


परमेश्वरला बचन
छार कबुल



New Testament in Tamang, Eastern

परमेश्वरला बचन छार कबुल
New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

© 2011, Wycliffe Bible Translators, Inc. and Eastern Tamang Language Team.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 4 Mar 2019 from source files dated 4 Mar 2019
75fec6d5-7473-5018-a7c0-dd9740a83748

Contents

मत्ती	1
मर्कुस	58
लूका	92
यूहन्ना	149
मुल चेलागदेला गे	192
रोमी	244
१ कोरिन्थी	269
२ कोरिन्थी	292
गलाती	307
एफिसी	315
फिलिप्पी	323
कलस्सी	329
१ थेसलोनिकी	335
२ थेसलोनिकी	340
१ तिमोथी	343
२ तिमोथी	350
तीतस	355
फिलेमोन	358
हिब्रू	360
याकूब	378
१ पत्रुस	385
२ पत्रुस	393
१ यूहन्ना	397
२ यूहन्ना	404
३ यूहन्ना	406
यहूदा	408
उन्बा ताम	411

मत्तीसे भ्रिबा थार्बा पिन्बा समाचार चु किताबला बारेरी पाङ्तोःमा

भ्रिबा म्हि: येशूला मुल चेला मत्तीसे भ्रिबा मुबा। थेदा लेवीएनोन भिमुबा (मर्कूस २:१४)।

भ्रिबा ग्ला: एन्टीओखिया शहररी भ्रिबा मुबा।

भ्रिबा साल: ओस्पन ईश्वी संवत् ७० (विक्रम संवत् १२७) सालरी भ्रिबा मुबा। बाइबलला कोड कोड विद्वानगदेसे ईश्वी संवत् ८० (विक्रम संवत् १३५) साल भन्दा लिच्छा भ्रिबा हिन्ना भिसी पाङ्मुला। चु मिति मर्कूसला किताब भ्रिबा भन्दा लिच्छाला हिन्ना। मत्तीला किताब भ्रिबा धुडरी यरूशलेमरी मुबा परमेश्वरला मन्दिरदा रोमीगदेसे नाश लबा मुबा।

खाल्दा भ्रिबा: येशू थार्बा पिन्बा ग्ले हिन्ना भिसी उन्बाला लागिरी यहूदीगदेदा भ्रिबा मुबा।

चु थार्बा पिन्बा समाचाररी डाच्छान पुइखला भिसी कबुल लबा थार्बा पिन्बा म्हि चा येशू हिन्ना भिसी पाङ्बा मुला। ल्हानान डाच्छा परमेश्वरसे हाडला म्हि यहूदीगदेदा थार्बा पिन्बा म्हि पुइखला भिसी कबुल लबा मुबा। थे कबुल चा परमेश्वरसे येशूदा जम्बुलिडरी पुइखसी पूरा लजी। चु थार्बा पिन्बा समाचार यहूदी यहूलला म्हिगदेला लागिरी जे आहिन, जम्बुलिड नाडलान म्हिगदेला लागिरीएनोन हिन्ना।

चु थार्बा पिन्बा समाचाररी मत्तीसे जम्मान तामगदे मेलोसेन भ्रिबा मुला। चु किताबरी येशू ख्रीष्ट न्हबाहेन्से सिबाग्याम सोबाधोनाला तामगदेला बारेरी पाङ्बा मुला। चुरी येशू न्हबा ताम ओच्छे येशूला बपत्तिस्मादेन शैतानसे येशूला सेम च्याबाला बारेरी पाङ्बा मुला। थेहड लसीन गालील अञ्चलरी येशूसे परमेश्वरला यहुल्साला समाचार थेःना लबादेन लोपबा ओच्छे आखम्बा म्हिगदेदा खम्ना लबा तामगदेला बारेरीनोन पाङ्बा मुला। थेहड लसीन येशू जम्मान म्हिला पापला सय फाबारी क्रुसरी सिबादेन सिबाग्याम सोबा तामला बारेरीनोन पाङ्बा मुला।

चु थार्बा पिन्बा समाचारग्याम येशूदा परमेश्वरसे मोशादा पिन्बा ठिमदेन परमेश्वरला यहुल्साला बारेरी म्हिसे आघोबा तामगदे घोना लबा अधिकार याङ्बा जम्मान भन्दा घेन गुरु हिन्ना भिसी उन्बा मुला।

मुल तामगदे

येशूला आखे म्हेमेगदेला मिनदेन येशू ख्रीष्ट न्हबा १:१-२:२३

बपत्तिस्मा पिन्बा यहून्नासे लबा गे ३:१-१२

येशूसे बपत्तिस्मा किन्बादेन शैतानसे येशूदा फसब लबारी म्हाइबा ३:१३-४:११

येशूसे गालील अञ्चलरी लबा गे ४:१२-१८:३५

येशू गालील अञ्चलहेन्से यरूशलेम शहरधोना फेपबा १९:१-२०:३४

यरूशलेम शहररी येशूला गे थुम्बा धुड २१:१-२७:६६

येशूदा सिबाग्याम सोना लबादेन हाडला चेलागदेदेन छ्याम हुप तबा २८:१-२०

मत्तीसे भ्रिबा थार्बा पिन्बा समाचार

येशूला आखे म्हेमे

लूका ३:२३-३८

१ चुरी भ्रिबा म्हिला मिनगदे येशू ख्रीष्टला वंशला हिन्ना। येशू ख्रीष्ट दाऊदला वंशरी न्हबा हिन्ना, ओच्छे दाऊद अब्राहामला वंशरी न्हबा हिन्ना।

२ अब्राहामला झा इसहाक मुबा,

इसहाकला झा याकूब,

याकूबला झा यहूदादेन थेला ज्योज्यो आलेगदे मुबा।

- 3 यहूदाला झा फारेसदेन जाहेर मुबा ।
 थेनीगदेला आमा तामार मुबा,
 फारेसला झा हेस्रोन,
 हेस्रोनला झा आराम,
 4 आरामला झा अम्मीनादाब,
 अम्मीनादाबला झा नहशोन,
 नहशोनला झा सल्मोन,
 5 सल्मोनला झा बोअज मुबा, थेला आमा राहाब मुबा,
 बोअजला झा ओबेद मुबा, थेला आमा रूथ मुबा,
 ओबेदला झा यिशै,
 6 यिशैला झा दाऊद ग्ले मुबा,
 दाऊद ग्लेला सन्तान सोलोमन मुबा, सोलोमनला आमा चा डाच्छा उरियाहला म्रिड मुबा ।
 7 सोलोमनला झा रहबाम,
 रहबामला झा अबिया,
 अबियाला झा आश,
 8 आशला झा यहोशापात,
 यहोशापातला झा यहोराम,
 यहोरामला झा उज्जियाह,
 9 उज्जियाहला झा योताम,
 योतामला झा आहाज,
 आहाजला झा हिजकिया,
 10 हिजकियाला झा मनश्शे,
 मनश्शेला झा आमोन,
 आमोनला झा योशियाह,
 11 योशियाहला झा यकोनियासदेन थेला आलेगदेला आबा मुबा । थेनीगदे यहूदीगदेदा चुड्सी बेबिलोन
 भिबा ग्लारी भोर्बा भन्दा डाच्छान न्हबा मुबा ।*
- 12 बेबिलोनरी भोर्माहेन्से
 यकोनियासला झा शालतिएल न्हजी,
 ओच्छे शालतिएलला झा यरुबाबेल,
 13 यरुबाबेलला झा अबिउद,
 अबिउदला झा एल्याकीम,
 एल्याकीमला झा आजोर,
 14 आजोरला झा सादोक,
 सादोकला झा आखिम,
 आखिमला झा एलिउद,
 15 एलिउदला झा एलाजार,
 एलाजारला झा मत्तान,
 मत्तानला झा याकूब,
 16 याकूबला झा योसेफ मुबा, योसेफसे मरियमदा ब्याह लजी ।
 थेनोन मरियमग्याम येशू न्हजी, थेदा जम्मासेन थार्बा पिन्बा स्त्रीष्ट भिसी भिला ।
 17 चुहड् लसी अब्राहामहेन्से दाऊदधोना च्युक बलि पुस्ता मुबा, थेहड् लसीन दाऊदहेन्से यहूदीगदे
 बेबिलोनरी भोर्बा धुड्धोना च्युक बलि पुस्ता मुबा, ओच्छे बेबिलोनरी भोर्बा धुड्हेन्से थार्बा पिन्बा
 स्त्रीष्ट न्हबा धुड्धोना च्युक बलि पुस्ता मुबा ।

* 1:11 २ राजा २४:१५; २ इति ३६:१०; यर्मि २७:२०

येशू ख्रीष्ट न्हबा
लूका २:१-७

18 येशू ख्रीष्ट चुहड् लसी न्हजी, योसेफसे येशूला आमादा ब्याह लबारी ह्नीबा मुबा। तर थेनीगदेला ब्याह तबा भन्दा डाच्छान मरियम परमेश्वरला आत्माग्याम न्हसेला तबा मुबा।* 19 तर थेला हेम्बो योसेफ परमेश्वरला डाच्छा ज्यबा म्हि तबासे लमा थेदा म्हिला ओन्छाडरी पे:ना थालगै भिसी खालैसे था आयाड्ना लसी खलाबा सेम लजी।

20 चु ताम म्हन्बान लमा योसेफ छुप निजी, जमाहेन्से म्हाडरी थे मुबा ग्लारी परमप्रभुला दूत खसी थेदा “दाऊद ग्लेला सन्तान योसेफ, ए मरियमदेन ब्याह लबारी थालोड्गो। तिग्दा भिसम थे परमेश्वरला आत्माग्याम न्हसेला तबा हिन्ना। 21 थेसे झा गिक न्हला, एसे थेला मिन येशू थान्गो। तिग्दा भिसम थेसे हाडला म्हिगदेदा थेनीगदेला पापग्याम थाना लला” भिसी भिजी।*

22 परमप्रभुसे अगमवक्ताग्याम सुड्बा बचन पूरा तगै भिसीन चु जम्मान तबा हिन्ना। 23 “च्यागो, ब्याह आलबा मिडकोला गिक न्हसेला तला ओच्छे थेसे झा न्हला, थेला मिन इम्मानुएल भिसी थान्ना,” इम्मानुएल भिबा चा “परमेश्वर य्हाडदेन छ्याम” भिबा हिन्ना।*

24 योसेफ छोर्माहेन्से परमप्रभुला दूतसे पाड्बा हड् थेसे मरियमदा ब्याह लजी। 25 तर मरियमसे कोला आन्हतेधोना योसेफ मरियमदेन छ्याम आमहेर्नी। मरियमसे कोला न्हमाहेन्से योसेफसे कोलाला मिन येशू थान्जी।*

2

ज्योतिषीगदे येशूदा झ्याल्बारी खबा

1 हेरोद ग्लेला धुडरी यहूदिया अञ्चलला बेथलेहेम भिबा नाम्सारी येशू न्हजी। जमाहेन्से स्यारला ज्योतिषीगदे यरूशलेमरी खजी, ओच्छे थेनीगदेसे, 2 “यहूदीगदेला ग्ले दोसी न्हबा कोला खानड मुला? तिग्दा भिसम डन्से स्याररी थे न्हजी भिसी उन्बा सार म्राड्जी। थेतबासेलमा डनी थेदा झ्याल्बारी खबा हिन्ना” भिसी भिजी।

3 चु ताम थे:माहेन्से हेरोद ग्लेदेन यरूशलेमरी मुबा जम्मान म्हिगदेदा ल्हानान सुर्दा तजी। 4 जमाहेन्से हेरोद ग्लेसे परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे जम्मादान ग्ला गिकरी ड्योड्सी “थार्बा पिन्बा ख्रीष्ट खानड न्हला भिसी पाड्बा मुला?” भिसी ड्योड्बा छार्बा लजी। 5 थेनीगदेसे हेरोद ग्लेदा “यहूदियाला बेथलेहेम भिबा नाम्सारी न्हला भिसी पाड्बा मुला, तिग्दा भिसम अगमवक्तासे चुहड् लसी भिबा मुला,

6 यहूदिया अञ्चलरी मुबा बेथलेहेम

नाम्सा जजा मुसैनोन घेन तला,

तिग्दा भिसम बेथलेहेमग्याम शासन लबा म्हि गिक थोन्ना,

थेसे डाला म्हि इस्राएलीगदेदा वास्ता लला” भिसी भिजी।”*

7 जमाहेन्से हेरोदसे थे ज्योतिषीगदेदा जे सुटुक ड्योड्सी सार खाइमा म्राड्बा हिन्ना, भिसी ड्योड्बा छार्बा लजी। ओच्छे थेनीगदेग्याम सार म्राड्बा धुड था याड्जी। 8 जमाहेन्से थेसे थेनीगदेदा “निउ, ओच्छे थे कोलादा ज्यना लसी म्हाड्गो। थेदा स्यापमैछ्याम डादा पाड्गो, डाएनोन थेदा झ्याल्बारी निला” भिसी बेथलेहेमरी पुड्जी।

9 ग्लेला ताम थे:सी थेनीगदे थेग्याम निजी। थेनीगदेसे डाच्छा स्याररी म्राड्बा सार दो:सी थेनीगदेला डाच्छा डाच्छा निजी, ओच्छे लैनु येशू मुबा ग्लारी धोमाहेन्से थे सार अडेब तजी। 10 थे सार म्राड्माहेन्से थेनीगदे ल्हानान ताड्जी। 11 दिम न्हडरी वाड्मा थेनीगदेसे लैनु येशूदा थेला आमा मरियमदेन छ्याम म्राड्जी, जमाहेन्से थेनीगदेसे येशूदा फ्या लसी हाड हाडला बाकस ठोड्सी म्हर,

* 1:18 लूका १:२७ † 1:21 “येशू” भिबाला अर्थ चा परमप्रभुसे थाना लला भिबा हिन्ना। * 1:21 लूका १:३१ * 1:23 यशै ७:१४ * 1:25 लूका २:२१ * 2:6 मीका ५:२

जयबा बासना खबा धूपदेन मूर् भिबा महंगो अत्तर भसी फुल्जी। 12 ओच्छे म्हाडरी परमेश्वरसे थेनीगदेदा हेरोद मुबा ग्लारी थानिउ भिबासे लमा थेनीगदे अर्गुन ग्यामसे हाडला यहुल्सारी निजी।

लैनु येशूदा मिश्र यहुल्सारी भोर्बा

13 ज्योतिषीगदे निमाहेन्से, परमप्रभुला दूत गिक म्हाडरी योसेफ मुबा ग्लारी खजी, ओच्छे थेसे योसेफदा “योसेफ, ए रे:सी लैनु कोलादेन थेला आमादा भोर्सी मिश्र यहुल्सारी निउ। ओच्छे डाइ एदा दो:सी खउ भिसी आपाड्तेधोना एनीगदे थेरीन चिउ। तिग्दा भिसम हेरोदसे लैनु कोलादा साइबारी म्हाइबा मुला” भिसी भिजी। 14 जमाकुनु म्हुनडनोन रे:सी थेसे लैनु कोलादेन थेला आमादा भोर्सी मिश्र यहुल्सारी निजी। 15 ओच्छे हेरोद आसितेधोना थेनीगदे थेरीन चिजी। चुहड् लसी परमप्रभुसे अगमवक्ताग्याम “डाइ डाला झादा मिश्र यहुल्साग्याम ड्योइबा मुला” भिसी सुड्बा बचन पूरा तबारी हिन्ना।*

हेरोद ग्लेसे जजा कोलागदेदा साइपुड्बा

16 जमाहेन्से हाडदा ज्योतिषीगदेसे झुक्याब लजीम भिबा था याड्सी हेरोद ल्हानान बोमो खजी। ओच्छे थेसे ज्योतिषीगदेग्याम था याड्बा धुइ अन्छार बेथलेहेम नाम्सादेन क्यारक्युर मुबा न्ही दिडधोनाला जम्मान कोलागदेदा साइपुड्जी। 17 जमाहेन्से यर्मिया अगमवक्तासे पाड्बा ताम पूरा तजी, 18 “रामा भिबा ग्लारी क्राबा क्रिड्बा लबा थे:जी, राहेल हाडला कोलागदेला लागिरी क्राबान मुबा। थेदा जम्मासेन सम्झब लसैनोन क्राबा आख्लानी। तिग्दा भिसम थेला कोलागदे साइसी जिन्बा मुबा।”*

योसेफदेन मरियम मिश्र यहुल्साग्याम दो:बा

19 ओच्छे हेरोद सिमाहेन्से, मिश्र यहुल्सारी परमप्रभुला दूत गिक म्हाडरी योसेफ मुबा ग्लारी खजी, ओच्छे थेदा स्वर्गदूतसे, 20 “योसेफ, ए रे:सी लैनु कोलादेन थेला आमादा इस्राएल यहुल्सारी भोर्सी निउ। तिग्दा भिसम लैनु कोलादा साइबारी म्हाइबा म्हिगदे जम्मान सिसी जिन्बा मुला” भिसी भिजी।

21 जमाहेन्से थे रे:सी लैनु कोलादेन थेला आमादा इस्राएल यहुल्सारी भोर्सी निजी। 22-23 तर यहूदियारी हेरोदला झा अखिलाउस ग्ले दोबा मुला भिबा थे:सी थेनीगदे थेरी निबारी लोड्जी। थेतबासेलमा दो:सी परमेश्वरसे थेदा म्हाडरी पाड्बा अन्छार गालील अञ्चलला नासरत भिबा नाम्सारी निसी चिजी। चुहड् लसी “थेदा नासरी भिला” भिसी अगमवक्तागदेग्याम पाड्बा ताम पूरा तजी।*

3

बपतिस्मा पिन्बा यूहन्नासे थे:ना लबा परमेश्वरला यहुल्साला समाचार

मर्कूस १:१-८; लूका ३:१-१८; यूहन्ना १:१९-२८

1 ल्हानान दिड लिच्छा बपतिस्मा पिन्बा यूहन्ना यहूदिया अञ्चलला तोडतोडबा ग्लारी खसी चुहड् भिसी पाड्बारी छ्याइजी, 2 “हाड हाडला पाप ख्लासी परमेश्वरपट्टि दो:गो, तिग्दा भिसम स्वर्गला यहुल्सा खसी जिन्बा मुला।”* 3 यशैया अगमवक्तासे चुनोन यूहन्नाला बारेरी चुहड् भिसी पाड्बा मुला,

“तोडतोडबा ग्लारीक्यार परमप्रभुला ग्याम तयार लउ, ओच्छे ‘परमप्रभु भ्रबाला लागिरी थेला ग्याम सोजो सहोउ,’ भिसी म्हि गिक क्रिड्बा मुला।”*

4 यूहन्नासे ऊँटला क्राला क्वान क्वान्मुबा, ओच्छे ढिला पेटी खीमुबा। थेसे तिरीदेन हि सिडसोरला खुदु चमुबा।* 5 यरूशलेम शहरदेन यहूदिया अञ्चल ओच्छे यर्दन स्योडला क्यारक्युरला जम्मान

* 2:15 होशे ११:१ * 2:18 यर्मि ३१:१५ * 2:22-23 लूका २:३९; यहू १:४५ * 3:2 मत्ती ४:१७; मर्कू १:१५ * 3:3 यशैया ४०:३ * 3:4 २ राजा १:८

ग्लाला म्हिगदे थे मुबा ग्लारी खजी। 6 ओच्छे हाड हाडला पाप ख्लासी थेग्याम यर्दन स्योडरी बपत्तिस्मा किन्जी।

7 तर फरिसीगदेदेन सदुकीगदे न्हडला ल्हानान म्हिगदे बपत्तिस्मा किन्बारी खबान लबा म्राड्सी थेसे थेनीगदेदा “पुख्रीला कोलागदे, एनीगदेदा परमेश्वरला बोमोग्याम स्योरम्याड्ला भिसी खाल्से भिजी?*

8 थेतबासेलमा हाड हाडला पाप ख्लासी परमेश्वरपट्टि दोःबा अन्छारला गे लउ। 9 एनीगदेसे डाला ताम ड्यान्गो, एनीगदेसे ‘डनी अब्राहामला सन्तान हिन्ना’ भिदेमा परमेश्वरला सजायग्याम स्योरम्याड्ला भिसी थाम्हन्गो। तिग्दा भिसम परमेश्वरसे अब्राहामला लागिरी चु युडबागदेग्यामसेनोन कोलागदे सहोबारी खम्ला।* 10 च्यागो, दोड थाबारी तरी थीसी जिन्बा मुला। थेतबासेलमा ज्यबा रो आरोबा जम्मान दोड टाहेन्सेन थासी मेरी भ्याड्ला।*

11 “डाइ चा एनीगदेसे हाड हाडला पाप ख्लासी परमेश्वरपट्टि दोःजी भिसी क्युइसे बपत्तिस्मा पिन्ना। तर डा भन्दा लिच्छा फेपखबासे एनीगदेदा परमेश्वरला आत्मादेन मेसे बपत्तिस्मा पिन्ना। थे डा भन्दा शक्तिशाली मुला। ओच्छे डा थेला लखम पुडबाधोनाला सुत्तै आरे। 12 ग्वा यहापबा नाख्ले थेलान छ्यारी मुला, दाहेन्से ग्वा ज्यना लसी यहाप्सी ग्वा जति भकारीरी थान्ना ओच्छे पोलोवा जति खाइमै आसिबा मेरी खाड्ला।”

येशूसे बपत्तिस्मा किन्बा

मर्कुस १:९-११; लूका ३:२१-२२

13 जमाहेन्से येशूएनोन यूहन्ना ग्याम बपत्तिस्मा किन्बारी गालील अञ्चलग्याम यर्दन स्योडरी फेपखजी। 14 तर यूहन्नासे थेदा “डाइ चा हाडग्याम बपत्तिस्मा किन्तोःबा मुला, तिग्दा हाड चा डा मुबा ग्लारी फेपखबा?” भिसी रोकब लबारी म्हाइजी।

15 तर येशूसे थेदा “दान्देदा चुहड्णोन तगै। तिग्दा भिसम परमेश्वरसे म्हन्बा ताम पूरा लबारी य्हाडसे चुहड्णोन लतोःला” भिसी सुड्जी। जमाहेन्से यूहन्नासे येशूदा बपत्तिस्मा पिन्जी। 16 ओच्छे येशूसे बपत्तिस्मा किन्सी क्युइग्याम पाखारी थोन्मैछ्याम थेसे स्वर्ग ठोड्सी परमेश्वरला आत्मा दुकुर हड् लसी फापसी हाडथोरी फेपखबान लबा म्राड्जी। 17 जमाहेन्से स्वर्गग्याम “चु डाइ सेमहेन्सेन माया लबा डाला झा हिन्ना, चुदा म्राड्सी डा ल्हानान ताड्बा मुला” भिबा काइ खजी।*

4

येशूदा फसब लबारी म्हाइबा

मर्कुस १:१२-१३; लूका ४:१-१३

1 जमाहेन्से परमेश्वरला आत्मासे शैतानग्याम सेम च्याबारी येशूदा तोडतोडबा ग्लारी भोर्जी।* 2 थेरी बोगल न्ही धिनधोना येशूसे धिन म्हुननोन तिगै आसोल्नी। थेतबासेलमा थेदा ल्हानान फोखेन्जी। 3 जमाहेन्से शैतान येशू मुबा ग्लारी खसी “हाड परमेश्वरला झा हिन्सम चु युडबागदेदा गेड दोगो भिसी सुड्गो” भिसी भिजी।

4 तर येशूसे “गेडसे जे म्हि आसो, तर परमेश्वरला सुड्ग्याम थोन्बा जम्मान बचनसे सोबारी खम्ला भिसी परमेश्वरला बचनरी भिबा मुला” भिसी सुड्जी।*

5 जमाहेन्से शैतानसे येशूदा परमेश्वरला शहर यरूशलेमरी भोर्सी परमेश्वरला मन्दिरला थोबोरी रापपुड्जी। 6 ओच्छे थेसे येशूदा “हाड परमेश्वरला झा हिन्सम चुग्याम मार छ्योड्गो। तिग्दा भिसम बचनरी चुहड् भिसी भिबा मुला,

‘परमेश्वरसे हाडदा चुड्बाला लागिरी हाडला स्वर्गदूतगदेदा कुल्ला।

ओच्छे एला काड युडबारी थाठोक्गै भिसी एदा

थेनीगदेसे या यारीन ताला’ भिसी भिजी।”*

* 3:7 मत्ती १२:३४; २३:३३ * 3:9 यूह ८:३३ * 3:10 मत्ती ७:१९ * 3:17 भजन २:७; यशै ४२:१; मत्ती १२:१८; १७:५

* 4:1 हिब्रू २:१८; ४:१५ * 4:4 व्यव ८:३ * 4:6 भजन ९१:११-१२

7 येशूसे थेदा “बचनरी चुहड् लसी भिबा मुला, ‘एसे हाडला परमप्रभु परमेश्वरला सेम च्याबा गे तिगै थालउ’” भिसी सुड्जी।*

8 दोःसी शैतानसे येशूदा नोबा गड गिकरी भोर्सी जम्बुलिडला जम्मान यहुल्सागदेदेन जम्मान ज्यबा स्हेगदे उन्जी। 9 ओच्छे “हाडसे डादा फ्या लसी तेन्जी भिसम चु जम्मान यहुल्सा डाइ हाडदा पिन्ना” भिसी भिजी।

10 जमाहेन्से येशूसे थेदा “शैतान, ए चुग्याम तुरुन्तन निउ! तिग्दा भिसम बचनरी ‘एसे हाडला परमप्रभु परमेश्वरदा फ्या लउ, ओच्छे थेदा जे तेन्गो’ भिसी भिबा मुला” भिसी सुड्जी।*

11 जमाहेन्से शैतानसे येशूदा ख्लासी निजी ओच्छे स्वर्गदूतगदे खसी येशूदा क्योड्जी।

येशूसे परमेश्वरला यहुल्साला समाचार थेःना लबा

मर्कूस १:१४-१५; लूका ४:१४-१५

12 यूहन्ना झ्याल्खानरी परब तजी भिबा थेःसी येशू दोःसी गालील अञ्चलरी फेप्जी।* 13 ओच्छे नासरत भिबा ग्लारी आफेपना कफर्नहुम शहररी धन्छ्याबारी फेप्जी। चु शहर गालील समुन्द्रला कुनीरी मुबा, चु शहर चा जबूलूनदेन नप्ताली भिबा यहुलला म्हिगदे चिबा जिल्लारी परब तमुबा।*

14 चुहड् लसी यशैया अगमवक्तासे पाड्बा ताम पूरा तजी,

15 “जबूलूनदेन नप्तालीला जिल्लारी यर्दन क्याम्सड,

समुन्द्रला कुनीरी, यर्दन क्याम्सड, गालीलरी चिबा अर्गु यहुलला म्हिगदे

16 ओच्छे धोपधोपरी चिबा म्हिगदेसे घेन य्हालदा म्हाड्बा मुला।*

थेहड् लसीन कालला धोपधोपरी मुबा म्हिगदेला गुडरी थे य्हाल फेःबा मुला।”

17 थे धुइहेन्से येशूसे “एनीगदेसे हाड हाडला पाप ख्लासी परमेश्वरपट्टि दोःगो, तिग्दा भिसम स्वर्गला यहुल्सा खसी जिन्बा मुला” भिसी म्हिगदेदा सुड्बारी छ्याड्जी।

येशूसे डाच्छा सहोबा चेलागदे

मर्कूस १:१६-२०; लूका ५:१-११

18 येशू गालील समुन्द्रला कुनीन कुनी फेपबान लमा पत्रुस भिबा सिमोनदेन थेला आले अन्द्रियासदा तार्डा साड्बारी समुन्द्ररी घ्याड क्लाड्बान लबा म्हाड्जी। तिग्दा भिसम थेनीगदे तार्डा साड्बा म्हिगदे मुबा। 19 येशूसे थेनीगदेदा “डादेन छ्याम भ्रउ, दाहेन्से डाइ एनीगदेदा तार्डा चुड्बा म्हि आहिन, तर म्हिगदेदा परमेश्वर मुबा ग्लारी भबा म्हि सहोला” भिसी सुड्जी। 20 येशूसे थेहड् सुड्मैछ्याम, हाडला घ्याड ख्लासी थेनीगदे येशूदेन छ्याम भ्रजी।

21 थेग्याम फेपबान लमा येशूसे जब्दियाला झागदे याकूबदेन थेला आले यूहन्नादा म्हाड्जी। थेनीगदे हाडला आबादेन छ्याम दोंगारी घ्याड राबान मुबा। येशूसे थेनीगदेदा एनोन ड्योड्जी। 22 येशूसे चुहड् सुड्मैछ्याम थेनीगदे दोंगादेन आबादा ख्लासी येशूदेन छ्याम भ्रजी।

येशूसे आखम्बा म्हिगदेदा खम्ना लबा

लूका ६:१७-१९

23 येशू गालील अञ्चलला जम्मान ग्लारी फेप्सी यहूदीगदे हुप तबा दिमरी म्हिगदेदा लोपबान परमेश्वरला यहुल्साला समाचार थेःना लजी। ओच्छे ल्हानान थरीला रोगसे स्यापबादेन आखम्बा म्हिगदेदा खम्ना लजी।* 24 जमाहेन्से सिरिया यहुल्सा नाडनोन येशूला बारेरी थेःजी। ओच्छे म्हिगदेसे ल्हानान थरीला रोगसे स्याप्सी दुख याड्बागदे, म्हडसे स्यापबागदे, सह म्हडसे स्यापबागदेदेन काड या चलब आतबा कुज्या म्हिगदेदा येशू मुबा ग्लारी भजी। जमाहेन्से येशूसे थेनीगदेदा खम्ना लजी। 25 ओच्छे गालील, डेकापोलिस, यरूशलेम, यहूदियादेन यर्दन क्याम्सडहेन्सेला ल्हानान म्हिगदे येशूदेन छ्याम भ्रजी।

* 4:7 वयव ६:१६ * 4:10 वयव ६:१३ * 4:12 मती १४:३; मर्कू ६:१७; लूका ३:१९-२० * 4:13 यूह २:१२ * 4:16 यशै ९:१-२ * 4:23 मती ९:३५; मर्कू १:३९

येशूसे म्हिगदेदा लोपबा
लूका ६:२०-२३

- 1 ल्हानान म्हिगदे खबा म्राड्सी येशू गडरी फेप्सी धन्छ्याजी। जमाहेन्से चेलागदेएनोन येशूला क्युर्सीन चिजी। 2 ओच्छे येशूसे थेनीगदेदा चुहड् भिसी लोपबारी छ्याइजी,
3 “परमेश्वरथोरी जे आश लबागदेसे† परमेश्वरग्याम मोलम याड्ला,
तिग्दा भिसम स्वर्गला यहुल्सा थेनीगदेलान हिन्ना।
4 सेम क्राबागदेसे परमेश्वरग्याम मोलम याड्ला
तिग्दा भिसम थेनीगदेदा परमेश्वरसे ताड्ना लला।*
5 सोजो म्हिगदेसे परमेश्वरग्याम मोलम याड्ला,
तिग्दा भिसम थेनीगदेसे जम्बुलिडला अधिकार याड्ला।*
6 परमेश्वरसे म्हन्बा अन्छार भ्रबारी म्हाइबागदेसे परमेश्वरग्याम मोलम याड्ला,
तिग्दा भिसम परमेश्वरसे थेनीगदेदा भड् पिन्ना।*
7 स्य्हान्दोदा दया लबागदेसे परमेश्वरग्याम मोलम याड्ला,
तिग्दा भिसम थेनीगदेसे दया याड्ला।
8 ज्यबा सेम थोबागदेसे परमेश्वरग्याम मोलम याड्ला,
तिग्दा भिसम थेनीगदेसे परमेश्वरदा म्राड्ला।*
9 स्य्हान्दोदा ठिक्ना लबागदेसे परमेश्वरग्याम मोलम याड्ला,
तिग्दा भिसम थेनीगदे परमेश्वरला झा दोला।
10 म्हिगदेसे दुख पिन्सैनोन परमेश्वरसे म्हन्बा अन्छार भ्रबागदेसे परमेश्वरग्याम मोलम याड्ला,
तिग्दा भिसम स्वर्गला यहुल्सा थेनीगदेलान हिन्ना।*
11 “डादा विश्वास लबासे लमा म्हिगदेसे एनीगदेदा खिसी लला, दुख पिन्ना, ओच्छे लुसीला ताम पाड्सी एनीगदेला बिरोधरी जम्मान नइबा ताम लमैनोन एनीगदेसे परमेश्वरग्याम मोलम याड्ला।*
12 तसैनोन एनीगदे ल्हानान ताड्गो, तिग्दा भिसम स्वर्गरी एनीगदेसे घेन इनाम याड्ला। एनीगदे भन्दा डाच्छाला अगमवक्तागदेदाएनोन थेनीगदेसे चुहड् लसीन दुख पिन्मुबा।*

चजा हड् तबा

मर्कूस ९:५०; लूका १४:३४-३५

- 13 “एनीगदे जम्बुलिडला चजा हड्बान हिन्ना, तर चजाला डम्बा सहे म्हाजी भिसम दोःसी तिग्से डम्ना लबा? गे आखेलबासे लमा म्हिसे थेदा भ्याड्ला, जमाहेन्से म्हिसे नाड्सी भ्रला।*
14 “गडरी मुबा शहरदा जम्मासेन म्राड्बा हड् लसी एनीगदेएनोन जम्बुलिडला नाड्सल तबासे लमा जम्मासेन म्राड्ला।* 15 म्हिगदेसे नाड्सल म्रासी फामसे घप्सी आथान, तर दिमरी मुबा जम्मान म्हिगदेसे म्राड्गै भिसी नोबा ग्लारी थान्ना।* 16 चुहड् लसी नाड्सलसे य्हाल तना लबा हड् लसी एनीगदेसे ज्यबा गे लसी उन्गो। एनीगदेला गे म्राड्सी थेनीगदेसे स्वर्गरी धन्छ्याबा एनीगदेला परमेश्वर आबाला जयजयकार लगै।*

परमेश्वरसे मोशादा पिन्बा ठिम अन्छार भ्रबा

- 17 “डा परमेश्वरसे मोशादा पिन्बा ठिमदेन अगमवक्तागदेसे पाड्बा ताम भ्याड्बारी आहिन, तर थे पूरा लबारी खबा हिन्ना। 18 एनीगदेसे डाला ताम ड्यानगो, तिग्दा भिसम मुदेन जम्बुलिड नाश आततेधोना परमेश्वरसे मोशादा पिन्बा ठिमरी मुबा हिगी गिकनोन आम्हा।* 19 थेतबासेलमा जुन म्हिसे ठिमरी मुबा तामगदे न्हडला जम्मान भन्दा जजा तामदा आड्यानना म्हिगदेदाएनोन थेहड्णोन

† 5:3 “परमेश्वरथोरी जे आश लबागदेसे” भिबा तामदा ग्रीक बाइबलरी आत्मारी प्राडबो भिसी भ्रिबा मुला। * 5:4 यशै ६१:२-३
* 5:5 भजन ३७:११ * 5:6 यशै ५५:१-२ * 5:8 भजन २४:३-४ * 5:10 १ पत्रु ३:१४ * 5:11 १ पत्रु ४:१४ * 5:12
२ इति ३६:१६; मुल ७:५२ * 5:13 मर्कू ९:५० * 5:14 यूह ८:१२; ९:५ * 5:15 मर्कू ४:२१; लूका ८:१६; ११:३३ * 5:16
१ पत्रु २:१२ * 5:18 लूका १६:१७

लपुड्जी भिसम थे म्हि स्वर्गला यहुल्सारी जम्मान भन्दा जजा तला। तर जुन म्हिसे ठिमरी मुबा तामगदे ड्यानूसी म्हिगदेदा थेहडनोन लपुड्ला थे म्हि स्वर्गला यहुल्सारी जम्मान भन्दा घेन म्हि तला। 20 एनीगदेसे डाला ताम ड्यानूगो, तिग्दा भिसम एनीगदेसे यहूदी धर्मगुरुगदेदेन फरिसीगदेसे भन्दा ज्यना लसी परमेश्वरसे म्हन्बा अन्छार आलनी भिसम तिगै लसीन एनीगदे स्वर्गला यहुल्सारी वाङ्आम्याङ्।

बोमो लबारी आत भिसी लोप्बा

21 “एसे म्हि थासाडगो, जुन म्हिसे म्हि साइला थेसे सजाय याङ्ला” भिसी परमेश्वरसे मोशादा पिन्बा ठिमरी भिबा ताम एनीगदेसे थे:बा मुला।* 22 तर एनीगदेसे डाला ताम ड्यानूगो, जुन म्हिसे खालैदा बोमो लला, थे म्हिसे सजाय याङ्ला, ओच्छे खालैसे स्य्हान्दोदा हेला लजी भिसम थेदा अदालतरी भोर्ला। तर जुन म्हिसे स्य्हान्दोदा ‘ए गे आखेल्बा मूर्ख’ भिसी भिला थेदा नर्गला लोड्बा खबा मेरी युला।

23 “थेतबासेलमा परमेश्वरदा भेटी फुल्बा धुइरी एदेन छ्याम खालै म्हि बोमो खबा मुला भिबा ताम एसे ढन्जी भिसम, 24 एला भेटी परमेश्वरला मन्दिरी भेटी फुल्बा ग्लाला डाच्छापट्टि ख्लासी डाच्छा थे म्हिदेन छ्याम ढिक्गो, ओच्छे एसे हाडला भेटी फुल्गो।

25 “एदा मुद्दा युबा म्हिदेन छ्याम अदालतरी निबान लबा धुइरी ग्यामरीन ढिक्गो। आहिन्सम थेसे एदा न्यायाधीशला यारी जिम्मा पिन्ना, ओच्छे न्यायाधीशसे सिपाहीगदेला यारी जिम्मा पिन्ना। जमाहेन्से ए झ्याल्खानरी परब तला। 26 एसे डाला सत्य ताम ड्यानूगो, एसे जम्मान टाडगा आफातेधोना थेग्याम थोन्बारी आम्याङ्।

सेमरी म्हन्बा नडबा ताम

27 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘ए स्य्हान्दोला म्रिडदेन छ्याम ब्रेल्सी थाभ्रउ।’* 28 तर एनीगदेसे डाला ताम ड्यानूगो, जुन म्हिसे खालै म्रिडम्हेमेदा नडबा सेमसे च्याला थेसे सेमरी थे म्रिडम्हेमेदेन छ्याम ब्रेल्सी जिन्बा तला। 29 चुदे एला दाहिने मीसे पाप लपुड्जी भिसम थे मी ते:सी भ्याङ्गो। तिग्दा भिसम एला पूरान लहुइ नर्गरी निबा भन्दा मी गिक ते:सी भ्याङ्बान एला लागिरी ज्यबा तला।* 30 थेहड् लसीन एदा दाहिने यासे पाप लपुड्जी भिसम थे या थासी भ्याङ्गो। तिग्दा भिसम एला पूरान लहुइ नर्गरी निबा भन्दा एला या गिक थासी भ्याङ्बान एला लागिरी ज्यबा तला।*

छोडपत्र

मर्कूस १०:११-१२; लूका १६:१८

31 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘जुन म्हिसे म्रिड खलाला थे म्हिसे छोडपत्रला कागज भिसी पिन्गै।’* 32 तर एनीगदेसे डाला ताम ड्यानूगो, जुन म्हिसे हाडला म्रिडदा स्य्हान्दोदेन छ्याम ब्रेल्सी आभ्रसैनोन खलाला, थेसे हाडला म्रिडदा स्य्हान्दोदेन छ्याम ब्रेल्सी भ्रबा म्रिडम्हेमे सहोला। ओच्छे थे म्रिडम्हेमेदेन छ्याम जुन म्हिसे ब्याह लला थेएनोन ब्रेल्सी भ्रबा तला।*

घान थाफागो

33 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘एसे लुसीला ताम लसी घान थाफागो, ओच्छे परमेश्वरदेन छ्याम लबा कबुल पूरा लउ।’* 34-35 तर एनीगदेसे डाला ताम ड्यानूगो, एनीगदेसे घान भिबा फानोन थाफागो, स्वर्गला मिनरी तसै, जम्बुलिडला मिनरी तसै एनीगदेसे घान थाफागो। तिग्दा भिसम स्वर्ग परमेश्वर धन्छ्याबा ग्ला हिन्ना ओच्छे जम्बुलिड परमेश्वरला स्य्हाप न्हे:बा ग्ला हिन्ना, ओच्छे यरूशलेम शहर चा जम्मालान ग्ले परमेश्वरला शहर

* 5:21 प्रस्था २०:१३; वयव ५:१७ * 5:27 प्रस्था २०:१४; वयव ५:१८ * 5:29 मत्ती १८:९; मर्कू ९:४७ * 5:30 मत्ती १८:८; मर्कू ९:४३ * 5:31 वयव २४:१-४; मत्ती १९:७; मर्कू १०:४ * 5:32 मत्ती १९:९; १ कोर ७:१०-११ * 5:33 लेवी १९:१२; गन्ती ३०:२; वयव २३:२१

हिन्ना।* 36 ओच्छे हाडला थोबोरी या थान्सी घान थाफागो। तिग्दा भिसम एसे क्रा गिकदाएनोन म्लाड अथवा तार तना लबारी आखम। 37 थेतबासेलमा एनीगदेसे पाड्बा ताम चा 'हिन्ना' भिसम 'हिन्ना,' 'आहिन' भिसम 'आहिन' जे तगै। थे भन्दा ल्हाना ताम चा शैतानग्याम खबा हिन्ना।

बदला थाकिन्गो
लूका ६:२७-३६

38 "परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, 'मीला बदला मी, ओच्छे स्वाला बदला स्वा किन्गो।'* 39 तर एनीगदेसे डाला ताम ड्यान्गो, एनीगदेदा बिरोध लबागदेदा एनीगदेसे बदला थाकिन्गो। बरु खालैसे एला दाहिने ग्रम्बारी तोजी भिसम अर्गुपट्टिला ग्रम्बाएनोन तासी पिन्गो। 40 खालै म्हिसे एदा बिरोध लसी मुद्दा लमा अदालतसे थेदा एला सहुर्दम पिन्गो भिजी भिसम थेदा एसे घएनोन पिन्गो। 41 चुदे खालै म्हिसे एदा कोस गिकधोना भ्रउ भिसी कर लजी भिसम थेदेन छ्याम कोस न्हीधोना निउ। 42 खालैसे एदा हीजी भिसम पिन्गो ओच्छे एदा छे हीबा म्हिदाएनोन छे पिन्गो।

शत्रुदाएनोन माया लतो:बा
लूका ६:२७-२८, ३२-३६

43 "परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, 'एसे हाडला खिमजेमदा माया लउ, ओच्छे शत्रुदा हेला लउ।'* 44 तर एनीगदेसे डाला ताम ड्यान्गो, एनीगदेसे हाडला शत्रुगदेदा माया लउ, ओच्छे एनीगदेदा दुख पिन्बागदेला लागिरी प्रार्थना लउ। 45 चुहड् लजी भिसम एनीगदे स्वर्गरी धन्छ्याबा परमेश्वर आबाला कोलागदे दोला। परमेश्वरसे ज्यबा सेम थोबादेन नइबा सेम थोबा न्हीलान लागिरी धिनी फेना लबा मुला। ओच्छे परमेश्वरला डाच्छापट्टि ज्यबा गे लबा म्हिदेन आज्यबा गे लबा म्हि न्हीलान लागिरी नाम ताइना लबा मुला। 46 चुदे एनीगदेदा माया लबादा जे एनीगदेसे माया लजी भिसम एनीगदेसे खाहड् लसी इनाम याड्ला? थेहड् मी तिरो दुइबा म्हिगदेसेनोन आल? लमुला। 47 एनीगदेसे हाडला ज्योज्यो आलेगदेदा जे मान लजी भिसम स्युहान्दोगदेसे भन्दा ज्यबा तिग लजी? थेहड् मी अर्गु यहुलला म्हिगदेसेनोन आल? लमुला। 48 थेतबासेलमा एनीगदेला स्वर्गरी धन्छ्याबा परमेश्वर आबा खाहड्बा मुला, एनीगदेएनोन थेहड्बान दोगो।"*

6

एसे सुटुकक पिन्गो

1 "एनीगदेसे लबा ज्यबा गेगदे म्हिगदेदा उन्बाला लागिरी भिसी थालउ। थेहड् लजी भिसम स्वर्गरी धन्छ्याबा एनीगदेला परमेश्वर आबासे एनीगदेदा तिगै इनाम आपिन। थेतबासेलमा होशियार तसी चिउ।"

2 "एनीगदेसे प्राडबोगदेदा पिन्बा धुइरी कप्टीगदेसे हड् लसी म्हिगदेदा थे:ना लसी थाभ्रउ। तिग्दा भिसम थेनीगदे म्हिगदेसे मान लगै भिसी यहूदीगदे हुप तबा दिमगदेदेन ग्यामरीक्यार निसी स्युहान्दोदा थे:ना लसी भ्रमुला। च्यागो, एनीगदेसे डाला ताम ड्यान्गो, थेनीगदेसे याड्तो:बा इनाम याड्सी जिन्बा मुला। 3 तर एसे प्राडबोगदेदा पिन्बा धुइरी एला दाहिने यासे तिग लबान मुला थे ताम एला देब्रे यासेनोन था थायाड्गै। 4 थेतबासेलमा एसे प्राडबोगदेदा पिन्बा सहे खालैदा था आतगै। थेहड् लजी भिसम खालैसे था आयाड्बा तामएनोन था याड्बा परमेश्वर आबासे एदा इनाम पिन्ना।

येशूसे प्रार्थनाला बारेरी लोपबा
लूका ११:२-४

5 "थेतबासेलमा एसे प्रार्थना लबा धुइरी कप्टीगदेसे हड् लसी थालउ। तिग्दा भिसम थेहड्बा म्हिगदेसे म्हिगदेदा उन्बाला लागिरी यहूदीगदे हुप तबा दिमगदेदेन ग्यामला कुनीरीक्यार राप्सी

* 5:34-35 याकू ५:१२; यशै ६६:१; मत्ती २३:२२; भजन ४८:२ * 5:38 प्रस्था २१:२४; लेवी २४:२०; वयव १९:२१ * 5:43 लेवी १९:१८ * 5:48 लेवी १९:२; वयव १८:१३ * 6:1 मत्ती २३:५

प्रार्थना लबारी सेम लमुला। च्यागो, एनीगदेसे डाला ताम ड्यान्गो, थेहड्बा म्हिगदेसे याड्तो:बा इनाम याड्सी जिन्बा मुला।* 6 तर ए प्रार्थना लबा धुइरी कोठा न्हडरी वाड्सी म्प्राप दुड्गो, ओच्छे खालैसे आम्राड्बा ग्लारी धन्छ्याबा परमेश्वर आबादेन छ्याम प्रार्थना लउ। जमाहेन्से खालैसे आम्राड्बा तामएनोन म्प्राड्बा परमेश्वर आबासे एदा इनाम पिन्ना। 7 ओच्छे प्रार्थना लमा अर्गु य्हुलला म्हिगदेसे हड् लसी ओहड्दोन थाक्रिड्गो। तिग्दा भिसम हेड्बा हेड्बा प्रार्थना लजी भिसम परमेश्वरसे थे:मुला भिसी थेनीगदेसे म्हन्मुला। 8 थेतबासेलमा एनीगदे थेनीगदे हड्बा थादोगो। तिग्दा भिसम एनीगदेसे हीबा भन्दा डाच्छान एनीगदेदा तिग तिग स्हे तो:बा मुला, थे एनीगदेला परमेश्वर आबादा था मुला।

9 “तर एनीगदेसे चा चुहड् लसी प्रार्थना लउ,
‘स्वर्गरी धन्छ्याबा डन्ना परमेश्वर आबा,
हाडदा† जम्मासेन मान लगै।

10 ओच्छे जम्मानथोरी हाडला शासन खगै,
ओच्छे हाडसे म्हन्बा ताम स्वर्गरी पूरा तबा
हड्दोन चु जम्बुलिडरीनोन पूरा तगै।

11 डन्से धिन धिननोन चतो:बा स्हे डन्दा तिनी पिन्गो।

12 डन्से डन्दा बिरोध लसी पाप लबागदेदा
माफ लबा हड् लसी हाडसेनोन
डन्ना पाप माफ लसी पिन्गो।

13 ओच्छे डन्दा पापरी फसब तबा ग्यामरी भ्रआपुड्गो,
तर शैतानग्याम फेसी थान्गो।
हाडला य्हुल्सादेन शक्ति ओच्छे हाडला मान
सदनना लागिरी हाडलान हिन्ना, आमेल।†

14 “एनीगदेदा बिरोध लसी पाप लबागदेदा एनीगदेसे माफ लजी भिसम स्वर्गरी धन्छ्याबा परमेश्वर आबासेनोन एनीगदेदा माफ लला।* 15 तर एनीगदेसे म्हिगदेदा माफ आलनी भिसम परमेश्वर आबासेनोन एनीगदेदा माफ आल।

फोडथान चिसी प्रार्थना लबा

16 “एनीगदेसे फोडथान चिसी प्रार्थना लबा धुइरी कप्टी म्हिगदेसे हड् लसी ली धोपधोप लसी थाभ्रउ। तिग्दा भिसम थेनीगदेसे फोडथान चिसी प्रार्थना लबा म्हिगदेसे म्प्राड्गै भिसी ली धोपधोप लसी भ्रमुला। थेतबासेलमा एनीगदेसे डाला ताम ड्यान्गो, थेनीगदेसे याड्तो:बा इनाम याड्सी जिन्बा मुला। 17 तर एनीगदेसे चा फोडथान चिसी प्रार्थना लबा धुइरी ली खुसी थोबोरी छ्युगु फोगो। 18 ओच्छे ए फोडथान चिसी प्रार्थना लबा म्हिगदेसे आहिन, तर खालैसे आम्राड्बा ग्लारी धन्छ्याबा परमेश्वर आबासे म्प्राड्गै। ओच्छे खालैसे आम्राड्बा तामएनोन म्प्राड्बा परमेश्वर आबासे एदा इनाम पिन्ना।

हाडला लागिरी स्वर्गरी धन सम्पत्ति सोसी थान्गो

लूका ११:३४-३६; १२:३३-३४; १६:१३

19 “हाडला लागिरी जम्बुलिडरी धन सम्पत्ति सोसी थाथान्गो, तिग्दा भिसम जम्बुलिडला धन सम्पत्तिगदे बुलुडदेन खियासे चला, ओच्छे दिम फोसी य्होगदेसे य्हो लसी भोर्ला।* 20 बरु हाडला लागिरी स्वर्गरी धन सम्पत्ति सोसी थान्गो। तिग्दा भिसम थेरी बुलुडसेएनोन आच खियासेएनोन आच, ओच्छे य्होसेएनोन वाड्सी य्हो आल। 21 तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।

* 6:5 लूका १८:१०-१४ † 6:9 चु पदरी ग्रीक बाइबलरी “हाडला छानदा मान लगै” भिसी भिबा मुला। तर मुल अर्थ चा परमेश्वरदा मान तगै भिबा हिन्ना। † 6:13 “हाडला य्हुल्सादेन शक्ति ओच्छे हाडला मान सदनना लागिरी हाडलान हिन्ना, आमेल।” चु पदला ताम चा ल्हानान हड्बा ग्रीक बाइबलरी भिबा आरे। * 6:14 मर्कू ११:२५-२६ * 6:19 याकू ५:२-३

22 “मी ल्हुइला लागिरी नाडसल हडबान हिन्ना। थेतबासेलमा एला मी ज्यबा मुसम एसे ज्यना लसी म्राड्ला, 23 तर एला मी न्होड्जी भिसम एसे तिगै आम्राड्। थेहड् लसीन एला सेमला नाडसल सिजी भिसम एला लागिरी जम्मान धोपधोप तला। 24 “खालैसेनोन मालिक न्हीला गे लबारी आखम। तिग्दा भिसम थेसे गिकदा हेला लला, ओच्छे स्य्हान्दोदा माया लला। अथवा थेसे गिकसे भिबा ताम ड्यानना, ओच्छे स्य्हान्दोदा वास्तान आल। थेहड् लसीन एनीगदेसेनोन परमेश्वरदेन धन सम्पत्ति न्हीलान गे लबारी आखम।

धन्दा सुर्दा थालउ
लूका १२:२२-३१

25 “थेतबासेलमा एनीगदेसे डाला ताम ड्यानगो, सोबाला लागिरी तिग चसे तिग थुड्से ओच्छे तिग क्वान्से भिसी धन्दा सुर्दा थालउ। तिग्दा भिसम चबा थुड्बादेन क्वान्बा भन्दा एनीगदेला प्राणदेन ल्हुइ घेन आहिन? 26 मुरी चरागदेदा च्यागो, थेनीगदेसे न्ह बलु ढ्वला, न्ह बाली दुइसी पोप लला, तर स्वर्गरी धन्छ्याबा एनीगदेला परमेश्वर आबासेन थेनीगदेदा ख्वामुला। चरागदे भन्दा मी एनीगदे घेन आहिन? 27 एनीगदे न्हडला खालैसे धन्दा सुर्दा लसी छिन्नडला लागिरी आयू काप्खमुला?

28 “तिग्दा एनीगदेसे क्वान्ना लागिरी धन्दा सुर्दा लबा? हिरी सार्बा म्हेन्दोदा च्यागो, थेसे गेएनोन आलमुला, क्वानएनोन आरामुला। तसैनोन थे खाहड् लसी ल्हेमुला! 29 एनीगदेसे डाला ताम ड्यानगो, सोलोमन ग्लेदेन ल्हानान धन सम्पत्ति मुसैनोन थेसे क्वान्बा क्वान थे म्हेन्दोगदे न्हडला गिक तेबै जेबा आरेमुबा।* 30 तिनी ल्हेबान निसी न्हडगर खर्माहिन्से मेरी फर्बा छेदा मी परमेश्वरसे चुहड् लसी जेना लमुला भिसम झन एनीगदेदा परमेश्वरसे जेना आल? खाइ एनीगदेला विश्वास? 31 थेतबासेलमा ‘तिग चसे? तिग थुड्से? ओच्छे तिग क्वान्से?’ भिसी धन्दा सुर्दा थालउ। 32 तिग्दा भिसम परमेश्वरदा डोआसेबा अर्गु य्हुलला म्हिगदेसे चा चु जम्मान सहे म्हाइमुला। तर स्वर्गरी धन्छ्याबा परमेश्वर आबासे एनीगदेदा चु जम्मान सहे तो:ला भिसी था मुला। 33 थेतबासेलमा डाच्छा एनीगदेसे परमेश्वरला य्हुल्सा म्हाइगो ओच्छे थेसे म्हेन्बा अन्छार गे लउ। जमाहेन्से परमेश्वरसे एनीगदेदा चु जम्मान सहे पिन्ना। 34 थेतबासेलमा न्हडगरला लागिरी धन्दा सुर्दा थालउ। तिग्दा भिसम न्हडगरदा तो:बा सहे न्हडगरनोन याड्ला। तिनीला लागिरी तिनीलान दुख मुला।

7

स्य्हान्दोदा दोष थालउ
लूका ६:३७-३८, ४१-४२

1 “स्य्हान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। 2 तिग्दा भिसम एनीगदेसे खाहड् लसी स्य्हान्दोदा दोष लला, थेहड् लसीन एनीगदेदाएनोन दोष लला। ओच्छे एनीगदेसे जुन दप्बा सहेसे दप्सी पिन्ना, परमेश्वरसेनोन एनीगदेदा थेनोन दप्बा सहेसे दप्सी पिन्ना।*

3 “स्य्हान्दोला गोरी से: भ्रबा म्राड्बा म्हिसे हाडला गोरी मुइ भ्रबा तिग्दा आम्राड्बा? 4 हाडला गोरी म्हुइ भ्रबा आम्राड्बासे खाहड् लसी आलेदा ‘खाइ एला गोला से: ते:सी पिन्ना भिसी भिखमुला?’† 5 कप्टी, डाच्छा हाडला गोला मुइ ते:गो, ओच्छे जे एसे आलेला गोरी भ्रबा से: ते:बारी खमुला।

6 “परमेश्वरदा फुलतो:बा सहे नगीदा थापिन्गो, तिग्दा भिसम थेसे एदा ख्राप्वारी खला। ओच्छे हाडला मोती ढ्वला डाच्छापट्टि थाभ्याड्गो। तिग्दा भिसम थेसे मोती नाड्सी भ्रला।

प्रार्थना लबारी आँट पिन्बा
लूका ११:९-१३

* 6:29 १ राजा १०:४-७; २ इति ९:३-६ * 7:2 मर्कू ४:२४ † 7:4 “हाडला गोरी भ्रबा मुइ भिबादेन आलेला गोरी मुबा से:” भिबा तामदा ग्रीक बाइबलरी “हाडला मीरी मुबा मूढादा वास्ता आलना हाडला आलेला मीरी मुबा धुलु ते:सी पिन्ना भिसी” भ्रिबा मुला।

7 “एनीगदेसे हीसम पिन्ना म्हाइसम स्याप्ला ओच्छे प्रापरी ढ्वक ढ्वक लसम एनीगदेला लागिरी प्राप ठोइसी पिन्ना। 8 तिग्दा भिसम जुन म्हिसे हीला थेदा पिन्ना, ओच्छे जुन म्हिसे म्हाइला थेसे स्याप्ला ओच्छे जुन म्हिसे प्रापरी ढ्वाक ढ्वाक लला थेदा प्राप ठोइसी पिन्ना।

9 “एनीगदे न्हडला खालैसे हाडला कोलासे गेड हीमा थेदा युडबा पिन्ना? 10 खाइमै तार्डा हीमा थेदा पुख्री पिन्ना? 11 एनीगदे पापी तसीनोन हाडला कोलागदेदा ज्यबा सहे पिन्बारी सेमुला भिसम स्वर्गरी मुबा एनीगदेला परमेश्वर आबासे गाते ल्हाना ज्यबा सहे पिन्ना। 12 एनीगदेदा स्यहानदो म्हिगदेसे जस्तो व्यवहार लगै भिसी म्हनबा मुला एनीगदेसेनोन थेनीगदेदा थेहडबान व्यवहार लउ। तिग्दा भिसम परमेश्वरसे मोशादा पिन्बा ठिमरी मुबादेन अगमवक्तासे लोपबा मुल ताम चुनोन हिन्ना।*

साडरो प्रापदेन घेन प्राप
लूका १३:२४

13 “एनीगदे साडरो प्रापग्याम वाड्गो। तिग्दा भिसम घेन प्रापग्याम वाड्बारी सजिलो मी मुला तसैनोन थे प्रापग्याम नाश तबा ग्लारी धोमुला। चु प्रापग्याम वाड्बा म्हिगदे चा ल्हानान मुला। 14 तर साडरो प्रापदेन जजाबा ग्यामसे भ्रमा जुकजुकधोनाला जुनी याड्मुला। तसैनोन चु ग्यामरी भ्रबा म्हिगदे ल्हाना आरे।

ज्यबा दोडदेन आज्यबा दोडला रो
लूका ६:४३-४४; १३:२५-२७

15 “फट्टा अगमवक्तागदे म्हाइसी होशियार तसी चिउ, थेनीगदे एनीगदे मुबा ग्लारी ग्यु हड लसी खमुला, तर थेनीगदेला सेम चा लोड्बा खबा फार्बा हडबान तमुला। 16 एनीगदेसे रो च्यासी दोड डोसेबा हड लसी थेनीगदे खाहड्बा म्हि हिन्ना भिबा ताम थेनीगदेला गेग्यामसेन डोसेला। पुजुला दोडग्याम अडगुर आथु ओच्छे देस्यला दोडग्यामनोन अज्जीर आथु। 17 थेहड लसीन जम्मान ज्यबा दोडरी ज्यबान रो रोला। ओच्छे आज्यबा दोडरी आज्यबान रो रोला। 18 ओच्छे ज्यबा दोडरी आज्यबा रो आरो ओच्छे आज्यबा दोडरीनोन ज्यबा रो आरो। 19 आज्यबा रो रोबा जम्मान दोड थासी मेरी फर्ला।* 20 चुहड लसीन थे अगमवक्तागदे खाहड्बा म्हि हिन्ना भिबा ताम एनीगदेसे थेनीगदेला गेग्यामसेन डोसेखमुला।*

21 “डादा ‘प्रभु, प्रभु’ जे भिबा म्हिगदे स्वर्गला यहुल्सारी वाड्बारी आम्याड्। तर स्वर्गरी धन्छ्याबा डाला आबासे कुल्बा ताम ड्यानबा म्हि जे वाड्म्याड्ला। 22 जमा धुइरी ल्हानान म्हिसे डादा ‘प्रभु, डन्से हाडला अधिकारग्याम परमेश्वरला ताम पाड्बा आहिन? ओच्छे हाडला अधिकारग्याम डन्से म्हाडगदे तापबा आहिन? थेहड लसीन डन्से हाडला अधिकारग्याम ल्हानान उदेकला गेगदे लबा आहिन?’ भिसी भिला। 23 जमा डाइ थेनीगदेदा ‘एनीगदेदा डाइ खाइमै डोसेबा आरे। पाप गे लबा म्हिगदे, एनीगदे डा मुबा ग्लाग्याम निउ’ भिसी पाड्ला।*

बुद्धि मुबा म्हिदेन मूर्ख म्हिसे सहोबा दिम
लूका ६:४७-४९

24 “थेतबासेलमा जुन म्हिसे डाइ पाड्बा ताम ड्यानसी थे अन्छार भ्रला, थे म्हि चा दिम सहोमा नुपना जग ख्वसी सहोबा बुद्धि मुबा म्हि हडबान हिन्ना। 25 बुद्धि मुबा म्हिसे दिम सहोमा नुपना जग ख्वसी सहोबासे लमा लाबालुडसरदेन भाल बाढी खसी थे दिमरी टसैनोन थे दिम आफुपनी। 26 तर जुन म्हिसे डाइ पाड्बा ताम थे:सी थे अन्छार गे आल, थे म्हि चा दिम सहोमा नुपना जग आख्वना सहोबा बुद्धि आरेबा मूर्ख म्हि हडबान हिन्ना। 27 बुद्धि आरेबा मूर्ख म्हिसे दिम सहोमा नुपना जग आख्वना सहोला। तर लाबालुडसरदेन भाल बाढी खसी थे दिमरी टजी भिसम थे दिम फुप्सी ल्हानान नोकसान तला।”

* 7:12 लूका ६:३१ * 7:19 मत्ती ३:१०; लूका ३:९ * 7:20 मत्ती १२:३३ * 7:23 भजन ६:८

28 येशूसे चु ताम सुड्सी जिन्माहेन्से थेरी मुबा म्हिगदे येशूसे लोप्बा म्राड्सी उदेक तजी। 29 तिग्दा भिसम येशूसे थेनीगदेला यहूदी धर्मगुरुगदेसे लोप्बा हड् लसी आहिन, तर अधिकार मुबा म्हिसे हड् लसी लोप्बा मुबा।*

8

येशूसे कोरे खबा म्हिदा खम्ना लबा

मर्कूस १:४०-४५; लूका ५:१२-१६

1 येशू गड्ग्याम मार फेप्खमाहेन्से ल्हानान म्हिगदे येशूदेन छ्याम भ्रबारी छ्याइजी। 2 थेनोन धुइरी कोरे खबा म्हि गिक येशूला डामरी खसी येशूदा फ्या लजी। ओच्छे “प्रभु, हाडला सेम मुसम हाडसे डादा खम्ना लखम्ला” भिसी भिजी।

3 जमाहेन्से येशूसे थेदा थुर्सी “ए खम्गै भिबा डाला सेम मुला, ए खम्गो” भिसी सुड्मैछ्याम थेला कोरे म्हाजी। 4 ओच्छे येशूसे थेदा “एसे चु ताम खालैदा थापाङ्गो। बरु ए निसी परमेश्वरला मन्दिररी पूजा लबा म्हिदा उन्गो। ओच्छे मोशासे कुल्बा अन्छार बलि फुल्गो। थेहड् लजी भिसम म्हिगदेसे ए खम्जी भिसी था याङ्गला” भिसी सुड्जी।*

येशूसे कप्तानना नोकरदा खम्ना लबा

लूका ७:१-१०

5 येशू कफर्नहुम शहररी फेप्खमा रोमी कप्तान गिक खसी, 6 “प्रभु, डाला नोकर काड या चलब आतना सहु खसी थलारी मुला” भिसी बिन्ती लजी।

7 जमाहेन्से येशूसे कप्तानदा “डा खसी थेदा खम्ना लला” भिसी सुड्जी।

8 तर कप्तानसे येशूदा “प्रभु, हाड डाला दिमरी फेप्खबाधोनाला डा आरे। थेतबासेलमा हाडसे चुग्यामसेन खम्गै भिसी सुड्जे सुड्सेनोन डाला नोकर खम्ला। 9 तिग्दा भिसम डाएनोन डाला हाकिमला तहरी चिबा म्हि हिन्ना। डाला तहरीनोन सिपाहीगदे मुला। डाइ कोइदा निउ भिमा निमुला, कोइदा खउ भिमा खमुला। ओच्छे डाला नोकरदा डाइ चुहड् लउ भिमा थेसे थेहड् नोन लमुला” भिसी भिजी।

10 चु ताम थे:सी येशू उदेक तसी हाडदेन छ्याम भ्रबा म्हिगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, इस्राएल यहुल्साला म्हिगदे न्हडरीनोन डाइ चुहड्बा घेन विश्वास मुबा म्हि आस्यापनी। 11 च्यागो, एनीगदेसे डाला ताम ड्यान्गो, स्यारदेन ल्हो जम्मान ग्लाग्याम अर्गु यहुलला ल्हानान म्हिगदे खला। ओच्छे अब्राहाम, इसहाक, याकूबदेन छ्यामनोन स्वर्गला यहुल्सारी भोज चबारी चिला।* 12 तर स्वर्गला यहुल्सारी चितो:बा ल्हानान इस्राएल यहुल्साला म्हिगदे चा मड्ग्यार धोपधोप्बा ग्लारी भ्याङ्गला। थेरी क्राबा क्रिड्बा लसी स्वा क्रेला।** 13 जमाहेन्से येशूसे थे कप्तानदा “ए निउ, एसे विश्वास लबा हड् नोन तगै” भिसी सुड्जी। चुहड् सुड्बा धुइरीन थे नोकर खम्जी।

येशूसे आखम्बा म्हिगदेदा खम्ना लबा

मर्कूस १:२९-३४; लूका ४:३८-४१

14 येशू पत्रुसला दिमरी धोखमाहेन्से पत्रुसला स्युमी छवा खसी म्हेर्सी चिबा म्राड्जी। 15 चु म्राड्सी येशूसे थेला यारी थुर्जी, ओच्छे थेला छवा म्हाजी। जमाहेन्से थे रे:सी येशूदा क्योड्बारी छ्याइजी।

16 धिनी घल्माहेन्से म्हिगदेसे म्हडसे स्यापबा म्हिगदेदा येशू मुबा ग्लारी भजी। जमाहेन्से येशूसे म्हडदा बड्सी थे म्हिगदेला ल्हुइग्याम तापजी। ओच्छे थेरी मुबा जम्मान आखम्बा म्हिगदेदा खम्ना लजी। 17 येशूसे चुहड् लबासे लमा यशैया अगमवक्तासे पाड्बा ताम पूरा तजी। यशैया अगमवक्तासे, “यहाडसे नातो:बा दुख थेसेन नाजी ओच्छे यहाडला आखम्बागदेएनोन खम्ना लजी”

* 7:29 मर्कू १:२२; लूका ४:३२ * 8:4 लेवी १४:१-३२ * 8:11 लूका १३:२९ * 8:12 मत्ती २२:१३; २५:३०; लूका १३:२८

भिसी पाइबा मुबा।*

येशूला लागिरी नातो:बा दुख
लूका ९:५७-६२

18 येशूसे हाडला क्युसीन ल्हानान म्हिगदे म्राड्सी “य्हाड समुन्द्रला क्याम्सडपट्टि निड” भिसी सुड्जी। 19 थे धुइरी यहूदी धर्मगुरु गिक खसी येशूदा “गुरु, हाड खानडदमान फेप्सै डाएनोन हाडदेन छ्याम निला” भिसी भिजी। 20 जमाहेन्से येशूसे थेदा “च्यागो, ल्हुन्दीगदे चिबारी ऊ मुला, ओच्छे चरागदे चिबारीनोन जड मुला। तर परमेश्वरसे पुइखबा महिला मी बल्पबा न्हबा ग्ला सुतै आरे” भिसी सुड्जी।

21 स्य्हान्दो चेला गिकसे येशूदा “प्रभु, डाच्छा डाला सिबा आबादा ल्हुसी हाडदेन छ्याम भ्रला” भिसी भिमा, 22 येशूसे थेदा “सिबागदेदा सिबागदे हड्बासेन ल्हुगै, तर ए चा डादेन छ्याम भ्रउ” भिसी सुड्जी।

येशूसे घेन लाबालुडसर म्हाना लबा
मर्कूस ४:३५-४१; लूका ८:२२-२५

23 जमाहेन्से येशू दोंगारी क्रै:जी, ओच्छे थेला चेलागदेएनोन थेदेन छ्यामनोन निजी। 24 निबान लमा तिक्खुरीन समुन्द्ररी घेन लाबालुडसर खजी। ओच्छे समुन्द्ररी छाल रे:सी छालसे दोंगा प्लिड्बारी छ्याइजी। तर थे धुइरी येशू चा सहिम्बा मुबा। 25 जमाहेन्से चेलागदे खसी “प्रभु, य्हाड सिबारी छ्याइजी, जोगब लउ” भिसी येशूदा छिड्जी।

26 जमाहेन्से येशूसे थेनीगदेदा “एनीगदे तिगदा लोड्बा? खाइ एनीगदेला विश्वास?” भिसी सुड्जी। ओच्छे येशू रे:सी लाबालुडसरदेन समुन्द्रला छालदा बड्जी। जमाहेन्से लाबालुडसर म्हासी शान्त तजी। 27 चुहड् तबा म्राड्सी थेनीगदे उदेक तजी। ओच्छे थेनीगदेसे “चु खाहड्बा म्हि? चुसे कुल्बा ताम मी लाबालुडसरदेन समुन्द्रला छालसेनोन ड्यान्बा चीम” भिसी हाड हाड न्हडरी ताम लजी।

येशूसे म्हडसे स्यापबा म्हि न्हीदा खम्ना लबा
मर्कूस ५:१-२०; लूका ८:२६-३९

28 येशू समुन्द्रला क्याम्सडपट्टि गदरा† भिबा ग्लारी धोखमा म्हडसे स्यापबा म्हि न्ही धुसांग्याम खबान लबा स्यापजी। थे म्हि न्ही ल्हानान लोड्बा खबा खाल्ला मुबासे लमा थे ग्याम खालै म्हि आभ्रमुबा। 29 थेनीगदेसे येशूदा म्राड्सी क्रिड्बान, “परमेश्वरला झा, हाडसे डन्दा तिग लबारी म्हाइबा? डन्ना धुइ आतमान हाड डन्दा नाश लबारी फेप्खबा हिन्ना?” भिसी भिजी।

30 थेनीगदे मुबा ग्लाग्याम जजाकी कयाथाड ढ्वागदे छबान मुबा। 31 थेतबासेलमा म्हडगदेसे येशूदा “चुदे हाडसे डन्दा चुरी चिआपुड्बा हिन्सम डन्दा ढ्वागदे न्हडरी वाड्पुड्गो” भिसी बिन्ती लजी।

32 जमाहेन्से येशूसे थेनीगदेदा “निउ” भिसी सुड्माहेन्से थेनीगदे थोन्सी ढ्वागदे न्हडरी वाड्जी। जमाहेन्से जम्मान ढ्वागदे गडग्याम समुन्द्ररी छ्योड्सी सिजी। 33 चुहड् तबा म्राड्सी ढ्वा छबा म्हिगदे यासी नाम्सारी निजी। ओच्छे म्हडसे स्यापबा म्हि न्हीदा तिग तिग तजी भिबा ताम जम्मादान थे:ना लजी। 34 जमाहेन्से नाम्साला मुबा जति जम्मान म्हिगदे येशूदा स्यापबारी खजी। ओच्छे येशूदा म्राड्सी थे म्हिगदेसे “चु ग्लाग्याम फेपगो” भिसी बिन्ती लजी।

9

येशूसे कुज्या म्हिदा खम्ना लबा
मर्कूस २:१-१२; लूका ५:१७-२६

* 8:17 यशै ५३:४ † 8:28 कोइ कोइ ग्रीक बाइबलरी “गेरासेनस” भिसी भिबा मुला। “गदरा” भिबादेन “गेरासेनस” भिबा ग्ला गिकनोन हिन्ना।

1 जमाहेन्से येशू दोंगारी क्रेःसी क्यामसडपट्टि फेपूजी, ओच्छे हाडलान शहररीं दोःसी फेपूखजी।
2 म्हिगदेसे काड या चलब आतबा कुज्या तसी म्हेर्सी चिबा म्हि गिकदा येशू मुबा ग्लारी भजी। येशूसे थेनीगदेला विश्वास म्राड्सी थे कुज्या म्हिदा “कोला, भड लउ, डाइ एला पाप माफ लबा मुला” भिसी सुड्जी।

3 थेरी मुबा यहूदी धर्मगुरुगदे न्हडला कोइ कोइसे “चुसे मी हाडसे हाडदान परमेश्वर सहोसी ताम लबान मुला” भिसी हाड हाड न्हडरी ताम लजी। 4 येशूसे थेनीगदेला सेमला ताम था याड्सी “एनीगदेसे तिग्दा चुहड्बा नडबा ताम म्हन्बा? 5 ‘एला पाप माफ तबा मुला’ भिबादेन रेःसी भ्रउ’ भिबारी खजिबा चा सजिलो मुला? 6 तर परमेश्वरसे पुडखबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिसी डाइ एनीगदेदा उन्ना” भिसी सुड्जी। जमाहेन्से येशूसे थे कुज्या म्हिदा “ए रेःगो, ओच्छे एला तीबा नान्बा पुड्सी दिमरी निउ” भिसी सुड्जी। 7 जमाहेन्से थे रेःसी हाडला दिमरी निजी। 8 चु म्राड्सी थेरी मुबा म्हिगदे उदेक तजी। ओच्छे थेनीगदेसे म्हिगदेदा चुहड्बा शक्ति पिन्बा परमेश्वरला जयजयकार लजी।

येशूसे मत्तीदा ड्योइबा

मर्कूस २:१३-१७; लूका ५:२७-३२

9 येशू थेग्याम फेपूबान लबा धुडरी मत्ती भिबा म्हिदा तिरो दुड्बा ग्लारी चिबान लबा म्राड्जी, ओच्छे येशूसे थेदा “डादेन छ्याम भ्रउ” भिसी सुड्जी। जमाहेन्से थे रेःसी येशूदेन छ्याम भ्रजी। 10 येशू मत्तीला दिमरी सोल छयोइबान लबा धुडरी तिरो दुड्बा म्हिगदेदेन पापीगदेएनोन खसी येशूदेन येशूला चेलागदेदेन छ्याम चिसी चबान मुबा। 11 चु म्राड्सी फरिसीगदेसे येशूला चेलागदेदा “एनीगदेला गुरु तिग्दा तिरो दुड्बा म्हिगदे ओच्छे पापीगदेदेन छ्याम चिसी चबा?” भिसी ड्योइजी।* 12 चु ताम थेःसी येशूसे “खम्बा म्हिगदेदा डाक्टर आतोः, तर आखम्बा म्हिगदेदा जे डाक्टर तोःला। 13 दाहेन्से एनीगदे निसी चु तामला अर्थ तिग हिन्ना घोबारी म्हाड्गो, ‘च्यागो, डाइ म्हाड्बा चा बलिदान आहिन, तर एनीगदेसे स्यूहान्दोदा लबा दया हिन्ना।’ थेतबासेलमा परमेश्वरला डाच्छा ज्यबा मुबा म्हिगदेदा आहिन, तर पापीगदेदा ड्योइबारी डा खबा हिन्ना” भिसी सुड्जी।*

येशूसे फोइथान चिसी प्रार्थना लबाला लागिरी लोपूबा

मर्कूस २:१८-२२; लूका ५:३३-३९

14 जमाहेन्से यूहन्नाला चेलागदे येशू मुबा ग्लारी खसी “डन्देन फरिसीगदे फोइथान चिसी प्रार्थना लमुला, तर हाडला चेलागदे चा तिग्दा फोइथान चिसी प्रार्थना आलबा?” भिसी ड्योइजी। 15 येशूसे थेनीगदेदा चुहड् भिसी सुड्जी, “म्हाछार जन्तीगदेदेन छ्याम मुतेधोना थेरी मुबागदेसे सुर्दा आल। तर म्हाछार थेनीगदेग्याम फेसी भोर्माहेन्से जे थेनीगदे सुर्दा तसी फोइथान चिला। 16 खालैसे बोक्टो क्वानरी छार क्वानगेनसे आख्या, छार क्वानगेनसे बोक्टो क्वान ख्याजी भिसम बोक्टो क्वान झन ढेला। 17 ओच्छे खालै म्हिसेनोन ढिला बोक्टो ताडरी अडगुरला कलिलो निडगु आयु, चुदे युजी भिसम थे ताड ढेसी अडगुरला निडगु डेला। ओच्छे थे ताडएनोन गे आखेल्बा तला। तर अडगुरला कलिलो निडगु ढिला छार ताडरी युला ओच्छे न्हीनोन जोगब तला।”

येशूसे याइरसला झामेदा खम्ना लबा

मर्कूस ५:२१-४३; लूका ८:४०-५६

18 येशूसे थेनीगदेदा चुहड् सुड्बान लबा धुडरी यहूदीगदे हुप तबा दिमला नेता गिक खजी। ओच्छे येशूदा फ्या लसी “दान्दे भर्खर डाला झामे सिजी, तर हाड फेपूखसी थेदा हाडसे थुर्जी भिसम थे सोला” भिसी भिजी। 19 जमाहेन्से येशू सहेड्सी थे म्हिदेन छ्याम फेपूजी, ओच्छे येशूला चेलागदेएनोन येशूदेन छ्यामनोन निजी।

† 9:1 “हाडलान शहर” चा कफर्नहुम शहर हिन्ना। * 9:11 लूका १५:१-२ * 9:13 मत्ती १२:७; होशे ६:६

20 थेनोन धुइरी का निबा बेथासे स्यापूसी च्युक नही दिड तबा म्रिडमहेमे गिक ग्यापग्याम खसी येशूला क्वानला जोरी थुर्जी। 21 तिग्दा भिसम “डाइ येशूला क्वान थुर्बारी जे म्याडसम डा खम्ला” भिसी थेसे सेम सेमरी म्हन्बा मुबा। 22 फ्लिक दोःसी च्यामा येशूसे थे म्रिडमहेमेदा म्राड्जी। ओच्छे येशूसे थेदा “भड लउ, माइ! एला विश्वाससे लमा ए खम्बा मुला” भिसी सुड्मैछ्याम थे म्रिडमहेमे खमज्जी।

23 येशू थे नेताला दिमरी धोखमा थेरी बाँसुरी ह्यापबां म्हिगदेदेन हल्ली खल्ली लसी चिबा म्हिगदे म्राड्जी। 24 चु म्राड्सी येशूसे जम्मादान “एनीगदे जम्मान मडग्यार थोन्गो। तिग्दा भिसम माइ सिबा आरे, तर म्हेसी चिबा मुला” भिसी सुड्जी। चु ताम थेःसी थेरी मुबा म्हिगदेसे खिसी लसी डेःजी। 25 थेरी मुबा म्हिगदे मडग्यार थोन्माहेन्से येशू दिम न्हडरी वाड्जी। ओच्छे थे माइला यारी चुड्सी थीजी। थीमैछ्याम थे माइ डोड रेःजी। 26 जमाहेन्से चु ताम थे यह्लसाला जम्मान ग्लारी थेःजी।

येशूसे मी आम्राड्बा म्हि न्हीदेन ताइ दोबा म्हिदा खम्ना लबा

27 येशू थेग्याम फेपबान लबा धुइरी मी आम्राड्बा म्हि न्हीसे “दाऊद ग्लेला सन्तान, डन्दा दया लउ” भिसी क्रिडबान येशूला लिच्छा लिच्छा खजी।

28 येशू दिम न्हडरी वाड्माहेन्से थे मी आम्राड्बा म्हि न्हीएनोन येशू मुबा ग्लारी खजी। जमाहेन्से येशूसे थेन्नीदा “डाइ खम्ना लबारी खम्ला भिसी एनीगदेदा विश्वास मुला?” भिसी ड्योइमा थेन्नीसे “मुला, प्रभु” भिसी भिजी।

29 जमाहेन्से येशूसे थेन्नीला मीरी थुर्सी “एनीगदेसे विश्वास लबासे लमा एनीगदे खम्बा मुला” भिसी सुड्जी। 30 येशूसे चुहड् सुड्मैछ्याम थेन्नीसे म्राड्जी। जमाहेन्से येशूसे थेन्नीदा “च्यागो, चु ताम खालैदान थापाड्गो” भिसी सुड्जी। 31 तसैनोन थेनीगदे निसी जम्मान ग्लारी येशूला बाररी थेःना लजी।

32 थे म्हि न्ही निबारी छ्याइमा म्हिगदेसे म्हडसे स्यापूसी ताइ दोबा म्हि गिकदा येशू मुबा ग्लारी भजी। 33 येशूसे म्हडदा तापमैछ्याम थे ताइ दोबा म्हिसे ताम पाड्बारी छ्याइजी। चु म्राड्सी थेरी मुबा म्हिगदे उदेक तसी “चुहड्बाम डन्से इस्राएल यह्लसाला म्हिगदे न्हडरी खाइमै म्राड्बा आरेबा” भिसी भिजी।

34 तर फरिसीगदेसे चा “चु म्हिसे मी म्हडगदेला ग्लेला शक्तिग्याम म्हड तापबा हिन्ना” भिसी भिबारी छ्याइजी।*

म्हिगदेदा म्राड्सी येशूदा दया रेःबा

35 जमाहेन्से येशूसे यहूदीगदे ह्युप तबा दिमरी लोपबादेन परमेश्वरला यह्लसाला समाचार थेःना लजी। ओच्छे जम्मान थरीला रोगसे स्यापबादेन आखम्बा म्हिगदेदा खम्ना लबान शहरदेन नाम्सा नाम्सारी फेपजी।* 36 म्हिला हुल म्राड्सी येशूदा ल्हानान दया रेःजी, तिग्दा भिसम थेनीगदे खालैसे आच्याना दुख याड्बा गोठालो आरेबा ग्युगदे हड्बान मुबा।* 37 जमाहेन्से येशूसे हाडला चेलागदेदा “च्यागो, बाली मी ल्हानान मिन्बा मुला, तर बाली दुइबा म्हिगदे ल्हाना आरे। 38 थेतबासेलमा बाली दुइबा म्हिगदे पुइखउ भिसी बालीला दोप्ता प्रभुदेन छ्याम प्रार्थना लउ” भिसी सुड्जी।*

10

येशूला मुल चेलागदे

मर्कूस ३:१३-१९; लूका ६:१२-१६

† 9:23 यहूदीगदेला ठिम अन्छार म्हि सिबा धुइरी बाँसुरी ह्यापबा म्हि भसी बाँसुरी ह्यापुड्मुबा। † 9:27 मी आम्राड्बा म्हिगदेसे येशूदा दाऊद ग्लेला सन्तान भिसी ड्योइमा थेनीगदेदा डाच्छाहेन्सेन था मुबा थाबां पिन्बा मसीह भिसी घोमुबा। तिग्दा भिसम यहूदीगदेसे येशू आखम्बा म्हिदा खम्ना लबारीदेन शासन लबारी दाऊदला सन्तानग्याम थोन्ना भिसी विश्वास लमुबा। † 9:33 याकूबला सन्तानदा इस्राएली भिसी भिमुबा भिसम येशूला धुइला यहूदीगदे चा यहूदा अञ्चलला बेन्यामीनदेन लेवीला सन्तानगदे मुबा।

* 9:34 मत्ती १०:२५; १२:२४; मर्कू ३:२२; लूका ११:१५ * 9:35 मत्ती ४:२३; मर्कू १:३९; लूका ४:४४ * 9:36 गन्ती २७:१७; १ राजा २२:१७; २ इति १८:१६; इज ३४:५; मर्कू ६:३४ * 9:38 लूका १०:२

1 येशूसे हाडला च्युक न्ही चेलागदेदा ड्योइसी जम्मान थरीला रोगसे स्यापूसी आखम्बागदेदा खम्ना लबादेन म्हडगदेदा तापबा अधिकार पिन्जी। 2 येशूला मुल चेलागदे चुनोन हिन्ना, जम्मान भन्दा डाच्छा पत्रुस भिबा सिमोनदेन थेला आले अनद्रियास, जब्दियाला झा याकूबदेन याकूबला आले यूहन्ना, 3 ओच्छे फिलिपदेन बारथोलोमाइ, थोमादेन तिरो दुइबा मत्ती, अल्फयसला झा याकूबदेन थेदियस, 4 ओच्छे सिमोन चु सिमोनदा हाडला यहुल्सादा माया लसी हाडला यहुल्साला लागिरी ज्याननोन पिन्खम्बा म्हि भिसी भिमुबा। ओच्छे यहूदा इस्करियोत, चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

मुल चेलागदेला गे

मर्कुस ६:७-१३; लूका ९:१-६

5 येशूसे हाडला च्युक न्ही मुल चेलागदेदा चुहड् भिसी कुल्सी पुइजी, “एनीगदे अर्गु यहुलला म्हिगदेदेन सामरीगदेला शहररी थानिउ। 6 बरु एनीगदे गोठालो आरेबा ग्युगदे हड् तसी भ्रबा इस्राएलीगदे मुबा ग्लारी निउ। 7 ओच्छे ‘स्वर्गला यहुल्सा खसी जिन्बा मुला’ भिसी पाड्गो।* 8 ओच्छे आखम्बा म्हिगदेदा खम्ना लबादेन सिबा म्हिगदेदा सोना लउ। थेहड् लसीन कोरे खबागदेदा खम्ना लबादेन म्हडगदे तापगो। एनीगदेसे ओहड्नुनोन याड्बा सहे एनीगदेसेएनोन ओहड्नुनोन पिन्गो। 9 एनीगदेसे म्हर म्हुइदेन टाडगा तिगै थाभोर्गो। 10 ओच्छे एनीगदेसे ग्यामला लागिरी पोबा क्वानदेन झोला ओच्छे लखमदेन कडी तिगै थाभोर्गो। तिगदा भिसम गे लबा म्हिसे ज्याला याड्तो:मुला।* 11 “एनीगदे शहररी निसै नाम्सारी निसै डाच्छा थेरी एनीगदेदा मान लबा म्हि खाल चीम थे म्हाइगो। ओच्छे एनीगदे थेग्याम आनितेधोना थेरीन चिउ। 12 ओच्छे थे दिमरी वाड्मा एनीगदेसे थे दिमला म्हिदा “परमेश्वरला शान्ति एनीगदेदेन छ्याम तगै” भिसी पाड्गो। 13 थे दिमला म्हिसे एनीगदेदा मान लजी भिसम थे दिमला म्हिसे शान्ति याड्गै। चुदे थे दिमला म्हिसे एनीगदेदा मान आलनी भिसम थे दिमला म्हिसे शान्ति थायाड्गै। 14 ओच्छे खालेसे एनीगदेला ताम आड्यान्ना मान आलनी भिसम थे दिमदेन शहरग्याम थोन्बा धुइरी हाडला काडला धुलु खर्सी पिन्गो।†* 15 च्यागो, एनीगदेसे डाला ताम ड्यान्गो, परमेश्वरसे निसाफ लबा धिनकुनु थे शहरला म्हिगदेला गति भन्दा मी सदोमदेन गमोरा शहरला म्हिगदेला गति नाखम्बा तला।* 16 “च्यागो, डाइ एनीगदेदा फार्बागदेला गुडरी ग्युदा पुइबा हड् लसी पुइला। थेतबासेलमा एनीगदे पुरखी हड्बा चलाक ओच्छे ढुकुर हड् सोजो तसी भ्रउ।* 17 तर एनीगदे म्हिगदे म्हाड्सी होशियार तउ, तिगदा भिसम थेनीगदेसे एनीगदेदा चुड्सी अदालतरी भोर्ला। ओच्छे यहूदीगदे हुप तबा दिमरी भोर्सी एनीगदेदा कोर्से तोबा ग्याड्बा लला। 18 डादा विश्वास लबासे लमा थेनीगदेसे एनीगदेदा अञ्चलाधीशदेन ग्लेला डाच्छापट्टि भोर्ला। एनीगदे थेनीगदेदेन अर्गु यहुलला म्हिगदेला लागिरी डाला साक्षी दोला। 19 थेनीगदेसे चुड्सी भोर्सेनोन खाहड् लसी जोहाब पिन्से भिसी एनीगदेसे धन्दा सुर्दा लआतो:। तिगदा भिसम थे धुइरी खाहड् लसी पाड्तो:बा थे ताम एनीगदेदा लोप्सी पिन्ना। 20 तिगदा भिसम थे धुइरी एनीगदेसे पाड्बा आहिन, तर परमेश्वर आबाला आत्मासेन एनीगदेग्याम पाड्ला। 21 “हाडलान ज्योज्यो आलेसे हाडलान ज्योज्यो आलेदा साइपुड्ला। थेहड् लसीन आबासे कोलागदेदा साइपुड्ला, ओच्छे कोलागदेसे आबा आमाला बिरोध लसी साइपुड्ला। 22 ओच्छे डादा विश्वास लबासे लमा एनीगदेदा जम्मासेन हेला लला। तर जुन म्हिसे जस्तोन दुख तसैनोन हाड आसितेधोना डादा विश्वास लबा आख्ला थेसे थार्बा याड्ला।* 23 म्हिगदेसे एनीगदेदा नाम्सा गिकरी

विश्वासीगदेसे नातो:बा दुख

मर्कुस १३:९-१३; लूका २१:१२-१७

16 “च्यागो, डाइ एनीगदेदा फार्बागदेला गुडरी ग्युदा पुइबा हड् लसी पुइला। थेतबासेलमा एनीगदे पुरखी हड्बा चलाक ओच्छे ढुकुर हड् सोजो तसी भ्रउ।* 17 तर एनीगदे म्हिगदे म्हाड्सी होशियार तउ, तिगदा भिसम थेनीगदेसे एनीगदेदा चुड्सी अदालतरी भोर्ला। ओच्छे यहूदीगदे हुप तबा दिमरी भोर्सी एनीगदेदा कोर्से तोबा ग्याड्बा लला। 18 डादा विश्वास लबासे लमा थेनीगदेसे एनीगदेदा अञ्चलाधीशदेन ग्लेला डाच्छापट्टि भोर्ला। एनीगदे थेनीगदेदेन अर्गु यहुलला म्हिगदेला लागिरी डाला साक्षी दोला। 19 थेनीगदेसे चुड्सी भोर्सेनोन खाहड् लसी जोहाब पिन्से भिसी एनीगदेसे धन्दा सुर्दा लआतो:। तिगदा भिसम थे धुइरी खाहड् लसी पाड्तो:बा थे ताम एनीगदेदा लोप्सी पिन्ना। 20 तिगदा भिसम थे धुइरी एनीगदेसे पाड्बा आहिन, तर परमेश्वर आबाला आत्मासेन एनीगदेग्याम पाड्ला। 21 “हाडलान ज्योज्यो आलेसे हाडलान ज्योज्यो आलेदा साइपुड्ला। थेहड् लसीन आबासे कोलागदेदा साइपुड्ला, ओच्छे कोलागदेसे आबा आमाला बिरोध लसी साइपुड्ला। 22 ओच्छे डादा विश्वास लबासे लमा एनीगदेदा जम्मासेन हेला लला। तर जुन म्हिसे जस्तोन दुख तसैनोन हाड आसितेधोना डादा विश्वास लबा आख्ला थेसे थार्बा याड्ला।* 23 म्हिगदेसे एनीगदेदा नाम्सा गिकरी

* 10:7 लूका १०:४-१२ * 10:10 १ कोर ९:१४; १ तिमो ५:१८ † 10:14 यहूदीला ठिम अन्छार काडला धुलु खर्बा चा परमेश्वरसे सजाय पिन्ना भिसी उन्बा हिन्ना। * 10:14 मुल १३:५१ † 10:15 उत्पत्ति १९:२३-२९ सदोमदेन गमोरा भिबा चा शहर न्ही हिन्ना। थेदा परमेश्वरसे नाश लजी। तिगदा भिसम थे शहररी ल्हानान नड्बा गेगदे लमुबा। चु ताम, मत्ती ११:२३-२४; लूका १०:१२, १७:२९; रोमी ९:२९; २ पत्रुस २:६; यहूदा १:७; उन्बा ११:८ पदरीएनोन मुला। * 10:15 मत्ती ११:२४; उत्प १९:२४-२८ * 10:16 लूका १०:३ * 10:22 मत्ती २४:९-१३

दुख पिन्जी भिसम एनीगदे अर्गु नाम्सारी यागो। च्यागो, एनीगदेसे डाला ताम ड्यानगो, परमेश्वरसे पुइखबा म्हि खबा भन्दा डाच्छा एनीगदे इस्राएलला जम्मान नाम्सारी धोआखम।

24 “च्यागो, गुरु भन्दा चेला घेन आत, ओच्छे मालिक भन्दा नोकरएनोन घेन आत।* 25 चेला ह्याडला गुरु हड्बा दोबादेन नोकर ह्याडला मालिक हड्बा दोबान ठीक मुला। तिग्दा भिसम थेनीगदेसे डा दिमला मुल म्हिदाम म्हडला ग्ले बालजिबुल भिला भिसम झन डाला म्हेमेगदेदा मी तिग भिला?*

खाल म्हाड्सी लोड्तो:बा?

लूका १२:२-९

26 “थेतबासेलमा थेहड्बा म्हिगदेदेन छ्याम थालोड्गो। तिग्दा भिसम घप्सी आम्राड्बा सहे तिगै आरे, ओच्छे छुम्सी था आयाड्बा सहे तिगै आरे।* 27 जुन ताम डाइ एनीगदेदा धोपधोपरी पाड्बा मुला, थे ताम एनीगदेसे य्हालरी पाड्गो, ओच्छे जुन ताम एनीगदेसे थे:ला, थे ताम एनीगदेसे दिमला धुरीग्याम थे:ना लउ। 28 ओच्छे एनीगदेला लहुइदा साइसी आत्मादा चा तिगै लबारी आखम्बा म्हिगदेदेन छ्याम थालोड्गो। तर लहुइदेन आत्मा न्हीदान साइसी नर्गरी धोना लखम्बा परमेश्वरदेन छ्याम जे लोड्गो। 29 डबल गिकरी च्युर्गन न्ही याड्मुला। तसैनोन एनीगदेला परमेश्वर आबासे सेम आलनी भिसम थे च्युर्गनगदे न्हडला गिकएनोन आसि। 30 एनीगदेला थोबोरी क्रा गाते मुला भिबा ताम सुतै परमेश्वरदा था मुला। 31 थेतबासेलमा एनीगदे थालोड्गो। तिग्दा भिसम थे ल्हानान च्युर्गनगदे भन्दा मी एनीगदे ल्हानान घेन मुला।

स्युहान्दोगदेदा ख्रीष्टला बारेरी पाड्बा

लूका १२:८-९

32 “थेतबासेलमा जुन म्हिसे डादा म्हिला ओन्छाडरी सेमहेन्से प्रभु भिसी पाड्ला, डाएनोन स्वर्गरी धन्छ्याबा आबाला डाच्छा थेदा डाला म्हि भिसी भिला। 33 तर जुन म्हिसे म्हिगदेला ओन्छाडरी डादा डाइ थेदा डोसेबा आरे भिसी भिला, डाइएनोन थेदा स्वर्गरी धन्छ्याबा डाला आबाला डाच्छा डोसेबा आरे भिसी भिला।*

ख्रीष्टदा विश्वास लबादेन आलबा

लूका १२:५१-५३; १४:२६-२७

34 “डा जम्बुलिडरी म्हिगदेदा ठिकना लबारी खबा हिन्ना भिसी थाम्हन्गो। तिग्दा भिसम डा म्हिगदेदा ठिकना लबारी आहिन, तर थेनीगदे न्हडरी छेना लबारी खबा हिन्ना। 35 तिग्दा भिसम ‘डा आबाला बिरोधरी झा, आमाला बिरोधरी झामे ओच्छे स्युमीला बिरोधरी चाड रे:ना लबारी खबा हिन्ना।

36 म्हिला शत्रु चा ह्याडलान म्हेमेगदे न्हडग्याम थोन्ना।*

37 “जुन म्हिसे डादा भन्दा ह्याडला आबा आमादेन कोलागदेदा माया लला, थे म्हि डाला चेला दोबारी आखम। 38 ओच्छे जुन म्हिसे आसितेधोना ह्याडला दुख ह्याडसेन नासी। डादेन छ्याम आभ्र, थे म्हि डाला चेला दोबाधोनाला आरे।* 39 जुन म्हिसे ह्याडला ज्यान जोगब लबारी म्हाइला थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे जुकजुकधोनाला जुनी याड्ला।*

40 “एनीगदेदा मान लबा म्हिगदेसे डादाएनोन मान लला। ओच्छे डादा मान लबागदेसे डादा पुइखबादाएनोन मान लला।* 41 जुन म्हिसे अगमवक्तादा ‘अगमवक्ता’ भिसी मान लला, थेसेनोन अगमवक्तासे याड्बा हड्बान इनाम याड्ला। थेहड् लसीन जुन म्हिसे परमेश्वरदा सेम निबा म्हिदा ‘परमेश्वरदा सेम निबा म्हि’ भिसी मान लला, थेसेनोन थे परमेश्वरदा सेम निबा म्हिसे याड्बा हड्बान

* 10:24 लूका ६:४०; यूह १३:१६; १५:२० * 10:25 मत्ती ९:३४; १२:२४; मर्कु ३:२२; लूका ११:१५ * 10:26 मर्कु ४:२२; लूका ८:१७ * 10:33 २ तिमो २:१२ * 10:36 मीका ७:६ † 10:38 ग्रीक बाइबलरी चा ह्याडला क्रुस ह्याडसेन पुइतो:ला भिसी भिबा मुला। * 10:38 मत्ती १६:२४; मर्कु ८:३४; लूका ९:२३ * 10:39 मत्ती १६:२५; मर्कु ८:३५; लूका ९:२४; १७:३३; यूह १२:२५ * 10:40 मर्कु ९:३७; लूका ९:४८; १०:१६; यूह १३:२०

इनाम याड्ला। 42 च्यागो, खालैसे चुगदे न्हडला गिकदा डाला चेला भिसी सिम्बा क्युडा जे थुड्बारी पिन्सैनोन थेसे याड्तो:बा इनाम याड्ला।”

11

बपत्तिस्मा पिन्बा यूहन्नासे ड्योड्बा ताम

1 येशूसे हाडला च्युक न्ही चेलादा चुहड् सुड्सी जिन्माहेन्से गालील अञ्चलला नाम्सागदेरी परमेश्वरला यहुल्साला समाचार लोपबारीदेन थे:ना लबारी फेपजी।

2-3 थे धुडरी बपत्तिस्मा पिन्बा यूहन्ना झ्याल्खानरी मुबा। थार्बा पिन्बा ख्रीष्टसे लबा गेला बारैरी थे:सी यूहन्नासे हाडला चेलागदेदा “डन्से फेपखला भिसी आश लसी चिबा थार्बा पिन्बा ग्ले हाडनोन हिन्ना कि स्य्हान्दो खालैदा भ्रान्तो:बा हिन्ना?” भिसी ड्योड्बारी थार्बा पिन्बा ख्रीष्ट मुबा ग्लारी पुड्जी।

4 जमाहेन्से येशूसे थेनीगदेदा चुहड् भिसी सुड्जी, “एनीगदेसे थे:बादेन म्राड्बा ताम निसी यूहन्नादा पाड्सी पिन्गो। 5 मी आम्राड्बागदेला मी म्राड्ना लबा मुला, कुज्यादेन कोरे खबा म्हिगदेदा खम्ना लबा मुला, नाब्यड् आथे:बागदेदा थे:ना लबा मुला, सिबागदेदा सोना लबा मुला, ओच्छे प्राड्बोगदेदा परमेश्वरला यहुल्साला समाचार थे:ना लबान मुला।* 6 जुन म्हिसे शङ्का आलना विश्वास लला, थे म्हिसे परमेश्वरग्याम मोलम याड्ला।”

7 थेनीगदे निमाहेन्से येशूसे थेरी मुबा म्हिगदेदा यूहन्नाला बारैरी सुड्बारी छ्याड्जी, “एनीगदे तोड्तोड्बा ग्लारी तिग च्याबारी निबा मुबा? तिग लाबासे यहोड्बा मा दोड् च्याबारी निबा हिन्ना? 8 ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, ज्यबा ज्यबा क्वान क्वान्बा म्हिगदे मी ग्लेखाडरी जे चिमुला। 9 एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाड्ला एनीगदेसे स्य्हान्दो अगमवक्तागदे भन्दा घेन म्हि गिक म्राड्बा मुला। 10 चुनोन यूहन्नाला बारैरी परमेश्वरला बचनरी चुहड् भिसी भिबा मुला,

‘च्यागो, डाइ डाला समाचार भोर्बा म्हिदा एला डाच्छा डाच्छा पुड्ला।

थेसे एला लागिरी ग्याम सहोला।†*’

11 “च्यागो, दान्देधोना बपत्तिस्मा पिन्बा यूहन्ना भन्दा घेन म्हि खालैनोन न्हबा आरे। तसैनोन जुन म्हि स्वर्गला यहुल्सारी जम्मान भन्दा जजा मुला, थे बपत्तिस्मा पिन्बा यूहन्ना भन्दा घेन हिन्ना।†

12 बपत्तिस्मा पिन्बा यूहन्नाला धुड्हेन्से दान्देधोना थे:ना लबा स्वर्गला यहुल्साला बारैरी ल्हानान गे तबा मुला। तर हाडसे हाडदान शक्तिशाली म्हन्बा म्हिगदे चा हाडलान भडसे स्वर्गला यहुल्सारी वाड्बारी म्हाड्बा मुला।* 13 तिग्दा भिसम यूहन्नाला धुड्धोना परमेश्वरसे मोशादा पिन्बा ठिमदेन जम्मान अगमवक्तागदेसे परमेश्वरला यहुल्साला बारैरी पाड्बा मुला। 14 एनीगदेसे अगमवक्तागदेसे पाड्बा ताम विश्वास लबा हिन्सम थेनीगदेसे खाल भिसी पाड्बा एलिया चा चुनोन यूहन्ना हिन्ना।* 15 जुन म्हिदा ड्यानबा सेम मुला, थेसे ड्यानसी घोट।

16 “दान्देला म्हिगदेदा डाइ खाहड् लसी घोना लसे? थेनीगदे मी ग्यामरीक्यार क्लाड्बा कोलागदे हड्बान हिन्ना। थेनीगदेसे हाडला ह्योगदेदा ड्योड्सी चुहड् भिमुला,

17 ‘डन्से एनीगदेला लागिरी बाँसुरी हाप्सी पिन्जी, तर एनीगदे आस्य्हनी।

ओच्छे डन्से दुखला व्हाड् गोजी, तर एनीगदे आक्रानी।’

18 चुहड् लसीन यूहन्नासे अड्गुरला निड्गु आथुड्ना फोड्थान चिसी प्रार्थना लमुबा, जमा म्हिगदेसे ‘थेदा म्हडसे स्यापबा म्हि’ भिसी भिबा मुबा। 19 परमेश्वरसे पुड्खबा म्हि चा चबा थुड्बा लसी भ्रजी।

† 10:42 “सिम्बा क्युड” नेपाली बाइबलदेन ग्रीक बाइबलरी चा “कचौर नाड क्युड” भिसी भिबा मुला। * 11:5 यशै ३५:५, ६; ६१:१ † 11:10 चु ताम चा परमेश्वरसे थार्बा पिन्बा ख्रीष्टदा सुड्बा ताम हिन्ना। * 11:10 मला ३:१ † 11:11 यूहन्नासे थार्बा पिन्बा ख्रीष्ट योना फेपखला भिबा ताम थे:ना लसी घेन गे लबा मुबा, तसैनोन येशूला चेलागदेसे येशूदा थार्बा पिन्बा ख्रीष्टदा डोसेजी भिसी थे:ना लजी। थे ताम यूहन्नासे लबा गे भन्दा घेन मुबा। * 11:12 लूका १६:१६ * 11:14 मला ४:५; मत्ती १७:१०-१३; मर्कु ९:११-१३

थेतबासेलमा म्हिगदेसे डादा 'च्यागो, ल्हानान चबा सहेदेन ल्हानान निडगु कासी ड्यूहोइसी भ्रबा, तिरो दुइबादेन पापीगदेला ह्यो' भिसी भिमुला! तर परमेश्वरला बुद्धिग्याम गे लबा म्हिदा थेसे लबा गेगदेग्यामसेन थे ठीक हिन्ना भिसी था याड्ला।”

येशूसे विश्वास आलबा शहरला म्हिगदेदा बड्बा
लूका १०:१३-१५

20 जमाहेन्से जुन जुन नाम्सारी येशूसे ल्हानान उदेकला गेगदे लबा मुबा, थे नाम्साला म्हिगदेदा दाहेन्से ज्यबा तसेला आरे भिसी सुड्बारी छ्याइजी, तिग्दा भिसम थेनीगदेसे ह्याड ह्याडला पाप ख्लासी परमेश्वरपट्टि आदोःनी। 21 “खोराजीनदेन बेथसेदाला म्हिगदे, एनीगदेसे परमेश्वरग्याम सजाय याड्ला। तिग्दा भिसम एनीगदेला नाम्सारी लबा हड्बा उदेकला गेगदे टुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा फोर्सी ह्याड ह्याडला पाप ख्लासी परमेश्वरपट्टि दोःसेला मुबा।* 22 तर एनीगदेसे डाला ताम ड्यानगो, परमेश्वरसे निसाफ लबा धुइरी एनीगदेला दुख भन्दा टुरोसदेन सीदोनला म्हिगदेला दुख नाखम्बा तला 23 कफर्नहुमला म्हिगदे, तिग एनीगदे स्वर्गरीन धोला भिसी म्हन्मुला? आधो! एनीगदेदा मी नर्गरी भ्याड्ला। तिग्दा भिसम एनीगदेला गुडरी लबा उदेकला गेगदे सदोमरी लबा हिन्सम थे नामसा तिनीधोना चिसेला मुबा।* 24 च्यागो, परमेश्वरसे निसाफ लबा धुइरी सदोमला म्हिगदेसे भन्दा एनीगदेसे ल्हानान सजाय याड्ला?”*

25 थे धुइरी येशूसे चुहड् भिसी प्रार्थना लजी, “मुदेन जम्बुलिडला प्रभु आबा, ह्याडदा धन्यवाद मुला, तिग्दा भिसम ह्याडसे ज्ञान बुद्धि मुबा म्हिगदेदेन सेबा घोबा म्हिगदेग्याम छुम्सी थान्बा ताम तिगै आसेबा म्हिगदेदा उन्सी पिन्जी। 26 हिन्ना आबा, चुहड् लमान ह्याड ताड्जी।

27 “डाला आबासे डादा जम्मान सहे जिम्मा पिन्बा मुला। थेतबासेलमा झा खाल हिन्ना भिसी आबादा बाहेक स्यहान्दो खालैदान था आरे। थेहड् लसीन आबा खाल भिसी झादेन झासे आबादा डोसेना लबा म्हिगदेसे बाहेक स्यहान्दो खालैदान आबा खाल हिन्ना भिसी था आरे।*

डा मुबा ग्लारी खसी बल्पबा न्हउ

28 “धोइ पुइसी बल्पबा म्हिगदे, डा मुबा ग्लारी खउ, डाइ एनीगदेला बल्पबा साल्ना लला। 29 डाला जुवा! पुइसी डाग्याम लोपगो, तिग्दा भिसम डाला सेम डेम्बादेन दयासे प्लिड्बा मुला। थेतबासेलमा एनीगदेला सेमरी शान्ति तला।* 30 तिग्दा भिसम डाइ कापबा जुवा सजिलो मुला, ओच्छे डाइ कापबा धोइ याड्बा मुला।”

12

येशू बल्पबा न्हबा धिननाएनोन प्रभु हिन्ना

मर्कुस २:२३-२८; ३:१-६; लूका ६:१-११

1 येशूदेन थेला चेलागदे बल्पबा न्हबा धिनकुनु बुग्याम फेपबान मुबा। थे धुइरी फोखेन्बासे लमा थेला चेलागदेसे ग्वाला नम थुसी चबारी छ्याइजी।* 2 थेनीगदेसे चुहड् लबा म्हाइसी फरिसीगदेसे येशूदा “च्यागो, ह्याडला चेलागदेसे बल्पबा न्हबा धिनकुनु लबारीन आतबा गे लजी” भिसी पाड्जी।

3 जमाहेन्से थेनीगदेदा येशूसे चुहड् भिसी सुड्जी, “दाऊददेन थेला ह्योगदेदा फोखेन्बा धुइरी थेनीगदेसे तिग लजी? तिग एनीगदेसे खाइमै परमेश्वरला बचन पढब लबा आरे? 4 थे धुइरी दाऊदसे परमेश्वरला दिमरी वाड्सी परमेश्वरदा फुल्बा गेड भसी ह्याडला ह्योगदेदेन छ्याम ढिक्सी चजी। थे गेड थेनीगदेसे चबारीन आतमुबा। तिग्दा भिसम थे गेड परमेश्वरला मन्दिररी पूजा लबा म्हिसे जे चबारी तमुबा।* 5 ओच्छे एनीगदेसे परमेश्वरसे मोशादा पिन्बा ठिम पढब लबा आरे? बल्पबा न्हबा धिनकुनुएनोन परमेश्वरला मन्दिररी पूजा लबा म्हिगदेसे गे लमुला, तसैनोन थेनीगदेसे पाप लबा मुला

* 11:21 यशै २३:१-१८; इज २६:१-२८:२६; योए ३:४-८; आमो १:९-१०; जक ९:२-४ * 11:23 यशै १४:१३-१५; उत्प १९:२४-२८

* 11:24 मती १०:१५; लूका १०:१२ * 11:27 यूह ३:३५; १:१८; १०:१५ † 11:29 चुरी जुवा भिबा चा परमेश्वरसे सुड्बा ताम ड्यानबादेन गाहो गे हिन्ना। * 11:29 यर्मि ६:१६ * 12:1 व्यव २३:२५ * 12:3 १ शमू २१:१-६ * 12:4 लेवी २४:९

भिसी आम्हन्मुला।* 6 तर एनीगदेसे डाला ताम ड्यान्गो, परमेश्वरला मन्दिर भन्दा घेन चुरी स्युहान्दो खालै मुला। 7 थेतबासेलमा 'डाइ म्हाइबा चा बलिदान आहिन, तर एनीगदेसे स्युहान्दोदा लबा दया हिन्ना' भिसी बचनरी भिबा ताम घोबा हिन्सम एनीगदेसे तिगै दोष आरेबा म्हिदा दोष आलसेला मुबा।* 8 तिग्दा भिसम परमेश्वरसे पुडखबा म्हि बल्पबा न्हबा धिनना प्रभु हिन्ना।”

बल्पबा न्हबा धिनकुनु येशूसे आखम्बा म्हिदा खम्ना लबा

9 थेग्याम येशू यहुदीगदे हुप तबा दिमरी फेपजी। 10 थेरी या गिक खर्बा म्हि मुबा। फरिसीगदेसे येशूदा दोष लबाला लागिरी “तिग बल्पबा न्हबा धिनकुनु खालै म्हिदा खम्ना लबा ठीक हिन्ना?” भिसी ड्योडजी।

11 जमाहेन्से येशूसे थेनीगदेदा चुहड् भिसी सुड्जी, “एनीगदे न्हडरी खालैला ग्यु गिक बल्पबा न्हबा धिनकुनु व्हाडरी ताड्जी भिसम एसे थे ग्युदा आते:ना थेहड् नोन थान्ना?”* 12 एनीगदेसे ग्युदा मी ते:मुला भिसम म्हि ग्यु भन्दा घेन आहिन? थेतबासेलमा बल्पबा न्हबा धिनकुनु खालैदा ज्यबा लबा ठीक हिन्ना।”

13 जमाहेन्से येशूसे थे म्हिदा “एला या तन्गब लउ” भिसी सुड्माहेन्से थेसे या तन्गब लजी। तन्गब लमैछ्याम थेला या अर्गु या हड्बान ज्यबा तजी। 14 जमाहेन्से फरिसीगदे थेग्याम थोन्सी निजी, ओच्छे येशूदा खाहड् लसी साड्बा भिसी ह्वाड ह्वाड न्हडरी सल्लाह लबारी छ्याड्जी।

परमेश्वरसे धम्बा म्हि

15 फरिसीगदेला ताम था याड्सी येशू थेग्याम फेपजी। जमाहेन्से महिला हुलएनोन येशूदेन छ्यामनोन खजी, ओच्छे येशूसे आखम्बा जम्मान म्हिगदेदा खम्ना लजी। 16 तर येशूसे थे महिला लहुडरी मुबा म्हडदा “च्यागो, डा परमेश्वरला झा हिन्ना भिसी खालैदा थापाड्गो” भिसी सुड्जी। 17 यशैया भिबा अगमवक्तासे पाड्बा ताम पूरा तबारीन येशूसे चुहड् सुड्बा हिन्ना। यशैया अगमवक्ताग्याम परमेश्वरसे चुहड् भिसी सुड्बा मुला,

18 “डाइ धम्बा डादा तेन्बा म्हि म्हाड्सी डा ताड्बा मुला।

ओच्छे थेदा डाइ माया लसी डाला आत्मा थेथोरी थान्सी पिन्बा मुला, थेसे डाइ लबा निसाफला बारिरी जम्मान यहुलला म्हिगदेदा पाड्ला।

19 थे छेबा बड्बा लसी आभ्र

ओच्छे ल्हानान क्रिड्सीएनोन आभ्र।

थेतबासेलमा थे ग्यामरीक्यार क्रिड्सी भ्रबा खालैसे आथे:।

20 थिबा मादा आक्युडना जोगब लसी थान्बा हड् लसी दुखरी मुबा म्हिगदेदा थेसे जोगब लसी थान्ना। थेहड् लसीन छ्युगु जिन्सी सिबारी छ्याड्बा नाडसलदा सिआपुड्बा हड् लसी थेसे विश्वासरी कमजोर तबा म्हिगदेदाएनोन जोगब लसी थान्ना।

ओच्छे जम्मादान ठीक निसाफ लसी थान्ना लला।

21 थेतबासेलमा जम्मान यहुलला म्हिगदेसे थेथोरी आश लला।”*

येशूदेन म्हडला ग्ले बालजिबुल

मर्कूस ३:२०-३०; लूका ११:१४-२३

22 जमाहेन्से म्हिगदेसे म्हडसे स्याप्सी ताड् दोबादेन मी आम्राड्बा म्हि गिकदा येशू मुबा ग्लारी भजी। येशूसे थेदा खम्ना लजी, जमाहेन्से थेसे म्हाड्खम्जी तामएनोन पाड्खम्जी। 23 चु म्हाड्सी थेरी मुबा जम्मान म्हिगदे उदेक तसी “चु दाऊद ग्लेला सन्ताननोन हिन्ना?” भिसी भिजी।*

24 तर चुहड्बा ताम थे:सी फरिसीगदेसे येशूदा “चु म्हिसे मी म्हडगदेला ग्ले बालजिबुललां शक्तिग्याम जे म्हडगदे ताप्बा हिन्ना” भिसी भिजी।*

* 12:5 गन्ती २८:९-१० * 12:7 मत्ती ९:१३; होशे ६:६ * 12:11 लूका १४:५ * 12:21 यशैया ४२:१-४ * 12:23 मत्ती ९:२७ † 12:24 “बालजिबुल” भिबा शैतानना अर्गु मिन हिन्ना। * 12:24 मत्ती ९:३४; १०:२५

25 तर थेनीगदेला सेमला ताम था याड्सी येशूसे थेनीगदेदा चुहड् भिसी सुड्जी, “च्यागो, जुन यहुल्साला म्हिगदे ह्वाड ह्वाड न्हडरी तोबा छेबा लला थे यहुल्सा नाश तला, ओच्छे दिम गिकलान म्हिएनोन ह्वाड ह्वाड न्हडरी आढिकनी भिसम थे दिमएनोन फुप्ला। 26 थेतबासेलमा शैतानसे शैतानदान तापूजी भिसम थेनीगदे ह्वाड ह्वाड न्हडरी फेला। थेहड् लजी भिसम थेनीगदेला यहुल्सा खाहड् लसी टुला? 27 डाइ बालजिबुलला शक्तिग्याम म्हड तापमुला भिसम एनीगदेला चेलागदेसे चा खाल्ला शक्तिग्याम म्हड तापबा हिन्ना? थेतबासेलमा एनीगदेला गल्ती थेनीगदेसेन उन्ना। 28 तर डाइ परमेश्वरला आत्माग्याम म्हड तापबा मुला भिसम एनीगदेला गुडरी परमेश्वरला यहुल्सा खसी जिन्बा मुला।

29 “भड्बा महिला दिमरी वाड्सी डाच्छा थे म्हिदा आखीना खालैसे थेला धन सम्पत्ति य्हो लखम्ला? थे भड्बा म्हिदा खीमाहेनसे जे थेसे थेला धन सम्पत्ति भोखम्ला।

30 “जुन म्हि डादेन छ्याम आढिक, थे म्हि डाला बिरोधी तला। ओच्छे जुन म्हिसे डा मुबा ग्लारी म्हिगदे आभ, थे म्हिसे डाला बिरोधी गे लला।* 31 थेतबासेलमा म्हिगदेसे जस्तोन पाप गेदेन पाप तामगदे लसैनोन थेनीगदेदा माफ लला। तर परमेश्वरला आत्मादा बिरोध लसी पाप ताम लबा म्हिसे खाड्मै माफ आयाड्। 32 थेहड् लसीन खालै म्हिसे परमेश्वरसे पुड्खबा म्हिदा बिरोध लसी ताम पाड्सै थेसे माफ याड्ला। तर परमेश्वरला आत्मादा बिरोध लसी ताम पाड्जी भिसम थेदा दान्देला धुडरी माफ आल, लिच्छाला जुनीरीनोन माफ आयाड्।*

दोड खाहड् लसी डोसेबा

लूका ६:४३-४५

33 “ज्यना लसी सयार लबा दोडरी ज्यना लसीन रोला। ओच्छे ज्यना लसी सयार आलबा दोडरी ज्यना लसी आरो। थेतबासेलमा सयार लजीम कि आलजीम भिबा ताम रोग्यामसेन था तला।* 34 पुरखीला कोलागदे, एनीगदेला सेमरीन पाप मुला भिसम खाहड् लसी ज्यबा ताम पाड्खम्ला? तिग्दा भिसम सेमरी जुन ताम मुला, थेनोन ताम एनीगदेसे पाड्बा हिन्ना।* 35 ज्यबा सेम मुबा महिला सेम न्हडग्याम ज्यबान ताम थोन्मुला ओच्छे नड्बा सेम मुबा महिला सेम न्हडग्याम नड्बान ताम थोन्मुला।* 36 थेतबासेलमा एनीगदेसे डाला ताम ड्यान्गो, परमेश्वरसे निसाफ लबा धिनकुनु आतो:बा ताम पाड्बा म्हिगदेसे ह्वाड ह्वाडला हिसाब उन्तो:ला। 37 तिग्दा भिसम एला दोष मुला कि आरे भिबा एला तामग्यामसेन था तला।”

म्हिगदेसे उदेकला चिनु म्हाड्बा

मर्कूस ८:११-१२; लूका ११:२९-३२

38 जमाहेनसे यहूदी धर्मगुरुगदेदेन फरिसीगदे न्हडला कोड कोडसे येशूदा “गुरु, डन्दा ह्वाडसे लबा उदेकला गे च्याबा सेम मुला” भिसी पाड्मा,*

39 येशूसे थेनीगदेदा चुहड् भिसी जोहाब पिन्जी, “नड्बा बानिबेहोर थोसी स्य्हान्दोदेन छ्याम ब्रेल्सी भ्रबा म्हिगदेसे उदेकला चिनु जे म्हाड्मुला। तर दान्देला म्हिगदेदा चा योना अगमवक्ताला चिनु बाहेक अर्गु चिनु आउन।* 40 तिग्दा भिसम धिन सोम म्हुन सोमधोना योना घेन तार्डाला फोरी चिबा हड् लसी परमेश्वरसे पुड्खबा म्हिएनोन धिन सोम म्हुन सोमधोना धुर्सारी तला।* 41 च्यागो, परमेश्वरसे निसाफ लबा धुडरी निनवे शहरला म्हिगदे रे:सी दान्देला म्हिगदेला दोष उन्ना। तिग्दा भिसम योना अगमवक्तासे पाड्बा परमेश्वरला यहुल्सा समाचार थे:सी, थेनीगदे ह्वाड ह्वाडला पाप ख्लासी परमेश्वरपट्टि दो:बा मुबा। तर चुरी योना अगमवक्ता भन्दा घेन म्हि गिक मुला। तसैनोन एनीगदेसे थेला ताम आड्यान्नी।* 42 निसाफ लबा धुडरी ल्होग्याम खबा ग्लेस्यासे दान्देला म्हिगदेला दोष

† 12:29 येशूसे चु कथा थेसे भड्बा म्हि हड्बा शैतानना ग्लेदा ढाजी भिसी घोना लबारी सुड्बा हिन्ना। तिग्दा भिसम थेसे म्हडदा महिला ल्हड्ग्याम तापबा मुबा। * 12:30 मर्कू ९:३९ * 12:32 लूका १२:१० * 12:33 मत्ती ७:२० * 12:34 मत्ती ३:७; २३:३३; १५:१८; लूका ३:७ * 12:35 मत्ती १५:१८ * 12:38 मत्ती १६:१; मर्कू ८:११ * 12:39 मत्ती १६:४; मर्कू ८:१२ * 12:40 जोना १:१७ * 12:41 जोना ३:५

उन्ना, तिग्दा भिसम थे सोलोमन ग्लेला ज्ञान बुद्धिला ताम ड्यान्बारी ल्हानान थारेडग्याम खबा मुबा। तर च्यागो, चुरी सोलोमन ग्ले भन्दा घेन म्हि मुसैनोन थेला ताम आड्यान्नी।*

डाच्छा थोन्सी निबा म्हड दोःसी खमाहेन्से

43 “म्हड महिला ल्हुडग्याम थोन्सी निमाहेन्से थेसे बलपबा न्हबारी तोडतोडबा ग्लारीक्यार ग्ला म्हाइसी भ्रला। ओच्छे खानडएनोन बलपबा न्हबा ग्ला आयाड्माहेन्से, 44 “डा जुन महिला ल्हुडग्याम थोन्सी खजी थेनोन महिला ल्हुडरी चिबारी निड” भिसी दोःसी निला। दोःसी खमा थेसे डाच्छा ह्वाड चिबा ग्ला खालै आरेबा साडसाडबा म्हाडला। 45 जमाहेन्से थे म्हड निसी ह्वाड भन्दा नइबा अर्गु गोर निस म्हडगदे भसी थे म्हि न्हडरी वाड्सी चिमुला। थेतबासेलमा थे महिला गति डाच्छाला भन्दा लिच्छाला गति झन नइबा तला। दान्देला म्हिगदेदाएनोन थेहडबान तला।”

येशूला आमामेन आलेगदे

मर्कुस ३:३१-३५; लूका ८:१९-२१

46 येशू म्हिगदेदेन छ्याम ताम लबान लबा धुडरी येशूदेन छ्याम ताम लबारी भिसी थेला आमामेन आलेगदे मडग्यार खसी चिबा मुबा। 47 जमाहेन्से म्हि गिकसे “ह्वाडेन छ्याम ताम लबारी भिसी ह्वाडला आमामेन आलेगदे मडग्यार खसी चिमुला” भिसी येशूदा पाड्जी।

48 तर येशूसे थे म्हिदा “डाला आमा खाल? डाला आलेगदे खाल?” 49 ओच्छे येशूसे ह्वाडला चेलागदेदा उन्बान चुहड् भिसी सुड्जी, “च्यागो, चुरी मुबा जम्मान डाला आमामेन आलेगदे हिन्ना। 50 तिग्दा भिसम जुन म्हि स्वर्गरी धन्छ्याबा डाला आबासे म्हनबा अन्छार भ्रला थेनोन डाला आमा, डाला आडा ओच्छे डाला आले हिन्ना।”

13

ब्लु ह्वबाला उखान

मर्कुस ४:१-९; लूका ८:४-८

1 जमाकुनु येशू दिमग्याम फेप्सी समुन्द्रला कुनीरी धन्छ्याजी। 2 ओच्छे थेरी महिला हुल मुबासेलमा येशू दोंगारी धन्छ्याजी। ओच्छे महिला हुल चा समुन्द्रला कुनीरीक्यार राप्सी चिजी।* 3 जमाहेन्से थेरी मुबा म्हिगदेदा येशूसे उखानग्याम ल्हानान ताम लोपबान चुहड् भिसी सुड्जी, “च्यागो, ब्लु ह्वबा म्हि गिक ब्लु ह्वबारी भ्रजी। 4 थे म्हिसे ब्लु ह्वमा कोड ब्लु ग्यामरी परब तजी, थे ब्लु चरागदे खसी चजी। 5 कोड ब्लु चा युडबाला घहड मुबा सरी परब तजी, ओच्छे थेरी साप्रा ल्हाना आरेबासे लमा योनान फुड्जी। 6 तर साप्रा ल्हाना आरेबासे लमा थेला टा नुपना निआम्याड्नी। थेतबासेलमा धिनीसे क्रोसी थे दोड सिजी। 7 कोड ब्लु चा पुजु झाडरी परब तजी, ओच्छे थे ब्लुदेन पुजु दोड छ्याम छ्यामनोन फुड्जी। तर पुजु दोड ल्हबान निबासे लमा थे दोडदा हाप तजी। 8 कोड ब्लु चा ज्यबा सरी परब तसी फुड्जी, ओच्छे कोड दोडरी दोबबर, कोड दोडरी तेबबर, कोड दोडरी चौबरधोना रोजी। 9 जुन म्हिदा ड्यान्बा सेम मुला थेसे ड्यान्सी घोड।”

येशूसे तिग्दा उखान सुड्बा?

मर्कुस ४:१०-१२; लूका ८:९-१०

10 जमाहेन्से चेलागदेसे येशूदा “ह्वाडसे थेनीगदेदा तिग्दा उखानग्यामसे जे लोपबा?” भिसी ड्योडमा, 11 येशूसे थेनीगदेदा चुहड् भिसी जोहाब पिन्जी, “म्हिसे था आयाड्बा स्वर्गला यहुल्साला ताम डाइ एनीगदेदा घोखम्बा ज्ञान बुद्धि पिन्बा मुला। तर थेनीगदेदा चु ज्ञान बुद्धि पिन्बा आरे। 12 तिग्दा भिसम जुन म्हिसे डाइ लोपबा तामदा सेम लसी ड्यान्ना, थेदा डाइ अझन घोना लला। तर डाइ लोपबा ताम आड्यान्बादा चा थेसे जुन घोबा मुला थे तामएनोन म्हाना लला।* 13 थेनीगदेसे डाइ लबा गे

* 12:42 १ राजा १०:१-१०; २ इति ९:१-१२ * 13:2 लूका ५:१-३ * 13:12 मती २५:२९; मर्कु ४:२५; लूका ८:१८; १९:२६

च्याबाम च्यामुला तर आम्राड्मुला, ओच्छे डाइ पाड्बा ताम ड्यान्बाम ड्यान्मुला तर आघोमुला। थेतबासेलमान डाइ थेनीगदेदा उखानग्याम पाड्बा हिन्ना।

14 “परमेश्वरसे यशैया अगमवक्ताग्याम सुड्बा ताम चुहड् लसी पूरा तबा मुला, थेनीगदेसे ड्यान्बाम ड्यान्मुला तर खाइमै आघोमुला,

च्याबाम च्यामुला तर खाइमै आम्राड्मुला,

15 तिग्दा भिसम चु म्हिगदेला सेम कोड्बा मुला,

थेनीगदेला नाब्यडसे आथे:मुला,

ओच्छे थेनीगदेसे मी च्युम्बा मुला।

आहिन्सम थेनीगदेसे म्राड्सेला मुबा,

थे:सेला मुबा, सेमहेन्सेन घोसेला मुबा,

डापट्टि दो:सेला मुबा,

ओच्छे थेनीगदेदा डाइ खम्ना लसेला मुबा।”*

16 जमाहेन्से येशूसे हाडला चेलागदेदा चुहड् भिसी सुड्जी, “एनीगदेसे परमेश्वरग्याम मोलम याड्ला, तिग्दा भिसम एनीगदेसे म्राड्बाएनोन मुला थे:बाएनोन मुला। 17 च्यागो, एनीगदेसे डाला ताम ड्यान्गो, ल्हानान अगमवक्तादेन परमेश्वरसे म्हन्बा अन्छार भ्रबा म्हिगदेसे एनीगदेसे म्राड्बा चु तामगदे च्याबारी म्हाड्मुबा। तर थेनीगदेसे आम्राड्नी, ओच्छे एनीगदेसे थे:बा ताम थेनीगदेसे थे:बारी म्हाड्जी, तर थे:बारी आम्याड्नी।*

ब्लु ढ्वबा उखानना अर्थ

मर्कूस ४:१३-२०; लूका ८:११-१५

18 “लु, ब्लु ढ्वबा उखानना अर्थ ड्यान्गो। 19 ग्यामरीक्यार परब तबा ब्लुला अर्थ चुनोन हिन्ना, जुन म्हिसे परमेश्वरला बचन ड्यान्ना, तर थेसे घोबा भन्दा डाच्छान शैतान खसी थेनीगदेला सेमग्याम थे ताम ब्यन्सी भोर्ला। 20 युड्बाला घहड मुबा सरीक्यार परब तबा ब्लुला अर्थ चुनोन हिन्ना, जुन म्हिसे परमेश्वरला बचन ड्यान्सी तुरुन्तन विश्वास लला। 21 तर थेनीगदेला विश्वासला टा आरेबासे लमा, थे छिन्ड जे चिला। ओच्छे परमेश्वरला बचनदा विश्वास लबासे लमा थेनीगदेदा आपत विपत खमाहेन्से थेनीगदेसे विश्वास लबा खलाला। 22 पुजु झाड न्हडरी परब तबा ब्लुला अर्थ चा जुन म्हिसे परमेश्वरला बचन ड्यान्ना, तर चु जम्बुलिडला धन्दा सुर्दादेन धन सम्पत्तिला लोभसे लमा परमेश्वरला बचनदा गे लआपुड्। थेतबासेलमा थेला विश्वासग्याम तिगै आरो। 23 तर ज्यबा सरी परब तबा ब्लुला अर्थ चा जुन म्हिसे परमेश्वरला बचन ड्यान्सी हाडला सेमरी थान्ना, ओच्छे थेला विश्वासग्याम दोब्बर, तेब्बर, चौबरधोनाला रो रोला।”

कोडोड म्नाला उखान

24 दो:सी येशूसे थेनीगदेदा उखान गिक सुड्जी, “च्यागो, स्वर्गला यहुल्सा हाडला बुरी ज्यबा ब्लु ढ्वबा म्हि हड्बान हिन्ना। 25 तर जम्मान म्हिगदे म्हेर्बा धुडरी थेला शत्रु खसी ग्वा न्हडरी कोडोड् डां ढ्वसी निजी। 26 थे ग्वा ल्हेबान निसी रोबा धुडरी चा ग्वा न्हडरी कोडोडला दोडएनोन म्राड्जी।

27 “थेतबासेलमा नोकरगदे दिमला मालिक मुबा ग्लारी खसी ‘बुरी हाडसे ग्वा जे ढ्वबा आहिन? थेरीम कोडोडएनोन फुड्जीम’ भिसी भिजी।

28 “जमाहेन्से दिमला मालिकसे थेनीगदेदा ‘खालै शत्रुसे चुहड् लबा हिन्ना’ भिसी भिमा, नोकरगदेसे ‘थेहड् भिसम डनी निसी थे कोडोड स्योड्सी भ्याड्गो?’ भिसी भिजी।

29 “तर थे मालिकसे नोकरगदेदा चुहड् भिसी पाड्जी, ‘दान्देन थास्योड्गो, तिग्दा भिसम एनीगदेसे कोडोड भिसी स्योड्मा ग्वाएनोन स्योड्सी भ्याड्ला। 30 बरु ग्वा खन्बा धुड आततेथोना थेहड्बान मुगै। ग्वा खन्बा धुडरी खन्बागदेदा डाच्छा कोडोड स्योड्सी ख्राड्बाला लागिरी ग्ला गिकरी थान्गो। तर एनीगदेसे ग्वा जे भसी डाला भकारीरी थान्गो भिसी पाड्ला।”

* 13:15 यशै ६:९-१० * 13:17 लूका १०:२३-२४ † 13:25 “कोडोड” भिबा चा सुन हड्बान म्राड्बा म्रा हिन्ना।

पच्छै बलुला उखानदेन खमीरला उखान

मर्कूस ४:३०-३४; लूका १३:१८-२१

31 दोःसी येशूसे थेनीगदेदा अर्गु उखान गिक सुड्जी, “च्यागो, स्वर्गला यहुल्सा म्हि गिकसे घुर्यानरी ह्वबा पच्छै बलुला गेडा गिक हड्बान हिन्ना। 32 पच्छैला गेडा ढापदुपगदे न्हडरी जम्मान भन्दा जजा तसैनोन थे फुइसी ल्हेबान निसी दोडनोन दोला। ओच्छे थे पच्छै दोडला हांगारी चरागदे खसी जड सहोसी चिला।”

33 दोःसीनोन येशूसे थेनीगदेदा अर्गु उखान गिक सुड्जी, “च्यागो, स्वर्गला यहुल्सा चा गेडरी युबा खमीर हड्बान हिन्ना। थे खमीर म्रिडम्हेमे गिकसे फाम सोम ब्रारी युसी ज्योप्ला। ओच्छे थे ब्रा आभोतेधोना थेसे घप्सी थान्ना।”

34 येशूसे महिला हुलदा जम्मान ताम उखानग्यामसे जे लोपजी। उखान आसुड्तेधोना थेनीगदेदा येशूसे तिमै ताम आलोपनी। 35 परमेश्वरसे अगमवक्ताग्याम सुड्बा ताम चुहड् लसी पूरा तजी, “डाइ ताम लमा उखानग्यामसे जे लला, ओच्छे जम्बुलिड टुड्माहेन्से दान्देधोना था आरेबा ताम डाइ घोना लला।”*

कोडोड म्नाला उखानना अर्थ

36 जमाहेन्से थे महिला हुलदा ख्लासी येशू दिम न्हडरी फेपजी। ओच्छे थेला चेलागदेएनोन दिम न्हडरी खसी, “बुरी फुइबा कोडोड म्नाला उखानना अर्थ घोना लसी पिन्गो” भिसी ड्योइमा, 37 येशूसे थेनीगदेदा चुहड् भिसी सुड्जी, “ज्यबा बलु ह्वबा म्हि चा परमेश्वरसे पुइखबा म्हि हिन्ना। 38 बु भिबा चा चु जम्बुलिड हिन्ना ओच्छे ज्यबा बलु भिबा चा परमेश्वरला यहुल्साला म्हिगदे हिन्ना, कोडोड म्ना भिबा चा परमेश्वरदा बिरोध लबागदे हिन्ना। 39 ओच्छे कोडोड ह्वबा शत्रु चा शैतान हिन्ना, बाली खन्बा धुइ भिबा चा परमेश्वरसे जम्बुलिडला जम्मान म्हिगदेला निसाफ लबा धुइ हिन्ना।† ओच्छे बाली खन्बागदे चा स्वर्गदूतगदे हिन्ना। 40 कोडोड स्योइसी म्हिगदेसे खाहड् लसी मेरी फर्मुला थेहड् लसीन परमेश्वरसे जम्बुलिडला जम्मान म्हिगदेला निसाफ लबा धुइरीनोन थेहड् नोन लला। 41 जमा धुइरी परमेश्वरसे पुइखबा म्हिसेनोन डाला स्वर्गदूतगदेदा पुइखला। थेनीगदेसे म्हिगदेदा पाप लपुड्बा जम्मान सहेदेन पाप गे लबा जम्मान म्हिगदेदा डाला यहुल्साग्याम हुप लला। 42 ओच्छे थेनीगदेदा मेरी युला, थेरी थेनीगदे स्वा क्रेसी क्रेसी क्राबा क्रिड्बा लला। 43 जमाहेन्से परमेश्वरसे म्हन्बा अनछार भ्रबा म्हिगदे हाडला परमेश्वर आबाला यहुल्सारी धिनी हड् नोन यहाल यहाल तसी चिला। जुन म्हिदा घोबा सेम मुला थेसे ज्यना लसी ड्यान्सी घोउ।

ल्हुसी थान्बा धनना उखानदेन मोतीला उखान

44 “च्यागो, स्वर्गला यहुल्सा वारीरी ल्हुसी थान्बा धन हड्बान हिन्ना। थे धन म्हि गिकसे स्यापजी। जमाहेन्से थे ल्हानान ताड्सी थे धन थेरीन ल्हुसी थान्सी दिमरी निजी। ओच्छे थेसे हाडदेन छ्याम मुबा जति जम्मान चुड्सी थे वारी ग्लुजी।

45 “चुहड् लसीन स्वर्गला यहुल्सा ज्यबा खाल्ला मोती म्हाइसी भ्रबा व्यापारी हड्बान हिन्ना। 46 थेसे ज्यबा खाल्ला मोती स्यापमाहेन्से हाडदेन छ्याम मुबा जति जम्मान चुड्सी थे मोती ग्लुजी।

तार्डा चुड्बा घ्याडला उखान

47 “थेहड् लसीन स्वर्गला यहुल्सा समुन्द्ररी रोपबा घ्याड हड्बान हिन्ना। थे घ्याडरी ल्हानान थरीला तार्डागदे परब तला। 48 ओच्छे घ्याड नाडनोन तार्डा परब तमाहेन्से म्हिगदेसे समुन्द्रला कुनीरी भसी गे खेल्बा तार्डागदे ताडरी थान्ना, गे आखेल्बा तार्डागदे पाखारी भ्याड्ला। 49 चुहड् नोन लसी परमेश्वरसे जम्बुलिडला जम्मान म्हिगदेला निसाफ लबा धुइरीनोन स्वर्गदूतगदे खसी ज्यबा गे लबा म्हिगदेदेन नड्बा गे लबा म्हिगदेदा फेला। 50 ओच्छे परमेश्वरसे कुल्बा ताम आड्यान्बागदेदा चा मेरी युला। थेरी म्हिगदे स्वा क्रेसी क्रेसी क्राबा क्रिड्बा लला।”

* 13:35 भजन ७८:२ † 13:39 “निसाफ लबा धुइ” चा ग्रीक बाइबलरी जम्बुलिड जिन्बा धुइ भिसी भिबा मुला। पद ४० देन ४९ पदरीनोन चुहड् लसीन भिबा मुला।

छारदेन पुरानो धन

51 जमाहेन्से येशूसे थेनीगदेदा “एनीगदेसे चु ताम जम्मान घोजी?” भिसी ड्योइमा, “घोजी” भिसी थेनीगदेसे येशूदा जोहाब पिन्जी। 52 थेतबासेलमा येशूसे चेलागदेदा “च्यागो, स्वर्गला यहुल्साला बारेरी था याड्बा यहूदी धर्मगुरुगदे दिमला दोप्ता हड्बान हिन्ना। तिग्दा भिसम थेसे हाडला दुकुटीग्याम छारदेन पुरानो धनगदे तेःला” भिसी सुड्जी।

नासरतला म्हिगदेसे येशूदा मान आलबा

मर्कूस ६:१-६; लूका ४:१६-३०

53 चु उखानगदे सुड्सी जिनमाहेन्से येशू थेग्याम हाडला नाम्सारी फेप्जी। 54 ओच्छे हाडला नाम्सारी धोखमाहेन्से यहूदीगदे हुप तबा दिमरी फेप्सी थेरी मुबा म्हिगदेदा लोप्जी। येशूसे लोप्बा म्राड्सी थेरी मुबा म्हिगदे उदेक तसी चुहड् भिजी, “चु म्हिसे चुहड्बा उदेकला गे लबा शक्तिदेन बुद्धि खानडग्याम याड्जी? 55 चु सिकर्मीला झा आहिन? चुला आमा मरियम ओच्छे आलेगदे याकूब, योसेफ, सिमोनदेन यहूदा आहिन? 56 चुला जम्मान आडागदे यहाडदेन छ्यामनोन आरे? तसैनोन चुसे चु जम्मान ज्ञान बुद्धिदेन शक्ति खानडग्याम याड्जी?” 57 जमाहेन्से थेनीगदेदा येशूदेन छ्याम बोमो खजी।

तर येशूसे थेनीगदेदा “च्यागो, अगमवक्तादा हाडला नाम्सारीदेन हाडला दिमरी बाहेक अर्गु खजिबै ग्लारी निसैनोन मान लला” भिसी सुड्जी।* 58 थेनीगदेसे विश्वास आलबा म्राड्सी येशूसे थेरी ल्हाना उदेकला गे आलनी।

14

बपत्तिस्मा पिन्बा यूहन्नादा साइबा

मर्कूस ६:१४-२९; लूका ९:७-९

1 थे धुइरी गालील अञ्चलरी शासन लबा हेरोदसे येशूसे लबा उदेकला गेला बारेरी थेःजी। 2 जमाहेन्से थेसे हाडला गे लबागदेदा “थे म्हि बपत्तिस्मा पिन्बा यूहन्ना हिन्ना। थे सिबाग्याम सोसी खबा हिन्ना। थेतबासेलमान थेसे चुहड्बा उदेकला गेगदे लबा हिन्ना” भिसी भिजी।

3 हेरोदसे हाडला आले फिलिपला म्रिड हेरोदियाससे लमा डाच्छा यूहन्नादा झ्याल्खानरी झाड्मुबा।* 4 तिग्दा भिसम हेरोदसे हाडला आले चाडदा थान्बासे लमा यूहन्नासे हेरोददा “हाडसे आले चाडदेन छ्याम ब्याह लबा ठीक आहिन” भिसी पाड्मुबा।* 5 थेतबासेलमा हेरोदसे यूहन्नादा साइबारी म्हाइमुबा। तर हेरोद म्हिगदे म्राड्सी लोड्मुबा। तिग्दा भिसम म्हिगदेसे बपत्तिस्मा पिन्बा यूहन्नादा अगमवक्ता हिन्ना भिसी भिमुबा।

6 हेरोदसे हाड न्हबा धिनदा ढन्सी घेन भोज लजी। जमाकुनु हेरोदियासला झामे जम्मान म्हिगदेला डाच्छापट्टि स्यूहसी हेरोददा ल्हानान ताड्ना लजी। 7 थेतबासेलमा हेरोदसे थेदा “एसे जे हीबा थेनोन पिन्ना” भिसी कबुल लजी।

8 तर थेला आमासे थेदा बपत्तिस्मा पिन्बा यूहन्नाला थोबो ह्नीगो भिसी पाड्बासे लमा थेसे “डादा दान्देन बपत्तिस्मा पिन्बा यूहन्नाला थोबो खार्बारी भउ” भिसी भिजी।

9 जमाहेन्से हेरोद ग्लेदा ल्हानान दुख ड्हमूजी। तसैनोन हाडला डोन्बोगदेला ओन्छाडरी जे हीसै पिन्ना भिसी घान फाबासे लमा थेसे भिबा हड्न्नोन लउ भिसी सिपाहीगदेदा कुल्जी। 10 ओच्छे थेनीगदे झ्याल्खानरी निसी यूहन्नाला थोबो थाजी। 11 जमाहेन्से यूहन्नाला थोबो खार्बारी भसी थे माइदा पिन्जी। ओच्छे थे माइसे भोर्सी हाडला आमादा पिन्जी। 12 यूहन्नादा साइजी भिबा ताम थेःमाहेन्से यूहन्नाला चेलागदे खसी लास भोर्सी ल्हुजी। जमाहेन्से यूहन्नाला चेलागदे येशू मुबा ग्लारी खसी थे जम्मान ताम पाड्जी।

* 13:57 यूह ४:४४ * 14:3 लूका ३:१९-२० * 14:4 लेवी १८:१६; २०:२१

येशूसे हजार डा म्हिदा चबा सहे पिन्बा

मर्कूस ६:३०-४४; लूका ९:१०-१७; यूहन्ना ६:१-१५

13 बपतिस्मा पिन्बा यूहन्नादा साइजी भिबा ताम थे:माहेन्से येशू हाड गिक जे दोंगारी क्रे:सी सुनसान ग्लारी फेपूजी। तर येशू थेग्याम सुनसान ग्लारी फेपूजी भिबा ताम थे:सी शहर शहरग्याम महिला हुल भ्रसीन येशू मुबा ग्लारी निजी। 14 येशू समुन्द्रला कुनीरी धोमा ल्हानान महिला हुलदा म्राइसी थेदा दया रे:जी। थेतबासेलमा येशूसे थेनीगदेला आखम्बा म्हिगदेदा खम्ना लजी।

15 ओच्छे ड्यसे तमाहेन्से येशूला चेलागदे थे मुबा ग्लारी खसी “दाहेन्से ड्यसे तसी जिन्जी, चु सुनसान ग्लारी तिगै आरे। थेतबासेलमा चु म्हिगदेदा पुइगो। ओच्छे थेनीगदे नाम्सा नाम्सारी निसी हाड हाडला लागिरी चबा सहे ग्लुसी चगै” भिसी येशूदा पाइजी।

16 तर येशूसे थेनीगदेदा “चु म्हिगदेदा तिग्दा पुइसे? एनीगदेसेन चुगदेदा चबा सहे पिन्गो” भिसी सुइजी।

17 जमाहेन्से थेनीगदेसे येशूदा “डन्देन छ्याम गोर डा गेडदेन गोर न्ही तार्डा भन्दा अर्गु तिगै आरे” भिसी भिजी।

18 येशूसे थेनीगदेदा “थे गेडदेन तार्डा डादा भउ” भिसी सुइजी। 19 जमाहेन्से येशूसे म्हिगदेदा पाइरी चिपुइजी। ओच्छे गेडदेन तार्डा यारी थोसी स्वर्गपट्टि सहीबान परमेश्वरदा धन्यवाद पिन्जी। ओच्छे गेड क्युइसी म्हिगदेदा भो लसी पिन्गो भिसी चेलागदेदा पिन्जी। जमाहेन्से चेलागदेसे भो लसी म्हिगदेदा पिन्जी। 20 जम्मान म्हिगदेसे म्रेन्ना चसीनोन लेइबा गेडदेन तार्डा चेलागदेसे च्युक न्ही सोली दुइजी। 21 थेरी गेड चबा म्हिगदे म्रिडम्हेमेदेन कोलागदे बाहेकनोन हजार डा हेम्फेबेगदे मुबा।

येशू समुन्द्रथोरी भ्रबा

मर्कूस ६:४५-५२; यूहन्ना ६:१६-२१

22 जमाहेन्से येशूसे तुरुन्तन हाडला चेलागदेदा दोंगारी क्रे:सी क्यामसडपट्टि हाड भन्दा डाच्छा पुइजी। थे धुइरी येशूसे चा महिला हुलदा पुइबान लजी। 23 म्हिगदे पुइसी जिन्माहेन्से येशू हाड गिक जे प्रार्थना लबारी गडरी फेपूजी। थेरी ड्यसेधोनान येशू गिक जे मुबा। 24 थे धुइरी चेलागदे क्रे:सी निबा दोंगा समुन्द्रला कुनीग्याम ल्हानान थारेड थोसी जिन्बा मुबा। तसैनोन लाबा उल्टोग्याम खबासे लमा समुन्द्ररी छाल रे:सी थेनीगदेदा क्यामसडपट्टि निबारी गाहो तबा मुबा।

25 स्यहोला तीन बजेरीक्यार येशू समुन्द्रथोरी भ्रबान थेनीगदेपट्टि फेपूखजी। 26 चेलागदेसे येशू समुन्द्रथोरी भ्रसी फेपूखबान लबा म्राइसी “चु मी म्हडनोन हिन्ना!” भिसी थेनीगदे लोइसी क्रिइजी। 27 तर तुरुन्तन येशूसे थेनीगदेदा “भड लउ, डानोन हिन्ना, थालोइगो” भिसी सुइजी।

28 जमाहेन्से पत्रुससे येशूदा “प्रभु, हाडनोन हिन्सम डादाएनोन समुन्द्रथोरी भ्रसी हाड मुबा ग्लारी खउ भिसी सुइगो” भिसी भिजी।

29 येशूसे “लु, खउ!” भिसी सुइमाहेन्से पत्रुस दोंगाग्याम फापूसी येशू मुबा ग्लारी निबारी समुन्द्रथोरी भ्रबारी छ्याइजी। 30 तर घेन लाबा खबा म्राइसी थे लोइजी। लोइबासे लमा थे समुन्द्ररी डुबब तबारी छ्याइजी। जमाहेन्से थेसे “प्रभु, डादा जोगब लउ” भिसी क्रिइजी।

31 येशूसे तुरुन्तन पत्रुसला या चुइसी “खाइ एला विश्वास, एसे तिग्दा शङ्का लबा?” भिसी सुइजी। 32 येशूदेन पत्रुस दोंगारी क्रे:माहेन्से लाबा म्हाजी। 33 जमाहेन्से दोंगारी मुबा चेलागदेसे येशूदा फ्या लसी, “हाड पक्कान परमेश्वरला झा हिन्ना” भिसी भिजी।

येशूसे आखम्बा ल्हानान म्हिगदेदा खम्ना लबा

मर्कूस ६:५३-५६

34 थेनीगदे समुन्द्र थासी गनेसरेत भिबा ग्लारी धोखजी। 35 थे ग्लाला म्हिगदेसे येशूदा डोसेमाहेन्से क्यारमारला नाम्साला म्हिगदेदा येशू फेपूखजी भिसी पाइसी पिन्जी। जमाहेन्से म्हिगदेसे आखम्बा म्हिगदे जम्मादान येशू मुबा ग्लारी भसी, 36 “चुगदेदा हाडला क्वान्ना जो जे भिसै थुपुइगो” भिसी बिन्ती लजी, ओच्छे येशूला क्वान थुर्बा जति जम्मान खम्जी।

15

रिमठिमला बारेरी लोपुबा

मर्कुस ७:१-२३

1 यरूशलेमग्याम खबा फरिसीगदेदेन यहूदी धर्मगुरुगदे येशू मुबा ग्लारी खसी, 2 “हाडला चेलागदेसे तिग्दा आखे म्हेमेला रिमठिमदा खलाबा? तिग्दा चबा भन्दा डाच्छा या आखुबा?” भिसी ड्योइमा, 3 येशूसे थेनीगदेदा चुहड् भिसी सुड्जी, “एनीगदेसे चा तिग्दा परमेश्वरसे कुल्बा ताम आड्यानना आखे म्हेमेला रिमठिम तेन्बा? 4 तिग्दा भिसम परमेश्वरसे ‘एसे हाडला आबा आमादा मान लउ,’ ओच्छे ‘जुन म्हिसे हाडला आबा आमादा बिरोध लसी नइबा ताम लला थेदा चा साइनोन तो:ला’ भिसी सुड्बा मुला।* 5 तर एनीगदेसे चा ‘जुन म्हिसे हाडला आबा आमादा पिन्तो:बा सहे परमेश्वरदा फुल्बा मुला, थेसे हाडला आबा आमादा मान लआतो:’ भिसी लोपुमुला। 6 चुहड् लसी एनीगदेसे हाडला रिमठिम अनछार भ्रगै भिसी परमेश्वरसे कुल्बा ताम चा गे आखेल्बा सहोबा मुला। 7 थेतबासेलमा कप्टीगदे, परमेश्वरसे यशैया अगमवक्ताग्याम सुड्बा ताम एनीगदेला गे अनछार ढिक्बा मुला।

8 ‘चु म्हिगदेसे सुडसे जे डादा मान लमुला, तर सेमहेन्से चा मान आलमुला।

9 ओच्छे थेनीगदेसे डादा तेन्बाम तेन्मुला,

तसैनोन परमेश्वरसे कुल्बा तामदा भन्दा म्हिसे सहोबा रिमठिमदा घेन म्हन्मुला।†”*

10 जमाहेन्से येशूसे महिला हुलदा हाड मुबा ग्लारी ड्योइसी, “डाइ पाड्बा ताम तिग चीम भिसी एनीगदेसे घोबारी म्हाइगो। 11 परमेश्वरदा तेन्बारी म्हिदा खजिबै चबा सहेसे न्होड्ना आल। तर महिला सेमग्याम थोन्बा नइबा तामसे चा म्हिदा न्होड्ना लमुला” भिसी सुड्जी।†

12 जमाहेन्से चेलागदे येशू मुबा ग्लारी खसी “हाडला ताम थे:सी फरिसीगदे हाडदेन छ्याम बोमो खबा ताम हाडदा था मुला?” भिसी पाड्जी।

13 तर येशूसे चेलागदेदा चुहड् भिसी सुड्जी, “स्वर्गरी धन्छ्याबा डाला आबासे आसूबा दोडगदेा स्योइसी भ्याड्ला। 14 थेतबासेलमा थेनीगदेदा तिगै पाड्आतो:। थेनीगदे मी आम्राड्बा म्हिगदेदा लोपुबा मी आम्राड्बा म्हिगदे हिन्ना। थेतबासेलमा मी आम्राड्बा म्हिसे मी आम्राड्बादान चुड्सी भोर्सम न्हीनोन व्हाडरी ताइला।†”*

15 जमाहेन्से पत्रुससे येशूदा “म्हिगदेदा चबा सहेसे न्होड्ना आलमुला भिसी हाडसे सुड्बा ताम डन्दा घोना लसी पिन्गो” भिसी भिमा, 16 येशूसे थेनीगदेदा चुहड् भिसी सुड्जी, “दान्देधोना अझ एनीगदेसे घोबा आरे? 17 चबा सहे चमाहेन्से फोरी धोमुला। ओच्छे फोग्यामसेनोन मडग्यार थोन्मुला भिबा ताम एनीगदेदा था आरे? 18 तर महिला सेमरी जुन ताम मुला थेनोन ताम सुडग्याम थोन्मुला, ओच्छे थेनोन तामसे म्हिदा न्होड्ना लमुला। 19 तिग्दा भिसम महिला सेमग्याम थोन्बा नइबा तामगदे चा म्हि साइबा, महिला प्रिडदेन छ्याम ब्रेल्सी भ्रबा, खालैदेन छ्याम ब्रेल्सी भ्रबा, यहो लबा, लुसीला ताम पाड्बा ओच्छे महिला तामगन लबा हिन्ना। 20 चु जम्मान तामसे चा म्हिदा न्होड्ना लमुला। तर या आखुना चसी म्हिदा न्होड्ना आलमुला।”

अर्गु यहूलला प्रिडम्हेमेला विश्वास

मर्कुस ७:२४-३०

21 जमाहेन्से येशू थे शहर ख्लासी टुरोसदेन सीदोन भिबा ग्लारीक्यार फेपुजी। 22 थे शहरला अर्गु यहूलला कनानी प्रिडम्हेमे गिक क्रिड्बान खसी येशूदा “प्रभु, दाऊद ग्लेला सन्तान, डादा दया लउ।

* 15:4 प्रस्था २०:१२; २१:१७; वयव ५:१६; लेवी २०:९ * 15:9 यशै २९:१३ † 15:11 यहूदीगदेला ठिम अनछार खालैसे स्यहान्दोदेन छ्याम ढिक्सी परमेश्वरदा तेन्बारी थे चोखो ततो:बा मुबा। थे परमेश्वरसे कुल्बा खजिबै ताम अनछार आभ्रनी भिसम थेदा अशुड् भिसी पाड्मुबा ओच्छे थे दो:सी शुड् दोबारी थेसे बलि फुल्तो:बा मुबा। † 15:13 थे फरिसीगदे चा परमेश्वरसे आसूबा दोडगदे हड्बान हिन्ना। ओच्छे परमेश्वरसे थेनीगदे जम्मादान दोड स्योइबा हड् लसी ले:ला, तिग्दा भिसम थेनीगदेसे परमेश्वरसे म्हन्बा हड् लसी आलोपनी। † 15:14 चुदे खालै म्हि सत्य ताम आसेबा म्हिसे लोपुबा अनछार भ्रजी भिसम तिरिकुनु थे नाश तसी निला। * 15:14 लूका ६:३९

डाला झामेदा म्हडसे ल्हानान दुख पिन्बा मुला” भिसी भिजी। ²³ तर येशूसे तिगै जोहाब आपिन्नी। जमाहेन्से चेलागदेसे येशूदा “चु म्रिडम्हेमेदा चुग्याम पुडगो। तिगदा भिसम चु क्रिड्बान य्हाडला लिच्छा लिच्छा भ्रसी छेर्ना लजी” भिसी बिनती लजी।

²⁴ जमाहेन्से येशूसे थै म्रिडम्हेमेदा “च्यागो, परमेश्वरसे डादा म्हाबा ग्यु हड् तसी चिबा इस्राएलला म्हिगदेला लागिरी जे पुडखबा हिनना” भिसी सुड्जी।

²⁵ तर थै म्रिडम्हेमेसे येशूदा फ्या लबान, “प्रभु, डादा हो लउ” भिसी भिजी।

²⁶ जमाहेन्से येशूसे थै म्रिडम्हेमेदा “च्यागो, कोलागदेदा पिन्तोःबा गेड नगीदां पिन्बा ठीक आहिन” भिसी सुड्मा, ²⁷ थै म्रिडम्हेमेसे “हिनना प्रभु, तर नगीसेनोन थैला दोप्तासे चमा सरी ताडबा भ्राइभ्रुड मी चम्याड्मुला” भिसी भिजी।

²⁸ जमाहेन्से येशूसे थै म्रिडम्हेमेदा “माड, एला विश्वास घेन चीम। एला विश्वाससे लमा एसे म्हन्बा हड् नोन तबा मुला” भिसी सुड्जी। थैनोन धुइरी थैला झामे खम्जी।

येशूसे ल्हानान थरीला रोगसे स्याप्बा म्हिदा खम्ना लबा

²⁹ जमाहेन्से येशू थै ग्ला ख्लासी गालील समुन्द्रला कुनीग्याम गडरी फेप्सी धन्छ्याजी। ³⁰ ओच्छे महिला हुल येशू मुबा ग्लारी खजी। थैनीगदेसे कुज्या तबा, मी आम्राड्बादेन ताड दोबा ओच्छे ल्हानान थरीला रोगसे स्याप्बा म्हिगदेदा भजी। जमाहेन्से येशूसे थै आखम्बा म्हिगदेदा खम्ना लजी। ³¹ येशूसे ताड दोबा म्हि, कुज्या म्हि, मी आम्राड्बा म्हिदेन जम्मान आखम्बा म्हिगदेदा खम्ना लबा म्राड्सी थैरी मुबा जम्मान म्हिगदे उदेक म्हन्सी इस्राएलला म्हिगदेसे तेन्बा परमेश्वरला जयजयकार लजी।

येशूसे हजार बलि म्हिदा चबा सहे पिन्बा

मर्कुस ८:१-१०

³² जमाहेन्से येशूसे चेलागदेदा हाड मुबा ग्लारी ड्योडसी, “चु म्हिगदे म्राड्सी डादा दया रेःजी। तिगदा भिसम चुगदे डादेन छ्याम भ्रबा तिनी सोमरे तजी। ओच्छे चुगदेदेन छ्याम तिगै चबा सहे आरे। थैतबासेलमा चुगदेदा फोइथाननोन पुडबारी आत। फोइथाननोन दिमरी पुडजी भिसम चुगदे ग्यामरीन बिहोस तला” भिसी सुड्जी।

³³ जमाहेन्से चेलागदेसे येशूदा “चुहड्बा तिगै आयाड्बा ग्लारी चुदेला महिला हुलदा ख्वाबारी डन्से खानड्ग्याम गेड भसे?” भिसी भिजी।

³⁴ येशूसे थैनीगदेदा “एनीगदेदेन छ्याम गेड गाते मुला?” भिसी ड्योडमा, थैनीगदेसे “डन्देन छ्याम गोर निस गेडदेन जजाबा तार्डागदे जजाकी मुला” भिसी भिजी।

³⁵ जमाहेन्से येशूसे थैरी मुबा महिला हुलदा पाडरी चिपुड्जी। ³⁶ येशूसे गोर निस गेडदेन तार्डा थोसी परमेश्वरदा धन्यवाद पिन्जी। ओच्छे गेड क्युड्सी चेलागदेदा पिन्जी। जमाहेन्से चेलागदेसे म्हिगदेदा भो लसी पिन्जी। ³⁷ ओच्छे जम्मान म्हिगदेसे ग्रेन्ना चजी। जमाहेन्से चेलागदेसे लेड्बा गेडदेन तार्डा दुड्मा सोली निस तजी। ³⁸ थैरी चबागदे न्हडरी कोलागदेदेन म्रिडम्हेमे बाहेकनोन हेम्फेबेगदे जे हजार बलि मुबा। ³⁹ जमाहेन्से येशूसे जम्मान म्हिगदेदा पुड्जी। ओच्छे येशू ह्याडला चेलागदेदेन छ्याम दौंगारी क्रेःसी मगादान भिबा नाम्सारीक्यार फेपुजी।

16

यहूदी धर्मगुरुगदेसे येशूदा स्वर्गला चिनु उन्गो भिसी पाड्बा

मर्कुस ८:११-१३; लूका १२:५४-५६

¹ कोइ कोइ फरिसीगदेदेन सदुकीगदे येशूला सेम च्याबाला लागिरी येशू मुबा ग्लारी खजी। ओच्छे “चुदे ह्याड परमेश्वरग्याम फेपुखबा हिनसम डन्दा स्वर्गला चिनु उन्गो” भिसी पाड्मा,* ² येशूसे थैनीगदेदा चुहड् भिसी सुड्जी, “एनीगदेसे ड्यसे मु वाला तबा म्राड्सम ‘न्हडगर धिन ज्यबा तला’

† 15:26 यहूदीगदेसे अर्गु यहूलला म्हिगदेदा हेला लसी हि नगी भिसी पाड्मुबा। तर येशूसे चा यहूदीगदेदा कोलागदेदेन छ्याम ओच्छे अर्गु यहूलला म्हिगदेदा चा दिमला नगीदेन दाँजब लसी घोना लसी सुड्बा मुबा। * 16:1 मत्ती १२:३८; लूका ११:१६

भिसी भिमुला। ³ ओच्छे स्यहोरी चा खसुदेन मु वाला तबा म्राड्सम 'तिनी लाबालुडसर खनम' भिसी मु च्यासी एनीगदेसे धिन फेबारी खम्मुला। तर एनीगदेदा ज्यना लसी उन्बा चु धुइला चिनु चा एनीगदेसे घोखम्बा आरे। ⁴ नइबा बानिबेहोर थोसी स्यहान्दोदेन छ्याम ब्रेल्सी भ्रबा म्हिगदेसे उदेकला चिनु जे म्हाइमुला। तर दान्देला म्हिगदेदा चा योना अगमवक्ताला चिनु बाहेक अर्गु चिनु आउन।" जमाहेन्से येशू थे ग्लाग्याम फेपजी।*

येशूसे फरिसीदेन सदुकीगदेला खमीरला बारेरी सुड्बा

मर्कूस ८:१४-२१

⁵ समुन्द्रला क्यामसडपट्टि धोखमाहेन्से गेड भबारी म्ले:जीम भिसी चेलागदेसे था याड्जी। ⁶ थेनोन धुइरी येशूसे थेनीगदेदा "च्यागो, एनीगदे फरिसीदेन सदुकीगदेला खमीरग्याम होशियार तसी चिउ" भिसी सुड्जी।*

⁷ तर चेलागदेसे चा "यहाडसे गेड भबारी म्ले:बासे लमा येशूसे चुहड् सुड्बा हिन्ना" भिसी हाड हाड न्हडरी ताम लबारी छ्याइजी।

⁸ येशूसे चु ताम था याड्सी, "एनीगदे खाहड्बा विश्वास आरेबा म्हिगदे! एनीगदेसे हाडदेन छ्याम गेड आरे भिसी तिग्दा ताम लसी चिबा? ⁹ एनीगदेसे अझ घोबा आरे? डाइ गोर डा गेडसे हजार डा म्हिगदेदा ख्वामा एनीगदेसे गाते सोली गेड दुइबा मुबा? थे ताम म्ले:सी जिन्जी?*" ¹⁰ ओच्छे डाइ गोर निस गेडसे हजार बलि म्हिगदेदा ख्वामा एनीगदेसे गाते सोली दुइमुबा?*" ¹¹ एनीगदेसे अझ तिग्दा आघोबा? डाइ एनीगदेदा गेडला बारेरी पाड्बा आहिन। तर फरिसीदेन सदुकीगदेला खमीर हड्बान तामग्याम होशियार तसी चिउ" भिसी पाड्बा हिन्ना।

¹² जमाहेन्से थेनीगदेसे येशूसे गेडरी युबा खमीरग्याम आहिन, तर फरिसीदेन सदुकीगदेसे लोप्बा तामग्याम होशियार तसी चिउ भिसी सुड्बा चीम भिसी घोजी।

येशू परमेश्वरला म्हि ख्रीष्ट हिन्ना

मर्कूस ८:२७-३०; लूका ९:१८-२१

¹³ कैसरिया फिलिप्पी भिबा ग्लारी धोखमाहेन्से येशूसे हाडला चेलागदेदा "म्हिगदेसे परमेश्वरसे पुड्खबा म्हिदा खाल भिसी भिमुला?" भिसी ड्योइमा, ¹⁴ चेलागदेसे "खालैसे बपत्तिस्मा पिन्बा यूहन्ना, खालैसे एलिया अगमवक्ता, खालैसे यर्मिया अगमवक्ता थेहड् लसीन खालैसे अगमवक्तागदे न्हडला गिक हिन्ना भिसी भिमुला" भिसी येशूदा जोहाब पिन्जी।*

¹⁵ दो:सी येशूसे थेनीगदेदा "तर एनीगदेसे चा डा खाल भिसी म्हन्मुला?" भिसी ड्योइमा, ¹⁶ सिमोन पत्रुससे "हाड परमेश्वरला झा थार्बा पिन्बा ख्रीष्ट हिन्ना" भिसी भिजी।*

¹⁷ जमाहेन्से येशूसे थेदा "योनाला झा सिमोन, एसे परमेश्वरग्याम मोलम याड्बा मुला। तिग्दा भिसम चु ताम एदा म्हिगदेसे पाड्सी था तबा आहिन। तर स्वर्गरी धन्छ्याबा डाला आबासे सुड्सी था याड्बा हिन्ना। ¹⁸ च्यागो, एसे डाला ताम ड्यानगो, एला मिन पत्रुसां हिन्ना। चु युड्बाला पहराथोरी डाइ डाला मण्डली स्होला। चु मण्डलीदा कालला शक्तिगदेसे खाइमै ढाबारी आखम। ¹⁹ थेतबासेलमा डाइ एदा स्वर्गला यहुल्साला साँचोगदे पिन्ना। एसे जम्बुलिडरी जुन सहे दुड्ला, थे सहे स्वर्गरीनोन दुड्ला। ओच्छे एसे जम्बुलिडरी जुन सहे ठोड्ला, थे सहे स्वर्गरीनोन ठोड्ला" भिसी सुड्जी।†* ²⁰ तर चेलागदेदा येशूसे "डा थार्बा पिन्बा ख्रीष्ट हिन्ना भिसी खालैदा थापाड्गो" भिसी सुड्जी।

येशूसे हाड खाहड् लसी सिला भिबा ताम चेलागदेदा सुड्बा

मर्कूस ८:३१-९:१; लूका ९:२२-२७

* 16:4 मत्ती १२:४०; लूका ११:२९ * 16:6 लूका १२:१ * 16:9 मत्ती १४:१७-२१ * 16:10 मत्ती १५:३४-३८ * 16:14 मत्ती १४:१-२; मर्कूस ६:१४-१५; लूका ९:७-८ * 16:16 यूह ६:६८-६९ † 16:18 "पत्रुस" भिबाला अर्थ चा युड्बा हिन्ना। † 16:19 चु पदरी येशूसे पत्रुसदा मण्डलीरी तिगै ताम लपुड्बादेन लआपुड्बा अधिकार पिन्ना भिसी सुड्जी। * 16:19 मत्ती १८:१८; यूह २०:२३

21 जमाहेन्से येशूसे हाडला चेलागदेदा “यरूशलेमरी निसी डाइ यहूदी गन्बागदे, परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेग्याम ल्हानान दुख नातोःला। थेनीगदेसे डादा दुख पिन्सी पिन्सीन साइला। तसैनोन डादा सिबाग्याम सोमरेमाकुनु सोना लला” भिसी सुड्जी।

22 चु ताम थेःमाहेन्से पत्रुससे येशूदा जजाकी क्याथाड भोर्सी “प्रभु, हाडदा परमेश्वरसे खाइमै चुहड् तआपुड्गै, हाडदा चुहड् खाइमै आत!” भिसी बड्जी।

23 तर येशू फ्लिक दोःसी पत्रुसदा “डादा कोलना लबारी म्हाइबा शैतान, ए चुग्याम थोन्सी निउ! तिग्दा भिसम एसे परमेश्वरसे सुड्बा तामदा भन्दा म्हिगदेला तामदा सेम लमुला” भिसी सुड्जी।

24 जमाहेन्से येशूसे हाडला चेलागदेदा चुहड् भिसी सुड्जी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला कुस हाडसेन पुइसी डादेन छ्याम भ्रगै।* 25 तिग्दा भिसम जुन म्हिसे हाडला ज्यान जोगब लबारी म्हाइला, थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे चा जुकजुकधोनाला जुनी याड्ला।* 26 म्हिसे जम्बुलिडनोन यारी किन्सी हाडला ज्यान चा निजी भिसम थेदा तिग ज्यबा तला? जम्बुलिडरी म्हिला ज्यान भन्दा घेन अर्गु तिगै स्हे मुला? 27 तिग्दा भिसम लिच्छा परमेश्वरसे पुइखबा म्हि हाडला आबाला घेन य्हालदेन शक्तिरी स्वर्गदूतदेन छ्याम खला। ओच्छे थेसे जम्मान म्हिदा थेनीगदेसे लबा गे अन्छारला इनाम पिन्ना।* 28 च्यागो, एनीगदेसे डाला ताम ड्यानगो, चुरी मुबा म्हिगदे न्हडला कोइ कोइ म्हि चा परमेश्वरसे पुइखबा म्हि हाडला य्हुल्सारी खबा आम्राड्तेधोना आसि।”

17

येशूला स्य्हाल पोबा

मर्कुस ९:२-१३; लूका ९:२८-३६

1 हुरे लिच्छा येशूसे पत्रुस, याकूबदेन याकूबला आले यहून्नादा जे हाडदेन छ्याम नोबा गडरी भोर्सी फेप्जी। 2 चेलागदेसे च्याना च्यानान येशूला स्य्हाल पोसी धिनी हड् य्हाल य्हाल तजी। ओच्छे थेला क्वानएनोन धिनीला स्हेर हड्बान तजी।† 3 थेनोन धुइरी थेनीगदेसे थेरी मोशादेन एलिया, येशूदेन छ्याम ताम लबान लबा म्राड्जी। 4 चु म्राड्सी पत्रुससे येशूदा “प्रभु, य्हाड चुरी मुबा ज्यबा तजीम। हाडदा ज्यबा छोर्सम चुरी डाइ छाप्रो सोम स्होला, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। 5 थेसे थेहड् पाड्ना पाड्ना तार तार्बा खसु खसी थेनीगदेदा घप्जी। थे खसु न्हडग्याम “चु डाइ सेमहेन्से माया लबा डाला झा हिन्ना, थेदा म्राड्सी डा ल्हानान ताड्बा मुला। थेतबासेलमा एनीगदेसे चुसे भिबा ताम ड्यानगो” भिबा काइ थेःजी।*

6 थे ताम थेःमाहेन्से चेलागदे लोड्सी सरी ख्लुप तजी। 7 तर येशू थेनीगदे मुबा ग्लारी खसी थेनीगदेदा थुर्सी “रेःगो, एनीगदे थालोड्गो” भिसी सुड्जी। 8 जमाहेन्से थेनीगदे रेःसी च्यामा थेरी येशू बाहेक स्य्हान्दो खालैदा आम्राड्नी।

9 जमाहेन्से येशू हाडला चेलागदेदेन छ्याम गडग्याम फाप्वान लबा धुइरी येशूसे चेलागदेदा “च्यागो, परमेश्वरसे पुइखबा म्हि सिबाग्याम आसोतेधोना एनीगदेसे तिनी म्राड्बा चु ताम खालैदा थापाड्गो” भिसी सुड्जी।

10 जमाहेन्से चेलागदेसे येशूदा “यहूदी धर्मगुरुगदेसे तिग्दा एलिया अगमवक्ता डाच्छा खतोःला भिबा?” भिसी ड्योइमा,* 11 येशूसे चेलागदेदा चुहड् भिसी सुड्जी, “हिन्ना, डाच्छा एलिया खला ओच्छे थेसे जम्मान ताम ढिक्ना लला। 12 तर एनीगदेसे डाला ताम ड्यानगो, तिग्दा भिसम एलिया खसी जिन्बा मुला। तसैनोन थेदा डोआसेना म्हिगदेसे जे लइ म्हन्बा थेनोन लजी। थेहड् लसीन

* 16:24 मत्ती १०:३८; लूका १४:२७ * 16:25 मत्ती १०:३९; लूका १७:३३; यहू १२:२५ * 16:27 मत्ती २५:३१; भजन ६२:१२; रोमी २:५ † 17:2 “क्वानएनोन धिनीला स्हेर हड्बान तजी” कोइ कोइ बाइबलरी चा तार तार तजी भिसी भिबा मुला। तर ग्रीक बाइबल अन्छार चु पदला मुल अर्थ चा धिनीला स्हेर हड्बान य्हाल य्हाल तजी भिसी पाड्बा हिन्ना (मर्कुस ९:३; लूका ९:२९)।

* 17:5 व्यव १८:१५; भजन २:७; यशै ४२:१; मत्ती ३:१७; मर्कू १:११; लूका ३:२२; २ पत्रु १:१७-१८ * 17:10 मला ४:५

परमेश्वरसे पुइखबा म्हिसेनोन थेनीगदेला याग्याम ल्हानान दुख नातोःबा मुला।¹³* जमाहेन्से येशूसे बप्तिस्मा पिन्बा यूहन्नाला बारेरी सुड्जीम भिबा ताम चेलागदेसे घोजी।

येशूसे म्हडसे स्याप्बा कोलादा खम्ना लबा

मर्कुस ९:१४-२९; लूका ९:३७-४३

14 थेनीगदे महिला हुल मुबा ग्लारी धोखमाहेन्से म्हि गिक येशूला डाच्छापट्टि पुइ जूसी, ¹⁵ “प्रभु, डाला झादा दया लउ, तिग्दा भिसम थेदा सह म्हडसे ल्हानान दुख पिन्बा मुला। थेदा खाइमाम मेरी, खाइमाम क्युइरी भ्याइमुला। ¹⁶ थेदा खम्ना लसी पिन्गो भिसी डाइ हाडला चेलागदे मुबा ग्लारी भमुबा। तर थेनीगदेसे खम्ना लबारी आखम्नी” भिसी भिजी।

17 जमाहेन्से येशूसे थेनीगदेदा “विश्वास आलबादेन नइबा सेम थोबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे? थेदा चुरी भउ” भिसी सुड्जी। ¹⁸ ओच्छे येशूसे थे म्हडदा बड्जी। बड्माहेन्से थे कोलाला ल्हुइग्याम म्हड थोन्सी यार्जी। जमाहेन्से थे कोला तुरुन्तन खम्जी।

19 ओच्छे चेलागदे सुटुकक येशू मुबा ग्लारी खसी “तिग्दा डन्से थे म्हडदा ताप्वारी आखम्नी” भिसी ड्योइमा, ²⁰ येशूसे थेनीगदेदा “एनीगदेला विश्वास आयोबासे लमा हिन्ना। थेतबासेलमा एनीगदेसे डाला ताम ड्यानगो, चुदे एनीगदेदेन छ्याम पच्छैला ब्लु गिक तेःबा जे विश्वास मुसैनोन चु गडदा ‘चुग्याम लेःउ’ भिसम थे लेःला। एनीगदेला लागिरी आतबा गे तिगै आरे।[†]* ²¹ तसैनोन चुहड्बा म्हड चा फोइथान चिसी प्रार्थना आलतेधोना थोन्सी आयार्मुला” भिसी सुड्जी।[†]

येशूसे हाड खाहड लसी सिला भिबा ताम दोःसी सुड्बा

मर्कुस ९:३०-३२; लूका ९:४३-४५

22 थेनीगदे गालील अञ्चलरी हुप तबा धुइरी येशूसे चेलागदेदा “परमेश्वरसे पुइखबा म्हिदा म्हिगदेला यारी जिम्मा पिन्ना। ²³ थेनीगदेसे थेदा साइला। तसैनोन सिसी सोमरेमाकुनु थेदा सिबाग्याम सोना लला” भिसी सुड्जी। चु ताम थेःसी चेलागदेदा ल्हानान दुख ड्हम्जी।

परमेश्वरला मन्दिरला तिरो

24 येशू हाडला चेलागदेदेन छ्याम कफर्नहुम नाम्सारी फेप्खबा धुइरी परमेश्वरला मन्दिरला तिरो दुइबा म्हिगदे पत्रुस मुबा ग्लारी खसी, “एनीगदेला गुरुसे परमेश्वरला मन्दिरला तिरो फामुला कि आफामुला?” भिसी ड्योइमा,* ²⁵ पत्रुससे “फामुला” भिसी भिजी। जमाहेन्से पत्रुस दिम न्हडरी वाड्सी येशूदा पाड्बारी छ्याइमा येशूसेन, “सिमोन, एला तिग सेम मुला? जम्बुलिडला ग्लेगदेसे हाडलान म्हिगदेग्याम तिरो दुइमुला कि स्य्हान्दो म्हिगदेग्याम दुइमुला?” भिसी ड्योइजी।

26 पत्रुससे “स्य्हान्दो म्हिगदेग्याम दुइमुला” भिसी जोहाब पिन्जी।

जमाहेन्से येशूसे चुहड् भिसी सुड्जी, “थेहड् भिसम हाडला म्हिगदेसे चा आफासै तबा चीम।

27 तसैनोन ए समुन्द्ररी निसी बल्छीसे तार्डा साइसी भउ। एसे जम्मान भन्दा डाच्छा साइबा तार्डाला सुडरी च्यागो, एसे थेला सुडरी म्हुइला डबल गिक स्याप्ला। थे डबल भोर्सी य्हाड न्हीला तिरो फागो। थेनीगदे य्हाडदेन छ्याम बोमो थाखगै।”

18

परमेश्वरला य्हल्सारी खाल घेन तला

मर्कुस ९:३३-३७, ४२-४८; लूका ९:४६-४८; १७:१-२

1 थे धुइरी चेलागदे येशू मुबा ग्लारी खसी, “स्वर्गला य्हल्सारी जम्मान भन्दा घेन खाल तला?” भिसी ड्योइमा,* ² येशूसे कोला गिकदा ड्योइजी। ओच्छे थेनीगदेला गुडरी राप्पुड्सी, ³ चुहड् भिसी

* 17:12 मत्ती ११:१४ † 17:20 म्हिसे गाते विश्वास लबा मुला भिबा चा घेन ताम आहिन, तर थेला जजाबा विश्वासरी परमेश्वरला शक्ति गाते घेन मुला भिबा ताम चा घेन ताम हिन्ना। * 17:20 मत्ती २१:२१; मर्कु ११:२३; १ कोर १३:२ † 17:21 चु पदला ताम ल्हाना हड्बा ग्रीक बाइबलरी भिबा आरे। मर्कुस ९:२९ सहीगो। * 17:24 प्रस्था ३०:१३; ३८:२६ * 18:1 लूका २२:२४

सुड्बारी छ्याइजी, “च्यागो, एनीगदेसे डाला ताम ड्यान्गो, एनीगदेसे हाड हाडला सेम पोसी चु कोलागदे हड्बा आतनी भिसम खाइमै स्वर्गला यहुल्सारी वाड्आम्याड्।* 4 जुन म्हि चु कोला हड्बान सोजो तला थेनोन स्वर्गला यहुल्सारी जम्मान भन्दा घेन तला। 5 जुन म्हिसे चुहड्बा कोलादा डाला मिनरी वास्ता लला, थेसे डादाएनोन वास्ता लला।

6 “तर जुन म्हिसे डादा विश्वास लबा चु कोलागदे न्हडला गिकदा पाप लपुड्ला, थेहड्बा म्हिदा मी खारेरी हान्दा च्योसी समुन्द्री डुबब लबान ज्यबा तला। 7 चु जम्बुलिडरी म्हिगदेदा पाप लपुड्बा स्हेगदे मुला। थेतबासेलमा चु जम्बुलिडला म्हिगदेसे परमेश्वरग्याम सजाय याड्ला। पाप लपुड्बा स्हेगदे मी मुनोन मुला, तसैनोन जुन म्हिसे स्य्हान्दोदा पाप लपुड्ला थे परमेश्वरग्याम सजाय याड्बा म्हि हिन्ना।

8 “एला यादेन काडरी खजिबासे चा एदा पाप लपुड्ला थे थासी भ्याड्गो। तिग्दा भिसम या काड मुसी खाइमै आसिबा मेरी निबा भन्दा मी बरु ठुडे तसी जुकजुकधोनाला जुनी याड्बा चा एला लागिरी ज्यबा तला।* 9 एला मीसे एदा पाप लपुड्जी भिसम तेःसी भ्याड्गो। तिग्दा भिसम मी न्हीनोन मुसी नर्गरी खाइमै आसिबा मेरी निबा भन्दा मी बरु काना तसी जुकजुकधोनाला जुनी याड्बा चा एदा ज्यबा तला।*

महाबा ग्युला उखान
लूका १५:३-७

10 “च्यागो, एनीगदेसे चु कोलागदे न्हडरी खालैदान हेला थालउ। तिग्दा भिसम चु कोलागदेदा च्याबा स्वर्गदूतगदे स्वर्गरी धन्छ्याबा डाला आबादेन छ्याम सदन तला। थेतबासेलमा एनीगदे होशियार तसी चिउ।† 11 तिग्दा भिसम परमेश्वरसे पुड्खबा म्हि म्हाबागदेदा म्हाइबारीदेन थारबा पिन्बारी खबा हिन्ना।†

12 “च्यागो, खालै महिला ग्यार्जा गिक ग्यु न्हडरी गिक म्हाजी भिसम थेसे तिग लला? तिग थेसे बोगल ब्लिसे च्युक कु ग्युदा गडरीन ख्लासी म्हाबा ग्यु म्हाइबारी आनि? 13 च्यागो, डाला ताम ड्यान्गो, चुदे थे म्हिसे म्हाबा ग्यु स्यापूजी भिसम थे आमहबा बोगल ब्लिसे च्युक कु ग्युगदेला लागिरी भन्दा थे स्यापूबा ग्यु गिकला लागिरी ल्हानान ताड्ला। 14 थेहड् लसीन स्वर्गरी धन्छ्याबा एनीगदेला परमेश्वर आबालाएनोन चु कोलागदे न्हडरी खालैनोन नाश थातगै भिबा सेम मुला।

बिरोध लबा म्हि

15 “चुदे परमेश्वरदा विश्वास लबा खालै म्हिसे एला बिरोध लसी आज्यबा गे लजी भिसम ए गिक जे थे मुबा ग्लारी निसी थेदा घोना लउ। चुदे एला ताम ड्यान्सी थेसे हाडसे लबा आज्यबा गे ख्लाजी भिसम थे एला हो तला।* 16 तर थेसे एला ताम आड्यान्नी भिसम एसे हाडदेन छ्याम स्य्हान्दो म्हि गिक अथवा न्ही भोर्सी निउ। ओच्छे परमेश्वरला बचनसे पाड्बा हड् म्हि न्ही अथवा सोम साक्षी थान्सी जम्मान ताम पक्का लउ।* 17 थे म्हिसे थेनीगदेला तामएनोन आड्यान्नी भिसम एसे मण्डलीदा पाड्गो। मण्डलीला तामएनोन आड्यान्नी भिसम एसे थेदा परमेश्वरदा आतेन्बा म्हिदेन तिरो दुड्बा म्हि हड्बान म्हन्सी ख्लापिन्गो। 18 एनीगदेसे डाला ताम ड्यान्गो, एनीगदेसे जम्बुलिडरी जुन सहे दुड्ला थे सहे स्वर्गरीनोन दुड्ला। ओच्छे एनीगदेसे जम्बुलिडरी जुन सहे ठोड्ला, थे सहे स्वर्गरीनोन ठोड्ला।*

19 “दोःसी डाइ एनीगदेदा पाड्ला, जम्बुलिडरी एनीगदे न्हडला म्हि न्ही ठिक्सी तिगै ताम हीजी भिसम स्वर्गरी धन्छ्याबा डाला आबासे एनीगदेदा पिन्ना। 20 तिग्दा भिसम डाला मिनरी म्हि न्ही सोम ठिक्सी खजिबै ग्लारी हुप तजी† भिसम डा थेनीगदेदेन छ्याम तला।”

* 18:3 मर्कू १०:१५; लूका १८:१७ * 18:8 मत्ती ५:३० * 18:9 मत्ती ५:२९ † 18:10 येशूदा विश्वास लबा कोलागदे च्याबा स्वर्गदूतगदेसे कोलागदेला वास्ता लसी सदन थेनीगदेला बारेरी परमेश्वरदा पाड्मुला। † 18:11 चु पदला ताम ल्हाना हड्बा ग्रीक बाइबलरी भिबा आरे (लूका १९:१० सहीगो)। * 18:15 लूका १७:३ * 18:16 वयव १९:१५ * 18:18 मत्ती १६:१९; यूह २०:२३ † 18:20 डाला मिनरी हुप तबा भिबा चा येशूदा विश्वास लबा म्हिगदे हिन्ना।

माफ आपिन्बा नोकरला उखान

21 जमाहेन्से पत्रुससे येशूदा “प्रभु, परमेश्वरदा विश्वास लबा म्हिसे डादा आज्यना लजी भिसम डाइ थेदा गाते रेमधोना माफ लतोःबा? निसरेमधोना?” भिसी ड्योइमा, 22 येशूसे थेदा चुहड् भिसी जोहाब पिन्जी, “निसरेमधोना जे आहिन, एसे थेदा सदन माफ लउ!†* 23 तिग्दा भिसम स्वर्गला यहुल्सा मी ग्ले गिक हड्बान हिन्ना। थेसे हाडला नोकरगदेदेन छ्याम हिसाब किताब किन्बारी म्हाइजी। 24 थे ग्लेसे हिसाब किताब किन्बारी छ्याइमा हजार च्युइ म्हरला डबल† छे किन्बा नोकरदा ग्ले मुबा ग्लारी भजी। 25 तर थे नोकरसे छे फाबारी आखम्बासे लमा ग्लेसे थेदा, थेला मिड, झा झामेदेन थेदेन छ्याम मुबा जम्मान सहे चूड्सी जम्मान टाडगा किन्गो” भिसी कुल्जी।

26 जमाहेन्से थे नोकरसे ग्लेदा फ्या लबान, “हाडसे तिगै रेधोना भ्रान्गो। डाइ हाडला जम्मान टाडगा फाला” भिसी बिन्ती लजी। 27 थे नोकरदा म्राड्सी ग्लेदा दया रेःजी। ओच्छे ग्लेसे थेदा ‘दाहेन्से तजी, एसे चु छे फाआतोः’ भिसी ख्लापिन्जी।

28 “जमाहेन्से थे नोकर निजी। निबान लमा थेसे डाच्छा ग्यार्जा गिक म्हुइला डबल पिन्बा ह्योदा स्यापजी। जमाहेन्से थेसे होला खारेरी न्हेप्सी ‘डाला टाडगा दान्देन भउ’ भिसी भिजी। 29 जमाहेन्से थे ह्योसे थेदा फ्या लबान, ‘तिगै रे भ्रान्गो डाइ एला जम्मान टाडगा पिन्ना’ भिसी बिन्ती लजी। 30 तर थेसे आड्यानना ह्योदा टाडगा आपिन्तेधोना झ्यालखानरी झाइजी।

31 “थे नोकरसे थेहड् लबा म्राड्सी स्यहान्दो ह्योगदेदा ल्हानान दुख ड्हम्सी थेसे लबा जम्मान ताम ग्लेदा पाड्जी। 32 थेहड्बा ताम थेःसी ग्लेसे थे नोकरदा हाड मुबा ग्लारी ड्योइजी। ओच्छे थेदा ‘पापी नोकर, एला ताम थेःसी डाइ दया लसी एसे फातोःबा जम्मान टाडगा ख्लापिन्जी। 33 डाइ एदा दया लमाहेन्से एसेनोन एला ह्योदा दया लआतोःबा?’ भिसी भिजी। 34 थे नोकरला बेहोर म्राड्सी ग्लेदा ल्हानान बोमो खजी। जमाहेन्से थेदाएनोन जम्मान छे आफातेधोना सजाय पिन्बा म्हिगदेला यारी जिम्मा पिन्जी।

35 “थेहड् लसीन एनीगदेसेनोन परमेश्वरदा विश्वास लबा खालै म्हिदा सेमहेन्सेन माफ आलनी भिसम स्वर्गरी धन्छ्याबा डाला आबासेनोन एनीगदेदा थेहड्नुन लला।”

19

येशूसे छोडपत्र लबारी आत भिसी लोपबा

मर्कूस १०:१-१२

1 चु ताम सुड्सी जिन्माहेन्से येशू गालील अञ्चलग्याम यर्दन स्योडला क्याम्सडपट्टि यहुदिया अञ्चलरी फेपजी। 2 येशूला लिच्छा लिच्छा म्हिला हुल खजी। ओच्छे येशूसे थेनीगदेदा खम्ना लजी।

3 ओच्छे कोइ कोइ फरिसीगदेसे येशूला सेम च्याबाला लागिरी, “खालै म्हिसे हाडला मिडदा तिगै दोष उन्सी छोडपत्र लबा ठीक हिन्ना कि आहिन” भिसी ड्योइजी।

4 जमाहेन्से येशूसे थेनीगदेदा चुहड् भिसी सुड्जी, “परमेश्वरसे जम्बुलिड छ्यामाहेन्सेन ‘हेम्कोलादेन मिडकोला सहोबा हिन्ना’ भिबा ताम एनीगदेसे पढब लबा आरे?†* 5 ‘थेतबासेलमा म्हिसे हाडला आबादेन आमादा ख्लासी हाडला मिडदेन छ्याम ढिक्सी चिमुला। ओच्छे थेन्नी ल्हुइ गिक हड्बान तला”†* 6 दाहेन्से थेन्नी ल्हुइ न्ही आहिन, तर ल्हुइ गिकनोन हिन्ना। थेतबासेलमा परमेश्वरसे सहोबा जोडीदा खालैसेन थाफेगै।”

7 थेनीगदेसे दोःसी येशूदा “थेहड् भिसम मोशासे तिग्दा छोडपत्र भिसी मिडदा ख्लागो भिसी कुल्बा?” भिसी ड्योइजी।*

8 जमाहेन्से येशूसे थेनीगदेदा “मोशासे मी एनीगदेला सेम कोड्बासे मिडदा ख्लाबारी तला भिसी पाड्बा हिन्ना। तर डाच्छाहेन्से चा चुहड्बा ठिम आरेबा। 9 थेतबासेलमा एनीगदेसे डाला ताम

† 18:22 “सदन माफ लउ” भिबादा ग्रीक बाइबलरी चा सात गुण सत्तरी पल्ट माफ लउ भिसी भिबा मुला। * 18:22 लूका १७:३-४

† 18:24 “हजार च्युइ म्हरला डबल” भिबा चा करोडौं करोड टाडगा हिन्ना। * 19:4 उत्प १:२७; ५:२ * 19:5 उत्प २:२४

* 19:7 व्यव २४:१-४; मत्ती ५:३१

इयान्गो, जुन म्हिसे हाडला मिड स्य्हान्दोदेन छ्याम ब्रेल्सी आभ्रसै ख्लासी स्य्हान्दो मिडम्हेमेदेन छ्याम ब्याह लला थेसे चा डाचछाला मिडला बिरोधरी ब्रेल्सी भ्रबा हिन्ना। ओच्छे स्य्हान्दोसे ख्लाबा मिडम्हेमेदेन छ्याम ब्याह लबा म्हिएनोन ब्रेल्सी भ्रबा हिन्ना”† भिसी सुड्जी।*

10 जमाहेन्से चेलागदेसे येशूदा “मिड हेम्बो न्हडरी चुहड् तसम ब्याह आलबान ज्यबा हिन्ना” भिसी भिजी।

11 येशूसे थेनीगदेदा चुहड् भिसी सुड्जी, “तर जम्मान म्हि ब्याह आलना चिबारी आखम। जुन म्हिदा परमेश्वरसे ब्याह आलना चिखम्बा शक्ति पिन्ना थे जे चिखम्बा। 12 तिग्दा भिसम कोड न्हमान नपुंसक न्हमुला, कोड म्हिदा चा स्य्हान्दो म्हिसे नपुंसक सहोसी थान्मुला। ओच्छे कोड म्हि चा स्वर्गला यहुल्साला गे लबारी नपुंसक हड् लसीन ब्याह आलना चिमुला। जुन म्हि चुहड् लसी चिखम्बा, थे म्हि जे चुहड् लसी चिउ” भिसी सुड्जी।

येशूसे कोलागदेदा मोलम पिन्बा

मर्कूस १०:१३-१६; लूका १८:१५-१७

13 येशूसे हाडला छ्या कोलागदेथोरी थान्सी मोलम पिन्गै भिसी म्हिगदेसे हाडला कोलागदेदा येशू मुबा ग्लारी भजी। चु म्हाड्सी येशूला चेलागदेसे थे कोलागदे भबा म्हिगदेदा बड्जी। 14 तर येशूसे चेलागदेदा “कोलागदेदा डा मुबा ग्लारी खपुड्गो, थेनीगदेला ग्याम थाकागो। तिग्दा भिसम स्वर्गला यहुल्सा चु कोलागदे हड्बालान हिन्ना” भिसी सुड्जी। 15 जमाहेन्से येशूसे कोलागदेथोरी हाडला छ्या थान्सी मोलम पिन्जी। ओच्छे येशू थे ग्याम फेप्जी।

परमेश्वरला यहुल्सादेन फ्युकपो म्हि

मर्कूस १०:१७-३१; लूका १८:१८-३०

16 फ्युकपो म्हि गिक येशू मुबा ग्लारी खसी, “गुरु, जुकजुकधोनाला जुनी याड्बारी डाइ ज्यबा गे तिग लतो:ला?” भिसी ड्योड्जी। 17 जमाहेन्से येशूसे थेदा “एसे डादा ज्यबा तिग हिन्ना भिसी तिग्दा ड्योड्बा? च्यागो, ज्यबा मी परमेश्वर जे मुला। थेतबासेलमा एदा जुकजुकधोनाला जुनी याड्बा सेम मुसम परमेश्वरसे कुल्बा अन्छार भ्रउ” भिसी सुड्जी।

18 थे म्हिसे येशूदा “परमेश्वरसे कुल्बा खजिबा ताम?” भिसी भिमा, येशूसे थेदा चुहड् भिसी सुड्जी, “एसे म्हि थासाड्गो, स्य्हान्दोदेन छ्याम ब्रेल्सी थाभ्रउ, यहो थालउ, लुसीला ताम पाड्सी थाभ्रउ,* 19 हाडला आबा आमामादा मान लउ, ओच्छे एसे हाडला खिमजेमदा हाडदा हड्नोन माया लउ।”*

20 जमाहेन्से थे म्हिसे येशूदा “चु जम्मान ताम मी डाइ लसीन चिबा मुला। दाहेन्से डाइ लतो:बा तिग मुला?” भिसी भिजी।

21 जमाहेन्से येशूसे थेदा “चुदे ए परमेश्वरदा सेम निबा म्हि दोबा हिन्सम एदेन छ्याम मुबा जम्मान धन सम्पत्ति चूड्सी प्राड्बोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ।” भिसी सुड्जी। 22 येशूला ताम थे:सी थे म्हि ल्हानान दुख ड्हम्सी निजी। तिग्दा भिसम थेदेन छ्याम ल्हानान धन सम्पत्ति मुबा।

23 ओच्छे येशूसे हाडला चेलागदेदा चुहड् भिसी सुड्जी, “च्यागो, एनीगदेसे डाला ताम इयान्गो, फ्युकपो म्हिदा स्वर्गला यहुल्सारी वाड्बारी ल्हानान गाहो मुला। 24 दो:सी डाइ एनीगदेदा पाड्ला, फ्युकपो म्हिदा परमेश्वरला यहुल्सारी वाड्बारी भन्दा ऊँटदा दापला मीग्याम वाड्बारी सजिलो मुला।”

25 चुहड्बा ताम थे:सी चेलागदे उदेक म्हनबान, “थेहड् भिसम खाल्से थार्बा याड्ला?” भिसी येशूदा ड्योड्जी।†

† 19:9 चु ताम “स्य्हान्दोसे ख्लाबा मिडम्हेमेदेन छ्याम ब्याह लबा म्हिएनोन ब्रेल्सी भ्रबा हिन्ना” भिसी ल्हाना हड्बा ग्रीक बाइबलरी भिबा आरे। * 19:9 मती ५:३२; १ कोर ७:१०-११ * 19:18 प्रस्था २०:१३-१६; वयव ५:१७-२० * 19:19 प्रस्था २०:१२; वयव ५:१६; लेवी १९:१८ † 19:25 यहूदीगदेसे फ्युकपो म्हिगदेदा चा परमेश्वरसे मोलम पिन्मुला भिसी म्हनमुबा।

26 जमाहेन्से येशूसे थेनीगदेदा स्हीबान, “चु गे म्हिसे लबारीन आखम्बा गे हिन्ना। तर परमेश्वरसे चु जम्मान गे लखम्बा” भिसी सुड्जी।

27 जमाहेन्से पत्रुससे येशूदा “डन्से मी जम्मान स्हे ख्लासी हाडदेन छ्याम भ्रबा मुला। दाहेन्से डन्से चा तिग याड्ला?” भिसी भिजी।

28 येशूसे थेनीगदेदा चुहड् भिसी सुड्जी, “एनीगदेसे डाला ताम ड्यान्गो, परमेश्वरसे छार जम्बुलिड सहोमा परमेश्वरसे पुड्खबा म्हि य्हाल य्हाल्बा शक्तिशाली ठिरी चिबा धुइरी एनीगदे डालेन छ्याम भ्रबागदेएनोन हाडला च्युक न्ही ठिरी चिला। ओच्छे इस्राएलला च्युक न्ही वंशला निसाफ लला।*

29 थेहड् लसीन जुन म्हिसे डाला लागिरी हाडला दिमनाम, ज्योज्यो आले, नाना आडा, आबा आमादेन झा झामे ख्लाला, थेसे थे भन्दा दोब्बर, तेब्बर, चौबरधोना याड्ला। ओच्छे जुकजुकधोनाला जुनी याड्बा अधिकार याड्ला” भिसी सुड्जी। 30 तर दान्दे डाच्छा मुबागदे न्हडला ल्हानान म्हि लिच्छा तला। ओच्छे दान्दे लिच्छा मुबागदे चा डाच्छा तला।*

20

अडगुरला वारीरी गे लबागदेला उखान

1 “च्यागो, स्वर्गला य्हुल्सा अडगुर वारीला दोप्ता गिक हड्बान हिन्ना। थे म्हि स्य्होरीन हाडला वारीरी गे लबारी म्हि म्हाइबारी निजी। 2 थेसे म्हि स्यापमाहेन्से धिन गिकला ज्याला तोगब लसी थेनीगदेदा अडगुर वारीरी गे लउ भिसी पुड्जी।

3 “दोःसी थे दोप्ता नौ बजेरीक्यार बजाररी निमा गे आयाड्ना चिबा म्हि म्हाड्जी। 4 जमाहेन्से थेसे थे म्हिगदेदा ‘एनीगदेएनोन डाला अडगुर वारीरी गे लबारी निउ। डाइ एनीगदेदा ठीक ज्याला पिन्ना’ भिसी भिमाहेन्से, 5 थेनीगदे गे लबारी निजी।

“थेहड् लसीन दोःसी थे दोप्तासे बाह बजेदेन तीन बजेरीक्यारएनोन स्य्हान्दो म्हिगदे भसी गे लपुड्जी।

6 “पाँच बजेरीक्यार दोःसी थे दोप्ता बजाररी निमा गे आयाड्ना चिबा म्हिगदे स्यापजी। थेतबासेलमा थेसे थे म्हिगदेदा ‘एनीगदे तिग्दा गे आलना धिन गिक य्होड्सी चिबा?’ भिसी भिमा, 7 थेनीगदेसे ‘खाइ डन्दा खलैसेन गे आपिन्नी’ भिसी भिजी। जमाहेन्से थे दोप्तासे ‘थेहड् भिसम एनीगदे डाला अडगुर वारीरी निसी गे लउ’ भिसी भिजी।

8 “ड्यसे तमाहेन्से थे अडगुर वारीला दोप्तासे नाइकेदा ‘गे लबागदे जम्मादान ड्योइसी थेनीगदेदा ज्याला पिन्गो। ज्याला पिन्बा धुइरी जम्मान भन्दा लिच्छा गे लबारी खबा म्हिगदेदा डाच्छा पिन्गो, ओच्छे डाच्छा गे लबारी खबा म्हिगदेदा चा लिच्छा पिन्गो’ भिसी कुल्जी।* 9 जमाहेन्से पाँच बजेरी गे लबारी खबा म्हि खजी। थेनीगदेदा धिन गिकलान ज्याला पिन्जी। 10 पाँच बजेरी खबागदेदा धिन गिकला ज्याला पिन्बा म्हाड्सी स्य्होरी जम्मान भन्दा डाच्छा खसी गे लबागदेसे चा य्हाड्से मी थे भन्दा ल्हानान याड्ला तला भिसी म्हन्जी। तर थेनीगदेसेनोन धिन गिकला ज्याला जे याड्जी। 11 ज्याला याड्माहेन्से थेनीगदेसे थे अडगुर वारीला दोप्ताला बिरोध लबान ताम लबारी छ्याड्जी। 12 ‘लिच्छा खसी घण्टा गिक जे गे लबा चुगदेदा डनी स्य्होहेन्से धिन गिकनोन छेपबा छबा नासी गे लबागदेदा तेनोन तिग्दा हाडसे ज्याला पिन्बा’ भिसी थेनीगदेसे भिजी,

13 “तर थे अडगुर म्हाड्ला दोप्तासे थेनीगदे न्हडला म्हि गिकदा चुहड् भिसी जोहाब पिन्जी, ‘च्यागो, एनीगदेदा डाइ तिगै अन्याय लबा आरे। डाइ धिन गिकला ज्याला पिन्ना भिमा एसेन तला भिसी गे लबा आहिन? 14 थेतबासेलमा एला ज्याला भोर्सी निउ। लिच्छा खसै चुगदेदा एदा तेनोन पिन्बा डाला सेम मुला। 15 डालेन मुबा स्हे डाइ म्हन्बा अन्छार पिन्आम्याड्? डाइ ताड्सी पिन्बा ग्लारी एसे तिग्दा डाह लबा?’

* 19:28 मत्ती २५:३१

* 19:30 मत्ती २०:१६; लूका १३:३०

* 20:8 लेवी १९:१३; वयव २४:१५

16 “चुहड् लसी लिच्छाला म्हि डाच्छा, डाच्छाला म्हि लिच्छा तला।”†*

डादा साइला भिसी येशूसे दोःसीनोन सुड्बा

मर्कूस १०:३२-३४; लूका १८:३१-३४

17 यरूशलेमपट्टि फेपबान लबा धुइरी येशूसे हाडला च्युक न्ही चेलागदेदा कुनी गिकरी भोर्सी चुहड् भिसी सुड्जी, 18 “च्यागो, दान्दे यहाड यरूशलेमपट्टि निबान मुला। दाहेन्से परमेश्वरसे पुइखबा म्हिदा परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेला यारी जिम्मा पिन्ना। जमाहेन्से थेनीगदेसे थेदा ‘चुदा साइनोन तोःला’ भिसी पाड्ला। 19 ओचछे थेदा अर्गु यहुलला म्हिगदेला यारी जिम्मा पिन्ना। जमाहेन्से थेनीगदेसे थेदा खिसी लबान कोर्गसे तोबा ग्याड्बा लसी क्रुसरी टाँगब लसी साइला। तर थेदा सोमरेमाकुनु सिबाग्याम सोना लला।”

जब्दियाला म्रिडसे लबा बिन्ती

मर्कूस १०:३५-४५

20 जमाहेन्से जब्दियाला म्रिडसे हाडला झा न्हीदा छ्यामनोन येशू मुबा ग्लारी भसी खजी। ओचछे थेसे येशूदा फ्या लबान बिन्ती लजी।

21 जमाहेन्से येशूसे थेदा “एदा तिग तोःबा?” भिसी सुड्मा, थेसे येशूदा “हाडसे शासन लबा धुइरी डाला झा न्हीदा गिकदा हाडला दाहिनेपट्टि गिकदा देब्रेपट्टि चिपुड्ला भिसी सुड्गो” भिसी भिजी।

22 तर येशूसे थेनीगदेदा “तिग हीदोबा भिसी एनीगदेदा थानोन आरे। डाइ नाबा दुख एनीगदेसे नाबारी खम्ला?” भिसी सुड्जी।

थेनीगदेसे “खम्ला” भिसी भिजी।

23 जमाहेन्से येशूसे थेनीगदेदा “एनीगदेसे डाइ नाबा दुख मी नाला। तर डाला दाहिने देब्रे चिपुड्ला अधिकार डाला यारी आरे। चु ग्ला डाला आबासे जुन महिला लागिरी सहोबा हिन्ना थे जे चिम्याड्ला” भिसी सुड्जी।

24 चु ताम थेःसी स्यहान्दो चेला च्युइदा चा थेन्ना ज्योज्यो आले न्हीदेन छ्याम बोमो रेःजी। 25 तर येशूसे थेनीगदेदा हाड मुबा ग्लारी ड्योइसी चुहड् भिसी सुड्जी, “च्यागो, एनीगदेदा चु ताम थानोन मुला, अर्गु यहुलला शासन लबा म्हिगदेसे हाडला सेमसे म्हन्बा अन्छार म्हिगदेशोरी शासन लमुला। ओचछे घेन घेन पदरी मुबा म्हिगदेसे हाड भन्दा धिरी मुबा म्हिगदेशोरी शासन लमुला। 26 तर एनीगदे चा थेहड् तबारी आत। जुन म्हि जम्मान भन्दा घेन दोबारी म्हाइला थेसे चा एनीगदेला सेवा लतोःला।* 27 ओचछे एनीगदे न्हडरी जुन म्हि डाच्छा तबारी म्हाइला थे चा एनीगदेला नोकर दोतोःला।* 28 थेहड् लसीन परमेश्वरसे पुइखबा म्हिएनोन स्यहान्दोगदेग्याम सेवा किन्बारी आहिन, तर स्यहान्दोगदेला सेवा लबारी ओचछे हाडलान ज्यान पिन्सी ल्हानान म्हिगदेला पापला सय फाबारी खबा हिन्ना।”

येशूसे मी आम्राड्बा म्हि न्हीदा खम्ला लबा

मर्कूस १०:४६-५२; लूका १८:३५-४३

29 येशू हाडला चेलागदेदेन छ्याम यरीहो भिबा शहरग्याम फेपबान लबा धुइरी महिला हुलएनोन थेनीगदेदेन छ्याम छ्याम खजी। 30 ग्यामला कुनीरी चिबा मी आम्राड्बा म्हि न्हीसे येशू थेनोन ग्याम फेपबान लबा ताम था याड्सी “प्रभु, दाऊद ग्लेला सन्तान! डन्दा दया लउ” भिसी क्रिड्बान भिजी।

31 थे म्हि न्हीदा येशूदेन छ्यामनोन खबा म्हिगदेसे “कुटिसी चिउ” भिसी बड्जी। तर थेन्नी ज्ञन क्रिड्बान, “प्रभु, दाऊद ग्लेला सन्तान डन्दा दया लउ” भिसी भिजी।

32 जमाहेन्से थेन तसी येशूसे थेनीगदेदा “डाइ एनीगदेला लागिरी तिग लगै भिसी म्हन्बा मुला?” भिसी ड्योइजी।

33 थेनीगदेसे येशूदा “प्रभु हाडसे डन्ना मी म्राड्ना लपिन्गो” भिसी भिजी।

† 20:16 चु उखानग्याम येशूसे लोपबा ताम चा डाच्छाहेन्से विश्वास लबा म्हिदेन लिच्छा विश्वास लबा म्हि न्हीसेन च्योच्यो इनाम याड्ला भिबा हिन्ना। तिगदा भिसम इनाम चा परमेश्वरला दयामायाग्याम ओहड्णोन पिन्बा मोलम हिन्ना। * 20:16 मत्ती १९:३०; मर्कू १०:३१; लूका १३:३० * 20:26 लूका २२:२५-२६ * 20:27 मत्ती २३:११; लूका २२:२६

34 थेनीगदेला ताम थे:सी येशूदा दया रे:सी येशूसे थेनीगदेला मीरी थुर्जी। थुर्मेछ्याम थेनीगदेसे म्हाड्जी। ओचछे थेनीगदे येशूदेन छ्याम भ्रजी।

21

येशू यरूशलेमरी फेपूबा

मर्कूस ११:१-११; लूका १९:२८-४०; यूहन्ना १२:१२-१६

1 येशू हाडला चेलागदेदेन छ्याम फेपूबान लमा यरूशलेम डामला जैतून भिबा गडला बेथफागे नाम्सारी धोखजी। ओचछे येशूसे हाडला चेला न्हीदा पुड्जी। 2 पुड्बा धुडरी चुहड् भिसी सुड्जी, “एनी जजाकी क्याथाडला नाम्सारी निउ। एनी थेरी धोमेछ्याम च्युन्सी थान्बा गधाला मामादेन कोला म्हाड्ला। जमाहेन्से एनीसे थे गधाला मामादेन कोलादा बलसी डा मुबा ग्लारी भउ। 3 थेरी एनीदा खालैसे तिगै भिजी भिसम ‘चु प्रभुदा तो:बा मुला’ भिसी भिउ। जमाहेन्से थेनीगदेसे एनीदा पुड्खला।”

4 अगमवक्ताग्याम पाड्बा बचन पूरा तगै भिसी चु तबा हिन्ना।

5 “सियोननां म्हिगदेदा चुहड् भिसी पाड्गो, ‘च्यागो, एनीगदेला ग्ले एनीगदे मुबा ग्लारी गधाला कोलाथोरी क्रे:सी फेपूखबान मुला। थे ल्हानान सोजो मुला।’”*

6 जमाहेन्से चेला न्ही निसी येशूसे कुल्बा अन्छार लजी। 7 थेनीगदेसे गधाला मामादेन कोला भजी। ओचछे थे गधाला मामादेन कोलाथोरी हाड हाडला घ तीजी। जमाहेन्से येशू थेथोरी धन्छ्याजी। 8 ओचछे थेरी मुबा ल्हानान म्हिगदेसे ग्यामरी हाड हाडला घगदे तीजी, कोइसे स्याउला थासी ग्यामरी तीजी, 9 जमाहेन्से येशूला लिच्छा डाच्छा भ्रबा जम्मान म्हिला हुलसे चुहड् भिसी क्रिड्बान जयजयकार लजी, “दाऊद ग्लेला सन्तानला जयजयकार तगै।

परमप्रभुला मिनरी फेपूखबासे परमेश्वरग्याम मोलम याड्गै।

थेहड् लसीन स्वर्गरी धन्छ्याबा परमेश्वरदा जयजयकार तगै।”

10 येशू यरूशलेमरी धोमाहेन्से शहर नाडनोन हल्ली खल्ली तजी। ओचछे म्हिगदेसे “चु खाल हिन्ना?” भिसी ड्योड्जी।*

11 येशूदेन छ्याम खबा म्हिला हुलसे “चु गालीलला नासरत भिबा नाम्साग्याम फेपूखबा अगमवक्ता येशू हिन्ना” भिसी भिजी।

येशू परमेश्वरला मन्दिररी फेपूबा

मर्कूस ११:१५-१९; लूका १९:४५-४८; यूहन्ना २:१३-२२

12 येशूसे परमेश्वरला मन्दिर न्हडरी चूड्बादेन ग्लुबागदेदा तापूजी। ओचछे टाडगा देपूबारी चिबागदेला टेबुलदेन ढुकुर चूड्बारी चिबागदे जम्मालान चिबा ग्लागदे प्लाड प्लिड लसी भ्याड्जी।

13 ओचछे येशूसे थेनीगदेदा चुहड् भिसी सुड्जी, “च्यागो, ‘डाला दिम य्हुल य्हुलला म्हिगदेसे प्रार्थना लबा दिम दोला’ भिसी परमेश्वरला बचनरी भिबा मुला। तर एनीगदेसे मी डाला दिमदा य्होगदे चिबा ग्ला सहोबा मुला।”*

14 येशू परमेश्वरला मन्दिररी मुबा धुडरी मी आम्राड्बा म्हिदेन कुज्या म्हिगदे येशू मुबा ग्लारी खजी। जमाहेन्से येशूसे थेनीगदेदा खम्ना लजी। 15 तर येशूसे लबा उदेकला गेदेन परमेश्वरला मन्दिररी कोलागदेसे “दाऊद ग्लेला सन्तानना जयजयकार तगै” भिसी क्रिड्बा म्हाड्सी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे बोमो खजी।† 16 थेनीगदेसे येशूदा “चु कोलागदेसे तिग

† 21:5 “सियोन” भिबा चा यरूशलेम शहरदा पाड्बा हिन्ना। * 21:5 जक ९:९ * 21:10 भजन ११८:२६-२७ * 21:13 यशै ५६:७; यर्मि ७:११ † 21:15 यहूदी धर्मगुरुगदेसे येशूदा खीष्ट हिन्ना भिसी विश्वास आलमुबा। ओचछे स्यहान्दो म्हिगदेसे येशूदा खीष्ट भिबासे लमा थेनीगदेदा बोमो रे:जी। चुदे स्यहान्दो म्हिगदेसे येशूदा ल्हानान सेम निजी भिसम येशूसे स्यहान्दो म्हिगदेदा थेनीगदेला बिरोधरी रे:पुड्ला भिसी थेनीगदे लोड्मुबा।

भिबान मुला हाडसे थे:बा आरे?" भिसी भिमा, येशूसे थेनीगदेदा चुहड् भिसी सुड्जी, "थे:बा मुला। तर परमेश्वरला बचनरी चुहड् भिसी भिबा मुला,

'प्रभु, हाडसे लैनु कोलागदेदेन जजा कोलागदेदाएनोन जयजयकार लतो:ला भिसी लोपबा मुला' तिग एनीगदेसे चु ताम पढब लबा आरे?"*

17 जमाहेन्से थेनीगदेदा थेरी ख्लासी येशू बेथानिया भिबा नाम्सारी फेप्सी जमाकुनु म्हणुनड थेरीन धन्छ्याजी।

तिगै आरोबा अञ्जीरला दोड

मर्कूस ११:१२-१४, २०-२४

18 न्हडगरदड स्यूहोरी यरूशलेमपट्टि दो:सी फेपखबान लबा धुइरी येशूदा फोखेन्जी। 19 ग्यामरी फेपबान लबा धुइरी येशूसे ग्यामला कुनीरी अञ्जीरला दोड गिक म्राड्जी। थे दोडरी अञ्जीर मुजी वा भिसी सहीबारी फेपमा भा जे म्राड्सी "दाहेन्से चु दोडरी खाइमै अञ्जीर थारोगै" भिसी येशूसे सुड्जी। थेहड् सुड्मैछ्याम थे अञ्जीर दोड खर्जी।†

20 अञ्जीर दोड खर्सी निबा म्राड्सी उदेक म्हणबान येशूला चेलागदेसे "दान्देला दान्देन खाहड् लसी चु अञ्जीर दोड खर्जी?" भिसी भिमा, 21 येशूसे थेनीगदेदा चुहड् भिसी सुड्जी, "च्यागो, एनीगदेसे डाला ताम ड्यानगो, एनीगदेला सेमरी शङ्का आलना विश्वास लजी भिसम चु अञ्जीर दोडदा लबा हड् जे आहिन, तर चु गडदाएनोन 'ए होक निसी समुन्द्ररी ताडगो' भिसम थेहड्णोन तला। 22 ओच्छे एनीगदेसे विश्वास लसी प्रार्थना लमा जुन ताम हीला थेनोन एनीगदेसे याड्ला।"

येशूला अधिकारला बारेरी ड्योइबा

मर्कूस ११:२७-३३; लूका २०:१-८

23 परमेश्वरला मन्दिररी फेप्सी येशूसे म्हिगदेदा लोपबान लबा धुइरी परमेश्वरला मन्दिररी पूजा लबा मुल म्हिगदेदेन यहूदी गन्बागदे येशू मुबा ग्लारी खसी "हाडसे खानडग्याम अधिकार याड्सी चु गे लबा हिनना? हाडदा चु अधिकार खाल्से पिन्बा हिनना?" भिसी ड्योइमा, 24 येशूसे थेनीगदेदा चुहड् भिसी सुड्जी, "एनीगदेदाएनोन डाइ ताम गिक ड्योइला। थे तामला जोहाब पिन्जी भिसम डादा चु गेगदे लबारी खाल्से अधिकार पिन्जी थे एनीगदेदा पाड्ला। 25 यूहन्नादा बपतिसमा पिन्बा अधिकार खाल्से पिन्जी? परमेश्वरसे कि म्हिगदेसे?"

जमाहेन्से थेनीगदे हाड हाड न्हडरी सल्लाह लबान, "परमेश्वरग्याम भिजी भिसम थेसे यहडाडदा 'थेहड् भिसम एनीगदेसे तिग्दा यूहन्नादा विश्वास आलबा?" भिसी भिला। 26 तर म्हिगदेग्याम भिजी भिसम महिला हुलसे साइला भिसी यहाड लोड्मुला। तिग्दा भिसम जम्मासेन यूहन्नादा अगमवक्ता हिनना भिसी भिमुला।" 27 थेतबासेलमा थेनीगदेसे "डन्दा था आरे" भिसी येशूदा जोहाब पिन्जी।

येशूसे थेनीगदेदा "थेहड् भिसम डाइएनोन चु गेगदे खाल्ला अधिकारग्याम लबा हिनना, थे एनीगदेदा आपाड्" भिसी सुड्जी।

झा न्ही मुबा म्हिला उखान

28 येशूसे अझ चुहड् भिसी सुड्जी, "डाइ एनीगदेदा झा न्ही मुबा म्हिला उखान पाड्ला। एनीगदेसे चुग्याम तिग घोला? थे म्हि थेबा झा मुबा ग्लारी निसी 'ए तिनी अडगुर वारीरी निसी गे लउ झा' भिसी कुल्मा, 29 थेसे 'डा आनि आबा' भिसी जोहाब पिन्जी। तर लिच्छा सेम दो:सी थे गे लबारी निजी।

30 "थेहड् लसीन थे झा च्याड्बा मुबा ग्लारी निसी थेदाएनोन थेहड्णोन भिसी कुल्मा, थेसे 'तला आबा डा निला' भिसी भिजी। तर थे आनिनी।"

* 21:16 भजन ८:२ † 21:19 येशूसे यहूदी धर्मगुरुगदेदा परमेश्वरसे सजाय पिन्ना भिबा ताम उन्बाला लागिरी अञ्जीरला दोड खर्ना लबा हिनना।

31 जमाहेन्से येशूसे परमेश्वरला मन्दिररी पूजा लबा मुल म्हिगदेदेन यहूदी गन्बागदेदा “चु न्ही न्हडरी खजिबासे चा आबासे कुल्बा ताम ड्यान्जी” भिसी ड्योइमा, थेनीगदेसे “थेबा झासे” भिसी जोहाब पिन्जी।

ओच्छे येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, एनीगदे भन्दा डाच्छा तिरो दुइबा म्हिगदेदेन बेश्यागदे परमेश्वरला यहुल्सारी निला। 32 तिग्दा भिसम बपतिसमा पिन्बा यूहन्नासे एनीगदेदा परमेश्वरसे म्हन्बा अन्छारला ग्याम उन्बारी खमाएनोन एनीगदेसे थेदा विश्वास आलनी। बरु तिरो दुइबा म्हिगदेदेन बेश्यागदेसे चा थेदा विश्वास लजी। थेनीगदेसे विश्वास लबा म्राड्सीनोन एनीगदेसे हाड हाडला पाप ख्लासी परमेश्वरपट्टि आदोःनी। ओच्छे थेला ताम विश्वास आलनी।

अधियाँ सहोबा म्हिगदेला उखान

मर्कूस १२:१-१२; लूका २०:९-१९

33 “अर्गु उखानएनोन ड्यान्गो, फ्युक्पो म्हि गिकसे वारीरी अडगुर सूसी क्युर्सिन पर्खाल लजी। ओच्छे अडगुर म्हर्बारी कोल सहोसी अडगुर वारी खुड्बारी नोबा छाप्रो गिक सहोजी। जमाहेन्से अधियाँरी पिन्सी थे अर्गु यहुल्सारी निजी।* ”

34 “अडगुर मिन्बा धुइ तमाहेन्से थे फ्युक्पो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुड्जी। 35 ओच्छे अधियाँ लबागदेसे थे फ्युक्पो महिला नोकर गिकदा चुड्सी तोबा ग्याड्बा लजी, गिकदा साइजी तर स्य्हानदो गिकदा चा युड्बासे तोजी। 36 थे फ्युक्पो म्हिसे दोःसी डाच्छाला भन्दा ल्हानान नोकरगदे पुड्जी, तर थेनीगदेसे थे नोकरगदेदाएनोन थेहड्णोन लजी। 37 “जमाहेन्से थे फ्युक्पो म्हिसे जम्मान भन्दा लिच्छा ‘थेनीगदेसे डाला झादा मी मान लला तला’ भिसी थेसे हाडला झादान थेनीगदे मुबा ग्लारी पुड्जी। 38 तर थेदा खबान लबा म्राड्सी अधियाँ लबागदेसे ‘चु मी यह्हाडला धनीला झा हिन्ना, यह्हाडसे थेदा साइगे। जमाहेन्से थेला सम्पत्ति यह्हाडलान तला’ भिसी हाड हाड न्हडरी ताम लजी। 39 जमाहेन्से थेनीगदेसे थे फ्युक्पो महिला झादा चुड्सी अडगुर वारीग्याम क्यथाड भोर्सी साइजी।

40 जमाहेन्से परमेश्वरला मन्दिररी पूजा लबा मुल म्हिगदेदेन यहूदी गन्बागदेदा येशूसे “दाहेन्से अडगुर वारीला धनी खसी थे अधियाँ लबा म्हिगदेदा तिग लला?” भिसी ड्योइमा, 41 थेनीगदेसे “थे अडगुर वारीला धनीसे थेहड्बा नड्बा गे लबा म्हिगदेदा नाश लला। ओच्छे जुन म्हिसे अडगुर मिन्माहेन्से हाडला भो पिन्ना थेहड्बा म्हिगदेदा अधियाँ पिन्ना” भिसी येशूदा जोहाब पिन्जी।†

42 जमाहेन्से येशूसे थेनीगदेदा चुहड् भिसी सुड्जी, “एनीगदेसे परमेश्वरला बचन खाइमै पढब लबा आरे?

‘जुन युड्बादा दिम सहोबा कर्मीगदेसे गे आखेल भिसी भ्याड्बा मुबा

थेनोन युड्बा दिमला सुर युड्बा दोजी।

चु परमप्रभुग्याम तबासे लमा

यह्हाडला लागिरी उदेकला ताम हिन्ना’

भिसी भिबा मुला।* ”

43 “थेतबासेलमा एनीगदेसे डाला ताम ड्यान्गो। च्यागो, दाहेन्से परमेश्वरला यहुल्सा एनीगदेग्याम ब्यन्सी परमेश्वरसे कुल्बा अन्छार भ्रबा यहुलला म्हिगदेदा पिन्ना। 44 थे युड्बाथोरी ताड्बा म्हि चा जम्मान छारछिर निला, ओच्छे थे युड्बा खालैथोरी ताड्जी भिसम थेरी मुबा म्हि फ्लातफ्लेत निला।”†

45 येशूसे सुड्बा उखान थेःमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे “चु ताम येशूसे यह्हाडलान बारेरी पाड्बा ताम हिन्ना” भिसी घोजी। 46 थेतबासेलमा थेनीगदेसे येशूदा

* 21:33 यशै ५:१-२ † 21:41 थे वारीला धनीला झा चा परमेश्वरला झा येशू हड्बान हिन्ना। * 21:42 भजन ११८:२२-२३

† 21:44 लूका २०:१८ सहीगो, चु पदला ताम कोइ कोइ ग्रीक बाडबलरी भिबा आरे।

चुड्बारी म्हाइजी, तर थेनीगदे महिला हुल म्राड्सी लोड्जी। तिग्दा भिसम म्हिगदेसे येशूदा अगमवक्ता भिसी म्हन्मुबा।

22

ब्याह भोजला उखान

लूका १४:१५-२४

1 दोःसीनोन येशूसे थेनीगदेदा उखानग्याम चुहड् भिसी सुड्जी, 2 “स्वर्गला य्हुल्सा चुहड्बान हिन्ना, ग्ले गिकसे हाडला झाला ब्याहला भोज ठीक लजी। 3 ओच्छे निम्तो याड्बा म्हिगदेदा ड्योइबारी हाडला नोकरगदे पुड्जी। तर निम्तो याड्बा म्हिगदेसे खबा सेम आलनी।

4 “दोःसी ग्लेसे निम्तो याड्बा म्हिगदेदा ‘डाइ छोबा छोबा म्हे बहर साइसी ब्याहला भोज ठीक लसी जिन्बा मुला। दाहेन्से हाडनी फेप्खउ भिउ’ भिसी स्यहान्दो नोकरगदेदा पुड्जी।

5 “तर थे निम्तो याड्बा म्हिगदेसे नोकरगदेला तामदा थेगोन आलना कोइ हाडला बु वारीरीक्यार निजी, कोइ व्यापार लबारी निजी, 6 ओच्छे स्यहान्दोगदेसे चा थे नोकरगदेदा चुड्सी तोबा ग्याड्बा लसी साइजी। 7 चु ताम थेःसी ग्ले ल्हानान बोमो खजी। जमाहेन्से ग्लेसे सिपाहीगदेदा पुड्सी हाडला नोकरगदे साइबागदेदा साइजी। ओच्छे थेनीगदेला शहरएनोन खाड्जी।

8 “जमाहेन्से ग्लेसे हाडला नोकरगदेदा चुहड् भिसी कुल्जी, ‘ब्याहला भोज ठीक लसी जिन्बा मुला। तसैनोन निम्तो याड्बा म्हिगदे यहाडला भोजरी खबाधोनाला आरेम। 9 थेतबासेलमा दाहेन्से एनीगदे ग्याम ग्यामरी निउ। ओच्छे स्यापबागदे जम्मादान ब्याहला भोज चबारी खउ भिसी निम्तो पिन्गो।’ 10 ओच्छे नोकरगदे ग्याम ग्यामरी निसी ज्यबा गे लबा तसै आज्यबा गे लबा तसै स्यापतेबा जम्मादान निम्तो पिन्जी। चुहड् लसी ब्याह दिम नाडनोन डोन्बोगदे तजी।

11 “डोन्बोगदेदा च्याबारी भिसी ग्ले दिम न्हडरी खमा थेरी ब्याहरी खबा धुइरी क्वान्तोःबा क्वान आक्वान्ना खबा म्हि गिकदा म्राड्जी। 12 थेदा म्राड्सी, ‘ओहो, हो!, ए मी ब्याहरी क्वान्तोःबा क्वान आक्वान्ना चुरी खाहड् लसी खजी?’ भिसी ड्योइमा, थे म्हिसे तिगै जोहाब पिन्आखमनी। 13 जमाहेन्से ग्लेसे हाडला नोकरगदेदा ‘चुला या काड खीसी मडग्यार धोपधोपबा ग्लारी भ्याड्गो। थेरी म्हिगदे स्वा क्रेसी क्राबा क्रिड्बा लला’ भिसी कुल्जी।*’

14 “तिग्दा भिसम ड्योइबागदे ल्हानान मुला, तर धम्बागदे चा ल्हाना आरे।”

तिरो फाबा ठीक हिन्ना कि आहिन?

मर्कूस १२:१३-१७; लूका २०:२०-२६

15 जमाहेन्से फरिसीगदे येशू मुबा ग्लाग्याम निजी। ओच्छे दाहेन्से येशूदा थेलान तामग्याम खाहड् लसी फसब लसे भिसी हाड हाड न्हडरी सल्लाह लजी। 16 थेनीगदेसे हाडला चेलागदेदा हेरोद ग्लेला म्हिगदेदेन छ्याम येशू मुबा ग्लारी पुड्जी। थे म्हिगदे येशू मुबा ग्लारी निसी चुहड् भिसी भिजी, “गुरु, हाड सत्य म्हि हिन्ना, ओच्छे हाडसे खालैदा वास्ता आलमुला भिसी उन्दा था मुला। तिग्दा भिसम हाडसे महिला ली च्यासी गे आलमुला, तर हाडसे म्हिगदेदा लोपबा धुइरी परमेश्वरला ग्याम ज्यना लसी उन्मुला। 17 थेतबासेलमा रोमी ग्याल्बो कैसरदा तिरो फाबा ठीक हिन्ना कि आहिन? उन्दा सुड्गो।”†

18 तर येशूसे थेनीगदेला सेमला नइबा ताम था याड्सी “कप्टीगदे, तिग्दा एनीगदेसे डादा फसब लबारी म्हाइबा? 19 एनीगदेसे तिरो फाबा डबल डादा उन्गो” भिसी सुड्मा, थेनीगदेसे डबल गिक भसी येशूदा पिन्जी। 20 जमाहेन्से येशूसे थेनीगदेदा “चु डबलरी मुबा छापदेन मिन खाल्ला हिन्ना?” भिसी सुड्मा, 21 थेनीगदेसे “रोमी ग्याल्बो कैसरला” भिसी जोहाब पिन्जी।

जमाहेन्से येशूसे थेनीगदेदा “दाहेन्से एनीगदेसे रोमी ग्लेला जति रोमी ग्लेदा फागो। ओच्छे परमेश्वरला जति परमेश्वरदान फागो” भिसी सुड्जी।

* 22:13 मत्ती ८:१२; २५:३०; लूका १३:२८ † 22:17 हेरोदला म्हिगदेदेन फरिसीगदेसे स्यहान्दो म्हिगदेसे येशूदा विश्वास लबा खलागै भिसी म्हन्मुबा।

22 चुहड्बा ताम थे:सी थेनीगदे उदेक तजी। जमाहेन्से थेनीगदेसे येशूदा ख्लासी निजी।

सिबाग्याम सोना लबाला बारेरी ड्योइबा

मर्कूस १२:१८-२७; लूका २०:२७-४०

23 म्हि सिमाहेन्से दो:सी आसो भिसी विश्वास लबा सदुकीगदे थेनोन धिनकुनु येशू मुबा ग्लारी खसी येशूदा चुहड् भिसी ड्योइबारी छ्याइजी।* 24 “गुरु, मोशासे य्हाडदा पिन्बा ठिम अन्छार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतो:ला भिसी पाड्बा मुला।* 25 डन्ना गुडरी ज्योज्यो आले निस मुबा। थेनीगदे न्हडरी थेबासे ब्याह लजी। तर कोलागदे आतनान थे सिजी। जमाहेन्से पाराडसे थेनोन चाडदेन छ्याम ब्याह लजी। 26 थेहड् लसीन पाराड साँजी लसी च्याड्बाधोनासेन थेनोन चाडदेन छ्याम ब्याह लजी। 27 थेनीगदे जम्मान सिमाहेन्से थे म्रिडम्हेमेनोन सिजी। 28 थेतबासेलमा डन्दा सुड्गो, सिबाग्याम सोना लजी भिसम थे म्रिडम्हेमे खजिबाला म्रिड तला? तिग्दा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।” 29 जमाहेन्से येशूसे थेनीगदेदा चुहड् भिसी जोहाब पिन्जी, “एनीगदे अन्दोलरीन चीम, तिग्दा भिसम एनीगदेसे परमेश्वरला बचनदेन परमेश्वरला शक्तिला बारेरी घोबान आरेम। 30 तिग्दा भिसम सिबाग्याम सोना लबा धुडरी न्ह ब्याह लला न्ह ब्याह तला। तर थेनीगदे स्वर्गरी मुबा स्वर्गदूतगदे हड्बान तला। 31 सिबाग्याम सोना लबाला बारेरी परमेश्वरसे एनीगदेदा तिग सुड्बा मुला, थे ताम एनीगदेसे पढब लबा आरे? 32 ‘डा अब्राहाम, इसहाकदेन याकूबला परमेश्वर हिन्ना’ भिसी परमेश्वरसे मोशादा सुड्बा मुबा। परमेश्वर सिबागदेला परमेश्वर आहिन, तर सोबागदेला परमेश्वर हिन्ना।”*

33 येशूसे चुहड् लसी लोप्बा म्राड्सी थेरी मुबा म्हिला हुल उदेक तजी।

परमेश्वरसे कुल्बा मुल ताम

मर्कूस १२:२८-३४; लूका १०:२५-२८

34 येशूसे सदुकीगदेदा जोहाबनोन पिन्आखम्बा तना लजी भिबा ताम थे:सी फरिसीगदे ढिक्सी सल्लाह लबारी ग्ला गिकरी पोप तजी। 35 जमाहेन्से थेनीगदे न्हडला यहूदी धर्मगुरु गिकसे येशूला सेम च्याबाला लागिरी चुहड् भिसी ड्योइजी, 36 “गुरु, परमेश्वरसे मोशादा पिन्बा ठिमरी जम्मान भन्दा मुल ताम चा खजिबा हिन्ना?”*

37-38 येशूसे थेदा चुहड् भिसी सुड्जी, “च्यागो, परमेश्वरसे कुल्बा जम्मान भन्दा मुल ताम चा चुनोन हिन्ना। एसे हाडला परमप्रभु परमेश्वरदा हाडला जम्मान सेमहेन्से, जम्मान प्राणसे, जम्मान बुद्धिसे माया लउ।* 39 ओच्छे अर्गु मुल ताम चा एसे हाडला खिमजेमदा हाडदा हड्दोन माया लउ।* 40 अगमवक्तागदेसे लोप्बा तामदेन मोशाला ठिमरी मुबा जम्मान तामगदे चा परमेश्वरसे कुल्बा चु मुल ताम न्हीग्यामनोन खबा हिन्ना।”

ख्रीष्ट खाल्ला झा हिन्ना?

मर्कूस १२:३५-३७; लूका २०:४१-४४

41 जमाहेन्से येशूसे थेरी पोप तसी चिबा फरिसीगदेदा चुहड् भिसी ड्योइजी, 42 “थार्बा पिन्बा ख्रीष्टला बारेरी एनीगदेसे तिग म्हन्बा मुला? थे खाल्ला झा हिन्ना?”

थेनीगदेसे येशूदा “दाऊद ग्लेला सन्तान हिन्ना” भिसी जोहाब पिन्जी।

43 दो:सी येशूसे थेनीगदेदा चुहड् भिसी सुड्जी, “थेहड् भिसम दाऊददा परमेश्वरला आत्माला शक्तिग्याम तिग्दा ख्रीष्टदा ‘प्रभु’ भिपुड्जी? दाऊदसेन चुहड् भिसी भिमुला,

44 ‘परमप्रभुसे डाला प्रभुदा,

“डाइ एला शत्रुगदेदा एला काड धिरी आथान्तेधोना

* 22:23 मुल २३:८ * 22:24 वयव २५:५ * 22:32 प्रस्था ३:६ * 22:36 लूका १०:२५-२८ * 22:37-38 वयव ६:५

* 22:39 लेवी १९:१८

ए डाला दाहिनेपट्टि चिउ भिसी सुड्जी।”†*

45 दाऊद ग्लेसेन ख्रीष्टदा प्रभु भिला भिसम खाहड् लसी ख्रीष्ट दाऊद ग्लेला सन्तान तला?”†

46 जमाहेन्से खालैसेन येशूदा जोहाब गिकनोन लआखमनी। जमाकुनुहेन्से खालैसेन येशूदा तिगै ताम ड्योडबा आँट आलनी।

23

येशूसे यहूदी धर्मगुरुदेन फरिसीगदेला दोष उन्बा

मर्कूस १२:३८-४०; लूका ११:३९-५२; २०:४५-४७

1 जमाहेन्से येशूसे हाडला चेलागदेदेन थेरी मुबा महिला हुलदा चुहड् भिसी सुड्जी, 2 “च्यागो, यहूदी धर्मगुरुदेन फरिसीगदेसे मोशाला ठिम लोपबा अधिकार याड्बा मुला। 3 थेतबासेलमा थेनीगदेसे पाड्बा ताम एनीगदेसे ड्यानगो, तर थेनीगदेसे लबा हड्बान गे चा थालउ। तिग्दा भिसम थेनीगदेसे एनीगदेदा लोपबाम लोपमुला, तर लोपबा अन्छारला गे चा आलमुला। 4 ओच्छे म्हिगदेदा थेनीगदेसे पुडनोन आखम्बा धोड काप्सी पिन्मुला। तर थेनीगदेसे भिसम थे धोड थीबाला लागिरी या जुम्बीसेनोन आथुर्मुला।

5 “थेनीगदेसे जम्मान गे म्हिदा उन्बाला लागिरी लमुला। तिग्दा भिसम थेनीगदेसे परमेश्वरसे मोशादा पिन्बा ठिम कागजरी भिसी घेन घेन जन्तर सहोसी डोदेन नारीरी खीमुला। ओच्छे थेनीगदेसे क्वान्बा क्वान्ना जोरी हेड्बा हेड्बा फुर्गा कार्मुला।* 6 थेनीगदेसे भोजरीदेन यहूदीगदे हुप तबा दिमला मुल ठिरी चिबारी सेम लमुला। 7 बजाररी निमाएनोन म्हिगदेसे फ्या लगै भिसी म्हन्मुला, ओच्छे ‘गुरु’ भिसीएनोन पाड्गै भिसी म्हन्मुला। 8 तर एनीगदेदा खालैसेन ‘गुरु’ भिसी थाभिगै। तिग्दा भिसम एनीगदे ज्योज्यो आले हिन्ना। एनीगदेला गुरु चा गिक जे मुला।† 9 जम्बुलिडरी एनीगदेसे खालैदान आबा थापाड्गो। तिग्दा भिसम स्वर्गरी एनीगदे जम्मालान आबा गिक जे मुला।† 10 ओच्छे एनीगदेदा खालैसेन ‘मालिक’ थाभिगै। तिग्दा भिसम एनीगदे जम्मालान मालिक थार्बा पिन्बा ख्रीष्ट जे हिन्ना। 11 एनीगदे न्हडला जुन म्हि घेन मुला, थेसे चा एनीगदे जम्मालान सेवा लतो:ला।* 12 ओच्छे जुन म्हिसे हाडसे हाडदान घेन सहोला, थे म्हि चा जजा दोला। तर हाडसे हाडदान जजा सहोबा म्हि चा घेन दोला।*

13 “परमेश्वरग्याम सजाय याड्तो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे म्हिगदेला डाच्छा स्वर्ग यहुल्साला म्राप दुड्मुला। ओच्छे एनीगदे हाडएनोन आनिमुला निबारी म्हाड्बा म्हिदाएनोन निआपुड्मुला।

14 “परमेश्वरग्याम सजाय याड्तो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे हेम्बो सिबा म्रिड्महेमेगदेला दिमनाम ब्यन्मुला। ओच्छे म्हिदा उन्बाला लागिरी हेड्बा हेड्बा प्रार्थना लबा सहोमुला। थेतबासेलमा स्य्हान्दोगदेसे भन्दा एनीगदेसे ल्हाना सजाय याड्ला।†

15 “परमेश्वरग्याम सजाय याड्तो:बा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदे गड स्योड थासी भ्रसै कोर्सी कोर्सी स्य्हान्दो म्हिदा हाडलान ग्यामरी भ्रपुड्मुला। ओच्छे तिगै लसी स्य्हान्दो म्हि गिक एनीगदेदेन छ्याम ढिक्जी भिसम एनीगदेसे थे म्हिदा हाड भन्दा आज्यबा सहोसी नर्गरी नितो:बा म्हि सहोमुला।

† 22:44 परमेश्वरसे प्रभुदा स्वर्गरी हाडदेन छ्याम चिबारी ग्ले सहोबा मुला। * 22:44 भजन ११०:१ † 22:45 म्हिगदेसे दाऊद ग्लेला सन्तानदा दाऊद ग्ले भन्दा जजा भिसी म्हन्मुबा, तसेनोन दाऊद ग्लेसेनोन हाडला सन्तानदा प्रभु भिबासे लमा थेनीगदे उदेक तजी। * 23:5 मत्ती ६:१; गन्ती १५:३८; व्यव ६:८ † 23:8 ख्रीष्टियानगदे न्हडरीनोन गुरुगदे तखम्ला (याकूब ३:१; एफिसी ४:११)। तर ख्रीष्ट चा जम्मालान मुल गुरु हिन्ना। † 23:9 येशूसे हाडला आबादा मान थालउ भिसी सुड्बा आहिन। तर परमेश्वरदा पिन्तो:बा मान जम्बुलिडरी स्य्हान्दो म्हिदा थालउ भिबा हिन्ना। * 23:11 मत्ती २०:२६-२७; मर्कू ९:३५; लूका २२:२६ * 23:12 लूका १४:११; १८:१४ † 23:14 चु पदला ताम ल्हाना हड्बा ग्रीक बाइबलरी भिबा आरे, कोड कोड बाइबलरी जे भिबा मुला। चु ताम मर्कूस १२:४० सहीगो।

16 “स्य्हान्दोदा लोपबा काना म्हिगदे, एनीगदेसे परमेश्वरग्याम गाते सजाय याड्ला। एनीगदेसे म्हिगदेदा लोपबा धुडरी ‘परमेश्वरला मन्दिरला मिन किन्सी घान फासैनोन तिगै आतमुला। तर परमेश्वरला मन्दिररी मुबा म्हरला मिन किन्सी घान फाजी भिसम चा थे घानसेन चमुला’ भिसी लोपमुला। 17 मूर्ख कानागदे, खजिबा चा घेन? म्हरदा चोखो तना लबा परमेश्वरला मन्दिर घेन कि म्हर घेन? 18 ओच्छे ‘खालै म्हिसे बलि फुल्बा ग्लाला मिन किन्सी घान फाजी भिसम तिगै आतमुला, तर थेरी फुल्बा भेटीला मिन किन्सी घान फाजी भिसम चा थे घानसेन चमुला’ भिसीनोन एनीगदेसे लोपमुला। 19 कानागदे, खजिबा चा घेन हिन्ना। भेटीदा चोखो तना लबा ग्ला घेन कि भेटी घेन? 20 थेतबासेलमा च्यागो, परमेश्वरला मन्दिररी बलि फुल्बा ग्लाला मिन किन्सी घान फाबा म्हिसे थेथोरी मुबा जम्मान सहेला मिन किन्सी घान फाबा तला। 21 ओच्छे परमेश्वरला मन्दिरला मिन किन्सी घान फाबासे थेरी धन्छ्याबाला मिन किन्सी घान फाबा तला। 22 थेहड् लसीन स्वर्गला मिन किन्सी घान फाबासे परमेश्वरला ठिदेन थेथोरी धन्छ्याबाला मिन किन्सी घान फाबा तला।* ”

23 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिगदा भिसम एनीगदेसे बाबरीदेन सोंप ओच्छे जिराला भो च्युडला भो गिक चा पिन्मुला। तर ठीक निसाफ, दयादेन विश्वासला बारेरी परमेश्वरसे मोशादा पिन्बा ठिमला मुल तामदा चा आड्यानमुला। तर एनीगदेसे चु गे न्हीनोन लतोःबा मुबा।* 24 तर एनीगदेसे भुसुना हड्बा जजा सहे चा म्राड्बा, तर ऊँट हड्बा घेन सहेदा चा आम्राड्बा, एनीगदे मी कानान हिन्ना।† ”

25 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। एनीगदेसे खोरेदेन खार्बाला पाखापट्टि जे म्यापमुला। तर न्हडपट्टि चा चीबुन थान्बा हड् लसी एनीगदेसे हाडला सेमरी लोभदेन म्हिदा ठगब लबा हड्बा नडबा ताम थान्मुला। 26 काना फरिसीगदे, डाच्छा खार्बादेन खोरे न्हडपट्टि ज्यना लसी म्यापगो। जमाहेन्से जे थे खार्बादेन खोरे पाखापट्टि ज्यना लसी धाला।

27 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। एनीगदे तार साप्रासे च्युर्सी थान्बा धुर्सा हड्बान मुला। थे धुर्साला पाखापट्टि च्यामा चा जेबा म्राड्मुला। तर न्हडरी भिसम सिबा महिला नखुदेन नडबा सहेगदेसे प्लिड्बा मुला।* 28 थेहड् लसीन एनीगदे महिला ओन्छाडरी ‘डनी परमेश्वरला डाच्छा ज्यबा म्हि हिन्ना’ भिसी भ्रमुला। तर एनीगदेला सेम चा छलकपटदेन पापसे प्लिड्बा मुला।

29 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिगदा भिसम एनीगदेसे अगमवक्तागदेला धुर्सा सहोमुला, ओच्छे परमेश्वरला डाच्छा ज्यबा म्हिगदेला धुर्सा जेना लसी थान्मुला। 30 ओच्छे ‘डन्ना आखे म्हेमेसे अगमवक्तागदेदा साइबा धुडरी डनीएनोन थेनीगदेदेन छ्याम मुबा हिन्सम थेनीगदेसे हड् चा डन्से आलसेला मुबा’ भिसी एनीगदेसे पाड्मुला। 31 एनीगदेसे पाड्बा चुहड्बा तामग्यामसेन एनीगदे अगमवक्तागदेदा साइबागदेला सन्तान हिन्ना भिसी था तना लबा मुला। 32 दाहेन्से एनीगदेला आखे म्हेमेसे शुरु लबा पाप गे एनीगदेसे पूरा लउ।

33 “पुख्रीदेन पुख्रीला कोलागदे, नर्गरी नातोःबा दुखग्याम एनीगदे खाहड् लसी जोगब तला? 34 थेतबासेलमा एनीगदेसे डाला ताम ड्यानगो, दाहेन्से डाइ अगमवक्तागदेदेन बुद्धि मुबा म्हिगदेदा ओच्छे सत्य ताम लोपबा धर्मगुरुगदे एनीगदे मुबा ग्लारी पुडखला। थेनीगदेदा एनीगदेसे कोइदा साइला, कोइदा क्रुसरी टांगब लसी साइला, कोइदा एनीगदे हुप तबा दिमगदेरी भोर्सी कोर्सासे तोःला ओच्छे कोइदा शहर शहरग्याम ताप्ला। 35 थेतबासेलमा परमेश्वरला डाच्छा ज्यबा म्हि हाबिलदा साइबा धुइहेन्से बेरेक्याहला झा जकरियादा साइबा धुइधोना जम्बुलिडरी मुबा जम्मान ज्यबा म्हिगदेदा साइबा पापला दोष एनीगदेसेन नातोःला। एनीगदेसे बेरेक्याहला झा जकरियादाएनोन

* 23:22 यशै ६६:१; मत्ती ५:३४ * 23:23 लेवी २७:३० † 23:24 चु पदरी येशुसे चुहड् भिसी लोपबारी छ्याड्जी, फरिसीगदेसे जजाबा भुसुना हड्बा तामदा चा वास्ता लमुला, तर थेनीगदेसे परमेश्वरसे मोशादा पिन्बा ठिमरी मुबा घेन तामदा चा तिगै वास्ता आलमुला। * 23:27 मुल २३:३ * 23:33 मत्ती ३:७; १२:३४; लूका ३:७

परमेश्वरला मन्दिरदेन बलि फुल्बा ग्लाला गुडरी साइजी। ³⁶ च्यागो, एनीगदेसे डाला ताम ड्यान्गो, चु जम्मान पापला सजाय दान्दला म्हिगदेशोरीन खला।

यरूशलेमला म्हिगदे म्हाड्सी येशूदा दुख ड्हम्बा

लूका १३:३४, ३५

³⁷ “यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुड्खबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्याप्से घपूबा हड लसी पोप लबारी म्हाड्मा एनीगदेसे आड्यान्नी। ³⁸ थेतबासेलमा दाहेन्से परमेश्वरसे एनीगदेला शहर खलाला।* ³⁹ डाला ताम ड्यान्गो, एनीगदेसे ‘परमप्रभुला मिनरी फेप्खबादा मोलम याड्बा म्हि’ आभितेधोना डादा आम्राड्।”*

24

परमेश्वरला मन्दिर नाश तला

मर्कूस १३:१-२; लूका २१:५-६

¹ जमाहेन्से येशू परमेश्वरला मन्दिरग्याम थोन्सी फेपबारी छ्याड्मा थेला चेलागदे परमेश्वरला मन्दिरला दिमगदे उन्बारी भिसी येशूला डामरी खजी। ² तर येशूसे थेनीगदेदा चुहड् भिसी सुड्जी, “एनीगदेसे चु जम्मान म्हाड्बा मुला आहिन? च्यागो, एनीगदेसे डाला ताम ड्यान्गो, चु मन्दिरला युडबा गिकनोन बाँकी आचिना जम्मान फुप्ला” भिसी सुड्जी।

जम्बुलिड नाश तबा धुइला चिनुगदे

मर्कूस १३:३-१३; लूका २१:७-१९

³ जमाहेन्से येशू जैतून भिबा गडरी धन्छ्याबा धुइरी, थेला चेलागदे सुटुकक खसी “हाडसे सुड्बा चु तामगदे खाड्मा तला? ओच्छे हाड फेप्खबा धुइदेन परमेश्वरसे जम्बुलिडला जम्मान म्हिगदेला निसाफ लबा धुइरी खाहड्बा चिनु म्हाड्ला? डन्दा सुड्गो” भिसी भिजी।

⁴ येशूसे थेनीगदेदा चुहड् भिसी सुड्जी, “एनीगदे होशियार तसी चिउ, एनीगदेदा खालैसेन झुक्याब थालगौ। ⁵ तिगदा भिसम ल्हानान म्हिगदे डाला मिन किन्सी ‘डानोन थार्बा पिन्बा ख्रीष्ट हिनना’ भिसी खला। ओच्छे ल्हानान म्हिदा झुक्याब लला। ⁶ एनीगदेसे लडाइदेन लडाइला हल्लागदे थेःला। तसैनोन एनीगदे थालोड्गो, तिगदा भिसम चु तनोन तोःबा हिनना। तर थेनोन धुइरी चा चु जम्बुलिड नाश आत। ⁷ तिगदा भिसम म्हि य्हुलला बिरोधरी म्हि य्हुलनोन ओच्छे य्हुल्साला बिरोधरी य्हुल्सा रेःला। चुहड् तसी ग्ला ग्लारी अनिकाल तबादेन सड्गुल निला। ⁸ चु जम्मान ताम मी कोला न्हसेला म्रिडम्हेमेदा बेथासे थुर्बा हड्बा जे हिनना।

⁹ “थे धुइरी एनीगदेदा म्हिगदेसे चुड्सी दुख पिन्ना, ओच्छे साइला। थेहड् लसीन डादा विश्वास लबासे लमा एनीगदेदा जम्मान य्हुलला म्हिगदेसे हेला लला।* ¹⁰ थे धुइरी ल्हानान म्हिगदेसे डादा विश्वास लबा खलाला। ओच्छे गिकसे स्य्हान्दोदा चुड्सी म्हिगदेला यारी जिम्मा पिन्बादेन हेला लला। ¹¹ थे धुइरी ल्हानान फट्टा अगमवक्तागदे थोन्सी ल्हानान म्हिगदेदा झुक्याब लला। ¹² थेहड् लसीन पाप गे ल्हानान तसी निबासे लमा ल्हानान म्हिसे स्य्हान्दोदा माया लबा खलाबान निला। ¹³ तर जस्तोन दुख तसैनोन जुन म्हिसे हाड आसितेधोना डादा विश्वास लसीन चिला थेसे थार्बा याड्ला।* ¹⁴ ओच्छे जम्बुलिडला जम्मान य्हुलला म्हिगदेसे परमेश्वरला य्हुल्साला समाचार थेःसी जिन्माहेन्से जे नाश तबा धुइ खला।

लोड्बा खबा धुइ

मर्कूस १३:१४-२३; लूका २१:२०-२४

* 23:38 यर्मि २२:५ * 23:39 भजन ११८:२६ * 24:9 मत्ती १०:२२ * 24:13 मत्ती १०:२२

15 “थेतबासेलमा दानिएल अगमवक्तासे पाड्बा हड्बोन एनीगदेसे परमेश्वरला मन्दिरला चोखो ग्लारी नड्बा खबा सहै म्राड्गो।” चुला अर्थ पढब लबा म्हिसे घोगै।* 16 “थे धुडरी यहूदिया अञ्चलरी मुबा म्हिगदे गडरीक्यार यार्गै।† 17 ओच्छे तलाथोरी मुबा म्हिगदे हाडला सामान किन्बारी मार फापसी दिम न्हडरी थावाड्गो। 18 बु वारीरी मुबागदे हाडला घ किन्बारी दोःसी दिमरी थानिउ।* 19 थे धुडरी जिउ न्हीला मिडम्हेमेदेन कोलादा ड्हे ख्वाबा आमागदेदा ज्ञन गाते ल्हानान दुख तला! 20 थेतबासेलमा खड्बा लादेन बल्पबा न्हबा धिनकुनु यारआतोःगै भिसी एनीगदेसे प्रार्थना लउ। 21 तिग्दा भिसम थे धुडरी तबा घेन दुख जम्बुलिड छ्यामाहेन्से दान्देधोना तबा आरे ओच्छे लिच्छाएनोन खाइमै तसेला आरे।* 22 थेहड्बा दुखला धिन परमेश्वरसे तुन्ना आलबा हिन्सम खालैसेन थार्बा आयाड्सेला मुबा। तर परमेश्वरसे हाडसे धम्बा म्हिगदेला लागिरी थे धिन तुन्ना लसी पिन्ना।

23 “खालैसे एनीगदेदा ‘च्यागो, थार्बा पिन्बा ख्रीष्ट चुरी मुला,’ अथवा ‘थेरी मुला,’ भिजी भिसम थेनीगदेला ताम विश्वास थालउ। 24 तिग्दा भिसम फट्टा ख्रीष्टगदेदेन फट्टा अगमवक्तागदे थोन्ना। ओच्छे थेनीगदेसे खम्तेधोना परमेश्वरसे धम्बा म्हिगदेदा झुक्याब लबाला लागिरी उदेकला घेन चिनुगदेदेन उदेकला गेगदे लसी उन्ना। 25 च्यागो, चु ताम डाइ एनीगदेदा डाच्छाहेन्सेन पाड्सी पिन्बा मुला।

26 “थेतबासेलमा म्हिगदेसे एनीगदेदा ‘येशू तोडतोडबा ग्लारी मुला’ भिजी भिसम, एनीगदे थेरी थानिउ। ओच्छे ‘च्यागो, येशू मी कोठा न्हडरी मुला’ भिजी भिसैनोन एनीगदेसे थेनीगदेला ताम विश्वास थालउ। 27 तिग्दा भिसम स्यारपट्टि तिप्लीड खमा न्हुपधोना य्हाल तबा हड् लसी परमेश्वरसे पुड्खबा म्हिगदेन थेहड् लसीन खला।*

28 “जुन ग्लारी सिबा जन्तु मुला थेरी गिद्दागदे पोप तमुला।*

परमेश्वरसे पुड्खबा म्हि फेप्खबा धुड

29 “थेहड्बा दुखला धिन खमैछ्याम,
‘धिनीसे य्हाल पिन्बा खलाला
ओच्छे लनीला य्हाल म्हाला।
जमाहेन्से मुला शक्तिगदे याड्योड तसी
सुक्र सार जम्मान ताइला।*’

30 चुहड् तमाहेन्से मुरी परमेश्वरसे पुड्खबा म्हि खबान लबा चिनु गिक म्राड्गो। ओच्छे परमेश्वरसे पुड्खबा म्हिदा स्वर्गला खसुरी शक्तिदेन घेन य्हाल य्हालरी खबा म्राड्सी जम्बुलिडरी मुबा जम्मान य्हुलला म्हिगदे क्राबा क्रिड्बा लला।* 31 बिगुलला घेन काइदेन छ्याम थेसे स्वर्गदूतगदेदा जम्बुलिडदेन मुला जम्मान ग्लारी पुड्गो। जमाहेन्से थे स्वर्गदूतगदेसे परमेश्वरसे धम्बा जम्मान म्हिगदेदा ग्ला गिकरी पोप लला।

अञ्जीरला दोड च्यासी लोप्तोःबा ताम

मर्कूस १३:२८-३१; लूका २१:२९-३३

32 “एनीगदेसे अञ्जीरला दोडदा च्यासी थेग्याम तिगै ताम लोपगो। थेला हाँगागदेरी भा भुमैछ्याम छेपबा छबा ला वाड्जी भिसी एनीगदेसे था याड्मुला। 33 थेहड् लसीन डाइ पाड्बा जम्मान तामगदे तबा म्राड्माहेन्से परमेश्वरसे पुड्खबा म्हि खबा धिन खसी जिन्जी भिबा ताम एनीगदेसे था याड्गो। 34 च्यागो, एनीगदेसे डाला ताम ड्यान्गो, चु जम्मान ताम पूरा आततेधोना दान्देला म्हिगदे आसि। 35 मुदेन जम्बुलिड म्हासी निसैनोन डाला बचन खाइमै आम्हा।

* 24:15 दानि ९:२७; ११:३१; १२:११ † 24:16 ईश्वरी संवत् ७० सालरी रोमी सिपाहीगदेसे यरूशलेम शहर हाडला यारी किन्बा भन्दा डाच्छा ल्हानान ख्रीष्टियानगदेदा येशूसे होशियार तना लबारी चु ताम सुड्बा हिन्ना। थे धुडरी ल्हानान म्हिगदे यर्दन स्योडला स्यार झ्याडपट्टिला डेकापोलिस भिबा अञ्चलरी यार्जी। * 24:18 लूका १७:३१ * 24:21 दानि १२:१; उन्बा ७:१४ * 24:27 लूका १७:२३-२४ * 24:28 लूका १७:३७ * 24:29 यशै १३:१०; ३४:४; इज ३२:७; योए २:१०-३१; ३:१५; उन्बा ६:१२-१३ * 24:30 दानि ७:१३; जक १२:१०-१४; उन्बा १:७

सदन होशियार तसी चिउ

मर्कूस १३:३२-३५; लूका १२:३९-४०; १७:२६-२७, ३४-३५

36 “थे दुखला धिनदेन धुइ खाइमा खला भिसी स्वर्गदूतदाएनोन था आरे ओच्छे डा परमेश्वरला झादाएनोन था आरे। थे ताम परमेश्वर आबादा जे था मुला। 37 ओन्मा नोआला धुइरी तबा हड्ढोन परमेश्वरसे पुइखबा म्हि दोःसी खबा धुइरीनोन तला।* 38 तिग्दा भिसम नाम खसी भाल बाढी खबा भन्दा डाच्छा नोआ पानी जहाजरी वाइबा धिनकुनुधोना म्हिगदे चबा थुइबादेन ब्याह लबान मुबा। 39 ओच्छे नाम खसी भाल बाढीसे आभोर्तेधोना थेनीगदेसे तिग तला भिसी था आयाङ्नी। परमेश्वरसे पुइखबा म्हि खमाएनोन थेहड्ढ तला।* 40 थे धुइरी बु वारीरी गे लसी चिबा म्हि न्ही न्हडरी गिकदा भोर्ला गिकदा थेरीन खलाला। 41 थेहड्ढ लसीन हान्दारी ब्रा स्याङ्सी चिबा मिडम्हेमे न्ही न्हडरी गिकदा भोर्ला, गिकदा थेरी खलाला।

42 “थेतबासेलमा एनीगदे होशियार तसी छोर्सी चिउ। तिग्दा भिसम एनीगदेला प्रभु खाइमा खला भिबा ताम एनीगदेदा था आरे। 43 तर एनीगदेसे चु तामएनोन था याङ्गो, दिमला म्हिसे यहो खबा धुइ था याङ्गसम थे छोर्सी चिला, ओच्छे थेसे हाडला दिम न्हडरी यहो वाङ्आपुङ्। 44 थेतबासेलमा एनीगदेएनोन होशियार तसी छोर्सी चिउ। तिग्दा भिसम परमेश्वरसे पुइखबा म्हिएनोन एनीगदेसे आमहन्बा धुइरी खला।*

ज्यबा गे लबा नोकरदेन नइबा गे लबा नोकर

लूका १२:४२-४६

45 “दिमरी गे लबा बुद्धि मुबादेन भर्तुप्पा म्हि खाल हिन्ना? मालिकसे दिमला स्य्हान्दो नोकरगदेदा ठीक ठीक धुइरी चबा थुइबा ढिक्ना लसी पिन्बारी जिम्मा पिन्थान्जी।” 46 मालिक दोःसी खबा धुइरीनोन थेसे मालिकसे कुल्सी थान्बा हड्ढ लसी गे लबा म्हाङ्गी भिसम इनाम याङ्बा नोकर थेनोन हिन्ना। 47 च्यागो, एनीगदेसे डाला ताम ड्यान्गो, मालिकसे थेहड्ढा नोकरदा हाडला जम्मान धन सम्पत्ति जिम्मा पिन्ना। 48 तर थे नइबा नोकरसे ‘डाला मालिक योनान आख’ भिसी म्हनसी, 49 इय्होइबा म्हिगदेदेन छ्याम चिसी चबा थुइबा लसी हाडदेन छ्यामनोन गे लबा नोकरगदेदा तोबा ग्याङ्बा लजी भिसम, 50 थेला मालिक थेसे आमहन्बा धिनदेन धुइरी धोखला। 51 जमाहेन्से मालिकसे थेदा ल्हानान सजाय पिन्सी कप्टी म्हिगदे मुबा ग्लारी भ्याङ्गला। थेरी चा जम्मान म्हिगदे स्वा क्रेसी क्रेसी क्राबा क्रिङ्बा लसी चिला।”

25

मिडकोला गोर च्युइ

1 येशूसे अङ्ग चुहड्ढ भिसी सुङ्गी, “स्वर्गला यहूलसा चा गोर च्युइ मिडकोलागदेला ताम हड्ढान तला। थे गोर च्युइ मिडकोलागदे हाड हाडला नाडसल थोसी म्हाछारदा हुप तबारी निजी।* 2 थे गोर च्युइ मिडकोला न्हडरी गोर डा बुद्धि मुबा, गोर डा बुद्धि आरेबा मुबा। 3-4 तिग्दा भिसम बुद्धि मुबागदेसे चा नाडसलदेन छ्युगुएनोन भोर्सी निजी, तर बुद्धि आरेबासे चा नाडसल जे भोर्सी निजी। 5 म्हाछार घइसी खबासे लमा थेनीगदे जम्मान छुप निजी।

6 “तर म्हुन गडसलरी ‘म्हाछारदा स्याप्बारी खउ’ भिबा काइ थेःजी। 7 जमाहेन्से थेनीगदे जम्मान रेःसी हाड हाडला नाडसल ठीक लजी। 8 ओच्छे बुद्धि आरेबा मिडकोलागदेसे बुद्धि मुबा मिडकोलागदेदा ‘डन्ना नाडसल सिबारी छ्याइजी, एनीगदेला छ्युगु डन्दाएनोन जजाकी जजाकी पिन्तोःजी’ भिसी हीजी। 9 तर बुद्धि मुबा मिडकोलागदेसे ‘डन्देन छ्याम मुबा छ्युगुसे यहोड जम्मादान आछ्यो तला। बरु एनीगदे पसलरी निसी ग्लुसी भउ’ भिसी भिजी।

10 “तर थेनीगदे छ्युगु ग्लुबारी निमा म्हाछार धोखजी। ओच्छे डाच्छान ठीक तसी चिबागदे म्हाछारदेन छ्याम भोज चबारी दिम न्हडरी वाङ्गी। ओच्छे प्राप दुङ्गी।

* 24:37 उत्प ६:५-८ * 24:39 उत्प ७:६-२४ * 24:44 लूका १२:३९-४० * 25:1 लूका १२:३५

11 “छिन्नड लिच्छा थे बुद्धि आरेबा म्रिडकोलागदे खसी ‘प्रभु, प्रभु डन्दाएनोन म्राप ठोड्सी पिन्गो’ भिसी भिमा, 12 महाछारसे थेनीगदेदा ‘च्यागो, एनीगदेसे डाला ताम ड्यान्गो, डाइ एनीगदेदा डोसेबा आरे’ भिसी जोहाब पिन्जी।* ”

13 “थेतबासेलमा एनीगदे होशियार तसी चिउ। तिग्दा भिसम डा खजिबा धिनदेन धुइरी खला भिबा ताम एनीगदेदा था आरे।

महरला डबलला उखान
लूका १९:११-२७

14 “थे धुइरी परमेश्वरला यहुल्सा चुहड्बान तला, च्यागो, फ्युक्पो म्हि गिक अर्गु यहुल्सारी निबा धुइरी हाडला नोकरगदेदा ड्योइसी हाडला धन सम्पत्तिगदे जिम्मा पिन्जी। 15 अर्गु यहुल्सारी निबा धुइरी थे फ्युक्पो म्हिसे हाडला नोकरगदेसे तिग तिग गे लखमुला थे अन्छार गिकदा महरला डबल डा, गिकदा डबल न्ही, गिकदा डबल गिक पिन्सी निजी।

16 “जमाहेन्से महरला डबल डा याड्बा चा तुरुन्तन निजी। ओच्छे व्यापार लसी अर्गु महरला डबल डा सहोजी। 17 थेहड् लसीन महरला डबल न्ही याड्बासेनोन अर्गु महरला डबल न्ही सहोजी। 18 तर महरला डबल गिक याड्बासे चा थे डबल भोर्सी स न्हडरी ल्हुसी थान्जी।

19 “ल्हानान धिन लिच्छा थे नोकरगदेला मालिक खसी थेनीगदेदेन छ्याम हिसाब किताब महाइजी। 20 जमाहेन्से महरला डबल डा याड्बा नोकर खसी ‘मालिक, हाडसे डादा पिन्बा डबल डाग्याम डाइ अर्गु डबल डा सहोबा मुला, चु किन्गो’ भिसी भिमा, 21 मालिकसे थेदा ‘स्याबास ज्यबा नोकर, एसे जजा तामरी विश्वास उन्जी। थेतबासेलमा दाहेन्से डाइ एदा ल्हानान तामगदे जिम्मा पिन्ना। दाहेन्से ए डादेन छ्याम ताड्सी गे लउ’ भिसी भिजी।

22 “जमाहेन्से महरला डबल न्ही याड्बा नोकरएनोन खसी ‘मालिक, हाडसे डादा पिन्बा महरला डबल न्हीग्याम डाइ अर्गु महरला डबल न्ही सहोबा मुला, चु किन्गो’ भिसी भिमा, 23 थेदाएनोन मालिकसे ‘स्याबास ज्यबा नोकर, एसेनोन जजा तामरी विश्वास उन्जी। थेतबासेलमा एदाएनोन डाइ ल्हानान तामगदे जिम्मा पिन्ना। दाहेन्से एनोन डादेन छ्याम ताड्सी गे लउ’ भिसी भिजी।

24 “थेहड् लसीन महरला डबल गिक याड्बा नोकरएनोन खसी ‘मालिक, हाड तिगै आह्ववा ग्लाग्याम बाली दुइबारी महाइबादेन तिगै आयहापवा ग्लारी पोप लबारी महाइबा खरो म्हि हिन्ना भिबा ताम डादा था मुबा। 25 थेतबासेलमा लोड्सी हाडसे डादा पिन्बा महरला डबल डाइ स न्हडरी ल्हुसी थान्जी। दाहेन्से हाडला चु डबल किन्गो’ भिसी भिजी।

26 “जमाहेन्से मालिकसे थेदा ‘ब्लेगु गे आखेल्बा नोकर, डाइ तिगै आह्वना बाली दुइबारी महाइबादेन तिगै आयहापवा ग्लाग्याम पोप लबारी महाइमुला भिबा ताम एदा था मुबा हिन्सम, 27 एसे डाइ पिन्बा डबल बैकरी थान्तो:बा मुबा, एसे बैकरी थान्बा हिन्सम डाइ दो:सी ब्याजदेन थे डबल किन्म्याड्सेला’ भिसी भिजी।

28 “जमाहेन्से मालिकसे ‘थे महरला डबल थेग्याम ब्यन्सी डबल च्युइ मुबा म्हिदा पिन्गो। 29 तिग्दा भिसम जुन म्हिदेन छ्याम मुला थेदा अर्गुएनोन पिन्ना। जमाहेन्से थेदेन छ्याम झन ल्हानान तला। तर जुन म्हिदेन छ्याम आरे थेदेन छ्याम मुबा जजाकीएनोन थेग्याम ब्यन्ना।†* 30 दाहेन्से थे गे आखेल्बा नोकरदा मडग्यार धोपधोपवा ग्लारी भ्याड्गो। थेरी म्हिगदे स्वा क्रेसी क्राबा क्रिड्बा लला।* ”

निसाफ लबा धिन

31 “परमेश्वरसे पुइखबा म्हि य्हाल य्हाल्बा शक्तिरी स्वर्गदूतगदेदेन छ्याम खसी हाडला ठिरी शक्तिशाली ग्ले दोसी धन्छ्याला।* 32 थे धुइरी जम्बुलिडरी मुबा जम्मान य्हुलला म्हिगदे डा मुबा

* 25:12 लूका १३:२५ † 25:29 चु उखानना अर्थ चा खालै म्हिसे परमेश्वरग्याम तिगै मोलम याड्बा मुसम थेदा पूरान चलब लतो:ला, चुहड् लसी चलब लमा थेदेन छ्याम मुबा मोलम बढब तबान निला। तर थेसे थे मोलम चलब आलनी भिसम याड्बा मोलमएनोन म्हासी निला। * 25:29 मती १३:१२; मर्कु ४:२५; लूका ८:१८ * 25:30 मती ८:१२; २२:१३; लूका १३:२८ * 25:31 मती १६:२७; १९:२८

ग्लारी पोप तला। जमाहेन्से गोठालोसे रादेन ग्युदा फेबा हड् लसी थेसेनोन थे म्हिगदेदा फेला।
33 थेहड् लसी फेमाहेन्से डाइ रादा देब्रेपट्टि थान्ना। ओच्छे ग्युदा चा दाहिनेपट्टि थान्ना।

34 “जमाहेन्से डाइ हाडला दाहिनेपट्टि मुबा म्हिगदेदा चुहड् भिसी भिला, ‘डाला आबा परमेश्वरग्याम मोलम याड्बा म्हिगदे! जम्बुलिड छ्यामाहेन्सेन एनीगदेला लागिरी स्होसी थान्बा य्हुल्सारी खसी चिउ। 35 तिग्दा भिसम डा खेन्बा फुइबा धुइरी एनीगदेसे डादा चबा थुड्बा पिन्जी। डा विदेशी तसैनोन एनीगदेसे डादा हाडला दिमरी चिपुड्जी। 36 ओच्छे डाइ क्वान क्वान्आम्याड्बा धुइरी एनीगदेसे डादा क्वान पिन्जी। डा आखम्बा धुइरी एनीगदेसे डादा च्याजी, डा झ्याल्खानरी परब तमा एनीगदे डादा स्याप्वारी खजी।’

37 “चुहड्बा ताम थेःसी परमेश्वरसे कुल्बा ताम ड्यानबा म्हिगदेसे थेदा चुहड् भिसी ड्योइला, ‘प्रभु, डन्से हाडदा खाइमा खेन्बा फुइबा म्राड्सी चबा थुड्बा पिन्जी? 38 ओच्छे डन्से हाडदा खाइमा विदेशी भिसी डन्ना दिमरी स्य्हूपुड्जी, ओच्छे खाइमा हाडसे क्वानआम्याड्बा म्राड्सी डन्से हाडदा क्वान पिन्जी। 39 हाड आखम्बा खाइमा म्राड्सी डन्से हाडदा च्याजी? खाइमा हाड झ्याल्खानरी परब तबा म्राड्सी डनी हाडदा स्याप्वारी खजी?’

40 “जमाहेन्से डाइ थेनीगदेदा ‘एनीगदेसे डाला ताम ड्यानगो, चु डाला आलेगदे न्हडला जम्मान भन्दा जजा आले गिकदा एनीगदेसे जे लबा मुबा थे डालान लागिरी लबा हिन्ना’ भिसी भिला।

41 “दोःसी डाइ हाडला देब्रेपट्टि मुबा म्हिगदेदा चा चुहड् भिसी भिला, ‘नाश तसी निबा म्हिगदे, दाहेन्से एनीगदे शैतानदेन थेला दूतगदेला लागिरी स्होबा खाइमै आसिबा मेरी निउ! 42 तिग्दा भिसम डा खेन्बा फुइबा धुइरी एनीगदेसे डादा चबा थुड्बा आपिन्नी। 43 डा विदेशी मुमा एनीगदेसे डादा एनीगदेला दिमरी चिआपुड्नी। डाइ क्वान क्वान्आम्याड्मा एनीगदेसे डादा क्वान आपिन्नी। डा आखम्बा धुइरी एनीगदेसे डादा आच्यानी। ओच्छे डा झ्याल्खानरी परब तबा धुइरी एनीगदे डादा स्याप्वारी आखनी।’

44 “जमाहेन्से थेनीगदेसेनोन ‘प्रभु, खाइमा डन्से हाड खेन्बा फुइबादेन विदेशी, क्वान क्वान्आम्याड्बा, आखम्बा ओच्छे झ्याल्खानरी परब तबा म्राड्सीनोन हाडला वास्ता आलनी?’ भिसी ड्योइला।

45 “जमाहेन्से डाइ थेनीगदेदा ‘एनीगदेसे डाला ताम ड्यानगो, चु डाला आलेगदे न्हडला जम्मान भन्दा जजा आलेदा एनीगदेसे वास्ता आलबान डादा वास्ता आलबा हिन्ना’ भिसी भिला।

46 “थेतबासेलमा परमेश्वरसे कुल्बा ताम आड्यानबा म्हिगदेसे चा जुकजुकधोनान सजाय याड्ला। तर परमेश्वरसे कुल्बा ताम ड्यानबा म्हिगदेसे चा जुकजुकधोनाला जुनी याड्ला।”*

26

येशूदा साइबारी म्हाइबा

मर्कूस १४:१-२; लूका २२:१-२; यूहन्ना ११:४५-५३

1 चु जम्मान ताम सुड्सी जिन्माहेन्से येशूसे हाडला चेलागदेदा चुहड् भिसी सुड्जी, 2 “मिप्र्र य्हुल्साग्याम फेसी खबा धिनदा ढन्सी धड्बा चाड खबारी न्हीरे जे मुला भिबा ताम एनीगदेदा थानोन मुला। थेनोन धुइरी परमेश्वरसे पुइखबा म्हिदा क्रुसरी टाँगब लबारी चुड्सी म्हिगदेदा जिम्मा पिन्ना।”*

3 थेनोन धुइरी परमेश्वरला मन्दिररी पूजा लबा मुल म्हि कैयाफाला दिमरी य्हूदी गन्बागदेदेन परमेश्वरला मन्दिररी पूजा लबा मुल म्हिगदे हुप तजी। 4 ओच्छे थेनीगदेसे येशूदा खाहड् लसी खालैदा था आयाड्ना साइबा भिसी हाड हाड न्हडरी सल्लाह लजी। 5 तर थेनीगदेसे “यहाडला चाडला धुइरी चा चुड्बारी आत। चाडला धुइरी चुड्जी भिसम म्हिगदेसे हुल दडगा लला” भिसी भिजी।

* 25:46 दानि १२:२ * 26:2 प्रसथा १२:१-२७

प्रिडम्हेमे गिकसे येशूला थोबोरी अत्तर फोर्बा

मर्कूस १४:३-९; यूहनना १२:१-८

६ येशू बेथानिया भिबा नाम्साला कोरे खबा सिमोनला दिमरी फेपखजी। ७ सोल छ्योइबान लबा धुइरी प्रिडम्हेमे गिक सिङ्गमरमरला ताडरी ल्हानान महँगो अत्तर भसी येशू मुबा ग्लारी खजी। ओच्छे थेसे थे अत्तर येशूला थोबोरी युजी।*

८ चुहड् लबा म्राड्सी येशूला चेलागदे बोमो खसी “चुहड्बा महँगो अत्तर तिग्दा ओहड्णोन खेरो भ्याड्बा? ९ बरु चु अत्तर चूड्सी खबा टाडगा प्राडबोगदेदा पिन्बा हिन्सै तसे मुबा” भिसी हाड हाड न्हडरी ताम लजी।

१० येशूसे चु ताम था याड्सी थेनीगदेदा चुहड् भिसी सुड्जी, “एनीगदेसे तिग्दा चु प्रिडम्हेमेदा कचकच लबा? चुसे मी डाला लागिरी ज्यबा गे लबा मुला। ११ तिग्दा भिसम प्राडबोगदे मी सदन एनीगदेदेन छ्याम तला। तर डा मी एनीगदेदेन छ्याम सदन आत।* १२ चुसे डाला सिबा ल्हुइ धुसारी थान्बाला लागिरी डा सिबा भन्दा डाच्छान डाला थोबोरी चु अत्तर युसी ठीक लबा मुला। १३ च्यागो, एनीगदेसे डाला ताम ड्यानगो, जम्बुलिडला जुन जुन ग्लारी थार्बा पिन्बा समाचार थे:ना लला, थे, थे ग्लारी चु प्रिडम्हेमेसे लबा गे ढन्बाला लागिरी थेला ताम लला।”

येशूदा धोका पिन्बा

मर्कूस १४:१०-११; लूका २२:३-६

१४ जमाहेन्से येशूला च्युक न्ही चेलागदे न्हडला यहूदा इस्करियोत भिबा चेला गिक परमेश्वरला मन्दिररी पूजा लबा मुल म्हिगदे मुबा ग्लारी निजी। १५ ओच्छे थेसे थेनीगदेदा “चुदे डाइ येशूदा चुड्सी हाडनीदा जिम्मा पिन्सम हाडनीसे डादा तिग पिन्ना?” भिसी ड्योइमा, थेनीगदेसे यहूदा इस्करियोतदा बोगल गिकसे च्युइ म्हुइला डबल पिन्ना भिसी पिन्जी। १६ जमाकुनुहेन्से यहूदा इस्करियोतसे येशूदा चुड्सी पिन्बाला लागिरी दाउ च्यासी भ्रजी।

येशूसे भोज तयार लउ भिसी कुल्बा

मर्कूस १४:१२-२५; लूका २२:७-१३; यूहनना १३:२१-३०

१७ खमीर आयुना गेड चसी धड्बा चाडला शुरुला धिनकुनु चेलागदे येशू मुबा ग्लारी खसी “हाडला लागिरी डन्से मिश्र यहुल्साग्याम फेसी खबा धिनदा ढन्सी धड्बा चाडला भोज खानड ठीक लउ?” भिसी ड्योइजी।

१८ येशूसे चेलागदेदा चुहड् भिसी कुल्जी, “एनीगदे शहररी म्हि गिक मुबा ग्लारी निसी थे म्हिदा ‘डा सिबा धुइ तसी जिनबा मुला। थेतबासेलमा डाइ हाडला चेलागदेदेन छ्याम चिसी एला दिमरी मिश्र यहुल्साग्याम फेसी खबा धिनदा ढन्सी धड्बा चाड धड्बा सेम मुला, भिसी गुरुसे सुड्बा मुला’ भिसी पाड्गो।” १९ जमाहेन्से येशूसे कुल्बा अनछारनोन चेलागदेसे मिश्र यहुल्साग्याम फेसी खबा धिनदा ढन्सी धड्बा चाडला भोज ठीक लजी।

२० ड्यसे तमाहेन्से येशू हाडला च्युक न्ही चेलागदेदेन छ्यामनोन भोज छ्योइबारी धन्छ्याजी। २१ जमाहेन्से भोज छ्योइबान लबा धुइरी येशूसे चेलागदेदा “च्यागो, एनीगदेसे डाला ताम ड्यानगो, एनीगदे न्हडलान गिकसे डादा म्हिगदेला यारी जिम्मा पिन्ना” भिसी सुड्जी।

२२ जमाहेन्से ल्हानान दुख इहम्सी चेलागदे जम्मासेन येशूदा “प्रभु, थे म्हि डानोन हिन्ना?” भिसी पालो पालो लसी ड्योइबारी छ्याइजी।

२३ ओच्छे येशूसे थेनीगदेदा चुहड् भिसी सुड्जी, “च्यागो, जुन म्हिसे खार्बारी डादेन छ्याम गेड तुइसी चमुला, थेनोन म्हिसे डादा चुड्सी पिन्ना।* २४ परमेश्वरला बचनरी भिबा हड्णोन परमेश्वरसे पुइखबा म्हि मी सिनोन तो:ला। तर जुन म्हिसे परमेश्वरसे पुइखबा म्हिदा चुड्सी म्हिला यारी जिम्मा पिन्ना, थेसे परमेश्वरग्याम खाहड्बा लोड्बा खबा सजाय याड्ला। बरु थे मी न्हनोन आन्हबा हिन्सम ज्यबा तसेला मुबा” भिसी सुड्जी।

* 26:7 लूका ७:३७-३८ * 26:11 व्यव १५:११ * 26:23 भजन ४१:९

25 येशूदा चुड्सी पिन्बारी महाइबा यहूदासेनोन येशूदा “गुरु, थे म्हि डानोन हिन्ना?” भिसी ड्योइजी। जमाहेन्से येशूसे थेदा “थे ताम मी एसेन पाड्जी” भिसी सुड्जी।

प्रभु भोजला शुरु

मर्कुस १४:२२-२६; लूका २२:१४-२३; १ कोरिन्थी ११:२३-२५

26 थेनीगदे भोज चबान लबा धुइरी येशूसे गेड थोसी परमेश्वरदा धन्यवाद पिन्जी। ओच्छे थे गेड क्युइसी चेलागदेदा “ना! चु चउ, चु डाला ल्हुइ हिन्ना” भिसी सुड्जी।

27 जमाहेन्से येशूसे खोरेरी मुबा अडगुरला निडगु थोसी परमेश्वरदा धन्यवाद पिन्सी, चेलागदेदा चुहड् भिसी सुड्जी, “ना! एनीगदे जम्मासेन चु थुड्गो। 28 तिग्दा भिसम एनीगदेसे थुड्बा चु निडगु डाला का हिन्ना। चु का एनीगदेदेन छ्याम लबा छारं कबुल हिन्ना। चुनोन का ल्हानान महिला पापला दोष मेटब लबाला लागिरी बगब तला।* 29 तर एनीगदेसे डाला ताम ड्यान्गो, एनीगदेदेन छ्याम डाला आबाला यहुल्सारी छार अडगुरला निडगु थुड्बा धिन आखतेधोना डाइ चु निडगु आथुड्।”

30 जमाहेन्से परमेश्वरदा धन्यवादला व्हाइ गिक गोसी येशू हाडला चेलागदेदेन छ्याम थे ग्लाग्याम जैतून भिबा गडरीक्यार फेप्जी।

पत्रुससे येशूदा खलाला भिसी पाड्बा ताम

मर्कुस १४:२७-३१; लूका २२:३१-३४; यूहन्ना १३:३६-३८

31 जमाहेन्से येशूसे हाडला चेलागदेदा चुहड् भिसी सुड्जी, “तिनी म्हुनड एनीगदे जम्मासेन डादा खलासी यार्ला। तिग्दा भिसम परमेश्वरला बचनरी ‘डाइ गोठालोदा साइला। ओच्छे ग्युगदे ससा बडबड तसी यार्ला’ भिसी भिबा मुला।* 32 तर डादा सिबाग्याम सोना लमाहेन्से एनीगदे भन्दा डाच्छा डा गालीलरी निला।”*

33 थेनोन धुइरी पत्रुससे येशूदा “हाडदा थेहड् लमा जम्मासेन खलासी यासैनोन डाइ हाडदा खाइमै आख्ला” भिसी भिजी।

34 जमाहेन्से येशूसे पत्रुसदा “च्यागो, एसे डाला ताम ड्यान्गो। तिनी म्हुनड नागा क्राबा भन्दा डाच्छा एसे सोमरेमधोना ‘डाइ येशूदा डोसेबान आरे’ भिसी पाड्ला” भिसी सुड्जी।

35 दोःसी पत्रुससे येशूदा “डा हाडदेन छ्याम सितोःसैनोन डाइ हाडदा आख्ला” भिसी भिजी। ओच्छे स्य्हान्दो चेलागदेसेनोन थेहड् नोन भिजी।

गेतसमनी भिबा ग्लारी येशूसे लबा प्रार्थना

मर्कुस १४:३२-४२; लूका २२:३९-४६

36 जमाहेन्से येशू हाडला चेलागदेदेन छ्याम गेतसमनी भिबा ग्लारी फेप्जी। ओच्छे चेलागदेदा “एनीगदे चुरीन चिउ, डा चा जजाकी क्याथाड निसी प्रार्थना लला” भिसी सुड्सी 37 येशूसे पत्रुसदेन जब्दियाला झा न्हीदा हाडदेन छ्यामनोन भोर्सी फेप्जी। ओच्छे थेदा ल्हानान सुर्दा तसी सेमरी दुख तबारी छ्याइजी। 38 जमाहेन्से येशूसे थेनीगदेदा “डाला सेम क्रोसी डा सिबा तेबान तबा मुला। थेतबासेलमा एनीगदे चुरीन डा हड् लसी छोर्सी चिउ” भिसी सुड्जी।

39 ओच्छे येशू चा जजाकी क्याथाड फेप्सी सरी ख्लुप तसी “आबा डाथोरी खबारी छ्याइबा चु दुख तसम डादा नाआपुड्गो। तर डाइ म्हन्बा अन्छार आहिन, हाडसे म्हन्बा अन्छार तगै” भिसी प्रार्थना लजी।

40 जमाहेन्से येशू चेला सोम मुबा ग्लारी दोःसी फेप्वमा थेनीगदे म्हेर्सी चिबा म्राड्सी येशूसे पत्रुसदा चुहड् भिसी सुड्जी, “एनीगदे डादेन छ्याम घण्टा गिक सुत्तै छोर्सी चिआखमनी? 41 दाहेन्से एनीगदे पापरी फसब आतबाला लागिरी छोर्सी प्रार्थना लसी चिउ। च्यागो, एनीगदेला आत्मा मी तयार मुला, तर ल्हुइ चा कमजोर मुला।”

† 26:28 ल्हानान हड्बा बाइबलरी “छार” भिसी भिबा आरे। * 26:28 प्रस्था २४:८; यर्मि ३१:३४ * 26:31 जक १३:७

* 26:32 मत्ती २८:१६

42 दोःसीनोन येशू डाच्छाला ग्लारीन फेप्सी “आबा चु दुख डाइ नानोन तोःबा हिन्सम हाडसे म्हन्बा हड्णोन तगै” भिसी प्रार्थना लजी।

43 ओच्छे चेलागदे मुबा ग्लारी दोःसी फेप्खमा चेलागदे म्हेर्सी चिबा स्यापजी। म्हेर्बा खबासे लमा थेनीगदेसे मीनोन ठोड्आखमनी। 44 थेतबासेलमा येशूसे थेनीगदेदा थेरीन ख्लासी सोमरेमला पालोरी डाच्छाला ग्लारीन फेप्सी डाच्छाला हड् लसीन प्रार्थना लजी।

45 जमाहेन्से येशू चेलागदे मुबा ग्लारी फेप्खसी थेनीगदेदा चुहड् भिसी सुड्जी, “अझन एनीगदे म्हेर्सी बल्पबा न्हबान मुला? च्यागो, परमेश्वरसे पुड्खबा म्हिदा चुड्सी पापीगदेला यारी जिम्मा पिन्बा धुइ खसी जिन्बा मुला। 46 रेःगो, निड! च्यागो, डादा स्य्हान्दोला यारी जिम्मा पिन्बा म्हि खसी जिन्बा मुला।”

येशूदा चुड्बा

मर्कूस १४:४३-५०; लूका २२:४७-५३; यूहन्ना १८:३-१२

47 येशूसे चु ताम सुड्बान लबा धुइरी च्युक न्ही चेला न्हडला यहूदा इस्करियोत भिबा चेलादेन छ्याम कडीदेन तरवार थोबा महिला हुल धोखजी। थेनीगदेदा परमेश्वरला मन्दिररी पूजा लबा मुल म्हिदेन यहूदी गन्बागदेसे पुड्खमुबा। 48 येशूदा चुड्बारी खबा म्हिगदेदा यहूदासे “जुन म्हिदा डाइ च्योक लला थेनोन येशू हिन्ना, थेदान चुड्गो” भिसी डाच्छान पाड्बा मुबा।

49 येशू मुबा ग्लारी धोमैछ्याम यहूदासे “लासो, फ्याफुल्ला गुरु” भिसी येशूदा च्योक लजी।

50 जमाहेन्से येशूसे थेदा “यहूदा, ए तिग लबारी खबा लउ” भिसी सुड्माहेन्से कडी तरवार पुड्सी खबा म्हिगदेसे येशूदा चुड्सी खीसी भोजी। 51 येशूदेन छ्याम मुबा चेलागदे न्हडला गिकसे हाडला तरवार तेःसी परमेश्वरला मन्दिररी पूजा लबा मुल महिला नोकरला नाब्यड च्वाट्टन थाजी।

52 थे चेलादा येशूसे चुहड् भिसी सुड्जी, “एला तरवार स्युबारी झाड्गो। तिगदा भिसम तरवार थोबा जम्मान म्हिदा तरवारसेन ताम्सी नाश लला। 53 चुदे डाइ डाला आबादा पाड्बा हिन्सम डादा जोगब लबारी डाला आबासे च्युक न्ही भन्दा ल्हानान स्वर्गदूतगदेला हुल तुरुन्तन पुड्खसे मुबा। चु ताम दान्देधोना एसे घोबा आरे? 54 तर डाइ चुहड् लबा हिन्सम परमेश्वरला बचनरी चुहड् तनोन तला भिसी भिबा ताम खाहड् लसी पूरा तला?”

55 जमाहेन्से येशूसे हाडदा चुड्बारी खबा महिला हुलदा चुहड् भिसी सुड्जी, “एनीगदे तिगदा यहूदा चुड्बारी खबा हड् लसी कडी तरवार थोसी खबा? खाइ, डाइ म्हिगदेदा धिन धिननोन परमेश्वरला मन्दिररी लोप्सी चिबा धुइरी एनीगदेसे डादा आचुड्नी।* 56 तर अगमवक्तागदेसे परमेश्वरला बचनरी भिबा अन्छार पूरा तगै भिसीन चुहड् तबा हिन्ना।” जमाहेन्से जम्मान चेलागदेसे येशूदा ख्लासी यार्जी।

येशूदा यहूदीगदेला सभारी भोर्बा

मर्कूस १४:५३-६५; लूका २२:५४-५५, ६३-७१; यूहन्ना १८:१३-१४, १९-२४

57 जमाहेन्से येशूदा चुड्बा म्हिगदेसे येशूदा परमेश्वरला मन्दिररी पूजा लबा मुल म्हि कैयाफाला दिमरी भोजी। थेरी यहूदी गन्बागदेदेन यहूदी धर्मगुरुगदेएनोन पोप तसी चिबा मुबा। 58 तर पत्रुस चा थारेड्ग्यामसेन येशूदा च्याबान च्याबान थे पूजा लबा मुल महिला दिमला खाड्गाधोनान निजी। जमाहेन्से येशूदा तिग लबा चीम भिसी पालेगदेदेन छ्याम चिसी च्याबारी छ्याइजी।

59 परमेश्वरला मन्दिररी पूजा लबा मुल म्हिगदेदेन यहूदी सभाला जम्मान म्हिगदेसे येशूदा साइबाला सजाय पिन्बाला लागिरी येशूला बिरोधरी लुसीला ताम पाड्बा म्हिगदे म्हाइजी। 60 चुहड् लसी ल्हानान म्हिगदेसे येशूदा बिरोध लबान लुसीला ताम पाड्जी। तसैनोन थेनीगदेसे पाड्बा ताम गिकनोन आढिकनी। जम्मान भन्दा लिच्छाला म्हि न्ही डाच्छापट्टि खसी, 61 “च्यागो, चु म्हिसे ‘डाइ परमेश्वरला मन्दिरदा फुप्सी सोमरेरीन स्होखम्ला’ भिसी पाड्बा मुला” भिसी दोष लजी।*

62 जमाहेन्से परमेश्वरला मन्दिररी पूजा लबा मुल म्हि रेःसी येशूदा “एसे तिगदा जोहाब आपिन्बा? चु म्हिगदेसे एला बिरोधरी पाड्बा तामला बारेरी एदा तिगै पाड्सेला आरे?” भिसी ड्योइजी।

* 26:55 लूका १९:४७; २१:३७ * 26:61 यूह २:१९

63 तर येशूसे तिगै जोहाब आलमाहेनसे परमेश्वरला मन्दिररी पूजा लबा मुल म्हिसे दोःसीनोन येशूदा “छोनबो परमेश्वरला मिनरी घान फासी डन्दा पाङ्गो। तिग ए परमेश्वरला झा थार्बा पिन्बा ख्रीष्टनोन हिन्ना?” भिसी पाङ्मा,

64 येशूसे थेदा “थे ताम मी हाडसेन सुङ्जी। तसैनोन दाहेनसे हाडनीसे परमेश्वरसे पुइखबा म्हिदा शक्तिशाली परमेश्वरला दाहिने छ्यापट्टि चिबादेन स्वर्गग्याम खसुरी खबान लबा म्हाङ्ला” भिसी सुङ्जी।*

65 जमाहेनसे परमेश्वरला मन्दिररी पूजा लबा मुल म्हिसे हाडला क्वान ढेबान, “चु म्हिसे परमेश्वरला बिरोध लसी ताम पाङ्बा मुला। दाहेनसे यहाडदा अर्गु प्रमाण तिगदा तोःजी? हाडनीसे दानदे चुसे हाडसे हाडदान परमेश्वर सहोसी पाङ्बा ताम यहाडसे थेःनोन थेःजी। 66 दाहेनसे हाडनीला तिग बिचार मुला?” भिसी ड्योइमा, स्य्हान्दोगदेसे “चु म्हि साइनोन तोःबा म्हि हिन्ना” भिसी भिजी।*

67 जमाहेनसे थे म्हिगदेसे येशूला लीरी थो स्वाबा तोबा ग्याङ्बा लजी। ओच्छे कोइ कोइसे चा तोबान,* 68 “ए थार्बा पिन्बा ख्रीष्ट हिन्सम, लु, अगमवाणी पाङ्गो। एदा खाल्से तोबा हिन्ना?” भिसी पाङ्जी।

पत्रुससे डाइ येशूदा डोसेबान आरे भिसी पाङ्बा

मर्कूस १४:६६-७२; लूका २२:५६-६२; यूहन्ना १८:१५-१८, २५-२७

69 थे धुइरी पत्रुस खाङ्गारी मुबा। थेदा म्हाङ्सी नोकरस्या गिक थे मुबा ग्लारी खसी, “एएनोन गालीलला येशूदेन छ्यामनोन मुबा आहिन?” भिसी ड्योइजी।

70 तर पत्रुससे जम्मालान ओन्छाडरी “एसे खाल्ला ताम लबा, डादा तिगै था आरे” भिसी, 71 थे खाङ्गाला म्हापरी निजी। थेरीनोन थेदा स्य्हान्दो नोकरस्या गिकसे म्हाङ्सी जम्मान म्हिगदेदा “चु म्हिएनोन नासरतला येशूदेन छ्यामनोन मुबा” भिसी पाङ्जी।

72 दोःसी पत्रुससे घान फाबान, “डाइ थे म्हिदा डोसेबान आरे” भिसी पाङ्जी।

73 जजाकी लिच्छा थेरी मुबा म्हिगदे पत्रुसला डामरी खसी थेदा “पक्कान एएनोन थेनीगदे न्हडला गिक हिन्ना भिबा एला तामग्यामनोन था तजी” भिसी भिजी।

74 जमाहेनसे पत्रुससे “डाइ लुसीला ताम पाङ्बा हिन्सम परमेश्वरला सजाय डाथोरी खगै भिसी घान फाबान डाइ थे म्हिदा डोसेबान आरे” भिसी भिजी।

थेसे थेहङ् भिमैछ्याम नागा क्राजी। 75 जमाहेनसे येशूसे “च्यागो, नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी सुङ्बा ताम पत्रुससे ढन्जी। थेतबासेलमा थे मङ्ग्यार निसी घ्वाँ घ्वाँ क्राजी।

27

येशूदा पिलातसला डाच्छापट्टि भोर्बा

मर्कूस १५:१; लूका २३:१-२; यूहन्ना १८:२८-३२

1 स्य्होरीन परमेश्वरला मन्दिररी पूजा लबा जम्मान मुल म्हिगदेदेन यहूदी गन्बागदेसे येशूदा साइनोन तोःला भिसी सल्लाह लजी। 2 जमाहेनसे थेनीगदेसे येशूदा खीसी पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी।

यहूदा इस्करियोत च्योसी सिबा

मुल चेला १:१८-१९

3 येशूदा साइनोन तोःला भिसी पाङ्बा ताम येशूदा चुङ्सी पिन्बा यहूदासे थेःजी। जमाहेनसे थेदा ल्हानान दुख इहम्सी थेसे किन्बा बोगल गिकसे च्युइ म्हुइला डबल परमेश्वरला मन्दिररी पूजा लबा मुल म्हिगदेदेन यहूदी गन्बागदेदा दोःसी पिन्बारी खजी। 4 ओच्छे यहूदासे थेनीगदेदा “तिगै दोष

* 26:64 दानि ७:१३ * 26:66 लेवी २४:१६ * 26:67 यशै ५०:६

आरेबा म्हिदा साइबाला लागिरी चुड्सी पिन्सी डाइ पाप गे लबा मुला” भिसी भिमा, थेनीगदेसे यहूदादा “डन्दा तिग मतलब? एनोन सेला” भिसी भिजी।

5 जमाहेन्से यहूदासे थे म्हुइला डबल परमेश्वरला मन्दिररीन भ्याड्सी निजी, ओच्छे थे च्योसी सिजी।

6 तर परमेश्वरला मन्दिररी पूजा लबा मुल म्हिगदेसे चा थे डबल दुइसी “चु डबल परमेश्वरला मन्दिरला दुकुटीरी थान्बा ठीक आत। तिग्दा भिसम चु काला सय हिन्ना” भिसी भिजी। 7 थेतबासेलमा थेनीगदे ह्वाड ह्वाड न्हडरी सल्लाह लसी थे टाडगासे अर्गु यहुल्साला सिबा म्हि ल्हुबारी कुमालेला वारी ग्लुजी। 8 थेतबासेलमा दान्देधोनाएनोन थे वारीदा काला वारी भिसी भिमुला।* 9 यर्मिया अगमवक्तासे पाड्बा ताम चुहड् लसी पूरा तजी,

“थे म्हुइला बोगल गिकसे च्युइ डबल परमेश्वरला मन्दिररी पूजा लबा म्हिगदेसे किन्जी।

थे डबल चा थेला सय हिन्ना भिसी इस्राएलला म्हिगदेसे तोगब लबा मुबा।*

10 जमाहेन्से परमेश्वरसे डादा कुल्बा अन्छार

थेनीगदेसे थेनोन टाडगासे कुमालेला बु ग्लुजी।”*

येशूदा पिलातसला डाच्छापट्टि रापपुड्बा

मर्कूस १५:२-१५; लूका २३:३-५, १३-२५; यूहन्ना १८:३३-१९:१६

11 येशू अञ्चलाधीशला डाच्छापट्टि रापमाहेन्से अञ्चलाधीशसे “तिग ए यहूदीगदेला ग्ले हिन्ना?” भिसी ड्योइमा, येशूसे थेदा “थे मी ह्वाडसेन सुड्बा मुला” भिसी जोहाब पिन्जी।

12 परमेश्वरला मन्दिररी पूजा लबा मुल म्हिगदेदेन यहूदी गन्बागदेसे येशूदा ल्हानान दोष लजी। तसैनोन येशूसे तिगै जोहाब आलनी। 13 जमाहेन्से पिलातस भिबा अञ्चलाधीशसे येशूदा “थेनीगदेसे एला बिरोध लसी एदा ल्हानान दोष लबान मुला, तिग एसे थे:बा आरे?” भिसी भिजी। 14 तर येशूसे थेदा ताम गिकलान जोहाब आपिन्नी। थेतबासेलमा अञ्चलाधीशएनोन उदेक तजी।

15 अञ्चलाधीशसे मिश्र यहुल्साग्याम फेसी खबा धिनदा ढन्सी धड्बा चाडला धुइरी महिला हुलसे धम्बा झ्याल्खानरी मुबा म्हि गिकदा पुइमुबा। 16 थे धुइरी जम्मान म्हिसे डोसेबा बारब्बा भिबा आज्यबा गे लबा म्हि गिक झ्याल्खानरी मुबा। 17 थेरी म्हिगदे पोप तमाहेन्से पिलातससे थेनीगदेदा “डाइ खाल्दा पुइगै भिबा एनीगदेला सेम मुला? बारब्बादा पुइगो कि थार्बा पिन्बा ख्रीष्ट भिबा येशूदा पुइगो?” भिसी ड्योइजी। 18 तिग्दा भिसम थेनीगदेसे येशूला डाह लसी ह्वाड मुबा ग्लारी भबा हिन्ना भिबा ताम पिलातसदा था मुबा।

19 पिलातस निसाफ लबा ग्लारीन मुबा धुइरी पिलातसला म्रिडसे “थे तिगै दोष आरेबा म्हिदा तिगै थालउ। तिग्दा भिसम तिनी म्हुनड डाइ थेला बारेरी म्हड म्राड्सी डादा ल्हानान दुख तबा मुला” भिसी खबर पुइजी।

20 तर परमेश्वरला मन्दिररी पूजा लबा मुल म्हिगदेदेन यहूदी गन्बागदेसे थेरी मुबा महिला हुलदा “बारब्बादा ख्लासी पिन्गो। ओच्छे येशूदा चा साइगो” भिउ” भिसी पाड्पुड्जी। 21 थेतबासेलमा दो:सी अञ्चलाधीशसे थेनीगदेदा “डाइ चु न्ही न्हडरी खजिबादा पुइगै भिबा एनीगदेला सेम मुला?” भिसी ड्योइमा, थेनीगदेसे “बारब्बादा पुइगो” भिसी भिजी।

22 जमाहेन्से पिलातससे थेनीगदेदा “थेहड् भिसम थार्बा पिन्बा ख्रीष्ट भिबा येशूदा डाइ तिग लउ?” भिसी ड्योइमा, थेनीगदे जम्मासेन “चुदा क्रुसरी टाँगब लसी साइगो!” भिसी भिजी।

23 पिलातससे “तिग्दा? चुसे थेहड्बा आज्यबा गे तिग लबा मुला?” भिसी ड्योइजी।

तर थेनीगदेसे झन क्रिड्बान, “चुदा क्रुसरी टाँगब लसी साइगो” भिसी भिजी।

24 तिगै लसीन आखम्बा म्राड्सी दाहेन्से झन हल्ली खल्ली तला भिसी पिलातस लोड्जी। ओच्छे थेसे जम्मान महिला डाच्छा या खुसी। “चु म्हिदा साइबासे लमा डाइ तिगै सजाय नाआतो:गै, थे सजाय एनीगदेसेन नागो” भिसी भिमा,* 25 थेरी मुबा जम्मान म्हिगदेसे “चुदा साइबाला सजाय डन्देन

* 27:8 मुल १:१८-१९ * 27:9 जक ११:१२-१३ * 27:10 जक ११:१३ † 27:24 पिलातससे या खुबाला अर्थ चा डाला तिगै दोष आरे भिसी उन्बाला लागिरी हिन्ना। * 27:24 व्यव २१:६-९

डन्ना सन्तानसेन नाला” भिसी जोहाब पिन्जी।

26 जमाहेन्से पिलातससे बारब्बादा पुड्जी। तर येशूदा चा कोर्सासे तोसी क्रुसरी टाँगब लसी साइबाला लागिरी रोमी सिपाहीगदेदा जिम्मा पिन्जी।

सिपाहीगदेसे येशूदा खिसी लबा

मर्कुस १५:१६-२०; यूहन्ना १९:२-३

27 जमाहेन्से येशूदा सिपाहीगदेसे अञ्चलाधीश चिबा दिमरी भोजी। ओच्छे जम्मान सिपाहीगदे येशूला क्युसीन पोप तजी। 28 जमाहेन्से येशूला क्वान स्युसी वाला क्वान क्वान्सी पिन्जी। 29 थेनीगदेसे पुजुला फेटा सहोसी येशूदा थोड्सी पिन्जी। ओच्छे येशूदा दाहिने छ्यारी माला कडी पिन्सी “लासूसो यहूदीगदेला ग्ले, फ्याफुल्ला” भिसी फ्या लबा सहोसी येशूदा खिसी लजी। 30 ओच्छे थेनीगदेसे येशूदा थो सवाबान थे माला कडीसे थोबोरी तोजी। 31 थेहड् लसी खिसी लमाहेन्से थेनीगदेसे थे क्वान स्युसी पिन्जी। ओच्छे येशूदा थेलान क्वान क्वान्सी क्रुसरी टाँगब लसी साइबारी भोजी।

येशूदा क्रुसरी टाँगब लबा

मर्कुस १५:२१-३२; लूका २३:२६-४३; यूहन्ना १९:१७-२४

32 ग्यामरी निबान लमा थेनीगदेसे कुरेनी भिबा ग्लाला सिमोनदा खबान लबा स्यापजी। जमाहेन्से थेनीगदेसे थे महिदा कर लसी येशूला क्रुस पुड्पुड्जी। 33 ओच्छे थेनीगदे गलगथा भिबा ग्लारी धोखजी। गलगथा भिबा चा “खपपरला ग्ला” हिन्ना। 34 थेरी धोखमाहेन्से थेनीगदेसे येशूदा अडगुरला निडगुरी कम्बा मान युसी पिन्जी। तर येशूसे थे निडगु म्यहाड्माहेन्से आसोल्नी।*

35 थेनीगदेसे येशूदा क्रुसरी टाँगब लमाहेन्से चिट्टा युसी हाड हाड न्हडरी येशूला क्वान भो लजी।* 36 जमाहेन्से थेनीगदे थेरीन चिसी येशूदा खुड्जी। 37 ओच्छे थेनीगदेसे “येशू यहूदीगदेला ग्ले” भिसी दोष उन्बा ताम भिसी येशूला थोबोथोरी क्रुसरी थान्जी। 38 थेनीगदेसे येशूदा क्रुसरी टाँगब लबा धुडरी य्हो न्हीदाएनोन गिकदा दाहिनेपट्टि गिकदा देब्रेपट्टि क्रुसरी टाँगब लजी।

39 थे ग्याम निबा खबा महिगदेसेनोन हाड हाडला थोबो य्होड्बान येशूदा खिसी लबान,* 40 “लु, परमेश्वरला मन्दिर फुप्सी दोःसी सोमरेरीन सहोला भिबा महि दान्दे एसे हाडसे हाडदान जोगब लउ। ए परमेश्वरलान झा हिन्सम क्रुसग्याम मार फापगो” भिसी भिजी।*

41 जमाहेन्से परमेश्वरला मन्दिररी पूजा लबा मुल महिगदे, यहूदी धर्मगुरुदेन यहूदी गन्बागदेसेनोन येशूदा खिसी लबान चुहड् भिसी भिजी, 42 “चुसे स्यहान्दो महिदा चा जोगब लजी, तर हाडसे हाडदान चा जोगब लबारी आखम्नी। चु इस्राएलीगदेला ग्ले आहिन! थे दान्देन क्रुसग्याम मार फापसी खगै। जमाहेन्से डन्से थेदा विश्वास लला। 43 चुसे परमेश्वरदा विश्वास लमुबा। ओच्छे ‘डा परमेश्वरलान झा हिन्ना’ भिसी भिमुबा। चुदे परमेश्वर चुदा म्राड्सी ताड्बा मुसम परमेश्वरसेन चुदा जोगब लगै।”*

44 थेहड् लसीन येशूदेन छ्यामनोन क्रुसरी टाँगब लबा य्होगदेसेनोन येशूदा खिसी लजी।

येशू सिबा

मर्कुस १५:३३-४१; लूका २३:४४-४९; यूहन्ना १९:२८-३०

45 जमाहेन्से धिनना बाह बजेहेन्से तीन बजेधोना यहूलसा नाडनोन धोपधोप तजी। 46 ओच्छे तीन बजेरीक्यार येशूसे घेन काडरी क्रिड्बान, “इलोइ इलोइ लामा सबखथनी?” भिसी सुड्जी। चुहड् भिबा चा “डाला परमेश्वर, डाला परमेश्वर हाडसे डादा तिग्दा ख्लाबा?” भिबा हिन्ना।*

47 येशूला ताम थेःसी थेरी राप्सी चिबागदे न्हडला कोइ कोइसे चा “चुसे मी एलियादा गा ड्योडबा चीम” भिसी भिजी। 48 जमाहेन्से थेनीगदे न्हडला गिक चा तुरुन्तन यार्बान निसी अडगुरला कम्बा निडगुरी क्वानगेन ब्लुम्सी माला कडीरी खीसी येशूदा खवाजी।* 49 तर स्यहान्दोगदेसे चा “भ्रान्गो, भ्रान्गो, चुदा एलिया खसी जोगब लला वा? च्यागे” भिसी भिजी।

* 27:34 भजन ६९:२१ * 27:35 भजन २२:१८ * 27:39 भजन २२:७; १०९:२५ * 27:40 मत्ती २६:६१; यूह २:१९ * 27:43 भजन २२:८ * 27:46 भजन २२:१ * 27:48 भजन ६८:२१

50 दोःसी येशू घेन काइरी क्रिड्जी, जमाहेन्से येशूला सा निजी।

51 थेनोन धुइरी परमेश्वरला मन्दिररी मुबा पर्दा तोरहेन्से मारधोना हाडनोन ठेसी पख्ले न्ही तजी। ओच्छे जम्बुलिडनोन याडयोड तसी पहरागदे फुपजी।* 52 जमाहेन्से धुर्सागदे ठोड्जी, ओच्छे परमेश्वरला ल्हानान म्हिगदेदा सिबाग्याम सोना लजी। 53 येशू सिबाग्याम सोना लमाहेन्से थेनीगदे धुर्साग्याम थोन्सी परमेश्वरला शहर यरूशलेमरी निजी। थेनीगदेदा थेरी ल्हानान म्हिगदेसे म्राड्जी।

54 सडगुल खबादेन थेरी तबा जम्मान ताम म्राड्सी येशूदा खुड्सी चिबा रोमी सिपाहीगदेदेन कप्तान ल्हानान लोड्सी “पक्कान चु मी परमेश्वरला झानोन चीम” भिसी भिजी।

55 थेरी येशूदा गालीलहेन्सेन हो लबान येशूदेन छ्याम छ्यामनोन खबा ल्हानान म्रिडम्हेमेगदेसेनोन थारेडग्यामसेन च्यासी चिबा मुबा। 56 थेनीगदे न्हडरी मरियम मग्दलिनी, याकूबदेन योसेफला आमा मरियमदेन जब्दियाला म्रिडएनोन मुबा।*

येशूदा धुर्सारी थान्बा

मर्कूस १५:४२-४७; लूका २३:५०-५६; यूहन्ना १९:३८-४२

57 ड्यसे तमाहेन्से अरिमाथिया भिबा शहरला योसेफ भिबा फ्युकपो म्हि गिक पिलातस मुबा ग्लारी निजी। थेएनोन येशूला चेला मुबा। 58 पिलातस मुबा ग्लारी धोमाहेन्से थेसे येशूला लास हीजी। जमाहेन्से पिलातससे थेदा येशूला लास भोर्पुड्जी। 59 जमाहेन्से योसेफसे मलमलला सफा छार क्वानरी येशूला लास रिल्सी, 60 थेसे हाडलान लागिरी पहरारी ट्वाइसी सहोबा छार धुर्सारी थान्जी। ओच्छे धुर्साला म्रापरी घेन युडबा बलिडबान भसी थान्सी थे निजी। 61 थे धुर्साला डाच्छापट्टि मरियम मग्दलिनीदेन अर्गु मरियमएनोन चिबा मुबा।

सिपाहीगदेसे येशूला धुर्सा खुड्बा

62 न्हडगरदडसे बलपबा न्हबा धिनकुनु परमेश्वरला मन्दिररी पूजा लबा मुल म्हिगदेदेन फरिसीगदे पिलातस मुबा ग्लारी निजी। 63 ओच्छे थेनीगदेसे चुहड् भिसी भिजी, “थे ठगसे सोबा धुइरी ‘डादा सिबाग्याम सोमरेमाकुनु सोना लला’ भिसी भ्रबा ताम डन्दा था मुला।” 64 थेतबासेलमा सोमरेमाधोना सिपाहीगदेदा धुर्सा खुड्पुड्गो। आहिन्सम थेला चेलागदे खसी थेला लास य्हो लसी भोर्ला। ओच्छे ‘येशूदा सिबाग्याम सोना लजी’ भिसी म्हिगदेदा डाच्छाला भन्दा झन झुक्याब लसी भ्रला।”

65 लु, थेहड् भिसम “सिपाहीगदे भोर्सी ज्यना लसी धुर्सा खुड्पुड्गो” भिसी पिलातससे थेनीगदेदा भिजी।

66 जमाहेन्से थेनीगदे धुर्सारी निसी धुर्साला म्रापरी थान्बा युडबारी लाहा छाप लसी सिपाहीगदेदा खुड्पुड्जी।

28

येशूदा सिबाग्याम सोना लबा

मर्कूस १६:१-१०; लूका २४:१-१२; यूहन्ना २०:१-१०

1 बलपबा न्हबा धिनना न्हडगरदड स्य्होरीन मरियम मग्दलिनीदेन स्य्हान्दो मरियम भिबा म्रिडम्हेमे न्ही येशूदा थान्बा धुर्सा च्याबारी निजी। 2 थेनोन धुइरी सडगुल खजी। तिग्दा भिसम स्वर्गग्याम परमप्रभुला दूत गिक मार फाप्सी धुर्साला म्रापरी थान्बा युडबा बलिड्सी थेनोन युडबाथोरी चिजी। 3 थे स्वर्गदूतला ली धिनीला स्य्हेर हड्बान यहाल यहाल्बा मुबा। ओच्छे थेला क्वान गलिड तेबान तार मुबा। 4 थेदा म्राड्सी धुर्सा खुड्सी चिबा सिपाहीगदे लोड्सी फितफित धर्सी सिबा तेबान तजी।

5 तर स्वर्गदूतसे थे म्रिडम्हेमेगदेदा चुहड् भिसी भिजी, “एनीगदे थालोड्गो, तिग्दा भिसम क्रुसरी टाँगब लसी साइबा येशूदा एनीगदेसे म्हाइबान मुला भिबा ताम डादा था मुला। 6 येशू चुरी आरे, थेसे सुड्बा हड्बान थेदा सिबाग्याम सोना लसी जिन्बा मुला। एनीगदेन खसी थेदा थान्बा ग्ला च्यागो।

* 27:51 प्रस्था २६:३१-३३

* 27:56 लूका ८:२-३

* 27:63 मत्ती १६:२१; १७:२३; २०:१९; मर्कू ८:३१; ९:३१; लूका ९:२२;

१८:३१-३३

7 दाहेन्से एनीगदे योना निसी थेला चेलागदेदा 'येशूदा सिबाग्याम सोना लसी जिन्बा मुला। ओच्छे येशू एनीगदे भन्दा डाच्छा गालील अञ्चलरी फेपबान मुला। एनीगदेसे येशूदा थेरीन म्राड्ला' भिसी पाड्सी पिन्गो।”

8 चुहड् तबा म्राड्सी थे म्रिडमहेमेगदे लोड्जी। तसैनोन स्वर्गदूतला ताम थेःसी थेनीगदे ल्हानान ताड्सी येशूला चेलागदेदा थे ताम पाड्बारी धुर्साग्याम थोन्सी यार्बान निजी।

9 थे म्रिडमहेमेगदे ग्यामरी निबान लमा तिक्खुरीन येशूसे स्याप्सी “एनीगदेदा शान्ति तगै” भिसी सुड्माहेन्से थेनीगदेसे येशूला स्यहाप चुड्सी फ्या लजी। 10 जमाहेन्से येशूसे थेनीगदेदा “एनीगदे थालोड्गो, डाला आलेगदे मुबा ग्लारी निसी थेनीगदेदा गालील अञ्चलरी निउ भिउ, थेनीगदेसे डादा थेरीन स्याप्ला भिसी पाड्सी पिन्गो” भिसी सुड्जी।

धुर्सा खुड्बा सिपाहीगदेसे पाड्बा ताम

11 थे म्रिडमहेमेगदे धुर्साग्याम निमाहेन्से धुर्सा खुड्सी चिबा सिपाहीगदे न्हडला कोइ कोइ सिपाहीगदे शहररी निसी परमेश्वरला मन्दिररी पूजा लबा मुल म्हिगदेदा थे धुर्सारी तिग तिग तबा मुबा, थे ताम पाड्सी पिन्जी। 12 जमाहेन्से पूजा लबा मुल म्हिगदेदेन यहूदी गन्बागदे हुप तसी थेनीगदे न्हडरी सल्लाह लसी सिपाहीगदेदा ल्हानान टाडगा पिन्सी चुहड् भिसी भिजी, 13 “एनीगदेसे ‘डनी म्हुनड म्हेर्बा धुडरी थेला चेलागदे खसी थेला लास यहो लसी भोर्जीम’ भिसी पाड्गो। 14 तिगै लसी चु ताम अञ्चलाधीशसे था याड्जी भिसै डन्से थेदा ताड्ना लसी एनीगदेदा तिगै लआपुड्।”

15 जमाहेन्से सिपाहीगदेसे थे टाडगा किन्जी, ओच्छे थेनीगदेदा लोपबा अन्छारनोन म्हिगदेदा पाड्जी। दान्देधोनाएनोन यहूदीगदेला गुडरी चुनोन ताम लसी चिमुला।

येशूसे पिन्बा थुमला अर्ती

मर्कूस १६:१४-१८; लूका २४:३६-४९; यूहन्ना २०:१९-२३; मुल चेला १:६-८

16 येशूसे हाडला च्युक गिक चेलागदेदा “गालील अञ्चलला गडरी निउ” भिसी कुलबासे लमा थेनीगदे थेरी निजी।* 17 थेरी थेनीगदेसे येशूदा म्राड्सी फ्या लजी। तर थेनीगदे न्हडला कोइ कोइसे चा येशू हिन्ना कि आहिन भिसी शङ्का लजी। 18 जमाहेन्से येशू थेनीगदे मुबा ग्लारी फेपखसी चुहड् भिसी सुड्जी, “च्यागो, परमेश्वरसे स्वर्गदेन जम्बुलिडला जम्मान अधिकार डादा पिन्बा मुला। 19 थेतबासेलमा एनीगदे यहुल्सा यहुल्सारी निसी जम्मान यहुलला म्हिगदेदा डाला चेला स्होउ। ओच्छे थेनीगदेदा परमेश्वर आबा, परमेश्वरला झादेन परमेश्वरला आत्माला मिनरी बपत्तिस्मा पिन्गो,* 20 ओच्छे डाइ एनीगदेदा लोपबादेन कुल्बा जम्मान ताम थेनीगदेदाएनोन लउ भिसी लोपगो। च्यागो, परमेश्वरसे जम्बुलिडला जम्मान म्हिगदेला निसाफ लबा धिनधोनाएनोन डा एनीगदेदेन छ्यामनोन तला।”

* 28:16 मत्ती २६:३२; मर्कू १४:२८ * 28:19 मुल १:८

मर्कूससे भिबा थार्बा पिन्बा समाचार चु किताबला बारेरी पाङ्तो:मा

भिबा म्हि: मर्कूस भिबा यूहन्नासे भिबा मुबा। थे येशूला मुल चेला सिमोन पत्रुसला हो मुबा (१ पत्रुस ५:१३)। थे बारनाबास ओच्छे पावलदेन छ्याम थार्बा पिन्बा समाचार थे:ना लबारी निबा मुबा (मुल चेला १२:२५)।

भिबा ग्ला: रोम शहररी भिबा मुबा।

भिबा साल: ओस्पन ईश्वी संवत् ६०-६५ (विक्रम संवत् ११७-१२३) सालला गुडरी भिबा हिन्ना। थे धुडरी ख्रीष्टियानगदेदा रोमीगदेसे ल्हानान दुख पिन्बा मुबा। चु थार्बा पिन्बा समाचार जम्मान भन्दा डाच्छा भिबा मुबा।

खाल्दा भिबा: येशू परमेश्वरला झा हिन्ना भिसी उन्बाला लागिरी अर्गु यहुलला म्हिगदेदा भिबा मुबा।

चु थार्बा पिन्बा समाचाररी येशूसे लबा गेदेन थेला अधिकारला बारेरी भिबा मुला। येशूसे लोप्बा तामगदेग्याम, म्हड म्हड ताप्बा तामगदेग्याम, म्हिगदेला पाप माफ लबा तामगदेग्याम येशू चा अधिकार याड्बा म्हि हिन्ना भिसी था याड्खम्ला। ओच्छे येशूसे म्हिगदेदा पापग्याम सोना लबारी हाडला ज्याननोन पिन्बारी खबा “परमेश्वरसे पुड्खबा म्हि” हिन्ना भिसी सुड्बा मुला।

चुरी येशूसे पिन्बा अर्तीला तामदेन लोप्बा तामगदे भन्दा थेसे लबा गेगदेला बारेरी ल्हानान भिबा मुला। बपत्तिस्मा पिन्बा यूहन्नाला बारेरीदेन येशूसे किन्बा बपत्तिस्माला बारेरी ओच्छे शैतानसे येशूला सेम च्याबा तामला बारेरी तिगै ताम पाङ्माहेन्से तुरुन्तन येशूसे म्हिगदेदा खम्ना लबादेन लोप्बा तामला बारेरी घोना लबा मुला। थेहड लसीन लिच्छा येशूला चेलागदेसे येशूदा ज्यना लसी डोसेजी। तर येशूदा बिरोध लबागदेसे चा येशूदा इन बिरोध लबारी छ्याड्जी। चु किताबला थुमरी येशूला ल्हुडरी तबा लिच्छाला साताला तामगदेदेन क्रुसरी टाँगब लसी साड्बा ओच्छे सिबाग्याम दो:सी सोबा तामला बारेरी भिबा मुला।

मुल तामगदे

थार्बा पिन्बा समाचार थे:ना लबा १:१-१३

येशूसे गालील अञ्चलरी लबा गे १:१४-९:५०

येशू गालील अञ्चलहेन्से यरूशलेम शहरधोना फेप्बा १०:१-५२

यरूशलेम शहररी येशूला गे थुम्बा धुड ११:१-१५:४७

येशू सिबाग्याम सोबा १६:१-८

येशू सिबाग्याम सोमाहेन्से चेलागदे मुबा ग्लारी फेप्खबादेन येशू स्वर्गरी फेप्बा १६:९-२०

मर्कूससे भिबा थार्बा पिन्बा समाचार

बपत्तिस्मा पिन्बा यूहन्नासे थे:ना लबा थार्बा पिन्बा समाचार

मत्ती ३:१-१२; लूका ३:१-९, १५-१७; यूहन्ना १:१९-२८

१ परमेश्वरला झा येशू ख्रीष्टला बारेला थार्बा पिन्बा समाचार चुहड लसी शुरु तजी। २ यशैया भिबा अगमवत्ताला किताबरी परमेश्वरसे चुहड भिसी सुड्बा मुला,

“च्यागो, डाड डाला समाचार भोर्बा म्हिदा एला डाच्छा डाच्छा पुड्खला।

थेसे एला ग्याम सहोला।*

३ तोडतोडबा ग्लारीक्यार म्हि गिक क्रिड्बान,

‘परमप्रभुला ग्याम तयार लउ,

* 1:2 मला ३:१

ओच्छे परमप्रभु भ्रबाला लागिरी थेला ग्याम सोजो सहोड।”*

4 चु म्हि बपतिस्मा पिन्बा यूहन्ना हिनना। थेसे तोडतोडबा ग्लारीक्यार खसी म्हिगदेदा “दाहेन्से एनीगदे हाड हाडला पाप ख्लासी परमेश्वरपट्टि दोःसी बपतिस्मा किन्गो। परमेश्वरसे एनीगदेला पापला दोष मेटब लला।” भिबान थार्बा पिन्बा समाचार थेःना लजी। 5 यरूशलेमदेन यहूदिया यहूल्साला जम्मान म्हिगदे यूहन्ना मुबा ग्लारी खसी, दाहेन्से डनी हाड हाडला पाप ख्लासी परमेश्वरपट्टि दोःला भिसी यर्दन स्योडरी यूहन्नाग्याम बपतिस्मा किन्जी। 6 यूहन्नासे ऊँटला क्राला क्वान क्वानमुबा ओच्छे ढिला पेटी खीमुबा। थेसे तिरीदेन हि सिडसोरला खुदु चमुबा।* 7 थेसे म्हिगदेदा चुहड् भिसी पाड्जी, “डा भन्दा लिच्छा फेप्खबान लबा चा डा भन्दान शक्तिशाली मुला। डा कू तसी थेला लखमला तुना बलबाधोनाला आरे। 8 डाइ एनीगदेदा क्युडग्याम बपतिस्मा पिन्बा मुला, तर थेसे एनीगदेदा परमेश्वरला आत्मासे बपतिस्मा पिन्ना।”

येशूसे यूहन्नाग्याम बपतिस्मा किन्बा

मत्ती ३:१३-१७; लूका ३:२१-२२

9 थेनोन धुइरी येशू गालील अञ्चलला नासरत नाम्साग्याम फेप्खजी, ओच्छे यर्दन स्योडरी यूहन्नाग्याम बपतिस्मा किन्जी। 10 यूहन्नाग्याम बपतिस्मा किन्सी क्युडग्याम थोनमैछ्याम येशूसे स्वर्ग ठोड्बा म्राड्जी ओच्छे परमेश्वरला आत्मा ढुकुर हड् लसी हाडथोरी फाप्खबान लबा म्राड्जी। 11 ओच्छे स्वर्गग्याम “ए डाइ सेमहेन्से माया लबा डाला झा हिनना, थेतबासेलमा डा एदा म्राड्सी ल्हानान ताड्बा मुला” भिबा काइ खजी।*

शैतानसे येशूदा फसब लबारी म्हाड्बा

मत्ती ४:१-११; लूका ४:१-१३

12 जमाहेन्से परमेश्वरला आत्मासे येशूदा तोडतोडबा ग्लारी भोजी। 13 येशू बोगल न्ही धिनधोना थेरीन धन्छ्याजी। थेनोन धुइरी शैतानसे थेदा फसब लबारी थेला सेम च्याजी। थे हीला जन्तुगदेदेन छ्याम मुबा ओच्छे स्वर्गदूतगदेसे थेदा क्योड्जी।

येशूसे डाच्छा धम्बा चेलागदे

मत्ती ४:१२-२२; लूका ४:१४-१५; ५:१-११

14 बपतिस्मा पिन्बा यूहन्नादा झ्याल्खानरी थान्माहेन्से येशूसे परमेश्वरला यहूल्साला समाचार थेःना लबान गालील अञ्चलरी फेपजी। 15 “दाहेन्से धुइ योसी जिन्बा मुला, ओच्छे परमेश्वरला यहूल्सा खबा धुइ तसी जिन्बा मुला। थेतबासेलमा एनीगदे हाड हाडला पाप ख्लासी परमेश्वरपट्टि दोःगो। ओच्छे थार्बा पिन्बा समाचाररी विश्वास लउ” भिसी येशूसे सुड्जी।*

16 येशू गालील समुन्द्रला कुनीन कुनी फेपबान लमा थेसे सिमोनदेन थेला आले अन्द्रियासदा तार्डा साइबारी समुन्द्ररी घ्याड क्लाड्बान लबा म्राड्जी। तिग्दा भिसम थेनीगदे तार्डा साइबा म्हिगदे मुबा। 17 येशूसे थेनीगदेदा “डादेन छ्याम भ्रउ, दाहेन्से डाइ एनीगदेदा तार्डा चुड्बा म्हि आहिन, तर म्हिगदेदा परमेश्वर मुबा ग्लारी भबा म्हि सहोला” भिसी सुड्जी। 18 येशूसे थेहड् सुड्मैछ्याम हाडला घ्याड ख्लासी थेनीगदे येशूदेन छ्याम भ्रजी। 19 जजाकी क्यथाड धोमाहेन्से येशूसे जब्दियाला झा न्ही, याकूबदेन थेला आले यूहन्नादा दौंगारी चिसी घ्याड राबान लबा म्राड्जी। 20 येशूसे थेनीगदेदा म्राड्मैछ्याम “डादेन छ्याम खउ” भिसी ड्योड्जी, ओच्छे थेनीगदेसे हाडला आबा जब्दियादा दौंगारी मुबा कुल्लीगदेदेन छ्याम ख्लासी येशूदेन छ्याम भ्रजी।

येशूसे महडसे स्याप्बा म्हिदा खम्ना लबा

लूका ४:३१-३७

21 जमाहेन्से थेनीगदे कफर्नहुम भिबा शहररी फेपजी। ओच्छे बलपबा न्हबा धिनकुनु येशू यहूदीगदे हुप तबा दिमरी फेप्सी परमेश्वरला बचनग्याम लोपबारी छ्याड्जी। 22 येशूसे लोपबा म्राड्सी म्हिगदे

* 1:3 यशै ४०:३ * 1:6 २ राजा १:८ * 1:11 उत्प २२:२; भजन २:७; यशै ४२:१; मत्ती १२:१८; मर्कु ९:७ * 1:15 मत्ती ३:२

उदेक तजी। तिग्दा भिसम येशूसे यहूदी धर्मगुरुगदेसे लोपबा हड लसी आहिन, तर अधिकार मुबा महिसे हड लसी लोपबा मुबा।* 23 थेनोन धुइरी यहूदीगदे हुप तबा दिम न्हडग्याम म्हडसे स्यापबा म्हि गिक चुहड भिबान क्रिड्जी, 24 “नासरतला येशू, हाडसे उन्दा तिग लबारी म्हाइबा? तिग हाड उन्दा साइबारी फेपखबा हिन्ना? हाड परमेश्वरसे पुइखबा परमेश्वरला म्हि भिसी डादा था मुला।” 25 येशूसे थे म्हडदा बड्सी, “कुटिसी चिउ! थे म्हिग्याम थोन्सी निउ!” भिसी 26 सुड्मैछ्याम थे म्हिदा लछार पछार लसी क्रिड्बान थे म्हिग्याम म्हड थोन्सी निजी। 27 चु म्हाड्सी थेरी मुबा जम्मान म्हिगदे उदेक म्हन्जी। ओच्छे हाड हाड न्हडरी चुहड भिबारी छ्याइजी, “आहिन, चु तिग? चु मी अधिकार लसी लोपबा छार ताम गा चीम। थेसे कुल्बा ताम म्हडगदेसेएनोन ड्यान्बा चीम।” 28 चुहड तमैछ्याम येशूसे लबा उदेकला गेला बारेरी गालील अञ्चलला जम्मान ग्लारी थे:जी।

येशूसे ल्हानान म्हिगदेदा खम्ना लबा

मत्ती ८:१४-१७; लूका ४:३८-४१

29 ओच्छे येशू यहूदीगदे हुप तबा दिमग्याम थोन्सी याकूब, यूहननादेन छ्याम सिमोनदेन अनद्रियासला दिमरी फेपजी। 30 थे धुइरी सिमोनना स्युमी छवा खसी म्हेसी चिबा मुबा। ओच्छे थेनीगदेसे थे ताम येशूदा पाड्जी। 31 थेतबासेलमा येशू सिमोनना स्युमी मुबा ग्लारी फेपसी थेला यारी चुड्सी थीजी। जमाहेन्से थेला छवा म्हाजी। ओच्छे थेसे थेनीगदेदा क्योड्बारी छ्याइजी। 32 जमाकुनु ड्यसे धिनी घल्माहेन्से म्हिगदेसे ल्हानान आखम्बा म्हिदेन म्हडसे स्यापबा म्हिगदेदा येशू मुबा ग्लारी भजी। 33 ओच्छे नाम्साला जम्मान म्हिगदे दिमला खाड्गारी हुप तजी। 34 येशूसे ल्हानान खालला रोगसे आखम्बा म्हिगदेदा खम्ना लजी। ओच्छे ल्हानान म्हिला ल्हुइग्याम म्हड तापजी। येशू खाल भिबा ताम थे म्हडगदेसे डोसेबासे लमा येशूसे थेनीगदेदा ताम पाड्आपुड्नी।

सुनसान ग्लारी येशूसे लबा प्रार्थना

लूका ४:४२-४४

35 स्यहोरीन मी म्हाड्बा भन्दा डाच्छान येशू सहेड्सी सुनसान ग्लारी प्रार्थना लबारी फेपजी। 36 सिमोन ओच्छे थेदेन छ्याम मुबागदे जम्मासेन येशूदा म्हाइबान निजी। 37 थेनीगदेसे येशूदा स्यापमाहेन्से “हाडदा जम्मासेन म्हाइबान मुला” भिसी भिजी। 38 येशूसे थेनीगदेदा “लु, य्हाड अर्गु नाम्सारीक्यार निइ, थेरीनोन डाइ थार्बा पिन्बा समाचार थे:ना लतो:बा मुला। तिग्दा भिसम डा चुलान लागिरी खबा हिन्ना” भिसी सुड्जी। 39 ओच्छे येशू गालील अञ्चलला जम्मान ग्लारी यहूदीगदे हुप तबा दिमगदेरी थार्बा पिन्बा समाचार थे:ना लबान म्हिगदेला ल्हुइग्याम म्हडगदे तापबान भजी।*

येशूसे कोरे खबा म्हिदा खम्ना लबा

मत्ती ८:१-४; लूका ५:१२-१६

40 ओच्छे कोरे खबा म्हि गिक येशू मुबा ग्लारी खसी पुइ जूबान, “हाडला सेम मुसम हाडसे डादा खम्ना लखम्ला” भिसी भिजी। 41 चु ताम थे:माहेन्से येशूदा दया रे:सी हाडला यासे थेदा थुर्बान, “ए खम्गै भिबा डाला सेम मुला, ए खम्गो” भिसी सुड्जी। 42 थेनोन धुइरी थे कोरे खबा म्हि खम्जी। 43-44 ओच्छे येशूसे थेदा “एसे चु ताम खालैदा थापाड्गो, बरु निसी परमेश्वरला मन्दिररी पूजा लबा म्हिदा उन्गो। ओच्छे ए खम्जी भिसी म्हिगदेदा उन्बाला लागिरी मोशासे कुल्बा अन्छार परमेश्वरदा बलि फुल्गो” भिसी कुल्जी।* 45 तर थे म्हि निसी चु ताम जम्मान म्हिदा पाड्जी। जमाहेन्से येशू दो:सी नाम्सारी डाच्छाला हड लसी फेपबारी आखम्नी। थेतबासेलमा येशू सुनसान ग्लारी धन्छ्याजी। तर थेरीनोन जम्मान ग्लाग्यामसे म्हिगदे येशू मुबा ग्लारी खजी।

2

येशूसे कुज्या म्हिदा खम्ना लबा

मत्ती ९:१-८; लूका ५:१७-२६

* 1:22 मत्ती ७:२८-२९ * 1:39 मत्ती ४:२३; ९:३५ * 1:43-44 लेवी १४:१-३२

1 तिगै धिन लिचछा दोःसी येशू कफर्नहुम भिबा शहररी फेपूजी। ओच्छे येशू दिमरीन मुला भिबा ताम म्हिगदेसे थेःजी। 2 जमाहेन्से महिला हुल खसी मडग्यारहेन्से दिम न्हडधोना चिबा ग्ला आतनी। थेरी येशूसे परमेश्वरला बचन सुड्बान मुबा। 3 थेनोन धुइरी गोर बलि म्हिसे काड या चलब आतबा कुज्या म्हि गिकदा पुइसी येशू मुबा ग्लारी भजी। 4 तर महिला हुलसे लमा थेनीगदेसे थे कुज्या म्हिदा येशू मुबा ग्लारी धोना लबारी आखमनी। थेतबासेलमा थेनीगदेसे थे दिमला छाना होक्सी थे कुज्या म्हिदा थेला तीबा नान्बादेन छ्यामनोन येशूला डाच्छापट्टि धोना लजी। 5 येशूसे थे म्हिगदेला विश्वास म्राड्सी कुज्या म्हिदा “कोला, एला पाप माफ तबा मुला” भिसी सुड्जी।

6-7 येशूसे चुहड् सुड्बा म्राड्सी थेरी मुबा यहूदी धर्मगुरुगदेसे “तिग्दा चु म्हिसे चुहड्बा ताम लबा? चुसे मी हाडसे हाडदान परमेश्वर सहोसी गा ताम लबा चीम, म्हिगदेला पापला दोष परमेश्वरसे जे मेटब लखममुला” भिसी सेम न्हड न्हडरी म्हन्जी। 8 येशूसे थेनीगदेला सेमला ताम था याड्सी थेनीगदेदा चुहड् भिसी सुड्जी, “एनीगदेला सेमरी तिग्दा चुहड्बा म्हन्बा?” 9 चु कुज्या म्हिदा ‘एला पाप माफ तबा मुला’ भिबादेन ‘रेःसी भ्रउ, एला तीबा नान्बा पुइसी निउ’ भिबा खजिबा चा सजिलो मुला? 10-11 तर च्यागो, परमेश्वरसे पुइखबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिबा ताम डाइ एनीगदेदा उन्ना।” जमाहेन्से येशूसे थे कुज्या म्हिदा “ए रेःगो, ओच्छे एला तीबा नान्बा पुइसी दिमरी निउ” भिसी सुड्जी। 12 येशूसे थेहड् सुड्मैछ्याम थे कुज्या म्हि जम्मासेन च्याना च्यानान डोड रेःसी हाडला तीबा नान्बा पुइसी निजी। चु म्राड्सी म्हिगदे उदेक म्हन्सी परमेश्वरदा जयजयकार लबान, “चुहड्बाम यहाडसे खाइमै म्राड्बा आरे” भिसी भिजी।

येशूसे लेवीदा ड्योइबा

मत्ती ९:९-१३; लूका ५:२७-३२

13 दोःसी तिरेम येशू समुन्द्रला कुनीरी फेपूजी। थेरी येशूदा म्राड्सी महिला हुल खजी ओच्छे येशूसे थेनीगदेदा लोपबारी छ्याइजी। 14 येशू थेग्याम फेपूबा धुइरी अल्फयसला झा लेवीदा तिरो दुइबा ग्लारी चिबान लबा म्राड्जी ओच्छे थेदा “डादेन छ्याम भ्रउ” भिसी सुड्जी। जमाहेन्से थे रेःसी येशूदेन छ्याम भ्रजी।

15 येशू लेवीला दिमरी सोल छ्योइबान लबा धुइरी तिरो दुइबा म्हिगदे, पापीगदे ओच्छे थेला चेलागदे थेदेन छ्यामनोन चिसी चबान मुबा। तिग्दा भिसम येशूदेन छ्याम भ्रबा म्हिगदे ल्हानान मुबा। 16 फरिसीदेन यहूदी धर्मगुरुगदेसे येशू पापीगदेदेन तिरो दुइबा म्हिगदेदेन छ्यामनोन धन्छ्यासी चबा म्राड्सी थेनीगदेसे थेला चेलागदेदा “तिग्दा चुसे पापीगदेदेन तिरो दुइबा म्हिगदेदेन छ्याम चिसी चबा?” भिसी ड्योइजी।

17 चुहड् भिबा ताम थेःसी येशूसे थेनीगदेदा “खम्बा म्हिगदेला लागिरी डाक्टर आतोः, तर आखम्बा म्हिगदेला लागिरी जे तोःला। थेतबासेलमा परमेश्वरला डाच्छा ज्यबा मुबा म्हिगदेदा आहिन तर पापीगदेदा ड्योइबारी डा खबा हिन्ना” भिसी सुड्जी।

येशूसे फोइथान चिसी प्रार्थना लबाला लागिरी लोपबा

मत्ती ९:१४-१७; लूका ५:३३-३९

18 यूहन्नाला चेलागदेदेन फरिसीगदे फोइथान चिसी प्रार्थना लबान लमुबा। थेतबासेलमा कोइ कोइ म्हिगदे खसी येशूदा “यूहन्नाला चेलागदेदेन फरिसीला चेलागदे फोइथान चिसी प्रार्थना लमुला तर हाडला चेलागदेसे चा तिग्दा चुहड् आलबा?” भिसी ड्योइजी। 19 येशूसे थेनीगदेदा चुहड् भिसी सुड्जी, “म्हाछार जन्तीगदेदेन छ्याम मुतेधोना खाहड् लसी थेनीगदे फोइथान चिला? दान्देधोना म्हाछार थेनीगदेदेन छ्याम मुला, थेतबासेलमा थेनीगदे फोइथान आचि। 20 तर म्हाछार जन्तीगदेग्याम फेसी भोर्बा धुइ खला। थे धुइरी थेनीगदे फोइथान चिला।

21 “खालैसे बोक्टो क्वानरी छार क्वानगेनसे आख्या, छार क्वानगेनसे बोक्टो क्वान ख्याजी भिसम बोक्टो क्वान इन ढेला। 22 ओच्छे खालै म्हिसेनोन ढिला बोक्टो ताडरी अडगुरला कलिलो निडगु आयु, युजी भिसम थे ढिला बोक्टो ताड भोसी ढेला, ओच्छे अडगुरला निडगु जति डेला।

जमाहेन्से ढिला ताडएनोन गे आखेलबा तला। थेतबासेलमा अडगुरला कलिलो निडगु ढिला छार ताडरी युतोःला।”

येशू बल्पबा न्हबा धिननाएनोन प्रभु हिन्ना

मत्ती १२:१-८; लूका ६:१-५

23 बल्पबा न्हबा धिनकुनु येशू बुग्याम फेपबान मुबा। थे धुइरी थेला चेलागदेसे ग्वाला नम थुबारी छ्याइजी।* 24 चु म्राड्सी फरिसीगदेसे येशूदा “च्यागो, बल्पबा न्हबा धिनकुनु लबारी आतबा गे थेनीगदेसे तिग्दा लबा?” भिसी ड्योइजी। 25 ओच्छे येशूसे थेनीगदेदा “दाऊदसे थेदेन छ्याम मुबा म्हिगदे फोखेनबा धुइरी थेनीगदेसे तिग लजी? एनीगदेसे खाइमै परमेश्वरला बचन पढब लबा आरे? 26 थेसे परमेश्वरला मन्दिररी पूजा लबा मुल म्हि अबियाथारला पालरी परमेश्वरला दिमरी वाड्सी, परमेश्वरदा फुल्बा गेड चजी, ओच्छे थेसे थेदेन छ्याम मुबा म्हिगदेदाएनोन पिन्जी। तर थे गेड परमेश्वरला मन्दिररी पूजा लबा म्हिगदेदा जे चपुड्मुबा” भिसी सुड्जी।*

27 दोःसी येशूसे फरिसीगदेदा “बल्पबा न्हबा धिन महिला लागिरी सहोबा हिन्ना, तर म्हि बल्पबा न्हबा धिनना लागिरी सहोबा आहिन। 28 थेतबासेलमा परमेश्वरसे पुइखबा म्हि बल्पबा न्हबा धिननाएनोन प्रभु हिन्ना” भिसी सुड्जी।

3

1 दोःसी येशू यहूदीगदे हुप तबा दिमरी वाड्जी। थेरी या खर्बा म्हि गिक मुबा। 2 बल्पबा न्हबा धिनकुनु येशूसे थे महिला खर्बा या खम्ना लला वा भिसी कोइ कोइ म्हिगदेसे दोष लबाला लागिरी चिवा लसी चिबा मुबा। 3 येशूसे थे या खर्बा मुबा म्हिदा “जम्मालान डाच्छापट्टि रापगो” भिसी सुड्जी। 4 थेसे थेनीगदेदा “बल्पबा न्हबा धिनकुनु ज्यबा गे लबा कि नइबा गे लबा, म्हि सोना लबा कि सिना लबा खजिबा चा ज्यबा हिन्ना?” भिसी ड्योइजी। तर थेनीगदे कुटिसी चिजी। 5 येशूसे हाडला क्युर्सीन मुबा म्हिगदेदा स्हीसी येशूसे थेनीगदेला सेम कोड्बा था याड्सी सेमरी ल्हानान दुख तसी येशूदा बोमो रेःजी। ओच्छे येशूसे थे या खर्बा मुबा म्हिदा “एला या तनगब लउ” भिसी सुड्जी। ओच्छे थे म्हिसे थेला या तनगब लमैछ्याम या खम्जी। 6 जमाहेन्से फरिसीगदे थेग्याम थोन्सी निसी येशूदा खाहड् लसी साइबा भिसी हेरोद ग्लेला म्हिगदेदेन छ्याम सल्लाह लजी।

येशूला लिच्छा महिला हुल भ्रबा

मत्ती १२:१५-१६; लूका ६:१७-१९

7 जमाहेन्से येशू हाडला चेलागदेदेन छ्याम समुन्द्रपट्टि फेपजी, ओच्छे गालील अञ्चलग्यामसे महिला हुल थेला लिच्छा भ्रजी। 8 येशूसे लबा उदेकला गेला बारेरी थेःसी यहूदिया, यरूशलेम, इदुमिआ, यर्दन क्यामसड्ला ओच्छे टुरोसदेन सीदोन नाम्साला क्यारमारला म्हिगदे येशू मुबा ग्लारी खजी। 9 थेतबासेलमा म्हिगदेसे हाडदा थानाड्गै भिसी येशूसे हाडला चेलागदेदा दौंगा गिक ठीक लपुड्जी। 10 तिग्दा भिसम येशूसे ल्हानान आखम्बा म्हिगदेदा खम्ना लबासे लमा रोगसे स्यापबा म्हिगदे येशूदा थुर्बारी तोर हुइ मार हुइ लबान मुबा।* 11 ओच्छे म्हडसे स्यापबा म्हिगदेसे येशूदा म्राड्मैछ्याम ख्लुप तसी, “हाड परमेश्वरला झा हिन्ना” भिसी क्रिड्मुबा। 12 तर येशूसे थे महिला लहुइरी मुबा म्हडदा “च्यागो, डा परमेश्वरला झा हिन्ना भिसी खालैदा थापाड्गो” भिसी बड्जी।

येशूसे च्युक न्ही चेलादा धम्बा

मत्ती १०:१-४; लूका ६:१२-१६

13 येशू गडरी फेप्सी हाडला सेमसे चबा जतिदा ड्योइजी, ओच्छे थेनीगदे थे मुबा ग्लारी खजी। 14 जमाहेन्से हाडदेन छ्याम भ्रबारी ओच्छे म्हिगदेदा परमेश्वरला यहुल्साला समाचार थेःना लबारी च्युक न्ही म्हि धम्जी, ओच्छे थेनीगदेदा मुल चेला भिसी सुड्जी। 15 ओच्छे म्हिगदेला लहुइग्याम म्हड तापबा अधिकार पिन्जी। 16 येशूसे धम्बा च्युक न्ही मुल चेलागदे चुगदेन हिन्ना, सिमोन भिबादा

* 2:23 व्चव २३:२५

* 2:26 १ शमू २१:१-६; लेवी २४:९

* 3:10 मर्कू ४:१; लूका ५:१-३

येशूसे पत्रुस मिन थान्जी। ¹⁷ जब्दियाला झा याकूबदेन याकूबला आले यूहननादा थेसे बोअनर्गेस भिसी मिन थान्जी। बोअनर्गेस भिबा चा मु घुर्बा हड्बाला झागदे भिबा हिन्ना। ¹⁸ ओच्छे अन्द्रियास, फिलिप, बारथोलोमाइ, मत्ती, थोमा, अल्फयसला झा याकूब, ओच्छे थेदियस, सिमोन मुबा। चु सिमोनदा चा हाडला यहुल्सादा माया लबा म्हि भिसी भिमुबा। ¹⁹ ओच्छे यहूदा इस्करियोत चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

येशूदेन म्हडला ग्ले बालजिबुल

मत्ती १२:२२-३२; लूका ११:१४-२३; १२:१०

²⁰ ओच्छे येशू दिमरी फेप्वा धुइरी दोःसी म्हिगदे हुप तजी। थेतबासेलमा येशूदेन थेला चेलागदेसे सोल छ्योइबारी सुत्तै आम्याड्नी। ²¹ चु ताम येशूला दिमला म्हिगदेसे थेःसी थेदा भोर्बारी भिसी दिमग्याम थोनजी, तिग्दा भिसम येशूला सेम ठेगानरी आरे भिसी थेनीगदेसे म्हनमुबा।

²² यरूशलेमग्याम खबा यहूदी धर्मगुरुगदेसे, “चुला ल्हुइरी म्हडगदेला ग्ले बालजिबुल मुला, चु म्हिसे मी म्हडगदेला ग्लेला शक्तिग्याम म्हड ताप्वा हिन्ना” भिसी भिजी।*

²³ तर येशूसे थेनीगदेदा हाड मुबा ग्लारी ड्योइसी उखानग्याम चुहड् भिसी सुड्जी, “शैतानसे शैतानदा खाहड् लसी ताप्खम्ला? ²⁴ यहुल्सा गिकलान म्हि हाड हाड न्हडरी आढिक्सम थे यहुल्सा न्होड्ला। ²⁵ ओच्छे दिम गिकला म्हिणोन हाड हाड न्हडरी आढिक्नी भिसम थे दिमनामणोन फुप्ला। ²⁶ थेहड् लसी शैतान शैतान न्हडरी आढिक्नी भिसम थेला यहुल्सा नाश तला। ²⁷ खालैसे भड्बा म्हिला दिमरी वाड्सी थेला धन सम्पत्ति यहो लतोःजी भिसम थेसे डाच्छा थे भड्बा म्हिदा चुड्सी खीतोःला। थे भड्बा म्हिदा खीमाहेन्से जे थेसे थेला धन सम्पत्ति भोर्खम्ला।

²⁸ “एनीगदेसे डाला ताम ड्यानगो, म्हिगदेसे लबा जम्मान पाप गेदेन परमेश्वरदा बिरोध लसी पाप लसैनोन माफ याड्ला। ²⁹ तर जुन म्हिसे परमेश्वरला आत्माला बिरोध लसी पाप गेदेन पाप ताम लला, थेसे खाइमै माफ आयाड्। थे जुकजुकधोना पापरी चितोःला।”* ³⁰ तिग्दा भिसम थेनीगदेसे येशूला ल्हुइरी म्हड मुला भिसी भिबान मुबा।

येशूला आमादेन आलेगदे

मत्ती १२:४६-५०; लूका ८:१९-२१

³¹ ओच्छे येशूला आमादेन आलेगदे थेरी धोखजी। थेनीगदे मडग्यार राप्सी येशूदा ड्योइबारी कोइ म्हिदा पुड्जी। ³² येशूला क्युर्नोन म्हिला हुल मुबा ओच्छे थेनीगदेसे येशूदा “मडग्यार हाडला आमादेन आलेगदे हाडदा म्हाइबान मुला” भिसी भिजी।

³³ येशूसे थेनीगदेदा “डाला आमादेन आलेगदे खाल हिन्ना?” भिसी सुड्जी। ³⁴ ओच्छे येशूसे हाडला क्युर्नोन चिबा म्हिगदेदा स्हीबान, “च्यागो, चुरी मुबा जम्मान डाला आमादेन आलेगदे हिन्ना। ³⁵ तिग्दा भिसम जुन म्हि परमेश्वरसे म्हनबा अन्छार भ्रला थेनोन डाला आमा, डाला आडा ओच्छे डाला आले हिन्ना” भिसी सुड्जी।

4

ब्लु ढ्वबाला उखान

मत्ती १३:१-२३; लूका ८:४-१५

¹ येशूसे दोःसी समुन्द्रला कुनीरी फेप्सी लोपबारी छ्याइजी। थेरी म्हिला हुल मुबासे लमा येशू समुन्द्ररी मुबा दौंगा गिकरी धन्छ्यासी लोपबारी छ्याइजी। ओच्छे म्हिला हुल चा समुन्द्रला कुनीरीक्यार चिजी।* ² येशूसे थेरी मुबा म्हिगदेदा उखानग्याम ल्हानान ताम लोपबान चुहड् सुड्जी, ³ “च्यागो, ब्लु ढ्वबा म्हि गिक ब्लु ढ्वबारी भ्रजी। ⁴ थे म्हिसे ब्लु ढ्वबा धुइरी कोइ ब्लु ग्यामरी परब तजी, ओच्छे थे ब्लु चरा खसी चजी। ⁵ कोइ ब्लु चा युडबाला घहड् मुबा सरी परब तजी, थेरी ल्हानान साप्रा आरेबासे लमा थे ब्लु योनान फुड्जी। ⁶ थेतबासेलमा थेला टा नुपना निआम्याड्नी।

* 3:22 मत्ती ९:३४; १०:२५ * 3:29 लूका १२:१० * 4:1 लूका ५:१-३

ओच्छे धिनीसे क्रोसी थे दोड सिजी। ⁷ कोइ ब्लु चा पुजु झाडरी परब तजी, ओच्छे थे ब्लु फुइसी ल्हेबान निजी। ल्हेसी निसै थे पुजु झाडला हापसे लमा थे दोडला नमरी गेडा आवाङ्नी। ⁸ कोइ ब्लु चा ज्यबा सरी परब तसी फुइजी, ओच्छे थे दोड ल्हेसी निमा थे दोडला नमरी चा दोब्बर, तेब्बर, चौबरधोना गेडा रोजी। ⁹ जुन म्हिदा ड्यान्बा सेम मुला थेसे ड्यान्सी घोउ।”

¹⁰ महिला हुल निमाहेन्से येशूला क्युर्नोन मुबा म्हिगदेदेन च्युक न्ही चेलागदेसे थे उखानना अर्थ ड्योइजी। ¹¹ ओच्छे येशूसे थेनीगदेदा चुहङ् भिसी सुङ्जी, “एनीगदेदा डाइ म्हिसे था आयाङ्बा परमेश्वरला यहुल्साला ताम घोखम्बा ज्ञान बुद्धि पिन्बा मुला। तर स्य्हान्दोगदेदा चा डाइ उखानग्याम जे पाङ्बा मुला। ¹² तिग्दा भिसम

‘थेनीगदेसे च्याबाम च्यामुला तर आम्राङ्मुला

ओच्छे ड्यान्बाम ड्यान्मुला तर आघोमुला।

आहिन्सम ह्वाङ् ह्वाङ्ला पाप ख्लासी परमेश्वरपट्टि दोःसेला मुबा,

ओच्छे परमेश्वरसे थेनीगदेला पाप माफ लसेला मुबा।”*

ब्लु ह्वबा उखानना अर्थ

मत्ती १३:१८-२३; लूका ८:११-१५

¹³ येशूसे थेनीगदेदा “एनीगदेसे चु उखानला अर्थ आघोसम अर्गु उखानना अर्थ खाहङ् लसी घोला?” भिसी सुङ्जी। ¹⁴ ब्लु ह्वबा म्हि चा परमेश्वरला बचन थेःना लबा म्हि हिन्ना। ¹⁵ ग्यामरीक्यार परब तबा ब्लुला अर्थ चा चुनोन हिन्ना, जुन म्हिसे परमेश्वरला बचन ड्यान्ना तर तुरुन्तन शैतान खसी थेनीगदेदा थेःना लबा ताम भोर्ला। ¹⁶ युडबाला घहङ्री परब तबा ब्लुला अर्थ चा चुनोन हिन्ना, जुन म्हिसे परमेश्वरला बचन थेःमैछ्याम ताङ्सी ह्वाङ्ला सेमरी थान्ना, ¹⁷ तर थेनीगदेला विश्वासला टा आरेबासे लमा, थे छिन्नङ् जे चिला। ओच्छे परमेश्वरला बचनदा विश्वास लबासे लमा थेनीगदेदा आपत विपत खमाहेन्से थेनीगदेसे विश्वास लबा खलाला। ¹⁸ पुजु झाङ् न्हङ्री परब तबा ब्लुला अर्थ चा जुन म्हिसे बचन ड्यान्ना ¹⁹ तर थेला सेमरी जम्बुलिङ्ला धन्दा सुर्दादेन धन सम्पत्तिला लोभसे लमा परमेश्वरला बचनदा गे लआपुङ्, ओच्छे थेला विश्वासग्याम तिगै आरे ²⁰ तर ज्यबा सरी परब तबा ब्लुला अर्थ चा जुन म्हिसे बचन ड्यान्सी ह्वाङ्ला सेमरी थान्ना, थेला विश्वाससे दोब्बर, तेब्बर, चौबरधोना गे लला।

नाडसलला अर्थ

लूका ८:१६-१८

²¹ येशूसे थेनीगदेदा चुहङ् भिसी सुङ्जी, “खालैसे नाडसल म्रासी खाट धिरीनोन आथान ओच्छे फामसे घप्सीनोन आथान। बरु यहाल तगै भिसी नोबा ग्लारी थान्ना।” ²² थेतबासेलमा लहुसैनोन आम्राङ्बा सहे तिगै आरे। ओच्छे छुम्सी थान्सैनोन आघोबा सहे तिगै आरे।” ²³ खालैदा ड्यान्बा सेम मुसम थेसे ड्यान्सी घोउ।

²⁴ “एनीगदेसे जुन ताम थेःबा मुला, थे तामरी सेम लउ। तिग्दा भिसम जुन दप्बा सहेसे एनीगदेसे दप्ला, थेनोन दप्बा सहेग्यामसे एनीगदेसे याङ्ला। ओच्छे एनीगदेदा झन ल्हाना पिन्ना।” ²⁵ जुन म्हिसे डाइ लोपबा तामदा सेम लसी ड्यान्ना, थेदा डाइ अङ्ग घोना लला। तर डाइ लोपबा ताम आड्यान्बादा चा थेसे जुन घोबा मुला थे तामएनोन म्हाना लला।”*

ल्हेबान निबा ब्लुला उखान

²⁶ येशूसे चुहङ् भिसी सुङ्जी, “परमेश्वरला यहुल्सा चा म्हि गिकसे बुरी ह्वबा ब्लु हङ्बान हिन्ना। ²⁷ ओच्छे थे म्हि म्हैर्सी चिसै आमहेर्ना चिसै धिन म्हुनोनन थे ब्लु फुइसी ल्हेबान निला, तर खाहङ् लसी ल्हेजी भिबा ताम थे म्हिसे था आयाङ्। ²⁸ तिग्दा भिसम बुरी ब्लु ह्वाङ्नोन फुइसी ल्हेबान

* 4:12 यशै ६:९-१० * 4:21 मत्ती ५:१५; लूका ११:३३ * 4:22 मत्ती १०:२६; लूका १२:२ * 4:24 मत्ती ७:२; लूका ६:३८

* 4:25 मत्ती १३:१२; २५:२९; लूका १९:२६

निमाहेन्से दोड दोला, ओच्छे थे दोडरी नम थोन्ना, जमाहेन्से थे नमरी गेडा वाड्ला। 29 बाली दुडबा धुइ तमैछ्याम थे म्हि खसी बाली खन्ना।”*

पच्छै बलुला उखान

मत्ती १३:३१-३२, ३४-३५; लूका १३:१८-१९

30 येशूसे दोःसी चुहड् भिसी सुड्जी, “डाइ परमेश्वरला य्हुल्सादा तिगदेन छ्याम दाँजब लसे? ओच्छे एनीगदेदा खाहड् लसी घोना लसे? 31 चु मी घुर्यानरी ह्वबा पच्छैला बलु हड्बान हिन्ना। जम्बुलिडरी जम्मान भन्दा जजाबा बलु तसैनोन, 32 थे गेडा ह्वमाहेन्से ढापढुप न्हडरी जम्मान भन्दा हाँगा मुबा घेन दोड तला। ओच्छे थे दोडला हाँगारी चरागदे खसी जड स्होसी चिला।”

33 थेनीगदेसे घोखमतेधोना येशूसे चुहड्बान उखानगदेग्याम परमेश्वरला बचन लोपूजी। 34 उखान आसुड्तेधोना थेनीगदेदा येशूसे तिगै ताम आलोपनी। तर हाडला चेलागदे जे तबा धुडरी चा जम्मान उखानना अर्थ घोना लमुबा।

येशूसे लाबालुडसरदा म्हाना लबा

मत्ती ८:१८, २३-२७; लूका ८:२२-२५

35 जमाकुनु ड्यसे येशूसे हाडला चेलागदेदा “लु, यहाड समुन्द्रला क्याम्सडपट्टि निड” भिसी सुड्जी। 36 येशूसे चुहड् सुड्माहेन्से चेलागदे महिला हुलदा ख्लासी येशू मुबा दाँगारी क्रेःजी। ओच्छे दाँगा चलब लबान क्याम्सडपट्टि भोर्जी। थेनीगदेला दाँगादेन छ्याम छ्याम अर्गु दाँगागदेएनोन निजी। 37 निबान लमा समुन्द्ररी लाबालुडसर खजी। थे लाबालुडसरसे लमा समुन्द्रला छाल रेःसी दाँगा डुबब तबारी छ्याइजी। 38 थे धुडरी येशू दाँगाला ग्यापपट्टि खुम लसी स्हिम्बान मुबा। ओच्छे चेलागदेसे “प्रभु, यहाड सिबारी छ्याइजी, हाडदा तिगै वास्ता आरे?” भिसी छिड्जी।

39 जमाहेन्से येशूसे सहेड्सी लाबालुडसरदेन समुन्द्रला छालदा “कुटिसी चिउ” भिसी सुड्मैछ्याम लाबालुडसर म्हाजी ओच्छे शान्त तजी।

40 येशूसे “एनीगदे तिग्दा लोड्बा? दान्देधोना एनीगदेदा डाला विश्वास आरे?” भिसी हाडला चेलागदेदा सुड्जी।

41 ओच्छे चेलागदे उदेक म्हन्सी लोड्बान, “चु खाल? लाबालुडसरदेन समुन्द्रला छालसेएनोन थेसे कुल्बा ताम ड्यानबा चीम!” भिसी थेनीगदे हाड हाड न्हडरी ताम लबारी छ्याइजी।

5

येशूसे म्हडसे स्यापबा म्हिदा खम्ना लबा

मत्ती ८:२८-३४; लूका ८:२६-३९

1 ओच्छे येशूदेन थेनीगदे गालील समुन्द्रला क्याम्सडपट्टि गेरासेनसां भिबा ग्लारी धोखजी। 2 येशू दाँगाग्याम फ्पमैछ्याम म्हडसे स्यापबा म्हि गिक धुर्साग्याम यार्बान खसी येशूदा स्यापूजी। 3 थे म्हि धुर्सारीक्यार चिमुबा। थेदा तिगै लसीन चुड्बारी आखम्मुबा थेदा च्याल्दासे खीसैनोन ब्लसी यार्मुबा। 4 तिग्दा भिसम थेदा ल्हानान रेम च्याल्दासे खीसी थान्सैनोन थेसे थे च्याल्दागदे फ्राटफ्रेट टाड्मुबा। थेतबासेलमा थेदा खालैसे तहरी थान्बारी आखम्मुबा। 5 थे धिन म्हुननोन हाडसे हाडदान युडबासे तोसी धुर्सा गडरीक्यार क्रिड्बान भ्रमुबा।

6 थेसे थारेड्ग्यामसेन येशूदा म्राड्मैछ्याम यार्बान खसी येशूदा फ्या लजी। 7 ओच्छे थेसे “जम्मान भन्दा घेन परमेश्वरला झा येशू, हाडसे डादा तिग लबारी छ्याइबा? डाइ हाडदा परमेश्वरला मिनरी घान फासी भिला, डादा दुख थापिन्गो” भिसी क्रिड्बान भिजी। 8 तिग्दा भिसम येशूसे डाच्छान थे महिला लहुडरी मुबा म्हडदा “ए थोन्सी निउ” भिसी सुड्बा मुबा। 9 ओच्छे येशूसे थेदा “एला मिन

* 4:29 योए ३:१३ † 5:1 “गेरासेनस” भिबादा कोड कोड ग्रीक बाइबलरी गदरा भिसी भिबा मुला। गेरासेनस भिबादेन गदरा भिबा ग्ला गिकनोन हिन्ना।

तिग?" भिसी ड्योइमा, थे म्हडसे "डाला मिन हुल हिन्ना, तिग्दा भिसम डनी ल्हानान मुला" भिसी भिजी। 10 थे म्हडसे येशूदा "डन्दा चु ग्लाग्याम थाते:गो।" भिसी बिन्ती लजी।

11 थेरी गडरीक्यार ह्वला बथान छबान मुबा। 12 ओच्छे म्हडगदेसे येशूदा "डन्दा ह्वागदे न्हडरी वाड्पुङ्गो" भिसी बिन्ती लजी 13 येशूसे वाड्पुङ्गमाहेन्से म्हडगदे महिला ल्हुङ्ग्याम थोन्सी ह्वागदे न्हडरी वाङ्जी। वाङ्मैछ्याम ओस्पन, हजार न्ही ह्वला बथान गडग्याम समुन्द्ररी छ्योङ्सी सिजी।

14 जमाहेन्से ह्वा छबा महिगदे यार्सी शहरदेन नाम्सा नाम्सारी निसी चु ताम थे:ना लजी। ओच्छे जम्मान महिगदे तिग तजीम भिसी च्याबारी खजी। 15 जमाहेन्से थेनीगदे येशू मुबा ग्लारी खजी, ओच्छे थे म्हडला हुलसे स्यापूबा महि खमसी ज्यना लसी क्वान क्वान्सी चिबा म्राङ्सी थेनीगदे लोङ्जी। 16 म्हडसे स्यापूबा महिदेन ह्वागदेदा तिग तिग तजी भिबा ताम म्राङ्बा महिगदेसे थेरी च्याबारी खबा महिगदेदा पाङ्जी। 17 जमाहेन्से थेनीगदेसे येशूदा "चु ग्लाग्याम फेपूगो" भिसी बिन्ती लबारी छ्याङ्जी।

18 येशू दोंगारी क्रे:बारी छ्याइमा थे म्हडसे स्यापूबा महिसे "डाएनोन हाडदेन छ्याम निसे" भिसी बिन्ती लजी। 19 तर येशूसे हाडदेन छ्याम खआपुङ्ना "ए हाडला दिमरी निसी एदा परमेश्वरसे उन्बा दयादेन परमेश्वरसे एला लागिरी तिग तिग लजी, थे तामगदे एसे हाडला ह्योगदेदा थे:ना लउ" भिसी सुङ्जी। 20 ओच्छे थे निसी डेकापोलिस भिबा ग्ला नाडनोन येशूसे हाडला लागिरी लबा उदेकला गेला बारेरी पाङ्सी भ्रजी, चु ताम थे:सी नाम्साला महिगदे उदेक म्हन्जी।

याइरसला झामेदेन का निबा बेथासे स्यापूबा म्रिडम्हेमे खम्बा

मत्ती ९:१८-२६; लूका ८:४०-५६

21 दो:सी येशू दोंगारी क्रे:सी समुन्द्रला क्यामसडपट्टि फेपूजी। ओच्छे थेला क्युर्सीन महिला हुल पोप तजी। 22 थेनोन धुडरी यहूदीगदे हुप तबा दिमला याइरस मिन लबा नेता गिक थेरी धोखजी। थेसे येशूदा म्राङ्मैछ्याम येशूदा फ्या लसी, 23 "डाला झामे आखमना सिबारी छ्याइबा मुला, हाड फेपूखसी थेदा थुर्सी पिनगो। ओच्छे थे खमगै" भिसी बिन्ती लजी।

24 थेतबासेलमा येशू याइरसदेन छ्याम फेपूजी ओच्छे महिला हुलएनोन येशूला लिच्छा भ्रजी, महिला हुलसे लमा येशूदा तोर हुइ मार हुइ लजी। 25 थे महिला हुल न्हडरी का निबा बेथासे स्यापूसी च्युक न्ही दिड तबा म्रिडम्हेमे गिक मुबा। 26 थेसे हाडला मुदेबा धन सम्पत्ति खर्च लसी डाक्टरगदेदा च्यापुङ्जी। तर खम्ला भिमाम झन डाच्छाला भन्दा सारो तसी निजी। 27 थेसे येशूला बारेरी थे:माहेन्से थे महिला हुल न्हडरी वाङ्सी ग्यापग्याम खसी येशूला क्वान थुर्जी। 28 तिग्दा भिसम थेसे "डाइ येशूला क्वान थुर्बारी जे म्याङ्सम डा खम्ला" भिसी म्हन्बा मुबा। 29 थेसे येशूला क्वान थुर्मैछ्याम थेला का निबा बेथा म्हाजी भिसी थेसे तुरुन्तन था याङ्जी। 30 ओच्छे येशूसे हाडला ल्हुङ्ग्याम तुरुन्तन शक्ति थोन्बा था याङ्सी महिला हुलपट्टि दो:सी, "खाल्से डाला क्वान थुर्जी?" भिसी ड्योइजी।

31 चेलागदेसे येशूदा भिजी, "चुदेला महिला हुलसे तोर हुइ मार हुइ लबा स्हीना स्हीनान दो:सी हाड 'डादा खाल्से थुर्जी' भिसी सुड्बान मुला।" 32 डादा थुर्बा खाल भिसी येशूसे क्युर्सीन च्याबारी छ्याङ्जी। 33 ओच्छे थे का निबा बेथासे स्यापूबा म्रिडम्हेमेसे येशूला क्वान थुर्मा हाडदा तिग तजी भिबा था तसी लोङ्सी फितफित धर्बान येशूला डाच्छापट्टि फ्या लजी। ओच्छे येशूदा जम्मान सत्य ताम पाङ्जी। 34 येशूसे थेदा "झामे, एला विश्वाससे लमा ए खम्बा मुला। दाहेन्से ए ढुकक तसी निउ, एला रोग म्हाजी" भिसी सुङ्जी।

35 येशूसे ताम लबान लबा धुडरी याइरसला दिमग्याम महिगदे खसी, "हाडला झामे सिजी, दाहेन्से गुरुदा दुख थापिनगो" भिसी भिजी।

36 तर येशूसे थेनीगदेला तामदा थेगो आलना, याइरसदा "थालोङ्गो, एसे विश्वास जे लउ" भिसी सुङ्जी। 37 ओच्छे येशूसे पत्रुस, याकूबदेन याकूबला आले यहून्नादा बाहेक स्युहान्दोदा हाडदेन छ्याम खआपुङ्नी। 38 थेनीगदे याइरसला दिमरी फेपूखमा येशूसे थेरी मुबा महिगदे क्राबा क्रिङ्बादेन

हल्ली खल्ली लसी चिबा म्राड्जी। ³⁹ येशू दिम न्हडरी वाड्सी, थेनीगदेदा “तिग्दा एनीगदे चुहड् लसी क्राबा क्रिड्बादेन हल्ली खल्ली लसी चिबा? माइ सिबा आरे, म्हेर्सी चिबा मुला” भिसी सुड्जी।

⁴⁰ तर थेनीगदेसे येशूला तामदा खिसी लसी डे:जी। ओच्छे येशूसे थेनीगदे जम्मादान मडग्यार ते:सी माइला आबादेन आमा ओच्छे हाडला चेलागदेदा छ्याम भोर्सी माइ मुबा ग्लारी फेप्जी। ⁴¹ ओच्छे येशूसे थे माइला या चुड्सी, “तालिता कुम,” भिसी सुड्जी। चु भिबा चा “माइ रे:गो” भिबा हिन्ना। ⁴² येशूसे चुहड् सुड्मैछ्याम थे माइ डोड रे:सी क्यारमार भ्रबारी छ्याइजी। थे माइ च्युक न्ही दिडला मुबा। चु म्राड्सी थेनीगदे उदेक म्हन्जी। ⁴³ येशूसे थेनीगदेदा “च्यागो, चु ताम खालैसे था थायाड्गै।” ओच्छे थे माइदा चा “तिगै चबा स्हे पिन्गो” भिसी सुड्जी।

6

नासरतरी येशूदा पत्याब आतबा

मत्ती १३:५३-५८; लूका ४:१६-३०

¹ येशू थे ग्याम थोन्सी हाडलान नाम्सारी फेप्जी। ओच्छे थेला चेलागदेएनोन थेदेन छ्याम निजी। ² बल्पा न्हबा धिनकुनु येशूसे यहूदीगदे हुप तबा दिमरी लोपबारी छ्याइजी। थेसे लोपबा म्राड्सी ल्हानान म्हिगदे उदेक तजी, “चु म्हिसे चु जम्मान खानडग्याम याड्जी? चुदा पिन्बा चु ज्ञान बुद्धि खाहड्बा हिन्ना? चुला याग्यामसे खाहड्बा उदेकला गे तबा? ³ तिग चु मरियमला झा, याकूब, योसेफ, यहूदादेन सिमोनला ज्योज्यो सिकर्मी आहिन? तिग चुला आडागदेएनोन यहाडदेन छ्याम आरे?” भिसी येशूला ताम पत्याब आतनी।

⁴ येशूसे थेनीगदेदा “अगमवक्तादा जम्मान ग्लारी मान लला, तर हाडला नाम्सारीदेन हाडला म्हिगदे ओच्छे हाडला दिमरी बाहेक अर्गु खजिबै ग्लारी निसैनोन मान लला” भिसी सुड्जी।* ⁵ थेरी येशूसे कोइ कोइ आखम्बा म्हिगदेथोरी हाडला या थान्सी थेनीगदेदा खम्ना लजी। तर थेनीगदेला विश्वास आरेबा म्राड्सी अर्गु उदेकला गे आलनी। ⁶ येशू थेनीगदेसे विश्वास आलबा म्राड्सी उदेक म्हन्जी। थेतबासेलमा नाम्सा नाम्सारी लोपबारी फेप्जी।

येशूसे हाडला च्युक न्ही चेलागदेदा पुड्बा

मत्ती १०:१, ५-१५; लूका ९:१-६

⁷ थे धुडरी येशूसे हाडला च्युक न्ही चेलागदेदा ड्योइसी थेनीगदेदा म्हड तापबा अधिकार पिन्सी गोर न्ही न्ही लसी पुड्जी। ⁸ येशूसे थेनीगदेदा चुहड् भिसी कुल्जी, “एनीगदेसे ग्यामला लागिरी कडी बाहेक तिगै चबा स्हे, टाडगा, झोला थापुड्गो। ⁹ तर लखम क्वान्गो, ओच्छे हाडला लागिरी पोबा क्वान थापुड्गो। ¹⁰ दो:सी येशूसे थेनीगदेदा चुहड् भिसी सुड्जी, “एनीगदे खजिबै दिमरी वाड्माहेन्से थे नाम्साग्याम थोन्सी आनितेधोना एनीगदे थे दिमरीन चिउ। ¹¹ चुदे खजिबै ग्लारी एनीगदेदा मान आलनी। ओच्छे एनीगदेसे पाड्बा ताम आड्यान्नी भिसम, एनीगदे थे ग्लाग्याम थोन्बा धुडरी दाहेन्से डन्से लतो:बा गे लसी जिन्जी। एनीगदेसे तिग लतो:बा लउ भिसी काडला धुलु खर्सी पिन्गो।”*

¹² जमाहेन्से थेला चेलागदे थेग्याम थोन्सी निसी म्हिगदेदा “हाड हाडला पाप ख्लासी परमेश्वरपट्टि दो:गो” भिसी पाड्जी। ¹³ थेनीगदेसे ल्हानान महिला लहुड्ग्याम म्हड तापजी। ओच्छे ल्हानान आखम्बा म्हिगदेदा छ्युगु फोर्सी प्रार्थना लसी खम्ना लजी।*

बपत्तिस्मा पिन्बा यूहन्ना सिबा

मत्ती १४:१-१२; लूका ९:७-९

¹⁴ येशूसे लबा उदेकला गेला बारेरी हेरोद ग्लेसे थे:जी, तिग्दा भिसम जम्मान ग्लारी येशूला मिन थे:मुबा। गाते म्हिसे मी “बपत्तिस्मा पिन्बा यूहन्ना सिबाग्याम सोसी खजीम, थेतबासेलमान थेसे चुहड्बा उदेकला गेगदे लबा हिन्ना” भिसी भिमुबा। ¹⁵ तर स्यहान्दोगदेसे, “चु एलिया हिन्ना” भिसी

* 6:4 यूह ४:४४ * 6:11 लूका १०:४-११; मुल १३:५१ * 6:13 याकू ५:१४

भिजी। ओचछे अझ स्यूहान्दोगदेसे, “चु म्हि मी ओन्माला अगमवक्तागदे हड्बान अगमवक्ता गिक हिनना” भिसी भिजी।*

16 तर हेरोदसे चु ताम थेःसी, “चु म्हि डाइ साइपुड्बा यूहन्ना हिनना, थेनोन सिबाग्यामसे सोसी खजीम” भिसी भिजी। 17 तिग्दा भिसम डाचछा हेरोद हाडसेन यूहन्नादा चुड्पुड्जी थेदा झ्याल्खानरी थान्बा मुबा। हेरोदसे हाडला आले फिलिपला म्रिड हेरोदियासदेन छ्याम ब्याह लबासे लमा थेसे यूहन्नादा झ्याल्खानरी थान्बा मुबा। 18 तिग्दा भिसम यूहन्नासे हेरोददा “हाडसे आले चाडदेन छ्याम ब्याह लबा ठीक आहिन” भिसी भिमुबा।* 19 थेतबासेलमा हेरोदियाससे यूहन्नाथोरी ईख थान्सी थेदा साइबारी म्हाइमुबा तर खम्बा आरेबा। 20 तिग्दा भिसम यूहन्ना परमेश्वरसे म्हन्बा अनछार भ्रबा म्हिदेन परमेश्वरला लागिरी फेसी थान्बा म्हि भिसी हेरोददा था मुबा। थेतबासेलमा यूहन्नादेन छ्याम लोड्सी थेदा जोगब लसी थान्मुबा। यूहन्नासे लोप्बा म्राड्सी थेला सेम क्रामुबा। तसैनोन सेम लसी ड्यानमुबा।

21 हेरोदियाससे हेरोद न्हबा धिनदा ढन्सी लबा भोजकुनु ज्यबा मौका याड्जी। हेरोदसे हाड न्हबा धिनदा ढन्सी घेन पदरी मुबा म्हिगदे, सिपाहीला कप्तानगदेदेन गालील नाम्साला गन्बा म्हिगदेदा ड्योड्सी भोज पिन्जी। 22 थे धुइरी हेरोदियासला हाडलान झामे थेरी खसी स्यूहजी। थे स्यूहबा म्राड्सी हेरोद ग्लेदेन थेला डोन्बोगदे ल्हानान ताड्जी। हेरोद ग्लेसे थे माइदा “एदा तिग तोःबा डादा हीगो, थे डाइ एदा पिन्ना” भिसी भिजी। 23 ओचछे हेरोद ग्लेसे घान फासी, “एदा डाला गडसल यहुल्सा भिसै पिन्ना” भिसी भिजी।

24 ओचछे थे मडग्यार थोन्सी हाडला आमादा डाइ तिग हीगो भिसी, ड्योड्मा, “बपत्तिस्मा पिन्बा यूहन्नाला थोबो हीगो” भिसी थेला आमासे भिजी। 25 चुहड् भिमैछ्याम थे माइ ग्ले मुबा ग्लारी निसी, “दान्दे डादा हाडसे बपत्तिस्मा पिन्बा यूहन्नाला थोबो खार्बारी भउ” भिसी भिजी। 26 थेहड् भिमाहेन्से ग्लेला सेमरी दुख ड्हमजी, तर ओतेला डोन्बोला ओन्छाडरी घान फासी पाड्बा तामदा थाबारी आखमनी। 27 थेतबासेलमा थेसे तुरुन्तन हाडला सिपाही गिकदा “बपत्तिस्मा पिन्बा यूहन्नाला थोबो थासी भउ” भिसी कुल्जी। ओचछे थे सिपाही झ्याल्खानरी निसी यूहन्नाला थोबो थाजी। 28 थासी भसी थे माइदा खार्बारी युसी पिन्जी। ओचछे थे माइसे थेला आमादा पिन्जी। 29 चु ताम थेःसी यूहन्नाला चेलागदे खसी थेला लास भोर्सी धुर्सारी थान्जी।

येशूसे हजार डा म्हिगदेदा चबा सहे पिन्बा

मती १४:१३-२१; लूका ९:१०-१७; यूहन्ना ६:१-१३

30 येशूसे पुड्बा जममान मुल चेलागदे दोःसी खसी येशू मुबा ग्लारी पोप तजी। थेनीगदेसे लबा गेदेन लोप्सी पिन्बा तामगदे येशूदा पाड्जी। 31 येशूसे थेनीगदेदा “एनीगदेएनोन सुनसान ग्लारी खसी बल्पबा न्हउ” भिसी सुड्जी। तिग्दा भिसम थेरी खबा निबा म्हिगदे ल्हानान मुबासे लमा थेनीगदेदा चबारी सुत्तै फुर्सत आरेबा। 32 थेतबासेलमा थेनीगदे दोंगारी क्रेःसी सुटुकक सुनसान ग्लारी फेपजी। 33 तर ल्हानान म्हिगदेसे थेनीगदे निबान लबा म्राड्जी। थेतबासेलमा थेनीगदे फेपगे लबा ग्ला था याड्सी, नाम्सा नाम्साला म्हिगदे यार्बान थेनीगदे फेपबा ग्लापट्टि निजी। ओचछे थेनीगदे भन्दा डाचछा धोजी। 34 येशू दोंगाग्याम फापबा धुइरी ल्हानान महिला हुल म्राड्सी थेदा दया रेःजी। तिग्दा भिसम थे म्हिगदे गोठालो आरेबा ग्युगदे हड्बा मुबा। येशूसे थे म्हिगदेदा ल्हानान ताम लोपबारी छ्याड्जी।*

35 ड्यसे तमाहेन्से थेला चेलागदे थे मुबा ग्लारी खसी थेदा “दाहेन्से ड्यसे तसी जिन्जी, चु सुनसान ग्लारी तिगै आरे। 36 थेतबासेलमा चु म्हिगदेदा पुड्गो। थेनीगदे चु क्यारमारला नाम्सारी निसी चबा सहेगदे ग्लुसी चगै” भिसी भिजी। 37 तर येशूसे थेनीगदेदा “एनीगदेसेन चुगदेदा चबा सहे पिन्गो” भिसी सुड्जी। तर थेनीगदेसे येशूदा “डन्से ग्यार्जा न्ही म्हुइला डबलसे गेड ग्लुसी थेनीगदेदा चबारी छ्योला?” भिसी भिजी।

* 6:15 मती १६:१४; मर्कू ८:२८; लूका ९:१९ * 6:18 लूका ३:१९-२० * 6:34 गन्ती २७:१७; १ राजा २२:१७; २ इति १८:१६; इज ३४:५; मती ९:३६

38 येशूसे थेनीगदेदा “एनीगदेदेन छयाम गेड गाते मुला? निसी च्यागो” भिसी सुड्जी। जमाहेन्से थेनीगदेसे च्यासी, “गोर डा गेडदेन गोर न्ही तार्डा मुला” भिसी भिजी।

39 जमाहेन्से येशूसे म्हिगदेदा पाडरी लाम लसी चिउ भिसी कुल्जी। 40 ओच्छे म्हिगदे ग्यार्जा ग्यार्जादेन बोगल न्हीसे च्युइ च्युइला लाम लसी पाडरी चिजी। 41 येशूसे थे गोर डा गेडदेन गोर न्ही तार्डा थोसी स्वर्गपट्टि सहीसी परमेश्वरदा धन्यवाद पिन्जी। ओच्छे थे गोर डा गेड क्युइसी म्हिगदेदा भो लसी पिन्गो भिसी चेलागदेदा पिन्जी। ओच्छे गोर न्ही तार्डाएनोन जम्मान म्हिगदेदा भो लसी पिन्जी। 42 ओच्छे जम्मान म्हिगदेसे प्रेन्ना चजी। 43 जमाहेन्से चेलागदेसे लेड्बा गेडदेन तार्डा दुइमा च्युक न्ही सोली तजी। 44 थेरी चबा हेम्फेबेगदे हजार डा मुबा।

येशू समुन्द्रथोरी भ्रबा

मत्ती १४:२२-३६; यूहन्ना ६:१५-२१

45 ओच्छे येशूसे तुरुन्तन हाडला चेलागदेदा दोंगारी क्रै:सी क्यामसड बेथसेदा नाम्सारी हाड भन्दा डाच्छा पुइजी। थे धुइरी येशूसे चा महिला हुलदा पुइबान लजी। 46 ओच्छे थेनीगदेदा पुइमाहेन्से येशू गडपट्टि प्रार्थना लबारी फेपजी। 47 ड्यसे तमा दोंगा समुन्द्रला गुडरी मुबा, ओच्छे येशू चा गिकजेन समुन्द्रला कुनीरी मुबा। 48 थेसे चेलागदेदा दोंगा चलब लबारी गाहो तबा म्राड्जी। तिग्दा भिसम लाबा उल्टोग्यामसे खबा मुबा। स्यहोला तीन बजेरीक्यार येशू समुन्द्रथोरी भ्रबान थेनीगदेपट्टि फेपखजी, ओच्छे थेनीगदेदा ख्लासी डाच्छा फेपगे लमा, 49 थेनीगदेसे येशूदा समुन्द्रथोरी भ्रबान लबा म्राड्सी म्हड मुनम भिसी थेनीगदे लोड्सी क्रिड्जी। 50 तिग्दा भिसम येशूदा म्राड्सी जम्मान लोड्बा मुबा। तर तुरुन्तन येशूसे थेनीगदेदा “भड लउ, डानोन हिन्ना, थालोड्गो” भिसी सुड्जी। 51 ओच्छे हाडला चेलागदेदेन छयाम दोंगारी क्रै:जी। जमाहेन्से लाबालुडसर म्हाजी। ओच्छे थेनीगदे ल्हानान उदेक तजी। 52 तिग्दा भिसम थेनीगदेला सेम कोड्बासे लमा येशूसे हजार डा म्हिगदेदा गेड पिन्बा म्राड्सीएनोन थेला अर्थ घोबा आरेबा।

53 थेनीगदे समुन्द्र थासी गनेसरेत भिबा ग्लारी धोखमाहेन्से दोंगा समुन्द्रला कुनीरी थान्सी, 54 दोंगाग्याम फापमैछयाम म्हिगदेसे येशूदा डोसेजी। 55 ओच्छे थेनीगदे क्यारमारला नाम्सारी निसी येशू फेपखजी भिसी थे:ना लजी। जमाहेन्से म्हिगदेसे आखम्बा म्हिगदेदा तीबा नान्बादेन छयामनोन येशू मुबा ग्लारी भबारी छ्याइजी। 56 जुन जुन ग्लारी येशू फेपजी, थे ग्लारी म्हिगदेसे आखम्बा म्हिगदेदा येशूला क्वान जे भिसै, थुर्पुड्गो भिसी बिन्ती लजी। ओच्छे येशूला क्वान थुर्बा जति जम्मान खम्जी।

7

रिमठिमला बारेरी लोप्बा ताम

मत्ती १५:१-२०

1 यरूशलेमग्याम खबा फरिसीदेन यहूदी धर्मगुरुगदे येशूला क्युर्नोन पोप तजी। 2 थेनीगदेसे येशूला कोइ कोइ चेलागदेसे या आखुना चबा म्राड्जी। 3 फरिसीगदेदेन यहूदीगदेला आखे म्हेमेला रिमठिम अन्छार या आखुतेधोना चबारी आतबा मुबा। 4 चुदे जे आहिन बजारग्याम खमाहेन्से नुहाब आलतेधोना आचमुबा। आखे म्हेमेला चु भन्दा ल्हानान रिमठिम तेन्मुबा ओच्छे खोरेगदे, ताडगदेदेन काँसला ताडगदे म्यापबा रिमठिम मुबा।

5 ओच्छे फरिसीगदेदेन यहूदी धर्मगुरुसे येशूदा “हाडला चेलागदे तिग्दा आखे म्हेमेला रिमठिम अन्छार आभ्रबा? ओच्छे या आखुनान चबा?” भिसी ड्योइजी।

6 थेतबासेलमा थेनीगदेदा चुहड् भिसी सुड्जी, “एनीगदे हड्बा कप्टी म्हिगदेला लागिरी यशैया अगमवक्तासे भ्रिबा ताम ढिक्बा मुला,
‘चु म्हिगदेसे सुडसे जे डादा मान लमुला,
तर सेमहेन्से चा मान आलमुला।

7 ओच्छे एनीगदेसे डादा तेन्बाम तेन्मुला

तसैनोन परमेश्वरसे कुल्बा तामदा भन्दा म्हिसे सहोबा रिमठिमदा घेन म्हन्मुला।*

8 एनीगदेसे परमेश्वरसे कुल्बा ताम ख्लासी म्हिगदेला रिमठिम तेन्बा मुला।”

9 दोःसी येशूसे थेनीगदेदा चुहड् भिसी सुड्जी, “एनीगदे हाडला रिमठिम तेन्बाला लागिरी परमेश्वरसे कुल्बा ताम ख्लाबा एनीगदे खाहड्बा छट्टु? 10 तिगदा भिसम मोशासे भिबा मुला, “एसे हाडला आबा आमादा मान लउ,” ओच्छे ‘जुन म्हिसे हाडला आबा आमादा बिरोध लसी नइबा ताम लला थेदा चा साइनोन तोःला’ भिसी सुड्बा मुला।* 11 तर एनीगदेसे चा ‘जुन म्हिसे हाडला आबा आमादा पिन्तोःबा सहे परमेश्वरदा फुल्बा मुला, थेसे हाडला आबा आमादा मान लआतोः’ भिसी पाड्मुला। 12 थेतबासेलमा एनीगदेला तामग्यामसेन म्हिगदेदा थेन्ना आबा आमादा तिगै पिन्आपुड्बा हड्बान हिन्ना। 13 चुहड् लसी एनीगदे हाडला रिमठिम अन्छार चा भ्रमुला। तर परमेश्वरला बचनदा चा तिगै गे आखेल्बा भिसी म्हन्मुला। चुहड्बा गे एनीगदेसे ल्हानान लमुला।”

म्हिदा चोखो तना लबा सहेगदे

मत्ती १५:१०-२०

14 दोःसी येशूसे महिला हुलदा हाड मुबा ग्लारी ड्योइसी चुहड् भिसी सुड्जी, “डाइ पाड्बा ताम तिग चीम भिसी एनीगदेसे घोबारी महाइगो। 15 खजिबै चबा सहेसे म्हिदा न्होड्ना लबारी आखम। तर महिला सेमग्याम थोन्बा तामसे जे म्हिदा न्होड्ना लमुला। 16 जुन म्हिदा ड्यानबा सेम मुला थेसे ड्यानसी घोउ।”†

17 येशू म्हिगदेदा ख्लासी दिम न्हडरी वाड्माहेन्से थेला चेलागदेसे “हाडसे सुड्बा ताम डन्दा घोना लसी पिन्गो” भिसी भिजी। 18 जमाहेन्से येशूसे हाडला चेलागदेदा चुहड् भिसी सुड्जी, “दान्देधोना अझ एनीगदेसे घोबा आरे? एनीगदेदा था आरे? महिला सुड्ग्याम न्हडरी वाड्बा सहेसे म्हिदा न्होड्ना आल। 19 तिगदा भिसम चबा सहे मी सेम न्हडरी आवाड्ना फो न्हडरी वाड्बा ओच्छे फो न्हडसेनोन मड्ग्यार थोन्ना।” चुहड् लसी येशूसे जम्मान चबा सहे चबारी तला भिसी हाडला चेलागदेदा घोना लसी पिन्जी।

20 येशूसे दोःसी चुहड् भिसी सुड्जी, “महिला सेम न्हड्ग्याम मड्ग्यार थोन्बा तामसे म्हिदा न्होड्ना लमुला। 21 तिगदा भिसम महिला सेमग्यामसेन नइबा म्हन्बा, ब्रेल्सी भ्रबा, यहो लबा, म्हि साइबा, 22 महिला मिडदेन छ्याम ब्रेल्सी भ्रबा, लोभ लबा, नइबा गे लबा, ठगब लबा, सुडरी जे ताम खजी थेनोन पाड्सी भ्रबा, डाह लबा, महिला तामगन लबा, डा हड्बा खालै आरे भिसी भ्रबा, मूर्ख गे लबा चु जम्मान तामगदे थोन्मुला। 23 महिला सेमग्याम थोन्बा चु जम्मान नइबा तामसेन म्हिगदेदा न्होड्ना लमुला।”

अर्गु यहुलला मिडम्हेमेला विश्वास

मत्ती १५:२१-२८

24 जमाहेन्से येशू थेग्याम टुरोस भिबा ग्लापट्टि फेपुजी। ओच्छे खालैसे था थायाड्गै भिसी दिम गिकरी वाड्जी तसैनोन म्हिगदेसे था याड्जी।† 25 थेनोन धुडरी मिडम्हेमे गिकसे येशूला बारेरी थेःमैछ्याम येशू मुबा ग्लारी खसी येशूदा फ्या लजी। थे मिडम्हेमेला झामेदा म्हडसे स्यापुबा मुबा। 26 थे मिडम्हेमे सिरिया यहुल्साला फोनिके भिबा नाम्सारी न्हबा मुबा। थे अर्गु यहुलला मिडम्हेमे मुबा। थेसे “डाला झामेला लहुड्ग्यामसे म्हड ताप्सी पिन्गो” भिसी येशूदा बिन्ती लजी। 27 तर येशूसे “डाच्छा हाडला कोलागदेदा मेन्ना लतोःला, हाडला कोलागदेला गेड् ब्यन्सी नगीदा पिन्बा ठीक आहिन” भिसी सुड्जी। 28 ओच्छे थे मिडम्हेमेसे “हिन्ना प्रभु, तसैनोन कोलागदेसे चबान लमा ताइबा भ्राइभ्रुड् नगीसेनोन चम्याड्मुला” भिसी भिजी। 29 येशूसे थे मिडम्हेमेदा “एसे चुहड् भिबासे लमा एला झामेला लहुड्ग्याम म्हड थोन्सी निसी जिन्बा मुला। दाहेन्से ए दिमरी निउ” भिसी सुड्जी। 30 थे

* 7:7 यशै २९:१३ * 7:10 प्रस्था २०:१२; २१:१७; वयव ५:१६; लेवी २०:९ † 7:16 चु पदला ताम चा ल्हानान हड्बा ग्रीक बाइबलरी भिबा आरे। † 7:24 कोड कोड ग्रीक बाइबलरी “टुरोसदेन सीदोन” भिसी भिबा मुला।

मिडम्हेमे दिमरी धोमा झामेला ल्हुङ्ग्याम म्हड थोन्सी निसी जिन्बा मुबा, ओच्छे झामे चा खाटरी म्हेसी चिबा मुबा।

नाब्यड आथे:बा खाग्ले म्हि खम्बा

³¹ येशू टुरोस भिबा ग्लाग्याम थोन्सी सीदोन ओच्छे डेकापोलिस तबान गालील समुन्द्ररी फेपूजी। ³² थेरी म्हिगदेसे नाब्यड आथे:बा खाग्ले म्हिदा येशू मुबा ग्लारी भसी, “थेदा थुसी खम्ना लपिन्गो” भिसी बिनती लजी। ³³ येशूसे थे म्हिदा महिला हुलग्याम जजाकी क्याथाड भोसी थेला नाब्यड न्हीरी या जुम्बी झाङ्गी। ओच्छे सरी थो स्वासी यासे थेला लेरी थुर्जी। ³⁴ जमाहेन्से येशूसे स्वर्गपट्टि स्हीबान सा न्हसी, “इफ्फाता” भिसी सुङ्गी। चु भिबा चा “ठोङ्गो” भिबा हिन्ना। ³⁵ चुहङ्गु भिमैछ्याम थे महिला नाब्यड थे:जी ओच्छे थेसे ज्यना लसी ताम पाङ्बारी छ्याङ्गी। ³⁶ येशूसे थेनीगदे जम्मादान “चु ताम खालैदा थापाङ्गो” भिसी कुल्जी। तर जति जति चु ताम खालैदा थापाङ्गो भिसी कुल्जी, झन ओतेन म्हिगदेसे पाङ्बान भ्रजी। ³⁷ चु ताम थे:बागदेसे उदेक म्हन्सी, “येशूसे लबा जम्मान गे ज्यबा मुला। थेसे नाब्यड आथे:बा खाग्ले म्हिदाएनोन खम्ना लमुला” भिसी भिबारी छ्याङ्गी।

8

येशूसे हजार बलि म्हिदा चबा सहे पिन्बा

मत्ती १५:३२-३९

¹ तिगै धिन लिच्छा दो:सी महिला हुल पोप तजी। थेनीगदेदेन छ्याम चबा सहे तिगै आरेबासे लमा येशूसे हाडला चेलागदेदा ड्योडसी, ² “चु म्हिगदेदा म्हाङ्गी डादा दया रे:जी। तिगदा भिसम चुगदे डादेन छ्याम भ्रबा तिनी सोमरे तजी। ओच्छे चुगदेदेन छ्याम चबा सहे तिगै आरे। ³ चु म्हिगदेदा फोइथाननोन दिमरी पुङ्गी भिसम ग्यामरी बिहोस तला। तिगदा भिसम कोइ कोइ म्हिगदे ल्हानान थारेङ्ग्याम खबा मुला” भिसी सुङ्गी।

⁴ जमाहेन्से चेलागदेसे येशूदा “चुहङ्गुबा तिगै आयाङ्गुबा ग्लारी चु म्हिगदेदा खानङ्ग्याम गेड भसी ख्वासे?” भिसी भिजी। ⁵ येशूसे थेनीगदेदा “एनीगदेदेन छ्याम गेड गाते मुला?” भिसी ड्योडमा, थेनीगदेसे “डन्देन छ्याम गोर निस गेड मुला” भिसी भिजी।

⁶ जमाहेन्से येशूसे थेरी मुबा महिला हुलदा पाङ्गी चिपुङ्गी। ओच्छे थेसे गोर निस गेड थोसी परमेश्वरदा धन्यवाद पिन्सी गेड क्युडसी चेलागदेदा भो लसी पिन्गो भिसी सुङ्गी, ओच्छे चेलागदेसे म्हिगदेदा भो लसी पिन्गी। ⁷ थेनीगदेदेन छ्याम जजाबा तार्डागदेएनोन मुबा। येशूसे तार्डाला लागिरीनोन धन्यवाद पिन्सी चेलागदेदा भो लपुङ्गी। ⁸ ओच्छे म्हिगदेसे प्रेन्ना चजी। जमाहेन्से चेलागदेसे लेङ्गा गेडदेन तार्डा दुडमा सोली निस तजी। ⁹ थेरी गेड चबा म्हिगदे हजार बलि ते मुबा। येशूसे महिला हुलदा पुङ्गी, ¹⁰ हाडला चेलागदेदेन छ्याम दौंगारी क्रे:सी दलमनुथा भिबा ग्लारीक्यार फेपूजी।

फरिसीगदेसे उदेकला चिनु म्हाङ्गा

मत्ती १६:१-४

¹¹ फरिसीगदे येशू मुबा ग्लारी खसी चुहङ्गु भिसी ताम लबारी छ्याङ्गी। ओच्छे येशूला सेम च्याबान, “डन्दा स्वर्गला चिनु गिक उन्गो” भिसी भिजी।* ¹² चु ताम थे:सी येशूसे सा न्हसी, “एनीगदेसे डाला ताम ड्यानगो, दान्देला म्हिगदेसे तिगदा चिनु म्हाङ्गा? तर डाइ दान्देला म्हिगदेदा तिगै चिनु आउन” भिसी सुङ्गी।* ¹³ ओच्छे थेनीगदेदा ख्लासी दौंगारी क्रे:सी येशू क्यामसडपट्टि फेपूजी।

येशूसे फरिसीदेन हेरोदसे लबा लुसीला तामला बारेरी लोपूबा

मत्ती १६:५-१२

¹⁴ दौंगारी क्रे:सी समुन्द्रला क्यामसडपट्टि निबा धुङ्गी चेलागदेसे गेड भोबारी म्ले:बा मुबा। थेनीगदेदेन छ्याम गेड गिक जे मुबा। ¹⁵ ओच्छे येशूसे थेनीगदेदा “च्यागो, एनीगदे फरिसीदेन हेरोद

* 8:11 मत्ती १२:३८; लूका ११:१६ * 8:12 मत्ती १२:२९; लूका ११:२९

ग्लेला खमीरग्याम होशियार तसी चिउ” भिसी सुड्जी।* 16 तर चेलागदेसे चा “यहाडदेन छ्याम गेड आरेबासे लमा येशूसे चुहड् भिसी सुड्बा हिन्ना” भिसी हाड हाड न्हडरी ताम लबारी छ्याइजी।

17 चेलागदेसे चुहड् लसी ताम लबा था याड्सी येशूसे थेनीगदेदा चुहड् भिसी सुड्जी, “एनीगदे गेड आरे भिसी तिग्दा ताम लसी चिबा? एनीगदेसे अझ घोबा आरे? एनीगदेला सेम कोड्बान मुला? 18 मी मुसैनोन एनीगदेसे तिग्दा आम्राड्बा? नाब्यड मुसैनोन तिग्दा आथे:बा? अझ एनीगदेसे ढन्बा आरे? 19 डाइ गोर डा गेडसे हजार डा म्हिगदेदा ख्वामा एनीगदेसे लेड्बा गेड गाते सोली दुइबा मुबा?” थेनीगदेसे “च्युक न्ही सोली” भिसी भिजी। 20 ओच्छे “डाइ गोर निस गेडसे हजार बलि म्हिगदेदा ख्वामा एनीगदेसे लेड्बा गेड गाते सोली दुइमुबा?” भिसी येशूसे ड्योइमा, थेनीगदेसे “सोली निस” भिसी भिजी। 21 जमाहेन्से येशूसे थेनीगदेदा “थेहड् भिसम अझ एनीगदेसे तिग्दा आघोबा?” भिसी सुड्जी।

येशूसे मी आम्राड्बा महिला मी प्राड्ना लबा

22 येशू हाडला चेलागदेदेन छ्याम बेथसेदा भिबा ग्लारी धोखमा म्हिगदेसे मी आम्राड्बा म्हि गिकदा येशू मुबा ग्लारी भसी, “चुदा थुर्सी पिन्गो” भिसी बिन्ती लजी। 23 येशूसे थे मी आम्राड्बा म्हिदा नाम्साग्याम क्याथाड भोर्सी थे मी आम्राड्बा महिला मीरी थो स्वाजी ओच्छे यासे थुर्सी, “एसे तिगै प्राड्जी?” भिसी ड्योइमा, 24 थे मी आम्राड्बा म्हिसे ओसो च्यासी, “डाइ म्हिगदेदा दोड भ्रबा हड् लसी क्युर्सीन भ्रबा प्राड्बा मुला” भिसी भिजी। 25 येशूसे दो:सी थे मी आम्राड्बा महिला मीरी हाडला यासे थुर्जी। जमाहेन्से थेसे प्राड्जी। 26 जमाहेन्से थे म्हिदा येशूसे नाम्सारी आवाड्ना दिमरी निउ भिसी पुइजी।

येशू परमेश्वरला म्हि ख्रीष्ट हिन्ना

मत्ती १६:१३-२०; लूका ९:१८-२१

27 जमाहेन्से येशू हाडला चेलागदेदेन छ्याम कैसरिया फिलिप्पी भिबा ग्लाला नाम्सारीक्यार फेपुजी। थेनीगदे ग्यामरी फेपुबान लमा येशूसे हाडला चेलागदेदा “म्हिगदेसे डादा खाल भिमुला?” भिसी ड्योइजी।

28 थेनीगदेसे “खालैसे बपतिसमा पिन्बा यूहनना, खालैसे एलिया, ओच्छे गाते म्हिसे चा अगमवक्तागदे न्हडला गिक हिन्ना भिमुला” भिसी भिजी।*

29 “तर एनीगदेसे चा डा खाल भिसी म्हनमुला?” भिसी येशूसे ड्योइमा, पत्रुससे “हाड परमेश्वरला म्हि थार्बा पिन्बा ख्रीष्ट हिन्ना” भिसी भिजी।*

30 येशूसे थेनीगदेदा “च्यागो, एनीगदेसे चु ताम खालैदा थापाड्गो” भिसी कुल्जी।

येशूसे हाड खाहड् लसी सिला भिबा ताम चेलागदेदा सुड्बा

मत्ती १६:२१-२८; लूका ९:२२-२७

31 जमाहेन्से येशूसे हाडला चेलागदेदा “परमेश्वरसे पुइखबा म्हिसे ल्हानान दुख नातो:ला। थेदा यहूदी गन्बागदेसे, परमेश्वरला मन्दिररी पूजा लबा मुल म्हिगदेसे ओच्छे यहूदी धर्मगुरुगदेसे बिरोध लसी साइला। तसैनोन थे सिबाग्याम सोमरेमाकुनु सोला” भिसी सुड्जी। 32 येशूसे चुहड् भिसी हाडला चेलागदेदा घोना लमाहेन्से पत्रुससे येशूदा जजाकी क्याथाड भोर्सी, “चुहड् थासुड्गो” भिसी बड्जी। 33 तर येशू स्य्हान्दो चेलागदेपट्टि फ्लिक दो:सी थेनीगदेदा स्हीबान पत्रुसदा “शैतान ए चुग्याम थोन्सी निउ! एसे म्हनबा ताम परमेश्वरला आहिन, महिला हिन्ना” भिसी बड्जी।

चेलागदेसे नातो:बा दुख

मत्ती १६:२४-२८; लूका ९:२३-२७

34 जमाहेन्से येशूसे हाडला चेलागदेदेन थेरी मुबा म्हिगदेदा ड्योइसी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला क्रुस हाडसेन पुइसी डादेन छ्याम

* 8:15 लूका १२:१ * 8:18 यर्मि ५:२१; इज १२:२; मर्कु ४:१२ * 8:28 मर्कु ६:१४-१५; लूका ९:७-८ * 8:29 यहू ६:६८-६९

भ्रगै” भिसी सुड्जी।* 35 तिग्दा भिसम जुन म्हिसे हाडला ज्यान जोगब लबारी म्हाडला थे म्हिसे जुकजुकधोनाला जुनी आयाड्, तर डादेन थार्बा पिन्बा समाचारला लागिरी ज्याननोन पिन्खम्बा म्हिसे चा जुकजुकधोनाला जुनी याड्ला।* 36 म्हिसे जम्बुलिडनोन यारी किन्सी हाडला ज्यान चा निजी भिसम थेदा तिग ज्यबा तला? 37 जम्बुलिडरी महिला ज्यान भन्दा घेन अर्गु तिगै सहे मुला? 38 ओच्छे दान्दे पापीदेन नइबा बानीबेहोर थोसी भ्रबा म्हिगदेला ओन्छाडरी जुन म्हि डादेन डाला तामरी पे:ला लिच्छा परमेश्वरला स्वर्गदूतगदेदेन छ्याम परमेश्वरसे पुइखबा म्हि हाडला आबा परमेश्वरला य्हालदेन शक्तिरी खमा थेदा हाडला भिबारी पे:ला।

9

1 ओच्छे येशूसे थेनीगदेदा “च्यागो, एनीगदेसे डाला ताम ड्यान्गो, चुरी मुबा म्हिगदे न्हडला कोइ कोइ म्हि चा परमेश्वरला य्हुल्सा शक्तिरी खबा आम्राड्तेधोना आसि” भिसी सुड्जी।

येशूला स्य्हाल पोबा

मत्ती १७:१-१३; लूका ९:२८-३६

2 हुरे लिच्छा येशूसे पत्रुस, याकूबदेन यूहननादा जे हाडदेन छ्याम नोबा गडरी भोर्सी फेपूजी। ओच्छे चेलागदेसे च्याना च्यानान येशूला स्य्हाल पोजी।* 3 येशूला क्वान धिनीला सहेर हड्बान य्हाल य्हाल तसी चुदे य्हाल य्हाल तजी कि ओते तार मी जम्बुलिडला खजिबै म्हिसे खुसैनोन तना लआखम। 4 थे धुइरी थेनीगदेसे एलियादेन मोशा, येशूदेन छ्याम ताम लबान लबा म्राड्जी। 5 चु म्राड्सी पत्रुससे येशूदा “गुरु, डनीएनोन चुरी मुबा ज्यबा तजी। दाहेन्से डन्से चुरी छाप्रो सोम स्होइ, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। 6 थेनीगदे लोड्बासे लमा पत्रुसदा तिग भितो:बा था आरेबा।

7 थे धुइरी खसु खसी थेनीगदेदा घपूजी। ओच्छे खसु न्हडग्याम चुहड्बा काइ थे:जी, “चु डाइ सेमहेन्से माया लबा डाला झा हिन्ना, चुसे भिबा ताम एनीगदेसे ड्यान्गो।”* 8 चुहड् भिबा थे:सी थेनीगदेसे क्यारमार च्यामा थेरी येशू बाहेक खालैदा आम्राड्नी।

9 जमाहेन्से येशू हाडला चेलागदेदेन छ्याम गडग्याम फापबान लबा धुइरी येशूसे चेलागदेदा “परमेश्वरसे पुइखबा म्हि सिबाग्याम आसोतेधोना एनीगदेसे तिनी म्राड्बा चु ताम खालैदा थापाड्गो” भिसी सुड्जी। 10 थेनीगदेसे येशूसे सुड्बा ताम सेमरी थान्जी। तर थेनीगदेसे चु सिबा ग्याम सोबा भिबा चा तिग हिन्ना भिसी हाड हाड न्हडरी ताम लजी।

11 थेनीगदेसे येशूदा “यहूदी धर्मगुरुगदेसे तिग्दा एलिया अगमवक्ता डाच्छा खतो:ला भिबा?” भिसी ड्योड्जी।* 12 येशूसे थेनीगदेदा चुहड् भिसी सुड्जी, “हिन्ना, डाच्छा एलिया खला ओच्छे थेसे जम्मान ताम ढिक्ना लला। तर परमेश्वरसे पुइखबा म्हिसे ल्हानान दुख नातो:ला ओच्छे जम्मान म्हिगदेसे थेदा खलाला भिसी तिग्दा भिबा? 13 तर च्यागो, एलिया मी खसी जिन्बा मुला। ओच्छे परमेश्वरला बचनरी भिबा अन्छार थेदा म्हिगदेसे जे लइ म्हन्बा थेनोन लजी।”

येशूसे म्हडसे स्यापबा कोलादा खम्ना लबा

मत्ती १७:१४-२०; लूका ९:३७-४३

14 थेनीगदे स्य्हान्दो चेलागदे मुबा ग्लारी धोखमा क्युर्नोन महिला हुल मुबा। ओच्छे यहूदी धर्मगुरुगदे थेरी चेलागदेदेन छ्याम छलफल लबान मुबा। 15 म्हिगदेसे येशूदा म्राड्मैछ्याम उदेक म्हन्सी यार्बान निसी येशूदा फ्या लजी। 16 येशूसे थेनीगदेदा “एनीगदे तिग ताम लबान मुला?” भिसी ड्योड्मा, 17 महिला हुल न्हडग्याम म्हि गिकसे बिन्ती लबान येशूदा “गुरु, डाइ डाला झा हाड मुबा ग्लारी भबा मुला। म्हडसे स्यापबासे लमा थेसे ताम पाड्आखम्बा मुला। 18 थेदा म्हडसे भ्याड्बा धुइरी थेसे सुड्ग्याम बोप्स्या ते:मुला। ओच्छे स्वा क्रेसी ककरक कुकरूक तमुला। डाइ हाडला

* 8:34 मत्ती १०:३८; लूका १४:२७ * 8:35 मत्ती १०:३९; लूका १७:३३; यूह १२:२५ * 9:2 २ पत्रु १:१७-१८ * 9:7 मत्ती ३:१७; मर्कू १:११; लूका ३:२२ * 9:11 मला ४:५; मत्ती ११:१४

चेलागदेदा थेला ल्हुइग्याम म्हड ताप्सी पिन्गो भिसी बिन्ती लजी, तर थेनीगदेसे आखमनी” भिसी भिजी।

19 येशूसे थेनीगदेदा “विश्वास आलबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे? थेदा डा मुबा ग्लारी भउ” भिसी सुड्जी।

20 थेनीगदेसे थे म्हडसे स्याप्बा कोलादा येशू मुबा ग्लारी भजी। येशूदा म्राड्मैछ्याम थे म्हडसे थे कोलादा लछार पछार लसी सरी हिल्ना लजी। ओच्छे सुड्ग्याम बोप्स्या ते:बान ककरक कुक्कूक तना लजी। 21 ओच्छे येशूसे थे म्हडसे स्याप्बा कोलाला आबादा “खाइमाहेन्से चुहड तबा?” भिसी ड्योइजी। थेला आबासे येशूदा चुहड भिसी भिजी, “चुदा जजाहेन्सेन चुहड तबा हिन्ना। 22 थेदा साइबारी म्हडसे घरिघरि मेरी, क्युडरी भ्याड्बा मुला। गुरु, हाडसे खमसम डन्दा दया लसी खमना लपिन्गो।” 23 येशूसे थेदा “खमसम भिसी तिग्दा भिबा? विश्वास लबादा जम्मान तखम्ला” भिसी सुड्जी। 24 येशूसे चुहड सुड्माहेन्से थे म्हडसे स्याप्बा कोलाला आबासे क्रिड्बान भिजी, “गुरु, डाइ विश्वास लला। विश्वास लबारी डादा हो लउ।”

25 म्हिला हुल हाड मुबापट्टि यार्बान खबा म्राड्सी येशूसे म्हडदा “ताइधोना लबादेन नाब्यड थे:ना आलबा म्हड ए थे कोलाला ल्हुइग्याम थोन्सी निउ! दो:सी खाइमै चु कोलाला ल्हुइरी थावाड्गो” भिसी बड्जी। 26 जमाहेन्से थे म्हड क्रिड्सी थे कोलादा लछार पछार लबान थोन्सी निजी। म्हड थोन्सी निबा धुइरी थे कोला सिबा तेबान तजी। ओच्छे थेरी मुबा ल्हानान म्हिगदेसे सिजीम भिसी म्हन्जी। 27 तर येशूसे थेला यारी चुड्सी थीमाहेन्से थे डोड रे:जी।

28 दिम न्हडरी वाड्माहेन्से खालै आरेबा धुइरी येशूदा चेलागदेसे “तिग्दा डन्से थे म्हडदा ताप्बारी आखमनी” भिसी ड्योइजी।

29 येशूसे हाडला चेलागदेदा “चुहड्बा म्हडदा चा प्रार्थनाग्यामसे जे ताप्खम्ला, तर अर्गु तिगै लसी ताप्आखम” भिसी सुड्जी।

दो:सी येशूसे हाड खाहड लसी सिला भिसी सुड्बा

मत्ती १७:२२-२३; लूका ९:४३-४५

30 येशूदेन थेला चेलागदे थे ग्ला ख्लासी गालील अञ्चलग्याम तबान फेपजी। हाड खानड मुला भिसी म्हिगदेसे था थायाड्गै भिबा येशूला सेम मुबा। 31 तिग्दा भिसम येशूसे हाडला चेलागदेदा लोप्बान मुबा। थे धुइरी येशूसे थेनीगदेदा “परमेश्वरसे पुइखबा म्हिदा चुड्सी म्हिगदेला यारी जिम्मा पिन्ना। थेनीगदेसे थेदा साइला, तसैनोन सोमरेमाकुनु थे सिबाग्याम सोला” भिसी सुड्जी 32 तर चेलागदेसे चु ताम आघोनी, ओच्छे दो:सी येशूदेन छ्याम चु ताम ड्योइबारी थेनीगदे लोड्जी।

जम्मान भन्दा घेन खाल?

मत्ती १८:१-५; लूका ९:४६-५०

33 थेनीगदे कफर्नहुम नाम्सारी धोमाहेन्से जम्मान दिमरी मुबा धुइरी येशूसे चेलागदेदा “दोलो एनीगदे ग्यामरी तिग ताम लबान मुबा?” भिसी ड्योइजी। 34 तर थेनीगदे कुटिसी चिजी। तिग्दा भिसम थेनीगदेसे “य्हाड न्हडला खाल घेन हिन्ना” भिसी हाड हाड न्हडरी ताम लबा मुबा।* 35 ओच्छे येशू धन्छ्यासी हाडला च्युक न्ही चेलागदेदा ड्योइसी, “खालै घेन दोबा सेम मुसम थे जम्मान भन्दा जजा तसी जम्मालान सेवा लतो:ला” भिसी सुड्जी।*

36 जमाहेन्से येशूसे थेनीगदेला गुडरी कोला गिकदा भजी। ओच्छे थे कोलादा हाडला कुरी किन्सी चेलागदेदा, 37 “डाला मिनरी चुहड्बा कोलागदेदा वास्ता लबासे डादा वास्ता लला, ओच्छे डादा वास्ता लबासे डादा जे आहिन, डादा पुइखबा डाला आबादाएनोन वास्ता लला” भिसी सुड्जी।*

38 जमाहेन्से यूहननासे येशूदा “गुरु, डन्से हाडला मिनरी म्हि गिकसे म्हड ताप्बा म्राड्जी। तर डन्से थेदा थेहड लआपुड्नी तिग्दा भिसम थे म्हि य्हाडदेन छ्याम भ्रबा म्हि आहिन” भिसी भिजी। 39 येशूसे थेनीगदेदा चुहड् भिसी सुड्जी, “एनीगदेसे थेदा थेहड थालउ। तिग्दा भिसम डाला मिनरी

* 9:34 लूका २२:२४ * 9:35 मत्ती २०:२६-२७; २३:११; मर्कू १०:४३-४४; लूका २२:२६ * 9:37 मत्ती १०:४०; लूका १०:१६; यूह १३:२०

उदेकला गे लबासे खाइमै डाला बिरोध आल। 40 यूहाडदा बिरोध आलबा म्हि चा यूहाडपट्टिला हिनना।* 41 च्यागो, खालैसे एनीगदेदा थाबा पिन्बा ख्रीष्टदा विश्वास लबा म्हि भिसी क्युडां जे थुड्बारी पिन्सैनोन थे म्हिसे याड्तोःबा इनाम याड्ला।”*

स्यूहान्दोदा पाप लपुड्बा म्हिसे याड्तोःबा सजाय

मत्ती १८:६-९; लूका १७:१-२

42 दोःसी येशूसे थेनीगदेदा चुहड् भिसी सुड्जी, “जुन म्हिसे डादा विश्वास लबा चु कोलागदे न्हडला गिकदा पाप लपुड्ला, थेहड्बा म्हिदा मी खारेरी हान्दा च्योसी समुन्द्ररी भ्याड्बा ज्यबा तला। 43 चुदे एला यासे पाप लपुड्जी भिसम थे थासी भ्याड्गो। या न्ही मुसी नर्गरी खाइमै आसिबा मेरी निबा भन्दा बरु ठुडे तसी जुकजुकधोनाला जुनी याड्बा चा एला लागिरी ज्यबा हिनना।* 44 नर्गरी न्ह च्योलोड सिला न्ह मेनोन सिला।† 45 ओच्छे एला काडसे एदा पाप लपुड्जी भिसम थे थासी भ्याड्गो। काड न्ही मुसी नर्गरी निबा भन्दा बरु कुज्या तसी जुकजुकधोनाला जुनी याड्बा चा एला लागिरी ज्यबा हिनना। 46 नर्गरी न्ह च्योलोड सिला, न्ह मेनोन सिला। 47 एला मीसे एदा पाप लपुड्जी भिसम तेःसी भ्याड्गो मी न्ही मुसी नर्गरी निबा भन्दा मी गिक तेःसी भ्याड्सी परमेश्वरला यहुल्सारी वाड्बा एदा ज्यबा तला।* 48 नर्गरी न्ह च्योलोड सिला, न्ह मेनोन सिला।* 49 जम्मान म्हिगदेदा मेसे खारेब लसी चजा डम्बा हड्बा दोना लला।† 50 चजा ज्यबा सहे हिनना, तर चजाला डम्बा म्हाजी भिसम थे दोःसी तिगसे डम्ना लबा? थेतबासेलमा एनीगदेसेनोन हाड हाड न्हडरी चजा थान्गो ओच्छे हाड हाड न्हडरी ठिक्सी चिउ।”*

10

छोडपत्रला बारेरी लोप्बा ताम

मत्ती १९:१-१२; लूका १६:१८

1 येशू थे ग्ला ख्लासी यर्दन स्योडला क्यामसडपट्टि यहूदिया अञ्चलरी फेप्जी। थेरीनोन महिला हुल पोप तजी, ओच्छे येशूसे दोःसी डाच्छाला हड् लसी थेनीगदेदा लोप्जी। 2 फरिसीगदेसे येशूला सेम च्याबाला लागिरी येशूदा “खालै म्हिसे हाडला मिडदेन छोडपत्र लबारी तला कि आत?” भिसी ड्योड्जी। 3 येशूसे थेनीगदेदा “एनीगदेदा मोशासे तिग भिसी कुल्बा मुला?” भिसी सुड्जी।

4 थेनीगदेसे, “खालैसे हाडला मिडदा ख्लातोःसम छोडपत्र भिसी ख्लाबारी तला भिसी मोशासे पाड्बा मुला” भिसी भिजी।*

5 येशूसे थेनीगदेदा चुहड् भिसी सुड्जी, “एनीगदेला सेम कोड्बासे लमा मोशासे चुहड् भिसी कुल्बा हिनना। 6 तर परमेश्वरसे जम्बुलिड छ्यामाहेन्सेन थेनीगदेदा हेम्कोलादेन मिडकोला लसी सहोबा हिनना।* 7 “थेतबासेलमा म्हिसे हाडला आबादेन आमादा ख्लासी हाडला मिडदेन छ्याम ठिक्सी चिमुला। 8 ओच्छे थेन्नी लहुड गिक हड्बान तला’ दाहेन्से थेन्नी न्ही आहिन, तर गिक हड्बान हिनना।* 9 थेतबासेलमा परमेश्वरसे सहोबा जोडीदा खालै म्हिसे थाफेगै।”

10 येशू हाडला चेलागदेदेन छ्याम दिमरी धन्छ्याबा धुडरी चेलागदेसे येशूदा थे तामला बारेरी ड्योड्जी। 11 येशूसे थेनीगदेदा चुहड् भिसी सुड्जी, “खालै म्हिसे हाडला मिडदेन छ्याम छोडपत्र लसी स्यूहान्दो मिडम्हेमेदेन छ्याम ब्याह लजी भिसम डाच्छाला मिडला बिरोधरी थे ब्रेल्सी भ्रबा हिनना। 12 ओच्छे थेहड् लसी हाडला हेम्बोदेन छ्याम छोडपत्र लसी स्यूहान्दो हेम्फेबेदेन छ्याम ब्याह लजी भिसम थेएनोन हाडला डाच्छाला हेम्बोला बिरोधरी ब्रेल्सी भ्रबा हिनना।”*

* 9:40 मत्ती १२:३०; लूका ११:२३ † 9:41 “क्युड” नेपाली बाइबलदेन ग्रीक बाइबलरी चा “कचौर नाड क्युड” भिसी भिबा मुला।

* 9:41 मत्ती १०:४२ * 9:43 मत्ती ५:३० † 9:44 चु पदगदेला ताम ल्हानान हड्बा ग्रीक बाइबलरी भिबा आरे। * 9:47

मत्ती ५:२९ * 9:48 यशै ६६:२४ † 9:49 ग्रीक बाइबलरी मेग्याम चजा डम्बा दोना लला भिसी भिबा मुला। * 9:50 मत्ती

५:१३; लूका १४:३४-३५ * 10:4 व्यव २४:१-४; मत्ती ५:३१ * 10:6 उत्प १:२७; ५:२ * 10:8 उत्प २:२४ * 10:12 मत्ती

५:३२; १ कोर ७:१०-११

येशूसे कोलागदेदा मोलम पिन्बा

मत्ती १९:१३-१५; लूका १८:१५-१७

13 येशूसे हाडला छ्या कोलागदेथोरी थानसी मोलम पिन्गै भिसी महिगदेसे हाडला कोलागदेदा येशू मुबा ग्लारी भजी। तर येशूला चेलागदेसे थे कोलागदे भबा महिगदेदा बड्जी। 14 चेलागदेसे चुहड् लबा म्राड्सी येशूदा बोमो रे:जी। ओच्छे थेनीगदेदा चुहड् भिसी सुड्जी, “कोलागदेदा डा मुबा ग्लारी खपुड्गो, थेनीगदेला ग्याम थाकागो। तिग्दा भिसम परमेश्वरला यहुल्सा चु कोलागदे हड्बालान हिन्ना। 15 एनीगदेसे डाला ताम ड्यानगो, जुन महिसे चु कोलागदेसे हड् लसी परमेश्वरला यहुल्सादा विश्वास आल थे महि परमेश्वरला यहुल्सारी खाडमै वाड्आम्याड्।* 16 जमाहेन्से येशूसे कोलागदेदा हाडला कुरी किन्सी थेनीगदेथोरी हाडला छ्या थानसी मोलम पिन्जी।

परमेश्वरला यहुल्सादेन फ्युकपो महि

मत्ती १९:१६-३०; लूका १८:१८-३०

17 येशू ग्यामरी फेपबान लबा धुइरी महि गिक यार्बान खसी पुइ जूबान येशूदा “ज्यबा गुरु, जुकजुकधोनाला जुनी याड्बाला लागिरी डाइ तिग लतो:ला?” भिसी ड्योइजी।

18 येशूसे थेदा चुहड् भिसी सुड्जी, “एसे डादा तिग्दा ज्यबा भिबा? परमेश्वर बाहेक खालै ज्यबा आरे। 19 परमेश्वरसे कुल्बा ताम एदा थानोन मुला। महि थासाइगो, स्यहान्दोदेन छ्याम ब्रेल्सी थाभ्रउ, य्हो थालउ, लुसीला ताम पाड्सी थाभ्रउ, ठगब थालउ, ओच्छे हाडला आबा आमादा मान लउ।”*

20 थेसे येशूदा “प्रभु, चु गे मी डाइ जत्धुगुहेन्सेन लबान मुला” भिसी भिजी। 21 येशूसे थेदा सहीबान माया लसी चुहड् भिसी सुड्जी, “अझन एसे गे गिक लतो:बा मुला। दाहेन्से ए निसी एला जम्मान धन सम्पत्ति चूड्सी प्राडबोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ।”

22 चु तामसे थेला ली धोपधोप तजी। ओच्छे दुख ड्हमसी निजी। तिग्दा भिसम थेदेन छ्याम ल्हानान धन सम्पत्ति मुबा।

23 येशूसे क्युर्नोन सहीसी हाडला चेलागदेदा “फ्युकपो महिदा परमेश्वरला यहुल्सारी वाड्बारी गाते गाहो मुला” भिसी सुड्जी। 24 चुहड्बा तामसे चेलागदे उदेक म्हन्जी। तर येशूसे अझ थेनीगदेदा चुहड् भिसी सुड्जी, “च्यागो कोलागदे, धन सम्पत्तिथोरी भर लबा महिगदेदा परमेश्वरला यहुल्सारी वाड्बारी गाते गाहो मुला? 25 फ्युकपो महिदा परमेश्वरला यहुल्सारी वाड्बारी भन्दा बरु ऊंटदा दापला मीग्याम वाड्बारी सजिलो तला।” 26 चु ताम थे:सी चेलागदे झन उदेक म्हन्सी, “थेहड् भिसम खाल्से थार्बा याड्ला?” भिसी भिजी। 27 येशूसे थेनीगदेदा सहीबान, “चु गे महिसे लबारीन आखम्बा गे हिन्ना, तर परमेश्वरसे खम्बा, तिग्दा भिसम परमेश्वरसे लआखम्बा गे तिगै आरे” भिसी सुड्जी।

28 जमाहेन्से पत्रुससे येशूदा “डन्से डन्ना जम्मान सहे ख्लासी हाडदेन छ्याम भ्रबा मुला” भिसी भिमा, 29 येशूसे चुहड् भिसी सुड्जी, “च्यागो, एनीगदेसे डाला ताम ड्यानगो, खालैसे डादेन थार्बा पिन्बा समाचारला लागिरी हाडला आबा आमा, झा झामे, ज्योज्यो आले, नाना आडा, दिमनाम खलाला, 30 थेसे नाबा दुखदेन छ्यामनोन दान्देन थे भन्दा ल्हाना दिमनाम, आबा आमा, झा झामे, ज्योज्यो आले, नाना आडा याड्ला। ओच्छे खबा धुइरी थेसे जुकजुकधोनाला जुनी याड्ला। 31 तर दान्दे डाच्छा मुबागदे न्हडला ल्हानान महि लिच्छा तला, दान्दे लिच्छा मुबागदे चा डाच्छा तला।”*

दो:सी येशूसे हाड खाहड् लसी सिला भिबा ताम सुड्बा

मत्ती २०:१७-१९; लूका १८:३१-३४

32 थेनीगदे यरूशलेमपट्टि फेपबान लबा धुइरी येशू चेलागदे भन्दा डाच्छा डाच्छा भ्रबान मुबा। ओच्छे चेलागदे उदेक तजी, तर स्यहान्दो लिच्छा भ्रबा महिगदे चा लोड्जी। दो:सीनोन येशूसे हाडला च्युक नही चेलागदेदा कुनी गिकरी भोर्सी हाडथोरी तिग तला भिबा तामला बारैरी चुहड् भिसी सुड्जी। 33-34 “च्यागो, दान्दे यहाड यरूशलेमपट्टि निबान मुला। परमेश्वरसे पुइखबा महिदा परमेश्वरला

* 10:15 मत्ती १८:३

* 10:19 प्रस्था २०:१२-१६; वयव ५:१६-२०

* 10:31 मत्ती २०:१६; लूका १३:३०

मन्दिररी पूजा लबा मुल म्हिगदेदेन यहूदी धर्मगुरुगदेला यारी जिम्मा पिन्ना। जमाहेन्से थेनीगदेसे साइनोन तोःला भिसी अर्गु यहूलला म्हिगदेला यारी जिम्मा लला। ओच्छे थेनीगदेसे थेदा थो स्वासी खिसी लला ओच्छे कोर्रासे तोसी साइला। तसैनोन थे सोमरेमाकुनु सिबाग्याम सोला।”

याकूबदेन यूहन्नासे लबा बिन्ती

मत्ती २०:२०-२८

35 जमाहेन्से जब्दियाला झा याकूबदेन यूहन्ना येशू मुबा ग्लारी खसी, “गुरु, डन्से हीबा सहे पूरा लसी पिन्गो भिबा डन्ना सेम मुला” भिसी थेनीगदेसे बिन्ती लजी।

36 “डाइ एनीगदेला लागिरी तिग लतोःजी?” भिसी येशूसे थेनीगदेदा ड्योइजी।

37 “हाड स्वर्गला य्हाल य्हाल्बा मान याड्बा ठिरी धन्छ्यामा डनी ज्योज्यो आलेदा हाडला दाहिनेपट्टिदेन देब्रेपट्टि चिपुड्गो” भिसी थेनीगदेसे भिजी।

38 “तिग हीदोबा भिसी एनीगदेदा थानोन आरे। डाइ नाबा दुख एनीगदेसे नाबारी खम्ला? डाइ किन्बा बपत्तिसमा एनीगदेसे किन्खम्ला?” भिसी येशूसे थेनीगदेदा सुड्जी।*

39 जमाहेन्से थेनीगदेसे येशूदा “खम्ला” भिसी भिजी।

जमाहेन्से येशूसे चुहड् भिसी सुड्जी, “एनीगदेसे डाइ नाबा दुख मी नाला, ओच्छे डाइ किन्बा बपत्तिसमाएनोन एनीगदेसे किन्ना। 40 तर डाला दाहिने देब्रे चिपुड्बा अधिकार डाला यारी आरे। चु ग्ला परमेश्वरसे जुन महिला लागिरी सहोबा हिन्ना थे जे चिम्याड्ला।”

41 चु ताम थेःसी चेला च्युड्दा चा याकूब, यूहन्ना म्राड्सी बोमो रेःजी। 42 तर येशूसे थेनीगदेदा हाड मुबा ग्लारी ड्योइसी चुहड् भिसी सुड्जी, “च्यागो, एनीगदेदा चु ताम थानोन मुला, अर्गु यहूलला शासन लबा म्हिगदेसे हाडला सेमसे म्हन्बा अन्छार म्हिगदेशोरी शासन लमुला। ओच्छे घेन घेन पदरी मुबा म्हिगदेसे हाड भन्दा धिरी मुबा म्हिगदेशोरी शासन लमुला। 43 तर एनीगदे चा थेहड् तबारी आत। जुन म्हि जम्मान भन्दा घेन दोबारी म्हाइला थेसे चा एनीगदेला सेवा लतोःला।* 44 जुन म्हि जम्मान भन्दा डाच्छा तबारी म्हाइला थे म्हि चा जम्मालान नोकर दोतोःला।* 45 तिग्दा भिसम परमेश्वरसे पुड्खबा म्हिएनोन स्यहान्दोगदेग्याम सेवा किन्बारी आहिन, तर स्यहान्दोगदेला सेवा लबारी ओच्छे हाडलान ज्यान पिन्सी ल्हानान म्हिगदेला पापला सय फाबारी खबा हिन्ना” भिसी सुड्जी।

मी आम्राड्बा बारतिमै

मत्ती २०:२९-३४; लूका १८:३५-४३

46 येशू हाडला चेलागदेदेन छ्याम यरीहो नाम्सारी धोखजी। थे नामसा ख्लासी निबा धुइरी ल्हानान महिला हुल थेनीगदेदेन छ्याम छ्याम खजी। ग्यामला कुनीरी तिमैला झा बारतिमै भिबा मी आम्राड्बा म्हि गिक हीसी चिबा मुबा। 47 नासरतला येशू खबा थेःसी थेसे “दाऊद ग्लेला सन्तान येशू, डादा दया लउ!” भिसी क्रिड्बारी छ्याइजी।

48 ल्हानान म्हिगदेसे थेदा “कुटिसी चिउ” भिसी बड्जी। तर इन थेसे “दाऊद ग्लेला सन्तान येशू, डादा दया लउ!” भिसी क्रिड्बान भिजी।

49 येशू थेन तसी, “थेदा चुरी ड्योइगो!” भिसी सुड्जी। ओच्छे थेनीगदेसे थे मी आम्राड्बा म्हिदा ड्योइसी, “भड लउ, एदा येशूसे ड्योइबान मुला, योनान रेःसी खउ।” भिसी भिजी। 50 जमाहेन्से थे मी आम्राड्बा म्हि हाडला घ भ्याड्सी छ्योड्बान येशू मुबा ग्लारी खजी।

51 येशूसे थेदा “डाइ एला लागिरी तिग लगै भिसी म्हन्बा मुला?” भिसी ड्योइजी, थे मी आम्राड्बा म्हिसे “गुरु, डाला मी म्राड्ना लसी पिन्गो” भिसी बिन्ती लजी। 52 येशूसे थेदा “एसे विश्वास लबासे लमा ए खम्बा मुला। दाहेन्से ए निउ” भिसी सुड्जी। येशूसे थेहड् सुड्मैछ्याम थेसे म्राड्जी ओच्छे येशूदेन छ्याम भ्रजी।

* 10:38 लूका १२:५० * 10:43 लूका २२:२५-२६ * 10:44 मत्ती २३:११; मर्कु ९:३५

11

येशू यरूशलेमरी फेपबा

मत्ती २१:१-११; लूका १९:२८-३८; यूहन्ना १२:१२-१५

१ येशूदेन थेला चेलागदे यरूशलेम डामला जैतून गडला बेथफागेदेन बेथानिया भिबा नाम्सारी धोखमा येशूसे हाडला चेलागदे न्हडला न्हीदा पुइजी। २ पुइबा धुइरी चुहड् भिसी सुड्जी, “एनी जजाकी क्याथाडला नाम्सारी निउ। नाम्सारी धोमैछ्याम एनीसे दान्देधोना खालै आक्रे:बा गधाला कोला गिक स्याप्ला। थेदा बलसी चुरी भसी खउ। ३ थेरी एनीदा खालैसे चु तिग लबा? भिसी ड्योइसम, चु प्रभुदा तो:बा मुला, प्रभुसे योनान दो:सी पिन्ना भिउ” भिसी पुइजी।

४ थेनी निमा ग्याम डामला दिमला खाडगारी गधाला कोला च्युन्सी थान्बा स्यापूजी। थेनीसे थे गधाला कोलादा बलबारी छ्याइमा, ५ थेरी राप्सी चिबा म्हिगदेसे “एनीसे थे गधाला कोलादा बलसी तिग लबारी छ्याइबा?” भिसी ड्योइजी। ६ येशूसे सुड्बा हड्ढोन चेला न्हीसे थेरी मुबा म्हिगदेदा भिजी, जमाहेन्से थे म्हिगदेसे गधाला कोला भोर्पुड्जी।

७ थे गधाला कोलादा चेला न्हीसे येशू मुबा ग्लारी भसी हाड हाडला घ गधाला कोलाथोरी तीसी पिन्जी, ओच्छे येशू गधाला कोलाथोरी क्रे:जी। ८ ल्हानान म्हिगदेसे ग्यामरी हाड हाडला घगदे तीजी, ओच्छे स्यहान्दोगदेसे चा भ्लेग्याम स्याउला भसी तीजी। ९ येशूला लिच्छा डाच्छा भ्रबा म्हिगदेसे चुहड् भिसी क्रिड्बारी छ्याइजी

“परमेश्वरदा जयजयकार तगै,

परमप्रभुला मिनरी फेपखबासे परमेश्वरग्याम मोलम याड्गै।*

१० यहाडला आखे म्हेमे दाऊद ग्लेला खबा

चु य्हुल्सादा परमेश्वरसे मोलम पिन्गै।

ओच्छे स्वर्गरी धन्छ्याबा परमेश्वरला जयजयकार तगै।”

११ यरूशलेमरी धोखमाहेन्से येशू परमेश्वरला मन्दिर न्हडरी वाड्जी। ओच्छे थेसे परमेश्वरला मन्दिरला क्युर्सीन सहीजी। तर घइबासे लमा येशू हाडला च्युक न्ही चेलागदेदेन छ्याम बेथानिया नाम्सारी फेपजी।

तिगै आरोबा अञ्जीरला दोड

मत्ती २१:१८-१९

१२ न्हडगरदडसे थेनीगदे बेथानियाग्याम यरूशलेमपट्टि फेपबा धुइरी येशूदा फोखेन्जी। १३ येशूसे जजाकी क्याथाड अञ्जीरला दोड गिक म्राड्जी। थेरी अञ्जीर मुजी वा भिसी येशूसे सहीबारी फेपजी। तर थे दोडरी भानोन भा जे मुबा। तिग्दा भिसम थे धुइरी अञ्जीर रोबा धुइ तबा आरेबा। १४ जमाहेन्से येशूसे “दाहेन्से एग्याम रोबा अञ्जीर खाइमै खालैसे थाचगै” भिसी सुड्जी। चु ताम थेला चेलागदेसे थे:जी।

येशू परमेश्वरला मन्दिररी फेपबा

मत्ती २१:१२-१७; लूका १९:४५-४७; यूहन्ना २:१३-२२

१५ येशू हाडला चेलागदेदेन छ्याम यरूशलेमरी धोमाहेन्से परमेश्वरला मन्दिर न्हडरी चूड्बादेन ग्लुबागदेदा तापूजी। थेसे थेरी चुड्बा ग्लुबा लबा जम्मान व्यापारीगदेदा तापूजी। ओच्छे टाडगा देपबारी चिबागदेला टेबुलदेन दुकुर चूड्बारी चिबागदे जम्मालान चिबा ग्लागदे प्लाड प्लिड लसी भ्याड्जी। १६ जमाहेन्से येशूसे परमेश्वरला मन्दिरग्याम खालैदा तिगै सहे भोर्बारी आपिन्नी भबारीएनोन आपिन्नी। १७ ओच्छे येशूसे जम्मान म्हिगदेदा लोपबान, “तिग परमेश्वरला बचनरी चुहड् भिबा आरे? ‘डाला दिमदा य्हुल य्हुलला म्हिगदेसे प्रार्थना लबा दिम भिसी भिला।’ तर एनीगदेसे मी डाला दिमदा य्होगदे चिबा ग्ला सहोबा मुला” भिसी सुड्जी।*

* 11:9 भजन ११८:२५-२६ * 11:17 यशै ५६:७; यर्मि ७:११

18 चु ताम परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे थें:सी येशूदा खाहड लसी साइबा भिसी दाउ च्यासी भ्रबारी छ्याइजी। तिग्दा भिसम येशूसे लोपबा तामरी जम्मान म्हिगदे उदेक म्हनमुबा। थेतबासेलमा थेनीगदे येशूदेन छ्याम लोड्मुबा। 19 ड्यसे तमाहेनसे येशू हाडला चेलागदेदेन छ्याम यरूशलेम शहरग्याम फेपजी।

विश्वासग्याम उदेकला गे तबा

मत्ती २१:२०-२२

20 न्हडगरदड स्यहोरी थेनीगदे डाच्छालाग्यामसे निबान लमा थेनीगदेसे थे अज्जीर दोड टाहेनसेन खर्बा म्राड्जी। 21 येशूसे थे अज्जीर दोडदा के:बा ताम ढन्सी पत्रुससे “रब्बी, हाडसे के:बा थे अज्जीरला दोड मी सिजीम” भिसी भिमा, 22 येशूसे हाडला चेलागदेदा “परमेश्वरथोरी विश्वास लउ” भिसी सुड्जी। 23 दो:सी येशूसे थेनीगदेदा चुहड् भिसी सुड्जी, “एनीगदेसे डाला ताम ड्यानगो, चुदे एनीगदेसे सेमरी तिगै शङ्का आलना हाडला सेमरी म्हनबा ताम पूरा तला भिसी विश्वास लसी चु गडदा ‘ए होक निसी समुन्द्ररी ताइगो’ भिजी भिसम एनीगदेला लागिरी थेहड्णोन तला।* 24 थेतबासेलमा एनीगदेसे प्रार्थना लमा तिग ह्नीबा मुला, थे डाइ याड्जी भिसी विश्वास लजी भिसम एनीगदेसे याड्ला। 25 तर एनीगदेसे प्रार्थना लबारी छ्याइबा धुडरी खालैला बिरोधरी तिगै आज्यबा ताम मुसम थेदा माफ लउ। स्वर्गरी मुबा एनीगदेला परमेश्वर आबासेनोन एनीगदेला पाप माफ लला। 26 तर एनीगदेसे माफ आलनी भिसम स्वर्गरी मुबा एनीगदेला परमेश्वर आबासेनोन एनीगदेला पाप माफ आल।†*

येशूला अधिकारला बारेरी ड्योइबा

मत्ती २१:२३-२७; लूका २०:१-८

27 दो:सी येशू हाडला चेलागदेदेन छ्याम यरूशलेम शहररी फेपखजी। मन्दिररी भ्रबान लमा परमेश्वरला मन्दिररी पूजा लबा मुल म्हिगदे, यहूदी गन्बागदे ओच्छे यहूदी धर्मगुरुगदे येशू मुबा ग्लारी खसी, 28 “हाडसे खानडग्याम अधिकार याड्सी चु गे लबा हिन्ना? हाडदा चु अधिकार खाल्से पिन्बा हिन्ना?” भिसी ड्योइजी।

29 येशूसे थेनीगदेदा चुहड् भिसी ड्योइजी, “एनीगदेदाएनोन डाइ ताम गिक ड्योइला। थे तामला जोहाब पिन्जी भिसम डादा चु गेगदे लबारी खाल्से अधिकार पिन्जी थे एनीगदेदा पाड्ला। 30 यूहन्नासे पिन्बा बपतिस्मा परमेश्वरग्याम मुबा कि म्हिग्याम मुबा? डादा पाड्गो।” 31 जमाहेनसे थेनीगदे हाड हाड न्हडरी ताम लसी, “चुदे यहाडसे परमेश्वरग्याम भिजी भिसम थेसे यहाडदा ‘थेहड् भिसम एनीगदेसे तिग्दा यूहन्नादा विश्वास आलबा?’ भिसी भिला। 32 तर म्हिगदेग्याम भिबारीनोन आत।” थेनीगदे महिला हुल म्राड्सी लोड्जी। तिग्दा भिसम जम्मान म्हिगदेसे यूहन्नादा अगमवक्ता हिन्ना भिसी भिमुला।

33 थेतबासेलमा थेनीगदेसे “डन्दा था आरे” भिसी येशूदा जोहाब पिन्जी। येशूसे थेनीगदेदा “थेहड् भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाड्” भिसी सुड्जी।

12

अधियाँ सहोबा म्हिगदेला उखान

मत्ती २१:३३-४६; लूका २०:९-१९

1 येशूसे थेनीगदेदा उखानग्याम चुहड् भिसी सुड्बारी छ्याइजी, “म्हि गिकसे वारीरी अडगुर सूसी क्युर्सीन पर्खाल लजी। ओच्छे अडगुर म्हर्बारी कोल सहोसी अडगुर वारी खुड्बारी नोबा छाप्रो गिक सहोजी। जमाहेनसे अधियाँरी पिन्सी थे अर्गु यहूलूसारी निजी।* 2 अडगुर मिन्बा धुड तमाहेनसे थे फ्युकपो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुड्जी। 3 तर थे अधियाँ लबागदेसे थेदा चुड्सी तोबा ग्याड्बा लसी तिगै आपिन्ना पुड्जी। 4 ओच्छे थेसे स्यहान्दो नोकरदा पुड्जी, तर थेनीगदेसे थेला थोबोरी तोसी बेइज्जत लसी पुड्जी। 5 थेसे अझ

* 11:23 मत्ती १७:२०; १ कोर १३:२ † 11:26 चु पदला ताम ल्हानान ग्रीक बाइबलरी भिबा आरे। * 11:26 मत्ती ६:१४-१५

* 12:1 यशै ५:१-२

स्यूहान्दो नोकरदा पुइजी। थेनीगदेसे थेदाएनोन साइजी। चुहड् लसी थेनीगदेसे कोइदा साइबा कोइदा तोबा लजी।

6 “दाहेन्से थेदेन छ्याम थेसे सेमहेन्सेन माया लबा झा गिक जे बाँकी मुबा। जम्मादान पुइसी जिन्माहेन्से ‘थेनीगदेसे डाला झादा मी मान लला तला’ भिसी थेसे हाडला झादा थेनीगदे मुबा ग्लारी पुइजी। 7 तर अधियाँ लबागदेसे ‘चु मी य्हाडला धनीला झा हिन्ना, य्हाडसे थेदा साइगे। जमाहेन्से थेला सम्पत्ति य्हाडलान तला’ भिसी हाड हाड न्हडरी ताम लजी। 8 ओच्छे थेनीगदेसे थेदा चुइसी साइसी थेदा वारीग्याम पाखारी भ्याइजी।

9 “दाहेन्से थे अडगुर वारीला धनीसे तिग लला? थे खसी अधियाँ लबा म्हिगदेदा साइला ओच्छे थे अडगुरला वारी स्यूहान्दोगदेदा सहोबारी पिन्ना। 10 एनीगदेसे परमेश्वरला बचन खाइमै पढब लबा आरे?

‘जुन युडबादा दिम सहोबा कर्मीगदेसे गे आखेल भिसी भ्याइबा मुबा, थेनोन युडबा दिमला सुर युडबा दोजी।

11 चु परमप्रभुग्याम तबासे लमा य्हाडला लागिरी उदेकला ताम हिन्ना’

भिसी भिबा मुला।”*

12 येशूसे सुइबा ताम य्हाडला बिरोधरी चीम भिसी यहूदी धर्मगुरुगदेसे था याइसी थेनीगदेसे येशूदा चुइबारी म्हाइजी। तिगदा भिसम चु उखान येशूसे थेनीगदेलान बिरोधरी सुइबा हिन्ना भिबा ताम थेनीगदेदा था मुबा। तर महिला हुलसे लमा थेनीगदे लोइसी येशूदा चुइबारी आखम्नी। थेतबासेलमा थेनीगदेसे येशूदा ख्लासी निजी।

रोमी ग्याल्बोदा तिरो फातोःबा कि फाआतोःबा भिसी येशूदा इयोइबा

मत्ती २२:१५-२२; लूका २०:२०-२६

13 जमाहेन्से तामनोन तामरी येशूदा फसब लइ भिसी यहूदी धर्मगुरुगदेसे फरिसीदेन हेरोदीगदेला कोइ कोइ म्हिगदेदा येशू मुबा ग्लारी पुइजी। 14 थेनीगदे येशू मुबा ग्लारी खसी, “गुरु, हाड सत्यला म्हि हिन्ना, ओच्छे खालैदा वास्ता आलमुला भिसी इन्दा था मुला। तिगदा भिसम हाडसे महिला ली च्यासी गे आलमुला। तर परमेश्वरला ग्याम ज्यना लसी लोपमुला। थेतबासेलमा इन्से रोमी ग्याल्बो कैसरदा तिरो फाबा ठीक हिन्ना कि आहिन? सुइगो। 15 इन्से तिरो फागो कि थाफागो?” भिसी इयोइमा, येशूसे थेनीगदेला कप्टी सेम था याइसी, “तिगदा एनीगदेसे डादा फसब लबारी म्हाइबा? खाइ डबल गिक भउ च्यागे” भिसी सुइजी। 16 थेनीगदेसे येशूदा डबल गिक पिन्जी, ओच्छे येशूसे थेनीगदेदा “चु डबलरी मुबा छापदेन मिन खाल्ला हिन्ना?” भिसी सुइमा, थेनीगदेसे “रोमी ग्याल्बो कैसरला” भिसी जोहाब पिन्जी। 17 जमाहेन्से येशूसे थेनीगदेदा “थेहड् भिसम रोमी ग्याल्बो कैसरला जति रोमी ग्याल्बो कैसरदा पिन्गो ओच्छे परमेश्वरला जति परमेश्वरदा पिन्गो” भिसी सुइजी। चुहड्बा ताम थेःसी थेनीगदे उदेक तजी।

सिबाग्याम सोना लबाला बारेरी इयोइबा

मत्ती २२:२३-३३; लूका २०:२७-३८

18 सिबा म्हि दोःसी आसो भिसी विश्वास लबा सदुकीगदे येशू मुबा ग्लारी खसी चुहड् भिसी इयोइजी,* 19 “गुरु, मोशासे य्हाडदा पिन्बा ठिम अन्छार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतोःला भिसी भिबा मुला।* 20 म्हि गिकला ज्योज्यो आले निस मुबा। थेबासे ब्याह लजी तर कोलागदे आतनान थे सिजी। 21 ओच्छे पाराडसे चाडदा ब्याह लजी थेएनोन कोलागदे आतनान सिजी, साँजीएनोन थेहड् तसीन सिजी। 22 चुहड् लसी जम्मासेन पालोन पालो चाडदा ब्याह लजी। ओच्छे कोलागदे आतनान थेनीगदे सिजी। ओच्छे थे म्रिडम्हेमेएनोन सिजी। 23 थेतबासेलमा इन्दा सुइगो, सिबाग्याम सोना

* 12:11 भजन ११८:२२-२३ * 12:18 मुल २३:८ * 12:19 वयव २५:५

लजी भिसम थे म्रिडम्हेमे खजिबाला म्रिड तला? तिग्दा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।” 24 येशूसे थेनीगदेदा “एनीगदे अन्दोलरीन चीम, तिग्दा भिसम एनीगदेसे परमेश्वरला बचनदेन परमेश्वरला शक्तिला बारेरी घोबान आरेम। 25 तिग्दा भिसम सिबाग्याम सोना लबा धुइरी न्ह ब्याह लला न्ह ब्याह तला। तर थेनीगदे स्वर्गरी मुबा स्वर्गदूतगदे हड्बान तला। 26 सिबाग्याम सोना लबाला बारेरी अझ भिगे भिसम परमेश्वरसे मोशादा लुड्बा मेला झाडग्याम ‘डा अब्राहाम, इसहाकदेन याकूबला परमेश्वर हिन्ना’ भिसी सुड्जी।* 27 परमेश्वर मी सिबागदेला परमेश्वर आहिन, तर सोबागदेला परमेश्वर हिन्ना। थेतबासेलमा एनीगदेसे घोबा जम्मान ताम गल्ती मुला” भिसी सुड्जी।

येशूसे लोप्बा जम्मान भन्दा मुल ताम

मत्ती २२:३४-४०; लूका १०:२५-२८

28 येशूसे म्हिगदेदा ज्यना लसी जोहाब पिन्बा म्राड्सी यहूदी धर्मगुरुगदे न्हडला गिकसे, “गुरु, परमेश्वरसे मोशादा पिन्बा ठिमरी जम्मान भन्दा मुल ताम चा खजिबा हिन्ना?” भिसी ड्योइजी। 29 येशूसे थेदा चुहड् भिसी सुड्जी, “इस्नाएलीगदे च्यागो, जम्मान भन्दा मुल ताम चा परमप्रभु यहाडला परमेश्वर गिक जे प्रभु हिन्ना। 30 एसे हाडला परमप्रभु परमेश्वरदा सेमहेन्से, जम्मान प्राणसे, जम्मान बुद्धिसे, जम्मान शक्तिसे माया लउ।”* 31 ओच्छे परमेश्वरसे कुल्बा अर्गु मुल ताम चा ‘एसे हाडला खिमजेमदा हाडदा हड्बान माया लउ।’* परमेश्वरसे कुल्बा मुल ताम चु भन्दा अर्गु आरे।”

32 चु ताम थे:सी यहूदी धर्मगुरुसे येशूदा “गुरु, हाडसे सुड्बा ताम ठीक हिन्ना। परमेश्वर गिक जे मुला, ओच्छे परमेश्वर बाहेक स्यहान्दो खालै आरे।”* 33 ओच्छे परमेश्वरदान सेमहेन्सेन, जम्मान प्राणसे, जम्मान बुद्धिसे, जम्मान शक्तिसे माया लबा, ओच्छे हाडदा हड्बान हाडला खिमजेमदाएनोन माया लबा चा मेरी ख्राड्सी पिन्बा जम्मान बलिदेन बलिदानगदे भन्दा मुल ताम हिन्ना” भिसी भिजी।* 34 थेसे होशियार तसी जोहाब पिन्बा म्राड्सी येशूसे थेदा “ए परमेश्वरला यहूलसाग्याम थारेड आरे” भिसी सुड्जी। जमाकुनुहेन्से खालैसे येशूदा तिगै ताम ड्योइबारी आँट आलनी।*

येशू ख्रीष्ट खाल्ला झा हिन्ना?

मत्ती २२:४१-४६; २३:१-३६; लूका २०:४१-४७

35 येशूसे परमेश्वरला मन्दिररी लोपबान लबा धुइरी चुहड् भिसी सुड्जी, “यहूदी धर्मगुरुगदेसे तिग्दा थार्बा पिन्बा ख्रीष्टदा दाऊद ग्लेला सन्तान भिसी भिबा? 36 तिग्दा भिसम दाऊदसेन परमेश्वरला आत्माग्याम चुहड् भिबा मुबा, ‘परमप्रभुसे डाला प्रभुदा डाइ एला शत्रुगदेदा एला काड धिरी आथान्तेधोना ए डाला दाहिनेपट्टि चिउ’ भिसी सुड्जी।”*

37 “दाऊद हाडसेन मी ख्रीष्टदा ‘प्रभु’ भिमाहेन्से खाहड् लसी ख्रीष्ट दाऊद ग्लेला सन्तान तला?” ओच्छे येशूसे लोपबा ताम म्हिगदेसे सेम लसी ड्यानजी।

येशूसे यहूदी धर्मगुरुगदे म्राड्सी होशियार तउ भसी सुड्बा

मत्ती २३:१-३६; लूका २०:४५-४७

38 येशूसे लोपबान लबा धुइरी चुहड् भिसी सुड्जी, “यहूदी धर्मगुरुगदे म्राड्सी होशियार तउ। तिग्दा भिसम थेनीगदे ज्यबा ज्यबा क्वान क्वान्सी कोर्बारी निबादेन बजाररी निबा धुइरी म्हिगदेसे मान लगै भिसी म्हनमुला। 39 ओच्छे यहूदीगदे हुप तबा दिमरीदेन भोज लबा ग्लारीनोन मुल ठि म्हाइमुला। 40 थेहड् लसीन थेनीगदेसे हेम्बो सिबा म्रिडम्हेमेगदेला दिमनाम ब्यन्मुला। ओच्छे म्हिगदेदा उन्बाला लागिरी हेड्बा हेड्बा प्रार्थना लमुला थेहड्बा म्हिगदेसे झन ल्हानान सजाय याड्ला।”

* 12:26 प्रस्था ३:६ * 12:30 वयव ६:४-५ * 12:31 लेवी १९:१८ * 12:32 वयव ४:३५ * 12:33 होशे ६:६ * 12:34 लूका १०:२५-२८ * 12:36 भजन ११०:१

हेम्बो सिबा म्रिडम्हेमेसे पिन्बा भेटी
लूका २१:१-४

41 येशू परमेश्वरला मन्दिररी भेटी युबा ग्लाला डाचछापट्टि धन्छ्यासी म्हिगदेसे भेटी युबा बाकसरी भेटी युबान लबा सूहीबान मुबा। थेरी फ्युकपो म्हिगदेसे ल्हानान टाडगा युजी। 42 ओच्छे हेम्बो सिबा प्राडबो म्रिडम्हेमे गिक खसी साडबोला सिगा गिकला डबल न्ही युजी। 43 जमाहेन्से येशूसे चेलागदेदा हाड मुबा ग्लारी ड्योइसी, “च्यागो, डाला ताम ड्यानगो। भेटी युबा बाकसरी चु हेम्बो सिबा प्राडबो म्रिडम्हेमेसे स्य्हानदो म्हिगदेसे भन्दा ल्हाना भेटी युबा मुला। 44 तिग्दा भिसम स्य्हानदो म्हिगदेसे हाडदेन छ्याम मुबा ल्हानान सम्पत्तियांम युजी। तर चु म्रिडम्हेमे प्राडबो तसीनोन हाडदेन छ्याम मुबा जति जम्मान युबा मुला” भिसी सुड्जी।

13

परमेश्वरला मन्दिर नाश तला
मत्ती २४:१-२; लूका २१:५-६

1 येशू परमेश्वरला मन्दिरग्याम थोनसी फेपबान लबा धुइरी चेलागदे न्हडला गिकसे “गुरु सूहीगो, चुरी गाते घेन घेन युडबासे सहोबा गाते जेबा दिमगदे” भिसी भिमा, 2 येशूसे थेदा “चु घेन दिमगदेला युडबा गिकनोन बाँकी आचिना जम्मान फुप्ला” भिसी सुड्जी।

जम्बुलिड नाश तबा धुइला चिनुगदे
मत्ती २४:३-१४; लूका २१:७-१९

3 येशू परमेश्वरला मन्दिरला क्यामसडपट्टिला जैतून गडरी धन्छ्याबा धुइरी पत्रुस, याकूब, यूहननादेन अन्रियास येशू मुबा ग्लारी खसी चुहड् भिसी सुटुकक ड्योइजी, 4 “हाडसे सुड्बा चु तामगदे खाइमा तला? ओच्छे चु तामगदे तबा धुइरी खाहड्बा चिनु म्राड्ला? डन्दा सुड्गो।”

5 येशूसे थेनीगदेदा चुहड् भिसी सुड्जी, “एनीगदे होशियार तउ। खालैसे एनीगदेदा झुक्याब थालगै। 6 तिग्दा भिसम ल्हानान म्हिगदे डाला मिन किन्सी ‘डानोन थार्बा पिन्बा ख्रीष्ट हिन्ना’ भिसी खला। ओच्छे ल्हानान म्हिदा झुक्याब लला। 7 एनीगदेसे लडाइदेन लडाइला हल्लागदे थे:ला। तसैनोन एनीगदे थालोड्गो, तिग्दा भिसम चु तनोन तो:बा हिन्ना। तर थेनोन धुइरी चा चु जम्बुलिड नाश आत। 8 तिग्दा भिसम म्हि यहुलला बिरोधरी म्हि यहुलनोन ओच्छे यहुल्साला बिरोधरी यहुल्सा रे:ला। खानडदमान सडगुल निला ओच्छे अनिकाल तला। चु चा कोला न्हसेला म्रिडम्हेमेदा कोला न्हबा धुइरी सहु खबारी छ्याइबा दुख हड्बान दुख तबारी छ्याइबा हिन्ना।

9 “तर थे धुइरी एनीगदे होशियार तउ। तिग्दा भिसम म्हिगदेसे एनीगदेदा अदालतरी ओच्छे यहूदीगदे हुप तबा दिमरी भोर्सी तोबा ग्याड्बा लला। ओच्छे थेनीगदेसे एनीगदेदा डादा विश्वास लबा ताम उन्बाला लागिरी अञ्चलाधीशदेन ग्लेला डाचछापट्टि रापुड्ला। 10 थे भन्दा डाचछा जम्मान यहुलदा थार्बा पिन्बा समाचार थे:ना लतो:बा मुला। 11 म्हिगदेसे एनीगदेदा चुड्सी भोर्सी मुद्दा युबा धुइरी एनीगदेसे तिग पाड्तो:ला भिसी धन्दा सुर्दा थालउ। तर थे धुइरी परमेश्वरसे तिग पाड्गो भिबा चीम थेनोन पाड्गो। तिग्दा भिसम थे धुइरी पाड्बा एनीगदेसे आहिन तर परमेश्वरला आत्मासे हिन्ना।*

12 “हाडलान ज्योज्यो आलेसे हाडलान ज्योज्यो आलेदा साडपुड्ला। थेहड् लसीन आबासे कोलागदेदा साडपुड्ला ओच्छे कोलागदेसे आबा आमादा बिरोधरी लसी साडपुड्ला। 13 ओच्छे डादा विश्वास लबासे लमा एनीगदेदा जम्मान म्हिगदेसे हेला लला। तर जुन म्हिसे जस्तोन दुख तसैनोन हाड आसितेधोना डादा विश्वास लबा आख्ला थेसे थार्बा याड्ला।*

लोड्बा खबा धुइ

मत्ती २४:१५-२८; लूका २१:२०-२४

* 13:11 मत्ती १०:१७-२०; लूका १२:११-१२ * 13:13 मत्ती १०:२२

14 “परमेश्वरला मन्दिरला चोखो ग्लारी नइबा खबा सहे म्राड्ला।” चुला अर्थ चा पढब लबा म्हिसे घोगै। “थे धुइरी यहूदिया अञ्चलरी मुबा म्हिगदे गडरीक्यार यागै।* 15 ओच्छे तलाथोरी मुबा म्हिगदे हाडला सामान किन्बारी मार फाप्सी दिम न्हडरी थावाड्गो।* 16 बु वारीरी मुबागदे हाडला घ किन्बारी दोःसी दिमरी थानिउ। 17 थे धुइरी जिउ नहीला म्रिडम्हेमेदेन कोलादा डहे ख्वाबा आमागदेदा इन गाते ल्हानान दुख तला! 18 चु ताम खड्बा लारी आतगै भिसी प्रार्थना लउ। 19 तिग्दा भिसम थे धुइरी तबा घेन दुख परमेश्वरसे चु जम्बुलिड स्होमाहेनसे दान्देधोना तबा आरे ओच्छे लिच्छाएनोन खाइमै तसेला आरे।* 20 चुदे परमेश्वरसे थे धुइ तुन्ना आलबा हिन्सम खालै म्हिसेन थाबा आयाड्सेला मुबा। तर हाडसे धम्बा म्हिगदेला लागिरी परमेश्वरसे थे धुइ तुन्ना लबा मुला।

21 “थे धुइरी खालैसे एनीगदेदा ‘च्यागो, थाबा पिन्बा ख्रीष्ट चुरी मुला,’ अथवा ‘थेरी मुला,’ भिजी भिसम एनीगदेसे थेनीगदेला ताम पत्याब थाचउ। 22 तिग्दा भिसम फट्टा ख्रीष्टगदेदेन फट्टा अगमवक्तागदे थोन्ना। ओच्छे थेनीगदेसे खम्तेधोना परमेश्वरसे धम्बा म्हिगदेदा डुक्याब लबाला लागिरी उदेकला चिनुगदेदेन उदेकला गेगदे लसी उन्ना। 23 तर एनीगदे चा होशियार लसी चिउ। डाइ एनीगदेदा जम्मान ताम डाच्छाहेनसेन पाड्सी पिन्बा मुला।

प्रभु येशू फेख्वा धुइ

मत्ती २४:२९-३१; लूका २१:२५-२८

24 “थे दुखला धुइ जिन्माहेनसे

धिनीसे य्हाल पिन्बा खलाला

ओच्छे लनीला य्हाल म्हाला।*

25 जमाहेनसे मुला शक्तिगदे याडयोड तसी

सुक्र सार जम्मान ताइला।*

26 जमाहेनसे म्हिगदेसे परमेश्वरसे पुइखबा म्हिदा घेन शक्तिदेन य्हाल य्हालरी खसुरी खबान लबा म्राड्ला।* 27 ओच्छे थेसे स्वर्गदूतगदेदा जम्बुलिडदेन मुला जम्मान ग्लारी पुइला। जमाहेनसे थे स्वर्गदूतगदेसे परमेश्वरसे धम्बा जम्मान म्हिगदेदा ग्ला गिकरी पोप लला।”

अञ्जीरला दोड च्यासी लोप्तोःबा ताम

मत्ती २४:३२-३५; लूका २१:२९-३३

28 येशूसे थेनीगदेदा दोःसी चुहड् भिसी सुड्जी, “एनीगदेसे अञ्जीरला दोडदा च्यासी थेग्याम तिगै ताम लोपगो। थेला हाँगागदेरी भा भुमैछ्याम छेपबा छबा ला वाड्जी भिसी एनीगदेसे था याड्मुला।

29 थेहड् लसीन डाइ पाड्बा तामगदे तबा म्राड्माहेनसे परमेश्वरसे पुइखबा म्हि खबा धिन खसी जिन्जी भिबा ताम एनीगदेसे था याड्गो। 30 च्यागो, एनीगदेसे डाला ताम ड्यान्गो, चु जम्मान ताम पूरा आततेधोना दान्देला म्हिगदे आसि। 31 मुदेन जम्बुलिड म्हासी निसैनोन डाला बचन खाइमै आम्हा।

होशियार तसी चितोःबा

मत्ती २४:३६-४४

32 “थे दुखला धिनदेन धुइ खाइमा खला भिसी स्वर्गदूतदाएनोन था आरे ओच्छे डा परमेश्वरला झादाएनोन था आरे। थे ताम परमेश्वर आबादा जे था मुला। 33 थेतबासेलमा एनीगदे होशियार तसी छोर्सी चिउ। ओच्छे प्रार्थना लउ, तिग्दा भिसम थे धुइ खाइमा खला भिसी एनीगदेदा था आरे।

34 “चु ताम चा मालिकसे हाडला दिम च्याबा म्हिदा क्यारमार ज्यना लसी च्यागो, ओच्छे नोकरगदेदाएनोन हाड हाडला गे ज्यना लसी लउ भिसी कुल्सी हाड चा विदेशरी निबा हड्बान हिन्ना।* 35 थेतबासेलमा एनीगदे छोर्सी चिउ, तिग्दा भिसम मालिक खाइमा खला भिसी एनीगदेदा था आरे। थे ड्यसे खखम्ला, म्हुन गुडरी खखम्ला, नागा क्राबा धुइरी खखम्ला, स्य्होरीनोन खखम्ला

* 13:14 दानि ९:२७; ११:३१; १२:११ * 13:15 लूका १७:३१ * 13:19 दानि १२:१; उन्बा ७:१४ * 13:24 यशै १३:१०; इज ३२:७; योए २:१०, ३१; ३:१५; उन्बा ६:१२ * 13:25 यशै ३४:४; योए २:१०; उन्बा ६:१३ * 13:26 दानि ७:१३; उन्बा १:७ * 13:34 लूका १२:३६-३८

खजिबै धुइरीनोन थे खखम्ला। ³⁶ तर एनीगदेदा था आपिन्ना तिक्खुरीन खमा एनीगदेदा म्हैर्सी चिबा स्याप्ला। ³⁷ थेतबासेलमा एनीगदे छोर्सी चिउ, डाइ एनीगदेदा पाड्बा चु ताम जम्मादान पाड्बा मुला।”

14

येशूदा साइबारी सल्लाह लबा

मत्ती २६:१-५; लूका २२:१-२; यूहन्ना ११:४५-५३

¹ मिश्र यहूल्साग्याम फेसी खबा धिनदा ढन्सी धड्बा चाडदेन खमीर आयुना गेड चसी धड्बा चाडला न्हीरे डाच्छाकुनु परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे येशूदा चुड्सी साइबारी दाउ च्यासी भ्रमुबा।* ² तिग्दा भिसम “यहाडला चाडला धुइरी चा चुड्बारी आत। चाडला धुइरी चुड्जी भिसम म्हिगदेसे हुल दडगा लला” भिसी थेनीगदे हाड हाड न्हडरी ताम लजी।

येशूदा अत्तर फोर्बा

मत्ती २६:६-१३; यूहन्ना १२:१-८

³ येशू बेथानिया भिबा नाम्साला कोरे खबा सिमोनला दिमरी सोल छ्योइवान लबा धुइरी म्रिडम्हेमे गिकसे सिड्गमरमरला ताडरी ल्हानान महंगो खाल्ला अत्तर भसी खजी। थे अत्तर जटामसी भिबा दोडला टाग्याम सहोबा मुबा। थेसे थे ताडनोन थिसी येशूला थोबोरी युजी।* ⁴ थेसे चुहड् लबा म्राड्सी स्यहान्दो म्हिगदेसे नाआखम्ना “चुदे महंगो अत्तर ओहड्णोन तिग्दा खेरो भ्याड्बा” भिसी हाड हाड न्हडरी ताम लजी। ⁵ बरु चु चुड्सी खबा टाडगा प्राडबोगदेदा पिन्सै तसेला। चु चुड्सम ग्यार्जा सोम म्हुइला डबल खसेला मुबा” चुहड् लसी थे म्रिडम्हेमेदा थेनीगदेसे बड्जी।

⁶ तर येशूसे थेनीगदेदा चुहड् भिसी सुड्जी, “थालउ, एनीगदेसे तिग्दा चुदा कचकच लबा? चुसे मी डाला लागिरी ज्यबा गे लबा मुला। ⁷ च्यागो, प्राडबोगदे मी सदन एनीगदेदेन छ्याम तला। ओच्छे एनीगदेसे थेनीगदेदा खजिबै धुइरी ह्यो लखम्ला। तर डा मी सदन एनीगदेदेन छ्याम आत।* ⁸ चु म्रिडम्हेमेसे जे लखम्जी, थेनोन थेसे लजी। डाला ल्हुइ धुर्सारी थान्बाला लागिरी चुसे अत्तर फोर्सी डाच्छान ठीक लबा मुला। ⁹ च्यागो, एनीगदेसे डाला ताम ड्यानगो, जम्बुलिडला जुन जुन ग्लारी थार्बा पिन्बा समाचार थे:ना लला, थे, थे ग्लारी चु म्रिडम्हेमेसे लबा गे ढन्बाला लागिरी थेला ताम लला।”

यहूदा इस्करियोतसे लबा सल्लाह

मत्ती २६:१४-१६; लूका २२:३-६

¹⁰ जमाहेन्से येशूला च्युक न्ही चेलागदे न्हडला यहूदा इस्करियोत भिबा चेला गिक परमेश्वरला मन्दिररी पूजा लबा मुल म्हिगदे मुबा ग्लारी निसी येशूदा चुड्सी पिन्ना भिसी सल्लाह लजी। ¹¹ चु ताम थे:सी परमेश्वरला मन्दिररी पूजा लबा मुल म्हिगदे ल्हानान ताड्सी यहूदा इस्करियोतदा टाडगा पिन्ना भिसी कबुल लजी। थे धुइहेन्से थेसे येशूदा चुड्सी पिन्बाला लागिरी दाउ च्यासी भ्रजी।

येशूसे भोज तयार लउ भिसी कुल्बा

मत्ती २६:१७-२५; लूका २२:७-१४, २१-२३; यूहन्ना १३:२१-३०

¹² खमीर आयुना गेड चसी धड्बा चाडला शुरुला धिनकुनु यहूदीगदेसे ग्यु बोगो फुलतो:मुबा। येशूला चेलागदेसे येशूदा “हाडला लागिरी डन्से मिश्र यहूल्साग्याम फेसी खबा धिनदा ढन्सी धड्बा चाडला भोज खानड ठीक लउ?” भिसी ड्योइजी।

¹³ येशूसे हाडला चेला न्हीदा “एनीगदे शहररी निउ, एनीगदेसे थेरी दर्बुडरी क्युइ पुड्सी निबा म्हि गिकदा स्याप्ला। थेनोन महिला लिच्छा लिच्छा निउ। ¹⁴ ओच्छे थे म्हि जुन दिमरी वाड्ला, थेनोन दिमला धनीदा ‘डाइ डाला चेलागदेदेन छ्याम चिसी मिश्र यहूल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला?’ भिसी गुरुसे ड्योइबा मुला भिउ। ¹⁵ एनीगदेदा थेसे

* 14:1 प्रस्था १२:१-२७ * 14:3 लूका ७:३७-३८ * 14:7 वयव १५:११

डाचूछान जेना लसी थान्बा तलाथोला घेन कोठा उन्सी पिन्ना। एनीगदेसे थेरीन य्हाडला लागिरी भोज ठीक लउ” भिसी कुल्जी।

16 जमाहेन्से चेलागदे शहररी निबान लबा धुइरी येशूसे सुड्बा हड्ढोन स्यापजी। ओचूछे थेनीगदेसे थेरीन मिश्र य्हुल्साग्याम फेसी खबा धिनदा ढन्सी धड्बा चाडला भोज ठीक लजी। 17 ओचूछे ड्यसे तमाहेन्से येशू हाडला च्युक न्ही चेलागदेदेन छ्याम फेपूखजी। 18 भोज सोल्बान लबा धुइरी येशूसे हाडला चेलागदेदा “च्यागो, एनीगदेसे डाला ताम ड्यान्गो, एनीगदे न्हडला डादेन छ्यामनोन चबा गिकसे डादा म्हिगदेला यारी जिम्मा पिन्ना” भिसी सुड्जी।*

19 चु ताम थे:माहेन्से चेलागदेदा दुख ड्हम्सी, “थे म्हि डानोन हिन्ना?” भिसी पालो पालो लसी येशूदा ड्योइजी।

20 येशूसे थेनीगदेदा “एनीगदे च्युक न्ही न्हडला गिकसे खार्बारी डादेन छ्यामनोन गेड तुइसी चबान मुला। 21 परमेश्वरला बचनरी भिबा हड्ढोन परमेश्वरसे पुइखबा म्हि मी सिनोन तो:ला। तर जुन म्हिसे परमेश्वरसे पुइखबा म्हिदा चुड्सी महिला यारी जिम्मा पिन्ना, थेसे परमेश्वरग्याम खाहड्बा लोड्बा खबा सजाय याडला। बरु थे मी न्हनोन आन्हबा हिन्सम ज्यबा तसेला मुबा” भिसी सुड्जी।

प्रभु भोज

मत्ती २६:२६-३०; लूका २२:१५-२०; १ कोरिन्थी ११:२३-२५

22 थेनीगदेसे चबान लबा धुइरी येशूसे यारी गेड किन्सी परमेश्वरदा धन्यवाद पिन्बान प्रार्थना लजी। ओचूछे गेड क्युइसी चेलागदेदा पिन्बान, “ना! चु डाला ल्हुइ हिन्ना” भिसी सुड्जी। 23 जमाहेन्से येशूसे खोरेरी मुबा अडगुरला निडगु थोसी परमेश्वरदा धन्यवाद पिन्सी चेलागदेदा पिन्जी। ओचूछे थेनीगदेसे थे खोरेग्याम थुड्जी। 24 जमाहेन्से येशूसे थेनीगदेदा “चु ल्हानान म्हिगदेला लागिरी बगब तबा डाला का हिन्ना। डाला कानोन परमेश्वरसे म्हिगदेदा लबा छार कबुल हिन्ना।* 25 ‘च्यागो, एनीगदेसे डाला ताम ड्यान्गो, परमेश्वरला य्हुल्सारी अडगुरला छार निडगु थुड्बा धुइ आखतेधोना डाइ चु अडगुरला निडगु आथुड्’ भिसी सुड्जी।” 26 ओचूछे थेनीगदे परमेश्वरदा धन्यवादला व्हाइ गिक गोसी जैतून भिबा गडरीक्यार भ्रजी।

पत्रुससे येशूदा खलाला भिसी पाड्बा ताम

मत्ती २६:३१-३५; लूका २२:३१-३४; यूहन्ना १३:२६-३८

27 येशूसे हाडला चेलागदेदा चुहड् भिसी सुड्जी, “एनीगदे जम्मासेन डादा खलासी यार्ला। तिग्दा भिसम परमेश्वरला बचनरी

‘डाइ गोठालोदा साइला

ओचूछे ग्युगदे ससा बडबड तसी यार्ला’ भिसी भिबा मुला।*

28 तर डादा सिबाग्याम सोना लमाहेन्से एनीगदे भन्दा डाचूछा डा गालीलरी निला।”*

29 येशूसे चुहड् सुड्मैछ्याम पत्रुससे येशूदा “जम्मासेन हाडदा खलासी यार्लेनोन डाइ हाडदा खाइमै आखला” भिसी भिजी।

30 येशूसे पत्रुसदा “च्यागो, एसे डाला ताम ड्यान्गो, न्हडगर स्य्होरी न्हीरेम नागा क्राबा भन्दा डाचूछा एसे सोमरेमधोना डा येशूदेन छ्याम भ्रबा म्हि हिन्नोन आहिन भिसी भिला” भिसी सुड्जी।

31 तर पत्रुससे, “आहिन, डा हाडदेन छ्याम सितो:सैनोन डाइ हाडदा आखला” भिसी भिजी। ओचूछे स्य्हान्दो चेलागदेसेनोन थेहड्ढोन भिजी।

गेतसमनी भिबा ग्लारी येशूसे लबा प्रार्थना

मत्ती २६:३६-४६; लूका २२:३९-४६

32 जमाहेन्से थेनीगदे गेतसमनी भिबा ग्लारी फेपूजी। ओचूछे येशूसे हाडला चेलागदेदा “डाइ प्रार्थना लतेधोना एनीगदे चुरीन चिउ” भिसी सुड्जी। 33 येशूसे पत्रुस, याकूबदेन यूहन्नादा हाडदेन छ्याम भोर्जी।

* 14:18 भजन ४१:९ * 14:24 प्रस्था २४:८; यर्मि ३१:३१-३४ * 14:27 जक १३:७ * 14:28 मत्ती २८:१६

ओच्छे येशूला सेम भोल्सी ल्हानान दुख तबारी छ्याइजी। ³⁴ ओच्छे येशूसे थेनीगदेदा “डाला सेम क्रोसी डा सिबा तेबान तबा मुला। थेतबासेलमा एनीगदे चुरीन डा हड लसी छोर्सी चिउ” भिसी सुड्जी। ³⁵ जमाहेन्से येशू जजाकी क्वाथाड फेप्सी सरी ख्लुप तसी, “डाथोरी खबारी छ्याइबा चु दुख तसम डाइ नाआतो:गै” भिसी प्रार्थना लबारी छ्याइजी। ³⁶ येशूसे चुहड् भिसी प्रार्थना लजी, “आबा, हाडसे लआखम्बा ताम तिगै आरे, थेतबासेलमा तसम डादा चु दुखग्याम फेसी पिन्गो। तर डाइ म्हन्बा अनछार आहिन, हाडसे म्हन्बा अनछार तगै।”

³⁷ जमाहेन्से येशू हाडला चेला सोम मुबा ग्लारी दो:सी फेप्खमा थेनीगदे म्हेर्सी चिबा स्यापजी। येशूसे पत्रुसदा चुहड् भिसी सुड्जी, “सिमोन, तिग ए म्हेर्सी चिबा? ए घण्टा गिक सुत्तै छोर्सी चिआखमनी? ³⁸ दाहेन्से एनीगदे पापरी फसब आतबाला लागिरी छोर्सी प्रार्थना लसी चिउ। च्यागो, एनीगदेला आत्मा मी तयार मुला, तर ल्हुइ चा कमजोर मुला।”

³⁹ येशू दो:सी तिरेम थे ग्लारी फेप्सी डाच्छाला हड लसीन प्रार्थना लजी। ⁴⁰ ओच्छे चेलागदे मुबा ग्लारी दो:सी फेप्खमा चेलागदे म्हेर्सी चिबा स्यापजी। म्हेर्बा खबासे लमा थेनीगदेसे मीनोन ठोड्आखमनी, ओच्छे तिग भितो:बा थे थेनीगदेदा था आतनी।

⁴¹ येशू सोमरेमला पालोरी फेप्खसी चेलागदेदा चुहड् भिसी सुड्जी, “अझन एनीगदे म्हेर्सी ब्लपबा न्हबान मुला? दाहेन्से म्हेर्बा धुइ निजी। च्यागो, परमेश्वरसे पुइखबा म्हिदा चुड्सी पापीगदेला यारी जिम्मा पिन्बा धुइ तसी जिन्बा मुला। ⁴² रे:गो, निइ! च्यागो, डादा स्य्हान्दोला यारी जिम्मा पिन्बा म्हि खसी जिन्बा मुला।”

येशूदा चुड्बा

मत्ती २६:४७-५६; लूका २२:४७-५३; यूहन्ना १८:३-१२

⁴³ येशूसे चु ताम सुड्मैछ्याम च्युक न्ही चेलागदे न्हडला यहूदा भिबा चेलादेन छ्याम कडीदेन तरवार थोबा महिला हुल धोखजी। थेनीगदेदा परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे यहूदी गन्बागदेसे पुइखबा मुबा। ⁴⁴ येशूदा चुड्बारी खबा म्हिगदेदा यहूदासे “जुन म्हिदा डाइ च्योक लला, थेनोन येशू हिनना, थेदा चुड्सी क्युर लसी भोर्गो” भिसी पाड्बा मुबा। ⁴⁵ ओच्छे यहूदा येशू मुबा ग्लारी सरासर निसी, “गुरु” भिसी येशूदा च्योक लजी। ⁴⁶ जमाहेन्से थेनीगदेसे येशूदा चुड्सी खीसी भोर्जी। ⁴⁷ तर थेरी राप्सी चिबा गिकसे तरवार ते:सी परमेश्वरला मन्दिररी पूजा लबा मुल महिला नोकरला नाब्यड च्वाट्टन थाजी।

⁴⁸ येशूसे थेनीगदेदा “एनीगदे तिग्दा यहूदा चुड्बारी खबा हड लसी कडी तरवार थोसी खबा? ⁴⁹ खाइ, डाइ एनीगदेला गुडरी म्हिगदेदा धिन धिननोन परमेश्वरला मन्दिररी लोप्सी चिबा धुइरी एनीगदेसे डादा आचुड्नी। तर परमेश्वरला बचनरी भिबा अनछार पूरा तगै भिसीन चुहड् तबा हिनना” भिसी सुड्जी।* ⁵⁰ जमाहेन्से चेलागदे जम्मासेन येशूदा ख्लासी यार्जी।

⁵¹ तर सुतिला क्वान क्वान्बा भ्योन गिक येशूला लिच्छा लिच्छा भ्रबान मुबा। थेनीगदेसे थेदाएनोन चुड्जी। ⁵² ओच्छे थेनीगदेसे थेदा चुड्मा थेला क्वान जे स्यापजी। तर थे म्हि हाडला क्वाननोन ख्लासी लिगन्डीन यार्जी।

येशूदा यहूदीगदेला सभारी भोर्बा

मत्ती २६:५७-६८; लूका २२:५४-५५, ६३-७१; यूहन्ना १८:१३-१४, १९-२४

⁵³ जमाहेन्से येशूदा परमेश्वरला मन्दिररी पूजा लबा मुल म्हि मुबा ग्लारी भोर्जी। थेरी पूजा लबा म्हिगदेदेन यहूदी गन्बागदे ओच्छे यहूदी धर्मगुरुगदेएनोन पोप तबा मुबा। ⁵⁴ ओच्छे पत्रुस चा येशूला जजाकी लिच्छा लिच्छा निसी परमेश्वरला मन्दिररी पूजा लबा मुल महिला दिमला ख्राडगाधोना निजी, ओच्छे पालेगदेदेन छ्याम मे दूसी चिजी।

* 14:49 लूका १९:४७; २१:३७

55 जमाहेन्से परमेश्वरला मन्दिररी पूजा लबा मुल म्हिगदेदेन यहूदी सभाला जम्मान म्हिगदेसे येशूदा साइबाला लागिरी प्रमाण म्हाइबारी छ्याइजी। तर थेनीगदेसे तिगै प्रमाण आस्यूपनी। 56 थेरी ल्हानान म्हिगदेसे येशूला बिरोध लसी लुसीला ताम लजी। तर खालैला ताम आढिकनी।

57 जमाहेन्से कोइ कोइ म्हिगदे रेःसी येशूला बिरोध लबान चुहड् भिसी लुसीला ताम पाड्बारी छ्याइजी, 58 “चु म्हिसे ‘डाइ म्हिसे सहोबा चु परमेश्वरला मन्दिरदा फुप्सी सोमरेरीन म्हिसे आसहोबा परमेश्वरला मन्दिर सहोला भिसी चुसे भिबा डन्से थेःबा मुला।’” * 59 ओते लसैनोन थेनीगदेला ताम आढिकनी।

60 परमेश्वरला मन्दिररी पूजा लबा मुल म्हिगदे जम्मान म्हिगदेला डाच्छापट्टि राप्सी येशूदा “एसे तिग्दा जोहाब आपिन्बा? चु म्हिगदेसे एला बिरोधरी पाड्बा तामला बारेरी एदा तिगै पाड्सेला आरे?” भिसी ड्योइजी। 61 तर येशूसे तिगै जोहाब आपिन्ना कुटिसी स्यूहूजी। परमेश्वरला मन्दिररी पूजा लबा मुल म्हिसे येशूदा दोःसी, “तिग ए परमेश्वरला झा थार्बा पिन्बा ख्रीष्ट हिनना?” भिसी ड्योइमा, 62 “डा हिनना, परमेश्वरसे पुइखबा म्हिदा हाडनीसे शक्तिशाली परमेश्वरला दाहिने छ्यापट्टि चिबादेन स्वर्गग्याम खसुरी खबान लबा म्हाइला” भिसी येशूसे सुड्जी।*

63 चु ताम थेःसी परमेश्वरला मन्दिररी पूजा लबा मुल म्हिसे हाडला क्वान डेबान, “दाहेन्से य्हाडदा अर्गु प्रमाण तिग्दा तोःजी?” भिसी भिजी। 64 “चुसे हाडसे हाडदान परमेश्वर सहोसी पाड्बा ताम य्हाडसे थेःनोन थेःजी, दाहेन्से एनीगदेला तिग बिचार मुला?” भिमा, थेरी मुबा जम्मान म्हिगदेसे “चु म्हि साइनोन तोःबा म्हि हिनना” भिसी भिजी।*

65 थेरी मुबा म्हिगदे न्हडला कोइ कोइ म्हिगदेसे येशूदा थो स्वाबारी छ्याइजी। ओच्छे येशूला मी घप्सी तोबान, “लु, अगमवाणी पाड्गो” भिसी ड्योइजी। जमाहेन्से थेरी मुबा स्यूहान्दो सिपाहीगदेसेनोन येशूदा तोबारी छ्याइजी।

पत्रुससे डा येशूला चेला आहिन भिसी पाड्बा

मत्ती २६:६९-७५; लूका २२:५६-६२; यूहन्ना १८:१५-१८, २५-२७

66 पत्रुस खाडगारी चिबान लमा परमेश्वरला मन्दिररी पूजा लबा मुल महिला नोकरस्या गिक पत्रुस मुबा ग्लारी खजी। 67 ओच्छे पत्रुसदा मे दूबान लबा म्हाइसी थे नोकरस्यासे “एएनोन नासरतला येशूदेन छ्यामनोन मुबा आहिन?” भिसी ड्योइमा, 68 “एसे खाल्ला ताम लबा, डादा तिगै था आरे” भिसी पत्रुस खाडगाला म्हापरीक्यार निजी। थे धुइरी नागा क्राजी।

69 पत्रुसदा म्हापरी चिबान लबा म्हाइसी दोःसी थे नोकरस्यासे स्यूहान्दो म्हिगदेदा “चु म्हि मी येशूला चेला हिनना” भिसी भिजी। 70 पत्रुससे दोःसी आहिन भिसी भिजी। जजाकी लिच्छा दोःसी थेरी राप्सी चिबा म्हिगदेसे पत्रुसदा “पक्कान, ए येशूला चेला हिनना। तिग्दा भिसम ए गालीलला म्हि हिनना” भिसी भिजी।

71 पत्रुससे दोःसी, “डाइ लुसीला ताम पाड्बा हिनसम परमेश्वरला सजाय डाथोरी खइ भिसी घान फाबान हाडसे भिबा म्हिदा डाइ डोसेबा आरे” भिसी भिजी।

72 पत्रुससे थेहड् भिमैछ्याम दोःसी नागा क्राजी। “न्हीरेम नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी येशूसे सुड्बा ताम ढन्सी पत्रुस घ्वाँ घ्वाँ क्राजी।

15

येशूदा पिलातसला डाच्छापट्टि भोर्बा

मत्ती २७:१-२, ११-२६; लूका २३:१-३, १८-२५; यूहन्ना १८:२८-४०; १९:१६

1 स्यूहोरीन परमेश्वरला मन्दिररी पूजा लबा मुल म्हिगदेदेन यहूदी गन्बागदे ओच्छे थेरी मुबा यहूदी धर्मगुरुगदेदेन छ्याम जम्मान म्हिगदे सल्लाह लजी। ओच्छे थेनीगदेसे येशूदा खीसी पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी।

* 14:58 यूह २:१९ * 14:62 दानि ७:१३ * 14:64 लेवी २४:१६

2 जमाहेन्से पिलातससे येशूदा “तिग ए यहूदीगदेला ग्ले हिन्ना?” भिसी ड्योइमा, येशूसे “थे मी हाडसेन सुड्बा मुला” भिसी जोहाब पिन्जी। 3 परमेश्वरला मन्दिररी पूजा लबा मुल म्हिगदेसे येशूदा ल्हानान तामरी दोष लबाला लबान लजी। 4 थेतबासेलमा पिलातससे येशूदा दोःसी, “एला तिगै जोहाब आरे? च्यागो, थेनीगदेसे एला बिरोध लसी एदा ल्हानान दोष लबान मुला” भिसी भिजी। 5 तर येशूसे तिगै जोहाब आपिन्नी। चु म्नाड्सी पिलातस उदेक तजी।

6 मिश्र यहुल्साग्याम फेसी खबा धिनदा ढन्सी धड्बा चाडला धुइरी पिलातससे म्हिगदेसे धम्बा झ्याल्खानरी मुबा म्हि गिकदा पुडमुबा। 7 थे धुइरी बारब्बा भिबा आज्यबा गे लबा म्हि गिक झ्याल्खानरी मुबा। थेसे आन्दोलनरी म्हि साइबा मुबा। 8 ओच्छे महिला हुल खसी पिलातसदा “निबा दिडरी हड् चु पाल्सेनो झ्याल्खानरी मुबा म्हि गिकदा पुड्सी पिन्गो” भिसी भिजी। 9 म्हिगदेसे चुहड् भिमाहेन्से पिलातससे “डाड चु यहूदीगदेला ग्लेदा ख्लासी पिन्गै भिसी एनीगदेसे म्हन्बा मुला?” भिसी ड्योइजी। 10 तिग्दा भिसम परमेश्वरला मन्दिररी पूजा लबा मुल म्हिगदेसे डाह लसी येशूदा डा मुबा ग्लारी भबा हिन्ना भिबा ताम पिलातसदा था मुबा।

11 तर परमेश्वरला मन्दिररी पूजा लबा मुल म्हिगदेसे स्य्हान्दो म्हिगदेदा थीसी, “येशूदा आहिन, बारब्बादा ख्लासी पिन्गो!” भिपुड्जी। 12 ओच्छे पिलातससे “चु यहूदीगदेला ग्ले भिबा म्हिदा डाड तिग लउ?” भिसी ड्योइमा, 13 “चुदा क्रुसरी टाँगब लसी साइगो!” भिसी यहूदीगदे क्रिड्बारी छ्याइजी।

14 पिलातससे “तिग्दा? चुसे थेहड्बा आज्यबा गे तिग लबा मुला?” भिसी ड्योइजी।

तर थेनीगदेसे झन क्रिड्बान, “चुदा क्रुसरी टाँगब लसी साइगो” भिसी भिजी।

15 पिलातसदा थे महिला हुलदा ताड्ना लबा सेम मुबा। थेतबासेलमा थेसे बारब्बादा पुइजी। तर येशूदा चा कोर्से तोसी क्रुसरी टाँगब लसी साइबाला लागिरी रोमी सिपाहीगदेदा जिम्मा पिन्जी।

सिपाहीगदेसे येशूदा खिसी लबा

मत्ती २७:२७-३१; यूहन्ना १९:२-३

16 जमाहेन्से सिपाहीगदेसे येशूदा सिपाहीगदेला हाकिम चिबा प्रेटोरियन भिबा दिम न्हडरी भोजी। ओच्छे जम्मान सिपाहीगदेदा ड्योइजी। 17 ओच्छे थेनीगदेसे ग्लेला हड्बान वाला वाला पिड्गै छोनना क्वान क्वान्सी पिन्जी। ओच्छे थेनीगदेसे पुजुला फेटा सहोसी येशूदा थोइसी पिन्जी। 18 जमाहेन्से थेनीगदेसे येशूदा “लाससो यहूदीगदेला ग्ले, फ्याफुल्ला” भिबान सलाम लजी। 19 ओच्छे थेनीगदेसे येशूदा थो स्वाबान माला कडीसे थोबोरी तोसी फ्या लजी। 20 थेहड् लसी येशूदा खिसी लमाहेन्से थेनीगदेसे थे वाला वाला पिड्गै छोनना क्वान स्युसी पिन्जी। ओच्छे येशूदा थेलान क्वान क्वान्सी क्रुसरी टाँगब लसी साइबारी भोजी।

येशूदा क्रुसरी टाँगब लबा

मत्ती २७:३२-४४; लूका २३:२६-४३; यूहन्ना १९:१७-२७

21 थेनीगदेसे येशूदा भोर्बान लबा धुइरी कुरेनी भिबा ग्लाला सिमोनदा खबान लबा स्यापुजी। थे अलेक्जेन्डरदेन रूफसला आबा मुबा। जमाहेन्से सिपाहीगदेसे थेदा कर लसी येशूला क्रुस पुड्पुड्जी।* 22 ओच्छे थेनीगदेसे येशूदा गलगथा भिबा ग्लारी भोजी। गलगथा भिबा चा “खप्परला ग्ला” हिन्ना। 23 गलगथारी धोमाहेन्से थेनीगदेसे येशूदा अडगुरला निडगुरी लठेब तबा मना युसी पिन्जी। तर येशूसे थे आसोल्नी। 24 जमाहेन्से थेनीगदेसे येशूदा क्रुसरी टाँगब लजी। ओच्छे थेनीगदेसे येशूला क्वान भो लसी खाल्दा खजिबा परब तबा चीम भिसी हाड हाड न्हडरी चिट्टा युजी।*

25 येशूदा क्रुसरी टाँगब लबा धुइरी स्य्होला नौ बजब तमुबा। 26 येशूदा दोष लबा तामरी “चु यहूदीगदेला ग्ले” भिसी भिबा मुबा। 27 थेनीगदेसे येशूदा क्रुसरी टाँगब लबा धुइरी यहो न्हीदाएनोन

* 15:21 रोमी १६:१३ † 15:23 “लठेब तबा मन” ग्रीक बाइबलरी चुदा मूर् भिसी भिबा मुला। * 15:24 भजन २२:१८

गिकदा दाहिनेपट्टि गिकदा देब्रेपट्टि कुसरी टाँगब लजी। 28 परमेश्वरला बचनरी भिबा ताम चुहड् लसी पूरा तजी, “थेदा अपराधीगदेदा हड्‌नोन लजी।”†*

29-30 थेग्याम भ्रबा म्हिगदेसे थोबो य्होड्‌बान, “लु, परमेश्वरला मन्दिर फुप्सी सोमरेरीन दोःसी सहोला भिबा म्हि दान्दे एसे हाडसे हाडदान जोगब लउ, ओच्छे कुसग्याम मार फापुगो” भिसी येशूदा खिसी लजी।* 31-32 थेहड् लसीन परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसेएनोन थेनीगदे हाड हाड न्हडरी, “चुसे स्य्हान्‌दोदा चा जोगब लखमजी। तर हाडसे हाडदा चा जोगब लआखमनी। चु इस्राएलीगदेला ग्ले थार्बा पिन्बा ख्रीष्ट कुसग्याम मार फापुसी खगै, ओच्छे जे यहाडसे थेदा विश्वास लला!” भिसी ठट्टा लजी। ओच्छे येशूदेन छ्याम कुसरी टाँगब लबा म्हिगदेसेनोन येशूदा खिसी लजी।

येशू सिबा

मत्ती २७:४५-५६; लूका २३:४४-४९; यूहन्ना १९:२८-३०

33 धिनना बाह बजेहेन्से तीन बजेधोना यहूलसा नाडनोन धोपधोप तजी। 34 ड्यसे तीन बजेरीक्यार येशूसे घेन काइरी क्रिड्‌बान, “इलोइ इलोइ लामा सबखथनी?” भिसी सुड्‌जी। चु भिबा चा “डाला परमेश्वर, डाला परमेश्वर, हाडसे डादा तिगदा खलाबा?” भिबा हिन्ना।* 35 चुहड् लसी क्रिड्‌बा म्नाड्‌सी थेरी राप्सी चिबागदे न्हडरी कोइ कोइसे “च्यागो, चुसे मी एलियादा गा ड्योइबा चीम” भिसी भिजी। 36 ओच्छे थेनीगदे न्हडरी गिकसे चा यार्सी निसी अडगुरला कम्बा निडगुरी क्वानगेन ब्लुम्सी माला कडीरी खीसी येशूदा ख्वामा, “भ्रान्‌गो, भ्रान्‌गो, चुदा एलिया खसी कुसग्याम मार तेःला वा? च्यागो” भिसी भिजी।*

37 जमाहेन्से घेन काइरी क्रिड्‌सी येशूला सा निजी। 38 थेनोन धुइरी परमेश्वरला मन्दिर न्हडरी मुबा पर्दा हाडनोन तोरहेन्से मारधोना पख्ले न्ही तसी ठेजी।* 39 चुहड् लसी येशूला सा निबा म्नाड्‌सी थेरी कुसला डाच्छापट्टि राप्सी चिबा रोमी कप्तानसे “चु मी साँचिन परमेश्वरला झानोन चीम” भिसी भिजी।

40 थेरी कोइ कोइ म्रिड्‌म्हेमेगदेसे थारेडग्याम च्यासी चिबा मुबा। थेनीगदे न्हडरी मरियम मग्दलिनी, जजा याकूबदेन योसेफला आमा मरियम ओच्छे सलोमी मुबा। 41 येशू गालीलरी मुबा धुइरी थेनीगदे येशूला लिच्छा लिच्छा भसी येशूला सेवा लमुबा। ओच्छे थेरी यरूशलेमधोना येशूदेन छ्याम खबा ल्हानान म्रिड्‌म्हेमेगदेएनोन मुबा।*

येशूदा धुर्सारी थान्‌बा

मत्ती २७:५७-६१; लूका २३:५०-५६; यूहन्ना १९:३८-४२

42 चु धिन ब्लपबा न्हबा धिनना डाच्छाकुनु मुबा। 43 थे धिनकुनु ड्यसे अरिमाथिया भिबा शहरला योसेफ भिबा म्हि आलोड्‌नान पिलातस मुबा ग्लारी निसी येशूला लास हीजी। थे योसेफ यहूदी सभाला मुल सदस्या मुबा। थेएनोन परमेश्वरसे शासन लबा धुइ खला भिसी भ्रान्‌सी चिबा मुबा।

44 येशू सिजी भिबा ताम थेःसी पिलातस उदेक तजी। ओच्छे थेसे रोमी कप्तानदा हाड मुबा ग्लारी ड्योइसी येशू साँचिन सिबा हिन्ना कि आहिन भिसी ड्योइबा छार्बा लजी। 45 रोमी कप्तानसे येशू साँचिन सिबा हिन्ना भिमाहेन्से पिलातससे येशूला लास योसेफदा भोर्बारी पिन्जी। 46 योसेफसे ज्यबा खाल्ला सुतिला क्वान ग्लुसी भजी। ओच्छे येशूला लास कुसग्याम मार तेःसी थे सुतिला क्वानरी रिल्‌जी। थेग्याम येशूला लासदा भोर्सी युड्‌बाला पहरारी ठ्वाइसी सहोबा धुर्सा न्हडरी भोर्सी थान्‌जी। जमाहेन्से युड्‌बा ब्लिड्‌बान भसी धुर्साला म्नापरी थान्‌जी। 47 मरियम मग्दलिनीदेन योसेफला आमा मरियमसे येशूला लास थान्‌बा ग्ला च्यासी चिमुबा।

† 15:28 चु पदला ताम ल्हानान हड्‌बा ग्रीक बाइबलरी भिबा आरे। * 15:28 यशै ५३:१२ * 15:29-30 भजन २२:७; १०९:२५; मर्कु १४:५८; यूह २:१९ * 15:34 भजन २२:१ * 15:36 भजन ६९:२१ * 15:38 प्रस्था २६:३१-३३ * 15:41 लूका ८:२-३

16

येशू सिबाग्याम सोबा

मत्ती २८:१-८; लूका २४:१-१२; यूहन्ना २०:१-१०

१ बल्पबा न्हबा धिन निमाहेन्से थेनोन धिनकुनु ड्यसे मरियम मग्दलिनी, याकूबला आमा मरियमदेन सलोमीसे येशूला लासरी फोर्बाला लागिरी ज्यबा बासना खबा छ्युगु ग्लुजी। २ न्हडगरदड आइतवार स्यहोरी धिनी फेबा धुइरी थेनीगदे येशूदा थान्बा धुसारी निजी। ३ “यहाडदा थे धुसाला म्पारी मुबा युडबा खाल्से बलिङ्सी पिन्ना?” भिसी थेनीगदे ग्यामरीक्यार ताम लबान निजी। ४ तर धुसाला डाच्छापट्टि धोसी च्यामा, थे घेन युडबा डाच्छान बलिङ्सी थान्बा म्प्राङ्जी। ५ थेनीगदे धुसा न्हडरी वाङ्सी च्यामा, धुसाला दाहिनेपट्टि तार क्वान क्वान्सी चिबा भ्योन म्हि गिकदा म्प्राङ्जी। ६ च्प्राङ्सी थेनीगदे लोङ्जी। ७ तर थे भ्योन म्हिसे थेनीगदेदा “थालोङ्गो! क्रुसरी साइबा नासरतला येशूदा एनीगदेसे म्हाइबान मुला भिबा ताम डादा था मुला। थेदा सिबाग्याम सोना लसी जिन्बा मुला। येशू चुरी आरे। एनीगदेन खसी थेदा थान्बा ग्ला च्यागो। ८ दाहेन्से निसी थेला चेलागदेदा ओच्छे खास लसी पत्रुसदा ‘एनीगदे भन्दा डाच्छा येशू गालील अञ्चलरी फेप्वान मुला। थेसे सुडबा ह्ङ्गोन एनीगदेसे थेरी थेदा म्प्राङ्गला भिसी पाङ्सी पिन्गो’ ” भिसी भिजी। ९ जमाहेन्से थेनीगदे लोङ्सी फितफित धर्सी धुसाग्याम थोन्सी निजी। ओच्छे थेनीगदेसे च्पु ताम खालैदा आपाङ्नी। तिगदा भिसम थेनीगदे ल्हानान लोङ्गबा मुबा।

येशू चेलागदे मुबा ग्लारी फेप्वबा

मत्ती २८:९-२०; लूका २४:१३-५३; यूहन्ना २०:११-२३; मुल चेला १:४-११

९ आइतवार स्यहोरीन येशू सिबाग्याम सोमाहेन्से जम्मान भन्दा डाच्छा मरियम मग्दलिनी मुबा ग्लारी फेप्वजी। थे मरियमला ल्हुङ्ग्याम येशूसे गोर निस म्हड ताप्वबा मुबा।† १० जमाहेन्से मरियम मग्दलिनी येशूला चेलागदे मुबा ग्लारी निसी च्पु ताम थे:ना लजी। सेमरी ल्हानान दुख तसी थेनीगदे क्रासी चिबा मुबा। ११ येशू सोसी हाड मुबा ग्लारी फेप्वजी भिबा ताम मरियमसे थेनीगदेदा भिजी। तर थेनीगदेसे च्पु ताम पत्याब आतनी।

१२ जमाहेन्से चेला न्ही नाम्सारीक्यार निबान लबा धुइरी हाडला डाच्छापट्टि येशूदा अर्गुन रूपरी म्प्राङ्गी। १३ ओच्छे थेनीगदे स्यहान्दो चेलागदे मुबा ग्लारी निसी च्पु ताम थे:ना लजी। तर स्यहान्दो चेलागदेसे थेनीगदेला ताम पत्याब आतनी।

१४ जमाहेन्से येशू च्युक गिक चेलागदे चबान लबा धुइरी थेनीगदे मुबा ग्लारी फेप्वजी। ओच्छे थेनीगदेला सेम कोङ्गबादेन म्हिगदेसे येशू सिबाग्याम सोजी भिसी पाङ्गबा ताम विश्वास आलबासे लमा येशूसे थेनीगदेदा बङ्गी।

१५ येशूसे हाडला चेलागदेदा “एनीगदे जम्बुलिङ्गला जम्मान ग्लारी निसी जम्मान म्हिगदेदा परमेश्वरला यहलसाला समाचार थे:ना लउ।* १६ विश्वास लसी बपत्तिस्मा किन्बागदेसे थार्बा याङ्गला। तर विश्वास आलबा जतिसे चा परमेश्वरग्याम सजाय याङ्गला। १७ ओच्छे विश्वास लबा म्हिगदेदेन छ्याम च्पुहङ्गबा चिनुगदे तला थेनीगदेसे डाला मिनरी म्हडगदे ताप्ला, ओच्छे छार छार ग्योइरी ताम लला। १८ ओच्छे थेनीगदेसे पुख्री च्पुङ्गसैनोन, बिख थुङ्गसैनोन थेनीगदेदा तिगै आत। थेनीगदेसे आखम्बा म्हिगदेशोरी या थान्सी प्रार्थना लमाहेन्से थे म्हिगदे खम्ला” भिसी सुङ्गी।

येशू स्वर्गरी फेप्वबा

लूका २४:५०-५३; मुल चेला १:९-११

१९ च्पुहङ्ग लसी चेलागदेदेन छ्याम ताम लमाहेन्से प्रभु येशूदा स्वर्गरी भोर्जी। ओच्छे येशू परमेश्वरला दाहिने छ्यापट्टि मुल ठिरी धन्छ्याजी।* २० जमाहेन्से चेलागदे जम्मान ग्लारी निसी येशूला बारैरी

† 16:9 च्पु पदला ताम कोड कोड ग्रीक बाइबलरी आरे। * 16:15 मुल १:८ * 16:19 मुल १:९-११

पाडूसी भ्रजी। थेनीगदेदेन छ्याम तसी प्रभुसे गे लजी। ओच्छे थेनीगदेसे थेःना लबा तामदा प्रभुसे उदेकला गेग्याम चु हिन्ना चीम भिसी विश्वास तना लजी।

लूकासे भिबा थार्बा पिन्बा समाचार चु किताबला बारेरी पाङ्तो:मा

भिबा म्हि: येशूला मुल चेला पावलला हो लूकासे भिबा मुबा (२ तिमोथी ४:११)। थे अर्गु यहुलला म्हि हिन्ना ओच्छे थे डाक्टर मुबा (कलस्सी ४:१४)। थेसे मुल चेलागदेला गेला बारेरीनोन भिबा मुला (मुल चेला १:१-२)।

भिबा ग्ला: रोम शहररी भिबा मुबा।

भिबा साल: ओस्पन ईश्वी संवत् ६०-७० (विक्रम संवत् ११७-१२७) सालला गुडरी भिबा मुबा।

खाल्दा भिबा: येशूला बारेरी तबा तामगदे घोना लबाला लागिरी थियोफिलस भिबा म्हिदा भिबा हिन्ना।

चु थार्बा पिन्बा समाचाररी येशूला बारेरी चुहङ् लसी भिबा मुला, इस्राएलीगदेला गुडरी फेप्खला भिसी कबुल लबा थार्बा पिन्बा ग्लेदेन जम्मान यहुलला म्हिगदेदा सोना लबा येशू स्त्रीष्ट हिन्ना। थे दुख याङ्बा म्हिगदेदेन प्राङ्बो म्हिगदे ओच्छे जम्मान म्हिगदेदा थार्बा पिन्बा समाचार थे:ना लगै भिसी परमेश्वरला आत्माग्याम जम्बुलिङरी पुङ्खबा हिन्ना। चु थार्बा पिन्बा समाचाररी जम्मान खाल्ला दुखरी परब तबा म्हिगदेदा वास्ता लसी भिबा हिन्ना। चुरी ताङ्तो:बा तामगदे प्रसूटन प्राङ्मुला। पाङ्गोन तो:मा चुरी डाच्छाला अध्यायगदेरी येशू जम्बुलिङरी फेप्खबा ताम ओच्छे लिच्छापट्टिला अध्यायगदेरी चा येशू स्वर्गरी फेप्बा तामला बारेरी भिबा मुला।

येशू स्वर्गरी फेप्माहेन्से येशूदा विश्वास लबागदे ल्हानान बढब तबान निजी ओच्छे येशूला बारेरी ल्हानान ग्लारी थे:बान निबा तामगदे लूकासे “मुल चेलागदेला गे” भिबा किताबरी भिबा मुला।

मुल तामगदे

शुरुला ताम १:१-४

बपत्तिस्मा पिन्बा यूहन्नादेन येशू न्हबा ओच्छे येशू जजा मुबा धुङ्ला ताम १:५-२:५२

बपत्तिस्मा पिन्बा यूहन्नासे लबा गे ३:१-२०

येशूसे बपत्तिस्मा किन्बादेन शैतानसे येशूदा फसब लबारी म्हाङ्बा ३:२१-४:१३

येशूसे गालील अञ्चलरी लबा गे ४:१४-९:५०

येशू गालील अञ्चलहेन्से यरूशलेम शहरधोना फेप्बा ९:५१-१९:२७

यरूशलेम शहररी येशूला गे थुम्बा धुङ् १९:२८-२३:५६

येशू सिबाग्याम सोबादेन स्वर्गरी फेप्बा २४:१-५३

लूकासे भिबा थार्बा पिन्बा समाचार

लूकासे येशूला बारेरी भिबा

१ परमेश्वरसे डन्ना गुडरी लबा गेला बारेरी ल्हानान म्हिगदेसे भिबारी छ्याङ्बा मुला। २ डाच्छाहेन्सेन येशूसे लबा गेदेन लोप्बा ताम प्राङ्बा म्हिगदेसे डन्दा थे:ना लजी। ३ थेतबासेलमा माननीय थियोफिलस, डाङ्गोनोन डाच्छाहेन्सेन जम्मान ताम म्हाङ्सी घोबासे लमा हाङ्गला लागिरी मेलोसेन भिमा ज्यबा तला भिसी म्हन्जी। ४ तिगदा भिसम हाङ्गदा पाङ्बा तामगदेरी सत्य ताम घोगै भिसी डाङ् चु हाङ्गला लागिरी भिबा हिन्ना।

बपत्तिस्मा पिन्बा यूहन्ना न्हला भिसी पाङ्बा ताम

५ यहूदिया यहुल्साला हेरोद ग्लेला धुङ्गरी अबिया भिबा समूहरी परमेश्वरला मन्दिररी पूजा लबा जकरिया भिबा म्हि मुबा। थेला म्रिड एलीशिबाएनोन परमेश्वरला मन्दिररी पूजा लबा हारूनना वंशरी

नहबा मुबा।* 6 परमेश्वरसे कुल्बा जम्मान ताम इयान्बासे लमा थे नहीनोन परमेश्वरला डाच्छा ज्यबा म्हि मुबा। 7 तर एलीशिबाग्याम कोला आतबासे लमा थे नहीला कोलागदे आरेबा मुबा। थे नहीला दिडएनोन निसी जिन्बा मुबा। 8 तिरेकुनु जकरिया हाडला समूहला पालोरी परमेश्वरला मन्दिररी पूजा लबान मुबा। 9 परमेश्वरला मन्दिररी पूजा लबा समूहला ठिम अन्छार चिट्टा युमा, परमप्रभुला मन्दिर न्हडरी वाड्सी धूप म्नाबा गे जकरियाला मिनरी थोन्जी। 10 परमेश्वरला मन्दिर न्हडरी धूप म्नाबा धुइरी म्हिला हुल मडग्यार प्रार्थना लसी चिबा मुबा। 11 धूप म्नाबान लबा धुइरी जकरियासे धूप म्नाबा ग्लाला दाहिनेपट्टि स्वर्गदूत खसी राप्सी चिबा म्नाड्जी। 12 स्वर्गदूतदा म्नाड्सी जकरिया आत्तेब तसी लोड्जी। 13 तर स्वर्गदूतसे थेदा “थालोड्गो जकरिया, तिग्दा भिसम परमेश्वरसे एला प्रार्थना सान्बा मुला। दाहेन्से एला म्रिड एलीशिबासे झा गिक न्हला। एसे थेला मिन यूहन्ना थान्गो। 14 थे न्हबा धुइरी ए ल्हानान ताड्ला, ओच्छे स्यहान्दो ल्हानान म्हिगदेएनोन ताड्ला। 15 तिग्दा भिसम थे परमप्रभुला डाच्छापट्टि घेन म्हि दोला। ओच्छे थेसे अडगुरला निडगुदेन खजिबै अर्गु इयहोइबा स्हे आथुड्। थे आमाला फोरी खमाहेन्सेन परमेश्वरला आत्मा थेदेन छ्याम तला।* 16 थेसे ल्हानान इस्राएलीगदेदा परमप्रभु परमेश्वरला ग्यामरी दोःसी भला। 17 आबागदेला सेम कोलागदेपट्टि तना लबारी ओच्छे परमेश्वरसे कुल्बा ताम आइयान्बागदेदा परमेश्वरसे कुल्बा ताम इयान्बा म्हिगदे हड्बा स्होसी प्रभुला ग्याम च्यासी चिबा यहुल स्होबाला लागिरी थे प्रभुला डाच्छा एलियाला आत्मादेन शक्तिरी भला।*

18 जमाहेन्से जकरियासे स्वर्गदूतदा “डाइ चु ताम खाहड् लसी विश्वास लसे? तिग्दा भिसम डा खेपबा दोसी जिन्जी ओच्छे डाला म्रिडलाएनोन दिड निसी जिन्बा मुला” भिसी भिमा, 19 स्वर्गदूतसे जकरियादा “डा परमेश्वरला डाच्छा राप्सी चिबा गब्रिएल हिन्ना। डादा परमेश्वरसे एदेन छ्याम ताम लबारी ओच्छे चु ज्यबा समाचार पाड्बारी पुइखबा हिन्ना।* 20 एसे डाइ पाड्बा ताम विश्वास आलबासे लमा चु ताम पूरा आततेधोना एसे ताम पाड्आखम। तर चु ताम ततोःबा धुइरी तनोन तला” भिसी भिजी।

21 जकरिया परमेश्वरला मन्दिर न्हडरी घडना चिबासे लमा मडग्यार जकरियादा भ्रान्सी चिबा म्हिगदेदा सुर्दा तजी। 22 थे परमेश्वरला मन्दिर न्हडग्याम मडग्यार थोन्सी खमा थेसे तिगै ताम पाड्आखम्नी। थेतबासेलमा मडग्यार मुबा म्हिगदेसे थेसे तिगै म्नाड्जीनम भिसी म्हनजी। जकरियासे थे म्हिगदेदा या लिपबान ताम लबारी छ्याड्जी। ओच्छे थे ताम पाड्आखम्बाला आखम्बान तजी।

23 परमेश्वरला मन्दिर न्हडरी पूजा लतोःबा हाडला पालो जिन्माहेन्से जकरिया दिमरी निजी। 24 तिगै धिन लिच्छा थेला म्रिड एलीशिबा न्हसेला तजी। जमाहेन्से एलीशिबा ला डाधोना दिम ख्लासी खानडएनोन आनिनी। 25 ओच्छे थेसे “दाहेन्से खालैसे डादा हेला थालगै भिसी परमेश्वरसे डादा दया लसी चु लबा हिन्ना” भिसी भिजी।

येशू न्हला भिसी पाड्बा ताम

26-27 गालील अञ्चलला नासरत भिबा नाम्सारी मरियम भिबा कन्याकेटी गिक मुबा। थेदा दाऊद ग्लेला वंशला योसेफ भिबा म्हिसे ब्याह लबारी ह्रीबा मुबा। एलीशिबा न्हसेला तबा ला हु तमा परमेश्वरसे गब्रिएल स्वर्गदूतदा मरियम मुबा ग्लारी पुइखजी।* 28 जमाहेन्से स्वर्गदूत थे कन्याकेटी मुबा ग्लारी निसी, “लास्सो माइ, एदा परमेश्वरसे ल्हानान दयामाया लबा मुला। थेतबासेलमा एदेन छ्याम परमप्रभु मुला” भिसी भिजी।

29 स्वर्गदूतला ताम थेःसी मरियम उदेक तजी। ओच्छे “आहिन, चु तिग भिबा?” भिसी सेमरी म्हनजी। 30 तर स्वर्गदूतसे थेदा “थालोड्गो मरियम, तिग्दा भिसम परमेश्वरसे एदा ल्हानान मोलम पिन्बा मुला। 31 दाहेन्से ए न्हसेला तला ओच्छे एसे झा गिक न्हला। एसे थेला मिन येशू थान्गो।* 32 थे घेन म्हि दोला ओच्छे थेदा जम्मान भन्दा घेन परमेश्वरला झा भिला। परमप्रभु परमेश्वरसे थेदा

* 1:5 १ इति २४:१० * 1:15 गन्ती ६:३ * 1:17 मला ४:५-६ * 1:19 दानि ८:१६; ९:२१ * 1:26-27 मत्ती १:१८
* 1:31 मत्ती १:२१

दाऊदला यहूल्सारी शासन लबारी ग्ले स्होला। 33 थेसे सदनना लागिरी याकूबला वंशथोरी शासन लला। ओच्छे थेला शासन खाइमै आजिन” भिसी भिजी।*

34 स्वर्गदूतला चुहड्बा ताम थे:सी मरियमसे “चु खाहड् लसी तला? तिग्दा भिसम डाइ ब्याह लबान आरे” भिसी भिजी।

35 स्वर्गदूतसे मरियमदा “एथोरी परमेश्वरला आत्मा फेपखला। ओच्छे एसे जम्मान भन्दा घेन परमेश्वरला आत्माला शक्तिसे कोला न्हला। थेतबासेलमा थे कोलादा परमेश्वरला झा भिला।

36 च्यागो, एला हाडला म्हि एलीशिबादाएनोन दिड निबासे लमा कोला आन्ह भिसी भिमुबा। तर दान्दे थे न्हसेला तबा ला दु तबा मुला। 37 थेतबासेलमा परमेश्वरसे लआखम्बा गे तिगै आरे” भिसी मरियमदा जोहाब पिन्जी।*

38 ओच्छे मरियमसे स्वर्गदूतदा “डा परमेश्वरदा तेन्बा म्हि हिन्ना, डादा हाडसे भिबा हड्दोन तगै” भिसी भिमाहेन्से स्वर्गदूत निजी।

मरियम एलीशिबादा हुप तबारी निबा

39 तिगै धिन लिच्छा मरियम योना योना लसी यहूदिया अञ्चलला गडपट्टिला नाम्सा गिकरी निजी। 40 ओच्छे जकरियाला दिमरी वाड्सी एलीशिबादा “लासूसो फ्याफुल्ला” भिजी। 41 मरियमसे लासूसो फ्याफुल्ला भिबा एलीशिबासे थे:माहेन्से एलीशिबाला फोरी मुबा कोला भोल्जी। ओच्छे एलीशिबाथोरी परमेश्वरला आत्मा फेपखजी। 42 जमाहेन्से एलीशिबासे घेन काइ लसी, “मिडम्हेमेगेदे न्हडरी ए परमेश्वरग्याम मोलम याड्बा म्हि हिन्ना। ओच्छे एला फोरी मुबा कोलादाएनोन ल्हानान मोलम पिन्बा मुला। 43 खाल्ला दयासे लमा डा हड्बाला दिमरी डाला प्रभुला आमा खजी? 44 च्यागो, एसे लासूसो फ्याफुल्ला भिबा डाइ थे:मैह्याम डाला फोरी मुबा कोला ताड्सी भोल्जी। 45 परमप्रभुसे सुड्बा ताम पूरा तला भिसी विश्वास लबासे लमा एसे परमेश्वरग्याम मोलम याड्बा मुला।” भिसी भिजी।

मरियमसे परमेश्वरदा धन्यवाद पिन्बा

46 ओच्छे मरियमसे चुहड् भिसी व्हाइ गोबारी छ्याइजी,
“डाला परमप्रभु परमेश्वरदा जयजयकार तगै।*

47 डादा थार्बा पिन्बा परमेश्वरदेन छ्याम डा सेमहेन्सेन ताड्बा मुला।

48 तिग्दा भिसम परमेश्वरदा तेन्बा डा हड्बा जजा म्हिदाएनोन वास्ता लबा मुला।
दाहेन्से जम्मान म्हिगदेसे डादा परमेश्वरग्याम मोलम याड्बा म्हि भिसी भिला।*

49 तिग्दा भिसम जम्मान भन्दा घेन परमप्रभु परमेश्वरसे डाला लागिरी घेन गे लसी पिन्बा मुला।

परमप्रभुन परमेश्वरर् हिन्ना।

50 परमेश्वरदा मान लबा म्हिगदेदा परमेश्वरसे जुकजुकधोनान दया लला।

51 ओच्छे सेमरी डा हड्बा खालै आरे भिसी भ्रबा म्हिगदेदा परमेश्वरसे हाडला शक्तिसे ससा बडबड तना लबा मुला।

52 शासन लबा म्हिगदेदा परमेश्वरसे थेला ग्लाग्याम ते:बा मुला।

ओच्छे प्राडबोगदेदा परमेश्वरसे घेन म्हि स्होबा मुला।*

53 ओच्छे फोखेन्बागदेदा परमेश्वरसे सदन ज्यबा ज्यबा सहे पिन्सी ग्रेन्ना लबा मुला।

तर फ्युकपो म्हिगदेदा तिगै आपिन्ना या थान्थान पुड्बा मुला।

54 परमेश्वरसे हाडसे लबा दया ढन्सी हाडदा तेन्बा इस्राएलीगदेदा हो लबा मुला।

55 ओच्छे यहाडला आखे म्हेमेदा सुड्बा हड् अब्राहामदेन थेला सन्तानगदेदा जुकजुकधोनाला लागिरी दया लबा मुला।”*

* 1:33 २ शमू ७:१२; १३:१६; यशै ९:७ * 1:37 उत्प १८:१४ * 1:46 १ शमू २:१-१० * 1:48 १ शमू १:११ † 1:49
चु पदरी “परमप्रभु परमेश्वर” भिसी पाड्बा ताम ग्रीक बाइबलरी “थेला छान चोखो मुला” भिसी पाड्बा मुला। चुला मुल अर्थ चा थे
जम्मान भन्दा घेन हिन्ना ओच्छे थे हड्बा स्यहान्दो खालै आरे भिबा हिन्ना। थेतबासेलमा जम्मासेन थेदा तेन्तो:ला। * 1:52
अय्यूब ५:११; १२:१९ * 1:55 उत्प १७:७

56 मरियम ला सोमधोना एलीशिबादेन छ्यामनोन चिसी हाडला दिमरी निजी।

बपतिसमा पिन्बा यूहन्ना न्हबा

57 ओच्छे एलीशिबासे कोला न्हबा धुइ तसी थेसे झा न्हजी। 58 जमाहेन्से परमप्रभु परमेश्वरसे एलीशिबादा दया लबा मुला भिबा थेःसी थेला हाडला म्हिदेन खिमजेमगदे ल्हानान ताड्जी।

59 कोला न्हसी भेःरे तमाहेन्से थेनीगदे थे कोलाला खतना लबारी खजी। ओच्छे थेनीगदेसे थे कोलाला मिन थेला आबाला हड्बान जकरिया थान्बारी छ्याइजी,* 60 तर थेला आमासे “आहिन, थेला मिन यूहन्ना थान्तोःला” भिसी भिमा, 61 थेनीगदेसे “थेहड्बा मिन एला हाडला म्हि न्हडरी खालैला आरे” भिसी भिजी।

62 जमाहेन्से थेनीगदेसे थेला आबादा झाला मिन तिग थान्बा भिसी या लिप्सी ड्योइमा, 63 जकरियासे पाटी गिक हीसी थे पाटीरी थेला मिन यूहन्ना हिन्ना भिसी भिजी। चुहड्बा म्राड्सी थेनीगदे जम्मान उदेक तजी। 64 थेनोन धुइरी जकरियासे ताम पाड्बारी छ्याइजी। ओच्छे थेसे परमेश्वरदा धन्यवाद पिन्जी। 65 चुहड् तबा म्राड्सी थेला खिमजेमगदे जम्मान उदेक तसी लोड्बा खजी। ओच्छे यहूदियाला गडरीक्यारला नाम्सा नाडनोन चु ताम थेःजी। 66 चु ताम थेःबा जति जम्मासेन “लिच्छा चु कोला खाहड्बा तला” भिसी हाड हाडला सेमरी म्हन्जी। तिग्दा भिसम थे कोलादेन छ्याम परमेश्वर मुबा।

जकरियासे गोबा व्हाइ

67 यूहन्नाला आबा जकरियाथोरी परमेश्वरला आत्मा फेपखजी। ओच्छे परमेश्वरला आत्मासे कुल्बा हड्बान थेसे पाड्बारी छ्याइजी।

68 “इसाएलीगदेला परमप्रभु परमेश्वरला जयजयकार तगै

तिग्दा भिसम परमेश्वर फेपखसी हाडला म्हिगदेदा हो लसी पापग्याम फेबा मुला!

69 परमेश्वरसे थेदा तेन्बा दाऊदला वंशरी

य्हाडदा थार्बा पिन्बा शक्तिशाली म्हि गिक पुइखबा मुला।

70-71 य्हाडला शत्रुगदेदेन य्हाडदा हेला लबागदेग्याम

थार्बा पिन्ना भिबा ताम

दडबोरीन परमेश्वरसे हाडला अगमवक्तागदेग्याम सुड्सी जिन्बा मुबा।

72 ओच्छे परमेश्वरसे य्हाडला आखे म्हेमेदेन छ्याम लबा हाडला कबुल ढन्सी य्हाडदा दया लबा मुला।

73 थे कबुल परमेश्वरसे य्हाडला म्हेमे अब्राहामदेन छ्याम लबा मुबा।

74-75 थेतबासेलमा शत्रुगदेग्याम थार्बा याड्बाला लागिरी आलोड्ना

य्हाड सोतेधोना परमेश्वरला डाच्छापट्टि ज्यबा म्हि दोसी य्हाडसे ज्यबा गे लसी परमेश्वरदा तेन्म्याड्गै।

76 डाला झा,

दाहेन्से एदा जम्मासेन जम्मान भन्दा घेन परमेश्वरला अगमवक्ता भिसी भिला।

तिग्दा भिसम ए प्रभुला डाच्छा डाच्छा निसी थेला ग्याम स्होला।*

77 ओच्छे पापला दोष मेटब तमाहेन्से थार्बा याड्बाला भिसी एसे परमेश्वरला म्हिगदेदा लोप्ला।

78 तिग्दा भिसम य्हाडला परमेश्वर दया लबा परमेश्वर हिन्ना।

थेतबासेलमा परमेश्वरसे य्हाड मुबा ग्लारी स्वर्गग्याम य्हाल पुइखला।

79 परमेश्वरसे धोपधोपरी भ्रबादेन सिला भिसी लोड्बा म्हिगदेदा य्हाल पिन्ना।

ओच्छे थेनोन य्हालसे य्हाडदा शान्तिला ग्यामरी भ्रपुड्ला।”*

80 यूहन्ना परमेश्वरला आत्माग्याम ज्ञान बुद्धि याड्बान घेन तबान निजी। ओच्छे इसाएलीगदेला गुडरी परमेश्वरला यहूल्साला समाचार थेःना लबा धुइ आततेधोना यूहन्ना तोडतोडबा ग्लारी चिजी।

* 1:59 लेवी १२:३ * 1:76 मला ३:१ * 1:79 यशै ९:२

2

येशू न्हबा

मत्ती १:१८-२५

1 थे धुइरी रोमी ग्याल्बो कैसर अगसूटससे जम्मान यहुल्साला म्हि झ्याबाला लागिरी जम्मालान मिन भ्रिउ भिसी कुल्जी। 2 सिरिया भिबा ग्लाला हाकिम कुरेनियस मुबा धुइरी चुहड् लसी म्हिगदे झ्याबा डाचछा रेम तबा मुबा। 3 जमाहेन्से जम्मान म्हिगदे मिन भ्रिबारी हाड हाडला आखे म्हेमेला नाम्सारी निजी।

4 थे धुइरी योसेफ गालील अञ्चलला नासरत भिबा ग्लारी चिबा मुबा। थेएनोन हाडला मिन भ्रिबारी यहूदिया अञ्चलला बेथलेहेम भिबा दाऊदला शहररी निजी। तिग्दा भिसम थे दाऊद ग्लेला वंशला मुबा। 5 ओचछे योसेफसे हाडसे ब्याह लबारी छ्याइबा मरियमदाएनोन छ्यामनोन भोर्सी बेथलेहेमरी मिन भ्रिबारी निजी। थे धुइरी मरियम न्हसेला मुबा। 6 थेनीगदे बेथलेहेमरी मुमान मरियमसे कोला न्हबा धुइ तजी। 7 जमाहेन्से मरियमसे बेथलेहेमरीन हाडला थेबा झा न्हजी। थे झादा ल्हेथानरी रिल लसी म्हे मुइदा खोले पिन्बा डूँडरी नाइजी। तिग्दा भिसम थेनीगदेसे खजिबै दिमरी चिबा ग्ला आयाड्नी।

गोठालोगदेसे लैनु येशूदा स्यापबा

8 थे ग्लाला डामला पाडग्यालरी गोठालोगदे म्हुनड ग्युगदे खुड्सी चिबा मुबा। 9 थेनोन धुइरी थेनीगदेसे स्वर्गदूत गिक म्राड्जी। ओचछे थेनीगदेला क्युर्नोन परमेश्वरला स्हेरसे य्हाल य्हाल तजी। चुहड् तबा म्राड्सी थेनीगदे लोड्जी। 10 तर स्वर्गदूतसे थेनीगदेदा “थालोड्गो! तिग्दा भिसम डाइ एनीगदेला लागिरी थार्बा पिन्बा समाचार भसी खबा मुला। चु समाचार जम्मान म्हिगदेला लागिरी हिन्ना। 11 तिनी दाऊदला शहररी एनीगदेदा पापग्याम थार्बा पिन्बा म्हि गिक न्हबा मुला। थेनोन थार्बा पिन्बा स्त्रीष्ट प्रभु हिन्ना। 12 ओचछे एनीगदेला लागिरी चिनु चा चु तला, एनीगदेसे कोला गिकदा ल्हेथानसे रिल लसी म्हे मुइदा खोले पिन्बा डूँडरी नाइसी थान्बा स्याप्ला।”

13 थेनोन धुइरी स्य्हान्दो स्वर्गदूतला हुल म्राड्जी। ओचछे थे स्वर्गदूतगदेसे परमेश्वरदा धन्यवादला व्हाइ गोबारी छ्याइजी,

14 “स्वर्गरी धन्छ्याबा परमेश्वरला जयजयकार, जम्बुलिडरी जुन म्हिदा परमेश्वरसे धम्बा मुला थेनीगदेदा शान्ति तगै!”

15 स्वर्गदूतगदे स्वर्गरी निमाहेन्से गोठालोगदेसे हाड हाड न्हडरी “लु, भ्रउ, य्हाडदा परमेश्वरसे सुड्बा चु ल्हेडमो च्याबारी बेथलेहेमरी निइ” भिसी भिजी।

16 जमाहेन्से थेनीगदे योना योना लसी बेथलेहेमरी निजी। थेरी थेनीगदेसे मरियमदेन योसेफ ओचछे लैनु कोलादा चा म्हे मुइदा खोले पिन्बा डूँडरी नाइसी थान्बा म्राड्जी। 17 जमाहेन्से थे कोलाला बाररी थेनीगदेदा स्वर्गदूतसे पाड्बा ताम थेनीगदेसे जम्मान म्हिगदेदा थे:ना लजी। 18 ओचछे गोठालोगदेसे पाड्बा ताम थे:बा म्हिगदे जम्मान उदेक तजी। 19 तर मरियमसे चा चु जम्मान ताम म्हनसी सेमरीन थान्जी। 20 ओचछे स्वर्गदूतसे भिबा ह्ङ्गोन म्राड्बासे लमा गोठालोगदेसे परमेश्वरदा घेन मानदेन जयजयकार लसी धन्यवादला व्हाइ गोबान निजी।

येशूदा परमेश्वरला मन्दिररी भोर्सी अर्पण लबा

21 थे कोला न्हसी भ्रे:रे तमा खतना लबा धुइरी थेला मिन येशू थान्जी। थेला मिन आमाला फोरी खबा भन्दा डाचछान स्वर्गदूतसे पाड्बा मुबा।* 22 ओचछे मोशाला ठिम अन्छार थेनीगदे चोख्याब लबा धुइ तमाहेन्से येशूदा थेला आबादेन आमासे परमप्रभुला डाचछा अर्पण लबाला लागिरी यरूशलेमरी परमेश्वरला मन्दिररी भजी।* 23 परमप्रभुसे मोशादा पिन्बा ठिमरी भ्रिबा अन्छार जम्मान भन्दा डाचछा न्हबा झा परमप्रभुला लागिरी फेसी थान्तो:बा मुबा।* 24 ओचछे परमेश्वरसे मोशादा पिन्बा

* 2:21 लेवी १२:३; लूका १:३१ * 2:22 लेवी १२:६-८ * 2:23 प्रस्था १३:२, १२

ठिमरी मुबा अन्छार जोर गिक ढुकुर तसै जोर गिक परेवा तसै परमप्रभुदा फुलतोःबासे लमा थेनीगदे बलि फुल्बारी खजी।

25 थे धुइरी यरूशलेमरी शिमियोन भिबा म्हि गिक मुबा। थे परमेश्वरसे म्हन्बा अन्छार भ्रबादेन परमेश्वरदा तेन्बा म्हि मुबा। थेदा परमेश्वरसे इस्राएलीगदेदा थार्बा पिन्बा म्हि पुइखला भिसी सुइबा ताम पूरा लला भिसी भ्रान्सी चिबा मुबा। 26 ओच्छे “थार्बा पिन्बा ख्रीष्टदा आम्राइतेधोना ए आसि” भिसी परमेश्वरला आत्मासे डाच्छान थेदा पाइबा मुबा। 27 परमेश्वरला आत्मासे कुल्बा हइ शिमियोन परमेश्वरला मन्दिररी निजी। थे धुइरी येशूला आबादेन आमासे परमेश्वरसे मोशादा पिन्बा ठिम अन्छार तिग लतोःबा मुबा, थे लबारी येशूदा परमेश्वरला मन्दिररी भसी खजी। 28 जमाहेन्से शिमियोनसे लैनु येशूदा कुरी किन्सी परमेश्वरदा धन्यवाद पिन्सी चुहइ भिजी,

29 “परमप्रभु हाडसे सुइबा ताम पूरा तबा मुला। दाहेन्से हाडदा तेन्बा म्हि डा सिसै ढुकक मुला।

30 तिग्दा भिसम हाडसे कबुल लबा हइन्ोन थार्बा पिन्बा ख्रीष्टदा डाइ प्राइसी जिन्बा मुला।

31 चु कोलादा हाडसे जम्मान म्हिगदेला लागिरी पुइखबा हिन्ना।

32 अर्गु यहूलला म्हिगदेदा ख्रीष्टसेन हाडला ग्याम उन्ना,
ओच्छे चुसे लमा इस्राएलीगदेसे मान याइला।”*

33 ओच्छे शिमियोनसे लैनु येशूला बारेरी पाइबा ताम थेःसी येशूला आबादेन आमा उदेक तजी।

34 जमाहेन्से शिमियोनसे मरियमदा मोलम पिन्बान भिजी, “चयागो, चु लैनु इस्राएलीगदेदा थार्बा पिन्बादेन नाश लबाला लागिरी परमेश्वरसे पिन्बा चिनु हिन्ना। थेदा ल्हानान म्हिगदेसे बिरोध लला।

35 थेतबासेलमा ल्हानान महिला सेमरी म्हन्बा तामगदे परमेश्वरसे उन्ना। ओच्छे एला सेमरी ल्हानान दुख तला।”

36-37 थेरी आशेर वंशला फनुएलला झामे हन्ना भिबा बोगल बलिसे बलि दिड तबा मिडमहेमे गिक मुबा। थे अगमवक्तास्या मुबा, ब्याह तसी निस दिड तमा थेला हेम्बो सिजी। ओच्छे थे फोइथान चिसी धिन म्हुननोन परमेश्वरला मन्दिररी प्रार्थना लबान परमेश्वरदा तेन्मुबा। 38 थेनोन धुइरी हन्ना खसी परमेश्वरदा धन्यवाद पिन्जी। ओच्छे थेसे परमेश्वरसे यरूशलेमदा पापग्याम फेबा धुइदा भ्रान्सी चिबा म्हिगदेदा थे कोलाला बारेरी पाइसी पिन्जी। 39 जमाहेन्से थेनीगदेसे परमेश्वरसे मोशादा पिन्बा ठिम अन्छार लतोःबा जम्मान गे जिन्ना लसी गालील अञ्चलला हाडलान नासरत शहररी निजी।* 40 लैनु येशू घेन घेन तबान खमाहेन्से थेला बुद्धिऐनोन खजी। तिग्दा भिसम परमेश्वरला मोलम थेदेन छ्याम मुबा।

येशूसे यहूदी धर्मगुरुगदेदेन छ्याम ताम लबा

41-42 मित्र यहुल्साग्याम फेसी खबा धिनदा ढन्सी धइबा चाडरी चाडला ठिम अन्छार येशूला आबा आमा दिडएदडसे यरूशलेमरी निबा लमुबा। थेतबासेलमा येशू च्युक न्ही दिड तमाऐनोन येशूला आबादेन आमासे येशूदा छ्यामनोन भोर्सी यरूशलेमरी निजी।* 43 चाड धइसी जिन्माहेन्से थेनीगदे दिमरी निजी। तर येशू चा यरूशलेमरीन धन्छ्याजी। चु ताम थेला आबादेन आमासे था आयाइनी। 44 येशूला आबादेन आमासे येशू महिला हुलरी मुला तला भिसी म्हन्सी तिरेला ग्याम भ्रसी निजी। ओच्छे थेनीगदेसे येशूदा हाडला म्हिदेन डोसेबा म्हिगदे मुबा ग्लारी निसी म्हाइजी, 45 तर आस्यापबासे लमा थेनीगदे थेदा म्हाइबान यरूशलेमरी दोःसी खजी। 46 थेनीगदेसे सोमरेरी येशूदा परमेश्वरला मन्दिररी स्यापजी। थेरी थे यहूदी धर्मगुरुगदेदेन छ्याम धन्छ्यासी थेनीगदेसे पाइबा ताम ड्यान्सी, ड्योइबा छार्बा लसी धन्छ्याबा मुबा। 47 थेरी येशूला ताम ड्यान्सी चिबागदे येशूसे ताम घोसी जोहाब पिन्बा प्राइसी उदेक तबा मुबा। 48 येशूला आबादेन आमासे थेदा प्राइसी उदेक म्हन्सी थेला आमासे “चयागो झा, एला आबादेन डा एदा म्हाइमा म्हाइमा हैरान तजी, एसे चुहइ तिग लबा?” भिमा, 49 येशूसे थेनीगदेदा “हाडनीसे डादा तिग्दा म्हाइबा? डा डाला आबाला दिमरी चितोःबा भिसी हाडनीदा था आरे?” भिसी सुइजी। 50 तर थेला आबादेन आमासे चु ताम आघोनी।

* 2:32 यशै ४२:६; ४९:६; ५२:१० * 2:39 मत्ती २:२३ * 2:41-42 प्रस्था १२:१-२७; वयव १६:१-८

51 जमाहेन्से येशू हाडला आबा आमादेन छ्यामनोन नासरतरी फेपूजी। ओच्छे हाडला आबा आमासे पाड्बा ताम ड्यानसी धन्छ्याजी। तर थेला आमासे चु जम्मान ताम हाडला सेमरीन थान्जी। 52 ओच्छे येशू परमेश्वरदेन म्हिगदेला दयामायारी घेन घेन तमाहेन्से बुद्धिनोन बढब तबान निजी।*

3

बपत्तिस्मा पिन्बा यूहन्ना

मत्ती ३:१-१२; मर्कूस १:१-८; यूहन्ना १:१९-२८

1 रोमी ग्याल्बो कैसर तिबेरियाससे शासन लबा च्युक डा दिड तमा पन्तियस पिलातस भिबा म्हि यहूदिया अञ्चलला हाकिम मुबा। जमा धुइरी हेरोद गालील अञ्चलला ग्ले मुबा, ओच्छे थेला आले फिलिप इतुरियादेन त्राखोनितिस भिबा ग्लाला ग्ले मुबा, थेहड् लसीन लुसानियास अबिलेने अञ्चलला ग्ले मुबा। 2 ओच्छे हन्नासदेन कैयाफा परमेश्वरला मन्दिररी पूजा लबा मुल म्हि मुबा। थेनोन धुइरी परमेश्वरसे जकरियाला झा तोडतोडबा ग्लारी चिबा यूहन्ना मुबा ग्लारी हाडला बचन पुडखजी। 3 यूहन्नासे म्हिगदेदा हाड हाडला पाप ख्लासी परमेश्वरपट्टि दोःगो, ओच्छे बपत्तिस्मा किन्गो। जमाहेन्से परमेश्वरसे एनीगदेला पापला दोष मेटब लला भिबान थार्बा पिन्बा समाचार थेःना लबान यर्दन स्योडला क्यारमारला जिल्लारीक्यार खजी। 4 चु ताम यशैया भिबा अगमवक्तासे चुहड् लसी भिबा मुबा,

“तोडतोडबा ग्लारीक्यार म्हि गिक क्रिड्बान चुहड् भिसी भ्रला,
‘परमप्रभुला ग्याम तयार लउ,

ओच्छे परमप्रभु भ्रबाला लागिरी थेला ग्याम सोजो सहोउ,

5 मुबा जे गडदेन होपगदे सम्म सहोला,

ओच्छे काडलाड कुडलीडबा ग्यामगदे सोजो तला

ओच्छे पगल पोगल मुबा ग्लाएनोन सम्म तला।

6 जमाहेन्से जम्मान म्हिगदेसे परमेश्वरसे पिन्बा थार्बा म्राड्ला।’ ”*

7 थेतबासेलमा यूहन्नासे बपत्तिस्मा किन्बारी खबा म्हिगदेदा चुहड् भिसी पाड्जी, “पुरीला कोलागदे, एनीगदेदा परमेश्वरला बोमोग्याम स्योरम्याड्ला भिसी खाल्से भिजी? 8 चुदे एनीगदे हाड हाडला पाप ख्लासी परमेश्वरपट्टि दोःबान हिन्सम परमेश्वरदा सेम निबा गे लउ, ओच्छे एनीगदे हाड हाड न्हडरी डनी अब्राहामला कोलागदे भिसी पाड्बारी थाम्हाइगो। तिग्दा भिसम परमेश्वरसे अब्राहामला लागिरी चु युडबागदेग्यामसेनोन कोलागदे सहोबारी खमला। 9 च्यागो, दोड थाबारी तरी थीसी जिन्बा मुला। थेतबासेलमा ज्यबा रो आरोबा जम्मान दोड टाहेन्सेन थासी मेरी फर्ला।”*

10 जमाहेन्से म्हिगदेसे यूहन्नादा “थेहड् भिसम दाहेन्से डन्से तिग लउ?” भिसी ड्योडमा, 11 यूहन्नासे थेनीगदेदा “जुन म्हिदेन छ्याम सहुर्दम न्ही मुला थेसे आरेबा म्हिदा पिन्गै, ओच्छे जुन म्हिदेन छ्याम चबा सहे मुला थेसे आरेबागदेदा भो लसी पिन्गै” भिसी जोहाब पिन्जी।

12 ओच्छे तिरो दुडबा म्हिगदेएनोन यूहन्ना मुबा ग्लारी बपत्तिस्मा किन्बारी खसी, “गुरु, डन्से चा तिग लउ?” भिसी ड्योडजी।*

13 यूहन्नासे थेनीगदेदा “एनीगदेसे तिरो दुडमा सरकारसे तोगब लबा भन्दा ल्हाना थाकिन्गो” भिसी भिजी।

14 ओच्छे सिपाहीगदेएनोन खसी, “डन्से चा तिग लउ?” भिसी ड्योडजी। यूहन्नासे थेनीगदेदा “खालैदा अत्याचार लसी आहिन्बा तामदा हिन्ना भिसी टाडगा थाकिन्गो, हाडला खतोःबा जे टाडगा किन्सी सन्तोक लसी चिउ” भिसी भिजी।

15 जमा धुइरी म्हिगदेसे थार्बा पिन्बा ख्रीष्ट फेपूखला भिसी आश लसी चिबा मुबा। थेतबासेलमा थेनीगदेसे यूहन्नादा म्राड्सी चुनोन ख्रीष्ट हिन्ना वा भिसी सेमरी म्हन्सी चिबा मुबा। 16 तर यूहन्नासे थेनीगदेदा “डाइ एनीगदेदा क्युडसे बपत्तिस्मा पिन्ना। तर डा भन्दा शक्तिशाली फेपूखबान मुला

* 2:52 १ शमू २:२६; हितो ३:४ * 3:6 यशै ४०:३-५ * 3:7 मत्ती १२:३४; २३:३३ * 3:9 मत्ती ७:१९ * 3:12 लूका ७:२९

डा थेला लखमला तुना बूलबाधोनाला आरे। थेसे एनीगदेदा परमेश्वरला आत्मादेन मेसे बप्टिस्मा पिन्ना। ¹⁷ ग्वा य्हापबा नाख्ले थेलान छ्यारी मुला। थेसे खलारी ग्वा ज्यना लसी य्हाप्सी ग्वा जति भकारीरी युला। ओच्छे पोलोवा जति खाइमै आसिबा मेरी खाड्ला” भिसी भिजी। ¹⁸ चुहड् लसी यूहन्नासे अर्गु लहानान अर्ती पिन्सी, लोप्सी म्हिगदेदा परमेश्वरला य्हुलसाला समाचार थेःना लजी। ¹⁹ तर हेरोद ग्लेसे हाडला आले चाड हेरोदियास भिबादा थान्बासे लमा थेला जम्मान पाप गे म्राड्सी यूहन्नासे थेदा बड्बा मुबा। ²⁰ थेतबासेलमा थेसे यूहन्नादा झ्याल्खानरी झाड्सी पापथोरी झन पाप गे लजी।*

येशूसे बप्टिस्मा किन्बा

मत्ती ३:१३-१७; मर्कूस १:९-११; यूहन्ना १:३२-३४

²¹ म्हिगदेसे बप्टिस्मा किन्बान लबा धुइरी येशूसेनोन बप्टिस्मा किन्जी। थेसे प्रार्थना लबान लबा धुइरी स्वर्ग ठोड्बा म्राड्जी। ²² ओच्छे परमेश्वरला आत्मा थेतोरी हुकुर हड् लसी फापखजी। ओच्छे स्वर्गग्याम “ए डाइ सेमहेन्से माया लबा डाला झा हिनना, ए म्राड्सी डा लहानान ताड्बा मुला” भिबा काइ खजी।*

येशूला आखे म्हेमे

मत्ती १:१-१७

²³ येशूसे हाडला गे लबारी छ्याइबा धुइरी येशू बोगल गिकसे च्युइ दिड तबा मुबा। जम्मान म्हिगदेसे येशू योसेफलान झा भिसी म्हन्बा मुबा।

योसेफ एलीला झा मुबा।

²⁴ एली मत्तातला झा,

मत्तात लेवीला झा,

लेवी मल्कीला झा,

मल्की यान्नाला झा,

यान्ना योसेफला झा,

²⁵ योसेफ मत्ताथियासला झा,

मत्ताथियस आमोसला झा,

आमोस नहूमला झा,

नहूम इसलीला झा,

इसली नग्गैला झा,

²⁶ नग्गै माथला झा,

माथ मत्ताथियासला झा,

मत्ताथियस सेमैनला झा,

सेमैन योसेखला झा,

योसेख योदाला झा,

²⁷ योदा योआननला झा,

योआनन रेसाला झा,

रेसा यरुबाबेलला झा,

यरुबाबेल शालतिएलला झा,

शालतिएल नेरीला झा,

²⁸ नेरी मल्कीला झा,

मल्की अदीला झा,

अदी कोसामला झा,

कोसाम एलमादमला झा,

एलमादम एर्ला झा,

* 3:20 मत्ती १४:३-४; मर्कू ६:१७-१८ * 3:22 उत्प २२:२; भजन २:७; यशै ४२:१; लूका ९:३५

29 एर् यहोशूला झा,
 यहोशू एलीएजरला झा,
 एलीएजर योरीमला झा,
 योरीम मत्तातला झा,
 मत्तात लेवीला झा,
 30 लेवी शिमियोनला झा,
 शिमियोन यहूदाला झा,
 यहूदा योसेफला झा,
 योसेफ योनानला झा,
 योनान एल्याकीमला झा,
 31 एल्याकीम मलेआला झा,
 मलेआ मिन्नाला झा,
 मिन्ना मत्ताथाला झा,
 मत्ताथा नातानला झा,
 नातान दाऊद ग्लेला सन्तान,
 32 दाऊद यिशैला झा,
 यिशै ओबेदला झा,
 ओबेद बोअजला झा,
 बोअज सल्मोनला झा,
 सल्मोन नहशोनला झा,
 33 नहशोन अम्मीनादाबला झा,
 अम्मीनादाब आरामला झा,
 आराम हेस्रोनला झा,
 हेस्रोन फारेसला झा,
 फारेस यहूदाला झा,
 34 यहूदा याकूबला झा,
 याकूब इसहोकला झा,
 इसहाक अब्राहामला झा,
 अब्राहाम तेरहला झा,
 तेरह नाहोरला झा,
 35 नाहोर सरूगला झा,
 सरूग रऊला झा,
 रऊ पेलेगला झा,
 पेलेग एबेरला झा,
 एबेर शेलहला झा,
 36 शेलह केनानला झा,
 केनान अर्पक्षदला झा,
 अर्पक्षद शेमला झा,
 शेम नोआला झा,
 नोआ लेमेखला झा,
 37 लेमेख मतूशेलहला झा,
 मतूशेलह हनोकला झा,
 हनोक येरेदला झा,
 येरेद महलालेलला झा,
 महलालेल केनानला झा,
 38 केनान एनोशला झा,
 एनोश शेतला झा,

शेत आदमला झा,
आदम परमेश्वरला झा मुबा।

4

शैतानसे येशूदा सेम फसब लबारी म्हाइबा

मत्ती ४:१-११; मर्कूस १:१२-१३

1 परमेश्वरला आत्मा येशूथोरी फेपूखमाहेन्से येशू यर्दन स्योडग्याम दोःजी। ओच्छे परमेश्वरला आत्मासे थेदा तोडतोडबा ग्लारी भोर्जी। 2 थेरी शैतानसे येशूदा बोगल न्ही धिनधोना फसब लबारी म्हाइजी। ओच्छे बोगल न्ही धिनधोना येशूसे तिगै आसोल्नी। थेतबासेलमा येशूदा ल्हानान फोखेन्जी। 3 थेनोन धुइरी शैतानसे येशूदा “हाड परमेश्वरला झा हिन्बान हिन्सम चु युडबादा गेड स्होड” भिसी भिजी। 4 ओच्छे येशूसे शैतानदा “गेडसे जे म्हि आसो भिसी बचनरी भिबा मुला” भिसी सुड्जी।*

5-6 जमाहेन्से शैतानसे येशूदा नोबा गडरी भोर्सी जम्बुलिडला जम्मान यहुल्सागदे उन्बान, “डाइ हाडदा चु जम्मान यहुल्साला ग्लेदेन चु जम्मान धन सम्पत्तिला मालिक स्होला, तिग्दा भिसम चु जम्मान डादा पिन्बा मुला। ओच्छे डाला सेमसे म्हन्बादा डाइ पिन्ना। 7 थेतबासेलमा हाडसे डादा फ्या लजी भिसम चु जम्मान हाडला तला” भिसी भिमा, 8 येशूसे थेदा “बचनरी चुहड् भिसी भिबा मुला, ‘एसे हाडला परमप्रभु परमेश्वरदा फ्या लउ, ओच्छे थेदा जे तेन्गो’ ” भिसी सुड्जी।*

9 दोःसी शैतानसे येशूदा यरूशलेमरी भोर्सी परमेश्वरला मन्दिरला थोबोरी राप्पुड्जी। ओच्छे थेसे येशूदा चुहड् भिसी भिजी, “हाड पक्कान परमेश्वरला झा हिन्सम चु ग्याम मार छ्योड्गो, 10 तिग्दा भिसम बचनरी चुहड् भिसी भिबा मुला, ‘परमेश्वरसे हाडदा जोगब लबाला लागिरी हाडला स्वर्गदूतगदेदा कुल्ला।*

11 ओच्छे एला काड युडबारी थाठोक्गै भिसी

थेनीगदेसे एदा या यारीन ताला’ भिसी भिबा मुला।”*

12 तर येशूसे थेदा “बचनरी चुहड्बाएनोन भिबा मुला, ‘एसे हाडला परमप्रभु परमेश्वरला सेम च्याबा गे तिगै थालउ’ ” भिसी सुड्जी।* 13 जमाहेन्से शैतानसे येशूदा तिगै लसी फसब लबारी आखम्बासे लमा दोःसी मौका आयाड्तेधोना थेसे येशूदा ख्लासी निजी।

येशूसे म्हिगदेदा लोपबारी छ्याइबा

मत्ती ४:१२-१७; मर्कूस १:१४-१५

14 जमाहेन्से परमेश्वरला आत्माला शक्तिरी येशू गालील अञ्चलरी दोःसी फेपूखजी। ओच्छे थेला बारेरी क्यारमारला जम्मान ग्लारी थेःजी। 15 येशू यहूदीगदे हुप तबा दिम दिमरी फेप्सी म्हिगदेदा लोपबारी छ्याइजी। जमाहेन्से जम्मान म्हिगदेसे थेला जयजयकार लजी।

नासरतरी येशूला ताम पत्याब आतबा

मत्ती १३:५३-५८; मर्कूस ६:१-६

16 जमाहेन्से येशू हाड छर्बा नासरत नाम्सारी फेपूखजी। ओच्छे थे सदन हड् लसी बूलपबा न्हबा धिनकुनु यहूदीगदे हुप तबा दिमरी फेप्सी परमेश्वरला बचनग्याम पढब लबारी छ्याइजी। 17 ओच्छे थेदा यशैया अगमवक्तासे भिबा किताब पढब लबाला लागिरी पिन्जी। जमाहेन्से थे ठोड्सी चुहड् भिसी भिबा ग्ला तेःसी पढब लजी।

18 “परमप्रभु परमेश्वरला आत्मा डादेन छ्याम मुला।

तिग्दा भिसम प्राडबोगदेदा परमेश्वरला यहुल्साला समाचार थेःना लबारी

ओच्छे झ्यालखानरी मुबागदेदा परमेश्वरला यहुल्साला समाचार थेःना लसी झ्यालखानग्याम तेःबारी,

* 4:4 व्यव ८:३

* 4:8 व्यव ६:१३

* 4:10 भजन ९१:११

* 4:11 भजन ९१:१२

* 4:12 व्यव ६:१६

मी आम्राड्बागदेदा मी म्राड्ना लबारी
ओच्छे दुखरी मुबागदेदा दुखग्याम फेबारी,*

19 थेहड् लसीन हाडला म्हिगदेदा परमेश्वरसे थार्बा पिन्बा धुड खसी जिन्बा मुला भिसी
थे:ना लबारी परमेश्वरसे डादा धम्सी पुडखबा हिन्ना।”

20 जमाहेन्से येशूसे किताब बन्द लसी थेरी मुबा म्हिदा पिन्सी धन्छ्याजी। यहूदीगदे हुप तबा
दिमरी मुबा जम्मान म्हिगदेसे येशूदा च्यासी चिबा मुबा। 21 ओच्छे येशूसे थेनीगदेदा “परमेश्वरला
बचनरी भिबा चु ताम तिनी एनीगदेसे ड्यानना ड्याननान पूरा तबा मुला” भिसी सुड्जी। 22 येशूसे
सुड्बा दयामायाला ताम थे:सी थेनीगदे उदेक म्हन्सी जम्मासेन थेला तामदा ज्यबा भिजी। ओच्छे
“चु योसेफला झा आहिन?” भिसी थेनीगदेसे भिजी।

23 येशूसे थेनीगदेदा “एनीगदेसे डादा पक्कान चु उखान भिला ‘डाक्टर, हाडसे हाडदान खम्ना
लउ। एसे कफर्नहुमरी उदेकला गे लजी भिसी डन्से थे:मुबा थे गे एसे हाडला नाम्सारीनोन लउ’ भिसी
पाड्ला” भिसी सुड्जी। 24 दो:सी येशूसे थेनीगदेदा चुहड् भिसी सुड्जी, “च्यागो, खजिबै अगमवक्तादा
हाडलान नाम्सारी मान आल।* 25 तर ड्यानगो, चु सत्य हिन्ना। तिगदा भिसम एलियाला धुडरी
इस्त्राएलरी हेम्बो सिबा म्रिडम्हेमेगदे ल्हानान मुबा। थे धुडरी सोम दिडसे ला दुधोना नाम आखबासे
लमा यहुल्सा नाडनोन अनिकाल तबा मुबा।* 26 तर परमेश्वरसे एलियादा स्य्हान्दो खालै मुबा ग्लारी
आपुड्ना सीदोनला सारपत भिबा नाम्सारी मुबा हेम्बो सिबा म्रिडम्हेमे मुबा ग्लारी जे पुड्जी।* 27 थेहड्
लसीन एलीशा अगमवक्ताला धुडरीएनोन इस्त्राएलरी कोरे खबा म्हिगदे ल्हानान मुबा। तर थेनीगदे
न्हडरी सिरिया यहुल्साला नामान भिबा कोरेला जे कोरे म्हाजी। तर स्य्हान्दो म्हिगदे खालैलान
आम्हानी।”*

28 चु ताम थे:सी यहूदीगदे हुप तबा दिमरी मुबा जम्मान म्हिगदेदा बोमो खजी। 29 जमाहेन्से थेरी
मुबा म्हिगदेसे येशूदा शहरग्याम मडग्यार ते:जी। थे शहर गडरी मुबा, थेतबासेलमा थेनीगदेसे येशूदा
गडला जोरी भोर्सी हिल्ना लबारी छ्याड्जी। 30 तर येशू थे म्हिगदेला गुडग्याम थोन्सी फेपूजी।

येशूसे म्हड तापूबा

मर्कूस १:२१-२८

31 जमाहेन्से येशू गालीलला कफर्नहुम भिबा शहररी फेपूजी। ओच्छे ब्लपूबा न्हबा धिनकुनु
म्हिगदेदा परमेश्वरला बचनग्याम लोपूबारी छ्याड्जी। 32 येशूसे लोपूबा म्राड्सी थेनीगदे उदेक तजी।
तिगदा भिसम येशूसे अधिकार लसी म्हिगदेदा लोपूबा मुबा।* 33 यहूदीगदे हुप तबा दिम न्हडरी म्हडसे
स्यापूबा म्हि गिक मुबा। थे म्हडसे स्यापूबा म्हिसे क्रिड्बान, 34 “नासरतला येशू, हाडसे डन्दा तिग
लबारी छ्याड्बा? तिग हाड डन्दा साडबारी फेपूखबा हिन्ना? हाड परमेश्वरसे पुडखबा परमेश्वरला
म्हि भिसी डादा था मुला” भिसी भिजी।

35 चुहड् भिबा थे:सी येशूसे थे म्हडदा बड्बान, “कुटिसी चिउ! थे म्हिग्याम थोन्सी निउ!”
सुड्मैछ्याम थे म्हिदा जम्मान म्हिला ओन्छाडरी लछार पछार लसी थोन्सी निजी, तर थे म्हिदा तिगै
आतनी। 36 चु म्राड्सी जम्मान म्हिगदे उदेक म्हन्सी, “चु म्हिला बोली बचनरी खाहड्बा अधिकार
चीम, थेला अधिकारदेन शक्तिसे कुल्मैछ्याम म्हडगदे थोन्सी यार्बा चीम!” भिसी भिजी। 37 ओच्छे
येशूसे लबा गे कफर्नहुम शहरला क्यारमारला जम्मान ग्लारी थे:जी।

येशूसे ल्हानान म्हिगदेदा खम्ना लबा

मत्ती ८:१४-१७; मर्कूस १:२९-३४

38 येशू यहूदीगदे हुप तबा दिमग्याम थोन्सी सिमोनना दिमरी फेपूजी। थेरी सिमोनना स्युमी छवा
खसी आखम्बा मुबा। ओच्छे दिमरी मुबागदेसे “थेदा खम्ना लसी पिन्गो” भिसी बिन्ती लजी।

* 4:18 यशै ६१:१-२ * 4:24 यूह ४:४४ * 4:25 १ राजा १७:१ * 4:26 १ राजा १७:८-१६ * 4:27 २ राजा ५:१-१४

* 4:32 मत्ती ७:२८-२९

39 जमाहेन्से येशू सिमोनना स्युमीला डामरी फेप्सी छवादा म्हासी निउ भिसी सुड्मा थेला छवा म्हाजी। ओच्छे सिमोनना स्युमी तुरुन्तन रेःसी थेनीगदेदा क्योड्बारी छ्याइजी।

40 ओच्छे धिनी घल्माहेन्से म्हिगदेसे ल्हानान थरीला रोगसे स्याप्बा म्हिगदेदा येशू मुबा ग्लारी भजी। जमाहेन्से येशूसे थेनीगदेथोरी हाडला या थान्सी थेनीगदे जम्मादान खम्ना लजी। 41 जमाहेन्से ल्हानान म्हिगदेला ल्हुइग्याम म्हडगदे चुहड् भिबान क्रिड्सी थोन्जी, “हाड परमेश्वरला झा हिनना।” तर येशूसे थे म्हडगदेदा बड्बान दोःसी तिगै ताम पाड्आपुड्नी। तिगदा भिसम येशू थार्बा पिन्बा ख्रीष्ट हिनना भिसी थे म्हडगदेसे डोसेबा मुबा।

येशूसे परमेश्वरला य्हुल्साला समाचार थेःना लबा

मर्कुस १:३५-३९

42 स्य्हो तमाहेन्से येशू सुनसान ग्लारी फेप्जी। जमाहेन्से महिला हुलसे म्हाइबान येशू मुबा ग्लारी धोखजी। ओच्छे थेनीगदेसे येशूदा “डन्दा ख्लासी थाफेपगो” भिसी रोकब लबारी म्हाइजी। 43 तर येशूसे थेनीगदेदा “डाइ अर्गु ग्लागदेरीएनोन परमेश्वरला य्हुल्साला समाचार थेःना लतोःबा मुला। तिगदा भिसम परमेश्वरसे डादा चुलान लागिरी पुइखबा हिनना” भिसी सुड्जी। 44 जमाहेन्से येशू य्हूदियाला य्हूदीगदे हुप तबा दिमगदेरी फेप्सी थार्बा पिन्बा समाचार थेःना लजी।

5

येशूसे डाच्छा धम्बा चेलागदे

मत्ती ४:१८-२२; मर्कुस १:१६-२०; य्हूहन्ना १:४०-४२

1 परमेश्वरला बचन ड्यानबाला लागिरी ल्हानान म्हिगदे येशूला क्युसीन तोर हुइ मार हुइ लबान मुबा। थेतबासेलमा येशू गनेसरेत भिबा घ्योइला कुनीरी राप्सी धन्छ्याबा मुबा। 2 ओच्छे येशूसे घ्योइला कुनीरी दोंगा न्ही म्राड्जी। थे धुइरी माझीगदे दोंगा ख्लासी हाड हाडला घ्याड खुबान मुबा। 3 थेरी मुबा दोंगा गिक चा सिमोनना मुबा। येशू सिमोनना दोंगारी क्रेःसी, “दोंगा जजाकी क्यथाड भोगो” भिसी सिमोनदा सुड्जी। थे दोंगारी धन्छ्यासी म्हिगदेदा लोपबारी छ्याइजी।*

4 लोप्सी जिन्माहेन्से येशूसे सिमोनदा “दोंगा नुपबा ग्लारीक्यार भोगो, ओच्छे तार्डा चुड्बारी घ्याड रोपगो” भिसी सुड्जी। 5 चु थेःसी सिमोनसे येशूदा “गुरु, डन्से म्हुन गिक घ्याड क्लाड्सेनोन तार्डा गिकनोन आस्याप्नी। तर हाडसे कुल्बासे लमा डाइ घ्याड रोप्ला” भिसी भिजी।* 6 ओच्छे थेनीगदेसे घ्याड रोपमाहेन्से तार्डा ल्हानान स्याप्बासे लमा घ्याडनोन ठेबारी छ्याइजी।* 7 थेतबासेलमा थेनीगदेसे अर्गु दोंगारी मुबा हाडला ह्योगदेदा गुहार हीजी। जमाहेन्से थेनीगदे खसी तार्डा तेःबारी छ्याइजी। तार्डा तेःमा तेःमा दोंगा न्हीरीन तार्डा ल्हानान तबासे लमा दोंगा न्हीनोन डुबब तबारी छ्याइजी।

8 चु म्राड्सी सिमोन पत्रुससे येशूला स्यहापरी फ्या लसी, “प्रभु, डा पापी म्हि हिनना। थेतबासेलमा हाड डा मुबाग्याम फेपगो” भिसी भिजी। 9 तिगदा भिसम ल्हानान तार्डा स्याप्बासे लमा सिमोनदेन थेला ह्योगदे उदेक तजी। 10 ओच्छे सिमोनदेन छ्याम ठिक्सी गे लबा जब्दियाला झागदे याकूबदेन य्हूहन्नादाएनोन ल्हानान उदेक तजी। जमाहेन्से येशूसे सिमोनदा “थालोड्गो, दाहेन्से ए तार्डा चुड्बा म्हि आहिन, तर एसे म्हिगदेदा परमेश्वर मुबा ग्लारी भला” भिसी सुड्जी। 11 जमाहेन्से थेनीगदेसे दोंगा घ्योइला कुनीरी भसी हाडदेन छ्याम मुबा जम्मान स्येगदे ख्लासी येशूदेन छ्याम भ्रजी।

येशूसे कोरे खबा म्हिदा खम्ना लबा

मत्ती ८:१-४; मर्कुस १:४०-४५

12 तिरेकुनु येशू शहर गिकरी मुबा। ओच्छे थेनोन शहररी मुबा कोरे खबा म्हि गिकसे येशूदा म्राड्जी। जमाहेन्से थे येशूला डामरी खसी फ्या लबान, “प्रभु, हाडला सेम मुसम हाडसे डादा खम्ना लखम्ला” भिसी भिमा, 13 येशूसे थेदा हाडला छ्यासे थुर्सी, “ए खमगै भिबा डाला सेम मुला, ए खमगो” भिसी

* 5:3 मत्ती १३:१-२; मर्कुस ३:९-१०; ४:१ * 5:5 य्हूह २१:३ * 5:6 य्हूह २१:६

सुड्मैछ्याम थैला कोरे महाजी। 14 जमाहेन्से येशूसे थैदा “च्यागो, एसे चु ताम खालैदा थापाङ्गो! बरु ए निसी परमेश्वरला मन्दिररी पूजा लबा म्हिदा उन्गो। ओच्छे एला कोरे महाजी भिसी म्हिगदेसे था याङ्बाला लागिरी परमेश्वरसे मोशादा पिन्बा ठिमसे कुल्बा अन्छार बलि फुल्गो” भिसी कुल्जी।*

15 जमाकुनुहेन्से झन जम्मान ग्लारी येशूसे लबा गेला बारेरी थै:जी। थैतबासेलमा म्हिगदे येशूला ताम ड्यानबारीदेन हाडला रोग म्हागै भिसी येशू मुबा ग्लारी खजी। 16 तर येशू चा सुनसान ग्लारी फेप्सी प्रार्थना लबा मुबा।

येशूसे कुज्या म्हिदा खम्ना लबा

मत्ती ९:१-८; मर्कूस २:१-१२

17 तिरेकुनु येशूसे म्हिगदेदा लोपबान लबा धुडरी गालील अञ्चलदेन यहूदिया अञ्चलला नाम्सा नाम्साग्यामसे ओच्छे यरूशलेमग्याम खबा फरिसीगदेदेन यहूदी धर्मगुरुगदेएनोन थैरी मुबा। येशूदेन छ्याम आखम्बा म्हिगदेदा खम्ना लबा परमप्रभुला शक्ति मुबा। 18 थैनोन धुडरी म्हिगदेसे कुज्या म्हि गिकदा खाटरीन पुडसी भजी। ओच्छे थैनीगदेसे थै कुज्या म्हिदा दिम न्हडरी येशूला डाच्छापट्टि भोर्बारी म्हाइजी। 19 तर महिला हुलसे लमा थैनीगदेसे थै कुज्या म्हिदा येशूला डाच्छापट्टि भोर्बाला लागिरी ग्याम आयाङ्नी। थैतबासेलमा थैनीगदेसे थै कुज्या म्हिदा मडग्यारग्यामसे छानारी भोर्जी। ओच्छे छाना होकसी थैदा तीबा नान्बादेन छ्यामनोन येशूला डाच्छापट्टि धोना लजी। 20 थै म्हिगदेला विश्वास म्हाइसी येशूसे थै कुज्या म्हिदा “डाइ एला पापला दोष मेटब लबा मुला” भिसी सुड्जी। 21 येशूसे चुहड् सुड्बा म्हाइसी यहूदी धर्मगुरुगदेदेन फरिसीगदेसे “हाडसे हाडदान परमेश्वर सहोसी ताम लबा चु म्हि खाल हिन्ना? म्हिगदेला पापला दोष मी परमेश्वरसे जे मेटब लखम्मुला” भिसी हाड हाड न्हडरी पाङ्बारी छ्याइजी।

22 येशूसे थैनीगदेला सेमला ताम था याङ्सी चुहड् भिसी सुड्जी, “एनीगदेला सेमरी तिग्दा चुहड्बा म्हन्बा? 23 चु कुज्या म्हिदा ‘एला पाप माफ तबा मुला’ भिबादेन ‘रे:सी भ्रउ’ भिबारी खजिबा चा सजिलो मुला? 24 तर च्यागो, परमेश्वरसे पुडखबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिबा तामला प्रमाण डाइ एनीगदेदा उन्ना।” जमाहेन्से येशूसे थै कुज्या म्हिदा “ए रे:गो, ओच्छे एला तीबा नान्बा पुडसी दिमरी निउ।” 25 येशूसे थैहड् सुड्मैछ्याम थै कुज्या म्हि डोड रे:सी हाडला तीबा नान्बा पुडसी परमेश्वरला जयजयकार लबान दिमरी निजी। 26 जमाहेन्से थैरी मुबा जम्मान म्हिगदे लोड्सी उदेक म्हन्जी। ओच्छे परमेश्वरला जयजयकार लबान, “तिनी य्हाडसे ल्हानान उदेकला गे म्हाइजी” भिसी भिजी।

येशूसे लेवीदा ड्योइबा

मत्ती ९:९-१३; मर्कूस २:१३-१७

27 थैग्याम फेपबान लबा धुडरी येशूसे लेवी भिबा तिरो दुइबा म्हिदा तिरो दुइबा ग्लारी चिबान लबा म्हाइजी। ओच्छे येशूसे थैदा “डादेन छ्याम भ्रउ” भिसी सुड्जी। 28 जमाहेन्से लेवीसे जम्मान सहे ख्लासी रे:जी ओच्छे येशूदेन छ्याम भ्रजी।

29 ओच्छे लेवीसे येशूदा हाडला दिमरी भोज सोल्बारी ड्योइजी। थैरी येशूदेन छ्याम भोज चबारी चिबा म्हिगदे न्हडरी तिरो दुइबा म्हिगदेदेन ल्हानान स्य्हान्दो म्हिगदेएनोन मुबा। 30 जमाहेन्से फरिसीगदेदेन थैनीगदेला धर्मगुरुगदेसे येशूला चेलागदेदा बिरोध लबान, “तिग्दा एनीगदे तिरो दुइबा म्हिगदे ओच्छे स्य्हान्दो पापीगदेदेन छ्याम चिसी चबा थुड्बा लबा?” भिसी ड्योइमा,* 31 येशूसे थैनीगदेदा “खम्बा म्हिदा डाक्टर आतो:, तर आखम्बा म्हिदा जे डाक्टर तो:ला! 32 थैतबासेलमा परमेश्वरला डाच्छा ज्यबा मुबा म्हिगदेदा आहिन, तर डनी पापी हिन्ना भिसी भ्रबा म्हिगदेसे हाडला पाप ख्लासी परमेश्वरपट्टि दो:गै भिसी ड्योइबारी डा खबा हिन्ना” भिसी सुड्जी।

* 5:14 लेवी १४:१-३२ * 5:30 लूका १५:१-२

येशूसे फोइथान चिसी प्रार्थना लबाला लागिरी लोपबा

मत्ती ९:१४-१७; मर्कूस २:१८-२२

33 जमाहेन्से थेनीगदेसे येशूदा “यूहन्नाला चेलागदे सदन फोइथान चिसी प्रार्थना लमुला। ओच्छे फरिसीगदेला चेलागदेसेनोन थेहड्णोन लमुला। तर हाडला चेलागदेसे चा तिग्दा फोइथान चिसी प्रार्थना आलबा?” भिसी ड्योइमा, 34 येशूसे थेनीगदेदा “म्हाछार जन्तीगदेदेन छ्याम मुतेधोना थेनीगदेदा खाहड् लसी फोइथान चिउ भिखम्ला? 35 तर म्हाछार थेनीगदेग्याम फेसी भोर्बा धुइरी जे थेनीगदे फोइथान चिला” भिसी सुड्जी।

36 ओच्छे येशूसे थेनीगदेदा उखान गिकएनोन सुड्बान, “खालै म्हिसे बोक्टो क्वानरी छार क्वानगेन्से आख्या। थेहड् लसी ख्याजी भिसम छार क्वानएनोन न्होड्ला ओच्छे छार क्वानगेन बोक्टो क्वानदेन छ्याम ढिकएनोन आढिक। 37 ओच्छे खालै म्हिसे ढिला बोक्टो ताडरी अडगुरला कलिलो निडगु आयु, युजी भिसम कलिलो निडगुसे ढिला बोक्टो ताड भोसी ढेला। जमाहेन्से निडगु डेला ओच्छे ढिला ताडएनोन गे आखेलबा तला। 38 थेतबासेलमा कलिलो निडगु छार ढिला ताडरी युसी थान्तो:बा मुला। 39 खालैसे चिपबा निडगु थुड्सी कलिलो निडगु थुड्बा सेम आल, तिग्दा भिसम थेसे चिपबा निडगुन ज्यबा भिला।”

6

येशू बलपबा न्हबा धिननाएनोन प्रभु हिनना

मत्ती १२:१-८; मर्कूस २:२३-२८

1 बलपबा न्हबा धिनकुनु येशू बुग्याम फेपबान मुबा। थे धुइरी थेला चेलागदेसे ग्वाला नम थुसी यारी न्हड्सी चबारी छ्याइजी।* 2 तर फरिसीगदे न्हडरी कोइ कोइसे “थेनीगदेदा बलपबा न्हबा धिनकुनु लबारी आतबा गे एनीगदेसे तिग्दा लबा?” भिसी भिमा, 3 येशूसे थेनीगदेदा चुहड् भिसी सुड्जी, “एनीगदेसे परमेश्वरला बचन पढब लबा आरे? दाऊदसे थेदेन छ्याम मुबागदे फोखेन्बा धुइरी थेसे तिग लजी?”* 4 थेसे परमेश्वरला मन्दिररी पूजा लबा म्हिगदे बाहेक स्यहान्दोसे चबारी आतबा गेड परमेश्वरला दिमरी वाड्सी ते:सी चजी। ओच्छे थेसे हाडदेन छ्याम मुबागदेदाएनोन पिन्मा खालैसेन तिगै भिजी?”*

5 जमाहेन्से येशूसे थेनीगदेदा “परमेश्वरसे पुइखबा म्हि बलपबा न्हबा धिनना प्रभु हिनना” भिसी सुड्जी।

येशूसे या खर्बा म्हिला या खम्ना लबा

मत्ती १२:९-१४; मर्कूस ३:१-६

6 बलपबा न्हबा अर्गु धिनकुनु येशूसे यहूदीगदे हुप तबा दिम न्हडरी परमेश्वरला यहूलसाला बारेरी लोपबारी छ्याइजी। थेरी दाहिने या खर्बा म्हि गिक मुबा। 7 बलपबा न्हबा धिनकुनु येशूसे थे म्हिला खर्बा या खम्ना लला वा भिसी यहूदी धर्मगुरुगदेदेन फरिसीगदेसे दोष लबाला लागिरी चिवा लसी चिबा मुबा। 8 तर येशूसे थेनीगदेला सेमला ताम था याड्सी थे या खर्बा मुबा म्हिदा “ए रे:सी चुरी रापगो” भिसी सुड्जी। ओच्छे थे म्हि रापजी। 9 जमाहेन्से येशूसे थेनीगदेदा “थेहड् भिसम चु तामला जोहाब पिन्गो, बलपबा न्हबा धिनकुनु ज्यबा लबादेन नइबा लबा, अथवा म्हि सोना लबादेन सिना लबा खजिबा चा ज्यबा हिनना” भिसी सुड्जी। 10 ओच्छे येशूसे हाडला क्युर्सीन मुबा म्हिगदेदा स्हीसी थे या खर्बा मुबा म्हिदा “एला या तन्गब लउ!” भिसी सुड्जी। ओच्छे थेसे या तन्गब लमैछ्याम थेला या खम्जी। 11 चु म्हाड्सी फरिसीगदेदा बोमो रे:सी दाहेन्से येशूदा तिग लबा भिसी हाड हाड न्हडरी सल्लाह लजी।

येशूसे च्युक न्ही चेलागदेदा धम्बा

मत्ती १०:१-४; मर्कूस ३:१३-१९

* 6:1 व्यव २३:२५ * 6:3 १ शमू २१:१-६ * 6:4 लेवी २४:९

12 तिरेकुनु येशू गडरी फेप्सी म्हून गिकनोन परमेश्वरदेन छ्याम प्रार्थना लजी। 13 ओच्छे स्यहो तमाहेन्से येशूसे हाडला चेलागदेदा ड्योइसी थेनीगदे न्हडरी च्युक न्ही चेलादा धम्जी। ओच्छे थेनीगदेदा मुल चेला भिसी मिन थान्जी। 14 सिमोनदा येशूसे पत्रुस भिसी सुड्जी, थेला आले अनद्रियास ओच्छे याकूब, यूहन्ना, फिलिप, बारथोलोमाइ, 15 मत्ती, थोमा, अल्फयसला झा याकूब ओच्छे सिमोन। चु सिमोनदा हाडला यहुल्सादा माया लबा म्हि भिसी भिमुबा। 16 ओच्छे याकूबला झा यहूदा, ओच्छे यहूदा इस्करियोत चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

येशूसे ल्हानान म्हिगदेदा खम्ना लबा

मत्ती ४:२३-२५; मर्कूस ३:७-१२

17 येशू हाडसे धम्बा चेलागदेदेन छ्याम गडग्याम मार फाप्सी सम्म ग्लारी फेप्खसी राप्सी धन्छ्याजी। जमाहेन्से येशूदेन छ्याम भ्रबा महिला हुल ओच्छे यहूदिया अञ्चलला जम्मान ग्लादेन यरूशलेम, ओच्छे टुरोसदेन सीदोन भिबा ग्लाग्याम महिला हुल 18 येशूसे लोप्बा ताम ड्यानबारी ओच्छे हाड हाडला रोगगदे महाना लबारी खजी। थेरी म्हडसे स्याप्सी आखम्बा म्हिगदेएनोन खम्जी। 19 थेतबासेलमा जम्मान म्हिगदेसे येशूदा थुर्बारी महाइमुबा। तिग्दा भिसम येशूदेन छ्याम म्हिगदेदा खम्ना लबा शक्ति मुबा। थे शक्तिग्याम रोगसे स्याप्बा जम्मान म्हिगदे खम्जी।

दुखदेन सुख

मत्ती ५:१-१२

20 जमाहेन्से येशूसे हाडला चेलागदेदा सहीबान चुहड् भिसी सुड्जी, “दुख याड्बा म्हिगदे, एनीगदेसे परमेश्वरग्याम मोलम याड्ला।

तिग्दा भिसम परमेश्वरला यहुल्सा एनीगदेलान हिन्ना।

21 फोखेन्बा म्हिगदे, एनीगदेसे परमेश्वरग्याम मोलम याड्ला।

तिग्दा भिसम एनीगदेदा परमेश्वरसे म्नेन्ना लला।

ओच्छे क्राबा म्हिगदे, एनीगदेसे परमेश्वरग्याम मोलम याड्ला।

तिग्दा भिसम परमेश्वरसे एनीगदे ताड्सी डेःम्याड्ला।

22 “परमेश्वरसे पुड्खबा म्हिदा विश्वास लबासे लमा एनोन एनीगदेसे परमेश्वरग्याम मोलम याड्ला।*
तेःला ओच्छे जम्मासेन एनीगदेदा खिसी लमाएनोन एनीगदेसे परमेश्वरग्याम मोलम याड्ला।*

23 “थे धुइरी एनीगदे फुरफुर ताड्गो। तिग्दा भिसम स्वर्गरी एनीगदेसे घेन इनाम याड्ला। एनीगदेदा दुख पिन्बागदेला आखे म्हेमेगदेसेनोन अगमवक्तागदेदा चुहड् नोन लमुबा।*

24 फ्युकूपोगदे, एनीगदेसे परमेश्वरग्याम सजाय याड्ला।

तिग्दा भिसम एनीगदेसे मोजमजा लसी जिन्बा मुला।

25 म्नेन्बागदे, एनीगदे फोइथाननोन चितोःला।

तिग्दा भिसम एनीगदेसे परमेश्वरग्याम सजाय याड्ला।

ओच्छे ताड्बागदे दुख नासी क्रासी चितोःला।

तिग्दा भिसम एनीगदेसे परमेश्वरग्याम सजाय याड्ला।

26 म्हिगदेग्याम मान याड्बागदे, एनीगदेसे परमेश्वरग्याम सजाय याड्ला।

तिग्दा भिसम एनीगदेला आखे म्हेमेगदेसेनोन फट्टा अगमवक्तागदेदा चुहड् नोन लमुबा।

येशूसे शत्रुदाएनोन माया लतोःला भिसी लोप्बा

मत्ती ५:३८-४८; ७:१२

27 “तर डाइ लोप्बा ताम ड्यानबागदेदा डाइ भिला, एनीगदेसे हाडला शत्रुगदेदा माया लउ, ओच्छे हाडदा हेला लबागदेदा ज्यबा व्यवहार लउ। 28 एनीगदेदा केःबागदेदा परमेश्वरसे मोलम पिन्गै भिसी प्रार्थना लउ। ओच्छे खालैसे एनीगदेदा आज्यबा लजी भिसम थेनीगदेदा ज्यबा तगै भिसी परमेश्वरदेन

† 6:20 “दुख याड्बा म्हिगदे” भिबा तामदा ग्रीक बाइबलरी प्राडबोगदे भिसी भिबा मुला। * 6:22 १ पत्रु ४:१४ * 6:23 २ इति ३६:१६; मुल ७:५२

छ्याम प्रार्थना लउ। 29 खालैसे एदा ग्रम्बा गिकरी तोजी भसम अर्गुपट्टिला ग्रम्बाएनोन तासी पिन्गो। ओच्छे एला स्कोट भोर्बारी छ्याइबादा सहर्दमदाएनोन पिन्गो। 30 एदेन छ्याम ह्रीबागदेदा पिन्गो, ओच्छे एसे थेदेन छ्याम दोःसी थाह्रीगो। 31 एनीगदेदा स्य्हान्दो म्हिगदेसे जस्तो व्यवहार लगै भिसी म्हन्बा मुला, एनीगदेसेनोन स्य्हान्दोगदेदा थेह्ङ्गोन लउ।*

32 “चुदे एनीगदेदा माया लबादा जे एनीगदेसे माया लजी भिसम एनीगदेदा तिग ज्यबा तला? तिग्दा भिसम पापीगदेसेनोन हाडदा माया लबागदेदा माया लमुला। 33 ओच्छे एनीगदेसे हाडदा ज्यबा लबादा जे ज्यबा लजी भिसम एनीगदेदा तिग ज्यबा तला? तिग्दा भिसम पापीगदेसेनोन थेह्ङ्गोन लमुला। 34 चुदे एनीगदेसे दोःसी याड्बा सेम लसी खालैदा छे पिन्जी भिसम एनीगदेदा तिग ज्यबा तला? तिग्दा भिसम पापीगदेसे जे जति छे पिन्बा मुला ओतेन किन्बा आश लसी पापीगदेदान छे पिन्बा मुला। 35 तर हाडला शत्रुगदेदा माया लउ, जम्मादान ज्यबा लउ, दोःसी किन्बा सेम लसी छे थापिन्गो ओच्छे एनीगदेला मान घेन तला। एनीगदे स्वर्गरी धन्छ्याबा जम्मान भन्दा घेन परमेश्वरला सन्तान तला। तिग्दा भिसम परमेश्वरसे बैगुनीदेन हाडला जे ग्याम च्याबा म्हिगदेदाएनोन दया लमुला। 36 थेतबासेलमा एनीगदेला परमेश्वर आबासे दया लबा ह्ङ् एनीगदेसेनोन दया लउ।

स्य्हान्दोदा दोष थालउ

मत्ती ७:१-५

37 “स्य्हान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। म्हिगदेला निसाफ लसी थाभ्रउ ओच्छे परमेश्वरसेनोन एनीगदेला निसाफ आल। म्हिगदेदा माफ पिन्गो ओच्छे परमेश्वरसेनोन एनीगदेदा माफ पिन्ना। 38 म्हिगदेदा पिन्गो ओच्छे परमेश्वरसेनोन एनीगदेदा पिन्ना। परमेश्वरसे मी छुइसी छुइसी पिन्ना ओच्छे जुन दपबा सहेसे एनीगदेसे स्य्हान्दोगदेदा पिन्ना, थेनोन दपबा सहेसे एनीगदेसे याड्ला।”

39 येशूसे थेनीगदेदा उखानग्याम चुह्ङ् भिसी सुङ्जी, “तिग मी आम्राड्बा म्हिसे मी आम्राड्बा म्हिदान डोर्याब लखम्ला? चुदे थेसे डोर्याब लजी भिसम थे न्हीनोन व्हाडरी ताइला।* 40 ओच्छे खजिबै चेला हाडला गुरु भन्दा घेन आत, तर थेसे लोप्सी जिन्माहेन्से गुरु ह्ङ्बान तला।*

41 “स्य्हान्दोला गोरी सेः भ्रबा म्हाड्बासे हाडला गोरी मुइ भ्रबा तिग्दा आम्राड्बा? 42 हाडला गोरी भ्रबा मुइ आम्राड्बासे खाह्ङ् लसी आलेदा ‘खाइ, एला गोला सेः तेःसी पिन्ना भिसी भिखम्ला।† कप्टी, डाच्छा हाडला गोला मुइ तेःगो, ओच्छे जे एसे आलेला गोरी भ्रबा सेः तेःबारी खम्ला।

ज्यबा दोडला रोदेन आज्यबा दोडला रो

मत्ती ७:१६-२०; १२:३३-३५

43 “ज्यबा दोडरी आज्यबा रो आरो ओच्छे आज्यबा दोडरी ज्यबा रो आरो। 44 जम्मान दोड थेरी रोबा रो अन्छार डोसेला। पुजुला दोडग्याम अज्जीर आथु ओच्छे पोलाडला दोडग्यामएनोन अङ्गुर आथु।* 45 तिग्दा भिसम ज्यबा सेम मुबा म्हिला सेम न्हङ्ग्याम ज्यबान ताम थोन्मुला ओच्छे नइबा सेम मुबा म्हिला सेम न्हङ्ग्याम नइबान ताम थोन्मुला। थेतबासेलमा म्हिला सेम न्हङ्गरी जे मुला थेनोन थेला सुङ्ग्याम पाड्ला।*

बुद्धि मुबा म्हिदेन मूर्ख म्हिसे सहोबा दिम

मत्ती ७:२४-२७

46 “डाइ कुल्बा ताम आङ्ग्यान्सम तिग्दा डादा ‘प्रभु, प्रभु’ जे भिबा? 47 डा मुबा ग्लारी खबा म्हिसे डाइ पाड्बा ताम ङ्ग्यान्ना ओच्छे डाइ कुल्बा अन्छार गे लला। थे खाह्ङ्बा म्हि हिन्ना भिबा ताम डाइ एनीगदेदा पाड्ला। थे म्हिसे 48 हाडला दिम सहोबा धुडरी जग नुपना ख्वसी सहोजी। ओच्छे नाम, भाल खमा थे दिमरी टजी। तसैनोन थे दिम आफुपनी, तिग्दा भिसम थे दिमला जग नुपना ख्वसी

* 6:31 मत्ती ७:१२ * 6:39 मत्ती १५:१४ * 6:40 मत्ती १०:२४-२५; यूह १३:१६; १५:२० † 6:42 “हाडला गोरी मुइ भ्रबा भिबादेन आलेला गोरी मुबा सेः” भिबा तामदा ग्रीक बाइबलरी “हाडला मीरी मुबा मूढादा वास्ता आलना हाडला आलेला मीरी मुबा धुलु तेःसी पिन्ना” भिसी भ्रिबा मुला। * 6:44 मत्ती १२:३३ * 6:45 मत्ती १२:३४

स्होबा मुबा। 49 तर जुन म्हिसे डाइ पाड्बा ताम थे:सी थे अन्छार गे आल थे म्हि चा जग नुपना आख्वना दिम स्होबा म्हि हड्बा हिन्ना। थेतबासेलमा नाम, भाल बाढी खबा धुइरी थे दिमरी टसी थे दिम फुप्सी ल्हानान नोक्सान तजी।”

7

येशूसे कप्तानला नोकरदा खम्ना लबा

मत्ती ८:५-१३

1 चुहड् सुड्सी जिन्माहेन्से येशू कफर्नहुम भिबा ग्लारी फेपूजी। 2 थेरी रोमी कप्तान गिकला नोकर आखम्ना सिबारीन छ्याइबा मुबा। थेसे थे नोकरदा ल्हानान माया लमुबा। 3 थेतबासेलमा थेसे हाडला नोकरदा खम्ना लगै भिसी येशूदा फेपूखउ भिसी ड्योडबाला लागिरी यहूदी गन्बागदेदा पुइजी। तिग्दा भिसम थेसे येशूला बारेरी थे:बा मुबा। 4 जमाहेन्से थेनीगदे येशू मुबा ग्लारी खसी बिन्ती लबान, “थे हाडला दया याड्तो:बा खाल्ला म्हि हिन्ना। 5 तिग्दा भिसम थेसे यहूड यहूदी यहूलदा माया लमुला, ओच्छे थेसेन यहूदीगदे हुप तबा दिम स्होसी पिन्बा हिन्ना” भिसी भिजी।

6 जमाहेन्से येशू थेनीगदेदेन छ्याम फेपूजी। येशू कप्तानला दिम डामरी धोमा, कप्तानसे हाडला होगदेदा चुहड् भिउ भिसी येशू मुबा ग्लारी पुइजी, “प्रभु हाडसे दुख थालउ। तिग्दा भिसम हाड डाला दिमरी फेपूखबा धोनाला डा आरे। 7 डाएनोन हाड मुबा ग्लारी खबाधोनाला आम्हन्नी। थेतबासेलमा हाडसे डाला नोकर खमगै भिसी सुड् जे सुड्सेनोन थे खम्ला। 8 तिग्दा भिसम डाएनोन डाला हाकिमला तहरी चिबा म्हि हिन्ना। डाला तहरीनोन सिपाहीगदे मुला। डाइ कोइदा निउ भिमा निमुला, कोइदा खउ भिमा खमुला। ओच्छे डाला नोकरदा डाइ चुहड् लउ भिमा थेसे थेहड् नोन लमुला” भिसी भिजी।

9 थेला चुहड्बा ताम थे:सी येशू उदेक तजी, ओच्छे महिला हुलपट्टि दो:सी, “एनीगदेसे डाला ताम ड्यानगो, इस्राएल यहूलसाला म्हिगदे न्हडरीनोन डाइ चुहड्बा घेन विश्वास मुबा म्हि आस्यापनी” भिसी सुड्जी। 10 जमाहेन्से कप्तानसे येशू मुबा ग्लारी पुइबा म्हिगदे दो:सी दिमरी निमा, थे नोकर खम्सी जिन्बा म्राड्जी।

येशूसे हेम्बो सिबा म्रिडम्हेमेला झादा सिबाग्याम सोना लबा

11 न्हडगरदड येशू नाइन भिबा शहररी फेपूमा हाडला चेलागदेदेन महिला हुलएनोन येशूदेन छ्याम निजी। 12 ओच्छे येशू शहररी धोबारीन छ्याइमा सिबा म्हि भवान मुबा। थे सिबा म्हि हेम्बो सिबा म्रिडम्हेमेला गिक जेन झा मुबा। ओच्छे शहरला म्हिगदेएनोन थेदेन छ्याम मुबा। 13 थे म्रिडम्हेमेदा म्राड्सी प्रभुदा सेमहेन्सेन दया रे:जी। ओच्छे थेदा “ए थाक्रागो” भिसी सुड्जी। 14 जमाहेन्से येशू सिबाला डामरी फेपूसी सिबादा थुर्जी। चुहड् लसी थुर्मेछ्याम सिबा पुइबा म्हिगदे थेन तजी। जमाहेन्से येशूसे सिबा म्हिदा “कोला, रे:गो” भिसी सुड्जी। 15 जमाहेन्से सिबा म्हि रे:सी ताम पाड्बारी छ्याइजी। ओच्छे येशूसे थेदा थेला आमादा जिम्मा पिन्जी।

16 चु म्राड्सी जम्मान म्हिगदे लोड्सी परमेश्वरदा जयजयकार लबान चुहड् भिजी, “यहाडला गुडरी घेन अगमवक्ता गिक फेपूखबा मुला। ओच्छे परमेश्वरसे हाडला म्हिदा दया लबा मुला।” 17 जमाहेन्से येशूसे लबा गेला बारेरी यहूदियाला जम्मान ग्लारीदेन डाम डामला जम्मान जिल्लारी थे:जी।

बपत्तिस्मा पिन्बा यूहन्नासे हाडला चेला न्हीदा येशू मुबा ग्लारी पुइबा

मत्ती ११:२-१९

18 यूहन्नाला चेलागदेसे येशूसे लबा जम्मान गे हाडला गुरु यूहन्नादा पाड्जी। जमाहेन्से यूहन्नासे हाडला चेला न्हीदा ड्योइसी, 19 “डन्से फेपूखला भिसी आश लसी चिबा थार्बा पिन्बा ग्ले हाडनोन हिन्ना कि स्य्हान्दो खालैदा भ्रान्तो:बा हिन्ना?” भिसी येशू मुबा ग्लारी ड्योइबारी पुइजी। 20 जमाहेन्से थेनीगदे येशू मुबा ग्लारी निसी, “डन्से फेपूखला भिसी आश लसी चिबा थार्बा पिन्बा ग्ले हाडनोन हिन्ना कि स्य्हान्दो खालैदा भ्रान्तो:बा हिन्ना?” भिसी ड्योइबारी बपत्तिस्मा पिन्बा यूहन्नासे डन्दा हाड मुबा ग्लारी पुइखबा हिन्ना भिसी भिजी।

21 थे धुइरी येशूसे रोगसे स्यापबा ल्हानान म्हिगदेदेन म्हडसे स्यापबा म्हिगदेदा खम्ना लबान मुबा। ओच्छे मी आम्राड्बा ल्हानान म्हिगदेला मी म्राड्ना लजी। 22 जमाहेन्से यूहन्नाला चेलागदेदा येशूसे चुहड् भिसी सुड्जी, “एनीगदेसे जुन जुन ताम म्राड्बादेन थेःबा मुला, थेनोन ताम यूहन्ना मुबा ग्लारी निसी पाड्गो। मी आम्राड्बागदेला मी म्राड्ना लबा मुला, कुज्यादेन कोरे खबा म्हिगदेदा खम्ना लबा मुला, नाब्यड् आथेःबागदेदा थेःना लबा मुला, सिबागदेदा सोना लबा मुला, ओच्छे प्राड्बोगदेदा परमेश्वरला यहूलसाला समाचार थेःना लबान मुला।* 23 जुन म्हिसे शङ्का आलना विश्वास लला थे म्हिसे परमेश्वरग्याम मोलम याड्ला।”

24 यूहन्नाला चेलागदे दोःसी निमाहेन्से येशूसे यूहन्नाला बारेरी महिला हुलदा चुहड् भिसी सुड्बारी छ्याड्जी, “एनीगदे तोडतोडबा ग्लारी तिग च्याबारी निबा मुबा? तिग लाबासे यहोड्बा मा दोड च्याबारी निबा हिन्ना? 25 ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, थेहड्बा ज्यबा ज्यबा क्वान क्वान्बादेन मोजमजा लबा म्हि मी ग्लेखाडरी जे चिबा मुला। 26 एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाड्ला एनीगदेसे स्यहान्दो अगमवक्तागदे भन्दा घेन म्हि गिकदा म्राड्बा मुला। 27 थे अगमवक्ता थेनोन हिन्ना, थेला बारेरी परमेश्वरला बचनरी चुहड्बा भिबा मुला, ‘च्यागो, डाइ डाला समाचार भोर्बा म्हिदा एला डाच्छा डाच्छा पुड्खला। थेसे एला लागिरी ग्याम सहोला’।*

28 “थेतबासेलमा च्यागो, दान्देधोना न्हबा कोलागदे न्हडरी यूहन्ना भन्दा घेन म्हि खालै आरे। तसैनोन परमेश्वरला यहूलसारी जुन म्हि जजा मुला थे म्हि यूहन्ना भन्दा घेन म्हि तला।”

29 ओच्छे तिरो दुड्बा म्हिगदेदेन स्यहान्दो म्हिगदेसे यूहन्नाला ताम थेःसी, “परमेश्वरसे कुल्बा ताम ठीक हिन्ना” भिसी थेग्याम बपत्तिस्मा किन्बा मुबा।* 30 तर फरिसीगदेदेन यहूदी धर्मगुरुगदेसे चा परमेश्वरसे कुल्बा ताम गे आखेलबा ताम हिन्ना भिसी यूहन्नाग्याम बपत्तिस्मा आकिन्बा मुबा। 31 येशूसे थेनीगदेदा चुहड् भिसी सुड्जी, “थेहड्बा म्हिगदेदा डाइ तिगदेन छ्याम दाँजब लसे? थेनीगदे खाहड्बा मुला भिसम, 32 बजाररी चिबा कोलागदे हड्बा मुला। थेनीगदे हाड हाड न्हडरी चुहड् भिसी कल लेमुला,

‘डन्से एनीगदेला लागिरी बाँसुरी हाप्सी पिन्जी, तर एनीगदे आस्यहनी।

ओच्छे डन्से दुखला व्हाड गोजी, तर एनीगदे आक्रानी?’

33 तिगै चबा थुड्बादेन अडगुरला निडगुएनोन आथुड्बा बपत्तिस्मा पिन्बा यूहन्ना खमा एनीगदेसे ‘थेदा म्हडसे स्यापबा म्हि’ भिसी भिबा मुबा। 34 परमेश्वरसे पुड्खबा म्हि चा चबा थुड्बा लसी भ्रजी। थेतबासेलमा म्हिगदेसे डादा ‘च्यागो, ल्हानान चबा सहेदेन ल्हानान निडगु कासी ड्यहोड्सी भ्रबा, तिरो दुड्बादेन पापीगदेला हो’ भिसी भिमुला! 35 तर परमेश्वरग्याम बुद्धि याड्बागदेसे जे परमेश्वरला बुद्धि ठीक हिन्ना भिसी था याड्बा मुला।”

येशू फरिसीला दिमरी फेपबा

36 फरिसीगदे न्हडला गिकसे येशूदा सोल छ्योड्बारी ड्योड्जी। ओच्छे थेला दिमरी फेपसी येशू सोल छ्योड्बारी धन्छ्याजी। 37 थे शहररी मुबा पापी म्रिड्महेमे गिकसे फरिसीला दिमरी येशू सोल छ्योड्बारी फेपखजी भिबा थेःसी सिड्गमरमरला बोटलरी अत्तर भसी येशू मुबा ग्लारी खजी।* 38 थे येशूला ग्यापग्याम खसी येशूला डामरी राप्सी क्राजी, ओच्छे थेला मीख्लीसे येशूला स्यहाप भम्जी। जमाहेन्से थेसे हाडला क्रासे येशूला स्यहाप फ्यासी च्योक लसी। येशूला स्यहापरी अत्तर फोर्बारी छ्याड्जी। 39 चुहड् लबा म्राड्सी येशूदा ड्योड्बा फरिसीसे “चु म्हि अगमवक्ता हिन्सम थेदा थुर्बा म्रिड्महेमे खाहड्बा म्रिड्महेमे भिसी डोसेसेला मुबा। तिग्दा भिसम चु पापीस्या हिन्ना” भिसी हाडला सेम न्हडरी म्हन्जी।

* 7:22 यशै ३५:५-६; ६१:१ * 7:27 मला ३:१ * 7:29 मत्ती २१:३२; लूका ३:१२ * 7:37 मत्ती २६:७; मर्कू १४:३; यूह १२:३

† 7:38 स्यहाप च्योक लबा चा यहूदीला ठिम अन्छार यहडसे फ्या लबा हड्बान हिन्ना।

40 थेसे सेमरी चुहड्बा ताम म्हन्बा था याड्सी येशूसे फरिसीदा “सिमोन डाइ एदा ताम गिक पाड्तोःबा मुला” भिसी सुड्जा, थेसे “सुड्गो गुरु” भिसी भिजी। 41 “च्यागो, म्हि न्हीसे साहू गिकदेन छ्याम छे किन्बा मुबा गिकसे ग्यार्जा डा ओच्छे स्य्हान्दोसे बोगल न्हीसे च्युइ टाडगा किन्बा मुबा। 42 थे न्हीसेन छे फाआखम्बासे लमा साहूसे थे न्हीदान माफ पिन्जी। थेतबासेलमा, लु, पाड्गो थे न्ही न्हडरी खजिबासे चा साहूदा ल्हाना माया लला” भिसी ड्योइमा, 43 “ल्हाना माफ याड्बासे” भिसी सिमोनसे भिमा, “एसे ठीक भिजी” भिसी येशूसे थेदा सुड्जी।

44 ओच्छे थे म्रिडम्हेमेपट्टि दोःसी येशूसे सिमोनदा चुहड् सुड्जी, “चुदा च्यागो, डा एला दिमरी खमा एसे डादा काड खुबारी क्युइएनोन आपिन्नी तर चुसे मी डाला काड मीख्लीसे खुसी हाडला क्रासे फ्यासी पिन्जी। 45 एसे डादा च्योक लसी फ्याआफुल्नी, तर चुसे मी खमाहेन्सेन डाला काडरी च्योक लबाला लबान मुला। 46 ओच्छे एसे डाला थोबोरी छ्युगु फोर्सी आपिन्नी। तर चुसे मी डाला काडरी अत्तर फोर्सी पिन्जी। 47 थेतबासेलमा एसे डाला ताम ड्यानगो, चुसे ल्हानान पाप लसैनोन माफ याड्सी जिनबा मुला। तिग्दा भिसम चु म्रिडम्हेमेसे ल्हानान मान लबा मुला। तर जुन म्हिदा जजाकी जे माफ लला, थेसे जजाकी जे मान लला।”

48 ओच्छे येशूसे थे म्रिडम्हेमेदा “एला पाप माफ तबा मुला” भिसी सुड्जी।

49 थेरी चबारी चिबा म्हिगदेसे चु ताम थेःसी, “पाप माफ लबा चु म्हि खाल हिन्ना?” भिसी हाड हाड न्हडरी भिबारी छ्याइजी। 50 ओच्छे येशूसे थे म्रिडम्हेमेदा “एला विश्वाससे लमा एसे थाबा याड्बा मुला, ए ढुकक तसी निउ” भिसी सुड्जी।

8

येशूसे परमेश्वरला य्हुल्साला समाचार थेःना लबा

1 जमाहेन्से येशू शहर शहरदेन नामसा नामसा तसी परमेश्वरला य्हुल्साला समाचार थेःना लबान फेपजी। थेला च्युक न्ही चेलागदेएनोन थेदेन छ्यामनोन मुबा। 2 ओच्छे येशूसे म्हडसे स्यापबादेन रोगग्याम खम्ना लबा कोइ कोइ म्रिडम्हेमेगदेएनोन येशूदेन छ्याम मुबा, थेनीगदे न्हडरी मरियम मग्दलिनी भिबा म्रिडम्हेमेला ल्हुड्ग्याम येशूसे गोर निस म्हड तापबा मुबा। 3 ओच्छे सुसननादेन हेरोद ग्लेला दिमरी गे लबा म्हिगदे न्हडला खुजास भिबा मुल महिला म्रिड योअन्नाएनोन येशूदेन छ्याम मुबा। ओच्छे थेनीगदेदेन स्य्हान्दो म्रिडम्हेमेगदेसे हाडलान टाडगासे येशूदा हो लमुबा।*

ब्लु ढ्वबाला उखान

मत्ती १३:१-९; मर्कूस ४:१-९

4 जमाहेन्से नामसा नामसाग्याम महिला हुल खसी येशू मुबा ग्लारी पोप तजी। ओच्छे येशूसे थेनीगदेदा उखान गिक चुहड् भिसी सुड्जी, 5 “च्यागो, ब्लु ढ्वबा म्हि गिक ब्लु ढ्वबारी भ्रजी। थे म्हिसे ब्लु ढ्वमा कोइ ब्लु ग्यामरी परब तजी। थे ब्लु म्हिसे नाड्जी ओच्छे चरागदे खसी चजी। 6 कोइ ब्लु चा युडबाला घहड मुबा सरी परब तजी, ओच्छे फुड्मैछ्याम सिजी। तिग्दा भिसम थे स खर्बा मुबा। 7 कोइ ब्लु चा पुजु झाडरी परब तजी। ओच्छे थे ब्लु पुजुदेन छ्याम छ्यामनोन ल्हेसी निसैनोन पुजु दोडला हापसे लमा थे दोडरी तिगै आरोनी। 8 तर कोइ ब्लु चा ज्यबा सरी परब तजी, ओच्छे थे दोडरी दोबबर, तेबबर, चौबरधोना रोजी।” चुदे सुड्माहेन्से येशूसे थेरी मुबा म्हिगदेदा “जुन म्हिदा ड्यानबा सेम मुला, थेसे ड्यानसी घोड।”

ब्लु ढ्वबा उखानना अर्थ

मत्ती १३:१०-२३; मर्कूस ४:१०-२०

9 जमाहेन्से चेलागदेसे येशूदा चु उखानना अर्थ तिग भिसी ड्योइजी। 10 येशूसे थेनीगदेदा चुहड् भिसी सुड्जी, “डाइ एनीगदेदा म्हिसे था आयाड्बा परमेश्वरला य्हुल्साला ताम घोरखम्बा ज्ञान बुद्धि पिन्बा मुला। तर स्य्हान्दोगदेदा चा उखानग्याम पाड्बा मुला। थेतबासेलमा

* 8:3 मत्ती २७:५५-५६; मर्कूस १५:४०-४१; लूका २३:४९

‘थेनीगदेसे च्याबाम च्याला तर आम्राड्,
ड्यान्बाम ड्यान्बा मुला तर आघो।’*

11 “च्यागो, चु उखानना अर्थ चुनोन हिन्ना, चु ब्लु भिबा चा परमेश्वरला बचन हिन्ना। 12 ग्यामला कुनीरीक्यार परब तबा ब्लुला अर्थ चा जुन म्हिसे परमेश्वरला बचन ड्यान्बाम ड्यान्ना तर सेमरी थान्बारी चा आखम्मुला। तिगदा भिसम थेनीगदेसे विश्वास लसी थाबा थायाड्गै भिसी शैतान खसी थेनीगदेला सेमग्याम परमेश्वरला बचन ब्यन्सी भोर्मुला। 13 थेहड् लसीन युड्बाला घहडरी परब तबा ब्लुला अर्थ चा थेनीगदेसे परमेश्वरला बचन ज्यबा म्हन्सी विश्वास मी लला। तर थेनीगदेला विश्वासला टा आरेबासे लमा तिगै धिन लिच्छा थेनीगदेदा तबा दुखसे लमा थेनीगदेसे विश्वास लबा खलाला। 14 ओच्छे पुजु झाड न्हडरी परब तबा ब्लुला अर्थ चा थेनीगदेसे जम्बुलिडरी म्राड्बा धन सम्पत्तिदेन मोजमजा, ओच्छे थेनीगदेदा तबा धन्दा सुर्दासे लमा विश्वासरी कोड्सी चिआखम्बासे लमा थेनीगदेला विश्वासग्याम तिगै आरो। 15 तर ज्यबा सरी परब तबा ब्लुला अर्थ चा जुन म्हिसे परमेश्वरला बचन ड्यान्सी हाडला ज्यबा सेमहेन्सेन विश्वास लला। ओच्छे थेला विश्वासग्याम गोल्से गोल्से ज्यबा रोगदे रोबान निला।

नाडसलला अर्थ

मर्कूस ४:२१-२५

16 “खालैसे नाडसल म्रासी फामसे घप्सी आथान, ओच्छे खाट धिरीएनोन छुम्सी आथान। तर दिम न्हडरी खबा महिगदेदा यहाल तगै भिसी नोबा ग्लारी थान्ना।* 17 लहुसैनोन आम्राड्बा सहे तिगै आरे। ओच्छे छुम्सी थान्सैनोन आघोबा सहे तिगै आरे।* 18 जुन म्हिसे डाइ लोप्बा तामदा सेम लसी ड्यान्ना, थेदा डाइ अझ घोना लला। तर डाइ लोप्बा ताम आड्यान्बादा चा थेसे जुन घोबा मुला थे तामएनोन म्हाना लला।”*

येशूला आमादेन आलेगदे

मत्ती १२:४६-५०; मर्कूस ३:३१-३५

19 थे धुडरी येशूला आमादेन आलेगदे येशूदा स्यापबारी येशू मुबा ग्लारी खजी। तर येशूला क्युर्सीन महिला हुल मुबासे लमा थेनीगदेसे येशूदा स्यापबारी आखम्नी। 20 जमाहेन्से थेरी मुबा खालै म्हिसे “हाडदा स्यापबारी हाडला आमादेन आलेगदे मडग्यार भ्रान्सी चिबा मुला” भिमा, 21 “च्यागो, जुन म्हिसे परमेश्वरला बचन ड्यान्सी परमेश्वरसे कुल्बा ताम ड्यान्ना थेनोन डाला आमादेन आलेगदे हिन्ना” भिसी येशूसे थेनीगदे जम्मादान सुड्जी।

येशूसे लाबालुडसर म्हाना लबा

मत्ती ८:२३-२७; मर्कूस ४:३५-४१

22 तिरिकुनु येशू हाडला चेलागदेदेन छ्याम दोंगारी केःमाहेन्से “लु, यहाड समुन्द्रला क्याम्सडपट्टि निड” भिसी चेलागदेदा सुड्जी। जमाहेन्से येशू हाडला चेलागदेदेन छ्याम क्याम्सड फेपजी। 23 थेनीगदे फेपबान लबा धुडरी येशू दोंगारीन छुप निजी। जमाहेन्से समुन्द्ररी घेन लाबालुडसर खजी, लाबालुडसरसे लसी समुन्द्ररी छाल रेःजी, छालसे लमा दोंगा डुबब तबारी छ्याइजी, जमाहेन्से थेनीगदेदा आपत विपत तजी। 24 जमाहेन्से चेलागदे येशूला डामरी खसी येशूदा छिड्बान, “गुरु, यहाड सिबारी छ्याइजी” भिसी भिजी। चेलागदेला चुहड्बा ताम थेःसी येशू सहेड्सी लाबालुडसरदा बड्जी। बड्मैछ्याम लाबालुडसर म्हासी शान्त तजी। 25 येशूसे थेनीगदेदा “खाड, एनीगदेला विश्वास” भिसी सुड्मा, थेनीगदे लोड्सी उदेक म्हन्बान हाड हाड न्हडरी “चु खाल? लाबालुडसरसेनोन थेसे कुल्बा ताम ड्यान्बा चीम” भिसी ताम लजी।

येशूसे महिला ल्हुड्ग्याम म्हड तापबा

मत्ती ८:२८-३४; मर्कूस ५:१-२०

* 8:10 यशै ६:९-१० * 8:16 मत्ती ५:१५; लूका ११:३३ * 8:17 मत्ती १०:२६ * 8:18 मत्ती २५:२९; लूका १९:२९

26 येशू हाडला चेलागदेदेन छ्याम गालील अञ्चलला क्याम्सडपट्टि गेरासेनस भिबा ग्लारी धोखजी। 27 येशू दोंगाग्याम फपमैछ्याम थे शहररी मुबा म्हडसे स्यापबा म्हि गिक येशूदा स्यापबारी खजी। थे क्वान आक्वाननान भ्रबा ल्हानान तसी जिन्बा मुबा। ओच्छे थे दिमरी आचिना धुर्सारीक्यार चिबा मुबा। 28 थेसे येशूदा म्राड्मैछ्याम क्रिड्बान येशूला डाच्छापट्टि ख्लुप तसी, “जम्मान भन्दा घेन परमेश्वरला झा येशू हाडसे डादा तिग लबा सेम मुला? डादा दुख थापिन्गो” भिसी बिन्ती लजी। 29 तिग्दा भिसम येशूसे थे म्हडदा थे महिला लहुड्ग्याम थोन्सी निउ भिसी कुल्बा मुबा। थेदा थे म्हडसे ल्हानान रेम चुड्बा मुबा। थे म्हिदा या काडरी च्याल्दासे खीसी खुड्सी चिसैनोन म्हडला शक्तिसे लमा थेसे च्याल्दा फ्राटफ्रेट टाड्सी थे हिरीक्यार यार्मुबा।

30 येशूसे थेदा “एला मिन तिग?” भिसी ड्योडमा, “डा हुल हिनना” भिसी भिजी। तिग्दा भिसम थे महिला लहुड्गी ल्हानान म्हड मुबा। 31 ओच्छे म्हडगदेसे “डन्दा ल्हानान नुप्बा व्हाडरीं थापुड्गो” भिसी येशूदेन छ्याम बिन्ती लजी।

32 थे ग्लाला डामला गडरी ढ्वला बथान छबान मुबा। थेतबासेलमा थे म्हडगदेसे डन्दा थे ढ्वागदे न्हडरी वाड्पुड्गो भिसी बिन्ती लमा थेनीगदेदा येशूसे “निउ” भिसी सुड्जी। 33 जमाहेन्से थे म्हडगदे थे महिला लहुड्ग्याम थोन्सी ढ्वागदे न्हडरी वाड्माहेन्से थेरी मुबा जम्मान ढ्वागदे गड्ग्याम समुन्द्ररी छ्योड्सी सिजी।

34 चुहड् तबा म्राड्सी ढ्वा छबा म्हिगदे यार्जी। ओच्छे नाम्सा नाम्सादेन शहर शहररी निसी थेनीगदेसे म्राड्बा जम्मान ताम थे:ना लजी। 35 थेनीगदेसे पाड्बा ताम थे:सी ल्हानान म्हिगदे च्याबारी येशू मुबा ग्लारी खमा, थेनीगदेसे डाच्छा म्हडसे स्याप्सी म्योसी भ्रबा म्हि खम्सी क्वान क्वान्सी येशूला डामरी चिबा म्राड्जी। चु म्राड्सी थेनीगदे लोड्जी। 36 थे म्हडसे स्यापबा म्हि खाहड् लसी खम्जी भिसी म्राड्बा म्हिगदेसे थेरी च्याबारी खबा म्हिगदेदा पाड्जी। 37 जमाहेन्से गेरासेनस भिबा नाम्साला क्यारमारला म्हिगदेसे येशूदा “डनी मुबा ग्लाग्याम फेपगो” भिसी बिन्ती लजी। तिग्दा भिसम थेनीगदे ल्हानान लोड्सी उदेक तबा मुबा। थेतबासेलमा येशू थे ग्लाग्याम दोंगारी क्रे:सी फेपबारी छ्याड्मा, 38 येशूसे म्हड ताप्सी खम्ना लबा म्हिसे “डाएनोन हाडदेन छ्याम निबा” भिसी येशूदेन छ्याम बिन्ती लमा येशूसे थेदा, 39 “ए हाडला दिमरी निउ ओच्छे परमेश्वरसे एला लागिरी खाहड्बा गे लबा मुला, थे ताम जम्मादान थे:ना लउ” भिसी सुड्जी। जमाहेन्से थे म्हि निसी येशूसे हाडला लागिरी लबा गेला बारेरी शहरला जम्मान ग्लारी थे:ना लबान भ्रजी।

याइरसला झामेदेन का निबा बेथासे स्यापबा म्रिडम्हेमे खम्बा

मत्ती ९:१८-२६; मर्कूस ५:२१-४३

40 जमाहेन्से येशू दो:सी फेपखमाहेन्से महिला हुलसे येशूदा फ्याफुल्जी। तिग्दा भिसम थेनीगदे येशू फेपखला भिसी भ्रान्सी चिमुबा। 41 थेनोन धुडरी याइरस भिबा यहूदीगदे हुप तबा दिमला नेता येशू मुबा ग्लारी खसी येशूला स्यहापरी फ्या लबान, “डाला दिमरी फेपखउ” भिसी बिन्ती लजी। 42 तिग्दा भिसम थेला गिक जेन मुबा च्युक न्ही दिडला झामे सिबारीन छ्याड्बा मुबा। जमाहेन्से येशू फेपबान लबा धुडरी म्हिगदेसे तोर हुड मार हुड लबारी छ्याड्जी। 43 थेरी का निबा बेथासे स्यापसी च्युक न्ही दिड तबा म्रिडम्हेमे गिक मुबा। थेसे हाडला जम्मान सम्पत्ति खर्च लसी मन लसैनोन थेदा खालैसे खम्ना लआखम्बा मुबा। 44 थेतबासेलमा थे येशूला ग्यापग्याम खसी येशूला क्वान्ना जोरी थुर्जी। थेसे येशूला क्वान थुर्मेछ्याम थेला का निबा बेथा म्हाजी।

45 जमाहेन्से येशूसे “डादा खाल्से थुर्जी” भिसी सुड्मा, जम्मासेन “डाइ थुर्बा आहिन” भिसी भिजी। तर पत्रुससे चा “गुरु, हाडदा म्हिगदेसे तोर हुड मार हुड लबान मुला” भिसी भिजी। 46 तर येशूसे “आहिन, डादा खालैसे थुर्बा मुला, तिग्दा भिसम डाग्याम डाला शक्ति थोन्सी निबा डाइ था याड्जी” भिसी सुड्जी। 47 जमाहेन्से थे म्रिडम्हेमेसे हाड लासी चिबारी आतनम भिसी फितफित धर्बान येशूला

† 8:31 चु पदरी “ल्हानान नुप्बा व्हाड” भिबा चा म्हड म्हड चिबा ग्ला हिनना। चु ताम (रोमी १०:७; उन्बा ९:१, २, ११; ११:७; १७:८; २०:१, ३) पदरी एनोन मुला।

डाचछापट्टि खसी फया लबान येशूदा तिग्दा थुर्जी ओच्छे थुर्मैछयाम हाड खाहड लसी खम्जी भिबा ताम जम्मान म्हिगदेला डाचछापट्टि पाड्जी। 48 ओच्छे येशूसे थे म्रिडम्हेमेदा “झामे, एला विश्वाससे लमा ए खम्बा मुला, ए दुक्क तसी निउ” भिसी सुड्जी।

49 येशूसे ताम लबान लबा धुइरी याइरसला दिमग्याम म्हि गिक खसी याइरसदा “हाडला झामे सिसी जिन्जी। दाहेन्से गुरुदा दुख थापिन्गो” भिसी भिजी। 50 तर येशूसे याइरसदा “थालोड्गो, एसे विश्वास जे लउ, ओच्छे एला झामे सोला” भिसी सुड्जी।

51 याइरसला दिमरी धोमाहेन्से येशूसे पत्रुस, याकूब, यूहन्नादेन थे माइला आबादेन आमादा बाहेक स्य्हान्दो खालैदान दिम न्हडरी खआपुड्नी। 52 याइरसला दिमरी पोप तबा म्हिगदे थे माइ सिजी भिसी क्राबा क्रिड्बा लसी चिबा मुबा। येशूसे थेनीगदेदा “थाक्रागो, थे सिबा आरे, म्हेर्सी चिबा मुला” भिसी सुड्जी। 53 येशूला ताम थे:सी थेनीगदेसे डे:बान येशूदा खिसी लजी। तिग्दा भिसम थे माइ सिसी जिन्बा मुला भिसी थेनीगदेदा था मुबा।

54 तर येशूसे थे माइला यारी चुड्सी, “माइ, ए रे:गो” भिसी सुड्मैछयाम, 55 थे माइला आत्मा दो:सी खजी ओच्छे थे डोड रे:जी। जमाहेन्से येशूसे “चु माइदा चबा सहे पिन्गो” भिसी सुड्जी। 56 चु म्राड्सी थे माइला आबादेन आमा उदेक तजी। तर येशूसे थेनीगदेदा “चु ताम खालैदा थापाड्गो” भिसी कुलजी।

9

येशूसे हाडला च्युक न्ही चेलागदेदा पुड्बा

मत्ती १०:५-१५; मर्कुस ६:७-१३

1 जमाहेन्से येशूसे हाडला च्युक न्ही चेलागदेदा ड्योइसी थेनीगदेदा म्हडगदे तापबादेन रोगगदे म्हाना लबा शक्तिदेन अधिकार पिन्सी, 2 परमेश्वरला यहुल्साला समाचार थे:ना लबारी ओच्छे आखम्बा म्हिगदेदा खम्ना लबारी पुड्जी। 3 ओच्छे येशूसे थेनीगदेदा चुहड् भिसी सुड्जी, “एनीगदेसे ग्यामला लागिरी कडी, झोला, चबा सहे, टाडगा ओच्छे पोबा क्वान तिगै थाभोर्गो। 4 जुन दिमला म्हिगदेसे एनीगदेदा मान लला, थे नाम्साग्याम थोन्सी आनितेधोना एनीगदे थे दिमरीन चिउ। 5 तर जुन ग्लाला म्हिगदेसे एनीगदेदा मान आल, एनीगदे थे शहरग्याम थोन्बा धुइरी दाहेन्से डन्से लतो:बा गे लसी जिन्जी। एनीगदेसे तिग लतो:बा लउ भिसी काडला धुलु खर्सी पिन्गो।”*

6 जमाहेन्से चेलागदे नाम्सा नाम्सारी निसी परमेश्वरला यहुल्साला समाचार थे:ना लबान आखम्बा म्हिगदेदा खम्ना लजी।

येशूला बारैरी थे:सी हेरोद ग्ले अलमल तबा

मत्ती १४:१-१२; मर्कुस ६:१४-२९

7 चु जम्मान गेला बारैरी थे:सी गालील अञ्चलरी शासन लबा हेरोद अलमल तजी। तिग्दा भिसम कोइ कोइ म्हिसे येशूदा “बपत्तिस्मा पिन्बा यूहन्ना सिबाग्याम सोसी खजीम” भिसी भिबा मुबा। 8 कोइ कोइसे चा “एलिया दो:सी खजीम” भिसी भिबा मुबा। ओच्छे स्य्हान्दो कोइ कोइसे चा “ओन्माला अगमवत्तागदे न्हडरी गिक सिबाग्याम सोसी खजीम” भिसी भिबा मुबा।* 9 थेतबासेलमा हेरोद ग्लेसे “चुहड्बा उदेकला गे लबा म्हि खाल हिन्ना? तिग्दा भिसम यूहन्नाला थोबो मी डाइनोन आपुड्बा हिन्ना” भिसी भिजी। ओच्छे थेसे तिरेम येशूदा स्यापबा सेम लजी।

येशूसे हजार डा म्हिगदेदा चबा सहे पिन्बा

मत्ती १४:१३-२१; मर्कुस ६:३०-४४; यूहन्ना ६:१-४

10 येशूसे परमेश्वरला यहुल्साला समाचार थे:ना लबारी पुड्बा मुल चेलागदे दो:सी खसी थेनीगदेसे लबा जम्मान गे येशूदा पाड्जी। जमाहेन्से येशूसे थेनीगदेदा जे भोर्सी बेथसेदा भिबा शहररी फेपजी। 11 तर चु ताम था याड्सी महिला हुल येशू मुबा ग्लारी निजी। जमाहेन्से येशूसे थेनीगदेदा खपुड्जी। ओच्छे म्हिगदेदा परमेश्वरला यहुल्साला समाचार थे:ना लबान आखम्बा म्हिगदेदा खम्ना लजी।

* 9:5 लूका १०:४-११; मुल १३:५१ * 9:8 मत्ती १६:१४; मर्कु ८:२८; लूका ९:१९

12 धिनी घल्बारी छ्याइमाहेन्से च्युक नही चेलागदे येशू मुबा ग्लारी खसी येशूदा “म्हिंगदेदा चुग्याम निपुङ्गो। तिगदा भिसम चु ग्लारी तिगै आरे। थेतबासेलमा थेनीगदे क्यारमारला नाम्सारी निसी चबा थुङ्बादेन चिबा ग्ला ढिकना लगै” भिसी भिजी।

13 तर येशूसे थेनीगदेदा “एनीगदेसेन चुगदेदा चबा सहे पिन्गो” भिसी सुङ्मा, थेनीगदेसे “डन्देन छ्याम गोर डा गेडदेन तार्डा नही जे मुला। आतसम डनी निसी चु जम्मान म्हिंगदेला लागिरी चबा सहे ग्लुसी भतोःला” भिसी भिजी।

14 थेरी हजार डा ते चा हेम्फेबे जे मुबा। ओच्छे येशूसे हाडला चेलागदेदा “म्हिंगदेदा बोगल नहीसे च्युइला लाम लसी चिपुङ्गो” भिसी सुङ्जी।

15 ओच्छे चेलागदेसे येशूसे सुङ्बा हङ्गोन लसी चिपुङ्गी। 16 जमाहेन्से येशूसे गोर डा गेडदेन तार्डा नही छ्यारी थोसी स्वर्गपट्टि सहीसी परमेश्वरदा धन्यवाद पिन्जी। ओच्छे येशूसे गेडदेन तार्डा क्युइसी म्हिंगदेदा भो लसी पिन्गो भिसी चेलागदेदा कुल्जी। 17 जमाहेन्से जम्मान म्हिंगदेसे भ्रेन्ना चसीनोन लेङ्बा भ्राइभ्रुइ चेलागदेसे दुइमा च्युक नही सोली तजी।

येशू परमेश्वरला म्हि ख्रीष्ट हिन्ना

मत्ती १६:१३-१९; मर्कूस ८:२७-२९

18 तिरेकुनु येशू गिक जेन प्रार्थना लसी धनछ्याबा मुबा। थे धुइरी थेला चेलागदेएनोन छ्यामनोन मुबा। ओच्छे येशूसे थेनीगदेदा “म्हिंगदेसे डादा खाल भिबा चीम?” भिसी ड्योइमा, 19 थेनीगदेसे “हाडदा खालैसे बपत्तिस्मा पिन्बा यूहन्ना भिबा मुला, खालैसे एलिया, ओच्छे स्यहान्दोगदेसे चा ओन्माला अगमवक्तागदे न्हडला गिक सिबाग्याम सोसी खजीम भिबा मुला” भिसी जोहाब पिन्जी।* 20 जमाहेन्से येशूसे दोःसी चेलागदेदा “तर एनीगदेसे चा डा खाल भिसी म्हन्मुला?” भिसी ड्योइमा, पत्रुससे “हाड परमेश्वरसे पुइखबा थार्बा पिन्बा ख्रीष्ट हिन्ना” भिसी जोहाब पिन्जी।*

21 जमाहेन्से येशूसे, “च्यागो, एनीगदेसे चु ताम खालैदा थापाङ्गो” भिसी कुल्जी। 22 ओच्छे येशूसे थेनीगदेदा “परमेश्वरसे पुइखबा म्हिसे ल्हानान दुख नातोःला। ओच्छे यहूदी गन्बागदे, परमेश्वरला मन्दिररी पूजा लबा मुल म्हिंगदेदेन यहूदी धर्मगुरुगदेसे बिरोध लसी साइला। तसैनोन थेदा सिबाग्याम सोमरेमाकुनु सोना लला” भिसी सुङ्जी।

चेलागदेसे नातोःबा दुख

मत्ती १६:२४-२८; मर्कूस ८:३४-९:१

23 जमाहेन्से येशूसे थेरी मुबा जम्मान म्हिंगदेदा चुहङ् भिसी सुङ्जी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला क्रुस हाडसेन धिन धिननोन पुइसी डादेन छ्याम भ्रगै।* 24 तिगदा भिसम जुन म्हिसे हाडला ज्यान जोगब लबारी म्हाइला, थे म्हिसे चा जुकजुकधोनाला जुनी आयाङ्। तर डाला लागिरी हाडला ज्याननोन पिन्खम्बा म्हिसे चा जुकजुकधोनाला जुनी याङ्ला।* 25 चुदे खालै म्हिसे जम्बुलिडनोन यारी किन्सी थेला ज्याननोन निजी भिसम तिग ज्यबा तला? 26 ओच्छे खालै म्हि डादेन डाला तामरी पेःजी भिसम परमेश्वरला स्वर्गदूतगदेदेन छ्याम परमेश्वरसे पुइखबा म्हि डाला आबा परमेश्वरला य्हालदेन शक्तिरी खमा थेदा हाडला भिबारी पेःला। 27 तर एनीगदेसे डाला ताम ड्यान्गो, चुरी मुबा म्हिंगदे न्हडला कोइ कोइ म्हि चा परमेश्वरला य्हुल्सा आम्राङ्तेधोना आसि।”

येशूला स्य्हाल पोबा

मत्ती १७:१-८; मर्कूस ९:२-८

28 येशूसे चु ताम सुङ्सी भ्रेःरे तमा पत्रुस, यूहन्नादेन याकूबदा प्रार्थना लबारी गडरी भोर्सी फेपुजी। 29 थेरी येशू प्रार्थना लबान लबा धुइरी येशूला स्य्हाल पोजी। ओच्छे येशूला क्वान धिनीला स्र्हेर हङ्बान य्हाल य्हाल तजी 30 ओच्छे म्हि नही येशूदेन छ्याम ताम लबा म्हाङ्गी। थे म्हि नही मोशादेन

* 9:19 मत्ती १४:१-२; मर्कू ६:१४-१५; लूका ९:७-८

* 9:20 यूह ६:६८-६९

* 9:23 मत्ती १०:३८; लूका १४:२७

* 9:24

मत्ती १०:३९; लूका १७:३३; यूह १२:२५

एलिया मुबा।³¹ थेनीगदेला स्यहाल यहाल यहाल तबा मुबा। ओच्छे येशू यरूशलेमरी सितो:ला भिबा तामला बारेरी येशूदेन छ्याम ताम लबान मुबा।

³² थे धुइरी चा पत्रुस ओच्छे थेदेन छ्याम मुबागदे म्हेर्बा मुबा। थेनीगदे फातछोर्मा येशू स्वर्गला यहालरी ओच्छे स्यहानदो म्हि न्हीएनोन येशूदेन छ्याम राप्सी चिबा म्राङ्गी।³³ ओच्छे थे म्हि न्ही येशू मुबाग्याम दो:सी निबारी छ्याइमा पत्रुससे “गुरु, यहाड चुरी मुबा ज्यबा तजीम। दाहेन्से डन्से चुरी छाप्रो सोम स्होइ, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। तर पत्रुसदा तिग ताम पाङ्तो:बा थे था आरेमुबा।³⁴ पत्रुससे चुहड पाङना पाङनान खसु खसी थेनीगदेदा घप्जी। चु म्राङ्गी चेलागदे लोङ्गी।³⁵ ओच्छे खसु न्हडग्याम चुहड्बा काइ थे:जी, “चु डाइ धम्बा डाला झा हिनना, चुसे भिबा ताम एनीगदेसे ड्यानगो।”³⁶ चु काइ थे:सी जिन्माहेन्से चेलागदेसे थेरी येशूदा जे म्राङ्गी। जमाहेन्से थेनीगदे कुटिसी चिजी। ओच्छे थेनीगदेसे म्राङ्बा चु ताम थे धुइरी खालैदा आपाङ्नी।

येशूसे म्हडसे स्याप्बा म्हिदा खम्ना लबा

मत्ती १७:१४-१८; मर्कूस ९:१४-२७

³⁷ न्हडगरदड येशू हाडला चेलागदेदेन छ्याम गडग्याम मार फेपखबा धुइरी महिला हुल गिक येशूदा स्याप्वारी खजी।³⁸ ओच्छे थे महिला हुल न्हडग्याम म्हि गिकसे क्रिडबान भिजी, “गुरु, डाला झादा च्यासी पिन्गो, तिग्दा भिसम चु डाला गिक जेन झा हिनना! ³⁹ थेदा म्हडसे घरिघरि चुडमुला, ओच्छे थे क्रिडसी सिबा तेबान तमुला। जमाहेन्से थेला सुडग्याम बोप्स्या ते:बा मुला, ओच्छे थे म्हडसे लछार पछार आलतेधोना थेदा आख्लामुला।⁴⁰ डाइ थे म्हड ताप्सी पिन्गो भिसी हाडला चेलागदेदा भिजी, तर थेनीगदेसे म्हड ताप्आखम्नी।”⁴¹ जमाहेन्से येशूसे थेनीगदेदा “विश्वास आलबादेन नइबा सेम थोबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे?” भिसी सुङ्गी। ओच्छे येशूसे थे म्हिदा “एला झादा चुरी भउ” भिसी सुङ्गी।⁴² ओच्छे थेसे हाडला झादा भना भनान थेला झादा थे म्हडसे चुङ्गी भ्याङ्गी। तर येशूसे थे म्हडदा बड्सी थे कोलादा खम्ना लसी थेला आबादा पिन्जी।⁴³ परमेश्वरला शक्ति म्राङ्गी थेरी मुबा म्हिगदे उदेक तजी।

दो:सी येशूसे हाड खाहड लसी सिला भिसी सुङ्बा

मत्ती १७:२२-२३; मर्कूस ९:३०-३२

ओच्छे थेरी मुबा म्हिगदे येशूला गे म्राङ्गी उदेक तसी चिबा धुइरी येशूसे हाडला चेलागदेदा,⁴⁴ “च्यागो, परमेश्वरसे पुइखबा म्हिदा चुङ्गी म्हिगदेला यारी जिम्मा पिन्ना। एनीगदेसे चु ताम खाइमै थाम्ले:गो” भिसी सुङ्गी।⁴⁵ तर चेलागदेसे चु ताम आघोनी। तिग्दा भिसम थेनीगदेसे चु ताम घोखम्बा ज्ञान आयाङ्बासे लमा येशूसे तिग सुङ्गी भिसी म्हन्बारीनोन आखम्नी। ओच्छे थेनीगदे लोङ्बासे लमा चु तामला अर्थ तिग भिसी येशूदा ड्योइबारी आखम्नी।

जम्मान भन्दा घेन खाल?

मत्ती १८:१-५; मर्कूस ९:३३-४०

⁴⁶ थे धुइरी चेलागदे हाड हाड न्हडरी खाल घेन भिसी ताम लबान मुबा।⁴⁷ येशूसे थेनीगदेला सेमला ताम था याङ्गी कोला गिकदा हाडला डामरी भसी थेनीगदेदा चुहड् भिसी सुङ्गी,⁴⁸ “च्यागो, जुन म्हिसे चुहड्बा कोलादा डाला मिनरी वास्ता लला, थेसे डादाएनोन वास्ता लला, डादा वास्ता लबासे डादा पुइखबा डाला आबादाएनोन वास्ता लला। ओच्छे एनीगदे न्हडरी जुन म्हि जम्मान भन्दा जजा मुला, थेनोन घेन तला।”⁴⁹

⁴⁹ जमाहेन्से यूहननासे, “गुरु, डन्से हाडला मिनरी म्हि गिकसे म्हड ताप्बा म्राङ्गी। तर डन्से थेदा थेहड लआपुङ्नी, तिग्दा भिसम थे डनी हड् हाडदेन छ्याम आभ्रमुला।”⁵⁰ तर येशूसे थेनीगदेदा

* 9:35 २ पत्रु १:१७-१८; यशै ४२:१; मत्ती ३:१७; १२:१८; मर्कू १:११; लूका ३:२२ * 9:46 लूका २२:२४ * 9:48 मत्ती १०:४०; लूका १०:१६; यूह १३:२०

“एनीगदेसे थेहड्ड थालउ, तिग्दा भिसम जुन म्हिसे एनीगदेला बिरोध आल थे म्हि एनीगदेपट्टिला हिन्ना” भिसी सुड्जी।

सामरीगदेसे येशूदा चिआपुड्बा

51 जमाहेन्से येशूसे हाड स्वर्गरी फेपूबा धुइ तबासे लमा यरूशलेमरी निनोन तोःला भिसी पक्का लजी। 52 ओच्छे येशूसे कोइ कोइ समाचार भोर्बा म्हिगदेदा डाच्छान जम्मान ताम तयार लबाला लागिरी सामरियाला नामसा गिकरी पुड्जी। 53 येशू यरूशलेमरी फेपूबारी छ्याइबा ताम था याड्सी सामरिया नामसाला म्हिगदेसे येशूदा चिआपुड्नी। 54 चु म्राड्सी येशूला चेला याकूबदेन यूहन्नासे, “प्रभु, डन्से स्वर्गग्याम मे ताइना लसी थेनीगदेदा नाश लगै भिसी भिउ भिबा हाडला सेम मुला?” भिसी भिमा,* 55 येशू चेलागदेपट्टि दोःसी थेनीगदेदा बड्जी।† 56 जमाहेन्से येशू हाडला चेलागदेदा भोर्सी अर्गु नामसापट्टि फेपूजी।

विश्वासीगदेदेन छ्याम ततोःबा गुण

मत्ती ८:१९-२२

57 ओच्छे येशू हाडला चेलागदेदेन छ्याम यरूशलेमपट्टि फेपूबान लबा धुइरी म्हि गिक खसी येशूदा “हाड खानडदमान फेपूसै डाएनोन हाडदेन छ्याम निला” भिसी भिजी।

58 जमाहेन्से येशूसे थेदा “च्यागो, लहुन्दीगदे चिबारी ऊ मुला, ओच्छे चरागदे चिबारीनोन जड मुला, तर परमेश्वरसे पुइखबा म्हिदा बलपूबा न्हबारीनोन ग्ला आरे” भिसी सुड्जी।

59 ओच्छे स्यूहानदो म्हि गिकदा येशूसे “डादेन छ्याम भ्रउ” भिसी सुड्जी। तर थेसे “प्रभु, डाच्छा डाला सिबा आबादा लहुसी हाडदेन छ्याम भ्रला” भिसी भिजी। 60 येशूसे थेदा “सिबागदेदा सिबागदे हड्बासेन लहुगै तर ए चा निसी परमेश्वरला यूहुल्साला समाचार थेःना लउ” भिसी सुड्जी।

61 दोःसी स्यूहानदो म्हि गिक येशू मुबा ग्लारी खसी, “डाएनोन हाडदेन छ्याम भ्रला, तर डाच्छा डा दिमरी निसी जम्मादान डा येशूदेन छ्याम निजी भिसी पाड्सी खला” भिसी भिजी।* 62 थेदा येशूसे, “मोइबा धुइरी ग्याप दोःसी च्याबा म्हि चा परमेश्वरला यूहुल्सारी गे आखेल” भिसी सुड्जी।

10

येशूसे बोगल सोमसे च्युक न्ही चेलागदेदा परमेश्वरला यूहुल्साला समाचार थेःना लबारी पुइबा

1 जमाहेन्से येशूसे स्यूहानदो बोगल सोमसे च्युइ चेलागदेदा धम्जी। ओच्छे हाड फेपूबारी छ्याइबा नामसादेन शहररी हाड फेपूबा भन्दा डाच्छा थेनीगदेदा गोर न्ही न्ही लसी पुइजी। 2 पुइबा धुइरी येशूसे थेनीगदेदा चुहड् भिसी सुड्जी, “च्यागो, बाली मी लहानान मिन्बा मुला, तर बाली दुइबा म्हिगदे लहाना आरे। थेतबासेलमा बाली दुइबा म्हिगदे पुइखउ भिसी बालीला दोप्ता प्रभुदेन छ्याम प्रार्थना लउ।* 3 दाहेन्से एनीगदे निउ। डाइ एनीगदेदा फार्बागदेला गुडरी ग्युला कोलादा पुइबा हड् लसी पुइला।* 4 ओच्छे एनीगदेसे टाडगा, झोला, लखम तिगै थापुइगो। ओच्छे ग्यामरी खालैदेन छ्याम लहाना ताम थालउ।

5 “ओच्छे एनीगदे जुन दिमरी वाड्ला डाच्छा ‘थे दिमला म्हिदा शान्ति तगै’ भिसी मोलम पिन्गो। 6 थे दिमरी एनीगदेदेन छ्याम ठिक्बा म्हि मुसम थेनीगदेसे शान्ति याड्ला। तर एनीगदेदेन छ्याम ठिक्बा म्हि आरेसम एनीगदेसे पिन्बा मोलम एनीगदेदान दोःसी खला। 7 ओच्छे थेनीगदेसे एनीगदेदा जस्तो चबा सहे पिन्सै चबा थुड्बा लसी थेनोन दिमरी चिउ। तिग्दा भिसम गे लबा म्हिसे ज्याला याड्तोःमुला। ओच्छे एनीगदे दिम दिमरी वाड्सी ज्यबा ज्यबा चबा सहे म्हाइसी थाभ्रउ।* 8 “थेहड्ड लसी एनीगदे शहरगदेरी निबा धुइरी थे शहरला म्हिगदेसे मान लसी चबा थुड्बारी पिन्बा सहे चउ। 9 ओच्छे थेरी आखम्बा म्हिगदेदा खम्ना लउ, ‘ओच्छे परमेश्वरला यूहुल्सा खसी जिन्बा

* 9:54 २ राजा १:९-१६ † 9:55 कोइ कोइ ग्रीक बाइबलरी चु ताम कापूबा मुला: ओच्छे येशूसे थेनीगदेदा “एनीगदेला सेम खाहड्बा ततोःमुला भिसी एनीगदेसे अन्न घोबा आरेम। डा परमेश्वरसे पुइखबा म्हि मी म्हिगदेदा साइबारी खबा आहिन, तर थेनीगदेदा थार्बा पिन्बारी खबा हिन्ना” भिसी सुड्जी। * 9:61 १ राजा १९:२० * 10:2 मत्ती ९:३७-३८ * 10:3 मत्ती १०:१६ * 10:7 १ कोर ९:१४; १ तिमो ५:१८

मुला' भिसी थेनीगदेदा पाङ्गो। 10 तर खजिबै शहररी एनीगदे निमा थे शहरला म्हिगदेसे एनीगदेदा मान आलनी भिसम थे शहरला ग्यामरी थोन्सी, 11 'डन्से डन्ना काडरी भेर्बा एनीगदेला नाम्साला धुलु सुत्तै एनीगदेदान नाम्सारी खर्बा मुला। तिग्दा भिसम डन्से पाङ्बा ताम एनीगदेसे आङ्गान्नी। तर च्यागो, परमेश्वरला यहूलसा खसी जिन्बा मुला भिबा एनीगदेसे था याङ्गो' भिसी थेनीगदेदा पाङ्गो। 12 एनीगदेसे डाला ताम ड्यान्गो, परमेश्वरसे निसाफ लबा धिनकुनु थे शहरला म्हिगदेला गति भन्दा मी सदोमा शहरला म्हिगदेला गति नाखम्बा तला।

येशूसे विश्वास आलबा शहरला म्हिगदेदा बड्बा

मत्ती ११:२०-२७; १३:१६-१७

13 "खोराजीनदेन बेथसेदाला म्हिगदे, एनीगदेसे परमेश्वरग्याम सजाय याङ्गला। तिग्दा भिसम एनीगदेला नाम्सारी लबा हड्बा उदेकला गेगदे टुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा फोर्सी ह्याड ह्याडला पाप ख्लासी परमेश्वरपट्टि दोःसेला मुबा 14 तर परमेश्वरसे निसाफ लबा धुडरी एनीगदेला गति भन्दा टुरोसदेन सीदोनला म्हिगदेला गति नाखम्बा तला। 15 कफर्नहुमला म्हिगदे, तिग एनीगदे स्वर्गरीन धोला भिसी म्हन्मुला? आधो! एनीगदेदा मी नर्गरी भ्याङ्गला।"

16 येशूसे ह्याडला चेलागदेदा "एनीगदेला ताम ड्यान्बासे डाला तामदाएनोन ड्यान्ना, एनीगदेला ताम आङ्गान्बासे डाला तामएनोन आङ्गान। ओच्छे डाला ताम आङ्गान्बासे डादा पुइखबाला तामएनोन आङ्गान" भिसी सुड्जी।

येशूसे पुडबा बोगल सोमसे च्युक न्ही चेलागदे दोःसी खबा

17 येशूसे पुडबा बोगल सोमसे च्युड न्ही चेलागदे ताड्बान येशू मुबा ग्लारी खसी, "प्रभु डन्से ह्याडला मिनरी म्हडगदेदा कुल्मा थेनीगदेसे ड्यान्जी" भिसी भिजी। 18 ओच्छे येशूसे थेनीगदेदा "डाइ शैतानदा स्वर्गग्याम तिप्लीड हड् लसी ताड्बा म्राङ्गी। 19 ओच्छे डाइ एनीगदेदा पुख्रीदेन बिच्छीदा नाङ्सी भ्रबादेन एनीगदेदा ह्याडला शत्रुगदेला जम्मान शक्तिदा ढाबा अधिकार पिन्बा मुला। थेतबासेलमा एनीगदेदा तिगै सहेसेएनोन न्होड्ना लआखम। 20 तसैनोन म्हडगदेदा ह्याडला धिरी थान्म्याङ्गी भिसी एनीगदे थाताङ्गो। तर ह्याडला मिन स्वर्गरी भिबा मुला भिसी एनीगदे ताङ्गो" भिसी सुड्जी।

येशूसे पिन्बा धन्यवाद

मत्ती ११:२५-२७; १३:१६-१७

21 थेनोन धुडरी येशूथोरी परमेश्वरला आत्मा फेप्खजी। ओच्छे येशू ताङ्सी, "मुदेन जम्बुलिडला प्रभु आबा, ह्याडदा धन्यवाद मुला, तिग्दा भिसम ह्याडसे ज्ञान बुद्धि मुबा म्हिगदेदेन सेबा घोबा म्हिगदेग्याम छुम्सी थान्बा ताम तिगै आसेबा म्हिगदेदा उन्सी पिन्जी। हिन्ना आबा, चुहड् लमान ह्याड ताङ्गी।

22 "डाला आबासे डादा जम्मान सहे जिम्मा पिन्बा मुला। ओच्छे डा खाल भिसी डाला आबादा बाहेक स्यहान्दो खालैदा था आरे। थेहड् लसीन आबा खाल भिसी झादेन झासे आबादा डोसेना लबा म्हिगदेसे बाहेक स्यहान्दो खालैदान आबा खाल हिन्ना भिसी था आरे।"

23 जमाहेन्से येशू ह्याडला चेलागदेपट्टि दोःसी थेनीगदेदा जे चुहड् भिसी सुड्जी, "एनीगदेसे म्राङ्बा मुला, चु ताम म्राङ्बागदे चा परमेश्वरग्याम मोलम याङ्बा म्हिगदे हिन्ना। 24 तिग्दा भिसम ल्हानान अगमवक्तागदेदेन ग्लेगदेसे एनीगदेसे म्राङ्बा चु तामगदे च्याबारी म्हाइमुबा। तर थेनीगदेसे आम्राङ्नी, ओच्छे एनीगदेसे थेःबा ताम थेनीगदेसे थेःबारी म्हाइजी, तर थेःबारी आम्याङ्नी।"

ज्यबा खिमजेम

मत्ती २२:३४-४०; मर्कूस १२:२८-३४

† 10:12 उत्पत्ति १९:२३-२९ "सदोम" भिबा चा शहर हिन्ना। थेदा परमेश्वरसे नाश लजी। तिग्दा भिसम थे शहररी ल्हानान नड्बा गेगदे लमुबा। चु ताम, मत्ती ११:२३-२४; लूका १०:१२, १७:२९; रोमी ९:२९; २ पत्रुस २:६; यहू १:७; उन्बा ११:८ पदरीएनोन मुला।

25 तिरेकुनु यहूदी धर्मगुरु गिक येशू मुबा ग्लारी खसी येशूला सेम च्याबारी थेसे “गुरु जुकजुकधोना आसिबा जुनी याड्बारी डाइ तिग लतोःला?” भिसी ड्योइमा, 26 येशूसे थेदा “परमेश्वरसे मोशादा पिन्बा ठिमरी तिग भिबा मुला? एसे पढब लबा आरे?” भिसी सुड्जी। 27 जमाहेन्से थेसे येशूदा “हाडला सेमहेन्सेन, हाडला प्राणसे, हाडला बुद्धिसे ओच्छे हाडला शक्तिसे एसे परमप्रभु हाडला परमेश्वरदा माया लउ। ओच्छे एसे हाडला खिमजेमदा हाडदा हड्णोन माया लउ” भिसी भिबा मुला। 28 भिसी भिमा, येशूसे थेदा “एसे ठीक भिजी दाहेन्से एसे थेहड्णोन लउ। जमाहेन्से ए जुकजुकधोना सोला” भिसी सुड्जी। 29 तर थे म्हिसे हाडसे हाडदान डा ठीक मुला भिसी उन्बाला लागिरी “थेहड् भिसम डाला खिमजेम खाल हिन्ना?” भिसी येशूदा ड्योइजी।

30 जमाहेन्से येशूसे थेदा चुहड् भिसी सुड्जी, “च्यागो, म्हि गिक यरूशलेमग्याम यरीहो भिबा ग्लापट्टि निबान लमा थेदा य्होगदेसे स्याप्सी लिगन्डीन लसी सिबाधोनान तोजी। 31 ओच्छे छिन्नड लिच्छा परमेश्वरला मन्दिररी पूजा लबा म्हि थेग्यामसेन खजी। तर थेसे थे य्होगदेसे तोसी सिबा तेबान तबा म्हिदा म्राड्सीनोन आम्राड्बा सहोसी निजी। 32 थेहड् लसीन स्यहान्दो लेवी गिकएनोन थेग्यामसेन खजी थेसेनोन थे सिबा तेबान तबा म्हिदा म्राड्सीनोन आम्राड्बा सहोसी निजी। 33 तर स्यहान्दो सामरी यहुलला म्हि गिकएनोन थेग्यामसेन खजी। थे सिबा तेबान तबा म्हिदा म्राड्सी थेदा ल्हानान दया रेःजी। 34 जमाहेन्से थे सिबा तेबान तबा म्हि मुबा ग्लारी निसी थेसे थे महिला पोरगदेरी छ्युगुदेन अडगुरला निडगु फोर्सी क्वानगेनसे खीजी। ओच्छे थेसे थे म्हिदा हाडलान गधाथोरी थान्सी म्हिगदे बास चिबा पाटी गिकरी भोर्सी म्हुन गिक हाडसेन थे महिला सयार लजी। 35 न्हडगरदड निबा धुइरी थेसे थे पाटीला धनीदा म्हुइला डबल न्ही पिन्सी थेसे ‘ज्यना लसी चुला सयार लउ, अझ खर्च ल्हानान निसम डा दोःसी खमा हाडदा पिन्ना’ भिसी भिजी।”

36 येशूसे थेदा “एला बिचाररी चु म्हि सोम न्हडरी खजिबा चा थे य्होसे स्याप्बा महिला खिमजेम तजी?” भिसी ड्योइमा, 37 थेसे येशूदा “थे य्होगदेसे तोबा म्हिदा दया लबा म्हि” भिसी भिजी।

ओच्छे येशूसे थेदा “दाहेन्से निसी एसेनोन थेहड्णोन लउ” भिसी सुड्जी।

येशू मार्थादेन मरियमला दिमरी फेप्बा

38 ओच्छे येशू हाडला चेलागदेदेन छ्याम फेप्बान लमा नाम्सा गिकरी धोजी, थे नाम्सारी मुबा मार्था भिबा म्रिडम्हेमेसे येशूदा हाडला दिमरी ड्योइजी। 39 थे म्रिडम्हेमेला मरियम भिबा आडा गिक मुबा, थे चा येशूला डामरी चिसी येशूला ताम ड्यानमुबा। 40 मार्था चा येशूदा कयोड्बाला लागिरी चबा सहे सहोबा गेरी कोल्सी चिबा मुबा। ओच्छे थे येशूला डामरी खसी, “प्रभु, चबा सहे सहोबारी आडासे डादा हो आलबा हाडसे म्राड्बा आरे? हाडसे डादा हो लबारी निउ भिसी थेदा सुड्सी पिन्गो” भिसी भिजी। 41 तर येशूसे थेदा “मार्था, ए ल्हानान तामरी धन्दा सुर्दा जे लमुला। 42 तर तोःबा सहे गिक जेन मुला, थेनोन सहे मरियमसे धम्बा मुला। थेतबासेलमा थेग्याम चु आब्यन” भिसी सुड्जी।

11

येशूसे प्रार्थना लबारी लोप्बा

मत्ती ६:९-१३; ७:७-११

1 तिरेकुनु येशूसे ग्ला गिकरी प्रार्थना लबान मुबा। येशूसे प्रार्थना लसी जिन्माहेन्से थेला चेला गिकसे “प्रभु, यहन्नासे हाडला चेलागदेदा प्रार्थना लबारी लोप्सी पिन्बा हड् लसी डन्दाएनोन प्रार्थना लबारी लोप्सी पिन्गो” भिसी भिमा, 2 येशूसे थेनीगदेदा “एनीगदेसे चुहड् लसी प्रार्थना लउ” भिसी सुड्जी, “परमेश्वर आबा,

हाडदां जम्मासेन मान लगै,

ओच्छे जम्मानथोरी हाडला शासन खगै।

3 डन्से धिन धिननोन चतोःबा सहे डन्दा धिन धिननोन पिन्गो।

† 10:33 “सामरी यहुल” चा यहूदीगदेला लागिरी जजा यहुलला म्हि हिन्ना। † 11:2 चु पदरी ग्रीक बाइबलरी “हाडला छानदा मान लगै” भिसी भिबा मुला। तर मुल अर्थ चा परमेश्वरदा मान तगै भिबा हिन्ना।

4 डन्ना पाप माफ लसी पिन्गो।

तिग्दा भिसम डन्सेनोन डन्दा बिरोध लसी पाप लबागदेदा माफ लबा मुला।

ओच्छे डन्दा पापरी फसब तबा ग्यामरी भ्रआपुङ्गो।”

5 जमाहेन्से येशूसे हाडला चेलागदेदा दोःसी चुहड् भिसी सुड्जी, “एनीगदे न्हडरी खालैला ह्यो गिक मुला भिसी म्हन्गो। थे म्हुन गुडरी थे ह्यो मुबा ग्लारी निसी ‘डादा गोर सोम गेड भउले ज्योज्यो, 6 डाला दिमरी थारेडग्याम डोन्बो गिक खबा मुला। दान्दे डादेन छ्याम चबा सहे तिगै आरे’ भिसी भिमा, 7 थेला ह्योसे दिम न्हडग्यामसेन ‘डा प्राप दुड्सी कोलागदेदेन छ्याम म्हेसी जिन्जी। थेतबासेलमा डादा दुख थापिन्गो। दान्दे डा रेःसी एदा तिगै पिन्आखम’ भिसी भिजी। 8 तर डाइ एनीगदेदा पाड्ला, थे ह्योसे थेदा ह्यो म्हन्सी तिगै आपिन्सैनोन थेसे हीबाला हीबान लमाहेन्से थे रेःसी थेदा तोःतेधोना पिन्ना।

9 “थेतबासेलमा एनीगदेसे डाला ताम ड्यान्गो, हीसम पिन्ना, म्हाइसम स्याप्ला ओच्छे प्रापरी ढ्वक ढ्वक लसम एनीगदेला लागिरी प्राप ठोड्सी पिन्ना। 10 तिग्दा भिसम जुन म्हिसे हीला थेदा पिन्ना, ओच्छे जुन म्हिसे म्हाइला थेसे स्याप्ला ओच्छे जुन म्हिसे प्रापरी ढ्वाक ढ्वाक लला थेदा प्राप ठोड्सी पिन्ना।

11 “ओच्छे एनीगदे न्हडरी खाल्ला आबासे चा हाडला कोलासे गेड हीमा युडबा, तार्डा हीमा पुख्री, 12 ओच्छे नागाफुम हीमा बिच्छी पिन्ना? आपिन। 13 एनीगदे पापी तसीनोन हाडला कोलागदेदा ज्यबा सहे पिन्बारी सेमुला भिसम एनीगदेला स्वर्गरी मुबा परमेश्वर आबासे थेदेन छ्याम हीबागदेदा गाते ल्हाना लसी हाडला आत्मा पिन्ना।”

येशूदेन म्हडला ग्ले बालजिबुल

मत्ती १२:२२-२९, ४३-४५; मर्कूस ३:२०-२७

14 येशूसे म्हडसे स्यापसी ताइ दोबा महिला ल्हुड्ग्याम थे ताइ दोना लबा म्हड तापूजी। जमाहेन्से थे म्हिसे ताम पाड्बारी छ्याइबा म्हाड्सी थेरी मुबा म्हिगदे उदेक तजी। 15 तर थेनीगदे न्हडरी कोइ कोइसे “चु म्हिसे मी म्हडगदेला ग्ले बालजिबुलला शक्तिग्याम जे म्हडगदे तापूबा हिन्ना” भिसी भिजी। 16 ओच्छे स्यहान्दो कोइ कोइसे चा येशूला सेम च्याबाला लागिरी “डन्दा स्वर्गला चिनु गिक उन्सी पिन्गो” भिसी भिजी।

17 तर येशूसे थेनीगदेला सेमला ताम था याड्सी थेनीगदेदा “च्यागो, जुन यहुल्साला म्हिगदे हाड हाड न्हडरी तोबा छेबा लला, थे यहुल्सा नाश तला, ओच्छे जुन दिमला म्हिगदे हाड हाड न्हडरीन तोबा छेबा लला, थे दिमएनोन फुप्ला।” 18 थेतबासेलमा शैतानएनोन हाड हाड न्हडरी आढिकनी भिसम खाहड् लसी थेला यहुल्सा टुला? तिग्दा भिसम एनीगदेसे डादा बालजिबुलला शक्तिग्याम म्हड तापूबा मुला भिसी भिबा मुला। 19 डाइ बालजिबुलला शक्तिग्याम म्हड तापूमुला भिसम एनीगदेला चेलागदेसे चा खाल्ला शक्तिग्याम म्हड तापूबा हिन्ना? थेतबासेलमा एनीगदेला गल्ती थेनीगदेसेन उन्ना। 20 तर डाइ परमेश्वरला शक्तिग्याम म्हड तापूबा मुला भिसम एनीगदेला गुडरी परमेश्वरला यहुल्सा खसी जिन्बा मुला।

21 ओच्छे भड्बा म्हिसे हतियार थोसी हाडला दिम खुड्जी भिसम थेला मालसामान खालैसे भोरआखम। 22 तर थे भन्दान भड्बा म्हि खजी भिसम थेदा ढासी थेसे भर लबा जम्मान हतियारगदे ब्यन्ना, ओच्छे थेला जम्मान मालसामान ब्यन्सी जम्मादान भो लसी पिन्ना। 23 जुन म्हि डादेन छ्याम आढिक, थे म्हि डाला बिरोधी तला। ओच्छे जुन म्हिसे डादेन छ्याम गे आल थे म्हिसे डाला बिरोधरी गे लला।

डाच्छा थोन्सी निबा म्हड दोःसी खमाहेन्से

मत्ती १२:४३-४५

24 “म्हड महिला ल्हुड्ग्याम थोन्सी निमाहेन्से थेसे बल्पूबा न्हबारी तोडतोडबा ग्लारीक्यार ग्ला म्हाइसी भ्रला, तर थेसे खानडएनोन बल्पूबा न्हबा गला आयाड्माहेन्से ‘डा जुन महिला ल्हुड्ग्याम थोन्सी खजी थेनोन महिला ल्हुडरी चिबारी निइ’ भिसी दोःसी निला। 25 ओच्छे थे म्हड दोःसी खमा

थेसे डाच्छा हाड चिबा ग्ला साडसाडबा म्राड्ला। ²⁶ जमाहेन्से थे म्हड निसी हाड भन्दा नइबा अर्गु गोर निस म्हडगदे भसी थे म्हि न्हडरी वाड्सी चिमुला। थेतबासेलमा थे महिला गति डाच्छाला भन्दा लिच्छाला गति झन नइबा तला।”

सुख याड्बागदे

²⁷ येशूसे चु ताम सुड्बान लमा महिला हुल न्हडग्याम क्रिड्बान म्रिडम्हेमे गिकसे “हाडदा न्हसी ड्हे ख्वाबा आमासे परमेश्वरग्याम मोलम याड्बा मुला,” भिसी भिजी। ²⁸ तर येशूसे “जुन म्हिसे परमेश्वरला बचन ड्यान्सी परमेश्वरसे कुल्बा अन्छार लला, थे म्हिसे परमेश्वरग्याम झन मोलम याड्ला,” भिसी सुड्जी।

म्हिगदेसे चिनु म्हाइबा

मत्ती १२:३८-४२

²⁹ येशूला क्युर्नोन महिला हुल तमाहेन्से येशूसे थेनीगदेदा चुहड् भिसी सुड्जी, “एनीगदे दान्देला म्हिगदे खाहड्बा नइबा म्हि! उदेकला चिनु जे म्हाइबा। तर योना अगमवक्ताला चिनु बाहेक अर्गु चिनु आउन। ³⁰ निनवे शहरला म्हिगदेला लागिरी योना चिनु तबा हड्बान परमेश्वरसे पुड्खबा म्हि दान्देला म्हिगदेला लागिरी चिनु हिन्ना। ³¹ निसाफ लबा धुडरी ल्होग्याम खबा ग्लेस्यसे दान्देला म्हिगदेला दोष उन्ना, तिग्दा भिसम थे सोलोमन ग्लेला ज्ञान बुद्धिला ताम ड्यान्बारी ल्हानान थारेड्ग्याम खबा मुबा। तर च्यागो, चुरी सोलोमन ग्ले भन्दा घेन म्हि मुसैनोन थेला ताम आड्यान्नी। ³² निसाफ लबा धुडरी निनवे शहरला म्हिगदे रेःसी दान्देला म्हिगदेला दोष उन्ना। तिग्दा भिसम योना अगमवक्तासे पाड्बा ताम ड्यान्सी थेनीगदेसे हाड हाडला पाप ख्लासी परमेश्वरपट्टि दोःबा मुबा। तर च्यागो, चुरी योना अगमवक्ता भन्दा घेन म्हि गिक मुला।

ल्हुडला नाडसल

मत्ती ५:१५; ६:२२-२३

³³ “खालैसे नाडसल म्रासी फामसे घप्सी आथान, ओच्छे छुम्सीनोन आथान। बरु दिम न्हडरी खबा म्हिगदेदा य्हाल तगै भिसी नोबा ग्लारी थान्ना। ³⁴ एला मी एला ल्हुडला लागिरी नाडसल हड्बान हिन्ना। एला मी ज्यबा मुसम एसे ज्यना लसी म्राड्ला। तर एला मी ज्यबा आरेसम एसे तिगै म्राड्बारी आखम ओच्छे ए धोपधोपरी भ्रतोःला। ³⁵ थेतबासेलमा ए होशियार तउ, तिग्दा भिसम एला ल्हुडरी मुबा नाडसल सिंसी धोपधोप थातगै। ³⁶ चुदे एनीगदेला ल्हुडरी तिगै धोपधोप आतना जम्मान ल्हुड य्हाल तजी भिसम नाडसलसे एनीगदेदा य्हाल तना लबा हड्बान एनीगदेला पूरान ल्हुड य्हाल तला।”

येशूसे फरिसीदेन यहूदी धर्मगुरुगदेला दोष उन्बा

मत्ती २३:१-३६; मर्कूस १२:३८-४०

³⁷ येशूसे चुहड् सुड्सी जिन्माहेन्से फरिसी गिकसे येशूदा सोल छ्योडबारी हाडला दिमरी ड्योड्जी। जमाहेन्से येशू थेला दिमरी फेप्सी सोल छ्योडबारी धन्छ्याजी। ³⁸ तर येशूसे छ्या आस्याल्नार् सोल्बा म्राड्सी थे फरिसी उदेक तजी।

³⁹ थे उदेक तबा म्राड्सी प्रभुसे थेदा चुहड् भिसी सुड्जी, “एनी फरिसीगदेसे खोरेदेन खार्बाला पाखापट्टि म्याप्सी चोखो सहोबा हड् लसी एनीगदेएनोन म्हिदा उन्बारी चोखो दोबा सहोमुला। तर एनीगदेला सेम लोभदेन नइबा तामसे प्लिड्बा तमुला। ⁴⁰ एनीगदे खाहड्बा मूर्ख म्हि, जुनसे पाखापट्टि सहोजी, थेसेन न्हडपट्टिनोन सहोबा आहिन? ⁴¹ एनीगदेदेन छ्याम मुबा सहेगदे प्राड्बोगदेदा पिन्गो। जमाहेन्से एनीगदेला लागिरी जम्मान सहे चोखो तला। ⁴² परमेश्वरग्याम सजाय याड्तोःबा फरिसीगदे, एनीगदेसे परमेश्वरदा बाबरीदेन जिरा ओच्छे अर्गु मसलाला दोडला भो च्युडला भो गिक मी पिन्मुला, तर एनीगदेसे म्हिगदेदा ठीक निसाफदेन परमेश्वरदा लतोःबा मायाला भिसम तिगै वास्ता आलमुला। तर एनीगदेसे चु गे न्हीनोन लतोःबा मुबा। ⁴³ परमेश्वरग्याम सजाय याड्बा फरिसीगदे, एनीगदेसे

† 11:38 यहूदीला ठिम अन्छार या आखुना चबा म्हिदा परमेश्वरला डाच्छा अशुद्ध भिसी म्हनमुबा।

यहूदीगदे हूप तबा दिमला मुल ठिरी चिबारीदेन बजाररी सय्हानदो म्हिगदेसे मान लगै भिसी सेम लमुला। 44 परमेश्वरग्याम सजाय याडतोःबागदे, एनीगदे म्हिगदेसे आम्राड्बा धुर्सा हड्बान हिन्ना। थेतबासेलमा म्हिगदेसे था आयाड्ना चुहड्बा धुर्साथोरी भ्रमुला।”

45 ओच्छे यहूदी धर्मगुरुगदे न्हडला गिकसे येशूदा “गुरु हाडसे चुहड् सुड्सी डननाएनोन बेइज्जत लबा मुला” भिसी भिमा, 46 येशूसे चुहड् भिसी सुड्जी, “एनी धर्मगुरुगदेएनोन परमेश्वरग्याम सजाय याडतोःबा म्हिगदे हिन्ना। तिग्दा भिसम एनीगदेसे म्हिगदेदा पुइनोन आखम्बा थोइ काप्बा मुला। तर एनीगदेसे चा या जुम्बीसेनोन आथुर्मुला।

47 “परमेश्वरग्याम सजाय याडतोःबा म्हिगदे, एनीगदेसे हाडला आखे म्हेमेगदेसे साइबा अगमवक्तागदेला धुर्सा सहोबा मुला। 48 तर एनीगदेला आखे म्हेमेसे तिग लमुबा थे एनीगदेला गेग्यामसेन उन्बा मुला। ओच्छे थेन्ना गेदेन एनीगदेला गे ढिक्बा मुला। तिग्दा भिसम थेनीगदेसे अगमवक्तागदेदा साइजी, ओच्छे एनीगदेसे चा म्हिदा उन्बाला लागिरी अगमवक्तागदेला धुर्सा सहोबा मुला। 49 थेतबासेलमा परमेश्वरसे हाडला ज्ञान बुद्धिग्याम चुहड् भिसी सुड्बा मुला, ‘डाइ थेनीगदे मुबा ग्लारी अगमवक्तादेन मुल चेला पुइखला थेनीगदेसे कोइदा साइला कोइदा ल्हानान दुख पिन्ना।’ 50 थेतबासेलमा जम्बुलिड छ्यामाहेन्से दान्देधोना साइबा अगमवक्तागदेला सजाय दान्देला म्हिगदेसे याड्ला। 51 ओच्छे हाबिलहेन्से परमेश्वरला मन्दिर न्हडला चोखो ग्लादेन धूप म्नाबा ग्लाला गुडरी साइबा जकरियाधोनाला सजाय दान्देला म्हिगदेला थोबोरी खला। 52 “परमेश्वरग्याम सजाय याडतोःबा यहूदी धर्मगुरुगदे, एनीगदेदेन छ्याम परमेश्वरला ज्ञान, बुद्धिला म्नाप ठोड्बा साँचो मुला। तसैनोन एनीगदे न्हडरी आवाड्नी ओच्छे न्हडरी वाड्बारी म्हाइबा म्हिगदेदाएनोन वाड्आपुड्नी।”

53 येशू थेग्याम थोन्सी फेप्वारी छ्याइमा यहूदी धर्मगुरुगदेदेन फरिसीगदेसे येशूदा ल्हानान बिरोध लसी ल्हानान तामगदे ड्योडबारी छ्याइजी। 54 येशूसे जोहाब पिन्मा खानडै गल्ती स्याप्ला वा भिसी थेनीगदेसे दाउ च्यासी चिजी।

12

चेलागदेदा होशियार तना लबा
मत्ती १०:२६-३३

1 थे धुडरी थेरी झ्यासीन झ्याबारी आखम्बाधोनाला म्हिगदे पोप तबासे लमा गिकसे गिकदा नाड्बारी छ्याइजी, ओच्छे जम्मान भन्दा डाच्छा येशूसे हाडला चेलागदेदा चुहड् भिसी सुड्बारी छ्याइजी, “एनीगदे फरिसीगदेला खमीरग्याम जोगब तसी चिउ। थे खमीर चा थेनीगदेसे म्हन्बा कप्टी ताम हिन्ना।* 2 घप्सी आम्राड्बा सहे तिगै आरे, ओच्छे छुम्सी था आयाड्बा सहे तिगै आरे।* 3 थेतबासेलमा जुन ताम एनीगदेसे धोपधोपरी पाड्ला थे ताम य्हाल तमा थेःला। ओच्छे दिम न्हडरी सा ताम लसी पाड्बा ताम दिमला धुरीग्याम थेःना लला।

खाल म्नाड्सी लोड्तोःबा?
मत्ती १०:२८-३३; १२:३२

4 येशूसे दोःसी चुहड् भिसी सुड्जी, “डाला ह्योगदे ड्यानगो, एनीगदे हाडदा साइबा म्हि म्नाड्सी थालोड्गो। तिग्दा भिसम थेसे एनीगदेला लहुइदा जे साइला, तर आत्मादा चा साइबारी आखम। 5 तर एनीगदे खाल्देन छ्याम लोड्तोःला थे ताम ड्यानगो, जुनदेन छ्याम एनीगदेदा साइसी नर्गरी भ्याड्बा शक्ति मुला, थे म्नाड्सी जे लोड्गो। 6 तिग डबल न्हीरी च्युर्गन डा ग्लुबारी आखम? खम्ला। तसैनोन थे न्हडला गिकदाएनोन परमेश्वरसे आम्लेः। 7 ओच्छे एनीगदेला थोबोला क्राएनोन परमेश्वरसे झ्यासी जिन्बा मुला। थेतबासेलमा एनीगदे थालोड्गो। तिग्दा भिसम थे ल्हानान च्युर्गनगदे भन्दा मी एनीगदे ल्हानान घेन मुला।

* 12:1 मत्ती १६:६; मर्क ८:१५ * 12:2 मत्ती ४:२२; लूका ८:१७

स्युहान्दोगदेदा खीष्टला बारेरी पाङ्बा

मत्ती १०:३२-३३

8 “डाला ताम ड्यानगो, जुन म्हिसे डादा महिला ओन्छाडरी सेमहेन्से प्रभु भिसी पाङ्बला, परमेश्वरसे पुइखबा म्हिसेनोन थेदा परमेश्वरला दूतगदेला ओन्छाडरी चु ह्वाडलान हिन्ना भिसी पाङ्बला। 9 तर जुन म्हिसे म्हिगदेला ओन्छाडरी डादा डाइ थेदा डोसेबा आरे भिसी भिला, डाइएनोन परमेश्वरला दूतगदेला ओन्छाडरी थेदा सेबान आरे भिसी पाङ्बला। 10 च्यागो, जुन म्हिसे परमेश्वरसे पुइखबा महिला बिरोधरी ताम लला, थेसे माफ याङ्बला। तर परमेश्वरला आत्माला बिरोधरी ताम लबा म्हिसे खाइमै माफ आयाङ्।* ”

11 “म्हिगदेसे एनीगदेदा चुङ्सी यहूदीगदे हूप तबा दिमला नेतादेन शासन लबा म्हिगदे ओच्छे न्यायाधीश मुबा गलारी भोर्बा धुइरी खाहङ् लसी जोहाब पिन्बा भिसी एनीगदेसे धन्दा सुर्दा थालउ।* 12 तिगदा भिसम थे धुइरी खाहङ् लसी जोहाब पिन्तो:ला भिसी एनीगदेदा परमेश्वरला आत्मासेन लोप्ला।”

मूर्ख फ्युकुपो महिला उखान

13 महिला हुल न्हडग्याम म्हि गिकसे येशूदा “गुरु, डाला ज्योज्योदा अंश भो लसी पिन्गो भिसी सुङ्सी पिन्गो” भिसी भिमा, 14 येशूसे थेदा “एनीगदेला निसाफ लबादेन अंश भो लसी पिन्बारी डादा खाल्से अधिकार पिन्बा मुला” भिसी सुङ्जी। 15 ओच्छे येशूसे थेनीगदेदा “एनीगदे होशियार तसी लोभग्याम जोगब तसी चिउ। तिगदा भिसम म्हिदेन छ्याम जतिन धन सम्पत्ति मुसैनोन थेसे म्हिदा सतयला जुनी आपिन” भिसी सुङ्बान, 16 थेनीगदेदा उखान गिक सुङ्जी, “ग्ला गिकरी फ्युकुपो म्हि गिक मुबा, थेला बुरी ल्हानान बाली रोजी। 17 थे फ्युकुपो म्हिसे सेम सेमरी चुहङ् भिजी, ‘डादेन छ्याम बाली थान्बा ग्ला आरे, डाइ तिग लसे?’ 18 ओच्छे थेसे चुहङ् भिजी, ‘दाहेन्से डाइ चुहङ् लला, जम्मान ढुकुटीगदे फुप्सी घेन घेन सहोला, ओच्छे जम्मान बालीदेन मालसामान थेरीन थान्ना। 19 ओच्छे थेसे ह्वाडला सेम न्हड न्हडरी चुहङ् भिसी भिजी, ‘डाइ ल्हानान दिडधोनादा छ्योबा बाली पोप लबा मुला। थेतबासेलमा डा सुख शान्तिरी चबा थुङ्बादेन मोजमजा लसी चिला।”

20 “तर परमेश्वरसे थेदा ‘मूर्ख, तिनी म्हुनडनोन एला प्राण डाइ किन्ना, एसे पोप लसी थान्बा धन सम्पत्ति खाल्से चला?’ भिसी सुङ्जी।”

21 चु उखान सुङ्सी जिन्माहेन्से येशूसे “ह्वाडला लागिरी धन सम्पत्ति पोप लबा महिला गति चुहङ्बान तला। परमेश्वरसे चुहङ्बा म्हिगदेदा फ्युकुपो आमहन्मुला” भिसी सुङ्जी।

धन्दा सुर्दा थालउ

मत्ती ६:२५-३४

22 जमाहेन्से येशूसे ह्वाडला चेलागदेदा चुहङ् भिसी सुङ्जी, “थेतबासेलमा एनीगदेसे डाला ताम ड्यानगो, ‘सोबाला लागिरी तिग चसे, तिग क्वान्से भिसी धन्दा सुर्दा थालउ।’ 23 तिगदा भिसम चबा थुङ्बादेन क्वान्बा भन्दा एनीगदेला प्राणदेन ल्हुइ घेन हिन्ना। 24 एनीगदेसे कावागदेदा च्यागो! थेनीगदेसे न्ह कमाइ लला, न्ह बाली धुइला, न्ह थेनीगदेला ढुकुटीन मुला। तसैनोन परमेश्वरसे थेनीगदेदा चबा सहे पिन्बान मुला। एनीगदे मी चरागदे भन्दा ल्हानान घेन मुला। 25 एनीगदे न्हडरी खाल्से धन्दा सुर्दा लसी छिन्नडला लागिरी आयू काप्खम्ला? 26 चुदे जजा गे मी लआखम्मुला भिसम तिगदा एनीगदे अर्गु तामला धन्दा सुर्दा लबा?”

27 “एनीगदेसे म्हेन्दोदा च्यागो, थेनीगदेसे न्ह गे लला, न्ह क्वान राला। तर च्यागो, सोलोमन ग्लेदेन छ्याम ल्हानान धन सम्पत्ति मुसैनोन थे म्हेन्दो तेएनोन जेबा आरेमुबा।* 28 तिनी ल्हेबान निसी न्हडगर खर्माहेन्से मेरी फर्बा छेदा मी परमेश्वरसे चुहङ् लसी जेना लमुला भिसम झन एनीगदेदा परमेश्वरसे गाते जेना लला? खाइ एनीगदेला विश्वास? 29 थेतबासेलमा एनीगदेसे तिग चबा, तिग थुङ्बा भिसी धन्दा सुर्दा लसी म्हाइसी थाभ्रउ। 30 तिगदा भिसम परमेश्वरदा डोआसेबा जम्बुलिडला

* 12:10 मत्ती १२:३२; मर्कू ३:२९

* 12:11 मत्ती १०:१९-२०; मर्कू १३:११; लूका २१:१४-१५

* 12:27 १ राजा १०:४-७; २

इति १:३-६

म्हिंगदेसे चा चुहङ् लसी धन्दा सुर्दा लमुला। तर एनीगदेदा चु जम्मान सहे तोःला भिसी परमेश्वर आबादा था मुला। ³¹ थेतबासेलमा डाच्छा परमेश्वरला यहुल्सा म्हाङ्गो। जमाहेन्से परमेश्वरसे एनीगदेदा चु जम्मान सहे पिन्ना।”

हाडला लागिरी स्वर्गरी धन सम्पत्ति सोसी थान्गो

मत्ती ६:१९-२१

³² दोःसी येशूसे चुहङ् भिसी सुङ्जी, “डाला कोलागदे, एनीगदे थालोङ्गो! तिग्दा भिसम एनीगदेला परमेश्वर आबा ल्हानान ताङ्सी एनीगदेदा थेसे हाडला यहुल्सा पिन्बारी छ्याङ्बा मुला। ³³ थेतबासेलमा एनीगदेसे हाडदेन छ्याम मुबा धन सम्पत्ति चूङ्सी खबा टाङ्गा प्राडबोगदेदा भो लसी पिन्गो। ओच्छे खाङ्मै आन्होङ्बा ढुकुटी सहोसी हाडला लागिरी स्वर्गरी धन सम्पत्ति सोसी थान्गो। थेरी यहोएनोन आख, बुलुङ्सेनोन आच। ³⁴ तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।”

छोर्सी चिउ

मत्ती २४:४२-५१; मर्कूस १३:३२-३७

³⁵ दोःसी येशूसे थेनीगदेदा चुहङ् भिसी सुङ्जी, “एनीगदे हाडला क्वान क्वान्सी नाडसल म्रासी तयार लसी चिउ।* ³⁶ ओच्छे एनीगदे ब्याहला भोजरी निसी खबा मालिकदा भ्रान्सी चिबा नोकर हङ्बान तउ। तिग्दा भिसम मालिक खसी म्राप ढ्वक ढ्वक लमैछ्याम थेनीगदेसे हाडला मालिकदा म्राप ठोङ्सी पिन्मुला। ³⁷ च्यागो, थे नोकरगदे गाते ताङ्म्याङ्ला, हाडला मालिक खबा धुङ्गी थेनीगदेदा छोर्सी चिबा म्राङ्जी। थेतबासेलमा थेसे केः खीसी हाडला नोकरगदेदा चबा सहे पिन्ना। ³⁸ थे नोकरगदे गाते ताङ्म्याङ्ला, मालिक महुन गुङ्गी अथवा स्य्हो तबा धुङ्गी खसैनोन हाडला नोकरगदे छोर्सी चिबा म्राङ्जी। ³⁹ तर एनीगदेसे चु तामएनोन था याङ्गो, दिमला म्हिसे यहो खबा धुङ्ग था याङ्गसम थेसे हाडला दिम न्हङ्गी यहो वाङ्आपुङ्। ⁴⁰ थेहङ् लसीन एनीगदेएनोन होशियार तसी छोर्सी चिउ। तिग्दा भिसम परमेश्वरसे पुङ्खबा म्हिएनोन एनीगदेसे आम्हन्बा धुङ्गी खला।

ज्यबा गे लबा नोकरदेन आज्यबा गे लबा नोकर

मत्ती २४:४५-५१

⁴¹ जमाहेन्से पत्रुससे येशूदा “प्रभु, चु उखान डनना लागिरी जे सुङ्बा कि स्य्हान्दो म्हिगदेला लागिरीनोन सुङ्बा हिन्ना?” भिसी ड्योङ्मा, ⁴² प्रभुसे थेदा चुहङ् भिसी सुङ्जी, “दिमरी गे लबा बुङ्गि मुबादेन भर्तुप्पा म्हि खाल हिन्ना? मालिकसे दिमला स्य्हान्दो नोकरगदेदा ठीक ठीक धुङ्गी चबा थुङ्बा ढिक्ना लसी पिन्बारी जिम्मा पिन्थान्जी।” ⁴³ मालिक दोःसी खबा धुङ्गीनोन थेसे मालिकसे कुल्सी थान्बा हङ् लसी गे लबा म्राङ्जी भिसम इनाम याङ्बा नोकर थेनोन हिन्ना। ⁴⁴ च्यागो, एनीगदेसे डाला ताम ड्यान्गो, मालिकसे थेहङ्बा नोकरदा हाडला जम्मान धन सम्पत्ति जिम्मा पिन्ना। ⁴⁵ तर थे आज्यबा नोकरसे ‘डाला मालिक योनान आख’ भिसी म्हन्सी, ड्य्होङ्बा म्हिगदेदेन छ्याम चिसी चबा थुङ्बा लसी हाडदेन छ्यामनोन गे लबा नोकरगदेदा तोबा ग्याङ्बा लजी भिसम, ⁴⁶ थेला मालिक थेसे आम्हन्बा धिनदेन धुङ्गी धोखसी मालिकसे थेदा ल्हानान सजाय पिन्ना। ओच्छे थेदा परमेश्वरदा विश्वास आलबा म्हिगदे मुबा ग्लारी भ्याङ्ला।

⁴⁷ “हाडला दिमला मालिकला सेमला ताम था याङ्सीनोन सेम निबा गे आलबा नोकरसे तोबा चला। ⁴⁸ तर हाडला मालिकला सेमला ताम था आयाङ्ना तोबा चबा खाल्ला गे लसैनोन थे नोकरदा ल्हाना आतोः। ओच्छे जुन म्हिदा ल्हाना पिन्बा मुला थेसेनोन ल्हानान पिन्तोःला। थेहङ् लसीन जुन म्हिदा ल्हानान जिम्मा पिन्बा मुला थेदेन छ्याम ल्हानान किन्ना।

थेमे न्हङ्गी बिरोध लबा

मत्ती १०:३४-३६

* 12:35 मत्ती २५:१-१३

49 “च्यागो, डा जम्बुलिडरी मे सल्कब लबारी खबा हिन्ना। बरु डाच्छान सल्कब तबा हिन्सै तसेला मुबा। 50 डाइ दुखला बप्तिस्मा किन्तोःबा मुला, थे बप्तिस्मा आकिन्तेधोना डादा शान्ति आत।* 51 तिग एनीगदेसे डा जम्बुलिडरी म्हिगदेदा ढिक्ना लबारी खबा भिसी म्हन्बा? आहिन, डा मी एनीगदेदा फेना लबारी खबा हिन्ना। 52 दाहेन्से गोर डा महिला थेमे हाड हाड न्हडरी फेला। ओच्छे न्हीला बिरोधरी सोम, सोमला बिरोधरी न्ही रेःला। 53 थेहड् लसीन आबाला बिरोधरी झा, झाला बिरोधरी आबा, आमाला बिरोधरी झामे, झामेला बिरोधरी आमा ओच्छे स्युमीला बिरोधरी चाड, चाडला बिरोधरी स्युमी रेःला।”*

धुइ च्यासी भ्रतोःबा

मत्ती १६:२-३; ५:२५-२६

54 जमाहेन्से महिला हुलदाएनोन येशूसे चुहड् भिसी सुड्जी, “जम्बुलिडला न्हुपग्याम खसु थोन्माहेन्से ‘दाहेन्से नाम खला’ भिसी एनीगदेसे भिमुला, ओच्छे थेहड् नोन तमुला। 55 थेहड् लसीन जम्बुलिडला ल्होपट्टिसे लाबा खबारी छ्याइमाहेन्से ‘दाहेन्से छेपबा छला’ भिसी एनीगदेसे भिमुला, ओच्छे थेहड् नोन तमुला। 56 कप्टीगदे, एनीगदेसे सदेन मुरी च्यासी तिग तबारी छ्याइबा मुला भिबा ताम चा था याड्मुला। तर दान्दे तिग तबारी छ्याइबा मुला भिबा ताम चा तिगदा था आयाड्बा?

57 “डाइ लबा गे ठीक मुला कि आरे’ भिसी एनीगदेसे तिगदा पक्का आलबा? 58 खालैसे एदा मुद्दा युसी न्यायाधीश मुबा ग्लारी भोजी भिसम, थे म्हिदेन छ्याम ग्यामरीन ढिक्गो। आहिनसम थेसे एदा न्यायाधीशला डाच्छापट्टि राप्पुड्ला। ओच्छे न्यायाधीशसे सिपाहीगदेला यारी जिम्मा पिन्ना। जमाहेन्से सिपाहीगदेसे भोसी झ्यालखानरी झाड्ला। 59 एसे डाला ताम ड्यान्गो, एसे जम्मान टाडगा आफातेधोना थेग्याम थोन्बारी आम्याड्।”

13

पाप ख्लासी परमेश्वरपट्टि दोःबा

1 थेनोन धुइरी थेरी मुबा कोइ कोइ म्हिगदेसे येशूदा चुहड् भिसी पाड्जी। गालीलला म्हिगदेसे परमेश्वरदा बलि फुल्बान लमा पिलातस भिबा रोमी अञ्चलाधीशसे थेनीगदेदान साइजी। ओच्छे थेनीगदेला काएनोन पशुला कादेन छ्याम दोड्जी। 2 जमाहेन्से येशूसे थेनीगदेदा चुहड् भिसी जोहाब पिन्जी, “थे गालीलला म्हिगदेसे चुहड् लसी दुख नाजी भिदेमा एनीगदेसे चु गालीलला म्हिगदेदा स्य्हान्दोगदे भन्दा ल्हानान पापी मुला भिसी म्हन्बा? 3 आहिन, एनीगदेसे डाला ताम ड्यान्गो, तिगदा भिसम एनीगदेसे हाड हाडला पाप ख्लासी परमेश्वरपट्टि आदोःनी भिसम एनीगदेएनोन थेहड् लसीन नाश तला। 4 थेहड् लसीन सिलोआम भिबा ग्लाला धरहरा गुर्सी सिबा च्युक भ्रेः म्हिगदे तिग यरूशलेमला स्य्हान्दो म्हिगदे भन्दा पापी मुबा भिसी म्हन्बा? 5 आहिन, डाला ताम ड्यान्गो, तिगदा भिसम एनीगदेसे हाड हाडला पाप ख्लासी परमेश्वरपट्टि आदोःनी भिसम एनीगदेएनोन थेहड् लसीन नाश तला।”

तिगै आरोबा दोडला उखान

6 जमाहेन्से येशूसे थेनीगदेदा उखान गिक सुड्जी, “म्हि गिकसे वारीरी अञ्जीरला दोड सूबा मुबा। थे म्हिसे थे अञ्जीरला दोडरी अञ्जीर रोजी वा भिसी च्याबारी खमा तिगै आस्यापनी। 7 थेतबासेलमा थेसे हाडला वारीरी गे लबा म्हिदा ‘डाइ अञ्जीर रोला वा भिसी च्याबा सोम दिड तजी, तर दान्देधोना आरोनी। दाहेन्से चुदा थासी भ्याड्गो’ भिसी भिमा, 8 थे गे लबा म्हिसे ‘अझ तिदिड भ्रान्गो, डाइ चु दोडला क्यारक्युर ख्वसी सार युला। 9 ओते लसीनोन आरोनी भिसम हाडसे चु दोड थासी भ्याड्खम्ला’ भिसी भिजी।”

येशूसे कुब्रे तबा मिडम्हेमेदा खम्ना लबा

* 12:50 मर्कू १०:३८ * 12:53 मीका ७:६

10 येशूसे बलपबा न्हबा धिनकुनुं यहूदीगदे हुप तबा दिमरी लोपबान मुबा। 11 थेरी म्हडसे स्याप्सी कुब्रे तबा म्रिडम्हेमे गिक मुबा। थे खाइमै सिधा तसी भ्रबारी आखम्मुबा। थे थेहड तबा च्युक भ्रे: दिड तबा मुबा। 12 येशूसे थे म्रिडम्हेमेदा म्राड्सी हाडला डामरी ड्योइसी, “दाहेन्से ए खम्जी” भिसी सुड्जी। 13 ओच्छे थेथोरी येशूसे हाडला छ्या थान्मैछ्याम थे कुब्रे तबा म्रिडम्हेमे खम्जी। जमाहेन्से थे म्रिडम्हेमेसे परमेश्वरला जयजयकार लबारी छ्याइजी।

14 येशूसे थे म्रिडम्हेमेदा बलपबा न्हबा धिनकुनु खम्ना लबा म्राड्सी यहूदीगदे हुप तबा दिमला नेता बोमो खसी, “म्हिंगदेदा गे लबा धिन साता गिकरी दुरे मुनोन मुला। थेतबासेलमा चु दुरे न्हडरी खसी खम्ना लउ, बलपबा न्हबा धिनकुनु आहिन” भिसी भिजी।*

15 प्रभुसे थेदा चुहड भिसी सुड्जी, “कपटी, तिग एनीगदेसे बलपबा न्हबा धिनकुनु म्हे मुइदेन गधादा पुइसी क्युइ ख्वाबारी आभोर्मुला? 16 चु अब्राहामला सन्तानदा च्युक भ्रे: दिडधोना शैतानसे आख्लाबा मुबा भिसम, तिनी बलपबा न्हबा धिनकुनुएनोन खम्ना लतो:बा आहिन?” 17 येशूसे चुहड लसी जोहाब पिन्बा म्राड्सी, येशूला बिरोधीगदे पे:जी। तर थेरी मुबा म्हिंगदे चा येशूसे लबा उदेकला गे म्राड्सी ताड्जी।

पचछै बलुदेन खमीरला उखान

मत्ती १३:३१-३३; मर्कूस ४:३०-३२

18 जमाहेन्से येशूसे थेनीगदेदा “परमेश्वरला यहुल्सादा डाइ तिगदेन छ्याम दाँजब लसे? परमेश्वरला यहुल्सा खाहड्बा मुला भिसम, 19 चु चा पचछै ढापला बलु गिक हड्बान हिन्ना। खालै म्हिसे घुर्यानरी ढवमाहेन्से थे ढाप फुइसी ल्हेबान निमुला। जमाहेन्से थे पचछै ढापला दोडला हाँगारी चरागदेसे जड सहोसी चिला” भिसी सुड्जी।

20 दो:सी येशूसे थेनीगदेदा चुहड भिसी सुड्जी, “परमेश्वरला यहुल्सादा डाइ तिगदेन छ्याम दाँजब लसे? 21 चु मी गेडरी युबा खमीर हड्बान हिन्ना। थे खमीर म्रिडम्हेमे गिकसे फाम सोम ब्रारी युसी ज्योप्ला। ओच्छे थे ब्रा आभोतेधोना थेसे घप्सी थान्ना।”

साडरो प्राप

मत्ती ७:१३-१४, २१-२३; ८:११-१२

22 जमाहेन्से येशू शहर शहरदेन नाम्सा नाम्सारी फेप्सी म्हिंगदेदा लोपबान यरूशलेमरी फेप्जी। 23 थेनोन धुइरी म्हि गिकसे, “प्रभु, तिग थार्बा याड्बा म्हिंगदे ल्हाना आरे?” भिसी येशूदा ड्योइमा, 24 येशूसे थेरी मुबा म्हिंगदेदा चुहड भिसी सुड्जी, “च्यागो, साडरो प्रापग्याम वाड्बारी भड लउ। तिग्दा भिसम ल्हानान म्हिंगदे वाड्बारी म्हाइमुला, तसैनोन वाड्बारी आखम्मुला। 25 दिमला मालिक रे:सी प्राप ढुड्सी जिन्माहेन्से एनीगदेसे मडग्यारग्याम ढ्वक ढ्वक लसी ‘गुरु, डन्दा प्राप ठोड्सी पिन्गो’ भिसी भिमा, थेसे एनीगदेदा ‘एनीगदे खाल हिन्ना? ओच्छे खानडग्याम खबा? डाइ एनीगदेदा डोसेबा आरे’ भिसी भिला। 26 एनीगदेसे ‘हाड डन्देन छ्यामनोन सोल्बा छ्योइबा लबा मुबा। ओच्छे डन्ना नाम्सारीक्यार हाडसे लोपबा मुबा’ भिसी भिमा, 27 थेसे एनीगदेदा ‘एनीगदे खाल हिन्ना? डाइ डोआसेनी। थेतबासेलमा पाप गे लबागदे, एनीगदे डा मुबा ग्लाग्याम निउ’ भिसी भिला।* 28 ओच्छे एनीगदेसे अब्राहाम, इसहाक, याकूबदेन जम्मान अगमवक्तागदेदा परमेश्वरला यहुल्सारी म्राड्मा, हाडदा चा मडग्यार भ्याड्मा क्राबा क्रिड्बा लसी स्वा क्रेला।* 29 स्यार, ल्हो, न्हुप, झ्याड जम्मान ग्लाग्यामसे म्हिंगदे खसी परमेश्वरला यहुल्सारी थेदेन छ्यामनोन चबा थुड्बा लबारी चिला।* 30 तर च्यागो, दान्दे लिच्छा मुबागदे डाच्छा तला, ओच्छे दान्दे डाच्छा मुबागदे लिच्छा तला।”*

यरूशलेमदा म्राड्सी येशूदा दुख ड्हम्बा

मत्ती २३:३७-३९

† 13:10 “बलपबा न्हबा धिन” चा यहूदीगदेसे परमेश्वरला लागिरी फेसी थान्बा धिन हिन्ना। * 13:14 प्रस्था २०:९-१०; वयव ५:१३-१४ * 13:27 भजन ६:८ * 13:28 मत्ती २२:१३; २५:३० * 13:29 मत्ती ८:११-१२ * 13:30 मत्ती १९:३०; २०:१६; मर्कू १०:३१

31 थेनोन धुइरी कोइ कोइ फरिसीगदे येशू मुबा ग्लारी खसी, “हाड चुग्याम थोन्सी फेपुगो। तिग्दा भिसम हाडदा हेरोदसे साइबारी छ्याइबा मुला” भिसी भिमा, 32 येशूसे थेनीगदेदा चुहड् भिसी सुड्जी, “एनीगदे निसी थे लहुन्दी हड्बा छट्टुदा चुहड् भिउ, ‘तिनीदेन न्हडगर डाइ म्हडगदे तापुबादेन आखम्बागदेदा खम्ना लबा गे लला, ओच्छे रेनी डाला गे जिन्ना।’ 33 ओच्छे तिनी, न्हडगर, रेनीकुनुधोनारी डा यरूशलेम शहररी धोनोन तोःला। तिग्दा भिसम यरूशलेम शहररी बाहेक अर्गु ग्लारी अगमवक्तादा आसाइ!

यरूशलेमला म्हिगदे म्राड्सी येशूदा दुख ड्हम्बा
मत्ती २३:३७-३९

34 “यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुइखबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्यापुसे घपुबा हड् लसी पोप लबारी म्हाइमा एनीगदेसे आड्याननी। 35 दाहेन्से परमेश्वरसे एनीगदेला दिम खलाला। च्यागो, डाला ताम ड्यानगो, एनीगदेसे ‘परमप्रभुला मिनरी फेपुखबादा मोलम याड्बा म्हि’ भिसी आभितेधोना डादा आम्राड्।”*

14

फरिसी गिकला दिमरी येशू फेपुबा

1 येशू बलपुबा न्हबा धिनकुनु फरिसीगदेला नेता गिकला दिमरी सोल छ्योइबारी फेपुजी। थेरी मुबा फरिसीगदेसे येशूला चिवा लसी चिमुबा। 2 थेरी टाड्बा बेथासे स्यापुबा म्हि गिक येशूला डाच्छापट्टि मुबा। 3 येशूसे यहूदी धर्मगुरुगदेदेन फरिसीगदेदा “बलपुबा न्हबा धिनकुनु आखम्बा म्हिदा खम्ना लबारी तला कि आत?” भिसी ड्योइमा, 4 थेनीगदे कुटिसी चिजी। ओच्छे येशूसे थे आखम्बा म्हिदा हाडला यासे थुसी खम्ना लमाहेन्से “दिमरी निउ” भिसी सुड्जी।

5 जमाहेन्से येशूसे थेनीगदेदा “बलपुबा न्हबा धिनकुनु एनीगदेला कोलागदे अथवा ग्लाप इनार न्हडरी ताइजी भिसम तिग एनीगदेसे तुरुन्तन आतेःना चिला?” भिसी सुड्मा,* 6 थेनीगदेसे तिगै पाड्बारी आखम्नी।

हाडसे हाडदान घेन थासुहोउ

7 थेरी चबा थुड्बारी खबा म्हिगदेसे मुल ठिगदे धम्सी चिबारी म्हाइबा म्राड्सी येशूसे थेनीगदेदा उखान गिक सुड्जी, 8 “खालैसे एनीगदेदा ब्याहरी निम्तो पिन्जी भिसम मुल ठिरी चिबारी थाम्हाइगो। तिग्दा भिसम थेरी एनीगदे भन्दा घेन म्हिदाएनोन निम्तो पिन्बा मुला तला। 9 एदेन थेदा निम्तो पिन्बा म्हि खसी ‘चु ग्लारी थेदा चिपुड्गो’ भिसी एदा चिबा ग्लाग्याम रेःपुड्ला। जमा ए पेःसी जम्मान भन्दा धिरी चितोःला। 10 थेतबासेलमा एसे निम्तो याड्बा धुइरी निसी जम्मान भन्दा धिला ग्लारी चिउ। जमाहेन्से एदा निम्तो पिन्बा म्हि खसी ‘तोर धन्छ्यागो’ भिसी मुल ठिरी चिपुड्ला।* थे धुइरी एदेन छ्याम चबा थुड्बारी चिबागदेला ओन्छाडरी एसे मान याड्ला। 11 तिग्दा भिसम जुन म्हिसे हाडसे हाडदान घेन सहोला थेदा जम्मान भन्दा जजा सहोला ओच्छे जुन म्हिसे हाडसे हाडदान जजा सहोला थेदा जम्मान भन्दा घेन सहोला।”*

12 येशूसे हाडदा निम्तो पिन्बा म्हिदाएनोन चुहड् भिसी सुड्जी, “एसे चबा थुड्बारी ह्योगदे, हाडला ज्योज्यो आलेगदे, हाडला म्हिगदेदेन फ्युकुपो खिमजेमगदेदा जे थाड्योइगो। तिग्दा भिसम थेनीगदेसेनोन एसे हड् लसीन निम्तो पिन्सी एला गुण फाला। 13 थेतबासेलमा एसे प्राडबोगदे, कुज्यागदेदेन मी आम्राड्बा म्हिगदेदाएनोन ड्योइगो। 14 थेहड् लजी भिसम एसे मोलम याड्ला। तिग्दा भिसम थेनीगदेसे एसे लबा गुण फाबारी आखम्सै परमेश्वरसे म्हन्बा अन्छारला गे लबा म्हिगदे सिबाग्याम सोबा धुइरी परमेश्वरसेन एसे लबा गुण फाला।”

* 13:35 भजन ११८:२६; यर्मि २२:५ * 14:5 मत्ती १२:११ * 14:10 हितो २५:६-७ * 14:11 मत्ती २३:१२; लूका १८:१४

भोजला उखान
मत्ती २२:१-१४

15 येशूला ताम थें:सी येशूदेन छ्याम चबा थुड्बा लबा म्हिगदे न्हडला गिकसे “परमेश्वरला यहूल्सारी चबा थुड्बा लम्याड्बागदे गाते ताड्म्याड्ला” भिसी भिजी। 16 जमाहेनसे येशूसे थेंदा उखानग्याम चुहड् भिसी सुड्जी, “म्हि गिकसे घेन भोज पिन्बारी ल्हानान म्हिगदेदा निम्तो पिन्जी। 17 भोज ठीक लसी जिन्माहेनसे हाडसे निम्तो पिन्बा म्हिगदेदा जम्मान ठीक तजी भिसी ड्योड्बारी हाडला नोकरदा पुड्जी। 18 तर निम्तो याड्बा जम्मान म्हिगदेसे निउ गिक गिक लसी चुहड् भिबारी छ्याड्जी, ‘गिकसे चा डाइ बु ग्लुबा मुला थें च्याबारी नितो:ला। थेतबासेलमा डादा माफ लउ, डा खआम्याड्’ भिसी भिजी। 19 ओच्छे स्य्हान्दोसे चा ‘डाइ हल डा ग्लाप ग्लुबा मुला, तिनीन थें ग्लाप च्याबारी नितो:बा मुला। थेतबासेलमा डादा माफ लउ, डा खआम्याड्’ भिसी भिजी। 20 थेंहड् लसीन स्य्हान्दोसेनो ‘डाइ भर्खर जे ब्याह लबा मुला, थेतबासेलमा डा खआम्याड्’ भिसी भिजी। 21 नोकरसे चु ताम हाडला मालिकदा पाड्माहेनसे दिमला मालिक बोमो खसी ‘ए शहरला ग्यामदेन गल्लीगदेरी निसी थेंरी मुबा जम्मान प्राड्बो, कुज्यादेन मी आम्राड्बागदेदा ड्योड्सी चुरी भउ’ भिसी कुल्जी। 22 चुहड् लसी जिन्माहेनसे नोकरसे दिमला मालिकदा ‘गुरु, हाडसे कुल्बा अनछार डाइ जम्मादान ड्योड्सी भजी, तसैनो अझ ग्ला मुला’ भिसी भिमा, 23 मालिकसे ‘ए शहरला मुल ग्यामदेन गल्ली गल्लीरी निसी म्हिगदेदा कर लसी भसी खउ। तिग्दा भिसम डाला दिम नाड्नोन म्हिगदे तगै! 24 चु भन्दा डाच्छा निम्तो याड्बा म्हिगदे खालैसेनो डाला भोजला ब्रोड् म्यहाड् आम्यहाड्’ भिसी भिजी।”

चेलासे लतो:बा गे
मत्ती १०:३७-३८

25 महिला हुल येशूदेन छ्याम निबान लबा धुड्री थेंनीगदेपट्टि दो:सी येशूसे चुहड् भिसी सुड्जी, 26 “चुदे डादेन छ्याम भ्रजी भिसम थेंसे हाडला आबा आमा, मिड, कोलागदे, ज्योज्यो आले, नाना आडा ओच्छे हाडलान ज्यानएनोन माया मारब आलनी भिसम थें डाला चेला दोआखम।* 27 जुन म्हिसे आसितेधोना हाडला दुख हाडसेन नासीं डादेन छ्याम आभ्र थें डाला चेला दोआखम।*

28 “चुदे एनीगदे न्हडरी खालै म्हिसे धरहरा स्होबा सेम लसम थेंसे धरहरा स्होसी जिन्बाधोना गाते खर्च निला भिसी डाच्छान हिसाब लतो:ला। 29 थेंहड् आलनी भिसम थेंसे धरहराला जग थान्सी धरहरा स्होसी जिन्ना लबारी आखमनी भिसम चु म्राड्बा जम्मान म्हिगदेसे थेंदा खिसी लसी, 30 ‘चु म्हिसे स्होबारीम छ्याड्मुबा तर स्होसी जिन्ना लबारी चा आखमनी’ भिला।

31 “खजिबै ग्लेसे अर्गु यहूल्साला ग्लेदेन छ्याम लडाइ लबारी निमा हाडदेन छ्याम मुबा हजार च्युड् सिपाहीगदे भोर्सी हाडदेन छ्याम लडाइ लबारी खबा बोगल गिक हजार सिपाहीदा ढाबारी खम्ला कि आखम थें डाच्छान चिसी सल्लाह आल? 32 लडाइ लबारी आखमनाम भिसी था याड्माहेनसे डाच्छान ढिक्बाला लागिरी स्य्हान्दो ग्ले मुबा ग्लारी हाडला ग्ले ब्लोन पुड्ला। 33 थेंहड् लसी एनीगदे न्हडला जुन म्हिसे डाला लागिरी जम्मान सहे खलाआखम थें म्हि डाला चेला दोआखम।

चजा हड् तबा

मत्ती ५:१३; मर्कूस ९:५०

34 “चजा ज्यब सहे हिन्ना, तर चजाला डम्बा सहे निजी भिसम थेंदा दो:सी तिग्से डम्ना लबा? 35 थें चजा न्ह साप्राला लागिरी गे खेल्बा तला न्ह सारनोन तला। जमाहेनसे म्हिगदेसे थें चजा भ्याड्ला। जुन म्हिदा ड्यानबा सेम मुला थेंसे ड्यानसी घोउ।”

15

म्हाबा ग्युला उखान
मत्ती १८:१२-१४

* 14:26 मत्ती १०:३७ † 14:27 “हाडला दुख हाडसेन नासीं” भिबादा ग्रीक बाइबलरी चा “हाडला कुस हाडसेन पुडतो:ला” भिसी भिबा मुला। * 14:27 मत्ती १०:३८; १६:२४; मर्कू ८:३४; लूका ९:२३

1 तिरेकुनु तिरो दुइबा म्हिगदेदेन पापीगदे जम्मान येशूला बचन ड्यान्बारी थेला डामरी खजी। 2 चु म्राड्सी फरिसीदेन यहूदी धर्मगुरुगदेसे “चु म्हि मी पापीगदेदेन छ्याम ढिक्सी थेनीगदेदेन छ्यामनोन चिसी चबा थुड्बा लबा चीम” भिसी येशूला तामगन लबारी छ्याइजी।*

3 जमाहेन्से येशूसे थेनीगदेदा उखान गिक सुड्जी, 4 “एनीगदे खालै महिला ग्यार्जा गिक ग्यु न्हडरी गिक म्हाजी भिसम थेसे बोगल बलिसे च्युक कु ग्युगदेदा ख्लासी थे म्हाबा ग्यु आस्यापतेधोना आमहाइ? म्हाइला। 5 थे ग्यु स्यापमाहेन्से ताड्सी ताड्सी थेसे बमरी पुइसी दिमरी भला। 6 ओच्छे हाडला ह्योगदेदेन खिमजेमगदेदा ड्योइसी एनीगदेएनोन डा हड् लसी ताड्गो। तिग्दा भिसम ‘डाइ डाला म्हाबा ग्यु स्यापजी’ भिसी भिला। 7 थेतबासेलमा एनीगदेसे डाला ताम ड्यान्गो, चुहड् लसीन हाडला पाप आखलाना डनी परमेश्वरला डाच्छा ज्यबा दोसी हाडला पाप ख्लाआतो:बा बोगल बलिसे च्युक कु म्हिगदेला लागिरी भन्दा हाडला पाप ख्लासी परमेश्वरपट्टि दो:बा म्हि गिकला लागिरी स्वर्गरी मुबागदे ल्हानान ताड्ला।

म्हाबा डबलला उखान

8 दो:सी येशूसे उखान गिकग्याम चुहड् भिसी सुड्जी, “खालै म्रिडम्हेमे गिकदेन छ्याम म्हडुइला गोर च्युइ डबल मुबा। थे डबल च्युइ न्हडरी डबल गिक म्हाजी भिसम थेसे थे डबल आस्यापतेधोना नाडसल म्रासी दिम साडसिड लसी आमहाइ? म्हाइला। 9 ओच्छे थे म्हाबा डबल स्यापमाहेन्से थेसे हाडला ह्योगदेदेन खिमजेमगदेदा ड्योइसी ‘एनीगदेएनोन डा हड् लसी ताड्गो। तिग्दा भिसम डाइ डाला म्हाबा डबल याड्जी’ भिसी भिला। 10 थेतबासेलमा एनीगदेसे डाला ताम ड्यान्गो, थेहड् लसीन खालै म्हिसे हाडला पाप ख्लासी परमेश्वरपट्टि दो:जी भिसम थे पापी गिकला लागिरी परमेश्वरला दूतगदे परमेश्वरदेन छ्यामनोन ताड्ला।”

म्हाबा झाला उखान

11 दो:सी येशूसे उखान गिक सुड्जी, “च्यागो, म्हि गिकला झा न्ही मुबा। 12 थेला झा च्याड्बासे चा आबादा ‘डाला अंश भउ आबा’ भिसी भिजी। जमाहेन्से थेसे हाडला सम्पत्ति झा न्हीदान भो लसी पिन्जी।

13 “तिगै धिन लिच्छा थे महिला झा च्याड्बा हाडला जम्मान सम्पत्ति भोर्सी अर्गु यहुल्सारी निजी। थेसे थेरी मोजमजा लसी जम्मान सम्पत्ति जिन्ना लजी। 14 थेला जम्मान धन सम्पत्ति जिन्बा धुइरीन थे यहुल्सारी ल्हानान अनिकाल तजी, ओच्छे थेसे ल्हानान दुख याड्जी। 15 जमाहेन्से थे, थे यहुल्साला म्हि गिक मुबा ग्लारी गे म्हाइबारी निजी। थे म्हिसे थेदा हाडला ढ्वा छबारी पुइजी। 16 थेदा खालैसे चबा थुड्बा आपिन्बासे लमा थेसे ढ्वला दाना चसीन हाडला फो म्रेन्ना लबारी म्हाइजी।

17 “जमाहेन्से थेसे हाडला दिम ढन्जी। ओच्छे चुहड् भिबारी छ्याइजी, ‘डाला दिमरी डाला आबाला नोकरगदेसे म्रेन्ना चसीनोन लेड्बाधोना चबा सहे मुला। तर डा चा भिसम चुरी फोइथाननोन सिबारी छ्याइबा मुला। 18 दाहेन्से डा आबा मुबा ग्लारी निसी, “आबा, डाइ परमेश्वरदेन हाडला बिरोधरी पाप लजी। 19 दाहेन्से डा हाडला झा भिबाधोनाला आरे। तसैनोन हाडसे डादा दया लसी हाडला नोकरगदे न्हडला गिक म्हन्सी थान्गो भितो:जी” ’ भिसी म्हन्जी।

20 “जमाहेन्से थे आबा मुबा ग्लारी निजी। आबासे थेदा थारेड्ग्याम खबान लबा म्राड्सी थेला सेमरी दया रे:जी। ओच्छे ताड्सी झादा स्यापबारी यार्बान निसी झादा हाप ख्वाइसी च्योक लजी। 21 ओच्छे झासे ‘आबा, डाइ परमेश्वरदेन हाडला बिरोधरी पाप लबा मुला। डा दाहेन्से हाडला झा भिबाधोनाला आरे’ भिसी भिजी। 22 तर आबासे हाडला नोकरगदेदा ड्योइसी चुहड् भिजी, ‘जम्मान भन्दा ज्यबा क्वान, च्यापदेन लखम योना भसी चुदा क्वान्सी पिन्गो। 23 ओच्छे छोबा हड्बा बहर भसी साइगो। तिनी य्हाडसे भोज लइ। 24 तिग्दा भिसम चु डाला झा सिबा मुबा दान्दे सोबा मुला, थे म्हाबा मुबा तर दान्दे याड्बा मुला।’ जमाहेन्से जम्मान ताड्सी भोज चबारी छ्याइजी।

* 15:2 लूका ५:२९-३०

25 “थे धुइरी थेला थेबा झा बुरी मुबा। थे बुग्याम खबा धुइरी दिमला डामरी धोखमा दिमरी व्हाइ गोबादेन स्यहबान लबा थे:जी। 26 जमाहेनसे थेसे नोकर गिकदा ड्योइसी, ‘चुरी तिग लबा?’ भिसी ड्योइमा, 27 नोकरसे थेदा ‘हाडला आले दो:सी दिमरी खबा मुला। चुहड लसी हाडला झा ज्यना लसी खबासे लमा आबासे जम्मान भन्दा छोबा बहर गिक साइबा मुला’ भिसी भिजी।

28 “चु ताम थे:सी थे बोमोसे दिम न्हडरी वाड्बारी आम्हाइनी। थेतबासेलमा थेला आबा मडग्यार खसी थेदा व्हाम्बारी छ्याइजी। 29 तर थेसे आबादा ‘च्यागो, डाइ चुदे दिडधोना हाडला नोकरसे हड लसी जम्मान गे लसी हाडसे कुल्बा जम्मान तामएनोन ड्यानजी। तसैनोन डाला ह्योगदेदेन छ्याम ढिकसी चबा थुड्बा लबारी हाडसे डादा खाइमै रा गिकधोना पिन्जी? 30 तर तिनी हाडला धन सम्पत्ति बेश्यागदेदेन छ्याम भ्रसी जिन्ना लबा झा दो:सी खमा चा थेला लागिरी छोबा बहर साइबा?’ भिसी भिमा, 31 आबासे थेदा ‘झा, ए मी सदन डादेन छ्याम मुनोन मुला। ओच्छे डादेन छ्याम मुबा जम्मान धन सम्पत्ति एलान हिन्ना। 32 तिनी य्हाडसे ताड्सी भोज लतो:बा धिन हिन्ना। तिग्दा भिसम एला आले सिबा मुबा दान्दे सोबा मुला, म्हाबा मुबा दान्दे याड्बा मुला’ भिसी भिजी।”

16

चलाक नाइके

1 येशूसे हाडला चेलागदेदा चुहड भिसी सुड्जी, “ग्ला गिकरी फ्युकपो म्हि गिकला गे लबा नाइके गिक मुबा। ‘नाइकेसे हाडला धन सम्पत्ति नाश लजी’ भिसी म्हिगदेसे थे फ्युकपो म्हिदा पाड्जी। 2 जमाहेनसे थे फ्युकपो म्हिसे हाडला गे लबा नाइकेदा ड्योइसी ‘म्हिगदेसे एला बिरोधरी पाड्बा ताम तिग हिन्ना? दाहेनसे जम्मान हिसाब किताब डादा घोना लउ। ओच्छे चु गे ख्लागो’ भिसी भिमा, 3 थे नाइकेसे चुहड भिसी म्हनजी, ‘दाहेनसे डादा मालिकसे गेग्याम ते:बारी छ्याइबा मुला, डा तिग लइ? ख्वबा मोइबा लइ भिसम भड आरे, हीसी चबारी डादा पे:बा खमुला। 4 दाहेनसे डाइ तिग लतो:बा थे डादा था मुला, डादा मालिकसे गेग्याम ते:माहेनसे म्हिगदेसे डादा मान लला भिबा ताम डाइ था याड्सी जिन्बा मुला।’ 5 जमाहेनसे थेसे हाडला मालिकला असामीगदेदा गिक गिक लसी ड्योइजी। ओच्छे थेसे डाच्छा खबा असामीदा ‘एदा डाला मालिकला छे गाते मुला?’ भिसी ड्योइमा, 6 थे असामीसे ‘हजार सोम लिटर छ्युगु मुला’ भिसी भिमाहेनसे थे नाइकेसे ‘दाहेनसे एला तमसुकरी हजार गिकसे ग्यार्जा डा लिटर जे भ्रिउ’ भिसी भिजी। 7 थेहड लसी स्य्हान्दोदाएनोन ‘एदा डाला मालिकला छे गाते मुला?’ भिसी ड्योइमा, थे असामीसे ‘हजार गिक बोरा ग्वा मुला’ भिसी भिमाहेनसे थे नाइकेसे ‘एला तमसुकरी ग्यार्जा भ्रे: बोरा जे भ्रिउ’ भिसी भिजी।

8 “मालिकसे थे बेडमान नाइकेसे चलाक गे लबा म्राड्सी थेला हर्गबढाइ लजी। तिग्दा भिसम चु जम्बुलिडला म्हिगदे हाडला ह्यो सहोबारी परमेश्वरदा डोसेबा म्हिगदे भन्दा ल्हानान चलाक तमुला। 9 थेतबासेलमा एनीगदेसे डाला ताम ड्यानगो, एनीगदेसे हाडला लागिरी जम्बुलिडला धन सम्पत्तिसे ह्यो सहोउ। तिग्दा भिसम एनीगदेला धन सम्पत्ति जिन्सी निसैनोन थेनीगदेसे एनीगदेदा जुकजुकधोना चिबा ग्लारी मान लला।

जजाबा तामरीन विश्वास लखम्बा ततो:ला

मत्ती ६:१४

10 येशूसे दो:सी चुहड भिसी सुड्जी, “खालैसे जजाबा तामरी विश्वासला गे लजी भिसम थेदा घेन गेरीएनोन विश्वास लला। तर जजाबा तामरी विश्वासला गे आलनी भिसम थेदा घेन गेरीएनोन विश्वास आल। 11 थेतबासेलमा एनीगदेसे जम्बुलिडला धन सम्पत्तिरी विश्वासला गे आलनी भिसम खाल्से एनीगदेदा सतयला धन सम्पत्ति जिम्मा पिन्ना? 12 थेहड लसीन स्य्हान्दोला धन सम्पत्तिरी विश्वासला गे आलनी भिसम एनीगदेदा धन सम्पत्ति खाल्से पिन्ना?

13 “खजिबै नोकरसे मालिक न्हीला गे लबारी आखम। तिग्दा भिसम थेसे गिकदा हेला लला, स्य्हान्दोदा माया लला, अथवा गिकसे भिबा ताम इयान्ना, स्य्हान्दोदा वास्तान आल। थेहड् लसीन एनीगदेसेनोन परमेश्वरदेन धन सम्पत्ति न्हीलान गे लबारी आखम।”*

येशूसे लोपबा अर्गु तामगदे

मत्ती ११:१२-१३; ५:१८, ३२

14 चु ताम थे:सी थेरी मुबा फरिसीगदेसे येशूदा खिसी लजी। तिग्दा भिसम थेनीगदे टाडगाला लिच्छा जे भ्रमुबा। 15 ओच्छे येशूसे थेनीगदेदा “म्हिगदेला ओन्छाडरी हाडसे हाडदान डनी ज्यबा म्हि हिन्ना भिसी भ्रबा एनीगदेन हिन्ना। तर परमेश्वरदा एनीगदेला सेम खाहड्बा मुला भिसी था मुला। तिग्दा भिसम म्हिगदेसे घेन भिसी म्हनबा तामगदे परमेश्वरला लागिरी ल्हानान नडबा खबा ताम हिन्ना। 16 “बपत्तिस्मा पिन्बा यूहन्नाला धुइधोना मोशाला ठिमदेन अगमवक्तागदेसे भ्रिबा परमेश्वरला बचन थे:ना लबा मुबा। थेनोन धुइहेनसे परमेश्वरला यूहुल्साला समाचार थे:ना लबान मुला। ओच्छे जम्मान म्हिगदे भड लसी परमेश्वरला यूहुल्सारी वाड्बान मुला।* 17 मुदेन जम्बुलिड नाश तसैनोन परमेश्वरसे मोशादा पिन्बा ठिमरी मुबा ताम गिकनोन आम्हा।*

18 “खालै म्हिसे हाडला म्रिडदेन छ्याम छोडपत्र लसी स्य्हान्दो म्रिडम्हेमेदेन छ्याम ब्याह लजी भिसम थे चा ब्रेल्सी भ्रबा हिन्ना। थेहड् लसी थेसे ख्लाबा म्रिडम्हेमेदा जुन म्हिसे ब्याह लला थेएनोन ब्रेल्सी भ्रबा हिन्ना।”*

फ्युकपो म्हिदेन लाजरस

19 दो:सी येशूसे चुहड् भिसी सुड्जी, “ग्ला गिकरी फ्युकपो म्हि गिक मुबा। थेसे मलमलला महँगो क्वान क्वान्सी धिन धिननोन मोजमजा लसी चिमुबा। 20 तर थेला म्प्रापरी चा जिउ नाड पोरनोन पोर मुबा लाजरस भिबा हीबा म्हि गिकदा भसी थान्मुबा। 21 थे फ्युकपो म्हिसे चमा ताडबा भ्राइभुड चम्याड्ला वा भिसी च्यासी चिमुबा। नगीगदे चा खसी थेला पोर ल्हेममुबा।

22 “तिरेकुनु थे प्राडबो म्हि सिजी। जमाहेनसे थेदा स्वर्गदूतगदेसे अब्राहामला डामरी भोर्सी थान्जी। ओच्छे थे फ्युकपो म्हिएनोन सिजी। 23 थे फ्युकपो म्हि नर्गरी ल्हानान दुख नासी चिबा धुइरी थेसे च्यामा थारेडग्याम अब्राहामला डामरी लाजरसदा म्राड्जी। 24 ओच्छे थेसे क्रिड्सी ‘आबा अब्राहाम, डादा दया लसी लाजरसदा डा मुबा ग्लारी पुडखउ। थेला या जुम्बी क्युइरी ब्लुम्सी डाला लेरी थोपा गिक क्युइ ताइना लगै। तिग्दा भिसम डा चुरी मेसे क्रोसी भोल्सी चिबा मुला’ भिसी भिजी।

25 “जमाहेनसे अब्राहामसे थेदा ‘झा, एसे तिग ढन्बा आरे? ए सोबा धुइरी ल्हानान सुख याड्बा मुबा, तर लाजरससे चा ल्हानान दुख याड्बा मुबा। दान्दे चा लाजरससे चुरी सुख शान्ति याड्बा मुला, एसे चा दुख नासी चितो:बा मुला। 26 एदेन छ्याम डन्ना गुडरी घेन व्हाड मुला। थेतबासेलमा क्याम्सड झासम लबा सेम मुसैनोन क्याम्सड झासम लबारी आखम्मुला’ भिसी भिजी।

27 “जमाहेनसे थे फ्युकपो म्हिसे ‘थेहड् भिसम आबा अब्राहाम, डाला बिन्ती मुला, लाजरसदा डाला आबाला दिमरी पुडगो। 28 तिग्दा भिसम थेरी डाला आले डा मुला। थेसे थेनीगदेदा डा हड् लसी थाभ्रउ भिसी पाड्गै, आहिन्सम थेनीगदेएनोन चु दुख नातो:बा ग्लारी खला’ भिसी भिजी।

29 “जमाहेनसे अब्राहामसे, ‘थेनीगदेदेन छ्याम मोशादेन अगमवक्तागदेसे भ्रिबा परमेश्वरला बचन मुनोन मुला, एला आलेगदेसे थे बचनरी भ्रिबा ताम इयान्सम तनोन तला’ भिसी भिजी।

30 “ओच्छे थे फ्युकपो म्हिसे ‘आहिन अब्राहाम आबा, थेनीगदेदा ओतेसे जे आत। सिबा म्हिगदे न्हडला खालै सोसी थेनीगदे मुबा ग्लारी निजी भिसम थेनीगदे हाड हाडला पाप ख्लासी परमेश्वरपट्टि दो:सेला मुबा’ भिसी भिजी।

31 “तर अब्राहामसे थेदा ‘मोशादेन अगमवक्तागदेला ताम आड्यान्बागदेसे सिबा म्हि सोसी निसैनोन थेनीगदेसे विश्वास आल’ भिसी भिजी।”

* 16:13 मत्ती ६:२४ * 16:16 मत्ती ११:१२-१३ * 16:17 मत्ती ५:१८ * 16:18 मत्ती ५:३२; १ कोर ७:१०-११

17

येशूसे विश्वासदेन माफ लतोःबा भिसी लोपबा

मत्ती १८:६-७, २१-२२; मर्कूस ९:४२

1 येशूसे हाडला चेलागदेदा चुहड् भिसी सुड्जी, “च्यागो, म्हिदा पापरी फसब लबा तामगदे मी खनोन खमुला। तर स्य्हान्दोदा पापरी फसब लबा म्हिसे चा परमेश्वरग्याम सजाय याड्ला। 2 जुन म्हिसे चु कोलागदेदा पाप लपुड्ला थेहड्बा म्हिदा पाप लपुड्बा भन्दा खारेरी हान्दा च्योसी समुन्द्ररी भ्याड्बान ज्यबा तला। 3 थेतबासेलमा हाडला लागिरी होशियार तसी चिउ! एला आलेसे पाप लजी भिसम थेदा बड्गो। ओच्छे थेसे डाइ लबा पाप खलाला भिजी भिसम थेदा माफ लउ।* 4 एला आलेसे एला बिरोधरी धिनना निसरेमधोना पाप लसैनोन निसरेमधोनान थेसे डाइ लबा पाप खलाला भिजी भिसम थेदा माफ लउ।”

5 जमाहेन्से प्रभुला मुल चेलागदेसे प्रभुदा “प्रभु, डन्ना विश्वास ल्हेना लसी पिन्गो” भिसी भिजी।

6 प्रभुसे थेनीगदेदा “एनीगदेदेन छ्याम पच्छैला ब्लु गिक तेःबा जे विश्वास मुजी भिसम चु किम्बुला दोडदा ‘ए प्योक्सी समुन्द्ररी निउ’ भिजी भिसम थे एनीगदेसे भिबा हड्णोन तला।

नोकरसे लतोःबा गे

7 “एनीगदे न्हडरी खालैला नोकर बु मोइसी तसै ग्यु छसी तसै दिमरी खमा, एनीगदेसे थेदा ‘चबा थुड्बा लउ’ भिसी खाइमै भिला? आभि। 8 बरु एनीगदेसे थेदा ‘निउ, डाला लागिरी चबा थुड्बा तयार लउ, डाइ चसी आजिन्तेधोना डादा क्योड्सी चिउ, ओच्छे ए चउ’ भिसी भिला। 9 हाडसे कुल्बा अन्छार गे लबा थे नोकरदा एसे खाइमै धन्यवाद पिन्ना? आपिन। 10 थेहड् लसीन एनीगदेदा कुल्बा जम्मान गे लसी जिन्माहेन्से ‘डनी मी गे आखेलबा नोकर हिन्ना। तिग्दा भिसम डन्से लतोःबा गे जे लबा हिन्ना’ भिसी भिउ।”

येशूसे कोरे खबा म्हि च्युइदा खम्ना लबा

11 येशू यरूशलेम भिबा शहररी फेपबा धुइरी सामरियादेन गालील अञ्चलग्याम तबान फेपजी। 12 येशू नाम्सा गिकरी वाड्बारी छ्याड्बा धुइरी कोरे खबा म्हि च्युइदा स्यापजी। थे कोरे खबा म्हिगदे जजाकी क्यथाड्णोन राप्सी, 13 “येशू गुरु, डन्दा दया लउ” भिसी क्रिड्जी।

14 जमाहेन्से येशूसे थेनीगदेदा “एनीगदे परमेश्वरला मन्दिररी पूजा लबा म्हि मुबा ग्लारी निसी हाडदा उन्गो” भिसी सुड्जी। ओच्छे थेनीगदे निना निनान ग्यामरीन खम्जी।* 15 थेनीगदे न्हडला गिकसे हाड खम्बा था याड्सी परमेश्वरदा जयजयकार लबान दोःसी खजी। 16 ओच्छे थे म्हिसे येशूदा धन्यवाद पिन्सी येशूला स्यहापरी फ्या लजी। थे म्हि चा सामरी य्हुलला मुबा।

17 जमाहेन्से येशूसे “कोरेग्याम खम्बा म्हि च्युइ न्हडरी चु गिक जेन हिन्ना? स्य्हान्दो म्हि कु चा खानड निजी? 18 परमेश्वरदा धन्यवाद पिन्बारी चु सामरी बाहेक स्य्हान्दो खालै आतनी?” भिसी सुड्जी। 19 जमाहेन्से येशूसे थे सामरी य्हुलला म्हिदा “दाहेन्से ए रेःसी निउ, एला विश्वाससे लमा एला कोरे म्हाबा मुला” भिसी सुड्जी।

परमेश्वरला य्हुल्सा एनीगदेला गुडरीन मुला

मत्ती २४:२३-२८, ३७-४१

20 फरिसीगदेसे परमेश्वरला य्हुल्सा खाइमा खला भिसी ड्योइमा, येशूसे थेनीगदेदा “परमेश्वरला य्हुल्सा म्राड्ना लसी आख। 21 खालै म्हिसे परमेश्वरला य्हुल्सा चुरी मुला, थेरी मुला भिसी भिदेमा एनीगदेसे आम्राड्। तिग्दा भिसम परमेश्वरला य्हुल्सा एनीगदेला गुडरीन मुला” भिसी सुड्जी।

22 जमाहेन्से येशूसे हाडला चेलागदेदा चुहड् भिसी सुड्जी, “एनीगदेसे तिरेकुनु परमेश्वरसे पुइखबा म्हिदा च्याबा सेम लला, तसैनोन एनीगदेसे आम्राड्। 23 म्हिगदेसे एनीगदेदा थे थेरी मुला, चुरी मुला भिसी भिला, जमा धुइरी एनीगदे थानिउ ओच्छे थेनीगदेला लिच्छा थाभ्रउ। 24 तिग्दा भिसम

* 17:3 मत्ती १८:१५ * 17:14 लेवी १४:१-३२

परमेश्वरसे पुइखबा म्हि तिप्लीड खबा धुइरी मुला कुनी गिकग्याम अर्गु कुनीधोना य्हाल तबा हड् तला। 25 तर डाच्छा थेसे ल्हानान दुखदेन म्हिगदेसे लबा बिरोध नातोःबा मुला।

26 “ओन्मा नोआला धुइरी तबा हड् नोन परमेश्वरसे पुइखबा म्हि दोःसी खबा धुइरीनोन तला।* 27 नोआ पानी जहाजरी वाड्बा धिनकुनुधोना म्हिगदे चबा थुड्बादेन ब्याह लबान मुबा। थेनोन धुइरी नामदेन भाल बाढी खसी जम्मान नाश लजी।* ”

28 “थेहड् लसीन लोतला धुइरीनोन कोइ म्हिगदे चबा थुड्बा, कोइ म्हिगदे ग्लुबा चूड्बा, कोइ सूबा ओच्छे कोइ म्हिगदे दिम सहोबान मुबा। 29 लोत सदोमग्याम थोन्माकुनुन मुग्याम मेदेन बारूद ताइसी जम्मान नाश लजी।* ”

30 “परमेश्वरसे पुइखबा म्हि खबा धुइरीनोन थेहड् नोन तला। 31 थे धुइरी तलाथोरी मुबा म्हिगदे हाडला सामान किन्बारी मार फापसी दिम न्हडरी थावाड्गो, ओच्छे बुरी मुबागदेएनोन दिमरी दोःसी थानिउ।* 32 थेहड् लसीन एनीगदेसे लोतला मिडदा तबा ताम ढन्गो। 33 तिग्दा भिसम जुन म्हिसे हाडला ज्यान जोगब लबारी म्हाइला थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे जुकजुकधोनाला जुनी याड्ला। 34 थेतबासेलमा एनीगदेसे डाला ताम ड्यानगो, म्हुनड ग्ला गिकरीन म्हेसी चिबा म्हि न्ही न्हडरी गिकदा भोर्ला गिकदा थेरीन खलाला। 35 ओच्छे हान्दारी ब्रा स्याड्सी चिबा मिडम्हेमे न्ही न्हडरी गिकदा भोर्ला गिकदा थेरी खलाला। 36 थेहड् लसीन बुरी मुबा म्हि न्ही न्हडरी गिकदा भोर्ला, गिकदा खलाला।† ”

37 जमाहेन्से चेलागदेसे येशूदा “खानड प्रभु?” भिसी ड्योइमा, येशूसे थेनीगदेदा “जुन ग्लारी सिबा जन्तु मुला थेरी गिद्दागदे पोप तमुला” भिसी सुड्जी।

18

हेम्बो सिबा मिडम्हेमेदेन न्यायाधीशला उखान

1 जमाहेन्से येशूसे हाडला चेलागदेदा “सदन प्रार्थना लसी चिगै ओच्छे खाइमै हरेस थाचगै” भिसी उखान गिक सुड्जी। 2 “शहर गिकरी न्यायाधीश गिक मुबा। थेसे परमेश्वरदेन म्हिगदेला वास्ता आलमुबा। 3 थेनोन शहररी हेम्बो सिबा मिडम्हेमे गिकएनोन मुबा। थे मिडम्हेमे घरिघरि थे न्यायाधीश मुबा ग्लारी निसी ‘डादा डाला बिरोधरी रेःबा म्हिग्याम ठीक निसाफ लसी पिन्गो’ भिसी भिमुबा।

4 “तिगै धिनधोना मी थेसे थे मिडम्हेमेला तामदा आड्याननी। तर लिच्छा थेसे, ‘डा परमेश्वरदेन म्हिगदेला वास्ता आलबा म्हि हिन्ना। 5 तर चु हेम्बो सिबा मिडम्हेमेसे डादा ल्हानान दुख पिन्बासे लमा चुला ठीक निसाफ लसी पिन्तोःजी। आहिन्सम चु घरिघरि खसी डादा छेर्ना लला’ भिसी सेमरी म्हन्जी।”

6 जमाहेन्से प्रभुसे चुहड् भिसी सुड्जी, “च्यागो, थे आज्यबा न्यायाधीशसे तिग लबा चीम, एनीगदेसे था याड्गो। 7 थेहड् लसीन परमेश्वरसे धिन म्हुननोन बिन्ती लबा हाडसे धम्बा हाडला महिला ठीक निसाफ आल? तिग हाडला म्हिदा हो लबारी घइना लला? 8 च्यागो, परमेश्वरसे हाडला महिला ठीक निसाफ लबारी खाइमै घइना आल। तसैनोन परमेश्वरसे पुइखबा म्हि खमा तिग चु जम्बुलिडरी डादा विश्वास लबागदे स्याप्ला?”

म्हि न्हीला प्रार्थना

9 हाडसे हाडदान डा ज्यबा म्हि हिन्ना भिसी ढुक्क तसी स्य्हान्दोदा चा हेला लबा म्हिगदेदा येशूसे चुहड् भिसी उखान गिक सुड्जी, 10 “फरिसीदेन तिरो दुइबा म्हि प्रार्थना लबारी परमेश्वरला मन्दिरी निजी। 11 ओच्छे फरिसीसे चुहड् भिसी प्रार्थना लजी, ‘परमेश्वर हाडदा धन्यवाद मुला, तिग्दा भिसम डा स्य्हान्दो म्हिगदे हड्बा लोभी, बेइमानी, स्य्हान्दोदेन छ्याम ब्रेलसी भ्रबा म्हि हड्बा आहिन। ओच्छे चु तिरो दुइबा म्हि हड्बाएनोन आहिन। 12 डाइ सातारी न्हीरेम फोइथान

* 17:26 उत्प ६:५-८ * 17:27 उत्प ७:६-२४ * 17:29 उत्प १८:२०-१९-२५ * 17:31 मत्ती २४:१७-१८; मर्कु १३:१५-१६

† 17:36 चु पदला ताम ल्हाना हड्बा ग्रीक बाइबलरी भिबा आरे।

चिसी प्रार्थना लबा मुला। ओच्छे डाइ याड्बा जम्मान सहेला भो च्युइला भो गिक हाडदा पिन्बा मुला।'

13 “तर तिरो दुइबा म्हि चा थारेडनोन राप्सी स्वर्गपट्टि आच्याना हाडला कु ठोकबान, ‘परमेश्वर, डा पापीदा दया लउ’ भिसी भिजी। 14 थेतबासेलमा एनीगदेसे डाला ताम ड्यानगो, चु तिरो दुइबा म्हि चा स्य्हान्दो म्हि भन्दा परमेश्वरदा सेम निबा म्हि दोसी हाडला दिमरी निजी। तिग्दा भिसम जुन म्हिसे हाडसे हाडदान घेन स्होला थे म्हि जजा तला। तर जुन म्हिसे हाडसे हाडदान जजा स्होला थे म्हि घेन तला।”*

येशूसे कोलागदेदा मोलम पिन्बा

मत्ती १९:१३-१५; मर्कूस १०:१३-१६

15 म्हिगदेसे हाडला कोलागदेदा येशूसे हाडला छ्या थान्सी मोलम पिन्गै भिसी येशू मुबा ग्लारी भजी। चु म्हाड्सी चेलागदेसे थेनीगदेदा बड्जी। 16 तर येशूसे थेनीगदेदा ड्योइसी चुहड् भिसी सुड्जी, “कोलागदेदा डा मुबा ग्लारी खपुड्गो, थेनीगदेला ग्याम थाकागो। तिग्दा भिसम परमेश्वरला य्हुल्सा चु कोलागदे हड्बालान हिन्ना। 17 एनीगदेसे डाला ताम ड्यानगो, जुन म्हिसे चु कोलागदेसे हड् लसी परमेश्वरला य्हुल्सादा विश्वास आल, थे म्हि परमेश्वरला य्हुल्सारी खाइमे वाड्आम्याड्।”

परमेश्वरला य्हुल्सादेन फ्युकपो म्हि

मत्ती १९:१६-३०; मर्कूस १०:१७-३१

18 यहूदी नेता गिकसे येशूदा “ज्यबा गुरु, जुकजुकधोनाला जुनी याड्बाला लागिरी डाइ तिग लतो:ला?” भिसी ड्योइमा, 19 येशूसे थेदा चुहड् भिसी सुड्जी, “एसे डादा तिग्दा ज्यबा भिबा? परमेश्वर बाहेक खालै ज्यबा आरे। 20 परमेश्वरसे कुल्बा ताम एदा थानोन मुला। म्हि थासाइगो, स्य्हान्दोदेन छ्याम ब्रेल्सी थाभ्रउ, य्हो थालउ, लुसीला ताम पाड्सी थाभ्रउ ओच्छे हाडला आबा आमादा मान लउ।”*

21 जमाहेन्से थेसे, “चु जम्मान ताम मी डाइ जत्धुगुहेन्सेन लसीन चिबा मुला” भिसी भिजी। 22 चु ताम थे:माहेन्से येशूसे थेदा “अझ एसे गे गिक लतो:बा मुला, दाहेन्से एसे हाडदेन छ्याम मुबा जम्मान धन सम्पत्ति चूड्सी प्राडबोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ” भिसी सुड्जी। 23 तर चु ताम थे:सी थे म्हिदा ल्हानान दुख ड्हमजी। तिग्दा भिसम थे ल्हानान फ्युकपो मुबा।

24 थे म्हिला सेमरी ल्हानान दुख तबा था याड्सी येशूसे चुहड् भिसी सुड्जी, “थेदा च्यासी फ्युकपो म्हिदा परमेश्वरला य्हुल्सारी वाड्बारी गाते गाहो मुला। 25 तिग्दा भिसम फ्युकपो म्हिदा परमेश्वरला य्हुल्सारी वाड्बारी भन्दा ऊंटदा दापला मीग्याम वाड्बारी सजिलो मुला।”

26 चु ताम थे:बागदेसे येशूदा “थेहड् भिसम खाल्से थाबा याड्ला?” भिसी ड्योइजी।

27 जमाहेन्से येशूसे थेनीगदेदा “चु गे म्हिसे लबारीन आखम्बा गे तसैनोन परमेश्वरसे लखम्ला” भिसी सुड्जी।

28 ओच्छे पत्रुससे, “सहीगो प्रभु, डन्से हाडला दिमनामनोन ख्लासी हाडदेन छ्याम भ्रबा मुला” भिसी भिमा, 29 येशूसे थेनीगदेदा “एनीगदेसे डाला ताम ड्यानगो, जुन म्हिसे हाडला दिम, मिड, ज्योज्यो आले, आबा आमा, ओच्छे झा झामेदा परमेश्वरला य्हुल्साला लागिरी खलाला, 30 थेसे दान्देन थे भन्दा ल्हाना याड्ला, ओच्छे लिच्छा खबा धुइरी थेसे जुकजुकधोनाला जुनी याड्ला” भिसी सुड्जी।

येशूसे हाडदा साइला भिसी सुड्बा

मत्ती २०:१७-१९; मर्कूस १०:३२-३४

31 येशूसे हाडला च्युक न्ही चेलागदेदा कुनी गिकरी भोर्सी चुहड् भिसी सुड्जी, “च्यागो, य्हाड् यरूशलेमरी निबान मुला। दाहेन्से परमेश्वरसे पुड्खबा म्हिला बाररी अगमवक्तागदेसे भिबा ताम पूरा तला। 32 थेदा अर्गु य्हुलला म्हिगदेला यारी जिम्मा पिन्ना। जमाहेन्से थे म्हिगदेसे थेदा खिसी लला

* 18:14 मत्ती २३:१२; लूका १४:११ * 18:20 प्रस्था २०:१२-१६; वयव ५:१६-२०

ओच्छे थो स्वाबान बेइज्जत लला, ³³जमाहेन्से कोर्रासे तोला ओच्छे साइला। तसेनोन थे सोमरेमाकुनु सिबाग्याम सोला।” ³⁴तर चेलागदेसे चु ताम तिगै आघोनी। तिग्दा भिसम चु ताम महिला ज्ञान बुद्धिसे घोसी घोआखम्बा तबासे लमा येशूसे तिग सुड्बा हिन्ना भिसी थेनीगदेसे म्हन्बारीएनोन आखम्नी।

येशूसे मी आम्राड्बा महिला मी प्राड्ना लबा

मत्ती २०:२९-३४; मर्कूस १०:४६-५२

³⁵ येशू यरीहो शहरला डामरी धोमा थेरी मी आम्राड्बा म्हि गिक ग्यामला कुनीरी ह्रीसी चिमुबा। ³⁶ थे मी आम्राड्बा म्हिसे हाडला डामग्याम महिला हुल निबान लबा थे:सी, “चुरी तिग तजी?” भिसी ड्योइमा, ³⁷ म्हिगदेसे थेदा “नासरतला येशू चुग्यामसेन फेपबान मुला” भिसी भिजी।

³⁸ जमाहेन्से थेसे क्रिड्बान, “दाऊद ग्लेला सन्तान येशू, डादा दया लउ” भिसी भिमा, ³⁹ डाच्छा भ्रवागदेसे थेदा कुटिसी चिउ भिसी बड्जी। तर थेसे ज्ञन क्रिड्बान, “दाऊद ग्लेला सन्तान येशू, डादा दया लउ” भिसी भिजी।

⁴⁰ थेसे चुहड् भिबा थे:सी येशू थेन तसी थेदा हाड मुबा ग्लारी भपुड्जी। ओच्छे थे डामरी खमाहेन्से, ⁴¹ “डाइ एला लागिरी तिग लउ भिसी म्हन्बा मुला?” भिसी ड्योइजी। जमाहेन्से थेसे “प्रभु, डाला मी प्राड्ना लसी पिन्गो” भिसी भिजी।

⁴² येशूसे थेदा “लु, एसे प्राड्गै, एसे विश्वास लबासे लमा एसे प्राड्बा मुला” भिसी सुड्जी। ⁴³ येशूसे चुहड् सुड्मैछ्याम थेसे प्राड्जी। ओच्छे थेसे परमेश्वरदा जयजयकार लबान येशूदेन छ्याम भ्रजी। चु प्राड्बा म्हिगदेसेनोन परमेश्वरदा जयजयकार लजी।

19

तिरो दुइबा जखायस

¹ येशू यरीहो शहरग्याम फेपबान मुबा। ² थेरी जखायस भिबा फ्युकपो म्हि गिक मुबा। थे तिरो दुइबा म्हिगदे न्हडला मुल म्हि मुबा। ³ थेसे येशूदा खाल चीम भिसी च्याबारी म्हाइजी। तर महिला हुलसे लमा थेसे येशूदा आम्राड्नी। तिग्दा भिसम थे मेबा मुबा। ⁴ थेतबासेलमा येशूदा च्याबारी थे डाच्छा डाच्छा याबान निसी अञ्जीरला दोडरी के:जी। तिग्दा भिसम येशू थेग्यामसेन फेपबारी छ्याइबा मुबा। ⁵ थेरी धोखमाहेन्से येशूसे तोरपट्टि सहीसी जखायसदा “जखायस, ए योना मार फापसी खउ! तिग्दा भिसम तिनी डा एला दिमरी चितो:बा मुला” भिसी सुड्जी।

⁶ जमाहेन्से जखायस ताड्सी मार फापसी येशूदा फ्याफुल्जी। ⁷ चु प्राड्माहेन्से म्हिगदेसे “चु म्हि मी पापीला दिमरी डोन्बो दोसी निजी” भिसी येशूला तामगन लजी।

⁸ तर जखायससे “प्रभु, दाहेन्से डाइ डाला गडसल धन सम्पत्ति प्राड्बोगदेदा भो लसी पिन्ना, ओच्छे डाइ खालैदा ठगब लसी किन्बा मुसम थेदा भो बलि ल्हाना दो:सी पिन्ना” भिसी भिजी।

⁹ जमाहेन्से येशूसे थेदा “तिनीहेन्से चु दिमसे थार्बा याड्बा मुला। तिग्दा भिसम जखायसएनोन अब्राहामला सन्तान हिन्ना। ¹⁰ परमेश्वरसे पुइखबा म्हि म्हाबागदेदा म्हाइबारीदेन थार्बा पिन्बारी खबा हिन्ना” भिसी सुड्जी।

म्हरला डबलला उखान

मत्ती २५:१४-३०

¹¹ येशू यरूशलेमला डामरी धोमुबा। म्हिगदेसे दाहेन्से परमेश्वरला यहुल्सा योनान खबान मुला भिसी म्हन्सी येशूला ताम ड्यान्सी चिमुबा। थेतबासेलमा येशूसे थेनीगदेदा चुहड् भिसी उखान गिक सुड्जी, ¹² “खालै घेन म्हि गिक हाडला ग्लारी शासन लबा सेम लसी थे यहुल्साला ग्ले मुबा ग्लारी निजी। ¹³ निबा भन्दा डाच्छा थेसे हाडला नोकर च्युइदा ड्योइजी। ओच्छे जम्मादान म्हरला डबलर् गिक गिक पिन्सी ‘डा आखतेधोना चु टाड्गासे व्यापार लउ’ भिसी कुल्जी। ¹⁴ तर थेला यहुल्साला

† 19:13 “म्हरला डबल गिक” भिबा चा थे धुइरी ला सोमला तलब हिन्ना।

म्हिंगदेसे चा थेदा सेम आनिमुबा। थेतबासेलमा थे निसी जिन्माहेन्से 'चु म्हिसे शासन लगे भिबा डन्ना सेम आरे' भिसी ग्ले ब्लोनदा पुइजी।

15 "तर थे म्हि शासन लबा अधिकार किन्सी खजी। जमाहेन्से थेसे हाडला नोकरगदेदा व्यापार लसी गाते सहोजी भिसी ड्योइबारी ड्योइजी। 16 ओच्छे डाच्छा खबा नोकरसे 'मालिक, हाडसे पिन्बा डबल गिकसे डाइ डबल च्युइ सहोजी' भिसी भिजी। 17 जमाहेन्से थे म्हिसे थेदा 'स्याबास! ए डाला ज्यबा नोकर हिन्ना! तिग्दा भिसम एसे डादा जजा तामरी विश्वास उन्जी। थेतबासेलमा डाइ एदा शहर च्युइरी शासन लबा अधिकार पिन्ना' भिसी भिजी। 18 ओच्छे स्यहान्दो नोकरसे 'मालिक, हाडसे पिन्बा डबल गिकसे डाइ डबल डा सहोजी' भिसी भिजी। 19 जमाहेन्से थेदाएनोन थे म्हिसे 'ए शहर डाला मुल म्हि तला' भिसी भिजी। 20 ओच्छे स्यहान्दो नोकरएनोन खसी 'मालिक, डाइ हाडला म्हरला डबल रूमालरी झोर्सी थान्बा मुला, थे चुरी मुला। 21 हाड खरो म्हि भिसी डादा था मुबासे लमा डादा लोड्बा खजी, हाडसे व्यापार आलबा ग्लारी नाफा म्हाइमुला, ओच्छे तिगै आढवबा ग्लारी बाली दुइबारी म्हाइमुला' भिसी भिजी। 22 थे शासन लबा म्हिसे थेदा 'गे आखेल्बा नोकर! एला तामग्यामसेन डाइ ए गे आखेल्बा चीम भिसी निसाफ लला। डाइ व्यापार आलबा ग्लारी नाफा म्हाइमुला ओच्छे तिगै आढवबा ग्लारी बाली दुइबारी म्हाइबा खरो म्हि भिसी एदा थानोन चीम। 23 थेहड् भिसम एसे तिग डाइ पिन्बा डबल बैकरी आथान्नी? एसे बैकरी थान्बा हिन्सम डाइ दोःसी ब्याजदेन थे डबल किन्म्याड्सेला' भिसी भिजी। 24 ओच्छे थेसे थेरी राप्सी चिबागदेदा 'दाहेन्से थेग्याम थे म्हरला डबल ब्यन्सी गोर च्युइ डबल मुबादा पिन्गो' भिसी भिजी। 25 जमाहेन्से थेनीगदेसे 'मालिक, थेदेन छ्याम मी डाच्छालान गोर च्युइ डबल मुला' भिसी भिमा, 26 थे शासन लबा म्हिसे थेनीगदेदा 'एनीगदेसे डाला ताम ड्यानगो, तिग्दा भिसम जुन म्हिदेन छ्याम मुला थेदा अर्गुएनोन पिन्ना। तर जुन म्हिदेन छ्याम आरे थेदेन छ्याम मुबा जजाकीएनोन थेग्याम ब्यन्ना। 27 थेतबासेलमा डाइ शासन थालगे भिसी म्हन्बा डाला शत्रुगदेदा चुरी भसी डाला डाच्छापट्टि साइगो' भिसी कुल्जी।"

येशू यरूशलेमरी फेपबा

मत्ती २१:१-११; मर्कूस ११:१-११; यूहन्ना १२:१२-१९

28 चुहड् सुड्सी जिन्माहेन्से येशू थेनीगदेला डाच्छा डाच्छा यरूशलेमपट्टि फेपजी। 29 ओच्छे बेथफागेदेन बेथानिया नाम्साला डामला जैतून भिबा गडरी धोखमाहेन्से येशूसे हाडला चेलागदे न्हडला न्हीदा पुइजी। 30 पुइबा धुइरी चुहड् भिसी सुड्जी, "एनी जजाकी क्याथाडला नाम्सारी निउ। नाम्सारी धोमाहेन्से एनीगदेसे दान्देधोना खालै आक्रेःबा गधाला कोला गिक स्याप्ला। थेदा ब्लसी चुरी भसी खउ। 31 ब्लबारी छ्याइमा खालैसे एनीदा 'चुदा तिग्दा ब्लबा' भिसी ड्योइजी भिसम, 'चु प्रभुदा तोःबा मुला' भिसी भिउ।"

32 जमाहेन्से थे चेला न्ही नाम्सारी निजी। ओच्छे थेरी थेनीसे येशूसे सुड्बा हड्णोन गधाला कोला स्यापजी। 33 थेनीसे थे गधाला कोलादा ब्लबारी छ्याइमा थे गधाला धनीसे "एनीसे चु गधाला कोलादा तिग्दा ब्लबा?" भिसी ड्योइजी।

34 ओच्छे चेला न्हीसे "चु प्रभुदा तोःबा मुला" भिसी भिजी।

35 जमाहेन्से थे चेला न्हीसे गधाला कोलादा येशू मुबा ग्लारी भसी हाडला घ तीसी येशूदा थेतोरी धन्छ्यापुड्जी। 36 येशू फेपबारी छ्याइबा धुइरी म्हिंगदेसेनोन ग्यामरी हाड हाडला घगदे तीजी।

37 येशू यरूशलेम डामला जैतून भिबा गडला ग्युरोरी धोखमा येशूदेन छ्याम भ्रबा चेलागदेसे येशूसे लबा उदेकला गेगदे ढन्सी ताड्बान क्रिड्सी चुहड् भिसी परमेश्वरदा धन्यवाद पिन्बारी छ्याइजी,

38 "परमप्रभुला मिनरी फेपखबा ग्लेसे परमेश्वरग्याम मोलम याड्गै,

स्वर्गरी शान्ति तगै।

ओच्छे स्वर्गरी धन्छ्याबा परमेश्वरदा मानदेन

जयजयकार तगै।

39 महिला हुल न्हडग्याम फरिसीगदेसे येशूदा “गुरु, हाडला चेलागदेदा कुटिसी चिउ भिसी बड्गो” भिसी भिजी।

40 तर येशूसे थेनीगदेदा “डाला ताम ड्यानगो, चुगदे कुटिसी चिजी भिसम युडबागदेन क्रिड्बारी छ्याइला” भिसी सुड्जी।

यरूशलेम नाश तला भिबा था याड्सी येशू क्राबा

41 यरूशलेम डामरी धोमा येशूसे शहरदा हाडला डाच्छापट्टि प्राड्सी क्राबान चुहड् भिसी सुड्जी, 42 “यरूशलेमला म्हिगदे, तिनी शान्तिला लागिरी तिग तोःला भिसी था याड्बा हिन्सम तसेला, तर एनीगदेसे था आयाड्नी! 43 थेतबासेलमा दाहेन्से एनीगदेला शत्रुगदे ढिक्सी क्युर्सिन खसी एनीगदेदा गुडरी झाड्ला। 44 ओच्छे थेनीगदेसे एनीगदेला शहरला पर्खाल फुप्सी एनीगदेला शहरदा नाश लला। जमाहेन्से एनीगदेला कोलागदेदा साइला। तिग्दा भिसम परमेश्वरसे एनीगदेदा थाना लबा धुइदा एनीगदेसे डोआसेनी।”

येशू परमेश्वरला मन्दिररी फेपूबा

मत्ती २१:१२-१७; मर्कूस ११:१५-१९; यूहन्ना २:१३-२२

45 जमाहेन्से येशू परमेश्वरला मन्दिररी फेपूजी। ओच्छे परमेश्वरला मन्दिर न्हडरी चूड्बागदेदा चुहड् भिसी सुड्बान तापूजी, 46 “च्यागो, परमेश्वरला बचनरी ‘डाला दिम प्रार्थना लबा दिम तला’ भिसी भिबा मुला। तर एनीगदेसे मी य्होगदे चिबा ग्ला सहोबा मुला।”*

47 जमाहेन्से धिन धिननोन येशूसे परमेश्वरला मन्दिररी लोपूबारी छ्याइजी। थे धुइरी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे थे यहुल्साला नेतागदे ढिक्सी येशूदा साइबारी म्हाइमुबा। 48 तर थेनीगदेसे तिगै निउ आयाड्नी। तिग्दा भिसम जम्मान म्हिगदेसे सेम लसी येशूला ताम ड्यानमुबा।

20

येशूला अधिकारला बारेरी ड्योइबा

मत्ती २१:२३-२७; मर्कूस ११:२७-३३

1 तिरिकुनु येशू परमेश्वरला मन्दिररी लोपूबान मुबा ओच्छे परमेश्वरला यहुल्साला समाचार थेःना लबान मुबा। थेनोन धुइरी परमेश्वरला मन्दिररी पूजा लबा मुल म्हिगदेदेन यहूदी गन्बागदे ओच्छे यहूदी धर्मगुरुगदे येशू मुबा ग्लारी खजी। 2 ओच्छे थेनीगदेसे येशूदा “हाडसे खानडग्याम अधिकार याड्सी चु गे लबा हिन्ना? हाडदा चु अधिकार खाल्से पिन्बा हिन्ना?” भिसी ड्योइमा, 3 येशूसे थेनीगदेदा “डाइएनोन एनीगदेदा ताम गिक ड्योइला, थे ताम डादा पाड्गो। 4 यूहन्नासे पिन्बा बपतिसमा परमेश्वरग्याम हिन्ना कि म्हिग्याम हिन्ना?” भिसी ड्योइजी। 5 जमाहेन्से थेनीगदे हाड हाड न्हडरी ताम लबारी छ्याइजी, “परमेश्वरग्याम भिजी भिसम थेसे य्हाडदा ‘थेहड् भिसम एनीगदेसे तिग्दा यूहन्नादा विश्वास आलबा?’ भिसी भिला। 6 तर म्हिगदेग्याम भिजी भिसम म्हिगदेसे य्हाडदा बिरोध लला। तिग्दा भिसम थेनीगदेसे यूहन्नादा अगमवक्ता भिसी विश्वास लबा मुबा।” 7 थेतबासेलमा थेनीगदेसे येशूदा “खाइ, थेसे चु अधिकार खानडग्याम याड्जी डन्दा था आरे” भिसी भिमा, 8 येशूसे थेनीगदेदा “थेहड् भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाड्” भिसी सुड्जी।

अधियाँ सहोबा म्हिगदेला उखान

मत्ती २१:३३-४६; मर्कूस १२:१-१२

9 जमाहेन्से येशूसे म्हिगदेदा उखान गिक सुड्जी, “म्हि गिकसे वारीरी अडगुर सूसी अधियाँरी पिन्सी थे ल्हानान धिनना लागिरी अर्गु यहुल्सारी निजी। 10 अडगुर मिन्बा धुइ तमाहेन्से थे फ्युकपो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुड्जी। तर थे अधियाँ

* 19:46 यशै ५६:७; यर्मि ७:११

लबागदेसे थेदा तोबा ग्याड्बा लसी तिगै आपिन्ना पुइजी। 11 थे वारीला धनीसे स्यूहान्दो नोकर गिकदा पुइजी। थेदाएनोन थे अधियाँ लबागदेसे तोसी बेइज्जत लसी थान्थान पुइखजी। 12 थेहड् लसीन थेसे दोःसी स्यूहान्दो नोकरदाएनोन पुइजी थेदाएनोन थे अधियाँ लबागदेसे सिबाधोनान तोसी तेःजी।

13 “जमाहेन्से थे वारीला धनीसे ‘दाहेन्से डाइ तिग लसे? डाइ माया लबा डाला झादान पुइतोःजी। डाला झादा मी थेनीगदेसे मान लला वा?’ भिसी पुइजी। 14 तर थेदा म्राड्सी अधियाँ लबागदेसे ‘चु मी य्हाडला धनीला झा हिनना, य्हाडसे थेदा साइगे। जमाहेन्से थेला सम्पत्ति य्हाडलान तला’ भिसी ह्राड ह्राड न्हडरी ताम लजी। 15 जमाहेन्से थेनीगदेसे थेदा अडगुर वारीग्याम मडग्यार भोर्सी साइजी।”

चुहड् सुड्सी जिनमाहेन्से येशूसे थेनीगदेदा “दाहेन्से थे वारीला धनीसे थेनीगदेदा तिग लला तला?

16 थे खसी अधियाँ लबा म्हिगदेदा साइला ओच्छे थे अडगुरला वारी स्यूहान्दोगदेदा स्होबारी पिन्ना।” भिसी सुड्जी। चु थेःसी म्हिगदेसे “चुहड्बाम खाइमै थातगै” भिसी भिजी। 17 ओच्छे येशूसे थेनीगदेला लीरी सहीसी चुहड् भिसी सुड्जी, “थेहड् भिसम परमेश्वरला बचनरी ‘जुन युडबादा दिम स्होबा कर्मीगदेसे गे आखेल भिसी भ्याड्बा मुबा थेनोन युडबा दिमला सुर युडबा दोजी’

भिसी भिबा चु तामला अर्थ तिग हिनना?*

18 थे युडबाथोरी ताइबागदे जम्मान छारछिर निला, ओच्छे थे युडबा खालैथोरी ताइजी भिसम थेरी मुबा म्हि फ्लातफ्लेत निला।”

तिरो फातोःबा कि फाआतोःबा भिसी येशूदा ड्योइबा

मत्ती २२:१५-२२; मर्कूस १२:१३-१७

19 जमाहेन्से यहूदी धर्मगुरुगदेदेन परमेश्वरला मन्दिररी पूजा लबा मुल म्हिगदेसे थे धुइरी येशूदा चुड्बारी म्हाइजी। तिग्दा भिसम चु उखान येशूसे थेनीगदेलान बिरोधरी सुड्बा हिनना भिबा ताम थेनीगदेदा था मुबा। तर थेनीगदे म्हिगदे म्राड्सी लोड्मुबा। 20 थेतबासेलमा थेनीगदेसे येशूदा चुड्बारी दाउ च्याजी। थेनीगदेसे येशूदा तामग्याम फसब लसी रोमी अञ्चलाधीशला यारी जिम्मा पिन्बारी म्हाइमुबा। थेतबासेलमा ह्राडसे ह्राडदान डा ज्यबा म्हि हिनना भिसी भ्रबा म्हिगदेदा थेनीगदेसे येशू मुबा ग्लारी पुइजी। 21 थे म्हिगदे येशू मुबा ग्लारी निसी, “गुरु, ह्राडसे लोप्बा ताम ठीक हिनना। ह्राडसे खालैला ली सहीसी गे आलमुला, ओच्छे ह्राडसे परमेश्वरला सत्य ग्याम उन्मुला भिसी डन्दा था मुला। 22 थेतबासेलमा डन्से रोमी ग्याल्बो कैसरदा तिरो फाबा य्हाडला ठिम अन्छार ठीक हिनना कि आहिन?” भिसी ड्योइजी।

23-24 तर येशूसे थेनीगदेला पापी सेम था याड्सी येशूसे थेनीगदेदा “डादा डबल गिक भउ। चु डबलरी मुबा छापदेन मिन खाल्ला हिनना?” भिसी सुड्मा, थेनीगदेसे “रोमी ग्याल्बो कैसरला” भिसी जोहाब पिन्जी। 25 जमाहेन्से येशूसे थेनीगदेदा “थेहड् भिसम रोमी ग्याल्बो कैसरला जति कैसरदा पिन्गो, परमेश्वरला जति परमेश्वरदा पिन्गो” भिसी सुड्जी। 26 थेनीगदेसे महिला ओन्छाडरी येशूदा खजिबै तामग्याम फसब लसी चुड्बारी आखमनी। ओच्छे येशूसे सुड्बा तामरी थेनीगदे उदेक म्हन्सी कुटिसी चिजी।

सिबाग्याम सोना लबाला बारेरी ड्योइबा

मत्ती २२:२३-३३; मर्कूस १२:१८-२७

27 जमाहेन्से सिबाग्याम दोःसी आसो भिसी विश्वास लबा कोइ कोइ सदुकीगदे येशू मुबा ग्लारी खजी। 28 ओच्छे थेनीगदेसे येशूदा चुहड् भिसी ड्योइजी, “गुरु, मोशासे य्हाडदा पिन्बा ठिम अन्छार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतोःला भिसी भिबा मुला। 29 ग्ला गिकरी ज्योज्यो आले निस मुबा। थेबासे ब्याह लजी, तर कोलागदे आतनान थे सिजी। 30 थेहड् लसीन पाराडसे चाडदा ब्याह लजी,

* 20:17 भजन ११८:२२

थेएनोन कोलागदे आतनान सिजी। 31 जमाहेन्से साँजीसे चाडदा ब्याह लजी, थेएनोन कोलागदे आतनान सिजी। थेहङ् लसी जम्मासेन पालोन पालो चाडदा ब्याह लजी। तर जम्मान कोलागदे आतनान सिजी। 32 ओच्छे थे म्रिडम्हेमेएनोन सिजी। 33 थेतबासेलमा डन्दा सुङ्गो, सिबाग्याम सोना लजी भिसम थे म्रिडम्हेमे खजिबाला म्रिड तला? तिग्दा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।”

34 जमाहेन्से येशूसे थेनीगदेदा चुहङ् भिसी सुङ्गी, “दान्देला म्हिगदेसे ब्याह लला, ओच्छे ब्याहएनोन लसी पिन्ना। 35 तर स्वर्गरी निम्याङ्सेला म्हिगदे सिबाग्याम सोना लबा धुइरी ब्याह लसी आपिन ब्याहएनोन आल। 36 ओच्छे थेनीगदे खाइमे आसि तिग्दा भिसम थेनीगदे स्वर्गदूतगदे हङ्बान तला। ओच्छे सिबाग्याम सोना लबाला सन्तान तबासे लमा थेनीगदे परमेश्वरला सन्तान हिन्ना। 37 परमप्रभुसे लुङ्बा झाङ्ग्याम मोशादा ‘डा अब्राहामला परमेश्वर, इसहाकला परमेश्वर ओच्छे याकूबला परमेश्वर हिन्ना’ भिसी सुङ्बा ताम मोशासे भिबा मुला। चु तामग्यामसेन सिबाग्याम सोना लमुला भिसी उन्बा मुला।* 38 परमेश्वर सिबागदेला परमेश्वर आहिन, तर सोबागदेला परमेश्वर हिन्ना! थेतबासेलमा परमेश्वरला लागिरी जम्मान सोबा मुला।”

39 जमाहेन्से कोइ कोइ यहूदी धर्मगुरुगदेसे “गुरु, हाडसे सुङ्बा ताम ठीक हिन्ना” भिसी भिजी। 40 जमाहेन्से खालैसेन येशूदा तिगै ताम ड्योइबारी आँट आलनी।

येशू खाल हिन्ना

मत्ती २२:४१-४६; मर्कूस १२:३५-३७

41 जमाहेन्से येशूसे थेनीगदेदा चुहङ् भिसी सुङ्गी, “म्हिगदेसे खाहङ् लसी थार्बा पिन्बा ख्रीष्टदा दाऊद ग्लेला सन्तान भिसी भिबा? 42-43 तिग्दा भिसम दाऊद हाडसेन भिबा व्हाइला किताबरी चुहङ् भिसी भिबा मुला,

‘परमप्रभुसे डाला प्रभुदा डाइ एला शत्रुगदेदा एला काड धिरी आथान्तेधोना ए डाला दाहिने यापट्टि चिउ भिसी सुङ्गी।’*

44 दाऊद ग्लेसेन ख्रीष्टदा प्रभु भिला भिसम खाहङ् लसी ख्रीष्ट दाऊद ग्लेला सन्तान तला?”

यहूदी धर्मगुरुगदे म्राङ्सी होशियार ततो:बा

मत्ती २३:१-३६; मर्कूस १२:३८-४०

45 ओच्छे जम्मान म्हिगदेसे ड्यानबान लबा धुइरी येशूसे हाडला चेलागदेदा चुहङ् भिसी सुङ्गी, 46 “एनीगदे यहूदी धर्मगुरुगदे म्राङ्सी होशियार तसी चिउ। तिग्दा भिसम थेनीगदे ज्यबा ज्यबा क्वान क्वान्सी कोबारी निमुला, ओच्छे बजाररीक्यार निमा म्हिगदेसे मान लगै भिसी सेम लमुला। थेहङ् लसीन यहूदीगदे हुप तबा दिमदेन भोज चबा ग्लारीनोन मुल ठिरी चिबारी सेम लमुला। 47 थेहङ् लसी थेनीगदेसे हेम्बो सिबा म्रिडम्हेमेगदेला दिमनाम ब्यन्मुला ओच्छे म्हिगदेदा उन्बाला लागिरी हेङ्बा हेङ्बा प्रार्थना लमुला। थेहङ्बा म्हिगदेसे ल्हानान सजाय याङ्ला।”

21

हेम्बो सिबा म्रिडम्हेमेसे पिन्बा भेटी

मर्कूस १२:४१-४४

1 येशूसे परमेश्वरला मन्दिररी फ्युकपो म्हिगदेसे भेटी युबा ताडरी भेटी युबान लबा म्राङ्गी। 2 ओच्छे हेम्बो सिबा प्राडबो म्रिडम्हेमेसेनोन डबल न्ही युबा म्राङ्गी। 3 चु म्राङ्गी येशूसे, “च्यागो, डाला ताम ड्यानगो। स्य्हान्दो म्हिगदेसे भन्दा चु हेम्बो सिबा प्राडबो म्रिडम्हेमेसे ल्हानान भेटी युबा मुला। 4 तिग्दा भिसम स्य्हान्दो म्हिगदेसे हाडदेन छ्याम मुबा ल्हानान सम्पत्तिग्याम युजी, तर चु हेम्बो सिबा म्रिडम्हेमे प्राडबो तसीनोन हाडदेन छ्याम मुबा जति जम्मान युजी” भिसी सुङ्गी।

* 20:37 प्रस्था ३:२, ६ * 20:42-43 भजन ११०:१

परमेश्वरला मन्दिर नाश तला

मत्ती २४:१-२; मर्कूस १३:१-२

५ तिरैकुनु चेलागदेसे, “ज्यबा ज्यबा युडबादेन म्हिगदेसे फुलबा भेटीगदेग्याम जेना लसी सहोबा चु परमेश्वरला मन्दिर गाते जेबा!” भिसी ताम लबान मुबा। तर येशूसे थेनीगदेदा, ६ “तिरैकुनु चुहड्बा धुइएनोन खाल, थे धुइरी दान्दे म्राड्बा चु मन्दिरला युडबा गिकनोन बाँकी आचिना जम्मान फुप्ला” भिसी सुड्जी।

जम्बुलिड नाश तबा धुइला चिनुगदे

मत्ती २४:३-१४; मर्कूस १३:३-१३

७ ओच्छे थेनीगदेसे, “गुरु, चु तामगदे खाइमा तला? चुहड् तबारी छ्याइजी भिसी खाहड्बा चिनु म्राड्ला?” भिसी ड्योइमा, ८ येशूसे थेनीगदेदा चुहड् भिसी सुड्जी, “एनीगदे होशियार तसी चिउ, खालैसे एनीगदेदा झुक्याब थालगै। तिग्दा भिसम डाला मिन किन्सी ‘डानोन थार्बा पिन्बा स्त्रीष्ट हिनना’ भिसी ल्हानान म्हिगदे खला। ओच्छे ‘धुइ खसी जिन्बा मुला’ भिसी भिला, तर एनीगदेसे थेनीगदेला ताम थाड्यान्गो। ९ ओच्छे लडाइ तजी भिबा ताम थे:सी एनीगदे आत्तेब थातउ, तिग्दा भिसम चु जम्बुलिड नाश तबा भन्दा डाच्छा चु तनोन तो:ला। तर थेनोन धुइरी चु जम्बुलिड नाश आत।” १० जमाहेन्से येशूसे थेनीगदेदा दो:सी चुहड् भिसी सुड्जी, “म्हि यहुलला बिरोधरी म्हि यहुलनोन ओच्छे यहुल्साला बिरोधरी यहुल्सा रे:ला। ११ ओच्छे घेन घेन सडगुल खला, जम्मान ग्लारी अनिकालदेन देसान खला। मुरी घेन घेन लोड्बा खबा चिनुगदे म्राड्ला।

१२ “तर चु तबा भन्दा डाच्छा म्हिगदेसे एनीगदेदा चुड्सी दुख पिन्ना। ओच्छे यहूदीगदे हुप तबा दिमरी जिम्मा लसी एनीगदेदा झ्यालखानरी झाड्ला। ओच्छे एनीगदेसे डादा विश्वास लबासे लमा ग्लेदेन अञ्चलाधीशगदेला डाच्छापट्टि भोर्ला। १३ थे धुइरी एनीगदेसे डाला बारेरी पाड्बा मौका याड्ला। १४ तर एनीगदेसे हाडदा जोगब लबारी तिग पाड्तो:बा भिसी धन्दा सुर्दा थालउ। १५ तिग्दा भिसम थे धुइरी एनीगदेसे तिग ताम पाड्तो:बा थे ताम पाड्बारी डाइ एनीगदेदा ज्ञान बुद्धि पिन्ना। जमाहेन्से थेनीगदेसे एनीगदेला ताम थाबारी आखम ओच्छे एनीगदेसे पाड्बा तामला जोहाबएनोन पिन्बारी आखम।” १६ तर एनीगदेदा हाडलान आबा आमा, ज्योज्यो आले ओच्छे हाडला म्हिगदेदेन ह्योगदेसेनोन चुड्सी पिन्ना। ओच्छे एनीगदे न्हडला कोइ कोइदा मी म्हिगदेसे साइपुड्ला। १७ थेहड् लसीन डादा विश्वास लबासे लमा एनीगदेदा जम्मान म्हिगदेसे हेला लला। १८ तर एनीगदेला थोबोला क्रा गिक सुत्तै आताइ। १९ जस्तोन दुख तसैनोन एनीगदेसे सेमहेन्सेन विश्वास लसी चिबासे लमा जुकजुकधोनाला जुनी याड्ला।

येशूसे यरूशलेम नाश तला भिसी सुड्बा

मत्ती २४:१५-२१; मर्कूस १३:१४-१९

२० “यरूशलेम शहरदा सिपाहीगदेसे घेरब लबा म्राड्माहेन्से शहर नाश तबा धुइ खसी जिन्जी भिसी एनीगदेसे घोउ। २१ थे धुइरी यहूदिया अञ्चलरी मुबागदे गडरीक्यार यार्गे, शहर न्हडरी मुबागदेसे शहर खलागै ओच्छे नाम्सारी मुबागदे शहररी थाखगै। २२ तिग्दा भिसम थे धिन चा परमेश्वरग्याम सजाय याड्बा धिन हिनना। ओच्छे परमेश्वरला बचनरी भिबा जम्मान ताम पूरा तनोन तला।” २३ थे धुइरी जिउ न्हीला म्रिडम्हेमेदेन कोलादा इहे ख्वाबा आमागदेदा इन गाते ल्हानान दुख तला! ओच्छे यहुल्सा नाडनोन ल्हानान दुख तला। चु यहुलला म्हिगदेदा परमेश्वरसे ल्हानान सजाय पिन्ना। २४ थे धुइरी कोइ कोइ म्हिगदेदा तरवारसे ताम्सी साइला, कोइ कोइदा चुड्सी यहुल्सा यहुल्सारी भोर्ला। ओच्छे अर्गु यहुलला म्हिगदेला धुइ आजिन्तेधोना थेनीगदेसे यरूशलेमरी रजाइँ लला।

येशू दो:सी फेप्खबा धुइ

मत्ती २४:२९-३१; मर्कूस १३:२४-२७

* 21:15 लूका १२:११-१२ * 21:22 होशे ९:७

25 “लनी धिनीदेन सारगदेरी खाइमै आम्राड्बा चिनुगदे म्राड्ला। ओच्छे समुन्द्र घुर्बादेन समुन्द्रला छालसे लमा जम्बुलिडला जम्मान म्हिगदे लोड्सी आत्तेब तला।* 26 जम्बुलिडरी तबारी छ्याइबा दुखला बारेरी था याड्सी म्हिगदे लोड्सी सिबा तेबान तला। तिग्दा भिसम मुरी मुबा जम्मान शक्ति याड्योड तला। 27 जमाहेन्से परमेश्वरसे पुइखबा म्हिदा घेन शक्तिदेन य्हाल य्हालरी खसुरी खबान लबा म्राड्ला।* 28 थेहड् तमाहेन्से आलोड्ना एनीगदेसे स्वर्गपट्टि च्यागो, तिग्दा भिसम एनीगदेदा योनान थार्ना लला।”

अञ्जीरला दोड च्यासी लोप्तोःबा ताम

मत्ती २४:३२-३५; मर्कूस १३:२८-३१

29 जमाहेन्से येशूसे थेनीगदेदा उखानग्याम चुहड् भिसी सुड्जी, “एनीगदेसे अञ्जीर दोडदेन अर्गु दोडगदे, 30 भुबा म्राड्माहेन्से दाहेन्से छेपबा छबा ला खबारी छ्याइजी भिसी था याड्मुला। 31 थेहड् लसीन डाइ पाड्बा ताम तबान लबा म्राड्माहेन्से एनीगदेसे परमेश्वरला य्हुल्सा खबा धुइ तबारी छ्याइजी भिसी था याड्गो।

32 “च्यागो, एनीगदेसे डाला ताम ड्यानगो, चु जम्मान ताम पूरा आततेधोना दान्देला म्हिगदे आसि। 33 मुदेन जम्बुलिड म्हासी निसैनोन डाला बचन खाइमै आम्ला।”

येशूसे छोर्सी चिउ भिसी लोपबा

34 “तर एनीगदे होशियार तसी चिउ, आहिन्सम मोजमजा लसी ड्य्होइसी भ्रबादेन हाडला ल्हुइला धन्दा सुर्दासे लमा एनीगदेला सेम न्होड्ला। ओच्छे परमेश्वरसे पुइखबा म्हि खमा एनीगदे तिक्खुरीन पासोरी परब तबा हड् तला। 35 थेहड् लसीन जम्बुलिडरी चिबा जम्मान म्हिगदेथोरी थे धिन खला। 36 थेतबासेलमा एनीगदे ‘थे लोड्बा खबा धुइरी जोगब तबारीदेन परमेश्वरसे पुइखबा महिला डाच्छा राप्बारी खमगै भिसी प्रार्थना लसी छोर्सी चिउ’ भिसी सुड्जी।”

37 थे धुइरी येशूसे धिनीरी म्हिगदेदा परमेश्वरला मन्दिररी लोपमुबा, ओच्छे म्हुन तमाहेन्से जैतून भिबा गडरी बास स्य्हूबारी फेपमुबा।* 38 येशूला बचन ड्यानबाला लागिरी म्हिगदे स्य्होरीन परमेश्वरला मन्दिररी खमुबा।

22

येशूदा साइबारी सल्लाह लबा

मत्ती २६:१-५, १४-१६; मर्कूस १४:१-२, १०-११

1 मिश्र य्हुल्साग्याम फेसी खबा धिनदा ढन्सी खमीर आयुना गेड चसी धड्बा चाड खबारी छ्याइमुबा। 2 थे धुइरी परमेश्वरला मन्दिररी पूजा लबा मुल म्हिदेन य्हूदी धर्मगुरुगदेसे येशूदा खाहड् लसी साइबा भिसी दाउ च्यासी भ्रमुबा। तर थेनीगदे म्हिगदेदेन छ्याम लोड्मुबा। 3 थे धुइरी च्युक न्ही चेलागदे न्हडला य्हूदा इस्करियोत भिबा चेलाला सेम न्हडरी शैतान वाड्जी। 4 जमाहेन्से य्हूदा इस्करियोत परमेश्वरला मन्दिररी पूजा लबा मुल म्हिदेन मन्दिरला सिपाहीगदेला हाकिम मुबा ग्लारी निसी येशूदा चुड्सी थेनीगदेला यारी जिम्मा लसी पिन्ना भिसी सल्लाह लजी। 5 जमाहेन्से थेनीगदे ताड्सी य्हूदा इस्करियोतदा टाडगा पिन्ना भिसी कबुल लजी। 6 जमाहेन्से य्हूदा इस्करियोतसे तला, भिसी महिला हुल आरेबा धुइरी येशूदा चुड्सी पिन्बारी दाउ च्यासी भ्रजी।

येशूसे भोज तयार लउ भिसी कुल्बा

मत्ती २६:१७-२५; मर्कूस १४:१२-२१; यूहन्ना १३:२१-३०

7 मिश्र य्हुल्साग्याम फेसी खबा धिनदा ढन्सी धड्बा चाड खसी जिन्बा मुबा। थे चाडकुनु ग्यु बोगो बलि पिन्तोःबा मुबा। 8 थे धुइरी येशूसे पत्रुसदेन यूहन्नादा “एनीगदे निसी य्हाडला लागिरी चाडला भोज तयार लउ” भिसी कुल्जी।

* 21:25 यशै १३:१०; इज ३२:७; योए २:३१; उन्बा ६:१२-१३

* 21:27 दानि ७:१३; उन्बा १:७

* 21:37 लूका १९:४७

9 जमाहेन्से थेनीगदेसे “डन्से भोज खानड तयार लउ” भिसी येशूदा ड्योइमा, 10 येशूसे थेनीगदेदा “एनीगदे शहररी धोमैछ्याम दर्बुडरी क्युइ पुइसी निबान लबा म्हि गिकदा स्याप्ला, एनीगदे थे महिला लिच्छा लिच्छा निउ। 11 ओच्छे थे म्हि जुन दिमरी वाड्ला थे दिमला धनीदा ‘डाइ डाला चेलागदेदेन छ्याम चिसी मिश्र यहुल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला? भिसी डन्ना गुरुसे ड्योइबा मुला’ भिसी भिउ। 12 जमाहेन्से एनीगदेदा थेसे डाच्छान जेना लसी थान्बा तलाथोला घेन कोठा उन्सी पिन्ना। एनीगदेसे थेरीन य्हाडला लागिरी भोज तयार लउ” भिसी कुल्जी।

13 जमाहेन्से थेनीगदे निजी ओच्छे येशूसे सुड्बा हड्बान स्याप्ली। ओच्छे थेनीगदेसे थे मिश्र यहुल्साग्याम फेसी खबा धिनदा ढन्सी धड्बा चाडला भोज तयार लजी।

प्रभु भोज

मत्ती २६:२६-३०; मर्कूस १४:२२-२६; १ कोरिन्थी ११:२३-२५

14 चबा धुइ तमाहेन्से येशू हाडला मुल चेलागदेदेन छ्याम सोल छ्योइबारी धन्छ्याजी। 15 जमाहेन्से येशूसे थेनीगदेदा “डाइ दुख नाबा भन्दा डाच्छा एनीगदेदेन छ्याम चिसी चु चाडला भोज चबा सेम ल्हानान मुबा। 16 थेतबासेलमा एनीगदेसे डाला ताम ड्यान्गो, परमेश्वरला यहुल्सारी चु भोजला अर्थ पूरा आततेधोना डाइ चु भोज दोःसी आच” भिसी सुड्जी। 17 जमाहेन्से येशूसे खोरे यारी थोसी परमेश्वरदा धन्यवाद पिन्माहेन्से “ना, चु एनीगदे जम्मासेन भो लसी थुड्गो। 18 एनीगदेसे डाला ताम ड्यान्गो, तिग्दा भिसम परमेश्वरला यहुल्सा आखतेधोना डाइ अडगुरला निडगु आथुड्” भिसी सुड्जी। 19 जमाहेन्से येशूसे यारी गेड थोसी परमेश्वरदा धन्यवाद पिन्माहेन्से गेड क्युइसी चेलागदेदा पिन्बान, “चु एनीगदेला लागिरी पिन्बा डाला ल्हुइ हिनना। दाहेन्से डादा ढन्सी चिबाला लागिरी एनीगदेसे चुहड्बान लउ” भिसी सुड्जी। 20 थेहड् लसीन गेड चसी जिन्माहेन्से येशूसे खोरे थोसी चेलागदेदा चुहड् भिसी सुड्जी, “चु खोरेरी मुबा अडगुरला निडगु डाला काग्याम सहोबा छार कबुल हिनना। चु डाला का एनीगदेला लागिरी बगब तबा मुला। 21 “तर च्यागो, डादा चुड्सी पिन्बा म्हि डादेन छ्यामनोन चिसी चबान मुला। 22 परमेश्वरसे पुइखबा म्हि मी परमेश्वरसे सुड्बा अन्छार निनोन तोःला। तर परमेश्वरसे पुइखबा म्हिदा चुड्सी पिन्बा म्हिसे चा परमेश्वरग्याम सजाय याड्ला।” 23 चु ताम थेःसी चेलागदे हाड हाड न्हडरी चुहड्बा गे लबा म्हि खाल मुला तला? भिसी ताम लजी।

खाल घेन खाल जजा

24 जमाहेन्से चेलागदे हाड हाड न्हडरी खाल घेन भिसी ताम लबारी छ्याइजी। 25 चु ताम था याड्सी येशूसे थेनीगदेदा चुहड् भिसी सुड्जी, “चु जम्बुलिडला ग्लेगदेदेन घेन घेन म्हिगदेसे म्हिगदेथोरी शासन लमुला। ओच्छे म्हिगदेसे थेनीगदेन डन्दा दया लबा ज्यबा म्हि हिनना भिसी भिमुला। 26 तर एनीगदे चा थेहड् तबारी आत। ओच्छे एनीगदे न्हडरी जुन घेन मुला थे जजा दोगै ओच्छे नेता दोबासे चा स्य्हान्दोगदेला सेवा लगै। 27 तिग्दा भिसम चबारी चिबा मालिकदेन चबा पिन्बा नोकररी खजिबा चा घेन हिनना? तिग चबारी चिबा मालिक घेन आहिन? हिनना। तर डा एनीगदेला ओन्छाडरी चबा पिन्बा नोकर हड्बान मुला। 28 एनीगदे चा डादा दुख तमा ह्यो लबागदे हिनना। 29 थेतबासेलमा डाला आबासे डादा यहुल्सा गिकला अधिकार पिन्बा हड् लसी डाइएनोन एनीगदेदा थे यहुल्साला अधिकार पिन्ना। 30 जमाहेन्से एनीगदेसे डाला यहुल्सारी टेबुल गिकरीन चबा थुड्बा लला। ओच्छे इस्राएलला च्युक न्ही वंशला निसाफ लसी ठिरी चिला।”

पत्रुससे येशूदा खलाला भिसी पाड्बा ताम

मत्ती २६:३१-३५; मर्कूस १४:२७-३१; यूहन्ना १३:३६-३८

31 जमाहेन्से येशूसे पत्रुसदा “सिमोन, सिमोन, शैतानसे एदा ग्वा य्हाप्बा हड् लसी य्हाप्बारी छ्याइबा मुला। 32 तर एला विश्वास याडयोड थातगै भिसी डाइ एला लागिरी प्रार्थना लजी। ए दोःसी डादेन छ्याम खमाहेन्से एसे आलेगदेदा विश्वासरी कोड्ना लउ।

33 जमाहेन्से पत्रुससे येशूदा “प्रभु, डा हाडदेन छ्याम झ्याल्खानरी चितो:सै हाडदेन छ्याम सितो:सै सिबारी तयार मुला” भिसी भिजी।

34 तर येशूसे पत्रुसदा “पत्रुस, डाला ताम झ्यान्गो, न्हडगर स्य्होरी नागा क्राबा भन्दा डाच्छा एसे डादा डोसेबान आरे भिसी सोमरेमधोना पाड्ला” भिसी सुड्जी।

खबारी छ्याइबा दुखला लागिरी होशियार तउ

35 येशूसे थेनीगदेदा “डाइ एनीगदेदा टाडगा, झोला, लखम आभोर्ना निउ भिसी पुइमुबा। थे धुइरी एनीगदेदा तिगै सहेला खाँचो तजी? भिसी ड्योइमा, थेनीगदेसे “आतनी” भिसी भिजी।

36 जमाहेन्से येशूसे थेनीगदेदा चुहड् भिसी सुड्जी, “तर दाहेन्से टाडगा मुबासे टाडगा थोगो, झोला मुबासे झोला थोगो, ओच्छे जुन म्हिदेन छ्याम तरवार आरे थेसे हाडला क्वान चूड्सी भिसै तरवार गिक ग्लुउ। 37 एनीगदेसे डाला ताम झ्यान्गो, तिग्दा भिसम परमेश्वरला बचनरी ‘थेदा अपराधीगदेदा हड्दोन लला भिसी भिबा ताम डाग्याम पूरा तनोन तो:ला’ तिग्दा भिसम डाला बारेरी भिबा ताम पूरा तबान मुला।”* 38 जमाहेन्से येशूदा चेलागदेसे “प्रभु, चुरी तरवार न्ही मुला” भिसी भिमा, येशूसे थेनीगदेदा “तजी” भिसी सुड्जी।

येशूसे लबा प्रार्थना

मत्ती २६:३६-४६; मर्कूस १४:३२-४२

39 येशू सदला हड्दोन थे ग्लाग्याम थोन्सी जैतून भिबा गडरी फेपूजी। ओच्छे थेला चेलागदेएनोन लिच्छा लिच्छा निजी। 40 थे ग्लारी धोमाहेन्से येशूसे थेनीगदेदा “एनीगदे फसब आतबाला लागिरी प्रार्थना लसी चिउ” भिसी सुड्जी। 41 ओच्छे येशू थेनीगदेग्याम जजाकी क्याथाड फेपूसी पुइ जूसी चुहड् भिसी प्रार्थना लबारी छ्याइजी। 42 “आबा, तसम डादा चु दुखग्याम फेसी पिन्गो। तर डाइ म्हनबा अनछार आहिन, हाडसे म्हनबा अनछार पूरा तगै।” 43 जमाहेन्से स्वर्गग्याम स्वर्गदूत गिक खसी येशूदा दुख नाखम्बा भड पिन्जी। 44 थे धुइरी येशूदा ल्हानान दुख तबासे लमा थेसे झन प्रार्थना लजी। थे धुइरी थेला टू काला धारा हड् लसी सरी ताइबान मुबा।

45 प्रार्थना लसी हाडला चेलागदे मुबा ग्लारी फेपूखमा येशूसे थेनीगदे दुखसे लमा लारकलुरूक तसी म्हेर्सी चिबा स्यापूजी। 46 जमाहेन्से येशूसे थेनीगदेदा “तिग्दा एनीगदे म्हेर्सी चिबा? रे:गो, पापरी फसब आतबाला लागिरी एनीगदेसे प्रार्थना लउ” भिसी सुड्जी।

येशूदा चुड्बा

मत्ती २६:४७-५६; मर्कूस १४:४३-५०; यूहन्ना १८:३-११

47 येशूसे चु ताम सुड्बान लबा धुइरी थेरी म्हिला हुल गिक खजी। थे म्हिला हुलला डाच्छा डाच्छा च्युक न्ही चेलागदे न्हडला यहूदा भिबा चेला खजी। येशूदा च्योक लबाला लागिरी थे येशूला डामरी खजी। 48 तर येशूसे थेदा “यहूदा, तिग एसे परमेश्वरसे पुइखबा म्हिदा च्योक लसी फसब लबारी म्हाइबा?” भिसी सुड्जी।

49 जमाहेन्से येशूला डामरी मुबा चेलागदेसे थेरी तबारी छ्याइबा ताम था याड्सी येशूदा “प्रभु, डन्से तरवार चलब लउ?” भिसी, 50 थेनीगदे न्हडला गिकसे परमेश्वरला मन्दिररी पूजा लबा मुल म्हिला नोकरदा ताम्मा थेला दाहिनेपट्टिला नाब्यड च्वाट्टन थाजी। 51 तर येशूसे “तजी थालउ” भिसी थेला नाब्यडरी थुर्सी खमना लजी।

52 जमाहेन्से येशूसे हाडदा चुड्बारी खबा परमेश्वरला मन्दिररी पूजा लबा मुल म्हिगदेदेन मन्दिरला सिपाहीगदेला हाकिमगदेदा ओच्छे यहूदी गन्बागदेदा “एनीगदे यहूदा चुड्बारी खबा हड् लसी तिग्दा कडीदेन तरवार थोसी खबा? 53 डा धिन धिननोन एनीगदेदेन छ्यामनोन परमेश्वरला मन्दिररी मुबा। थे धुइरी एनीगदेसे डादा आचुड्नी। तर दाहेन्से एनीगदेला गे लबा धुइ खबा मुला ओच्छे चु धोपधोपसे शासन लबा धुइ हिनना” भिसी सुड्जी।

* 22:37 यशै ५३:१२

पत्रुससे येशूदा डोसेबा आरे भिसी पाड्बा

मत्ती २६:५७-५८, ६९-७५; मर्कूस १४:५३-५४, ६६-७२; यूहन्ना १८:१३-१८, २५-२७

54 जमाहेन्से थेनीगदेसे येशूदा चुड्सी परमेश्वरला मन्दिररी पूजा लबा मुल म्हिला दिमरी भोजी। पत्रुसएनोन थारेडग्यामसेन येशूला लिच्छा लिच्छा निजी। 55 थेरी म्हिगदे खाडगाला गुडरी मे फुड्सी दूबान मुबा। ओच्छे पत्रुसएनोन थेरी खसी थेनीगदेदेन छ्यामनोन चिजी। 56 थेनोन धुडरी नोकरस्या गिकसे पत्रुसदा मे दूसी चिबा म्राड्सी थेदा “चु म्हिएनोन येशूदेन छ्यामनोन मुबा” भिसी भिमा, 57 पत्रुससे थे नोकरस्यादा “माइ, डाइ थेदा डोसेबा आरे” भिसी भिजी।

58 ओच्छे छिन्नड लिच्छा स्य्हान्दो म्हि गिकसे पत्रुसदा म्राड्सी, “एएनोन थेनीगदेला हो हिनना” भिसी भिमा, पत्रुससे “डा आहिन” भिसी जोहाब पिन्जी।

59 ओस्पन घण्टा गिक लिच्छा स्य्हान्दो म्हि गिकसे “चु म्हिएनोन पक्कान येशूदेन छ्यामनोन मुबा, तिगदा भिसम चुएनोन गालीलला हिनना” भिसी भिमा, 60 पत्रुससे “एसे तिग भिबा, डादा था आरे” भिसी भिमैछ्याम नागा क्राजी। 61 ओच्छे प्रभुसे पत्रुसदा सहीजी। जमाहेन्से “न्हडगर स्य्होरी नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी प्रभुसे सुड्बा ताम पत्रुससे ढन्जी। 62 जमाहेन्से पत्रुस मडग्यार निसी घ्वाँ घ्वाँ क्राजी।

येशूदा सिपाहीगदेसे खिसी लसी तोबा

मत्ती २६:५९-६८; मर्कूस १४:५५-६५; यूहन्ना १८:१९-२४

63 जमाहेन्से येशूदा चुड्सी भबा म्हिगदेसे येशूदा खिसी लबान तोजी। 64 ओच्छे येशूला मी घपसी तोबान, “लु, अगमवाणी पाड्गो, एदा खाल्से तोजी?” भिसी भिजी। 65 ओच्छे थेनीगदेसे येशूदा बड्बान बेइज्जत लजी।

येशूदा यहूदीगदेला सभारी भोर्बा

मत्ती २६:५९-६६; मर्कूस १४:५५-६४; यूहन्ना १८:१९-२४

66 यहूदाल तमैछ्याम येशूदा यहूदी गन्बागदे हुप तबा सभारी भोजी। थे सभारी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे मुबा। 67 जमाहेन्से थेनीगदेसे येशूदा “ए थार्बा पिन्बा ख्रीष्ट हिनना भिसम डन्दा पाड्गो” भिसी भिमा, येशूसे थेनीगदेदा “डाइ पाड्सैनोन ह्याडनीसे विश्वास आल। 68 ओच्छे डाइ तिगै ड्योइसैनोन ह्याडनीसे जोहाब पिन्बारी आखम। 69 तर दाहेन्से परमेश्वरसे पुड्खबा म्हि शक्तिशाली परमेश्वरला दाहिनेपट्टि चिला” भिसी सुड्जी।

70 जमाहेन्से थेनीगदे जम्मासेन येशूदा “थेहड् भिसम तिग ए परमेश्वरला झा हिनना?” भिसी ड्योइमा, येशूसे थेनीगदेदा “ह्याडनीसे सुड्बा हड्दोन डा थेनोन हिनना” भिसी जोहाब पिन्जी।

71 येशूसे चुहड् सुड्माहेन्से थेनीगदेसे “थेलान सुड्ग्याम यहूडसे चु जम्मान ताम थे:सी जिन्माहेन्से दाहेन्से यहूडदा थेला बिरोधरी अर्गु प्रमाण तिगदा तो:जी” भिसी भिजी।

23

पिलातससे येशूदा ड्योइबा छार्बा लबा

मत्ती २७:१-२, ११-१४; मर्कूस १५:१-५; यूहन्ना १८:२८-३८

1 जमाहेन्से यहूदीगदेलान सभाला म्हिगदेसे येशूदा पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी। 2 ओच्छे थेनीगदेसे येशूदा दोष लबान, “चुसे ह्याडसे ह्याडदान डा थार्बा पिन्बा ख्रीष्ट हिनना भिबादेन रोमी ग्याल्बो कैसरदा तिरो फाआतो: भिसी यहूडला यहूल्साला म्हिगदेदा न्होड्ना लबा डन्से स्यापजी” भिसी भिजी। 3 थेनीगदेला ताम थे:सी पिलातससे येशूदा “तिग ए यहूदीगदेला ग्ले हिनना?” भिसी ड्योइमा, येशूसे पिलातसदा “थे मी ह्याडसेन सुड्बा मुला” भिसी जोहाब पिन्जी।

4 जमाहेन्से पिलातससे परमेश्वरला मन्दिररी पूजा लबा मुल म्हिदेन थेरी मुबा जम्मान म्हिगदेदा “डाइ चु महिला तिगै गल्ती आस्यापनी” भिसी भिमा, 5 थेनीगदेसे क्रिडबान, “चुसे यहूदिया अञ्चलदेन गालील अञ्चलहेन्से चुधोनाला म्हिगदेदा हाडला ताम लोप्सी न्होड्ना लबा मुला” भिसी भिजी।

6 जमाहेन्से पिलातससे “चु म्हि गालीलला हिन्ना?” भिसी ड्योड्जी। 7 येशू हेरोदसे शासन लबा अञ्चलला चीम भिसी था याड्माहेन्से पिलातससे येशूदा हेरोद मुबा ग्लारी पुड्जी। थे धुइरी हेरोद यरूशलेमरी मुबा। 8 येशूदा म्हाड्माहेन्से हेरोद ल्हानान ताड्जी। तिग्दा भिसम थेसे येशूला बारेरी थे:बासे लमा ल्हानान धिनहेन्से येशूदा च्याबा सेम लमुबा। ओच्छे थेसे येशूसे लबा तिगै उदेकला गे च्याम्याड्ला भिसी आश लबा मुबा। 9 थेतबासेलमा थेसे येशूदा ल्हानान ताम ड्योड्जी तर येशूसे तिगै जोहाब आपिन्नी। 10 ओच्छे परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे क्रिडबान येशूदा दोष लबारी छ्याड्जी। 11 जमाहेन्से हेरोददेन थेला सिपाहीगदेसे येशूदा खिसी लबान बेड्जजत लजी। ओच्छे येशूदा ग्लेसे क्वान्बा हड्बा क्वान क्वान्सी पिन्सी पिलातस मुबा ग्लारी दो:सी पुड्जी। 12 डाच्छा हेरोददेन पिलातस आढिक्बा मुबा। तर थे धिनकुनुहेन्से थेन्नी ढिक्जी।

येशूदा सिबाला सजाय पिन्बा

मत्ती २७:१५-२६; मर्कूस १५:६-१५; यूहन्ना १८:३१-१९:१६

13 जमाहेन्से पिलातससे परमेश्वरला मन्दिररी पूजा लबा मुल म्हिगदेदेन यहूदी नेतागदेदा ओच्छे म्हिगदेदा ड्योड्सी, 14 “एनीगदेसे चुसे म्हिगदेदा न्होड्ना लजी भिसी डा मुबा ग्लारी भजी, तर डाइ एनीगदेला डाच्छापट्टिन चुदा ड्योड्बा छार्बा लमा डाइ हाडनीसे लबा दोष तिगै आस्यापनी। 15 हेरोदसेएनोन तिगै दोष आस्यापबासे लमा चुदा यहाड मुबा ग्लारी पुड्खजी। च्यागो, साइनोन तो:बा खाल्ला गे चा चुसे तिगै लबा आरे। 16 थेतबासेलमा डाइ चुदा सजाय जे पिन्सी पुड्ला” भिसी भिजी। 17 यहूदीगदे मिश्र यहूल्साग्याम फेसी खबा धिनदा ढन्सी धड्बा चाडला धुइरी पिलातससे झ्याल्खानरी मुबा म्हि गिकदा पुडतो:मुबा।† 18 तर जम्मान म्हिगदेसे “चुदा साइनोन तो:ला, बरु डन्ना लागिरी बारब्बादा पुड्सी पिन्गो” भिसी क्रिड्जी। 19 थे धुइरी जम्मान म्हिसे डोसेबा बारब्बा भिबा आज्यबा गे लबा म्हि गिक झ्याल्खानरी थान्बा मुबा।

20 पिलातससे येशूदा पुड्बा सेम लसी म्हिगदेदा घोना लबारी म्हाड्जी। 21 तर थेनीगदे जम्मासेन, “चुदा क्रुसरी टांगब लसी साइगो, क्रुसरी साइगो!” भिसी क्रिड्बाला क्रिड्बान लजी। 22 दो:सीएनोन पिलातससे थेनीगदेदा “तिग्दा? चुसे थेहड्बा आज्यबा गे तिग लबा मुला? डाइ मी चुदा साइतो:बा दोष तिगै आस्यापनी। थेतबासेलमा डाइ चुदा सजाय पिन्सी पुड्ला” भिसी भिजी। 23 तर थेनीगदे इन क्रिड्सी, “क्रुसरी साइनोन तो:ला” भिसी भिजी। चुहड् लसी क्रिड्सी म्हिगदेसे ढाजी। 24 जमाहेन्से पिलातससे येशूदा थेनीगदेसे भिबा हड्न्नोन लपुड्जी। 25 ओच्छे आन्दोलन लसी म्हि साइबासे लमा झ्याल्खानरी झाड्बा बारब्बादा पिलातससे पुड्सी पिन्जी। तिग्दा भिसम म्हिगदेसे थेदान पुड्सी पिन्गो भिसी भिमुबा। तर येशूदा चा थेनीगदेसे पाड्बा अन्छार थेनीगदेला यारी जिम्मा लसी पिन्जी।

येशूदा क्रुसरी साइबा

मत्ती २७:३२-४४; मर्कूस १५:२१-३२; यूहन्ना १९:१७-२७

26 जमाहेन्से थेनीगदेसे येशूदा थेग्याम भोर्बान लमा कुरेनी भिबा ग्लाला सिमोन खबान मुबा। थेदा चुड्सी येशूला क्रुस पुड्पुड्सी येशूला लिच्छा लिच्छा भ्रपुड्जी। 27 ओच्छे महिला हुल येशूला लिच्छा लिच्छा निजी। थेरी म्रिडम्हेमेगदेएनोन क्राबा क्रिड्बा लबान मुबा। 28 तर थेनीगदेपट्टि दो:सी येशूसे चुहड् भिसी सुड्जी, “यरूशलेमला झामेगदे, डाला लागिरी थाक्रागो, तर हाडलान लागिरी ओच्छे हाडलान कोलागदेला लागिरी क्रागो। 29 तिग्दा भिसम चुहड्बा धुइएनोन खबान मुला। थे धुइरी म्हिगदेसे कोला आन्हबा म्रिडम्हेमेदेन इहे ख्वाआतो:बा म्रिडम्हेमेगदेदा परमेश्वरग्याम मोलम याड्बा म्हि हिन्ना भिसी भिला। 30 थेनोन धुइरी म्हिगदेसे गड्गदेदा डनीथोरी ताड्गो ओच्छे डन्दा

† 23:17 चु पदला ताम ल्हानान हड्बा ग्रीक बाड्बलरी भिबा आरे।

लहुउ भिसी भिला।* 31 दोड पिडगै मुबा धुइरीन चुगदेसे चुहड लमुला भिसम दोड खर्माहेन्से झन तिग लला?" भिसी सुड्जी।

32 थेनीगदेसे यहो न्हीदाएनोन येशूदेन छ्यामनोन साइबारी भोजी। 33 जमाहेन्से थेनीगदे खप्पर भिबा गडरी धोखजी। थेरी थेनीगदेसे येशूदा कुसरी टाँगब लजी। ओच्छे थे यहो न्हीदाएनोन गिकदा येशूला दाहिनेपट्टि, गिकदा देब्रेपट्टि लसी कुसरी टाँगब लजी। 34 थे धुइरी येशूसे "आबा, चुगदेदा माफ लउ। तिगदा भिसम चुगदेसे तिग लबान मुला थे चुगदेदा था आरे" भिसी सुड्जी। ओच्छे सिपाहीगदेसे चिट्टा युसी येशूला क्वान हाड हाड न्हडरी भो लजी।*

35 थेरी राप्सी च्यासी चिबा म्हिगदेदेन यहूदी नेतागदेसे येशूदा खिसी लबान, "चुसे स्य्हान्दो म्हिदा मी जोगब लजी। चु परमेश्वरसे धम्बा थार्बा पिन्बा ख्रीष्ट हिन्सम हाडसे हाडदान जोगब लगै" भिसी भिजी।*

36 ओच्छे सिपाहीगदेसेएनोन येशूदा अडगुरला कम्बा निडगु पिन्सी खिसी लबान,* 37 "ए यहूदीगदेला ग्ले हिन्सम हाडसे हाडदान जोगब लउ" भिसी भिजी।

38 ओच्छे येशूदा "यहूदीगदेला ग्ले" भिसी दोष उन्बा ताम भिसी येशूला थोबोथोरी थान्जी।

39 येशूदेन छ्यामनोन कुसरी टाँगब लबा यहो न्ही न्हडला गिकसे येशूदा खिसी लबान, "ए थार्बा पिन्बा ख्रीष्ट आहिन? लु, एसे हाडदा जोगब लउ, ओच्छे डन्दाएनोन जोगब लउ" भिसी भिजी। 40 तर स्य्हान्दो यहोसे थेदा बड्बान चुहड भिसी सुड्जी, "एदा परमेश्वर म्राड्सी लोड्बा आखमुला? थेसे याड्बा सजाय एसे याड्बा आरे? 41 यहूडासे मी आज्यबा गे लबासे लमा ठीक सजाय नाबान मुला, तर चुसे मी थेहड्बा तिगै आज्यबा गे लबा आरे।"

42 जमाहेन्से थेसे येशूदा "येशू, हाडला यहूलसारी फेपबा धुइरी डादाएनोन ढन्गो" भिसी भिजी।

43 ओच्छे येशूसे थेदा "एसे डाला ताम ड्यानगो, तिनीन ए डादेन छ्याम स्वर्गरी तला" भिसी सुड्जी।

येशू सिबा

मत्ती २७:४५-५६; मर्कूस १५:३३-४१; यूहन्ना १९:२८-३०

44 ओस्पन धिनना बाह बजेहेन्से तीन बजेधोना यहूलसा नाडनोन धोपधोप तजी। 45 थे धुइरी धिनीला यहाल म्हाजी, ओच्छे परमेश्वरला मन्दिर न्हडला पर्दा पखले न्ही तसी ढेजी।* 46 जमाहेन्से येशूसे क्रिड्बान, "आबा, डाला आत्मा किन्गो" भिसी सुड्माहेन्से येशूला सा निजी।*

47 चु म्राड्सी रोमी कप्तानसे परमेश्वरदा जयजयकार लबान, "चु म्हि पक्कान परमेश्वरला डाच्छा ज्यबा म्हि चीम" भिसी भिजी।

48 चु म्राड्सी थेरी च्याबारी खबा जम्मान म्हिगदेदा लहानान दुख तसी क्राबा क्रिड्बा लबान दिमरी निजी। 49 ओच्छे येशूदा डोसेबा म्हिगदेदेन गालीलग्याम येशूदेन छ्याम छ्याम खबा म्रिड्महेमेगदे थारेड्ग्यामसेन चु ताम च्यासी चिबा मुबा।*

येशूदा धुर्सारी थान्बा

मत्ती २७:५७-६१; मर्कूस १५:४२-४७; यूहन्ना १९:३८-४२

50 योसेफ भिबा म्हि ज्यबादेन परमेश्वरसे कुल्बा ताम ड्यानबा म्हि मुबा। थे यहूदी सभाला सदस्य मुबा। 51 थेसे स्य्हान्दोगदेसे येशूदा साइबारी सल्लाह लबा धुइरी बिरोध लमुबा। तिगदा भिसम थेसे परमेश्वरसे शासन लबा धुइ खला भिसी भ्रान्सी चिबा मुबा। थे यहूदिया अञ्चलला अरिमाथिया भिबा नाम्साला म्हि मुबा। 52 थे पिलातस मुबा ग्लारी निसी येशूला लास हीजी। 53 ओच्छे थेसे येशूला लास कुसग्याम तेःसी मलमलला क्वानसे रिल्जी। जमाहेन्से युड्बाला पहरारी ठ्वाइसी सहोबा धुर्सारी थान्जी, थे धुर्सारी चु भन्दा डाच्छा खालैला लास थान्बा आरेबा। 54 थे धिन ब्लपबा न्हबा धिनना डाच्छाकुनु मुबा। थेतबासेलमा ब्लपबा न्हबा धिन खबारी छ्याइमुबा। 55 गालीलग्याम येशूदेन छ्याम खबा म्रिड्महेमेगदेएनोन योसेफदेन छ्यामनोन निजी ओच्छे येशूला लास धुर्सारी थान्बा

* 23:30 होशे १०:८; उन्बा ६:१६ * 23:34 भजन २२:१८ * 23:35 भजन २२:७ * 23:36 भजन ६९:२१ * 23:45 प्रस्था २६:३१-३३ * 23:46 भजन ३१:५ * 23:49 लूका ८:२-३

च्याजी। ⁵⁶ जमाहेन्से थेनीगदे दिमरी निसी येशूला लासरी फोर्बाला लागिरी ज्यबा खाल्ला छ्युगुदेन अत्तर तयार लजी। तर न्हडगरदड चा यहूदीगदेला ठिम अन्छार बल्पबा न्हबा धिन धड्जी।*

24

येशू सिबाग्याम सोबा

मत्ती २८:१-१०; मर्कूस १६:१-८; यूहन्ना २०:१-१०

¹ जमाहेन्से थे म्रिडम्हेमेगदे आइतवारकुनु स्य्होरीन हाडसे तयार लबा ज्यबा खाल्ला छ्युगुदेन अत्तर भोर्सी येशूदा थान्बा धुर्सारी निजी। ² थेनीगदे थेरी धोमा धुर्साला म्पारी थान्बा युडबा बलिड्सी थान्बा म्प्राड्जी। ³ तर थेनीगदे धुर्सा न्हडरी वाड्सी च्यामा थेरी येशूला लास आम्राड्नी। ⁴ थेरी थेनीगदे अलमल तसी चिबा धुइरी झक्झक्बा क्वान क्वान्बा म्हि न्ही थेनीगदेला डामरीन राप्जी। ⁵ थे म्हि न्हीदा म्प्राड्सी म्रिडम्हेमेगदे लोड्सी सरी ख्लुप तजी। जमाहेन्से थे म्हि न्हीसे थेनीगदेदा चुहड् भिसी भिजी, “एनीगदेसे सोबा म्हिदा तिग्दा सिबागदे थान्बा धुर्सारी म्हाड्बा? ⁶ येशू चुरी आरे। थेदा सिबाग्याम सोना लसी जिन्बा मुला! येशू गालीलरी मुबा धुइरी एनीगदेदा तिग भिसी सुड्बा मुबा थे ताम एनीगदेसे ढन्गो। ⁷ परमेश्वरसे पुइखबा म्हिदा पापीगदेला यारी जिम्मा लला, ओच्छे क्रुसरी टाँगब लला तसैनोन डादा सोमरेमाकुनु सिबाग्याम सोना लला।” ⁸ जमाहेन्से येशूसे सुड्बा ताम थेनीगदेसे ढन्जी।

⁹ जमाहेन्से थे म्रिडम्हेमेगदे धुर्साग्याम दोःसी निसी हाडसे म्प्राड्बा जम्मान ताम च्युक गिक चेलागदेदेन स्य्हान्दो जम्मान म्हिगदेदा पाड्जी। ¹⁰ थे म्रिडम्हेमेगदे चा मरियम मग्दलिनी, याकूबला आमा मरियमदेन योअन्ना मुबा। ओच्छे थेनीगदेदेन छ्याम स्य्हान्दो म्रिडम्हेमेगदेएनोन मुबा। थेनीगदेसेन मुल चेलागदेदा हाडसे म्प्राड्बा जम्मान ताम पाड्मुबा। ¹¹ तर चेलागदेसे “एनीगदेसे तिग आतोःबा ताम लबा?” भिसी पत्याब आतनी। ¹² तर पत्रुस चा डोड रेःसी धुर्सापट्टि यार्बान निजी। थेरी धोसी धुर्साला म्प्रापग्याम योइ तसी च्यामा येशूदा बेरब लबा क्वान जे म्प्राड्जी। चुहड् तबा म्प्राड्सी थे उदेक म्हनबान दिमपट्टि निजी।

इम्माउस नाम्सारी निबा ग्यामरी येशूदा स्याप्बा

मर्कूस १६:१२-१३

¹³ थेनोन धिनकुनु येशूला चेलागदे न्हडला चेला न्ही यरूशलेमग्याम ओसपन कोस सोमसे गडसल थारेडला इम्माउस भिबा नाम्सारीक्यार निबान मुबा। ¹⁴ थेनीगदेसे यरूशलेमरी तबा तामला बारेरी हाड हाड न्हडरी ताम लबान मुबा। ¹⁵ चुहड् लसी ताम लसी भ्रबान लबा धुइरी येशूएनोन थेनीगदेदेन छ्यामनोन फेप्जी। ¹⁶ तसैनोन थेनीगदेसे येशूदा डोआसेनी। तिग्दा भिसम परमेश्वरसे थेनीगदेदा डोसेना आलनी।

¹⁷ जमाहेन्से येशूसे थेनीगदेदा “एनीगदेसे तिग ताम लसी भ्रबा?” भिसी ड्योइमा, थेनीगदेला ली धोपधोप लसी थेन तजी।

¹⁸ थे न्ही न्हडला क्लेओपास भिबासे येशूदा “यरूशलेमरी कोर्सी खबा म्हि तसीनोन थेरी तिनी न्हडगर तिग तबा मुला थे ताम था आयाड्बा चा हाड जे चीम” भिसी पाड्मा, ¹⁹ येशूसेएनोन थेनीगदेदा “तिग ताम?” भिसी ड्योइजी।

जमाहेन्से थेनीगदेसे “नासरतला येशूला बारेरी तबा ताम हाडदा था आरे? थे म्हि अगमवक्ता हिनना। थेसे लबा गेदेन लोप्बा ताम परमेश्वरदेन म्हिंला ओन्छाडरी शक्तिशाली मुबा। ²⁰ तर थेदा परमेश्वरला मन्दिररी पूजा लबा मुल म्हिदेन यहूदी नेतागदेसे चुदा साइगो भिसी क्रुसरी टाँगब लपुड्जी। ²¹ यहाड इस्राएलीगदेदा येशूसेन पापग्याम फेला भिसी डन्से आश लमुबा। तर येशूदा साइबाएनोन तिनी सोमरे तजी। ²²⁻²³ चुदे जे आहिन, तिनी स्य्होरीन डन्ना कोइ कोइ नाना आडागदे येशूदा थान्बा धुर्सारी निमा, थेनीगदेसे येशूला लास आस्यापनी। थेरी थेनीगदेसे स्वर्गदूतगदेदा म्प्राड्जी। थे स्वर्गदूतगदेसे “येशू सोसी जिन्बा मुला” भिसी थेनीगदेदा पाड्बा ताम डन्दाएनोन

* 23:56 प्रस्था २०:१०; वयव ५:१४

पाडूसी उदेक तना लजी। ²⁴ चु ताम थे:सी डन्ना कोइ कोइ होगदे येशूदा थान्बा धुसारी च्याबारी निजी। थेनीगदेसेएनोन थे म्रिडम्हेमेगदेसे पाड्बा हड्बोन स्यापजी, तर येशूदा भिसम आम्राड्नीम।”

²⁵ जमाहेन्से येशूसे थेनीगदेदा चुहड् भिसी सुड्जी, “ताम आघोबा म्हि, अगमवक्तागदेसे पाड्बा ताम विश्वास लबारी एनीगदेदा खाहड्बा गाहो तबा? ²⁶ तिग थार्बा पिन्बा खीष्ट हाडला शक्तिदेन य्हालरी फेप्खबा भन्दा डाच्छा चु दुख नातो:बा आरेबा?” ²⁷ ओच्छे येशूसे हाडला बारेरी मोशाहेन्से जम्मान अगमवक्तागदेसे परमेश्वरला बचनरी भिबा ताम थेनीगदेदा घोना लजी।

²⁸ थेनीगदे इम्माउस नाम्साला डामरी धोखमाहेन्से येशू अझ थेग्याम क्यारनोन फेपबारी छ्याइजी। ²⁹ तर थे चेला न्हीसे येशूदा “महुन तबारी छ्याइजी, थेतबासेलमा तिनी हाड डन्देन छ्यामनोन धन्छ्यागो” भिसी भिमाहेन्से येशू थेनीगदेदेन छ्याम धन्छ्याबाला लागिरी दिम न्हडरी फेपजी। ³⁰ येशू थेनीगदेदेन छ्याम सोल छ्योइबारी धन्छ्याजी। जमाहेन्से येशूसे गेड छ्यारी थोसी धन्यवाद पिन्सी गेड क्युइसी थेनीगदेदा पिन्जी। ³¹ जमाहेन्से थेनीगदेसे येशूदा डोसेजी। तर थेनोन धुइरी थेनीगदेसे येशूदा थेरी आम्राड्नी। ³² ओच्छे थेनीगदेसे “येशू य्हाडदेन छ्याम ग्यामरी ताम लबान परमेश्वरला बचन घोना लबा धुइरी य्हाडला सेम गाते ताड्बा मुबा” भिसी हाड हाड न्हडरी ताम लजी।

³³ जमाहेन्से तुरुन्तन थेनीगदे यरूशलेमपट्टि निजी। थेरी धोमा थेनीगदेसे च्युक गिक चेलागदेदेन छ्याम पोप तसी चिबा म्हिगदेसे, ³⁴ “प्रभु सिबाग्याम सोबादेन सिमोन मुबा ग्लारी फेपबा ताम चा पक्कान हिन्ना चीम” भिसी ताम लसी चिबा स्यापजी। ³⁵ जमाहेन्से थेन्नीसेएनोन ग्यामरी तबा तामदेन प्रभुसे गेड क्युइबा धुइरी थेन्नीसे प्रभुदा डोसेजी भिबा ताम थेरी मुबागदेदा पाड्जी।

येशू चेलागदे मुबा ग्लारी फेपखबा

मत्ती २८:१६-२०; मर्कूस १६:१४-१८; यूहन्ना २०:१९-२३; मुल चेला १:४-८

³⁶ थेनीगदेसे चु ताम लबान लबा धुइरी येशू थेनीगदेला डाच्छा रापजी, ओच्छे “एनीगदेदा शान्ति तगै” भिसी सुड्जी।

³⁷ तर येशूदा म्राड्सी, “चु म्हड कि तिग” भिसी थेनीगदे लोड्सी आत्यब तजी।

³⁸ जमाहेन्से येशूसे थेनीगदेदा “एनीगदे तिग्दा सेमरी शङ्का लसी लोड्बा? ³⁹ एनीगदेसे डाला यादेन काडरी थुर्सी च्यागो, डानोन हिन्ना। तिग्दा भिसम म्हडला स्यादेन नखु आत, तर डाला मी मुला” भिसी सुड्जी।

⁴⁰ चुहड् सुड्माहेन्से येशूसे थेनीगदेदा हाडला छ्यादेन स्यहाप उन्जी। ⁴¹ जमाहेन्से थेनीगदे ताड्सी उदेक तसी अझ येशूला ताम विश्वास आलनी। जमाहेन्से येशूसे थेनीगदेदा “एनीगदेदेन छ्याम तिगै चबा स्हे मुला?” भिसी ड्योइमा, ⁴² थेनीगदेसे दुम्बु गिक तार्डाला स्या येशूदा पिन्जी। ⁴³ थे तार्डाला स्या तासी येशूसे थेनीगदेलान डाच्छापट्टि छ्योइजी।

⁴⁴ जमाहेन्से येशूसे थेनीगदेदा “डाला बारेरी परमेश्वरसे मोशादा पिन्बा ठिमरी, अगमवक्तागदेसे भिबा किताबगदेदेन व्हाइला किताबरी भिबा जम्मान ताम पूरा तबा मुला। चु ताम एनीगदेदेन छ्याम मुबा धुइरीन डाइ एनीगदेदा पाड्बा मुबा” भिसी सुड्जी।

⁴⁵ जमाहेन्से येशूसे थेनीगदेदा परमेश्वरला बचन घोखम्बा ज्ञान पिन्जी। ⁴⁶ ओच्छे येशूसे थेनीगदेदा चुहड् भिसी सुड्जी, “थार्बा पिन्बा खीष्टसे दुख नातो:ला ओच्छे सोमरेमाकुनु थे सिबाग्याम सोला, ⁴⁷ थेला मिनरी हाड हाडला पाप ख्लासी परमेश्वरपट्टि दो:जी भिसम पापला दोष मेटब तला। चु ताम यरूशलेमहेन्से जम्मान य्हुलला म्हिगदेदा थे:ना लतो:ला भिसी परमेश्वरला बचनरी भिबा मुला। ⁴⁸ तिग्दा भिसम चु जम्मान ताम म्राड्बा एनीगदेन हिन्ना। ⁴⁹ च्यागो, डाला आबासे पिन्ना भिसी कबुल लबा शक्ति डाइ एनीगदे मुबा ग्लारी पुइखला। थेतबासेलमा तोरग्याम शक्ति आयाड्तेधोना एनीगदे चु शहररीन चिउ।”

येशू स्वर्गरी फेपबा

मर्कूस १६:१९-२०; मुल चेला १:९-११

50 जमाहेन्से येशूसे थेनीगदेदा बेथानियाधोना भोर्जी, ओच्छे हाडला या थीसी थेनीगदेदा मोलम पिन्जी। 51 चुहड् लसी मोलम पिन्माहेन्से येशूदा थेनीगदेग्याम फेसी स्वर्गरी भोर्जी। 52 येशूदा फ्या लमाहेन्से थेनीगदे ताड्सी यरूशलेमरी दोःसी निजी। 53 ओच्छे थेनीगदेसे परमेश्वरला जयजयकार लबान सदन परमेश्वरला मन्दिररी चिजी।

यूहन्नासे भिबा थार्बा पिन्बा समाचार चु किताबला बारेरी पाड्तोःमा

भिबा म्हि: येशूला मुल चेला यूहन्नासे भिबा मुबा। चु यूहन्ना येशूसे माया लबा चेला हिन्ना (यूहन्ना २१:७)। थे जब्दियाला झा ओच्छे याकूबला आले हिन्ना (मत्ती ४:२१)।

भिबा ग्ला: एफिसस शहररी भिबा मुबा।

भिबा साल: ओस्पन ईश्वी संवत् ८०-९५ (विक्रम संवत् १३७-१५२) सालला गुडरी भिबा मुबा।
चु जम्मान भन्दा लिच्छा भिबा थार्बा पिन्बा समाचार हिन्ना।

खाल्दा भिबा: यहूदी धर्म तेन्बा अर्गु यहुलला म्हिगदेदा येशू ख्रीष्टनोन परमेश्वर हिन्ना भिसी उन्बाला लागिरी भिबा मुबा।

चु थार्बा पिन्बा समाचाररी येशू जुकजुकधोनाला जुनी पिन्बा बचन हिन्ना। ओच्छे थे बचन म्हि दोसी जम्बुलिडरी मुबा म्हिगदेला गुडरी धन्छ्याजी भिसी भिबा मुला। येशू परमेश्वरला झादेन कबुल लबा थार्बा पिन्बा ग्ले हिन्ना भिसी चु थार्बा पिन्बा समाचार पढब लबागदेसे येशूदा विश्वास लगै ओच्छे थेनीगदेसे जुकजुकधोनाला जुनी याङ्गै भिसी भिबा हिन्ना (यूहन्ना २०:३१)।

चु किताबरी बचनदेन येशू गिकनोन हिन्ना भिसी भिबा मुला। चु थार्बा पिन्बा समाचारला डाच्छाला भोरी येशूसे लबा उदेकला गेगदेला बारेरी पाड्बा मुला। ओच्छे येशून परमेश्वरला झादेन कबुल लबा थार्बा पिन्बा ग्ले हिन्ना भिसी पाड्बा मुला। डाच्छाला भोरी प्रभुसे लबा उदेकला गेगदेग्याम तिग उन्बा मुला भिबा ताम येशूसे सुड्बा बचनग्यामनोन ज्यना लसी घोबारी खम्ला। चु भोरी चा म्हिगदेसे खाहड् लसी येशूदा विश्वास लसी चेला दोजी ओच्छे स्य्हान्दोसे थेदा बिरोध लसी विश्वास आलनी भिबा तामला बारेरी पाड्बा मुला। जमाहेन्से १३ अध्यायहेन्से १७ अध्याय न्हडरी येशूसे हाडदा चुड्बाकुनु म्हुनड हाडला चेलागदेदेन छ्याम संगती लबा तामदेन हाड कुसरी सिबा भन्दा डाच्छा हाडला चेलागदेदा होशियार तना लबान आँट पिन्बा तामगदेला बारेरी भिबा मुला। लिच्छाला अध्यायगदेरी चा येशूदा चुड्बा तामला बारेरीदेन येशूला सेम च्याबा तामला बारेरी भिबा मुला। थेहड् लसीन येशू कुसरी सिबा तामला बारेरीदेन सिबाग्याम सोबा तामला बारेरी ओच्छे येशू हाडला चेलागदे मुबा ग्लारी फेप्खबा तामला बारेरीनोन भिबा मुला।

यूहन्नासे जुकजुकधोनाला जुनी चा ख्रीष्टग्याम याङ्मुला ओच्छे येशूदा परमेश्वर मुबा ग्लारी भोर्बा ग्यामदेन सत्य ओच्छे जुनी हिन्ना भिसी विश्वास लसी थे मुबा ग्लारी खबागदेसे जे याङ्ला भिसी लोपबा मुला। चु थार्बा पिन्बा समाचाररी उदेकला ताम तिग मुला भिसम म्हिगदेदा आत्माला ताम घोना लबाला लागिरी क्युडदेन गेड ओच्छे यहाल, गोठालोदेन ग्यु, थेहड् लसीन अङ्गुरला दोडदेन रोगदे हड्बा जम्मासेन घोबारी खम्बा उखानगदेग्याम सुड्बा मुला।

मुल तामगदे

बचन म्हि दोसी न्हबा १:१-१८

बपत्तिस्मा पिन्बा यूहन्नादेन येशूला चेलागदे १:१९-५१

येशूसे म्हिगदेला गुडरी लबा गे २:१-१२:५०

येशू सिबा भन्दा डाच्छा हाडला चेलागदेदेन छ्याम लबा तामगदे १३:१-१७:२६

येशूदा कुसरी टाँगब लबा १८:१-१९:४२

येशू सिबाग्याम सोसी हाडला चेलागदे मुबा ग्लारी फेप्खबा २०:१-२१:२५

यूहन्नासे भिबा थार्बा पिन्बा समाचार

बचन म्हि दोसी न्हबा

1 जम्बुलिङ्ग सहोबा भन्दा डाचछान बचन भिबा मुबा, थे बचन परमेश्वरदेन छ्याम मुबा, ओच्छे बचननोन परमेश्वर मुबा। 2 जम्बुलिङ्ग सहोबा भन्दा डाचछाहेन्सेन थे परमेश्वरदेन छ्याम मुबा।

3 परमेश्वरसे जम्मान सहे थेनोन बचनग्याम सहोजी। परमेश्वरसे सहोबा सहेगदे न्हडरी बचनग्याम आसहोबा सहे तिगैनोन आरे। 4 बचनसे सहोबा जम्मान सहेगदेसे थेनोन बचनग्याम जुनी याडुजी। थेनोन जुनी जम्मान म्हिगदेला यहाल हिन्ना। 5 थे यहाल धोपधोपरी यहाल यहाल तला, ओच्छे धोपसे थे यहालदा खाइमै साइबारी आखम।

6 परमेश्वरसे म्हि गिक पुइखबा मुबा, थेला मिन यूहन्ना मुबा।* 7 थेग्यामसेन जम्मान म्हिगदेसे थे यहालदा विश्वास लगै भिसी परमेश्वरसे थेदा थे यहालला बारेरी पाडुबाला लागिरी पुइखबा मुबा। 8 थे चा थे यहाल आहिन्बा मुबा। तर थे यहालला बारेरी म्हिगदेदा घोना लबारी थे खबा मुबा।

9 जम्मान म्हिगदेदा ज्ञान बुद्धि पिन्बा सत्य यहाल चा जम्बुलिङ्गरी फेपखबान मुबा। 10 थे जम्बुलिङ्गरी मुबा, जम्बुलिङ्ग थेग्यामसेन सहोबा हिन्ना। तसैनोन जम्बुलिङ्गला म्हिगदेसे थेदा डोआसेनी। 11 थे हाडलान म्हिगदे मुबा ग्लारी फेपखजी। तर थेदा हाडलान म्हिगदेसे मान आलनी। 12 तर जुन म्हिसे थेदा मान लसी थेथोरी विश्वास लजी, थेनीगदेदा थेसे परमेश्वरला सन्तान दोबा हक पिन्जी। 13 थेनीगदे महिला सेमसे म्हन्बा अन्छार खजिबै महिला ल्हुइग्याम न्हबा आहिन। थेनीगदे परमेश्वरसे सहोबा परमेश्वरलान कोलागदे हिन्ना।

14 चुनोन बचन म्हि दोसी न्हजी, ओच्छे दयामायादेन सत्यसे प्लिङ्गी थे यहाडला गुडरी धन्छ्याजी। उनसे थेला घेन यहालदेन शक्ति म्हाडुजी, थे यहालदेन शक्ति परमेश्वरला गिकजेन झाला मुबा।

15 यूहन्नासे थेला बारेरी चुहङ्ग भिसी क्रिडबान पाडुजी, “डा भन्दा लिच्छा फेपखबा चा डा भन्दा घेन म्हि हिन्ना। तिग्दा भिसम थे डा भन्दा डाचछाहेन्सेन मुबा। थे महिला बारेरी डाइ डाचछान पाडुबा मुबा।”

16 थे दयामायासे प्लिङ्गबा मुला। थेतबासेलमा थेग्यामसेन यहाडसे दयामायाथोरी दयामाया याडुबा मुला। 17 तिग्दा भिसम परमेश्वरसे यहाडदा मोशाग्याम ठिम पिन्मुबा। तर येसू ख्रीष्टग्याम चा दयामायादेन सत्य ताम पिन्बा मुला। 18 परमेश्वरदा खालैसेन खाइमै म्हाडुबा आरे। तर परमेश्वर आबादेन छ्याम मुबा थेला गिकजेन झा परमेश्वरसेन यहाडदा परमेश्वर आबा खाहङ्गबा मुला भिसी उन्बा मुला।

बपत्तिस्मा पिन्बा यूहन्नासे पाडुबा ताम

मत्ती ३:१-१२; मर्कूस १:१-८; लूका ३:१-१८

19 यरूशलेम शहरग्याम यहूदीगदेसे परमेश्वरला मन्दिररी पूजा लबागदेदेन लेवीगदेदा यूहन्ना मुबा ग्लारी थे खाल चीम? भिसी ड्योइबारी पुइमा यूहन्नासे थेनीगदेदा चुहङ्ग भिसी पाडुमुबा। 20 थेसे थेनीगदेदा “डा थार्बा पिन्बा ख्रीष्ट हिन्नोन आहिन” भिसी सत्य ताम पाडुजी।

21 जमाहेन्से थेनीगदेसे यूहन्नादा “थेहङ्ग भिसम ए खाल हिन्ना? तिग ए एलिया हिन्ना” भिसी ड्योइजी।

तर यूहन्नासे “डा आहिन” भिसी जोहाब पिन्जी।

दो:सी थेनीगदेसे “तिग ए थेनोन अगमवक्ता हिन्ना?” भिसी ड्योइमा,

यूहन्नासे “डा थे अगमवक्ताएनोन आहिन” भिसी जोहाब पिन्जी।†*

22 जमाहेन्से दो:सीनोन थेनीगदेसे यूहन्नादा “ए खाल हिन्ना? उन्दा पाडुगो। उन्दा चुरी पुइखबा म्हिगदेदा एला बारेरी पाडुतो:बा मुला। थेतबासेलमा ए खाल हिन्ना? उन्दा पाडुगो” भिसी भिमा,

23 यूहन्नासे थेनीगदेदा “यशैया अगमवक्तासे पाडुबा हङ्गनोन ‘परमप्रभु भ्रबाला लागिरी थेला ग्याम सोजो सहोउ’ भिसी तोडतोडबा ग्लारी क्रिडुबा म्हि गिकला काइ डानोन हिन्ना” भिसी पाडुजी।*

* 1:6 मत्ती ३:१; मर्कूस १:४; लूका ३:१-२ † 1:21 चु पदरी “थे अगमवक्ता” भिबा चा ठिमला किताबरी यहूदीगदेदा पुइखला भिसी पाडुबा अगमवक्ताला बारेरी हिन्ना। * 1:21 व्यव १८:१५, १८; मला ४:५ * 1:23 यशै ४०:३

24 थेनीगदे न्हडला कोइ कोइ फरिसीगदेसे 25 यूहन्नादा “ए थाबा पिन्बा ख्रीष्टएनोन आहिन, एलियाएनोन आहिन, ओच्छे थे अगमवक्ताएनोन आहिन भिसम तिग्दा बपतिस्मा पिन्बा?” भिसी ड्योइजी।

26 जमाहेन्से यूहन्नासे थेनीगदेदा “डाइ क्युइसे बपतिस्मा पिन्बा मुला, तर एनीगदेला गुडरी खालै गिक मुला थेदा एनीगदेसे डोसेबा आरे। 27 डा भन्दा लिच्छा फेपखबा चा थेनोन हिन्ना। डा थेला लखमला तुना बलबाधोनाला आरे” भिसी भिजी।

28 चु ताम यर्दन स्योडला क्याम्सडपट्टि बेथानिया भिबा नाम्सारी तबा मुबा, थेरीन यूहन्नासे म्हिगदेदा बपतिस्मा पिन्बान मुबा।

परमेश्वरला झा

29 न्हडगरदड येशू हाड मुबा ग्लारी फेपखबान लबा म्राड्सी यूहन्नासे चुहड् भिजी, “च्यागो, जम्बुलिडरी मुबा जम्मान म्हिदा पापग्याम फेबा परमेश्वरसे पुइखबा ग्ले!† 30 थेला बारेरी डाइ डाच्छान पाड्बा मुबा, ‘डा भन्दा लिच्छा म्हि गिक फेपखबान मुला, थे डा भन्दा शक्तिशाली मुला। तिग्दा भिसम थे डा न्हबा भन्दा डाच्छाहेन्सेन मुबा।’ 31 थे खाल हिन्ना भिबा ताम डादा था आरेबा, तर इस्राएलीगदेसे थेदा डोसेगै भिसीन डाइ क्युइग्याम बपतिस्मा पिन्बान खबा हिन्ना।”

32 यूहन्नासे अझ हाडसे म्राड्बा ताम चुहड् भिसी पाड्जी, “डाइ परमेश्वरला आत्मा ढुकुर हड् लसी स्वर्गग्याम फेपखसी थैथोरी धन्छ्याबा म्राड्जी। 33 डाइ अझ थेदा डोसेबा आरेबा, तर क्युइग्याम बपतिस्मा पिन्गो भिसी डादा पुइखबासेन, ‘एसे जुन म्हिथोरी परमेश्वरला आत्मा फेपखसी धन्छ्याबा म्राड्ला, थेसेन परमेश्वरला आत्माग्याम बपतिस्मा पिन्ना’ भिसी सुड्जी। 34 थैथोरी परमेश्वरला आत्मा फेपखबा डाइ म्राड्बा मुला। थैतबासेलमा डाइ पाड्बा चु ताम सत्य हिन्ना, परमेश्वरला झा चा थेनोन हिन्ना।”

येशूसे डाच्छा धम्बा चेलागदे

35 दोःसी न्हडगरदड यूहन्ना हाडला चेलागदे न्हडला न्हीदेन छ्याम राप्सी चिबा मुबा। 36 येशू फेपबान लबा म्राड्सी यूहन्नासे, “च्यागो, परमेश्वरसे पुइखबा ग्ले!” भिसी पाड्जी। 37 चु ताम थेःसी यूहन्नाला चेला न्ही येशूला लिच्छा लिच्छा निजी।

38 येशूसे फ्लिक दोःसी स्हीमा, थेनीगदे लिच्छा लिच्छा खबान लबा म्राड्सी येशूसे थेनीगदेदा “एनीगदेसे तिग म्हाइबा?” भिसी ड्योइजी। जमाहेन्से थेनीगदेसे येशूदा “गुरु हाड खानड धन्छ्यामुला?” भिसी ड्योइमा,

39 येशूसे थेनीगदेदा “डादेन छ्याम खउ, एनीगदेसे म्राड्ला” भिसी सुड्जी। जमाहेन्से थेनीगदे येशूदेन छ्याम निजी, ओच्छे येशू धन्छ्याबा ग्ला म्राड्जी। जमाकुनु ओस्पन ड्यसेला चार बजब तसी जिन्बासे लमा थेनीगदे येशूदेन छ्याम चिजी।

40 यूहन्नासे पाड्बा ताम थेःसी येशूदेन छ्याम निबा थे चेला न्ही न्हडला गिक चा सिमोन पत्रुसला आले अन्द्रियास मुबा। 41 थेसे डाच्छा हाडला ज्योज्यो सिमोनदा स्याप्सी, “डन्से मसीहदा स्याप्जी,” भिसी पाड्जी। हिबू ग्योइरी “मसीह” भिबा चा “थाबा पिन्बा ख्रीष्ट” भिबा हिन्ना। 42 थेसे सिमोनदा येशू मुबा ग्लारी भजी।

येशूसे सिमोनदा स्हीसी, “ए योनाला झा सिमोन हिन्ना, एला मिन केफास हिन्ना” भिसी सुड्जी।

केफास भिबा चा ग्रीक ग्योइरी पत्रुस भिबा हिन्ना।†

फिलिपदेन नथानेल

43 न्हडगरदड येशू गालील अञ्चलरी नितोःजी भिसी फेप्मा फिलिपदा स्याप्जी। ओच्छे येशूसे थेदा “डादेन छ्याम भ्रउ” भिसी सुड्जी। 44 फिलिपएनोन पत्रुसदेन अन्द्रियासलान शहर बेथसेदाला मुबा। 45 जमाहेन्से फिलिप नथानेलदा हुप तबारी निजी। ओच्छे नथानेलदा चुहड् भिसी पाड्जी,

† 1:29 “परमेश्वरसे पुइखबा ग्ले” भिसी भिबा तामदा ग्रीक बाइबलरी परमेश्वरसे पुइखबा ग्यु बोगो भिसी भिबा मुला। चु ताम १:३६ पदरीनोन मुला। † 1:42 “पत्रुस” भिबा चा युडबाला पहरा भिबा हिन्ना।

“मोशासे भिबा ठिमदेन अगमवक्तागदेसे जुन म्हिला बारेरी पाड्बा मुबा, डन्से थे म्हिदा स्याप्बा मुला। थे योसेफला झा नासरतला येशू हिन्ना।”

46 नथानेलसे थेदा “तिग नासरतग्यामसेनोन तिगै ज्यबा सहे खला?” भिसी ड्योइमा, फिलिपसे थेदा “खसी च्यागो” भिसी जोहाब पिन्जी।

47 नथानेल हाड मुबा ग्लारी खबान लबा म्राड्सी येशूसे थेला बारेरी “तिगै लुसीला ताम आलबा पक्का इस्राएलीदा च्यागो” भिसी सुड्जी।

48 नथानेलसे येशूदा “हाडसे डाला बारेरी खाहड लसी था याड्जी?” भिसी ड्योइमा, येशूसे थेदा “फिलिपसे एदा ड्योइबारी निबा भन्दा डाच्छान डाइ एदा अज्जीरला दोड टारी म्राड्मुबा” भिसी जोहाब पिन्जी।

49 जमाहेन्से नथानेलसे येशूदा “रब्बी, हाडनोन परमेश्वरला झा इस्राएलला ग्ले हिन्ना” भिसी भिजी।

50 येशूसे थेदा “डाइ एदा अज्जीरला दोड टारी म्राड्जी भिबासे लमा एसे विश्वास लबा आहिन? एसे अझ चु भन्दान घेन घेन तामगदे म्राड्ला” भिसी सुड्जी। 51 दोःसी येशूसे थेनीगदेदा “च्यागो, एनीगदेसे डाला ताम ड्यानगो, एनीगदेसे स्वर्ग ठोड्बादेन परमेश्वरला दूतगदे परमेश्वरसे पुड्खबा म्हिथोरी फाप्खबान लबा तोर निबान लबा म्राड्ला” भिसी सुड्जी।*

2

काना भिबा नाम्सारी लबा ब्याह

1 सोमरेमाकुनु गालील अञ्चलला काना भिबा नाम्सारी ब्याह गिक मुबा। थेरी येशूला आमाएनोन मुबा। 2 थे ब्याहरी येशूदेन येशूला चेलागदेदाएनोन निम्तो पिन्बा मुबा। 3 अडगुरला निडगु जिन्माहेन्से येशूला आमासे येशूदा “थेनीगदेदेन छ्याम अडगुरला निडगु आरे” भिसी भिजी।

4 चु ताम थेःसी येशूसे “चु यहाडला गे आहिन। डाइ गे लबा धुइ अझ तबा आरे” भिसी सुड्जी। 5 जमाहेन्से येशूला आमासे नोकरगदेदा “येशूसे एनीगदेदा जे लउ भिसी कुल्ला, थेनोन लउ” भिसी पाड्जी।

6 ओच्छे थेरी युडबा ठ्वाड्सी सहोबा ओस्पन बोगल बलिहेन्से ग्यार्जा गिक लिटर क्युइ वाड्बा गोर हु युडबाला फुम्बा मुबा। थे फुम्बारी चा यहूदीगदेला ठिम अन्छार चोख्याब लबाला लागिरी क्युइ थान्मुबा। 7 येशूसे थेरी मुबा नोकरगदेदा “चु जम्मान फुम्बारी क्युइ प्लिड्ना लउ” भिसी कुल्ल्जी। जमाहेन्से थेनीगदेसे थे जम्मान फुम्बा नाड नाड क्युइ प्लिड्ना लजी।

8 ओच्छे येशूसे थेनीगदेदा “चु जजाकर भोर्सी भोजला मुल म्हिदा म्यहाड्पुड्गो” भिसी कुल्ल्जी। जमाहेन्से थेनीगदेसे भोर्सी मुल म्हिदा पिन्जी। 9 मुल म्हिसे म्यहाड्बा धुइरी थे क्युइ अडगुरला निडगु दोसी जिन्बा मुबा। थेदा थे निडगु खानडग्याम भजी भिबा ताम था आरेबा, तर थे क्युइ युबा नोकरगदेदा चा था मुबा। जमाहेन्से थे मुल म्हिसे म्हाछारदा ड्योइसी, 10 “जम्मान म्हिसे डाच्छा अडगुरला ज्यबा निडगु पिन्मुला। ओच्छे डोन्बोगदे ड्योइमाहेन्से लिच्छा अडगुरला आज्यबा निडगु पिन्मुला। तर एसे मी दान्दे धोनान ज्यबा निडगु पिन्बान मुला” भिसी भिजी।

11 येशूसे लबा उदेकला गेगदे न्हडरी गालील अञ्चलला काना भिबा नाम्सारी लबा उदेकला गे चा जम्मान भन्दा डाच्छा लबा हिन्ना। चु उदेकला चिनुग्याम येशूसे हाडला शक्ति उन्जी। चु म्राड्सी थेला चेलागदेसे थेदा विश्वास लजी।

12 जमाहेन्से येशू हाडला आमा, आले, चेलागदेदेन छ्याम कफर्नहुम भिबा शहररी फेप्जी। ओच्छे तिगै धिनधोना थेनीगदे थेरीन धन्छ्याजी।*

येशू परमेश्वरला मन्दिररी फेप्बा

मत्ती २१:१२-१३; मर्कूस ११:१५-१७; लूका १९:४५-४६

* 1:51 उत्प २८:१२ * 2:12 मत्ती ४:१३

13 यहूदीगदेसे मिश्र यहूल्साग्याम फेसी खबा धिनदा ढन्सी धड्बा चाड खबारी छ्याइबा मुबा। थे धुइरी येशू यरूशलेमरी फेपूजी।* 14 येशूसे म्हिगदेदा परमेश्वरला मन्दिररी ग्यु, बहर, दुकुर चूड्बा किन्बा लबादेन टेबुलरी टाडगा थान्सी टाडगा देप्सी चिबा म्राड्जी। 15 जमाहेन्से येशूसे छोला कोर्रा सहोसी मन्दिररी मुबा ग्युगदेदेन बहरगदे जम्मानान तापूजी, ओच्छे टाडगा देप्सी चिबागदेला टाडगागदे भ्याड्सी टेबुल प्लाड प्लिड लसी पिन्जी। 16 दुकुर चूड्बागदेदा येशूसे “चु जम्मान सहे चुग्याम भोगो। डाला आबाला दिमदा व्यापार लबा दिम थासहोउ” भिसी सुड्जी।

17 थे धुइरी येशूला चेलागदेसे परमेश्वरला बचनरी, “परमेश्वर! हाडला दिमला लागिरी डाइ लबा मायासे लमा डा सिबा तेबान तबा मुला” भिसी भिबा ताम ढन्जी।*

18 यहूदी नेतागदेसे येशूदा “हाडदा चु गे लबाला लागिरी अधिकार मुबा हिन्सम डन्दा हाडसे तिग चिनु उन्बारी खम्ला?” भिसी भिजी।

19 येशूसे थेनीगदेदा “एनीगदेसे चु मन्दिर फुपूगो, डाइ चु सोमरेरी सहोला” भिसी सुड्जी।* 20 जमाहेन्से यहूदी नेतागदेसे येशूदा “परमेश्वरला चु मन्दिर सहोबारी डन्दा बोगल न्हीसे हु दिड लगब तजी भिसम हाडसे चा खाहड् लसी सोमरेरी सहोखम्ला?” भिसी ड्योइजी। 21 तर येशूसे जुन मन्दिरला बारेरी सुड्बा मुबा, थे मन्दिर चा हाडलान लहुइ मुबा। 22 येशू सिबाग्याम सोमाहेन्से येशूसे सुड्बा चु ताम चेलागदेसे ढन्जी। जमाहेन्से थेनीगदेसे परमेश्वरला बचनरी भिबा तामदेन येशूसे सुड्बा तामरी विश्वास लजी।

23 मिश्र यहूल्साग्याम फेसी खबा धिनदा ढन्सी धड्बा चाडला धुइरी येशू यरूशलेमरी मुबा। थेरी येशूसे लबा उदेकला गे म्राड्सी ल्हानान म्हिगदेसे येशूदा विश्वास लजी। 24 तर थेनीगदेसे लबा विश्वासदा येशूसे पत्याब आतनी। तिग्दा भिसम जम्मान म्हिगदेला सेमला ताम येशूदा था मुबा। 25 जम्मान महिला सेमला ताम था मुबासे लमा खालै महिला बारेरी येशूदा खालैसेन पाड्तोःबा आरेबा।

3

निकोदेमस येशूदा स्यापूबारी निबा

1 फरिसीगदे न्हडला निकोदेमस भिबा म्हि गिक मुबा। थे यहूदी नेतागदे न्हडला गिक मुबा। 2 थे तिरिकुनु म्हुनड येशू मुबा ग्लारी निसी येशूदा “गुरु, हाड डन्दा लोपूबारी परमेश्वरग्याम फेपूखबा हिन्ना भिबा डन्दा था मुला। तिग्दा भिसम परमेश्वरसे हो आलनी भिसम हाडसे लबा हड्बा शक्तिशाली गेगदे खालैसेन लबारी आखम” भिसी भिजी।

3 येशूसे थेदा “च्यागो, एसे डाला ताम ड्यानगो, खालै म्हि तोरग्यामाँ आन्हतेधोना परमेश्वरला यहूल्सादा म्राड्बारी आखम” भिसी सुड्जी।

4 चु ताम थेःसी निकोदेमससे येशूदा “खेपूबा दोसीनोन म्हि खाहड् लसी दोःसी न्हबारी खम्ला? तिग थे दोःसी आमाला फो न्हडरी वाड्सी न्हबारी खम्ला?” भिसी भिजी।

5 जमाहेन्से येशूसे थेदा चुहड् भिसी सुड्जी, “च्यागो, एसे डाला ताम ड्यानगो, खालै म्हि क्युइदेन आत्माग्याम आन्हतेधोना परमेश्वरला यहूल्सारी वाड्आम्याड्। 6 लहुइग्याम न्हबा लहुइ हिन्ना, तर परमेश्वरला आत्माग्याम न्हबा आत्मा हिन्ना। 7 डाइ एदा तोरग्याम न्हतोःला भिसी पाड्मा ए उदेक थातउ। 8 लाबा खानडपट्टि निम्हन्जी थेनोनपट्टि निमुला। लाबा खबा एसे था याड्मुला, तर थे खानडग्याम खजी खानडपट्टि निजी भिबा एदा था आरे। परमेश्वरला आत्माग्याम न्हबा म्हिगदेएनोन थेहड्बान तमुला।”

9 निकोदेमससे येशूदा “चु खाहड् लसी तखम्ला?” भिसी ड्योइजी।

10 जमाहेन्से येशूसे थेदा चुहड् भिसी सुड्जी, “ए इस्राएलीगदेला गुरु तसीनोन चु ताम आघोनी? 11 च्यागो, एसे डाला ताम ड्यानगो, डन्से मी हाडसे म्राड्बा तामदेन था याड्बा ताम जे पाड्मुला।

* 2:13 प्रस्था १२:१-२७ † 2:14 यरूशलेमरी परमेश्वरला मन्दिर गिक जे मुबा। * 2:17 भजन ६९:९ * 2:19 मत्ती २६:६१; २७:४०; मर्कू १४:५८; १५:२९ † 3:3 “तोरग्याम” भिबा चा ग्रीक बाइबल अन्छार दोःसीनोन भिबा हिन्ना। चुला अर्थ चा परमेश्वरला आत्माग्याम भिबा हिन्ना। चु ताम ३:७ देन ३१ रीनोन मुला।

तर डन्से पाड्बा ताम एनीगदेसे विश्वास आलमुला। 12 डाइ जम्बुलिडरी मुबा स्हेला बारेरी पाड्मा मी एनीगदेसे विश्वास आलमुला भिसम स्वर्गला बारेरी पाड्मा एनीगदेसे खाहड् लसी विश्वास लबारी खम्ला? 13 “स्वर्गग्याम खबा परमेश्वरसे पुइखबा म्हि बाहेक स्यहानदो खालैनोन स्वर्गरी निबा आरे। 14 यहूदीगदे तोडतोडबा ग्लारी मुबा धुइरी मोशासे पित्तलला पुख्री सहोसी सिडरी ठोक्सी च्योबा हड् परमेश्वरसे पुइखबा म्हिदाएनोन च्योला।* 15 ओच्छे जुन जुन म्हिसे थेदा विश्वास लला, थेनीगदेसे जुकजुकधोनाला जुनी याड्ला।

16 “तिग्दा भिसम परमेश्वरसे जम्बुलिडदा ल्हानान माया लसी हाडला गिक जेन झा पुइखजी। थेदा विश्वास लबागदे खालै नाश थातगै, तर जुकजुकधोनाला जुनी याड्गै भिसीन चुहड् लबा हिन्ना। 17 तिग्दा भिसम परमेश्वरसे हाडला झादा जम्बुलिडदा सजाय पिन्बारी पुइखबा आहिन। तर थेग्याम जम्बुलिडसे थार्बा याड्गै भिसी पुइखबा हिन्ना। 18 जुन म्हिसे परमेश्वरला झाथोरी विश्वास लला, थेला दोष आउन। तर विश्वास आलबा महिला चा डाच्छान दोष उन्सी जिन्बा तला। तिग्दा भिसम थेसे परमेश्वरला झादा विश्वास आलनी। 19 दोषी खाहड् लसी तला भिसम य्हाल जम्बुलिडरी खसी जिन्सैनोन म्हिगदेदा य्हाल भन्दा धोपधोपनोन सेम निजी। तिग्दा भिसम थेनीगदेसे लबा गेनोन आज्यबा मुबा। 20 आज्यबा गे लबागदेसे य्हालदा हेला लमुला। तिग्दा भिसम य्हालरी खमाहेन्से थेनीगदेसे लबा आज्यबा गे जम्मासेन म्हाड्ला भिसी थेनीगदे य्हालरी आखबा हिन्ना। 21 तर थेसे लबा जम्मान गे परमेश्वरदेन छ्याम गिक तसी लबा हिन्ना भिसी जम्मासेन म्हाड्गै भिसी सत्य तामदा तेन्बा म्हि य्हालरी खबा हिन्ना।”

बपतिस्मा पिन्बा यूहन्नासे येशूला बारेरी दोःसी पाड्बा

22 जमाहेन्से येशू हाडला चेलागदेदेन छ्याम यहूदिया अञ्चलरी फेप्सी तिगै धिनना लागिरी थेनीगदेदेन छ्याम थेरी धन्छ्याबा धुइरी म्हिगदेदा बपतिस्मा पिन्बान मुबा। 23 यूहन्नासेनोन सालीम भिबा ग्लाला डामरी मुबा एनोन भिबा ग्लारी बपतिस्मा पिन्बान मुबा। तिग्दा भिसम थेरी ल्हानान क्युड मुबा, ओच्छे म्हिगदे थेरी खसी बपतिस्मा किन्बान मुबा। 24 थे धुइधोना यूहन्ना झ्यालखानरी परब तबा आरेमुबा।*

25 थेनोन धुइरी यूहन्नाला चेलागदे यहूदी गिकदेन छ्याम चोखो तबाला बारेरी ताम लबान मुबा। 26 जमाहेन्से थेनीगदे यूहन्ना मुबा ग्लारी खसी, “गुरु, यर्दन क्यामसड मुबा धुइरी हाडसे डन्दा म्हि गिकला बारेरी सुड्मुबा, थे म्हि हाडदेन छ्यामनोन मुबा। दान्दे थेसेनोन बपतिस्मा पिन्बान मुला, ओच्छे जम्मान म्हिगदे थे मुबा ग्लारी निबान मुला” भिसी भिजी।

27 यूहन्नासे थेनीगदेदा चुहड् भिसी जोहाब पिन्जी, “परमेश्वरसे आपिन्तेधोना म्हिसे तिगै स्हे आयाड्। 28 “डा थार्बा पिन्बा ख्रीष्ट आहिन, तर थे भन्दा डाच्छा पुइखबा म्हि जे हिन्ना” भिसी डाला बारेरी पाड्बा ताम एनीगदेदान था मुला।* 29 जुन म्हिदेन छ्याम चाडछार चिला थेनोन म्हाछार हिन्ना। म्हाछारदेन छ्याम राप्बा म्हि म्हाछारला काइ थेःसी ल्हानान ताड्मुला। थेहड् लसीन डाएनोन ल्हानान ताड्बा मुला। 30 दाहेन्से ख्रीष्ट चा बढब तबान नितोःला, तर डा चा घटब तबान नितोःला।

स्वर्गग्याम फेप्खबा परमेश्वरला झा

31 “तोरग्याम फेप्खबा चा जम्मान भन्दा घेन मुला। जम्बुलिडरी न्हबा म्हिगदे चा जम्बुलिडलान हिन्ना, ओच्छे जम्बुलिडलान ताम लमुला। तर स्वर्गग्याम फेप्खबा चा जम्मान भन्दा घेन मुला। 32 थेसे हाडसे म्हाड्बादेन थेःबा तामनोन सुड्मुला, तर थेला ताम खालैसेन विश्वास आलमुला। 33 जुन म्हिसे थेला तामदा विश्वास लला, थेसे चा परमेश्वर सत्य हिन्ना भिबा तामला प्रमाण उन्ना। 34 परमेश्वरसे पुइखबा म्हिसे परमेश्वरलान ताम पाड्ला। तिग्दा भिसम परमेश्वरसे थेदा हाडला पूरान आत्मा पिन्बा मुला। 35 परमेश्वरसे हाडला झादा माया लबा मुला, ओच्छे थेदा जम्मानथोरी शासन लबा अधिकार पिन्बा मुला।* 36 थेतबासेलमा जुन म्हिसे परमेश्वरला झादा विश्वास लला

* 3:14 गन्ती २१:९ * 3:24 मत्ती १४:३; मर्कू ६:१७; लूका ३:१९-२० * 3:28 यूह १:२० * 3:35 मत्ती ११:२७; लूका १०:२२

थेसे जुकजुकधोनाला जुनी याड्ला। तर जुन म्हिसे परमेश्वरला झासे कुल्बा ताम आड्यान थेसे जुकजुकधोनाला जुनी आयाड्। बरु थेसे परमेश्वरग्याम खबा सजाय नातो:ला।”

4

येशूदेन सामरी यहुलला म्रिडम्हेमे

1 यूहन्नासे भन्दा येशूसे ल्हानान चेलागदे सहोबा मुला, ओच्छे बपत्तिस्माएनोन पिन्बान मुला भिसी फरिसीगदेसे थे:जी भिबा ताम येशूदा था मुबा। 2 बपत्तिस्मा पिन्बा चा चेलागदेसे पिन्मुबा तर येशू हाडसेन चा आहिन मुबा। 3 फरिसीगदेसे थे:बा ताम था याड्माहेन्से येशू यहूदिया अञ्चल ख्लासी गालील अञ्चलरी दो:सी फेप्जी।

4 येशू गालील अञ्चलरी फेप्मा सामरिया अञ्चलग्याम फेप्तो:मुबा। 5 थेतबासेलमा येशू सामरिया अञ्चलला सुखार भिबा शहररी धोखजी। चु शहर चा याकूबसे हाडला झा योसेफदा पिन्बा बुला डामरी मुबा।* 6 थेरी याकूबला इनार मुबा। भना भना बल्पबासे लमा येशू थे इनारला कुनीरी धन्छ्याबा मुबा। थे धुइरी ओस्पन धिनी गडसल तबा मुबा।

7 थेनोन धुइरी सामरी यहुलला म्रिडम्हेमे गिक थे इनाररी क्युइ किन्बारी खजी। येशूसे थेदा “डादा क्युइ थुड्बारी भउ” भिसी सुड्जी। 8 येशूला चेलागदे चा चबा सहे ग्लुबारी शहररी निबा मुबा।

9 सामरी यहुलला म्रिडम्हेमेसे येशूदा “हाड यहूदी यहुलला म्हि तसीनोन डा हड्बा सामरी यहुलला म्रिडम्हेमेदेन छ्याम तिग्दा क्युइ हीबा?” भिसी भिजी। तिग्दा भिसम यहूदीगदेसे सामरीगदेदेन छ्याम संगतनोन आलमुबा।†

10 येशूसे थेदा “एसे परमेश्वरसे पिन्बा मोलमदेन दान्दे एदेन छ्याम क्युइ हीबा म्हिदा डोसेबा हिन्सम एसे थे म्हिदेन छ्याम क्युइ हीसेला मुबा। जमाहेन्से थे म्हिसे एदा जुकजुकधोनाला जुनी याड्बा क्युइ पिन्सेला मुबा” भिसी सुड्जी।

11 थे म्रिडम्हेमेसे येशूदा “लास्सो, हाडदेन छ्याम क्युइ ते:बारी ताड आरे, ओच्छे इनारएनोन नुप्बा मुला। हाडसे खानडग्याम थे जुकजुकधोनाला जुनी याड्बा क्युइ भला? 12 तिग हाड डन्ना म्हमे याकूब भन्दा घेन हिन्ना? थेसेन डन्दा चु इनार सहोसी पिन्बा हिन्ना। थेदेन थेला सन्तानसे ओच्छे थेला म्हे मुड्गदेसेनोन चुनोन इनारला क्युइ थुड्मुबा” भिसी भिजी।

13 जमाहेन्से येशूसे थेदा चुहड् भिसी सुड्जी, “चु क्युइ थुड्बा म्हिगदेदा दो:सी क्युइ फुइला। 14 तर जुन जुन म्हिसे डाइ पिन्बा क्युइ थुड्ला थे म्हिदा दो:सी क्युइ आफुइ। डाइ थेदा जुन क्युइ पिन्ना, थे क्युइ चा थेला लागिरी जुकजुकधोनाला जुनी पिन्बा क्युइला मुहान दोला!” भिसी सुड्जी।

15 थे म्रिडम्हेमेसे येशूदा “लास्सो, डादाएनोन थे क्युइ भउ, थेहड् भिसम डादा दो:सी क्युइ आफुइ ओच्छे चुधोना क्युइ किन्बारीनोन खआतो:” भिसी भिजी।

16 जमाहेन्से येशूसे थेदा “निउ, एला हेम्बोदा ड्योइसी भउ” भिसी सुड्जी।

17 थेसे “डाला हेम्बो आरे” भिसी भिजी।

तर येशूसे थेदा “एसे डाला हेम्बो आरे भिसी भिबा ठीक हिन्ना। 18 तिग्दा भिसम एला गोर डा हेम्बो तसी जिन्बा मुला। दान्दे ए जुन म्हिदेन छ्याम चिबा मुला, थे म्हि एला हेम्बो आहिन। एसे पाड्बा ताम सत्य हिन्ना” भिसी सुड्जी।

19 जमाहेन्से थे म्रिडम्हेमेसे, “लास्सो, हाड अगमवक्ता हिन्बा चीम भिसी डाइ था याड्जी। 20 डन्ना आखे म्हमेगदेसे चु गडरी परमेश्वरदा तेन्जी, तर हाडनी यहूदीगदेसे चा परमेश्वरदा तेन्बा ग्ला यरूशलेम जे हिन्ना भिसी सुड्मुला” भिसी भिजी।

21 येशूसे थे म्रिडम्हेमेदा चुहड् भिसी सुड्जी, “एसे डादा विश्वास लउ, दाहेन्से खालैनोन परमेश्वरदा तेन्बारी चु गडरीदेन यरूशलेमरी निआतो:बा धुइ खबान मुला। 22 एनी सामरीगदेसे आसेनान परमेश्वरदा तेन्जी, तर डनी यहूदीगदेसे चा सेसी तेन्जी। तिग्दा भिसम थार्बा याड्बा चा यहूदीगदे

* 4:5 उत्प ३३:१९; यहो २४:३२ † 4:9 “यहूदीगदेसे सामरीगदेदेन छ्याम संगतनोन आलमुबा” भिबा चु ताम कोइ कोइ ग्रीक बाइबलरी आरे।

नहडग्यामनोन तला। 23 तर चुहड्बा धुइएनोन खबान मुला, थे धुइ चा चुनोन हिनना, सेसी सेमहेन्सेन परमेश्वरदा तेन्बा म्हिगदेसे चा सत्यदेन आत्माग्याम परमेश्वर आबादा तेन्मुला। परमेश्वर आबासे चुहड् लसी तेन्बा म्हिगदे म्हाइमुला। 24 तिग्दा भिसम परमेश्वर आत्मा हिनना। थेतबासेलमा थेदा तेन्बागदेसे सत्यदेन आत्माग्याम तेन्तोःला।”

25 जमाहेन्से थे म्रिडम्हेमेसे येशूदा “थार्बा पिन्बा ग्ले फेप्खला भिबा ताम डादाएनोन था मुला, थेदा ‘थार्बा पिन्बा ख्रीष्ट’ भिसी भिला। थे फेप्खमाहेन्से थेसेन डन्दा जम्मान ताम घोना लला” भिसी भिजी।

26 येशूसे थेदा “एदेन छ्याम ताम पाड्बा म्हि, डा थेनोन हिनना” भिसी सुड्जी।

27 थे धुइरी येशूला चेलागदेएनोन थेरी धोखजी। येशू म्रिडम्हेमे गिकदेन छ्याम ताम लसी चिबा म्राड्सी थेनीगदे उदेक तजी। तर “हाडसे तिग म्हाइबा?” अथवा “हाड थे म्रिडम्हेमेदेन छ्याम तिग्दा ताम लबा” भिसी खालैसेन आड्योइनी।

28 जमाहेन्से थे म्रिडम्हेमे दर्बुड थेरीन ख्लासी नाम्सापट्टि निसी म्हिगदेदा, 29 “म्हि गिकदा च्याबारी खउ, डाइ लबा जम्मान गे थेसे डादा पाड्जी। थेनोन थार्बा पिन्बा ख्रीष्ट मी आहिन?” भिसी भिजी।

30 चु ताम थेःसी शहरला जम्मान म्हिगदे येशूदा च्याबारी थेरी खजी।

31 थेनोन धुइरी चेलागदेसे येशूदा “रब्बी, सोल छ्योइगो” भिसी बिन्ती लजी।

32 तर येशूसे थेनीगदेदा “डादेन छ्याम चबा सहे मुला, थे ताम एनीगदेदा थानोन आरे” भिसी सुड्जी।

33 थेतबासेलमा चेलागदेसे “खालैसे येशूदा सोल भसी पिन्जी कि तिग?” भिसी हाड हाड न्हडरी ताम लजी।

34 येशूसे थेनीगदेदा चुहड् भिसी सुड्जी, “डादा पुइखबासे कुल्बा ताम ड्यान्सी थेला गे पूरा लबान डाला चबा सहे हिनना। 35 एनीगदेसे ‘बाली मिन्बारी अझ ला बलि बाँकी मुला भिसी भिमुला।’ तर एनीगदेसे डाला ताम ड्यान्गो, बु वारीरी च्यागो, बाली मिन्सी दुइबा धुइ तसी जिन्बा मुला। 36 जुन म्हिसे बाली दुइबान मुला, थेसे ज्यला याड्बान मुला। ओच्छे जुकजुकधोनाला जुनी याड्बा बाली हुप लबान मुला। ओच्छे ब्लु ढ्वबादेन बाली दुइबा न्हीनोन ताड्म्याड्ला। 37 तिग्दा भिसम चु ताम सत्य हिनना। ‘गिकसे ब्लु ढ्वला, ओच्छे स्य्हान्दोसे बाली दुइला।’ 38 डाइ एनीगदेदा एनीगदेसे ब्लुनोन आढ्वबा ग्लारी बाली दुइबारी पुइजी। स्य्हान्दोसे दुख लसी ब्लु ढ्वबा ग्लारी एनीगदेसे बाली दुइम्याड्बा मुला।”

39 “डाइ लबा जम्मान गे थेसे डादा सुड्जी” भिसी थे सामरी म्रिडम्हेमेसे पाड्बासे लमा थे नाम्साला ल्हानान सामरीगदेसे येशूदा विश्वास लजी। 40 थेनीगदे येशू मुबा ग्लारी खसी येशूदा “हाड डन्देन छ्याम धन्छ्यागो” भिसी बिन्ती लजी। जमाहेन्से येशू थेनीगदेदेन छ्याम न्हीरेधोना धन्छ्याजी। 41 येशूला ताम थेःसी झन ल्हानान सामरीगदेसे येशूदा विश्वास लजी। 42 थेनीगदेसे थे म्रिडम्हेमेदा “दान्दे एसे पाड्बा ताम थेःसी जे डन्से विश्वास लबा आहिन, तर डन्सेन येशूला ताम थेःसी विश्वास लबा हिनना। ओच्छे पक्कान जम्बुलिडला जम्मान म्हिदा थार्ना लबा थेनोन हिनना भिसी डन्से था याड्जी” भिसी भिजी।

येशूसे हाकिमला झादा खम्ना लबा

43 थे ग्लारी न्हीरेधोना धन्छ्यासी येशू गालील अञ्चलरी फेप्जी। 44 अगमवक्तादा हाडलान नाम्सारी मान आल भिसी येशूसेन सुड्बा मुबा।* 45 येशू गालील अञ्चलरी धोखमाहेन्से थे ग्लाला म्हिगदेसे येशूदा मान लजी। तिग्दा भिसम मिश्र य्हुल्साग्याम फेसी खबा धिनदा ढन्सी धड्बा चाडला धुइरी येशूसे यरूशलेम शहररी लबा जम्मान उदेकला गेगदे थेनीगदेसे म्राड्बा मुबा। थे धुइरी थेनीगदेएनोन यरूशलेम शहररी चाड धड्बारी निबा मुबा।*

46 दोःसी येशू गालील अञ्चलला काना भिबा शहररी फेप्जी। थेनोन शहररी येशूसे क्युइदा अडगुरला निडगु दोना लबा मुबा। कफर्नहुम शहररी चिबा हाकिम गिकला झा ल्हानान आखम्बा मुबा।* 47 येशू यहूदिया अञ्चलग्याम गालील अञ्चलरी फेप्खजी भिबा ताम थेःसी थे हाकिम येशू

* 4:44 मत्ती १३:५७; मर्कू ६:४; लूका ४:२४ * 4:45 यूह २:२३ * 4:46 यूह २:१-११

मुबा ग्लारी खजी। ओच्छे थेसे हाड फेपखसी डाला झादा खम्ना लसी पिन्गो भिसी बिन्ती लजी। तिग्दा भिसम थेला झा ल्हानान आखम्ना सिबारीन छ्याइबा मुबा।

48 थेतबासेलमा येशूसे थेदा “उदेकला गेदेन चिनु आम्राड्तेधोना एनीगदेसे खाइमै विश्वास आल” भिसी सुड्जी।

49 थे हाकिमसे येशूदा “लास्सो, डाला झा सिबा भन्दा डाच्छान हाड फेपखउ” भिसी पाड्जी।

50 येशूसे थेदा “निउ, दाहेन्से एला झा सोला” भिसी सुड्जी।

जमाहेन्से येशूसे सुड्बा तामरी विश्वास लसी थे दिमरी निजी। 51 ओच्छे थे ग्यामरी निबान लमा थेला नोकरगदे खसी, “हाडला झा खम्जी” भिसी भिजी। 52 जमाहेन्से थेसे नोकरगदेदा “थे गाते धुइहेन्से खम्जी?” भिसी ड्योइमा, थेनीगदेसे “तिल्मा धिनना एक बजेहेन्से थेला छवा म्हाजी” भिसी भिजी। 53 चु ताम थे:माहेन्से येशूसे थेदा “एला झा सोला” भिसी सुड्बा धुइरीन खम्जी भिबा ताम थेसे था याड्जी। थेतबासेलमा थेदेन थेला म्हेमेक्योड्सेन येशूदा विश्वास लजी।

54 चु गे चा यहूदिया अञ्चलग्याम गालील अञ्चलरी फेपखसी येशूसे लबा अर्गु उदेकला गे हिन्ना।

5

येशूसे कुज्या म्हिदा खम्ना लबा

1 जमाहेन्से यहूदीगदेला चाडला धुइरी येशू यरूशलेमरी फेपजी। 2 यरूशलेम शहर न्हडरी निबारी ग्यु भिबा प्राप मुबा। थे प्रापला डामरी गोर डा दलान मुबा घ्योइ गिक मुबा। थे घ्योइदा हिब्रू ग्योइरी बेथेसदा भिसी भिमुबा। 3 थे दलानरी आखम्बा ल्हानान म्हिगदे, मी आम्राड्बा म्हि, कुज्या म्हिदेन काड या चलब आतबा म्हि चिमुबा। थे घ्योइला क्युइ गाते धुइरी ल्हिड्ला भिसी थेनीगदे जम्मासेन च्यासी चिमुबा। 4 तिग्दा भिसम धुइ धुइरी परमप्रभुला दूत गिक मार खसी थे घ्योइला क्युइ ल्हिड्सी पिन्मुबा। घ्योइरी क्युइ ल्हिड्मैछ्याम जुन म्हि डाच्छा घ्योइरी वाड्जी थे म्हि जस्तोन आखम्बा मुसैनोन थे खम्मुबा।†

5 थेरी बोगल गिकसे च्युक भ्रे: दिडधोना आखम्बा म्हि गिकएनोन मुबा। 6 येशूसे थे थेरीन म्हेसी चिबा म्हाड्जी। ओच्छे थे ल्हानान दिडहेन्से आखम्बा चीम भिबा था याड्सी येशूसे थेदा “तिग एदा खम्बा सेम मुला?” भिसी ड्योइमा, 7 थे आखम्बा म्हिसे, “लास्सो, घ्योइला क्युइ ल्हिड्बा धुइरी डादा घ्योइरी झाड्सी पिन्बा डाला खाले आरे। थेतबासेलमा डा घ्योइरी वाड्बारी निना निनान डा भन्दा डाच्छा स्यहान्दो म्हि वाड्मुला” भिसी भिजी।

8 जमाहेन्से येशूसे थेदा “रे:गो, ओच्छे हाडला तीबा नान्बा पुइसी भ्रउ” भिसी सुड्जी।

9 येशूसे थेहड् सुड्मैछ्याम थे म्हि खम्जी। जमाहेन्से थे हाडला तीबा नान्बा पुइसी भ्रजी। जमाकुनु बल्पबा न्हबा धिन मुबा।† 10 थेतबासेलमा यहूदी धर्मगुरुगदेसे थे म्हिदा “तिनी बल्पबा न्हबा धिन हिन्ना, एसे तीबा नान्बा पुइबारी आत” भिसी भिजी।

11 जमाहेन्से थेसे “जुन म्हिसे डादा खम्ना लजी थेसेन डादा तीबा नान्बा पुइसी भ्रउ भिसी सुड्बा हिन्ना” भिसी भिजी। 12 थे म्हिगदेसे थेदा “एदा तीबा नान्बा पुइसी भ्रउ भिबा म्हि खाल हिन्ना?” भिसी ड्योइजी। 13 तर हाडदा खम्ना लबा म्हि खाल हिन्ना भिसी थेसे डोसेबा आरेमुबा। तिग्दा भिसम थेरी म्हिगदे ल्हानान पोप तबासे लमा महिला हुल न्हडग्याम येशू सुटुकक फेपसी जिन्बा मुबा।

14 लिच्छा येशूसे थेदा परमेश्वरला मन्दिररी स्याप्सी, “च्यागो, ए खम्सी जिन्बा मुला। थेतबासेलमा एसे दो:सी पाप थालउ, चुदे पाप लजी भिसम एदा चु भन्दा आज्यबा तला” भिसी सुड्जी।

15 थे निसी हाडदा खम्ना लबा म्हि येशू चीम भिसी यहूदी धर्मगुरुगदेदा पाड्जी।

परमेश्वरला झाग्याम याड्बा जुनी

† 5:4 “थे घ्योइला क्युइ...थे म्हि जस्तोन आखम्बा मुसैनोन थे खम्मुबा।” चु ताम ल्हानान हड्बा ग्रीक बाइबलरी आरे। † 5:9 यहूदीगदेला ठिम अन्छार बल्पबा न्हबा धिनकुनु तिगै गे लबारी आतमुबा।

16 येशूसे चु गे बल्पबा न्हबा धिनकुनु लबासे लमा यहूदी धर्मगुरुगदेसे येशूदा बिरोध लबारी छ्याइजी। 17 तर येशूसे “डाला आबासे सदन गे लमुला। ओच्छे डाइनोन सदन गे लला” भिसी सुड्जी। 18 थेतबासेलमा यहूदी धर्मगुरुगदेसे झन येशूदा साइबारी म्हाइजी, तिग्दा भिसम थेसे ठिम अन्छार बल्पबा न्हबा धिनकुनु लबारी आतबा गे जे लबा आहिन, तर थेसे हाडसे हाडदान परमेश्वर हड्बान सहोसी परमेश्वरदा हाडला आबा भिसी सुड्मुबा।

19 येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, आबासे जुन जुन लबा म्राड्ला झासेनोन थेनोन गे जे लला, तर झासे जे तिगै गे लबारी आखम। तिग्दा भिसम आबासे जुन गे लला झासेनोन थेनोन गे लला। 20 तिग्दा भिसम आबासे झादा माया लसी हाडसे लबा जम्मान गे उन्ना। ओच्छे थेसे अझ चु भन्दान घेन घेन गे हाडला झादा उन्ना। ओच्छे एनीगदे उदेक तगै भिसी थेसे अझ चु भन्दा घेन घेन गे लला। 21 आबासे सिबागदेदा सोना लसी जुकजुकधोनाला जुनी पिन्बा हड् लसी झासेनोन जुन म्हिदा सेम निला थेदा जुकजुकधोनाला जुनी पिन्ना। 22 आबासे खालैलान निसाफ आल। तिग्दा भिसम जम्मादान निसाफ लबा अधिकार आबासे झादा पिन्बा मुला। 23 आबादा मान लबा हड् लसी झादाएनोन मान लगै भिसीन आबासे चुहड् लबा हिन्ना। तिग्दा भिसम जुन म्हिसे झादा मान आल थेसे झादा पुइखबा आबादाएनोन मान आल।

24 “थेतबासेलमा एनीगदेसे डाला ताम ड्यान्गो, जुन म्हिसे डाला ताम ड्यान्सी डादा पुइखबादा विश्वास लला थेसे जुकजुकधोनाला जुनी याड्ला। ओच्छे थेदा दोषएनोन आल, बरु थे सिबाला तहग्याम थोन्ना। जमाहेन्से थेसे जुकजुकधोनाला जुनी याड्ला। 25 च्यागो, एनीगदेसे डाला ताम ड्यान्गो, थे धुइ खबान मुला, थे धुइ डाच्छान खसी जिन्बा मुला। थेतबासेलमा सिबागदे न्हडला जुन जुनसे परमेश्वरला झाला काइ थे:ला थेनीगदे सोला। 26 तिग्दा भिसम परमेश्वर आबा हाडदेन छ्यामनोन जुकजुकधोनाला जुनी मुला, थेहड् लसीन थेसे हाडला झादाएनोन जुकजुकधोनाला जुनी पिन्बा अधिकार मुबा म्हि सहोबा मुला। 27 ओच्छे निसाफ लबा अधिकार थेदान पिन्बा मुला। तिग्दा भिसम परमेश्वरसे पुइखबा म्हि थेनोन हिन्ना।

28 “डाला ताम थे:सी एनीगदे उदेक थातउ। तिग्दा भिसम चुहड्बा धुइ खबान मुला, थे धुइरी परमेश्वरसे पुइखबा म्हिला काइ थे:सी सिबागदे जम्मान दो:सी सोला। 29 ज्यबा गे लबागदे जुकजुकधोनाला जुनी याड्बारी दो:सी सोला ओच्छे आज्यबा गे लबागदे सजाय नाबाला लागिरी दो:सी सोला।* ”

30 “डाइ हाडसेन तिगै लबारी आखम, परमेश्वर आबासे सुड्बा अन्छार निसाफ लबासे लमा डाइ लबा निसाफ ठीक तमुला। तिग्दा भिसम डाइ म्हन्बा अन्छार आहिन, तर डादा पुइखबासे म्हन्बा अन्छार डाइ गे लमुला।

31 “चुदे डाइ डाला बारेरी जे पाड्जी भिसम एनीगदेसे डाइ पाड्बा ताम सत्य हिन्ना भिसी था आयाड्। 32 तर डाला बारेरी परमेश्वर आबासेन सुड्ला, थेसे डाला बारेरी जुन ताम सुड्ला थे जम्मान ताम सत्य हिन्ना भिसी डादा था मुला।

33 “एनीगदेसे ताम घोबाला लागिरी हाडला म्हिगदेदा बप्तिस्मा पिन्बा यूहन्ना मुबा ग्लारी पुइजी। ओच्छे थेसे थेनीगदेदा सत्य ताम पाड्जी।* 34 डाइ म्हिगदेसे डाला बारेरी तिग ताम पाड्मुला भिसी भर लबा आहिन, तर एनीगदेदा थार्ना लबाला लागिरीन डाइ चु ताम पाड्बा हिन्ना। 35 यूहन्ना मी लुड्सी य्हाल तना लबा नाडसल हड्बान मुबा, तर थेसे पिन्बा य्हालरी एनीगदे छिन्नड जे ताड्बारी म्हाइजी।

36 “तर डाला बारेरी ताम पाड्बा यूहन्ना भन्दाएनोन घेन ताम चुरी मुला। तिग्दा भिसम जुन गेगदे पूरा लबारी आबासे डादा पिन्बा मुला, थे गेगदे डाइ लबान मुला। चु गेसेन डादा परमेश्वरसे पुइखबा हिन्ना भिसी उन्बा मुला। 37 डादा पुइखबा आबासेनोन डाला बारेरी सुड्बा मुला। तर एनीगदेसे थेला काइ खाइमै थे:बा आरे, ओच्छे थेदा म्राड्बाएनोन आरे।* 38 थेसे सुड्बा बचन एनीगदेला सेमरी आचि। तिग्दा भिसम थेसे पुइखबा म्हिदा एनीगदेसे विश्वास आलनी। 39 एनीगदेसे जुकजुकधोनाला जुनी

* 5:29 दानि १२:२ * 5:33 यूह १:१९-२७; ३:२७-३० * 5:37 मत्ती ३:१७; मर्कू १:११; लूका ३:२२

याड्बाला भिसी बचनरी म्हाइमुला, थे बचनसेनोन डाला बारेरी पाड्मुला। 40 तसैनोन जुकजुकधोनाला जुनी याड्बाला लागिरी एनीगदे डा मुबा ग्लारी खबारी आमहाइमुला।

41 “म्हिंगदेसे डादा जयजयकार लगै भिसी डाइ म्हन्बा आरे। 42 तर एनीगदे परमेश्वरदा माया आलबा खाहड्बा खाल्ला म्हि हिन्ना भिबा ताम डादा था मुला। 43 डा हाडलान आबाला मिन किन्सी खमाएनोन एनीगदेसे डादा मान आलनी। तर स्य्हान्दो खालै म्हि हाडलान मिन किन्सी खजी भिसम एनीगदेसे थेदा मान लला। 44 एनीगदेसे डादा खाहड् लसी विश्वास लखम्ला? एनीगदे हाड हाड न्हडरी चा गिकसेम गिकदा मान लगै भिसी म्हन्बा, तर परमेश्वरग्याम जे याड्बा मान चा किन्बारी आमहाइबा।

45 “परमेश्वर आबाला ओन्छाडरी डाइ एनीगदेला दोष उन्ना भिसी थाम्हन्गो। तर थार्बा पिन्ना भिसी एनीगदेसे विश्वास आश लबा मोशाला ठिमरी मुबा तामसेन एनीगदेला दोष उन्ना। 46 च्यागो, एनीगदेसे मोशादा विश्वास लबा हिन्सम दान्दे डादाएनोन विश्वास लसेला मुबा। तिग्दा भिसम थेसे डालान बारेरी भिबा मुबा! 47 तर मोशासे भिबा तामनोन एनीगदेसे विश्वास लबारी आखमनी भिसम डाइ पाड्बा ताम झन खाहड् लसी विश्वास लखम्ला?”

6

येशूसे हजार डा म्हिंगदेदा चबा सहे पिन्बा

मत्ती १४:१३-२१; मर्कूस ६:३०-४४; लूका ९:१०-१७

1 जमाहेन्से येशू गालील समुन्द्रला क्यामसडपट्टि फेपजी। थे समुन्द्रदा तिबेरियास समुन्द्र भिसीनोन भिमुबा। 2 ओच्छे ल्हानान महिला हुलएनोन येशूला लिच्छा लिच्छा निजी। तिग्दा भिसम आखम्बा म्हिंगदेदा येशूसे ल्हानान रेम खमना लबा उदेकला चिनुगदे थेनीगदेसे म्हाड्बा मुबा। 3 ओच्छे येशू गडरी फेपसी हाडला चेलागदेदेन छ्याम थेरीन धनछ्याजी। 4 थे धुडरी यहूदीगदेला मिश्र यहूलसाग्याम फेसी खबा धिनदा ढन्सी धड्बा चाडएनोन खबारी छ्याइबा मुबा।

5 येशूसे क्युर्सीन सहीमा हाड मुबा ग्लारी ल्हानान म्हिंगदे खबान लबा म्हाड्सी फिलिपदा “चु म्हिंगदेदा पिन्बाला लागिरी यहाडसे खानडग्यामसे गेड ग्लुसी भसे?” भिसी सुड्जी। 6 येशूसे थेला सेम च्याबाला लागिरी थेहड् भिसी सुड्बा मुबा। तिग्दा भिसम हाडसे तिग लबारी छ्याइबा मुबा, थे ताम येशूदा था मुबा।

7 फिलिपसे येशूदा “यहाडसे ग्यार्जा न्ही म्हुइला डबलसे गेड ग्लुसी भसैनोन चुरी मुबा म्हिंगदेदा जजाकर सुत्तै आथोप” भिसी भिजी।†

8 येशूला चेला सिमोन पत्रुसला आले अन्द्रियाससे येशूदा, 9 “चुरी कोला गिकदेन छ्याम जौला गोर डा गेडदेन गोर न्ही तार्डा मुला। तिग चुदेसे चु जम्मान म्हिंगदेदा छ्योला?” भिसी भिजी।

10 येशूसे चेलागदेदा “म्हिंगदेदा चिपुड्गो” भिसी सुड्जी। थेरी घेन पाड्ग्याल मुबा, थेरी हजार डा ते चा हेम्फेबे जे मुबा। 11 जमाहेन्से येशूसे गेड छ्यारी थोसी परमेश्वरदा धन्यवाद पिन्माहेन्से जम्मान म्हिदा भो लसी पिन्जी, ओच्छे तार्डाएनोन भो लसी पिन्जी। थेरी मुबा जम्मान म्हिसे म्नेन्ना चजी।

12 थेनीगदे जम्मासेन म्नेन्ना चसी जिन्माहेन्से येशूसे हाडला चेलागदेदा “लेड्बा टगलटोगोल खेरो थानिगै, जम्मान पोप लउ” भिसी सुड्जी। 13 थेतबासेलमा थेनीगदेसे चसी लेड्बा गोर डा जौला गेडला टगलटोगोल दुइमा च्युक न्ही सोली तजी।

14 येशूसे लबा चुहड्बा उदेकला गे म्हाड्सी म्हिंगदेसे “जम्बुलिडरी फेपखला भिसी बचनसे यहाडदा पाड्बा अगमवक्ता† चा पक्कान चुनोन चीम” भिसी भिजी।* 15 थेतबासेलमा म्हिंगदे खसी हाडदा जबरजस्ती ग्ले सहोबारी म्हाइबा मुला भिबा ताम था याड्सी येशू दोःसी हाड गिकनोन गडरी फेपजी।

येशू समुन्द्रथोरी भ्रबा

मत्ती १४:२२-२३; मर्कूस ६:४५-५२

† 6:7 थे धुडरी धिन गिक गे लमा सिगा गिक म्हुइला डबल गिक याड्मुबा। † 6:14 “पाड्बा अगमवक्ता” भिबा चा यूहन्ना हिन्ना (१:२१ सहीगो)। * 6:14 वयव १८:१५

16 इयसे तमाहेन्से येशूला चेलागदे समुन्द्रपट्टि निजी। 17 ओच्छे थेनीगदे दोंगारी क्रेःसी समुन्द्रला क्याम्सड कफर्नहुम भिबा शहरपट्टि निजी। थे धुइरी धोप तसी जिन्बा मुबा, तसैनोन अझ येशू थेनीगदे मुबा ग्लारी फेप्खबा आरेमुबा। 18 घेन लाबा खबासे लमा समुन्द्ररी छाल रेःबारी छ्याइजी। 19 चेलागदे दोंगा चलब लसी ओस्पन कोस गिक-न्ही ते थारेड धोमा, थेनीगदेसे येशू समुन्द्र थोथोरी भ्रसी हाडगदे मुबापट्टि फेप्खबान लबा म्राइजी। चु म्राइसी थेनीगदे लोइजी। 20 तर येशूसे थेनीगदेदा “डानोन हिनना, थालोइगो” भिसी सुइजी। 21 चु ताम थेःसी थेनीगदे ल्हानान ताइजी, ओच्छे येशूदा दोंगारी धन्छ्यापुइजी। जमाहेन्से तुरुन्तन थेनीगदे धोतोःबा ग्लारी धोजी।

22 ओच्छे समुन्द्रला क्याम्सडपट्टि मुबा म्हिगदेसे न्हडगरदड थेरी दोंगा गिक जेन म्राइजी। डाच्छाकुनु येशू चेलागदेदेन छ्याम दोंगारी फेप्बा आरेमुबा, तर थेला चेलागदे जे निमुबा भिबा ताम थेनीगदेदा था मुबा। 23 जमाहेन्से तिबेरियास भिबा शहरग्याम अर्गु दोंगागदे येशूसे परमेश्वरदा धन्यवाद पिन्सी थेनीगदेदा गेड पिन्बा ग्लाला डामरी धोखजी। 24 थेरी येशूदेन छ्याम चेलागदे आरेबा था याइसी थेनीगदे दोंगागदेरी क्रेःसी येशूदा म्हाइबान कफर्नहुम शहररी निजी।

जुनी पिन्बा गेड

25 थेनीगदेसे येशूदा समुन्द्रला क्याम्सडपट्टि स्यापमाहेन्से “गुरु, हाड चुरी खाइमा फेप्खजी?” भिसी इयोइजी।

26 जमाहेन्से येशूसे थेनीगदेदा चुहइ भिसी सुइजी, “एनीगदेसे डाला ताम इयान्गो, डाइ लबा उदेकला गे म्राइसी आहिन, तर म्नेना गेड चम्याइबासे लमान एनीगदेसे डादा म्हाइबा हिनना। 27 च्यागो, नाश तसी निबा चबा सहेला लागिरी जे दुख लसी गे थालउ, तर जुकजुकधोना चिबा चबा सहेला लागिरी दुख लसी गे लउ। चु चबा सहे एनीगदेदा परमेश्वरसे पुइखबा म्हिसे पिन्ना। तिग्दा भिसम चु गे लबाला लागिरीन परमेश्वर आबासे थेदा धम्बा मुला।”

28 जमाहेन्से थेनीगदेसे येशूदा “थेहइ भिसम परमेश्वरसे म्हन्बा अन्छारला गे लबाला लागिरी डन्से तिग लतोःला?” भिसी इयोइमा, 29 येशूसे थेनीगदेदा “परमेश्वरसे पुइखबा म्हिदा विश्वास लउ, एनीगदेसे लगै भिसी परमेश्वरसे म्हन्बा गे चा थेनोन हिनना” भिसी सुइजी।

30 जमाहेन्से थेनीगदेसे येशूदा भिसी भिजी, “डन्से हाडदा विश्वास लबाला लागिरी हाडसे डन्दा खाहइबा उदेकला चिनु उन्खम्ला? हाडसे तिग लखम्ला? 31 य्हाडला आखे म्हेमेगदेसे मी तोडतोडबा ग्लारीएनोन मन्ना चजी। चु ताम बचनरीन ‘परमेश्वरसे थेनीगदेदा स्वर्गग्याम गेड पिन्जी’ भिसी भिबा मुला।”*

32 येशूसे थेनीगदेदा चुहइ भिसी सुइजी, “च्यागो, एनीगदेसे डाला ताम इयान्गो, एनीगदेदा स्वर्गग्याम गेड पिन्बा मोशा आहिन। तर स्वर्गग्याम सत्य गेड पिन्बा चा डाला आबा हिनना। 33 तिग्दा भिसम परमेश्वरसे पिन्बा गेड चा चुनोन हिनना, थे स्वर्गग्याम खसी जम्बुलिडला म्हिगदेदा जुनी पिन्मुला!”

34 थेनीगदेसे येशूदा “प्रभु, चु गेड डन्दा सदन पिन्गो” भिसी भिजी।

35 जमाहेन्से येशूसे थेनीगदेदा चुहइ भिसी सुइजी, “जुकजुकधोनाला जुनी पिन्बा गेड चा डानोन हिनना। डा मुबा ग्लारी खबागदे खाइमै आखेन, ओच्छे डादा विश्वास लबागदेदा खाइमै क्युइ आफुइ। 36 तर डाइ एनीगदेदा पाइसी जिन्बा मुबा, एनीगदेसे डादा म्राइसैनोन विश्वास आलनी। 37 आबासे डादा पिन्बा जति जम्मान डा मुबा ग्लारी खला, डा मुबा ग्लारी खबागदेदा डाइ तिगै लसीन आखला। 38 डा हाडसे म्हन्बा अन्छारला गे लबारी खबा आहिन, तर डादा पुइखबासे म्हन्बा अन्छारला गे लबारी डा स्वर्गग्याम खबा हिनना। 39 डादा पुइखबासे म्हन्बा ताम चा थेसे डादा पिन्बा म्हिगदे डाग्याम गिकनोन थाम्हागै, तर चु जम्बुलिडरी डा दोःसी खबा धुइरी डाइ थेनीगदेदा सोना लबारी खमगै भिसी हिनना। 40 तिग्दा भिसम डाला आबासे म्हन्बा ताम चा चुनोन हिनना, झादा

† 6:31 “मन्न” भिबा चा परमेश्वरसे स्वर्गग्याम पिन्बा गेड हिनना। * 6:31 प्रस्था १६:१५, ३१; भजन ७८:२४

म्राड्सी थेदा विश्वास लबागदे जम्मासेन जुकजुकधोनाला जुनी याड्गै, ओच्छे डा दोःसी खबा धुइरी डाइ थेनीगदेदा सिबाग्याम सोना लला।”

41 “स्वर्गग्याम खबा गेड डानोन हिन्ना” भिसी येशूसे सुड्बासे लमा यहूदी गन्बागदेसे येशूला बिरोध लसी ताम लबारी छ्याइजी। 42 थेनीगदेसे, “तिग चु योसेफला झा येशू आहिन?, चुला आबा आमादा य्हाडसे डोसेबा आरे?, खाहड् लसी चुसे ‘डा स्वर्गग्याम खबा हिन्ना’ भिसी पाड्बा” भिसी भिजी।

43 जमाहेन्से येशूसे थेनीगदेदा चुहड् भिसी सुड्जी, “एनीगदेसे हाड हाड न्हडरी डाला बिरोध लसी ताम थालउ। 44 तिगदा भिसम डादा पुइखबा आबासे डा मुबा ग्लारी खबा सेम आपिन्तेधोना खालैनोन डा मुबा ग्लारी खबारी आखम। डा मुबा ग्लारी खबागदे जम्मादान डा दोःसी खबा धुइरी डाइ सोना लला। 45 अगमवक्तागदेसेनोन परमेश्वरला बचनरी “परमेश्वरसेन जम्मान म्हिगदेदा लोप्ला” भिसी भिबा मुबा। परमेश्वर आबाला ताम थेःसी थेग्यामसेन लोप्ला म्हिगदे जम्मान डा मुबा ग्लारी खला।* 46 परमेश्वर आबाग्याम खबा म्हिसे जे परमेश्वरदा म्राड्बा मुला। तर स्यहान्दो खालैसेन थेदा म्राड्बा आरे। 47 थेतबासेलमा एनीगदेसे डाला ताम ड्यानगो, जुन म्हिसे विश्वास लला थेसे जुकजुकधोनाला जुनी याड्बा मुला। 48 च्यागो, जुकजुकधोनाला जुनी पिन्बा गेड डानोन हिन्ना। 49 एनीगदेला आखे म्हेमेगदेसे तोडतोडबा ग्लारी मन्न चजी, तसैनोन थेनीगदे सिजी। 50 तर स्वर्गग्याम खबा गेड चुनोन हिन्ना, जुन म्हिसे चु गेड चला थे खाइमै आसि। 51 स्वर्गग्याम खबा छोन्बो गेड चा डानोन हिन्ना, जुन म्हिसे चु गेड चला थे खाइमै आसि। चु गेड चा डाइ जम्बुलिडला म्हिगदेसे जुकजुकधोनाला जुनी याड्गै भिसी पिन्ना। थे गेड चा डालान ल्हुइ हिन्ना।”

52 चु ताम थेःसी यहूदीगदेदा बोमो रेःसी हाड हाड न्हडरी चुहड् भिसी ताम लबारी छ्याइजी, “चु म्हिसे खाहड् लसी हाडला ल्हुइ य्हाडडा चबारी पिन्खम्ला?”

53 जमाहेन्से येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यानगो, चुदे एनीगदेसे परमेश्वरसे पुइखबा म्हिला ल्हुइ आचनी भिसम, का आथुड्नी भिसम एनीगदेदेन छ्याम जुकजुकधोनाला जुनी आत। 54 तर डाला ल्हुइ चबा, डाला का थुड्बा म्हिदेन छ्याम जुकजुकधोनाला जुनी तला। ओच्छे डा दोःसी खबा धुइरी डाइ थेदा सिबाग्याम सोना लला। 55 तिगदा भिसम चनोन तोःबा सहे चा डाला ल्हुइ हिन्ना ओच्छे थुड्नोन तोःबा सहे चा डाला का हिन्ना। 56 डाला ल्हुइ चबा, डाला का थुड्बा म्हि डादेन छ्याम तला, ओच्छे डा थेदेन छ्याम तला। 57 छोन्बो परमेश्वरसे डादा पुइखबासे लमा डा थेग्यामसे सोला, थेहड् लसीन डादा चबा म्हिणोन डाग्यामसेन सोला। 58 स्वर्गग्याम खबा गेड चुनोन हिन्ना। चु गेड एनीगदेला आखे म्हेमेगदेसे चबा गेड हड्बा आहिन। थेनीगदेसे थे गेड चजी तसैनोन थेनीगदे सिजी। तर चु गेड चबा म्हिगदे चा खाइमै आसि।” 59 चु ताम चा येशूसे कफर्नहुम भिबा शहररी यहूदीगदे हुप तबा दिमरी म्हिगदेदा लोप्ला धुइरी सुड्बा मुबा।

ल्हानान चेलागदेसे येशूदा ख्लाबा

60 चु ताम थेःमाहेन्से येशूला चेलागदे न्हडला ल्हानानसे “चुहड्बा गाहो बचन खाल्से ड्यानखम्ला?” भिसी भिजी।

61 तर चेलागदेसे चु तामला बारेरी ताम लबान मुला भिबा था याड्सी येशूसे थेनीगदेदा चुहड् भिसी सुड्जी, “तिग डाइ पाड्बा तामसे लमा एनीगदेला विश्वास म्हाबा हिन्ना? 62 थेहड् भिसम एनीगदेसे परमेश्वरसे पुइखबा म्हिदा स्वर्गरी दोःसी निबा म्राड्मा एनीगदेला सेमरी खाहड्बा छोर्ला? 63 जुकजुकधोनाला जुनी पिन्बा चा परमेश्वरला आत्मासेन हिन्ना। चु गे चा म्हिला शक्तिसे लबारी खम्बा गे आहिन। डाइ एनीगदेदा पाड्बा ताम चा परमेश्वरला आत्मासे पिन्बा जुकजुकधोनाला जुनीला बारेरी हिन्ना। 64 तर एनीगदे न्हडरी गातेसे मी चु ताम विश्वास लबा आरे।” तिगदा भिसम खाल्से विश्वास आल, खाल्से हाडदा धोका पिन्ना भिबा ताम येशूदा डाच्छाहेन्सेन था मुबा। 65 जमाहेन्से दोःसी येशूसे थेनीगदेदा “थेतबासेलमान डाइ एनीगदेदा चु ताम पाड्बा हिन्ना, चुदे डाला

* 6:45 यशै ५४:१३

आबासे डा मुबा ग्लारी खआपुङ्नी भिसम खालै म्हि डा मुबा ग्लारी खबारी आखम” भिसी सुङ्जी।
66 चु तामसे लमा जमाकुनुहेन्से चेलागदे न्हडला ल्हानान चेलागदे येशूदेन छ्याम भ्रबारी ख्लाजी।

67 थेतबासेलमा येशूसे हाडला च्युक न्ही चेलागदेदा “तिग एनीगदेएनोन डादा ख्लासी निबा हिनना?” भिसी सुङ्जी। 68 जमाहेन्से सिमोन पत्रुससे येशूदा भिसी भिजी, “प्रभु, जुकजुकधोनाला जुनी पिन्बा बचन मी हाडदेन छ्याम मुला भिसम डनी खाल मुबा ग्लारी निसे?”* 69 हाड परमेश्वरसे पुइखबा परमेश्वरला म्हि हिनना भिबा ताम डन्से था याङ्सीन हाडदा विश्वास लबा हिनना।”

70 येशूसे थेनीगदेदा “एनीगदे च्युक न्हीदान डाइ धम्बा हिनना, तसैनोन एनीगदे न्हडला गिक चा शैतान हिनना” भिसी सुङ्जी। 71 चु ताम येशूसे सिमोन इस्करियोतला झा यहूदाला बारेरी सुङ्बा मुबा। तिगदा भिसम च्युक न्ही चेला न्हडला तसीनोन थेसे लिच्छा येशूदा धोका पिन्बारी छ्याइबा मुबा।

7

यहूदीगदेसे छाप्रोरी चिसी धड्बा चाड

1 जमाहेन्से येशू गालील अञ्चललान नाम्सा नाम्सारी फेपूजी, तर यहूदिया अञ्चलरी चा फेपूबा सेम आलनी। तिगदा भिसम यहूदीगदेसे येशूदा साइबारी म्हाइमुबा। 2 थे धुइरी यहूदीगदेसे छाप्रोरी चिसी धड्बा चाडा खबारी छ्याइबा मुबा।* 3 थेतबासेलमा येशूदा हाडला आलेगदेसेनोन खिसी लसी चुहड् भिसी भिजी, “चु ग्ला ख्लासी हाड यहूदिया अञ्चलरी फेपूनोन फेपूगो, थेरीनोन हाडसे लबा गेगदे हाडला चेलागदेसे म्राङ्गै। 4 हाडदा जम्मासेन डोसेगै भिसी म्हन्बा म्हिसे खाइमै लासी गे आलमुला। हाडसेनोन थेहड्बान गेगदे लबा मुसम हाड खाल हिनना भिबा ताम जम्बुलिडला म्हिगदेदा डोसेना लउ।” 5 तिगदा भिसम येशूला आलेगदेसेनोन येशूदा विश्वास आलमुबा!

6 थेतबासेलमा येशूसे थेनीगदेदा चुहड् भिसी सुङ्जी, “डाला लागिरी धुइ तबा आरे। तर एनीगदेला लागिरी मी खजिबै धुइ मुसै ठीक मुला। 7 एनीगदेदा जम्बुलिडला म्हिगदेसे हेला आलमुला, तर डादा चा हेला लमुला। तिगदा भिसम थेनीगदेला बानीबेहोर आज्यबा मुला भिसी डाइ पाङ्मुला। 8 एनीगदे चा चाड धड्बारी निउ, डा दान्दे आनि। तिगदा भिसम डाला धुइ तबा आरे।” 9 थेहड् सुङ्सी येशू गालीलरीन धन्छ्याजी।

10 तर येशूला आलेगदे चाड धड्बारी निमाहेन्से येशूएनोन खालैसे था आयाङ्ना लसी थेरी फेपूजी।

11 थेरी यहूदी नेतागदेसे येशूदा म्हाइबान, “थे म्हि खानड मुला?” भिसी म्हिगदेदा ड्योइजी।

12 ल्हानान म्हिगदेसे येशूला बारेरी चुहड् भिसी ताम लबान मुबा, कोइ कोइसे “थे ज्यबा म्हि हिनना” भिसी भिमुबा। तर कोइ कोइसे चा “आहिन, थेसे ल्हानान म्हिगदेदा न्होङ्ना लबा मुला” भिसी भिमुबा। 13 तसैनोन यहूदी नेतागदेदेन छ्याम लोङ्सी खालैसेन येशूला बारेरी स्यहान्दो म्हिसे था याङ्ना लसी ताम आलमुबा।

चाडला धुइरी येशूसे म्हिगदेदा लोपूबा

14 चाडला गुडरी परमेश्वरला मन्दिररी फेपूसी येशूसे म्हिगदेदा लोपूबारी छ्याइजी। 15 यहूदी नेतागदे उदेक म्हन्बान, “चुसे तिगै पढब आलना चुहड्बा ज्ञान बुद्धि खानडग्याम याङ्जी?” भिसी भिजी।

16 जमाहेन्से येशूसे थेनीगदेदा चुहड् भिसी जोहाब पिन्जी, “डाइ डाला ताम लोपूबा आहिन, तर डादा पुइखबा परमेश्वरला ताम लोपूबा हिनना। 17 चुदे खालै म्हिसे परमेश्वरसे म्हन्बा अन्छार लबारी म्हाइजी भिसम थेसे जे डाइ लोपूबा ताम परमेश्वरग्याम हिनना कि डालान सेमला ताम लोपूबा हिनना भिसी था याङ्ला। 18 जुन म्हिसे हाडलान ताम पाङ्ला थेसे हाडदान मान लगै भिसी म्हन्मुला। तर हाडदा पुइखबादा मान लगै भिसी म्हन्बा म्हिसे चा सत्य ताम पाङ्मुला, थेसे तिगै लुसीला ताम आलमुला। 19 मोशासे एनीगदेदा ठिम पिन्बा मुला, तसैनोन एनीगदेसे मोशासे पिन्बा ठिम अन्छार गे आलनी। एनीगदेसे डादा तिगदा साइबारी म्हाइबा?”

* 6:68 मत्ती १६:१६; मर्कू ८:२९; लूका ९:२० † 7:2 चु चाड यहूदीगदेसे हाडला आखे म्हेमेगदे बोगल न्ही दिडधोना तोडतोडबा ग्लारी चिबा धुइदा ढन्बाला लागिरी छाप्रोरी चिसी धड्मुबा। * 7:2 लेवी २३:३४; वयव १६:१३

20 थेरी मुबा म्हिला हुलसे येशूदा “एदा म्हडसे स्यापजीम, खाइ एदा खाल्से साइबारी म्हाइबा मुला?” भिसी भिजी।

21 जमाहेन्से येशूसे थेनीगदेदा चुहड् भिसी सुड्जी, “डाइ गे गिक लमा एनीगदे तिग्दा उदेक म्हन्बा? 22 च्यागो, खतना लउ भिसी एनीगदेदा मोशासे ठिम स्होसी पिन्बा मुला। हिन्बाम थे ठिम मोशासे स्होबा आहिन, एनीगदेला आखे म्हेमेसेन स्होबा हिन्ना। थेतबासेलमा एनीगदेसे ब्लपबा न्हबा धिनकुनुएनोन ह्वाडला झागदेला खतना लमुला।* 23 य्हाडसे मोशासे पिन्बा ठिम आख्लागे भिसी ब्लपबा न्हबा धिनरीएनोन खतना लमुला भिसम डाइ चा आखम्बा म्हि गिकदा खम्ना लमा एनीगदेसे तिग्दा डादा बोमो लबा?”* 24 एनीगदेसे म्हिला ली च्यासी निसाफ थालउ, तर ठीक लसी निसाफ लउ।”

तिग चुनोन ख्रीष्ट हिन्ना?

25 यरूशलेमग्याम खबा कोइ कोइ म्हिगदेसे चुहड् भिसी भिजी, “तिग यहूदी धर्मगुरुगदेसे साइबारी म्हाइबा म्हि चुनोन आहिन? 26 च्यागो, आलोङ्गान चुसे जम्मादान लोपबान मुला, तर चुदा थेनीगदेसे तिगै आपाङ्नी! डन्ना नेतागदेसेनोन चुनोन थार्बा पिन्बा ख्रीष्ट हिन्ना भिसी पक्कान था याङ्गी कि तिग? 27 चु म्हि खाहड् लसी थार्बा पिन्बा ख्रीष्ट हिन्ना, तिग्दा भिसम चु म्हि खानडग्याम खबा हिन्ना भिबा ताम य्हाडदा था मुला। तर ख्रीष्ट फेपखबा धुइरी खानडग्याम फेपखला भिबा ताम खालैदान था आत।

28 थे धुइरी परमेश्वरला मन्दिररी लोपबान लमा येशूसे घेन काइरी चुहड् भिसी सुड्जी, “डा खानडग्याम खबा हिन्ना भिबादेन डा खाल हिन्ना भिबा ताम एनीगदेदा पक्कान था मुला। च्यागो, डा ह्वाडनोन खबा आहिन, तर डादा खालैसे पुइखबा हिन्ना थे चा सत्य हिन्ना, एनीगदेसे थेदा डोसेबा आरे। 29 तर डाइ थेदा डोसेबा मुला। तिग्दा भिसम थेसे पुइखबासे लमा डा थेग्याम खबा हिन्ना।”

30 चु ताम थे:सी थेनीगदेसे येशूदा चुड्बारी म्हाइजी। तर खालैसेन या आझाङ्नी, तिग्दा भिसम येशूला धुइ तबा आरेमुबा। 31 थेरी मुबा ल्हानान म्हिगदेसे येशूदा विश्वास लजी। ओच्छे थेनीगदेसे, “थार्बा पिन्बा ख्रीष्ट फेपखसी, तिग चु म्हिसे भन्दा अझ उदेकला गेगदे लला?” भिसी भिजी।

येशूदा चुड्बारी म्हाइबा

32 म्हिगदेसे येशूला बारेरी खासखास खुसखुस ताम लबान लबा फरिसीगदेसे थे:जी। जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे येशूदा चुड्बाला लागिरी परमेश्वरला मन्दिर खुड्बा सिपाहीगदेदा पुइजी।

33 येशूसे म्हिगदेदा चुहड् भिसी सुड्जी, “तिगै धिनधोना डा एनीगदेदेन छ्यामनोन तला, जमाहेन्से डादा जुन्से पुइखबा मुला, डा थे मुबा ग्लारीन निला। 34 ओच्छे एनीगदेसे डादा म्हाइला, तर आस्याप। तिग्दा भिसम डा निबा ग्लारी एनीगदे खबारी आखम।”

35 चु ताम थे:सी यहूदी नेतागदेसे ह्वाड ह्वाड न्हडरी चुहड् भिसी भिजी, “चु म्हि खानड निबारी छ्याइजी? एनीगदेसे डादा आस्याप भिसी भिमुला। अर्गु यहूलसारी ससा बडबड तसी चिबा यहूदीगदे मुबा ग्लारी निसी थे यहूलसाला ग्रीक ग्योइ पाड्बा म्हिगदेदा लोपबारी म्हाइजी कि तिग? 36 एनीगदेसे डादा म्हाइला, तर आस्याप। तिग्दा भिसम डा निबा ग्लारी एनीगदे खबारीन आखम’ भिसी चु म्हिसे तिग ताम पाड्बा?”

जुकजुकधोनाला जुनी पिन्बा क्युइ

37 चाड जिन्बा धिनकुनु अथवा मुल धिनकुनु येशूसे म्हिगदेला डाच्छा रापसी घेन काइरी चुहड् भिसी सुड्जी, “चुदे खालैदा क्युइ फुइबा मुसम डा मुबा ग्लारी खसी थुङ्गो।* 38 परमेश्वरला बचनसे पाड्बा ह्ङ्गोन डादा विश्वास लबा म्हिला सेम न्हडग्याम जुकजुकधोनाला जुनी पिन्बा क्युइ थोन्ना।”* 39 चु ताम चा येशूसे ह्वाडदा विश्वास लबा म्हिगदेसे याङ्तो:बा परमेश्वरला आत्माला

* 7:22 उत्प १७:१०; लेवी १२:३

* 7:23 यहू ५:९

* 7:37 लेवी २३:३६

* 7:38 यशै ५८:११; जक १४:८

बारेरी सुड्बा मुबा। परमेश्वरसे थे धुइधोना ह्याडला आत्मा पुइखबा आरेमुबा। तिग्दा भिसम थे धुइधोना येशूदा क्रूसरी टांगब लबादेन स्वर्गरी घेन य्हालदेन शक्तिरी फेपूबा धुइ तबा आरेमुबा।

थे खाल?

40 येशूला ताम थे:सी थेरी मुबा कोइ कोइ म्हिगदेसे “चु म्हि पक्कान थेनोन अगमवक्ता[†] हिनना” भिसी भिजी।*

41 ओच्छे कोइ कोइसे “चु थार्बा पिन्बा ख्रीष्ट हिनना” भिसी भिजी। तर कोइ कोइसे चुहड् भिसी भिजी, “तिग गालील अञ्चलग्यामसेनोन थार्बा पिन्बा ग्ले फेपूखला? 42 परमेश्वरला बचनरी थार्बा पिन्बा ख्रीष्ट दाऊदला सन्तानग्याम दाऊदलान नाम्सा बेथलेहेमग्यामसेन खला भिसी पाड्बा आरे?”* 43 चुहड् लसी येशूसे लमा म्हिगदे ह्याड ह्याड न्हडरीन आढिकनी। 44 थेनीगदे न्हडला गाते म्हिगदेसे येशूदा चुड्बारी म्हाइजी। तर थेनीगदे खालैसेन या आझाड्नी।

यहूदी धर्मगुरुगदेसे विश्वास आलबा

45 परमेश्वरला मन्दिर खुड्बा सिपाहीगदे दो:सी खमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे थेनीगदेदा “खाइ, एनीगदेसे थेदा तिग्दा आभबा?” भिसी भिजी।

46 जमाहेन्से थे सिपाहीगदेसे थेनीगदेदा “थे महिला ताम थे:सी डनी उदेक तजी। थेहड्बा ताम मी डन्से खाइमै थे:बा आरे” भिसी भिजी।

47 जमाहेन्से फरिसीगदेसे थेनीगदेदा चुहड् भिसी भिजी, “एनीगदेदाएनोन थेसे झुक्याब लजी कि तिग? 48 तिग यहूदी नेतागदेदेन फरिसीगदे खालैसे थेदा विश्वास लबा मुला? 49 तर परमेश्वरसे मोशादा पिन्बा ठिम आसेबा चु म्हिगदेसे परमेश्वरग्याम सजाय याड्ला।” 50 डाच्छा म्हुनड तिरम येशूदा हुप तबारी निबा थेनीगदे न्हडलान निकोदेमस भिबा म्हिसे चुहड् भिसी भिजी,* 51 “तिग य्हाडला ठिम अनछार थे म्हिसे लबा तामदेन गे आघोनान य्हाडसे थेदा दोष उन्बारी तला?”

52 तर स्य्हान्दोगदेसे थेदा “एएनोन गालील अञ्चलला हिनना? परमेश्वरला बचन ज्यना लसी पढब लउ। जमाहेन्से एसे गालीलग्याम खाइमै खालै अगमवक्ता आख भिबा ताम था याड्ला” भिसी भिजी। 53 जमाहेन्से थेनीगदे जम्मान ह्याड ह्याडला दिमरी निजी।

8

स्य्हान्दोदेन छ्याम ब्रेल्सी भ्रबा म्रिडम्हेमे

1 तर येशू चा जैतून भिबा गडरी फेपूजी। 2 येशू न्हडगरदड स्य्होरीन परमेश्वरला मन्दिररी फेपूखजी। जमाहेन्से जम्मान म्हिगदे येशू मुबा ग्लारी खजी। ओच्छे येशू धन्छ्यासी जम्मान म्हिगदेदा लोपूबारी छयाइजी।

3 यहूदी धर्मगुरुगदेदेन फरिसीगदेसे स्य्हान्दोदेन छ्याम ब्रेल्सी चिबान लबा धुइरी स्यापूबा म्रिडम्हेमेदा चुड्सी येशू मुबा ग्लारी भजी। ओच्छे जम्मालान डाच्छा थे म्रिडम्हेमेदा रापूसी चिपुड्जी।

4 थेनीगदेसे येशूदा चुहड् भिसी भिजी, “गुरु, चु स्य्हान्दोदेन छ्याम ब्रेल्बान लबा म्रिडम्हेमेदा चुड्सी डन्से ह्याड मुबा ग्लारी भसी खबा मुला। 5 य्हाडला मोशासे ठिमरी चुहड्बा म्रिडम्हेमेदा युडबासे तोसी साइगो भिसी कुल्बा मुला। ह्याडसे चा चुला बारेरी तिग सुड्बा?”* 6 तर येशूदा दोष लम्याड्ला कि भिसी थेनीगदेसे चुहड् भिसी ड्योइबा मुबा।

येशूसे कू तसी या जुम्बीसे सरी भिबारी छयाइजी। 7 थेनीगदेसे येशूदा ड्योइबाला ड्योइबान लमाहेन्से येशू रापूसी थेनीगदेदा “जुन म्हिसे खाइमै पाप लबा आरे थेसे डाच्छा चु म्रिडम्हेमेदा युडबासे तोउ” भिसी सुड्जी। 8 जमाहेन्से येशूसे दो:सी कू तसी सरी भिजी।

9 चु ताम थे:सी थेरी मुबा जम्मान म्हिगदे घेनहेन्से जजाधोना गिक गिक लसी थेग्याम निजी। ओच्छे थेरी येशूदेन छ्याम थे म्रिडम्हेमे जे तजी। थे म्रिडम्हेमे चा अझ येशूला डाच्छापट्टि रापूसी

† 7:40 “थेनोन अगमवक्ता” भिबा चा यूहन्ना हिनना (यूहन्ना १:२१ सहीगो)। * 7:40 व्यव १८:१५ * 7:42 २ शमू ७:१२; यर्मि २३:५-६; मीका ५:२; भजन ८९:३-४ * 7:50 यहू ३:१-२ * 8:5 लेवी २०:१०; व्यव २२:२२-२४

चिबा मुबा। 10 जमाहेन्से येशू राप्सी थे म्रिडम्हेमेदा चुहङ् भिसी सुङ्जी, “खाइ, एदा दोष लबा म्हिगदे खानड निजी? तिग थेनीगदे खालैसेन एदा सजाय आपिन्नी?”

11 जमाहेन्से थे म्रिडम्हेमेसे येशूदा “प्रभु, खालैसेन तिगै आलनी” भिसी भिमा, येशूसे थेदा “डाइएनोन एदा सजाय आपिन, दाहेन्से निउ, तर दोःसी पाप थालउ” भिसी सुङ्जी।†

जम्बुलिडला य्हाल

12 दोःसीनोन येशूसे म्हिगदेदा लोपबान, “जम्बुलिडला य्हाल डानोन हिन्ना। डादेन छ्याम भ्रबा म्हि खाइमै धोपधोपरी भ्रआतोः। तिग्दा भिसम थेसे जुनी पिन्बा य्हाल याङ्ला” भिसी सुङ्जी।*

13 जमाहेन्से फरिसीगदेसे येशूदा “एसे हाडलान बारेरी पाङ्बान मुला, एसे पाङ्बा ताम सत्य आहिन” भिसी भिजी।*

14 येशूसे थेनीगदेदा चुहङ् भिसी सुङ्जी, “डाइ डालान बारेरी पाङ्सैनोन डाइ पाङ्बा ताम सत्य हिन्ना। तिग्दा भिसम डा खानडग्याम खबा हिन्ना, ओच्छे खानड निबान मुला भिबा ताम डादा था मुला। तर एनीगदेदा चु ताम था आरे। 15 एनीगदेसे मी महिला ज्ञान बुद्धिग्याम निसाफ लमुला। तर डाइ मी खालैला निसाफ आल। 16 चुदे डा हाडसेन निसाफ लतोःजी भिसम डाइ लबा निसाफ चा सत्य तला। तिग्दा भिसम डा गिक जे आरे, तर डादा पुइखबा आबाएनोन डादेन छ्याम मुला। 17 मोशासे पिन्बा एनीगदेला ठिमरी म्हि न्हीसे पाङ्बा ताम चा सत्य तमुला भिसी भिबा मुला।* 18 हाडलान बारेरी सत्य ताम पाङ्बा म्हि गिक चा डानोन हिन्ना, ओच्छे स्य्हान्दो चा डादा पुइखबा आबा हिन्ना।”

19 चु ताम थेःसी थेनीगदेसे येशूदा “एला आबा खानड मुला?” भिसी ड्योइमा, येशूसे थेनीगदेदा “एनीगदेसे डादाएनोन डोसेबा आरे, डाला आबादाएनोन डोसेबा आरे। चुदे एनीगदेसे डादा डोसेबा हिन्सम डाला आबादाएनोन डोसेसेला मुबा” भिसी सुङ्जी।

20 चु जम्मान ताम येशूसे परमेश्वरला मन्दिररी भेटी युबा ताड मुबा ग्लाग्याम लोपबान लबा धुइरी सुङ्बा मुबा। तर थेनीगदे खालैसेन येशूदा आचुङ्नी। तिग्दा भिसम अझ येशूला धुइ तबा आरेमुबा।

म्हिगदेसे येशूदा डोआसेबा

21 दोःसी येशूसे थेनीगदेदा “डा चुग्याम निनोन निला, ओच्छे एनीगदेसे डादा म्हाइला। तर एनीगदे हाडलान पापरी सिला। डा निबा ग्लारीनोन एनीगदे खबारी आखम” भिसी सुङ्जी।

22 चु ताम थेःसी यहूदी नेतागदेसे “चु म्हि सिबारी म्हाइबा कि तिग? चुसे मी ‘डा निबा ग्लारी एनीगदे खबारी आखम भिसी भिमुला’ भिसी हाड हाड न्हडरी ताम लजी।”

23 जमाहेन्से येशूसे थेनीगदेदा “एनीगदे मारग्याम खबा हिन्ना, डा तोरग्याम खबा हिन्ना। एनीगदे चुनोन जम्बुलिडला हिन्ना, तर डा चा चु जम्बुलिडला आहिन। 24 थेतबासेलमा ‘एनीगदे हाडलान पापरी सिला’ भिसी डाइ एनीगदेदा पाङ्सी जिन्बा मुला। चुदे एनीगदेसे ‘डा थेनोन हिन्ना’† भिसी डादा विश्वास आलनी भिसम एनीगदे हाडलान पापरी सिला।”

25 जमाहेन्से थेनीगदेसे येशूदा “ए खाल हिन्ना?” भिसी ड्योइमा, येशूसे थेनीगदेदा चुहङ् भिसी सुङ्जी, “डा थेनोन हिन्ना, चु ताम डाइ एनीगदेदा डाच्छान पाङ्बा मुला। 26 एनीगदेला बारेरी डाइ पाङ्तोःबा तामदेन एनीगदेला निसाफ लतोःबा ताम ल्हानान मुला। तर डादा पुइखबा चा सत्य मुला, ओच्छे थेग्याम डाइ जुन ताम थेःजी थेनोन ताम डाइ जम्बुलिडला म्हिगदेदा पाङ्बा मुला।”

27 येशूसे परमेश्वर आबाला बारेरी सुङ्बान मुबा भिबा ताम थेनीगदेसे आघोनी। 28 थेतबासेलमा येशूसे थेनीगदेदा चुहङ् भिसी सुङ्जी, “एनीगदेसे परमेश्वरसे पुइखबा म्हिदा तोर थीमाहेन्से† जे डा थेनोन चीम भिबादेन डाइ डालान सेमग्याम ताम पाङ्बा आहिन्बा चीम, तर परमेश्वर आबासे लोपबा अनछार जे पाङ्बा चीम भिबा ताम एनीगदेसे था याङ्ला। 29 ओच्छे डादा पुइखबा डादेन छ्यामनोन

† 8:11 जम्मान भन्दा पुरानो ग्रीक बाइबलगदेरी ७:५३ पदहेन्से ८:११ पदधोनाला ताम भिबा आरे। * 8:12 मती ५:१४; यूह ९:५

* 8:13 यूह ५:३१ * 8:17 वयव १९:१५; गन्ती ३५:३० † 8:24 “डा थेनोन हिन्ना” भिबा चा परमेश्वरला बचनरी परमेश्वरला मिन हिन्ना। † 8:28 “तोर थीमाहेन्से” भिबा चा येशूदा कुसरी टांगब लबा हिन्ना।

मुला, थेसे डादा खाइमै आख्लामुला। तिग्दा भिसम डाइ सदन थेदा सेम निबा गे जे लमुला।”³⁰ चुताम थे:सी ल्हानान म्हिगदेसे येशूदा विश्वास लजी।

सत्यसे पापग्याम फेला

³¹ येशूसे हाडदा विश्वास लबा यहूदीगदेदा चुहड् भिसी सुड्जी, “एनीगदे डाइ लोपबा अनछार भ्रजी भिसम एनीगदे डाला पक्का चेला दोला। ³² ओच्छे सत्य तिग हिन्ना भिसी एनीगदेसे था याड्ला, थेनोन सत्यसे एनीगदे खालैला तहरी चिआतो:।”

³³ थेनीगदेसे येशूदा “डनी अब्राहामला सन्तान हिन्ना, दान्देधोना डनी खालैला नोकर दोबा आरे। हाडसे डन्दा स्य्हान्दोला तहग्याम फेला भिसी सुड्बाला अर्थ चा तिग हिन्ना?” भिसी भिजी।*

³⁴ जमाहेन्से येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यानगो, पाप लबागदे जम्मान पापला तहरी तला। ³⁵ नोकर सदन मालिकला दिमरी आचि, तर झा चा सदन चिला। ³⁶ थेतबासेलमा परमेश्वरला झासे एनीगदेदा फेजी भिसम एनीगदे पक्कान फेला। ³⁷ एनीगदे अब्राहामला सन्तान हिन्ना भिसी डादा था मुला। तसैनोन एनीगदेसे डाइ पाड्बा ताम नाबारी आखम्बासे लमा डादा साइबारी म्हाइबा मुला। ³⁸ डा डाला आबादेन छ्याम मुबा धुइरी डाइ जुन ताम म्राड्मुबा, थेनोन ताम डाइ एनीगदेदा पाड्बा हिन्ना। तर एनीगदेसे चा एनीगदेला आबाग्याम तिग थे:बा मुला थेनोन लमुला।”

³⁹ थेनीगदेसे येशूदा “डन्ना आबा चा अब्राहामनोन हिन्ना” भिसी भिमा, येशूसे थेनीगदेदा चुहड् भिसी सुड्जी, “एनीगदे पक्कान अब्राहामला सन्तान हिन्सम अब्राहामसे लबा हड्बा गे एनीगदेसेनोन लसेला मुबा। ⁴⁰ तर डाइ परमेश्वरग्याम थे:बा सत्य ताम एनीगदेदा पाड्मा एनीगदेसे चा डादा साइबारी म्हाइजी। तर अब्राहामसे मी चुहड्बा गे आलनी। ⁴¹ एनीगदेला आबासे जुन गे लबा मुबा, थेनोन गे एनीगदेसेनोन लबा मुला।”

जमाहेन्से थेनीगदेसे येशूदा “डनी स्य्हान्दोदेन छ्याम ब्रेल्सी भ्रमा न्हबा कोलागदे आहिन, तर परमेश्वरनोन डन्ना आबा हिन्ना” भिसी भिजी।

⁴² येशूसे थेनीगदेदा चुहड् भिसी सुड्जी, “च्यागो, एनीगदेला आबा परमेश्वरनोन हिन्सम एनीगदेसे डादा माया लसेला मुबा। तिग्दा भिसम परमेश्वरसे पुइखबासे लमा डा दान्दे चुरी मुला। डा हाडला सुरसे खबा आहिन, तर परमेश्वरसेन डादा पुइखबा हिन्ना। ⁴³ एनीगदेसे तिग्दा डाइ पाड्बा ताम आघोबा? तिग्दा भिसम एनीगदेसे डाला ताम नाआखम्नी। ⁴⁴ एनीगदेला आबा शैतान हिन्ना, एनीगदेसे हाडला आबासे म्हन्बा अनछारनोन गे लमुला। थेसे मी डाच्छाहेन्से म्हि साइबा मुबा, थे सत्यरी खाइमै भ्रबारी आखम। तिग्दा भिसम थेदेन छ्याम सत्य भिबा मुनोन आरे। थेसे सदन हाडला बानीबेहोर अनछार लुसीला ताम पाड्मुला। थेतबासेलमा थे लुसीला ताम पाड्बा म्हि हिन्ना, थे जम्मान लुसीला तामला आबा हिन्ना। ⁴⁵ तर एनीगदेसे डाला ताम विश्वास आलमुला। तिग्दा भिसम डाइ सत्य ताम पाड्मुला। ⁴⁶ एनीगदे न्हडला खाल्से डादा पापी भिसी दोष लबारी खम्ला? डाइ सत्य ताम पाड्मा एनीगदेसे तिग्दा डादा विश्वास आलबा? ⁴⁷ परमेश्वरला म्हिगदेसे परमेश्वरला ताम ड्यानमुला। तर एनीगदे चा परमेश्वरला म्हि आहिन। थेतबासेलमा एनीगदेसे परमेश्वरला ताम आड्यानमुला।”

अब्राहाम भन्दा येशू डाच्छा

⁴⁸ यहूदी नेतागदेसे येशूदा “डन्से पाड्बा ताम ठीक हिन्ना। ए सामरी यहूलला हिन्ना, एदा म्हडसे स्यापबा मुला” भिसी भिजी।

⁴⁹ येशूसे थेनीगदेदा चुहड् भिसी सुड्जी, “डादा म्हडसे स्यापबा आरे। डाइ डाला आबादा मान लबा मुला, तर एनीगदेसे डादा पे:ना लमुला। ⁵⁰ डाइ डादा मान लगे भिसी म्हन्बा आहिन, तर डादा मान लबादेन डाला लागिरी निसाफ लसी पिन्बा म्हि स्य्हान्दोन मुला। ⁵¹ थेतबासेलमा च्यागो, एनीगदेसे डाला ताम ड्यानगो, चुदे खालै म्हिसे डाला ताम ड्यानजी भिसम थे खाइमै आसि।”

* 8:33 मत्ती ३:९; लुका ३:८

52 यहूदीगदेसे येशूदा चुहड् भिसी भिजी, “एदा म्हडसे स्यापबान हिन्ना भिसी दाहेनसे डन्दा पक्का था तजी। तिगदा भिसम अब्राहामदेन अगमवक्तागदे सिजी, तर एसे चा ‘खालै म्हिसे डाइ पाड्बा ताम ड्यान्जी भिसम थे खाइमै आसि’ भिसी भिमुला। 53 तिग ए डन्ना म्हमे अब्राहाम भन्दा घेन हिन्ना? थे सिजी, ओच्छे अगमवक्तागदेएनोन सिजी। एसे चा हाडदा खाल भिसी म्हन्बा?”

54 येशूसे थेनीगदेदा चुहड् भिसी सुड्जी, “डाइ हाडदा मान लगै भिसी म्हन्जी भिसम थे गे आखेल्बा ताम हिन्ना। तर डादा मान पिन्बा चा डालान आबा हिन्ना, डाला आबादान एनीगदेसे यहाडला परमेश्वर भिसी पाड्मुला। 55 तर एनीगदेसे थेदा डोसेबा आरे। डाइ चा थेदा ज्यना लसी डोसेबा मुला। चुदे डाइएनोन थेदा डोसेबा आरे भिसी भिजी भिसम डाएनोन एनीगदे हड्बान लुसीला ताम पाड्बा म्हि दोला। तर डाइ थेदा डोसेबा मुला, ओच्छे थेसे सुड्बा अन्छारनोन डाइ गे लबा मुला। 56 एनीगदेला म्हमे अब्राहामसेनोन डा खबा धिन च्याबारी ल्हानान सेम लबा मुबा। ओच्छे थेसे डा खबा धिन म्राड्सी जिन्बासे लमा ताड्जी।”

57 थेतबासेलमा यहूदीगदेसे येशूदा “एसे बोगल न्हीसे च्युइ दिड मी तबा आरे भिसम खाहड् लसी एसे अब्राहामदा म्राड्जी?” भिसी भिजी।

58 जमाहेनसे येशूसे थेनीगदेदा “च्यागो, एनीगदेसे डाला ताम ड्यान्गो, अब्राहाम न्हबा भन्दा डाच्छाहेनसेन ‘डा थेनोन हिन्ना’ भिबा मुनोन मुबा” भिसी सुड्मेछ्याम, 59 थेनीगदेसे येशूदा तोबारी भिसी युडबा दुड्जी। तर येशू लासी परमेश्वरला मन्दिरला ग्यापग्याम सुटुकक थोन्सी फेप्जी।

9

मी आम्राड्बा म्हिसे म्राड्बा

1 थेग्याम फेपबान लमा येशूसे न्हमान मी आम्राड्बा म्हि गिकदा स्याप्जी। 2 येशूला चेलागदेसे येशूदा “गुरु, खाल्ला पापसे लमा चु म्हि न्हमान काना न्हजी, चुलान पापसे लमा कि चुला आबा आमाला पापसे लमा चुहड् तबा हिन्ना?” भिसी ड्योड्जी।

3 जमाहेनसे येशूसे थेनीगदेदा चुहड् भिसी सुड्जी, “थेला पापसे लमाएनोन आहिन, थेला आबा आमाला पापसे लमाएनोन आहिन। तर परमेश्वरला गे थेग्याम म्राड्गै भिसीन थे काना तबा हिन्ना। 4 धिनी मुबा धुडरीन यहाडसे डादा पुड्खबाला गे लतोःला। धोप तमाहेनसे खालैसेन गे लबारी आखम। 5 डा जम्बुलिडरी चितेधोना डानोन जम्बुलिडला यहाल हिन्ना।”*

6 चुहड् सुड्माहेनसे येशूसे सरी थो स्वाजी, ओच्छे थोसे साप्रा ज्योप्सी थे काना महिला मीरी फोर्सी पिन्जी। 7 ओच्छे थेदा चुहड् भिसी सुड्जी, “सिलोआम भिबा घ्योडरी निसी ली खुउ।” सिलोआम भिबाला अर्थ चा पुड्बा हिन्ना। ओच्छे थे, थे घ्योडरी निसी ली खुजी। जमाहेनसे थेसे म्राड्जी, ओच्छे दोःसी खजी। 8 थेला खिमजेमगदेदेन थेदा डाच्छा हीसी चिबा म्राड्बा म्हिगदेसे “तिग चु थे हीबा म्हि आहिन?” भिसी ड्योड्जी। 9 कोड कोड म्हिसे थेदा म्राड्सी, “चु मी थेनोन हीबा म्हि हिन्ना” भिसी भिबान मुबा। स्यहान्दोगदेसे चा हिन्बाम थे हड्बान म्राड्बा चीम, तर थे म्हि “आहिन” भिसी भिजी।

तर थे म्हिसे “डा थेनोन हिन्ना” भिसी भिबाला भिबान मुबा।

10 थेनीगदेसे थेदा “दान्दे एसे खाहड् लसी म्राड्जी?” भिसी ड्योड्जी।

11 जमाहेनसे थेसे थेनीगदेदा “येशू भिबा म्हि गिकसे साप्रा ज्योप्सी डाला मीरी फोर्सी डादा ‘सिलोआमरी निसी खुउ’ भिसी सुड्जी। ओच्छे निसी खुमाहेनसे डाइ म्राड्जी” भिसी भिजी। 12 थेनीगदेसे थेदा “थे म्हि खानड मुला?” भिसी ड्योड्मा, थेसे “डादा था आरे” भिसी भिजी।

फरिसीगदेसे ड्योड्बा छार्बा लबा

13 जमाहेनसे थेनीगदेसे डाच्छा काना मुबा म्हिदा फरिसीगदे मुबा ग्लारी भोर्जी। 14 येशूसे साप्रा ज्योप्सी थेला मीरी फोर्सी थेदा खम्ना लबा धिन चा बल्पबा न्हबा धिनकुनु मुबा। 15 फरिसीगदेसेनोन

* 9:5 मत्ती ५:१४; यूह ८:१२

थेदा “एसे खाहड् लसी म्राड्जी?” भिसी ड्योइमा, थेसे थेनीगदेदा “येशूसे साप्रा ज्योप्सी डाला मीरी फोर्सी पिन्जी, ओच्छे डाइ खुमाहेन्से म्राड्जी” भिसी भिजी।

16 फरिसीगदे न्हडला कोइ कोइसे “थे म्हि परमेश्वरग्याम खबा आहिन। तिग्दा भिसम थेसे ब्लपबा न्हबा धिनदा आधड्मुला” भिसी भिजी। तर स्युहान्दोगदेसे चा “पापी म्हिसे खाहड् लसी चुहड्बा उदेकला गे लबारी खम्ला?” भिसी भिजी। थेतबासेलमा थेनीगदे हाड हाड न्हडरी आढिकनी।

17 थेनीगदेसे दोःसीनोन थे काना म्हिदा “थे म्हिसे एला मी खम्ना लजी, दाहेन्से एसे चा थे म्हि खाल भिसी म्हनबा मुला” भिसी ड्योइमा, थेसे “थे म्हि अगमवक्ता हिनना” भिसी भिजी।

18 यहूदी नेतागदेसे थे पक्कान काना मुबा, ओच्छे दान्दे म्राड्खम्बा हिनना भिसी विश्वास लबारी आखम्नी। थेतबासेलमा थेनीगदेसे थेला आबा आमादा ड्योइसी, 19 “चु एनीगदेलान झा हिनना? तिग चु न्हमान काना न्हबा हिनना? थेहड् भिसम दान्दे चा चुसे खाहड् लसी म्राड्जी?” भिसी ड्योइजी।

20 जमाहेन्से थेला आबा आमासे चुहड् भिसी भिजी, “हिनना, चु डन्नान झा हिनना, चु न्हमान काना मुबा। 21 तर चुला मी खाल्से खम्ना लसी म्राड्खम्जी भिबा ताम डन्दा था आरे। चु दिड छ्योसी जिन्बा म्हि हिनना, थेसे हाडला बारैरी हाडसेन पाड्खम्ला। थेतबासेलमा हाडनीसे थेदान ड्योइगो।”

22 यहूदी नेतागदेदेन छ्याम लोड्सी थेनीगदेसे थेहड् भिसी पाड्बा हिनना। तिग्दा भिसम जुन म्हिसे येशूदा थार्बा पिन्बा खीष्ट हिनना भिसी विश्वास लला थेदा यहूदीगदे हुप तबा दिमग्याम तेःतोःला भिसी यहूदीगदेसे डाच्छान सल्लाह लसी जिन्बा मुबा। 23 थेतबासेलमान थेला आबा आमासे “चु दिड छ्योसी जिन्बा म्हि हिनना, चुदान ड्योइगो” भिसी पाड्जी।

24 जमाहेन्से थेनीगदेसे दोःसीनोन थे काना म्हिदा ड्योइसी, “एसे सत्य ताम पाड्सी परमेश्वरदा मानदेन जयजयकार लउ, थे येशू चा पापी हिनना भिसी डन्दा था मुला” भिसी भिजी।

25 थे म्हिसे थेनीगदेदा “थे पापी हिनना कि आहिन भिबा ताम मी डादा था आरे। तर डाच्छा डा काना मुबा, दान्दे डाइ म्राड्मुला भिबा ताम जे डादा था मुला” भिसी भिजी।

26 जमाहेन्से थेनीगदेसे थेदा “थे म्हिसे एदा तिग लजी? खाहड् लसी थे म्हिसे एला मी खम्ना लजी?” भिसी ड्योइजी।

27 थेसे थेनीगदेदा “डाइ हाडनीदा दोलोन पाड्सी जिन्जी, तर हाडनीसे वास्तान आलनी दान्दे दोःसी तिग्दा ड्योइबा, तिग हाडनीएनोन थेला चेला दोबारी म्हाइबा हिनना?” भिसी जोहाब पिन्जी।

28 थेनीगदेसे थेदा खिसी लबान चुहड् भिजी, “ए गा थेला चेला हिनना, डनी मी मोशाला चेला हिनना। 29 मोशादेन छ्याम परमेश्वरसे ताम लबा डन्दा था मुला, तर चु म्हि चा खानड्ग्याम खजी थे ताम डन्दाएनोन था आरे।”

30 जमाहेन्से थेसे थेनीगदेदा चुहड् भिसी भिजी, “चु खाहड्बा उदेकला ताम! येशूसे डाला मी खम्ना लजी। तर हाडनीसे चा येशू खानड्ग्याम फेपखजी भिबा ताम डन्दा था आरे। 31 परमेश्वरसे पापी म्हिला ताम आड्यानमुला, तर थेदा मान लबादेन थेसे म्हनबा अन्छार गे लबा म्हिला जे ताम ड्यानमुला भिसी य्हाड जम्मादान था मुला। 32 जम्बुलिड छ्यामाहेन्से दान्देधोना खालै म्हिसे न्हमान काना मुबा म्हिला मी खम्ना लजी भिबा ताम थेःबा आरे। 33 चु येशू परमेश्वरग्याम फेपखबा आहिनसम येशूसे चुहड्बा तिगै गे लबारी आखम्सेला मुबा।”

34 थेनीगदेसे थेदा “ए पापरी न्हसी पापरीन छर्बा म्हिसे डन्दा लोपबारी म्हाइबा?” भिसी भिजी। ओच्छे थेनीगदेसे थेदा यहूदीगदे हुप तबा दिमग्याम तेःजी।

परमेश्वरदा डोआसेबा म्हि काना हड्बान हिनना

35 यहूदीगदेसे थे काना म्हिदा यहूदीगदे हुप तबा दिमग्याम तेःजी भिबा ताम येशूसे थेःजी। ओच्छे थेदेन छ्याम हुप तसी येशूसे “तिग एसे परमेश्वरसे पुड्खबा म्हिदा विश्वास लला?” भिसी ड्योइजी।

36 थेसे येशूदा “प्रभु, डाइ थेदा विश्वास लबारी थे खाल हिनना?” भिसी भिमा,

37 येशूसे थेदा “थे म्हि एसे म्राड्सी जिन्बा मुला, दान्दे थे म्हि एदेन छ्याम ताम लबान मुला” भिसी सुड्जी।

38 चु ताम थे:सी थेसे येशूदा फ्या लबान, “प्रभु, डाइ विश्वास लला” भिसी जयजयकार लजी।

39 ओच्छे येशूसे, “कानागदेसे म्राङ्गै, ओच्छे डा काना आहिन भिसी भिबा म्हिगदेसे चा थाम्राङ्गै भिसी निसाफ लबाला लागिरीन डा चु जम्बुलिडरी खबा हिन्ना” भिसी सुङ्जी।

40 चु ताम थे:सी थेरी मुबा कोइ कोइ फरिसीगदेसे येशूदा “तिग डनीएनोन काना हिन्ना?” भिसी भिजी।

41 जमाहेन्से येशूसे थेनीगदेदा “बरु एनीगदे कानान मुबा हिन्सम पापला दोष लगब आतसेला मुबा, तर एनीगदेसे ‘डन्से म्राङ्मुला’ भिसी भिबासे लमा एनीगदेदा सदन पापला दोष तला” भिसी सुङ्जी।

10

येशू ज्यबा गोठालो

1 येशूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यानगो, ग्युला गोठेरी म्रापग्याम आवाङ्ना अर्गुपट्टिग्याम वाङ्बा म्हि चा यहोदेन डाँका हिन्ना। 2 तर ग्युगदेला गोठालो चा म्रापग्याम वाङ्मुला। 3 गोठे खुङ्बा म्हिसे गोठालोदा म्राप ठोङ्सी पिन्ना। जमाहेन्से गोठालोसे ग्युगदेदा मिन किन्सी किन्सी ड्योइला। जमाहेन्से ग्युगदेसे गोठालोला काइ थे:ला, ओच्छे गोठालोसे ग्युगदेदा मङ्ग्यार भोर्ला। 4 ह्वाङ्ला जम्मान ग्युगदे मङ्ग्यार ते:सी जिन्माहेन्से गोठालो डाच्छा डाच्छा भ्रला, ओच्छे ग्युगदे चा गोठालोला लिच्छा लिच्छा भ्रला। तिग्दा भिसम ग्युगदेसे ह्वाङ्ला गोठालोला काइ डोसेला। 5 डोआसेबा म्हिसे ड्योइजी भिसम ग्युगदे थे म्हिदेन छ्याम आनि। बरु थे महिला काइ डोआसेबासे लमा थेनीगदे लोङ्सी यार्ला।”

6 येशूसे थेनीगदेदा चु उखान सुङ्जी। तर थेनीगदेसे उखानना अर्थ आघोनी।

सत्य म्राप

7 थेतबासेलमा दो:सीनोन येशूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यानगो, ग्युगदे वाङ्बा म्राप डानोन हिन्ना। 8 डा भन्दा डाच्छा खबागदे चा जम्मान यहोदेन डाँका हिन्ना, तर ग्युगदेसे थेनीगदेला ताम आड्याननी। 9 म्राप चा डानोन हिन्ना, चुदे खालै म्हि डाग्याम न्हडरी वाङ्जी भिसम थे जोगब तला। थेनीगदे गोठे न्हडरी निबा मङ्ग्यार थोन्बा लला, ओच्छे पिङ पिङबा छे याङ्बा पाङ्गी चम्याङ्ला।

10 “यहो मी यहो लबारी, साइबारी ओच्छे नाश लबारी भिसी जे खमुला। तर डा मी थेनीगदेसे पूरान जुनी याङ्गै भिसी खबा हिन्ना। 11 ज्यबा गोठालो चा डानोन हिन्ना। ह्वाङ्ला ग्युगदेदा जोगब लबाला लागिरी ज्यबा गोठालो चा सिबारीन तयार तमुला। 12 तर जुन म्हि ग्यु छबारी जे थान्ना ओच्छे थे साँच्चिलान गोठालो आहिन ओच्छे ग्युगदेएनोन थेला आहिन भिसम थेहङ्बा म्हि फार्बा खबा म्राङ्माहेन्से ग्युगदेदा ख्लासी यार्ला। ओच्छे फार्बासे ग्युगदेदा व्हाला, जमाहेन्से ग्युगदे ससा बडबड तला। 13 थेसे ग्युगदेदा तिगै वास्ता आलना यार्ला। तिग्दा भिसम थे टाङ्गा किन्सी गे लबा म्हि जे हिन्ना।

14-15 “ज्यबा गोठालो चा डानोन हिन्ना। आबासे डादा, डाइ आबादा डोसेबा हङ् लसी डाइ डाला ग्युगदेदा डोसेमुला, ओच्छे ग्युगदेसेनोन डादा डोसेमुला। थेतबासेलमा डाइ डाला ग्युगदेला लागिरी ह्वाङ्ला ज्याननोन पिन्ना।* 16 डाला अर्गु ग्युगदेएनोन मुला, थेनीगदे चा चु गोठेला आहिन। डाइ थेनीगदेदाएनोन भतो:बा मुला, थेनीगदेसे डाला काइ थे:सी बगाल गिकनोन तला। ओच्छे थेनीगदेला गोठालोएनोन गिकनोन तला।

17 “डाइ डाला प्राण पिन्बा चा दो:सी किन्बाला लागिरी हिन्ना। थेतबासेलमा डाला आबासे डादा माया लबा हिन्ना। 18 खालैसे डाग्याम डाला प्राण किन्बारी आखम, तर डाइ डालान सेमसे डाला प्राण पिन्ना। डादा डाला प्राण पिन्बा अधिकारएनोन मुला, दो:सी किन्बा अधिकारएनोन मुला। डाला आबासे डादा कुल्बा तामएनोन चुनोन हिन्ना।”

* 10:14-15 मत्ती ११:२७; लूका १०:२२

19 चु ताम थे:सी दो:सीनोन यहूदीगदे ह्राड ह्राड न्हडरी आढिक्नी। 20 ल्हानान म्हिगदेसे येशूला बारेरी, “चु म्हडसे स्याप्सी म्योबा मुला। एनीगदेसे तिग्दा चुला ताम ड्यानबा?” भिसी ह्राड ह्राड न्हडरी पाड्बान मुबा।

21 तर स्युहानदो म्हिगदेसे चा “म्हडसे स्यापबा म्हिसे चुहड्बा ताम लबारी आखम! तिग म्हडसे स्यापबा म्हिसेनोन काना महिला मी खम्ना लबारी खम्ला?” भिसी पाड्बान मुबा।

यहूदीगदेसे येशूदा विश्वास आलबा

22 यरूशलेम शहररी परमेश्वरला मन्दिर अर्पण लबा चाड खबा मुबा। थे धुइ चा सेखरी मुबा। 23 येशू परमेश्वरला मन्दिरला सोलोमन भिबा दलानरी भ्रबान मुबा। 24 यहूदीगदे येशूला क्युर्सीन पोप तसी, “ह्राडसे डन्दा खाइमाधोना अलमल तना लसी थान्बा? चुदे ह्राड थार्बा पिन्बा ख्रीष्टनोन हिन्सम डन्दा सिधान सुड्गो” भिसी भिजी।

25 जमाहेन्से येशूसे थेनीगदेदा चुहड् भिसी सुड्जी, “डाइ डाचछान पाड्सी जिन्बा मुला, तर एनीगदेसे विश्वास आलनी। डाइ डाला आबाग्याम अधिकार याड्सी लबा गेग्यामसेन डा खाल हिन्ना भिसी उन्ना। 26 तर एनीगदेसे डादा विश्वास आलनी, तिग्दा भिसम एनीगदे डाला ग्युगदे आहिन। 27 डाला ग्युगदेसे डाला काइ डोसेमुला, ओचछे डाइएनोन थेनीगदेदा डोसेमुला। थेनीगदे डादेन छ्याम भ्रमुला। 28 थेनीगदे खाइमै नाश आत। तिग्दा भिसम डाइ थेनीगदेदा जुकजुकधोनाला जुनी पिन्ना। ओचछे खालैसेन थेनीगदेदा डाग्याम ब्यन्सी भोर्बारी आखम। 29 चुगदे डादा पिन्बा डाला आबा चा जम्मान भन्दा घेन मुला। थेग्यामसे मी झन खालैसेन चुगदेदा ब्यन्सी भोर्बारी आखम। 30 आबादेन डा गिकनोन हिन्ना।”

31 चु ताम थे:सी यहूदी नेतागदेसे दो:सीनोन येशूदा तोबारी भिसी युडबा दुइजी। 32 तर येशूसे थेनीगदेदा “आबासे कुलबा जम्मान ज्यबा गेगदे डाइ एनीगदेला ओन्छाडरी लबा मुला। थे गेगदे न्हडला खजिबा गेला लागिरी एनीगदेसे डादा युडबासे तोबारी म्हाइबा?” भिसी सुड्जी।

33 जमाहेन्से यहूदी नेतागदेसे येशूदा “एसे ज्यबा गे लबासे लमा डन्से एदा युडबासे तोबारी म्हाइबा आहिन। तर एसे परमेश्वरला बिरोध लसी ताम लबासे लमान डन्से एदा युडबासे तोबारी छ्याइबा हिन्ना। ए म्हि तसीनोन ह्राडसे ह्राडदान परमेश्वर सहोबा?” भिसी भिजी।*

34 येशूसे थेनीगदेदा चुहड् भिसी सुड्जी, “एनीगदेला ह्राडलान ठिमरी ‘एनीगदे ल हिन्ना’ भिसी परमेश्वरसे सुड्बा ताम भिबा आरे? 35 जुन म्हिगदे मुबा ग्लारी परमेश्वरला बचन खजी परमेश्वरसे थेनीगदेन ल हिन्ना भिसी पाड्मा परमेश्वरला बचन न्होड्बारी आखम्नी भिसम, 36 परमेश्वर आबासेन धम्सी चु जम्बुलिडरी पुइखबा म्हिसे ‘डा परमेश्वरला झा हिन्ना’ भिसी पाड्मा खाहड् लसी डाइ परमेश्वरला बिरोध लबा तला? 37 चुदे डाइ डाला आबाला गे लबा आरे भिसम डादा विश्वास लआतो:। 38 तर चुदे डाइ डाला आबाला गे लसीनोन डादा विश्वास आल भिसम चु गेगदेदा मी विश्वास लउ। जमाहेन्से एनीगदेसे परमेश्वर आबा डादेन छ्याम डा परमेश्वर आबादेन छ्याम मुला भिबा ताम पक्कान था याड्ला।” 39 चु ताम थे:सी थेनीगदेसे दो:सीनोन येशूदा चुड्बारी म्हाइजी। तर येशू थेनीगदेला याग्याम स्योर्जी।

40 येशू दो:सीनोन यर्दन स्योडला क्याम्सड फेप्सी धन्छ्याजी। थे ग्लारी डाचछा यूहन्नासे बपतिसमा पिन्मुबा।* 41 ल्हानान म्हिगदे येशू मुबा ग्लारी खजी। ओचछे थेनीगदेसे, “यूहन्नासे मी तिगै उदेकला गे आलनी, तर यूहन्नासे येशूला बारेरी जुन जुन ताम पाड्मुबा थे जम्मान ताम सत्य चीम” भिसी भिजी। 42 ओचछे थेरी ल्हानान म्हिगदेसे येशूदा विश्वास लजी।

1 बेथानिया भिबा नाम्सारी लाजरस भिबा म्हि गिक आखम्बा मुबा। थेनोन नाम्सारी मरियमदेन थेला नाना मार्थाएनोन चिमुबा।* 2 चुनोन मरियमसे तिरेम येशूला स्य्हापरी अत्तर फोर्सी हाडलान क्रासे फ्यामुबा। आखम्बा लाजरस चा चुनोन नाना आडाला आले मुबा।* 3 मार्थादेन मरियमसे येशूदा “प्रभु, हाडसे माया लबा म्हि आखम्बा मुला” भिसी समाचार पुड्जी।

4 चु समाचार थेःसी येशूसे “लाजरस आखम्बा मुला, तसैनोन थे आसि। तर चुहड् तबा चा परमेश्वरला मानदेन जयजयकार तबाला लागिरी हिन्ना, ओच्छे चुग्यामसेन म्हिगदेसे परमेश्वरला झादाएनोन मानदेन जयजयकार लला” भिसी सुड्जी। 5 येशूसे मार्था, मरियमदेन लाजरसदा ल्हानान माया लमुबा। 6 तसैनोन लाजरस आखम्बा मुला भिबा ताम थेःसी येशू अझ हाड धन्छ्याबा ग्लारीन न्हिरेधोना धन्छ्याजी।

7 जमाहेन्से येशूसे हाडला चेलागदेदा “लु, दाहेन्से यहाड दोःसीनोन यहूदिया अञ्चलरी निड” भिसी सुड्जी।

8 चेलागदेसे येशूदा “गुरु, ओने जे हाडदा थेरी यहूदीगदेसे युडबासे तोबारी म्हाडमुबा, तिग दोःसीनोन हाड थेरीन फेप्वारी म्हाडबा?” भिसी भिजी।

9 येशूसे थेनीगदेदा चुहड् भिसी सुड्जी, “तिग धिन गिकरी च्युक न्ही घण्टा आत? धिनीरी भ्रबा महिला काड आठोक। तिग्दा भिसम थेसे जम्बुलिडरी धिनीग्याम य्हाल याड्ला। 10 तर म्हनुड भ्रबा महिला काड ठोक्ला। तिग्दा भिसम म्हनुड थेदेन छ्याम य्हाल आत।”

11 जमाहेन्से येशूसे थेनीगदेदा “य्हाडला ह्यो लाजरस म्हेर्बा मुला। तर डा थेदा छिड्वारी थेरी नितोःला” भिसी सुड्जी।

12 चेलागदेसे येशूदा “प्रभु, थे म्हेर्बा जे हिन्सम थे खम्ला” भिसी भिजी। 13 येशूसे सुड्बा चा लाजरस सिसी जिन्जी भिसी सुड्बा, तर थेनीगदेसे चा लाजरस म्हेर्बा जे चीम भिसी म्हन्बा मुबा।

14 थेतबासेलमा येशूसे थेनीगदेदा सिधान सुड्जी, “लाजरस सिसी जिन्बा मुला। 15 तर एनीगदेसे विश्वास लगै भिसी डा थेरी तुरुन्तन आनिबा हिन्ना। थेतबासेलमा डा ताड्बा मुला। दाहेन्से भ्रउ, य्हाड थे मुबा ग्लारी निड” भिसी सुड्जी। 16 जमाहेन्से येशूला चेला दिदुमर्सा भिबा थोमासे स्य्हान्दो चेलागदेदा “लु, य्हाडएनोन गुरुदेन छ्याम निड, सितोःसै गुरुदेन छ्यामनोन सिला” भिसी भिजी।

सिबाग्याम सोना लबादेन जुनी पिन्बा येशू

17 येशू बेथानिया भिबा नाम्सारी धोखमा लाजरसदा धुर्सा न्हडरी थान्बा बल्लिरे तसी जिन्बा मुबा। 18 बेथानिया नाम्सा यरूशलेम शहरग्याम कोस गिक ते थारेड मुबा। 19 मार्थादेन मरियमला आले सिबासे लमा ल्हानान यहूदीगदे मार्थादेन मरियमदा समझब लबारी खबा मुबा। 20 येशू फेप्वबान मुला भिबा ताम थेःसी मार्था येशूदा स्याप्वारी निजी। तर मरियम चा दिमरीन चिजी।

21 जमाहेन्से मार्थासे येशूदा स्याप्वारी चुहड् भिजी, “प्रभु, हाड मुबा हिन्सम डाला आले आसिसेला मुबा। 22 तर दान्देनोन हाडसे परमेश्वरदेन छ्याम जुन सहे हीसैनोन परमेश्वरसे हाडदा पिन्ना भिबा ताम डादा था मुला।”

23 येशूसे मार्थादा “एला आले दोःसी सोला” भिसी सुड्जी।

24 मार्थासे येशूदा “चु जम्बुलिड नाश तबा धुडरी जम्मान म्हि सिबाग्याम सोमा थेएनोन सोला भिबा ताम डादा था मुला” भिसी भिजी।

25 येशूसे थेदा चुहड् भिसी सुड्जी, “सिबाग्याम सोना लबादेन जुनी पिन्बा डानोन हिन्ना। डादा विश्वास लबा म्हि सिसैनोन सोला। 26 ओच्छे डादेन छ्याम भ्रबादेन डादा विश्वास लबा म्हि खाइमै आसि। तिग एसे चु ताम विश्वास लखम्ला?” भिसी सुड्जी।

27 मार्थासे येशूदा “हिन्ना प्रभु, डाड हाडदा विश्वास लला, हाड परमेश्वरला झा जम्बुलिडरी फेप्वबा थार्बा पिन्बा ख्रीष्ट हिन्ना” भिसी भिजी।

* 11:1 लूका १०:३८-३९ * 11:2 यहू १२:३ † 11:16 “दिदुमस” भिबा चा जौल्या हिन्ना।

28 चुहड् भिसी मार्था निजी, ओच्छे हाडला आडा मरियमदा सुटुकु इयोइसी, “गुरु धोखजी, एदा गुरुसे इयोइबान मुला” भिसी भिजी। 29 चु ताम थे:मैछ्याम मरियम तुरुन्तन येशू मुबा ग्लारी निजी। 30 थे धुइधोना येशू नाम्सारी धोखबा आरेमुबा। तर येशू मार्थासे स्याप्बा ग्लारीन मुबा। 31 थेन्ना दिमरी थेन्दा समझब लबारी खबा यहूदीगदेसे मरियम योना योना लसी निबा म्राड्जी। थे आलेला धुर्सारी क्राबारी निबा हिन्ना भिसी म्हन्सी थेनीगदे मरियमला लिच्छा लिच्छा निजी।

32 मरियम येशू मुबा ग्लारी धोमाहेन्से येशूदा फ्या लबान, “प्रभु, हाड चुरी मुबा हिन्सम डाला आले आसिसेला मुबा” भिसी भिजी। 33 मरियम ओच्छे थेदेन छ्याम खबा जम्मान यहूदीगदे क्राबा म्राड्सी येशूदा ल्हानान दुख इहम्जी।

34 जमाहेन्से येशूसे थेनीगदेदा “एनीगदेसे थेदा खानड थान्बा मुला?” भिसी इयोइमा, थेनीगदेसे येशूदा “प्रभु, फेपखसी स्हीगो” भिसी भिजी।

35 थे धुइरी येशूएनोन क्राजी। 36 थेतबासेलमा यहूदीगदेसे “च्यागो, येशूसे थेदा गाते माया लमुबा” भिसी भिजी।

37 तर कोइ कोइ महिसे चा “तिग काना महिला मी खम्ना लबा चु महिसे थेदा खम्ना लबारी आखम्नी?” भिसी भिजी।

येशूसे लाजरसदा सिबाग्याम सोना लबा

38 जमाहेन्से येशू दो:सीनोन ल्हानान दुख इहम्सी धुर्सारी फेपजी। थे धुर्सा चा ऊ हड्बा मुबा। थे धुर्साला म्रापरी युडबा थान्मुबा। 39 येशूसे थेनीगदेदा “धुर्साला म्रापरी थान्बा युडबा ते:गो” भिसी सुड्मा, सिबा महिला नाना मार्थासे येशूदा “प्रभु दान्देधोना मी थे थाड खसी जिन्तला। तिग्दा भिसम थे सिबा बलिरे तसी जिन्जी” भिसी भिजी।

40 येशूसे थेदा “एसे विश्वास लजी भिसम परमेश्वरला घेन य्हालदेन शक्ति म्राड्ला भिसी डाइ एदा पाड्बा आहिन?” भिसी सुड्जी।

41 थेनीगदेसे युडबा ले:माहेन्से स्वर्गपट्टि स्हीसी येशूसे चुहड् भिसी सुड्जी, “आबा, हाडदा धन्यवाद मुला। तिग्दा भिसम हाडसे डाला बिन्ती इयान्जी। 42 हाडसे डाला ताम सदन इयान्मुला भिबा ताम डादा था मुला। तसैनोन डादा हाडसे चु जम्बुलिडरी पुइखबा हिन्ना भिबा ताम चुरी मुबा म्हिगदेसे विश्वास लबारी खम्गै भिसीन डाइ हाडदा चु ताम पाड्बा हिन्ना।”

43 चुहड् सुड्सी जिन्माहेन्से येशूसे घेन काइरी “लाजरस, ए मडग्यार खउ” भिसी क्रिड्जी। 44 जमाहेन्से सिबा लाजरस रे:सी मडग्यार खजी। अझन थेला थोबोहेन्से काडधोना खीबा मुबा। येशूसे थेरी मुबा म्हिगदेदा “थेदा खीबा क्वान बलसी थेदा निपुड्गो” भिसी सुड्जी।

येशूदा साइबारी म्हाइबा

मत्ती २६:१-५; मर्कूस १४:१-२; लूका २२:१-२

45 येशूसे लबा चुहड्बा उदेकला गे म्राड्सी मरियमदा हुप तबारी खबा ल्हानान यहूदीगदेसे येशूदा विश्वास लजी। 46 तर थेनीगदे न्हडला कोइ कोइ चा फरिसीगदे मुबा ग्लारी निसी येशूसे लबा गेला बारेरी पाड्जी।

47 जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे जम्मान भन्दा घेन यहूदी सभाला म्हिगदेदा इयोइसी चुहड् भिसी भिजी, “चु महिसे ल्हानान उदेकला गेगदे लमुला। दाहेन्से य्हाडसे तिग लइ? 48 चु महिदा तिगै आलना ओहड्नुन ख्लाजी भिसम जम्मान म्हिगदेसे चुदा विश्वास लला। ओच्छे रोमी सिपाहीगदे खसी य्हाडला परमेश्वरला मन्दिरदेन य्हाडला य्हुल नाश लला।”

49 कैयाफा भिबा महि परमेश्वरला मन्दिररी पूजा लबा थे दिडला मुल महि मुबा। थेसे थेनीगदेदा चुहड् भिसी भिजी, “एनीगदेदा तिगै ताम था आरे। 50 जम्मान य्हुल्सा नाश तबा भन्दा बरु जम्मान महिला लागिरी महि गिक सिबान एनीगदेला लागिरी ज्यबा तला भिसी एनीगदेसे घोबा आरे।”

51 चु ताम थेसे ह्राडला सेमग्याम पाड्बा आहिन मुबा। तर थे परमेश्वरला मन्दिररी पूजा लबा थे दिडला मुल म्हि तबासे लमा यहूदी यहुलला लागिरी येशू सिनोन तोःला भिसी परमेश्वरला ताम पाड्बा मुबा। 52 ओच्छे थेसे चु ताम यहूदी यहुलला लागिरी जे पाड्बा आहिन मुबा। तर ससा बडबड तसी चिबा परमेश्वरला जम्मान म्हिगदेदाएनोन गिक सहोबाला लागिरी थेसे चु ताम पाड्बा मुबा। 53 थेतबासेलमा थे धिनहेन्से यहूदी नेतागदेसे येशूदा साइबारी सल्लाह लजी।

54 जमाहेन्से यहूदीगदेला डाच्छा येशू दोःसी डाच्छाला हड् लसी आभ्रनी। तर थे ग्लाग्याम तोडतोडबा गलाला डामरी मुबा एफ्राइम भिबा शहररी फेप्सी थेरीन चेलागदेदेन छ्याम धन्छ्याजी।

55 यहूदीगदे मिश्र यहुल्साग्याम फेसी खबा धिनदा ढन्सी धड्बा चाड खबारी छ्याइमुबा। थेतबासेलमा चाड खबा भन्दा डाच्छान ह्राड ह्राडदा चोखो सहोबाला लागिरी नाम्सा नाम्साग्याम ल्हानान म्हिगदे यरूशलेम शहररी निजी। 56 थेनीगदेसे येशूदा जम्मान ग्लारी म्हाइजी, ओच्छे थेनीगदे जम्मान परमेश्वरला मन्दिररी हुप तबा धुडरी “एनीगदेदा खाहड्बा छोर्बा मुला, तिग थे चु चाडरी खला?” भिसी ह्राड ह्राड न्हडरी ताम लजी। 57 परमेश्वरला मन्दिररी पूजा लबा मुल म्हिगदेदेन फरिसीगदेसे चा येशूदा चुड्बाला लागिरी थे जुन ग्लारी मुसै था याड्बा म्हिसे “डन्दा पाड्गो” भिसी कुल्बा मुबा।

12

येशूदा अत्तर फोर्बा

मत्ती २६:६-१३; मर्कूस १४:३-९

1 मिश्र यहुल्साग्याम फेबा धिनदा ढन्सी धड्बा चाड खबा भन्दा ढुरे डाच्छा येशू लाजरसदा सिबाग्याम सोना लबा बेथानिया भिबा नाम्सारी धोखजी। 2 येशूला लागिरी थेनीगदेसे जमाकुनु ड्यसे थेरीन सोल सहोजी। मार्थासे चा जम्मादान क्योड्बान मुबा। येशूदेन छ्यामनोन चिबागदे न्हडरी गिक चा लाजरस मुबा। 3 थेनोन धुडरी मरियमसे जटामसी भिबा दोडला टाग्याम सहोबा महंगो खाल्ला ज्यबा बासना खबा अत्तर लिटर गडसल ते भसी येशूला स्यहापरी फोर्सी ह्राडलान क्रासे येशूला स्यहाप फ्याजी। ओच्छे दिम नाडनोन थे अत्तरला बासना खजी।* 4 तर येशूदा चुड्सी पिन्बारी म्हाइबा चेला यहूदा इस्करियोतसे चुहड् भिसी भिजी, 5 “चु अत्तर मी ग्यार्जा सोम म्हुडला डबलरी† चूड्सी थे टाडगा प्राडबोगदेदा पिन्सै तसेला।” 6 तर थेसे प्राडबोगदेदा वास्ता लसी चु ताम पाड्बा आहिन मुबा। तिग्दा भिसम थे यहो मुबा, ओच्छे टाडगाएनोन थेदेन छ्यामनोन थान्सी थेसेन यहो लमुबा।

7 येशूसे चुहड् भिसी सुड्जी, “थेदा तिगै थापाड्गो, डादा लहुबा धिनना लागिरी चुसे चुहड् लबा हिन्ना। 8 तिग्दा भिसम प्राडबो म्हिगदे मी एनीगदेदेन छ्याम सदन तला, तर डा चा एनीगदेदेन छ्याम सदन आत।”*

लाजरसदा साइबारी सल्लाह लबा

9 येशू बेथानिया भिबा नाम्सारी मुला भिबा था याड्सी ल्हानान यहूदीगदे थेरी खजी, थेनीगदे येशूदा च्याबारी जे खबा आहिन मुबा। तर येशूसे सिबाग्याम सोना लबा लाजरसदाएनोन च्याबारी खबा मुबा। 10 थेतबासेलमा परमेश्वरला मन्दिररी पूजा लबा मुल म्हिगदेसे लाजरसदाएनोन साइबारी सल्लाह लजी। 11 तिग्दा भिसम लाजरसदा सिबाग्याम सोना लबासे लमा ल्हानान यहूदीगदेसे थेनीगदेदा ख्लासी येशूदा विश्वास लबान मुबा।

येशू यरूशलेमरी फेप्बा

मत्ती २१:१-११; मर्कूस ११:१-११; लूका १९:२८-४०

12 न्हडगरदडसे मिश्र यहुल्साग्याम फेबा धिनदा ढन्सी धड्बा चाडरी खबा ल्हानान म्हिगदेसे येशू यरूशलेमरी फेप्खबान मुला भिबा ताम थेःजी। 13 जमाहेन्से खजूरला हांगागदे क्युड्सी थोबान म्हिगदेसे

* 12:3 लूका ७:३७-३८ † 12:5 “ग्यार्जा सोम म्हुडला डबल” चा तिदिडला ज्याला मुबा। * 12:8 व्यव १५:११

“थेला जयजयकार तगै,
परमप्रभुला मिनरी फेपखबासे परमेश्वरग्याम मोलम याङ्गै
इसाएलला ग्लेदां परमेश्वरसे मोलम पिन्गै”
भिसी क्रिडबान येशूदा मान लबारी खजी।*

14 येशूसे गधाला कोला गिक स्यापजी ओच्छे थेनोन गधाला कोलाथोरी क्रेःसी फेपखजी।
परमेश्वरला बचनरीनोन चुहङ् लसी भिबा मुला,*

15 “सियोननां म्हिगदे, एनीगदे थालोङ्गो।

च्यागो, एनीगदेला ग्ले गधाला कोलाथोरी क्रेःसी फेपखबान मुला।”*

16 डाचछा मी चु ताम येशूला चेलागदेसेनोन आघोनी। तर येशू सिबाग्याम सोसी स्वर्गरी घेन
य्हालदेन शक्तिरी फेपमाहेनसे जे थेनीगदेसे येशूला बारेरी भिबा जम्मान ताम घोजी।

17 येशूसे धुर्सारी थान्बा लाजरसदा ड्योइसी सिबाग्याम सोना लबा धुइरी येशूदेन छ्यामनोन मुबा
म्हिगदेसे येशूसे लबा गेला बारेरी पाङ्गी भ्रजी। 18 येशूसे चुहङ्बा उदेकला गे लबा मुबा भिबा ताम
थेःबासे लमाएनोन म्हिगदे येशूदा हुप तबारी निबा मुबा। 19 थेतबासेलमा फरिसीगदे हाड हाड न्हडरी
“खाड, य्हाडसे तिग लखम्जी। च्यागो, जम्बुलिडला जम्मान म्हिगदे थेदेन छ्याम भ्रबारी छ्याइजी”
भिसी भिजी।

ग्रीक य्हुलला म्हिगदेसे येशूदा म्हाइबा

20 कोइ कोइ ग्रीस य्हुल्साला म्हिगदेां मिश्र य्हुल्साग्याम फेबा धिनदा ढन्सी धङ्बा चाडरी
पूजा लबाला लागिरी यरूशलेम शहररी खबा मुबा। 21 थेनीगदे गालील अञ्चलला बेथसेदा भिबा
नाम्सारी चिबा फिलिप मुबा ग्लारी निसी, “डनी येशूदेन छ्याम हुप तबा सेम मुला” भिसी बिन्ती
लजी। 22 जमाहेनसे फिलिप निसी अन्द्रियासदा चु ताम पाङ्गी, ओच्छे थेनीनोन निसी येशूदा पाङ्गी।

23 येशूसे थेनीगदेदा चुहङ् भिसी सुङ्गी, “दाहेनसे परमेश्वरसे पुइखबा म्हिदा मान लबा धुइ खसी
जिन्बा मुला। 24 च्यागो, एनीगदेसे डाला ताम ड्यानगो, बु वारीरी ह्वबा ग्वाला ब्लु आसिनी भिसम थे
गिक जेन तला। तर थे सिजी भिसम फुइसी थेरी ल्हानान ग्वा रोला। 25 थेतबासेलमा जुन म्हिसे हाडला
ज्यान जोगब लबा सेम लला थे म्हिसे जुकजुकधोनाला जुनी आयाङ्। तर जुन म्हिसे जम्बुलिडरी
मुमा हाडला ज्यानना वास्ता आलना डादेन छ्याम भ्रला, थेसे जुकजुकधोनाला जुनी सदन जोगब लसी
थान्ना।* 26 खालै म्हिसे डाला लागिरी गे लबा सेम लजी भिसम थे डादेन छ्याम भ्रतोःला। ओच्छे
डा जुन ग्लारी चिला, डाला गे लबा म्हिएनोन डादेन छ्यामनोन तला। खालै म्हिसे डाला लागिरी गे
लजी भिसम डाला आबासे थेला मान बढब लसी पिन्ना।

येशूसे हाड सिबाला बारेरी सुङ्बा

27 येशूसे चुहङ् भिसी सुङ्गी, “दान्दे डादा सेमरी ल्हानान दुख तबा मुला, डाइ तिग पाङ्से? ‘आबा
डादा चु दुखग्याम जोगब लउ’ भिसी पाङ्बारी तला? आत, तिग्दा भिसम डा चु दुख नाबाला लागिरीन
खबा हिन्ना। 28 आबा, हाड जम्मान भन्दा घेन परमेश्वर हिन्ना भिबा ताम उन्गो।”

जमाहेनसे स्वर्गग्याम “डाइ डा जम्मान भन्दा घेन परमेश्वर हिन्ना भिबा ताम उन्सी जिन्बा
मुला, चु ताम डाइ अझ उन्ना” भिबा काइ खजी।

29 चु ताम थेःसी थेरी मुबा म्हिगदेसे “चु मु गुर्बा हिन्ना” भिसी भिजी। तर स्य्हान्दोगदेसे चा
“स्वर्गदूत थेदेन छ्याम ताम लबा हिन्ना” भिसी भिजी।

30 येशूसे थेनीगदेदा चुहङ् भिसी सुङ्गी, “स्वर्गग्याम खबा चु काइ डाला लागिरी आहिन, तर
एनीगदेला लागिरी हिन्ना। 31 दाहेनसे चु धुइ चा जम्बुलिडरी मुबा म्हिगदेला निसाफ लबा धुइ हिन्ना,
ओच्छे चु जम्बुलिडदा तहरी थान्बादां मङ्ग्यार भ्याङ्ला। 32 ओच्छे डादा जम्बुलिडग्याम तोर

† 12:13 “इसाएलला ग्ले” भिबा चा थार्बा पिन्बा स्त्रीष्ट भिबा हिन्ना। * 12:13 भजन ११८:२५-२६ * 12:14 मत्ती २१:१-११;
मर्क ११:१-११; लूका १९:२८-४० † 12:15 “सियोन” भिबा चा यरूशलेम शहरदा पाङ्बा हिन्ना। * 12:15 जक ९:९ † 12:20
चु म्हिगदे चा यहूदीगदेसे हङ्गोन परमेश्वरदा तेन्बा म्हि मुबा। * 12:25 मत्ती १०:३९; १६:२५; मर्क ८:३५; लूका ९:२४; १७:३३
† 12:31 “जम्बुलिडदा तहरी थान्बा” चा शैतान हिन्ना। यूह १४:३०, १६:११ सहीगो।

थीमाहेन्से जम्मान म्हिदा डाइ डा मुबा ग्लारी भला।”³³ येशूसे हाड खाहड लसी सिबान मुला भिबा ताम म्हिगदेसे घोगै भिसी चुहड सुड्बा मुबा।

³⁴ जमाहेन्से म्हिगदेसे येशूदा “थार्बा पिन्बा ख्रीष्ट सदन सोला भिबा ताम डन्से ठिमग्याम थेःबा मुला। हाडसे चा तिग्दा ‘परमेश्वरसे पुइखबा म्हिदा तोर थीनोन तोःला’† भिसी सुड्बा? परमेश्वरसे पुइखबा चु म्हि चा खाल हिन्ना?” भिसी ड्योइजी।*

³⁵ येशूसे थेनीगदेदा चुहड भिसी सुड्जी, “अझ छिन्नड य्हाल एनीगदेदेन छ्याम तला। थेतबासेलमा य्हाल एनीगदेदेन छ्याम मुबा धुइरीन हाड भ्रतोःबा ग्यामरी भ्रउ। आहिन्सम एनीगदेदा धोपधोपसे घप्ला, धोपधोपरी भ्रमा म्हिदा हाड खानड निबान मुला भिबा तामनोन था आत।³⁶ य्हाल एनीगदेदेन छ्याम मुबा धुइरी एनीगदेसे थेदा विश्वास लउ। थेहड लजी भिसम एनीगदे य्हालला सन्तान दोला।” चु ताम सुड्सी जिन्माहेन्से येशू थे ग्याम फेप्सी थेनीगदेसे आम्राड्बा ग्लारी धन्छ्याजी।

यहूदीगदेसे येशूदा विश्वास आलबा

³⁷ येशूसे यहूदीगदेलान ओन्छाडरी ल्हानान उदेकला गेगदे लबा मुबा। तसैनोन थेनीगदेसे येशूदा विश्वास आलनी।³⁸ यशैया अगमवक्तासे पाड्बा ताम पूरा तबारीन चुहड तबा हिन्ना। यशैया अगमवक्तासे

“परमप्रभु, डन्से पाड्बा ताम खालसे विश्वास लजी? ओच्छे हाडसे लबा शक्तिशाली गे खालसे म्राड्जी?”

भिसी पाड्बा मुबा।*

³⁹ थेनीगदेसे विश्वास लआखमनी, तिग्दा भिसम यशैया अगमवक्तासे दोःसी चुहड भिसी पाड्बा मुला,

⁴⁰ “प्रभुसे थेनीगदेला मी बन्द लसी पिन्बा मुला

ओच्छे थेनीगदेला सेम कोड्ना लबा मुला।

आहिन्सम थेनीगदेसे म्राड्सेला मुबा,

सेमहेन्सेन घोसेला मुबा,

डापट्टि दोःसेला मुबा,

ओच्छे थेनीगदेदा डाइ खमना लसेला मुबा।”*

⁴¹ यशैया अगमवक्तासे येशूला घेन शक्ति म्राड्सी येशूला बारेरीन चु ताम पाड्बा मुबा।

⁴² तसैनोन ल्हानान यहूदी नेतागदेसे येशूदा विश्वास लजी। तर फरिसीगदेसे यहूदीगदे हुप तबा दिमरी वाड्बारी आपिन भिसी लोड्सी थेनीगदेसे चु ताम खालैदान आपाड्नी।⁴³ तिग्दा भिसम थेनीगदेसे परमेश्वरसे भन्दा म्हिगदेसे ज्यबा भिगै भिसी म्हनमुबा।

येशू जम्बुलिडदा सोना लबारी फेप्खबा

⁴⁴ येशूसे घेन काइरी चुहड भिसी सुड्जी, “डादा विश्वास लबा म्हिगदेसे डादा जे आहिन, तर डादा पुइखबादाएनोन विश्वास लला।⁴⁵ ओच्छे डादा म्राड्बा म्हिसे डादा पुइखबादाएनोन म्राड्ला।

⁴⁶ डादा विश्वास लबा म्हिगदे धोपधोपरी भ्रआतोःगै भिसीन डा जम्बुलिडरी य्हाल दोसी खबा मुला।

⁴⁷ “डाला ताम थेःसीनोन डाइ पाड्बा अन्छार आभ्रबा म्हिगदेला निसाफ आल। तिग्दा भिसम डा जम्बुलिडला म्हिगदेला निसाफ लबारी खबा आहिन। तर जम्बुलिडला म्हिगदेदा थार्ना लबारी खबा हिन्ना।⁴⁸ तर डादेन डाला तामदा विश्वास आलबा म्हिगदेला निसाफ लबारी न्यायाधीश गिक मुला। थे न्यायाधीश चा डाइ पाड्बा तामनोन हिन्ना। थेसेन चु जम्बुलिड नाश तबा धुइरी थेनीगदेला निसाफ लला।⁴⁹ तिग्दा भिसम चु ताम डाइ डाला सेमग्याम पाड्बा आहिन, तर डादा पुइखबा आबासे कुल्बा अन्छारनोन डाइ पाड्बा हिन्ना।⁵⁰ डादा पुइखबा आबासे कुल्बा ताम ड्यान्बा म्हिदा जुकजुकधोनाला जुनी पिन्ना भिबा ताम डादा था मुला। थेतबासेलमा आबासे जुन ताम पाड्पुड्ला थे ताम जे डाइ पाड्बा मुला।”

† 12:34 येशूसे ‘परमेश्वरसे पुइखबा म्हिदा तोर थीनोन तोःला’ भिबा चा हाडदा कुसरी टांगब लसी साडला भिसी सुड्बा हिन्ना।

* 12:34 भजन ११०:४; यशै ९:७; इज ३७:२५; दानि ७:१४ * 12:38 यशै ५३:१ * 12:40 यशै ६:१०

13

येशूसे हाडला चेलागदेला काड खुबा

1 मिश्र यहुल्साग्याम फेसी खबा धिनदा ढन्सी धड्बा चाड खबा भन्दा डाचछान चु जम्बुलिड ख्लासी आबा मुबा ग्लारी निबा धुइ तसी जिन्जी भिबा ताम येशूसे था याड्सी जिन्बा मुबा। येशूसे जम्बुलिडरी मुबा हाडला चेलागदेदा ल्हानान माया लमुबा, ओच्छे थेनीगदेदा लिच्छाधोनान माया लजी।

2 येशू हाडला चेलागदेदेन छ्याम ड्यसेला सोल छ्योडबान मुबा। थेनोन धुइरी येशूदा चुड्सी पिन्बा सेम शैतानसे सिमोनना झा यहूदा इस्करियोतदा खना लसी जिन्बा मुबा। 3 परमेश्वरसे जम्मान अधिकार हाडदा पिन्बा मुला भिबा ताम येशूदा था मुबा। ओच्छे परमेश्वरग्यामनोन खसी दोःसी परमेश्वर मुबा ग्लारी निबान मुला भिबा तामएनोन येशूदा था मुबा 4 सोल छ्योडमाहेन्से येशू सहेड्जी, ओच्छे हाडसे नान्बा घ क्यार थान्सी क्रेप्सरी गम्सा खीजी। 5 जमाहेन्से येशूसे ताड गिकरी क्युड युजी, ओच्छे हाडला चेलागदेला काड खुसी हाडसे खीबा गम्सासे थेनीगदेला काड फ्याजी।

6 येशूसे सिमोन पत्रुसला काड खुबारी छ्याइमा सिमोन पत्रुससे “प्रभु तिग हाडसे डाला काड खुबारी छ्याइबा?” भिसी भिजी।

7 येशूसे थेदा “डाइ तिग लबान मुला, थे ताम एसे दान्दे आघो। तर चु ताम एसे लिच्छा घोला” भिसी सुड्जी।

8 पत्रुससे येशूदा “हाडसे डाला काड खाइमै खुबारी आत” भिसी भिमा, येशूसे थेदा “डाइ एला काड आखुनी भिसम ए डाला म्हि आदो” भिसी सुड्जी।

9 जमाहेन्से सिमोन पत्रुससे येशूदा “थेहड् भिसम प्रभु, डाला काड जे आहिन, तर डाला यादेन थोबोएनोन खुसी पिन्गो” भिसी भिजी।

10 जमाहेन्से येशूसे थेदा “नुहाब लसी जिन्बा म्हिसे काड जे खुतोःला। एनीगदे न्हडरी म्हि गिक बाहेक स्य्हान्दो जम्मान चोखो तसी जिन्बा मुला” भिसी सुड्जी। 11 तिग्दा भिसम हाडदा खाल्से चुड्सी पिन्बारी छ्याइबा मुला भिबा ताम येशूदा था मुबा। थेतबासेलमान येशूसे “एनीगदे न्हडला गिक चा चोखो तबा आरे” भिसी सुड्बा मुबा।

12 थेनीगदेला काड खुसी जिन्माहेन्से हाडला घ नान्सी येशू दोःसी धन्छ्याजी। जमाहेन्से येशूसे थेनीगदेदा चुहड् भिसी सुड्जी, “डाइ तिग्दा एनीगदेला काड खुजी भिबा ताम एनीगदेसे घोजी?*

13 एनीगदेसे डादा ‘गुरुदेन प्रभु’ भिसी पाड्बा ताम सत्य हिनना, तिग्दा भिसम डा एनीगदेला गुरुदेन प्रभुन हिनना। 14 चुदे डा प्रभुदेन गुरु तसीनोन डाइ एनीगदेला काड खुजी भिसम एनीगदेसेनोन गिकसेम गिकला काड खुतोःला। 15 डाइ लबा हड्दोनोन एनीगदेसेनोन लगै भिसीन डाइ चुहड् लसी उन्बा हिनना। एनीगदेसेनोन चुहड्दोनोन लउ। 16 थेतबासेलमा च्यागो, एनीगदेसे डाला ताम ड्यानगो, मालिक भन्दा नोकर घेन आत ओच्छे समाचार पुड्बा म्हि भन्दा समाचार भोर्बा म्हिएनोन खाइमै घेन आत।* 17 चुदे एनीगदेसे चु ताम घोसी चुनोन अन्छार लजी भिसम एनीगदेसे परमेश्वरग्याम मोलम याड्ला।

येशूसे हाडदा धोका पिन्बा चेलाला बारेरी सुड्बा

मत्ती २६:२०-२५; मर्कूस १४:१७-२१; लूका २२:२१-२३

18 “चु ताम डाइ एनीगदे जम्मालान बारेरी पाड्बा आहिन, डाइ धम्बागदेदा डाइ ज्यना लसी डोसेमुला। तर ‘डादेन छ्यामनोन गेड चबा म्हिसे डादा धोका पिन्ना’ भिसी परमेश्वरला बचनरी पाड्बा ताम पूरा तबाला लागिरीन चुहड् तबा हिनना।* 19 चु ताम तमाहेन्सेनोन एनीगदेसे डादा “डा थेनोन हिनना” भिसी विश्वास लबारी खमगै भिसीन डाइ चु ताम एनीगदेदा डाचछान पाड्बा हिनना। 20 थेतबासेलमा च्यागो, एनीगदेसे डाला ताम ड्यानगो, डाइ पुड्बा म्हिगदेदा मान लबा म्हिसे डादाएनोन मान लला, ओच्छे डादा मान लबा म्हिसे डादा पुड्खबादाएनोन मान लला।”*

* 13:12 लूका २२:२७ * 13:16 मत्ती १०:२४; लूका ६:४०; यहू १५:२० * 13:18 भजन ४१:९ * 13:20 मत्ती १०:४०; मर्कू ९:३७; लूका ९:४८; १०:१६

21 चु ताम सुड्सी जिन्माहेन्से ल्हानान दुख इहम्सी येशूसे चेलागदेदा “च्यागो, एनीगदेसे डाला ताम ड्यानगो, एनीगदे न्हडलान गिकसे डादा म्हिगदेला यारी जिम्मा पिन्ना” भिसी सुड्जी।

22 येशूसे चु ताम खाल्ला बारेरी सुड्बा हिन्ना भिबा आघोबासे लमा चेलागदेसे हाड हाड न्हडरी गिकसेम गिकला लीरी च्याबारी छ्याइजी। 23 येशूसे ल्हानान माया लबा चेला चा येशूला डामरीन चिबा मुबा। 24 जमाहेन्से सिमोन पत्रुससे थेदा “येशूसे चु ताम खाल्ला बारेरी सुड्बा हिन्ना? ड्योइगो” भिसी मीला चाल लजी।

25 थे येशूला डामरी चिबान येशूदा “प्रभु, थे म्हि खाल हिन्ना?” भिसी ड्योइजी।

26 येशूसे थेदा “डाइ जुन म्हिदा गेड तुइसी पिन्ना, थे म्हि थेनोन हिन्ना” भिसी सुड्जी। ओच्छे येशूसे टोगल गिक गेड तुइसी सिमोन इस्करियोतला झा यहूदा इस्करियोतदा पिन्जी। 27 थे गेड किन्माहेन्से यहूदा इस्करियोत न्हडरी शैतान वाड्जी। जमाहेन्से येशूसे थेदा “एसे तिग लबारी छ्याइबा मुला, थे योनान लउ” भिसी सुड्जी। 28 तर येशूसे थेदा तिग्दा थेहड् भिसी सुड्बा हिन्ना भिसी थेरी चबारी चिबागदे खालैसेन आघोनी। 29 थेनीगदेला टाडगा यहूदा इस्करियोतसे थान्बासे लमा कोइ कोइसे चा येशूसे थेदा चाडला लागिरी तोःबा सहेगदे ग्लुउ भिसी सुड्जीनम भिसी म्हन्जी। ओच्छे कोइ कोइसे चा येशूसे थेदा प्राडबोगदेदा तिगै पिन्गो भिसी सुड्जीनम भिसी म्हन्जी। 30 येशूसे पिन्बा गेड चमाहेन्से यहूदा इस्करियोत तुरुन्तन मडग्यार निजी। थे धुइरी धोप तसी जिन्बा मुबा।

येशूसे कुल्बा छार ताम

31 यहूदा इस्करियोत मडग्यार निमाहेन्से येशूसे चुहड् भिसी सुड्जी, “दाहेन्से परमेश्वरसे पुइखबा म्हिसे घेन मान याड्बा मुला, ओच्छे थेग्याम परमेश्वरसेनोन घेन मान याड्बा मुला। 32 चुदे परमेश्वरसे पुइखबा म्हिग्याम परमेश्वरसे घेन मान याड्जी भिसम परमेश्वरसेनोन हाडसे पुइखबादा घेन मान पिन्ना। ओच्छे परमेश्वरसे चु गे योनान लला।

33 “कोलागदे, डा एनीगदेदेन छ्याम छिन्ड जे तला। एनीगदेसे डादा म्हाइला, तर दाहेन्से डाइ यहूदीगदेदा पाड्बा ताम एनीगदेदाएनोन पाड्ला, ‘डा जुन ग्लारी निबान मुला, थेरी एनीगदे खबारी आखम।’* ”

34 “दाहेन्से डाइ एनीगदेदा छार ताम गिक कुल्ला, एनीगदेसे गिकसेम गिकदा माया लउ। डाइ एनीगदेदा माया लबा हड् लसी एनीगदेसेनोन गिकसेम गिकदा माया लउ।* 35 चुदे एनीगदेसे गिकसेम गिकदा माया लजी भिसम एनीगदे डाला चेला हिन्बा चीम भिसी जम्मासेन डोसेला।”

पत्रुससे येशूदा डोसेबा आरे भिसी पाड्ला भिसी येशूसे सुड्बा

मत्ती २६:३१-३५; मर्कूस १४:२७-३१; लूका २२:३१-३४

36 सिमोन पत्रुससे येशूदा “प्रभु, हाड खानड फेप्वारी छ्याइबा?” भिसी ड्योइमा, येशूसे थेदा “डा निबा ग्लारी ए दान्दे डादेन छ्याम भ्रबारी आखम, तर लिच्छा चा भ्रला” भिसी सुड्जी।

37 पत्रुससे येशूदा “प्रभु, तिग्दा डा दान्देन हाडदेन छ्याम भ्रबारी आखम? हाडला लागिरी डा सिबारीनोन तयार मुला” भिसी भिजी।

38 जमाहेन्से येशूसे थेदा “तिग एसे डाला लागिरी हाडला ज्याननोन पिन्खम्ला? च्यागो, एसे डाला ताम ड्यानगो, नागा क्राबा भन्दा डाच्छान एसे डादा डोसेबान आरे भिसी सोमरेमधोना पाड्ला” भिसी सुड्जी।

14

येशूसे चेलागदेदा सम्झब लबा

1 येशूसे हाडला चेलागदेदा चुहड् भिसी सुड्जी, “एनीगदेसे दुख थाम्हन्गो। एनीगदेसे परमेश्वरदा विश्वास लबा मुला, ओच्छे डादाएनोन विश्वास लउ। 2 डाला आबाला दिमरी चिबा ग्ला ल्हानान मुला, ओच्छे डा एनीगदेला लागिरी ग्ला सहोबारी निबान मुला। चुदे ग्ला आरेबा हिन्सम डाइ

* 13:33 यूह ७:३४ * 13:34 यूह १५:१२, १७; १ यूह ३:२३; २ यूह ५

एनीगदेदा चु ताम पाङ्गोन आपाङ्गसेला मुबा। ³ एनीगदेला लागिरी ग्ला सहोसी जिन्माहेन्से डा दोःसी खला, ओच्छे एनीगदे डादेन छ्यामनोन चिबाला लागिरी एनीगदेदाएनोन डा मुबा ग्लारीन भोर्ला। ⁴ डा निबारी छ्याइबा ग्याम एनीगदेदा थानोन मुला।”

येशू सत्य, ग्याम ओच्छे जुनी हिन्ना

⁵ थोमासे येशूदा “प्रभु, हाड खानड फेप्वान मुला भिबा ताम मी डन्दा था आरे भिसम हाड फेप्वान ग्याम मी झन डन्से खाहङ् लसी था याङ्से?” भिसी भिजी।

⁶ येशूसे चुहङ् भिसी सुङ्जी, “परमेश्वर मुबा ग्लारी भोर्बा ग्याम, सत्य ओच्छे जुनी डानोन हिन्ना। डाग्याम बाहेक खालैनोन परमेश्वर आबा मुबा ग्लारी निबारी आखम। ⁷ एनीगदेसे डादा डोसेबा हिन्सम डाला आबादाएनोन डोसेसेला मुबा। तर दाहेन्से एनीगदेसे डाला आबादा डोसेला, ओच्छे एनीगदेसे थेदा म्राङ्सी जिन्बा मुला।

⁸ फिलिपसे येशूदा “प्रभु, डन्दा परमेश्वर आबा उन्सी पिन्गो, चुदे लजी भिसम तला” भिसी भिजी।

⁹ येशूसे थेदा चुहङ् भिसी सुङ्जी, “फिलिप, चुदे धिनधोना डा एनीगदेदेन छ्याम चिजी, तसैनोन एसे डादा डोसेबा आरे? डादा म्राङ्बा म्हिसे परमेश्वर आबादाएनोन म्राङ्सी जिन्बा मुला। तर डादा म्राङ्सीनोन तिग्दा एसे डन्दा परमेश्वर आबादा उन्सी पिन्गो भिसी भिबा? ¹⁰ डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम एदा विश्वास आरे? जुन ताम डाइ एनीगदेदा पाङ्बा मुला थे ताम डाइ डाला सेमग्याम पाङ्बा आहिन। तर डादेन छ्याम गिक तबा आबासे हाडला गे डाग्याम लबान मुला। ¹¹ डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम विश्वास लउ। आहिनसम डाइ लबा गेगदे च्यासीन विश्वास लउ।

¹² “च्यागो, एनीगदेसे डाला ताम ड्यानगो, डादा विश्वास लबागदेसे डाइ लबा हङ्बान गे लबारी खम्ला, ओच्छे थे भन्दा घेन घेन गेगदेएनोन लबारी खम्ला। तिग्दा भिसम डा परमेश्वर आबा मुबा ग्लारी निबान मुला। ¹³ एनीगदेसे डादेन छ्याम जुन सहे हीसैनोन डाग्याम परमेश्वर आबाला मान तगै भिसी डाइ एनीगदेदा पिन्ना। ¹⁴ एनीगदेसे डाला मिनरी जुन सहे हीसै डाइ एनीगदेदा पिन्ना।

परमेश्वरला आत्मा पुङ्खला भिसी लबा कबुल

¹⁵ “चुदे एनीगदेसे डादा माया लबा मुसम डाइ कुल्बा ताम एनीगदेसे ड्यानना। ¹⁶ ओच्छे डाइ परमेश्वर आबादेन छ्याम बिन्ती लला, डाला साटोरी परमेश्वर आबासे एनीगदेदा हो लबा आत्मा पुङ्खला। थे सदन एनीगदेदेन छ्याम धन्छ्याला। ¹⁷ थे आत्मासे एनीगदेदा परमेश्वरला बारेरी सत्य ताम घोना लला। तर थेदा जम्बुलिङला म्हिगदेसे विश्वास आल, तिग्दा भिसम जम्बुलिङला म्हिगदेसे थेदा न्ह म्राङ्ला न्ह डोसेला। तर एनीगदेसे मी थेदा डोसेला, तिग्दा भिसम थे एनीगदेदेन छ्यामनोन मुला ओच्छे थे एनीगदे न्हङ्गरी धन्छ्याला।

¹⁸ “डाइ एनीगदेदा टुहुरा सहोसी आथान, डा दोःसी एनीगदे मुबा ग्लारी खला। ¹⁹ छिन्नड लिच्छा जम्बुलिङला म्हिगदेसे डादा खाइमै आम्राङ्, तर एनीगदेसे मी डादा म्राङ्ला। तिग्दा भिसम डा सोबासे लमा एनीगदेएनोन सोला। ²⁰ थे धिन खमाहेन्से खाहङ् लसी एनीगदे डादेन छ्याम गिक तसी चिबा मुला, डाएनोन एनीगदेदेन छ्याम गिक तसी चिबा मुला, ओच्छे डा परमेश्वर आबादेन छ्याम गिक तसी चिबा मुला भिबा ताम एनीगदेसे था याङ्ला। ²¹ जुन म्हिसे डाइ कुल्बा ताम सेमरी थान्सी थे अनछार भ्रला थेसे डादा माया लला। डादा माया लबा म्हिदा परमेश्वर आबासेनोन माया लला, डाइएनोन थेदा माया लला ओच्छे डा हाडनोन थे मुबा ग्लारी खला।”

²² यहूदा इस्करियोत चा आहिन, तर स्यहान्दो यहूदासे येशूदा “प्रभु, हाड तिग्दा डनी मुबा ग्लारी चा फेप्वला, तर जम्बुलिङला स्यहान्दो म्हिगदे मुबा ग्लारी चा आफेप्व भिसी सुङ्बा?” भिसी भिमा, ²³ येशूसे थेदा चुहङ् भिसी सुङ्जी, “चुदे खालैसे डादा माया लमुला भिसम थेसे डाइ कुल्बा तामएनोन ड्यानमुला। ओच्छे थेदा डाला आबासेनोन माया लला, थेहङ् लसीन डादेन डाला आबा थे मुबा ग्लारी खसी थेदेन छ्यामनोन चिला। ²⁴ तर डादा माया आलबा म्हिगदेसे डाइ कुल्बा तामएनोन

आङ्यान्मुला। चु ताम डाइ एनीगदेदा डाला सेमग्याम पाङ्बा आहिन, तर डादा पुइखबा परमेश्वर आबासेन सुङ्बा हिन्ना।

25 “डा एनीगदेदेन छ्याम मुबा धुइरीन चु ताम डाइ एनीगदेदा पाङ्बा मुला। 26 डाला साटोरी आबासे एनीगदेदा हो लबारी पुइखबा थेला आत्मासे एनीगदेदा जम्मान ताम लोप्ला ओच्छे डाइ पाङ्बा जम्मान तामएनोन एनीगदेदा ढन्ना लला।

27 “डा एनीगदेदा शान्ति पिन्सी निबान मुला। एनीगदेदा पिन्बा शान्ति चा डाला हाडलान शान्ति हिन्ना। चु शान्ति चा जम्बुलिडला म्हिगदेसे पाङ्बा हङ्बा शान्ति आहिन। थेतबासेलमा दुख थाम्हन्गो ओच्छे थालोङ्गो।

28 “ ‘डा चुग्याम निबान मुला, तसैनोन डा एनीगदे मुबा ग्लारी दोःसी खला’ भिसी डाइ पाङ्बा ताम एनीगदेसे थेःबा मुला। एनीगदेसे डादा पक्कान माया लबा हिन्सम डा परमेश्वर आबा मुबा ग्लारी निबारी छ्याइबा मुला भिबा ताम थेःसी एनीगदे ताङ्सेला मुबा। तिग्दा भिसम डा भन्दा मी परमेश्वर आबान घेन हिन्ना। 29 चु ताम पूरा तमाहेन्से एनीगदेसे डादा विश्वास लगै भिसी चु ताम पूरा तबा भन्दा डाच्छान डाइ एनीगदेदा पाङ्सी जिन्बा मुला। 30 दाहेन्से डाइ एनीगदेदा चु भन्दा ल्हाना ताम आपाङ्। तिग्दा भिसम चु जम्बुलिडदा तहरी थान्बा चा खबान मुला। तसैनोन थेदेन छ्याम डादा तिगै लबा शक्ति आरे।* 31 तर डाइ परमेश्वर आबादा माया लमुला भिबा ताम जम्बुलिडला म्हिगदेसे था याङ्गै भिसीन परमेश्वर आबासे कुल्बा अन्छारनोन डाइ लबान मुला। दाहेन्से भ्रउ, य्हाड चुग्याम निड।

15

येशू चा अङ्गुरला दोड

1 “साँच्चिलान अङ्गुर दोड चा डानोन हिन्ना, ओच्छे डाला आबा चा दोडदा सयार लबा म्हि हिन्ना। 2 थेसे डादेन छ्याम मुबा तिगै आरोबा हाँगा चा थासी भ्याङ्गला। तर रोबा हाँगागदेदा चा अङ्ग ल्हाना रोगै भिसी जोगदे घ्याम्सी ज्यना लसी सयार लला। 3 थेहङ् लसीन एनीगदेला विश्वास अङ्ग ल्हेगै भिसी डाइ पाङ्बा चु बचनगदेसेन एनीगदेला सेम ज्यना लसी जिन्बा मुला। 4 एनीगदे डादेन छ्याम गिक तसी चिउ, डाएनोन एनीगदेदेन छ्याम गिक तसी चिला। हाँगा दोडग्याम फेजी भिसम थे हाँगारी तिगै आरो। थेहङ् लसीन एनीगदेएनोन डाग्याम फेसी चिजी भिसम एनीगदेसेनोन तिगै लबारी आखम।

5 “अङ्गुरला दोड डानोन हिन्ना, एनीगदे चा हाँगागदे हिन्ना। चुदे खालै म्हि डादेन छ्याम गिक तसी चिजी भिसम डाएनोन थेदेन छ्याम गिक तसी चिला, ओच्छे थे विश्वासरी ल्हेसी ल्हानान ज्यबा गेगदे लला। तर डाग्याम फेसी चिजी भिसम एनीगदेसे तिगै लबारी आखम। 6 डादेन छ्याम गिक तसी आचिबागदेदा चा थे हाँगागदेदा भ्याङ्बा हङ् लसी भ्याङ्गला, ओच्छे थे खर्ला। थेहङ्बा हाँगागदेदा म्हिगदेसे हुप लसी मेरी भ्याङ्गला, जमाहेन्से थे मेफ्रा दोला। 7 चुदे एनीगदे डादेन छ्याम गिक तजी भिसम ओच्छे डाला बचन एनीगदेला सेम न्हडरी थान्जी भिसम एनीगदेदा तोःबा स्हे हीमा पिन्ना। 8 चुदे एनीगदेसे ल्हानान ज्यबा गेगदे लसी डाला चेला दोसी उन्जी भिसम डाला आबाला मानदेन जयजयकार तला।

9 “डादा आबासे माया लबा हङ् लसी डाइएनोन एनीगदेदा डाच्छाहेन्सेन माया लबा मुला। थेतबासेलमा एनीगदेसे डाला माया थाम्लेःगो। 10 डाला आबासे कुल्बा ताम ड्यान्बासे लमा आबाला माया सदन डादेन छ्याम मुला। थेहङ् लसीन एनीगदेसेनोन डाइ कुल्बा ताम ड्यान्जी भिसम डाला माया सदन एनीगदेदेन छ्याम तला। 11 डाला सेम ताङ्बा हङ् लसी एनीगदेला सेमएनोन पूरान ताङ्खमगै भिसीन डाइ एनीगदेदा चु ताम पाङ्बा हिन्ना।

12 “डाइ एनीगदेदा माया लबा हङ् लसी एनीगदेसेनोन हाड हाड न्हडरी गिकसेम गिकदा माया लउ भिसी डाइ चु ताम कुल्बा मुला।* 13 होला लागिरी हाडला ज्याननोन पिन्बा भन्दा घेन माया अर्गु

* 14:30 यूह १२:३१ * 15:12 यूह १३:३४; १५:१७; १ यूह ३:२३; २ यूह ५

तिगैनोन आरे। 14 चुदे एनीगदेसे डाइ कुल्बा ताम ड्यान्जी भिसम एनीगदे डाला हो हिन्ना। 15 दाहेन्से डाइ एनीगदेदा नोकर भिसी आपाड्, तिग्दा भिसम मालिकसे तिग लबान मुला भिसी नोकरदा था आत। तर डाइ एनीगदेदा हो भिसी पाड्बा मुला, तिग्दा भिसम डाला आबासे डादा सुड्बा जम्मान ताम डाइ एनीगदेदा पाड्सी जिन्बा मुला। 16 एनीगदेसे डादा धम्बा आहिन, तर एनीगदे सदन ज्यबा म्हि दोसी ज्यबा गे लगै भिसीन डाइ एनीगदेदा धम्बा हिन्ना। थेहड् लसी एनीगदेसे डाला मिन किन्सी परमेश्वर आबादेन छ्याम हीजी भिसम एनीगदेसे हीबा स्हे परमेश्वर आबासे पिन्ना। 17 थेतबासेलमा डाइ कुल्बा अन्छार एनीगदेसे गिकसेम गिकदा माया लउ।

चेलागदेदा हेला लबा

18 “चुदे एनीगदेदा जम्बुलिडला म्हिगदेसे हेला लजी भिसम एनीगदेदा भन्दा डाचछा डादा हेला लबा हिन्ना भिसी घोट। 19 चुदे एनीगदे जम्बुलिडला म्हि हिन्बा हिन्सम थेनीगदेसे एनीगदेदा हाडला म्हि म्हन्सी माया लसेला मुबा। तर एनीगदे चु जम्बुलिडला म्हि आहिन। एनीगदेदा डाइ चु जम्बुलिडग्याम धम्बा हिन्ना। थेतबासेलमा एनीगदेदा जम्बुलिडला म्हिगदेसे हेला लबा हिन्ना। 20 ‘नोकर मालिक भन्दा घेन आत’ भिसी डाइ पाड्बा ताम एनीगदेसे थाम्ले:गो। थेनीगदेसे डादा दुख पिन्जी भिसम एनीगदेदाएनोन दुख पिन्ना। थेहड् लसीन थेनीगदेसे डाइ कुल्बा ताम ड्यान्जी भिसम एनीगदेसे पाड्बा तामएनोन ड्यान्ना।* 21 एनीगदे डाला म्हि तबासे लमा थेनीगदेसे एनीगदेदा ल्हानान दुख पिन्ना। तिग्दा भिसम थेनीगदेसे डादा पुड्खबा परमेश्वर आबादा डोसेबा आरे। 22 चुदे डा आखबादेन डाइ थेनीगदेदा आपाड्बा हिन्सम थेनीगदेदा पापला दोष आतसेला मुबा। तर दाहेन्से थेनीगदेसे हाडला पापला लागिरी तिगै निउ लबा ग्ला आरे। 23 डादा हेला लबा म्हिसे डाला आबादाएनोन हेला लला। 24 खालैसेन लबारी आखम्बा गेगदे डाइ थेनीगदेला गुडरी आलबा हिन्सम थेनीगदेदा पापला दोष आतसेला मुबा। तर डाइ लबा उदेकला गेगदे म्हाड्सीनोन थेनीगदेसे डादेन डाला आबादा हेला लबा मुला। 25 तर थेनीगदेला हाडलान ठिमरी ‘थेनीगदेसे डादा थेहड् नोन हेला लला’ भिसी भिबा ताम पूरा तबाला लागिरीन चुहड् तबा हिन्ना।*

26 “डाइ आबाग्याम सत्यला आत्मा एनीगदेदा हो लबाला लागिरी पुड्खला। थे खसी थेसेन डाला बारेरी पाड्ला। 27 ओच्छे एनीगदे चा डाचछाहेन्सेन डादेन छ्याम चिबासे लमा एनीगदेसेनोन डाला बारेरी पाड्ला।

16

1 “एनीगदेला विश्वास म्हासी थानिगै भिसी डाइ एनीगदेदा जम्मान ताम पाड्बा हिन्ना। 2 एनीगदेदा थेनीगदेसे यहूदीगदे हुप तबा दिमग्याम ते:ला। ओच्छे एनीगदेदा साइबा म्हिगदेसे ‘डन्से परमेश्वरदा तेन्बा मुला’ भिसी म्हन्बा धुइएनोन खबान मुला। 3 थेनीगदेसे एनीगदेदा थेहड् लला, तिग्दा भिसम थेनीगदेसे परमेश्वर आबादा डोसेबा आरे ओच्छे डादाएनोन डोसेबा आरे। 4 च्यागो, थे जम्मान ताम तबा धुइरी एनीगदेसे ‘चु जम्मान तामला बारेरी डादा प्रभुसे डाच्छान सुड्सी जिन्बा मुबा’ भिबा ताम ढन्गै भिसी डाइ एनीगदेदा चु ताम पाड्बान मुला। दान्देधोना डा एनीगदेदेन छ्यामनोन मुबासे लमा चु ताम डाइ डाच्छा एनीगदेदा आपाड्नी।

परमेश्वरला आत्मासे लबा गे

5 दाहेन्से डा डादा पुड्खबा परमेश्वर आबा मुबा ग्लारी निबान मुला। तर एनीगदे खालैसेन डादा ‘हाड खानड फेप्बा?’ भिसी आड्योइ। 6 तसैनोन डाइ चु जम्मान ताम पाड्बासे लमा एनीगदेदा सेमरी ल्हानान सुर्दा तबा मुला। 7 तसैनोन डाइ एनीगदेदा सत्य ताम पाड्बा मुला, डा चुग्याम निबान एनीगदेदा ज्यबा हिन्ना। तिग्दा भिसम डा चुग्याम आनिनी भिसम एनीगदेदा हो लबा आत्मा एनीगदे मुबा ग्लारी आफेप्व। तर डा निजी भिसम डाइ थेदा एनीगदे मुबा ग्लारी पुड्खला। 8 थे फेप्वमाहेन्से थेसे जम्बुलिडला म्हिगदेदा परमेश्वरदा सेम निबा गेला बारेरीदेन परमेश्वरसे लबा निसाफला बारेरी,

* 15:20 मती १०:२४; लूका ६:४०; यूह १३:१६ * 15:25 भजन ३५:१९; ६९:४

गल्ती गेला बारेरी ओच्छे पापला बारेरी उन्ना। ⁹ डादा विश्वास आलबान पाप हिन्ना भिसी थेसे थेनीगदेदा घोना लला। ¹⁰ थेसे परमेश्वरदा सेम निबा गे तिग हिन्ना भिसी घोना लला। तिग्दा भिसम डा परमेश्वर आबा मुबा ग्लारी निबान मुला, ओच्छे एनीगदेसे डादा दोःसी आम्राड्। ¹¹ थेसे परमेश्वरसे लबा निसाफ भिबा तिग हिन्ना भिसीएनोन थेनीगदेदा घोना लला। तिग्दा भिसम चु जम्बुलिडदा तहरी थान्बादा परमेश्वरसे निसाफ लसी जिन्बा मुला।

¹² “डाइ एनीगदेदा पाड्तोःबा ताम मी ल्हानान मुबा। तर एनीगदेसे दान्दे चु भन्दा ल्हाना घोबारी आखम। ¹³ तर थे सत्यला आत्मा फेपखमाहेन्से सत्य ताम तिग हिन्ना भिसी थेसेन एनीगदेदा घोना लला। थेसे हाडला सेमग्याम एनीगदेदा तिगै ताम आसुड्, थेसे जुन ताम थेःला थेनोन ताम जे एनीगदेदा सुड्ला। ओच्छे थेसेन लिच्छा तसेला तामगदेएनोन एनीगदेदा घोना लला। ¹⁴ थेसे डाला मानदेन जयजयकार लला, तिग्दा भिसम थेसे डाइ पाड्बा ताम थेःसी एनीगदेदा पाड्ला। ¹⁵ परमेश्वर आबादेन छ्याम मुबा जम्मान सहे जम्मान डालान हिन्ना। थेतबासेलमा डाइ पाड्बा जम्मान ताम ‘सत्यला आत्मासे थेःसी एनीगदेदा घोना लला’ भिसी पाड्बा हिन्ना।”

सुर्दा म्लेःसी ताड्म्याड्ला

¹⁶ येशूसे हाडला चेलागदेदा “छिन्नड लिच्छा एनीगदेसे डादा आम्राड्, तर दोःसी तिगै धिन लिच्छा मी एनीगदेसे डादा प्राड्ला” भिसी सुड्जी।

¹⁷ चु ताम थेःसी येशूला कोइ कोइ चेलागदेसे “थेसे यहाडदा ‘छिन्नड लिच्छा एनीगदेसे डादा आम्राड् दोःसी छिन्नड लिच्छा मी एनीगदेसे डादा प्राड्ला’ भिबादेन ‘तिग्दा भिसम डा आबा मुबा ग्लारी निबान मुला’ भिसी सुड्बाला अर्थ चा तिग हिन्ना?” भिसी हाड हाड न्हडरी ताम लजी। ¹⁸ ओच्छे थेनीगदेसे दोःसी, “थेसे ‘छिन्नड लिच्छा’ भिसी सुड्बा तिग हिन्ना? थेसे सुड्बा ताम यहाडदा था आरे” भिसी भिजी।

¹⁹ थेनीगदेसे चु तामला बारेरी ड्योडबा सेम लबा मुला भिसी था याड्सी येशूसे थेनीगदेदा चुहड् भिसी सुड्जी, “डाइ एनीगदेदा ‘छिन्नड लिच्छा एनीगदेसे डादा आम्राड् भिबादेन छिन्नड लिच्छा मी एनीगदेसे डादा प्राड्ला’ भिसी पाड्बा तामला बारेरी एनीगदेसे हाड हाड न्हडरी ताम लबा आहिन? ²⁰ थेतबासेलमा च्यागो, एनीगदेसे डाला ताम ड्यानगो, एनीगदे क्राबा क्रिड्बा लला, तर जम्बुलिडला म्हिगदे चा ताड्ला। एनीगदेदा दुखदेन सुर्दा तला, तसैनोन एनीगदेला सुर्दा म्हासी दोःसी ताड्म्याड्ला। ²¹ कोला न्हबा धुडरी मिडम्हेमेदा ल्हानान दुख तमुला। तर कोला न्हमाहेन्से थेसे थे जम्मान दुख म्लेःमुला। तिग्दा भिसम जम्बुलिडरी कोला गिक न्हजी भिसी थे ल्हानान ताड्मुला। ²² थेहड् लसीन एनीगदेदा दान्दे दुख तबा मुला। तर डा दोःसी एनीगदेदा हुप तबारी खमा एनीगदे सेमरी ल्हानान ताड्म्याड्ला। ओच्छे एनीगदेला ताड्बा खालैसेन महाना लबारी आखम। ²³ थे धुडरी एनीगदेसे डादेन छ्याम तिगै ताम आड्योड। च्यागो, डाला मिनरी एनीगदेसे जुन सहे ह्रीला थे सहे एनीगदेदा परमेश्वर आबासे पिन्ना। ²⁴ दान्देधोना मी एनीगदेसे डाला मिनरी तिगै ह्रीबा आरे। ह्रीगो एनीगदेदा पिन्ना, ओच्छे एनीगदे पूरान ताड्म्याड्ला।

येशूसे जम्बुलिडला जम्मान नइबा तामदा ढाबा

²⁵ “दान्दे चा डाइ एनीगदेदा चु ताम उखानग्याम पाड्बा मुला, तर धुड तमाहेन्से परमेश्वरला बारेरी पाड्मा चा उखान आपाड्ना डाइ एनीगदेदा प्रस्टन घोना लला। ²⁶ थे धुडरी एनीगदे हाडसेन डाला मिनरी ह्रीला। तर डाइ एनीगदेला लागिरी परमेश्वर आबादेन छ्याम ह्रीसी पिन्आतोः। ²⁷ तिग्दा भिसम परमेश्वर आबा हाडसेन एनीगदेदा माया लबा मुला। तिग्दा भिसम एनीगदेसे डादा माया लबा मुला, ओच्छे डा परमेश्वरग्याम खबा हिन्ना भिसीएनोन विश्वास लबा मुला। ²⁸ डा परमेश्वर आबाग्यामसेन चु जम्बुलिडरी खबा हिन्ना, दान्दे दोःसी डा चु जम्बुलिडदा ख्लासी परमेश्वर आबा मुबा ग्लारी निबान मुला।”

²⁹ जमाहेन्से चेलागदेसे येशूदा चुहड् भिसी भिजी, “दान्दे चा भिसम हाडसे डन्दा उखान आसुड्ना प्रस्टन घोना लजी। ³⁰ दाहेन्से हाडदा जम्मान ताम था मुला भिबा ताम डन्से था याड्जी। दाहेन्से

खालैसे हाडदा इयोइतोःबा ताम तिगै आरे। थेतबासेलमा हाड परमेश्वरग्याम फेपूखबा हिन्ना भिसी डन्से विश्वास लजी।”

31 येशूसे थेनीगदेदा चुहड् भिसी सुड्जी, “तिग दान्दे मी एनीगदेसे डादा विश्वास लबा मुला? 32 च्यागो, चुहड्बा धुइएनोन खबान मुला, एनीगदे ससा बडबड तसी डा गिकदा जे ख्लासी हाड हाडला दिमरी निला, पाड्णोन तोःमा चु धुइ खसी जिन्बा मुला। तसैनोन थे धुइरी डा गिक जे आत, तिगदा भिसम डाला आबा सदन डादेन छ्याम मुला। 33 एनीगदे डादेन छ्याम गिक तसी शान्ति याड्सी चिबारी खमगै भिसीन डाइ एनीगदेदा चु जम्मान ताम पाड्बा हिन्ना। जम्बुलिडरी एनीगदेदा ल्हानान दुख तला, तर एनीगदेसे आँट लउ, तिगदा भिसम डाइ जम्बुलिडला जम्मान नइबा तामदा ढासी जिन्बा मुला।”

17

येशूला प्रार्थना

1 चु जम्मान ताम सुड्सी जिन्माहेन्से येशूसे स्वर्गपट्टि सहीसी चुहड् भिसी प्रार्थना लजी, “परमेश्वर आबा, दाहेन्से धुइ तसी जिन्बा मुला। हाड गाते घेन मुला भिसी उन्बाला लागिरी हाडसे हाडला झा गाते घेन मुला भिसी उन्गो। 2 हाडसे थेदा पिन्बा जम्मान म्हिगदेदा थेसे जुकजुकधोनाला जुनी पिन्खमगै भिसी हाडसे थेदा जम्बुलिडला जम्मान म्हिगदेशेरी शासन लबा अधिकार पिन्बा मुला। 3 हाड गिक जेन सत्य परमेश्वर हिन्ना भिसी डोसेबादेन हाडसे पुइखबा येशू ख्रीष्टदा डोसेबान जुकजुकधोनाला जुनी याड्बा हिन्ना। 4 हाडसे डादा जिम्मा पिन्बा गे पूरा लसी डाइ जम्बुलिडरी हाडदा मान लबा मुला। 5 परमेश्वर आबा, जम्बुलिड स्होबा भन्दा डाच्छा डा हाडदेन छ्याम मुबा धुइरी गाते घेन मानदेन जयजयकार मुबा। दाहेन्से थेहड् लसीन डादा हाडदेन छ्याम घेन स्होउ।

हाडला चेलागदेला लागिरी येशूसे लबा प्रार्थना

6 “हाडसे जम्बुलिडग्याम डादा पिन्बा जम्मान म्हिगदेदा डाइ हाड खाल हिन्ना भिसी डोसेना लबा मुला। थेनीगदे हाडलान म्हि मुबा, ओच्छे हाडसे डादा पिन्जी। थेनीगदे हाडला बचन अनछार भ्रबा मुला। 7 हाडसे डादा पिन्बा जम्मान ताम हाडग्यामसेन खबा हिन्ना भिसी दान्दे थेनीगदेसे था याड्सी जिन्बा मुला। 8 तिगदा भिसम हाडसे डादा पिन्बा बचन डाइ थेनीगदेदा लोपूबा मुला, ओच्छे थेनीगदे थे अनछार भ्रबान मुला। डा हाडग्याम खबा हिन्ना भिसी थेनीगदेसे घोबा मुला, ओच्छे डादा हाडसे पुइखबा हिन्ना भिसीएनोन थेनीगदेसे विश्वास लबा मुला।

9 “डाइ थेनीगदेलान लागिरी प्रार्थना लबान मुला, जम्बुलिडला म्हिगदेला लागिरी चा आहिन। तर हाडसे पिन्बा म्हिगदेलान लागिरी प्रार्थना लबान मुला, तिगदा भिसम थेनीगदे हाडलान हिन्ना। 10 डादेन छ्याम मुबा जम्मान हाडला हिन्ना, हाडदेन छ्याम मुबा जम्मान डाला हिन्ना। ओच्छे थेनीगदेग्याम डाला मानदेन जयजयकार तबा मुला।

11 “दाहेन्से डा हाड मुबा ग्लारी खबान मुला। ल्हानान धिनधोना डा चु जम्बुलिडरी आचि, तर चुगदे मी चु जम्बुलिडरीन चिला। थेतबासेलमा डाला आबा परमप्रभु परमेश्वर, हाडदेन डा गिक तबा हड् लसी चुगदेएनोन गिक तबाला लागिरी हाडसे डादा पिन्बा हाडला मिनग्याम थेनीगदेदा जोगब लसी थान्गो। 12 डा थेनीगदेदेन छ्याम मुबा धुइरी हाडसे डादा पिन्बा हाडला मिनग्याम डाइ थेनीगदेदा जोगब लसी थान्जी। नाश ततोःबा म्हि बाहेक स्युहान्दो खालैदान डाइ नाश तआपुड्नी। तिगदा भिसम परमेश्वरला बचनरी भिबा ताम पूरा तबाला लागिरीन चुहड् तबा हिन्ना।*

13 “तर दाहेन्से डा हाड मुबा ग्लारी खबान मुला। डाग्याम याड्बा ताड्बा थेनीगदेसे पूरान याड्गै भिसीन डाइ चु ताम जम्बुलिडरी मुबा धुइरीन पाड्बा मुला। 14 डा हाडसेन थेनीगदेदा हाडला बचन लोपूजी। तर थेनीगदेदा चु जम्बुलिडला म्हिगदेसे हेला लजी। तिगदा भिसम डा चु जम्बुलिडला आहिन्बा हड् थेनीगदेएनोन चु जम्बुलिडला आहिन। 15 थेनीगदेदा चु जम्बुलिडग्याम भोगो भिसी डाइ प्रार्थना आल, तर थेनीगदेदा शैतानग्याम जोगब लसी थान्गो। 16 डा चु जम्बुलिडला आहिन्बा

* 17:12 भजन ४१:९; १०९:४-८

हड् थेनीगदेएनोन चु जम्बुलिडला आहिन। 17 थेनीगदेदा सत्य बचनग्याम हाडदा तेन्बा चोखो म्हि सहोड। तिग्दा भिसम हाडला बचन सत्य मुला। 18 हाडसे डादा जम्बुलिडरी पुइखबा हड् लसी डाइएनोन थेनीगदेदा जम्बुलिडरी पुइबा मुला। 19 थेनीगदेसे हाडसे हाडदान पूरान चोखो थान्गै भिसी डाइनोन थेनीगदेला लागिरी हाडसे हाडदान चोखो सहोबा मुला।

हाडदा विश्वास लबागदे जम्मान गिक तसी चिगै भिसी येशूसे लबा प्रार्थना

20 “डाइ चुगदेला लागिरी जे आहिन, तर चुगदेला ताम थे:सी डादा विश्वास लबा म्हिगदेला लागिरीनोन प्रार्थना लला। 21 थेनीगदे जम्मान गिक तसी चिबारी खमगै। परमेश्वर आबा, हाड डादेन छ्याम ओच्छे डा हाडदेन छ्याम गिक तबा हड् लसी थेनीगदेएनोन यहाडदेन छ्याम गिक तबारी खमगै। ओच्छे डादा हाडसे पुइखबा हिन्ना भिसी जम्बुलिडला म्हिगदेसे विश्वास लबारी खमगै। 22 यहाड गिक तबा हड् लसी थेनीगदेएनोन गिक तसी चिबारी खमगै भिसी हाडसे डादा मान याड्बा म्हि सहोबा हड् लसी डाइएनोन थेनीगदेदा मान याड्बा म्हि सहोबा मुला। 23 डा थेनीगदेदेन छ्याम ओच्छे हाड डादेन छ्याम गिक तबा हड् लसी थेनीगदेएनोन पूरान गिक तबारी खमगै। ओच्छे डादा हाडसेन पुइखबा हिन्ना भिबादेन हाडसे डादा माया लबा हड् लसी हाडसे थेनीगदेदाएनोन माया लमुला भिसी जम्बुलिडला जम्मान म्हिगदेसे था याड्गै।

24 “परमेश्वर आबा, हाडसे जम्बुलिड सहोबा भन्दा डाच्छाहेन्सेन डादा माया लसी यहालदेन शक्ति पिन्बा मुला। चु ताम म्राड्बाला लागिरी हाडसे डादा पिन्बा जम्मान म्हिगदे डादेन छ्याम तगै भिबा डाला सेम मुला।

25 “ठीक निसाफ लबा परमेश्वर आबा, हाडदा जम्बुलिडला म्हिगदेसे डोसेबा आरे, तर डाइ हाडदा डोसेबा मुला। ओच्छे हाडसेन डादा पुइखबा हिन्ना भिसी डाला चेलागदेसे था याड्बा मुला। 26 हाडसे डादा लबा माया थेनीगदेदेन छ्याम तगै, ओच्छे डा थेनीगदेदेन छ्याम तबारी खमगै भिसी डाइ थेनीगदेदा हाड खाल हिन्ना भिसी डोसेना लबा मुला। अझ हाड खाल हिन्ना भिसी डाइ थेनीगदेदा सदन पाड्बाला।”

18

येशूदा चुड्बा

मत्ती २६:४७-५६; मर्कुस १४:४३-५०; लूका २२:४७-५३

1 प्रार्थना लसी जिन्माहेन्से येशू हाडला चेलागदेदेन छ्याम किद्रोन भिबा खोलसाला कयामसडपट्टि मुबा बगैचारी फेपजी। 2 थे ग्ला येशूदा चुड्सी पिन्बा यहूदादाएनोन था मुबा। तिग्दा भिसम येशू हाडला चेलागदेदेन छ्याम थे ग्लारी ल्हानान हड्बा फेपमुबा। 3 थे धुडरी फरिसीगदेदेन परमेश्वरला मन्दिररी पूजा लबा मुल म्हिगदेसे पुइखबा परमेश्वरला मन्दिर खुड्बा सिपाहीदेन रोमी सिपाहीगदेदा भसी यहूदा येशू मुबा ग्लारी धोखजी। थेनीगदे हतियार थोसी नाडसलदेन मेदड म्रासी खबा मुबा।

4 हाडदा तबारी छ्याड्बा जम्मान ताम था याड्सी थेनीगदेला डाच्छापट्टि फेपसी येशूसे थेनीगदेदा “एनीगदेसे खाल्दा म्हाइबा?” भिसी ड्योइजी। 5 जमाहेन्से थेनीगदेसे “नासरतला येशूदा म्हाइबा” भिसी भिमा, येशूसे थेनीगदेदा “डा थेनोन हिन्ना” भिसी सुड्जी। येशूदा चुड्सी पिन्बा यहूदाएनोन थेनीगदेदेन छ्यामनोन राप्सी चिबा मुबा। 6 येशूसे थेनीगदेदा “डा थेनोन हिन्ना” भिसी सुड्बा थे:मैछ्याम थेनीगदे ग्यापपट्टि ले:मा जम्मान हिल्जी। 7 दो:सी येशूसे थेनीगदेदा “एनीगदेसे खाल्दा म्हाइबान मुला?” भिसी सुड्मा, थेनीगदेसे “नासरतला येशूदा म्हाइबा” भिसी भिजी। 8 येशूसे थेनीगदेदा “डा थेनोन हिन्ना भिसी डाइ एनीगदेदा दोलोन पाड्सी जिन्जी। थेतबासेलमा एनीगदेसे डादान म्हाइबा हिन्सम चु म्हिगदेदा चा निपुड्गो” भिसी सुड्जी। 9 “हाडसे डादा पिन्बा म्हिगदे डाइ गिकनोन नाश तपुड्बा आरे” भिसी येशूसे डाच्छान सुड्बा ताम चुहड् लसी पूरा तजी।

10 सिमोन पत्रुससे हाडदेन छ्याम मुबा तरवार ते:सी परमेश्वरला मन्दिररी पूजा लबा मुल म्हिला नोकरदा ताम्मा दाहिनेपट्टिला नाब्यड च्वाट्टन थाजी। थेला मिन चा माल्खस मुबा।

11 येशूसे पत्रुसदा “एला तरवार स्युबारी झाङ्गो। तिग परमेश्वर आबासे नापुङ्बा दुख डाइ थानागो?” भिसी सुङ्गी।*

येशूदा हन्नास मुबा ग्लारी भोर्बा

12 जमाहेन्से रोमी सिपाहीगदेदेन थेनीगदेला कप्तान ओच्छे यहूदीगदेसे पुइबा परमेश्वरला मन्दिर खुङ्बा सिपाहीगदेसे येशूदा चुङ्गी खीजी। 13 ओच्छे डाच्छा थेनीगदेसे येशूदा कैयाफाला केन हन्नास मुबा ग्लारी भोर्बा। कैयाफा चा परमेश्वरला मन्दिररी पूजा लबा थे दिडला मुल म्हि मुबा। 14 चुनोन कैयाफासे “जम्मान म्हिगदेला लागिरी म्हि गिक सिबा चा ज्यबा हिन्ना” भिसी यहूदी नेतागदेदा सल्लाह पिन्बा मुबा।*

पत्रुससे येशूदा डोसेबा आरे भिसी लुसीला ताम पाङ्बा

मत्ती २६:६९-७०; मर्कूस १४:६६-६८; लूका २२:५५-५७

15 सिमोन पत्रुसदेन स्युहान्दो चेला गिक चा येशूदेन छ्याम छ्याम निजी। थे स्युहान्दो चेलासे चा परमेश्वरला मन्दिररी पूजा लबा मुल म्हिदा ज्यना लसी डोसेमुबा। थेतबासेलमा थे येशूदेन छ्यामनोन परमेश्वरला मन्दिररी पूजा लबा मुल म्हिला दिमला खाङ्गारी निजी। 16 तर पत्रुस चा म्नापरीन राप्सी चिबा मुबा। थेतबासेलमा परमेश्वरला मन्दिररी पूजा लबा मुल म्हिदा डोसेबा थे स्युहान्दो चेला मङ्ग्यार निसी म्नापरी चिबा म्निडम्हेमेदा पाङ्गी पत्रुसदा न्हङ्गी भजी।

17 जमाहेन्से म्नापरी चिबा थे म्निडम्हेमेसे पत्रुसदा “तिग एणोन थे म्हिला चेला आहिन?” भिसी भिमा, पत्रुससे थेदा “डा आहिन” भिसी भिजी।

18 खङ्बासे लमा थेरी नोकरगदेदेन पालेगदे मे दूसी चिबा मुबा। पत्रुसएनोन निसी थेनीगदेदेन छ्यामनोन मे दूबारी छ्याङ्गी।

परमेश्वरला मन्दिररी पूजा लबा मुल म्हिसे येशूदा ड्योइबा छार्बा लबा

मत्ती २६:५९-६६; मर्कूस १४:५५-६४; लूका २२:६६-७१

19 परमेश्वरला मन्दिररी पूजा लबा मुल म्हिसे येशूदा थेला चेलागदेदेन छ्याम थेसे लोपूबा तामला बारेरी ड्योइबा छार्बा लजी। 20 येशूसे थेदा चुहङ्ग भिसी सुङ्गी, “डाइ जम्मालान डाच्छा लोपूबा मुला। डाइ सदन यहूदीगदे हुप तबा दिमदेन परमेश्वरला मन्दिररी खबा जम्मान यहूदीगदेला डाच्छा लोपूबा मुला। डाइ खालैसे था आयाङ्ना लसी तिगै ताम पाङ्बा आरे। 21 डादा तिग्दा ड्योइबा? डाइ लोपूबा ताम थे:बागदेदा ड्योइगो। डाइ तिग पाङ्गी, तिग लोपूजी भिबा थेनीगदेदान था मुला।”

22 येशूसे चुहङ्ग सुङ्मा येशूला डामरी राप्सी चिबा परमेश्वरला मन्दिरला सिपाही गिकसे येशूदा तोबान, “परमेश्वरला मन्दिररी पूजा लबा मुल म्हिदेन छ्याम चुहङ्ग लसी ताम लबारी तला?” भिसी भिजी।

23 येशूसे थेदा “डाइ पाङ्बा ताम ठीक आहिनसम आहिन भिसी पाङ्गो। चुदे डाइ पाङ्बा ताम ठीक हिनसम तिग्दा डादा तोबा?” भिसी सुङ्गी। 24 जमाहेन्से हन्नाससे येशूदा आब्लानान परमेश्वरला मन्दिररी पूजा लबा मुल म्हि कैयाफा मुबा ग्लारी पुङ्गी।

दो:सीनोन पत्रुससे येशूदा डोसेबा आरे भिसी लुसीला ताम पाङ्बा

मत्ती २६:७१-७५; मर्कूस १४:६९-७२; लूका २२:५८-६२

25 सिमोन पत्रुसएनोन राप्सी मे दूसी चिबा धुङ्गी थेरी मुबा म्हिगदेसे थेदा “एणोन येशूलान चेला आहिन?” भिसी ड्योइमा, थेसे थेनीगदेदा “आहिन, डाइ थेदा डोसेबान आरे” भिसी लुसीला ताम पाङ्गी। 26 पत्रुससे नाब्यड थासी पिन्बा नोकरला हाङ्गलान म्हिणोन थेरी मे दूसी चिबा मुबा। थेणोन परमेश्वरला मन्दिररी पूजा लबा मुल म्हिला नोकर मुबा। थेसे पत्रुसदा “डाइ एदा थे म्हिदेन छ्यामनोन बगैचारी म्नाङ्बा आहिन?” भिसी भिमा, 27 पत्रुससे दो:सीनोन आहिन, भिसी जोहाब पिन्जी। जोहाब पिन्मैछ्याम नागा क्राजी।

* 18:11 मत्ती २६:३९; मर्कूस १४:३६; लूका २२:४२ * 18:14 यूह ११:४९-५०

येशूदा पिलातस मुबा ग्लारी भोर्बा

मती २७:१-२, ११-१४; मर्कूस १५:१-५; लूका २३:१-५

28 थेनीगदेसे येशूदा स्यूहोरीन कैयाफाला दिमग्याम रोमी अञ्चलाधीशला दरबाररी भोर्जी। तर हाड अशुद्ध तसी मिश्र यहूलसाग्याम फेसी खबा धिनदा ढन्सी धड्बा चाडरी तिगै चबा सहे चबारी आम्याड् भिसी थेनीगदे चा लोड्सी दरबार न्हडरी आवाड्नी।† 29 थेतबासेलमा रोमी हाकिम पिलातस मडग्यार खजी। ओच्छे थेसे थेनीगदेदा “एनीगदेसे चु महिला तिग दोष स्यापजी?” भिसी ड्योइमा, 30 थेनीगदेसे थेदा “चुदे चु महिला दोष आस्यापबा हिन्सम डन्से चु महिदा हाड मुबा ग्लारी आभसेला” भिसी भिजी।

31 पिलातससे थेनीगदेदा “चु महिदा एनीगदेसेन भोगो, ओच्छे एनीगदेला हाडलान ठिम अन्छार चु महिला निसाफ लउ” भिसी भिजी।

जमाहेन्से यहूदीगदेसे थेदा “खालै महिदा साइबाला सजाय पिन्बा डन्ना लागिरी ठीक आरे” भिसी भिजी। 32 हाड खाहड् लसी सितो:ला भिसी येशूसेन सुड्बा ताम पूरा तबाला लागिरीन चुहड् तबा मुबा।*

33 दरबार न्हडरी निसी पिलातससे येशूदा ड्योइजी, ओच्छे थेसे येशूदा “तिग ए यहूदीगदेला ग्ले हिन्ना?” भिसी ड्योइजी।

34 येशूसे पिलातसदा “चु ताम हाडसे हाडलान सेमग्याम सुड्बा हिन्ना कि स्यूहानदो खालै महिसे हाडदा डाला बारेरी पाड्बासे लमा चु ताम ड्योइबा हिन्ना?” भिसी सुड्जी।

35 पिलातससे येशूदा “तिग डा यहूदी हिन्ना? एलान यहूलला महिगदेदेन परमेश्वरला मन्दिररी पूजा लबा मुल महिगदेसे एदा चुरी भबा हिन्ना। एसे तिग लजी?” भिसी भिजी।

36 येशूसे पिलातसदा “डाइ शासन लबा चु जम्बुलिडरी आहिन। चुदे डाइ चु जम्बुलिडरी शासन लबा हिन्सम डादा यहूदीगदेला याग्याम जोगब लबारी डाला महिगदे थेनीगदेदेन छ्याम छेसेला मुबा। तर डाइ शासन लबा चुरी आहिन” भिसी सुड्जी।

37 पिलातससे येशूदा “थेहड् भिसम ए ग्लेनोन हिन्ना?” भिसी ड्योइमा, येशूसे पिलातसदा “डा ग्ले हिन्ना भिसी मी हाडसेन सुड्बा मुला। डा ग्ले दोबाला लागिरी न्हबा हिन्ना, ओच्छे चुनोन सत्य ताम घोना लबाला लागिरी डा चु जम्बुलिडरी खबा हिन्ना। थेतबासेलमा जुन महि सत्यला लिच्छा भ्रला थेसे डाला ताम ड्यानना” भिसी सुड्जी।

38 पिलातससे येशूदा “खाहड्बा सत्य ताम हिन्ना?” भिसी ड्योइजी।

चु तामगदे ड्योइमैछ्याम पिलातस मडग्यार यहूदीगदे मुबा ग्लारी निसी चुहड् भिसी भिजी, “डाइ चु महिला तिगै दोष आस्यापनी। 39 तर मिश्र यहूलसाग्याम फेसी खबा धिनदा ढन्सी धड्बा चाडला धुडरी डाइ एनीगदेला लागिरी महि गिकदा ख्लासी पिन्तो:मुबा। थेतबासेलमा डाइ चु यहूदीगदेला ग्लेदा ख्लासी पिन्गै भिसी एनीगदेसे म्हन्बा मुला?”

40 तर थेनीगदेसे “चु महिदा आहिन, तर बारब्बादा ख्लासी पिन्गो” भिसी क्रिड्बान भिजी। बारब्बासे चा आन्दोलन लसी महि साइबा मुबा।

19

येशूदा सिबाला सजाय पिन्बा

मती २७:१५-३१; मर्कूस १५:६-२०; लूका २३:१३-२५

1 जमाहेन्से पिलातससे येशूदा भोर्सी कोर्से तोउ भिसी रोमी सिपाहीगदेदा कुल्जी। 2 कोर्से तोमाहेन्से सिपाहीगदेसे पुजुला फेटा सहोसी येशूदा थोइसी पिन्जी, ओच्छे ग्लेसे क्वान्बा हड्बान वाला वाला पिड्गै छोनना क्वानएनोन क्वान्सी पिन्जी। 3 ओच्छे येशूला डामरी खसी, “लास्सो यहूदीगदेला ग्ले, फ्याफुल्ला” भिसी येशूदा खिसी लबान ग्रम्बारी तोबारी छ्याइजी।

† 18:28 यहूदीगदेला ठिम अन्छार यहूदीगदे अर्गु यहूलला महिगदेला दिमरी वाड्जी भिसम अशुद्ध तमुबा। * 18:32 यूह ३:१४; १२:३२

4 पिलातस दोःसी मडग्यार खसी थेरी मुबा म्हिगदेदा “च्यागो, डाइ चु म्हिदा सजाय पिन्बा तिगै दोष आस्यापनी। चु ताम एनीगदेदा था तगै भिसी डाइ थेदा मडग्यार भवा मुला” भिसी भिजी। 5 येशू पुजुला फेटादेन वाला वाला पिडगै छोनना क्वान क्वान्सीन मडग्यार फेपखजी। जमाहेन्से पिलातससे थेनीगदेदा “लु, च्यागो, चु म्हिदा!” भिसी भिजी।

6 परमेश्वरला मन्दिररी पूजा लबा मुल म्हिगदेदेन सिपाहीगदेसे येशूदा म्राड्मैछ्याम “चुदा क्रुसरी टाँगब लसी साइगो, क्रुसरी साइगो!” भिसी क्रिड्बाला क्रिड्बान लजी। जमाहेन्से पिलातससे थेनीगदेदा “चु म्हिदा एनीगदेसेन भोर्सी क्रुसरी टाँगब लउ, तिग्दा भिसम चु म्हिदा सजाय पिन्तोःबा तिगै दोष डाइ आस्यापनी” भिसी भिजी।

7 यहूदीगदेसे थेदा “डन्ना ठिम गिक मुला थे ठिम अन्छार चुदा साइनोन तोःला। तिग्दा भिसम चुसे हाडसे हाडदान परमेश्वरला झा सहोबा मुला” भिसी भिजी।

8 चु ताम थेःसी पिलातस झन लोड्जी। 9 पिलातससे दोःसी दरबार न्हडरी वाड्सी येशूदा “ए खानडला हिन्ना?” भिसी ड्योड्जी। तर येशूसे थेदा तिगै जोहाब आपिन्नी। 10 थेतबासेलमा पिलातससे येशूदा “तिग ए डादेन छ्याम ताम आपाड्? एदा ख्लासी पिन्बा अधिकार डादा मुला, ओच्छे एदा क्रुसरी टाँगब लसी साइबा अधिकारएनोन डादा मुला भिसी एदा था आरे?” भिसी भिजी।

11 येशूसे थेदा “चु अधिकार परमेश्वरसे आपिन्बा हिन्सम हाडसे डादा तिगै लबारी आखम्बसेला मुबा। थेतबासेलमा डादा हाडला जिम्मारी पिन्बा म्हिदा झन ल्हाना पापला दोष तला” भिसी सुड्जी।

12 चु ताम थेःसी पिलातससे झन येशूदा ख्लाबारी म्हाड्जी। तर यहूदीगदेसे क्रिड्बान चुहड् भिसी भिजी, “चुदे हाडसे चु म्हिदा ख्लाजी भिसम हाड रोमी ग्याल्बो कैसरला म्हि आहिन। जुन म्हिसे हाडसे हाडदान ग्ले हिन्ना भिसी पाड्ला थे म्हिसे रोमी ग्याल्बो कैसरला बिरोध लबा हिन्ना।”

13 चु ताम थेःसी पिलातससे येशूदा मडग्यार भजी ओच्छे पिलातस युडबा तीबा खाडगारी निसाफ लबा ठिरी चिजी। थे युडबा तीबा खाडगादा हिब्रू ग्योडरी गबबथा भिसी भिमुला। 14 थे धुडरी ओस्पन धिनना बाह बजब तसी जिन्बा मुबा। थे धिन चा मिश्र यहूलसाग्याम फेसी खबा धिनदा ढन्सी धड्बा चाड धड्बारी तयार लबा धिन मुबा। पिलातससे यहूदीगदेदा “च्यागो, एनीगदेला ग्ले” भिसी भिजी।

15 तर थेनीगदेसे “चुदा क्रुसरी टाँगब लसी साइबारी भोर्नोन तोःला” भिसी क्रिड्बाला क्रिड्बान लजी। जमाहेन्से पिलातससे थेनीगदेदा “थेहड् भिसम डाइ एनीगदेला ग्लेदा क्रुसरी टाँगब लसी साइगो?” भिसी भिमा, परमेश्वरला मन्दिररी पूजा लबा मुल म्हिगदेसे “रोमी ग्याल्बो कैसर बाहेक डन्ना स्य्हान्दो खालै ग्ले आरे” भिसी भिजी।

16 थेतबासेलमा चु ताम थेःसी पिलातससे येशूदा क्रुसरी टाँगब लसी साइगो भिसी थेनीगदेदा जिम्मा लसी पिन्जी। जमाहेन्से येशूला जिम्मा सिपाहीगदेसे किन्जी।

येशूदा क्रुसरी साइबा

मत्ती २७:३२-४४; मर्कूस १५:२१-३२; लूका २३:२६-४३

17 येशूसे हाडला क्रुस हाडसेन पुड्सी, “खप्परला ग्ला” भिबा ग्लारी फेपजी, चु ग्लादा हिब्रू ग्योडरी गलगथा भिमुबा। 18 थेरी धोमाहेन्से थेनीगदेसे येशूदा क्रुसरी टाँगब लजी, ओच्छे यहो न्हीदाएनोन गिकदा येशूला दाहिनेपट्टि गिकदा देब्रेपट्टि क्रुसरी टाँगब लजी। येशूदा चा गुडरी थान्जी।

19 पिलातससे “नासरतला येशू, यहूदीगदेला ग्ले” भिसी भिबा ताम येशूला थोबो भन्दा फिरी क्रुसरी ठोक्पुड्जी। 20 चु ताम ल्हानान यहूदीगदेसे पढब लजी। तिग्दा भिसम येशूदा क्रुसरी टाँगब लसी साइबा ग्ला शहरला डामरीन मुबा। चु ताम हिब्रू, ल्याटिनदेन ग्रीक ग्योडरी भिबा मुबा। 21 परमेश्वरला मन्दिररी पूजा लबा यहूदीगदेला मुल म्हिगदेसे पिलातसदा “यहूदीगदेला ग्ले” भिसी आहिन, तर चुसे डा यहूदीगदेला ग्ले हिन्ना भिजी भिसी भिउ” भिसी भिजी।

22 पिलातससे थेनीगदेदा “डाइ जुन ताम भिसै, भिसी जिन्जी, तजी” भिसी भिजी।

23 येशूदा क्रुसरी टाँगब लमाहेन्से सिपाहीगदेसे येशूला क्वान भो बलि लसी हाड हाड न्हडरी भो लजी। ओच्छे थेनीगदेसे येशूसे न्हडरी क्वान्बा क्वानएनोन किन्जी, तर थे क्वान चा आढुपना

तोरहेन्से मारधोनान रासी स्होबा मुबा। ²⁴ थेतबासेलमा थेनीगदेसे “चु चा आढेगे, तर खाल्दा परब तबा चीम चिट्टा युसी च्यागे” भिसी हाड हाड न्हडरी ताम लजी। बचनरी भिबा ताम पूरा तबाला लागिरीन चुहड् तबा मुबा। बचनरी

“थेनीगदेसे डाला क्वान हाड हाड न्हडरी भो लजी,
ओच्छे डाला क्वान किन्बाला लागिरी चा चिट्टा युजी”*

भिसी भिबा मुबा।

थेतबासेलमा सिपाहीगदेसे चु गे लजी।*

²⁵ येशूला आमामेन येशूला आमाला आडा ओच्छे क्लोपासला म्रिड मरियमदेन मरियम मग्दलिनी येशूला क्रुसला डामरी राप्सी चिबा मुबा। ²⁶ येशूसे हाडला आमामेन हाडसे माया लबा चेला डामरी राप्सी चिबा म्राड्सी आमामेन “आमा च्यागे, दाहेन्से चु हाडला झा हिन्ना” भिसी सुड्जी। ²⁷ ओच्छे येशूसे थे चेलादाएनोन “च्यागे, दाहेन्से थे एला आमामेन हिन्ना” भिसी सुड्जी। जमाकुनुहेन्से थे चेलासे येशूला आमामेन मरियमदा हाडला दिमरी भोजी।

येशू सिबा

मत्ती २७:४५-५६; मर्कूस १५:३३-४१; लूका २३:४४-४९

²⁸ “दाहेन्से डाइ लतो:बा गे जिन्जी” भिसी येशूसे था याड्सी बचनरी भिबा जम्मान ताम पूरा तगै भिसी येशूसे “डादा क्युड फुड्जी” भिसी सुड्जी।* ²⁹ थेरी अडगुरला कम्बा निडगु मुबा ताड गिक मुबा। थेतबासेलमा सिपाहीगदेसे हिसप भिबा दोडला हाँगारी क्वानगेन खीसी थे निडगुरी ब्लुम्सी येशूदा ख्वाजी। ³⁰ अडगुरला निडगु सोल्माहेन्से येशूसे “दाहेन्से डाला गे जिन्जी” भिसी थोबो कु लजी। जमाहेन्से येशूला सा निजी।

येशूला राइरी भालासे भ्लोबा

³¹ थे धिन चा मिश्र यहुल्साग्याम फेसी खबा धिनदा ढन्सी धड्बा चाड धड्बारी तयार लबा धिन मुबा। चु धिन चा यहूदीगदेसे ब्लपबा न्हबा धिनना डाच्छाकुनु मुबा। न्हडगरदड मिश्र यहुल्साग्याम फेसी खबा धिनदा ढन्सी धड्बा चाड धड्बा धिन परब तबासे लमा जमाकुनुला ब्लपबा न्हबा धिन चा थेनीगदेला लागिरी मुल धिन मुबा। थेतबासेलमा थे मुल धिनकुनु क्रुसरी खालैलान लास आतगै भिसी यहूदीगदेसे हाड हाड न्हडरी सल्लाह लजी। ओच्छे थेनीगदे पिलातस मुबा ग्लारी निसी, “सिबाला सजाय पिन्बा म्हिगदे योनान सिगै भिसी थेनीगदेला काड क्युड्सी क्रुसग्याम मार ते:पुड्गो” भिसी बिन्ती लजी। ³² जमाहेन्से सिपाहीगदे खसी डाच्छा येशूदेन छ्यामनोन क्रुसरी टाँगब लबा म्हि न्हीला काड क्युड्जी। ³³ येशूलाएनोन स्यहाप क्युड्बारी छ्याइमा थेनीगदेसे येशू डाच्छान सिसी जिन्बा म्राड्जी। थेतबासेलमा थेनीगदेसे येशूला स्यहाप आक्युड्नी। ³⁴ तर सिपाही गिकसे येशूला राइरी भालासे भ्लोमा येशूला राइग्याम कादेन क्युड् थोन्जी। ³⁵ एनीगदेसेनोन विश्वास लखमगै भिसी चु म्राड्बा म्हिसे जस्तो तबा म्राड्बा मुबा थेहड्बान पाड्बा मुला। चु ताम सत्य हिन्ना भिबा थेदा था मुला। ³⁶ “थेला नखु गिकनोन आक्युड्” भिसी बचनरी भिबा ताम पूरा तबाला लागिरीन चुहड् तबा हिन्ना।* ³⁷ दो:सी बचनना अर्गु ग्लारी “जुन म्हिदा थेनीगदेसे भ्लोला, थेनोन म्हिदा थेनीगदेसे च्याला” भिसी भिबा मुला।*

येशूदा धुर्सारी थान्बा

मत्ती २७:५७-६१; मर्कूस १५:४२-४७; लूका २३:५०-५६

³⁸ यहूदीगदेदेन छ्याम लोड्सी स्यहान्दासे था आयाड्ना येशूदा विश्वास लबा अरिमाथिया भिबा शहरला योसेफ भिबा चेला गिक मुबा। थेसे पिलातसदेन छ्याम येशूला लास हीजी, जमाहेन्से पिलातससे थेदा “तला, भोर्गो” भिसी भिजी। जमाहेन्से थे निसी येशूला लास क्रुसग्याम मार ते:सी भोजी। ³⁹ ओच्छे डाच्छा म्हुनड येशू मुबा ग्लारी निबा निकोदेमसएनोन बोगल गिकसे च्युक सोम

* 19:24 भजन २२:१८ * 19:24 भजन २२:१८ * 19:28 भजन ६९:२१ * 19:36 प्रस्था १२:४६; गन्ती ९:१२; भजन ३४:२०

* 19:37 जक १२:१०

किलो ते मूर्देन घ्युकुमारी दोड्सी सहोबा ज्यबा बासना खबा अत्तर भसी खजी।* 40 चुहड् लसी थेनीगदेसे यहूदीगदेला ठिम अनछार येशूला लासरी थे बासना खबा अत्तर फोर्सी मलमलला क्वानरी रिल्जी। 41 येशूदा क्रुसरी टाँगब लबा ग्लाला डामरी बगैँचा गिक मुबा। थे बगैँचारी खालैलान लास आथान्बा छार धुर्सा गिक मुबा। 42 यहूदीगदेसे ब्लपूबा न्हबा धिनना डाच्छाकुनुला धिन तबासे लमा थेनीगदेसे येशूला लास थे डामरीन मुबा धुर्सारी थान्जी।

20

येशू धुर्सारी आरेबा

मत्ती २८:१-८; मर्कूस १६:१-८; लूका २४:१-१२

1 आइतवार स्य्होरीन मरियम मग्दलिनीं येशूला लास थान्बा धुर्सारी निजी। धुर्सारी धोसी च्यामा थेसे धुर्साला म्नापरी मुबा युड्बा लेःसी जिन्बा म्नाड्जी। 2 जमाहेन्से थे थेग्याम यार्बान सिमोन पत्रुसदेन येशूसे माया लबा चेला मुबा ग्लारी निसी, “थेनीगदेसे यहाडला प्रभुदा धुर्साग्याम भोर्जीम! तर खानड भोर्सी थान्जी भिबा डन्दा था आरे” भिसी भिजी।

3 जमाहेन्से तुरुन्तन पत्रुसदेन थे चेला यार्बान धुर्सारी निजी। 4 थेन्नी छ्याम छ्यामनोन यार्सी निमा पत्रुसदा ख्लासी थे स्य्हान्दो चेला चा धुर्सारी डाच्छा धोजी। 5 धुर्साला म्नापग्याम योइ तसी च्यामा थेसे डाच्छा येशूदा बेरब लबा क्वान जे म्नाड्जी, तर थे धुर्सा न्हडरी आवाड्नी। 6 सिमोन पत्रुसएनोन थे चेलाला लिच्छा लिच्छा खसी धुर्सा न्हडरी वाड्सी च्याजी। थेसेनोन थेरी येशूदा बेरब लबा मलमलला क्वान जे म्नाड्जी। 7 येशूला थोबोरी बेरब लबा क्वान चा मलमलला क्वानदेन छ्याम आरेबा। तर जजाकी क्वाथाडपट्टि भसी पट्ट्याब लसी थान्बा मुबा। 8 जमाहेन्से पत्रुस भन्दा डाच्छा धोखबा चेलाएनोन धुर्सा न्हडरी वाड्सी च्याजी। चु म्नाड्माहेन्से थेसे येशू सिबाग्याम सोजीम भिसी विश्वास लजी। 9 तिग्दा भिसम येशू सिबाग्याम दोःसी सोनोन तोःला भिसी बचनरी भिबा ताम थेनीगदेसे दान्देधोना घोबा आरेबा। 10 जमाहेन्से थे चेला न्ही हाडला दिमरी निजी।

येशू मरियम मग्दलिनी मुबा ग्लारी फेप्खबा

मत्ती २८:९-१०; मर्कूस १६:९-११

11 तर मरियम मग्दलिनी चा क्राबान धुर्साला डामरी राप्सी चिबा मुबा। क्राबान थेसे धुर्सा न्हडरी योइ तसी च्यामा, 12 येशूला लास थान्बा ग्लारी तार क्वान क्वान्बा स्वर्गदूत न्हीदा म्नाड्जी, गिक येशूला थोबोपट्टि गिक स्य्हापपट्टि मुबा। 13 थे स्वर्गदूत न्हीसे थेदा “माइ, ए तिग्दा क्राबा?” भिसी ड्योइमा, थेसे थेनीगदेदा “म्हिगदेसे डाला प्रभुदा भोर्जीम, थे म्हिगदेसे प्रभुदा खानड भोर्सी थान्जी भिबा डादा था आरे” भिसी भिजी।

14 चुहड् भिसी थेसे ग्यापपट्टि च्यामा येशू राप्सी स्य्हूबा म्नाड्जी। तर थेसे येशून हिनना भिसी डोआसेनी।

15 येशूसे थेदा “माइ, ए तिग्दा क्राबा? एसे खाल्दा म्हाइबा?” भिसी सुड्मा, थेसे येशूदा बगैँचारी म्हेन्दो क्वबा म्हि मुनम भिसी, “ज्योज्यो, हाडसे येशूदा चुग्याम भोर्बा हिनसम खानड थान्बा मुला डादा सुड्गो, डाइ थेदा भोर्ला” भिसी भिजी।

16 येशूसे थेदा “मरियम!” भिसी ड्योइमा, फ्लिक दोःसी थेसे येशूदा, हिब्रू ग्योइरी “रब्बोनी” भिसी भिजी। “रब्बोनी” भिबा चा “डाला गुरु” भिबा हिनना।

17 येशूसे थेदा “डादा चुड्सी थाथान्गो, तिग्दा भिसम डा दान्देधोना आबा मुबा ग्लारी निबा आरे। तर ए डाला ज्योज्यो आले नाना आडागदे मुबा ग्लारी निसी थेनीगदेदा ‘डाला आबादेन एनीगदेला आबा ओच्छे डाला परमेश्वरदेन एनीगदेला परमेश्वर मुबा ग्लारी डा निबान मुला’ भिसी पाड्सी पिन्गो” भिसी सुड्जी।

* 19:39 यूह ३:१-२ † 20:1 मत्ती, मर्कूसदेन लूकारी च्यामा स्य्हान्दो प्रिड्महेमे न्हीएनोन मुला, तर चु पदरी चा स्य्हान्दो प्रिड्महेमे न्हीला मिन पाड्बा आरे।

18 जमाहेन्से मरियम मगदलिनी चेलागदे मुबा ग्लारी निसी, “डाइ प्रभुदा म्राङ्जी” भिसी भिजी। ओच्छे येशूसे थेदा सुड्बा ताम थेनीगदेदाएनोन पाङ्सी पिन्जी।

येशू चेलागदे मुबा ग्लारी फेप्खबा

मत्ती २८:१६-२०; मर्कुस १६:१४-१८; लूका २४:३६-४९

19 थेनोन धिनकुनु ड्यसे येशूला चेलागदे यहूदी नेतागदेदेन छ्याम लोङ्सी म्राप ढुङ्सी चिबा मुबा। थे धुइरीन येशू थेनीगदे मुबा ग्लारी फेप्खसी थेनीगदेला गुडरी राप्सी धन्छ्याजी। ओच्छे येशूसे थेनीगदेदा “एनीगदेदा शान्ति तगै” भिसी सुङ्जी। 20 चुहङ् सुड्माहेन्से येशूसे थेनीगदेदा हाडला यादेन राइ उन्जी। प्रभुदा म्राङ्सी थेनीगदे ल्हानान ताङ्जी।

21 जमाहेन्से येशूसे दोःसीनोन थेनीगदेदा “एनीगदेदा शान्ति तगै! डाला आबासे डादा पुइखबा हङ् लसी डाइएनोन एनीगदेदा पुइबान मुला” भिसी सुङ्जी। 22 जमाहेन्से येशूसे थेनीगदेदा फू लसी चुहङ् भिसी सुङ्जी, “परमेश्वरला आत्मा किन्गो। 23 जुन महिला पाप एनीगदेसे माफ लला, थेनीगदेसे माफ याङ्ला, ओच्छे जुन महिला पाप एनीगदेसे माफ आल, थेनीगदेसे माफ आयाङ्।”*

येशू थोमा मुबा ग्लारी फेप्खबा

24 येशू फेप्खबा धुइरी च्युक न्ही चेलागदे न्हडरी दिदुमस भिबा थोमा चा थेनीगदेदेन छ्याम आरेमुबा। 25 थेतबासेलमा स्यहान्दो चेलागदेसे थेदा “डन्से प्रभुदा म्राङ्जी” भिसी भिजी। तर थेसे थेनीगदेदा “येशूला यारी खिल ठोक्बाला पोर आम्राङ्तेधोना, ओच्छे थे पोरदेन राइला पोररी डाला या जुम्बी आङ्गाङ्तेधोना डाइ विश्वास आल” भिसी भिजी।

26 साता गिक लिच्छाएनोन चेलागदे दिमरीन म्राप ढुङ्सी चिबा मुबा। जमा चा थोमाएनोन थेनीगदेदेन छ्यामनोन मुबा। तर येशू थेनीगदे मुबा ग्लारी फेप्खसी थेनीगदेला गुडरी राप्सी धन्छ्याजी, ओच्छे “एनीगदेदा शान्ति तगै!” भिसी सुङ्जी। 27 जमाहेन्से येशूसे हाडला छ्या उन्बान थोमादा “एला या जुम्बी चुरी थान्गो, ओच्छे डाला या च्यागो। ओच्छे एला यासे डाला राइरी थुर्सी च्यागो। एसे शङ्गा थालउ, तर विश्वास लउ” भिसी सुङ्जी।

28 थेनोन धुइरी थोमासे येशूदा “डाला प्रभुदेन परमेश्वर!” भिसी भिजी।

29 येशूसे थेदा “एसे डादा म्राङ्बासे लमा विश्वास लबा आहिन? तर जुन म्हिसे डादा आम्राङ्सैनोन विश्वास लला, थेसे गाते ल्हानान मोलम याङ्ला” भिसी सुङ्जी।

30 येशूसे हाडला चेलागदेला डाच्छा ल्हानान उदेकला गेदेन शक्तिशाली गेगदे लबा मुबा, थे तामगदे चु किताबरी भिबा आरे। 31 तर एनीगदेसे येशू परमेश्वरला झा थार्बा पिन्बा ख्रीष्ट हिनना भिसी विश्वास लगै भिसीन चु किताब भिबा हिनना। थेदा विश्वास लसी एनीगदेसे जुकजुकधोनाला जुनी याङ्गै।

21

येशू हाडला चेला निस मुबा ग्लारी फेप्खबा

1 जमाहेन्से येशू दोःसी गालील अञ्चलला तिबेरियास भिबा समुन्द्रला कुनीरी हाडला चेलागदे मुबा ग्लारी फेप्खजी। चुहङ् लसी येशू थेनीगदे मुबा ग्लारी फेप्खजी। 2 थेरी सिमोन पत्रुस, दिदुमस भिबा थोमा, गालील अञ्चलला काना भिबा शहरला नथानेलदेन जब्दियाला झा न्ही, ओच्छे स्यहान्दो चेला न्ही पोप तसी चिबा मुबा। 3 सिमोन पत्रुससे हाडला ह्योगदेदा “दाहेन्से डा मी तार्डा साइबारी निला” भिसी भिमा, थेला ह्योगदेसे “डनीएनोन एदेन छ्यामनोन निला” भिसी भिजी। जमाहेन्से थेनीगदे दोंगारी क्रैःजी। तर थेनीगदेसे म्हुन गिकरी तार्डा गिकनोन चुङ्बारी आखम्नी।*

4 य्हाल तबारी छ्याइबा धुइरी येशू समुन्द्रला कुनीरी राप्सी धन्छ्याबा मुबा। तर चेलागदेसे येशून हिनना भिसी डोआसेनी। 5 येशूसे थेनीगदेदा “कोलागदे, एनीगदेदेन छ्याम तार्डा मुला?” भिसी ड्योइमा, थेनीगदेसे “आरे” भिसी भिजी। 6 येशूसे थेनीगदेदा “एनीगदेसे दोंगाला दाहिनेपट्टि घ्याड रोप्गो तार्डा

* 20:23 मत्ती १६:१९; १८:१८ * 21:3 लूका ५:५

स्याप्ला” भिसी सुड्जी। थेनीगदेसे येशूसे सुड्बा ग्लारी घ्याड रोप्मा लहानान तार्डा स्याप्लासे लमा घ्याडनोन छेड्बारी आखम्नी।* 7 येशूसे माया लबा चेलासे पत्रुसदा “थे मी प्रभु गा चीम” भिसी भिजी। “थे मी प्रभु गा चीम” भिबा थे:सी सिमोन पत्रुस हाडला क्वान क्रेप्सरी खीसी समुन्द्ररी वाड्जी। तिग्दा भिसम थेसे क्वान स्युबा मुबा। 8 तर स्युहान्दो चेलागदे चा दोंगारीन चिसी तार्डासे प्लिड्बा घ्याड छेड्बान समुन्द्रला कुनीरी खजी। समुन्द्रला कुनीग्याम थेनीगदे लहाना थारेड आरेमुबा, ओस्पन ग्यार्जा गिक मिटर ते जे थारेड मुबा। 9 समुन्द्रला कुनीरी धोखमाहेन्से थेनीगदेसे मेभुप्यारी तार्डा प्राड्जी ओच्छे गेडएनोन प्राड्जी।

10 येशूसे थेनीगदेदा “एनीगदेसे भर्खर चुड्बा तार्डा जजाकी भउ” भिसी सुड्जी।

11 जमाहेन्से सिमोन पत्रुस दोंगारी क्रे:सी घेन घेन तार्डासे प्लिड्बा घ्याड छेड्बान पाखारी भजी। थेरी ग्यार्जा गिकसे बोगल न्हीसे च्युक सोम तार्डा मुबा। ओते लहाना मुसैनोन घ्याड चा आढेनी। 12 येशूसे थेनीगदेदा “चबारी खउ” भिसी सुड्जी। तर चेलागदे खालैसेन येशूदा “हाड खाल हिन्ना?” भिसी ड्योड्बा सेम आलनी। तिग्दा भिसम येशू प्रभु हिन्ना भिसी थेनीगदेसे डोसेसी जिन्बा मुबा। 13 येशू फेप्वखी थेनीगदेदा गेडदेन तार्डा पिन्जी। 14 येशूदा सिबाग्याम सोना लमाहेन्से हाडला चेलागदे मुबा ग्लारी फेप्वखा चु सोमरेमला पालरी मुबा।

येशूदेन पत्रुस

15 थेनीगदेसे चसी जिन्माहेन्से येशूसे सिमोन पत्रुसदा “यूहन्नाला झा सिमोन, तिग एसे डादा चुगदेसे भन्दा लहाना माया लला?” भिसी सुड्जी।

जमाहेन्से पत्रुससे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहड् भिसम एसे डाला ग्युला कोलागदेदा ज्यना लसी छउ” भिसी सुड्जी।

16 येशूसे दो:सी, “यूहन्नाला झा सिमोन, तिग एसे डादा माया लला?” भिसी सुड्जी।

जमाहेन्से थेसे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहड् भिसम एसे डाला ग्युगदेदा ज्यना लसी च्यागो” भिसी सुड्जी।

17 येशूसे दो:सीनोन थेदा “यूहन्नाला झा सिमोन, तिग एसे डादा माया लला?” भिसी सुड्जी।

येशूसे चुहड् लसी सोमरेमधोना “तिग एसे डादा माया लला?” भिसी सुड्बासे लमा लहानान आज्यना इहम्सी पत्रुससे येशूदा “प्रभु, हाडदा जम्मान ताम था मुला। डाइ हाडदा माया लमुला भिबा तामएनोन हाडदा था मुला” भिसी भिजी।

जमाहेन्से येशूसे थेदा चुहड् भिसी सुड्जी, “थेहड् भिसम एसे डाला ग्युगदेदा ज्यना लसी छउ।

18 एसे डाला ताम ड्यानगो, ए भ्योन मुबा धुडरी एसे हाडला के: हाडसेन खीमुबा, ओच्छे जुन ग्लारी निबा सेम लमुबा थेरीन निमुबा। तर खेप्ला दोमाहेन्से एसे तिगै लबारी आखम, एदा स्युहान्दो म्हिसे के: खीसी पिन्ना ओच्छे जुन ग्लारी एदा निआमहन थेरीन एदा भोर्ला” भिसी सुड्जी। 19 चु ताम चा परमेश्वरदा मान लबादेन जयजयकार लबारी पत्रुस खाहड् लसी सितो:ला भिसी येशूसे सुड्बा हिन्ना। चु ताम सुड्सी जिन्माहेन्से येशूसे पत्रुसदा “ए डादेन छ्याम भउ” भिसी सुड्जी।†

येशूसे माया लबा चेला

20 पत्रुससे ग्याप दो:सी च्यामा येशूसे माया लबा चेला लिच्छा लिच्छा खबान लबा प्राड्जी। चुनोन चेलासे भोज चबा धुडरी येशूला डामरी चिसी, “प्रभु, हाडदा चुड्सी पिन्बा म्हि खाल हिन्ना?” भिसी ड्योड्बा मुबा।* 21 थेदा प्राड्सी पत्रुससे येशूदा “चुला चा तिग तला?” भिसी ड्योड्जी।

22 जमाहेन्से येशूसे पत्रुसदा “डा आखतेधोना थेसे डादा भान्सी चिड् भिबा डाला सेम मुसैनोन एदा तिग्दा तो:जी? ए चा डादेन छ्याम भउ” भिसी सुड्जी। 23 थेतबासेलमा थे चेला आसिनम भिबा ताम

* 21:6 लूका ५:६ † 21:15 “ग्युला कोलागदे” भिबा चा येशूदा विश्वास लबा म्हिगदे हिन्ना। † 21:19 लहाना हड्बा बाइबल विद्वानगदेसे पत्रुसदा बोगल गिकसे च्युड् दिड् लिच्छा थोबो ग्युरो लसी कुसरी टांगब लसी साड्जी भिसी पाड्बा मुला। * 21:20 यूह १३:२५

स्य्हान्दो चेलागदेसे था याङ्जी। येशूसे मी थे आसि भिसी सुङ्बा अरेमुबा, तर “डा आखतेधोना थेसे डादा भ्रान्सी चिइ भिबा डाला सेम मुसैनोन एदा तिग्दा तो:जी?” भिसी जे सुङ्बा मुबा।

²⁴ चुनोन चेलासे चु जम्मान ताम पाङ्बा हिन्ना, ओच्छे थेसेन चु ताम भ्रिबा हिन्ना। थेसे पाङ्बा तामदेन भ्रिबा ताम सत्य मुला भिसी डन्दा था मुला।

²⁵ येशूसे अर्गुणोन ल्हानान गेगदे लबा मुला। थे जम्मान गेला बारेरी भ्रिबा हिन्सम चु किताबगदे जम्बुलिड नाडनोन आवाङ्सेला मुबा भिसी डाइ म्हन्मुला।

मुल चेलागदेला गे चु किताबला बारेरी पाड्तो:मा

भ्रिबा म्हि: येशूला मुल चेला पावलला हो लूकासे भ्रिबा मुबा (२ तिमोथी ४:११)। थे अर्गु यहुलला म्हि हिन्ना। थे डाक्टर मुबा (कलस्सी ४:१४)। थेसे थाबा पिनबा समाचारएनोन गिक भ्रिबा मुबा।

भ्रिबा ग्ला: रोम शहररी भ्रिबा मुबा।

भ्रिबा साल: ओस्पन ईश्वी संवत् ६०-७० (विक्रम संवत् ११७-१२७) सालला गुडरी भ्रिबा मुबा। लूकासे थाबा पिनबा समाचार भ्रिमाहेन्से चु किताब भ्रिबा मुबा। चु किताब न्ही चा भो गिकदेन भो न्ही हड्बा मुबा।

खाल्दा भ्रिबा: येशूला मुल चेलागदेसे लबा गेगदे घोना लबाला लागिरी थियोफिलस भिबा म्हिदा भ्रिबा हिन्ना।

चु किताब लूकासे हाडसे भ्रिबा “थाबा पिनबा समाचार” भ्रिसी जिन्माहेन्से भ्रिबा मुबा। चु किताबदा नेपाली बाइबलरी “प्रेरित” भिसी भ्रिबा मुला। चु किताबरी पाड्बा मुल ताम चा प्रभु येशूला जम्मान भन्दा डाच्छाला चेलागदेसे खाहड् लसी परमेश्वरला आत्माला शक्ति याड्सी थाबा पिनबा समाचार यरूशलेमहेन्से जम्बुलिडला कानाकुनी जम्मान ग्लारी धोना लजी भिसी पाड्बा हिन्ना (मुल चेला १:८)। चु ताम यहूदीगदेग्याम शुरु तसी लिच्छा जम्बुलिडला जम्मान म्हिगदेला लागिरीनोन येशूदा तेन्बा ग्याम दोबा हिन्ना। चु किताबरी स्त्रीष्टियानगदे रोमी सरकारदा बिरोध लबागदे आहिन, तर स्त्रीष्टियानगदेसे लबा विश्वासग्याम यहूदी धर्मला गे पूरा तबा हिन्ना भिबा ताम पढब लबागदेसे घोगै भिसी भ्रिबा मुला।

चु किताबरी मुल चेलागदेला गे भो सोमरी भ्रिबा मुल।

(क) येशू स्वर्गरी फेप्माहेन्से यरूशलेम शहररी थाबा पिनबा समाचार थे:ना लबा।

(ख) प्यालेस्टाइन भिबा यहुल्साला ग्ला ग्लारीनोन थाबा पिनबा समाचार थे:ना लजी।

(ग) अर्गु यहुल्साला जम्मान म्हिगदेला गुडरी थाबा पिनबा समाचार थे:ना लजी। थेहड् लसीन यूरोपदेन अफ्रिकाला गुडरी मुबा घेन समुन्द्रला कानाकुनी परब तबा यहुल्सागदेदेन रोम यहुल्साधोनान थाबा पिनबा समाचार थे:जी।

चु किताबला मुल ताम चा परमेश्वरला आत्मासे लबा गेला बारेरी हिन्ना। परमेश्वरला आत्मा पेन्तिकोसला धिनकुनु यरूशलेम शहररी मुबा विश्वासीगदेला गुडरी शक्तिरी फेप्खजी। थेहड् लसीन चु किताबरी मुबा तामगदेग्याम मण्डलीदेन मण्डलीदा च्याबा म्हिगदेदा हो लबा ताम ओच्छे थेनीगदेदा विश्वासरी कोड्ना लबा तामगदे उन्बा मुला। चु किताबरी भ्रिबा तामगदेसे विश्वासीगदे खाहड् लसी भ्रतो:ला भिबादेन संगतीरी थे थाबा पिनबा समाचारला शक्ति खाहड्बा मुबा भिसी उन्बा मुला।

मुल तामगदे

येशू स्वर्गरी फेप्बा धुइला ताम ओच्छे येशूसे कुल्बादेन कबुल लबा ताम १:१-१४

यहूदाला साटोरी स्य्हान्दोदा मुल चेला सहोबारी धम्बा १:१५-२६

यरूशलेम शहररी थाबा पिनबा समाचार थे:ना लबा २:१-८:३

यहूदियादेन सामरिया अञ्चलरी थाबा पिनबा समाचार थे:ना लबा ८:४-१२:२५

डाच्छा रेम पावल थाबा पिनबा समाचार थे:ना लबारी निबा १३:१-१४:२८

यरूशलेम शहररी चिबा सभा १५:१-३५

न्ही रेमला पालरी पावल थाबा पिनबा समाचार थे:ना लबारी निबा १५:३६-१८:२२

सोम रेमला पालरी पावल थाबा पिनबा समाचार थे:ना लबारी निबा १८:२३-२१:१६

यरूशलेमदेन कैसरिया ओच्छे रोम शहररी पावलदा झ्यालखानरी झाड्बा २१:१७-२८:३१

मुल चेलागदेला गे

परमेश्वरसे हाडला आत्मा पिन्ना भिसी लबा कबुल

1-2 लाससो, थियोफिलस, फ्याफुल्ला, डाइ हाडदा येशूसे गे शुरु लबाहेनसे स्वर्गरी आभोर्तेधोना थेसे लबादेन लोपबा जम्मान तामला बारेरी डाच्छान भिसी जिन्बा मुला।[†] चु तबा भन्दा डाच्छा येशूसे परमेश्वरला आत्माग्याम हाडसे धम्बा मुल चेलागदेसे तिग गे लतो:ला भिसी सुड्बा मुबा।*
3 येशू सिसी जिन्माहेनसे हाडदा सिबाग्याम सोना लबा मुला भिबा ताम लहानान ग्यामसे उन्बाला लागिरी बोगल न्ही धिनधोना हाडला चेलागदे मुबा ग्लारी फेप्खजी। ओच्छे थेनीगदेदा परमेश्वरला यहुलसाला बारेरी सुड्जी।

4 तिरेकुनु थेनीगदेदेन छ्याम धन्छ्यासी सोल छयोड्बा धुइरी येशूसे थेनीगदेदा चुहड् भिसी कुल्जी, “एनीगदे यरूशलेम शहर ख्लासी खानडएनोन थानिउ। परमेश्वर आबासे हाडला आत्मा पिन्ना भिसी लबा कबुल आयाड्तेधोना भ्रान्सी चिउ। थे कबुलला बारेरी डाइ एनीगदेदा डाच्छान पाड्सी जिन्बा मुला।* 5 तिगदा भिसम यूहननासे क्युड्ग्याम बपतिस्मा पिन्जी, तर दाहेनसे तिगै धिन लिच्छा एनीगदेला बपतिस्मा परमेश्वरला आत्माग्याम[†] तला।”*

येशू स्वर्गरी फेपबा

6 थेतबासेलमा थेनीगदे पोप तसी चिबा धुइरी चेलागदेसे येशूदा “प्रभु, दान्दे हाडसे इस्राएल यहुलसादा दो:सी छार सहोबारी छ्याड्बा हिन्ना?” भिसी ड्योड्जी।

7 येशूसे थेनीगदेदा चुहड् भिसी सुड्जी, “चु ताम परमेश्वर आबासे तोगब लबा धिनदेन धुइगदेरी तनोन तला। तर थे तामगदे घोबारी म्हाड्बा एनीगदेला गे आहिन। 8 तर परमेश्वरला आत्मा एनीगदेथोरी फेप्खमाहेनसे एनीगदेसे शक्ति याड्ला। जमाहेनसे एनीगदे यरूशलेमहेनसे यहूदियादेन सामरिया अञ्चलरी, ओच्छे जम्बुलिडला कनाकुनीधोना डाला साक्षी दोला।”*

9 येशूसे चुहड् सुड्माहेनसे थेनीगदेसे च्याना च्यानान येशूदा स्वर्गरी भोजी। ओच्छे येशूदा खसुसे घप्जी। जमाहेनसे थेनीगदेसे येशूदा आम्राड्नी।*

10 थेनीगदे एकोहोरो तसी मुपट्टि च्यासी चिबा धुइरी तिक्खुरीन तार क्वान क्वान्बा म्हि न्ही[†] थेनीगदेला डामरी राप्जी। 11 ओच्छे थे म्हि न्हीसे थेनीगदेदा “गालीलला म्हिगदे, तिगदा एनीगदे मुपट्टि च्यासी राप्सी चिबा? एनीगदे मुबाग्याम स्वर्गरी फेपबा चुनोन येशू दान्दे एनीगदेसे खाहड् लसी स्वर्गरी फेपबान लबा म्राड्बा मुला। थेहड् लसीन थे दो:सी फेपखला” भिसी भिजी।

यहूदाला ग्लारी मत्तियासदा थान्बा

12 जमाहेनसे थेनीगदे जैतून भिबा गड्ग्याम यरूशलेमपट्टि दो:जी। थेग्याम यरूशलेम शहररी धोबारी ओस्पन किलोमिटर गिक ते भ्रदोमुबा। 13 शहररी धोमाहेनसे थेनीगदे हाड चिबा दिमला तलाथोला कोठारी वाड्जी। थेनीगदे पत्रुस, यूहनना, याकूब, अन्द्रियास, फिलिप, थोमा, बारथोलोमाइ, मत्ती, अल्फयसला झा याकूब, हाडला यहुल्सादा माया लबा म्हि भिबा सिमोन ओच्छे याकूबला झा यहूदा मुबा।* 14 कोइ कोइ म्रिडम्हेमेगदेदेन येशूला आमा मरियम ओच्छे येशूला आलेगदेएनोन थेनीगदेदेन छ्याम सेम गिक लसी प्रार्थना लबाला लबान मुबा।

15 तिरेकुनु थेरी प्रभु येशूदा विश्वास लबा म्हिगदे ओस्पन ग्यार्जा गिकसे बोगल गिक हुप तबा मुबा। थे धुइरी पत्रुस थेनीगदेला डाच्छापट्टि राप्सी चुहड् भिबारी छ्याड्जी, 16 “ज्योज्यो आले नाना आडागदे, परमेश्वरला बचनरी येशूदा चुड्बा म्हिगदेला नेता यहूदाला बारेरी दाऊद ग्लेसे डाच्छान

† 1:1-2 थियोफिलसदा डाच्छा भिसी पुड्बा किताब चा लूकाला किताब हिन्ना (लूका १:३)। * 1:1-2 लूका १:१-४ * 1:4 लूका २४:४९; यूह १४:२६ † 1:5 परमेश्वरला आत्माला बपतिस्माला बारेरी मुल चेला २:१-१३ सहीगो। * 1:5 मत्ती ३:११; मर्कू १:८; लूका ३:१६; यूह १:२३ * 1:8 मत्ती २८:१९; मर्कू १६:१५; लूका २४:४७-४८ * 1:9 मर्कू १६:१९; लूका २४:५०-५१ † 1:10 “तार क्वान क्वान्बा म्हि न्ही” चा स्वर्गदूतगदे हिन्ना। * 1:13 मत्ती १०:२-४; मर्कू ३:१६-१९; लूका ६:१४-१६

परमेश्वरला आत्माग्याम पाड्बा मुबा। थे बचनरी मुबा ताम पूरा तनोन तोःबा मुबा। 17 यहूदाएनोन डनीगदे न्हडला गिक मुबा। उनसे हडनोन प्रभुला गे लबाला लागिरी थेदाएनोन धम्बा मुबा।”

18 ओच्छे यहूदासे आज्यबा गे लसी सहोबा टाडगासे बु गिक ग्लुजी। थे बुरी हाडनोन सिसी सरी हिलमा थेला फो थिसी गुड फो थोन्जी। 19 थे ताम यरूशलेमला जम्मान म्हिगदेसे था याड्जी, ओच्छे थेनीगदेसे थे बुला मिन हाडलान ग्योइरी “आखेलदामा” भिसी थान्जी। थेला अर्थ चा काला बु भिबा हिन्ना।*

20 पत्रुससे दोःसी चुहड् भिसी भिजी,
“थेला दिम थान्थान तगै, थेरी खालै थाचिगै।’

ओच्छे
‘थेसे याड्बा अधिकार स्यहान्दोसेन जिम्मा किन्गै’
भिसी व्हाडला किताबरी भिबा मुला।*

21 “थेतबासेलमा यहूदाला ग्लारी य्हाडदेन छ्याम मुबा म्हिगदे न्हडला गिक धम्तोःबा मुला। थे म्हि चा य्हाड प्रभु येशूदेन छ्याम मुबा धुइरी सदन य्हाडदेन छ्यामनोन भ्रबा म्हि ततोःला। 22 थे म्हि यहूदनासे बपतिस्मा पिन्बा धुइहेन्से प्रभु येशू य्हाड मुबाग्याम स्वर्गरी भोर्बा धुइधोना य्हाडदेन छ्यामनोन मुबा म्हि ततोःला। ओच्छे थे म्हि य्हाडदेन छ्याम तसी प्रभु येशू सिबाग्याम सोजी भिबा तामला साक्षी ततोःला।”*

23 जमाहेन्से थेरी मुबा म्हिगदेसे म्हि न्हीला मिन पिन्जी। थे न्हीला मिन युस्तस भिबा योसेफ बारसाबासदेन मतियास मुबा। 24 थेनीगदेसे चुहड् भिसी प्रार्थना लजी, “प्रभु, हाडदा जम्मान महिला सेमला ताम था मुला। थेतबासेलमा चु न्ही न्हडरी हाडसे खाल्दा धम्बा, उन्दा उन्सी पिन्गो। 25 ओच्छे थे म्हिसे चा यहूदासे लबा मुल चेलाला गे लखमगै। तिगदा भिसम यहूदा चा थे गे ख्लासी थे जुन ग्लारी नितोःमुबा थेनोन ग्लारी निसी सिजी।”† 26 जमाहेन्से थेनीगदेसे थे म्हि न्हीला मिनरी चिट्टा युजी, थे चिट्टा मतियासला मिनरी परब तजी। जमाकुनुहेन्से थेदा च्युक गिक मुल चेलागदेदेन छ्याम झ्याजी।

2

परमेश्वरला आत्मा फेप्खबा

1 पेन्तिकोसला धिनकुनु प्रभु येशूदा विश्वास लबा म्हिगदे जम्मान ग्ला गिकरीन पोप तबा मुबा।*
2 थे धुइरी तिख्खुरी स्वर्गग्याम लाबा खबा हड्बा घेन काइ खजी। थे काइसे थेनीगदे चिबा दिम प्लिड्जी। 3 ओच्छे मेला ल्हाम हड्बा सहेगदे थेनीगदे हाड हाडथोरी भो भो तसी चिबा म्राड्जी। थे मेला ल्हाम चा ले हड्बान म्राड्मुबा। 4 जमाहेन्से थेनीगदे जम्मान परमेश्वरला आत्मासे प्लिड्जी।† ओच्छे परमेश्वरला आत्माग्याम पाड्खम्बा शक्ति याड्सी थेनीगदेसे पाड्आसेबा अर्गु ग्योइगदेरी ताम पाड्बारी छ्याइजी

5 थे धुइरी परमेश्वरदा तेन्बा यहूदीगदे जम्बुलिडला जम्मान यहुल्साग्याम यरूशलेमरी खसी चिबा मुबा। 6 चुहड्बा काइ थेःमाहेन्से थेरी म्हिगदे पोप तजी। ओच्छे प्रभु येशूदा विश्वास लबा म्हिगदेसे हाड हाडला ग्योइरी ताम पाड्बा म्राड्सी थेनीगदे उदेक म्हन्जी।

7 जमाहेन्से थेनीगदे उदेक तसी चुहड् भिबारी छ्याइजी, “तिग चु ताम पाड्बा जम्मान म्हिगदे गालीलला आहिन? 8 तर चुगदेसे खाहड् लसी य्हाड हाड हाडला ग्योइ पाड्खम्बी! 9 य्हाड चुरी पार्थीला म्हिगदे, मादीला म्हिगदे, एलामला म्हिगदे, मेसोपोटामीयाला म्हिगदे, यहूदियाला म्हिगदे, कापाडोकियाला म्हिगदे, पोन्टसदेन एशियारी चिबा म्हिगदे हिन्ना। 10 ओच्छे फ्रिगियाला म्हिगदे,

* 1:19 मती २७:३-८ † 1:20 व्हाडला किताब भिबा चा भजनसंग्रह हिन्ना। “थेसे याड्बा अधिकार स्यहान्दोसेन जिम्मा किन्गै” भिबा चा यहूदासे लबा ख्रीष्टला गे स्यहान्दो म्हिसे लगे भिबा हिन्ना। * 1:20 भजन ६९:२५; १०९:८ * 1:22 मती ३:१६; मर्क १:९; १६:१९; लूका ३:२१; २४:५१ † 1:25 “यहूदा हाडलान ग्लारी निसी सिजी” भिबा चा थे नर्गरी निजी भिबा हिन्ना। * 2:1 लेवी २३:१५-२१; वयव १६:९-११ † 2:4 “परमेश्वरला आत्मासे प्लिड्जी” भिबा चा म्हिदा परमेश्वरला आत्माला शक्तिसे पूरान चलब लबा हिन्ना।

पामफिलियाला म्हिगदे, मिश्रदेन कुरेनीरी परब तबा लिबियाला डाम डामला ग्लागदेदेन रोमग्याम खबा ¹¹ यहूदीदेन यहूदी धर्म तेन्बा अर्गु यहूलला म्हिगदे मुला। ओच्छे क्रेट यहुल्सारी चिबा म्हिगदेदेन अरबीला म्हिगदेएनोन मुला, थेनीगदेसे मी य्हाडला हाड हाडलान ग्योइरी परमेश्वरसे लबा घेन गेला बारेरी पाड्बान चीम।

¹² चुहड्बा म्राड्सी थेनीगदे जम्मान उदेक तसी अलमल तसी गिकसे गिकदा “चु तिग तबा?” भिसी ड्योइबा छार्बा लबारी छ्याइजी। ¹³ तर स्य्हान्दोगदेसे थेनीगदेदा “चुगदे मी कलिलो निडगुसे ड्य्होइजीम” भिसी खिसी लजी।

पत्रुससे महिला हुलदा घोना लबा

¹⁴ जमाहेन्से पत्रुस च्युक गिक चेलागदेदेन छ्याम राप्सी जजाकी डाच्छा निसी घेन काइरी चुहड् भिसी भिजी, “यहूदिया अञ्चलग्याम ज्योइखबा यहूदी ह्योगदेदेन यरूशलेमरी स्य्हूबा जम्मान म्हिगदे चु तिग तबा हिन्ना डाइ हाडनीदा घोना लला। हाडनीसे डाला ताम ज्यना लसी ड्यानगो। ¹⁵ हाडनीसे म्हन्बा हड् चुगदे ड्य्होइबा आरे। दान्दे स्य्होला नौ बजब जे तबा मुला, चु धुइरी खालैसेन निडगु आथुड्। ¹⁶ तर चु ताम तला भिसी योएल अगमवक्तासे पाड्बा मुबा।

¹⁷ ‘परमेश्वरसे सुड्बा मुला,

लिच्छाला धिनरी डाइ जम्मान म्हिगदेथोरी डाला आत्मा पुइखला,

जमाहेन्से एनीगदेला झा झामेगदेसे अगमवाणी पाड्ला,

ओच्छे एनीगदेला ठिटा कोलागदेसे परमेश्वरसे उन्बा ताम म्राड्ला,

ओच्छे एनीगदेला आखे मम म्हेमेगदेसे म्हाड म्राड्ला।

¹⁸ थे धिनकुनु नोकरगदेथोरीनोन डाइ डाला आत्मा पुइखला,

ओच्छे थेनीगदेसे लिच्छा तसेला ताम डाच्छान पाड्ला।

¹⁹ डाइ तोर मुरी उदेकला गेगदेदेन मार जम्बुलिडरी उदेकला चिनुगदे उन्ना।

चु चिनुगदे चा का, मेदेन म्युगुला मुसलो हिन्ना।

²⁰ परमप्रभु फेप्खबा घेन य्हाल य्हाल्बा धिन भन्दा डाच्छा धिनी धोपधोप तला

ओच्छे लनी का हड्बान वाला तला।

²¹ ओच्छे जुन म्हिसे परमप्रभुदा डादा हो लउ भिसी भिला, थे म्हिसे थार्बा याड्ला।*

²² “इस्त्राएलला म्हिगदे डाला ताम ड्यानगो, परमेश्वरसे येशूग्याम हाडनीला गुडरी शक्तिशाली गेगदे लबान उदेकला चिनुगदे उन्बा ताम हाडनीदा थानोन मुला। थे चिनुगदेग्याम परमेश्वरसे नासरतला येशूदा डाइनोन पुइखबा हिन्ना भिसी उन्बा मुबा। ²³ परमेश्वरसे डाच्छान म्हन्बा अन्छार येशूदा हाडनीसे चुड्जी। ओच्छे येशूदा हाडनीसे पापी म्हिगदेला यारी जिम्मा पिन्सी क्रुसरी टाँगब लसी साइपुड्जी।* ²⁴ तर येशूदा सिबाला शक्तिसे साइबाला साइबान लबारी आखमनी। तिग्दा भिसम परमेश्वरसे येशूदा सिबाला दुखग्याम फेसी सोना लजी।* ²⁵ तिग्दा भिसम दाऊद ग्लेसे येशूला बारेरी चुहड् भिबा मुला,

‘डाइ प्रभुदा सदन डाला डाच्छापट्टि म्राड्मुला।

थे डादेन छ्यामनोन मुला।

थेतबासेलमा डाइ तिगै तामरी धन्दा सुर्दा लआतो:।*

²⁶ थेतबासेलमा डा सेमहेन्सेन ताड्बा मुला,

ओच्छे ताड्बान डाइ सेमहेन्सेन डाला सुड्ग्याम प्रभुला जयजयकार लबा मुला।

ओच्छे डाला ल्हुइ सिसी निसैनोन डा दो:सी सोला भिसी डाइ प्रभुथोरी आश लबा मुला।

²⁷ तिग्दा भिसम हाडसे डाला प्राणदा सिबागदे निबा ग्लारी आखला।

ओच्छे हाडदा जे तेन्बा महिला ल्हुइदा हाडसे नइना आल।

²⁸ हाडसे डादा डा दो:सी सोला भिबा ताम उन्बा मुला,

* 2:21 योए २:२८-३२ * 2:23 मत्ती २७:३५; मर्कु १५:२४; लूका २३:३३; यूह १९:१८ * 2:24 मत्ती २८:५-६; मर्कु १६:६; लूका २४:५ * 2:25 भजन १६:८-११

ओच्छे हाड डादेन छ्याम तसी डादा ल्हानान ताडना लला।'

29 “ज्योज्यो आले नाना आडागदे, डाइ यहाडला म्हेमे दाऊद ग्लेला बारेरी हुक्क तसी पाड्ला। थे सिसी ल्हुजी, ओच्छे दान्देधोना थेला धुर्सा मुनोन मुला। 30 दाऊद ग्ले अगमवक्ता तबासे लमा थेला ग्लारी हाडलान सन्तानना गिकदा परमेश्वरसे ग्ले सहोला भिसी परमेश्वरसे कबुल लबा ताम थेदा था मुबा।* 31 परमेश्वरसे लिच्छा तिग लला भिसी दाऊदसे डाच्छान म्राड्मुबा। थेतबासेलमा थेसे थार्बा पिन्बा ख्रीष्ट सिबाग्याम सोला भिसी चुहड् भिमुबा, ‘थेदा सिबागदे निबा ग्लारी आख्लानी ओच्छे थेला सिबा ल्हुड नइना आलनी।’

32 “ओच्छे चुनोन येशूदा परमेश्वरसे सिबाग्याम सोना लजी। चु तामला डनी जम्मान साक्षी मुला। 33 परमेश्वर आबासे येशूदा घेन मान पिन्सी हाडला दाहिने छ्यापट्टि थान्जी, ओच्छे कबुल लबा अनछार परमेश्वरसे येशूदा हाडला आत्मा पिन्जी। दान्दे हाडनीसे म्राड्बा चु तामदेन थे:बा तामगदे थेनोन परमेश्वरला आत्मा प्रभु येशूसे डन्दा पिन्बा हिन्ना। 34-35 दाऊद हाडनोन स्वर्गरी आनिनी, तर थेसे चुहड् भिसी भिबा मुला, ‘परमप्रभुसे डाला प्रभुदा चुहड् भिसी सुड्बा मुला, डाइ एला शत्रुगदेदा भेना आलतेधोना ए डाला दाहिने यापट्टि चिउ’*’

36 “थेतबासेलमा इस्राएलला जम्मान म्हिगदेसे चु ताम पक्का हिन्ना भिसी था याड्गै, जुन येशूदा हाडनीसे क्रुसरी टांगब लसी साड्बा मुबा, थेनोन येशूदा परमेश्वरसे प्रभुदेन थार्बा पिन्बा ख्रीष्ट सहोबा मुला।”

37 जमाहेन्से पत्रुसला ताम थे:सी थेनीगदेला सेमरी ल्हानान दुख तजी, ओच्छे पत्रुसदेन स्य्हान्दो मुल चेलागदेदा “दाहेन्से डन्से तिग लतो:ला ज्योज्यो आले?” भिसी ड्योड्मा,

38 पत्रुससे थेनीगदेदा चुहड् भिसी जोहाब पिन्जी, “दाहेन्से एनीगदेसे हाड हाडला पाप ख्लासी परमेश्वरपट्टि दो:गो। ओच्छे पाप माफ याड्बाला लागिरी एनीगदेसे येशू ख्रीष्टला मिनरी बपत्तिस्मा किन्गो। जमाहेन्से एनीगदेसे परमेश्वरला आत्माला मोलम याड्ला। 39 तिग्दा भिसम परमेश्वरसे लबा चु कबुल एनीगदेदेन छ्याम एनीगदेला कोलागदेला लागिरी हिन्ना, ओच्छे यहाडला प्रभु परमेश्वरसे ड्योड्बा थारेड थारेड चिबा जम्मान म्हिगदेला लागिरीनोन हिन्ना।”

40 ओच्छे पत्रुससे ल्हानान तामग्याम होशियार तना लजी। ओच्छे थेनीगदेदा अर्ती पिन्बान, “दान्देला नइबा म्हिगदेथोरी खबारी छ्याड्बा सजायग्याम एनीगदे हाडनोन जोगब तसी चिउ” भिसी भिजी।

41 जमाहेन्से ल्हानान म्हिगदेसे पत्रुससे पाड्बा तामरी विश्वास लसी बपत्तिस्मा किन्जी। थेनोन धिनकुनु थेनीगदेला गुडरी विश्वास लबा म्हिगदे ओस्पन हजार सोम ते बढब तजी।

विश्वासीगदेला संगती

42 जमाहेन्से थेनीगदेसे मुल चेलागदेसे लोप्बा ताम ड्यानमुबा, संगती लमुबा, प्रभु भोज चमुबा, ओच्छे सेम गिक तसी सदन प्रार्थना लमुबा। 43 मुल चेलागदेसे ल्हानान उदेकला गेगदेदेन उदेकला चिनुगदे उन्जी। थेतबासेलमा जम्मान म्हिगदेसे परमेश्वरदा ल्हानान मान लजी। 44 प्रभुदा विश्वास लबा जम्मान म्हिगदे ग्ला गिकरीन हुप तमुबा, ओच्छे थेनीगदेदेन छ्याम मुबा सहेगदे जम्मालान हिन्ना भिसी चलब लमुबा।* 45 ओच्छे थेनीगदेसे हाडदेन छ्याम मुबा सम्पत्तिदेन मालसामान चूड्सी जुन जुन म्हिदा जुन जुन सहे खाँचो तबा मुला थे सहे जम्मादान भो लसी पिन्मुबा। 46 ओच्छे थेनीगदे धिन धिननोन जम्मान सेम गिक तसी परमेश्वरला मन्दिररी हुप तमुबा। ओच्छे थेनीगदे दिम दिमरी निसी प्रभु भोज चबादेन ज्यबा सेम थोसी ताड्सी चबा थुड्बा लमुबा। 47 ओच्छे सदन परमेश्वरला जयजयकार लमुबा। स्य्हान्दो म्हिगदेसे थेनीगदेदा ज्यबा म्हि भिसी भिमुबा। ओच्छे थार्बा याड्बा म्हिगदे धिन धिननोन प्रभुसे थेनीगदेला गुडरी बढब लसी पिन्जी।

* 2:30 भजन १३२:११; २ शमू ७:१२-१३ * 2:34-35 भजन ११०:१ † 2:39 “थारेड थारेड चिबा जम्मान म्हिगदे” भिबा चा लिच्छा लिच्छाला म्हिगदे अथवा थारेड थारेडला ग्ला हिन्ना। * 2:44 मुल ४:३२-३५

3

कुज्या म्हि गिकदा खम्ना लबा

¹ तिरेकुनु पत्रुसदेन यूहन्ना धिनना तीन बजेरी परमेश्वरला मन्दिररी निबान मुबा। थे धुइ चा प्रार्थना लबा धुइ मुबा। ² परमेश्वरला मन्दिर न्हडरी वाड्बा म्हिगदेदेन छ्याम टाडगा हीगै भिसी न्हमाहेन्सेन कुज्या मुबा म्हि गिकदा म्हिगदेसे सदन परमेश्वरला मन्दिररी वाड्बा प्रापरी भसी थान्मुबा। थे प्रापदा जेबा प्राप भिसी भिमुबा। ³ थे कुज्या म्हिसे पत्रुसदेन यूहन्ना परमेश्वरला मन्दिर न्हडरी वाड्बारी छ्याइबा प्राड्सी टाडगा हीजी। ⁴ जमाहेन्से पत्रुसदेन यूहन्नासे थे म्हिदा ज्यना लसी च्याजी, ओच्छे पत्रुससे थेदा “डन्दा च्यागो” भिसी भिजी। ⁵ थेतबासेलमा थेनीगदेसे तिगै पिन्ना वा भिसी थे कुज्या म्हिसे थेनीगदेदा सेम लसी च्याजी।

⁶ जमाहेन्से पत्रुससे “डादेन छ्याम म्हरदेन म्हुइ आरे। तर डादेन छ्याम तिग मुला थे डाइ एदा पिन्ना। नासरतला येशू ख्रीष्टला मिनरी ए रे:सी भ्रउ!” भिसी भिजी। ⁷ ओच्छे थेसे थे कुज्या महिला दाहिने यारी चुड्सी थीजी, थीमैछ्याम थे कुज्या महिला काडदेन काडला जी जीरी भड वाड्जी। ⁸ जमाहेन्से थे कुज्या म्हि डोड रे:सी क्यारमार भ्रबारी छ्याइजी। ओच्छे भ्रवान छ्योड्सी परमेश्वरला जयजयकार लबान थेनीगदेदेन छ्याम परमेश्वरला मन्दिररी वाड्जी। ⁹ ओच्छे जम्मान म्हिगदेसे थेदा भ्रवान लबादेन परमेश्वरला जयजयकार लबा प्राड्जी। ¹⁰ थेनीगदेसे थे म्हिदा परमेश्वरला मन्दिरला जेबा भिबा प्रापरी हीसी चिबा चुनोन हिन्ना भिसी डोसेजी। ओच्छे थे खम्बा प्राड्सी थेनीगदे ल्हानान उदेक तजी।

पत्रुससे परमेश्वरला मन्दिररी लोप्बा

¹¹ थे म्हिसे पत्रुसदेन यूहन्नादा चुड्सी भ्रबा प्राड्सी म्हिगदे ल्हानान उदेक तसी सोलोमन भिबा दलानरी यार्बान थेनीगदे मुबा ग्लारी खजी। ¹² चु प्राड्सी पत्रुससे म्हिगदेदा चुहड् भिसी भिजी, “इस्त्राएलला म्हिगदे, हाडनी तिग्दा चु तामरी उदेक म्हन्बा? तिग डन्से हाडलान शक्तिदेन परमेश्वरदा तेन्बासे लमा चु म्हिदा भ्रना लखम्बा हड् छोर्सी ट्वल्ल तसी डन्दा च्याबा? ¹³ यहाडला आखे म्हेमे अब्राहाम, इसहाकदेन याकूबला परमेश्वरसे हाडला गे लबा येशूदा घेन मान लजी। तर हाडनीसे चा चुड्सी महिला यारी जिम्मा पिन्जी, ओच्छे पिलातससे येशूदा पुइबारी छ्याइमा हाडनीसे थेदा पुइबारी आत भिसी पिलातसला डाच्छापट्टि भिमुबा।* ¹⁴ तर हाडनीसे तिगै दोष आरेबादेन परमेश्वरसे म्हन्बा अन्छार भ्रबा म्हिदा चा पुइबारी आत, बरु म्हि साइबा म्हिदा चा पुइगो भिसी पाड्जी।* ¹⁵ ओच्छे हाडनीसे जुनी पिन्बादा साइजी। तर थेनोन येशूदा परमेश्वरसे सिबाग्याम सोना लजी, चु ताम प्राड्बा चा डनीन हिन्ना। ¹⁶ येशूलान मिनना शक्तिग्याम चु म्हिसे भड याड्जी। हाडनीसे प्राड्बादेन डोसेबा चु म्हिसे येशूदा विश्वास लबासे लमा हाडनी जम्मालान डाच्छापट्टि चुदा खम्ना लबा मुला।

¹⁷ “च्यागो ज्योज्यो आलेगदे, हाडनीसे लबा चु जम्मान गे आसेनान लबा हिन्ना भिसी डादा था मुला। ओच्छे हाडनीला नेतागदेसेनोन थेहड्नुन लजी। ¹⁸ तर थार्बा पिन्बा ख्रीष्टसे दुख नातो:ला भिसी परमेश्वरसे डाच्छान जम्मान अगमवक्तागदेग्याम सुड्बा अन्छार परमेश्वरसे चु गे पूरा लजी। ¹⁹ थेतबासेलमा परमेश्वरसे हाडनीला पाप माफ लबाला लागिरी हाड हाडला पाप ख्लासी परमेश्वरपट्टि दो:गो। ²⁰ जमाहेन्से परमेश्वरग्याम हाडनीसे सुखला धिन याड्ला, थेहड् लसीन परमेश्वरसे हाडनीला लागिरी डाच्छान धम्बा थार्बा पिन्बा ख्रीष्ट येशूदा पुइखला। ²¹ ओन्माहेन्सेन परमेश्वरसे हाडला अगमवक्तागदेग्याम सुड्बा जम्मान सहे दो:सी सहोबा धुइ आततेधोना येशू ख्रीष्ट स्वर्गरी धन्छ्यातो:बा मुला। ²² मोशासे चुहड् भिसी पाड्बा मुला,

‘एनीगदेला परमप्रभु परमेश्वरसे डादा पुइखबा हड् लसी

एनीगदेला ज्योज्यो आलेगदे न्हड्ग्यामसेन एनीगदेला लागिरी अगमवक्ता गिक पुइखला।

थेसे पाड्बा जम्मान ताम एनीगदेसे ड्यानतो:बा मुला।*

²³ थे अगमवक्ताला ताम आड्यानबा खजिबै म्हिदा चा

* 3:13 प्रस्था ३:१५ * 3:14 मत्ती २७:१५-२३; मर्कू १५:६-१४; लूका २३:१३-२३; यूह १९:१२-१५ * 3:22 व्यव १८:१५, १८

परमेश्वरला म्हिगदेग्याम फेसी नाश लला।*

24 “शमूएल अगमवक्ताहेन्से लिच्छा खबा जम्मान अगमवक्तागदेसे चुनोन धिनगदेला। बारेरी पाड्जी। 25 हाडनी थेनोन अगमवक्तागदेदेन परमेश्वरसे लबा थेनोन कबुलला सन्तान हिनना। थे कबुल हाडनीला म्हेमे अब्राहामदेन छ्याम परमेश्वरसे चुहड् भिसी लमुबा, ‘एला सन्तानग्यामनोन जम्बुलिडला जम्मान म्हिगदेसे मोलम याड्ला।’* 26 हाडनीदा नडबा गेग्याम फेसी मोलम पिन्बाला लागिरी परमेश्वरसे हाडला झा येशूदा डाच्छा हाडनी मुबा ग्लारी पुडखबा हिनना।”

4

पत्रुसदेन यूहन्नादा यहूदी धर्मला अदालतरी भोर्बा

1 पत्रुसदेन यूहन्ना म्हिगदेदेन छ्याम ताम लबान लमा परमेश्वरला मन्दिररी पूजा लबा म्हिगदेदेन मन्दिर च्याबा सिपाहीगदेला कप्तान ओच्छे सदुकीगदे थेनीगदे मुबा ग्लारी खजी। 2 थेनीगदेदा बोमो खजी, तिग्दा भिसम पत्रुसदेन यूहन्नासे येशू सिबाग्याम सोबा मुला, थेहड् लसीन स्य्हानदो सिबा म्हिगदेएनोन थेग्याम सोला भिसी म्हिगदेदा लोपबान मुबा। 3 थेतबासेलमा थेनीगदेसे पत्रुसदेन यूहन्नादा चुड्जी, ओच्छे थे धुडरी ड्यसे तसी जिन्बासे लमा न्हडगरदडधोना झ्यालखानरी थान्जी। 4 तर पत्रुसदेन यूहन्नासे पाड्बा समाचार ड्यान्बा म्हिगदे न्हडरी ल्हानान म्हिगदेसे विश्वास लजी। विश्वास लबा म्हिगदे न्हडरी ओस्पन हजार डा ते हेम्कोलागदे मुबा।

5 ओच्छे न्हडगरदड यहूदी नेतागदे, यहूदी धर्मगुरुगदेदेन यहूदी गन्बागदे यरूशलेमरी पोप तजी। 6 थेरी परमेश्वरला मन्दिररी पूजा लबा मुल म्हि हन्नासदेन छ्याम कैयाफा, यूहन्ना,† अलेक्जेन्डर ओच्छे मुल म्हिला स्य्हानदो हाडला म्हिगदेएनोन मुबा। 7 जमाहेन्से थेनीगदेसे पत्रुसदेन यूहन्नादा हाडला गुडरी भसी, “एनीगदेसे चु गे खाहड्बा शक्तिदेन खाल्ला मिनग्याम लबा हिनना?” भिसी ड्योड्जी।

8 जमाहेन्से परमेश्वरला आत्मासे प्लिड्सी पत्रुससे चुहड् भिसी भिजी, “यहूदी नेतागदेदेन यहूदी गन्बागदे, 9 चुदे हाडनीसे चु कुज्या म्हिला लागिरी तिनी डन्से ज्यबा गे लबासे लमा चु म्हिदा खाहड् लसी खम्ना लजी भिसी ड्योड्बा छार्बा लबा हिनसम, 10 चु ताम हाडनीदेन इस्राएलला जम्मान म्हिगदेदा था तगै, हाडनीसे कुसरी टाँगब लसी साड्बादेन परमेश्वरसे सिबाग्याम सोना लबा नासरतला येशू ख्रीष्टला मिनरी चु म्हि हाडनीला ओन्छाडरी खम्सी राप्बा मुला। 11 चुनोन येशूला बारेरी बचनरी चुहड् भिसी भिबा मुला,

‘हाडनी डकर्मीगदेसे गे आखेल भिसी भ्याड्बा युडबा चुनोन हिनना, तर दान्दे चुनोन युडबा सुर युडबा दोबा मुला।’*

12 ओच्छे थेसे बाहेक स्य्हानदो खालैसे य्हाड्दा थार्बा पिन्बारी आखम, तिग्दा भिसम जम्बुलिडला म्हिगदेला गुडरी य्हाड्दा सोना लबारी स्य्हानदो खालैला मिन आरे।”

13 ओच्छे ल्हाना पढब आलबादेन तिगै तालिम आकिन्बा सोजो म्हि पत्रुसदेन यूहन्नासे म्हिगदेदा लोपबा आँट लबा म्राड्सी यहूदी नेतागदे, यहूदी धर्मगुरुगदेदेन यहूदी गन्बागदे उदेक म्हन्जी। जमाहेन्से थेनीगदेसे पत्रुसदेन यूहन्ना येशूदेन छ्याम चिबा चीम भिसी था याड्जी। 14 थे कुज्या म्हि खम्सी पत्रुस, यूहन्नादेन छ्याम राप्सी चिबा म्राड्बासे लमा थेनीगदेसे तिगै पाड्बारी आखम्नी। 15 थेतबासेलमा थेनीगदेसे पत्रुसदेन यूहन्नादा अदालतग्याम मडग्यार निउ भिसी कुल्जी। ओच्छे थेनीगदे हाड हाड न्हडरी चुहड् भिसी सल्लाह लबारी छ्याड्जी, 16 “दाहेन्से य्हाड्से चु न्हीदा तिग लबा? तिग्दा भिसम चु न्हीसे लबा उदेकला गे यरूशलेमरी चिबा जम्मान म्हिगदेसे था याड्सी जिन्बा मुला। ओच्छे चु ताम य्हाड्सेनोन आहिन भिबारी आखम। 17 तर चु ताम स्य्हानदो म्हिगदेसे थाआयाड्गै भिसी ‘दाहेन्से एनीगदेसे चु येशूला बारेरी खालै म्हिदा तिगै थापाड्गो’ भिसी य्हाड्से चु न्हीदा पाड्तो:ला।”

* 3:23 वयव १८:१९ † 3:24 “चुनोन धिनगदे” भिबा चा येशू ख्रीष्ट डाच्छा फेपखबा धिनहेन्से दो:सी फेपखबा धिनधोनाला ताम तखम्ला। * 3:25 उत्प २२:१८ † 4:6 चु यूहन्ना चा येशूला चेला यूहन्ना आहिन। * 4:11 भजन ११८:२२

18 जमाहेन्से थेनीगदेसे पत्रुसदेन यूहन्नादा ड्योइसी, “च्यागो, दाहेन्से एनीगदेसे येशूला बारेरी खालैदा तिगै थापाङ्गो ओच्छे तिगै ताम थालोपगो” भिसी कुल्जी। 19 तर पत्रुसदेन यूहन्नासे थेनीगदेदा “परमेश्वरला ताम आड्यानना हाडनीला ताम ड्यानबारी परमेश्वरला डाच्छा ठीक हिन्ना कि आहिन हाडनीसेन म्हन्गो। 20 तिग्दा भिसम डन्से म्राड्बादेन थे:बा ताम आपाङ्ना डनी चिनोन आखम” भिसी जोहाब पिन्जी।

21 थेनीगदेसे पत्रुसदेन यूहन्नादा सजाय पिन्बारी तिगै ग्याम आम्राड्माहेन्से पत्रुसदेन यूहन्नादा ल्हानान बड्सी पुइजी। तिग्दा भिसम थेरी तबा उदेकला गेला लागिरी जम्मान म्हिगदेसे परमेश्वरला जयजयकार लबान मुबा। 22 तिग्दा भिसम थे उदेकला गेग्याम खम्बा म्हि बोगल न्ही दिड भन्दा ल्हाना तबा मुबा।*

येशूदा विश्वास लबा म्हिगदेला प्रार्थना

23 थेग्याम पुइमाहेन्से पत्रुसदेन यूहन्ना हाडला ह्योगदे मुबा ग्लारी खजी। ओच्छे परमेश्वरला मन्दिररी पूजा लबा मुल म्हिगदेदेन यहूदी गन्बागदेसे पाङ्बा जम्मान ताम ह्योगदेदा पाङ्सी पिन्जी।

24 थेनीगदेसे चु ताम थे:माहेन्से सेम गिक लसी परमेश्वरदेन छ्याम प्रार्थना लबारी छ्याइजी, “प्रभु, मु जम्बुलिडदेन समुन्द्र ओच्छे थेरी मुबा जम्मान सहे हाडसेन सहोबा हिन्ना।” 25 ओच्छे हाडला गे लबा डन्ना आखे महेमे दाऊदला सुड्ग्याम हाडला आत्मासे चुहड् सुड्बा मुबा,

‘अर्गु यहूलला म्हिगदे तिग्दा बोमो खबा,
ओच्छे म्हिगदेसे तिग्दा गे आखेलबा तामगदे म्हन्बा?

26 जम्बुलिडला ग्लेगदेदेन शासन लबागदे परमप्रभुदेन थेसे धम्बा थार्बा पिन्बा ख्रीष्टला बिरोधरी लडाइ लबाला लागिरी तयार तजी।”*

27 “चु सत्य ताम हिन्ना, तिग्दा भिसम हाडसे धम्बा तिगै दोष आरेबा हाडला गे लबा येशूला बिरोधरी हेरोददेन पन्तियस पिलातस ओच्छे अर्गु यहूलला म्हिगदे, इस्राएलीगदेदेन छ्याम चुनोन शहररी हुप तबा मुबा।” 28 डाच्छान हाडला सेमसे म्हन्बादेन हाडला शक्तिसे तिग लबारी म्हाइमुबा थे पूरा तबा मुला। 29 दाहेन्से प्रभु, थेनीगदेसे डन्दा लोङ्ना लबा ताम हाडसे ढन्गो, ओच्छे हाडला गे लबा म्हि डन्दा हाडला बचन म्हिगदेदा थे:ना लबारी भड पिन्गो। 30 ओच्छे हाडला शक्तिग्याम आखम्बा म्हिगदेदा खम्ना लमा हाडला गे लबा तिगै दोष आरेबा येशूला मिनग्याम उदेकला चिनुदेन गे तगै।”

31 चुहड् लसी प्रार्थना लसी जिन्माहेन्से थेनीगदे पोप तबा ग्ला लिंगलिग तजी, ओच्छे थेनीगदे जम्मान परमेश्वरला आत्मासे प्लिङ्जी।† जमाहेन्से थेनीगदे आलोङ्ना परमेश्वरला बचन थे:ना लबारी छ्याइजी।

विश्वासीगदेला साझा सम्पत्ति

32 चु धुइरी चा प्रभु येशूदा विश्वास लबा म्हिगदे न्हडला खालैसेनोन हाडला धन सम्पत्ति चु डाला हिन्ना भिसी आभिमुबा। थेनीगदे जम्मालान सेम गिकनोन तबासे लमा थेनीगदेदेन छ्याम मुबा जम्मान धन सम्पत्ति यहाडला भिसी भिमुबा।* 33 थे मुल चेलागदेसे परमेश्वरला घेन शक्ति याङ्सी प्रभु येशू सिबाग्याम सोबा हिन्ना भिबा तामला साक्षी दोसी पाङ्मुबा, ओच्छे परमेश्वरसे थेनीगदे जम्मादान ल्हानान मोलम पिन्जी। 34 थेनीगदेला न्हडरी खालैदान तिगै सहेला खाँचो आतमुबा, तिग्दा भिसम वारी बु मुबादेन दिम मुबागदेसे थे चूड्सी खबा टाङ्गा भसी, 35 मुल चेलागदेदा पिन्मुबा। ओच्छे जुन जुन म्हिदा खाँचो तमुबा थेनीगदेदा भो लसी पिन्मुबा। 36 ओच्छे साइप्रस यहुल्साला लेवी वंशला योसेफ भिबा म्हिदा मुल चेलागदेसे बारनाबास भिसी मिन थान्मुबा (बारनाबास भिबा

* 4:22 मुल ३:७-८ * 4:24 प्रस्था २०:११; नहे ९:६; भजन १४६:६ * 4:26 भजन २:१-२ * 4:27 मत्ती २७:१-२; मर्क १५:१; लूका २३:१, ७-११; यूह १८:२८-२९ † 4:31 “परमेश्वरला आत्मासे प्लिङ्बा” भिबा चा परमेश्वरला शक्ति याङ्बा हिन्ना।

* 4:32 मुल २:४४-४५

चा आँट पिन्बाला झा हिन्ना), ³⁷ थेसे हाडला वारी बु चूड्जी, ओच्छे टाडगा भसी मुल चेलागदेदा पिन्जी।

5

हननियादेन सफीरा

¹ तर थेरी हननिया भिबा म्हि गिक मुबा, थेदेन थेला म्रिड सफीरासे हाडदेन छ्याम मुबा टोगल गिक वारी चूड्जी। ² थेन्नी ढिक्सी वारी चूड्सी खबा टाडगाग्याम तिगै टाडगा चा हाडदेन छ्याम थान्जी। ओच्छे बाँकी टाडगा चा हननियासे मुल चेलागदे मुबा ग्लारी भसी जम्मान टाडगा चुदेन हिन्ना भिसी पाड्जी।

³ जमाहेन्से पत्रुससे थेदा चुहड् भिसी भिजी, “हननिया ए शैतानना तहरी चिसी तिग्दा परमेश्वरला आत्मादेन छ्याम लुसीला ताम पाड्बा? ओच्छे हाडला वारी चूड्सी खबा टाडगा तिग्दा छुम्सी थान्बा? ⁴ तिग थे वारी आचूड्तेधोना एलान आहिन? ओच्छे चूड्सी खबा टाडगाएनोन एलान मुबा, चु टाडगा एसे जे लइ म्हन्बा थेनोन लबारी खमसेला मुबा। तर एदा चुहड्बा गे लबा सेम खाहड् लसी खजी? च्यागो, एसे म्हिगदेदा आहिन, तर परमेश्वरदा लुसीला ताम पाड्बा मुला। ⁵ चुहड्बा ताम थे:मैछ्याम हननिया सरी पाप्सी सिजी। जमाहेन्से चु ताम थे:बा म्हिगदे जम्मादान ल्हानान लोड्बा खजी। ⁶ जमाहेन्से थेरी मुबा भ्योन म्हिगदे रे:सी थेला लास क्वानसे रिल्जी ओच्छे धुर्सारी भोर्सी लहुजी।

⁷ ओसपन घण्टा सोम लिच्छा चु ताम था आयाङ्गान हननियाला म्रिड न्हडरी खजी। ⁸ जमाहेन्से पत्रुससे थेदा “एनीगदेसे वारी ओतेरीन चूड्बा हिन्ना? डादा पाड्गो” भिसी भिमा, थेसे “लास्सो, ओतेरीन हिन्ना” भिसी भिजी।

⁹ जमाहेन्से पत्रुससे थेदा “एनीगदे ढिक्सी तिग्दा प्रभुला आत्मासे तिग लबा चीम भिसी च्याबारी म्हाड्बा? च्यागो, एला हेम्बोदा धुर्सारी लहुबागदे म्पारीन मुला, एदाएनोन थेनीगदेसे मडग्यार भोर्ला” भिसी भिजी। ¹⁰ थेहड् भिमैछ्याम थे पत्रुसला काड डामरी पाप्सी सिजी। जमाहेन्से थेला हेम्बोदा लहुसी खबा भ्योनगदे न्हडरी खमा थे सिसी जिन्मुबा, ओच्छे थेनीगदेसे थेदाएनोन भोर्सी थेला हेम्बोला डामरी लहुजी। ¹¹ जमाहेन्से जम्मान मण्डलीदेन चु ताम थे:बा जम्मान म्हिगदेदा ल्हानान लोड्बा खजी।

मुल चेलागदेग्याम तबा उदेकला गे

¹² जमाहेन्से मुल चेलागदेग्याम म्हिगदेला गुडरी उदेकला गेगदे तबारी छ्याड्जी, ओच्छे थेनीगदे जम्मान सोलोमनना दलानरी[†] सेम गिकनोन तसी हुप तमुबा। ¹³ तर प्रभु येशूदा विश्वास आलबा स्यहान्दो म्हिगदे न्हडला खालैसेनोन प्रभु येशूदा विश्वास लबा म्हिगदेदेन छ्याम ढिक्सी चिबारी भड आलनी, तसैनोन थेनीगदेसे प्रभु येशूदा विश्वास लबा म्हिगदेला बारेरी ज्यबान ताम लमुबा। ¹⁴ जमाहेन्से प्रभुदा विश्वास लबा हेम्फेबेदेन म्रिडम्हेमेगदेला हुल झन बढब तबान निजी। ¹⁵ मुल चेलागदेसे लबा उदेकला गेला बारेरी थे:सी म्हिगदेसे आखम्बा म्हिगदेथोरी पत्रुस खमा थेला क्रिपसे जे भिसै स्यापुगै भिसी आखम्बा म्हिगदेदा थेनीगदेला तीबा नान्बादेन छ्यामनोन भसी ग्याम ग्यामरी थान्मुबा। ¹⁶ ओच्छे यरूशलेमला क्यारक्युरला शहरग्यामसेनोन ल्हानान म्हिगदेसे आखम्बा म्हिगदेदेन म्हडसे स्यापुबा म्हिगदेदाएनोन थेरी भसी खमुबा। ओच्छे थे म्हिगदे जम्मान खम्मुबा।

मुल चेलागदेदा दुख पिन्बा

¹⁷ परमेश्वरला मन्दिररी पूजा लबा मुल म्हि ओच्छे थेदेन छ्याम मुबा जम्मान सदुकीगदेसे मुल चेलागदेदा डाह लजी। ¹⁸ ओच्छे मुल चेलागदेदा चुड्सी झ्याल्खानरी झाड्जी। ¹⁹ तर म्हुनड प्रभुला

[†] 5:11 चु पदरी “मण्डली” भिबा चा प्रभु येशू ख्रीष्टदा विश्वास लबा यरूशलेमला म्हिगदे हिन्ना। [†] 5:12 “सोलोमनना दलान” भिबा चा सोलोमन ग्लेसे सहोबा दलान मुबा, चु दलान यरूशलेमला मन्दिररी मुबा।

दूत गिक खसी झ्यालखानना प्राप ठोड्डी थैनीगदेदा मडग्यार भसी चुहड् भिसी भिजी, ²⁰ “एनीगदे निउ ओच्छे परमेश्वरला मन्दिररी राप्सी चु छार जुनीला बारेरी जम्मान ताम म्हिगदेदा थे:ना लउ।”

²¹ स्वर्गदूतसे चुहड् भिमाहेन्से थैनीगदे स्यहोरीन परमेश्वरला मन्दिररी वाड्डी म्हिगदेदा लोपबारी छ्याइजी।

थेनोन धुइरी परमेश्वरला मन्दिररी पूजा लबा मुल म्हि, थेदेन छ्याम मुबा म्हिगदे खजी, ओच्छे इस्राएली नेतागदे जम्मादान सभारी ड्योइजी। जमाहेन्से मुल चेलागदेदा झ्यालखानग्याम भबारी म्हिगदे पुइजी। ²² तर परमेश्वरला मन्दिरला सिपाहीगदे झ्यालखानरी धोखसी च्यामा थैनीगदेसे थेरी खालैदा आम्राड्नी। थेतबासेलमा थैनीगदे दो:सी निसी चु ताम पाड्जी। ²³ “डन्से झ्यालखानरी तालचा लसी थान्बादेन पालेगदे प्रापरी राप्सी चिबा म्राड्जी, तर डन्से प्राप ठोड्डी च्यामा न्हडरी खालैदा आस्यापनी।” ²⁴ परमेश्वरला मन्दिरला कप्तानदेन परमेश्वरला मन्दिररी पूजा लबा मुल म्हिगदेसे चु ताम थे:माहेन्से दाहेन्से तिग तला भिसी थैनीगदे अलमल तजी।

²⁵ थेनोन धुइरी थेरी खालै म्हि गिक खसी, “च्यागो, हाडनीसे झ्यालखानरी झाड्डी थान्बा म्हिगदे मी परमेश्वरला मन्दिररी राप्सी म्हिगदेदा लोपबान मुला” भिसी भिजी। ²⁶ जमाहेन्से सिपाहीगदेदेन छ्याम परमेश्वरला मन्दिरला कप्तान निसी थैनीगदेदा कर आलना भजी। तिग्दा भिसम म्हिगदेसे थैनीगदेदा युड्बासे तोला भिसी थैनीगदे लोड्मुबा।

²⁷ थैनीगदेसे थे मुल चेलागदेदा सभारी भसी डाच्छापट्टि राप्पुड्जी। ओच्छे परमेश्वरला मन्दिररी पूजा लबा मुल म्हिसे मुल चेलागदेदा चुहड् भिसी ड्योइजी, ²⁸ “एनीगदेदा डन्से येशूला मिन लसी खालैदा तिगै ताम थालोपगो भिसी कुल्मुबा। तर च्यागो, एनीगदेसे लोपबा चु ताम यरूशलेम नाडनोन थे:ना लसी जिन्जीम, ओच्छे येशूदा साइबाला दोष एनीगदेसे डन्दा लबारी म्हाइबा मुला।”*

²⁹ तर पत्रुसदेन स्यहान्दो मुल चेलागदेसे चुहड् भिसी भिजी, “डन्से म्हिगदेसे कुल्बा ताम आहिन, बरु परमेश्वरसे कुल्बा ताम चा ड्याननोन तो:मुला। ³⁰ हाडनीसे येशूदा कुसरी टाँगब लसी साइबा मुबा, तर यहाडला आखे म्हेमेला परमेश्वरसे येशूदा सिबाग्याम सोना लजी। ³¹ परमेश्वरसे इस्राएलीगदेसे हाडला पाप खलासी परमेश्वरपट्टि दो:गै भिसी ओच्छे थैनीगदेला पापला दोष मेटब लबारी येशूदा शासन लबा म्हिदेन थाबा पिन्बा म्हि सहोसी हाडला दाहिने छ्यापट्टि थान्जी। ³² चु जम्मान तामला साक्षी डनी मुला, थेहड्दोन लसी परमेश्वरसे कुल्बा ताम ड्यानबा म्हिगदेदा पिन्बा परमेश्वरला आत्माएनोन साक्षी मुला।”

³³ चु ताम थे:माहेन्से थैनीगदेदा ल्हानान बोमो रे:जी, ओच्छे मुल चेलागदेदा साइबारी सल्लाह लबान मुबा। ³⁴ तर यहूदी धर्मगुरुदेन छ्याम जम्मासेन मान लबा गमलिएल भिबा फरिसीसे सभाला डाच्छा रे:सी थैनीगदेदा छिन्नड मडग्यार निउ भिसी भिजी। ³⁵ ओच्छे थेसे सभाला म्हिगदेदा चुहड् भिसी भिजी, “इस्राएलीगदे हाडनीसे चु म्हिगदेदा जे लबारी छ्याइबा मुला, थेरी होशियार तउ। ³⁶ तिग्दा भिसम चु भन्दा डाच्छाएनोन थूदास भिबा म्हिसे डा घेन म्हि हिन्ना भिसी भिमुबा। ओच्छे थेदेन छ्याम ओस्पन ग्यार्जा बलि म्हिगदे भ्रमुबा, ओच्छे थेदा साइजी। जमाहेन्से थेदेन छ्याम भ्रबा जम्मान म्हिगदे ससा बडबड तजी, ओच्छे जम्मान गे आखेलबा तजी। ³⁷ चु म्हि भन्दा लिच्छाएनोन यहुल्साला म्हि झ्याबा धुइरी गालीलग्याम यहूदा भिबा म्हि थोन्जी, ओच्छे ल्हानान म्हिगदे थेला लिच्छा भ्रजी, थेदाएनोन साइजी। जमाहेन्से थेदेन छ्याम भ्रबा म्हिगदे ससा बडबड तजी। ³⁸ दान्देला चु तामला बारेरीनोन डाइ हाडनीदा पाड्ला, चु म्हिगदेदा हाडनीसे तिगै आलना खलागो। तिग्दा भिसम चुगदेसे लबा चु गेदेन ताम म्हिगदेग्याम हिन्सम थे हड्दोन म्हासी निला। ³⁹ तर चु गे परमेश्वरग्याम तबा हिन्सम हाडनीसे रोकब लबारी आखम। रोकब लबारी म्हाइजी भिसम हाडनी परमेश्वरला बिरोधरी रे:जीम भिबा ताम था तला।”

जमाहेन्से थैनीगदेसे थेला ताम ड्यानन्जी। ⁴⁰ ओच्छे थैनीगदेसे मुल चेलागदेदा न्हडरी ड्योइसी तोबा ग्याइबा लजी। ओच्छे “दो:सी खाइमै येशूला मिन किन्सी तिगै ताम थापाड्गो” भिसी थैनीगदेदा पुइजी।

* 5:28 मत्ती २७:२५

41 जमाहेन्से येशूला मिनरी बेइज्जत नाबाधोनाला तजी भिबा तामरी ताड्सी ताड्सी मुल चेलागदे थे सभाग्याम थोन्सी निजी। 42 ओच्छे थेनीगदे धिन धिननोन परमेश्वरला मन्दिरदेन दिम दिमरी निसी येशून थार्बा पिन्बा ख्रीष्ट हिन्ना भिसी थार्बा पिन्बा समाचार थे:ना लबारी आख्लानी।

6

चबा थुड्बा भो लसी पिन्बाला लागिरी धम्बा गोर निस म्हि

1 थे धुडरी येशूदा विश्वास लबा म्हिगदे बढब तबान निमुबा। जमाहेन्से हिब्रू ग्योइ पाड्बा यहूदीगदेला बिरोधरी ग्रीक ग्योइ पाड्बा यहूदीगदेसे तामगन लबारी छ्याइजी। तिग्दा भिसम ग्रीक ग्योइ पाड्बा यहूदीगदेला हेम्बो सिबा म्रिडम्हेमेगदेसे धिनना धिन तो:तेधोना चबा थुड्बा आयाड्मुबा। 2 जमाहेन्से च्युक न्ही चेलागदेसे येशूदा विश्वास लबागदेदा ड्योइसी चुहड् भिसी भिजी, “परमेश्वरला बचन थे:ना लबा गे ख्लासी चबा थुड्बा पिन्बा गे लबारी डन्दा ठीक आत। 3 थेतबासेलमा आलेगदे, एनीगदे न्हडला परमेश्वरला आत्मादेन बुद्धिसे प्लिड्बा, ओच्छे जम्मासेन मान लबा गोर निस म्हिदा धम्गो, डन्से चु गे थेनीगदेदा जिम्मा पिन्ना। 4 तर डन्से चा प्रार्थना लबादेन परमेश्वरला बचन थे:ना लबा गे लला।”

5 चु ताम येशूदा विश्वास लबा जम्मान म्हिगदेदा सेम निजी। ओच्छे थेरी मुबा जम्मादान थे ताम ज्यबा छोर्सी थेनीगदेसे पूरा विश्वास मुबादेन परमेश्वरला आत्मासे प्लिड्बा स्तिफनस, फिलिप, प्रखरस, निकनोर, तीमोन, पर्मिनासदेन एन्टिओखिया भिबा शहरला यहूदी धर्म तेन्बा निकोलाउसदा धम्जी। 6 ओच्छे थे म्हिगदेदा मुल चेलागदे मुबा ग्लारी भजी। जमाहेन्से मुल चेलागदेसे थे म्हिगदेशोरी हाडला या थान्सी प्रार्थना लजी।

7 परमेश्वरला बचन ल्हानान ग्लारी थे:बान निजी, ओच्छे यरूशलेमरी प्रभु येशूदा विश्वास लबा म्हिगदे बढब तबान निजी। परमेश्वरला मन्दिररी पूजा लबा म्हिगदे न्हडला ल्हानान म्हिगदेसेनोन प्रभु येशूदा विश्वास लजी।

स्तिफनसदा चुड्सी यहूदीगदे हुप तबा दिमरी भोर्बा

8 जमाहेन्से स्तिफनस परमेश्वरला दयामायादेन शक्तिसे प्लिड्सी म्हिगदेला गुडरी घेन घेन गेगदे लसी उदेकला चिनुगदे उन्बान मुबा। 9 तर दान्दे नोकर आहिन्बा म्हिगदे भिबा हुप तबा दिमग्याम कोइ कोइ म्हिगदे स्तिफनस मुबा ग्लारी खसी आतो:बा आतो:बा ताम लबारी छ्याइजी। थे म्हिगदे चा अलेक्जेन्ड्रिया, कुरेनी, किलिकिया ओच्छे एशियाला म्हिगदे मुबा। 10 स्तिफनससे परमेश्वरला आत्मादेन बुद्धिग्याम पाड्बा तामला जोहाब थेनीगदे खालैसेन पिन्आखमनी।

11 जमाहेन्से थेनीगदेसे न्हड न्हडरी म्हिगदेदा थीसी घुस पिन्बान चुहड् भिसी पाड्पुड्जी, “चुसे परमेश्वरदेन मोशाला बिरोधा लसी ताम पाड्बा डन्से थे:जी।” 12 चुहड्बा ताम लसी थेनीगदेसे म्हिगदे, यहूदी गन्बागदेदेन यहूदी धर्मगुरुगदेदा थीजी। ओच्छे थेनीगदेसे स्तिफनसदा चुड्सी यहूदी धर्मला अदालतरी भोर्जी।

13 जमाहेन्से थेनीगदेसे स्तिफनसला बिरोध लसी लुसीला ताम पाड्बा म्हिगदेदा भजी। थे म्हिगदेसे चुहड् भिसी पाड्जी, “चु म्हिसे परमेश्वरला मन्दिरदेन मोशाला ठिमला बिरोध लसी ताम पाड्बारी आख्लानी। 14 तिग्दा भिसम चुसे मी ‘नासरतला येशूसे परमेश्वरला चु मन्दिरदा फुप्ला ओच्छे मोशासे य्हाड्दा पिन्बा रिमठिमएनोन पोसी पिन्ना’ भिबा डन्से थे:जी।”

15 जमाहेन्से यहूदी धर्मला अदालतरी चिबा जम्मान म्हिगदेसे थेदा ज्यना लसी च्याजी। ओच्छे थेला ली स्वर्गदूतला ली हड्बान य्हाल य्हाल्बा प्राड्जी।

7

स्तिफनससे म्हिगदेदा पाड्बा

† 6:1 हिब्रू ग्योइ पाड्बा यहूदीगदे चा इस्त्राएलीगदे हिन्ना। ओच्छे ग्रीक ग्योइ पाड्बा यहूदीगदे चा अर्गु यहुलला म्हिगदे हिन्ना।

† 6:11 चुरी “मोशाला बिरोध लसी” भिबा चा परमेश्वरसे मोशादा पिन्बा ठिमला बिरोधरी भिबा हिन्ना।

1 जमाहेन्से परमेश्वरला मन्दिररी पूजा लबा मुल म्हिसे, “चु ताम सत्य हिनना?” भिसी ड्योडमा,
2 स्तिफनससे चुहड् भिसी भिजी, “आबागदेदेन ज्योज्यो आलेगदे चु ताम ड्यानगो। जम्मान भन्दा
घेन शक्ति मुबा परमेश्वरसे य्हाडला आखे म्हेमे अब्राहाम हारान भिबा नाम्सारी फेपबा भन्दा
डाचछा मेसोपोटामिया भिबा ग्लारी स्यहूबा धुइरी थेसे परमेश्वरदा हाडला डाचछापट्टि म्राड्जी।*
3 परमेश्वरसे थेदा ‘ए हाडला य्हुल्सादेन हाडला म्हिगदे ख्लासी डाइ उन्बा य्हुल्सारी निउ’ भिसी
सुड्बा मुबा।*

4 “जमाहेन्से थे कल्दीगदेला य्हुल्साग्याम थोन्सी हारान भिबा नाम्सारी खसी चिजी। ओचछे
थेला आबा सिमाहेन्से परमेश्वरसे थेदा थे ग्लाग्याम दान्दे हाडनी स्यहूबान लबा चु शहररी भजी।*
5 परमेश्वरसे थेदा थे ग्लारी निसी सम्पत्ति मी आहिन काड थान्बा ग्ला सुत्तै आपिन्नी। तर सन्तान
आरेसैनोन परमेश्वरसे थे ग्ला थेदेन थेला सन्तानदा पिन्ना भिसी कबुल लबा मुबा।* 6 ओचछे
परमेश्वरसे थेदा “एला सन्तान अर्गु य्हुल्सारी निसी चितोःबा मुला, थे ग्लाला म्हिगदेसे थेनीगदेदा
घ्यबा सहोसी ग्यार्जा बलि दिडधोना थेनीगदेसे नाआखम्बा दुख पिन्ना’ भिसी सुड्जी।* 7 दोःसी
परमेश्वरसे चुहड् भिसी सुड्जी, ‘थेनीगदे जुन य्हुलला म्हिगदेला घ्यबा दोःसी चिला डाइ थे य्हुलला
म्हिगदेदा सजाय पिन्ना। जमाहेन्से थेनीगदे थे ग्लाग्याम थोन्सी चुनोन ग्लारी खसी डादा तेन्ना।’

8 “परमेश्वरसे अब्राहामदेन छ्याम खतनाला कबुल लजी। हाडला झा इसहाक न्हसी भ्रेःरे तमाकुनु
अब्राहामसे थेला खतना लजी। इसहाकसेनोन हाडला झा याकूबला खतना लजी, थेहड् लसीन
याकूबसेनोन हाडला च्युक न्ही कोलागदेला खतना लजी। ओचछे थेला च्युक न्ही कोलागदे य्हाड
जम्मालान आखे म्हेमे दोजी।*

9 “थे आखे म्हेमेगदे न्हडरी योसेफ भिबादा थेला ज्योज्योगदेसे डाह लसी मिश्र य्हुल्सारी चूड्सी
पिन्जी। तसैनोन थेदेन छ्याम परमेश्वर मुबा।* 10 योसेफदा परमेश्वरसे जम्मान दुखग्याम फेजी।
ओचछे परमेश्वरसे थेदा ज्यबा बुद्धि पिन्बासे लमा मिश्र य्हुल्साला ग्ले फारोसे थेदा सेम निसी मान
लजी। जमाहेन्से थेदा मिश्र य्हुल्सादेन ग्लेखाडला हाकिम सहोजी।*

11 “लिच्छा मिश्र य्हुल्सादेन कनान य्हुल्सा नाडनोन अनिकाल तसी घेन दुख तजी, थेतबासेलमा
य्हाडला आखे म्हेमेसे चबा सहे तिगैनोन आयाडनी।* 12 तर याकूबसे मिश्र य्हुल्सारी चबा सहे मुला
भिबा ताम थेःमाहेन्से थेला झागदे य्हाडला आखे म्हेमेदा थेरी पुड्जी। थेनीगदे मिश्र य्हुल्सारी निबा
चु डाचछारेम मुबा। 13 ओचछे दोःसी हूप तमा योसेफसे हाडला ज्योज्यो आलेगदेदा हाड खाल हिनना
भिसी डोसेना लजी। जमाहेन्से योसेफला जम्मान म्हेमेला बाररी फारो ग्लेसे था याड्जी।* 14 जमाहेन्से
योसेफसे हाडला आबा याकूबदेन हाडला म्हिगदेदा चुरी भसी खउ भिसी पुड्जी। याकूबला हाडला
म्हेमेदेन हाडला म्हिगदे लसी बोगल सोमसे च्युक डा म्हि मुबा।* 15 जमाहेन्से याकूब हाडला जम्मान
म्हिगदेदा भोर्सी मिश्र य्हुल्सारी निजी, ओचछे थे थेरीन सिजी। थेहड् लसीन थेला झागदे य्हाडला
आखे म्हेमेगदेएनोन थेरीन सिजी।* 16 लिच्छा मिश्र य्हुल्साग्याम थेनीगदेला सिबा ल्हुइदा शकेम
भिबा ग्लारी भोर्सी धुर्सारी थान्जी। थे धुर्सा अब्राहामसे हमोर भिबा महिला झागदेदा टाडगा फासी
ग्लुबा मुबा।*

स्तिफनससे मोशाला बाररी पाड्बा

17 “परमेश्वरसे अब्राहामदेन छ्याम लबा कबुल पूरा तबारी छ्याइबा धुइ तसी जिन्बा मुबा, थे
धुइरी मिश्र य्हुल्सारी य्हाडला आखे म्हेमेला सन्तानगदे ल्हानान बढब तबान निजी। 18 जमाहेन्से
मिश्र य्हुल्सारी योसेफदा डोआसेबा स्यहान्दो ग्लेसे शासन लबारी छ्याइजी।* 19 थे ग्लेसे य्हाडला
य्हुलला म्हिगदेदा धोका पिन्सी ल्हानान दुख पिन्जी। ओचछे थेनीगदेसे य्हाडला आखे म्हेमेला

* 7:2 उत्प १२:१ * 7:3 उत्प १२:१ * 7:4 उत्प ११:३१; १२:४ * 7:5 उत्प १२:७; १३:१५; १५:१८; १७:८ * 7:6
उत्प १५:१३-१४; प्रस्था ३:१२ * 7:8 उत्प १७:१०-१४; २१:२-४; २५:२६; २९:३०-३५ * 7:9 उत्प ३७:११, २८; ३९:२, २१
* 7:10 उत्प ४१:३९-४१ * 7:11 उत्प ४२:१-२ * 7:13 उत्प ४५:१, १६ * 7:14 उत्प ४५:९-१०, १७-१८; ४६:२७
* 7:15 उत्प ४६:१-७; ४९:३३ * 7:16 उत्प २३:३-१६; ३३:१९; ५०:७-१३; यहो २४:३२ * 7:18 प्रस्था १:७-८

भर्खर न्हबा कोलागदेदा मडग्यार थान्पुड्जी। चुहड् लसी भर्खर न्हबा जम्मान कोलागदेदा सिना लजी।*

20 “थेनोन धुडरी मोशा न्हजी। थे परमेश्वरला डाच्छापट्टि जेबा म्हि मुबा। थेदा ला सोमधोना हाडलान आबाला दिमरी सयार लसी थान्जी।* 21 थेदा मडग्यार भोर्सी थान्माहेन्से फारोला झामेसे थेदा भोर्जी, ओच्छे हाडलान झा सहोसी सयार लसी न्हजी।* 22 जमाहेन्से मोशादा मिश्रीगदेला बुद्धि लोप्जी, ओच्छे मोशासे पाड्बा तामदेन गे शक्तिशाली मुबा।

23 “बोगल न्ही दिड तमाहेन्से मोशासे हाडला इस्राएली ज्योज्यो आलेदेन छ्याम हुप तबा सेम लजी।* 24 मिश्री गिकसे हाडला इस्राएली ज्योज्यो आले न्हडला गिकदा अन्याय लबा म्हाड्सी मोशासे थेदा जोगब लसी थे मिश्रीदा साइसी हाडला आलेथोरी लबा अत्याचारला बदला किन्जी। 25 डाग्यामसेन परमेश्वरसे थेनीगदेदा चु दुखग्याम फेला भिबा ताम डाला ज्योज्यो आलेसे घोला भिसी मोशासे म्हन्बा मुबा। तर थेनीगदेसे थे ताम आघोनी। 26 न्हडगरदड इस्राएली न्ही हाड हाड न्हडरी छेबा बड्बा लसी चिबा धुडरी मोशा खजी, ओच्छे थेनीगदेदा ठिक्ना लबारी म्हाइसी ‘होगदे, एनीगदे मी ज्योज्यो आले हिन्ना, तिग्दा हाड हाड न्हडरी छेबा?’

27 “तर हाडला खिमजेमदा अन्याय लबा म्हिसे थेदा धुर आड्सी चुहड् भिजी, ‘एदा डन्दा शासन लबा म्हिदेन न्यायाधीश दोबारी खाल्से धम्जी? 28 तिग तिल्मा एसे थे मिश्रीदा साइबा हड्दोन डादाएनोन साइबारी म्हाइबा?’ 29 चुहड्बा ताम थे:सी मोशा मिद्यान भिबा य्हुल्सारी यासी विदेशी दोसी चिजी। थेरी थेला झा न्ही न्हजी।

30 “मिद्यान य्हुल्सारी चिबा बोगल न्ही दिड तमा मोशासे सीनै भिबा गडला डामरी तोडतोडबा ग्लारी लुड्बा झाडरी मे ल्हामरी स्वर्गदूत गिक म्हाड्जी।* 31 चु म्हाड्सी मोशा उदेक तजी, ओच्छे जजाकी डामरी निसी च्यामा परमेश्वरसे चुहड् भिसी सुड्बा थे:जी। 32 ‘डा एला आखे म्हेमे अब्राहाम, इसहाकदेन याकूबला परमेश्वर हिन्ना।’ चु थे:सी मोशा लोड्सी फितफित धर्सी थेपट्टि च्याबारीन आखम्नी।

33 “जमाहेन्से परमेश्वरसे मोशादा चुहड् भिसी सुड्जी, ‘एला लखम स्युगो। तिग्दा भिसम ए राप्बा ग्ला चोखो ग्ला हिन्ना। 34 डाइ मिश्र य्हुल्सारी मुबा डाला म्हिगदेदा लबा अन्याय म्हाड्सी जिन्बा मुला, ओच्छे थेनीगदेला दुखला तामएनोन थे:सी जिन्बा मुला। थेतबासेलमा थेनीगदेदा थे अन्यायदेन दुखग्याम फेबाला लागिरी डा मार फाप्बा हिन्ना। दाहेन्से डाइ एदा मिश्र य्हुल्सारी पुडला।’

35 “चुनोन मोशादा थेनीगदेसे ‘एदा खाल्से डन्दा शासन लबा म्हिदेन न्यायाधीश सहोजी’ भिसी पत्याब आतमुबा, थेनोन मोशादा परमेश्वरसे लुड्बा झाडला मे ल्हामरी म्हाड्बा स्वर्गदूतग्याम शासन लबा म्हिदेन इस्राएलीगदेदा दुखग्याम फेबा म्हि सहोसी पुड्जी।* 36 चुनोन मोशासे मिश्र य्हुल्सारी, वाला भिबा समुनद्रदेन बोगल न्ही दिडधोना तोडतोडबा ग्लारी उदेकला गेगदेदेन चिनुगदे उन्बान इस्राएलीगदेदा मिश्र य्हुल्साग्याम फेसी भबा मुबा।*

37 “चुनोन मोशासे इस्राएलीगदेदा ‘परमेश्वरसे डादा पुड्खबा हड् लसी एनीगदे न्हडग्यामसेन एनीगदेला लागिरी अगमवक्ता गिक पुड्खला’ भिसी पाड्मुबा।* 38 चुनोन मोशा तोडतोडबा ग्लारी म्हिगदेदेन छ्याम मुबा धुडरी स्वर्गदूतदेन छ्याम मुबा, थेनोन स्वर्गदूतसे सीनै भिबा गडरी य्हाडला आखे म्हेमेदेन छ्याम ताम पाड्मुबा, थेसेन य्हाडदा पिन्बाला लागिरी छोन्बो बचन याड्बा मुबा।*

39 “थेसे कुल्बा ताम आड्यानना य्हाडला आखे म्हेमेसे थेदा ख्लासी मिश्र य्हुल्सारीन दो:सी निबा सेम लजी। 40 जमाहेन्से थेनीगदेसे हारूनदा ‘य्हाडला डाच्छा डाच्छा भ्रबा तिगै लगदे सहोसी पिन्गो। तिग्दा भिसम डन्दा मिश्र य्हुल्साग्याम फेसी भबा चु मोशादा तिग तगेम य्हाडदा था आरे’ भिसी भिजी।* 41 जमाहेन्से थेनीगदेसे म्हे बहरला मूर्ति गिक सहोसी थेरी बलि पिन्जी, ओच्छे हाडसे लबा गेरी थेनीगदे ल्हानान ताड्जी।* 42 थेतबासेलमा परमेश्वरसे थेनीगदेदा ख्लाजी, ओच्छे थेनीगदेसे

* 7:19 प्रस्था १:११-१३, २२ * 7:20 प्रस्था २:२ * 7:21 प्रस्था २:३-१० * 7:23 प्रस्था २:११-१५; १८:३-४ * 7:30 प्रस्था ३:१-१० * 7:35 प्रस्था २:१४ * 7:36 प्रस्था ७:५; १४:२१; गन्ती १४:३३ * 7:37 व्यव १८:१५, १८ * 7:38 प्रस्था १९:१-२०; १७; व्यव ५:१-३३ * 7:40 प्रस्था ३२:१ * 7:41 प्रस्था ३२:२-६

म्हन्बा हड्णोन मुरी मुबा सारगदेदा तेन्बारी ख्लासी पिन्जी। चु ताम अगमवक्तागदेसे डाच्छान परमेश्वरला बचनरी भिबा मुबा,

‘इस्नाएलीगदे तिग एनीगदे बोगल न्ही दिडधोना तोडतोडबा ग्लारी मुबा धुइरी एनीगदेसे डादा जन्तुला बलिदेन भेटीगदे पिन्जी? आपिन्नी।*’

43 तर एनीगदेसे मोलोख भिबा लला पालदेन रेफन भिबा लला सार, ओच्छे एनीगदेसे तेन्बा लला मूर्तिगदे थीसी भोर्जी।

थेतबासेलमा दाहेन्से डाइ एनीगदेदा सजाय पिन्बाला लागिरी बेबिलोन भिबा ग्लाग्याम क्याम्सडपट्टि पुइला।’

स्तिफनससे परमेश्वर धन्छ्याबा पालला बारेरी पाड्बा

44 “य्हाडला आखे म्हेमे तोडतोडबा ग्लारी मुबा धुइरी थेनीगदेदेन छ्याम परमेश्वर धन्छ्याबा पाल मुबा। थे पाल मोशासे म्हाडबादेन परमेश्वरसे कुल्बा अन्छार स्होबा मुबा।* 45 परमेश्वरसे अर्गु य्हुलला म्हिगदेदा तेःसी थेनीगदेला य्हुल्सा य्हाडला आखे म्हेमेदा शासन लपुड्जी। थे पाल य्होशूसे थेनीगदेला य्हुल्सा ढासी किन्बा धुइरी थेनीगदेदेन छ्यामनोन भजी। थेहड् लसीन दाऊद ग्लेला धुडधोनान थे पाल थेनीगदेदेन छ्यामनोन मुबा।* 46 दाऊद ग्लेसे परमेश्वरला दयामाया याड्सी थेसे याकूबला परमेश्वरला लागिरी दिम स्होम्याङ्गै भिसी परमेश्वरदेन छ्याम बिन्ती लजी।* 47 तर परमेश्वरला लागिरी दिम चा सोलोमन ग्लेसे स्होजी।*’

48 “तर म्हिसे स्होबा दिमरी जम्मान भन्दा घेन परमेश्वर धन्आछ्या, ओच्छे अगमवक्तागदेसेनोन चुहड् पाड्बा मुला। 49 परमेश्वरसे चुहड् भिसी सुड्बा मुला, ‘डाला ठि स्वर्ग हिन्ना,

ओच्छे जम्बुलिड डाला काड थान्बा ग्ला हिन्ना।

एनीगदेसे डाला लागिरी खाहड्बा दिम स्होजी?

ओच्छे डाइ बलप्बा न्हबा ग्ला खानड मुला?

50 तिग चु जम्मान स्हे डालान यासे स्होबा आहिन?”**

51 दोःसी स्तिफनससे चुहड् भिसी भिजी, “युडबा हड्बा सेम थोबा म्हिगदे, एनीगदेसे हाडला सेमरी परमेश्वरदा खाइमै आथान्नी। ओच्छे एनीगदेला आखे म्हेमेगदेसे लबा हड्णोन एनीगदेसेनोन परमेश्वरला आत्मासे पाड्बादा सदन बिरोध लजी।* 52 एनीगदेला आखे म्हेमेगदेसे अगमवक्तागदे न्हडला खजिबा अगमवक्तादा चा दुख आपिन्नी तला? थेनीगदेसे परमेश्वरसे म्हन्बा अन्छार भ्रबा म्हिा फेप्खबान मुला भिसी थेःना लबागदे जम्मादान साइजी। दान्दे हाडनी चा परमेश्वरसे धम्बा महिदा धोका पिन्बादेन साइबा म्हि दोजी। 53 हाडनीसे स्वर्गदूतगदेला याग्याम पिन्बा मोशाला ठिम मी याड्जी। तर हाडनीसे थे ठिम आड्यान्नी।”

स्तिफनस सिबा

54 स्तिफनसला चुहड्बा ताम थेःसी थेनीगदे बोमोसे म्लाड म्लाड तसी स्वा क्रेबारी छ्याइजी। 55 तर स्तिफनस चा परमेश्वरला आत्मासे प्लिड्सी एकोहोरो स्वर्गपट्टि च्याजी। ओच्छे थेसे परमेश्वरला घेन य्हालरी येशूदा परमेश्वरला दाहिनेपट्टि राप्सी धन्छ्याबा म्हाड्जी। 56 ओच्छे थेसे “च्यागो, डाइ स्वर्ग ठोड्बादेन परमेश्वरसे पुइखबा म्हि येशूदा परमेश्वरला दाहिनेपट्टि राप्सी धन्छ्याबा म्हाड्बा मुला” भिसी भिजी।

57 तर थेनीगदेसे नाब्यड ख्यासी घेन काइ लसी क्रिड्सी तिक्खुरीन स्तिफनसदा व्हाजी। 58 जमाहेन्से थेनीगदेसे युडबासे तोसी साइबाला लागिरी स्तिफनसदा शहरग्याम तेःसी भोर्जी।

* 7:42 आमो ५:२५-२७ * 7:44 प्रस्था २५:९, ४० * 7:45 यहो ३:१४-१७ * 7:46 २ शमू ७:१-१६; १ इति १७:१-१४
† 7:47 “सोलोमन ग्ले” चा दाऊद ग्लेला झा हिन्ना। * 7:47 १ राजा ६:१-३८; २ इति ३:१-१७ * 7:50 यशै ६६:१-२ * 7:51 यशै ६३:१० † 7:52 “परमेश्वरसे म्हन्बा अन्छार भ्रबा म्हि” चा येशू खीष्ट हिन्ना।

चुहड् लबा म्राड्बा म्हिगदेसे हाड हाडला क्वान स्युसी शाऊल भिबा भ्योन म्हिदा जिम्मा लसी स्तिफनसदा युडबासे तोजी।

⁵⁹ थेनीगदेसे चुहड् लसी युडबासे तोबा धुइरी स्तिफनससे “प्रभु येशू डाला आत्मा हाडसे किन्गो” भिसी प्रार्थना लजी। ⁶⁰ जमाहेन्से थेसे पुइ जूसी घेन काइ लसी, “प्रभु, चु पापला दोष थेनीगदेदा थाखगै” भिमैछ्याम थेला सा निजी।

8

शाऊलसे येशूदा विश्वास लबा म्हिगदेदा दुख पिन्बा

¹ स्तिफनसदा साइबारी शाऊलएनोन ढिक्बा मुबा। थेनोन धिनकुनुहेन्से यरूशलेमरी मुबा मण्डलीला बिरोधरी ल्हानान दुख तबारी छ्याइजी, ओच्छे मुल चेलागदे बाहेक थेनीगदे जम्मान ससा बडबड तसी यहूदियादेन सामरियाला ग्लारीक्यार यार्जी। ² जमाहेन्से परमेश्वरदा तेन्बा म्हिगदेसे स्तिफनसला लासदा भोर्सी ल्हुजी, थे सिबासे लमा थेनीगदे ल्हानान क्राबा क्रिड्बा लजी। ³ तर शाऊलसे चा येशूदा विश्वास लबा म्हिगदेदा नाश लबारी छ्याइजी। ओच्छे दिम दिमरी वाड्सी हेम्फेबे, म्रिड्महेमे जम्मादान छेड्बान भोर्सी झ्यालखानरी झाड्जी।*

फिलिपसे सामरियारी थार्बा पिन्बा समाचार थेःना लबा

⁴ जमाहेन्से थे ससा बडबड तसी यार्बा म्हिगदेसे हाड धोतेबा ग्लारी थार्बा पिन्बा समाचार थेःना लजी। ⁵ फिलिप चा सामरियाला शहर गिकरी निसी थार्बा पिन्बा ख्रीष्टला बारेरी पाड्जी। ⁶ फिलिपसे पाड्बादेन थेसे लबा उदेकला चिनु म्राड्सी थेरी मुबा म्हिगदेसे थेला तामदा सेम लसी ड्यानजी। ⁷ तिग्दा भिसम थेरी मुबा ल्हानान महिला ल्हुइग्याम घेन काइ लसी क्रिड्बान म्हड थोन्सी निबारी छ्याइजी। ओच्छे थेरी मुबा काड या चलब आतबादेन कुज्या म्हिगदेदाएनोन खम्ना लबा मुबा। ⁸ थेतबासेलमा थे शहरला म्हिगदे ल्हानान ताड्जी।

जादु उन्बा सिमोन

⁹ थे शहररी सिमोन भिबा म्हि गिक मुबा। थेसे डाच्छाहेन्सेन थे शहररी जादु लसी सामरियाला म्हिगदेदा उदेक तना लबा मुबा। ओच्छे थेसे हाडसे हाडदान डा हड्बा खालै आरे भिसी म्हन्मुबा। ¹⁰ थेदा यहुल्साला जजाबा म्हिहेन्से घेनधोनाला जम्मान म्हिगदेसे “चु परमेश्वरला शक्ति हिन्ना” भिसी तेन्मुबा, “चुदा जम्मान भन्दा घेन शक्ति भिमुला।” ¹¹ थे ग्लाला म्हिगदेसे सिमोनसे भिबा ताम ड्यानसी थेदेन छ्याम भ्रमुबा। तिग्दा भिसम थेसे ल्हानान धुइहेन्से जादु लसी म्हिगदेदा उदेक तना लबा मुबा। ¹² तर थेनीगदेसे परमेश्वरला यहुल्सादेन येशू ख्रीष्टला मिनना समाचार थेःना लबा फिलिपला तामरी विश्वास लजी। जमाहेन्से हेम्फेबेदेन म्रिड्महेमे जम्मासेन बपत्तिस्मा किन्जी। ¹³ सिमोनसेनोन विश्वास लसी बपत्तिस्मा किन्जी, ओच्छे थे फिलिपदेन छ्याम भ्रबारी छ्याइजी। ओच्छे फिलिपसे लबा घेन घेन उदेकला गेदेन चिनुगदे म्राड्सी सिमोन उदेक तजी।

¹⁴ सामरियाला म्हिगदेसे परमेश्वरला बचनरी विश्वास लजी भिबा थेःसी यरूशलेमरी मुबा मुल चेलागदेसे पत्रुसदेन यूहन्नादा थेनीगदे मुबा ग्लारी पुइजी। ¹⁵ थेनीगदे सामरियारी धोखसी थेरी मुबा विश्वासीगदेसे परमेश्वरला आत्मा याड्गै भिसी पत्रुसदेन यूहन्नासे प्रार्थना लजी। ¹⁶ तिग्दा भिसम थे धुइधोना थेनीगदे न्हडला खालैथोरीनोन परमेश्वरला आत्मा फेपखबा आरेमुबा। थेनीगदेला बपत्तिस्मा प्रभु येशूला मिनरी जे तबा मुबा। ¹⁷ पत्रुसदेन यूहन्नासे थेनीगदेशोरी या थान्सी प्रार्थना लमाहेन्से थेनीगदेसे परमेश्वरला आत्मा याड्जी।

¹⁸ मुल चेलागदेसे या थान्मा परमेश्वरला आत्मा याड्बा म्राड्माहेन्से सिमोनसे थेनीगदेदा टाडगा पिन्बारी छ्याइबान, ¹⁹ “डादाएनोन चु शक्ति पिन्गो, ओच्छे डाइ जुन म्हिथोरी या थान्ना थे म्हिसे परमेश्वरला आत्मा याड्गै” भिसी भिजी। ²⁰ तर पत्रुससे सिमोनदा चुहड् भिसी भिजी, “एला टाडगा एदेन छ्यामनोन नाश तगै। तिग्दा भिसम परमेश्वरला मोलम टाडगासे ग्लुखम्ला भिसी एसे म्हन्जी।

* 8:3 मुल २२:४-५; २६:९-११

21 परमेश्वरला डाचूछा एला सेमसे म्हन्बा ताम ठीक आरेबासे लमा चु गेरी एला तिगै भोदेन अधिकार आरे। 22 थेतबासेलमा एसे म्हन्बा चु आज्यबा नइबा तामदा ख्लासी परमेश्वरपट्टि दोःसी परमेश्वरदेन छ्याम प्रार्थना लसम एला सेमरी म्हन्बा चुहड्बा तामदा परमेश्वरसे माफ पिन्ना तला। 23 तिगदा भिसम एला सेम डाहसे प्लिड्बादेन पापला तहरी मुला भिबा ताम डादा था मुला।”

24 जमाहेन्से सिमोनसे “हाडनीसे सुड्बा ताम डाथोरी थाखगै भिसी हाडनीसेन परमेश्वरदेन छ्याम डाला लागिरी प्रार्थना लसी पिन्गो” भिसी भिजी।

25 ओच्छे पत्रुसदेन यूहन्नासे येशूसे लबा हाडसेन म्राड्बा गेदेन प्रभुला बचनग्याम घोना लमाहेन्से सामरीगदेला ल्हानान नाम्सागदेरी थाबा पिन्बा समाचार थेःना लबान थेनीगदे यरूशलेमरी धोजी।

फिलिपसे इथियोपिया भिबा सरकाररी म्हिदा स्यापूबा

26 जमाहेन्से प्रभुला दूत गिकसे फिलिपदा “एरेःसी ल्होपट्टि यरूशलेमग्याम गाजापट्टि निउ। थे ग्याम तोडतोड्बा मुला” भिसी भिजी। 27 थेतबासेलमा फिलिप रेःसी निजी, थेसे नपुंसक गिकदा स्यापूजी थे नपुंसक इथियोपिया भिबा यहुल्साला कन्दाकी भिबा ग्लेस्याला टाडगाला गे लबा मुल म्हि मुबा। थे नपुंसक परमेश्वरदा तेन्बारी यरूशलेमरी निबा मुबा। 28 थे नपुंसक हाडला दिमपट्टि दोःसी खबान मुबा, ओच्छे थे हाडला रथरी चिसी यशैया भिबा अगमवक्तासे भिबा किताब पढब लबान मुबा। 29 जमाहेन्से परमेश्वरला आत्मासे फिलिपदा “ए थे रथला डामरी निसी थेदेन छ्याम छ्यामनोन निउ” भिसी सुड्जी।

30 फिलिप थे मुबा ग्लारी यार्सी निमा थेसे यशैया भिबा अगमवक्तासे भिबा किताब पढब लबान लबा थेःजी। जमाहेन्से फिलिपसे थेदा “हाडसे पढब लबान लबा चु ताम घोमुला?” भिसी ड्योडमा,

31 थेसे “खालैसे घोना आलतेधोना डाइ खाहड् लसी घोसे?” भिसी भिजी। जमाहेन्से थेसे फिलिपदा रथरी डादेन छ्यामनोन चिउ भिसी पाड्जी। 32 थेसे पढब लबा परमेश्वरला बचनरी चुहड् भिसी भिबा मुबा,

थे साइबारी भोर्बा ग्यु हड्बान मुबा,

ओच्छे ग्यु बोगो हाडला क्रा थामा कुटिसी चिमुला,
थेहड् लसीन थेसेनोन तिगै आसुड्ना कुटिसी चिजी।*

33 थेदा अत्याचार तबा धुइरी थेसे ठीक निसाफ आयाड्नी।

दाहेन्से थेला वंशला बारेरी खाल्से पाड्ला?

तिगदा भिसम थेला जुनी जम्बुलिड्ग्याम भोर्जी।

34 जमाहेन्से थे नपुंसकसे फिलिपदा “चु अगमवक्तासे खाल्ला बारेरी पाड्बा हिन्ना? थेसे हाडलान बारेरी पाड्बा हिन्ना कि स्यहान्दो खालै महिला बारेरी पाड्बा हिन्ना? डादा पाड्सी पिन्गो” भिसी भिजी। 35 जमाहेन्से फिलिपसे परमेश्वरला थेनोन बचनग्याम थेदा येशूला बारेरी थाबा पिन्बा समाचार पाड्जी। 36 ओच्छे थेनीगदे निबान लबा धुइरी क्युइ मुबा ग्लारी धोजी। जमाहेन्से थे नपुंसकसे फिलिपदा “च्यागो, चुरी क्युइ मुबा चीम, दाहेन्से डादा बपतिस्मा किन्बारी तिगसे रोकब लखम्ला?” भिसी भिजी। 37 फिलिपसे थे नपुंसकदा “हाडसे सेमहेन्सेन विश्वास लसम हाडसे किन्खम्ला” भिसी भिमा थे नपुंसकसे, “येशू ख्रीष्टनोन परमेश्वरला झा हिन्ना भिसी डाइ विश्वास लबा मुला” भिसी जोहाब पिन्जी।† 38 जमाहेन्से थे नपुंसकसे रथ रोकब लपुड्जी ओच्छे फिलिपदेन थे क्युइरी वाड्जी, जमाहेन्से फिलिपसे थेदा बपतिस्मा पिन्जी।

39 थेन्नीन क्युइग्याम पाखारी थोन्मैछ्याम प्रभुला आत्मासे फिलिपदा भोर्जी, जमाहेन्से नपुंसकसे फिलिपदा दोःसी आम्राड्नी, ओच्छे थे ताड्बान दिमरी निजी। 40 तर फिलिपसे हाड अशदोद भिबा ग्लारी धोजीम भिबा था याड्जी। ओच्छे कैसरिया भिबा ग्लारी आदोतेधोना जम्मान शहरगदेरी थाबा पिन्बा समाचार थेःना लबान निजी।

* 8:32 यशै ५३:७-८ † 8:37 चु पद ल्हाना हड्बा ग्रीक बाडबलरी भिबा आरे।

शाऊलसे येशूदा विश्वास लबा

1 थेनोन धुइरी शाऊलसे अझ धाग उन्बान प्रभुला चेलागदेदा साइबारी परमेश्वरला मन्दिररी पूजा लबा मुल म्हि मुबा ग्लारी निसी, 2 प्रभुदा विश्वास लबा हेम्फेबेदेन म्रिडम्हेमे न्हडला जो स्याप्सै खीसी यरूशलेमरी भम्याङ्गै भिसी दमस्कस भिबा ग्लाला यहूदीगदे हुप तबा दिमला नेतागदेला लागिरी चिठी भिसी पिन्गो भिसी चिठी हीजी। 3 जमाहेन्से शाऊल निबान लमा थे दमस्कस भिबा ग्लाला डामरी धोजी। थेरी धोमा स्वर्गग्याम तिक्खुरीन थेला क्युर्नोन य्हाल तजी। 4 थे सरी हिल्जी ओच्छे थेसे “शाऊल, शाऊल, एसे डादा तिग्दा ल्हानान दुख पिन्बा?” भिबा काइ थे:जी।

5 ओच्छे थेसे “प्रभु हाड खाल हिनना?” भिसी भिमा चुहड् भिबा काइ थे:जी, “डा एसे ल्हानान दुख पिन्बा येशू हिनना। 6 दाहेन्से ए रे:सी शहररी निउ, ओच्छे एसे तिग लतो:बा थे ताम एदा उन्ना।”

7 थेदेन छ्याम निबा म्हिगदेसे थे काइ चा थे:जी, तर क्यारमार च्यामा खालैदा आम्राड्बासे लमा थेनीगदे थोम तसी चिजी। 8 जमाहेन्से शाऊल रे:सी मी ठोड्सी च्यामा थेसे तिगै आम्राड्नी, ओच्छे थेदेन छ्याम मुबागदेसे थेला यारी चुड्सी दमस्कस भिबा ग्लारी भोजी। 9 थेसे सोमरेधोना तिगै आम्राड्नी, ओच्छे चबा थुड्बाएनोन आलनी।

10 दमस्कस भिबा ग्लारी हननिया भिबा प्रभुला चेला गिक मुबा। थेदा म्हाडरी प्रभुसे “हननिया” भिसी ड्योइमा, थेसे “लाससो प्रभु” भिसी भिजी।

11 जमाहेन्से प्रभुसे थेदा चुहड् भिसी सुड्जी, “ए ‘सोजो’ भिबा ग्यामपट्टि निउ, थेरी यहूदाला दिमरी शाऊल भिबा टार्सस शहररी चिबा म्हिदा म्हाड्गो, च्यागो, थेसे दान्दे प्रार्थना लबान मुला। 12 थेसे म्हाडरी हननिया भिबा म्हि गिक खसी म्हाड्खमगै भिसी हाडथोरी हननियासे या थान्बा म्हाड्बा मुला।”

13 तर हननियासे चुहड् भिसी भिजी, “प्रभु, चु म्हिसे मी यरूशलेमरी मुबा हाडला म्हिगदेदा गाते नड्बा गे लसी दुख पिन्जी भिबा ताम डाइ ल्हानान म्हिगदेग्याम थे:बा मुला। 14 चुरीनोन हाडला मिन किन्बागदेदा खीबारी परमेश्वरला मन्दिररी पूजा लबा मुल म्हिगदेग्याम अधिकार याड्बा मुला।”

15 तर प्रभुसे थेदा चुहड् भिसी सुड्जी, “ए निउ, तिग्दा भिसम डाइ थेदा डादा तेन्बारी धम्बा मुला। थेसे अर्गु यहूलला म्हिगदे, ग्लेगदेदेन इस्त्राएलीगदेदा डाला मिन थे:ना लला। 16 दाहेन्से थेसे डाला लागिरी गाते दुख नातो:ला भिबा ताम डाइ थेदा उन्ना।”

17 जमाहेन्से हननिया निसी थे दिमरी वाड्जी। ओच्छे शाऊलथोरी हाडला या न्हीनोन थान्सी चुहड् भिसी भिजी, “शाऊल आले, ए ग्यामरी खबान लबा धुइरी ए मुबा ग्लारी फेप्खबा प्रभु येशूसेन डादा पुड्खबा हिनना। एसे म्हाड्बारी खमगै ओच्छे परमेश्वरला आत्मासे प्लिड्गै भिसी ए मुबा ग्लारी पुड्खबा हिनना।” 18 हननियासे थेहड् भिमैछ्याम थेला मीग्याम जजाबा पाप्रा हड्बा ताइजी ओच्छे थेला मीसे म्हाड्खमजी। जमाहेन्से रे:सी थेसे बपत्तिस्मा किन्जी। 19 ओच्छे थेसे चबा सहे चसी भड याड्जी।

शाऊलसे दमस्कसदेन यरूशलेमरी परमेश्वरला यहूलसाला समाचार थे:ना लबा

शाऊल तिगै रेधोना येशूदा विश्वास लबागदेदेन छ्याम दमस्कसरी चिजी। 20 ओच्छे तुरुन्तन शाऊल यहूदीगदे हुप तबा दिमरी निसी, “येशू परमेश्वरला झा हिनना” भिसी पाड्बारी छयाइजी। 21 चुहड् भिबा थे:बा म्हिगदे जम्मान उदेक म्हनसी चुहड् भिजी, “येशूला मिन किन्बा यरूशलेमरी मुबा म्हिगदेदा नाश लबादेन चुरीनोन येशूला मिन किन्बा म्हिगदेदा खीसी परमेश्वरला मन्दिररी पूजा लबा मुल म्हिगदे मुबा ग्लारी भोर्बा सेमसे खबा चुनोन म्हि आहिन?” 22 तर शाऊलसे थे:ना लबा ताम झन झन शक्तिशाली तबान निजी ओच्छे येशून थार्बा पिन्बा खीष्ट हिनना भिसी दमस्कसरी मुबा यहूदीगदेदा अलमल तना लजी।

23 ल्हानान रे निमाहेन्से शाऊलदा साइबारी यहूदीगदे ढिक्सी सल्लाह लजी। 24 तर थेनीगदेसे हाडदा साइबारी म्हाड्बा ताम शाऊलसे था याड्जी। शाऊलदा साइबारी थेनीगदेसे दमस्कस शहरला

प्राप प्रापरी धिन म्हनुनोन खुड्सी चिमुबा। ²⁵ तर शाऊलदा स्य्हान्दो विश्वासीगदेसे म्हनुडनोन छाडरी युसी थे शहरला पर्खालग्याम मार पुइजी।*

शाऊल यरूशलेम शहररी

²⁶ शाऊल यरूशलेमरी खमाहेन्से थेरी मुबा येशूला चेलागदेदेन छ्याम ढिक्बारी म्हाइजी। तर थेनीगदेसे थे येशूला चेला हिन्ना भिसी विश्वास आतबासे लमा शाऊल म्हाइसी जम्मान लोइजी। ²⁷ तर बारनाबाससे मुल चेलागदे मुबा ग्लारी शाऊलदा हाडदेन छ्यामनोन भोजी। ओच्छे शाऊलसे प्रभुदा ग्यामरी म्हाइबादेन प्रभुसे सुइबा तामला बारेरी पाइजी। थेहड् लसीन दमस्कसरी आलोइनान येशूला बारेरी थे:ना लजी भिबा ताम बारनाबाससे थेनीगदेदा पाइसी पिन्जी। ²⁸ जमाहेन्से शाऊल यरूशलेमला जम्मान ग्लारी थेनीगदेदेन छ्याम छ्याम भ्रजी, ओच्छे शाऊल आलोइनान प्रभुला बारेरी थे:ना लबान भ्रजी। ²⁹ ओच्छे शाऊलदेन ग्रीक ग्योइ पाइबा यहूदीगदे हाड हाड न्हडरी आढिक्बा ताम लमुबा, तर थे ग्रीक ग्योइ पाइबा यहूदीगदेसे चा शाऊलदा साइबारी म्हाइबान मुबा। ³⁰ चु ताम था याइसी प्रभुदा विश्वास लबागदेसे शाऊलदा कैसरिया भिबा शहररी भोजी, ओच्छे थेग्याम टार्सस भिबा शहरपट्टि पुइजी।

³¹ जमाहेन्से यहूदियादेन गालील ओच्छे सामरिया भिबा ग्लारी मुबा जम्मान मण्डलीदा शान्ति तजी। ओच्छे प्रभुला चेलागदेसे परमेश्वरला आत्माग्याम आँट याइजी ओच्छे मण्डलीएनोन बढब तजी। चेलागदे परमेश्वरसे कुल्बा अन्छार भ्रमुबा ओच्छे प्रभुदा विश्वास लबा म्हिगदेएनोन ल्हानान तबान निजी।

एनियासदेन डोरकास भिबा म्हि खम्बा

³² पत्रुस क्यारमारला नाम्सागदेरी कोर्बान निबा धुइरी लुइडा भिबा ग्लारी मुबा परमेश्वरला म्हिगदे मुबा ग्लारी धोखजी। ³³ पत्रुससे थेरी एनियास भिबा कुज्या म्हि गिक म्हेसी चिबा स्यापजी, थे म्हि कुज्या तबा भ्रे: दिड तबा मुबा। ³⁴ जमाहेन्से पत्रुससे थे कुज्या म्हिदा “एनियास, एदा येशू ख्रीष्टसे खम्ना लला। थेतबासेलमा ए रे:सी हाडला तीबा नान्बा दुइगो” भिसी भिमैछ्याम थे कुज्या म्हि डोड रे:जी। ³⁵ थे कुज्या म्हि खम्बा म्हाइसी लुइडेन शारोन भिबा ग्लारी चिबा जम्मान म्हिगदेसे प्रभुदा विश्वास लजी।

पत्रुससे प्रार्थना लमाहेन्से डोरकास दो:सी सोबा

³⁶ योप्पा भिबा शहररी तबीता भिबा चेला गिक मुबा, थेदा ग्रीक ग्योइरी डोरकास भिमुबा।† थेसे सदन प्राडबोगदेदा ह्यो लबादेन ज्यबा गे लमुबा। ³⁷ पत्रुस लुइडा भिबा ग्लारी मुबा धुइरी थे तबीता आखम्ना सिजी, ओच्छे म्हिगदेसे थेला लास खुसी तलाथोला कोठा गिकरी भोसी थान्जी। ³⁸ लुइडा भिबा ग्ला योप्पा शहरला डामरीन तबासे लमा चेलागदेसे पत्रुस थेरी मुला भिबा ताम थे:सी, “डनी मुबा ग्लारी योना फेपखउ भिउ” भिसी म्हि न्हीदा थे मुबा ग्लारी पुइजी।

³⁹ जमाहेन्से पत्रुस थेनीगदेदेन छ्याम निजी। थेरी धोखमाहेन्से थेनीगदेसे पत्रुसदा तलाथोला कोठारी भोजी। जमाहेन्से थेरी मुबा हेम्बो सिबा म्रिडम्हेमेगदे पत्रुसला डामरी राप्सी क्राबान मुबा, ओच्छे डोरकास भिबा तबीतासे थेनीगदेदेन छ्याम मुबा धुइरी राबा क्वान उन्जी।

⁴⁰ जमाहेन्से पत्रुससे थेनीगदे जम्मादान मडग्यार पुइसी पुइ जूसी प्रार्थना लजी, ओच्छे थे लासपट्टि च्यासी, “तबीता रे:गो” भिसी भिमा, तबीतासे मी ठोइजी ओच्छे थेसे पत्रुसदा म्हाइसी रे:सी चिजी। ⁴¹ पत्रुससे तबीताला यारी चुइसी थीजी ओच्छे परमेश्वरला म्हिगदेदेन हेम्बो सिबा म्रिडम्हेमेगदेदा ड्योइसी तबीता सोजी भिसी उन्जी।

⁴² जमाहेन्से चु ताम योप्पा शहर नाडनोन थे:जी, ओच्छे ल्हानान म्हिगदेसे प्रभुदा विश्वास लजी। ⁴³ ओच्छे पत्रुस ल्हानान धिनधोना ढिला गे लबा सिमोन भिबा म्हिदेन छ्याम योप्पा शहररीन चिजी।

* 9:25 २ कोर ११:३२-३३ † 9:36 हिब्रू ग्योइरी “तबीता” ओच्छे ग्रीक ग्योइरी “डोरकास” भिबा मुला। चुला अर्थ चा “तडगी” हिन्ना।

10

पत्रुसदेन कर्नेलियस

1 कैसरिया भिबा ग्लारी कर्नेलियस भिबा म्हि गिक मुबा, थे म्हि रोमी यहुलला इटालिया भिबा सिपाहीला कप्तान मुबा। 2 थेसे परमेश्वरदा तेन्मुबा, ओच्छे थेदेन थेला दिमला जम्मान म्हिगदेसे परमेश्वरसे कुल्बा ताम ड्यानमुबा। थेसे आरेबागदेदा ज्यबा सेमसे पिन्मुबा। ओच्छे परमेश्वरदेन छ्याम सदन प्रार्थना लमुबा। 3 तिरेकुनु थेसे धिनना तीन बजेरीक्यार प्रार्थना लबा धुइरी परमेश्वरला स्वर्गदूत गिक हाड मुबा ग्लारी खबा म्राड्जी। ओच्छे स्वर्गदूतसे थेदा “कर्नेलियस!” भिसी ड्योइबा थे:जी।

4 जमाहेन्से कर्नेलियस लोड्सी स्वर्गदूतदा जयना लसी च्यासी, “प्रभु, सुड्गो” भिसी भिमा, स्वर्गदूतसे थेदा चुहड् भिसी भिजी, “एसे लबा प्रार्थनादेन एसे प्राडबोगदेदा दया लसी चबा थुड्बारी पिन्बा जम्मान गे परमेश्वरदा फुल्बा भेटी हड्बान दोबा मुला। 5 दाहेन्से एसे योप्पा भिबा शहररी म्हिगदे पुड्सी पत्रुस भिबा सिमोनदा ड्योइगो। 6 थे ढिला गे लबा सिमोन भिबा म्हिदेन छ्याम चिबा मुला, थे सिमोनना दिम समुन्द्रला कुनीरी मुला।”

7 ओते पाड्माहेन्से स्वर्गदूत कर्नेलियस मुबाग्याम फेसी निजी। जमाहेन्से कर्नेलियससे हाडला नोकरगदे न्हडला नोकर न्हीदेन सदन हाडदा क्योड्बा ओच्छे परमेश्वरदा तेन्बा सिपाही गिकदा ड्योइजी। 8 ओच्छे थेनीगदेदा चु जम्मान ताम पाड्सी योप्पा भिबा शहररी पुड्जी।

पत्रुससे म्राड्बा ताम

9 न्हडगरदड थेनीगदे निबान लबा धुइरी धिनना बाह बजेरीक्यार योप्पा शहरला डामरी धोखमा पत्रुस चा प्रार्थना लबारी दिमला कौसीरी निजी। 10 थे धुइरी पत्रुसदा फोखेन्जी, ओच्छे थेसे चबा सहे चबारी म्हाइजी। तर स्यहान्दोगदेसे चबा सहे सहोबान मुबा, थेनोन धुइरी थे एकोहोरो तजी। 11 जमाहेन्से थेसे स्वर्ग ठोड्बा म्राड्जी ओच्छे कुनी बल्लिरीन खीबा तन्ना हड्बा स्वर्गग्याम जम्बुलिडपट्टि मार खबान लबा म्राड्जी। 12 थे तन्नारी जम्बुलिडला काड बलि मुबा ल्हानान थरीला जन्तुदेन सरी भ्रबा जन्तु ओच्छे चरागदे मुबा। 13 जमाहेन्से पत्रुससे चुहड् भिबा काइ थे:जी, “पत्रुस, ए रे:सी चुदा साइसी चउ।”

14 तर पत्रुससे “आहिन प्रभु, डाइ चुहड्बा चबारी आतबा नड्बा सहे[†] खाइमै चबा आरे” भिसी भिजी।

15 दो:सीनोन पत्रुससे “परमेश्वरसे चोखो सहोसी जिन्बा सहेदा एसे नड्बा सहे थाम्हन्गो” भिबा काइ थे:जी। 16 सोमरेमधोना चुहड्बा काइ थे:जी, ओच्छे थे तन्ना तुरुन्तन स्वर्गपट्टि भोजी।

17 हाडसे म्राड्बा तामला अर्थ तिग मुला तला भिसी पत्रुस अलमल तसी चिमुबा। थेनोन धुइरी कर्नेलियससे पुड्बा म्हिगदे सिमोनना दिम म्हाइबान निमा दिम स्याप्सी म्रापरी राप्जी। 18 ओच्छे घेन काइ लसी, “पत्रुस भिबा सिमोन चुरी धन्छ्यामुला?” भिसी ड्योइजी।

19 थे धुइरी पत्रुस हाडसे म्राड्बा तामला बारेरी म्हनसी चिबा मुबा। थेनोन धुइरी परमेश्वरला आत्मासे पत्रुसदा चुहड् भिसी सुड्जी, “च्यागो, एदा म्हि सोमसे म्हाइबान मुला। 20 थेतबासेलमा ए रे:सी धिरी निउ, ओच्छे शङ्का आलना थेनीगदेदेन छ्याम निउ, तिग्दा भिसम थेनीगदेदा डाइनोन पुड्खबा हिन्ना।”

21 जमाहेन्से पत्रुस थेनीगदे मुबा ग्लारी निसी, “च्यागो, एनीगदेसे म्हाइबा म्हि डानोन हिन्ना। एनीगदे चुरी तिग्दा खबा?” भिसी ड्योइमा, 22 थेनीगदेसे पत्रुसदा “कर्नेलियस भिबा कप्तानसे डन्दा पुड्खबा हिन्ना। थे ज्यबा म्हिदेन परमेश्वरदा तेन्बा म्हि हिन्ना, ओच्छे यहूदीगदे जम्मासेन थेदा मान लमुला। थेला दिमरी हाडदा ड्योइसी हाडसे सुड्बा ताम ड्यानगो भिसी परमेश्वरला स्वर्गदूतगदे गिकसे कुल्बा मुला” भिसी भिजी।

23 थेतबासेलमा थेनीगदेदा न्हडरी ड्योइसी पत्रुससे थेनीगदेदा क्योड्जी।

पत्रुस कर्नेलियसला दिमरी निबा

† 10:14 परमेश्वरसे मोशादा पिन्बा ठिम अन्छार कोइ कोइ जन्तुगदेला स्या चबारी आतमुबा।

न्हडगरदड पत्रुस थेनीगदेदेन छ्याम निजी, ओच्छे येशूदा विश्वास लबा योप्पा शहररी मुबा कोइ कोइ म्हिगदेएनोन थेदेन छ्याम निजी।²⁴ रेनीदड थेनीगदे कैसरिया भिबा ग्लारी धोजी। कर्नेलियससे चा हाडला म्हिगदेदेन हाडदेन छ्याम ठिक्बा होंगदेदा ड्योइसी थेनीगदेला ग्याम च्यासी चिबा मुबा।²⁵ पत्रुस न्हडरी खमाहेन्से कर्नेलियस थेदेन छ्याम हुप तजी, ओच्छे थेदा फ्या लजी।²⁶ तर पत्रुससे थेदा थीसी, “रे:गो, डाएनोन म्हि जे हिनना” भिसी भिजी।

²⁷ ओच्छे थेदेन छ्याम ताम पाड्बान दिम न्हडरी वाड्जी, थेरी पत्रुससे ल्हानान म्हिगदे हुप तसी चिबा म्राड्जी।²⁸ पत्रुससे थेनीगदेदा चुहड् भिसी भिजी, “डनी यहूदीगदेला ठिमसे अर्गु यहुलला म्हिगदेदेन छ्याम हुप तबारी आपिनमुला[†] भिबा ताम हाडनीदा थानोन मुला, तर परमेश्वरसे डादा खजिबै म्हिदा नइबादेन गे आखेल्बा थाम्हनगो भिसी उन्बा मुला।²⁹ थेतबासेलमा हाडनीसे ड्योइमैछ्याम तिगै आम्हनना डा हाडनी मुबा ग्लारी खबा हिनना। हाडनीसे डादा चुरी तिग्दा ड्योइबा हिनना डादा सुड्गो।”

³⁰ जमाहेन्से कर्नेलियससे चुहड् भिसी भिजी, “ब्लिरे डाच्छा ओस्पन चुनोन धुइरी डा दिमरी तीन बजेला प्रार्थना लबान मुबा थे धुइरी यहाल यहाल्बा क्वान क्वान्बा म्हि गिक डाला डाच्छापट्टि राप्जी।³¹ ओच्छे थे म्हिसे चुहड् भिसी भिजी, ‘कर्नेलियस, एसे लबा प्रार्थना परमेश्वरसे थे:बा मुला, थेहड् लसीन प्राड्बोगदेदा दया लसी चबा थुड्बा पिन्बा गे परमेश्वरसे ढन्बा मुला।³² थेतबासेलमा एसे योप्पा शहररी म्हि पुइसी पत्रुस भिबा सिमोनदा ड्योइगो। थे समुन्द्रला कुनीरी ढिला गे लबा सिमोनना दिमरी चिमुला।’³³ थेतबासेलमा डाइ तुरुन्तन हाड मुबा ग्लारी म्हि पुइखबा हिनना, दान्दे हाड डन्ना लागिरी ल्हानान दुख लसी चुरी फेपखजी। दाहेन्से प्रभुसे हाडदा कुल्बा जम्मान ताम हाडग्याम ड्यानबारी डनी जम्मान परमेश्वरला डाच्छापट्टि हुप तबा मुला।”

पत्रुससे थार्बा पिन्बा समाचार थे:ना लबा

³⁴ जमाहेन्से पत्रुससे चुहड् भिसी पाड्बारी छ्याइजी, “चु ताम सत्य हिनना, परमेश्वरसे खालैला ली आच्याना जम्मादान गिकनोन व्यवहार लमुला भिबा ताम डाइ म्राड्बा मुला।^{*}³⁵ तर यहुल यहुलला म्हिगदे न्हडला जुन म्हिसे परमेश्वरदा मान लसी थेसे म्हन्बा अन्छारला गे लला थे म्हि परमेश्वरदा सेम निबा म्हि तला।³⁶ ओच्छे येशू ख्रीष्टग्याम इस्राएलीगदेला गुडरी परमेश्वरसे पुइखबा शान्तिला समाचार हाडनीदा थानोन मुला। थेनोन येशू जम्मालान प्रभु हिनना।³⁷ यहन्नासे बपतिस्माला बारेरी थे:ना लमाहेन्से गालीलहेन्से यहूदियाला जम्मान ग्लारी तबा ताम हाडनीदा थानोन मुला।³⁸ खाहड् लसी परमेश्वरसे नासरतला येशूथोरी हाडला आत्मादेन शक्ति पुइखजी। जमाहेन्से थेसे ज्यबा गेदेन शैतानसे दुख पिन्बा जम्मान म्हिगदेदा खम्ना लबान भ्रजी, तिग्दा भिसम थेदेन छ्याम परमेश्वर मुबा।

³⁹ “यहूदीगदेला यहुल्सादेन यरूशलेमरी येशूसे लबा जम्मान गे डन्से म्राड्बा मुला। थेदा म्हिगदेसे क्रूसरी टांगब लसी साइजी।⁴⁰ तर सोमरेमाकुनु परमेश्वरसे थेदा सोना लजी। थेतबासेलमा डन्से दो:सी येशूदा म्राड्म्याड्जी।⁴¹ थेदा जम्मान म्हिसे मी म्राड्आम्याड्नी, तर थे सिबाग्याम सोमाहेन्से थेदेन छ्यामनोन चबा थुड्बा लसी भ्रबा म्हि डन्से जे म्राड्जी। चुनोन ताम उन्बाला लागिरी डाच्छान परमेश्वरसे डन्दा धम्बा हिनना।⁴² ओच्छे थार्बा पिन्बा समाचार थे:ना लबारीदेन येशूदा सिबादेन सोबा म्हिगदेला निसाफ लबाला लागिरी परमेश्वरसे धम्बा हिनना भिसी पाड्गो भिसी येशूसे डन्दा कुल्बा मुला।⁴³ ओच्छे येशूथोरी विश्वास लबागदे जम्मालान पाप येशूला मिनरी माफ याड्ला भिसी जम्मान अगमवक्तागदेसेनोन पाड्बा मुला।”

⁴⁴ पत्रुससे चु ताम पाड्ना पाड्ना पत्रुसला ताम थे:बा जम्मान म्हिथोरी परमेश्वरला आत्मा फेपखजी।⁴⁵ अर्गु यहुलला म्हिगदेथोरीएनोन परमेश्वरला आत्मा फेपखबा म्राड्सी पत्रुसदेन छ्याम खबा यहूदी विश्वासीगदे उदेक तजी।⁴⁶ तिग्दा भिसम थेनीगदेसे आसेबा ग्योइ पाड्सी परमेश्वरला जयजयकार लबान लबा यहूदी विश्वासीगदेसे थे:जी।

[†] 10:28 यहूदीगदेसे चा अर्गु यहुलला म्हिगदेदा परमेश्वरला डाच्छा नइबादेन तिगै गे आखेल्बा म्हि भिसी म्हन्मुबा। ^{*} 10:34 व्यव १०:१७

जमाहेन्से पत्रुससे चुहड् भिसी पाड्जी, ⁴⁷ “य्हाडसे हड्नुन परमेश्वरला आत्मा याड्बा चु म्हिगदेदा दाहेन्से क्युडला बपत्तिस्मा किन्बारी खाल्से रोकब लबा?” ⁴⁸ थेतबासेलमा पत्रुससे थेनीगदेदा येसू ख्रीष्टला मिनरी बपत्तिस्मा किन्गो भिसी कुल्जी। जमाहेन्से थेनीगदेसे पत्रुसदा तिगै धिन डन्देन छ्याम स्य्हूगो भिसी भिजी।

11

खतना लबा यहूदीगदेदा पत्रुससे घोना लबा

¹ यहूदियारी मुबा मुल चेलादेन स्य्हान्दो आलेगदेसे अर्गु यहूलला म्हिगदेसेनोन परमेश्वरला बचनरी विश्वास लजी भिबा ताम थे:जी। ² ओच्छे पत्रुस यरूशलेमरी धोखमाहेन्से खतना लनोन तो:ला भिबा यहूदी विश्वासीगदेसे पत्रुसदा चुहड् भिसी बिरोध लजी, ³ “खतना आलबा म्हिगदेला दिमरी निसी थेनीगदेदेन छ्याम हाडसे तिग्दा चबा थुड्बा लबा?”

⁴ जमाहेन्से पत्रुससे थेनीगदेदा मेलोसेन घोना लबारी छ्याइजी। ⁵ “च्यागो, डा योप्पा भिबा शहररी प्रार्थना लमा सेम गिक तसी एकोहोरो तबा धुइरी कुनी ब्लिरी खीबा घेन तन्ना हड्बा गिक मुग्याम मार खबान लबा तिगै सहे डाइ म्राड्जी, थे तन्ना हड्बा सहे डा मुबा ग्लारी खजी। ⁶ थेरी डाइ ज्यना लसी च्यामा जम्बुलिडरी मुबा काड ब्लि मुबा ल्हानान थरीला जन्तुगदेदेन सरी भ्रबा जन्तुगदे ओच्छे चरागदेदा म्राड्जी। ⁷ जमाहेन्से ‘पत्रुस रे:गो, एसे चुगदे साइसी चउ’ भिबा काइ डाइ थे:जी।

⁸ “तर डाइ ‘आहिन प्रभु, चुहड्बा चबारी आतबा नइबा सहेगदे डाइ खाइमै चबा आरे’ भिसी भिमा, ⁹ “दो:सीनोन स्वर्गग्याम परमेश्वरसे चोखो सहोसी जिन्बा सहेदा एसे नइबा सहे भिसी थापाड्गो भिबा काइ डाइ थे:जी। ¹⁰ सोमरेमधोना चुहड्नुन तजी, जमाहेन्से थे जम्मान सहे दो:सी स्वर्गरीन भोर्जी।

¹¹ “थेनोन धुइरी कैसरिया भिबा ग्लाग्याम डा मुबा ग्लारी पुइखबा म्हि सोम डा चिबा दिमरी धोखजी। ¹² परमेश्वरला आत्मासे डादा थेनीगदेदेन छ्याम शङ्का आलना निउ भिसी सुड्जी। ओच्छे चु ज्योज्यो आले दुएनोन डादेन छ्याम निमुबा, जमाहेन्से डनी थे म्हिला दिम न्हडरी वाड्जी।

¹³ थेसे डन्दा चुहड् भिसी पाड्जी, स्वर्गदूत गिक थेला दिमरी राप्सी चुहड् भिसी पाड्बान लबा म्राड्जी, ‘एसे योप्पा भिबा शहररी म्हि पुइसी सिमोन भिबा पत्रुसदा ड्योइसी भउ। ¹⁴ थेसे एदा जुन ताम पाड्ला थे तामग्याम एदेन एला दिमला जम्मान म्हिगदेसे थाबा याड्ला।’

¹⁵ “डाइ पाड्बारी छ्याइमाहेन्से, डाच्छा य्हाडथोरी परमेश्वरला आत्मा फेप्खबा हड् लसी थेनीगदेथोरीनोन परमेश्वरला आत्मा फेप्खजी। ¹⁶ जमाहेन्से ‘यूहन्नासे एनीगदेदा क्युडग्याम बपत्तिस्मा पिन्जी, तर दाहेन्से परमेश्वरला आत्माग्याम एनीगदेला बपत्तिस्मा तला’ भिसी प्रभुसे सुड्बा ताम डाइ ढन्जी।* ¹⁷ प्रभु येसू ख्रीष्टदा विश्वास लमाहेन्से परमेश्वरसे य्हाडदा मोलम पिन्जी, थेनोन मोलम परमेश्वरसे थेनीगदेदाएनोन पिन्जी भिसम परमेश्वरदा रोकब लबा डा खाल हिन्ना?”

¹⁸ चु ताम थे:माहेन्से थेनीगदेसे बिरोध लबा ख्लाजी, जमाहेन्से थेनीगदेसे परमेश्वरदा जयजयकार लजी, ओच्छे “दाहेन्से परमेश्वरसे अर्गु यहूलला म्हिगदेदाएनोन हाड हाडला पाप ख्लासी परमेश्वरपट्टि दो:सी सोबा मौका पिन्बा मुला” भिसी भिजी।

एन्टिओखिया भिबा शहरला मण्डली

¹⁹ सतिफनसला बारेरी खबा दुखसे लमा ससा बड्बड तबागदेसे स्य्हान्दोगदेदा आहिन, तर यहूदीगदेदा जे थाबा पिन्बा समाचार थे:ना लबान, फोनिके भिबा ग्लादेन साइप्रस भिबा ग्ला ओच्छे एन्टिओखिया भिबा शहरधोना निजी।* ²⁰ तर थेनीगदे न्हडला कोइ कोइ चेलागदे साइप्रसदेन कुरेनी भिबा ग्लाला मुबा। थेनीगदे एन्टिओखिया भिबा शहररी खसी अर्गु यहूलला म्हिगदेदाएनोन प्रभु येसूला बारेरी थाबा पिन्बा समाचार थे:ना लजी। ²¹ थेनीगदेदेन छ्याम प्रभुला शक्ति मुबासे लमा ल्हानान म्हिगदेसे विश्वास लसी प्रभुला चेला दोजी।

* 11:16 मुल १:५ * 11:19 मुल ८:१-४

22 चु ताम यरूशलेमरी मुबा मण्डलीसे थे:जी, जमाहेनसे थेनीगदेसे एन्टिओखिया भिबा शहररी बारनाबासदा पुइजी। 23 बारनाबास थेरी खसी परमेश्वरसे दयामाया लबादेन मोलम पिन्बा म्राइसी ल्हानान ताइजी। ओच्छे थेसे थेनीगदे जम्मादान सदन सेमहेनसे प्रभुदा विश्वास लसी चिउ भिसी आँट पिन्जी। 24 बारनाबास परमेश्वरला आत्मासे प्लिड्बादेन विश्वासरी कोइबा ज्यबा म्हि मुबा। थेतबासेलमा ल्हानान म्हिगदेसे प्रभुदा विश्वास लजी।

25 जमाहेनसे बारनाबास शाऊलदा म्हाइबारी टार्सस भिबा शहररी निजी। 26 थेसे शाऊलदा स्यापमाहेनसे एन्टिओखिया भिबा शहररी भजी। जमाहेनसे थेनीगदेसे तिदिडधोना मण्डलीला म्हिगदेदेन छ्याम स्यापबान ल्हानान म्हिगदेदा परमेश्वरला बचन लोपबारी छ्याइजी। चेलागदेदा जम्मान भन्दा डाच्छा एन्टिओखिया भिबा शहररीन ख्रीष्टियान भिसी भिजी।

27 थे धुइरी कोइ कोइ अगमवक्तागदे यरूशलेमग्याम एन्टिओखिया भिबा शहररी खजी। 28 थे अगमवक्तागदे न्हडला अगाबस भिबा अगमवक्ता रे:जी, ओच्छे परमेश्वरला आत्मासे थेदा चु जम्बुलिड नाडनोन घेन अनिकाल तबारी छ्याइबा मुला भिसी पाइपुइजी। चु ताम लिच्छा क्लौडियस भिबा ग्लेला पालोरी पूरा तजी।* 29 जमाहेनसे जम्मान चेलागदेसे हाड हाडसे खमतेधोना भेटी हुप्सी यहूदिया भिबा ग्लारी चिबा विश्वासीगदेदा पिन्बारी पक्का लजी। 30 चुहड लसी बारनाबासदेन शाऊलसे भेटी हुप्सी मण्डलीदा च्याबा म्हिगदे मुबा ग्लारी पुइजी।

12

पत्रुसदा झ्याल्खानरी थान्बा

1 थे धुइरी हेरोद अग्रिपा भिबा ग्लेसे मण्डलीला कोइ कोइ म्हिगदेदा चुइसी ल्हानान दुख पिन्बारी छ्याइजी। 2 थे ग्लेसे यूहननाला ज्योज्यो याकूबदा तरवारसे थासी साइपुइजी। 3 चुहड लमा यहूदीगदे ताइबा म्राइसी हेरोद ग्लेसे पत्रुसदाएनोन चुइपुइजी। हेरोद ग्लेसे चुहड लबा खमीर आयुना गेड चसी धड्बा चाडला धुइरी मुबा। 4 हेरोद ग्लेसे पत्रुसदा चुइसी झ्याल्खानरी झाइमाहेनसे सिपाहीगदेला समूह बलि सहोसी खुइपुइजी। ओच्छे मिश्र यहूल्साग्याम फेसी खबा धिनदा ढन्सी धड्बा चाड जिन्माहेनसे थेदा म्हिगदेला डाच्छापट्टि भसी ड्योइबा छार्बा लबा सेम लजी।*

5 थेतबासेलमा पत्रुसदा झ्याल्खानरी झाइजी, तर मण्डलीसे पत्रुसला लागिरी परमेश्वरदेन छ्याम झन प्रार्थना लबाला लबान लजी।

पत्रुस झ्याल्खानग्याम थोन्बा

6 हेरोद ग्लेसे पत्रुसदा म्हिगदेला डाच्छापट्टि भबारी छ्याइबा धिनना डाच्छाकुनुला म्हुनड, पत्रुस सिपाही न्हीला गुडरी म्हेसी चिबा मुबा, थेदा च्याल्दा न्हीसे खीसी थान्बा मुबा। ओच्छे स्यहान्दो सिपाहीगदेसेनोन झ्याल्खानना म्रापरी खुइसी चिबा मुबा। 7 तिक्खुरीन प्रभुला दूत गिक पत्रुस मुबा ग्लारी खसी रापजी, ओच्छे पत्रुसदा थान्बा कोठारी य्हाल तजी। ओच्छे थे स्वर्गदूतसे पत्रुसला राइरी थुसी, “ए योना रे:गो” भिसी पत्रुसदा छिइजी। स्वर्गदूतसे थेहड् भिमैछ्याम पत्रुसला यारी खीबा च्याल्दा हड्ढनोन ब्लसी सरी ताइजी। 8 जमाहेनसे स्वर्गदूतसे थेदा “एसे क्वानदेन लखम क्वान्गो” भिसी भिमा थेसे थेहड्ढनोन लजी। दो:सीनोन स्वर्गदूतसे पत्रुसदा “ए घ नान्सी डाला लिच्छा लिच्छा खउ” भिसी भिजी। 9 स्वर्गदूतसे थेहड् भिमाहेनसे पत्रुस स्वर्गदूतला लिच्छा लिच्छा भ्रबारी छ्याइजी। स्वर्गदूतसे लबा चु गे साँचिन हिन्ना भिसी पत्रुसदा थानोन आरेबा। तर पत्रुससे चु डाइ म्हाड म्राइबान मुला भिसी म्हनजी। 10 जमाहेनसे झ्याल्खानरी खुइसी चिबा सिपाहीला समूह न्हीदा वाइसी थेनीगदे शहरपट्टि निबा फाइला म्रापरी धोजी, थेरी धोमैछ्याम थे म्राप हड्ढनोन ठोइजी, जमाहेनसे थेनीगदे थोन्सी गल्लीला ग्याम तसी निना निनान स्वर्गदूतसे पत्रुसदा ख्लासी निजी।

* 11:28 मुल २१:१० † 12:1 चु हेरोद अग्रिपा घेन हेरोदला छाया हिन्ना। येसू न्हबा धुइरी चा घेन हेरोद ग्ले मुबा (मत्ती २:१-१८, लूका १:५)। † 12:3 “खमीर आयुना गेड चसी धड्बा चाड” भिबादेन मिश्र यहूल्साग्याम फेसी खबा धिनदा ढन्सी धड्बा चाड भिबा गिकनोन हिन्ना। * 12:4 प्रस्था १२:१-२७

11 थे धुइरी चा तिग तजी भिबा ताम पत्रुससे था याइसी चुहड् भिजी, “प्रभुसे हाडला दूत पुइखसी हेरोद ग्लेला याग्यामदेन यहूदीगदेसे लबारी छ्याइबा गेग्याम फेबा ताम पक्का हिन्ना।”

12 चु ताम था याइमाहेन्से थे मर्कूस भिबा यूहन्नाला आमा मरियमला दिमरी निजी। थेरी ल्हानान म्हिगदे हुप तसी प्रार्थना लसी चिबा मुबा। 13 थेसे प्राप ढ्वक ढ्वक लमाहेन्से रोदा भिबा नोकरस्या प्राप ठोइबारी खजी। 14 थेसे पत्रुसला काइ डोसेसी ताइबासे लमा प्रापनोन आठोइना न्हडरी यार्बान निसी, “पत्रुस प्रापरी राप्सी चिबा मुला” भिसी जम्मादान भिजी।

15 तर थेरी मुबागदेसे थेदा “ए म्योजीम” भिसी भिमा थेसे ढीपि लबान चु ताम पक्का हिन्ना भिसी भिजी। जमाहेन्से थेनीगदेसे “थे पत्रुसदा च्याबा स्वर्गदूत मुला तला” भिसी भिजी।

16 तर पत्रुससे चा प्राप ढ्वक ढ्वक लबाला लबान लजी। जमाहेन्से प्राप ठोइमा पत्रुसदा प्राइसी थेनीगदे उदेक तजी। 17 तर पत्रुससे थेनीगदेदा “कुटिसी चिउ” भिसी यासे चाल लजी, ओच्छे प्रभुसे हाडदा खाहड् लसी झ्याल्खानग्याम मडग्यार तेःजी भिबा ताम थेनीगदेदा पाइजी। ओच्छे चु ताम याकूबदेन विश्वास लबा स्यूहानदो ज्योज्यो आले नाना आडागदेदाएनोन पाइसी पिन्गो भिसी पत्रुस थेनीगदे मुबा ग्लाग्याम अर्गु ग्लारी निजी।

18 स्यूहो तमाहेन्से पत्रुस खानड निजी भिसी सिपाहीगदे न्हडरी ल्हानान हल्ली खल्ली तजी। 19 हेरोदसे पत्रुसदा म्हाइगो भिसी कुल्जी। तर थेनीगदेसे पत्रुसदा खानडएनोन आस्यापनी। थेतबासेलमा सिपाहीगदेदा ड्योइबा छार्बा लजी, तसैनोन तिगै जोहाब आपिन्माहेन्से थेनीगदेदा साइगो भिसी कुल्जी। जमाहेन्से हेरोद चा यहूदियाग्याम कैसरिया भिबा ग्लारी निसी थेरीन चिजी।

हेरोद सिबा

20 टुरोसदेन सीदोन यहूल्साला म्हिगदेदेन छ्याम हेरोद ल्हानान बोमो खबा मुबा। थेतबासेलमा थेनीगदे ढिक्सी हेरोद मुबा ग्लारी खजी, ओच्छे ग्लेला गे लबा बलसूतस भिबा म्हिदा ह्यो स्होसी ग्लेदेन छ्याम ढिक्बाला लागिरी सल्लाह लजी। तिग्दा भिसम थेनीगदेला चबा सहे हेरोद ग्लेला यहूल्साग्याम खतोःबा मुबा।

21 तोगब लबा धिनकुनु ग्लेसे जे क्वान्बा क्वान क्वान्सी हेरोद ग्ले निसाफ लबा ठिरी चिसी म्हिगदेला डाच्छा भाषण लजी। 22 जमाहेन्से म्हिगदेसे “चु काइ मी लला काइ हिन्ना, महिला आहिन!” भिसी क्रिड्जी। 23 तर परमेश्वरला मानदेन जयजयकार आलबासे लमा थेनोन धुइरी स्वर्गदूत गिकसे हेरोद ग्लेदा आखम्बा तना लजी, जमाहेन्से स्याउँ स्याउँ च्योलोड तसी थे सिजी।

24 तर परमेश्वरला बचन जुन जुन ग्लारी थेःजी थेरी ल्हानान विश्वासीगदे बढब तबान निजी। 25 ओच्छे बारनाबासदेन शाऊल हाडला गे जिन्ना लसी यरूशलेमग्याम दोःजी। थेनीगदेदेन छ्याम मर्कूस भिबा यूहन्नाएनोन मुबा।

13

बारनाबासदेन शाऊलदा धम्बा

1 एन्टिओखियाला मण्डलीरी मुबा अगमवक्तागदेदेन लोप्बा म्हिगदे चुनोन हिन्ना। बारनाबास, म्लाडगै भिबा शिमियोन, कुरेनी भिबा लुकियस, शासन लबा हेरोददेन छ्यामां छर्बा मनेन ओच्छे शाऊल, 2 थेनीगदे फोइथान चिसी प्रार्थना लबान प्रभुदा तेन्बा धुइरी परमेश्वरला आत्मासे “बारनाबासदेन शाऊलदा डाला लागिरी फेसी थान्गो, डाइ थेन्नीदा डाला गे लबाला लागिरी धम्बा मुला” भिसी सुड्जी। 3 जमाहेन्से थेनीगदे फोइथान चिसी थेन्नीथोरी हाड हाडला या थान्सी प्रार्थना लसी थेन्नीदा प्रभुला गे लबारी पुइजी।

पावल थार्बा पिन्बा समाचार थेःना लबारी डाच्छारेम निबा

समुन्द्रला गुडरी मुबा साइप्रस भिबा ग्लारी

† 13:1 चु हेरोद चा हेरोद अन्तिपास हिन्ना।

4 परमेश्वरला आत्मासे बारनाबासदेन शाऊलदा पुइजी, ओच्छे थेन्नी सिलुकिया भिबा ग्लारी निजी। थे ग्लाग्याम पानी जहाजरी क्रेःसी साइप्रसपट्टि निजी। 5 ओच्छे सलामिस भिबा ग्लारी धोखमाहेनसे थेन्नीसे यहूदीगदे हुप तबा दिमरी परमेश्वरला बचन थेःना लजी। थेन्नीदा हो लबारी मर्कूस भिबा यूहन्नाएनोन थेन्नीदेन छ्यामनोन मुबा।*

6 जमाहेनसे थेनीगदे साइप्रस भिबा अञ्चललारा शहर शहररी कोर्बान पाफोस भिबा ग्लाधोना धोखजी, थेरी थेनीगदेसे बार-येशू भिबा जादु लबा फट्टा यहूदी अगमवक्ता गिकदा स्यापूजी। 7 थे जादु लबा म्हि साइप्रस भिबा अञ्चलरी शासन लबा सर्गियस पौलुस भिबा महिला हो मुबा। थे सर्गियस पौलुस बुद्धि मुबा म्हि मुबा। थेसे परमेश्वरला बचन ड्यान्बा सेम लबासे लमा शाऊलदेन बारनाबासदा ड्योइजी। 8 तर जादु लबा एलुमाससे सर्गियस पौलुससे थेनीगदेला ताम विश्वास थालगै भिसी शाऊलदेन बारनाबासला बिरोध लजी। एलुमास भिबा चा ग्रीक ग्योइरी जादु लबा म्हि भिबा हिन्ना। 9 तर शाऊल, थेदा पावलएनोन भिमुबा, परमेश्वरला आत्मासे प्लिड्सी थे एलुमासदा एकोहोरो च्याबाला च्याबान लसी चुहड् भिसी भिजी, 10 “ए जम्मान ज्यबा गेला शत्रु, ओच्छे पापी सेमदेन नइबा सेमसे प्लिड्बा शैतानना कोला, तिग एसे प्रभुग्याम लोप्बा सत्य तामगदेदा न्होइना लबारी आख्ला? 11 च्यागो, दाहेनसे प्रभुसे एदा सजाय पिन्सी जिन्बा मुला, थेतबासेलमा छिन्नडधोना ए काना तसी धिनीला य्हालएनोन आम्राड्” भिसी भिजी। थेहड् भिमैछ्याम खसु हड्बा खसी थेला मी घपूजी, ओच्छे धोपधोप तसी थेसे तिगै आम्राइनी।

जमाहेनसे खालैसे यारी चुड्सी डोर्याब लला वा भिसी थे क्यारमार भ्रबारी छ्याइजी। 12 चुहड् तबा म्राड्सी थे ग्लारी शासन लबा म्हिसे प्रभुदा विश्वास लजी। तिग्दा भिसम प्रभुला बचनग्याम लोप्बा तामरी थे उदेक तबा मुबा।

पावलसे एन्टिओखिया भिबा शहररी थार्बा पिन्बा समाचार थेःना लबा

13 पावलदेन थेला ह्योगदे पाफोसग्याम पानी जहाजरी क्रेःसी पामफिलिया भिबा ग्लारी परब तबा पर्गा भिबा ग्लारी धोजी, ओच्छे मर्कूस भिबा यूहन्ना चा थेनीगदेग्याम फेसी यरूशलेमरी धोजी। 14 तर थेनीगदे चा पर्गा भिबा ग्लाग्याम पिसिदिया भिबा अञ्चलरी परब तबा एन्टिओखिया शहररी खजी, ओच्छे बलप्बा न्हबा धिनकुनु यहूदीगदे हुप तबा दिम न्हडरी निसी चिजी। 15 ओच्छे यहूदीगदे हुप तबा दिमला नेतागदेसे मोशाला ठिमदेन अगमवक्तागदेसे भिबा किताब पढब लमाहेनसे थेनीगदेदा “आलेगदे, हाडनीदेन छ्याम म्हिगदेदा अर्ती पिन्बा खाल्ला तिगै बचन मुसम सुड्गो” भिसी भिजी।

16 जमाहेनसे पावल राप्सी यासे चाल लबान चुहड् भिबारी छ्याइजी, “इस्त्राएलला डाला ज्योज्यो आलेदेन परमेश्वरदा तेन्बा अर्गु यहूलला म्हिगदे डाला ताम ड्यान्गो। 17 य्हाडला आखे म्हेमेगदे मिश्र यहूलसारी चिबा धुइरी इस्त्राएल यहूलला परमेश्वरसे थेनीगदेदा धम्सी घेन म्हि स्होजी। जमाहेनसे परमेश्वरसे हाडला शक्तिशाली छ्यासे थेनीगदेदा थे यहूलसाग्याम तेःसी भजी।* 18 ओच्छे तोडतोडबा ग्लारी थेनीगदेसे लबा आज्यबा बानीबेहोर नाबान ओस्पन बोगल न्ही दिडधोना परमेश्वरसे थेनीगदेदा हो लजी।* 19 जमाहेनसे परमेश्वरसे कनान यहूलसाला गोर निस यहूलला म्हिगदेदा नाश लजी। ओच्छे थे यहूलसा परमेश्वरसे थेनीगदेला अधिकाररी पिन्जी।* 20 चु जम्मान ताम ओस्पन ग्यार्जा बलिसे बोगल न्हीसे च्युइ दिडधोना तजी।

“जमाहेनसे शमूएल अगमवक्ताला पालोधोना परमेश्वरसे न्यायाधीश पिन्जी।* 21 जमाहेनसे म्हिगदेसे ग्ले ह्हीजी, थेतबासेलमा परमेश्वरसे बेन्यामीनना वंशला कीश भिबा महिला झा शाऊलदा बोगल न्ही दिडधोना शासन लपुड्जी।* 22 ओच्छे परमेश्वरसे शाऊलदा तेःमाहेनसे दाऊददा थेनीगदेला ग्ले स्होजी। ओच्छे परमेश्वरसे दाऊदला बारिरी ‘डाइ यिशै भिबा महिला झा दाऊददा डाला सेमसे म्हन्बा हड्बान म्हि स्यापूजी, थेसे डाइ म्हन्बा जम्मान गे लला’ भिसी सुड्जी।*

* 13:5 मुल १२:१२, २५ † 13:6 “साइप्रस” भिबा अञ्चल चा समुन्द्रला गुडरी मुबा ग्ला हिन्ना। बाइबलला ग्यापपट्टि मुबा नक्सारी स्होगो। * 13:17 प्रस्था १:७; १२:५१ * 13:18 गन्ती १४:३४; वयव १:३१ * 13:19 वयव ७:१; यहो १४:१

* 13:20 न्याय २:१६; १ शमू ३:२० * 13:21 १ शमू ८:५; १०:२१ * 13:22 १ शमू १३:१४; १६:१२; भजन ८९:२०

23 “परमेश्वरसे कबुल लबा अन्छार चुनोन म्हिला सन्तानग्याम इस्राएलीगदेदा थार्बा पिन्बाला लागिरी येशूदा भजी। 24 येशू फेपखबा भन्दा डाच्छा यूहन्नासे इस्राएलला जम्मान म्हिगदेदा हाड हाडला पाप ख्लासी परमेश्वरपट्टि दोःसी बपतिसमा किन्गो भिसी थेःना लजी।* 25 यूहन्नासे हाडला गे जिन्ना लबारी छ्याइमा ‘एनीगदेसे डा खाल भिसी म्हन्बा मुला? डा थे आहिन। तर च्यागो, थे डा भन्दा लिच्छा फेपखला, डा थेला लखम स्युबाधोनाला आरे’ भिसी भिमुबा।*

26 “अब्राहामला सन्तान, डाला ज्योज्यो आलेदेन परमेश्वरसे कुल्बा ताम ड्यानबा अर्गु यहूलला आलेगदे चु थार्बा याड्बा समाचार यह्हाडला लागिरी पुडखबा मुला। 27 तर यरूशलेमरी चिबा म्हिगदेदेन हाडला नेतागदेसे थेदा डोआसेनी, ओच्छे बल्पबा न्हबा धिनकुनु पढब लबा अगमवक्तागदेसे भिबा बचन आघोना थेदा सिबाला सजाय पिन्सी थे बचन पूरा लजी। 28 सिबाला सजाय पिन्तोःबा तिगै ताम आस्यूपसैनोन थेनीगदेसे थेदा साइनोन तोःला भिसी पिलातसदा भिजी।* 29 ओच्छे थेनीगदेसे थेला बारेरी बचनरी भिबा अन्छार जम्मान ताम लसी जिन्माहेन्से थेनीगदेसे थेदा क्रुसग्याम मार तेःसी धुर्सारी थान्जी।* 30 तर परमेश्वरसे थेदा सिबाग्याम सोना लजी। 31 ओच्छे गालीलग्याम यरूशलेमधोना हाडदेन छ्याम खबा म्हिगदेसे थेदा ल्हानान धिनधोना म्राड्जी, दान्दे म्हिगदेला लागिरी थेनीगदे थेला साक्षी हिन्ना।

32 “परमेश्वरसे यह्हाडला आखे म्हेमेदेन छ्याम लबा थे कबुलला समाचार डन्से हाडनीदा पाड्ला। 33 परमेश्वरसे येशूदा सिबाग्याम सोना लसी थेनीगदेला कोलागदे यह्हाडला लागिरी थे ताम पूरा लसी पिन्जी, थेला बारेरी दाऊद ग्लेसे भिबा न्हीरेमला व्हाइरी चुहड् भिसी भिबा मुला

‘ए डाला झा हिन्ना,
तिनी डा एला आबा दोजी।’*

34 परमेश्वरसे येशूदा खाइमै नइना आलना सिबाग्याम सोना लबाला बारेरी चुहड् भिसी सुड्बा मुला,
‘डाइ दाऊददा पिन्ना भिसी

लबा कबुल चोखोदेन सत्य मोलम एनीगदेदा पिन्ना।’*

35 ओच्छे अर्गु व्हाइरीनोन चुहड् भिबा मुला,
‘परमेश्वरसे हाडदा जे तेन्बा म्हिला ल्हुइ धुर्सारी नइआपुड्।’*

36 तर चु ताम दाऊदसे हाडला बारेरी पाड्बा आहिन। तिग्दा भिसम दाऊदसे हाड सोतेधोना परमेश्वरसे म्हन्बा हड्बान गे लसी सिजी। ओच्छे थेदा थेला आखे म्हेमे ल्हुबा ग्लारीन ल्हुजी, ओच्छे थेला ल्हुइ नइसी निजी। 37 तर परमेश्वरसे सिबाग्याम सोना लबा येशूला ल्हुइ चा आनइनी।

38 “थेतबासेलमा ज्योज्यो आलेगदे चु येशूग्यामसेन यह्हाडला पाप माफ तला भिसी डाइ पाड्बा चु ताम हाडनीदा था तगै। 39 मोशाला ठिमग्याम हाडनी परमेश्वरदा सेम निबा म्हि दोबारी आखमनी। तर येशूदा विश्वास लबागदे जम्मान परमेश्वरदा सेम निबा म्हि दोबा मुला। 40 थेतबासेलमा होशियार लसी स्यूहूगो, आहिन्सम अगमवक्तागदेसे पाड्बा चु ताम हाडनीथोरी खला। 41 अगमवक्तागदेसे चुहड् भिसी पाड्बा मुबा,

‘परमेश्वरसे सुड्बा तामदा हेला लबागदे,

उदेक तसी सिउ!

एनीगदेला धुइरी डाइ गे गिक लला,

थे गेला बारेरी खालैसे पाड्सी पिन्सैनोन

एनीगदेसे खाइमै विश्वास आल।’ ”*

42 पावलदेन बारनाबास यहूदीगदे हुप तबा दिमग्याम थोन्सी निबारी छ्याइमुबा, जमा म्हिगदेसे खबा साताला बल्पबा न्हबा धिनकुनुएनोन डन्दा चु ताम लोप्सी पिन्गो भिसी थेनीगदेदा पाड्बाला पाड्बान लजी। 43 यहूदीगदे हुप तबा दिमग्याम थोन्माहेन्से ल्हानान यहूदीगदेदेन यहूदी धर्म

* 13:24 मर्कू १:४; लूका ३:३ * 13:25 मत्ती ३:११; मर्कू १:७; लूका ३:१६; यूह १:२०, २७ * 13:28 मत्ती २७:२२-२३;
मर्कू १५:१३-१४; लूका २३:२१-२३; यूह १९:१५ * 13:29 मत्ती २७:५७-६१; मर्कू १५:४२-४७; लूका २३:५०-५६; यूह १९:३८-४२
* 13:33 भजन २:७ * 13:34 यशै ५५:३ * 13:35 भजन १६:१० * 13:41 हब १:५

तेन्बा अर्गु य्हुलला म्हिगदे पावलदेन बारनाबासला लिच्छा भ्रबारी छ्याइजी, जमाहेन्से पावलदेन बारनाबाससे थेनीगदेदा एनीगदे सदन परमेश्वरला दयामायारी चिउ भिसी भिजी।

44 बल्पा न्हबा अर्गु धिनकुनुएनोन शहरला जम्मान ह्ङ्बा म्हिगदे परमेश्वरला बचन ड्यान्बारी पोप तजी। 45 चुदे ल्हाना महिला हुल म्राङ्सी कोइ कोइ य्हूदीगदेदा ल्हानान डाह तजी, ओच्छे पावलसे पाङ्बा तामदा बिरोध लसी थेनीगदेसे पावलला बेइज्जत लजी।

46 तर पावलदेन बारनाबास दुक्क तसी थेनीगदेदा चुह्ङ् भिसी भिजी, “जम्मान भन्दा डाच्छा परमेश्वरला बचन एनीगदे य्हूदीगदेदान थे:ना लतो:बा मुबा। तसैनोन चुदा एनीगदेसे ड्यान्बारीन आम्हाइनी। चुह्ङ् लसी एनीगदेसे हाडसे हाडदा जुकजुकधोनाला जुनी याङ्बाधोनाला म्हि हिन्ना भिसी आम्हन्बासे लमा दाहेन्से डनी अर्गु य्हुलला म्हिगदे मुबा ग्लारी निसी परमेश्वरला बचन थे:ना लला। 47 तिग्दा भिसम प्रभुसे डन्दा चुह्ङ् भिसी कुल्बा मुला,

‘जम्बुलिङला कनाकुनीधोना थार्बा याङ्बा समाचार धोना लबारी ओच्छे अर्गु य्हुलला म्हिगदेला गुडरी य्हाल दोबारी डाइ एनीगदेदा धम्बा मुला।’”*

48 चु ताम थे:माहेन्से अर्गु य्हुलला म्हिगदे ताङ्सी परमेश्वरला बचनला जयजयकार लजी, ओच्छे जुकजुकधोनाला जुनी याङ्बारी धम्बागदेसे परमेश्वरला बचनरी विश्वास लजी।

49 जमाहेन्से विश्वासीगदेसे जम्मान ग्लारी प्रभुला बचन थे:ना लजी। 50 तर पावलदेन बारनाबासला बिरोध लसी य्हूदीगदेसे म्हिगदेग्याम मान याङ्बा परमेश्वरसे कुल्बा ताम ड्यान्बा म्रिडम्हेमेगदेदेन शहरला मुल म्हिगदेदा थीसी, पावलदेन बारनाबासदा हाडला ग्लाग्याम ते:जी। 51 थेतबासेलमा पावलदेन बारनाबाससे चा थेनीगदेला बिरोधरी हाडला काडला धुलु खर्सी आइकोनियन भिबा ग्लारी निजी।* 52 तर एन्टिओखियारी मुबा चेलागदे चा परमेश्वरला आत्मासे प्लिङ्सी ल्हानान ताङ्जी।

14

पावलदेन बारनाबास आइकोनियन भिबा शहररी

1 थेह्ङ् लसीन बारनाबासदेन पावल आइकोनियन भिबा शहररीनोन य्हूदीगदे हुप तबा दिमरी निजी। ओच्छे थेनीगदेसे य्हूदीगदे हुप तबा दिम न्हडरी ज्यना लसी घोना लबासे लमा थेरी मुबा ल्हानान य्हूदीगदेदेन अर्गु य्हुलला म्हिगदेसे प्रभु येशू ख्रीष्टदा विश्वास लजी। 2 तर विश्वास आलबा य्हूदीगदेसे चा अर्गु य्हुलला म्हिगदेदा थीसी प्रभुरी विश्वास लबा ज्योज्यो आलेगदेला बिरोध लबारी छ्याइजी। 3 तसैनोन पावलदेन बारनाबास ल्हानान धिनधोना थेरीन चिजी। थेन्नीसे प्रभुथोरी विश्वास थान्सी आलोडनान ताम लजी। थेनीगदेग्याम प्रभुसे उदेकला चिनुगदेदेन गेगदे लसी हाडला दयामायाला बचन सत्य हिन्ना भिसी उन्जी। 4 तर थे शहरला म्हिगदे फेसी कोइ य्हूदीगदेदेन छ्याम कोइ येशूला मुल चेलागदेदेन छ्याम ढिक्बारी छ्याइजी। 5 जमाहेन्से अर्गु य्हुलला म्हिगदेदेन य्हूदीगदे न्हीनोन नेतागदेदेन छ्याम ढिक्सी थेनीगदेदा दुख पिन्बादेन युडबासे तोबारी म्हाइजी। 6 पावलदेन बारनाबाससे चु था याङ्सी लुकोनिया भिबा शहरला लुसत्रादेन डर्बी शहररी ओच्छे थे शहरला क्यारमारला जिल्ला तबान यार्सी निजी। 7 थेरीनोन थेनीगदेसे थार्बा पिन्बा समाचार थे:ना लसीन चिजी।

पावलदेन बारनाबास लुसत्रादेन डर्बी शहररी

8 लुसत्रा भिबा शहररी काड चलब आतबा म्हि गिक मुबा। थे म्हि न्हमान कुज्या मुबा, थे खाइमै भ्रबा आरेमुबा। 9 थे म्हिसे पावलसे पाङ्मा ड्यान्बान मुबा। ओच्छे थे म्हिसे डाएनोन खम्ला भिसी विश्वास लबा ताम था याङ्सी पावलसे थे म्हिदा एकोहोरो च्यासी, 10 “ए काड जूसी डोड रे:गो” भिसी घेन काइसे पाङ्जी। थेह्ङ् पाङ्मैछ्याम थे म्हि डोड रे:सी भ्रबारी छ्याइजी।

11 महिला हुलसे पावलसे लबा चु गे म्राङ्माहेन्से लुकोनिया ग्योइरी क्रिड्बान, “लगदे म्हि दोसी य्हाड मुबा ग्लारी फेपखजीम” भिसी भिजी। 12 जमाहेन्से थेनीगदेसे बारनाबासदा जिउस भिबा ल

* 13:47 यशै ४२:६; ४९:६ * 13:51 मत्ती १०:१४; मर्कू ६:११; लूका ९:५; १०:११

ओच्छे पावलदा हर्मेस लां भिसी भिबारी छ्याइजी, तिग्दा भिसम पावल चा ताम पाड्बा मुल म्हि मुबा। 13 थे जिउसला मन्दिर थे शहरला डामरीन मुबा। थेतबासेलमा थे मन्दिररी पूजा लबा म्हिसे बहरगदेदेन म्हेन्दोला लुड भसी शहरला म्पारी खजी। जमाहेन्से मुल चेला बारनाबासदेन पावलला डाच्छापट्टि थे बाहरगदे बलि पिन्बारी ठीक लजी।

14 तर मुल चेलागदे बारनाबासदेन पावलसे चु ताम था याड्माहेन्से थेनीगदेसे हाड हाडला क्वान डेबान म्हिला हुल न्हडरी यार्सी निसी क्रिड्बान चुहड् भिबारी छ्याइजी। 15 “महिगदे! हाडनीसे तिग्दा चुहड्बा गे लबा? डनीएनोन हाडनी हड्बान दुख सुख नासी भ्रबा म्हिगदे हिन्ना, ओच्छे चुहड्बा नड्बा गेगदे ख्लासी स्वर्गदेन जम्बुलिड ओच्छे समुन्द्रदेन थेरी मुबा जम्मान स्हेगदे स्होबा छोनबो परमेश्वरपट्टि दोःगै भिसी हाडनीदा सत्य ताम पाड्बारी डनी थाबा पिन्बा समाचार भसी खबा हिन्ना।* 16 दड्बो धुइरी परमेश्वरसे जम्मान यहुलला महिगदेदा हाड हाडला ठिम अन्छार भ्रपुड्जी, 17 तसैनोन परमेश्वरसे हाडला दयामायाला गे लबा आख्लाना स्वर्गग्याम नाम ताइना लसी चबा स्हेगदे रोना लजी। ओच्छे ल्हानान चबा स्हेगदे पिन्सी महिगदेला सेम ताड्ना लजी। चुनोन गेगदेसे परमेश्वरला साक्षी पिन्बा मुला।” 18 चुहड् भिसैनोन बलि थालउ भिसी थे महिगदेदा रोकब लबारी थेनीगदेदा गाहो तजी। तसैनोन म्हिला हुलदा बलि पिन्आपुड्नी।

19 जमाहेन्से एन्टिओखियादेन आइकोनियन भिबा शहरग्याम कोइ कोइ यहूदीगदे थेरी धोखजी। थेनीगदेसे महिगदेदा थीसी युड्बासे तोपुड्जी। जमाहेन्से जम्मान महिगदेसे युड्बासे तोजी, ओच्छे सिजी भिसी म्हनसी थेनीगदेसे पावलदा डुइबान शहरग्याम मड्ग्यार भोजी। 20 तर प्रभुला चेलागदे खसी पावलला क्यारक्युर पोप तमा थे रेःसी शहर न्हडरी निजी। ओच्छे न्हडगरदड् बारनाबासदेन छ्यामनोन थे डर्बी भिबा शहररी निजी।

सिरिया भिबा ग्लाला एन्टिओखिया शहररी दोःसी निबा

21 थेन्नीसे डर्बी भिबा शहररी थाबा पिन्बा समाचार थेःना लसी ल्हानान महिगदेदा येशूला चेला स्होजी। जमाहेन्से थेन्नी लुस्त्रादेन आइकोनियन ओच्छे एन्टिओखिया भिबा शहररी दोःसी निजी। 22 थेन्नीसे थेरी मुबा चेलागदेदा आँट पिन्बान सदन विश्वासी चिउ भिसी भिजी। ओच्छे य्हाड सेमरी ल्हानान दुख नासी परमेश्वरला यहुल्सारी वाड्तोःला भिसी थेनीगदेदा भिजी। 23 जमाहेन्से बारनाबासदेन पावलसे जम्मान मण्डलीरी मण्डलीदा च्याबा महिगदे धम्सी थान्जी। ओच्छे फोइथान चिसी प्रार्थना लसी थेनीगदेदा हाडसे विश्वास लबा प्रभुला छ्यारी जिम्मा पिन्जी।

24 जमाहेन्से थेनीगदे पिसिदिया अञ्चलग्याम पामफिलिया भिबा अञ्चलरी खजी। 25 ओच्छे पर्गा भिबा शहररी परमेश्वरला बचन थेःना लसी थेनीगदे अटालिया भिबा शहररी निजी।

26 थेनीगदे अटालियाग्याम पानी जहाजरी क्रैःसी एन्टिओखियारी दोःसी निजी। थेनोन शहररी पावलदेन बारनाबासदा प्रभुदा विश्वास लबा ज्योज्यो आलेगदेसे परमेश्वरला दयामायारी जिम्मा पिन्सी परमेश्वरला बचन थेःना लबारी पुड्बा मुबा। दान्दे चु गे पावलदेन बारनाबाससे पूरा लजी। 27 एन्टिओखियारी धोखमाहेन्से पावलदेन बारनाबाससे मण्डलीला जम्मान महिगदेदा ड्योइजी। ओच्छे परमेश्वर थेन्नीदेन छ्याम तसी लबा गेदेन अर्गु यहुलला महिगदेसेनोन विश्वास लबारी खम्ला भिबा ताम थेनीगदेदा पाड्सी पिन्जी। 28 जमाहेन्से थेनीगदे थेरी चेलागदेदेन छ्याम ल्हानान धिनधोना चिजी।

15

यरूशलेमरी चिबा सभा

1 यहूदियाग्याम एन्टिओखियारी खबा कोइ कोइ महिगदेसे येशूदा विश्वास लबा ज्योज्यो आले नाना आडागदेदा “एनीगदेसे मोशाला ठिम अन्छार खतना आलनी भिसम एनीगदेसे थाबा आयाड्” भिसी लोपुजी।* 2 पावलदेन बारनाबासला ताम थेनीगदेदेन छ्याम आढिक्बासे लमा थेनीगदेसे हाड

† 14:12 थे ग्लाला महिगदेसे तेन्बा मुल ल चा ‘जिउस’ भिबा ल मुबा, ओच्छे ‘हर्मेस’ भिबा चा लगदेला ताम थेःना लबा ल भिसी म्हनमुबा। * 14:15 प्रस्था २०:११; भजन १४६:६ * 15:1 लेवी १२:३

ह्याडलान ताम थान्जी। थेतबासेलमा पावलदेन बारनाबास ओच्छे कोइ कोइ विश्वासीगदेदा चु ताम सल्लाह लबारी यरूशलेमरी मुबा मुल चेलागदेदेन मण्डलीदा च्याबा म्हिगदे मुबा ग्लारी पुडबाला लागिरी धम्जी।

3 जमाहेन्से मण्डलीला म्हिगदेसे थेनीगदेदा थे ग्याम पुड्जी। थेनीगदे फोनिकेदेन सामरियाग्याम तबान निबा धुडरी स्याप्बा विश्वासीगदेदा अर्गु य्हुलला म्हिगदेसेनोन प्रभुदा विश्वास लजी भिबा ताम पाड्जी। चु ताम थे:सी थेरी मुबा विश्वासीगदे ल्हानान ताड्जी। 4 थेनीगदे यरूशलेमरी धोखमाहेन्से थेनीगदेदा मण्डलीला म्हिगदेदेन मुल चेलागदे ओच्छे मण्डलीदा च्याबा म्हिगदेसे मान लजी। जमाहेन्से परमेश्वरसे थेनीगदेग्याम लबा जम्मान गे थेरी मुबागदेदा पाड्जी।

5 जमाहेन्से फरिसी समूहला कोइ कोइ विश्वासीगदे राप्सी, “अर्गु य्हुलला म्हिगदेदाएनोन खतना लसी मोशाला ठिम अन्छार भ्रतो:ला भिसी पाड्तो:ला” भिसी भिजी।

6 चु तामला बारेरी सल्लाह लबाला लागिरी मुल चेलागदेदेन मण्डलीदा च्याबा म्हिगदे हुप तजी। 7 थेनीगदे न्हडरी ल्हानान सल्लाह लसी जिन्माहेन्से पत्रुस राप्सी थेनीगदेदा चुहड् भिबारी छ्याइजी, “आलेगदे, ल्हानान धुड डाच्छा अर्गु य्हुलला म्हिगदेसे डाला सुडग्याम थोन्बा थार्बा पिन्बा समाचार थे:सी विश्वास लगै भिसी ह्याडनी न्हडग्याम परमेश्वरसे डादा धम्बा ताम ह्याडनीदा थानोन मुला।* 8 ओच्छे परमेश्वर चा जम्मान म्हिला सेमला ताम था याड्बा परमेश्वर हिन्ना। परमेश्वरसे य्हाडदा हड्दोन अर्गु य्हुलला म्हिगदेदाएनोन ह्याडला आत्मा पिन्सी थेनीगदे डाला हिन्ना भिसी उन्बा मुला।* 9 ओच्छे परमेश्वरसे य्हाडदेन थेनीगदे खालैला ली आच्याना गे लसी थेनीगदेसे लबा विश्वासग्याम थेनीगदेला सेम साडसाड तना लजी। 10 थेतबासेलमा तिग्दा अर्गु य्हुलला विश्वासीगदेदा चु धोइ काप्सी परमेश्वरदा बोमो खना लबारी म्हाडबा? तिग्दा भिसम चु धोइ य्हाडला आखे म्हेमेसेनोन पुडआखमनी ओच्छे य्हाडसेनोन पुडआखमनी। 11 तर य्हाडसे हड्दोन थेनीगदेसेनोन प्रभु येशूला दयामायाग्याम थार्बा याड्बा मुला भिसी य्हाडसे विश्वास लबा मुला।”

12 पत्रुसला चुहड्बा ताम थे:सी सभारी मुबा जम्मान म्हिगदे कुटिसी चिजी, ओच्छे अर्गु य्हुलला म्हिगदेला गुडरी परमेश्वरसे थेनीगदेग्याम खाहड्बा उदेकला गेदेन चिनुगदे उन्बा ताम पावलदेन बारनाबाससे पाड्मा थेनीगदे ड्यानसी चिजी। 13 पावलदेन बारनाबाससे पाड्सी जिन्माहेन्से याकूबसे चुहड् भिसी भिजी, “ज्योज्यो आलेगदे डाला ताम ड्यानगो, 14 परमेश्वरसे दया लसी अर्गु य्हुलला म्हिगदेदा धम्सी ह्याडलान म्हि सहोजी। चु ताम मी सिमोनसे ह्याडदा दोलोन पाड्सी जिन्बा मुला। 15 चुनोन तामदेन छ्याम अगमवक्ताला बचनएनोन ढिक्मुला। परमप्रभुसे सुड्बा ताम अगमवक्तासे चुहड् लसी भिबा मुला,

16 ‘डा दो:सी खला,
ओच्छे दाऊदला फुप्बा दिमां दो:सी सहोला,
थेनोन फुप्बा दिमला जगथोरी दो:सी दिम सहोला,

17 थेहड् लसीन बाँकी मुबा म्हिगदे
डा मुबा ग्लारी खगै,
ओच्छे अर्गु य्हुलला म्हिगदेदाएनोन
डाला म्हि सहोबाला लागिरी डाइ ड्योइबा मुला।

18 चु ताम डा परमप्रभुसे ल्हानान डाच्छाहेन्सेन था तना लबा मुला।*’

19 “थेतबासेलमा परमेश्वरपट्टि दो:बा अर्गु य्हुलला म्हिगदेदा य्हाडसे दुख आपिन्गे भिसी डाइ म्हन्बा मुला। 20 तर य्हाडसे थेनीगदेदा चुहड् भिसी भिसी पुडगे, ‘एनीगदेसे मूर्तिदा फुल्बा सहे थाचड। ओच्छे स्य्हान्दोदेन छ्याम ब्रेल्सी थाभ्रड, ओच्छे खारे च्यासी साडबा जन्तुला स्या थाचड, ओच्छे तिगैलान का थाचड।’* 21 तिग्दा भिसम डाच्छाला म्हिगदेला धुइहेन्सेन जम्मान शहररी मोशाला ठिमग्याम लोप्वान मुला, चु ठिम चा बल्प्बा न्हबा धिनरी यहूदीगदे हुप तबा दिमरी पढब लमुबा।”

* 15:7 मुल १०:१-११:१८ * 15:8 मुल २:४; १०:४४ † 15:16 चु पदरी “दिम” भिबा चा दाऊद ग्लेला य्हुल्सा हिन्ना।

* 15:18 आमो ९:११-१२ * 15:20 प्रस्था ३४:१५-१७; लेवी १७:१०-१६; १८:६-२३

अर्गु यहलला म्हिगदेदा भिबा चिठी

²² जमाहेन्से मुल चेलागदेदेन मण्डलीदा च्याबा म्हिगदे ओच्छे जम्मान मण्डली ढिक्सी हाड न्हडला कोइ कोइ म्हिगदेदा धम्सी पावलदेन बारनाबासदा छ्यामनोन एन्टिओखियारी पुइबा ज्यबा तला भिसी म्हन्जी। ओच्छे विश्वासीगदे न्हडला मुल म्हिगदे यहूदा भिबा बारनाबासदेन सिलासदा धम्जी। ²³ थेनीगदेदेन छ्याम चुहड् भिसी भिबा चिठी पुइजी,

“हाडनीलान ज्योज्यो आले डनी मुल चेलागदेदेन मण्डलीदा च्याबा म्हिगदेग्याम एन्टिओखियादेन सिरिया ओच्छे किलिकियारी मुबा अर्गु यहलला विश्वासीगदेदा फ्याफुल्ला।

²⁴ “डनी न्हडला कोइ कोइसे डन्से आपाड्बा तामगदे हाडनीदा लोप्सी हाडनीला सेम धरमर तना लसी हाडनीदा ल्हानान तामग्याम दुख पिन्बा मुला भिबा ताम डन्से थे:बा मुला। ²⁵ थेतबासेलमा डनी जम्मान ढिक्सी लबा सल्लाह अन्छार कोइ कोइ म्हिगदेदा धम्सी थेनीगदेदा डन्ना सेम निबा हो बारनाबास ओच्छे पावलदेन छ्याम हाडनी मुबा ग्लारी पुइखबा ज्यबा छोर्जी। ²⁶ चुगदे चुहड्बा म्हिगदे हिन्ना, चुगदेसे यहूडला प्रभु येशू ख्रीष्टला लागिरी हाडला ज्याननोन पिन्बारी छ्याइबा मुबा। ²⁷ थेतबासेलमा डन्से यहूदादेन सिलासदाएनोन पुइखबा मुला। थेनीगदेसेनोन चु ताम हाडनीदा पाड्सी पिन्ना। ²⁸ तिग्दा भिसम था ततो:बा ताम बाहेक अर्गु ल्हानान तामग्याम दुख आपिन्बा परमेश्वरला आत्मादेन डन्दा ज्यबा छोर्जी। ²⁹ हाडनीदा था ततो:बा ताम चा चुनोन हिन्ना, हाडनीसे मूर्तिदा बलि पिन्बा तिगै सहेगदे, कादेन खारे च्यासी साइबा जन्तुला स्या थासोल्गो, ओच्छे स्यहान्दोदेन छ्याम ब्रेल्सी थाभ्रउ। चुहड्बा तामगदेला संगतनोन आलनी भिसम हाडनीदा ज्यबा तला। दान्देदा चुदेन लासूसो फ्याफुल्ला।”

³⁰ जमाहेन्से पावल, बारनाबास, यहूदादेन सिलास यरूशलेमग्याम एन्टिओखिया शहररी निजी। थेरी थेनीगदेसे विश्वासीगदेदा ग्ला गिकरी ड्योइसी थेनीगदेदा थे चिठी पिन्जी। ³¹ चिठीरी भिबा आँट पिन्बा ताम पढब लसी एन्टिओखियाला विश्वासीगदे ल्हानान ताड्जी। ³² यहूदादेन सिलास चा अगमवक्ता मुबा। थेन्नीसे प्रभुदा विश्वास लबा ज्योज्यो आले नाना आडागदेदा बचनग्याम ल्हानान आँट पिन्सी विश्वासरी कोड्ना लजी। ³³ थेनीगदे तिगै रेधोना थेरी चिमाहेन्से थेरी मुबा आलेगदेसे थेनीगदेदा पुइखबागदे मुबा ग्लारी ढुक्क तसी फेपुगो भिसी पुइजी। ³⁴ तर सिलासदा चा थेरीन चिबा ज्यबा छोर्जी।† ³⁵ तर पावलदेन बारनाबास चा म्हिगदेदा लोपबादेन प्रभुला बचन थे:ना लबान ल्हानान म्हिगदेदेन छ्याम एन्टिओखियारी चिजी।

पावल थाबा पिन्बा समाचार थे:ना लबारी न्हीरेमला पालरी निबा

पावलदेन बारनाबासला ताम आढिक्बा

³⁶ तिगै धिन लिच्छा पावलसे बारनाबासदा “यहाडसे डाच्छा प्रभुला बचन थे:ना लबा शहरला विश्वासीगदेदा दो:सी स्यापबारी निड ओच्छे थेनीगदे खाहड्बा चीम च्यागे” भिसी भिजी। ³⁷ बारनाबाससे मर्कूस भिबा यहून्नादा भोर्बा सेम लजी। ³⁸ तर पावलदा चा मर्कूसदा छ्यामनोन भोर्बारी ज्यबा आछोर्नी, तिग्दा भिसम पामफिलियारी मुबा धुइरी मर्कूस थेनीगदेग्याम फेसी निमुबा, ओच्छे थेनीगदेदेन छ्याम ढिक्सी गे लबा आरेमुबा।* ³⁹ चु तामरी पावलदेन बारनाबासला ताम आढिक्ना थेन्नी फेजी। ओच्छे बारनाबाससे मर्कूसदा भोर्सी पानी जहाजरी क्रे:सी साइप्रस भिबा ग्लारी निजी। ⁴⁰ तर पावलसे चा सिलासदा धम्जी, ओच्छे प्रभुदा विश्वास लबा आलेगदेसे थेन्नीदा परमेश्वरला छ्यारी जिम्मा पिन्माहेन्से थेन्नी थेग्याम निजी। ⁴¹ पावलदेन सिलास सिरियादेन किलिकियारी निसी थेरी मुबा मण्डलीगदेदा विश्वासरी कोड्ना लबान भ्रजी।

पावलदेन सिलास तिमोथीदेन छ्याम हुप तबा

† 15:34 ल्हानान हड्बा ग्रीक बाइबलरी ३४ पद आरे। * 15:38 मुल १३:१३

1 पावल डर्बिदिन लुसूत्रा शहररीएनोन खजी। थेरी तिमोथी भिबा चेला गिक मुबा। थेला आमा यहूदी विश्वासी मुबा, तर आबा चा ग्रीक मुबा। 2 लुसूत्रादेन आइकोनियन शहरला ज्योज्यो आले नाना आडागदेसे तिमोथीदा ज्यबा म्हि भिसी पाड्मुबा। 3 पावलसे तिमोथीदाएनोन छ्यामनोन भोर्बा सेम लजी। ओच्छे थेरी चिबा यहूदीगदेसे लमा पावलसे थेदा भोर्सी खतना लसी पिन्जी। तिग्दा भिसम थेला आबा ग्रीक हिन्ना भिसी थेनीगदेदा था मुबा। 4 जमाहेन्से थेनीगदे शहर शहररी निबान यरूशलेमरी मुबा मुल चेलागदेदेन मण्डलीदा च्याबा म्हिगदेसे पक्का लबा ताम ड्यान्गो भिसी पाड्बान भजी। 5 थेतबासेलमा मण्डलीगदे विश्वासरी कोड्बान धिन धिननोन प्रभुदा विश्वास लबा म्हिगदे बढब तबान निजी।

पावल म्हेर्बा धुइरी माकेडोनियाला म्हिदा म्हाड्बा

6 परमेश्वरला आत्मासे पावल, सिलासदेन तिमोथीदा एशियारी बचन थे:ना लआपुड्बासे लमा थेनीगदे फ्रिगियादेन गलातियाला ग्लागदे तबान निजी। 7 माइसिया भिबा ग्लाला साँधरी धोखमाहेन्से थेनीगदे बिथिनिया भिबा ग्लापट्टि निबारी म्हाइजी। तर येसूला आत्मासे थेनीगदेदा थेपट्टि निआपुड्नी। 8 थेतबासेलमा माइसिया तबान थेनीगदे त्रोआस भिबा ग्लारी निजी। 9 म्हुनड म्हेर्बा धुइरी पावलसे माकेडोनियाला म्हि गिक राप्सी थेदा “माकेडोनियारी फेप्खउ ओच्छे डन्दा हो लसी पिन्गो” भिसी बिन्ती लसी चिबा म्हाड्जी। 10 थेसे चुहड्बा म्हाड्माहेन्से डनीं माकेडोनियारी निबारी तयार तजी। तिग्दा भिसम थे ग्लाला म्हिगदेदा थार्बा पिन्बा समाचार थे:ना लबारी परमेश्वरसे डन्दा ड्योइजीम भिबा ताम डन्से था याड्जी।

लिडिया भिबा म्निडम्हेमेसे विश्वास लबा

11 जमाहेन्से डनी त्रोआसग्याम पानी जहाजरी क्रे:सी सोजोन सामोथ्रेस भिबा ग्लारी खजी, ओच्छे न्हडगरदड नियापोलिस भिबा ग्लारी धोखजी। 12 थेग्याम माकेडोनियाला घेन शहर फिलिपपीरी निजी। थे शहररी चा रोमीगदेसे शासन लमुबा। थेरीन डनी तिगै रेधोना चिजी। 13 ब्लपबा न्हबा धिनकुनु डनी शहरग्याम थोन्सी स्योडला कुनीरी निजी। तिग्दा भिसम थेरी प्रार्थना लबा ग्ला मुला तला भिसी डन्से म्हनबा मुबा, थेरी कोड कोड म्निडम्हेमेगदे हुप तसी चिबा स्यापजी। थेतबासेलमा डनीएनोन थेनीगदेदेन छ्याम चिसी ताम लजी। 14 थेरी डन्ना ताम ड्यान्बागदे न्हडरी थिआटीरा भिबा शहररी चिबा वाला वाला पिड्गै छोनना क्वान चूड्बा परमेश्वरदा तेन्बा लिडिया भिबा म्निडम्हेमे गिक मुबा। पावलसे पाड्मा ज्यना लसी ड्यान्सी धोखम्गै भिबा सेम प्रभुसे थेदा पिन्बा मुबा। 15 थेदेन थेला दिमला जम्मान म्हेमेगदेसे बपत्तिसमा किन्माहेन्से थेसे “चुदे हाडनीसे डादा प्रभुदा विश्वास लबा म्हि म्हनसम डाला दिमरी फेप्खसी धन्छ्यागो” भिसी डन्दा कर लसी ड्योइजी।

पावलदेन सिलासदा झ्यालखानरी झाड्बा

16 डनी प्रार्थना लबा ग्लारी निबान मुबा, थेरी डन्से म्हडसे स्यापबा नोकर स्या गिकदा स्यापजी, थेसे थे म्हडला शक्तिग्याम म्हुदु च्यासी स्होबा ल्हानान टाडगा हाडला मालिकगदेदा पिन्मुबा। 17 ओच्छे थे नोकरस्यासे “चु म्हिगदे शक्तिशाली परमेश्वरला गे लबा म्हिगदे हिन्ना। चुगदेसे एनीगदेदा थार्बा याड्बा ग्यामला बारेरी पाड्बान मुला” भिसी क्रिड्बान पावलदेन छ्याम डन्ना लिच्छा लिच्छा भजी। 18 थे नोकरस्यासे ल्हानान धिनधोना चुहड् पाड्बाला पाड्बान लबासे लमा पावल छेर्सी थेपट्टि फ्लिक दो:सी थे नोकरस्याला ल्हुइरी मुबा म्हडदा चुहड् भिसी भिजी, “ए थेला ल्हुइग्याम येसू ख्रीष्टला मिनरी थोन्सी निउ भिसी डाइ कुल्बा मुला।” पावलसे थेहड् भिमैछ्याम थे म्हड थोन्सी निजी।

19 थे नोकरस्याला मालिकगदेसे दाहेन्से चुला कमाइ चआम्याडनम भिबा म्हाड्सी पावलदेन सिलासदा चुड्सी बजारला गुडरी मुबा नेतागदे मुबा ग्लारी डुइबा छेड्बा लबान भोर्जी। 20 ओच्छे थेनीगदेदा थे शहरला हाकिमगदे मुबा ग्लारी भसी चुहड् भिसी भिजी, “चु म्हिगदे यहूदी हिन्ना,

† 16:10 चु किताब लूकासे भिबा मुबा, चु धुइरी लूकाएनोन पावल, तिमोथी, सिलासदेन छ्याम निबा मुबा।

चुगदेसे य्हाडला शहररी आतोःबा ताम लोप्सी डनदा कोलना लजी। 21 ओच्छे थेनीगदेसे य्हाडला ठिमसे लोप्बारी आतबा ताम लोप्बा मुला य्हाड रोमी म्हिगदे तबासे लमा थेन्से लोप्बा ताम य्हाडसे विश्वास लसी झ्यान्बारी आत।”

22 जमाहेन्से थेरी मुबा म्हिगदे पावलदेन सिलासला बिरोधरी रेःजी। थे शहरला हाकिमगदेसे थेनीगदेला क्वान ढेसी भ्याङ्जी, ओच्छे थेनीगदेदा तोउ भिसी कुल्जी। 23 थेनीगदेदा ल्हानान तोमाहेन्से झ्याल्खानरी झाङ्सी झ्याल्खानना हाकिमदा चु कैदीगदेदा यार्बारी आखम्ना लसी थान्गो भिसी कुल्जी। 24 चुहङ् भिमाहेन्से थे झ्याल्खानना हाकिमसे पावलदेन सिलासदा झ्याल्खानना न्हडला कोठारी भोर्सी ठिँगुरो लगब लसी थान्जी। 25 तर म्हुन गडसलरीक्यार पावलदेन सिलास प्रार्थना लबान परमेश्वरला व्हाइ गोबान मुबा, ओच्छे स्य्हान्दो कैदीगदेसे चा झ्यान्बान मुबा। 26 जमाहेन्से थेरी तिक्खुरीन घेन सडगुल खसी झ्याल्खानना जग यहड यहोड तसी तुरुन्तन झ्याल्खानना म्नापगदे ठोङ्जी। ओच्छे थेनीगदे जम्मादान खीबा स्येगदेएनोन हङ्गोन बल्जी। 27 थे झ्याल्खानना हाकिम फातछोर्मा झ्याल्खानना जम्मान म्नाप ठोङ्बा म्नाङ्सी थेसे जम्मान कैदीगदे यार्जी भिसी म्हन्सी हाडसे हाडदान साइबारी तरवार स्याजी।† 28 तर पावलसे थेदा “हाडसे हाडदान तिगै थालउ, तिगदा भिसम डनी जम्मान चुरीन मुला” भिसी घेन काइसे क्रिङ्जी।

29 जमाहेन्से थेसे नाडसल हीसी छ्योङ्बान न्हडरी खजी, थे लोङ्सी फितफित धर्बान पावलदेन सिलासला डाच्छापट्टि ख्लुप तजी। 30 ओच्छे थेसे थेनीगदेदा मडग्यार भसी, “दाहेन्से डाइ थार्बा याङ्बारी तिग लतोःला?” भिसी झ्योङ्जी।

31 पावलदेन सिलाससे “प्रभु येशू ख्रीष्टदा विश्वास लउ, ओच्छे हाडदेन हाडला जम्मान म्हमेगदेसे थार्बा याङ्ला” भिसी भिजी। 32 जमाहेन्से थेनीगदेसे थेदेन थेला दिमरी मुबा जम्मादान प्रभुला बचन थेःना लजी। 33 जमाकुनु म्हुनडला थेनोन धुइरी थेसे थेनीगदेदा भोर्सी थेनीगदेला पोर खुसी पिन्जी। ओच्छे थेदेन थेला दिमरी मुबा जम्मासेन तुरुन्तन बपतिसमा किन्जी। 34 जमाहेन्से थे झ्याल्खानना हाकिमसे पावलदेन सिलासदा हाडला दिमरी भसी सोल पिन्जी। ओच्छे थेसे परमेश्वरदा विश्वास लबासे लमा थेला दिमरी मुबा जम्मान म्हिगदे विश्वास लसी थेदेन छ्याम ल्हानान ताङ्जी।

35 तर यहाल तमाहेन्से शहरला हाकिमगदेसे सिपाहीगदेदा “थे म्हिगदेदा पुइसी पिन्गो” भिसी कुल्जी। 36 जमाहेन्से झ्याल्खानना हाकिमसे पावलदा “शहररी मुबा हाकिमगदेसे हाडनीदा पुइसी पिन्गो भिसी पाङ्बा मुला। थेतबासेलमा दाहेन्से हाडनी थोन्सी दुक्क तसी फेपुगो” भिसी भिजी।

37 तर पावलसे थे खबर भसी खबा सिपाहीगदेदा “डनी रोमी म्हि तना तनान थेनीगदेसे रोमी ठिम अनछार डनदा तिगै झ्योङ्बा छार्बा आलना तोसी झ्याल्खानरी झाङ्जी। दान्दे चा डनदा सुटुकक तेःबारी म्हाइबा? डनी नीनोन आनि। थेहङ् भिसी कुल्बा हाकिमगदेन छ्याम खसी डनदा तेःतोःला” भिसी भिजी।

38 जमाहेन्से सिपाहीगदे हाकिमगदे मुबा ग्लारी निसी पावलसे पाङ्बा ताम पाङ्जी। पावलदेन सिलास रोमी म्हि चीम भिबा थेःसी थेनीगदे लोङ्जी। 39 जमाहेन्से थेनीगदे खसी पावलदेन सिलासदा माफ हीजी, ओच्छे पावलदेन सिलासदा झ्याल्खानग्याम मडग्यार भोर्सी, “डन्ना शहर ख्लासी फेपुगो” भिसी बिन्ती लजी। 40 झ्याल्खानग्याम थोन्माहेन्से पावलदेन सिलास लिडिया भिबा म्रिडम्हेमेला दिमरी निजी। थेरी प्रभुदा विश्वास लबा ज्योज्यो आले नाना आडागदेदेन छ्याम हुप तसी थेनीगदेदा प्रभुरी कोङ्सी चिउ भिसी आँट पिन्सी पावलदेन सिलास थेग्याम निजी।

17

थेसलोनिके भिबा ग्लारी परमेश्वरला यहुल्साला समाचार थेःना लबा

1 जमाहेन्से पावलदेन सिलास† अम्फिपोलिसदेन अपोल्लोनिया भिबा शहरग्याम तबान थेसलोनिके भिबा शहररी खजी। थेरी यहूदीगदे हुप तबा दिम गिक मुबा। 2 सदला हङ्गोन लसी

† 16:27 थे धुइरी चा कैदीगदे यार्जी भिसम झ्याल्खानना हाकिमदा सरकारसे साइमुबा। † 17:1 १७:१ हेन्से २०:४ पदधोना लूकासे “डनी” भिसी पाङ्बा आरे। चु तामग्याम लूका पावल, सिलासदेन छ्याम आरे भिबा ताम था याङ्खम्ला। चु धुइरी लूका चा फिलिप्पीरी चिबा मुबा।

पावल थेनीगदे मुबा ग्लारी निजी, ओचछे सोमरेम बलपबा न्हबा धिनधोना परमेश्वरला बचनग्याम थेनीगदेदेन छ्याम छलफल लजी। ³ थेसे परमेश्वरला बचनग्याम खीष्टसे दुख नासी सिबाग्याम सोनोन तोःला भिसी प्रस्टन उन्सी घोना लजी। “चुनोन येशू थार्बा पिन्बा खीष्ट हिनना भिसी डाइ हाडनीदा पाड्बान मुला,” भिसी भिजी। ⁴ जमाहेन्से थेनीगदे न्हडला कोइ कोइ म्हिगदेसे प्रभुदा विश्वास लजी। ओचछे परमेश्वरदा तेन्बा ल्हानान ग्रीकगदेदेन स्य्हान्दोसे मान लबा ल्हानान म्रिडम्हेमेगदेसेनोन प्रभुदा विश्वास लसी पावल, सिलासदेन छ्याम ढिक्सी भ्रजी।

⁵ तर यहूदीगदेसे डाह लसी गे आलना न्होड्सी भ्रबा म्हिगदेदा थीसी शहररी हुल दडगा लपुड्जी, ओचछे यासोन भिबा महिला प्राप झ्याल छ्याकछिक लसी पावलदेन सिलासदा म्हिगदेला डाचछापट्टि भवारी छ्याइजी। ⁶ थेनीगदेसे पावलदेन सिलासदा आस्यापमाहेन्से यासोनदेन स्य्हान्दो कोइ कोइ ज्योज्यो आलेगदेदा शहररी मुबा शासन लबा म्हिगदे मुबा ग्लारी डुइबा छेड्बा लसी चुहड् भिसी क्रिड्बान भिजी, “जम्बुलिड नाडनोन हल्ली खल्ली तना लबा चु म्हिगदे चुरीनोन धोखजीम। ⁷ थे म्हिगदे यासोनना डोन्बो दोबा मुला, थेनीगदे जम्मासेन येशू भिबा स्य्हान्दोन गूले गिक मुला भिसी रोमी ग्याल्बो कैसरला ठिम अन्छार लतोःबा गेला बिरोध लबा मुला।” ⁸ चु थेःसी म्हिगदेदेन शहररी मुबा शासन लबा म्हिगदे आत्यब तजी। ⁹ जमाहेन्से यासोन ओचछे थेदेन छ्याम मुबा बाँकी म्हिगदेदेन छ्याम धरौटी किन्सी पुड्जी।

बेरिया भिबा ग्लारी परमेश्वरला यहुल्साला समाचार थेःना लबा

¹⁰ म्हुन तमैछ्याम पावलदेन सिलासदा विश्वासीगदेसे बेरिया भिबा ग्लारी पुड्जी, ओचछे थेनीगदे थेरी धोखमाहेन्से यहूदीगदे हुप तबा दिमरी निजी। ¹¹ थे ग्लाला यहूदीगदे थेसलोनिकेला म्हिगदे भन्दा ल्हानान फर्स्यालो मुबा। तिग्दा भिसम थेनीगदेसे परमेश्वरला बचन सेम लसी ड्यान्मुबा, ओचछे पावलसे पाड्मा ढिक्बा चीम कि आढिक्बा चीम भिसी सदन परमेश्वरला बचनरी च्यामुबा। ¹² थेतबासेलमा ल्हानान म्हिगदेसे प्रभुदा विश्वास लजी। ओचछे स्य्हान्दोसे मान लबा ल्हानान ग्रीक म्रिडम्हेमेगदेदेन हेम्फेबेगदेसेनोन प्रभुदा विश्वास लजी। ¹³ तर परमेश्वरग्यामला बचन बेरिया भिबा ग्लारीनोन पावलसे थेःना लबान मुला भिबा थेसलोनिकेला यहूदीगदेसे था याड्माहेन्से थेनीगदे थेरीनोन हुल दडगा लबारी म्हिगदेदा सुर्याब लबारी खजी। ¹⁴ जमाहेन्से विश्वासीगदेसे पावलदा तुरुन्तन समुन्द्रधोना सनिजी। तर सिलासदेन तिमोथी चा थेरीन चिजी। ¹⁵ पावलदा सबारी निबागदेसे पावलदा एथेन्स भिबा ग्लाधोना सनिजी। थेरी धोमाहेन्से पावलसे सिलासदेन तिमोथीदा खमतेधोना योना खउ भिउ भिसी पाड्गो भिसी कुल्जी। जमाहेन्से थेदा सबागदे थेग्याम बेरियारी दोःसी निजी।

पावल एथेन्स भिबा ग्लारी धोबा

¹⁶ सिलासदेन तिमोथीदा पावलसे एथेन्स भिबा ग्लारी भ्रान्सी चिमा थेसे थे शहर नाडनोन लथाननोन लथान प्राड्सी थेदा ल्हानान दुख ड्हमजी। ¹⁷ थेतबासेलमा थेसे यहूदीगदे हुप तबा दिमरी परमेश्वरदा तेन्बा म्हिगदे, यहूदीगदेदेन छ्याम ओचछे बजाररी स्यापबा म्हिगदेदेन छ्याम धिन धिननोन ड्योइबा छार्बा लमुबा। ¹⁸ इपिक्युरीदेन स्तोइ भिबा धर्म तेन्बा म्हिगदेसेनोन थेदेन छ्याम ड्योइबा छार्बा लजी। ओचछे थेनीगदे न्हडला कोइ कोइसे “चु फतफतेसे तिग पाड्बारी म्हाइबा हिनना?” भिसी भिमा, स्य्हान्दोगदेसे “चुसे अर्गु यहुल्साला ल लुला बारेरी पाड्बा हड्बा मुला” भिसी भिजी। तिग्दा भिसम थेसे येशूदेन छ्याम सिबागदे दोःसी सोला भिबा तामला बारेरी पाड्बान मुबा। ¹⁹ थेतबासेलमा थेनीगदेसे पावलदा अरियोपागसरी† भोर्सी चुहड् भिसी भिजी, “हाडसे लोपबा चु छार ताम खाहड्बा हिनना, डन्सेनोन घोबारी तला? ²⁰ तिग्दा भिसम हाडसे डन्दा उदेकला ताम लोपबान मुला। थेतबासेलमा चु खाहड्बा ताम हिनना थे ताम डन्दाएनोन घोबा सेम मुला।” ²¹ दान्दे एथेन्सला जम्मान म्हिगदेदेन थे ग्लारी चिबा अर्गु यहुल्साला म्हिगदे छार छार ताम पाड्बादेन ड्यान्सीन धिन निना लमुबा।

† 17:19 अरियोपागस भिबा एथेन्स भिबा ग्लाला गड मुबा। थे ग्लारी चा एथेन्सला नेतागदे हुप तबा ग्ला मुबा। लिच्छा चुनोन ग्लाला मिनग्याम सभाला मिन थान्जी।

22 थेतबासेलमा पावलसे अरियोपागस भिबा सभाला गुडरी राप्सी चुहड् भिसी भिजी, “एथेनुसला म्हिगदे, हाडनी जम्मान तामरी धर्म लबा चीम भिसी डाइ म्राड्बा मुला। 23 तिग्दा भिसम डा कोर्बान निमा हाडनीसे तेन्बा लथानगदे म्राड्जी। ओच्छे ग्ला गिकला भेटी फुल्बा ग्लारी चा ‘डोआसेबा लला लागिरी’ भिसी ठ्वाइसी भिसी थान्बाएनोन स्याप्जी। थेतबासेलमा डाइ हाडनीसे डोआसेनान तेन्बा परमेश्वरला बारेरी हाडनीदा पाड्ला।

24 “चु जम्बुलिडदेन जम्बुलिडरी मुबा जम्मान सहे सहोबा परमेश्वर स्वर्गदेन जम्बुलिडला प्रभु हिनना, थेतबासेलमा यासे सहोबा मन्दिररी परमेश्वर धन्आछ्या। 25 ओच्छे महिला याग्याम फुल्बा सहेगदे परमेश्वरदा तोःला भिसी थाम्हन्गो। तिग्दा भिसम परमेश्वर हाडसेन जम्मान म्हिगदेदा जुनी, सादेन तोःबा जम्मान सहेगदे पिन्बा मुला।* 26 परमेश्वरसे म्हि गिकग्याम जम्बुलिड नाडनोन चिबारी यहुल यहुलला म्हिगदे सहोजी। ओच्छे थेनीगदे सोबा धुइदेन चिबा ग्लाएनोन तोगब लसी पिन्जी। 27 चुहड् लबा चा जम्मान यहुलला म्हिगदेसे परमेश्वरदा आस्यापतेधोना साम्सी म्हाइसी स्यापगै भिबा परमेश्वरला सेम मुला। तसैनोन परमेश्वर यह्हाड जम्मानग्याम थारेड अरे। 28 तिग्दा भिसम परमेश्वर यह्हाडदेन छ्यामनोन मुबासे लमा यह्हाड सोबा मुला, यह्हाड क्यारमार भ्रबा मुला ओच्छे यह्हाड जम्बुलिडरी मुला। हाडनीलान वह्हाइ भिबा म्हिगदेसेनोन ‘यह्हाड पक्कान परमेश्वरला सन्तान हिनना’ भिसी भिबा मुला।

29 यह्हाड परमेश्वरला सन्तान तबासे लमा परमेश्वर म्हर, म्हुइदेन युडबागदेला ल हड्बा हिनना भिसी यह्हाडसे म्हनबारी आत। चुगदे चा महिला सेमसे म्हनसी महिला सीपसे सहोबा सहे जे हिनना। 30 थेतबासेलमा डाच्छा आसेना आघोना लबा धुइला गेदा परमेश्वरसे वास्ता आलनी। तर दाहेन्से परमेश्वरसे जम्मान म्हिगदेदा “हाड हाडला पापगदे ख्लासी डापट्टि दोःगो” भिसी कुल्बा मुला। 31 तिग्दा भिसम परमेश्वर हाडसेन धम्बा म्हिग्याम खलैला ली आच्याना जम्बुलिडला निसाफ लबारी परमेश्वरसे थे धिन तोगब लसी जिन्बा मुला। ओच्छे जम्मान म्हिगदेदा चु धिन उन्बाला लागिरी येशूदा सिबाग्याम सोना लजी।”

32 सिबाग्याम सोना लजी भिबा ताम थेःसी थेनीगदे न्हडला कोइ कोइसे पावलदा खिसी लजी। तर स्यहान्दोगदेसे चा “हाडसे पाड्बा चु ताम डन्दा दोःसी ड्यान्बा सेम मुला” भिसी भिजी। 33 जमाहेन्से पावल सभाग्याम थोन्सी निजी। 34 तर कोइ कोइ म्हिगदे थेदेन छ्याम भ्रसी प्रभुदा विश्वास लजी। थेनीगदे न्हडला अरियोपागस भिबा सभाला डियनुसियस भिबा म्हिदेन दामारिस भिबा म्रिडम्हेमे गिक मुबा ओच्छे स्यहान्दोगदेसेनोन प्रभुदा विश्वास लजी।

18

पावल कोरिन्थ भिबा ग्लारी निबा

1 जमाहेन्से पावल एथेनुसग्याम कोरिन्थ भिबा ग्लारी निजी। 2 थेरी पावलसे पोन्टस भिबा ग्लाला अकिलास भिबा यहूदी म्हि गिकदा स्याप्जी। थे म्हि तिगै धिन डाच्छा जे हाडला म्रिड प्रिस्किलादेन छ्याम इटालिया भिबा ग्लाग्याम खबा मुबा। तिग्दा भिसम क्लौडियस भिबा ग्याल्बोसे जम्मान यहूदीगदेदा रोमग्याम थोन्सी निउ भिसी कुल्बा मुबा। पावल थेनीगदेदा स्यापबारी निजी। 3 पावलदेन थेनीगदेला गे गिकनोन तबासे लमा थेनीगदे छ्यामनोन चिजी। तिग्दा भिसम थेनीगदेएनोन पाल सहोबा गे लमुबा। 4 बल्पबा न्हबा धिनदडसेन पावल यहूदीगदे हुप तबा दिमरी निसी छलफल लमुबा, ओच्छे यहूदीदेन ग्रीकगदेदा घोना लबारी म्हाइमुबा।

5 सिलासदेन तिमोथी माकेडोनियाग्याम खबा धुइरी पावल परमेश्वरला बचन थेःना लबा गे लबादेन यहूदीगदेदा येशून थार्बा पिन्बा ख्रीष्ट हिनना भिसी घोना लबा गे जे लमुबा। 6 तर यहूदीगदेसे पावलला बिरोध लबान तामगन लबारी छ्याइजी, जमाहेन्से पावलसे हाडला क्वान खर्सी, “एनीगदे हाडलान दोषसे लमा नाश तजी भिसम चुला दोष डादा लगब आत। दाहेन्से, डा अर्गु यहुलला म्हिगदे मुबा ग्लारी निला” भिसी भिजी।*

* 17:25 १ राजा ८:२७; यशै ४२:५; मुल ७:४८ * 18:6 मुल १३:५१

7 जमाहेन्से पावल थेग्याम परमेश्वरदा तेन्बा तीतस युस्तस भिबा म्हिला दिमरी निजी। थेला दिम यहूदीगदे हुप तबा दिमला डामरीन मुबा। 8 थेरी यहूदीगदे हुप तबा दिमला नेता क्रिसपसदेन थेला दिमरी मुबा जम्मान म्हिगदेसे प्रभुदा विश्वास लजी, ओच्छे कोरिन्थला म्हिगदे न्हडला ल्हानान म्हिगदेसे पावलसे पाड्बा परमेश्वरला बचन ड्यानसी विश्वास लसी बपत्तिसमा किन्जी।

9 तिरेकुनु म्हुनड म्हेर्बा धुइरी म्हाडरी पावलदा प्रभुसे चुहड् भिसी भिजी, “ए थालोङ्गो, तर पाड्बान निउ, ओच्छे कुटिसी थाचिउ। 10 तिग्दा भिसम डा एदेन छ्याम मुला। थेतबासेलमा एदा खालैसे तिगै लआखम, तिग्दा भिसम चु शहररी डाला म्हिगदे ल्हानान मुला।” 11 थेतबासेलमा परमेश्वरला बचन लोपबान पावल दिड गिकसे ला दुधोना थेनीगदेदेन छ्यामनोन चिजी।

12 तर अखैया भिबा ग्लाला नेता गलियोनना धुइरी जम्मान यहूदीगदे ढिक्सी पावलदा चुड्सी अदालतरी भोजी, 13 ओच्छे चुहड् भिसी भिजी, “चु म्हिसे मोशाला ठिमला बिरोध लसी परमेश्वरदा तेन्गो भिसी म्हिगदेदा व्हाम्बान लोपबा मुला।”

14 पावलसे ताम पाड्बारी छ्याइमा गलियोनसे थे यहूदीगदेदा चुहड् भिसी भिजी, “यहूदीगदे, चुदे चु ताम अन्यायदेन आज्यबा गेला बारेरी हिनसम डाइ एनीगदेला ताम ड्याननोन तोःबा मुबा। 15 तर एनीगदेसे पाड्बा चु तामदेन मिन मोशासे पिन्बा एनीगदेलान ठिमला बारेरी तबासे लमा एनीगदेसेन ढिक्ना लउ। चुहड्बा तामला निसाफ चा डाइ आल।” 16 जमाहेन्से गलियोनसे थेनीगदेदा अदालतग्याम तेःजी। 17 जमाहेन्से थेनीगदे जम्मासेन यहूदीगदे हुप तबा दिमला सोस्थेनेस भिबा नेतादा चुड्सी अदालत न्हडरीन तोजी। तर गलियोनसे थे तामला तिगै वास्ता आलनी।

पावल दोःसी थार्बा पिन्बा समाचार थेःना लबारी ग्ला ग्लारी निबा

18 पावल कोरिन्थरी तिगै धिनधोना चिजी। जमाहेन्से विश्वासीगदेग्याम फेसी पावल पानी जहाजरी क्रेःबारी किंक्रिया भिबा ग्लारी निजी। थेदेन छ्याम प्रिसकिलादेन अकिलासएनोन मुबा। सिरिया भिबा ग्लारी निबाला लागिरी पानी जहाजरी क्रेःबा भन्दा डाच्छा हाडसे लबा कबुल पूरा लबाला लागिरी किंक्रिया भिबा ग्लारी पावलसे हाडला क्रा भेजी।* 19 जमाहेन्से थेनीगदे एफिसस भिबा ग्लारी धोखजी, ओच्छे पावलसे प्रिसकिलादेन अकिलासदा थेरीन खलाजी। तर हाड चा यहूदीगदे हुप तबा दिम गिकरी वाड्सी यहूदीगदेदेन छ्याम छलफल लबारी छ्याइजी। 20 पावलदा यहूदीगदेसे अझ तिगै धिनधोना चिउ भिसी भिमा पावलसे थेनीगदेला ताम आड्याननी। 21 थेनीगदेग्याम फेबा धुइरी पावलसे थेनीगदेदा “परमेश्वरसे सेम लजी भिसम डा दोःसी हाडनी मुबा ग्लारी खला” भिसी पावल पानी जहाजरी क्रेःसी एफिससरी निजी।

22 जमाहेन्से कैसरिया शहररी धोखसी पावल यरूशलेमरी निसी थेरी मुबा मण्डलीला म्हिगदेदेन छ्याम हुप तजी। ओच्छे पावल एन्टिओखिया शहररी धोजी।

पावल थार्बा पिन्बा समाचार थेःना लबारी सोमरेमला पालरी निबा

23 पावल तिगै धिनधोना थेरीन चिजी। जमाहेन्से पावल गलातियादेन फ्रिगियाला जम्मान ग्लागदेरी निबान जम्मान चेलागदेदा विश्वासरी कोड्ना लबान भ्रजी।

अपोल्लोससे थार्बा पिन्बा समाचार थेःना लबा

24 अलेक्जेन्ड्रिया भिबा ग्लाला अपोल्लोस भिबा यहूदी गिक एफिससरी खजी। थे परमेश्वरला बचन सेबा घोबादेन ज्यना लसी ताम पाड्खम्बा म्हि मुबा। 25 थेसे थार्बा पिन्बा प्रभु येशूला बारेरी थेःबा मुबा, थेतबासेलमा सेमहेन्सेन ताड्सी प्रभु येशूला बारेरी ज्यना लसी लोपमुबा। तसैनोन थेदा यूहन्नासे पिन्बा बपत्तिसमाला बारेरी जे था मुबा। 26 थे दुक्क तसी यहूदीगदे हुप तबा दिमरी पाड्बारी छ्याइजी। थेसे पाड्मा प्रिसकिलादेन अकिलाससे थेःमाहेन्से थेनीगदेसे थेदा हाडला दिमरी भोजी। ओच्छे थेदा परमेश्वरला गेला बारेरी ज्यना लसी घोना लसी पिन्जी।

* 18:18 गन्ती ६:१८

27 जमाहेन्से अपोल्लोस अखैया भिबा ग्लारी निबा सेम लजी। थेतबासेलमा एफिससरी मुबा चेलागदेसे थेदा निबारी आँट पिन्सी, अपोल्लोसदा मान लगै भिसी चिठी गिक भिसी पुइजी। अखैयारी धोमाहेन्से प्रभुला दयामायाम्याम विश्वास लबा म्हिगदेदा थेसे ल्हानान हो लजी। 28 तिग्दा भिसम थेसे परमेश्वरला बचनग्याम येशून थारबा पिन्बा खीष्ट हिनना भिसी म्हिगदेला ओन्छाडरी यहूदीगदेदा तिगै पाड्आखम्बा तना लजी।

19

पावल एफिसस शहररी निबा

1 अपोल्लोस कोरिन्थरी मुबा धुइरी पावल एशियाला गुडग्याम तबान एफिसस भिबा शहररी खजी। थेरी पावलसे कोइ कोइ चेलागदेदा स्यापजी। 2 जमाहेन्से पावलसे थेनीगदेदा “एनीगदेसे विश्वास लमाहेन्से परमेश्वरला आत्मा याड्जी?” भिसी ड्योइमा, थेनीगदेसे पावलदा “परमेश्वरला आत्मा मुला भिसी डन्से थे:बै आरे” भिसी भिजी। 3 दो:सीनोन पावलसे थेनीगदेदा “एनीगदेसे खाहड्बा बपतिस्मा किन्जी?” भिसी ड्योइमा, थेनीगदेसे पावलदा “यूहन्नासे लोपबा अन्छारला बपतिस्मा किन्जी” भिसी भिजी। 4 जमाहेन्से पावलसे थेनीगदेदा “यूहन्नासे पिन्बा बपतिस्मा चा हाड हाडला पाप ख्लासी परमेश्वरपट्टि दो:गै भिसी पिन्बा बपतिस्मा हिनना। थेसे हाड भन्दा लिच्छा फेपखबा म्हिदा विश्वास लउ भिसी म्हिगदेदा लोपम्बा, थे म्हि येशू हिनना” भिसी पाड्जी।* 5 चु ताम थे:सी थेनीगदेसे प्रभु येशूला मिनरी बपतिस्मा किन्जी। 6 पावलसे थेनीगदेथोरी या थान्माहेन्से थेनीगदेथोरी परमेश्वरला आत्मा फेपखजी, जमाहेन्से थेनीगदेसे आसेबा ग्योइदेन परमेश्वरग्याम खबा ताम पाड्जी। 7 थेनीगदे ओस्पन च्युक न्ही ते मुबा।

8 जमाहेन्से पावल ढुकक तसी यहूदीगदे हुप तबा दिमरी वाड्सी ला सोमधोना परमेश्वरला यहूलसाला बारेरी थेनीगदेदेन छ्याम छलफल लबान म्हिगदेदा घोना लजी। 9 तर थेरी कोइ कोइ म्हिगदे अटेरी तसी विश्वास आलना येशूदा विश्वास लबा म्हिगदेला ओन्छाडरी थेरी मुबा समूहला बिरोध लबारी छ्याइजी। थेतबासेलमा पावल थेनीगदेग्याम फेसी चेलागदेदा छ्यामनोन भोर्सी टुरान्नस भिबा ग्लाला स्कूलरी धिन धिननोन छलफल लबारी छ्याइजी। 10 चु गे लबा न्ही दिड तमा एशियारी चिबा जम्मान यहूदीदेन ग्रीकगदेसे प्रभुला बचन थे:जी।

एफिससरी उदेकला गे

11 थेरी परमेश्वरसे पावलग्याम म्हिसे लबारी आखम्बा उदेकला गेगदे लजी। 12 पावलला लहुइरी रूमाल तसै घ तसै थुर्सी आखम्बा म्हिगदे मुबा ग्लारी भोर्सी थेनीगदेला लहुइरी थुर्माहेन्से आखम्बा म्हिगदे खम्मुबा ओच्छे थेनीगदेला लहुइग्याम म्हड थोन्सी यार्मुबा।

13 जमाहेन्से डाबा स्युइबा लबा कोइ कोइ यहूदीगदे क्यारमार निसी प्रभु येशूला मिनग्याम म्हडसे स्यापबागदेदा “डाइ एदा पावलसे थे:ना लबा येशूला मिनरी थोन्सी निउ भिसी कुल्बा मुला” भिसी भिजी। 14 चुहड्बा गे लबा चा परमेश्वरला मन्दिररी पूजा लबा यहूदी मुल म्हि स्केवासला झा निस मुबा। 15 तर तिरेकुनु चा म्हडसे थेनीगदेदा “डाइ येशूदा डोसेमुला, ओच्छे पावलदाएनोन डोसेबा मुला, तर एनीगदे चा खाल हिनना?” भिसी ड्योइजी। 16 जमाहेन्से थे म्हडसे स्यापबा म्हि छ्योड्बान थेनीगदे मुबा ग्लारी खजी, ओच्छे थेनीगदे जम्मादान लछार पछार लसी तहरी थान्जी, जमाहेन्से थेनीगदे लिगन्डी तसी घाइते तसी थे दिमग्याम थोन्सी यार्जी।

17 चु ताम एफिससरी चिबा जम्मान यहूदीदेन ग्रीकगदेसे थे:सी थेनीगदे जम्मान लोड्जी। ओच्छे थेनीगदेसे प्रभु येशूला मिननोन जम्मान भन्दा घेन हिनना भिसी भिबारी छ्याइजी। 18 जमाहेन्से विश्वास लबा ल्हानान म्हिगदे खजी ओच्छे थेनीगदे जम्मासेन हाड हाडसे लबा आज्यबा गेगदे म्हिगदेला ओन्छाडरी पाड्जी।* 19 जादु लबा म्हिगदे न्हडला ल्हानान म्हिगदेसे हाड हाडला जादुला किताब हुप लसी भजी, ओच्छे जम्मान म्हिगदेला ओन्छाडरी खाड्जी। थेनीगदेसे भबा किताबला सय लमा

* 19:4 मत्ती ३:११; मर्क १:४, ७-८; लूका ३:४, १६; यूह १:२६-२७ * 19:18 वयव १८:१०-१४

ओस्पन बोगल न्हीसे हजार च्युइ म्हुइला डबल तजी। 20 चुहइ तसी प्रभुला शक्तिशाली बचन खानडदमान थे:सी ल्हेबान निजी।

21 चुहइ तमाहेन्से पावलसे माकेडोनियादेन अखैया तबान यरूशलेमरी निबारी पक्का लजी। ओच्छे थेरी धोमाहेन्से “डा रोमरीएनोन निनोन तो:ला” भिसी पावलसे भिजी। 22 ओच्छे पावलसे हाडदा हो लबा तिमोथीदेन इरास्तसदा माकेडोनियारी डाच्छा पुइजी। तर हाड चा तिगै धिनधोना एशियारीन चिजी।

एफिसस भिबा ग्लाला म्हिगदे न्हडरी खलबल तबा

23 थे धुइरी थार्बा याड्बा ग्यामला बारेरी थे:ना लबासे लमा एफिससरी ल्हानान खलबल तजी। 24 तिग्दा भिसम डेमेत्रियस भिबा म्हुइला मूर्तिगदे सहोबा म्हि गिकसे आर्तेमिस भिबा लुला जजाबा मन्दिरगदे सहोसी गे लबागदेदा ल्हानान गे पिन्बा मुबा। 25 ओच्छे थेसे थे गे लबागदेदेन अर्गु थेहइबान गे लबागदे जम्मादान ग्ला गिकरी हुप लसी चुहइ भिसी भिजी, “डाला ह्योगदे, एनीगदेदा थानोन मुला, य्हाडदा चुनोन गेग्याम ल्हानान फाइदा मुला। 26 एनीगदेसे म्हाडबादेन थे:बा तामगदे एफिससरी जे आहिन, तर एशियाला जम्मान ग्लारी पावल भिबा म्हिसे म्हिला याग्याम सहोबा ल लुगदे चा तिगै आहिन भिसी ल्हानान म्हिगदेदा व्हाम्सी भोर्बा मुबा। 27 थेतबासेलमा य्हाडला व्यापार म्हासी निबा जे आहिन, तर आर्तेमिस भिबा घेन लुला मन्दिरएनोन गे आखेल्बा तला, ओच्छे एशियाला जम्मान ग्लादेन जम्बुलिड न्हडनोन घेन मान पिन्बा लुदा तेन्बा खलाला।”

28 चु ताम थे:सी थेनीगदेदा ल्हानान बोमो रे:जी, ओच्छे “एफिससला म्हिगदेला आर्तेमिसनोन घेन हिनना” भिसी थेनीगदे क्रिड्बारी छ्याइजी। 29 ओच्छे शहर न्हडनोन हल्ली खल्ली तजी। जमाहेन्से थेनीगदे जम्मान ढिक्सी माकेडोनियाला गायसदेन अरिस्तार्खस भिबा पावलला हो न्हीदा चुइसी दुइबा छेइबा लसी रडगशाला न्हडरी भोर्जी। 30 पावलएनोन तिगै ताम पाड्बा सेम लसी म्हिला हुल न्हडरी निबारी म्हाइजी, तर प्रभुदा विश्वास लबागदेसे थेदा निआपुइनी। 31 एशियाला सरकारला गे लबा कोइ कोइ मुल म्हिगदेएनोन पावलला हो मुबा। ओच्छे थेनीगदेसेनोन पावलदा रडगशाला न्हडरी थानिउ भिसी पाड्सी पिन्गो भिसी कुल्सी पुइजी।

32 थेनोन धुइरी थेनीगदे न्हडरी गिकसेम गिक हाड हाडला ताम लबान क्रिड्सी हल्ली खल्ली लबान मुबा। तिग्दा भिसम थेरी मुबा ल्हानान म्हिगदेदा हाड तिग्दा पोप तजी भिबा ताम सुत्तै था आरेमुबा। 33 जमाहेन्से म्हिला हुल न्हडग्याम कोइ कोइ म्हिगदेसे अलेक्जेन्डर भिबा म्हिदा डाच्छापट्टि भजी। थेदा यहूदीगदेसे तिगै ताम पाड्सी चुगदेदा घोना लसी पिन्गो भिसी भिजी। ओच्छे अलेक्जेन्डरसे हाड जोगब तबाला लागिरी याला चाल लबान तिगै पाड्बा सेम लजी। 34 तर थेनीगदेसे थे म्हि यहूदी चीम भिबा था याड्सी जम्मान म्हिगदे ढिक्सी ओस्पन घण्टा न्ही ते “एफिससला म्हिगदेला आर्तेमिसनोन घेन हिनना” भिसी क्रिड्जी।

35 जमाहेन्से शहरला हाकिमसे म्हिगदेदा कुटिसी चिना लमाहेन्से चुहइ भिसी घोना लजी, “एफिससला म्हिगदे, एफिसस शहर चा घेन आर्तेमिसला मन्दिरदेन मुग्याम ताइबा थेला मूर्तिदा जोगब लसी थान्बा मुला भिबा ताम खाल्दा था आरे? 36 चु ताम खालै म्हिसे आहिन भिसी पाड्बारी आखम भिबा हाडनीदा थानोन मुला। थेतबासेलमा हाडनी कुटिसी स्यूहूगो, ओच्छे तिगै आम्हन्ना तिगै गे लबारी आत। 37 तिग्दा भिसम हाडनीसे भबा चु म्हिगदेसे य्हाडला लथान यहो लबा आरे, ओच्छे य्हाडला लुदा बिरोधएनोन लबा आरे। 38 चुदे डेमेत्रियसदेन थेला गे लबागदेसे खालैला बिरोधरी उजुर लतो:बा मुसम अदालतगदे मुनोन मुला ओच्छे न्यायाधीशगदेएनोन मुनोन मुला। थेतबासेलमा थेनीगदेसे गिकसे गिकदा बिरोध लबा हिन्सम मुद्दा युगै। 39 तर चु बाहेक अर्गुन ताम पाड्बा सेम मुसम थे तामला निसाफ य्हाडला ठिम अनछार गन्बागदे हुप तसी सदन लबा सभारी ढिक्ना लला। 40 तिग्दा भिसम तिनी तबा चु हुल दडगाला दोष य्हाडथोरी खबारी खम्ला, चु थेहइन्नोन तबा हुल दडगा तिग्दा तजी भिसी य्हाडसे घोना लबारी आखम।” 41 चुदे भिसी थे हाकिमसे थेरी मुबा म्हिगदेदा पुइजी।

20

पावल माकेडोनियादेन ग्रीस भिबा ग्लारी निबा

1 थे हल्ली खल्ली म्हमाहेन्से पावलसे प्रभुदा विश्वास लबागदेदा ड्योइबारी पुइजी, ओच्छे थेनीगदेदा आँट पिन्सी थेनीगदेग्याम फेसी थे माकेडोनिया भिबा ग्लापट्टि निजी। 2 माकेडोनियाग्याम तबान निमा थेसे प्रभुदा विश्वास लबा थे ग्लाला म्हिगदेदा ल्हानान आँट पिन्सी थे ग्रीस भिबा ग्लारी निजी। 3 थेरी पावल ला सोमधोना चिजी। ओच्छे पानी जहाजरी क्रेःसी सिरिया भिबा ग्लारी निबारी छ्याइमा थेदा यहूदीगदेसे साइबारी जाल लबा ताम था याडूसी थेसे भ्रसीन माकेडोनिया तसी निबारी पक्का लजी। 4 ओच्छे बेरिया भिबा ग्लाला पुरस भिबा महिला झा सोपात्रोस, थेसलोनिके भिबा ग्लाला अरिस्ताखसदेन सिकन्दस ओच्छे डर्बी भिबा ग्लाला गायसदेन तिमोथी ओच्छे एशिया भिबा ग्लाला तुखिकसदेन त्रोफिमसएनोन थेदेन छ्याम निजी। 5 चुगदे डाचछान त्रोआस भिबा ग्लारी धोसी डन्दा[†] भ्रान्सी चिबा मुबा। 6 डनी चा मिश्र यहुलुसाग्याम फेसी खबा धिनदा ढन्सी धड्बा चाड निमाहेन्से फिलिप्पी भिबा ग्लाग्याम पानी जहाजरी क्रेःसी खमा डारेकुनु थेनीगदे मुबा ग्ला त्रोआसरी धोखजी, ओच्छे थेरी डनी डारेधोना चिजी।

युटिकस भिबा म्हि सिबाग्याम सोबा

7 साताला डाचछाकुनु डनी प्रभु भोज चबारी पोप तजी, ओच्छे पावल चा न्हडगरदडनोन निबा सेम लबासे लमा थेनीगदेदेन छ्याम म्हुन गडसलधोना ताम लसी चिजी। 8 डनी पोप तबा दिमला तलाथोला कोठारी चा ल्हानान नाडसलगदे मुबा। 9 युटिकस भिबा भ्योन म्हि चा झ्यालरी चिबा मुबा। पावलसे ल्हानान धुइधोना ताम लबासे लमा थेदा म्हेर्बा खसी छुप निजी। थेतबासेलमा थे तला सोमग्यामसे ताइजी, थेनीगदेसे थेदा थीमा सिसी जिन्बा स्यापजी। 10 जमाहेन्से पावल मार फापजी, ओच्छे खलुप तसी थेदा हाप ख्वाइजी। पावलसे थेरी मुबागदेदा “थालोड्गो, तिग्दा भिसम चु सोबान मुला” भिसी भिजी। 11 जमाहेन्से थे तलाथोरी निजी ओच्छे गेड क्युइसी चमाहेन्से यहाल आततेधोना ताम लसी चिजी। जमाहेन्से थेनीगदेग्याम पावल फेसी निजी। 12 ओच्छे थेनीगदेसे थे सिबाग्याम सोबा भ्योन म्हिदा दिमरी भोर्जी। ओच्छे थेनीगदेसे ल्हानान आँट याइजी।

पावल त्रोआसग्याम मिलेटस भिबा ग्लाधोना निबा

13 त्रोआसग्याम पावल बाहेक डनी जम्मान पानी जहाजरी क्रेःसी अस्सोस भिबा शहररी निजी। पावलसे चा अस्सोसधोना भ्रसी निबा सेम लबासे लमा थे अस्सोसधोना भ्रसी निजी। ओच्छे अस्सोसग्याम चा डन्देन छ्यामनोन पानी जहाजरी क्रेःसी निबा पावलला सेम मुबा। 14 डनी अस्सोसरी धोखमाहेन्से पावलएनोन डन्देन छ्यामनोन पानी जहाजरी क्रेःसी डनी जम्मान छ्यामनोन मितिलेने भिबा शहररी निजी। 15 थेग्याम डनी पानी जहाजरी निसी न्हडगरदड खियस भिबा ग्लाला डामरी धोखजी, ओच्छे रेनीदड सामोस भिबा ग्लारी धोखजी। ओच्छे अर्गु धिनकुनु चा मिलेटस भिबा ग्लारी खजी। 16 पावलसे एशियारी चिबा सेम आलबासे लमा एफिससरी आवाडनान निबा सेम लजी। तिग्दा भिसम पावलसे खम्तेधोना पेन्तिकोसला धिनरी यरूशलेमरीन दोबारी भड लबान मुबा।

एफिससला मण्डलीदा च्याबा म्हिगदेग्याम फेसी निबा

17 पावलसे मिलेटसग्याम एफिससरी मुबा मण्डलीला मण्डलीदा च्याबा म्हिगदेदा ड्योइबारी म्हि पुइजी। 18 थेनीगदे पावल मुबा ग्लारी धोखमाहेन्से पावलसे थेनीगदेदा चुहड् भिसी भिजी, “एशियारी काड न्हेःमाकुनुहेन्से डा ह्वाडनीला गुडरी खाहड् लसी चिजी भिबा ताम ह्वाडनीदा थानोन मुला। 19 ओच्छे यहूदीगदेसे जाल लसी डादा फसब लबारी म्हाइबासे लमा डादा ल्हानान दुख तजी, तसैनोन डा सोजो तसी क्राबान प्रभुला गे लजी। 20 ओच्छे ह्वाडनीदा ज्यबा ताम पाड्बा धुइरी जम्मान महिला ओन्छाडरीदेन एनीगदे जम्मालान दिम दिमरी निसी डाइ ह्वाडनीदा लोपबा धुइरी डाइ तिगै

† 20:5 चुरी लूकासे “डन्दा” भिसी पाड्बा चा पावलएनोन लूकादेन छ्याम मुबा।

ताम बाँकी आथान्ना लोपूजी। 21 यहूदीगदेदेन अर्गु यहूलला म्हिगदेदाएनोन डाइ हाड हाडला पाप ख्लासी परमेश्वरपट्टि दोःगो ओचछे यहाडला प्रभु येसू ख्रीष्टदा विश्वास लउ भिसी पाड्बा मुला।

22 “च्यागो, डा परमेश्वरला आत्माला करसे लमा यरूशलेमपट्टि निबान मुला, थेरी तिग तला भिबा ताम डादा था आरे। 23 जम्मान शहररी डादा दुख तबादेन झ्याल्खानरी झाड्ला भिसी परमेश्वरला आत्मासे उन्बा ताम जे डादा था मुला। 24 तसेनोन डाइ हाडला ज्ञानदा घेन म्हन्बा आरे, तिग्दा भिसम परमेश्वरला दयामायाला बारेरी थार्बा पिन्बा समाचार थेःना लबादेन प्रभु येसूसे डादा पिन्बा गे जिन्ना लखमगै भिबा डाला सेम मुला।* ”

25 “च्यागो, डाइ हाडनी न्हडला जम्मादान परमेश्वरला यहूलसाला समाचार थेःना लबान भ्रजी, दोःसी खाइमै यहाड हुप आत भिबा डादा था मुला। 26 थेतबासेलमा तिनी डाइ हाडनीदा पाड्ला, हाडनी न्हडला खालै नाश तसेनोन थेला दोष डादा आत। 27 तिग्दा भिसम एनीगदेसे था याड्गै भिसी परमेश्वरसे म्हन्बा जम्मान ताम डाइ एनीगदेदा गिकनोन बाँकी आथान्ना पाड्बा मुला।

28 “दाहेन्से हाड हाडलान लागिरी ओचछे परमेश्वरला आत्मासे हाडनीदा जिम्मा पिन्बा ग्युगदेला लागिरी होशियार तसी चिउ। परमेश्वरला मण्डलीदा ज्यना लसी च्याबा म्हि दोगो, तिग्दा भिसम प्रभु येसूसे थे म्हिगदेदा हाडलान कासे ग्लुबा मुला। 29 तिग्दा भिसम डा निमाहेन्से एनीगदेला गुडरी लोड्बा खबा फार्बागदे हड्बान लुसीला ताम लोपूबा म्हिगदे खला, थेसे म्हिगदेदा बाँकी आथान भिबा ताम डादा था मुला। 30 हाडनीलान गुडग्यामएनोन न्होड्ना लबा ताम पाड्बा म्हिगदे थोन्ना, थेनीगदेसे प्रभुदा विश्वास लबागदेदा हाडदेन छ्याम भोर्ला। 31 थेतबासेलमा हाडनी होशियार तसी स्यहूगो, डाइ सोम दिडधोना धिन म्हुननोन क्रासी क्रासी एनीगदे जम्मादान लोपूबा ताम थाम्लेःगो।

32 “दाहेन्से डाइ हाडनीदा परमेश्वरदेन थेला दयामायाला बचनरी जिम्मा पिन्ना, थे बचनसेन हाडनीदा विश्वासरी कोड्ना लला, ओचछे परमेश्वरसे हाडला लागिरी फेसी थान्बा म्हिगदेसे याड्बा हक एनीगदेसेनोन याड्ला। 33 डाइ खालै महिला म्हर, म्हुइदेन क्वान्ना लोभ आलनी। 34 ओचछे डाइनोन गे लसी डाला खाँचो ओचछे डादेन छ्याम मुबागदेदा खाँचो तबा सहेगदे डाइ पिन्बा हाडनीदा थानोन मुला। 35 हाडनीसेनोन डाइ हड् लसी कमजोर म्हिगदेदा ह्यो लगै भिसी डाइ सेमहेन्सेन लबा जम्मान गे हाडनीदा उन्बा मुला, तिग्दा भिसम प्रभु येसूसेनोन ‘किन्बागदे भन्दा पिन्बागदेसे चा झन मोलम याड्ला’ भिसी सुड्बा मुला। थेतबासेलमा हाडनीसेनोन चु बचनदा ढन्सी हाडसेन गे लसी आखम्बागदेदा ह्यो लउ।”

36 चुदे पाड्सी जिन्माहेन्से पावलसे पुइ जूसी थेनीगदेदेन छ्याम प्रार्थना लजी। 37 ओचछे थेनीगदे जम्मान क्रासी पावलदा हापख्वाइसी च्योक लजी। 38 पावलसे दोःसी खाइमै हुप आत भिसी पाड्बासे लमा थेनीगदेदा ल्हानान दुख ड्हमजी। ओचछे थेनीगदेसे पावलदा पानी जहाज मुबा ग्लाधोना सबारी निजी।

21

पावल यरूशलेमरी निबा

1 थेनीगदेग्याम फेसी डनी पानी जहाजरी क्रेःसी सोजोन कोस भिबा ग्लारी खजी, ओचछे न्हडगरदड रोडस भिबा ग्लारी धोखजी थेग्याम पटारा भिबा ग्लारी धोखजी। 2 जमाहेन्से फोनिके भिबा ग्लारी निबा पानी जहाज गिक स्यापूजी ओचछे डनी थेरीन क्रेःसी निजी। 3 साइप्रस भिबा ग्ला म्राड्माहेन्से थे ग्लाला देब्रेपट्टिग्याम डनी सिरियापट्टि निसी टुरोस भिबा ग्लारी फापूजी। तिग्दा भिसम पानी जहाजरी भबा मालसामान थेरी तेःतोःबा मुबा। 4 ओचछे प्रभुदा विश्वास लबागदेदा म्हाइसी स्यापमाहेन्से डनी निसरेधोना थेरीन चिजी। थेनोन धुइरी प्रभुदा विश्वास लबागदेसे परमेश्वरला आत्माग्याम पावलदा यरूशलेमरी थानिउ भिसी भिजी। 5 थे ग्लाग्याम निबा धुइ तमाहेन्से डनी थे ग्लाग्याम थोन्जी। ओचछे थेनीगदेला कोलागदेदेन म्हेमेगदे क्योड्सेन डन्दा शहर मडग्यारधोना सबारी खजी। जमाहेन्से डनी

* 20:24 २ तिमो ४:१९

जम्मासेन समुन्द्रला कुनीरी पुइ जूसी प्रार्थना लजी। ⁶ जमाहेन्से डनी थेनीगदेग्याम फेसी पानी जहाजरी क्रेःजी, ओच्छे थेनीगदे चा हाडला दिमरी निजी।

⁷ टुरोसग्याम डनी समुन्द्रला ग्याम तबान टोलेमाइस भिबा ग्लारी धोखजी। जमाहेन्से थेरी मुबा प्रभुदा विश्वास लबागदेदा स्याप्सी डनी थेनीगदेदेन छ्याम तिरे चिजी। ⁸ न्हडगरदड डनी थे ग्लाग्याम थोन्सी कैसरिया भिबा शहररी धोखजी, ओच्छे डनी थार्बा पिन्बा समाचार थेःना लबा फिलिपां भिबा महिला दिमरी वाड्जी। थे फिलिप यरूशलेमरी धम्बा गोर निस न्हडला गिक मुबा।* ⁹ थे फिलिपला ब्याह आलबा झामे बलि मुबा। थेनीगदेसे परमेश्वरग्याम खबा ताम पाड्मुबा।

¹⁰ डनी तिगै रेधोना थेरी चिबा धुइरी यहूदिया भिबा ग्लाग्याम अगाबस भिबा अगमवक्ता गिक डनी मुबा ग्लारी खजी।* ¹¹ थे अगमवक्ता डनी मुबा ग्लारी खसी पावलला केः किन्सी हाडलान काड या खीजी। थेसे “चु केः जुन महिला हिन्ना थेदा यरूशलेमरी यहूदीगदेसे चुहड्नुन लसी खीला। ओच्छे अर्गु यहूलला म्हिगदेला यारी जिम्मा पिन्ना भिसी परमेश्वरला आत्मासे सुड्बा मुला” भिसी भिजी।

¹² चु ताम थेःसी थेरी मुबागदेदेन डन्से पावलला यरूशलेमरी थाफेपुगो भिसी बिन्ती लजी। ¹³ तर पावलसे थेनीगदेदा “तिगदा एनीगदे क्रासी डाला सेम क्राना लबा? प्रभु येशूला लागिरी डा झ्यालखानरी चिबा जे आहिन, तर यरूशलेमरी सिबारीनोन तयार मुला” भिसी जोहाब पिन्जी। ¹⁴ डन्से पावलला सेम दोःबारी आखम्माहेन्से “प्रभुसे जुन म्हन्बा मुला थे ताम पूरा तगै” भिसी डनी कुटिसी चिजी।

¹⁵ जमाहेन्से डनी हाड हाडला सामानगदे तयार लसी यरूशलेमपट्टि निजी। ¹⁶ डन्देन छ्याम कैसरिया भिबा ग्लाला कोइ कोइ प्रभुदा विश्वास लबागदेएनोन निजी। ओच्छे थेनीगदेसे डन्दा डाच्छाहेन्सेन प्रभुदा विश्वास लबा साइप्रस भिबा ग्लाला मनासोन भिबा महिला दिमरी बास चिबाला लागिरी भजी।

पावलसे मण्डलीला मण्डलीदा च्याबा म्हिगदेदा हुप तबा

¹⁷ डनी यरूशलेमरी धोखमाहेन्से थेरी मुबा ज्योज्यो आले नाना आडागदे ताड्सी डन्दा मान लजी। ¹⁸ ओच्छे न्हडगरदड पावल डन्देन छ्याम याकूब मुबा ग्लारी निजी। थेरी जम्मान मण्डलीदा च्याबा म्हिगदे हुप तबा मुबा। ¹⁹ थेनीगदेदा लासूसो फ्याफुल्ला भिसी पाड्माहेन्से पावलसे थेनीगदेदा हाडसे लबा गेग्याम अर्गु यहूलला म्हिगदेला गुडरी परमेश्वरसे खाहड्बा गेगदे लजी भिबा जम्मान ताम थेनीगदेदा पाड्जी।

²⁰ चु ताम थेःमाहेन्से थेनीगदेसे परमेश्वरला जयजयकार लजी। जमाहेन्से थेनीगदेसे पावलला चुहड् भिसी भिजी, “आले, चुरीनोन झ्यासीन झ्याबारी आखम्बाधोनाला यहूदीगदेसे परमेश्वरला विश्वास लसी मोशासे पिन्बा ठिम अन्छार ज्यना लसी भ्रमुला। ²¹ हाडसे अर्गु यहूलसारी चिबा यहूदीगदेदा एनीगदेसे हाडला कोलागदेला खतना थालउ। ओच्छे मोशासे पिन्बा ठिम अन्छार आलसै तला भिसी लोपुबा मुला रो भिबा ताम थेनीगदेसे थेःबा मुला। ²² दाहेन्से तिग लसे? थेनीगदेसे हाड चुरी फेपुखजी भिबा पककान थेःला। ²³ थेतबासेलमा डन्से हाडदा पाड्बा अन्छार लउ, चुरी परमेश्वरदेन छ्याम कबुल लबा म्हि बलि डन्देन छ्याम मुला। ²⁴ चुगदेदा भोर्सी हाडएनोन चुगदेदेन छ्यामनोन चोख्याब तउ, ओच्छे चुगदेदा तोःबा खर्च हाडसेन युसी पिन्गो। जमाहेन्से चुगदेसे क्रा भ्रैगै। हाडसे चुहड् लसी मोशासे पिन्बा ठिम अन्छार लबा म्राड्सी हाडला बारेरी चुगदेसे थेःबा जम्मान ताम सत्य आहिन्बा चीम भिसी था याड्ला। ²⁵ तर डन्से सल्लाह लसी प्रभुदा विश्वास लबा अर्गु यहूलला म्हिगदेदा हाडनीसे मूर्तिदा बलि पिन्बा तिगै सहेगदे, कादेन खारे च्यासी साइबा जन्तुला स्या थाचउ, ओच्छे स्यहान्दोदेन छ्याम ब्रेल्सी थाभ्रउ भिसी चिठी भिबा मुला।”

²⁶ जमाहेन्से न्हडगरदड थे म्हि बलिदा भोर्सी हाडदाएनोन थेनीगदेदेन छ्यामनोन चोख्याब लजी, ओच्छे चोख्याब लबा धिन खाइमा जिन्ना भिबादेन थे म्हिगदेला लागिरी बलि खाइमा फुलुबा भिसी परमेश्वरला मन्दिररी पूजा लबा म्हिदा पाड्बारी पावल परमेश्वरला मन्दिर न्हडरी वाड्जी।

पावलला चुड्बा

† 21:8 फिलिपदा चा मुल चेलागदेदा हो लबाला लागिरी धम्बा मुबा। * 21:8 मुल ६:१-७ * 21:10 मुल ११:२७-२८

27 कबुल पूरा लबा निसरे तबारी छ्याइबा धुइरी एशियाला यहूदीगदेसे पावलदा परमेश्वरला मन्दिररी म्राड्सी थेरी मुबा जम्मान म्हिगदेदा थीसी पावलदा चुइजी। 28 थेनीगदेसे क्रिड्बान, “इसाएलला म्हिगदे डन्दा ह्यो लउ। तिग्दा भिसम खानडदमान य्हाडला यहूलला म्हिगदेदेन य्हाडला ठिम ओच्छे चु ग्लाला बिरोध लसी लोप्सी भ्रबा म्हि चुनोन हिन्ना। चुदे जे आहिन, चुसे परमेश्वरला मन्दिररी अर्गु यहूलला म्हिगदेदा भसी चु चोखो ग्लादा नइबा तना लबा मुला” भिसी भिजी। 29 तिग्दा भिसम चु भन्दा डाच्छा थे म्हिगदेसे एफिसस भिबा ग्लाला त्रोफिमस भिबा म्हिदा पावलदेन छ्याम म्राड्बा मुबा। थेतबासेलमा पावलसे थेदा परमेश्वरला मन्दिररी भजी भिसी थे म्हिगदेसे म्हन्जी।

30 जमाहेन्से शहर नाडनोन हल्ली खल्ली तसी म्हिगदे तिक्खुरीन यार्बान खजी। ओच्छे पावलदा चुइसी डुइबा छेइबा लसी परमेश्वरला मन्दिरग्याम मडग्यार तेःसी तुरुन्तन मन्दिरला प्राप दुइजी।

31 थेनीगदेसे पावलदा साइबारी म्हाइबा धुइरी यरूशलेम नाडनोन हल्ली खल्ली तबा मुला भिबा ताम रोमी सिपाहीगदेला हाकिमसे थेःजी। 32 जमाहेन्से थेसे तुरुन्तन सिपाहीदेन कप्तानगदेदा छ्यामनोन भोर्सी यार्बान पावलदा तोबान लबा ग्लारी खजी। पावलदा तोबागदेसे हाकिमदेन सिपाहीगदेदा म्राड्सी पावलदा तोबा ख्लाजी।

33 ओच्छे रोमी सिपाहीगदेला हाकिम पावलला डामरी खसी पावलदा चुइजी। ओच्छे चुदा च्याल्दा न्हीसे खीगो भिसी कुल्जी। जमाहेन्से थेसे चु म्हि खाल हिन्ना? चुसे तिग लजी? भिसी ड्योइजी। 34 तर थेरी मुबा म्हिगदे न्हडरी कोइसे तिग ताम लसी क्रिड्सी हल्ली खल्ली लबासे लमा थेसे थे घटनाला बारेरी तिगै आघोनी। थेतबासेलमा थेसे पावलदा सिपाहीगदेला ब्यारेकरी भोर्गो भिसी कुल्जी। 35 पावल चामरी धोमा म्हिगदेसे पावलदा तोबारी खबासे लमा सिपाहीगदेसे थेदा पुइसी भोर्जी। 36 तिग्दा भिसम महिला हुलसे “चुदा साइनोन तोःला” भिसी क्रिड्बान लिच्छा लिच्छा भ्रबा मुबा।

महिला हुलदा पावलसे हाडला बारेरी पाड्बा

37 सिपाहीगदेला ब्यारेक न्हडरी भोर्बारी छ्याइमा पावलसे सिपाहीगदेला हाकिमदा “हाडसे डादा ताम पाड्पुड्सम तिगै ताम पाड्बा सेम मुला” भिसी भिमा सिपाहीगदेला हाकिमसे पावलदा चुहड् भिसी भिजी, “एसे ग्रीक ग्योइ सेमुला? 38 डाच्छा रोमी सरकारदा बिरोध लसी हजार बलि बिरोध लबागदेदा तोडतोडबा ग्लारी भोर्सी निबा मिश्री एनोन आहिन?” 39 तर पावलसे “डा मी किलिकिया भिबा ग्लाला टार्सस भिबा शहरला यहूदी हिन्ना, डा जजाबा शहरला म्हि आहिन। थेतबासेलमा डादा चु म्हिगदेदा तिगै पाड्पुड्गो” भिसी बिन्ती लजी। 40 जमाहेन्से “तला” भिसी भिमाहेन्से पावल चामरी राप्सी म्हिगदेदा यासे चाल लजी, ओच्छे म्हिगदे कुटिसी चिजी। जमाहेन्से थेसे हिब्रू ग्योइरी† चुहड् भिसी पाड्बारी छ्याइजी।

22

1 “डाला ह्योगदे हाडनीला ओन्छाडरी डाइ डाला बारेरी पाड्बारी छ्याइबा ताम ड्यानगो।”
2 पावलसे हिब्रू ग्योइरी ताम पाड्बा थेःसी थेनीगदे झन कुटिसी चिजी।

3 जमाहेन्से पावलसे चुहड् भिसी पाड्बारी छ्याइजी, “डा किलिकिया भिबा ग्लाला टार्सस शहररी न्हबा यहूदी हिन्ना। तर डा यरूशलेम शहररी गमलिएल भिबा महिला कुरी छर्बा हिन्ना। गमलिएल गुरुग्यामनोन डाइ य्हाडला आखे म्हेमेला ठिम अन्छार लोप्तोःबा जम्मान ताम लोप्जी। तिनी हाडनीसे सेमहेन्से परमेश्वरदा खाहड् लसी तेन्बा मुला डाइनोन थेहड् लसीन तेन्बा मुबा। 4 ओच्छे डाइ थार्बा याड्बा ग्यामरी भ्रबा म्हिगदेदा सिबाधोनान तोसी हेम्फेबेदेन मिडम्हेमे न्हीदान चुइसी झ्याल्खानरी झाइजी।* 5 डाइ पाड्बा चु ताम सत्य हिन्ना भिसी परमेश्वरला मन्दिररी पूजा लबा मुल म्हिदेन यहूदीगदे हुप तबा दिमला गन्बागदेसेनोन पाड्खम्ला। थेनीगदेसेन दमस्कस भिबा ग्लारी मुबा यहूदी ज्योज्यो आलेगदेदा चिठी भिसी डादा पुइजी। थे चिठीरी प्रभु येशूदा विश्वास लबागदे

† 21:40 हिब्रू ग्योइ चा यहूदीगदेला ग्योइ हिन्ना। * 22:4 मुल ८:३

जम्मादान चुड्बा अधिकार डादा पिन्बा मुबा। थेतबासेलमा थेनीगदेदा खीसी यरूशलेमरी भसी सजाय पिन्बा सेमसे डा दमस्कसरी निबा मुबा।

6 “डा दमस्कसला डामरी धोमा ओस्पन धिनी गडसल तजी तला, थेनोन धुडरी स्वर्गग्याम तिक्खुरीन डाला क्युर्नोन य्हाल खसी झ्वालड् तजी। 7 डा सरी हिल्जी, ओच्छे डादा ‘शाऊल, शाऊल, एसे डादा तिग्दा दुख पिन्बा?’ भिबा काइ थे:जी।

8 “ओच्छे डाइ ‘प्रभु, हाड खाल हिन्ना?’ भिसी ड्योइमा, थेसे डादा ‘एसे दुख पिन्बान लबा नासरतला येशू डानोन हिन्ना’ भिसी सुड्जी। 9 डादेन छ्याम मुबागदेसे थे य्हाल मी म्राड्जी, तर डादेन छ्याम ताम पाड्बाला काइ भिसम आथे:नी।

10 “थेनोन धुडरी डाइ ‘प्रभु, दाहेन्से डाइ तिग लउ?’ भिसी भिमा, प्रभुसे डादा ‘ए रे:गो ओच्छे दमस्कस शहररी निउ, एसे लतो:बा जम्मान गे थेरी पाड्सी पिन्ना’ भिसी सुड्जी। 11 थे य्हालसे लमा डाइ तिगै आम्राड्नी। थेतबासेलमा डादेन छ्याम मुबागदेसे डादा यारी चुड्सी दमस्कस शहररी भजी।

12 “थे शहररी हननिया भिबा मोशासे पिन्बा ठिम अन्छार भ्रबा म्हि गिक मुबा। थेदा दमस्कसरी चिबा जम्मान यहूदीगदेसे मान लमुबा। 13 थेनोन म्हि डा मुबा ग्लारी खसी डाला डामरी राप्सी डादा ‘शाऊल आले, एला मी दो:सी म्राड्गै’ भिसी पाड्मैछ्याम डाइ म्राड्खमजी, ओच्छे डाइ थेदा म्राड्जी।

14 “ओच्छे थेसे चुहड् भिसी भिजी, ‘य्हाडला आखे म्हेमेला परमेश्वरला सेम घोबादेन परमेश्वरसे म्हनबा अन्छार भ्रबा म्हिदां म्राड्बारी ओच्छे थेसे पाड्मा थे:बारी हाडदा धम्बा मुला।* 15 तिग्दा भिसम हाडसे थेला बारेरी म्राड्बादेन थे:बा तामला साक्षी दोसी हाडसे जम्मान म्हिगदेदा थे:ना लतो:बा मुला। 16 थेतबासेलमा दाहेन्से तिग्दा भ्रान्से? रे:गो, बप्तिस्मा किन्गो, ओच्छे थेला मिनरी विश्वास लमाहेन्से हाडला पाप धाला।’

17 “यरूशलेमरी दो:सी खमाहेन्से परमेश्वरला मन्दिररी प्रार्थना लबा धुडरी सेम गिक तसी डा एकोहोरो तजी। 18 एकोहोरो तबा धुडरी डाइ प्रभुदा म्राड्जी, थेसे डादा ‘योना लसी ए यरूशलेमग्याम थोन्सी निउ। तिग्दा भिसम डाला बारेरी एसे पाड्मा थेनीगदेसे विश्वास आल’ भिसी सुड्जी।

19 “तर डाइ चुहड् भिसी पाड्जी, ‘प्रभु, जम्मान यहूदीगदे हुप तबा दिमरी निसी हाडदा विश्वास लबागदेदा तोबा ग्याड्बा लसी झ्याल्खानरी झाड्बा ताम यहूदीगदे जम्मादान था मुला। 20 ओच्छे हाडला बारेरी पाड्बा स्तिफनसदा साइबारी डाएनोन ढिक्सी डामरीन राप्सी स्तिफनसदा साइबागदेला क्वान खुड्सी चिबा मुबा।’ 21 “जमाहेन्से प्रभुसे डादा ‘ए निउ, तिग्दा भिसम डाइ एदा अर्गु य्हलला म्हिगदे मुबा ग्लारी थारेड थारेडधोना पुइला’ भिसी सुड्जी।”

22 पावलसे चुहड् पाड्तेधोना थेनीगदेसे ड्यानबान मुबा, ओच्छे ड्यानना ड्याननान “चुहड्बा म्हिदा मी जम्बुलिडरी थान्बारी आत। तिग्दा भिसम सोबा भन्दा सिबान ज्यबा तला” भिसी थेनीगदे क्रिड्बारी छ्याइजी।† 23 ओच्छे थेनीगदे हाड हाडला क्वान स्युसी साप्रा स्वाबान क्रिड्जी।

24 जमाहेन्से सिपाहीगदेला हाकिमसे चुहड् भिसी कुल्जी, “चु म्हिगदेसे तिग्दा चुदा बिरोध लसी क्रिड्बा चीम भिबा ताम था याड्बाला लागिरी थेदा ब्यारेक न्हडरी भसी कोर्से तोबान ड्योइबा छार्बा लउ।” 25 सिपाहीगदेसे पावलदा ढिला छोसे खीबारी छ्याइमा पावलसे हाडला डामरी राप्सी चिबा कप्तानदा “तिग रोमीला ठिम अन्छार तिगै दोष आरेबा रोमी म्हिदा कोर्से तोबा ठीक हिन्ना?” भिसी ड्योइजी।

26 चु ताम थे:माहेन्से कप्तान सिपाहीगदेला हाकिम मुबा ग्लारी खसी, “हाडसे चु तिग लबारी छ्याइबा? चु म्हि मी रोमी म्हि चीम” भिसी भिजी।

27 जमाहेन्से थे हाकिम खसी पावलदा “लु, डादा पाड्गो, ए पक्कान रोमी म्हि हिन्ना?” भिसी ड्योइमा पावलसे “हिन्ना” भिसी भिजी। 28 ओच्छे थे हाकिमसे “डाइ ल्हानान टाड्गा फासी डा चु

† 22:14 परमेश्वरसे म्हनबा अन्छार भ्रबा म्हि चा येशू खीष्ट हिन्ना। यहूदीगदेसे बिरोध थालगै भिसी पावलसे चुरी येशूला मिन आपाड्नी। * 22:14 मुल ९:१७ † 22:22 परमेश्वरसे पावलदा अर्गु य्हलला म्हिगदे मुबा ग्लारी निउ भिसी सुड्बा ताम थे:सी यहूदीगदेसे चा अर्गु य्हलला म्हिदेन यहूदीगदे गिकनोन हिन्ना भिसी म्हनसी पावल म्राड्सी यहूदीगदेदा झन बोमो खजी।

यहुलसाला म्हि दोबा हिन्ना” भिसी जोहाब पिन्मा, पावलसे “तर डा मी न्हमान रोमी म्हि हिन्ना” भिसी भिजी।

²⁹ पावलदा ड्योइबा छार्बा लबारी तयार तबागदे जम्मान थेग्याम तुरुन्तन लिच्छापट्टि लेःजी। ओच्छे पावल रोमी म्हि चीम भिबा ताम था याड्सी सिपाहीगदेला हाकिमएनोन लोड्जी। तिग्दा भिसम पावलदा खीगो भिसी थेसे कुल्बा मुबा।

पावलदा यहूदीगदेला अदालतरी भोर्बा

³⁰ न्हडगरदड यहूदीगदेसे तिग्दा बिरोध लजीम भिबा ताम घोबा सेम लसी थेदा बलसी पिन्जी। ओच्छे परमेश्वरला मन्दिररी पूजा लबा जम्मान मुल म्हिगदेदेन यहूदीगदेला अदालतला नेतागदेदा पोप तउ भिसी कुल्जी। जमाहेन्से पावलदा अदालतरी भसी थेनीगदेला डाच्छापट्टि राप्पुड्जी।

23

¹ पावलसे अदालतरी मुबागदे जम्मादान च्यासी, “ज्योज्यो आलेगदे, तिनीला धिनधोना डा परमेश्वरला डाच्छा ज्यबा सेमसे भ्रबा मुला” भिसी भिजी। ² चु ताम थेःसी परमेश्वरला मन्दिररी पूजा लबा मुल म्हि हननियासे पावलला डामरी राप्सी चिबागदेदा थेला ग्रम्बारी तोउ भिसी कुल्जी। ³ जमाहेन्से पावलसे थेदा “हाडसे हाडदान ज्यबा म्हन्बा म्हि! च्यागो, एदाएनोन परमेश्वरसे सजाय पिन्ना। ए मोशासे पिन्बा ठिम अनछार डाला निसाफ लबारी चिसीनोन मोशाला ठिमदा ख्लासी एसे डादा तोउ भिसी कुल्बा?” भिसी भिजी।

⁴ पावलला डामरी राप्सी चिबागदेसे पावलदा “तिग एसे परमेश्वरला मन्दिररी पूजा लबा मुल महिला बेइज्जत लबा?” भिसी भिजी।

⁵ पावलसे थेनीगदेदा “डाला ज्योज्यो आलेगदे, थे परमेश्वरला मन्दिररी पूजा लबा मुल म्हि हिन्ना भिबा डादा था आरेबा। तिग्दा भिसम ‘एसे हाडला यहूलला नेताला बारेरी नइबा ताम थापाड्गो’ भिसी परमेश्वरला बचनरी भिबा मुला” भिसी भिजी।*

⁶ तर अदालतरी सदुकीगदेला समूहदेन फरिसीगदेला समूह चीम भिबा था याड्सी पावलसे “ज्योज्यो आलेगदे, डा फरिसीला कोला फरिसीन हिन्ना। डाइ सिबागदे दोःसी सोला भिसी आश लबासे लमा डादा चु मुद्दा तबा हिन्ना” भिसी भिजी।

⁷ पावलसे थेहड् भिमाहेन्से फरिसीगदेदेन सदुकीगदेला ताम आढिक्ना थेनीगदे फेजी। ⁸ तिग्दा भिसम सदुकीगदेसे म्हि सिबाग्याम दोःसी आसो भिबादेन स्वर्गदूत ओच्छे आत्मा भिबा तिगै आरे भिसी भिमुबा। तर फरिसीगदेसे चा चु जम्मान मुला भिसी विश्वास लमुबा।

⁹ जमाहेन्से थेरी ल्हानान हल्ली खल्ली तजी। थेतबासेलमा फरिसी समूहला कोइ कोइ धर्मगुरुगदे राप्सी सदुकीगदेला बिरोध लबान, “डन्से चु महिला तिगै दोष आस्यापनी। तर आत्मा अथवा स्वर्गदूतसेन चु म्हिदा चुहड् पाड्बा हिन्सम तिग तजी?” भिसी भिजी। ¹⁰ थेरी थेनीगदेला ताम आढिक्ना छेबा बड्बा तबासे लमा पावलदा थेनीगदेसे तोबा ग्याड्बा लसी साइला भिसी सिपाहीगदेला हाकिम लोड्सी पावलदा थेग्याम भसी ब्यारेक न्हडरी भोर्गो भिसी सिपाहीगदेदा कुल्जी।

¹¹ जमाकुनु म्हुनड प्रभु पावलला डामरी राप्सी, “पावल एसे भड लउ। तिग्दा भिसम यरूशलेम शहररी एसे डाला बारेरी पाड्बा हड् लसी रोमरीनोन डाला बारेरी पाड्तोःला” भिसी सुड्जी।

पावलदा साइबारी जाल लबा

¹² जमाहेन्से न्हडगरदड स्य्होरी यहूदीगदे हुप तसी पावलदा जाल लसी साइबारी सल्लाह लजी। ओच्छे पावलदा आसाइतेधोना तिगै चबा थुड्बा आल भिसी घान फाजी। ¹³ चुहड् लसी जाल लबा म्हिगदे बोगल न्ही भन्दा ल्हानान मुबा। ¹⁴ थेनीगदे परमेश्वरला मन्दिररी पूजा लबा मुल म्हिगदेदेन यहूदी गन्बागदे मुबा ग्लारी निसी चुहड् भिसी भिजी, “डन्से पावलदा आसाइतेधोना तिगै आच भिसी घान फाबा मुला। ¹⁵ थेतबासेलमा हाडनीदेन अदालत ढिक्सी सिपाहीगदेला हाकिमदा चुहड् भिसी

* 23:5 प्रस्था २२:२८

पाङ्गो, चुला मुद्दाला बारेरी अझ ज्यना लसी छिनब लतोःला भिबा सहोसी थेदा तेःसी भउ। ओच्छे थे चुरी खना खनान डन्से थेदा ग्यामरीन साइला।¹⁶

¹⁶ तर पावलला कोनसे चुहड्बा जाल लबा था याङ्सी ब्यारेक न्हडरी निसी पावलदा पाङ्सी पिन्जी। ¹⁷ जमाहेन्से पावलसे कप्तानगदे न्हडला गिकदा ड्योइसी, “चु भ्योन म्हिदा सिपाहीगदेला हाकिम मुबा ग्लारी ससी पिन्गो। तिग्दा भिसम चुसे थेदा पाङ्तोःबा ताम मुला” भिसी भिजी। ¹⁸ थेतबासेलमा कप्तानसे थेदा सिपाहीगदेला हाकिम मुबा ग्लारी भोर्सी, “झ्याल्खानरी मुबा पावलसे डादा ड्योइसी चु भ्योन म्हिदा हाड मुबा ग्लारी भोर्गी भिसी पाङ्जी। तिग्दा भिसम चुसे हाडदेन छ्याम तिगै ताम पाङ्बा सेम मुला रो” भिसी भिजी।

¹⁹ जमाहेन्से सिपाहीगदेला हाकिमसे थे भ्योन म्हिदा यारी चुङ्सी कुनी गिकरी भोर्सी, “एसे डादा तिग ताम पाङ्बारी म्हाइबा?” भिसी ड्योइजी। ²⁰ ओच्छे थे भ्योन म्हिसे हाकिमदा चुहड् भिसी भिजी, “यहूदीगदेसे पावलला बारेरी अझ ज्यना लसी ड्योइबा छार्बा लतोःला भिबा निहुँ लसी न्हडगर थेदा अदालतरी भसी पिन्गो भिसी हाडदा बिन्ती लतोःला भिसी सल्लाह लबा मुला। ²¹ तर हाडसे थेनीगदेला ताम थाङ्यानगो। तिग्दा भिसम बोगल न्ही भन्दा ल्हानान म्हिगदेसे थेदा आसाइतेधोना तिगै चबा थुड्बा आल भिसी घान फासी थेदा साइबारी खुङ्सी चिबा मुला। दान्दे थेनीगदेसे हाडसे तिग सुड्बा चीम थे ताम जे भ्रान्सी चिबा मुला।”

²² जमाहेन्से सिपाहीगदेला हाकिमसे थे भ्योन म्हिदा “एसे डादा पाङ्बा चु ताम स्युहान्दो खालैदा थापाङ्गो” भिसी पुइजी।

पावलदा कैसरिया भिबा ग्लारी पुइबा

²³ जमाहेन्से सिपाहीगदेला हाकिमसे कप्तानगदे न्हडला न्हीदा ड्योइसी चुहड् भिसी भिजी, “तिनी म्हनुना नौ बजेरीक्यार ग्यार्जा न्ही सिपाहीगदेदेन बोगल सोमसे च्युइ ताथोरी क्रेःबा म्हिगदे ओच्छे ग्यार्जा न्ही भाला पुइबा म्हिगदेदा कैसरिया भिबा ग्लाधोना निबारी ठीक लसी थान्गो। ²⁴ ओच्छे पावलला लागिरीनोन ता गिक ठीक लसी थेदा बिरोध लबा म्हिगदेग्याम जोगब लसी यहूदिया अञ्चलाधीश फेलिक्स मुबा ग्लारी भोर्गी।” ²⁵ थेसे चुहड् भिसी चिठी भिजी,

²⁶ “माननीय अञ्चलाधीश फेलिक्सदा क्लौडियस लुसियसग्याम फ्याफुल्ला!

²⁷ चु म्हिदा यहूदीगदेसे चुङ्सी साइबारी छ्याइबा मुबा। तर चु रोमी म्हि चीम भिसी डाइ था याङ्सी सिपाहीगदेदेन छ्याम निसी चुदा जोगब लबारी थेनीगदेला याग्याम फेसी भजी।* ²⁸ तिग तामरी चुदा थेनीगदेसे दोष लजीम भिसी घोबाला लागिरी डाइ चुदा थेनीगदेला अदालतरीनोन भोर्जी। ²⁹ थेनीगदेसे हाडलान ठिमला ड्योइबा तामला बारेरी चुदा दोष लजीम। तर डाइ चुदा साइतोःबा अथवा झ्याल्खानरी झाङ्तोःबा हड्बा तिगै दोष आस्यपनी। ³⁰ चु म्हिदा जाल लसी साइबारी छ्याइबा ताम था याङ्सी डाइ चु म्हिदा तुरुन्तन हाड मुबा ग्लारी पुइखबा हिन्ना। ओच्छे चुदा बिरोध लबागदेदा हाडला डाच्छापट्टि बयान पिन्गो भिसी डाइ पाङ्बा मुला।”

³¹ जमाहेन्से सिपाहीगदेला हाकिमसे कुलबा अन्छार पावलदा सिपाहीगदेसे म्हनुनोन एन्टिपाट्रिस भिबा शहररी भोर्जी। ³² न्हडगरदड ताथोरी क्रेःबा सिपाहीगदेदा पावलदेन छ्यामनोन निउ भिसी भिजी। ओच्छे भाला पुइबा सिपाहीगदे चा ब्यारेकरी दोःसी खजी। ³³ कैसरिया भिबा ग्लारी धोमाहेन्से थेनीगदेसे कैसरियाला मुल हाकिमदा चिठी पिन्जी। ओच्छे पावलदाएनोन थेला डाच्छापट्टि भजी। ³⁴ थेसे थे चिठी पढब लसी जिन्माहेन्से पावलदा ए खजिबा जिल्लाला हिन्ना भिसी ड्योइमा, पावल किलिकिया भिबा ग्लाला चीम भिबा था याङ्जी। ³⁵ थेसे “एदा दोष लबागदे खमाहेन्से डाइ एला मुद्दा च्याला” भिसी भिजी। ओच्छे पावलदा हेरोदा ग्लेसे सहोबा ग्लेखाडरी थान्गो भिसी कुलजी।

* 23:27 मुल १६:३७; २२:२४-२९ † 23:35 चु हेरोद चा घेन हेरोद हिन्ना। चु हेरोद येशू न्हमाहेन्से सिजी। मत्ती २ अध्यायरी सहीगो।

1 डारे लिच्छा परमेश्वरला मन्दिररी पूजा लबा मुल म्हि हननियादेन कोइ कोइ यहूदी गन्बागदे तर्तुल्लस भिबा वकीलदेन छ्याम थेरी खजी। थेनीगदेसे पावलदा बिरोध लबा ताम मुल हाकिम फेलिक्सदा घोना लजी। 2 पावलदा थेरी भमाहेन्से तर्तुल्लससे थेला बिरोध लसी चुहड् भिबारी छ्याइजी,

“माननीय फेलिक्स हाडग्याम डन्से ल्हानान शान्ति याड्बा मुला। ओच्छे हाडसे डन्ना यहूलला लागिरी ल्हानान ज्यबा गेगदे लबा मुला। 3 चु ताम डन्से जम्मान ग्लारी सदन ढन्सी हाडदा ल्हानान धन्यवाद पिन्बा मुला। 4 डादा हाडदेन छ्याम ल्हानान ताम पाड्बा सेम आरे। तसैनोन दया लसी हाडसे डन्ना ताम गिक ड्यानगो।

5 “तिग्दा भिसम चु म्हि जम्बुलिड नाडलान यहूदीगदेला गुडरी हल्ली खल्ली लबादेन खानडदमान दुख पिन्सी भ्रबा नासरी भिबा समूहला मुल नेता हिन्ना। 6 ओच्छे चुसे परमेश्वरला मन्दिरदाएनोन नइबा तना लबारी छ्याइबान मुबा। थेनोन धुइरी डन्से चुदा चुड्जी। डन्ना ठिम अनछार निसाफएनोन लसेला मुबा। 7 तर सिपाहीगदेला हाकिम लुसियससे डनी मुबा ग्लारी खसी जबरजस्ती थेदा डनीग्याम ब्यन्सी भोजी। 8 ओच्छे चुदा बिरोध लबागदेदा हाडला डाच्छा निउ भिसी कुल्जी।† दाहेन्से डन्से चुदा बिरोध लसी पाड्मा ठीक हिन्ना कि आहिन भिसी हाडसेनोन ड्योइबा छार्बा लमाहेन्से था याड्ला।”

9 थेदेन छ्याम खबा यहूदीगदेसेनोन “चु जम्मान ताम ठीक हिन्ना” भिसी भिजी।

10 अञ्चलाधीशसे पावलदा ताम पाड्पुड्माहेन्से पावलसे चुहड् भिसी पाड्जी, “हाड ल्हानान दिडहेन्से यहूदी यहूलला मुल हाकिमदेन न्यायाधीश हिन्ना भिबा ताम डाइ था याड्जी। थेतबासेलमा हाडला डाच्छापट्टि डादा बिरोध लबा तामला बारेरी पाड्म्याड्मा डा ल्हानान ताड्बा मुला। 11 डा परमेश्वरला मन्दिररी परमेश्वरदा तेन्बारी यरूशलेमरी निबा च्युक न्ही धिन भन्दा ल्हाना तबा आरे। चु ताम हाडसेनोन था याड्खम्ला। 12 ओच्छे चुगदेसे डाइ खालै म्हिगदेदेन छ्याम छलफल लबाएनोन स्याप्बा आरे। ओच्छे परमेश्वरला मन्दिरदेन यहूदीगदे हुप तबा दिमरी ओच्छे शहररी हुल दडगा लबाएनोन स्याप्बा आरे। 13 ओच्छे दान्दे चुगदेसे डादा लबा दोषला तिगै सत्य ताम हाडदा उन्बारी आखम। 14 “तर चु ताम डाइ हाडलान डाच्छापट्टि पाड्खम्ला। डा थार्बा याड्बा ग्यामरी भ्रसी डन्ना आखे म्हेमेला परमेश्वरदा तेन्बा मुला। चुनोन थार्बा याड्बा ग्यामदा चुगदेसे लुसीला ताम पाड्बा म्हिगदेला समूह भिसी भिमुला। तर डाइएनोन थेनीगदे भ्रबा ग्यामरीन भ्रसी मोशाला ठिमरी मुबा तामदेन अगमवक्तासे भ्रिबा किताबला जम्मान तामरी विश्वास लबान मुला। 15 थेनीगदेसे हड् लसीन परमेश्वरसे म्हन्बा अनछारला गे लबा म्हिदेन परमेश्वरसे म्हन्बा अनछारला गे आलबा म्हि न्हीनोन सिबाग्याम दोःसी सोला भिसी डाइएनोन परमेश्वरथोरी आश लबा मुला। 16 थेतबासेलमा डाइ सदन परमेश्वरदेन म्हिगदेला डाच्छापट्टि ज्यबा सेम थोसी भ्रबा मुला।

17 “ल्हानान दिड लिच्छा डा हाडलान यहूदीगदेदा टाडगा पिन्सी हो लबारीदेन परमेश्वरदा भेटी फुल्बारी यरूशलेमरी खबा मुबा। 18 परमेश्वरला मन्दिररी भेटी फुल्बान लबा धुइरी चुगदेसे डादा स्याप्बा हिन्ना। थे धुइरी डाइ चोख्याब तबारी लतोःबा जम्मान गे लसी जिन्बा मुबा। चुगदेसे डादा परमेश्वरला मन्दिररी स्याप्मा डादेन छ्याम खालै महिला हुल आरेबा ओच्छे हुल दडगाएनोन तबा आरेबा। 19 तर एशिया भिबा ग्लाग्याम खबा कोइ कोइ यहूदीगदेसे डादा परमेश्वरला मन्दिररी म्हाड्बा मुबा। चुदे डाला बिरोधरी तिगै ताम पाड्तोःबा मुसम थेनीगदे चा हाड मुबा ग्लारी खसी डाला बिरोधरी उजुर लदोमुबा। 20 आहिनसम, डा यहूदी अदालतला डाच्छापट्टि राप्बा धुइरी डाला तिग दोष स्याप्जी थे दोष चुरी मुबा म्हिगदेसेन पाड्गै। 21 तर डाइ थेनीगदेला डाच्छा क्रिड्सी चु ताम जे पाड्बा हिन्ना, ‘सिबागदे दोःसी सोला’ भिसी विश्वास लबासे लमा तिनी हाडनीला डाच्छा डादा चु मुद्दा तबान मुला।”

† 24:8 “डन्ना ठिम अनछार...हाडला डाच्छा निउ भिसी कुल्जी।” चु ताम ल्हाना हड्बा ग्रीक बाडबलरी आरे।

22 चु तामला बारैरी फेलिक्सदा जम्मान ताम था तबासे लमा थेसे चु ताम थे:माहेन्से पावलदा बिरोध लबागदेदा “सिपाहीगदेला हाकिम लुसियस चुरी खमाहेन्से डाइ एनीगदेला मुद्दा छिनब लसी पिन्ना” भिबा सहोसी पुइजी। 23 जमाहेन्से फेलिक्ससे कप्तानदा “पावलदा जयना लसी खुइसी चिउ, तर थेदा ल्हानान कडाएनोन थालउ। ओच्छे थेदा तो:बा सहेगदे थेला ह्योगदेसे पिन्बारी खमा थेला ह्योगदेदा रोकब थालउ” भिसी कुल्जी।

फेलिक्सदेन दुसिल्लाला डाच्छापट्टि पावल

24 तिगै धिन लिच्छा फेलिक्ससे हाडला यहूदी म्रिड दूसिल्लादा छ्यामनोन भसी खजी, ओच्छे थेसे पावलदा ड्योइसी ख्रीष्ट येशूदा विश्वास लबा बारैला ताम पावलग्याम ड्यानजी। 25 पावलसे थेदा परमेश्वरदा सेम निबा गे लतो:बा मुला ओच्छे हाडसे हाडदान तहरी थान्सी परमेश्वरसे लबा निसाफला बारैरी पाड्मा फेलिक्स आत्तेब तसी पावलदा “दान्देदा ए निउ, तजी भिसम डाइ एदा ड्योइला” भिसी भिजी। 26 पावलसे थेदा टाडगा पिन्ना वा भिबा आश लसी पावलदा धुइ धुइरी ड्योइसी ताम लमुबा।

27 नही दिड लिच्छा फेलिक्सला ग्लारी पर्किअस फेस्तस भिबा हाकिम खजी। ओच्छे फेलिक्ससे यहूदीगदेदा ताड्ना लबाला लागिरी पावलदा झ्यालखानरीन थान्सी निजी।

25

पावलला मुद्दा फेस्तससे च्याबा

1 फेस्तस मुल हाकिम दोबा सोमरे लिच्छा कैसरियाग्याम यरूशलेमरी निजी। 2 थेरी परमेश्वरला मन्दिररी पूजा लबा मुल म्हिगदेदेन यहूदी गन्बागदेसे पावलला बिरोधरी दोष लजी। 3 उन्ना लागिरी पावलदा यरूशलेमरी पुइखसी उन्दा दया लउ भिसी बिन्ती लजी। तिग्दा भिसम थेनीगदेसे पावलदा ग्यामरी खना खनान साइबारी जाल लबान मुबा। 4 तर फेस्तससे थेनीगदेदा चुहड् भिसी पाड्जी, “पावलदा कैसरियारीन झ्यालखानरी थान्बा मुला, ओच्छे डाएनोन योनान कैसरियारी दो:सी निबा सेम मुला। 5 एनीगदे न्हडला कोइ कोइ नेतागदे डादेन छ्यामनोन कैसरियारी भ्रउ, ओच्छे थे म्हिसे तिगै आज्यबा गे लबा मुसम थेरी थेला दोष उन्गो।”

6 जमाहेन्से थेनीगदे मुबा ग्लारी फेस्तस भ्रे:रे च्युइरे भन्दा ल्हाना आचिना कैसरियारी दो:सी निजी। ओच्छे न्हडगरदड निसाफ लबा ठिरी चिसी पावलदा भसी खउ भिसी कुल्जी। 7 पावल धोखमाहेन्से यरूशलेमग्याम खबा यहूदीगदे थेला क्युर्सीन राप्जी। ओच्छे पावलला बिरोधरी हिन्बा आहिन्बा तामला दोष लजी। तर थेनीगदे हाडसेन पाड्मा सत्य हिन्ना भिसी उन्बारी आखमनी।

8 जमाहेन्से पावलसे हाडला ताम पाड्बान, “डाइ यहूदीगदेदा मोशासे पिन्बा ठिम, परमेश्वरला मन्दिरला बिरोधरीदेन रोमी ग्याल्बो कैसरला बिरोधरी तिगै आज्यबा गे लबा आरे” भिसी भिजी।

9 तर फेस्तससे यहूदीगदेदा ताड्ना लबाला लागिरी पावलदा “तिग ए यरूशलेमरी निसी थेरी डाला डाच्छा चु तामला बारैरी निसाफ लसी पिन्गै भिसी म्हन्बा मुला?” भिसी ड्योइजी।

10 तर पावलसे चुहड् भिसी भिजी, “डा रोमी ग्याल्बो कैसरसे निसाफ लबा ठिला डाच्छा राप्सी चिबान मुला। थेतबासेलमा डाला निसाफ चुरीन ततो:ला। डाइ यहूदीगदेदा तिगै नइबा गे लबा आरे भिबा ताम हाडदा थानोन मुला। 11 चुदे डाइ डादा साइतो:बाधोनाला गे लबा मुसम डादा साइसैनोन ठीक मुला। तर डादा यहूदीगदेसे लबा दोषला तिगै सत्य ताम उन्बारी आखमसम डादा खालैसे थेनीगदेला यारी जिम्मा पिन्बारी आम्याड्। तर रोमी ग्याल्बो कैसरसेन डाला चु मुद्दा च्यासी पिन्गै भिबा डाला बिन्ती मुला।”

12 जमाहेन्से फेस्तससे हाडदा सल्लाह पिन्बा म्हिगदेदेन छ्याम सल्लाह लसी, “एसे रोमी ग्याल्बो कैसरदा बिन्ती लजी। थेतबासेलमा ए रोमी ग्याल्बो कैसर मुबा ग्लारीन नितो:ला” भिसी भिजी।

अग्रिपास भिबा ग्लेदेन फेस्तससे लबा सल्लाह

13 तिगै धिन लिचछा अग्रिपास ग्लेदेन थेला आडा बरनिकी फेस्तसदा मान लबारी कैसरियारी खजी। 14 थेरी थेनीगदे ल्हानान धिन चिमाहेन्से फेस्तससे पावलला मुद्दा ग्लेदा उन्बान चुहड् भिसी भिजी, “चुरी फेलिक्ससे झ्यालखानरी थान्बा म्हि गिक मुला। 15 थेला बारेरी डा यरूशलेमरी निमा परमेश्वरला मन्दिररी पूजा लबा मुल म्हिदेन यहूदी गन्बागदेसे थेला बिरोधरी दोष लसी थेदा सिबाला सजाय पिन्तो:ला भिसी डादा पाड्मुबा।

16 तर डाइ थेनीगदेदा चुहड् भिसी भिजी, ‘दोष आस्यापतेधोना खालै म्हिदा सिबाला सजाय पिन्बा रोमीगदेला ठिम आरे। ओचछे दोष लबा महिला ओन्छाडरी दोष तबा म्हिसे हाडला बारेरी ताम पाड्म्याड्तो:ला।’ 17 थेतबासेलमा थेनीगदे चुरी खमाहेन्से डाइ योना लसीन न्हडगरदडनोन निसाफ लबा ठिरी चिसी थेदा भसी खउ भिसी कुल्जी। 18 जमाहेन्से पावलदा दोष लबा म्हिगदेसे राप्सी पावलसे लबा आज्यबा गेला दोष उन्ना भिसी डाइ म्हन्बा मुबा। तर थेनीगदेसे डाइ म्हन्बा अन्छार तिगै दोष उन्बारी आखमनी। 19 बरु थेनीगदे न्हडरी आठिक्बा ताम चा सिसी जिन्बा येशूला बारेरीदेन थेनीगदेलान धर्मला बारेरी मुबा। ओचछे पावलसे चा येशू अझ सोबान मुला भिसी पाड्बा मुबा। 20 जमाहेन्से चु ताम तिग हिन्ना भिसी सत्य ताम था याड्बारी डा अलमल तबासे लमा चु तामला बारेरी निसाफ लबारी यरूशलेमरी निबा सेम मुला कि भिसी डाइ पावलदा ड्योड्जी। 21 तर पावलसे रोमी ग्यालबोग्याम छिनब आततेधोना डादा चुरीन झ्यालखानरी थान्गो भिसी बिन्ती लबासे लमा थेदा रोमी ग्याल्बो कैसर मुबा ग्लारी आपुइतेधोना चुरीन थान्गो भिसी कुल्जी।”

22 जमाहेन्से अग्रिपाससे फेस्तसदा “चु महिला ताम डादाएनोन ड्यानबा सेम मुला” भिसी भिमा फेस्तससे अग्रिपासदा “थेला ताम हाडसे न्हडगर ड्यानम्याड्ला” भिसी भिजी।

पावलदा अग्रिपास भिबा ग्लेला डाचछा भोर्बा

23 न्हडगरदड अग्रिपास ग्लेदेन थेला आडा बरनिकी ओचछे सिपाहीगदेला हाकिमगदे, शहरला मुल नेतागदेदेन छ्यामनोन सभा दिम न्हडरी वाड्जी, थेरी म्हिगदेसे थेनीगदेदा ल्हानान मान लजी। जमाहेन्से फेस्तससे पावलदा भसी खउ भिसी कुल्बासे लमा पावलदा थेरी भजी। 24 जमाहेन्से फेस्तससे चुहड् भिसी भिजी, “ग्ले अग्रिपासदेन चुरी यहाडदेन छ्याम मुबा जम्मान ज्योज्यो आलेगदे, हाडनीसे म्राड्बा चु म्हिदा जम्मान यहूदीगदेसे क्रिड्बान, ‘चु म्हिदा साइनोन तो:ला’ भिसी यरूशलेमरीदेन चुरी डादाएनोन थेसे हाडला ताम पाड्बा मुबा। 25 तर डाइ चुदा साइनोन तो:बा तिगै दोष आस्यापनी ओचछे चुसेनोन रोमी ग्याल्बोला डाचछा हाडला ताम थान्बा सेम लबासे लमा डाइ चुदा रोमी ग्याल्बो मुबा ग्लारी पुड्बा सेम लबा मुला। 26 चुला बारेरी डाइ डाला रोमी ग्याल्बोदा भिसी पुइतो:बा खास ताम तिगै आरे। थेतबासेलमा डाइ चुदा हाडनीला डाचछापट्टि ओचछे खास लसी हाड ग्ले अग्रिपासला डाचछापट्टि भबा मुला, दाहेन्से यहाडसे चुदा ड्योड्बा छार्बा लमाहेन्से डाइ भिसी पुइतो:बा ताम स्याप्ला तला। 27 तिगूदा भिसम झ्यालखानरी झाड्बा महिला बारेरी तिगै दोष आउन्ना रोमी ग्याल्बो मुबा ग्लारी पुड्बारी डादा ज्यबा आछोर्नी।”

26

1 जमाहेन्से अग्रिपास ग्लेसे पावलदा “दाहेन्से एसे हाडला बारेरी ताम पाड्म्याड्ला” भिसी भिजी। ओचछे पावलसे याला चाल लबान हाडला बारेरी चुहड् भिसी ताम लबारी छ्याड्जी।

2 “ग्ले अग्रिपास, यहूदीगदेसे डादा लबा जम्मान दोषला बारेरी तिनी हाडला डाचछापट्टि पाड्म्याड्मा डा ल्हानान ताड्बा मुला। 3 यहूदीगदेला जम्मान रिमठिमदेन थेनीगदे खाहड्बाधोना मुला भिबा हाडदा ज्यना लसी था मुबासे लमा डाला ताम आछेर्ना ज्यना लसी ड्यानसी पिन्गो भिबा डाला बिन्ती मुला।

4 “डाला यहूलला गुडरीदेन यरूशलेमरीनोन डा जत्धुगुहेन्से दान्देधोना खाहड् लसी भ्रबा मुला भिबा ताम यहूदीगदेदा था मुला। 5 डन्ना यहूदी धर्म तेन्बा म्हिगदे न्हडला हाडसे तेन्बा ताम जे जम्मान भन्दा ठीक हिन्ना भिबा फरिसीगदेला समूह न्हडला डाएनोन गिक मुबा भिबा ताम थेनीगदेदा था मुला। थेतबासेलमा चु ताम पाड्बा सेम मुसम थेनीगदेसे पाड्खम्ला। 6 परमेश्वरसे यहाडला आखे

म्हेमेदेन छ्याम लबा कबुलरी डाइ विश्वास लबासे लमा तिनी डादा चु मुद्दा तबा मुला। 7 अग्रिपास ग्ले यहाडला च्युक नही वंशगदेसेन चु कबुल याड्बाला लागिरी धिन म्हुननोन सेम गिक लसी परमेश्वरदा तेन्बा मुला। चुनोन कबुलरी डाइ विश्वास लबासे लमा यहूदीगदेसे डादा दोष लबा हिन्ना। 8 परमेश्वरसे सिबागदेदा दोःसी सोना लला भिबा तामरी विश्वास लबारी हाडनीदा तिग्दा गाहो तबा?

9 “हिन्बाम डाइनोन खम्तेधोना नासरतला येशूला बिरोध लतोःला भिसी म्हुन्बा मुबा। 10 डाइ यरूशलेमरी चुहड् लसी बिरोध लजी। डाइ परमेश्वरला मन्दिररी पूजा लबा मुल म्हिगदेग्याम अधिकार किन्सी परमेश्वरला म्हिगदेदा झ्याल्खानरी झाड्जी। ओच्छे थेनीगदेदा साड्बा गेरीनोन हो लजी। 11 ओच्छे यहूदीगदे हुप तबा जम्मान दिमगदेरी थेनीगदेदा ल्हानान रेम सजाय पिन्सी परमेश्वरदा बिरोध लउ भिसी कर लबा मुबा। ओच्छे थेनीगदेदेन छ्याम ल्हानान बोमो खसी डाइ थेनीगदेदा अर्गु यहूलसाला शहरगदेरीनोन दुख पिन्जी।

पावलसे हाडसे येशूदा विश्वास लबाला बारेरी पाड्बा

12 “चुहड् लसी परमेश्वरला मन्दिररी पूजा लबा मुल म्हिगदेग्याम अधिकारदेन कुलबा तामला चिठी याड्माहेन्से डा दमस्कस भिबा ग्लापट्टि निजी। 13 अग्रिपास ग्ले, डनी निबान लमा धिनी गुडरी डाइ स्वर्गग्याम धिनीला य्हाल भन्दा ल्हानान य्हाल खबा म्हाड्जी। थे य्हाल डादेन डाला होगदेला क्युर्सीन ज्वालडलड तजी। 14 ओच्छे डनी जम्मान सरी हिल्जी। जमाहेन्से डादा हिब्रू ग्योडरी “शाऊल, शाऊल एसे डादा तिग्दा दुख पिन्बा? डादेन छ्याम छेसी एसे हाडसे हाडदान दुख तना लबा मुला”† भिबा काइ डाइ थेःजी।

15 “जमाहेन्से डाइ, ‘प्रभु, हाड खाल हिन्ना?’ भिसी ड्योड्जी।

“प्रभुसे डादा चुहड् भिसी सुड्जी, ‘एसे दुख पिन्बान लबा येशू डानोन हिन्ना।’ 16 ‘तर रेःगो, तिग्दा भिसम डाइ एदा डाला गे लबा म्हिदेन डाला साक्षी पिन्बा म्हि सहोबाला लागिरी डा ए मुबा ग्लारी खबा हिन्ना। एसे डाला बारेरी म्हाड्बा तामदेन डाइ एदा लिच्छा उन्बा तामगदेएनोन स्य्हान्दो म्हिगदेदा थेःना लतोःला। 17 ओच्छे एदा डाइ यहूदीगदेदेन अर्गु यहूलला म्हिगदे मुबा ग्लारी पुडबारी छ्याड्बा मुला। थेनीगदेसे एदा पिन्बा दुखग्याम डाइ एदा जोगब लला। 18 एसे थेनीगदेला मी म्हाड्ना लसी थेनीगदेदा धोपधोपग्याम य्हाल य्हाल मुबापट्टिदेन शैतानना शक्तिग्याम फेसी परमेश्वरपट्टि भतोःला। जमाहेन्से थेनीगदेसे पापग्याम माफ याड्ला ओच्छे डादा विश्वास लबासे लमा थेनीगदे परमेश्वरसे धम्बा म्हिगदेदेन छ्याम चिम्याड्ला।

19 “थेतबासेलमा अग्रिपास ग्ले, डादा स्वर्गग्याम उन्बा ताम डाइ ड्यानबा हिन्ना। 20 डाइ डाच्छा दमस्कसरी, जमाहेन्से यरूशलेमरीदेन यहूदिया यहूलसा नाडनोन चिबागदेदा, ओच्छे अर्गु यहूलला म्हिगदेदाएनोन हाड हाडला पाप ख्लासी परमेश्वरपट्टि दोःगो ओच्छे हाड हाडला पाप ख्लासी परमेश्वरपट्टि दोःबा अन्छारला गे लउ भिसी थेःना लजी। 21 डाइ चुहड् लसी थेःना लबासे लमा यहूदीगदेसे डादा परमेश्वरला मन्दिररी चुड्सी साड्बारी म्हाड्जी। 22 तिनीधोना परमेश्वरसे डादा हो लबान मुला। थेतबासेलमा डा चुरी राप्सी यहूलसाला जजा घेन जम्मादान चु ताम पाड्बान मुला। ओच्छे डाइ अगमवक्तागदेदेन मोशासे पाड्बा ताम पूरा तनोन तला भिबा ताम बाहेक अर्गु तिगै ताम पाड्बा आरे। 23 थेनीगदेसे थार्बा पिन्बा ख्रीष्टसे दुख नानोन तोःला, ओच्छे सिबागदे न्हडरी थे जम्मान भन्दा डाच्छा सोसी हाडला यहूलला म्हिदेन अर्गु यहूलला म्हिगदेदा परमेश्वरला यहूलसाला बारेरी पाड्ला।”

24 पावलसे चु ताम पाड्बान लमा फेस्तससे “पावल ए म्योबा हिन्ना, एसे ल्हानान पढब लबासे लमा एदा थेसेन म्योना लबा हिन्ना” भिसी घेन काइ लसी पाड्जी।

25 तर पावलसे चुहड् भिसी भिजी, “जम्मासेन मान लबा फेस्तस, डा म्योबा आहिन, तर डाइ सत्य तामदेन बुद्धिला ताम जे पाड्बा मुला। 26 चु तामला बारेरी अग्रिपास ग्लेदाएनोन था मुबासे लमा डाइ

† 26:14 ग्रीक बाइबलरी “सुडरोरी काडसे छेक्मा एदान सहू खला” भिसी भिबा मुला। चु भिबा चा “डादेन छ्याम छेसी एसे हाडसे हाडदान दुख तना लबा मुला” भिबा हिन्ना।

ढुकुक तसी चु ताम पाडुबान मुला। डाइ पाडुबा चु जम्मान ताम ग्लेदा थानोन मुला भिबा ताम डादा पक्का था मुला। तिगदा भिसम चु ताम खालैसे आम्राडुबा ग्लारी लबा आहिन।”

27 जमाहेन्से पावलसे चुहड् भिसी भिजी, “अग्रिपास ग्ले, तिग हाडसे अगमवक्तागदेदा विश्वास लमुला? डादा था मुला, हाडसे विश्वास लमुला।”

28 जमाहेन्से अग्रिपास ग्लेसे पावलदा “तिग एसे डादा चुदे योनान ख्रीष्टियान सहोबारी म्हाइबा?” भिसी भिजी।

29 पावलसे “योना तसै घइसी तसैनोन चु च्याल्दागदे बाहेक, हाड जे आहिन, तर तिनी डाला ताम ड्यानबागदे जम्मान डा हडुबान तगै भिसी डाइ परमेश्वरदेन छ्याम प्रार्थना लबा मुला” भिसी जोहाब पिन्जी।

30 जमाहेन्से ग्लेदेन हाकिम ओच्छे बरनिकीदेन थेरी मुबा जम्मान म्हिगदे रेःसी निबारी छ्याइजी। 31 ओच्छे थेनीगदे थे ग्लाग्याम थोन्माहेन्से “चु म्हिसे साइनोन तोःबा अथवा झ्याल्खानरी झाडतोःबाधोनाला तिगै गे लबा आरेम” भिसी हाड हाड न्हडरी ताम लजी।

32 ओच्छे अग्रिपाससे फेस्तसदा “चुसे रोमी ग्याल्बो कैसरला डाच्छा हाडला ताम थान्बा सेम आलबा हिन्सम पुडसै तसेला” भिसी भिजी।

27

पावल रोम यहुल्सारी थार्बा पिन्बा समाचार थेःना लबारी निबा

1 डनी समुन्द्रग्याम तबान इटालिया भिबा ग्लारी नितोःला भिसी पक्का लमाहेन्से थेनीगदेसे पावलदेन स्युहानदो कोइ कोइ झ्याल्खानरी मुबा म्हिगदेदा ग्याल्बो अगस्टसला सिपाहीगदेला कप्तान युलियस भिबा महिला यारी जिम्मा पिन्जी। 2 जमाहेन्से डनी एडामिटेनोस भिबा ग्लाग्याम खसी एशियारी परब तबा पानी जहाज थान्बा ग्लागदे तबान निबा पानी जहाजरी क्रेःसी निजी। थेरी डन्देन छ्याम माकेडोनिया अञ्चलला थेसलोनिके भिबा ग्लाला अरिस्तार्खस मिन लबा म्हि गिकएनोन मुबा।

3 न्हडगरदड डनी सीदोन भिबा ग्लारी धोखजी। ओच्छे युलियससे दया लसी पावलदा थेला ह्योगदे मुबा ग्लारी निसी तोःतेबा सहेगदे किन्पुडुजी। 4 थेग्याम दोःसी डनी मुबा पानी जहाज निजी, ओच्छे पानी जहाजला डाच्छापट्टिग्याम लाबा खबासे लमा डनी समुन्द्रला गुडरी मुबा साइप्रस भिबा ग्लाला भर लसी कुनीग्याम तबान निजी। 5 जमाहेन्से किलिकियादेन पामफिलिया भिबा ग्लाला क्याम्सडपट्टिला समुन्द्ररी धोखमाहेन्से डनी लुकिया भिबा ग्लाला माइरा भिबा शहररी धोखजी। 6 थेरी कप्तान युलियससे अलेक्जेन्ड्रिया भिबा शहरग्याम इटालिया भिबा यहुल्सारी निबा पानी जहाज गिक स्यापुजी। ओच्छे डनी थे पानी जहाजरी क्रेःसी निजी।

7 ल्हानान धिनधोना दुख नासी डनी गोलसे गोलसे लसी कनीडस भिबा ग्लारी धोखजी। तर लाबासे अझ डन्दा डाच्छा निआपुडुबासे लमा क्रेट भिबा गडला भर लसी कुनीग्याम तबान सालमोने भिबा ग्लारी निजी। 8 ल्हानान दुखसे डनी थे ग्लाला कुनीग्याम पानी जहाज थान्बा जेबा भिबा ग्लारी खजी। थे ग्लाग्याम लासिया भिबा शहर डामरीन मुबा।

9 समुन्द्रग्याम निबारी ल्हानान लोडुबा खबा धुइ तबासे लमा डनी ल्हानान धिनधोना थेरीन चिजी, ओच्छे फोइथान चिसी प्रार्थना लबा धिनएनोन। निसी जिन्बासे लमा पावलसे थेनीगदेदा चुहड् भिसी सल्लाह पिन्जी। 10 “च्यागो ह्योगदे, चु समुन्द्रग्याम निजी भिसम य्हाडदा ल्हानान दुख तला। पानी जहाजदेन मालसामान जे नाश तबा आहिन, तर य्हाडला ज्याननोन निखम्ला भिबा ताम डाइ म्राडुबा मुला” भिसी भिजी। 11 तर सिपाहीगदेला कप्तानसे पावलला तामदा भन्दा पानी जहाज चलब लबा म्हिदेन पानी जहाजला धनीला ताम जे विश्वास लजी। 12 चु ग्लारी सेखरी चिबारी गाहो तबासे लमा जस्तो लसीन फोनिक्स भिबा ग्लारी निसी खडुबा ला निना लतोःला भिसी ल्हानान हडुबा म्हिगदेसे

† 27:9 “फोइथान चिसी प्रार्थना लबा धिन” चा नेपाली पात्रो अन्छार आसोज लारी परब तमुबा। चु धुडरी चा जम्मान यहूदीगदेला पाप माफ तबाला लागिरी परमेश्वरला मन्दिररी पूजा लबा मुल म्हिसे बलि फुल्मुबा। (प्रस्था ३०:१०; लेवी २३:२७; गन्ती २९:७-११; हिब्रू ९:१७)

थेग्याम पानी जहाज चलब लतो:ला भिसी सल्लाह पिन्जी। फोनिक्स भिबा ग्ला चा क्रेट भिबा गडला पानी जहाज थान्बा ग्ला हिन्ना। थे ग्ला चा ल्हो न्हुपदेन झ्याड न्हुपपट्टि दोबा मुला।

समुन्द्ररी लाबालुडसर खबा

13 ल्होग्याम गोल्से गोल्से लाबा खबारी छ्याइमाहेन्से थेनीगदेसे दाहेन्से य्हाड निखम्ला भिसी म्हन्जी, ओच्छे फाइला अड्कुसी ते:सी क्रेट भिबा ग्लाला कुनीन कुनी निबारी छ्याइजी। 14 तर छिन्नड लिच्छा थे क्रेट भिबा गडग्याम घेन लाबालुडसर खजी। चुहड्बा लाबालुडसरदा स्यार झ्याड लाबा भिसी भिमुबा। 15 जमाहेन्से थे लाबालुडसरसे पानी जहाजदा डाच्छापट्टि निआपुड्नी। तसैनोन पानी जहाज चलब लबा म्हिसे खम्तेधोना डाच्छा निबारी भड लजी, तर निबारी आखमनी। थेतबासेलमा डन्से पानी जहाज खानड खानड निजी थेनोन पट्टि निपुड्जी। 16 ओच्छे क्लौडा भिबा ग्लाला गडला भर लसी कुनीग्याम निमा डन्से बल्ला बल्ला पानी जहाजला ग्यापपट्टि खीसी थान्बा जजाबा दोंगादा जोगब लखमजी। 17 थे दोंगादा पानी जहाज न्हडरी झाड्माहेन्से पानी जहाज चलब लबागदेसे पानी जहाज थान्होड्गै भिसी पानी जहाजला क्युर्सीन घेन छोसे खीजी। तसैनोन सिरटिस भिबा ग्लाला कुनीरीक्यार मुबा बलौटे सरी क्याला भिसी थेनीगदे लोड्जी। जमाहेन्से पानी जहाज चलब लबागदेसे पानी जहाजला पाल ते:जी, ओच्छे पानी जहाजदा लाबाला भररी पुड्जी। 18 थे लाबालुडसरसे डन्दा प्लिड लला हड्नीन लबासे लमा न्हडगरदड थेनीगदेसे पानी जहाजरी मुबा मालसामान भ्याड्बारी छ्याइजी। 19 ओच्छे पानी जहाज चलब लबारी तो:बा सहेगदेएनोन रेनीदड थेनीगदेसेन भ्याड्जी। 20 ल्हानान धिनधोना धिनीदेन सार तिगैनोन आम्राड्नी। ओच्छे लाबालुडसरएनोन खबाला खबान लबासे लमा डन्दा सोला भिबा आशनोन आरेबा।

21 ओच्छे ल्हानान धिनधोना थेनीगदेसे तिगै आचमाहेन्से पावल थेनीगदेला गुडरी राप्सी चुहड् भिसी पाड्जी, “होगदे, हाडनीसे डाला ताम ड्यानसी क्रेटग्याम पानी जहाज चलब आलबा हिन्सम हाडनीसे चुहड्बा दुख नाआतो:सेला मुबा। 22 तसैनोन दाहेन्से हाडनी थालोड्गो, भड लउ। तिग्दा भिसम हाडनी न्हडला खालैनोन आसि। तर पानी जहाज चा नाश तला। 23 तिग्दा भिसम डा जुन परमेश्वरला हिन्ना ओच्छे डाइ जुन परमेश्वरदा तेन्बा मुला, थेनोन परमेश्वरला दूत गिक दोलो म्हुनड डा मुबा ग्लारी खजी। 24 ओच्छे थेसे डादा ‘थालोड्गो पावल, तिग्दा भिसम ए रोमी ग्याल्बो कैसर मुबा ग्लारी निनोन तो:ला। च्यागो, एदेन छ्याम पानी जहाजरी मुबा जम्मान म्हिगदेदा परमेश्वरसे सोना लला’ भिसी भिजी। 25 थेतबासेलमा होंगदे, हाडनी थालोड्गो, भड लउ। तिग्दा भिसम डादा परमेश्वरसे जुन ताम सुड्बा मुला थे ताम पूरा तला भिबा तामरी डादा विश्वास मुला। 26 तसैनोन य्हाडला पानी जहाज खजिबै गड गिकरी ठोक्तो:ला।”

27 डन्ना पानी जहाज लाबालुडसरसे लमा एडियास भिबा समुन्द्ररी याडयोड तबा च्युक बलि धिन तसी जिन्बा मुबा। जमाहेन्से म्हुन गडसलरीक्यार पानी जहाज चलब लबागदेसे य्हाड खजिबै ग्लाला डामरी धोबारी छ्याइजीम भिसी म्हन्जी। 28 जमाहेन्से थेनीगदेसे गाते नुपबा चीम भिसी दप्सी च्यामा बोगल गिकसे च्युक दु मिटर नुपबा मुबा ओच्छे जजाकी क्यथाड निसी दो:सी दप्सी च्यामा बोगल गिकसे मिटर दु नुपबा मुबा। 29 ओच्छे पानी जहाज खानडै युडबारी ठोक्ला भिसी लोड्सी थेनीगदेसे पानी जहाजला ग्यापपट्टिग्याम गोर बलि फाइला अड्कुसी मार पुड्जी, ओच्छे य्हाल तगै भिसी प्रार्थना लबारी छ्याइजी। 30 ओच्छे पानी जहाज चलब लबागदे थे पानी जहाज खलासी यार्बाला लागिरी पानी जहाजला डाच्छापट्टिग्याम फाइला अड्कुसी मार पुड्बा स्होसी थे पानी जहाजरी मुबा दोंगा समुन्द्ररी ते:सी जिन्बा मुबा। 31 जमाहेन्से पावलसे सिपाहीगदेला कप्तानदेन सिपाहीगदेदा “चु म्हिगदे चुरी आचिनी भिसम हाडनी सोबारी आखम” भिसी भिजी। 32 चु ताम थे:सी सिपाहीगदेसे पानी जहाजरी खीसी थान्बा दोंगाला छो थासी पुड्जी।

33 रमरम रिमरिम तबा धुडरी पावलसे थेनीगदे जम्मादान दाहेन्से सोल्बा छ्योड्बा लउ भिसी बिन्ती लजी। ओच्छे पावलसे थेनीगदेदा चुहड् भिसी भिजी, “सुर्दा लसी हाडनीसे सोल्बा छ्योड्बा आलबा तिनी च्युक बलि धिन तसी जिन्बा मुला। 34 थेतबासेलमा दाहेन्से हाडनीसे तिगै सोल्बा छ्योड्बा

लउ। ओच्छे तिगै सोल्बा छ्योइबा लमाहेन्से हाडनीदा भड खला, थालोङ्गो, खालैनोन आसि।”
 35 चुदे पाइसी जिन्माहेन्से पावलसे गेड दुइसी जम्मालान ओन्छाडरी परमेश्वरदा धन्यवाद पिन्सी
 गेड क्युइसी चबारी छ्याइजी। 36 जमाहेन्से थेनीगदेसेनोन आँट याइसी तिगै चबा सहेगदे चजी।
 37 पानी जहाजरी डनी जम्मान लसी ग्यार्जा न्हीसे बोगल सोमसे च्युक दु म्हि मुबा। 38 थेनीगदेसे
 म्रेन्ना चमाहेन्से पानी जहाज याइना लबारी पानी जहाजरी मुबा ग्वाएनोन भ्याइजी।

पानी जहाज नाश तबा

39 यहाल तसैनोन थेनीगदेसे थे ग्ला डोआसेनी। तर थेरी थेनीगदेसे कुनी गिकरी बलौटे स म्राइजी।
 जमाहेन्से खमतेधोना पानी जहाजदा थे कुनीरी भोर्गे भिसी थेनीगदेसे सल्लाह लजी। 40 जमाहेन्से
 थेनीगदेसे फाइला अङ्कुसीगदे तेःसी समुन्द्ररी भ्याइजी, ओच्छे पानी जहाज चलब लबा क्याबादा
 खीबा छोगदेएनोन ब्लसी समुन्द्ररी पुइजी। जमाहेन्से डाच्छापट्टिला पालदा तोर खेन्सी लाबापट्टि
 दोःसी पिन्जी, ओच्छे पानी जहाजदा कुनीपट्टि भोर्बारी छ्याइजी। 41 तर क्युइ न्हडरी मुबा बालुवाला
 उमरी ठोक्की, ओच्छे पानी जहाजला डाच्छापट्टिला जो थेरीन भासब तसी चलब लबारीन आखमनी।
 जमाहेन्से पानी जहाजला ग्यापपट्टिला जोरी समुन्द्रला छालसे टसी क्युइबारी छ्याइजी।

42 थेहड तमाहेन्से थेरी मुबा झ्याल्खानरी झाड्बा म्हिगदे समुन्द्ररी क्याल्सी याला भिसी म्हनसी
 सिपाहीगदेसे थेनीगदेदा साइगे भिसी सल्लाह लजी। 43 तर सिपाहीगदेला कप्तानसे पावलदा जोगब
 लबा सेम लसी थेनीगदेदा थेहड लआपुइनी। ओच्छे क्याल्बारी खम्बागदे डाच्छा पानी जहाजग्याम
 छ्योइसी पाखारी थोन्गो भिसी सिपाहीगदेला कप्तानसे कुल्जी। 44 ओच्छे क्याल्बारी आखम्बागदे
 चा फल्याकगदेदेन पानी जहाजला क्युइबा टोगलगदे चुइसी निउ भिसी भिजी। चुहड लसी जम्मान
 ज्यना लसी पाखारी थोन्जी।

28

पावल माल्टा भिबा ग्लारी धोबा

1 डनी ज्यना लसी समुन्द्रला कुनीरी धोमाहेन्से थे ग्लाला मिन माल्टा चीम भिसी डन्से था याइजी।
 2 जमा धुइरी नाम खसी ल्हानान खड्बासे लमा थे ग्लाला म्हिगदेसे ल्हानान दया लसी मे फुइसी डनी
 जम्मादान मान लजी।

3 पावलसेनोन भम नाड सिड हुप लसी मेरी युजी। मेला लेप्से लमा पुखी गिक थोन्सी थेला यारी
 जीसीन चिजी। 4 थे ग्लाला म्हिगदेसे पावलला यारी पुखीसे जिबा म्राइसी, “चु म्हि पक्कान म्हि
 साइबा म्हि चीम। चु म्हि समुन्द्रग्यामसेम जोगब तसी खजी। तर ल लुला निसाफग्याम चा स्योर
 आम्याइनी” भिसी हाड हाड न्हडरी पाइजी। 5 जमाहेन्से पावलसे थे पुखीदा मेरी खर्सी पिन्जी। तर
 थेदा चा तिगै आतनी। 6 जमाहेन्से थेरी मुबा म्हिगदेसे पावलदा थे पुखीला बिखसे टाइसी तिक्खुरीन
 हिलसी सिला भिसी च्याबारी छ्याइजी। तसैनोन ल्हानान धुइधोना थेदा तिगै आतबा म्राइसी थेनीगदेसे
 डाच्छा म्हन्बा ताम आहिन्बा चीम “तर चु मी ल चीम” भिसी भिजी।

7 थे ग्लाला पब्लियस भिबा मुल म्हिला बु वारी थे ग्लाला डामरीन मुबा। थेसे डन्दा मान
 लसी सोमरेधोना थेला दिमरी भोर्सी क्योइजी। 8 थे धुइरी पब्लियसला आबा मासी तसी छवा खसी
 आखम्बा मुबा। पावल थेदा च्याबारी निजी, ओच्छे थेथोरी या थानसी प्रार्थना लसी थेदा खमना लजी।
 9 चुहड तबा था याइमाहेन्से थे ग्लाला जम्मान आखम्बा म्हिगदेएनोन खजी, ओच्छे थेनीगदेएनोन
 खमजी। 10 थेनीगदेसे डन्दा ल्हानान मान लसी ल्हानान सहेगदे पिन्जी। ओच्छे पानी जहाजरी
 क्रेःमाहेन्से डन्दा तोःबा अर्गु सहेगदेएनोन पानी जहाजरी झाइसी पिन्जी।

पावल रोमरी धोखबा

11 ला सोम लिच्छा डनी अलेक्जेन्द्रिया भिबा ग्लाग्याम खबा पानी जहाजरी क्रेःजी। चु पानी
 जहाज सेखरी माल्टा भिबा ग्लारीन मुबा। थे पानी जहाजला डाच्छापट्टि जौल्या लला मूर्ति सहोसी
 थान्बा मुबा। 12 जमाहेन्से सुराकुसाई भिबा शहररी धोखसी डनी सोमरेधोना थेरीन चिजी। 13 थेग्याम

डनी कुनी कुनी तसी रेगियन भिबा ग्लारी धोखजी। न्हडगरदड ल्होग्याम लाबा खजी, ओच्छे रेनीदड डनी पटिओली भिबा ग्लारी धोखजी। 14 थेरी डन्से प्रभु येशूदा विश्वास लबा ज्योज्यो आले नाना आडागदेदा स्यापजी। थेनीगदेसे डन्दा थेरी निसरेधोना चिउ भिसी भिजी। चुहड लसी डनी रोमरी निजी। 15 डनी खबान मुला भिबा ताम थे:सी रोमरी मुबा विश्वासीगदे डन्दा हुप तबारी अप्पियस भिबा बजारदेन तीन पाटी भिबा शहरधोना खजी। थेनीगदेदा म्राड्सी पावल ताड्सी परमेश्वरदा धन्यवाद पिन्जी। 16 डनी रोमरी धोखमाहेन्से पावलदा सिपाही गिकला भररी थे गिकदा चिपुड्जी।

पावलसे रोमरी थार्बा पिन्बा समाचार थे:ना लबा

17 थेरी धोखसी सोमरे लिच्छा पावलसे रोमला यहूदी गन्बागदेदा ड्योड्जी। ओच्छे थेनीगदे खमाहेन्से पावलसे थेनीगदेदा चुहड भिसी भिजी, “ज्योज्यो आलेगदे, डाइ यहाडला यहूलला म्हिगदेदेन आखे म्हेमेला रिमठिमला बिरोधरी तिगै गे लबा आरेमुबा। तसैनोन यरूशलेमहेन्सेन झ्याल्खानरी झाड्सी डादा रोमीगदेला यारी जिम्मा पिन्बा मुला। 18 थेनीगदेसे ड्योड्बा छार्बा लमाहेन्से डादा साइतो:बा तिगै दोष आस्याप्माहेन्से डादा पुड्बा सेम लमुबा। 19 तर यहूदीगदेसे बिरोध लबासे लमा डाइ रोमी ग्याल्बो कैसरदा डाला ताम पाड्णोन तो:बा तजी। तसैनोन डाइ डाला यहूलला म्हिगदेदा बिरोध लसी दोष लतो:बा तिगै ताम आरेबा। 20 थेतबासेलमा हाडनीदेन छ्याम हुप तसी ताम लबारी डाइ हाडनीदा ड्योड्बा हिन्ना। तिग्दा भिसम इस्राएलीगदेसे आश लबा ख्रीष्ट फेपखजी भिसी डाइ विश्वास लबासे लमा डादा च्याल्दासे खीसी चुरी भबा हिन्ना।

21 जमाहेन्से थेनीगदेसे पावलदा चुहड भिसी भिजी, “डन्से मी हाडला बारेरी यहूदियाग्याम तिगै खबर याड्बा आरे। ओच्छे यहाडला खालै यहूदी ज्योज्यो आलेगदे खसी हाडला बिरोधरी तिगै आज्यबा तामएनोन पाड्बा आरे। 22 तर डन्दा थे ताम हाडग्यामसेन ड्यानबा सेम मुला। तिग्दा भिसम चु समूहलां बारेरी जम्मान ग्लारी म्हिगदेसे बिरोध लबा ताम जे डन्दा था मुला।”

23 थेतबासेलमा पावलला ताम ड्यानबाला लागिरी थेनीगदेसे धिन तोगब लजी। थे धिनकुनु ल्हानान म्हिगदे पावल मुबा ग्लारी खजी। जमाहेन्से पावलसे थेनीगदेदा स्यहोहेन्से ड्यसेधोनान मोशाला ठिमदेन अगमवक्तागदेला किताबग्याम परमेश्वरला यहूलसाला बारेरी जम्मान ताम घोना लसी येशूला बारेरी थेनीगदेदा विश्वास तना लबारी म्हाड्जी। 24 पावलसे पाड्बा तामरी कोडसे विश्वास लजी, कोडसे विश्वास आलनी। 25 जमाहेन्से थेनीगदे हाड हाड न्हडरी आढिकना फेसी भ्रबारी छ्याइमाहेन्से पावलसे थेनीगदेदा चुहड भिसी भिजी, “एनीगदेला आखे म्हेमेदा यशैया अगमवक्ताग्याम परमेश्वरला आत्मासे पाड्मा ठीकनोन मुबा भिसी हाडला ताम जिन्ना लबान चुहड भिबारी छ्याड्जी।

26 ‘चु म्हिगदे मुबा ग्लारी निसी पाड्गो
एनीगदेसे थे:बाम थे:मुला, तर खाइमै आघोमुला,
च्याबाम च्यामुला, तर खाइमै आम्राड्मुला।

27 तिग्दा भिसम चु म्हिगदेला सेम कोड्बा मुला,
ओच्छे थेनीगदेला नाब्यड आथे:मुला,
ओच्छे थेनीगदेसे मी च्युम्बा मुला,
आहिन्सम थेनीगदेसे म्राड्सेला मुबा,
ओच्छे थे:सेला मुबा, ओच्छे घोसी सेम दो:सेला मुबा,
जमाहेन्से डाइ थेनीगदेदा खम्ना लसेला मुबा।*’

28 थेतबासेलमा चु ताम हाडनीदा था तगै, दाहेन्से परमेश्वरसे पिन्बा चु थार्बा अर्गु यहूलला म्हिगदे मुबा ग्लारी पुड्बा मुला, ओच्छे थेनीगदेसे चु ताम ड्यानना।”

† 28:22 चु समूहला म्हिगदे भिबा चा ख्रीष्टदा विश्वास लबा म्हिगदे हिन्ना। * 28:27 यशै ६:९-१०

²⁹ पावलसे चु ताम पाङ्सी जिन्माहेन्से यहूदीगदे ह्वाड ह्वाड न्हडरी ल्हानान छलफल लबान थेग्याम फेजी।†

³⁰ न्ही दिडधोना पावल रोमरी ह्वाडसेन खर्च लसी चिजी, ओच्छे थे मुबा ग्लारी खबा जम्मान म्हिगदेदा मान लजी। ³¹ आलोङ्ना थेसे परमेश्वरला यहुल्साला समाचार थेःना लजी, चुहङ् लसी प्रभु येशू ख्रीष्टला बारेरी लोप्मा थेदा खालैसे रोकब आलनी।

† 28:29 चु पदला ताम ल्हाना ह्वाड ग्रीक बाइबलरी आरे।

पावलसे रोमला विश्वासीगदेदा भिबा चिठी चु चिठीला बारेरी पाङ्तोःमा

भिबा म्हि: येशूला मुल चेला पावलसे भिबा मुबा (रोमी १:१)। चु चिठी भिबाला लागिरी पावलदा तर्तियस भिबा म्हिसे हो लबा मुबा (रोमी १६:२२)।

भिबा ग्ला: कोरिन्थ शहररी भिबा मुबा।

भिबा साल: ओस्पन ईश्वी संवत् ५६-५७ (विक्रम संवत् ११३-११४) सालरी भिबा मुबा। चु चिठी पावल थार्बा पिन्बा समाचार थेःना लबारी निबा सोमरेमला पालला धुइ जिन्बारी छ्याइमा भिबा मुबा।

खाल्दा भिबा: रोम शहररी मुबा विश्वासीगदेदा भिबा मुबा।

पावल चु चिठी भिबा धुइधोना रोम शहररी निबा आरेमुबा। तर रोम शहररी मुबा विश्वासीगदेदा हुप तसी थेनीगदेदेन छ्याम तिगै धिनधोना चिसी गे लबा सेम मुबा। ओच्छे थेनीगदेग्याम तिगै हो किन्सी स्पेन य्हुल्सारी थार्बा पिन्बा समाचार थेःना लबारी निबा पावलला सेम मुबा। चु चिठी थेसे विश्वासीगदेसे आघोनान आतबा तामगदे घोना लबाला लागिरी भिबा मुबा।

पावलसे रोम य्हुल्साला मण्डलीदा फ्याफुल्बान थेनीगदेला लागिरी थेसे प्रार्थना लबा तामगदे उन्बा मुला। ओच्छे परमेश्वरला डाच्छा य्हूदीगदे मुसैनोन अर्गु य्हुलला म्हिगदे मुसैनोन पाप ख्लासी परमेश्वरदा सेम निबा म्हि ततोःला भिसी पाङ्बा मुला। तिग्दा भिसम जम्मान म्हिगदे पापला तहरी मुला। ओच्छे हाडदा परमेश्वरदा सेम निबा म्हि सहोबाला लागिरी येशू ख्रीष्टदा विश्वास लनोन तोःला भिसी पाङ्बा मुला। जमाहेन्से येशूदेन छ्याम गिक तमाहेन्से याङ्बा छार जुनीला बारेरी पाङ्बा मुला। येशूदा विश्वास लबागदे परमेश्वर मुबा ग्लारी निम्याङ्गला ओच्छे थेदा परमेश्वरला आत्मासे पापदेन कालला शक्तिग्याम फेला। ओच्छे ५ अध्यायहेन्से ८ अध्यायधोनारी विश्वास लबागदेदा परमेश्वरदा सेम निबा म्हिगदे सहोबा तामला बारेरीदेन परमेश्वरला आत्माला शक्तिसे लबा गेला बारेरी पाङ्बा मुला।

जमाहेन्से परमेश्वरसे म्हि य्हुलला लागिरी म्हन्बा अन्छार य्हूदीगदेदेन अर्गु य्हुलला म्हिगदे खाहङ् लसी खबारी खम्ला भिसी झ्योइबा तामला जोहाब पिन्बारी म्हाइबा मुला। य्हूदीगदेसे येशूदा विश्वास आलबासे लमा अर्गु य्हुलला म्हिगदेसे येशूदा विश्वास लसी परमेश्वरला दयामाया याङ्गै भिबा परमेश्वरला सेम मुबा।

चिठीला थुमरी स्य्हान्दोगदेदा माया लजी भिसम परमेश्वरदा ताङ्ना लखम्ला भिसी भिबा मुला। परमेश्वरदा तेन्बा, विश्वासीगदेसे हाडला य्हुल्साला लागिरीदेन स्य्हान्दो म्हिगदेदा लतोःबा गेगदेला बारेरीनोन भिबा मुला।

मुल तामगदे

फ्याफुल्बादेन धन्यवादला प्रार्थना १:१-१७

म्हिगदेसे याङ्गोनोन तोःबा थार्बा १:१८-३:२०

थार्बा याङ्गबाला लागिरी परमेश्वरसे उन्बा ग्याम ३:२१-४:२५

ख्रीष्टग्याम याङ्गबा छार जुनी ५:१-८:३९

परमेश्वरसे म्हन्बा अन्छार य्हूदीगदेसे याङ्गबा ताम ९:१-११:३६

ख्रीष्टदा विश्वास लबागदेला बानीबेहोर १२:१-१५:१३

चिठीला थुमरी भिबा ताम १५:१४-१६:२७

पावलसे रोमला विश्वासीगदेदा भिबा चिठी

1 लासूसो, रोमरी मुबा जम्मान म्हिगदेदा डा पावलग्याम फ्याफुल्ला। डा येशू ख्रीष्टदा तेन्बा म्हिदा परमेश्वरसेन मुल चेला दोबारी धम्बा हिन्ना। ओच्छे थाबा पिनबा समाचार थेःना लबाला लागिरी धम्बा हिन्ना। 2 चुनोन थाबा पिनबा समाचार परमेश्वरसे दडबोरीन हाडला म्हिगदेदा पिनना भिसी अगमवक्तागदेग्याम सुड्बा मुबा। थेनोन थाबा पिनबा समाचार परमेश्वरला बचनरी भिबा मुला।

3 थे थाबा पिनबा समाचार चा परमेश्वरला झा यहाडला प्रभु येशू ख्रीष्टला बारेरी हिन्ना। थे म्हि दोसी दाऊद ग्लेला वंशग्याम न्हजी। 4 म्हि दोसी न्हसैनोन थे स्वर्गग्याम फेपखबा मुबा, यहाडला प्रभु येशू ख्रीष्टदा परमेश्वरला झा हिन्ना भिसी परमेश्वरला आत्माला शक्तिसे उन्बा अनछार परमेश्वरसे थेदा सिबाग्याम सोना लजी। 5 यहाडला प्रभु येशू ख्रीष्टग्याम परमेश्वरसे उन्दा दयामाया लसी ख्रीष्टला गे लबा मुल चेला सहोबा मुला। जम्मान यहूलला म्हिगदेसे विश्वास लगै ओच्छे थेसे कुल्बा ताम ड्यानगै भिसीन डाइ ख्रीष्टला लागिरी चु गे लबा हिन्ना। 6 थेनीगदे न्हडरी एनीगदेदाएनोन येशू ख्रीष्टला हाडलान म्हि सहोबारी ड्योइबा मुला।

7 परमेश्वरसे माया लसी हाडला म्हिगदे सहोबारी ड्योइबा रोम यहुल्साला म्हिगदे, एनीगदेदा यहाडला परमेश्वर आबादेन प्रभु येशू ख्रीष्टला दयामायादेन शान्ति तगै।

धन्यवादला प्रार्थना

8 जम्मान भन्दा डाच्छा डाइ डाला परमेश्वरदा येशू ख्रीष्टग्याम एनीगदे जम्मालान लागिरी धन्यवाद पिनना। तिग्दा भिसम एनीगदेसे ख्रीष्टदा विश्वास लबा ताम जम्बुलिडला जम्मान म्हिगदेसे थेःबा मुला। 9 डाइ सदन प्रार्थना लबा धुइरी एनीगदेदा गाते ढन्बा मुला भिबा ताम परमेश्वरदान था मुला। डाइ थेनोन परमेश्वरला झाला समाचार थेःना लसी थेदा सेमहेन्सेन तेन्बा मुला। 10 परमेश्वरसे म्हन्बा अनछार डा जस्तो लसीन एनीगदे मुबा ग्लारी खबारी खमगै भिसी डाइ प्रार्थना लमा सदन परमेश्वरदेन छ्याम बिन्ती लबा मुला।

11 तिग्दा भिसम परमेश्वरला आत्मासे पिनबा मोलम एनीगदेदा पाड्सी ख्रीष्टथोरी लबा विश्वास कोड्ना लबाला लागिरी एनीगदेदेन छ्याम हुप तबा डादा ल्हानान सेम मुला। 12 ओच्छे यहाड न्हीलान विश्वासग्याम गिकसेम गिकदा भड याड्गै भिबा डाला सेम हिन्ना।

13 ज्योज्यो आले नाना आडागदे, चु ताम एनीगदेदा था तगै भिसी डाइ म्हन्बा मुला। अर्गु ग्लाला म्हिगदेसे हड् लसी रोमला अर्गु यहूलला म्हिगदेसेनोन विश्वास लगै भिसी डा ल्हानान रेम एनीगदे मुबा ग्लारी खबा सेम लजी। तर डा दान्दधोना एनीगदे मुबा ग्लारी खबारी खम्बा आरे।* 14 ग्रीकां म्हि हिन्सै आहिन्सै, पढब लबा मुसै आरेसै जम्मादान थाबा पिनबा समाचार थेःना लबा जिम्मा डाला हिन्ना। 15 थेतबासेलमा एनी रोमरी चिबागदेदाएनोन थाबा पिनबा समाचार थेःना लबारी डादा ल्हानान सेम मुला।

थाबा पिनबा समाचार

16 चु थाबा पिनबा समाचार थेःना लबारी डा आपेःमुला। तिग्दा भिसम विश्वास लबागदे जम्मालान लागिरी चु थाना लबा परमेश्वरला शक्ति हिन्ना। डाच्छा यहूदीगदेदा थाना लबाला लागिरी हिन्ना, थेहड् लसीन अर्गु यहूलला म्हिगदेला लागिरीनोन हिन्ना।* 17 चुनोन थाबा पिनबा समाचारसे म्हिदा परमेश्वरदा सेम निबा म्हि दोबारी लोप्ला, ओच्छे विश्वासग्यामसेन डाच्छाहेन्से लिच्छाधोना परमेश्वरदा सेम निबा म्हि दोबारी खम्ला। तिग्दा भिसम बचनरीनोन “जुन म्हि विश्वासग्याम परमेश्वरदा सेम निबा म्हि दोबा मुला, थेसेन जुकजुकधोनाला जुनी याड्ला” भिसी भिबा मुला।*

म्हिसे परमेश्वरदा सेम आनिबा गे लबा

18 म्हिगदेसे परमेश्वरला बिरोध लसी पापदेन आज्यबा गे लबासे लमा परमेश्वर बोमो खसी थेनीगदेथोरी स्वर्गग्याम सजाय खबा मुला। थेनीगदेसे लबा आज्यबा गेसे सत्य तामदा नाड्सी थान्बा

* 1:13 मुल १९:२१ † 1:14 चु पदरी “ग्रीक” भिबा चा थे धुइरी जम्बुलिडरी जम्मान भन्दा ज्यबा रिमठिम मुबादेन ल्हानान ताम सेबा घोबा म्हि भिबा हिन्ना। * 1:16 मर्कू ८:३८ * 1:17 हब २:४

मुला। 19 परमेश्वरला बारैरी घोखम्बा ताम चा थेनीगदेला डाच्छान मुला। तिग्दा भिसम थे ताम परमेश्वरसे थेनीगदेदा उन्सी जिन्बा मुला। 20 म्हिसे म्राड्आखम्बा परमेश्वरला गुण, खाइमै आम्हबा थेला शक्तिदेन बानीबेहोर चु जम्बुलिङ् छ्यामाहेनसे परमेश्वरसे सहोबा जम्मान सह्येगदेग्यामसेन म्राड्बा मुला। थेतबासेलमा थेनीगदेसे तिगै निउ लबा ग्याम आरे।

21 थेनीगदेसे परमेश्वरदा डोसेसीनोन परमेश्वरदा लतोःबा मानदेन जयजयकार आलनी ओच्छे परमेश्वरदा धन्यवादएनोन आपिन्नी। बरु थेनीगदेसे म्हन्बा आज्यबा तामग्यामसेन थेनीगदे गे आखेल्बा म्हि दोजी। ओच्छे थेनीगदेला आज्यबा सेम इन धोपधोपसे प्लिङ्जी।* 22 थेनीगदेसे हाडसे हाडदान बुद्धि मुबा म्हि भिसी भ्रजी, तसैनोन थेनीगदेलान तामसे थेनीगदे मूर्ख दोबा मुला। 23 थेनीगदेसे खाइमै नाश आतबा य्हालदेन शक्ति मुबा परमेश्वरदा तेन्बा ख्लासी नाश तसी निबा म्हि, जन्तु, चरागदेदेन सुल्सी भ्रबा जन्तुगदेला मूर्ति सहोसी तेन्जी।*

24 थेतबासेलमा थेनीगदेला नइबा सेमसे तिग लइ म्हन्बा, थे अन्छार लसी भ्रबारी परमेश्वरसे थेनीगदेदा ख्लासी पिन्जी। थेनीगदेसे हाड हाड न्हडरी ब्रेल्सी पेःबा खबा पाप गेगदे लजी। 25 थेनीगदेसे सदन जयजयकार लतोःबा जम्मान सहे सहोबा परमेश्वरदा तेन्बा ख्लाजी। ओच्छे परमेश्वरसे सहोबा सह्येगदेदा चा तेन्जी। चुहङ् लसी थेनीगदेसे परमेश्वरला सत्य तामदा लुसीला तामदेन छ्याम देपूजी।

26 थेतबासेलमा परमेश्वरसे थेनीगदेला आज्यबा सेमसे म्हन्बा अन्छारलान पेःबा खबा गेगदे लबारी ख्लासी पिन्जी। ओच्छे थेनीगदेला म्रिङकोलागदे हेम्कोलादेन छ्याम आमहेर्ना म्रिङकोला म्रिङकोलान ब्रेल्सी भ्रजी। 27 थेहङ् लसीन हेम्कोलागदे म्रिङकोलादेन छ्याम आमहेर्ना बैससे क्रोसी हेम्कोला हेम्कोलादेन छ्यामनोन ब्रेल्सी भ्रजी। ओच्छे थेनीगदेसे लबा आज्यबा पेःबा खबा गेला सजाय थेनीगदे हाडसेन नाजी।

28 थेनीगदेसे परमेश्वरदा तेन्बा सेम आलबासे लमा परमेश्वरसे थेनीगदेदा थेनीगदेलान न्होङ्बा सेमसे म्हन्बा अन्छारलान गे लगे भिसी ख्लासी पिन्जी। 29 थेनीगदेला सेम जम्मान आज्यबा ताम, लोभदेन बोमोसे प्लिङ्बा मुला। थेतबासेलमा थेनीगदेसे डाह लबा, म्हि साइबा, छेबा बड्बा लबा, म्हिदा झुक्याब लबा, स्य्हान्दोला बारैरी आज्यबा म्हन्बा, म्हिला तामगन लबा, 30 ओच्छे स्य्हान्दोला बेइज्जत लसी भ्रबा, परमेश्वरदाएनोन हेला लबा, डा हङ्बा खालै आरे भिसी हाडसे हाडदान घेन सहोबा, स्य्हान्दोदा मान आलबा, आबा आमासे कुल्बा ताम आड्यानना आज्यबा गे जे लबारी छार छार ग्याम म्हाइबा, 31 थेहङ् लसी थेनीगदे मूर्ख दोसी लला भिबा गेएनोन आलमुला। चु म्हिगदे चा दया आरेबा म्हि हिन्ना। 32 चुहङ्बा गे लबा म्हिगदे परमेश्वरला ठिम अन्छार सितोःबा मुला भिबा ताम थेनीगदेदा थानोन मुला, तसैनोन थेनीगदेसे चुहङ्बा आज्यबा गे लबा जे आहिन, चुहङ्बा आज्यबा गे लबा स्य्हान्दोदाएनोन भड पिन्मुला।

2

परमेश्वरसे लबा निसाफ

1 थेतबासेलमा स्य्हान्दोदा दोष लबा म्हिगदे, एनीगदे जुन मुसैनोन डाइ गल्ती लबा आरे भिसी तिगै निउ लबा ग्याम आरे। स्य्हान्दोदा दोष लबा तामग्यामसेन एनीगदे दोषी तबा मुला। तिग्दा भिसम एनीगदेसे जुन गेग्याम स्य्हान्दोदा दोष लबा मुला थैनोन गे एनीगदेसेनोन लबा मुला।* 2 चुहङ्बा गे लबा म्हिगदेदा परमेश्वरसे ठीक निसाफ लला भिबा ताम य्हाडदा था मुला। 3 एनीगदेसे चुहङ्बा आज्यबा गे लबा म्हिगदेदा दोष लमुला। तर हाडएनोन थेहङ्बान आज्यबा गे लसी भ्रमुला। तिग परमेश्वरसे निसाफ लबा धुइरी एनीगदे चा स्योमर्याङ्ला भिसी म्हन्बा? 4 परमेश्वरसे एनीगदेदा गाते माया लमुला, ओच्छे हाडदेन छ्याम थान्बारी गाते सेम लमुला भिबा ताम एनीगदेसे पक्कान म्हन्बा आरे। परमेश्वरसे एनीगदे हाड हाडला पाप ख्लासी हाडपट्टि दोःगै भिसी भ्रान्बा मुला। थेतबासेलमा एनीगदेदा गाते ज्यना लमुला भिबा ताम एनीगदेदा था आरे?

* 1:21 एफि ४:१७-१८ * 1:23 व्यव ४:१६-१८ * 2:1 मत्ती ७:१; लूका ६:३७

5 तर एनीगदेला कोड्बा सेमदेन परमेश्वरपट्टि दोःबारी आमहाडबासे लमा परमेश्वरसे ठीक लसी निसाफ लबा धुइरी एनीगदेसे लहानान सजाय याड्ला। 6 तिग्दा भिसम परमेश्वरसे जम्मान म्हिदा थेनीगदेसे लबा गे अन्छार इनाम पिन्ना।* 7 सेम नासी ज्यबा गे लबान परमेश्वरला घेन य्हालदेन मान ओच्छे जुकजुकधोनाला जुनी याड्बारी म्हाडबा म्हिगदेदा चा परमेश्वरसे जुकजुकधोनाला जुनी पिन्ना। 8 तर स्य्हान्दो म्हिगदेसे हाडला जे ग्याम च्यासी सत्य ताम अन्छार आभ्रमुला, ओच्छे पाप गे जे लसी भ्रमुला। थेहड्बा म्हिगदेदा परमेश्वरसे सजाय पिन्ना। 9 आज्यबा गे लबा जम्मान म्हिगदेशोरी आपत विपतदेन दुख खला। चुहड्बा दुख डाच्छा यहूदीगदेशोरी खला, थेहड् लसीन अर्गु यहूलला म्हिगदेशोरीनोन खला। 10 तर ज्यबा गे लबा म्हिगदेदा परमेश्वरसे ज्यबा भिसी मानदेन शान्ति पिन्ना। चु जम्मान ताम परमेश्वरसे डाच्छा यहूदीगदेदा पिन्ना, थेहड् लसीन अर्गु यहूलला म्हिगदेदाएनोन पिन्ना। 11 तिग्दा भिसम परमेश्वरसे खालैलान ली च्यासी निसाफ आल।*

12 परमेश्वरसे मोशादा पिन्बा ठिम था आयाड्ना पाप गे लबा अर्गु यहूलला म्हिगदेएनोन नाश तला, ओच्छे थे ठिम था याड्सीनोन पाप गे लबा यहूदीगदेदाएनोन थे ठिमग्यामसेन निसाफ लला। 13 तिग्दा भिसम मोशाला ठिम सेसी घोसी जे परमेश्वरदा सेम निबा म्हि दोबारी आखम। तर ठिम अन्छार गे लबा म्हि चा परमेश्वरदा सेम निबा म्हि दोला। 14 अर्गु यहूलला म्हिगदेदेन छ्याम परमेश्वरसे मोशादा पिन्बा ठिम आरे। तसैनोन थेनीगदे न्हडला कोइ कोइसे हाडला बानीबेहोरग्याम लबा गेगदे ठिमदेन छ्याम ढिक्बासे लमा थेनीगदे हाडनोन ठिम तेबान हिन्ना। 15 थेनीगदेसे लबा गे ठिमदेन छ्याम ढिक्बासे लमा थेनीगदेला सेमरीन ठिम मुला भिसी उन्मुला। थेतबासेलमा थेनीगदेला सेमसे खाइमाम दोष उन्मुला, खाइमाम भड पिन्मुला। 16 चु ताम परमेश्वरसे येशू ख्रीष्टग्याम महिला सेमला ताम निसाफ लबा धुइरी तला। थे ताम डाइ एनीगदेदा थाबा पिन्बा समाचार थेःना लबा धुइरी पाड्सी जिन्बा मुला।

ठिम अन्छार भ्रबा जे यहूदी हिन्ना

17 तर एनीगदे यहूदी हिन्ना भिसी परमेश्वरसे मोशादा पिन्बा ठिमला भररी भ्रमुला, ओच्छे डनी परमेश्वरसे धम्बा म्हि हिन्ना भिसी घमण्डएनोन लमुला भिसम, 18 एनीगदेदा परमेश्वरला सेमला तामएनोन था मुला, ओच्छे तिग ज्यबा हिन्ना भिबा ताम था मुला, तिग्दा भिसम एनीगदेसे ठिमग्याम लोप्बा मुला। 19 थेहड् लसीन एनीगदे हाडसे हाडदान काना म्हिगदेला नेतादेन धोपधोपरी भ्रबा म्हिगदेला लागिरी य्हाल हिन्ना भिसी भ्रमुला। 20 ओच्छे मूर्ख म्हिगदेदा ज्यबा ग्याम उन्बादेन आसेबा आघोबा म्हिगदेदा लोप्मुला भिसी म्हन्मुला। तिग्दा भिसम एनीगदे ठिमग्यामसे जम्मान सत्य तामदेन बुद्धि याड्बा मुला भिसी भ्रमुला। 21 चुहड् लसी स्य्हान्दोदा लोप्बा ताम अन्छार एनीगदे चा तिग्दा आभ्रबा? ओच्छे स्य्हान्दोदा चा यहो लबारी आत भिसी पाड्सी भ्रबा, एनीगदे चा तिग्दा यहो लसी भ्रबा? 22 एनीगदेसे स्य्हान्दोगदेदा चा ब्रेल्सी भ्रबारी आत भिसी लोप्सी एनीगदे हाडनोन चा तिग्दा ब्रेल्सी भ्रबा? ओच्छे मूर्तिदा तेन्बा ठीक आहिन भिसी स्य्हान्दोदा लोप्सी एनीगदे हाडनोन चा तिग्दा मन्दिरला धन सम्पत्ति यहो लबा? 23 डन्दा ठिम था मुला भिसी घमण्ड लबा म्हिसे तिग्दा ठिमरी मुबा ताम अन्छार आभ्रना परमेश्वरदा हेला लबा? 24 तिग्दा भिसम बचनरी “एनी यहूदीगदेसे लमान अर्गु यहूलला म्हिगदेसे परमेश्वरला बिरोधरी ताम लसी भ्रबा मुला” भिसी भ्रिबा मुला।*

25 ठिम अन्छार भ्रजी भिसम एसे लहुइरी लबा खतना ठीक हिन्ना। तर थे ठिम अन्छार आभ्रनी भिसम एसे लबा खतना आलबा तेबान हिन्ना। 26 चुदे खतना आलबा अर्गु यहूलला म्हिगदेसे थे ठिम अन्छार गे लजी भिसम परमेश्वरला डाच्छा थे खतना लबा म्हि हड्बान हिन्ना। 27 लहुइरी खतना आलसैनोन थे ठिम अन्छार भ्रबा अर्गु यहूलला म्हिगदेसे एनी खतना लबादेन भ्रिबा ठिम मुसीनोन थे अन्छार आभ्रबा यहूदीगदेला दोष उन्ना। 28 तिग्दा भिसम यहूदी तसी न्हजी भिदेमा पक्का यहूदी आदो। ओच्छे लहुइरी जे लबा खतनाएनोन पक्का खतना आत। 29 तर जुन म्हिसे सेमहेन्सेन परमेश्वरदा तेन्ना थे म्हि चा पक्का यहूदी हिन्ना। ओच्छे सेमरी परमेश्वरला आत्मासे लबा खतना

* 2:6 भजन ६२:१२; हितो २४:१२ * 2:11 व्यव १०:१७ * 2:24 यशै ५२:५

चा पक्का खतना हिन्ना। चु चा ठिमरी भिबा अन्छार आहिन। चुहड्बा म्हिसे म्हिगदेग्याम आहिन, परमेश्वरग्याम स्याबास याड्ला।*

3

1 थेहड् भिसम यहूदी तसी तिगै फाइदा आरे? ओच्छे खतना लसी तिगै याड्बा आरे? 2 जम्मान तामरी फाइदा मुला। तिग्दा भिसम परमेश्वरसे जम्मान भन्दा डाच्छा यहूदीगदेदा हाडला बचन जिम्मा पिन्बा मुबा। 3 चुदे थेनीगदे न्हडला कोइ कोइसे परमेश्वरला बचनथोरी विश्वास लबारी आखमनी भिदेमा तिग परमेश्वर विश्वास लबारी आखम्बा परमेश्वर हिन्ना? 4 अहँ, आहिन। म्हि फट्टा तसैनोन परमेश्वर चा सत्य मुला। बचनरीनोन चुहड् भिसी भिबा मुला,

“हाडसे सुड्बा तामग्यामसेन

हाड सत्य परमेश्वर हिन्ना भिसी

म्हिगदेसे था याड्ला,

ओच्छे निसाफ लबा धुइरी हाडसेन ढाला।”*

5 तर चुदे यहाडसे लबा आज्यबा गेग्याम परमेश्वर ज्यबा मुला भिसी पाड्मुला भिसम यहाडसे तिग पाड्से? परमेश्वरसे यहाडदा आज्यबा गेला सजाय पिन्मा तिग परमेश्वरसे अन्याय लबा तला? डाइ म्हिसे म्हन्बा अन्छार पाड्बा हिन्ना। 6 चु ताम हिन्नोन आहिन, चुदे परमेश्वरदेन छ्याम निसाफ लबा अधिकार आरेबा हिन्सम खाहड् लसी परमेश्वरसे जम्बुलिडला निसाफ लबारी खम्ला? 7 चुदे डाइ पाड्बा लुसीला तामग्याम परमेश्वरदा लहानान मान तला, ओच्छे परमेश्वर सत्य हिन्ना भिसी उन्ना भिसम तिग्दा परमेश्वरसे डादा झन पापी म्हिदा हड् लसी निसाफ लबा? 8 ज्यबा तबारी पाप गे लसै तला भिबा ताम खाइमै ज्यबा तला? तसैनोन कोइ कोइ म्हिगदेसे यहाडसे चुहड् पाड्जी भिसी खिसी लसी दोष लबा मुला। चुहड् लसी दोष लबा म्हिगदेदा चा ठीक सजाय पिन्ना।

पाप आलबा म्हि खालै आरे

9 दाहेन्से अर्गु यहूलला म्हिगदे भन्दा यहाड यहूदीगदे चा परमेश्वरला डाच्छा ज्यबा म्हि हिन्ना? आहिन। यहूदीदेन अर्गु यहूलला म्हिगदे जम्मान पापला तहरी मुला भिसी डाइ डाच्छान पाड्सी जिन्बा मुला। 10 बचनरीनोन चुहड् भिसी भिबा मुला

“परमेश्वरसे म्हन्बा अन्छार भ्रबा म्हि खालै आरे,

गिकनोन आरे।*

11 घोबा म्हि खालै आरे,

ओच्छे परमेश्वरदा म्हाइबा म्हिएनोन खालै आरे।

12 जम्मान म्हिसे परमेश्वरदा ख्लाबा मुला,

गे खेलबा म्हि गिकनोन आरे,

ओच्छे ज्यबा गे लबा म्हिएनोन गिकनोन आरे।

13 थेनीगदेला ओल्गोड आल्हुबा धुर्सा हड्बान मुला,

ओच्छे स्यहान्दोदा फसब लबारी थेनीगदेला लेसे लुसीला ताम जे लमुला।

थेनीगदेला सुडरी चा पुख्रीला हड्बान बिख मुला।*

14 थेनीगदेला सुडसे के:बादेन

आज्यबा ताम जे पाड्मुला।*

15 थेनीगदे म्हि साइबारी छ्यारबा तमुला।*

16 थेनीगदे भ्रबा ग्यामरी

दुखदेन नाश जे तमुला।

17 ओच्छे शान्तिला ग्यामदा

* 2:29 वयव ३०:६ * 3:4 भजन ५१:४ * 3:10 भजन १४:१-३; ५३:१-३ * 3:13 भजन ५:९; १४०:३ * 3:14 भजन १०:७ * 3:15 यशै ५९:७-८

थेनीगदेसे डोसेबान आरे।
 18 थेनीगदे परमेश्वर म्राड्सी
 आलोड्मुला।”*

19 परमेश्वरसे मोशादा पिन्बा ठिमरी भिबा ताम थे ठिमला तहरी चिबा म्हिगदेदा पाड्बा ताम हिन्ना भिसी य्हाड्दा था मुला। थेतबासेलमा जम्बुलिडला जम्मान म्हिगदे परमेश्वरला डाच्छा राप्तोःला। थे धुडरी खालैसेन तिगै पाड्बारी आखम। 20 तिग्दा भिसम थे ठिम अन्छार गे लसी खालैनोन परमेश्वरदा सेम निबा म्हि दोबारी आखम। ठिमसे चा म्हिसे लबा पाप उन्सी पिन्बा जे हिन्ना।*

विश्वासग्यामसे जे परमेश्वरदा सेम निबा म्हि दोला

21 तर दान्दे परमेश्वरसे म्हिदा खाहड् लसी हाड्दा सेम निबा म्हि स्होमुला भिबा ताम य्हाड्से म्राड्बा मुला। चु ताम ठिमदेन अगमवक्तागदेसेनोन पाड्बा मुला। तर चु चा ठिम अन्छार गे लसी आहिन। 22 चुहड् लसीन येशू ख्रीष्टदा विश्वास लबा जम्मान म्हिगदे विश्वासग्यामनोन परमेश्वरदा सेम निबा म्हि दोबा मुला। तिग्दा भिसम परमेश्वरला डाच्छा जम्मान म्हि गिकनोन हिन्ना।* 23 तिग्दा भिसम जम्मान म्हिगदेसे पाप लबा मुला, ओच्छे परमेश्वरला घेन य्हालग्याम थारेड तबा मुला। 24 तर परमेश्वर चा दया लबा परमेश्वर हिन्ना, थेसे दयामाया लसी म्हिगदेदा तिगै आकिनना ओहड्दोन हाड्दा सेम निबा म्हि स्होबा मुला। तिग्दा भिसम ख्रीष्ट येशूसे जम्मान महिला लागिरी हाड्सेन सजाय नासी म्हिगदेदा पापला सजायग्याम फेबा मुला। 25 परमेश्वरसे ख्रीष्टदा य्हाड्दला लागिरी बलि तबारी पुड्खजी। ओच्छे ख्रीष्टसे बगब लबा का य्हाड्दला लागिरी हिन्ना भिबा तामरी विश्वास लबा महिला पापला दोष मेटब लबा मुला। चुहड् लसी परमेश्वरसे हाड्से लबा निसाफ ठीक हिन्ना भिसी उन्बा मुला। तिग्दा भिसम ख्रीष्ट फेपूखबा भन्दा डाच्छा परमेश्वरसे नासी म्हिगदेला पापगदेदा तिगै वास्ता आलनी। 26 दान्देनोन हाड् ठीक मुला भिसी उन्बाला लागिरी परमेश्वरसे चुहड् लजी। परमेश्वरसे हाड् ठीक निसाफ लबादेन येशूथोरी विश्वास लबा म्हिगदेग्याम स्य्हान्दो म्हिगदेदाएनोन हाड्दा सेम निबा म्हि स्होबारी खम्बा परमेश्वर हिन्ना भिसी उन्बाला लागिरी थेहड् लबा हिन्ना।

27 थेहड् भिसम य्हाड्से तिग तामला लागिरी घमण्ड लसे? घमण्ड लतोःबा तामनोन आरे। तिग्दा भिसम चु गे खजिबै ठिम अन्छार भ्रसी तबा आहिन। तर विश्वास लबासे लमान तबा हिन्ना। 28 थेतबासेलमा ठिम अन्छार गे लसी आहिन। तर विश्वास लसी जे परमेश्वरदा सेम निबा म्हि दोबारी खम्ला भिबा ताम य्हाड्दा था मुला। 29 तिग परमेश्वर य्हूदीगदेला जे परमेश्वर हिन्ना? तिग अर्गु य्हुलला म्हिगदेला चा परमेश्वर आहिन? थे अर्गु य्हुलला म्हिगदेलाएनोन परमेश्वर हिन्ना। 30 जम्मालान परमेश्वर गिकनोन हिन्ना। खतना लबा म्हि मुसै, खतना आलबा म्हि मुसै,† जम्मादान परमेश्वरसे थेनीगदेसे लबा विश्वासग्यामसेन परमेश्वरदा सेम निबा म्हि स्होबा हिन्ना।* 31 चुदे य्हाड्से विश्वासग्याम परमेश्वरदा सेम निबा म्हि दोखम्ला भिसी पाड्मा तिग परमेश्वरला ठिमदा चा नाश लबा हिन्ना? पक्कान आहिन, बरु य्हाड्से थे ठिमदा पूरा लबा मुला।

4

अब्राहामला विश्वास

1 दाहेन्से डन्ना म्हेमे अब्राहामसे तिग लोपजी भिबा ताम खाहड् लसी पाड्से? 2 चुदे अब्राहाम थेसे लबा गेग्याम परमेश्वरदा सेम निबा म्हि दोबा हिन्सम घमण्ड लम्याड्सेला मुबा। तर परमेश्वरला डाच्छा चा आहिन। 3 तिग्दा भिसम परमेश्वरला बचनरी चुहड् लसी भिबा मुला, “अब्राहामसे परमेश्वरदा विश्वास लजी। थेतबासेलमा परमेश्वरसे अब्राहामदा हाड्दा सेम निबा म्हि हिन्ना भिसी सुड्जी।”* 4 च्यागो, खालै म्हिसे गे लसी याड्बा ज्याला चा दान आहिन, तर थे थेसे याड्तोःबा ज्याला

* 3:18 भजन ३६:१ * 3:20 भजन १४३:२; गला २:१६ * 3:22 गला २:१६ † 3:30 “खतना लबा म्हि” ओच्छे “खतना आलबा म्हि” भिबा चा य्हूदी ओच्छे अर्गु य्हुलला म्हिगदे हिन्ना। * 3:30 ब्यव ६:४; गला ३:२० * 4:3 उत्प १५:६; गला ३:६

हिन्ना।⁵ जुन म्हिसे गेथोरी भर आलना पाप माफ लसी परमेश्वरदा सेम निबा म्हि सहोबा परमेश्वरदा विश्वास लला, थेहड्बा म्हिदा विश्वासग्यामसेन परमेश्वरसे हाडदा सेम निबा म्हि हिन्ना भिसी सुड्ला।⁶ गेग्याम आहिन, तर विश्वासग्याम परमेश्वरदा सेम निबा म्हि दोबा म्हिगदेदा दाऊद ग्लेसे परमेश्वरला बचनरी चुहड् भिसी पाड्बा मुला।

7 “थेनीगदेसे परमेश्वरग्याम गाते मोलम याड्ला,

थेनीगदेसे आज्यबा गे लसैनोन परमेश्वरसे थेनीगदेदा माफ लबा मुला। ओच्छे थेनीगदेला पापला दोषएनोन मेटब लसी पिन्बा मुला।

8 थेनीगदेसे परमेश्वरग्याम गाते मोलम याड्ला,

थेनीगदेसे लबा पापला दोष परमेश्वरसे मेटब लसी जिन्बा मुला।”*

9 दाऊदसे पाड्बा चु मोलम खतना लबा यहूदीगदेला लागिरी जे हिन्ना? आहिन। तर खतना आलबा अर्गु यहूलला म्हिगदेला लागिरीनोन हिन्ना। तिग्दा भिसम अब्राहामसे परमेश्वरदा विश्वास लबासे लमा परमेश्वरसे थेदा हाडदा सेम निबा म्हि हिन्ना भिसी सुड्जी भिबा ताम यहडसे पाड्मुला।

10 अब्राहामदा परमेश्वरसे खाडमा तिगै दोष आरेबा म्हि हिन्ना भिसी सुड्जी? थेसे ठिम अनछार खतना लबा भन्दा डाच्छा कि लिच्छा? तर खतना लबा भन्दा डाच्छान सुड्बा हिन्ना।¹¹ लिच्छा अब्राहामला खतना लजी, ओच्छे चु चा थेसे लबा विश्वाससे लमा खतना तबा भन्दा डाच्छान परमेश्वरसे थेदा हाडदा सेम निबा म्हि भिसी सुड्बाला चिनु हिन्ना। ओच्छे खतना आलसैनोन विश्वासग्याम परमेश्वरसे हाडदा सेम निबा म्हि भिसी सुड्बा जम्मान म्हिगदेला थे आबा दोगै भिसी चुहड् तबा हिन्ना।*¹² थेहड् लसी यहूदीगदे खतना लबासे लमा आहिन, तर थेनीगदेसेनोन अब्राहामसे हड् लसीन खतना लबा भन्दा डाच्छा विश्वास लसी भ्रबासे लमान अब्राहाम थेनीगदेलाएनोन आबा दोजी।

विश्वासग्यामसे जे कबुल लबा सहे याड्ला

13 अब्राहामदेन थेला सन्तानगदेदा जम्बुलिडला हक पिन्ना भिसी लबा कबुल चा थेसे ठिम अनछार गे लबासे लमा आहिन। तर थेसे लबा विश्वासग्याम परमेश्वरदा सेम निबा म्हि दोबासे लमा हिन्ना।*¹⁴ चुदे ठिम अनछार भ्रबा म्हिगदेसे थे हक याड्बा हिन्सम म्हिगदेसे लबा विश्वास गे आखेल्बा तसेला मुबा। ओच्छे परमेश्वरसे पिन्ना भिसी लबा कबुलएनोन गे आखेल्बा तसेला मुबा।*¹⁵ तिग्दा भिसम ठिम अनछार आभ्रमा परमेश्वरसे म्हिगदेदा सजाय पिन्ना। तर ठिमनोन आरेमाहेन्से थेरी आज्यबा गेनोन आत।

16 परमेश्वरसे लबा दयामायाथोरी भर लगै भिसी थेसे लबा कबुल विश्वासग्यामसे जे याड्ला। चुनोन दयामायाग्यामसे अब्राहामला जम्मान सन्तानसे परमेश्वरसे लबा कबुल याड्ला भिसी पक्का लबा मुला। चु कबुल ठिम मुबागदेला लागिरी जे आहिन, तर अब्राहामसे हड्बान विश्वास लबा म्हिगदेला लागिरीनोन हिन्ना। तिग्दा भिसम अब्राहाम यहड जम्मालान आबा हिन्ना।*¹⁷ परमेश्वरसे अब्राहामदा सुड्बा ताम बचनरी चुहड् लसी भ्रिबा मुला, “डाइ एदा जम्मान यहूलला म्हिगदेला आबा सहोबा मुला।” तिग्दा भिसम परमेश्वरला डाच्छा अब्राहाम यहड जम्मालान आबा हिन्ना। सिबागदेदा सोना लबादेन आरेबा सहेदा बचनग्यामसेन सहोबा परमेश्वरदा अब्राहामसे विश्वास लजी।*

18 कोला तला भिसी आशनोन आरेबा धुइरी परमेश्वरसे “एला कोलागदे मुला सार हड्नोन झ्यासीन झ्याआखम्बाधोना तला” भिसी सुड्बा तामरी आश लसी विश्वास लजी। चुहड् लसी थे ल्हानान यहूलला म्हिगदेला आबा दोजी।*¹⁹ अब्राहाम ओस्पन ग्यार्जा गिक दिड तसी जिन्बा मुबा। हाड खेपुबा दोसी सिड लबा धुइ तजी भिबा तामदेन हाडला मिड साराग्याम कोला आत भिबा ताम था याड्सीनोन थेला विश्वास कमजोर आतनी।*²⁰ परमेश्वरसे पिन्ना भिसी कबुल लबा तामरी थेसे तिगै शङ्का आलना विश्वासरी झन कोड्सी चिजी, ओच्छे चुनोन विश्वासग्याम थेसे परमेश्वरदा मानदेन

* 4:8 भजन ३२:१-२ * 4:11 उत्प १७:१० * 4:13 उत्प १७:४-६; २२:१७-१८; गला ३:२९ * 4:14 गला ३:१८ * 4:16 गला ३:७ * 4:17 उत्प १७:५ * 4:18 उत्प १५:५ * 4:19 उत्प १७:१७

जयजयकार लजी। ²¹ परमेश्वरसे लबा कबुल पूरा लखम्ला भिबा ताम अब्राहामदा पक्का था मुबा। ²² चुहड्बा विश्वाससे लमान परमेश्वरसे अब्राहामदा “हाडदा सेम निबा म्हि हिन्ना” भिसी सुड्जी। ²³ “परमेश्वरदा सेम निबा म्हि हिन्ना” भिसी सुड्बा ताम चा अब्राहामला लागिरी जे भिबा आहिन, ²⁴ तर य्हाडला लागिरीनोन भिबा हिन्ना। य्हाड न्हडला जुन म्हिसे य्हाडला प्रभु येशूदा सिबाग्याम सोना लबा परमेश्वरदा विश्वास लला, थेनीगदेदाएनोन परमेश्वरसे हाडदा सेम निबा म्हि हिन्ना भिसी सुड्ला। ²⁵ य्हाडला पापला दोष मेटब लबाला लागिरी येशूदा साइजी, ओच्छे य्हाडदा परमेश्वरदा सेम निबा म्हि हिन्ना भिसी म्हनबाला लागिरी थेदा सिबाग्याम सोना लजी।*

5

विश्वासग्याम याड्बा शान्ति

¹ थेतबासेलमा य्हाडला विश्वासग्यामसेन य्हाडदा परमेश्वरदा सेम निबा म्हि दोना लबा मुला। ओच्छे य्हाडला प्रभु येशू ख्रीष्टग्यामसेन य्हाड परमेश्वरदेन छ्याम ढिक्बा मुला। ² ख्रीष्टसे य्हाडला विश्वासग्याम य्हाडदा परमेश्वरला दयामायारी भबा मुला। ओच्छे दान्दे य्हाड थेनोन दयामायारी भबा मुला। य्हाडदा परमेश्वरसे थेला हड्बान य्हालदेन शक्ति पिन्ना भिसी घेन आश थोसी य्हाड ताड्बा मुला। ³ चुदे जे आहिन, दुखरीनोन य्हाड ताड्बा मुला। तिग्दा भिसम य्हाडसे दुख नाजी भिसम अझन य्हाड विश्वासरी पाको म्हि दोला। ⁴ दुख नाखम्बा शक्तिसे य्हाडदा पाको म्हि सहोला। य्हाड पाको म्हि तमाहेन्से य्हाडदा आश खमुला। ⁵ य्हाडसे लबा चु आशसे य्हाडदा दुख इहम्ना आल। तिग्दा भिसम य्हाडदा परमेश्वरसे हाडला आत्मा पिन्बा मुला, ओच्छे थेनोन आत्मासे य्हाडला सेमरी परमेश्वरला माया थान्सी पिन्बा मुला।

⁶ य्हाडसे थाबा याड्बाला लागिरी तिगैनोन लबारी आखम्बा धुइरी ख्रीष्ट य्हाड पापीगदेला लागिरी परमेश्वरसे तोगब लबा धुइरी सिजी। ⁷ धर्म तेन्बा महिला लागिरी खालै म्हि चुहड् लसी आसि। तर ज्यबा गे लबा महिला लागिरी खालै म्हिसे सिबारी म्हाइला तला। ⁸ तर य्हाड पापी तसैनोन ख्रीष्ट य्हाडला लागिरी सिसी य्हाडदा परमेश्वरसे हाडला माया उन्जी।

⁹ दाहेन्से ख्रीष्ट सिसी हाडलान काग्याम य्हाडदा परमेश्वरदा सेम निबा म्हि दोना लजी। चुदे जे आहिन, परमेश्वरग्याम य्हाडसे नातोःबा सजायग्यामसेनोन य्हाडदा जोगब लला। ¹⁰ य्हाड परमेश्वरला शत्रु मुबा धुइरीन थेला झा ख्रीष्ट सिसी य्हाडदा परमेश्वरदेन छ्याम ढिक्ना लजी। य्हाडदा परमेश्वरदेन छ्याम ढिक्ना लबा जे आहिन, तर दाहेन्से झन प्रभु येशू ख्रीष्टला ल्हुइग्यामसे य्हाडदा थान्नाएनोन लला। ¹¹ चुदे जे आहिन, तर दाहेन्से प्रभु येशू ख्रीष्टसे य्हाडदा परमेश्वरदेन छ्याम ढिक्ना लसी हाडला हो सहोबासे लमा य्हाड परमेश्वरदेन छ्याम गिक तसी ताड्बा मुला।

आदमदेन ख्रीष्ट

¹² जम्मान भन्दा डाच्छा आदम भिबा म्हि गिकग्याम जम्बुलिडरी पाप खजी, ओच्छे पापग्याम काल खजी। चुहड् लसीन जम्मान म्हिगदेसे पाप लबासे लमा जम्मानथोरी काल खजी।* ¹³ परमेश्वरसे मोशादा ठिम पिन्बा भन्दा डाच्छाहेन्सेन जम्बुलिडरी पाप मुबा। तर ठिम आरेबासे लमा पापला हिसाब आरेमुबा। ¹⁴ तसैनोन आदमला धुइहेन्से मोशा भिबा महिला धुइधोनाला जम्मान म्हिगदेदा कालसे शासन लजी। थे म्हिगदेसे लबा पाप आदमसे लबा पाप हड्बा आतसै थेनीगदे सितोःजी। आदमसे लबा गेग्याम जम्मान म्हि सिजी, ओच्छे ख्रीष्टसे लबा गेग्याम चा जम्मान म्हि सोजी।

चुहड् लसी च्यामा, आदम लिच्छा फेपखबा ख्रीष्ट हड्बान मुबा। ¹⁵ तर पापला सय फाबारी परमेश्वरसे य्हाडदा पिन्बा मोलमदेन आदमसे लबा पाप ल्हानान फरक मुला। तिग्दा भिसम म्हि गिकसे लबा पापग्याम ल्हानान म्हिगदे सिजी। तर लिच्छा फेपखबा येशू ख्रीष्टसे चा परमेश्वरला ल्हानान घेन दयामायाग्याम म्हिसे फातोःबा पापला सय फासी ल्हानान म्हिगदेदा सोना लजी।

* 4:25 यशै ५३:४-५ * 5:12 उत्प ३:६

16 थेहड् लसीन परमेश्वरसे ओहड्‌नोन पिन्बा मोलम चा म्हि गिकसे लबा पाप भन्दा फरक मुला। म्हि गिकसे पाप लबासे लमा जम्मान म्हिगदेदा दोषी भिसी पाङ्जी, ओच्छे सजाय नातो:जी। तर ल्हानान पाप लमाहेन्से लिच्छा फेपखबा ओहड्‌नोन याड्‌बा मोलमग्याम परमेश्वरसे म्हिगदेला पापला दोष मेटब लसी हाडदा सेम निबा म्हि भिसी सुङ्जी। 17 म्हि गिकसे पाप लबासे लमा जम्मान म्हिगदेशोरी कालसे शासन लजी। तर परमेश्वरसे ल्हानान दयामाया लसी म्हि गिक येशू ख्रीष्टग्याम ओहड्‌नोन पिन्बा मोलमग्याम यहाडदा परमेश्वरदा सेम निबा म्हि हिन्ना भिसी सुङ्जी। थे मोलम याड्‌बा म्हिगदे येशू ख्रीष्टग्याम सोला ओच्छे शासन लला।

18 थेतबासेलमा म्हि गिकसे लबा पापग्यामसे जम्मान म्हिगदेसे सजाय नातो:जी, थेहड् लसीन म्हि गिकसे लबा ज्यबा गेग्यामसेन जम्मान म्हिगदे परमेश्वरदा सेम निबा म्हि दोसी जुकजुकधोनाला जुनी याड्‌बारी खम्ला। 19 म्हि गिकसे परमेश्वरसे कुल्बा ताम आड्यान्बासे लमा ल्हानान म्हिगदे पापी दोजी। थेहड् लसीन म्हि गिकसे परमेश्वरसे कुल्बा ताम ड्यान्बासे लमा ल्हानान म्हि परमेश्वरदा सेम निबा म्हि दोजी। 20 जम्मान म्हिगदेसे गाते पाप लबा चीम भिसी था याङ्गै भिसी परमेश्वरसे ठिम पिन्जी। तर जति पाप बढब तबान निजी परमेश्वरसे झन ल्हानान दयामाया लजी। 21 थे धुड्‌री पापसे कालग्याम म्हिगदेदा शासन लबा हड् लसी दान्दे परमेश्वरला दयामायासे शासन लबान मुला। थे दयामायासे यहाडदा परमेश्वरदा सेम निबा म्हि सहोसी यहाडला प्रभु येशू ख्रीष्टग्याम जुकजुकधोनाला जुनी पिन्बान मुला।

6

पापग्याम सिला ख्रीष्टग्याम सोला

1 दाहेन्से यहाडसे तिग पाङ्से? तिग परमेश्वरग्याम ल्हानान दयामाया याङ्गै भिसी अझ यहाड पापनोन लसी चिसे? 2 आहिन, खाइमै चुहड् लबारी आत। चुदे यहाड पापला शक्तिग्याम फेसी जिन्जी भिसम तिग्दा यहाड दो:सी पापला तहरी चिबा सेम लबा? 3 यहाड ख्रीष्ट येशूदेन छ्याम गिक तबारी बपतिस्मा किन्जी। यहाडसे किन्बा बपतिस्मा चा ख्रीष्टदेन छ्याम गिक तसी सिबाला चिनु हिन्ना भिबा ताम एनीगदेदा थानोन मुला। 4 थेतबासेलमा यहाडएनोन ख्रीष्टदेन छ्यामनोन बपतिस्माग्याम सिसी लहुजी। ओच्छे यहाड छार बानीबेहोर थोसी भ्रबाला लागिरी शक्तिशाली परमेश्वर आबासे हाडला शक्तिग्याम येशू ख्रीष्टदा सिबाग्याम सोना लजी।*

5 चुदे यहाड ख्रीष्टदेन छ्याम गिक तसी सिजी भिसम यहाडएनोन थे हड् लसीन सिबाग्याम सोला। 6 यहाडला पापसे प्लिड्‌बा लहुड नाश तगै भिसी डाच्छाला बानीबेहोरदा ख्रीष्टदेन छ्यामनोन क्रुसरी साइबा मुला। चुहड् लबा चा दाहेन्से यहाड पापला तहरी चिआतो:गै भिसी हिन्ना भिबा ताम यहाडदा थानोन मुला। 7 तिग्दा भिसम जुन म्हि सिबा मुला थे म्हि थेला पापला सजायग्याम पूरान फेसी जिन्बा मुला।

8 ख्रीष्टदेन छ्याम सिजी भिसम ख्रीष्टदेन छ्यामनोन सोला भिसी यहाडसे विश्वास लबा मुला। 9 तिग्दा भिसम यहाडदा थानोन मुला, ख्रीष्ट सिसीनोन सोसी जिन्बा मुला। दाहेन्से थे खाइमै आसि, ओच्छे थेदा कालला शक्तिसेनोन तिगै लबारी आखम। 10 पूरान पापला दोष मेटब लबाला लागिरी ख्रीष्ट तिरेम सिसी जिन्बासे लमा पापला सय फासी जिन्जी। ओच्छे परमेश्वरला लागिरीन थे सदनना लागिरी सोबा मुला। 11 थेहड् लसीन एनीगदेसेनोन हाड हाडला पापला शक्तिला लागिरी सिजी भिसी म्हन्तो:मुला। तर ख्रीष्ट येशूग्याम परमेश्वरला लागिरी सोबा मुला भिसी म्हन्तो:मुला।

12 थेतबासेलमा एनीगदेला पापी सेमसे जुन लड् म्हन्बा थे अनछार लआतो:गै भिसी एनीगदेसे हाडला सिसी निबा लहुडरी पापदा शासन लबारी थापिन्गो। 13 ओच्छे आज्यबा गे लबारी हाडला या काड पापदा जिम्मा थापिन्गो। तर सिबाग्याम सोबा म्हिगदेसे हड् लसी हाडला पूरान लहुड परमेश्वरदा पिन्गो, ओच्छे परमेश्वरदा सेम निबा गे लबाला लागिरी हाडला या काड परमेश्वरदान

* 6:4 कल २:१२

जिम्मा लसी पिन्गो। 14 तिग्दा भिसम पाप एनीगदेथोरी शासन लबा एनीगदेला मालिक आहिन, दाहेन्से एनीगदे ठिमला तहरी आरे, तर परमेश्वरला दयामायाला तहरी मुला।

परमेश्वरदा सेम निबा गे लबा म्हि

15 य्हाड ठिमला तहरी आरे, तर परमेश्वरला दयामायाला तहरी मुला भिदेमा तिग य्हाड पापनोन लसी चिसे? आहिन, चुहड् खाडमै लबारी आत। 16 जुन्ना ताम ड्यान्सी गे लबा सेम लला एनीगदे थेलान नोकर दोला। चुदे पापला नोकर दोसी थेसे कुल्बा अनछार भ्रजी भिसम ए सिला, तर परमेश्वरसे कुल्बा अनछार भ्रजी भिसम ए थेदा सेम निबा म्हि दोला। 17 डाचछा एनीगदे पापला नोकर दोबा मुबा। तर दान्दे एनीगदेसे सेमहेन्सेन परमेश्वरला बारेरी लोपबा ताम अनछार भ्रबा मुला। चुला लागिरी परमेश्वरदा धन्यवाद तगै। 18 एनीगदे पापग्याम फेबा मुला, ओच्छे परमेश्वरसे म्हन्बा अनछार भ्रबा म्हि दोबा मुला।

19 घोबारी आखम्बा एनीगदेला बानीबेहोरसे लमा डाइ एनीगदेसे घोबारी खम्बा ग्योइरी पाड्बान मुला। तिरेम आज्यबा सेम थोसी पापथोरी पाप लबाला लागिरी एनीगदेसे हाडला ल्हुड पापदा जिम्मा पिन्बा मुबा। दाहेन्से परमेश्वरसे म्हन्बा अनछार भ्रबा म्हि दोबारी एनीगदेसे हाडला ल्हुड परमेश्वरदा जिम्मा पिन्गो। 20 पापला नोकर दोबा धुइरी एनीगदे परमेश्वरसे म्हन्बा अनछार भ्रआतो:मुबा। 21 थे धुइरी लबा गेगदे ढन्सी एनीगदे दान्दे पे:मुला, थेहड्बा गेग्याम एनीगदेसे तिग याड्जी? थे जम्मान आज्यबा गेसे चा म्हिदा सिना लमुला। 22 दाहेन्से एनीगदेसे पापग्याम थार्बा याड्बा मुला, ओच्छे परमेश्वरदा तेन्सी तिगै दोष आरेबा म्हि दोबा मुला। चुग्याम एनीगदेसे जुकजुकधोनाला जुनी याड्ला। 23 तिग्दा भिसम पापसे पिन्बा ज्याला चा काल हिनना, तर परमेश्वरसे ओहड्दोनोन पिन्बा मोलम चा य्हाडला प्रभु येशू ख्रीष्टग्याम याड्बा जुकजुकधोनाला जुनी हिनना।

7

ठिमग्याम फेबा

1 ज्योज्यो आले नाना आडागदे, चु ताम डाइ ठिम सेबा घोबा म्हिगदेदा पाड्बान मुला। म्हि सोतेधोना जे ठिमला तहरी तमुला भिबा ताम एनीगदेदाएनोन थानोन मुला। 2 सोतेधोना ब्याह लबा बारेला ठिमला तहरी चिबा चा, ब्याह लबा मिडमहेमे हाडला हेम्बो सोतेधोना हेम्बोला तहरी चिबा हड्बा हिनना। तर चुदे थेला हेम्बो सिजी भिसम थे हेम्बोला तहरी आचि। 3 चुदे हाडला हेम्बो मुना मुनान थेसे स्य्हान्दो हेम्फेबेदेन छ्याम ब्याह लजी भिसम ब्रेल्सी भ्रबा हिनना। तर थेला हेम्बो सिजी भिसम थे, थे ठिमग्याम फेबा मुला, ओच्छे स्य्हान्दो हेम्फेबेदेन छ्याम ब्याह लसैनोन ब्रेल्सी भ्रबा आहिन।

4 थेहड् लसीन डाला ज्योज्यो आले नाना आडागदे, एनीगदेएनोन ख्रीष्टला ल्हुडग्याम ठिमला लागिरी सिनी जिन्बा मुला। थेतबासेलमा परमेश्वरला लागिरी ज्यबा गे लबारी खम्गै भिसी य्हाड सिबाग्याम सोबा ख्रीष्टदेन छ्याम गिक तबा मुला। 5 य्हाड डाचछा पापी बानीबेहोर अनछार भ्रमुबा। थे धुइरी ठिमसे य्हाडला पापी सेमदा थीसी य्हाडदा ल्हानान पाप गेगदे लपुड्जी। थेनोन गेसे य्हाडथोरी काल भजी। 6 थेहड्बा ठिमला लागिरी य्हाड सिनी जिन्जी। चु भिबा चा य्हाड थे ठिमग्याम फेसी जिन्बा मुला भिबा हिनना। थेतबासेलमा दाहेन्से य्हाड डाचछा भ्रिबा ठिमला तहरी चिसी आहिन, तर परमेश्वरला आत्मासे पिन्बा छार जुनीग्याम तेन्बा मुला।

ठिमदेन पाप

7 थेहड् भिसम तिग य्हाडसे ठिमनोन पाप हिनना भिसी पाड्बारी तला? पक्कान आत। तर चुदे ठिम आरेबा हिनसम पाप भिबा डादा थानोन आतसेला मुबा। तिग्दा भिसम “एसे लोभ थालउ” भिसी ठिमसे आपाड्बा हिनसम लोभ लबा चा पाप हिनना भिसी डाइ था आयाड्सेला मुबा।* 8 तर पापसे ठिमरी कुल्बा तामग्याम मौका किन्सी डाला सेमरी ल्हानान थरीला लोभ खना लजी। तिग्दा भिसम ठिम आरेसम पाप खाडमै आरेबा तेबान हिनना। 9 डाचछा ठिम था आरेबा धुइरी डा सोबा मुबा। तर ठिम

* 7:7 प्रस्था २०:१७; वयव ५:२१

था याड्माहेन्से डा पापग्याम सिबा तेबान तजी ओच्छे पाप चा सोजी। 10 ओच्छे जुनी पिन्ना भिसी कबुल लबा थे ठिमसे मी डादा सिना लजी। 11 तिग्दा भिसम पापसे थे ठिमसे कुल्बा तामग्यामसेन मौका किन्सी डादा छल लसी साइबा हड्बान हिन्ना।* 12 तसेनोन ठिमदेन ठिमसे कुल्बा ताम चा तिगै दोष आरेबादेन ठीक ओच्छे ज्यबा मुला।

13 ज्यबा मुला भिबा ठिमसेन डादा साइबा हिन्ना? पक्कान आहिन। ठिमरी मुबा ज्यबा तामग्याम डादा साइबा पापनोन हिन्ना। थेतबासेलमा ठिम अन्छार पाप गाते लोड्बा खबा मुला भिबा ताम य्हाड्दा था मुला।

ख्रीष्ट आरेसम य्हाड् पापदेन छ्याम भ्रेःला

14 ठिम स्वर्गग्याम खबा ज्यबा ताम हिन्ना भिबा य्हाड्दा था मुला। तर डाएनोन पापला तहरी चिबा जम्बुलिडला म्हि हिन्ना। 15 डाइ तिग लबान मुला थे डादान था आरे। तिग्दा भिसम जुन गे डाइ लबारी म्हाइला थे आलमुला। तर जुन गे डादा सेम आनिमुला थेनोन गे डाइ लमुला।* 16 चुहड् लसीन लबारी आम्हाइबा गे डाइ लमुला भिसम ठिम ज्यबा मुला भिबा तामरी डादा विश्वास मुला। 17 थेतबासेलमा डाइ लबा आज्यबा गे डा हाडसेन लबा आहिन। तर डा न्हडरी चिबा पापसे लबा हिन्ना। 18 तिग्दा भिसम डा जम्बुलिडलान म्हि तबासे लमा डा न्हडरी तिगै ज्यबा ताम आरे, थेहड् तबा चा डा न्हडरी मुबा जम्मान पापी बानीबेहोरसे हिन्ना भिसी डादा था मुला। थेतबासेलमा जुन गे ज्यबा मुला, थे गे डाइ लबारी म्हाइसैनोन लबारी आखम्मुला। 19 तिग्दा भिसम जुन गे ज्यबा भिसी डाइ लबारी म्हाइजी थे लबारी आखम्मुला। तर जुन गे आज्यबा भिसी डाइ लबारी आम्हाइनी थे गे लमुला। 20 जुन गे डादा सेम आनिमुला थेनोन गे डाइ लमुला भिसम थे गे लबा डा हाडनोन आहिन। तर डा न्हडरी चिबा पाप हिन्ना।

21 थेतबासेलमा ज्यबा गे लबारी म्हाइना म्हाइनान डाग्याम आज्यबा गे जे तमुला। डाला ल्हुडरी गे लबा चा आज्यबा गे लबा ठिम हिन्ना भिसी डाइ था याड्बा मुला। 22 तिग्दा भिसम डाला सेम चा परमेश्वरला ठिमग्यामसेन ताड्मुला। 23 तर डादा चा डा न्हडरी मुबा अर्गुन ठिमसे गे लपुड्मुला भिसी डाइ म्हाड्बा मुला। चु शक्तिसे चा परमेश्वरदा ताड्ना लबारी म्हाइबा डाला सेमदा बिरोध लमुला। चुसेन डादा पापला नोकर सहोसी डाथोरी शासन लमुला। 24-25 डा गाते ल्हाना दुख याड्बा म्हि, पापदेन कालला शक्तिला तहरी मुबा चु ल्हुड्ग्याम डादा खाल्से फेला? थेतबासेलमा डाइ सेमहेन्सेन परमेश्वरला ठिमदा तेन्बारी म्हाइमुला, तर डाला पापी बानीबेहोरसे चा पापदान तेन्पुड्मुला। डा खाहड्बा ताड्आखम्बा म्हि, पापदेन कालला शक्तिला तहरी मुबा चु ल्हुड्ग्याम डादा खाल्से फेला? परमेश्वरदा धन्यवाद तगै। येशू ख्रीष्ट य्हाड्डला प्रभुसेन चुग्याम य्हाड्दा फेला।

8

परमेश्वरला आत्माग्याम याड्बा जुनी

1 थेतबासेलमा दाहेन्से ख्रीष्ट येशूदेन छ्याम गिक तबा म्हिगदेदा परमेश्वरसे सजाय आपिन। 2 तिग्दा भिसम ख्रीष्ट येशूग्याम जुनी पिन्बा परमेश्वरला आत्माला शक्तिसे य्हाड्दा पापदेन सिबाला शक्तिग्याम थाना लबा मुला। 3 महिला हाडलान पापी बानीबेहोरसे ठिमदा कमजोर तना लबासे लमा ठिमसे लबारी आखम्बा गे परमेश्वरसे लजी। परमेश्वरसे हाडलान डादा पापी महिला हड्बान ल्हुडरी पुड्खसी महिला पापला लागिरी बलि तपुड्जी। ओच्छे थेलान ल्हुड्ग्याम पापला शक्तिदा नाश लजी। 4 चुहड् लसी पापी बानीबेहोर अन्छार भ्रबारी आहिन, तर परमेश्वरला आत्मासे कुल्बा अन्छार भ्रबा म्हि य्हाड्ग्याम परमेश्वरसे ठिमसे म्हन्बा ताम पूरा तबा मुला।

5 तिग्दा भिसम पापी बानीबेहोर अन्छार भ्रबा म्हिगदेला सेम पापी बानीबेहोरदा सेम निबा तामरी तमुला। तर परमेश्वरला आत्मासे कुल्बा अन्छार भ्रबा म्हिगदेला सेम परमेश्वरला आत्मादा सेम निबा तामरी तमुला। 6 पापी बानीबेहोर अन्छार जे भ्रबा सेम लबा म्हि चा सिबा म्हि हड्बान हिन्ना। तर परमेश्वरला आत्मासे म्हन्बा अन्छार भ्रबा सेम लबा म्हिसे चा शान्तिदेन जुनी याड्ला। 7 पापी

* 7:11 उत्प ३:१३ * 7:15 गला ५:१७

सेमला तहरी चिबा म्हिगदे परमेश्वरला शत्रु हिन्ना। तिग्दा भिसम थेनीगदे परमेश्वरला ठिम अन्छार भ्रएनोन आभ्र ओच्छे भ्रबारीएनोन आखम। 8 पापी सेमला तहरी चिबा म्हिगदेसे परमेश्वरदा ताड्ना लबारी आखम।

9 चुदे एनीगदे न्हडरी परमेश्वरला आत्मा धन्छ्याजी भिसम एनीगदे पापी बानीबेहोररी आहिन, तर परमेश्वरला आत्मारी तला। तर खालै म्हिदेन छ्याम ख्रीष्टला आत्मा आरेसम थे ख्रीष्टला म्हि तनोन आखम। 10 चुदे ख्रीष्ट एनीगदे न्हडरी धन्छ्याजी भिसम पापसे लमा एनीगदेला ल्हुइ सिसी निसैनोन एनीगदे परमेश्वरदा सेम निबा म्हि दोबासे लमा एनीगदेला आत्मा चा सोला। 11 परमेश्वरसे ह्याडला आत्मासे ख्रीष्ट येशूदा सिबाग्याम दोःसी ल्हुइरीन सोना लजी। थेनोन परमेश्वरला आत्मा एनीगदे न्हडरी धन्छ्याजी भिसम एनीगदेला सिसी निबा ल्हुइदाएनोन थेसे सोना लला।*

12 थेतबासेलमा ज्योज्यो आले नाना आडागदे, य्हाडसे लतोःबा गे मी ल्हानान मुला, तर चु गेगदे य्हाडला पापी बानीबेहोरला तहरी चिसी लबा आहिन। 13 तिग्दा भिसम एनीगदे ह्याडलान पापी बानीबेहोरला तहरी चिजी भिसम एनीगदे सितोःला। तर चुदे परमेश्वरला आत्माला शक्तिग्याम थे पापी बानीबेहोरदा नाश लजी भिसम एनीगदे सोला। 14 तिग्दा भिसम परमेश्वरला आत्मासे उन्बा ग्यामरी भ्रबा म्हिगदे जे परमेश्वरला कोलागदे हिन्ना। 15 तिग्दा भिसम परमेश्वरसे एनीगदेदा थेला नोकर सहोसी लोड्ना लबा आत्मा पिन्बा आहिन, तर परमेश्वरसे एनीगदेदा थेला ह्याडलान कोलागदे दोबा आत्मा पिन्बा मुला। थे आत्माग्यामसे य्हाडसे थेदा “आबा” भिसी पाड्मुला।* 16 य्हाड परमेश्वरला कोलागदे हिन्ना भिसी परमेश्वरला आत्मासे य्हाडला आत्मादा घोना लबा मुला। 17 य्हाड परमेश्वरला कोलागदे हिन्सम य्हाड परमेश्वरला हक याड्बा म्हि हिन्ना। ओच्छे चु हक ख्रीष्टदेन छ्याम तसी याड्ला। तर थेहड् लसीन ख्रीष्टसे नाबा दुख य्हाडसेनोन नाजी भिसम ख्रीष्टसे याड्बा मान य्हाडसेनोन याड्ला।

लिच्छा याड्बा मान

18 तिग्दा भिसम य्हाडसे लिच्छा याड्बा सुखदेन घेन मान दान्दे य्हाडसे नाबा दुखदेन छ्याम दाँजब लबारी आखम भिबा ताम डादा था मुला। 19 पाड्नुनोन तोःमा, परमेश्वरसे ह्याडला कोलागदे उन्बा धिन च्याबारी परमेश्वरसे सहोबा जम्मान सहेसे सेम लसी थे धिन भ्रान्सी चिबा मुला। 20 तिग्दा भिसम जम्मान सहे गे आखेलबा तबा मुला, थेनीगदेसे म्हन्बा अन्छार चुहड् तबा आहिन। तर परमेश्वरसेन थेनीगदेदा थाना लबा धिनना आश लसी चुहड् लबा हिन्ना। 21 तिग्दा भिसम परमेश्वरसे सहोबा सहेगदेदाएनोन तिरिकुनु नाश तबाला याग्याम फेला, ओच्छे थेनीगदेसेनोन परमेश्वरला कोलागदेसे याड्बा हड्बान घेन थारबा याड्ला।

22 थेनीगदे जम्मासेन कोला न्हबा बेथा याड्बा म्रिडम्हेमेगदेसे दुख नाबा हड् लसी दान्देधोना दुख नासी चिबा मुला भिबा ताम य्हाडदा था मुला। 23 थेनीगदे जे आहिन, तर परमेश्वरला आत्मा याड्बा म्हिगदे य्हाडएनोन परमेश्वरला कोलागदे दोबादेन ल्हुइ पूरान पापग्याम फेबाला लागिरी सेमरी दुख नासी परमेश्वरला ग्याम च्यासी चिबा मुला।* 24 तिग्दा भिसम य्हाड चुनोन आशग्याम थारबा मुला। आश लबा भिबा चा य्हाडसे तिगै सहे याड्बाला लागिरी भ्रान्सी चिबा हिन्ना। डाच्छा याड्सी जिन्बा सहेला लागिरी खालैसेन आश आल। 25 तर चुदे य्हाडसे आम्राड्बा सहेला लागिरी आश लबा हिन्सम थे आयाड्तेधोना दुख नासी भ्रान्सी चितोःला।

26 य्हाड कमजोर मुला, तर परमेश्वरला आत्मासेन य्हाडदा ह्यो लला। ह्यो लबा भिबा चा खाहड् लसी प्रार्थना लतोःला भिसी आसेबा धुइरी य्हाडसे पाड्बारीन आखम्बा तामग्याम परमेश्वरला आत्मासे य्हाडला साटोरी प्रार्थना लला। 27 ओच्छे परमेश्वरला आत्मासे म्हन्बा ताम जम्मालान सेमला ताम था याड्बा परमेश्वरदा था मुला। तिग्दा भिसम परमेश्वरला आत्मासे ह्याडला म्हिगदेला साटोरी परमेश्वरसे म्हन्बा अन्छार प्रार्थना लमुला।

† 8:9 चु पदरी परमेश्वरला आत्मादेन ख्रीष्टला आत्मा भिबा गिकनोन हिन्ना। * 8:11 १ कोर ३:१६ * 8:15 मर्कु १४:३६; गला ४:६ * 8:23 २ कोर ५:२-४

28 परमेश्वरसे हाडसे म्हन्बा अन्छार धम्बा जम्मान म्हिगदेदेन थेदा माया लबा म्हिगदेला लागिरी जम्मान सहेगदेदा ज्यबा तना लमुला भिबा ताम यहाडदा था मुला। 29 ख्रीष्ट जम्मान ज्योज्यो आले नाना आडागदेला ज्योज्यो दोगै भिसी जम्बुलिड सहोबा भन्दा डाच्छाहेन्सेन परमेश्वरसे हाडसे डोसेबा म्हिगदेदा धम्जी। ओच्छे थेनीगदेदा हाडला झा हड्बान सहोबारी पक्का लजी। 30 जुन जुन म्हिदा परमेश्वरसे डाच्छान धम्मुबा, थेनीगदेदा हाडलान सन्तान दोबारी ड्योइजी। ड्योइमाहेन्से थेनीगदेदा परमेश्वरला डाच्छा ज्यबा म्हि हिनना भिसी सुड्जी। परमेश्वरला डाच्छा ज्यबा म्हि हिनना भिसी सुड्माहेन्से परमेश्वरसे थेनीगदेदा हाडसे याड्बा मानदेन यहाल याड्बा हकएनोन पिन्जी।

परमेश्वरला माया

31 थेहड् भिसम चु तामगदेला बारेरी यहाडसे तिग पाड्तोःबा? चुदे परमेश्वरनोन यहाडपट्टि मुला भिसम यहाडदा खाल्से ढाखम्ला? 32 परमेश्वरसे हाडलान झादा मी बाँकी आथानना यहाडला लागिरी पिन्जी भिसम तिग थेसे हाडला झादेन छ्यामनोन यहाडदा जम्मान सहे आपिन? 33 परमेश्वरसे धम्बा म्हिगदेला बिरोधरी खाल्से दोष उन्खम्ला? परमेश्वरसेन थेनीगदेदा हाडदा सेम निबा म्हि भिसी सुड्बा मुला। 34 थेतबासेलमा यहाडदा सजाय पिन्गो भिसी खाल्से पाड्खम्ला? तिग्दा भिसम यहाडसे नातोःबा सजाय ख्रीष्ट येसूसेन नासी सिजी। थे सिबाग्याम सोसी दान्दे स्वर्गला मुल ठिरी धन्छ्याबा मुला। ओच्छे यहाडला लागिरी परमेश्वरदेन छ्याम प्रार्थना लबा मुला। 35 दाहेन्से यहाडदा दुख कष्ट, बिरोध, चआम्याड्बा, क्वानआम्याड्बा, आपत विपत, साइबारी म्हाइबा चु तामसे यहाडदा ख्रीष्टला मायाग्याम फेबारी खम्ला? 36 परमेश्वरला बचनरीनोन चुहड् भिसी भिबा मुला, “हाडला लागिरी डन्दा धिन धिननोन साइबा मुला, ओच्छे डन्दा साइबारी ठीक लबा ग्युदा हड्नोन लमुला।”*

37 तर चु जम्मान ताम तसैनोन यहाडदा माया लबा ख्रीष्टग्यामसेन यहाडसे चु जम्मानथोरी ढाबा मुला। 38-39 तिग्दा भिसम कालला शक्तिगदे मुसै, सिसै, सोसै, स्वर्गदूतगदे मुसै, शासन लबागदे मुसै, दान्देला तामगदे मुसै, लिच्छा तसेला तामगदे मुसै, नर्गला शक्तिगदे मुसै, मुरी मुबा शक्ति मुसै, जम्बुलिडरी मुबा शक्ति मुसै, खजिबै सहेगदे मुसै ख्रीष्ट येसूग्यामसे यहाडदा परमेश्वरसे लबा मायाग्याम फेबारी आखम भिबा ताम डादा था मुला।

9

परमेश्वरसे धम्बा म्हिगदे

1 डा ख्रीष्टला म्हि तबासे लमा सत्य ताम पाड्बान मुला, डाइ लुसीला ताम पाड्बा आरे। डाइ सत्य ताम पाड्बान मुला भिबा ताम डाला सेमदा था मुला, ओच्छे डाइ लुसीला ताम पाड्बा आरे भिसी परमेश्वरला आत्मादा था मुला। 2 डाला सेमरी ल्हानान दुखदेन सुर्दा सदन तबा मुला। 3 डा ख्रीष्टग्याम फेमा डाला यहुलला ज्योज्यो आले नाना आडागदेसे थार्बा याड्बा हिन्सम डा हाडला म्हिगदेला लागिरी सजाय नाबारीनोन तयार तसेला मुबा। 4 थेनीगदे इस्राएलीगदे हिन्ना, थेनीगदेदा परमेश्वरसे हाडलान कोलागदे सहोजी, ओच्छे थेनीगदेदा अर्गु यहुलला म्हिगदेग्याम हाडला यहालदेन शक्ति उन्जी। थेहड् लसीन थेनीगदेदा मोलम पिन्ना भिसी कबुल लजी, ओच्छे ठिम पिन्जी। थेनीगदेसे परमेश्वरदा खाहड् लसी तेन्तोःला भिसीएनोन लोपजी, ओच्छे परमेश्वरसे पिन्ना भिसी लबा कबुलगदे थेनीगदेलान हिन्ना।* 5 चुगदे अब्राहाम, इसहाकदेन याकूबला सन्तान हिन्ना। थार्बा पिन्बा ख्रीष्टएनोन चुनोन वंशग्याम म्हि लहुड किन्सी न्हबा हिन्ना। जम्मानथोरी शासन लबा परमेश्वर थार्बा पिन्बा ख्रीष्टनोन हिन्ना। थेला सदन जयजयकार तगै। आमैन।

6 परमेश्वरसे इस्राएलीगदेदेन छ्याम लबा कबुल पूरा आलबा आहिन, तर थेनीगदे परमेश्वरसे कुल्बा अन्छार आभ्रनी। थेतबासेलमा थेनीगदे जम्मान इस्राएलला सन्तान तसैनोन परमेश्वरला

* 8:36 भजन ४४:२२ * 9:4 प्रस्था ९:४

कोलागदे आदोनी। 7 ओच्छे अब्राहामला सन्तान तजी भिदेमा जम्मान थेला झा झामे आत। तिग्दा भिसम परमेश्वरसे अब्राहामदा सुड्बा ताम बचनरी चुहड् लसी भिबा मुला, “इसहाकग्याम न्हबागदेदा जे एला सन्तान भिला।”^{*} 8 चु भिबा चा अब्राहामला जम्मान सन्तान परमेश्वरला कोलागदे आहिन। तर परमेश्वरसे लबा कबुलग्यामा न्हबा कोलागदे जे अब्राहामला सन्तान हिनना। 9 तिग्दा भिसम परमेश्वरसे अब्राहामदेन चुहड् लसी कबुल लबा मुबा, “तोगब लबा धुडरी डा दोःसी खला, जमा धुडरी एला म्रिड सारासे झा गिक न्हला।”^{*}

10 ओते जे आहिन, य्हाडला म्हेमे इसहाकग्याम रिबेकासे जौल्या कोला न्हबा मुबा। 11 परमेश्वरसे म्हनबा अन्छार थेसे धम्बा ताम पूरा लबाला लागिरी थे जौल्या कोलागदे न्हबा भन्दा डाच्छान जजा कोलादा धम्जी। थेनीगदेसे ज्यबा आज्यबा गे लबा भन्दा डाच्छान परमेश्वरसे थे कोलादा धम्बा मुबा। 12 चु चा म्हिगदेसे लबा गे अन्छार आहिन, तर य्हाडदा ड्योडबा परमेश्वरसे म्हनबा अन्छार हिनना। तिग्दा भिसम परमेश्वरसे रिबेकादा “थेबा झा चा च्याड्बा झाला नोकर दोला” भिसी सुड्बा मुबा।^{*} 13 परमेश्वरला बचनरीनोन चुहड् लसी, “डाइ याकूबदा माया लजी, तर एसावदा चा हेला लजी” भिसी भिबा मुला।^{*}

14 थेहड् भिसम य्हाडसे तिग पाड्तोःबा? तिग परमेश्वरसेनोन अन्याय लला? पक्कान आल!
15 तिग्दा भिसम परमेश्वरसे मोशादा,
“जुन म्हिदा डाइ दया लबा सेम मुला, डाइ थेदा दया लला।
ओच्छे जुन म्हिदा डाइ माया लबा सेम मुला, डाइ थेदान माया लला”

भिसी सुड्बा मुला।^{*}

16 थेतबासेलमा चु दया चा न्ह य्हाडला सेमसे म्हनबासे लमा हिनना न्ह य्हाडसे गे लबारी म्हाडबासे लमा हिनना, तर परमेश्वरसे म्हनबा अन्छार हिनना। 17 मिश्र य्हुल्साला ग्ले फारोदा परमेश्वरसे “एग्याम डाला शक्ति उन्बादेन जम्बुलिड नाडनोन डाला मिन थेःना लगै भिबा सेमसे डाइ एदा ग्ले स्होबा हिनना” भिसी सुड्बा ताम बचनरी भिबा मुला।^{*} 18 थेतबासेलमा परमेश्वरसे जुन म्हिदा दया लबा सेम मुला थेदा दया लला, ओच्छे जुन म्हिला सेम कोड्ना लबा सेम मुला थेला सेम कोड्ना लला।

19 एनीगदे न्हडला खालैसे डादा चुहड् भिसी पाड्ला, “थेहड् भिसम परमेश्वरसे तिग्दा अझ दोष लबा? तिग्दा भिसम परमेश्वरसे म्हनबा तामदा खालैसेन बिरोध लबारी आखम।” 20 म्हि तसीनोन परमेश्वरदेन छ्याम जोहाब लबा ए खाल हिनना? तिग साप्राग्याम स्होबा ताडसे हाडदा स्होबा म्हिदा “तिग्दा डादा चुहड्बा स्होबा?” भिसी ड्योडला।^{*} 21 तिग हाडसे ज्योपूबा साप्राग्याम कोड ताड ज्यबा खाल्ला, कोड ताड आज्यबा खाल्ला स्होबा हक कुमालेदा आरे?^{*}

22 थेहड् लसीन परमेश्वरदाएनोन हाडला बोमोदेन शक्ति उन्बा सेम मुला। तर सजाय पिन्तोःबा म्हिगदेदाएनोन सजाय आपिन्ना अझ नासीन धन्छ्याबा मुला। 23 ओच्छे हाडसे डाच्छान ड्योडबा म्हिगदेदा परमेश्वरसे हाडला घेन य्हालदेन शक्ति ओच्छे ल्हानान दया उन्बाला लागिरीन चुहड् लसी नाबा मुबा। 24 तिग्दा भिसम परमेश्वरला म्हिगदे य्हाडनोन हिनना। थेसे य्हुदीगदे न्हडग्याम जे ड्योडबा आहिन, तर अर्गु य्हुलला म्हिगदे न्हडग्यामएनोन ड्योडजी। 25 परमेश्वरसे सुड्बा ताम होशे भिबा अगमवक्तासे चुहड् लसी भिबा मुला,

“जुन म्हिगदे ‘डाला म्हि आहिनमुबा,’

थेनीगदेदा डाइ ‘डाला म्हि स्होला।’

ओच्छे जुन म्हिदा ‘डाइ माया लबा आरेबा,’

थेनीगदेदा ‘डाइ माया लला।’ ”^{*}

26 ओच्छे,

* 9:7 उत्प २१:१२ † 9:8 चु पदरी “कबुल” भिबा चा पावलसे येशू ख्रीष्टग्याम थार्बा याड्बा समाचारला बारेरी पाड्बा ताम हिनना। * 9:9 उत्प १८:१० * 9:12 उत्प २५:२३ * 9:13 मला १:२-३ * 9:15 प्रस्था ३३:१९ * 9:17 प्रस्था ९:१६ * 9:20 यशै २९:१६; ४५:९ * 9:21 यर्मि १८:१-१०; २ तिमो २:२०-२१ * 9:25 होशे २:२३

“जुन ग्लारी थेनीगदेदा,
 ‘एनीगदे डाला म्हि आहिन’ भिसी भिमुबा,
 थेनोन ग्लारी थेनीगदेदा,
 ‘छोन्बो परमेश्वरला कोलागदे’ भिसी भिला।”*

27 इस्राएलीगदेला बारेरी यशैया अगमवक्तासेनोन चुहड् भिसी पाड्बा मुला,
 “इस्राएलीगदे समुन्द्रला बालुवा ते मुसैनोन
 थेनीगदे न्हडला कोइ कोइसे जे थार्बा याड्ला।

28 तिग्दा भिसम प्रभुसे हाडला बचन अन्छार
 योनान जम्बुलिडला म्हिगदेदा सजाय पिन्सी नाश लला।”*

29 यशैया अगमवक्तासे इस्राएलीगदेला बारेरी चुहड् भिसीनोन पाड्बा मुला,
 “चुदे जम्मान भन्दा शक्तिशाली परमेश्वरसे य्हाडला लागिरी सन्तान गिकनोन आख्लाबा हिन्सम
 य्हाडएनोन सदोमदेन गमोराला म्हिगदे हड् लसीन नाश तसेला मुबा।”*

यहूदीगदेसे विश्वास आलबा

30 चु जम्मान तामला अर्थ चा तिग हिन्ना? चु भिबा चा अर्गु य्हुलला म्हिगदेसे परमेश्वरदा सेम
 निबा म्हि दोबारी आमहाइसैनोन थेनीगदेदा परमेश्वरसे हाडदा सेम निबा म्हि स्होजी। चु जम्मान ताम
 थेनीगदेला विश्वासग्याम तजी। 31 तर इस्राएलीगदे चा थे ठिम अन्छार भ्रसी परमेश्वरदा सेम निबा
 म्हि दोबारी ल्हानान भड लजी तसैनोन दोआखमनी। 32 तिग्दा आखमनी? तिग्दा भिसम थेनीगदेसे
 विश्वास आलना लबा गेग्याम परमेश्वरदा सेम निबा म्हि दोबारी म्हाइजी। थेतबासेलमा थेनीगदे
 युडबारी तोइजी, ओच्छे थे युडबासे थेनीगदेदा हिल्ना लजी। 33 परमेश्वरला बचनरीनोन चुहड् भिसी
 भिबा मुला,

“च्यागो, डाइ सियोनरीं थेनीगदेदा तोइना लबा युडबा गिक थान्ना,
 थे युडबारी ल्हानान म्हिगदे तोइला ओच्छे थेनीगदेदा हिल्ना लला।
 तर थेदा विश्वास लबा खालै म्हिगदेदा पे:ना आल।”*

10

1 ज्योज्यो आले नाना आडागदे, परमेश्वरसे इस्राएलीगदेदा थार्ना लगै भिसी डाइ सेमहेन्सेन म्हनबा
 मुला, ओच्छे प्रार्थना लबा मुला। 2 थेनीगदेसे परमेश्वरदा ल्हानान तेन्बारी म्हाइबा मुला भिबा ताम
 डाइ पक्का लसी पाड्खम्ला। तर थेनीगदेसे तेन्बा चा ठीक ज्ञान बुद्धिग्याम आहिन। 3 तिग्दा भिसम
 परमेश्वरसे थेनीगदेदा हाडदा सेम निबा म्हि स्होला भिबा ताम था आयाड्ना, थेनीगदे हाडलान
 गेग्याम परमेश्वरदा सेम निबा म्हि दोबारी म्हाइजी। तर थेनीगदे परमेश्वरसे हाडदा सेम निबा म्हि
 स्होला भिबा तामला तहरी आचिनी। 4 तिग्दा भिसम ख्रीष्टदा विश्वास लबा म्हिगदे परमेश्वरदा
 सेम निबा म्हि दोगै भिसी ख्रीष्टसेन ठिमला गे पूरा लजी।

जम्मासेन थार्बा याड्खम्ला

5 “ठिमरी पाड्बा अन्छार परमेश्वरदा सेम निबा म्हि दोबारी म्हाइबागदे ठिम अन्छारनोन भ्रतो:ला”
 भिसी मोशासे भिबा मुला।* 6 तर विश्वासग्याम परमेश्वरदा सेम निबा म्हि दोबा तामसे चुहड् भिसी
 पाड्बा मुला, “एनीगदेसे सेम न्हडरी ‘खाल स्वर्गरी निला?’ भिसी थापाड्गो, चु भिबा चा ख्रीष्टदा मार
 भबारी हिन्ना।* 7 ओच्छे ‘ल्हानान नुप्बा व्हाडधोनां खाल निला?’ भिसीएनोन एनीगदेसे हाडला सेम
 न्हडरी थापाड्गो।” चु भिबा चा ख्रीष्टदा सिबाग्याम सोना लसी तोर भबारी हिन्ना। 8 तर चु बचनसे
 तिग पाड्बा मुला? “परमेश्वरला बचन एनीगदेदेन छ्यामनोन मुला। ओच्छे एनीगदेला सेमदेन सुडरीन
 मुला।” डन्से थे:ना लबा चुनोन बचनसे म्हिगदेदा विश्वास लबारी ड्योइबा मुला।* 9 तिग्दा भिसम

* 9:26 होशे १:१० * 9:28 यशै १०:२२-२३ * 9:29 यशै १:९ † 9:33 “सियोन” भिबा चा यरूशलेम शहरदा पाड्बा हिन्ना।
 * 9:33 यशै २८:१६ * 10:5 लेवी १८:५ * 10:6 व्यव ३०:१२ † 10:7 “ल्हानान नुप्बा व्हाड” भिबा चा म्हाड म्हाड चिबा
 ग्ला हिन्ना (लूका ८:३१; उन्बा ९:१, २, ११; ११:७; १७:८; २०:१, ३)। * 10:8 व्यव ३०:१४

चुदे एसे येशूदान प्रभु हिन्ना भिसी पाङ्बादेन परमेश्वरसेन थेदा सिबाग्याम सोना लबा हिन्ना भिसी सेमहेन्सेन विश्वास लजी भिसम ए थार्ला। 10 तिग्दा भिसम हाडला सेमहेन्से विश्वास लबा म्हिदा परमेश्वरसे हाडदा सेम निबा म्हि हिन्ना भिसी सुङ्ला, ओच्छे येशूदा प्रभु हिन्ना भिसी पाङ्बासे लमान थेसे थार्ला याङ्ला। 11 परमेश्वरला बचनरीनोन “थेदा विश्वास लबा म्हिगदे खालैनोन पेःआतोः” भिसी भिबा मुला।* 12 तिग्दा भिसम यहूदीदेन अर्गु यहूलला म्हिगदे न्हडरी तिगै फरक आरे। प्रभु गिक जे मुला, थेनोन प्रभु जम्मालान प्रभु हिन्ना। थेदेन छ्याम ह्नीबा म्हिगदेदा थेसे ल्हानान मोलम पिन्ना। 13 तिग्दा भिसम बचनरी “प्रभुला मिन किन्बा म्हिगदे जम्मासेन थार्ला याङ्ला” भिसी भिबा मुला।*

14 तर प्रभुदा विश्वास लबान आरे भिसम म्हिगदेसे खाहङ् लसी प्रभुदेन छ्याम ह्नीसे? प्रभुला बारैरी थेःबान आरे भिसम थेनीगदेसे खाहङ् लसी प्रभुदा विश्वास लसे? ओच्छे खालै म्हिसे थेनीगदेदा प्रभुला बारैरी थेःना लबान आरे भिसम थेनीगदेसे खाहङ् लसी था याङ्से? 15 ओच्छे थेःना लबा म्हिनोन आपुइना खाहङ् लसी थेःबा? परमेश्वरला बचनरीनोन “थार्ला पिन्बा समाचार थेःना लबा म्हिगदे खमा गाते ल्हानान ताङ्तोःबा ताम हिन्ना” भिसी भिबा मुला।*

16 तर थेनीगदे न्हडला कोइ कोइ म्हि थार्ला पिन्बा समाचार अन्छार आभ्रनी। तिग्दा भिसम यशैया अगमवक्तासेन “प्रभु, डन्से थेःना लबा तामदा खाल्से विश्वास लबा मुला?” भिसी भिबा मुला।* 17 विश्वास चा थार्ला पिन्बा समाचार थेःसी खमुला, ओच्छे थे थार्ला पिन्बा समाचार चा ख्रीष्टला बारैरी पाङ्बा ताम हिन्ना।

18 थेहङ् भिसम डाइ एनीगदेदा ड्योइला, “तिग थेनीगदेसे थेःबा आरेबा?” आहिन, थेनीगदेसे पक्कान थेःबा मुला। तिग्दा भिसम परमेश्वरला बचनरी “मुदेन स्वर्गला काइ जम्बुलिड नाडनोन थेःबा मुला, ओच्छे थेनीगदेसे परमेश्वरला बारैरी पाङ्बा ताम जम्बुलिडला जम्मान ग्लारी धोबा मुला” भिसी भिबा मुला।*

19 डाइ दोःसीनोन ड्योइला, “तिग इस्राएलीगदेसे आघोनी?” परमेश्वरसे मोशाग्याम डाच्छान थेनीगदेदा “जुन म्हि खजिबै यहूलला आहिन मुबा, थेनोन यहूलला म्हिदा धम्सी डाइ एनीगदेला सेमरी डाह तना लला। ओच्छे आघोबा मूर्ख म्हिगदेदा थार्ला लसी डाइ एनीगदेदा बोमो खना लला” भिसी सुङ्बा मुबा।*

20 परमेश्वरसे सुङ्बा ताम अझ आँट लसी यशैया अगमवक्तासे चुहङ् लसी भिबा मुला, “डादा म्हाइनोन आमहाइबागदेसे डादा स्यापबा मुला, ओच्छे जुन म्हिसे डादा आमहाइनी थेनीगदेला गुडरी डा हाडनोन थोन्जी”*

21 इस्राएलीगदेला बारैरी परमेश्वरसे चुहङ् भिसी सुङ्बा मुला, “डाला ताम आङ्यान्बादेन सेम कोङ्बा म्हिगदेदा ‘खउ’ भिसी डाइ धिन गिक या पिन्जी।”*

11

यहूदीगदेदा परमेश्वरसे लबा दया

1 थेहङ् भिसम डाइ एनीगदेदा ड्योइला, “तिग परमेश्वरसे हाडला म्हिगदेदा ख्लाबा हिन्ना?” पक्कान आहिन! तिग्दा भिसम ख्रीष्टदा विश्वास लबा डाएनोन अब्राहामला वंशरी न्हबा बेन्यामीनला† सन्तान इस्राएली हिन्ना।* 2 परमेश्वरसे डाच्छाहेन्सेन डोसेबा हाडला म्हिगदेदा ख्लाबा आरे। एलिया अगमवक्ताला बारैरी परमेश्वरला बचनरी पाङ्बा ताम मी एनीगदेदा थानोन मुला। एलिया अगमवक्तासे इस्राएलीगदेला बिरोधरी परमेश्वरदेन छ्याम चुहङ् लसी बिन्ती लबा

* 10:11 यशै २८:१६ * 10:13 योए २:३२ * 10:15 यशै ५२:७ * 10:16 यशै ५३:१ * 10:18 भजन १९:४ * 10:19 वयव ३२:२१ * 10:20 यशै ६५:१ * 10:21 यशै ६५:२ † 11:1 “बेन्यामीन” भिबा म्हि चा इस्राएलला च्युक न्ही कोलागदे न्हडला गिक हिन्ना। * 11:1 फिलि ३:५

मुबा, 3 “प्रभु, थेनीगदेसे हाडला अगमवक्तागदेदा साइबा मुला ओच्छे हाडदा बलि फुल्बा गुलागदे फुप्सी पिन्बा मुला, सोबा चा डा जे हिन्ना, डादाएनोन साइबारी थेनीगदेसे म्हाइबान मुला।”* 4 तर परमेश्वरसे थेदा “डाइ डाला लागिरी हजार निस म्हिगदेदा जोगब लसी थान्बा मुला, थेनीगदेसे बाल भिबा लदा फ्या लबा आरे” भिसी सुड्जी।* 5 थेहड् लसीन परमेश्वरला दयामायाग्याम धम्बागदे न्हडला कोइ कोइ म्हिगदे दान्देनोन मुला। 6 चु चा दयामायाग्याम तबा हिन्ना, ठिम अन्छार लबा गेग्याम आहिन। चुदे ठिम अन्छार लबा गेग्याम तबा हिन्सम दयामाया आचिसेला मुबा।

7 थेतबासेलमा चुहड् तजी, इस्राएलीगदेसे जुन सहे म्हाइमुबा थे सहे थेनीगदेसे आयाड्नी। तर परमेश्वरसे धम्बागदेसे जे थे सहे याड्जी। तर आयाड्बागदेला चा सेम कोड्जी। 8 परमेश्वरला बचनरीनोन चुहड् भिसी भिबा मुला,

“परमेश्वरसे थेनीगदेदा तिगै ताम घोबारी आखम्बा आत्मा पिन्बा मुला, ओच्छे म्हाइनोन आम्राड्बा मीदेन थे:नोन आथे:बा नाब्यड पिन्बा मुला, दान्देधोनाएनोन थेनीगदे थेहड्बान मुला।”*

9 ओच्छे दाऊदसेनोन चुहड् भिसी पाड्बा मुला,

“थेनीगदेला भोजएनोन थेनीगदेला लागिरी झूबा वादेन फुप हड्बान तगै।

ओच्छे थेनीगदेला चबा सहे थान्बा टेबुलरी ठोक्सी थेनीगदे हिल्लगै,

थेनीगदेसे फातो:बा पापला सय फातो:गै।

10 थेनीगदेला मी काना तगै,

ओच्छे थेनीगदेला छिक्मा खाइमै सोजो थातगै।”*

11 थेतबासेलमा एनीगदेसे डाला ताम ड्यानूगो, “तिग नाश तबारीन इस्राएलीगदे ठोक्सी हिल्लबा हिन्ना?” आहिन। तर थेनीगदेसे पाप लबासे लमान थेनीगदेसे याड्तो:बा थार्बा अर्गु यहुलला म्हिगदेसे याड्जी। तिगदा भिसम चु म्हाइसी इस्राएलीगदेसे थार्बा याड्बारी सेम लगै भिसीन चुहड् तबा हिन्ना।

12 इस्राएलीगदेसे पाप लबासे लमा अर्गु यहुलला म्हिदेन जम्बुलिडला जम्मान म्हिगदेसे मोलम याड्जी। थेनीगदे परमेश्वरसे कुल्बा अन्छार भ्रआखम्बासे लमा अर्गु यहुलला म्हिगदेसे थार्बा याड्जी भिसम झन इस्राएलीगदेसेनोन परमेश्वरसे कुल्बा ताम ड्यानूबा हिन्सम गाते ल्हानान मोलम याड्सेला मुबा।

अर्गु जम्मान यहुलसे थार्बा याड्बा

13 दाहेन्से डाइ एनी अर्गु यहुलला म्हिगदेदा चु ताम पाड्ला, डा अर्गु यहुलला म्हिगदेला लागिरी मुल चेला दोबासे लमा डाइ चु गे लम्याड्जी। थेतबासेलमा डाला सेम ल्हानान ताड्बा मुला। 14 डाला हाडलान यहुलला म्हिगदेसे एनीगदेदा डाह लसी थेनीगदे न्हडला कोइ कोइ चा परमेश्वरपट्टि दो:सी थार्बा याड्ला वा भिबा आशसे डाइ चुहड् लबा हिन्ना। 15 तिगदा भिसम थेनीगदेदा परमेश्वरसे ख्लामा जम्बुलिडला जम्मान म्हिगदे परमेश्वरला म्हि दोजी भिसी दो:सी थेनीगदेदा परमेश्वरसे हाडला म्हि सहोबा चा जम्बुलिडला जम्मान म्हिगदे सिबाग्याम सोबा तेबान आहिन? 16 चुदे गेड ख्राड्बारी ज्योपबा ब्राग्याम जजाकी परमेश्वरदा फुल्जी भिसम थे गेड ख्राड्बारी ज्योपबा जम्मान ब्रा चोखो तला। थेहड् लसीन दोडला टा ज्यबा मुसम थे दोडला हाँगाएनोन ज्यबा तला।

17 थेहड् लसीन दोडला हाँगा क्युइसी निबा हड् लसी गाते इस्राएलीगदेसेनोन परमेश्वरदा ख्लामी निबा मुला। तर एनी अर्गु यहुलला म्हिगदे चा हिरी खबा जैतूनना हाँगा दिमरी मुबा जैतूनना दोडरी थुइबा हड् लसी थुइबा मुला। दाहेन्से एनीगदे टा गिकग्यामसेन शक्ति याड्सी सोला। 18 थेतबासेलमा एसे थे क्युइसी निबा हाँगा हड्बा इस्राएलीगदेदेन छ्याम घमण्ड थालउ। चुदे घमण्डन लबा हिन्सम चु ताम ढन्गो, तिगदा भिसम ए चा हाँगा जे हिन्ना, एसे टादा ताबा आहिन। तर टासे चा एदा ताबा हिन्ना। 19 तर एसे चुहड् भिसी पाड्ला, “डादा थुइबाला लागिरीन थे हाँगागदे क्युइबा मुबा।” 20 एसे पाड्बा तामएनोन ठीकनोन हिन्ना, येसूदा विश्वास आलबासे लमा थेनीगदे क्युइबा हाँगा हड्बान

* 11:3 १ राजा १९:१०-१४ * 11:4 १ राजा १९:१८ * 11:8 वयव २९:४; यशै २९:१० * 11:10 भजन ६९:२२-२३

मुबा। तर एनीगदे चा विश्वास लबासे लमा सोबा हिन्ना। थेतबासेलमा एनीगदेसे घमण्ड थालउ, तर परमेश्वर म्राङ्सी लोङ्गो। ²¹ तिग्दा भिसम परमेश्वरसे डाच्छाहेन्सेन मुबा हाँगागदेदा मी भ्याङ्जी भिसम एनीगदे थुइबा हाँगागदेदाएनोन भ्याङ्ला।

²² थेतबासेलमा परमेश्वरसे गाते ल्हानान दया लमुला भिबादेन गाते खरो व्यवहार लमुला भिबा ताम एनीगदेसे था याङ्सी जिन्बा मुला। थेदा विश्वास आलबागदेदा थेसे खरो व्यवहार लजी। तर थेदा विश्वास लबा एनीगदेदा परमेश्वरसे दया लजी। तर एनीगदेसे थेला दयादा म्ले:जी भिसम एनीगदेदाएनोन थासी भ्याङ्ला। ²³ चुदे थेनीगदेसे हाडला सेम दो:सी विश्वास लजी भिसम हाँगादा हड् लसी थुइला। तिग्दा भिसम परमेश्वरसे थेनीगदेदा दो:सी गिक सहोबारी खम्ला। ²⁴ अर्गु यहुलला म्हि एनीगदे चा हिरी खबा जैतूनना दोङ्ग्याम थासी भबा हाँगा हड्बान हिन्ना। हिरी खबा जैतूनदेन दिमरी मुबा जैतून आढिकुसैनोन एनीगदेदा दिमरी मुबा जैतून दोडला हाँगारी थुइबा मुला। इस्राएलीगदे चा दिमरी मुबा जैतूनना हाँगा हड्बान हिन्ना। थेतबासेलमा थेनीगदेदा दो:सी भसी थुइबारी परमेश्वरदा झन सजिलो तला।

जम्मानथोरी परमेश्वरला दयामाया मुला

²⁵ ज्योज्यो आले नाना आडागदे, परमेश्वरला सेमला ताम एनीगदेसेनोन था याङ्गै भिबा डाला सेम मुला। थे ताम था याङ्जी भिसम एनीगदेसे हाडसे हाडदान घेन म्हि आसहो। थे ताम चा चुनोन हिन्ना, परमेश्वरला लागिरी ख्रीष्टदा विश्वास लबा अर्गु यहुलला म्हिगदे आछ्योतेधोना जे इस्राएलीगदेला सेम कोङ्ला। ²⁶ जमाहेन्से जम्मान इस्राएली यहुलदाएनोन थाना लला। परमेश्वरला बचनरीनोन चुहड् भिसी भिबा मुला,

“थार्बा पिन्बा म्हि सियोनग्याम फेपखला,
ओच्छे याकूबग्याम पाप गेगदे भ्याङ्ला।”*

²⁷ “ओच्छे प्रभुसे ‘थेनीगदेला पापला दोष मेटब लसी डाइ थेनीगदेदेन छ्याम लबा डाला कबुल पूरा लला’ भिसी सुड्बा मुला।”*

²⁸ एनी अर्गु यहुलला म्हिगदेला गुडरी थार्बा पिन्बा समाचार धोबाला लागिरी इस्राएलीगदे परमेश्वरला शत्रु दोबा हिन्ना। तर थेनीगदेला आखे म्हेमेसे लमा अझ थेनीगदे परमेश्वरसे धम्बा म्हि हिन्ना। ओच्छे थेनीगदेदा परमेश्वरसे माया लमुला। ²⁹ तिग्दा भिसम परमेश्वरसे हाडसे मोलम दो:सी आकिन, ओच्छे हाडसे धम्बागदेदाएनोन खाइमै आख्ला। ³⁰ डाच्छा एनीगदेसेनोन परमेश्वरसे कुल्बा ताम आङ्यान्मुबा। तर इस्राएलीगदेसे परमेश्वरसे कुल्बा ताम आङ्यान्बासे लमा दान्दे एनीगदेसे परमेश्वरला दया याङ्बा हिन्ना। ³¹ थेहड् लसी दान्दे इस्राएलीगदे अटेरी तसी चिबासे लमा परमेश्वरसे एनीगदे अर्गु यहुलला म्हिगदेदा दया लबा हिन्ना। एनीगदेदा दया लबा म्राङ्सी तिरेकुनु थेनीगदेसेनोन दया याङ्ला। ³² जम्मान म्हि अटेरी तबासे लमा परमेश्वरसे थेनीगदेदा थेनीगदेदान पापरी खीसी थान्बा मुला। चुहड् लबा चा तिरेकुनु जम्मान म्हिगदेसे परमेश्वरला दया याङ्गै भिसी हिन्ना।

जयजयकारला व्हाइ

³³ ओहो, परमेश्वरला दया गाते ल्हाना!

थेला ज्ञान बुद्धि गाते घेन!

ओच्छे थेसे पक्का लसी जिन्बा ताम खाल्से घोखम्ला?

थेला ग्याम खालैसेन म्राङ्बारी आखम!*

³⁴ “तिग्दा भिसम प्रभुला सेमला ताम खाल्से था याङ्बा मुला?

ओच्छे थेदा सल्लाह पिन्बा म्हि खाल मुला?”*

³⁵ “परमेश्वरसे छे फाबारी

खाल्से परमेश्वरदा छे पिन्बा मुला?”*

* 11:26 यशै ५९:२० * 11:27 यर्मि ३१:३३-३४ * 11:33 यशै ५५:८ * 11:34 यशै ४०:१३ * 11:35 अय्यूब ४१:११

36 तिग्दा भिसम जम्मान सहे परमेश्वरग्याम खबा हिन्ना।

जम्मान सहे थेसेन सहोबा हिन्ना।

ओच्छे जम्मान सहे थेलान लागिरी सहोबा हिन्ना।

थेतबासेलमा सदन परमेश्वरला मानदेन जयजयकार तगै। आमेन।*

12

परमेश्वरदा सेम निबा बलि

1 थेतबासेलमा ज्योज्यो आले नाना आडागदे, एनीगदेदा परमेश्वरसे ल्हानान दया लबासे लमा परमेश्वरसे कुल्बा अन्छार भ्रबारी एनीगदेसे हाड हाडला लहुइ परमेश्वरदा सेम निबा छोनबोदेन चोखो बलि दोसी परमेश्वरदा जिम्मा पिन्गो भिबा डाला बिन्ती मुला। एनीगदेसे परमेश्वरदा सेमहेनसेन तेन्बाएनोन चुनोन हिन्ना। 2 जम्बुलिडला म्हिगदेला हड्बा बानीबेहोर थोसी थाभ्रउ, बरु एनीगदेसे हाडला सेम परमेश्वरपट्टि दोःसी छार म्हि दोगो। थेहड् लजी भिसम जे एनीगदेसे परमेश्वरला सेमला ताम घोबारी खम्ला। ओच्छे खजिबा ताम ज्यबादेन परमेश्वरदा सेम निबा ओच्छे सत्य हिन्ना भिसी था याड्खम्ला।

3 डाथोरी परमेश्वरला दयामाया मुबासे लमा एनीगदे जम्मादान डाला चु बिन्ती मुला, एनीगदेसे हाडसे हाडदान घेन थाम्हन्गो। तर परमेश्वरसे पिन्बा विश्वासां अन्छार हाड खाहड्बा मुला थे भन्दा घेन दोबारी थाम्हाडगो। 4 चु चा य्हाडला लहुइ हड्बान हिन्ना। तिग्दा भिसम य्हाडला लहुइ गिक मुसैनोन थेरी या, काड, ना, सुड ल्हानान थरीला सहेगदे मुला। तर चु जम्मान सहेगदेसे गे गिकनोन आल। 5 थेहड् लसीन य्हाड ल्हानान मुसैनोन खीष्टदेन छ्याम गिक तबासे लमा य्हाड लहुइ गिक हड्बान हिन्ना, ओच्छे य्हाड जम्मान हाड हाड न्हडरी या, काड, ना, सुड हड्बान हिन्ना।* 6 थेतबासेलमा परमेश्वरसे दयामाया लसी य्हाडदा पिन्बा थरी थरीला मोलमगदे अन्छार य्हाडसे गे लइ। अगमवाणी पाड्बा मोलम याड्बा म्हिसे हाडला विश्वास अन्छार पाड्गै, 7 स्य्हान्दोदा हो लबा मोलम याड्बा म्हिसे सेमहेनसेन हो लगै, स्य्हान्दोदा लोपबा मोलम याड्बा म्हिसे ज्यना लसी लोपगै, 8 स्य्हान्दोदा आँट पिन्बा मोलम याड्बा म्हिसे आँट पिन्गै, स्य्हान्दोदा दान पिन्बा मोलम याड्बा म्हिसे सेमहेनसेन ताड्सी पिन्गै, शासन लबा मोलम याड्बा म्हिसे ज्यना लसी शासन लगै ओच्छे दया लबा मोलम याड्बा म्हिसे सेमहेनसेन ताड्सी दया लगै।*

स्य्हान्दोदा माया लउ

9 एनीगदेसे सुडसे जे आहिन सेमहेनसेन माया लउ। ओच्छे जुन ताम आज्यबा मुला थे तामला संगतनोन थालउ। तर जुन ताम ज्यबा मुला सदन थे अन्छार भ्रउ। 10 ज्योज्यो आले नाना आडा न्हडरी माया लबा हड् लसी जम्मादान माया लउ। ओच्छे एनीगदेदा लबा मान भन्दा स्य्हान्दोदा इन ल्हाना मान लउ। 11 एनीगदे आब्लेना सदन इनसी गे लउ, ओच्छे सेमहेनसेन परमेश्वरदा तेन्गो। 12 एनीगदेसे जुकजुकधोनाला जुनी याड्ला भिसी लबा आशरी ताड्गो, ओच्छे जस्तोन दुख तसैनोन नासी सदन प्रार्थना लसी चिउ। 13 परमेश्वरला म्हिगदेदा खाँचो तबा धुइरी हो लउ, ओच्छे हाडला दिमरी खबा डोनबोदा ज्यना लसी क्योड्गो।

14 एनीगदेदा दुख पिन्बा म्हिगदेदा मोलम पिन्गो। थेनीगदेदा केःबा आहिन, बरु मोलम पिन्गो।* 15 ताड्बा म्हिगदेदेन छ्याम एनीगदेएनोन ताड्गो, ओच्छे दुख तसी क्राबा म्हिगदेदेन छ्याम एनीगदेएनोन क्रागो। 16 जम्मान म्हिगदेदेन छ्याम ढिक्सी चिउ। एनीगदेसे खाइमै घमण्ड थालउ, तर सोजो म्हिगदेदेन छ्याम भ्रउ। ओच्छे हाडसे हाडदान घेन म्हि सहोसी थाभ्रउ।*

17 खालैसे आज्यबा लजी भिदेमा एसे थेदा आज्यबा थालउ। बरु जम्मान म्हिगदेसे ज्यबा भिसी म्हन्बा तामरी जे भ्रउ। 18 खमतेधोना एनीगदे जम्मान म्हिगदेदेन छ्याम ढिक्सी चिउ। 19 डाला सेम

* 11:36 † 12:3 चु पदरी “विश्वास” भिबा चा परमेश्वरसे म्हिगदेदा पिन्बा शक्तिदेन मोलमगदे हिन्ना। * 12:5 † 12:8 † 12:8 † 12:8-11 * 12:14 मत्ती ५:४४; लूका ६:२८ * 12:16 हितो ३:७

निबा ह्योगदे, एनीगदे ह्याडसे खाइमै खालैदेन छ्याम बदला थाकिन्गो, तर परमेश्वरदान जिम्मा पिन्गो। तिग्दा भिसम बचनरीनोन चुहड् भिसी भिबा मुला,

“बदला किन्बा गे डाला हिन्ना,
डाइनोन थेनीगदेदा बदला किन्ना”

भिसी परमप्रभुसे सुड्बा मुला।*

²⁰ बरु,

“एला शत्रु खेन्बा फुड्बा मुसम

थेदा चबा थुड्बा पिन्गो

थेहड् लजी भिसम एला शत्रु ह्याडनोन पे:ला।”†*

²¹ एनीगदे आज्यबा गे लबागदेदेन छ्याम थाब्रेगो, बरु ज्यबा गे लसी थेनीगदेदा ढागो।

13

शासन लबागदेला तहरी चिउ

¹ शासन लबा म्हिगदेसे कुल्बा ताम जम्मासेन ड्यान्तो:मुला। तिग्दा भिसम परमेश्वरसे शासन लबा हक आपिन्नी भिसम खालैसेन शासन लबारी आखम। शासन लबा जम्मान म्हिगदेदा परमेश्वरसेन धम्बा हिन्ना। ² थेतबासेलमा शासन लबा म्हिगदेदा बिरोध लबा म्हिगदेसे परमेश्वरसे कुल्बा तामदा बिरोध लबा हिन्ना। जुन जुन म्हिसे बिरोध लला, थेसे सजाय याड्ला। ³ तिग्दा भिसम शासन लबा म्हिगदे म्राड्सी ज्यबा गे लबा म्हिगदे आहिन, तर आज्यबा गे लबा म्हिगदे जे लोड्मुला। तिग एनीगदे शासन लबा म्हिगदेदेन छ्याम आलोड्ना चिबा सेम मुला? थेहड् भिसम एनीगदेसे ज्यबा गे लउ। जमाहेन्से एनीगदेसे थेनीगदेग्याम स्याबास याड्ला। ⁴ तिग्दा भिसम शासन लबागदे परमेश्वरला गे लबा म्हिगदे हिन्ना। परमेश्वरसे एनीगदेदा ज्यबा लबारीन थेनीगदेदा धम्बा हिन्ना। एसे आज्यबा गे लजी भिसम जे थेनीगदेदेन छ्याम लोड्गो। तिग्दा भिसम थेनीगदेदेन छ्याम सजाय पिन्बा अधिकार मुला। शासन लबा म्हिगदे चा आज्यबा गे लबा म्हिगदेदा सजाय पिन्बा परमेश्वरला गे लबा म्हिगदे हिन्ना। ⁵ थेतबासेलमा परमेश्वरग्याम सजाय आयाड्बारी जे आहिन, तर एनीगदेला सेमला तामला लागिरी एनीगदे शासन लबागदेला तहरी चितो:ला।

⁶ थेतबासेलमान एनीगदेसे तिरो फामुला। तिग्दा भिसम शासन लबा म्हिगदे चा सदन आज्यबा गेगदे लआपुड्बा परमेश्वरला गे लबा म्हिगदे हिन्ना। ⁷ एनीगदेसे तिग तिग लदोमुला थे पूरा लउ, तिरो फातो:बा ग्लारी तिरो फागो ओच्छे मान लतो:बा म्हिदा मान लउ।*

गिकसेम गिकदा माया लउ

⁸ एनीगदेसे स्य्हान्दोला लागिरी लतो:बा तिगै गे बाँकी थाथान्गो, तर गिकसेम गिकदा माया लबारी चा खाइमै थाखलागो। तिग्दा भिसम ह्याडला खिमजेमदा माया लबा म्हिसे चा ठिमरी मुबा जम्मान ताम पूरा लबा हिन्ना। ⁹ “ए स्य्हान्दोदेन छ्याम ब्रेल्सी थाभ्रउ, एसे म्हि थासाइगो, एसे य्हो थालउ, एसे लोभ थालउ,” भिसी कुल्बा तामगदेदेन अर्गु कुल्बा जति तामगदे मुला थे जम्मान तामगदे चा “एसे ह्याडला खिमजेमगदेदा ह्याडदा हड्दोन माया लउ” भिसी कुल्बा ताम न्हडरी स्याप्ला।* ¹⁰ माया लबा म्हिसे ह्याडला खिमजेमदा न्होड्ना आल। थेतबासेलमा माया लबा चा ठिम पूरा लबा हिन्ना।

¹¹ चु जे आहिन, चु धुइ चा य्हाड महेर्बाग्याम रे:तो:बा धुइ हिन्ना भिबा ताम एनीगदेदा थानोन मुला। तिग्दा भिसम डाच्छा य्हाडसे विश्वास लबा धुइरी भन्दा झन दान्दे थार्बा याड्बा धुइ तसी जिन्बा मुला। ¹² म्हुन निसी य्हाल तबारीन छ्याइबा मुला। थेतबासेलमा य्हाडसे धोपधोपरी लबा जम्मान आज्यबा गेगदे खलागे, ओच्छे य्हालला सेना दोसी चिड। ¹³ ओच्छे य्हालरी भ्रबा म्हि दोसी सोजो तसी गे लइ। म्हुनड हड् लसी मोजमजा लबा, ड्य्होइसी भ्रबा, ब्रेल्सी भ्रबा, छाडा तसी भ्रबा,

* 12:19 वयव ३२:३५ † 12:20 ग्रीक ग्योइरी चा “एसे थेला थोबोरी मे भुपरो उम्ला” भिसी भिबा मुला। * 12:20 हितो २५:२१-२२ * 13:7 मत्ती २२:२१; मर्कु १२:१७; लूका २०:२५ * 13:9 प्रस्था २०:१३-१५, १७; वयव ५:१७-१९; लेवी १९:१८

छेबा बड्बा लबा, ओच्छे डाह लबा गेगदे य्हाडसे ख्लागे। 14 तर प्रभु येशू ख्रीष्ट हड्बान दोसी भ्रउ, ओच्छे पापी बानीबेहोर अन्छार ल्हुइला लागिरी जे लइ म्हन्बा थे लसी थाभ्रउ।

14

स्य्हान्दोदा दोष थालउ

1 विश्वासरी कमजोर मुबागदेदा हाडलान ज्योज्यो आले नाना आडा म्हन्गो। तर थेनीगदेसे म्हन्बा तामगदेला बिरोध लबाला लागिरी आहिन।* 2 कोइ कोइसे चा जम्मान सहे चबारी तमुला भिसी विश्वास लमुला, तर विश्वासरी कमजोर मुबा म्हिगदेसे चा ढापढुप जे चमुला। 3 एनी जम्मान सहे चबागदेसे ढापढुप जे चबागदेदा जजा थाम्हन्गो। थेहड् लसीन एनी आचबागदेसेनोन चबागदेदा दोष थालउ। तिग्दा भिसम चबा म्हिगदेदाएनोन परमेश्वरसे हाडला कोलागदे म्हन्बा मुला। 4 स्य्हान्दोला नोकरदा दोष लबा ए खाल हिनना? थेला हाडलान मालिकसे गा नोकरसे ज्यबा गे लबा हिनना कि आज्यबा गे लबा हिनना भिसी निसाफ लला। प्रभुसेन हाडला म्हिगदेदा जम्मान गेरी ज्यबा तना लला। तिग्दा भिसम थेदा हो लबा शक्ति प्रभुदेन छ्याम मुला।

5 कोइ कोइ म्हिसे अर्गु धिन भन्दा चु धिन ज्यबादेन मुल हिनना भिसी म्हन्मुला। तर कोइ कोइसे चा जम्मान धिन ओस्पन हिनना। जम्मान म्हिगदेसे हाड हाडला सेमरी विश्वास लबा अन्छार ढुकक ततो:ला।† 6 खजिबै धिनदा ज्यबादेन मुल धिन हिनना भिसी म्हन्बा म्हिसे परमेश्वरदा मान लबाला लागिरी म्हन्बा हिनना। स्या चबा म्हिगदेसे चबा धुइरी परमेश्वरदा मान लमुला। तिग्दा भिसम थेनीगदेसे परमेश्वरदा धन्यवाद पिन्मुला। ओच्छे स्या आचबा म्हिगदेसेनोन आचबा धुइरी परमेश्वरदा मान लमुला। तिग्दा भिसम थेनीगदेसे परमेश्वरदा धन्यवाद पिन्मुला। 7 तिग्दा भिसम य्हाड खालैनोन हाडलान लागिरी सोएनोन आसो ओच्छे सिएनोन आसि। 8 य्हाड सोसै प्रभुला लागिरीन सोला ओच्छे सिसैनोन प्रभुला लागिरीन सिला। थेतबासेलमा य्हाड सिसै सोसै प्रभुलान हिनना। 9 थेतबासेलमा ख्रीष्ट सिजी ओच्छे सिबाग्याम सोसी सिबादेन सोबागदे जम्मालान प्रभु दोजी

10 थेहड् भिसम, तिग्दा एनीगदेसे हाडला ज्योज्यो आले नाना आडागदेदा दोष लबा? ओच्छे तिग्दा थेनीगदेदा जजा म्हन्बा? तिग्दा भिसम परमेश्वरसे निसाफ लबा धुइरी य्हाड जम्मान थेला डाच्छापट्टि रापतो:ला।* 11 तिग्दा भिसम बचनरीनोन चुहड् भिसी भिबा मुला,

“ च्यागो, डाइ घान फासी पाड्ला,

जम्मासेन डादा फ्या लला,

ओच्छे जम्मासेन डादा परमेश्वर भिसी

जयजयकार लला†

भिसी प्रभुसे सुड्बा मुला।”*

12 थेतबासेलमा य्हाड जम्मासेन परमेश्वरदा हाड हाडला हिसाब उन्तो:ला।

स्य्हान्दोदा फसब थालउ

13 थेतबासेलमा य्हाडसे गिकसेम गिकदा दोष आलइ। बरु दाहेन्से हाडला ज्योज्यो आले नाना आडागदेदा न्होड्ना लबा गे खाइमै आलबारी पक्का लइ। 14 प्रभु येशूदा विश्वास लबासे लमा चु ताम डादा था मुला, खजिबै चबा सहे हाडनोन चीबु आत। तर खालै म्हिसे खजिबै चबा सहे चीबु हिनना भिसी म्हन्जी भिसम थेला लागिरी थे चबा सहे चीबुन तला। 15 एसे चबा सहेसे लमा एला आलेला विश्वासदा ज्यबा आतनी भिसम एसे हाडला आलेदा माया लबा आरे। ख्रीष्टसे हाडला ज्याननोन पिन्सी सोना लबा एला आले एसे चबा सहेसे लमा नाश थातगै। 16 थेतबासेलमा एदा ज्यबा छोर्बा तामदा आज्यबा भिसी स्य्हान्दोसे बिरोध थालगै। 17 तिग्दा भिसम परमेश्वरला यहुल्सा चा चबा थुड्बा ताम आहिन। तर चु चा परमेश्वरदा सेम निबा म्हि दोबाला बारैरी, शान्ति पिन्बाला बारैरी ओच्छे ताड्बा तामला बारैरी हिनना। चु जम्मान परमेश्वरला आत्माग्याम खबा हिनना। 18 चुहड्

* 14:1 कल २:१६ † 14:5 चु पदरी पावलसे यहूदी धर्मला ठिम अन्छार ज्यबा धिन भिसी पाड्बा मुला। * 14:10 २ कोर

५:१० * 14:11 यशै ४५:२३

लसी ख्रीष्टदा तेन्बा म्हिसे परमेश्वरदा ताड्ना लला, ओच्छे म्हिगदेसेनोन थेदा ज्यबा म्हि भिसी पाड्ला।

19 थेतबासेलमा य्हाडसे सदन हाड हाड न्हडरी शान्ति पिन्बा तामदेन गिकसेम गिकदा विश्वासरी कोड्ना लबा गे जे लड। 20 एसे चबा सहेला लागिरीन परमेश्वरला गेदा न्होड्ना थालउ। पाड्ना तों:मा जम्मान चबा सहे चोखो मुला, तर हाडसे चबा सहेग्याम स्य्हान्दोदा न्होड्ना लबा चा ज्यबा आहिन। 21 स्या चमा, ड्य्होडबा सहे थुड्मा एला ज्योज्यो आले नाना आडाला विश्वास न्होड्ला भिसम एसे आचबादेन आथुड्बान ज्यबा तला।

22 एसे जुन विश्वास लबा मुला थे विश्वासदा एदेन परमेश्वर न्हडरी थान्गो। जुन म्हिसे चु ताम ठीक हिन्ना भिसी हाडला सेमरी तिगै आज्यबा आमहन्ना पक्का लला थे म्हि ताड्ला। 23 तर खालै म्हिसे तिगै सहे शङ्का लसी चजी भिसम थे म्हि परमेश्वरला डाच्छा दोषी तला। तिग्दा भिसम विश्वास अन्छार आलबा जुन ताम तसैनोन पाप हिन्ना।

15

स्य्हान्दोदा ह्यो लउ

1 य्हाड विश्वासरी कोड्बा मुबागदेसे विश्वासरी कमजोर मुबागदेदा ह्यो लतो:ला। ओच्छे य्हाडसे हाडदा ज्यबा तबा गे जे आहिन, तर स्य्हान्दोदाएनोन वास्ता लतो:ला। 2 य्हाड जम्मासेन ख्रीष्टदा विश्वास लबागदेदा ज्यबा तगै, ओच्छे थेनीगदे विश्वासरी कोड्बा तगै भिसी य्हाडसे थेनीगदेदा वास्ता लतो:ला। 3 तिग्दा भिसम ख्रीष्टसेनोन हाडदा ज्यबा तबा गे जे आलनी। परमेश्वरला बचनरीनोन “हाडदा हेला लबागदेसे डादाएनोन हेला लबा मुला” भिसी भिबा मुला।* 4 तिग्दा भिसम बचनरी भिबा जम्मान तामगदे य्हाडदा लोपबाला लागिरी भिबा मुबा, चु बचनग्यामसेन य्हाडसे लबा आश याड्बाला लागिरी जस्तोन दुख तसैनोन नाबारी आँट याड्ला।

5 दुख नाखम्बा शक्तिदेन आँट पिन्बा परमेश्वरसेन एनीगदेदा ख्रीष्ट येशू हड्बान दोसी भ्रबारीदेन हाड हाड न्हडरी ढिक्सी चिखम्बा सेम पिन्गै। 6 ओच्छे एनीगदे जम्मान ढिक्सी सुड गिक तसी य्हाडला प्रभु येशू ख्रीष्टला आबा परमेश्वरला जयजयकार लबारी खम्गै।

अर्गु य्हुलला म्हिगदेला लागिरी थार्बा पिन्बा समाचार

7 थेतबासेलमा ख्रीष्टसे एनीगदेदा माया लबा हड् लसी परमेश्वरदा मान लबारी एनीगदेसे हाड हाड न्हडरी गिकसेम गिकदा मान लउ। 8 एनीगदेसे डाला ताम ड्यान्गो, येशू ख्रीष्टसे लबा गेसे परमेश्वर विश्वास लखम्बा परमेश्वर हिन्ना भिसी य्हूदीगदेदा उन्बारी हिन्ना। ओच्छे येशू ख्रीष्टसे य्हाडला आखे म्हेमेदेन छ्याम लबा कबुल पूरा लजी। 9 थेहड् लसीन अर्गु य्हुलला म्हिगदेसे परमेश्वरसे लबा दयाला लागिरी परमेश्वरला जयजयकार लगै भिसीएनोन येशू ख्रीष्टसे चु गे लबा हिन्ना। बचनरीनोन चुहड् भिसी भिबा मुबा,

“थेतबासेलमा डाइ अर्गु य्हुलला म्हिगदेला गुडरी हाडला जयजयकार लला,
ओच्छे हाडलान जयजयकार तबा व्हाइ गोला।”*

10 दो:सी चुहड् भिसीनोन भिबा मुला,

“अर्गु य्हुलला म्हिगदे,

परमेश्वरला म्हिगदेदेन छ्याम ताड्गो।”*

11 दो:सीनोन चुहड् भिसीनोन भिबा मुला

“अर्गु य्हुलला जम्मान म्हिगदे,

प्रभुलान जयजयकार लउ,

ओच्छे जम्मान म्हिगदेसे

प्रभुला जयजयकार लगै।”*

* 15:3 भजन ६९:९ * 15:9 २ शमू २२:५०; भजन १८:४९ * 15:10 वयव ३२:४३ * 15:11 भजन ११७:१

12 दोःसी यशैया अगमवक्तासेनोन चुहड् भिसी पाड्बा मुला,
 “यिशैला वंशग्याम म्हि गिक फेप्खला,
 थेसे अर्गु य्हुलला म्हिगदेथोरी शासन लला,
 ओच्छे अर्गु य्हुलला म्हिगदेसेनोन
 थेथोरी आश लला।”*

13 आश तना लबा परमेश्वरदा विश्वास लबासे लमा थेसेन शान्ति पिन्सी एनीगदेदा पूरान ताड्ना लगै। थेहड् लसम एनीगदेसे लबा आश परमेश्वरला आत्माला शक्तिग्याम ल्हेबान निला।

अर्गु य्हुलला म्हिगदेला लागिरी पावलसे लबा गे

14 ज्योज्यो आले नाना आडागदे, एनीगदे ल्हानान ज्यबा मुला, ओच्छे एनीगदेला जम्मान ज्ञान बुद्धिसे गिकसेम गिकदा लोपबारी खम्मुला भिबा ताम डादा था मुला। 15 तसैनोन परमेश्वरसे डादा दयामाया लबासे लमा एनीगदेदा ढन्ना लबाला लागिरी डाइ चु तामगदे भिबारी आँट लबा मुला। 16 परमेश्वरसे दयामाया लसी डादा अर्गु य्हुलला म्हिगदेला गुडरी गे लबाला लागिरी ख्रीष्ट येशूला मुल चेला सहोजी। ओच्छे अर्गु य्हुलला म्हिगदे परमेश्वरला आत्मग्याम चोखो तसी परमेश्वरदा सेम निबा भेटी दोगै भिसी डाइ परमेश्वरला मन्दिररी पूजा लबा म्हि हड्बा दोसी थार्बा पिन्बा समाचार थेःना लजी।

17 थेतबासेलमा ख्रीष्ट येशूसे डाग्याम परमेश्वरला लागिरी डाइ लतोःबा गे लम्याड्मा डा ल्हानान ताड्बा मुला। 18 ख्रीष्टदा विश्वास लबा अर्गु य्हुलला म्हिगदेदा परमेश्वरसे कुल्बा अनछार भ्रबा म्हि सहोबारी ख्रीष्टसे डाग्याम लबा तामदेन गेला बारैरी जे डाइ पाड्बारी भड लला। 19 डाइ परमेश्वरला आत्माला शक्तिग्याम उदेकला चिनुगदेदेन उदेकला गेगदे लजी। थेहड् लसीन डाइ यरूशलेमहेन्से इल्लुरिकन भिबा य्हुल्साधोनान ख्रीष्टला थार्बा पिन्बा समाचार पूरान थेःना लजी। 20 स्यहान्दोसे थान्बा जगथोरी दिम सहोबा म्हिसे हड् लसी स्यहान्दोसे थेःना लबा ग्लारी थेःना लबा डाला सेम आरे। थेतबासेलमा ख्रीष्टला मिन आथेःबादेन खालैसेन थेःना आलबा ग्लारी जे थार्बा पिन्बा समाचार थेःना लबा डादा सेम मुला। 21 बचनरीनोन चुहड् लसीन भ्रिबा मुला,
 “थेला बारैरी जुन म्हिदा खाइमै पाड्बा आरे,
 थेनीगदेसे थेदा म्नाड्ला।

ओच्छे थेला बारैरी जुन म्हिसे खाइमै थेःबा आरे
 थेनीगदेसे परमेश्वरदा डोसेला”*

पावल रोमरी निड म्हन्बा

22 थेतबासेलमान डाइ चु ग्लागदेरी ख्रीष्टला समाचार थेःना लसी भ्रबासे लमा डा ल्हानान रेम एनीगदे मुबा ग्लारी खबारी म्हाइसैनोन खबारी आखम्नी। 23 तर दाहेन्से चु ग्लारीक्यार डाइ थार्बा पिन्बा समाचार थेःना लसी जिन्बा मुला। ल्हानान दिडहेन्से एनीगदेदेन छ्याम हुप तबा सेम मुबासे लमा, 24 डा स्पेन भिबा य्हुल्सारी निबा धुइरी एनीगदेदेन छ्याम चिसी तिगै धिनधोना संगती लबा सेम मुला। ओच्छे एनीगदेदेन छ्याम तिगै धिनधोना चिमाहेन्से डा थेग्याम स्पेनरी निबा धुइरी एनीगदेसे डादा ह्यो लला भिसी डाइ म्हन्बा मुला। 25 तर दान्दे चा डा परमेश्वरला म्हिगदेदा ह्यो लबारी यरूशलेम शहररी निबान मुला। 26 तिग्दा भिसम माकेडोनियादेन अखैया भिबा ग्लारी मुबा परमेश्वरला म्हिगदेसे ताड्सी यरूशलेम शहररी मुबा परमेश्वरला म्हिगदे न्हडला प्राडबोगदेदा टाडगा पुइखबा मुला। 27 चु टाडगा पिन्बारी थेनीगदेदा ल्हानान सेम मुबा। तर थेनीगदेसे यहूदीगदेदा पिन्बा टाडगा चा थेनीगदेसे फातोःबा छे हड्बान हिन्ना। तिग्दा भिसम अर्गु य्हुलला म्हिगदेसे याड्बा स्वर्गला मोलम यहूदीगदेग्यामसे याड्बा हिन्ना। 28 थेतबासेलमा चु टाडगा हुप्सी थेनीगदेदा भोर्सी पिन्माहेन्से एनीगदे मुबा ग्लारी खसी डा स्पेनरी निला। 29 ओच्छे डा एनीगदे मुबा ग्लारी खमा येशू ख्रीष्टसे पिन्बा मोलमगदेएनोन भसी खला।

† 15:12 “यिशै” चा दाऊद ग्लेला आबा हिन्ना। * 15:12 यशै ११:१० * 15:21 यशै ५२:१५

30 ज्योज्यो आले नाना आडागदे, यहाडला प्रभु येशू ख्रीष्टदेन परमेश्वरला आत्मासे पिन्बा मायाग्याम डाला लागिरी डादेन छ्यामनोन परमेश्वरदेन छ्याम प्रार्थना लसी पिन्गो भिबा डाला बिनती मुला। 31 ख्रीष्टदा विश्वास आलबा यहूदिया अञ्चलरी मुबा म्हिगदेग्याम जोगब तबारी खमगै भिसी डाला लागिरी परमेश्वरदेन छ्याम प्रार्थना लसी पिन्गो। ओच्छे यरूशलेमरी मुबा परमेश्वरला म्हिगदेदाएनोन डाइ हुप्सी भबा टाडगा सेम निगै भिसीएनोन प्रार्थना लसी पिन्गो। 32 थेहड् लसीन परमेश्वरला सेम मुसम डा एनीगदे मुबा ग्लारी ताड्सी ताड्सी खला। ओच्छे डा एनीगदेदेन छ्यामनोन चिसी बल्पबा न्हला। 33 शान्ति पिन्बा परमेश्वर एनीगदे जम्मानदेन छ्याम तगै। आमेन।

16

फ्याफुल्ला

1 दाहेनसे डाइ मण्डलीदा हो लबा यहाडला आडा फिबी गाते ज्यबा मुला भिसी एनीगदेदा डोसेना लला। थे किंक्रिया भिबा ग्लाला मण्डलीरी हो लबा म्हि हिन्ना। 2 थेसे ल्हानान म्हिगदेदा हो लबा मुला ओच्छे डादाएनोन ल्हानान हो लबा मुला। थेतबासेलमा परमेश्वरला म्हिगदेदा मान लबा हड् लसी थेदाएनोन मान लउ। ओच्छे एनीगदेसे थेदा तिग तोःबा थे सहेरी खमतेधोना हो लउ।

3 डादेन छ्यामनोन ख्रीष्ट येशूला गे लबा प्रिस्कादेना थेला हेम्बो अकिलासदा फ्याफुल्ला। 4 थेनीगदेसे डादा जोगब लबाला लागिरी हाडला ज्याननोन पिन्बारी तयार तजी। डाइ थेनीगदेदा खाइमै म्लेःबारी आखम, डाइ जे आहिन, अर्गु यहूलला जम्मान मण्डलीगदेसेएनोन थेनीगदेदा म्लेःबारी आखम। 5 थेनीगदेला दिमरी मुबा मण्डलीदाएनोन फ्याफुल्ला।

ओच्छे एशिया अञ्चलरी जम्मान भन्दा डाच्छा ख्रीष्टदा विश्वास लबा डाला सेम निबा हो इपेनितसदा फ्याफुल्ला। 6 एनीगदेला लागिरी ल्हानान गे लसी पिन्बा मरियमदाएनोन फ्याफुल्बा मुला भिसी पाड्सी पिन्गो। 7 डादेन छ्यामनोन झ्यालखानरी मुबा डाला यहूदी होदेन एन्ड्रोनिकस ओच्छे युनियस आडादा फ्याफुल्बा मुला भिसी पाड्सी पिन्गो। चेलागदे न्हडरी थेनीगदेएनोन जम्मासेन डोसेबा मुल चेलागदे हिन्ना। डाइ भन्दा डाच्छा थेनीगदेसे ख्रीष्टदा विश्वास लबा मुबा।

8 ओच्छे प्रभुरी डाला सेम निबा हो एम्प्लीआतसदाएनोन डाइ फ्याफुल्बा मुला भिसी पाड्सी पिन्गो। 9 यहाडदेन छ्यामनोन ख्रीष्टला लागिरी गे लबा उर्बानसदेन डाला सेम निबा हो सूताखुसदाएनोन फ्याफुल्बा मुला भिसी पाड्सी पिन्गो। 10 अपेल्लेसदाएनोन फ्याफुल्ला। थेसे सेमहेनसे ख्रीष्टदा लबा विश्वासला ताम उन्बा मुला। थेहड् लसीन अरिस्तोबुलसला दिमरी मुबागदे जम्मादान फ्याफुल्ला। 11 डाला यहूदी आले हेरोदियनदेन प्रभुदा विश्वास लबा नर्किससला दिमरी मुबागदे जम्मादान फ्याफुल्ला।

12 प्रभुला ल्हानान गे लबा त्रुफेना आडादेन त्रुफोसादा ओच्छे प्रभुला लागिरी ल्हानान गे लबा डाला सेम निबा आडा परसीसदा फ्याफुल्ला। 13 प्रभुसे धम्बा रूफसदेन थेला आमादा डाइ फ्याफुल्बा मुला भिसी पाड्सी पिन्गो। थेला आमासे डादाएनोन हाडलान झादा हड् लसी माया लमुला। 14 ओच्छे असिंक्रितस, फ्लेगन, हर्मेस, पत्रोबासदेन हर्मास ओच्छे थेनीगदेदेन छ्याम मुबा जम्मान ज्योज्यो आले नाना आडागदेदाएनोन फ्याफुल्ला। 15 थेहड् लसीन फिलोलोगस, युलिया आडा, नेरियसदेन थेला आडा, ओलिम्पास ओच्छे थेनीगदेदेन छ्याम मुबा परमेश्वरला म्हिगदे जम्मादान फ्याफुल्ला। 16 एनीगदे हाड हाड न्हडरी गिकसेम गिकदा सेमहेनसेन माया लसी फ्याफुल्गो। डन्से सेमहेनसेन माया लसी फ्याफुल्बा मुला भिसी जम्मान मण्डलीगदेसे पाड्बा मुला।

17 ज्योज्यो आले नाना आडागदे, एनीगदेदा लोपबा तामदा बिरोध लबादेन हाडसे हाडदान विश्वासी भिसी एनीगदेला विश्वासदा न्होडना लबारी म्हाइबा म्हिगदे म्राड्सी होशियार तसी चिउ। थेहड्बा म्हिगदेला संगतनोन थालउ भिबा डाला बिनती मुला। 18 तिगदा भिसम थेहड्बा म्हिगदेसे

† 16:3 ग्रीक बाइबलरी चु पददेन १ कोरिन्थी १६:१९ पदरी जे प्रिस्का भिसी भिबा मुला। अर्गु जम्मान ग्लारी प्रिस्किला भिसी भिबा मुला। प्रिस्का भिबादेन प्रिस्किला भिबा म्हि गिकनोन हिन्ना।

य्हाडला प्रभु येशू ख्रीष्टला लागिरी आहिन, तर ह्हाडला फो न्हबाला लागिरी जे गे लमुला। ओच्छे ज्यबा ज्यबा ताम लसी सोजो म्हिगदेदा धोका पिन्मुला।¹⁹ एनीगदे परमेश्वरसे कुल्बा अन्छार भ्रमुला भिबा ताम जम्मादान था मुला। चु म्राड्सी डाएनोन ल्हानान ताड्बा मुला। थेहड् लसीन ज्यबा ज्यबा तामला बारेरी एनीगदेसे बुद्धि याड्गै तर आज्यबा तामला बारेरी तिगै था आतगै भिसी डाड म्हनबा मुला।²⁰ शान्ति पिन्बा परमेश्वरसे शैतानदा योनान एनीगदेला काड धिरी थान्ना। य्हाडला प्रभु येशू ख्रीष्टला दयामाया एनीगदेदेन छ्याम तगै।

²¹ डादेन छ्याम गे लबा तिमोथीसे एनीगदेदा फ्याफुल्ला भिसी पाड्बा मुला। थेहड् लसीन डाला यहूदी आले लुकियस, यासोनदेन सोसिपात्रोससेनोन एनीगदेदा फ्याफुल्बा मुला।²² पावलला लागिरी चु चिठी भिसी पिन्बा प्रभुरी ह्हाडनीला आले डा तर्तियससेनोन जम्मादान फ्याफुल्ला।²³ डा चिबा दिमला धनी गायसदेन थेला दिमरी मुबा मण्डलीगदेसेनोन फ्याफुल्ला भिसी पाड्बा मुला। ओच्छे चु शहरला कोष अध्यक्ष इरास्तसदेन आले क्वार्टससेनोन एनीगदेदा फ्याफुल्बा मुला।²⁴ य्हाडला प्रभु येशू ख्रीष्टला दयामाया एनीगदेदेन छ्याम तगै। आमेन।†

²⁵ य्हाड जम्मासेन परमेश्वरदा मान लइ। थार्बा पिन्बा ख्रीष्टला बारेला ताम दडबोहेन्सेन छुम्सी थान्बा मुबा। तर दान्दे एनीगदेसे चु ताम था याड्बा मुला। चु ताम डाड थेःना लबा येशू ख्रीष्टला बारेरी पाड्बा तामग्यामसे एनीगदेसे था याड्बा मुला।²⁶ थेतबासेलमा दान्दे चु जम्मान तामगदे अगमवक्तासे भिबा तामगदेग्याम था याड्ना लमुला। ओच्छे जम्मासेन विश्वास लसी परमेश्वरसे कुल्बा ताम ड्यान्गै भिसी खाड्मै म्हासी आनिबा परमेश्वरसे कुल्बा तामग्याम जम्मान यहूलला म्हिगदेसे चु जम्मान ताम थेःबा मुला।²⁷ ओच्छे जम्मान ताम था याड्बा परमेश्वर गिक जेला येशू ख्रीष्टग्याम सदन मानदेन जयजयकार तगै। आमेन।

† 16:24 चु पदला ताम ल्हाना हड्बा ग्रीक बाइबलरी भिबा आरे।

पावलसे कोरिन्थला विश्वासीगदेदा भिबा डाच्छारेमला चिठी चु चिठीला बारेरी पाड्तोःमा

भिबा म्हि: येशूला मुल चेला पावलसे भिबा मुबा। चु चिठी भिबाला लागिरी पावलदा सोस्थेनेस भिबा म्हिसे हो लबा मुबा (१ कोरिन्थी १:१)।

भिबा ग्ला: एशिया अञ्चलला एफिसस शहररी भिबा मुबा।

भिबा साल: ओस्पन ईश्वी संवत् ५५-५६ (विक्रम संवत् ११२-११३) सालरी भिबा मुबा।

खाल्दा भिबा: कोरिन्थ शहररी मुबा विश्वासीगदेदा भिबा मुबा।

पावलसे चु चिठी कोरिन्थला विश्वासीगदेदा डाच्छारेम भिबा मुबा। कोरिन्थ शहर चा ग्रीस भिबा यहुल्साला ग्लेखाड मुबा। पावलला धुइरी कोरिन्थसे अर्गु जम्मान यहुल्सादेन छ्यामएनोन ढिक्सी गे लबा मुबा। थे शहररी थरी थरीला ल्हानान रिमठिमदेन धर्मगदे तेन्बा म्हिगदे मुबा। थेहड् लसीन नइबा गे लबा म्हिगदेएनोन मुबा। पावलसे थे शहररी थार्बा पिन्बा समाचार थेःना लमा यहुदीगदेसे भन्दा अर्गु यहुलला ल्हानान म्हिगदेसे येशूदा विश्वास लजी। ओच्छे पावलसे थेरी मण्डली गिक सहोजी।

कोरिन्थला मण्डलीरी छेबा बड्बा, नइबा बानीबेहोरदेन स्य्हान्दोदेन छ्याम ब्रेल्सी भ्रबा हड्बा नइबा तामगदे मुबा। थेहड् लसीन ब्याहला बारेरी, ज्ञान बुद्धिला बारेरी, मण्डलीला ठिमला बारेरीदेन परमेश्वरला आत्मासे पिन्बा मोलमला बारेरी ओच्छे सिबाग्याम सोबाला बारेरी ड्योइबा तामगदे मुबा। चु जम्मान तामगदेला बारेरी पावलदा ज्ञान बुद्धि मुबासे लमा थेसे चु चिठीग्याम कोरिन्थला विश्वासीगदेदा ज्यना लसी घोना लजी।

परमेश्वरसे हाडला म्हिगदेदा पिन्बा मोलमगदे न्हडरी माया चा जम्मान भन्दा ज्यबा हिन्ना भिसी १३ अध्यायरी भिबा मुला।

मुल तामगदे

फ्याफुल्बादेन धन्यवाद पिन्बा १:१-९

मण्डली न्हडरी आढिक्बा १:१०-४:२१

नइबा गेगदे ख्लातोःबा ५:१-६:२०

ब्याह लबाला बारेरी पाड्बा ७:१-७:४०

ख्रीष्टदा तेन्बागदेदेन मूर्तिदा तेन्बागदे ८:१-११:१

मण्डली न्हडरी प्रभुदा तेन्बा धुइरी था ततोःबा ताम ११:२-१४:४०

ख्रीष्टदेन ख्रीष्टदा विश्वास लबागदे सिबाग्याम सोबा १५:१-५८

यरूशलेमरी मुबा परमेश्वरला म्हिगदेला लागिरी भेटी १६:१-४

चिठीला थुमरी भिबा ताम १६:५-२४

पावलसे कोरिन्थला विश्वासीगदेदा भिबा डाच्छारेमला चिठी

1 लाससो, परमेश्वरसे म्हन्बा अन्छार ख्रीष्ट येशूला मुल चेला दोबारी धम्बा डा पावलदेन यहाडला आले सोस्थेनेसग्यामा[†] फ्याफुल्ला! 2 चु चिठी डन्से कोरिन्थ शहररी मुबा परमेश्वरला मण्डलीला म्हिगदेदा भिबान मुला। परमेश्वरसे एनीगदेदा हाडलान म्हिगदे दोबारी ख्रीष्ट येशूग्याम चोखो सहोबा मुला। थेसे प्रभु येशू ख्रीष्टदा तेन्बा जम्मान ग्लारी मुबा म्हिगदेदा हाडला म्हि सहोबा हड् लसीन एनीगदेदाएनोन हाडला म्हि सहोबारी ड्योइबा मुला। थेनीगदेदेन यहाडला प्रभु गिकनोन हिन्ना।* 3 यहाडला परमेश्वर आबादेन प्रभु येशू ख्रीष्टसे एनीगदेदा दयामायादेन शान्ति पिन्गै।

† 1:1 सोस्थेनेस चा कोरिन्थ शहरला यहुदी नेता मुबा। थेसे पावलग्याम थार्बा पिन्बा समाचार थेःसी प्रभु येशूदा विश्वास लबा मुबा।

* 1:2 मुल १८:१

पावलसे परमेश्वरदा धन्यवाद पिन्बा

4 एनीगदे ख्रीष्ट येशूदेन छ्याम गिक तसी परमेश्वरसे एनीगदेदा दयामाया लबासे लमा डाइ एनीगदेला लागिरी सदन डाला परमेश्वरदा धन्यवाद पिन्बा मुला। 5 एनीगदे ख्रीष्ट येशूदेन छ्याम गिक तबासे लमा एनीगदेदा परमेश्वरला बारेरी ज्यना लसी ताम पाङ्खम्बा शक्तिदेन जम्मान ताम घोखम्बा ज्ञान बुद्धि पिन्बा मुला। 6 तिग्दा भिसम ख्रीष्टला बारेरी डन्से पाङ्मा सत्य हिन्ना भिसी एनीगदेदा पक्का मुला। 7 थेतबासेलमा य्हाडला प्रभु येशू ख्रीष्ट दोःसी फेपखबा धुइ आततेधोना भ्रान्सी चिमा परमेश्वरदा तेन्बाला लागिरी एनीगदेदा तोःबा जम्मान मोलम याङ्बा मुला। 8 ओच्छे य्हाडला प्रभु येशू ख्रीष्ट दोःसी फेपखमा एनीगदेदा तिगै दोष आरेबा म्हि सहोबाला लागिरी परमेश्वरसेन लिच्छाधोना एनीगदेला विश्वास कोडुना लला। 9 परमेश्वर विश्वास लखम्बा परमेश्वर हिन्ना। थैसे हाडला झा य्हाडला प्रभु येशू ख्रीष्टदेन छ्याम ढिक्सी सेम गिक तबारी एनीगदेदा ड्योइबा मुला।

मण्डली न्हडरी आढिक्बा

10 ज्योज्यो आले नाना आडागदे, दाहेन्से डाइ एनीगदेदा य्हाडला प्रभु येशू ख्रीष्टला अधिकारग्याम एनीगदे हाड हाड न्हडरी ढिक्सी चिउ भिबा डाला बिन्ती मुला। ओच्छे मण्डली न्हडरी तिगै आढिक्बा ताम खआपुङ्गो। बरु एनीगदेसे लबारी म्हाइबा तामगदेरी सेम गिक तसी चिउ। 11 तिग्दा भिसम डाला ज्योज्यो आले नाना आडागदे, एनीगदे हाड हाड न्हडरी कल लमुला भिबा ताम डादा क्लोए भिबा महिला म्हेमेगदे न्हडला खालैसे पाङ्जी। 12 एनीगदेला बारेरी डाइ थेःबा ताम चा चुनोन हिन्ना, एनीगदे हाड हाड न्हडरी कोइसे “डा पावलला हिन्ना,” कोइसे “डा अपोल्लोसला हिन्ना,” कोइसे “डा पत्रुसला हिन्ना” ओच्छे कोइसे “डा ख्रीष्टला हिन्ना” भिसी पाङ्मुला रो।*

13 तिग ख्रीष्ट भो लबा मुला? तिग एनीगदेला लागिरी डा पावल कुसरी सिबा हिन्ना? ओच्छे डा पावलला मिनरी एनीगदेसे बपतिसमा किन्बा हिन्ना? आहिन। 14 डाइ क्रिसपसदेन गायसदा बाहेक स्यहान्दो खालैदा बपतिसमा आपिन्नी, परमेश्वरदा धन्यवाद तगै।* 15 थेतबासेलमा डाला मिनरी बपतिसमा किन्जी भिसी एनीगदे खालैसेन पाङ्आम्याङ्। 16 हिन्बाम, डाइ स्तिफनासला दिमला जम्मान म्हिगदेदानोन बपतिसमा पिन्जी। चु बाहेक डाइ स्यहान्दो खालैदा बपतिसमा पिन्जी कि आपिन्नी थे डाइ ढन्बा आरे।* 17 तिग्दा भिसम बपतिसमा पिन्बारी आहिन, तर थार्बा पिन्बा समाचार थेःना लबाला लागिरी ख्रीष्टसे डादा पुइबा हिन्ना। चु तामगदे डाइ हाडलान ज्ञान बुद्धिग्याम पाङ्बा आहिन। चुदे डाइ हाडलान ज्ञान बुद्धिग्याम पाङ्जी भिसम ख्रीष्ट कुसरी सिबा खेरो निला।

ख्रीष्टनोन परमेश्वरला ज्ञानदेन शक्ति हिन्ना

18 ख्रीष्ट कुसरी सिबाला बारेला समाचार नाश तबागदेसे मूर्ख ताम हिन्ना भिसी म्हनमुला। तर य्हाड थार्बा याङ्बागदेला लागिरी चा परमेश्वरला शक्ति हिन्ना। 19 परमेश्वरला बचनरीनोन चुहड् भिसी भिबा मुला,

“डाइ बुद्धि मुबागदेला बुद्धि नाश लला

ओच्छे चलाकगदेला घोखम्बा शक्ति म्हाना लला।”*

20 खइ, बुद्धि मुबा म्हिगदे खानड मुला? खइ, यहूदी धर्मगुरुगदे खानड मुला? ओच्छे ल्हानान ताम पाङ्बा चु धुइला म्हिगदे खइ? च्यागो, परमेश्वरसे जम्बुलिडला ज्ञान बुद्धिदा गे आखेल्बा सहोबा मुला।* 21 जम्बुलिडला म्हिगदेसे हाडला ज्ञान बुद्धिग्याम परमेश्वरदा डोआसे भिबा ताम परमेश्वरसे हाडला ज्ञान अन्छार म्हनजी। बरु जम्बुलिडला म्हिगदेसे गे आखेल्बा ताम हिन्ना भिसी म्हनबा डन्से थेःना लबा थार्बा पिन्बा समाचाररी विश्वास लबा म्हिगदेदा थार्ना लबा परमेश्वरदा ज्यबा छोर्जी।

† 1:12 चु पदरी पत्रुसदा ल्हानान हड्बा बाइबलरी केफास भिसी भिबा मुला। पत्रुस भिबादेन केफास भिबा म्हि गिकनोन हिन्ना।

* 1:12 मुल १८:२४ * 1:14 मुल १८:८; १९:२९; रोमी १६:२३ * 1:16 १ कोर १६:१५ * 1:19 यशै २९:१४ * 1:20 अय्यूब १२:१७; यशै १९:१२; ३३:१८; ४४:२५

22 च्यागो, यहूदीगदेसे चा उदेकला चिनु उन्गो भिसी पाङ्मुला। ओच्छे अर्गु यहूलला म्हिगदेसे चा जम्बुलिडला ज्ञान बुद्धि म्हाइमुला। 23 तर डन्से क्रुसरी साइबा ख्रीष्टला बारेरी पाङ्मुला। चु ताम यहूदीगदेला लागिरी चा छेर्ना लबा ताम दोजी, ओच्छे अर्गु यहूलला म्हिगदेला लागिरी चा गे आखेल्बा ताम दोजी।† 24 तर यहूदी हिन्सै अर्गु यहूलला म्हि हिन्सै परमेश्वरसे धम्बागदेला लागिरी चा ख्रीष्टनोन परमेश्वरला शक्तिदेन ज्ञान बुद्धि हिन्ना। 25 तिग्दा भिसम म्हिगदेसे परमेश्वरसे लबा ताम चा मूर्ख ताम हिन्ना भिसी म्हन्सैनोन परमेश्वरला ताम महिला ज्ञान बुद्धि भन्दा घेन मुला, ओच्छे म्हिगदेसे परमेश्वर कमजोर मुला भिसी म्हन्सैनोन परमेश्वर महिला शक्ति भन्दा शक्तिशाली मुला।

26 ज्योज्यो आले नाना आडागदे, परमेश्वरसे धम्बा धुइरी एनीगदे खाहड्बा मुबा? थे ताम ढन्गो। म्हिगदेसे म्हन्बा अन्छार एनीगदे न्हडला ल्हाना हड्बा म्हि ज्ञान बुद्धि आरेबा मुबा। एनीगदे न्हडला ल्हानान म्हि शक्तिशाली आरेबा मुबा, ओच्छे यहूलसाला घेन महिला म्हेमेलाएनोन आहिन मुबा। 27 तर डा ज्ञान बुद्धि मुबा म्हि हिन्ना भिसी म्हन्बा म्हिगदेदा पेःना लबारी परमेश्वरसे जम्बुलिडला म्हिगदेसे मूर्ख भिसी म्हन्बा म्हिगदेदा धम्जी। ओच्छे डनी शक्ति मुबा म्हि हिन्ना भिसी म्हन्बागदेदा पेःना लबारी कमजोर म्हिगदेदा धम्जी। 28 ओच्छे चु जम्बुलिडला म्हिगदेसे घेन म्हन्बा म्हिगदेदा गे आखेल्बा स्होबाला लागिरी परमेश्वरसे म्हिगदेसेन हेला लसी गे आखेल्बा भिसी म्हन्बा म्हिगदेदा धम्जी। 29 खालैसेन हाडला डाच्छापट्टि घमण्ड थालगै भिसीन परमेश्वरसे चुहड् लबा हिन्ना। 30 बरु परमेश्वरसेन एनीगदेदा ख्रीष्ट येशूदेन छ्याम गिक स्होबा मुला। परमेश्वरग्यामसेन ख्रीष्ट यहाडला ज्ञान बुद्धि दोबा मुला। थेहड् लसी ख्रीष्टग्यामसेन यहाडदा परमेश्वरदा सेम निबा म्हि स्होजी ओच्छे यहाडला पापला सय फासी यहाडदा चोखो स्होसी फेबा मुला। 31 थेतबासेलमा परमेश्वरला बचनरीनोन “चुदे खालै म्हिसे डा ज्यबा म्हि हिन्ना भिसी पाङ्बा सेम मुसम, थेसे प्रभुसे लबा गे गाते ज्यबा मुला भिसी पाङ्गै” भिसी भिबा मुला।*

2

परमेश्वरला आत्माग्याम याङ्बा ज्ञान बुद्धि

1 डाला ज्योज्यो आले नाना आडागदे, परमेश्वरला बारेरी पाङ्बारी डा एनीगदे मुबा ग्लारी खमा डाइ डाला ज्ञान बुद्धिरी घमण्ड लसी एनीगदेदेन छ्याम घेन घेन ताम आलनी। 2 तिग्दा भिसम डा एनीगदेदेन छ्याम मुबा धुइरी येशू ख्रीष्ट क्रुसरी सिबा ताम बाहेक अर्गु तिगै ताम एनीगदेदा आपाङ्बा पक्का लबा मुबा। 3 एनीगदे मुबा ग्लारी खबा धुइरी डा कमजोर मुबा, ओच्छे लोङ्सी डाला तिड धर्बा मुबा।* 4 डाइ एनीगदेदेन छ्याम ताम लबान बचनग्याम पाङ्मा एनीगदेदा व्हाम्बारी डाला ज्ञान बुद्धिदेन शक्तिग्याम तिगै ताम आपाङ्नी, तर डाला गेग्यामसेन परमेश्वरला आत्माला शक्ति उन्जी। 5 एनीगदेला विश्वास महिला ज्ञान बुद्धिथोरी आहिन, तर परमेश्वरला शक्तिथोरी तगै भिसी डाइ थेहड् लबा हिन्ना।

6 तसैनोन पाको म्हिगदेदा डन्से ज्ञान बुद्धिला ताम लोप्बा मुला। तर डन्से लोप्बा ज्ञान बुद्धिला ताम चु जम्बुलिडला म्हिगदेदेन शासन लबागदेला ज्ञान बुद्धिला ताम आहिन। थेहड्बा ज्ञान बुद्धि थोबा म्हिगदे चा नाश तसी निला। 7 तर डन्से चा महिला ज्ञान बुद्धिग्याम घोबारी आखम्बा परमेश्वरला ज्ञान बुद्धिला बारेरी थेःना लबा मुला। चु ज्ञान बुद्धि चा जम्बुलिड स्होबा भन्दा डाच्छान यहाडदा य्हालदेन शक्ति पिन्बाला लागिरी परमेश्वरसे म्हन्बा अन्छार फेसी थान्बा मुबा। 8 चु जम्बुलिडरी शासन लबागदे खालैसेन चु ताम आघोनी। चुदे थेनीगदेसे घोबा हिन्सम य्हालदेन शक्ति मुबा प्रभुदा क्रुसरी टाँगब आलसेला मुबा। 9 तर बचनरी चुहड् भिसी भिबा मुला,
“खालैसेन खाइमै आम्राङ्बा,
खाइमै आथेःबा,

† 1:23 यहूदीला ठिम अन्छार क्रुसरी टाँगब लसी साइबा म्हि चा परमेश्वरग्याम सजाय याङ्बा म्हि हिन्ना भिसी म्हन्मुबा (प्रस्था २१:२२-२३ सहीगो)। थेतबासेलमा क्रुसरी टाँगब लसी साइबा येशू ख्रीष्टग्याम खाहड् लसी थार्बा याङ्गला भिसी यहूदीगदेसे म्हन्मुबा।

* 1:31 यर्मि ९:२४ * 2:3 मुल १८:९

खाइमै सेमरी आमहन्बा तामगदे परमेश्वरसे हाडदा माया लबा म्हिगदेला लागिरी ठीक लबा मुला।*
 10 परमेश्वरसे हाडला आत्माग्यामसेन यहाडदा थे जम्मान ताम उन्बा मुला। तिग्दा भिसम परमेश्वरला आत्मादा जम्मान ताम था मुला। ओच्छे म्हिसे था आयाड्बा परमेश्वरला सेमला तामगदेएनोन परमेश्वरला आत्मादान था मुला। 11 महिला सेमला ताम थे न्हडरी मुबा हाडलान आत्मासे जे घोला, थेहड् लसीन परमेश्वरला सेमला ताम परमेश्वरला आत्मासे जे घोला। 12 यहाडसे जम्बुलिडरी मुबा आत्मा याड्बा आहिन, तर दाहेनसे परमेश्वरसे पिन्बा जम्मान मोलमगदे घोबारी खम्गे भिसी परमेश्वरसेन हाडला आत्मा यहाडदा पिन्बा मुला।

13 डन्से थेःना लबा ताम महिला ज्ञान बुद्धिग्याम लोप्बा तामगदे आहिन, तर परमेश्वरला आत्मासे डन्दा लोप्बा तामगदे हिन्ना। थेनोन तामगदे डन्से परमेश्वरला आत्मा मुबागदेदा लोप्बा मुला। 14 तर जुन म्हिदेन परमेश्वरला आत्मा आरे थेसे परमेश्वरला आत्माला तामगदेरी विश्वास आल। तिग्दा भिसम थेला लागिरी थे तामगदे चा मूर्ख ताम हिन्ना। थे जम्मान तामगदे परमेश्वरला आत्माग्यामसे जे घोबारी खम्बा तामगदे तबासे लमा थेसे घोबारी आखम। 15 परमेश्वरला आत्मा मुबा म्हिसे जम्मान सहे ठीक मुला कि आरे भिसी च्याबारी खम्ला। तर परमेश्वरला आत्मा आरेबा स्यहान्दो खालै म्हिसे थेदा ठीक मुला कि आरे भिसी च्याबारी आखम। 16 तिग्दा भिसम बचनरी चुहड् भिसी भ्रिबा मुला,

“खाल्से प्रभुला सेम घोखम्ला?

ओच्छे खाल्से प्रभुदा लोप्बारी खम्ला?”

तर यहाडसे मी ख्रीष्टला सेम याड्बा मुला।*

3

परमेश्वरला गे लबा म्हिगदे

1 डाला ज्योज्यो आले नाना आडागदे, डा एनीगदेदेन छ्याम मुबा धुइरी डाइ परमेश्वरला आत्मासे कुल्बा अन्छार भ्रबा म्हिगदेदेन छ्याम हड् लसी एनीगदेदेन छ्याम ताम लबारी आखम्नी। तर डाइ एनीगदेदेन छ्याम हाडला सेमसे म्हन्बा अन्छार भ्रबा म्हिदेन छ्याम हड् लसी ताम लजी। ओच्छे डाइ एनीगदेदेन छ्याम विश्वासरी पाको आरेबा म्हिगदेदा हड् लसी ताम लबा मुला। 2 थे धुइरी एनीगदेसे कोड्बा चबा सहे चबारी आखम्बासे लमा डाइ एनीगदेदा इहे जे ख्वाजी। दान्देधोनाएनोन एनीगदेसे चबा सहे चबारी खम्बा आरे।* 3 अझ एनीगदे हाडला सेमसे म्हन्बा अन्छार भ्रबा महिला हड्बान बानीबेहोर थोसी भ्रबा मुला। ओच्छे एनीगदे हाड हाड न्हडरी गिकसेम गिकदा डाह लबान छेबा बड्बा लमुला। थेतबासेलमा एनीगदे अझ हाडला सेमसे म्हन्बा अन्छार भ्रबा स्यहान्दो म्हि हड्बान मुला। 4 तिग्दा भिसम एनीगदे हाड हाड न्हडरीन कोइसे “डा पावलला हिन्ना,” कोइसे “डा अपोल्लोसला हिन्ना” भिमाहेन्से एनीगदे हाडला सेमसे म्हन्बा अन्छार भ्रबा म्हिगदे हड्बान आतनी? तजी।

5 अपोल्लोसदेन पावल घेन हिन्ना? आहिन। डनी मी प्रभुसे कुल्बा अन्छार गे लबा म्हि जे हिन्ना। डन्से परमेश्वरथोरी विश्वास लबाला लागिरी एनीगदेदा ह्यो लबा जे हिन्ना। 6 डाइ चा सूजी, ओच्छे अपोल्लोससे क्युइ युजी। तर थेदा परमेश्वरसेन लहेना लजी।* 7 थेतबासेलमा सूबादेन क्युइ युबा म्हि तिगै आहिन, तर लहेना लबा परमेश्वर चा घेन हिन्ना। 8 सूबादेन क्युइ युबा म्हि तिगै फरक आरे। थेन्नीसेन हाड हाडसे लबा गे अन्छारला जयाला याड्ला। 9 तिग्दा भिसम डनी न्ही चा परमेश्वरला गे लबा म्हि हिन्ना, एनीगदे चा परमेश्वरला बु हड्बान हिन्ना।

ओच्छे एनीगदे परमेश्वरला दिम हड्बाएनोन हिन्ना। 10 परमेश्वरसे डादा पिन्बा दयामायाग्याम डाइ मुल कर्मीसे हड् लसी जग थान्बा मुला। स्यहान्दोगदेसे चा थे जगथोरी दिम सहोबान मुला, तर थे जगथोरी दिम सहोबागदेसे होशियार लसी सहोगै। 11 तिग्दा भिसम थे जग चा येशू ख्रीष्टनोन

* 2:9 यशै ६४:४ * 2:16 यशै ४०:१३ † 3:1 चु पदरी “विश्वासरी” भिबादा ग्रीक बाइबलरी ख्रीष्टरी भिसी भ्रिबा मुला।

* 3:2 हिब्रू ५:१२-१३ * 3:4 १ कोर १:१२ * 3:6 मुल १८:४-११, २४-२८

हिन्ना। थे जग बाहेक स्यूहान्दो खालैसे अर्गु जग थान्बारी आखम। ¹² चुदे खालै म्हिसे थे जगथोरी म्हर, म्हुइदेन म्हंगो खाल्ला युडबा, सिड, सो ओच्छे परालसे दिम सहोजी भिसम, ¹³ थे जम्मान म्हिगदेसे लबा गे परमेश्वरसे निसाफ लबा धिनकुनु था याड्ला। तिग्दा भिसम निसाफ लबा धुइरी परमेश्वरसे मेरी युसी थेनीगदेसे लबा गे खाहड्बा चीम भिसी च्याला। ¹⁴ चुदे थे जगथोरी दिम सहोबा महिला गे मेरी युमा आक्रोनी भिसम थे म्हिसे इनाम याड्ला। ¹⁵ चुदे खालै महिला गे क्रोसी नाश तजी भिसम थेसे इनाम आयाड्। तर थे म्हि चा मेग्याम स्योर्बा हड् तसी जोगब तला।

¹⁶ एनीगदेन परमेश्वरला मन्दिर हिन्ना, ओच्छे परमेश्वरला आत्मा एनीगदे न्हडरी धनछ्यामुला भिबा ताम एनीगदेदा था आरे? ¹⁷ चुदे खालै म्हिसे परमेश्वरला मन्दिरदा नाश लजी भिसम परमेश्वरसेन थेदा नाश लला। तिग्दा भिसम परमेश्वरला मन्दिर चोखो मुला, ओच्छे थे मन्दिर चा एनीगदेन हिन्ना।

¹⁸ खालैसेन हाडसे हाडदान धोका थापिन्गो। एनीगदे न्हडरी खालै म्हिसे हाडसे हाडदान डा चु जम्बुलिडला ज्ञान बुद्धि मुबा म्हि हिन्ना भिसी म्हन्जी भिसम थे तिगै था आरेबा मूर्ख म्हि हड्बा दोतो:ला। जमाहेन्से थे ज्ञान बुद्धि मुबा म्हि दोला। ¹⁹ तिग्दा भिसम परमेश्वरला लागिरी जम्बुलिडला ज्ञान बुद्धि चा मूर्ख ताम हड्बान हिन्ना। बचनरीनोन चुहड् लसी भिबा मुला,

“ज्ञान बुद्धि मुबा म्हिगदेसे लबा चलाक गेग्यामसेन
परमेश्वरसे थेनीगदेदा चुड्ला।”

²⁰ दो:सी चुहड् भिसीएनोन भिबा मुला,

“ज्ञान बुद्धि मुबा म्हिगदेसे म्हन्बा ताम गे आखेल्बा ताम हिन्ना भिसी
परमप्रभुदा था मुला।”

²¹ थेतबासेलमा खालैसेन म्हिसे लबा गेरी घमण्ड थालगै। तिग्दा भिसम जम्मान सहे एनीगदेलान हिन्ना, ²² पावलदेन अपोल्लोस ओच्छे पत्रुस, चु जम्बुलिड, दानदेला धुइ, लिच्छाला धुइ, सिसै सोसै जम्मान एनीगदेलान हिन्ना। ²³ ओच्छे एनीगदे चा ख्रीष्टला हिन्ना, ओच्छे ख्रीष्ट चा परमेश्वरला हिन्ना।

4

ख्रीष्टला मुल चेलागदेसे नातो:बा ताम

¹ म्हिगदेसे डन्दा ख्रीष्टला गे लबा म्हिदेन म्हिसे था आयाड्बा परमेश्वरला सेमला ताम घोना लबा जिम्मा याड्बा म्हि हिन्ना भिसी म्हन्तो:ला। ² चुदे जे आहिन, चुहड्बा गे लबा म्हि चा मालिकसे विश्वास लखम्बा म्हि ततो:ला। ³ तर एनीगदेदेन म्हिगदेला निसाफ लबा अदालतसे डाला निसाफ लसैनोन थे ताम डाला लागिरी तिगै आहिन। ओच्छे डाइएनोन हाडसे हाडदान निसाफ आल। ⁴ डाइ तिगै आज्यबा गे लबा मुला भिसी डादा था आरे, तर चुहड् भिदेमा डाला तिगै गल्ती आरे भिसी पाड्बारी आखम। प्रभुसेन डाला निसाफ लला। ⁵ थेतबासेलमा प्रभुसे तोगब लबा धुइ भन्दा डाच्छान एनीगदेसे खालैदान निसाफ थालउ। बरु प्रभु फेप्वबा धुइ भान्सी चिउ। धोपधोपरी लबा जम्मान ताम प्रभुसेन यहालरी भसी महिला सेमला जम्मान ताम उन्ना। थे धुइरी चा जम्मान म्हिसे परमेश्वरग्याम हाड हाडला गे अन्छार याड्तो:बा इनाम याड्ला।

⁶ दाहेन्से ज्योज्यो आले नाना आडागदे, चु तामग्यामसेन एनीगदेसे ज्यना लसी घोखमगै भिसी डाइ डादेन अपोल्लोसला बारेरी पाड्बा मुला। परमेश्वरला बचनरी भिबा भन्दा तिगै अर्गु ताम थालउ। ओच्छे एनीगदेसे कोइदा मान लबा, कोइदा मान आलबा थालउ। ⁷ खाल्से एनीगदेदा स्यूहान्दो म्हिगदे भन्दा घेन सहोजी? तिग एनीगदेदेन छ्याम मुबा जम्मान सहे परमेश्वरसेन पिन्बा आहिन? परमेश्वरसे पिन्बा सहेगदेन एनीगदेदेन छ्याम मुला भिसम दो:सी तिग्दा एनीगदे हाडसेन सहोबा हड् लसी घमण्ड लबा?

⁸ हाडदा तो:बा जम्मान सहे याड्सी एनीगदे फ्युकपो तसी जिन्बा मुला भिसी एनीगदेसे म्हन्बा मुला। ओच्छे डनी आरेसै ग्ले दोबारी खम्बा मुला भिसी एनीगदेसे म्हन्बा मुला। एनीगदेसे म्हन्बा

अन्छार एनीगदे ग्लेनोन दोबा हिन्सम ज्यबा तसेला मुबा। तिग्दा भिसम डन्सेनोन एनीगदेदेन छ्यामनोन शासन लबारी खमसेला मुबा।⁹ तर डनी मुल चेलागदेदा सिबाला सजाय याड्बा म्हिगदेदा हड लसी परमेश्वरसेन जम्मान भन्दा लिच्छापट्टि थान्बा मुला भिसी म्हन्बा मुला। थेहड लसीन डनी चा जम्बुलिडरी स्वर्गदूतगदेदेन म्हिगदेला ओन्छाडरी जम्मासेन म्राड्गै भिसी उन्बारी थान्बा स्हे हड्बान म्हन्बा मुला।¹⁰ डन्से ख्रीष्टदा तेन्बासे लमा डनी मूर्ख म्हि हड्बान हिन्ना, तर एनीगदेदा चा ख्रीष्टसे बुद्धि मुबा म्हि सहोबा मुला। डनी कमजोर म्हि हिन्ना, एनीगदे चा भड्बा म्हि हिन्ना। ओच्छे डन्दा हेला लमुला, तर एनीगदेदा चा म्हिगदेसे मान लमुला।¹¹ दान्देएनोन डनी चबा थुड्बा आयाड्ना फोइथाननोन भ्रबा मुला, क्वान्बारी ज्यबा क्वान आरे। ओच्छे डन्दा म्हिगदेसे तोबा ग्याड्बा लबा मुला, ओच्छे डन्ना दिमनामएनोन आरे।¹² चबा थुड्बादेन क्वान्बाला लागिरी डनी हाडसेन दुख लसी गे लमुला। स्य्हान्दोसे बेइज्जत लमा डन्से थेन्दा मोलम पिन्मुला, ओच्छे दुख पिन्मा डन्से नामुला।¹³ डन्ना बेइज्जत लमाएनोन डन्से थेन्दा माया लसी ताम पाड्बा मुला। दान्देधोनाएनोन म्हिगदेला लागिरी डनी जम्बुलिडरी तिगै गे आखेलना भ्याड्तोःबा स्हेदेन फोहोर हड्बान तबा मुला।

¹⁴ चु ताम डाइ एनीगदेदा पेःना लबाला लागिरी भ्रिबा आहिन, तर एनीगदेदा डाइ माया लबा डालान कोलागदेदा हड लसी अर्ती पिन्बारी भ्रिबा हिन्ना।¹⁵ एनीगदेदा ख्रीष्टला बारेरी लोप्बा म्हिगदे झ्याबारीन आखम्बाधोना मुसैनोन एनीगदेला आबा ल्हाना आरे, तर गिक जे मुला। तिग्दा भिसम एनीगदेदा थार्बा पिन्बा समाचार थेःना लसी ख्रीष्ट येसूदा डोसेना लबासे लमा डा एनीगदेला आबा हड्बान दोबा मुला।¹⁶ थेतबासेलमा एनीगदे डा हड्बान दोगो भिबा डाला बिनती मुला।¹⁷ थेतबासेलमा डाइ माया लबा तिमोथीदा एनीगदे मुबा ग्लारी पुइखबान मुला। थे ख्रीष्टदेन छ्याम गिक तबादेन विश्वास लखम्बा डाला झा हड्बान हिन्ना। डाइ जम्मान ग्लाला मण्डलीगदेरी लोप्बा अन्छार येसू ख्रीष्टरी डा खाहड लसी भ्रबा मुला भिबा ताम थेसेन एनीगदेदा ढन्ना लला।

¹⁸ एनीगदे न्हडरी कोइ कोइ चा डा एनीगदे मुबा ग्लारी आख भिबा म्हन्सी घमण्ड लसी भ्रमुला रो,¹⁹ तर प्रभुसे सेम लजी भिसम डा योनान एनीगदे मुबा ग्लारी खला। ओच्छे थे घमण्ड लसी भ्रबा म्हिसे पाड्बासे लमा आहिन, तर थेनीगदेला शक्ति खाहड्बा चीम थे च्याला।²⁰ तिग्दा भिसम परमेश्वरला यहुल्सा ज्यबा तामग्याम जे आहिन, तर शक्तिग्याम† म्राड्मुला।²¹ डा थेरी धोखमाहेन्से डाइ एनीगदेदा तिग लगे भिसी म्हन्बा मुला? एनीगदेदा कडीसे सजाय पिन्गो कि सोजो तसी माया लउ?

5

ब्रेल्बा

¹ डाइ एनीगदेला गुडरी स्य्हान्दोदेन छ्याम ब्रेल्सी भ्रमुला रो भिबा ताम थेःबान मुला। ओच्छे एनीगदे न्हडला गिकसे मी हाडलान आमच्याडदा† भ्रिड सहोबा मुला भिबा ताम डाइ थेःबा मुला। चुहड लसी मी अर्गु यहुलला म्हिगदेएनोन ब्रेल्सी आभ्रमुला।² तर एनीगदेसे मी घमण्ड लबा मुला। बरु एनीगदेसे मी दुख म्हन्तोःमुबा, ओच्छे थेहड्बा गे लबा म्हिदा एनीगदेला गुडग्याम तेःतोःमुबा।³ डा लहुडरी एनीगदेदेन छ्याम आरेसै डाला सेम मी एनीगदेदेन छ्यामनोन मुला। ओच्छे डा एनीगदेदेन छ्याम मुबा हड लसीन थेहड्बा गे लबा म्हिदा डाइ निसाफ लसी जिन्बा मुला।⁴ एनीगदे यहाडला प्रभु येसूला मिनरी ग्ला गिकरीन हुप तमा, डाला सेमएनोन एनीगदेदेन छ्यामनोन तला, ओच्छे यहाडला प्रभु येसूला शक्तिएनोन थेरीन तला।⁵ थे धुडरी थेला पाप लबा लहुडा† नाश तगै भिसी एनीगदेसे थेदा शैतानना यारी जिम्मा लसी पिन्गो। ओच्छे प्रभु दोःसी फेप्वसी निसाफ लबा धुडरी थेला आत्मा चा थार्ला।

† 4:9 थे धुडरी चा कोरिन्थीला ठिम अन्छार सजाय पिन्तोःबा म्हिदा जम्मान महिला डाच्छापट्टि भसी च्यानदा चपुड्मुबा। † 4:20 “शक्तिग्याम” भिबा चा परमेश्वरला आत्मासे ख्रीष्टदा विश्वास लबागदेला बानीबेहोर परमेश्वरदा सेम निबा सहोबा हिन्ना। जमाहेन्से थे परमेश्वरसे म्हन्बा अन्छार भ्रबारी खम्ला। † 5:1 “आमच्याड” भिबा चा आबासे भबा स्य्हान्दो भ्रिड हिन्ना। † 5:5 “पाप लबा लहुड” भिबादा पापी बानीबेहोर भिसीएनोन घोखम्ला।

६ एनीगदेसे घमण्ड लबा ज्यबा आहिन। ज्योपबा बारी जजाकी खमीर युमाहेन्से[†] ज्योपबा जम्मान ब्रादा भोना लमुला भिबा ताम एनीगदेदा था आरे? ७ खमीर आयुना ज्योपबा छार ब्रा दोबारी एनीगदेसे डाच्छाला थे आज्यबा खमीर[†] तेःसी भ्याङ्गो। जमाहेन्से एनीगदे खमीर आयुना ज्योपबा छार ब्रा हड्बान दोला, तिग्दा भिसम ख्रीष्ट चा मिश्र यहुलसाग्याम फेसी खबा धिनदा ढन्सी धड्बा चाडरी बलि फुल्बा ग्यु बोगो हड्बान दोसी यहाडला लागिरी बलि तसी जिन्बा मुला। ८ थेतबासेलमा थे खमीर हड्बा आज्यबा बानीबेहोर थोसी आहिन, तर सेमरी तिगै आज्यबा ताम आथान्ना सत्य ग्यामरी भ्रसी खमीर आयुबा गेड हड्बान दोसी चाड धङ्गे।

९ डाइ डाच्छान एनीगदेदा ब्रेल्सी भ्रबा म्हिगदेदेन छ्याम संगतनोन थालउ भिसी अर्गु चिठीरी भ्रिबा मुबा। १० तर चु जम्बुलिडरी मुबा ख्रीष्टदा विश्वास आलना ब्रेल्सी भ्रबागदे, लोभ लबागदे, यहो लबागदेदेन मूर्तिदा तेन्बा म्हिगदेदेन छ्याम संगतनोन थालउ भिबारी म्हाइबा आहिन। थेहड् भिसम एनीगदेसे चु जम्बुलिडनोन ख्लातोःला। ११ डाइ भ्रिबा ताम चा चुनोन हिन्ना। डा ख्रीष्टदा विश्वास लबा म्हि हिन्ना भिसी सुडसे चा पाङ्सी भ्रबा, तर गेसे चा स्यहान्दोदेन छ्याम ब्रेल्सी भ्रबा, लोभ लबा, मूर्तिदा तेन्बा, महिला तामगन लबा, ड्य्होइसी भ्रबादेन यहो लबा म्हिदेन छ्याम चा संगतनोन थालउ भिबा हिन्ना। थेहड्बा म्हिदेन छ्याम मी चबा थुड्बाएनोन थालउ। १२ ख्रीष्टदा विश्वास आलबा मण्डली[†] न्हडरी आरेबा म्हिगदेला निसाफ लबा गे डाला आहिन। तर ख्रीष्टदा विश्वास लबा मण्डली न्हडला म्हिगदेला निसाफ लबा गे एनीगदेला हिन्ना। १३ ख्रीष्टदा विश्वास आलबा मण्डली न्हडरी आरेबा म्हिगदेला निसाफ मी परमेश्वरसेन लला। परमेश्वरला बचनरी चुहड् भिसी भ्रिबा मुला, “नइबा गे लबा म्हिदा एनीगदेला गुडग्याम तेःगो।”*

6

विश्वासी न्हडरी मुद्दा

१ एनीगदे न्हडरी खालैला स्यहान्दो विश्वासी गिकदेन छ्याम छेबा बड्बा तजी भिसम तिग्दा निसाफ लसी पिन्गो भिसी परमेश्वरला म्हि मुबा ग्लारी आनिना परमेश्वरदान विश्वास आलबा म्हिगदे मुबा ग्लारी निबा? २ परमेश्वरला म्हिगदेसे जम्बुलिडला म्हिगदेला निसाफ लला भिबा ताम एनीगदेदा था आरे? चुहड् लसी एनीगदेसेन जम्बुलिडला म्हिगदेला मी निसाफ लला भिसम तिग जजाबा ताम चा ढिक्ना लबारी आखम? ३ यहाडसे स्वर्गदूतगदेलाएनोन निसाफ लला भिबा ताम एनीगदेदा था आरे? थेहड् भिसम तिग चु धुइला तामगदे निसाफ लबारी गाहो मुला? ४ चुहड् लसी छेबा बड्बा तमा तिग्दा एनीगदे मण्डलीसे मान आलबा स्यहान्दो म्हिगदे मुबा ग्लारी निसी निसाफ लसी पिन्गो भिसी पाङ्बा? ५ एनीगदेदा मी पेःबा खतोःबा। तिग ह्याडला ज्योज्यो आले नाना आडा छेबा बड्बा लमा निसाफ लखम्बा बुद्धि मुबा म्हि एनीगदे न्हडरी खालै आरे? ६ तर एनीगदे मी विश्वासीगदे न्हडरी गिकसेम गिकला बिरोध लसी परमेश्वरदा विश्वास आलबा म्हिगदेला डाच्छा निसाफ लसी पिन्गो भिसी अदालतरी निमुला।

७ एनीगदे हाड हाड न्हडरी गिकसेम गिकला बिरोध लसी मुद्दा लबासे लमा एनीगदे भ्रेःसी जिन्बा मुला। बरु मुद्दा आलना जस्तोन तसै एनीगदेसे नासी चितोःमुबा। ओच्छे ठगब लसै एनीगदेसे नासी चितोःमुबा। ८ तर एनीगदेसे मी ह्याडलान विश्वासी ज्योज्यो आले नाना आडागदेदाएनोन दुख पिन्सी ठगब लबा मुला।

९ आज्यबा गे लबा म्हिगदे परमेश्वरला यहुलसारी निम्याड्बा हक आयाड् भिबा ताम एनीगदेदा था आरे? एनीगदेसे हाडसे हाडदान धोका थापिन्गो। ब्रेल्सी भ्रबा म्हिगदे, मूर्तिदा तेन्बागदे, स्यहान्दोला म्रिडदेन छ्याम ब्रेल्सी भ्रबागदे, बेश्या म्रिडम्हेमे हड्बा ब्रेल्सी भ्रबा हेम्कोलागदे ओच्छे म्रिडकोला म्रिडकोलादेन छ्याम हेम्कोला हेम्कोलादेन छ्यामनोन ब्रेल्सी भ्रबागदे, १० यहो लबागदे, लोभ लबागदे, ड्य्होइसी भ्रबागदे, महिला तामगन लबागदेदेन स्यहान्दोला ब्यन्सी चबागदेसे परमेश्वरला

† 5:6 “ज्योपबा बारी जजाकी खमीर युमाहेन्से” भिबा चा जजाबा पापसे पूरान मण्डलीदा न्होइना लमुला भिबा हिन्ना। † 5:7 “आज्यबा खमीर” भिबा चा पाप लबा म्हि हिन्ना। † 5:12 “मण्डली” भिबा चा ख्रीष्टदा विश्वास लबा जम्मान म्हिगदे हिन्ना।

* 5:13 वयव १३:५; १७:७

यहुल्सारी निम्याड्बा हक आयाड्। ¹¹ एनीगदे न्हडरी कोइ कोइ डाच्छा थेहड्बान मुबा। तर दान्दे एनीगदेला पाप खुसी परमेश्वरसे चोखो म्हि सहोबा मुला। ओच्छे प्रभु येशू ख्रीष्टदेन य्हाडला परमेश्वरला आत्माग्याम एनीगदेदा हाडदा सेम निबा म्हि सहोबा मुला।

एनीगदेला ल्हुड्ग्याम परमेश्वरदा मान लउ

¹² एनीगदे न्हडरी खालैसे “डाइ जे लसै ठीक मुला” भिसी पाड्मुला तला, तर जम्मान तामग्याम एनीगदेदा ज्यबा आत। डाइएनोन पाड्खमसेला मुबा, “डाइ जे लसै तला,” तर डा खजिबै तामला नोकर आदो।

¹³ एनीगदे न्हडरी खालैसे “चबा सहे फोला लागिरी ओच्छे फो चबा सहेला लागिरी हिन्ना” भिसी पाड्मुला। थे ताम ठीकनोन हिन्ना, तर परमेश्वरसे थे न्हीदान नाश लला। महिला ल्हुड् ब्रेल्सी भ्रबाला लागिरी आहिन, तर परमेश्वरदा तेन्बाला लागिरी हिन्ना, ओच्छे य्हाडला ल्हुड् चा प्रभुलान हिन्ना। ¹⁴ ओच्छे परमेश्वरसे हाडलान शक्तिग्याम प्रभुदा सोना लजी, य्हाडदाएनोन थेलान शक्तिग्याम थेसेन सोना लला।

¹⁵ एनीगदेला ल्हुड् ख्रीष्टला या काड हड्बान हिन्ना भिबा ताम एनीगदेदा था आरे? थेहड् भिसम तिग डाइ ख्रीष्टला छ्यादेन स्यहापदा भोर्सी बेश्यादेन छ्याम ब्रेल्बारी तला? आत, चु तनोन आखम्बा ताम हिन्ना! ¹⁶ बेश्यादेन छ्याम ब्रेल्बा म्हि चा बेश्यादेन छ्याम ल्हुड् गिक हड्बान तला भिबा ताम एनीगदेदा था आरे? तिग्दा भिसम बचनरीनोन “थे न्ही ल्हुड् गिक हड्बान तला” भिसी भिबा मुला।* ¹⁷ तर जुन म्हि प्रभुदेन छ्याम गिक तला, थे म्हि प्रभुदेन छ्याम आत्मारीनोन गिक तला।

¹⁸ थेतबासेलमा खाडमै ब्रेल्सी थाभ्रउ। तिग्दा भिसम अर्गु पापसे भन्दा ब्रेल्सी भ्रबा पापसे चा महिला हाडलान ल्हुड्दा ल्हानान न्होड्ना लमुला। ¹⁹ एनीगदेला ल्हुड् परमेश्वरला आत्माला मन्दिर हिन्ना। एनीगदेसे परमेश्वरग्याम याड्बा आत्मा एनीगदे न्हडरी धन्छ्यामुला भिबा ताम एनीगदेदा था आरे? थेतबासेलमा एनीगदेला ल्हुड् एनीगदेलान आहिन, ²⁰ तिग्दा भिसम परमेश्वरसे एनीगदेदा सय फासी ग्लुबा हिन्ना। थेतबासेलमा एनीगदेसे हाडला ल्हुड्ग्याम परमेश्वरदा मानदेन जयजयकार लउ।

7

ब्याह लबाला बारेरी पाड्बा

¹ दाहेन्से एनीगदेसे भिबा तामगदेला बारेरी डाइ पाड्ला। म्हिसे ब्याह आलबान ज्यबा हिन्ना।† ² तर ल्हानान ब्रेल्सी भ्रबासे लमा जम्मान हेम्फेबेला हाड हाडलान म्रिड तगै, ओच्छे जम्मान म्रिडम्हेमेलाएनोन हाड हाडलान हेम्बो तगै। ³ हेम्बो हाडला म्रिडदेन छ्याम म्हेर्बा खलाबारी आत। ओच्छे म्रिडएनोन हाडला हेम्बोदेन छ्याम म्हेर्बा खलाबारी आत। ⁴ ओच्छे म्रिडसे हाडला ल्हुड्थोरी हाडसेन अधिकार लआम्याड्, तर हेम्बोला अधिकार तला। थेहड् लसीन हेम्बोसेनोन हाडला ल्हुड्थोरी हाडसेन अधिकार लआम्याड्, तर म्रिडसे अधिकार लला। ⁵ म्रिड हेम्बो खाडमै छ्यामनोन म्हेर्बा थाख्लागो। सल्लाह लसी तिगै धिनना लागिरी प्रार्थना लबाला लागिरी छ्यामनोन आम्हेर्सेनोन प्रार्थना लसी जिन्माहेन्से चा छ्यामनोन म्हेर्गो। आहिन्सम एनीगदेसे सेम नाबारी आखम्बासे लमा शैतानसे एनीगदेदा फसब लला। ⁶ चुहड् लसी लनोन तोःला भिसी डाइ एनीगदेदा कुल्बा आहिन। तर एनीगदेसे लबारी तला भिसी जे पाड्बा हिन्ना। ⁷ हिन्बाम जम्मान म्हि डा हड् लसी ब्याह आलना चिगै भिसी डाइ म्हन्बा मुला। तर जम्मान म्हिसे परमेश्वरग्याम थरी थरीला मोलम याड्बा मुला, कोइसे ब्याह आलना चिबा मोलम याड्बा मुला ओच्छे कोइसे ब्याह लसी चिबा मोलम याड्बा मुला।

⁸ दाहेन्से ब्याह आलबा म्हिगदेदेन हेम्बो सिबा म्रिडम्हेमेगदेला लागिरी डाइ चु ताम पाड्बान मुला, थेनीगदे चा डा हड् लसीन ब्याह आलना चिबान थेनीगदेला लागिरी ज्यबा हिन्ना। ⁹ तर थेनीगदेसे हाडसे हाडदान तहरी थान्बारी आखम्नी भिसम ब्याह लगै। तिग्दा भिसम सेम नाबारी आखम्ना चिबा भन्दा बरु ब्याह लबा चा ज्यबा हिन्ना।

* 6:16 उत्प २:२४ † 7:1 ग्रीक बाइबलरी चा हेम्कोलासे म्रिडकोलादा आर्थुबान ज्यबा हिन्ना भिसी पाड्बा मुला।

10 दाहेन्से डाइ ब्याह लबा म्हिगदेदा पाड्ला, म्रिडसे हेम्बोदा थाख्लागो। चु डाइ कुल्बा ताम आहिन, तर प्रभुसे कुल्बा ताम हिन्ना। 11 तर फेसी चिसैनोन स्य्हान्दोदेन छ्याम ब्याह थालउ। स्य्हान्दोदेन छ्याम ब्याह लबा भन्दा मी बरु दोःसी हाडला हेम्बोदेन छ्यामनोन ढिक्सी चिउ। ओच्छे हेम्बोसेनोन हाडला म्रिडदा ख्लाबारी आत।

12 तर स्य्हान्दो जम्मादानां डाइ चुहड् भिसी पाड्ला, चु ताम प्रभुसे सुड्बा ताम आहिन। तर डाइनोन पाड्बा हिन्ना। चुदे प्रभुदा विश्वास लबा खालै ज्योज्यो आलेला म्रिडसे ख्रीष्टदा विश्वास लबा आरे, तसैनोन थेसे हाडला हेम्बोदेन छ्याम चिबा सेम लजी भिसम थे म्हिसे हाडला म्रिडदा थाख्लागै। 13 चुहड् लसीन खालै म्रिडम्हेमेला हेम्बोसे ख्रीष्टदा विश्वास आलसैनोन थेसे हाडला म्रिडदेन छ्याम चिबा सेम लजी भिसम थेसे हाडला हेम्बोदा थाख्लागै। 14 तिग्दा भिसम हेम्बोसे ख्रीष्टदा विश्वास आलसैनोन म्रिडसे विश्वास लबासे लमा हेम्बो परमेश्वरला म्हि दोखम्ला। ओच्छे म्रिडसे ख्रीष्टदा विश्वास आलसैनोन हेम्बोसे विश्वास लबासे लमा म्रिड परमेश्वरला म्हि दोखम्ला। थेहड् आतबा हिन्सम थेनीगदेला कोलागदे चोखो आतसेला मुबा। तर थेहड् तबासे लमा थेनीगदे मी परमेश्वरदा सेम निबा मुला।

15 तर ख्रीष्टदा विश्वास आलबा म्हिसे चा ख्लाबारी म्हाइसम ख्लापुड्गो। जमाहेन्से म्रिड मुसै हेम्बो मुसै थेनी गिकसेम गिकला तहरी चिआतोः। थेतबासेलमा थेन्नीदा खालैसेन कर लसी ग्ला गिकरी थाथान्गो। थेन्नी चा फेसी चिबान ठीक मुला, तिग्दा भिसम परमेश्वरसे य्हाडदा छेबा बड्बा लसी चिबारी आहिन, तर ढिक्सी चिबाला लागिरी धम्बा हिन्ना। 16 तिग ख्रीष्टदा विश्वास लबा म्रिडम्हेमेसे विश्वास आलबा हाडला हेम्बोदा थानां लखम्ला भिबा ताम एनीगदेदा था आरे? ओच्छे ख्रीष्टदा विश्वास लबा हेम्फेबेसे विश्वास आलबा हाडला म्रिडदा थानां लखम्ला भिबा ताम एनीगदेदा था आरे?

परमेश्वरसे म्हन्बा अन्छार भ्रउ

17 प्रभुसे एनीगदे जम्मादान ख्वाहड् लसी भ्रगै भिसी म्हन्बा मुला थेनोन अन्छार भ्रउ। ओच्छे एनीगदेदा डाच्छा परमेश्वरसे धम्माहेन्से ख्वाहड् लसी भ्रमुबा थेहड् लसीन भ्रउ। डाइ पाड्बा चु ताम जम्मान मण्डलीगदेला लागिरी हिन्ना। 18 परमेश्वरसे धम्बा भन्दा डाच्छान खतना लसी जिन्बा मुसम थे म्हिसे दोःसी खतना आलबा म्हि दोबारी थाम्हाइगो। ओच्छे खतना आलमान परमेश्वरसे थेदा धम्जी भिसैनोन थेसे खतना थालउ। 19 तिग्दा भिसम खतना लसै आलसै तिगै आहिन। तर परमेश्वरसे कुल्बा ताम ड्यानबा चा घेन ताम हिन्ना। 20 परमेश्वरसे थेनीगदेदा धम्बा धुडरी थेनीगदे ख्वाहड्बा मुबा थेनोन अन्छार लसी चिगै। 21 परमेश्वरसे धम्बा धुडरी ए खालैला नोकरां मुसैनोन एसे धन्दा सुदा थालउ। तर ए थेग्याम थोन्म्याड्सम थोन्गो। 22 तिग्दा भिसम जुन म्हि प्रभुसे धम्बा धुडरी नोकर मुबा थेदा दान्दे प्रभुसे थेग्याम फेबा मुला। थेहड् लसीन प्रभुसे धम्बा धुडरी जुन म्हि खालैला नोकर दोबा आरेबा थे दान्दे ख्रीष्टला नोकर दोबा मुला। 23 परमेश्वरसे एनीगदेदा सय फासी ग्लुबा हिन्ना। थेतबासेलमा एनीगदे महिला नोकर थादोगो। 24 ज्योज्यो आले नाना आडागदे, परमेश्वरसे एनीगदेदा धम्बा धुडरी एनीगदे ख्वाहड्बा मुबा थेनोन अन्छार सदन परमेश्वरदेन छ्याम चिउ।

ब्याहला बारेरी ड्योडबा तामगदे

25 ब्याह आतबा म्हिगदेदा प्रभुसे कुल्बा ताम डादेन छ्याम तिगै आरे। तर प्रभुला दया याड्सी विश्वास लखम्बा म्हि तबासे लमा डाइ एनीगदेदा चु सल्लाह पिन्ना। 26 चु धुडला दुखदा म्राड्माम एनीगदे ख्वाहड् लसी चिबा मुला थेहड् लसीन चिबा ज्यबा तला भिसी डाइ म्हन्बा मुला। 27 चुदे एसे ब्याह लसी जिन्बा मुसम हाडला म्रिडदा ख्लाबारी थाम्हाइगो। ओच्छे ब्याह लबा आरेसै ब्याह लबारी थाम्हाइगो। 28 तर ब्याह लजी भिसै पाप आहिन। ब्याह आलबा म्रिडकोलासे ब्याह लजी

† 7:12 “स्य्हान्दो जम्मादान” भिबा चा येशूदा विश्वास लबा भन्दा डाच्छान ब्याह लबा म्हिगदेदा पाड्बा हिन्ना। † 7:21 थे धुडला ‘नोकरसे चा’ गे लपुड्सीनोन तिगै आयाड्बा म्हि हिन्ना।

भिदेमा थेसे पाप लबा आहिन। तर ब्याह लबा म्हिगदेसे चु जम्बुलिडरी ल्हानान दुख नातोःला डाइ मी एनीगदेदा चु दुखग्यामसे जे जोगब लबारी म्हाइबा हिनना।

²⁹ ज्योज्यो आले नाना आडागदे, डाइ पाड्बारी म्हाइबा ताम चा चुनोन हिनना। दाहेन्से य्हाडला प्रभु फेपखबा धुइ ल्हाना आरेबासे लमा म्रिड मुबागदेसे म्रिड आरेबागदे हड् लसी चिउ। ³⁰ क्राबागदे आक्राबा म्हिगदे हड् लसी चिउ ओच्छे ताड्बागदे आताड्बा म्हिगदे हड् लसी चिउ। ओच्छे तिगै ग्लुसी भबागदेसे हाडदेन छ्याम तिगै आरेबा हड् लसी चिउ। ³¹ थेहड् लसीन जम्बुलिडला सहे चलब लबा म्हिगदेसे थे सहेगदेदा वास्तान आलबा हड् लसी चिउ। तिग्दा भिसम चु जम्बुलिड म्हासी निबान मुला।

³² एनीगदे जम्मान धन्दा सुर्दा आलना चिगै भिसी डाइ म्हन्बा मुला। ब्याह आलबा म्हिसे चा खाहड् लसी प्रभुदा ताड्ना लखम्ला भिसी सेमहेन्सेन प्रभुला लागिरी गे लमुला। ³³ तर ब्याह लबा म्हिसे चा खाहड् लसी हाडला म्रिडदा ताड्ना लखम्ला भिसी जम्बुलिडला तामगदेरी धन्दा सुर्दा लमुला। ³⁴ थेहड्बा महिला सेम चा पट्टि न्ही तला। थेहड् लसीन दोःसी ब्याह आलना चिबा म्रिडम्हेमेदेन खाइमै ब्याह आलबा म्रिडकोलासे चा हाडला लहुइदेन आत्मा परमेश्वरलान हिनना भिबा तामरी जे धन्दा सुर्दा लमुला। तर ब्याह लबा म्रिडम्हेमेसे चा खाहड् लसी हाडला हेम्बोदा ताड्ना लखम्ला भिसी जम्बुलिडला तामरी धन्दा सुर्दा लमुला।

³⁵ डाइ चु ताम एनीगदेला लागिरी ज्यबा तगै भिसी पाड्बा हिनना। एनीगदेसे चु लबारी तला, चु लबारी आत भिसी डाइ चु ताम एनीगदेला लागिरी ठिम सहोसी पिन्बा आहिन। तर एनीगदे प्रभुरी ज्यना लसी भ्रबारी खमगै ओच्छे जस्तोन दुख तसैनोन प्रभुदा तेन्बारी खमगै।

³⁶ चुदे खालै म्हिसे हाडला सेम तहरी थान्बारी आखमना हाडसे ब्याह लबारी हीबा म्रिडकोलादेन छ्याम ब्रेल्बा सेम खजी भिसम थेदा ब्याह लपुड्गो। चुहड् लबा पाप आहिन। ³⁷ थेहड् लसीन जुन म्हिसे ब्याह लबारी हीसी जिन्बा म्रिडकोलादेन छ्याम खालैसे कर लसी आहिन, तर हाडलान सेमसे ब्याह आल भिसी हाडसे हाडदान तहरी थान्मुला भिसम थे म्हिसेनोन ज्यबान लबा हिनना। ³⁸ थेतबासेलमा जुन म्हिसे ब्याह लला, थेसे ज्यबान लबा हिनना। तर जुन म्हिसे ब्याह आल, थेसे इन ज्यबा लबा हिनना।

³⁹ हेम्बो सोतेधोना म्रिड हेम्बोलान तहरी तला। तर हेम्बो सिमाहेन्से थेदा ब्याह लइ म्हन्जी भिसम थेसे स्य्हान्दोदेन छ्याम ब्याह लबारी खम्ला। थे म्हि चा प्रभुदा विश्वास लबा म्हि ततोःला। ⁴⁰ तर थे म्रिडम्हेमे ब्याह आलना चिजी भिसम थेला लागिरी इन ताड्तोःबा ताम हिनना। चु डाइ म्हन्बा ताम जे हिनना, तसैनोन परमेश्वरला आत्मा डादेन छ्याम मुला भिसी डाइ म्हन्बा मुला।

8

मूर्तिदा फुल्बा सहेगदे

¹ दाहेन्से मूर्तिगदेदा फुल्बा सहेला बारेरी डाइ पाड्ला। य्हाड जम्मानदेन छ्याम ज्ञान बुद्धि मुला भिबा ताम य्हाड जम्मादान था मुला। थे ज्ञान बुद्धिसे चा य्हाडदा घमण्डी सहोला। तर मायासे चा मण्डलीदा भड्ना लला। ² चुदे खालै म्हिसे “डाइ जम्मान ताम सेबा मुला” भिसी म्हन्मुला भिसम थेसे जुन ताम सेतोःमुबा थे ताम चा सेबान आरे। ³ तर जुन म्हिसे परमेश्वरदा माया लला परमेश्वरसे थेदा डोसेला।

⁴ थेतबासेलमा मूर्तिगदेदा फुल्बा चबा सहेला बारेरी च्यागे। जम्बुलिडरी मुबा मूर्ति तिगै आहिन। ओच्छे परमेश्वर बाहेक स्य्हान्दो खालै आरे भिबा ताम य्हाडदा थानोन मुला। ⁵ मुदेन जम्बुलिडरी मिन जेला ल लु मुला तला। चुहड् लसी म्हिसे ल्हानान ल लुदेन प्रभुगदे तेन्सैनोन, ⁶ य्हाडला लागिरी चा परमेश्वर आबा गिक जे मुला, जम्मान सहे थेसेन सहोबा हिनना। ओच्छे य्हाड थेलान लागिरी सोबा हिनना। य्हाडला लागिरी प्रभु गिक जे मुला थे चा येशू ख्रीष्ट हिनना। थेग्यामसेन जम्मान सहे सहोबा हिनना। ओच्छे थेग्यामसेन य्हाड सोबा मुला।

७ तर जम्मान म्हिदा चु ताम था आरे। ओच्छे एनीगदे न्हडला कोइ कोइ म्हिसे विश्वास लबा भन्दा डाच्छान मूर्तिदा पूजा लसी खबासे लमा दान्देधोनाएनोन थेहड्बा चबा सहे चमा चु चा मूर्तिदा फुल्बा सहे हिन्ना भिसी म्हन्मुला। ओच्छे ज्यबा आज्यबा फेबारी खम्बा थेनीगदेला ज्ञान कमजोर तबासे लमा थेनीगदेसे “डाइ पाप लजी” भिसी म्हन्मुला। ८ चबा सहेसे य्हाडदा परमेश्वरदा सेम निबा म्हि आसहो। ओच्छे थेहड्बा चबा सहे चसैनोन य्हाडदा न्होडना आल, आचसैनोन य्हाडदा ज्यबा तना आल।

९ तर एनीगदे होशियार तउ, एनीगदेला लागिरी जम्मान सहे चबारी तसैनोन विश्वासरी कमजोर मुबागदेसे पाप लआम्याङ्गै। १० चुदे कमजोर सेम मुबागदेसे एनीगदे सेबा घोबा म्हिगदेदा मूर्तिला मन्दिररी चबा थुड्बा लसी चिबा म्हाङ्गी भिसम, तिग थेनीगदेसे मूर्तिदा फुल्बा सहेगदे चबा आँट आल? ११ एला ज्ञान बुद्धि अन्छारला गे लबासे लमा थे विश्वासरी कमजोर मुबा ज्योज्यो आले नाना आडागदे नाश तला। तर ख्रीष्ट थेनीगदेला लागिरीनोन सिसी जिन्बा मुला। १२ थेहड् लसी एनीगदेसे विश्वासरी कमजोर मुबा स्य्हान्दो विश्वासीगदेला सेम न्होडना लबा चा ख्रीष्टला बिरोधरी पाप लबा हिन्ना। १३ चुदे डाइ चबा चबा सहेसे लमा स्य्हान्दो विश्वासीगदे पापरी फसब तला भिसम डाइ खाइमै स्या आच। चुहड् लसी स्य्हान्दो विश्वासीगदेदा पापरी फसब लबा डाला सेम आहिन।

9

पावलएनोन अर्गु मुल चेलागदे हड्बान हिन्ना

१ डा खजिबै सहेला तहरी आरे। डा मुल चेला हिन्ना। डाइ य्हाडला प्रभु येशूदा म्हाङ्गा मुला। डाइ य्हाडला प्रभुला लागिरी लबा गेग्यामसेन एनीगदेसे थेदा विश्वास लबा हिन्ना। २ स्य्हान्दोगदेसे डादा मुल चेला आहिन भिसैनोन एनीगदेसे मी डादा मुल चेला हिन्ना भिसी म्हन्मुला। एनीगदेसे प्रभुदा लबा विश्वासग्यामसेन डा मुल चेला हिन्ना भिसी उन्मुला।

३ डाला अधिकारला बारेरी बिरोध लसी ताम पाड्बा म्हिगदेदा डाइ चुनोन ताम पाड्ला, ४ तिग एनीगदेग्यामसेन चबा थुड्बा किन्बा डन्ना हक आरे? ५ तिग स्य्हान्दो मुल चेलागदेदेन प्रभुला आलेगदे ओच्छे पत्रुससे हड् लसी डन्सेनोन छ्याम छ्यामनोन प्रभुदा विश्वास लबा म्हाङ्गा थोसी भ्रबा हक आरे? ६ तिग बारनाबासदेन डाइ जे सोबाला लागिरी ह्हाडसेन गे लतोःबा हिन्ना?

७ तिग सिपाहीसे सरकारग्याम चबा थुड्बा आयाड्? याड्ला। तिग अडगुर सूबा म्हिसे अडगुर आच? चला। तिग म्हे मुइ न्हबा म्हिसे ड्हे म्हुइ आथुड्? थुड्ला। ८ चु ताम डाइ म्हिसे म्हन्बा ताम अन्छार जे पाड्बा आहिन। तर परमेश्वरसे मोशादा पिन्बा ठिमरीनोन चुहड् भिसी भ्रिबा मुला। ९ तिगदा भिसम परमेश्वरसे मोशादा पिन्बा ठिमरी “दाइ लबा ग्लापला सुडरी बोर थाक्वान्गो” भिसी भ्रिबा मुला। तिग परमेश्वरसे म्हेगदेला लागिरी वासता लबा हिन्ना? १० तिग परमेश्वरसे य्हाडला लागिरीन चु ताम सुड्बा आहिन? हिन्ना। य्हाडला लागिरी चु ताम भ्रिबा हिन्ना। तिगदा भिसम मोइबा म्हिदेन दाइ लबा म्हिसे ह्हाडला भो याड्ला भिबा आशसेन गे लमुला। ११ डन्से एनीगदेदा थार्बा पिन्बा समाचार थेःना लबा चा बलु ढवबा हड्बान हिन्ना भिसम एनीगदेग्याम डन्से बाली दुइबा हड् लसी तिगै सहे किन्मा उदेक म्हन्तोःला? १२ चुदे स्य्हान्दो म्हिगदेसे एनीगदेग्याम तिगै सहे याड्बा हक मुला भिसम झन डन्ना मी घेन हक मुला। तर डन्से थे हक अन्छार आकिन्नी। बरु ख्रीष्टला थार्बा पिन्बा समाचार थेःना लमा स्य्हान्दो म्हिदा विश्वास लबारी गाहो थातगै भिसी जम्मान ताम नासी चिजी। १३ तिग परमेश्वरला मन्दिररी गे लबा म्हिसे मन्दिरग्यामसेन चबा सहे चला भिबादेन बलि फुल्बा ग्लारी गे लबा म्हिसे बलि फुल्बा सहेग्यामसेन भो किन्ना भिबा ताम एनीगदेदा था आरे? १४ चुहड् लसीन थार्बा पिन्बा समाचार पाड्बा म्हिगदेसेनोन थे गेग्यामसेन चबा थुड्बा लउ भिसी प्रभुसे कुल्बा मुला।

१५ तर डाइ याड्तोःबा हक एनीगदेग्याम तिगै म्हाड्बा आरे। दान्देनोन एनीगदेसे थे जम्मान ताम ढिक्ना लगै भिसीएनोन डाइ चु ताम भ्रिबा आहिन। चुहड् लसी डा ताड्सी ताड्सी थार्बा पिन्बा समाचार थेःना लबा डाला गेदा खालै म्हिसे गे आखेल्बा स्होजी भिसम बरु डा सिबान ज्यबा तला।

16 डाइ थाबां पिन्बा समाचार थे:ना लमा डाइ घमण्ड लतो:बा ताम आरे। तिग्दा भिसम चु डाइ थे:ना लतो:बान समाचार हिन्ना। चुदे डाइ थाबां पिन्बा समाचार थे:ना आलनी भिसम डाला लागिरी चु भन्दा दुखला ताम अर्गु तिगै आरे। 17 तिग्दा भिसम चु गे डाइ म्हन्बा अन्छार लजी भिसम डाइ इनाम याड्वा। तर चु गे डाइ म्हन्बा अन्छार आल। परमेश्वरसेन डादा चु गे लउ भिसी जिम्मा पिन्बासे लमान चु गे लबा हिन्ना। 18 थेहड् भिसम डाइ याड्वा इनाम चा तिग हिन्ना? थे इनाम चा डाइ याड्वा हक अन्छार तिगै सहे आकिन्ना थाबां पिन्बा समाचार थे:ना लबा चा डाइ याड्वा इनाम हिन्ना।

19 डा खालै महिला नोकर आहिन। तसैनोन ल्हानान म्हिगदेदा डाइ ख्रीष्ट मुबा ग्लारी भबारी खमगै भिसी डा जम्मान महिला नोकर दोजी। 20 यहूदीगदेसे ख्रीष्टदा विश्वास लगै भिसी डा यहूदीगदे हड्बान दोसी भ्रजी। ओच्छे परमेश्वरसे मोशादा पिन्बा ठिमला तहरी भ्रबा म्हिगदेसे ख्रीष्टदा विश्वास लगै भिसी डाएनोन थे ठिमला तहरी चिजी। 21 ओच्छे थे ठिम अन्छार आभ्रबा अर्गु यहूलला म्हिगदेसेनोन ख्रीष्टदा विश्वास लगै भिसी डाएनोन थेनीगदे हड्बान दोसी भ्रजी। चु भिबा चा डाइ परमेश्वरला ठिमदा ख्लाजी भिसी पाड्वा आहिन, तर डा ख्रीष्टला ठिम अन्छार भ्रबा मुला। 22 ओच्छे विश्वासरी पाको आरेबा म्हिगदे विश्वासरी पाको तगै भिसी डाएनोन थेनीगदे हड्बान तसी भ्रजी। चुहड् लसी जम्मान म्हिसे ख्रीष्टग्याम थाबां याड्गै भिसी जम्मान म्हिगदेला लागिरी डा जम्मान थरीला म्हि दोसी भ्रजी। 23 चु थाबां पिन्बा समाचारग्याम मोलम याड्वा भिबा आश लसीन डाइ थाबां पिन्बा समाचारला लागिरी चु जम्मान गे लबा हिन्ना।

24 इनाम याड्वा भिसी छयोड्वा म्हिगदे न्हडरी गिकसे जे इनाम याड्वा भिबा ताम एनीगदेदा था आरे? थेतबासेलमा एनीगदेएनोन इनाम याड्बालान लागिरी छयोड्गो। 25 तिगै खेलरी भो किन्बा म्हिसे जम्मान थरीला तालिम किन्तो:ला। थेनीगदेसे म्हासी निबा इनाम याड्बाला लागिरी थेहड् लमुला। तर यहडसे चा खाडमै आमहबा इनाम याड्बाला लागिरी थेहड् लबा मुला। 26 थेतबासेलमा डा ह्वाड धोतो:बा ग्लारी आधोतेधोना छयोड्बारी आखला। थेहड् लसी म्हाडदुडरी छेक्बा म्हिसे हड् लसीं डाइ आछेक। 27 तर डाइ डाला लहुडदा दुख पिन्सी तहरी थान्ना। थेहड् आलनी भिसम स्य्हानदो म्हिदा थाबां पिन्बा समाचार थे:ना लना लनान डाइ याड्तो:बा इनाम आयाड्।

10

इस्राएलीगदेसे हड् लसी मूर्तिदा थातेन्गो

1 ज्योज्यो आले नाना आडागदे, एनीगदेसे चु ताम था याड्गै भिसी डाइ म्हन्बा मुला। यहडला आखे म्हेमेगदेदा मिश्र यहुल्साग्याम खसुसे ग्याम उन्सी भोजी। ओच्छे थेनीगदे जम्मान ज्यना लसी समुन्द्र गुडग्याम निखमजी। 2 ओच्छे थेनीगदे जम्मान मोशाला लिच्छा भ्रसी खसुदेन समुन्द्ररी बपत्तिस्मा याड्जी। 3 थेनीगदे जम्मासेन परमेश्वरला आत्मासे पिन्बा चबा सहे चजी।* 4 ओच्छे थेनीगदेदेन छ्याम छ्यामनोन मुबा पहराग्याम परमेश्वरला आत्मासे पिन्बा क्युड थेनीगदे जम्मासेन थुड्जी। थे पहरा ख्रीष्टनोन मुबा।* 5 तसैनोन थेनीगदे न्हडला ल्हानान हड्बा म्हिगदेदेन छ्याम परमेश्वर आताड्नी। ओच्छे थेनीगदे थे तोडतोडबा ग्लारीन सिजी।*

6 थेनीगदेसे हड्बान यहडसेनोन आज्यबा सेम थाथोगै भिसीन यहडदा घोना लबाला लागिरी चु ताम तबा हिन्ना। 7 थेनीगदे न्हडला कोइ कोइसे मूर्तिदा तेन्बा हड् लसी एनीगदेसे थातेन्गो। थेनीगदेला बारेरी बचनरीनोन चुहड् भिसी भ्रिबा मुला, “म्हिगदेसे चबा थुड्बा लबारी चिजी ओच्छे रे:सी मोजमजा लजी।”* 8 थेनीगदे न्हडला कोइ कोइ म्हिगदे ब्रेल्सी भ्रबा हड् लसी यहड ब्रेल्सी भ्रबारी आत। थेनीगदेसे थेहड्बा आज्यबा गे लबासे लमान तिरेरीन बोगल गिकसे हजार सोम म्हि सिजी।* 9 थेनीगदे न्हडला कोइ कोइ म्हिगदेसे प्रभुलां सेम च्याबा हड् लसी यहडसे थेला सेम च्याबारी आत। प्रभुला

† 9:26 चु चा बक्सीड क्लाड्बा खेल हड्बान म्हन्सी म्हाडदुडरीन म्हिदा आछेक भिसी घोना लबा हिन्ना। तिग्दा भिसम कोरिन्थरी दिडएदडेन खेल क्लाड्मुबा। * 10:3 प्रस्था १६:३५ * 10:4 प्रस्था १७:६; गन्ती २०:११ * 10:5 गन्ती १४:२९-३० * 10:7 प्रस्था ३२:६ * 10:8 गन्ती २५:१-१८ † 10:9 चु पदरी प्रभुला साटोरी ख्रीष्ट भिसी कोइ कोइ बाडबलरी भ्रिबा मुला।

सेम च्याबासे लमा थेनीगदे पुरखीसे जीसी सिजी।* 10 थेनीगदे न्हडला कोइ कोइसे गनगन लबा हड लसी य्हाडसे गनगन लबारी आत। गनगन लबासे लमा थेनीगदेदा नाश लबा दूतसे नाश लजी।*

11 थे तामगदे य्हाडदा घोना लबाला लागिरी थेनीगदेदा तबा मुबा। थे तामगदे जिन्बारी छ्याइबा धुइरी य्हाडदा होशियार तना लबाला लागिरी भिबा हिन्ना।

12 थेतबासेलमा जुन म्हिसे डा ठीक मुला भिसी म्हन्ना, थे म्हि चा होशियार तसी चिगै। आहिन्सम थे म्हि हिल्ला। 13 एनीगदेदा लोभ उन्सी फसब लमा स्य्हान्दो म्हिगदेदा लोभरी फसब लबा हडबान तला। तर परमेश्वर विश्वास लखम्बा परमेश्वर हिन्ना, तिग्दा भिसम परमेश्वरसे एनीगदेला सेमसेन नाआखम्बाधोनाला लोभ उन्सी फसब लबारी आपिन। एनीगदेदा फसब लबारी लोभ उन्मा थेग्याम फेबारी परमेश्वरसेन एनीगदेदा ग्याम उन्सी पिन्ना।

14 थेतबासेलमा डाला सेम निबा ह्योगदे, एनीगदेसे मूर्ति थातेन्गो। 15 सेबा घोबा म्हि म्हन्सी डाइ एनीगदेदा पाडबान मुला। डाइ पाडबा चु ताम सत्य हिन्ना कि आहिन, एनीगदेसेन पक्का लउ। 16 प्रभु भोजला खोरे थोसी य्हाडसे परमेश्वरदा धन्यवाद पिन्सी थुड्मा य्हाड ख्रीष्टला कारी गिक तबा हिन्ना। ओच्छे गेड क्युइसी चमा य्हाड ख्रीष्टला ल्हुइरी गिक तबा हिन्ना।* 17 गेड गिकनोन हिन्ना, थेतबासेलमा य्हाड ल्हानान मुसैनोन ल्हुइ चा गिकनोन हिन्ना। तिग्दा भिसम य्हाड जम्मासेन गेड गिकग्यामसेन चबा मुला।

18 इस्राएलीगदेदा च्यागो, परमेश्वरदा फुल्बा सहे चबागदे परमेश्वरदा बलि फुल्बा ग्लादेन छ्याम गिक तबा मुला।* 19 डाइ पाडबारी म्हाइबा तिग हिन्ना भिसम, मूर्तिदा फुल्बा सहे तिगै आहिन, ओच्छे मूर्तिएनोन तिगैनोन आहिन। 20 तर मूर्तिदा बलि फुल्बा अर्गु य्हुलला म्हिगदेसे परमेश्वरदा फुल्बा आहिन, म्हड म्हुडदा हिन्ना। थेतबासेलमा एनीगदे म्हड म्हुडदेन गिक थातगै भिबा डाला सेम मुला।* 21 एनीगदेसे प्रभुदेन म्हड म्हुड न्हीलान खोरेग्याम थुड्बारी आखम। ओच्छे प्रभुदेन म्हड म्हुड न्हीलान टेबुलरी चिसीनोन चबारी आखम।† 22 थेहड लजी भिसम प्रभुदा डाह तला। तिग एनीगदेसे य्हाड प्रभु भन्दा भड्बा हिन्ना भिसी म्हन्बा?*

एनीगदेसे जे लसै परमेश्वरदा मान तबा गे लउ

23 जम्मान ताम लम्याड्मुला, तर जम्मान ताम य्हाडला लागिरी ज्यबा आरे। जम्मान ताम लम्याड्मुला, तर जम्मान तामसे स्य्हान्दोगदेदा ज्यबा तना आल।* 24 एनीगदे खालैसेन हाडसे हाडदा ज्यबा लबारी थाम्हाइगो। तर हाडला खिमजेमदा ज्यबा लबारी म्हाइगो।

25 एनीगदेला सेम आन्होड्बाला लागिरी स्या पसलरी निसी खानडग्याम भबा हिन्ना भिसी ड्योइबा छार्बा आलना भसी चउ। 26 तिग्दा भिसम परमेश्वरला बचनरी चुहड लसी भिबा मुला, “जम्बुलिडदेन जम्बुलिडरी मुबा जम्मान सहे प्रभुलान हिन्ना।”*

27 ख्रीष्टदा विश्वास आलबा खालै म्हिसे एनीगदेदा चबारी ड्योइमा एनीगदेदा निबा सेम खजी भिसम हाडला सेम आन्होड्बाला लागिरी एनीगदेसे तिगै ड्योइबा छार्बा आलना थेरी चबारी पिन्बा जम्मान सहे चउ। 28 तर खालै म्हिसे एदा “चु मी बलि फुल्बा सहे हिन्ना” भिजी भिसम थेहड पाड्बा म्हिदेन थेला सेमला लागिरी एसे थे चबा सहे थाचउ। 29 डाइ एला लागिरी पाड्बा आहिन, तर एदा थे ताम था याड्ना लसी पिन्बा म्हिला सेमला लागिरी पाड्बा हिन्ना। डाइ जे लसै तबा तामरी तिग्दा स्य्हान्दोला सेमसे निसाफ लपुड्से? 30 चुदे डाइ परमेश्वरदा धन्यवाद पिन्सी चबान मुला भिसम धन्यवाद पिन्सी चबा सहेला लागिरी स्य्हान्दोसे तिग्दा डादा बिरोध लबा?

31 थेतबासेलमा एनीगदेसे चसै, थुड्सै, जे लसैनोन परमेश्वरदा मानदेन जयजयकार पिन्बाला लागिरी एनीगदेसे जम्मान गे लउ। 32 एनीगदेसे यहूदीदा तसै, अर्गु य्हुलला म्हिदा तसै, परमेश्वरला मण्डली तसै खालैदान न्होड्ना लबा गे थालउ। 33 जम्मान गेग्याम डाइ जम्मान म्हिदा ताड्ना लबारी म्हाइबा

* 10:9 गन्ती २१:५-६ * 10:10 गन्ती १६:४१-४९ * 10:16 मत्ती २६:२६-२८; मर्कू १४:२२-२४; लूका २२:१९-२० * 10:18 लेवी ७:६ * 10:20 व्यव ३२:१७ † 10:21 चु पद अन्छार विश्वासीगदेसे प्रभुला भोज चमाहेन्से विश्वास आलबा म्हिदेन चबारी मूर्तिगदेला मन्दिररी निबारी आत। * 10:22 व्यव ३२:२१ * 10:23 १ कोर ६:१२ * 10:26 भजन २४:१

मुला। डाइ खाइमै हाडदा ज्यबा तगै भिसी खजिबै गे लबारी आमहाइनी। तर थेनीगदेसे थार्बा याडूगै भिसी डाइ ल्हानान म्हिगदेला लागिरी ज्यबा गे लबारी म्हाइबा मुला।

11

1 डाइ ख्रीष्टसे लबा हड्ढोन लसी भ्रबा मुला, एनीगदेएनोन डाइ लबा हड्ढोन लसी भ्रउ।*

मिडम्हेमेसे थोबो घप्तो:बा

2 डा एनीगदेदेन छ्याम ल्हानान ताड्बा मुला। तिग्दा भिसम एनीगदेसे डादा सदन ढन्बा मुला, ओच्छे डाइ लोप्बा अनछार एनीगदे भ्रबा मुला।

3 तर एनीगदेसे चु ताम घोटो:ला भिसी डाइ महन्बा मुला। ख्रीष्ट चा जम्मान हेम्फेबेला थोबो† हिनना ओच्छे हेम्बो चा मिडला थोबो हिनना। थेहड् लसीन परमेश्वर चा ख्रीष्टला थोबो हिनना।

4 थोबो घप्सी प्रार्थना लबादेन अगमवाणी पाड्बा हेम्फेबेसे हाडलान थोबोला बेइज्जत लबा हिनना।

5 तर थोबो आघपना प्रार्थना लबादेन अगमवाणी पाड्बा मिडम्हेमेसे चा हाडला हेम्बोला बेइज्जत लबा हिनना। थेहड्बा मिडम्हेमे चा क्रा भ्रेसी भ्रबा मिडम्हेमे हड्ढान हिनना।† 6 खालै मिडम्हेमेसे

हाडला थोबो आघपनी भिसम थेसे क्रा भ्रेसी भ्रगै। तर क्रा थाबादेन भ्रबा चा मिडम्हेमेला लागिरी पे:बा खबा ताम तबासे लमा थेसे थोबो घप्तो:ला। 7 परमेश्वरसे हाडदा उन्बाला लागिरी हेम्फेबेदा

हाड हड्ढान सहोजी। थेतबासेलमा हेम्फेबेसे थोबो घपबारी आत। तिग्दा भिसम हेम्फेबेला गे चा परमेश्वरदा मान लबा हिनना। तर मिडम्हेमेला गे चा हेम्फेबेदा मान लबा हिनना।* 8 तिग्दा भिसम

जम्मान भन्दा डाच्छा हेम्फेबे मिडम्हेमेग्याम सहोबा आहिन, तर मिडम्हेमे चा हेम्फेबेग्याम सहोबा हिनना।* 9 थेहड् लसीन मिडम्हेमेला लागिरी हेम्फेबे सहोबा आहिन, तर हेम्फेबेला लागिरी मिडम्हेमे

सहोबा हिनना।* 10 ओच्छे स्वर्गदूतगदेसे म्राड्बासे लमा मिडम्हेमेसे हाडला हेम्बोला तहरी चिबा मुला भिबा ताम उन्बाला लागिरी थोबो घप्तो:ला।

11 तसैनोन प्रभुला म्हिगदेला गुडरी मिड हेम्बोला तहरी चितो:ला ओच्छे हेम्बोएनोन मिडला तहरी चितो:ला। 12 तिग्दा भिसम हेम्फेबेग्याम मिडम्हेमे सहोजी। थेहड् लसीन हेम्फेबे मिडम्हेमेग्याम

न्हला। ओच्छे जम्मान ताम चा परमेश्वरग्यामसेन तबा हिनना। 13 चु ताम एनीगदेसेन पक्का लउ, तिग मिडम्हेमेसे थोबो आघपना परमेश्वरदेन छ्याम प्रार्थना लमा जेला? 14 थेहड् लसीन हेम्फेबेसे

क्रा न्हजी भिसम थेला लागिरी पे:बा खबा ताम हिनना भिसी तिग एनीगदेसे डाच्छाहेनसेन तसी खबा तामग्याम था याड्बा आरे? 15 तर चुदे मिडम्हेमेला क्रा हेड्बा मुसम थेला लागिरी ताड्बा ताम हिनना।

तिग्दा भिसम थेला थोबो घपबाला लागिरीन थेदा हेड्बा क्रा पिन्बा हिनना। 16 तर चु तामदा खालैसे बिरोध लबारी म्हाइजी भिसम य्हाड्देन परमेश्वरला मण्डलीदेन छ्याम चु बाहेक अर्गु खजिबै ठिम

आरे।

प्रभु भोज

मती २६:२६-२९; मर्कूस १४:२२-२५; लूका २२:१४-२०

17 दाहेनसे डाइ एनीगदेदा चु तामगदेला बारेरी पाड्मा एनीगदेसे ज्यबा लजी भिसी डाइ पाड्बारी आखम। तिग्दा भिसम एनीगदे हुप तबा धुइरी ज्यबा ताम भन्दा ल्हानान आज्यबा ताम लबा मुला।

18 डाच्छा एनीगदे मण्डलीरी हुप तबा धुइरी हाड हाड न्हडरी आढिक्मुला भिबा ताम डाइ थे:बा मुला। चु ताम हिनना तला भिसी डाइ विश्वास लबा मुला। 19 खाल ठीक मुला, खाल ठीक आरे भिसी

डोसेबाला लागिरी एनीगदेला गुडरी आढिक्बा तामगदेएनोन खतो:ला।

20 एनीगदे ग्ला गिकरी पोप तसी चबा थुड्बा लबा चा प्रभु भोज आहिन। 21 तिग्दा भिसम चबा थुड्बा धुइरी जम्मासेन खालैसे खालैदा आभ्रान्ना हाड हाडला भो चला। ओच्छे कोइ फोइथान तला,

कोइ चा थुड्सी ड्य्होइला। 22 एनीगदेसे हाड हाडलान दिमरी चसै आत? तिग एनीगदेसे परमेश्वरला

* 11:1 १ कोर ४:१६ † 11:3 “थोबो” भिबा चा मुली भिबा हिनना। † 11:5 थे धुइरी जम्मासेन डोसेगै भिसी बेश्या मिडम्हेमेगदेला क्रा भ्रेसी पिन्मुबा। * 11:7 उत्प १:२६-२७ * 11:8 उत्प २:२१-२२ * 11:9 उत्प २:२३

मण्डलीदा गे आखेलबा भिसी म्हन्बा? ओच्छे तिगै आरेबा म्हिगदेदा पेःना लबारी म्हाइबा? दाहेन्से डाइ एनीगदेदा तिग पाइसे? तिग एनीगदेसे चुहड् लबा ज्यबा हिन्ना भिसी पाइसे? अहं, डाइ आपाड्।

23 तिग्दा भिसम डाइ जुन ताम प्रभुग्याम लोप्बा मुला थे ताम डाइ एनीगदेदा पाइबारी छ्याइबा मुला। प्रभु येशूदा चुड्बाकुनु म्हनुड थेसे गेड थोजी। 24 ओच्छे परमेश्वरदा धन्यवाद पिन्सी थे गेड क्युडजी। जमाहेन्से “चु एनीगदेला लागिरी डाला ल्हुइ हिन्ना। डादा ढनसी चिबाला लागिरी एनीगदेसे चुहड् नोन लउ” भिसी सुड्जी। 25 थेहड् लसीन भोज चसी जिनमाहेन्से प्रभुसे खोरे थोसी, “चु खोरेला निडगु एनीगदेला लागिरी डाला काग्याम सहोबा छार कबुल हिन्ना। जुन जुन धुइरी एनीगदेसे चु थुड्ला थे, थे धुइरी डादा ढनबाला लागिरी सदन चुहड् लउ” भिसी सुड्जी।* 26 चुहड् लसी गेड चबादेन अडगुरला निडगु थुड्बा धुइरी प्रभु आफेपखतेधोना प्रभु य्हाडला लागिरी सिजी भिसी एनीगदेसे जम्मादान थेःना लमुला।

27 थेतबासेलमा जुन म्हिसे तिगै ताम वास्ता आलना प्रभुला गेड चबादेन प्रभुला खोरेग्याम थुड्ला थेसे प्रभुला ल्हुइदेन कादा बेइज्जत लबासे लमा पापला दोष तला। 28 जम्मान म्हिसे डाच्छा ह्वाडसे ह्वाडदान ठीक मुला कि आरे भिसी च्यासी जे थे गेड चउ, ओच्छे खोरेग्याम थुड्गो। 29 तिग्दा भिसम जुन म्हिसे प्रभुला ल्हुइला बारेरी आघोना चबा थुड्बा लला, थेसे थेहड् लसी चबा थुड्बा लबासे लमा सजाय याड्ला। 30 थेतबासेलमा एनीगदे न्हडरी ल्हानान कमजोरदेन आखम्बा मुला, ओच्छे कोइ कोइ मी सिसी जिन्जी। 31 तर य्हाडसे ह्वाडसे ह्वाडदान ठीक मुला कि आरे भिसी च्याजी भिसम य्हाडसे सजाय नाआतोः। 32 तर निसाफ लबा धुइरी जम्बुलिडला दोष स्यापबा हड् लसी एनीगदेला दोष थास्यापगै भिसी य्हाडदा प्रभुसे ह्वाडला तहरी थान्ना।

33 थेतबासेलमा ज्योज्यो आले नाना आडागदे, प्रभु भोज चबारी ग्ला गिकरी पोप तबा धुइरी गिकसेम गिकदा भ्रान्गो। 34 खालै फोखेन्बा मुसम थेसे दिमरीन चगै, ओच्छे प्रभु भोज चबा धुइरी एनीगदे खालैसेन परमेश्वरग्याम सजाय थायाड्गै। अर्गु तामला बारेरी डा खसीन पाड्ला।

12

परमेश्वरला आत्मासे पिन्बा मोलम

1 ज्योज्यो आले नाना आडागदे, परमेश्वरला आत्मासे पिन्बा मोलमला बारेरी एनीगदेसे था याड्गै भिसी डाइ म्हन्बा मुला। 2 एनीगदेसे ख्रीष्टदा विश्वास लबा भन्दा डाच्छा तिगै सहेसे एनीगदेदा उन्बा आज्यबा ग्यामरी भ्रसी तामनोन पाइआखम्बा मूर्तिगदेदा तेन्जी भिबा ताम एनीगदेदा थानोन मुला। 3 परमेश्वरला आत्मासे कुल्बा अन्छार भ्रबा म्हिगदे खालैसेन “येशू गे आखेलबा हिन्ना” भिसी आपाड्। ओच्छे परमेश्वरला आत्मासे हो आलतेधोना खालैसेन “येशून प्रभु हिन्ना” भिसी पाइबारी आखम भिबा ताम एनीगदेसे था याड्गै भिसी डाइ म्हन्बा मुला।*

4 परमेश्वरसे पिन्बा मोलम ल्हानान थरीला मुला, तर मोलम पिन्बा परमेश्वरला आत्मा चा गिक जे हिन्ना।* 5 तेन्बाला लागिरी ल्हानान थरीला तामगदे मुला, तर प्रभु चा गिक जे मुला। 6 ओच्छे गेगदे ल्हानान थरीला मुला, तर जम्मान म्हिदा गे लखम्बा शक्ति पिन्बा चा थेनोन परमेश्वर जे हिन्ना।

7 जम्मान विश्वासीदा हो लबाला लागिरी परमेश्वरला आत्मासे य्हाड जम्मादान मोलम पिन्बा मुला। 8 परमेश्वरला आत्मासेन कोइदा बुद्धिला ताम पाइबारी, थेनोन परमेश्वरला आत्मासे कोइदा ज्ञानना ताम पाइबारी मोलम पिन्बा मुला। 9 थेनोन परमेश्वरला आत्मासे कोइदा विश्वास लखम्बा, कोइदा आखम्बा म्हिगदेदा खम्ना लबा मोलमगदे पिन्बा मुला। 10 ओच्छे कोइदा उदेकला गे लखम्बा, कोइदा अगमवाणी पाइबा, कोइदा ज्यबा आज्यबा आत्मा फेखम्बा, कोइदा थरी थरीला ग्योइ पाइबा, कोइदा चा थेनोन थरी थरीला ग्योइ जम्मादान घोना लखम्बा मोलमगदे पिन्बा मुला। 11 तर परमेश्वरला आत्मा गिकनोन हिन्ना ओच्छे चु जम्मान गेगदे थे आत्मालान हिन्ना। ओच्छे चु मोलम परमेश्वर ह्वाडसेन म्हन्बा अन्छार गिक गिकदा पिन्ना।

* 11:25 प्रस्था २४:६-८; यर्मि ३१:३१-३४ * 12:३ रोमी १२:६ * 12:४ रोमी १२:६

लहुइ गिकरी ल्हानान सहे मुला

12 यहाडला लहुइरी ल्हानान सहे मुला। ल्हानान सहेगदे मुसैनोन लहुइ चा गिक जे हिनना, ख्रीष्टला लहुइएनोन थेहडबान हिनना।* 13 यहाड यहुदी हिनसै, अर्गु यहुलला म्हि हिनसै, नोकर हिनसै आहिनसै यहाडसे गिकनोन परमेश्वरला आत्माग्याम लहुइ गिकरीन बपतिस्मा किन्बा मुला। ओच्छे यहाड जम्मासेन परमेश्वरला आत्मा गिकनोन याड्बा मुला।†

14 तिगदा भिसम लहुइला सहे गिकग्यामसे जे महिला लहुइ सहोबा आहिन, तर लहुइला ल्हानान सहेगदे ढिक्सी महिला लहुइ सहोबा हिनना। 15 चुदे काडसे “डा या आहिन, थेतबासेलमा डा लहुइरी मुबा सहे आहिन” भिजी भिदेमा थे लहुइला सहे आहिन? हिनना। 16 ओच्छे नाब्यडसे “डा मी आहिन, थेतबासेलमा डा लहुइला सहे आहिन” भिजी भिदेमा थे लहुइला सहे आहिन? हिनना। 17 चुदे लहुइरी जम्मान मीनोन मी जे मुबा हिनसम तिगसे थे:बा? ओच्छे लहुइरी जम्मान नाब्यड जे मुबा हिनसम तिगसे थाड नाबा? 18 तर परमेश्वरसे ह्याडसे म्हनबा अनछार यहाडला लहुइरी जम्मान सहे ढिक्ना लसी थान्बा मुला। 19 चुदे थे जम्मान सहे गिक जे मुबा हिनसम लहुइनोन आदोसेला मुबा। 20 तर लहुइरी ल्हानान सहेगदे मुसैनोन लहुइ चा गिक जे हिनना।

21 मीसे यादा “ए डादा आतो:” भिसी पाड्आखम, ओच्छे थोबोसेनोन काडदा “एनीगदे डादा आतो:” भिसी पाड्आखम। 22 बरु लहुइरी मुबा कमजोर सहेगदे झन आरेना आतमुला। 23 यहाडसे जजा म्हनबा लहुइला थे सहेगदेदा झन ज्यना लसी थान्मुला। ओच्छे उन्बारी आखम्बा सहेगदेदा झन जोगब लसी थान्मुला। 24 तर यहाडसे उन्बारी खम्बा सहेगदेदा चा थेहड लसी जोगब लसी थान्आतो:। बरु लहुइला कमजोर सहेगदेदा चा मान लगै भिसी परमेश्वरसे ढिक्ना लसी थान्जी। 25 लहुइरी मुबा जम्मान सहेगदे ढिक्सी गिकसेम गिकला वास्ता लगै भिसीन हिनना। 26 चुदे लहुइला सहे गिकदा दुख तजी भिसम लहुइला जम्मान सहेदा दुख तला। ओच्छे लहुइला सहे गिकसे मान याड्जी भिसम लहुइला जम्मान सहेगदे ताड्ला।

27 एनीगदे जम्मान ख्रीष्टला लहुइ हिनना, ओच्छे एनीगदे गिक गिक ख्रीष्टला लहुइला सहेगदे हिनना। 28 परमेश्वरसेन मण्डलीरी जम्मान भन्दा

डाच्छा मुल चेलागदे,
जमाहेन्से अगमवक्तागदे,
जमाहेन्से स्य्हान्दोदा लोप्बा म्हिगदे,
ओच्छे उदेकला गे लबा म्हिगदे,
आखम्बा म्हिदा खम्ना लबा मोलम याड्बा म्हिगदे,
स्य्हान्दोदा ह्यो लबा म्हिगदे,
जम्मान ताम ढिक्ना लबा म्हिगदे,
ओच्छे थरी थरीला ग्योइ पाड्बा म्हिगदेदा धम्सी थान्बा मुला।*

29 तिग जम्मान म्हिगदे मुल चेला हिनना? आहिन। तिग जम्मान म्हिगदे अगमवक्ता हिनना? आहिन। तिग जम्मान म्हिगदे स्य्हान्दोदा लोप्बा म्हि हिनना? आहिन। तिग जम्मान म्हिगदेसे उदेकला गे लला? आल। 30 तिग जम्मान म्हिगदेसे आखम्बा म्हिदा खम्ना लबा मोलम याड्ला? आयाड्। तिग जम्मान म्हिगदेसे थरी थरीला ग्योइ पाड्ला? आपाड्। तिग जम्मान म्हिगदेसे थे थरी थरीला ग्योइ जम्मादान घोना लबारी खम्ला? आखम। 31 तर एनीगदेसे अझ घेन घेन मोलम याड्बा सेम लउ।

माया चा जम्मान भन्दा घेन मोलम हिनना

ओच्छे एनीगदेदा डाइ झन जम्मान भन्दा ज्यबा ग्याम उन्ना।

* 12:12 रोमी १२:४-६ † 12:13 “परमेश्वरला आत्मा गिकनोन याड्बा मुला” भिबादा ग्रीक बाइबलरी आत्मा गिकनोन थुड्बारी पिन्बा मुला भिसी भिबा मुला। * 12:28 एफि ४:११

13

1 डाइ म्हिगदेदेन स्वर्गदूतगदेला ग्योइरी ताम पाडूसैनोन स्य्हान्दोदा माया आलनी भिसम डा चा स्याडदेन बुपुजेल हड्बा जे तला। 2 डाइ अगमवाणी पाडुखम्सैनोन म्हिला ज्ञान बुद्धिसे घोआखम्बा ताम घोसैनोन, जम्मान ज्ञान बुद्धि याडूसैनोन, ओच्छे डादेन छ्याम गडगदे लेःखम्बा विश्वास मुसैनोन डाइ स्य्हान्दोदा माया लआखम्नी भिसम डा तिगैनोन आहिन।* 3 चुदे डाइ डाला जम्मान धन सम्पत्ति स्य्हान्दोदा भो लसी पिन्जी, ओच्छे डाइ डाला लहुइनोन मेरी खाडुपुडूसैनोना डाइ स्य्हान्दोदा माया आलनी भिसम डादा तिगै ज्यबा आत।

4 स्य्हान्दोदा माया लबा म्हिसे जम्मान ताम भ्रान्बारी खम्ला ओच्छे दया लला। स्य्हान्दोदा डाह आल, डा जे ज्यबा भिसी आपाडु ओच्छे घेन दोसीनोन आभ्र। 5 स्य्हान्दोदा माया लबा म्हि चा हिक्बा आरेबा म्हि हड्बा आत मुला, हाडदा जे ज्यबा तगै भिसीएनोन आमहन, स्य्हान्दोदेन आछेर, ओच्छे हाडदा बिरोध लबा तामलाएनोन वास्ता आल। 6 स्य्हान्दोदा माया लबा म्हि आज्यबा तामरी आताडु, थे सत्य तामरी जे ताडुला। 7 स्य्हान्दोदा माया लबा म्हिसे जम्मान ताम जोगब लला, जम्मान तामएनोन विश्वास लला, ओच्छे जम्मान ताम तला भिसी आश लला, जम्मान तामरी कोडुसी चिला।

8 माया खाडुमै म्हासी आनि। तर अगमवाणी पाडुबा खलाला, थरी थरीला ग्योइ पाडुबा खलाला, ओच्छे ज्ञान बुद्धिला तामगदे गे आखेलबा तला। 9 यहाडसे पाडुबा अगमवाणीदेन यहाडला ज्ञान बुद्धि पूरा आरे। 10 तर जम्मान ताम पूरा तमाहेन्से चा पूरा आतबा जम्मान तामगदे म्हासी निला।

11 डा जजा मुबा धुइरी डाइ जत्धुगुलान ताम पाडुमुबा, ओच्छे जत्धुगुसे म्हन्बा तामनोन म्हन्मुबा, जत्धुगुसे घोबा हड् लसीन घोमुबा। तर भ्योन तमाहेन्से डाइ जत्धुगुला जम्मान बानीबेहोरगदे खलाजी। 12 दान्दे चा यहाडसे ज्यना लसी आम्राडुबा ऐनारी म्राडुबा हड् जे म्राडुमुला, तर लिच्छा चा ज्यना लसी म्राडुला। दान्दे डाइ पूरान ताम आघोसैनोन थे धुइरी चा परमेश्वरसे डाला बाररी जम्मान ताम था याडुबा हड् डाइएनोन जम्मान ताम घोला।

13 विश्वास, आशदेन माया चा खाडुमै आमहा। तर चु सोम न्हडरी घेन चा माया हिनना।

14

अगमवाणीदेन अर्गु ग्योइ

1 थेतबासेलमा एनीगदेसे ल्हानान म्हाइदोबा चा माया हिनना। ओते जे आहिन, परमेश्वरला आत्मासे पिन्बा मोलमगदे याडुबारीनोन ल्हानान सेम लउ। ओच्छे अगमवाणी पाडुबारी चा ज्ञान ल्हानान सेम लउ। 2 तिग्दा भिसम अर्गु ग्योइ पाडुबा म्हिसे म्हिगदेदेन छ्याम आहिन, परमेश्वरदेन छ्याम ताम पाडुमुला। थेसे परमेश्वरला आत्माला शक्तिग्याम म्हिसे था आयाडुबा ताम पाडुबासे लमा स्य्हान्दो खालै म्हिसे आघोमुला। 3 तर अगमवाणी पाडुबा म्हिसे स्य्हान्दोदोदोदेसे घोखम्बा ताम पाडुमुला। थेसे पाडुबा तामग्याम म्हिगदेसे विश्वासरी कोडुबा आँटदेन शान्ति याडुला। 4 अर्गु ग्योइ पाडुबा म्हिसे हाडलान विश्वास कोडुना लला। तर अगमवाणी पाडुबा म्हिसे चा मण्डलीलान विश्वास कोडुना लला। 5 एनीगदे जम्मासेन अर्गु ग्योइ पाडुगै भिसी डाइ म्हन्बा मुला। तर थे भन्दा ज्ञान ल्हाना चा एनीगदेसे अगमवाणी पाडुगै भिसी डाइ म्हन्बा मुला। मण्डलीला विश्वास कोडुना लबाला लागिरी अर्गु ग्योइ म्हिगदेदा घोना लसी पिन्बा म्हि खालै आरेसम अर्गु ग्योइ पाडुबा म्हि भन्दा अगमवाणी पाडुबा म्हि चा घेन हिनना।

6 ज्योज्यो आले नाना आडागदे, चुदे डा एनीगदे मुबा ग्लारी खसी अर्गु ग्योइ जे पाडुजी भिसम तिग एनीगदेदा ज्यबा तला? आत। तर चुदे डा एनीगदे मुबा ग्लारी खसी परमेश्वरसे उन्बा ताम, ज्ञान बुद्धिला ताम, अगमवाणीदेन तिगै लोपतोःबा ताम लोपुजी भिसम एनीगदेदा ज्यबा तला। 7 बाँसुरीदेन वीणा ह्यापमा थैला काइ ज्यना लसी आथोन्नी भिसम तिग ह्यापुजी भिसी खाहडु लसी था याडुबा? 8 चुदे

* 13:2 मत्ती १७:२०; २१:२१; मर्कू ११:२३ † 13:3 थे धुइरी म्हिदा सजाय पिन्तोःसम मेसे खाडुमुबा। † 14:2 “अर्गु ग्योइ” भिबा चा ग्रीक अन्खार खालै म्हिसे आसेबा ग्योइ पाडुखम्ला भिबा हिनना। (चु ताम १४:४, ५, १३, १४, १८, २२, २६, २७, २८, ३९ पदगदेरीनोन मुला।)

बिगुल ह्यापूमा जयना लसी आथेःनी भिसम लडाइ लबाला लागिरी खाहङ् लसी तयार तला?† 9 थेहङ् लसीन एनीगदेसेनोन अर्गु ग्योइरी आघोबा ताम पाङ्जी भिसम एनीगदेसे तिग पाङ्जी भिसी खाल्से था याङ्से? एनीगदेसे पाङ्बा चा तिगै गे आखेल्बा तला। 10 जम्बुलिङरी ल्हानान थरीला ग्योइगदे मुला। थे ग्योइगदे न्हङरी खालै म्हिसे आघोबा ग्योइ चा गिकनोन आरे। 11 चुदे खालै म्हिसे पाङ्मा डाइ आघोनी भिसम थे डाला लागिरी विदेशी तला, ओच्छे थेला लागिरी डा विदेशी तला। 12 थेहङ् लसीन एनीगदेसेनोन परमेश्वरला आत्माग्याम याङ्बा मोलमगदे याङ्बारी ल्हानान सेम लबासे लमा मण्डलीदा लहेना लबाला लागिरी जुन मोलमसे आँट याङ्सी भङ्ना लला थे मोलम म्हाइगो।

13 थेतबासेलमा अर्गु ग्योइ पाङ्बा म्हिसे थे ताम घोना लखम्बा शक्ति याङ्बाला लागिरी प्रार्थना लतोःला। 14 तिग्दा भिसम डाइ अर्गु ग्योइरी प्रार्थना लमा डाला आत्माग्याम प्रार्थना लला। तर थे ताम डाइएनोन आघो। 15 थेहङ् भिसम डाइ तिग लसे? डाइ आत्माग्याम प्रार्थना लला, तर डाइ घोबाला लागिरी सेमसेनोन प्रार्थना लला। ओच्छे आत्मासे परमेश्वरला जयजयकार लसी व्हाइ गोला, तर डाइ घोबाला लागिरी सेमसेनोन व्हाइ गोला। 16 चुदे एसे आत्माग्याम परमेश्वरला जयजयकार लसी धन्यवाद पिन्सी प्रार्थना लमा स्य्हान्दो म्हिगदेसे आघोनी भिसम खाहङ् लसी, “आमेन” भिखम्ला? 17 एसे जयना लसी धन्यवाद पिन्ना तला, तर स्य्हान्दो म्हिसे आघोनी भिसम थेला विश्वास कोङ्बा आत।

18 डाइ परमेश्वरदा धन्यवाद पिन्ना, तिग्दा भिसम एनीगदेसे भन्दा झन डाइ ल्हानान रेम अर्गु ग्योइ पाङ्मुला। 19 तर मण्डलीरी आघोबा ग्योइग्याम हजार च्युइ ताम पाङ्बा भन्दा मी बरु डाइ ह्वाङ्लान सेमग्याम गोर डा ताम जे पाङ्सी स्य्हान्दो लोप्ला चा ज्यबा तला भिसी डाइ म्हन्बा मुला।

20 ज्योज्यो आले नाना आडागदे, एनीगदेसे कोलागदेसे म्हन्बा हङ् लसी थाम्हन्गो। आज्यबा तामगदेला लागिरी एनीगदे तिगै आसेबा कोलागदे हङ्बान दोगो। तर म्हन्बा धुइरी चा पाको म्हिसे म्हन्बा हङ्बान म्हन्गो। 21 बचनरीनोन परमप्रभुसे चुहङ् भिसी सुङ्बा मुला, “अर्गु ग्योइ पाङ्बा म्हिगदेदेन विदेशीग्याम डाइ चु म्हिगदेदेन छ्याम ताम पाङ्ला। तसैनोन थेनीगदेसे डाला ताम ड्यान्बा सेम आल।”*

22 थेतबासेलमा अर्गु ग्योइगदे पाङ्बा चा विश्वास लबा म्हिगदेला लागिरी आहिन, विश्वास आलबा म्हिगदेला लागिरी चिनु हिन्ना। तर अगमवाणी पाङ्बा चा विश्वास आलबा म्हिगदेला लागिरी आहिन, विश्वास लबा म्हिगदेला लागिरी हिन्ना।

23 थेतबासेलमा एनीगदे मण्डलीरी हुप तबा धुइरी अर्गु ग्योइ पाङ्बा धुइरी विश्वास आलबा म्हिगदेदेन थे ताम आघोबा म्हिगदे थेरी खजी भिसम थेनीगदेसे एनीगदेदा म्योजीम भिसी भिला। 24 तर जम्मासेन अगमवाणी पाङ्बान लबा धुइरी विश्वास आलबा खालै म्हिदेन घोबा सेम थोसी खबा म्हि थेरी खजी भिसम जम्मासेन पाङ्बा तामग्याम थेसे हाङसे लबा पाप था याङ्ला ओच्छे थेसे हाङ ठीक मुला कि आरे भिसी च्याला। 25 खालैदा था आरेबा थेला सेमला तामगदेएनोन था याङ्ला। जमाहेन्से खलुप तसी थेसे परमेश्वरदा धन्यवाद पिन्ना, ओच्छे “पक्कान, एनीगदेला गुडरी परमेश्वर मुला” भिसी थेसे पाङ्ला।

ठीक लसी संगती लउ

26 ज्योज्यो आले नाना आडागदे, डाइ एनीगदेदा पाङ्बारी म्हाइबा ताम चा चुनोन हिन्ना, एनीगदे हुप तसी संगती लबा धुइरी कोइसे व्हाइ गोला, कोइसे बचनग्याम लोप्ला, कोइसे परमेश्वरसे उन्बा ताम घोना लला, कोइसे अर्गु ग्योइ पाङ्ला, कोइसे थे ग्योइग्याम पाङ्बा ताम जम्मादान घोना लला। चु जम्मान तामगदे चा मण्डलीदा भङ्ना लबारी लतोःला। 27 एनीगदे न्हङरी खालैसे अर्गु ग्योइ पाङ्मुला भिसम, पालो पालो लसी न्ही सोमसे जे पाङ्गो, स्य्हान्दो गिकसे चा थे अर्गु ग्योइ जम्मादान घोना

† 14:8 यहूदीगदेला ठिम अन्छार लडाइ लबाला लागिरी तयार तउ भिसी पाङ्तोःमा बिगुल ह्यापुम्बा।

* 14:21 यशै २८:११-१२

लतोःला। 28 तर थे ताम घोना लबारी थेरी खालै म्हि आतनी भिसम थे ताम पाड्बा म्हि चा मण्डलीरी कुटिसी चिगै। ओच्छे थे हाडनोन परमेश्वरदेन छ्याम जे ताम लगै।

29 अगमवाणी पाड्बा म्हि चा न्ही सोमधोना तगै, ओच्छे स्यूहान्दो म्हिगदेसे चा थेनीगदेसे पाड्मा परमेश्वरग्याम खबा हिन्ना कि आहिन भिसी च्यागै। 30 तर थेरी मुबा म्हिगदे न्हडरी गिकदा परमेश्वरसे तिगै ताम उन्सी पाड्पुड्जी भिसम डाच्छा पाड्बान लबा म्हि चा तिगै आपाड्ना कुटिसी चिगै। 31 अगमवाणी पाड्बा एनीगदे जम्मासेन पालो पालो लसी अगमवाणी पाड्खम्ला, ओच्छे ड्यानबा म्हिगदेसे लोपखम्ला ओच्छे जम्मासेन आँट याड्ला। 32 अगमवक्तागदेसे हाडला सेमदा हाडसेन तहरी थान्तोःला। 33 तिग्दा भिसम परमेश्वर अलमल तना लबा परमेश्वर आहिन, तर शान्ति पिन्बा परमेश्वर हिन्ना।

थेहड् लसीन परमेश्वरला म्हिगदेसे जम्मान मण्डलीला ठिम अन्छार, 34 मण्डलीरी संगती लबान लबा धुइरी म्रिडम्हेमेगदे कुटिसी चितोःला। थे धुइरी थेनीगदेसे ताम पाड्आम्याड्। तर हाडला ठिमसे पाड्बा अन्छार थेनीगदे तहरी चितोःला। 35 तिगै तामला बारेरी ड्योइबा सेम मुसम थेनीगदेसे दिमरी हाड हाडला हेम्बोदेन छ्याम ड्योइगै। तिग्दा भिसम मण्डलीरी ताम पाड्बा चा म्रिडम्हेमेगदेला लागिरी पेःबा खबा ताम हिन्ना।

36 तिग परमेश्वरला बचन एनी कोरिन्थला म्हिगदेसे थेःना लबारी शुरु लबा हिन्ना? आहिन। तिग परमेश्वरला बचन एनीगदेसे जे थेःबा हिन्ना? आहिन। 37 खालै म्हिसे हाडसे हाडदान अगमवक्ता अथवा परमेश्वरला आत्माग्याम मोलम याड्बा म्हि हिन्ना भिसी म्हन्मुला भिसम, थेसे डाइ भिबा चु ताम प्रभुसे कुल्बा ताम हिन्ना भिसी था याड्तोःला। 38 तर खालै म्हिसे चु तामगदेदा वास्ता आलनी भिसम थेला तामदाएनोन खालैसेन वास्ता आल।

39 थेतबासेलमा डाला ज्योज्यो आले नाना आडागदे, अगमवाणी पाड्बारी ल्हानान सेम लउ, ओच्छे अर्गु ग्योइ पाड्बा म्हिगदेदाएनोन थाकागो। 40 तर जम्मान गे ज्यना लसी ढिक्ना लसी लतोःला।

15

येशू ख्रीष्ट सिबाग्याम सोबा

1 दाहेन्से ज्योज्यो आले नाना आडागदे, डाइ एनीगदेदा थेःना लबा थार्बा पिन्बा समाचारला बारेरी डाइ एनीगदेदा दोःसी पाड्ला। थे समाचाररी विश्वास लसी एनीगदे थेनोन अन्छार भ्रबान मुला। 2 चुदे डाइ थेःना लबा थार्बा पिन्बा समाचाररी विश्वास लबा आख्लानी भिसम जे एनीगदेसे थार्बा याड्ला, आहिन्सम एनीगदेसे लबा विश्वास गे आखेल्बा तला।

3 तिग्दा भिसम परमेश्वरला बचन अन्छार ख्रीष्ट य्हाडला पापला लागिरी सिजी भिसी डाइ था याड्बा मुल तामनोन डाइ एनीगदेदा थेःना लबा मुला।* 4 थेदा ल्हुजी ओच्छे परमेश्वरला बचन अन्छार थे सोमरेमाकुनु सिबाग्याम दोःसी सोजी।* 5 ओच्छे थेदा पत्रुससे म्राड्जी, जमाहेन्से थेदा च्युक न्ही मुल चेलासे म्राड्जी।* 6 जमाहेन्से थेदा हाडदा विश्वास लबा ग्यार्जा डा भन्दा ल्हाना ज्योज्यो आले नाना आडागदेसे तिक्खुरीन म्राड्जी। थेनीगदे न्हडला ल्हाना हड्बा म्हिगदे दान्देधोनाएनोन मुला, तर कोइ कोइ चा सिसी जिन्जी। 7 जमाहेन्से थेदा याकूबसे म्राड्जी, ओच्छे लिच्छा जम्मान मुल चेलागदेसे म्राड्जी। 8 थेदा जम्मान भन्दा लिच्छा चा डाइ म्राड्जी। थे धुइरी चा डा ला आछ्योना न्हबा कोला हड्बान मुबा।*

9 तिग्दा भिसम जम्मान मुल चेलागदे डा भन्दा घेन हिन्ना, थेनीगदे न्हडरी डा चा तिगैनोन आहिन। तिग्दा भिसम डाइ परमेश्वरला मण्डलीदा ल्हानान दुख पिन्बासे लमा डा मुल चेला भिबाधोनाला आरे।* 10 तर दान्दे डा परमेश्वरला दयामायासे लमान मुल चेला दोबा मुला। ओच्छे थेसे डादा लबा दयामाया खेरोरी आनिनी। बरु डाइ स्यूहान्दो मुल चेलागदेसे भन्दा ल्हानान गे लजी। तर चु जम्मान

* 15:3 यशै ५३:५-१२
२४:३४, ३६; यूह २०:१९

* 15:4 भजन १६:८-१०; मत्ती १२:४०; मुल २:२४-३२
* 15:8 मुल ९:३-६

* 15:5 मत्ती २८:१६-१७; मर्कू १६:१४; लूका

* 15:9 मुल ८:३

गे डाइ लबा आहिन, डादेन छ्याम मुबा परमेश्वरला दयामायासेन हिन्ना। 11 थेतबासेलमा डाइ थे:ना लसै, थेनीगदेसे थे:ना लसै, डन्से थे:ना लबा ताम चा गिकनोन हिन्ना। ओच्छे थेनोन तामरी एनीगदेसे विश्वास लबा मुला।

य्हाड सिबाग्याम सोला

12 डन्से चा ख्रीष्ट सिबाग्याम सोजी भिसी थे:ना लसी भ्रमुला भिसम एनीगदे न्हडला कोड कोइसे चा तिग्दा सिबागदे दो:सी आसो भिसी पाड्बा? 13 तर चुदे सिबागदे दो:सी आसो भिसम ख्रीष्टएनोन सिबाग्याम सोबा आहिन। 14 चुदे ख्रीष्ट सिबाग्याम आसोबा हिन्सम डन्से थे:ना लबा ताम गे आखेल्बा तला, ओच्छे एनीगदेसे लबा विश्वासएनोन गे आखेल्बा तला। 15 थे भन्दाएनोन डनी परमेश्वरला बारैरी लुसीला ताम पाड्बा म्हि दोला। तिग्दा भिसम परमेश्वरसे ख्रीष्टदा सिबाग्याम सोना लजी भिसी डन्से परमेश्वरला बारैरी थे:ना लबा मुला। तर च्यागो, सिबागदे दो:सी आसोबा हिन्सम परमेश्वरसे ख्रीष्टदाएनोन सोना आलसेला मुबा। 16 सिबागदे आसोमुला भिसम परमेश्वरसेनोन ख्रीष्टदा सोना लबा आहिन। 17 ख्रीष्ट सिबाग्याम आसोबा हिन्सम एनीगदेसे लबा विश्वास गे आखेल्बा तला, ओच्छे एनीगदे अझ पापरीन तला। 18 थेहड् भिसम ख्रीष्टदा विश्वास लसी सिबा म्हिगदेएनोन जम्मान सिबाला सिबान तजी। 19 चुदे चु जुनी मुदेधोनाला लागिरी जे य्हाडदा ख्रीष्टग्याम ज्यबा तला भिसी आश लबा हिन्सम स्य्हान्दो जम्मान म्हिगदे भन्दा य्हाड चा ल्हाना दया याड्तो:बा म्हि दोला।

20 तर ख्रीष्ट मी सिबाग्याम सोबा हिन्ना। सिबागदे न्हडग्याम ख्रीष्ट जम्मान भन्दा डाच्छा सोसी स्य्हान्दो सिबागदेएनोन सोला भिसी उन्बा मुला। 21 तिग्दा भिसम म्हि गिकसे लमान जम्मान म्हि सिबा मुला। थेहड् लसीन गिकसे लमान सिबागदेएनोन दो:सी सोला। 22 आदमग्यामा जम्मान म्हि सिबा मुला। थेहड् लसीन ख्रीष्टग्याम चा जम्मान म्हि सोला। 23 तर जम्मान म्हि हाड हाडला पालो अनछार सिबाग्याम सोला। ख्रीष्ट चा सिबाग्याम जम्मान भन्दा डाच्छा सोजी। ओच्छे ख्रीष्ट दो:सी फेपखबा धुइरी चा थेदा विश्वास लबा म्हिगदेएनोन सिबाग्याम सोला। 24 जमाहेन्से चु जम्बुलिड नाश तला। थे धुइरी ख्रीष्टसे जम्मान अधिकारगदे, शक्तिगदेदेन शासन लबागदेदा नाश लसी परमेश्वरला य्हुल्सा परमेश्वर आबादान जिम्मा पिनना। 25 तिग्दा भिसम ख्रीष्टसे जम्मान शत्रुगदेदा भ्रेना लसी हाडला काड धिरी आथान्तेधोना थेसे शासन लतो:ला।* 26 जम्मान भन्दा लिच्छा चा शत्रु कालदा नाश लबान मुला। 27 तिग्दा भिसम बचनरी “परमेश्वरसे जम्मान सहेगदे ख्रीष्टला स्यहाप धिरी थान्ना” भिसी भिबा मुला। चु भिबा चा परमेश्वरएनोन ख्रीष्टला तहरी तला भिसी पाड्बा आहिन। तर परमेश्वरसे जम्मान सहेगदेथोरी ख्रीष्टदा शासन लपुड्ला भिबा हिन्ना।* 28 जम्मान सहे ख्रीष्टला शासनरी भमाहेन्से ख्रीष्टएनोन परमेश्वरला तहरी धन्छ्याला। ओच्छे जम्मान सहेथोरी परमेश्वरसेन शासन लला।

29 सिबाग्याम दो:सी आसोबा हिन्सम सिबागदेला लागिरी बपतिस्मा किन्बा म्हिगदेदा तिग फाइदा तला? चुदे सिबाग्याम आसो भिसम थेनीगदेसे थेला लागिरी तिग्दा बपतिस्मा किन्बा? 30 ओच्छे डनीएनोन तिग्दा सदन हाडला जयान गोजाला धाररी थान्सी भ्रसे? 31 ज्योज्यो आले नाना आडागदे, एनीगदे य्हाडला प्रभु ख्रीष्ट येसूदेन छ्याम गिक तबासे लमा डा ल्हानान ताड्बा मुला। थेतबासेलमा डाइ सेमहेन्सेन चु ताम पाड्ला, “डा धिन धिननोन सिबारी तयार मुला।” 32 म्हिसे महन्बा अनछार जे एफिसस शहररी डा हि जन्तुदेना छ्याम छेबा तामसे डादा तिग फाइदा तला? चुदे सिबागदे दो:सी आसो भिसम म्हिगदेसे पाड्बा हड्न्नोन

“य्हाडएनोन चबा थुड्बा लइ,

तिग्दा भिसम न्हडगर मी य्हाड सिनोन सिला!”*

† 15:22 “आदम” चा परमेश्वरसे सहेबा जम्मान भन्दा डाच्छाला म्हि हिन्ना। आदमसे परमेश्वरसे कुल्बा ताम आड्यान्ना पापी दोजी। आदम पापी दोबासे लमा य्हाडएनोन पापी दोजी। * 15:25 भजन ११०:१ * 15:27 भजन ८:६ † 15:32 “हि जन्तु” भिबा चा पावलदा एफिससरी बिरोध लबा म्हिगदे हिन्ना। * 15:32 यशै २२:१३

33 चु तामरी एनीगदे झ्युक्याब थातउ। आज्यबा महिला संगत लजी भिसम ज्यबा बानीबेहोरएनोन न्होड्ला। 34 दाहेन्से एनीगदेसे ठीक ताम म्हन्गो, ओच्छे पाप थालउ। तिग्दा भिसम एनीगदे न्हडला गाते म्हिसे मी परमेश्वरदा डोसेबान आरे। डाइ चु ताम पाड्मा एनीगदेदा पेःबा खतोःबा।

सिबाग्याम सोबा ल्हुइ

35 तर खालै म्हिसे “सिबागदे दोःसी खाहड् लसी सोला? ओच्छे सोमाहेन्से थेनीगदेला ल्हुइ खाहड्बा तला?” भिसी ड्योडला। 36 मूर्ख म्हि! एसे जुन सहेला ब्लु ढ्वला थे ब्लु आनइतेधोना आफुइ। 37 एनीगदेसे ग्वा तसै, अर्गु तिगैला ब्लु मुसै, थेला गेडा ढ्वबा हिन्ना, तर दोडनोन ढ्वबा आहिन। 38 तर परमेश्वरसे हाडसे म्हन्बा अनछार थे ब्लुगदेदेन अर्गु ब्लुगदेदा जेबा ल्हुइ पिन्ना। 39 जम्मान ल्हुइ खाल गिकलान आत। महिला ल्हुइ अर्गु खाल्ला, जन्तुगदेला ल्हुइ अर्गु खाल्ला, चरागदेला ल्हुइ अर्गु खाल्ला ओच्छे तार्डागदेला ल्हुइ अर्गु खाल्ला तला।

40 मुरी मुबा सहेगदेला हाड हाडलान रुपदेन य्हाल तला ओच्छे जम्बुलिडरी मुबा सहेगदेलाएनोन हाड हाडलान रुप तला। 41 धिनीला य्हाल अर्गुन खाल्ला तला, लनीला य्हाल अर्गु खाल्ला तला ओच्छे सारगदेला य्हाल अर्गुन खाल्ला तला। तिग्दा भिसम जम्मान सारगदेला य्हाल गिकनोन आत।

42 सिबागदेएनोन थेहड् लसीन सोला। सिमाहेन्से ल्हुबा ल्हुइ चा नइसी निला, तर सिबाग्याम दोःसी सोमाहेन्से चा खाइमै आसि। 43 सिमाहेन्से ल्हुबा य्हाडला ल्हुइ आज्यबादेन कमजोर तला। ओच्छे सिबाग्याम सोमाहेन्सेला ल्हुइ जेबादेन शक्तिशाली तला। 44 ल्हुबा धुइरी स्या काला ल्हुइरी ल्हुला, तर सोबा धुइरी थे आत्माला ल्हुइरी सोला। स्यादेन काला ल्हुइ तला भिसम आत्माला ल्हुइएनोन तनोन तला।

45 थेतबासेलमा बचनरीनोन, “जम्मान भन्दा डाच्छाला म्हि आदम चा सोबा म्हि दोजी” भिसी भिबा मुला। तर लिच्छाला आदम चा स्य्हानदोदा जुकजुकधोनाला जुनी पिन्बा आत्मा तजी।* 46 आत्माला ल्हुइ डाच्छा खबा आहिन, तर स्या काला ल्हुइ चा डाच्छा खबा हिन्ना। जमाहेन्से जे आत्माला ल्हुइ खबा हिन्ना। 47 डाच्छाला म्हि आदम चा जम्बुलिडला साप्राग्याम स्होबा म्हि मुबा। तर थे भन्दा लिच्छाला म्हि ख्रीष्ट चा स्वर्गग्याम फेपखबा मुबा। 48 जम्बुलिडरी मुबा म्हिगदे चा थे साप्रासे स्होबा म्हि हड्बान मुला, ओच्छे स्वर्गरी मुबा म्हिगदे चा स्वर्गग्याम फेपखबा म्हि हड्बान मुला। 49 दान्दे य्हाडसे साप्रासे स्होबा महिला रुप किन्बा हड् लसी लिच्छा चा य्हाडसे स्वर्गग्याम फेपखबा महिला रुप किन्म्याड्ला।

50 ज्योज्यो आले नाना आडागदे, डाइ पाड्बारी म्हाइबा ताम चा चुनोन हिन्ना, चु स्या काला ल्हुइदा परमेश्वरला य्हुल्सारी वाड्बा हक आरे। ओच्छे नाश तसी निबा ल्हुइसे खाइमै आसिबा जुनी आयाड्। 51 च्यागो, डाइ एनीगदेदा म्हिसे था आयाड्बा ताम गिक पाड्ला। य्हाड जम्मान मी आसि, तर य्हाड जम्मालान ल्हुइ पोला। 52 य्हाडला मी चीम जे तमा छिन्नडरीन जम्मान भन्दा लिच्छारेम बिगुलला काइ थेःला। जमाहेन्से तुरुन्तन सिबागदे दोःसी खाइमै नाश आतबा जुनी किन्सी सोला, ओच्छे य्हाडला ल्हुइ पोला।* 53 तिग्दा भिसम सिबा ल्हुइ खाइमै आसिबा ततोःला, ओच्छे चु नइसी निबा ल्हुइ दोःसी खाइमै आनइबा ततोःला। 54 सिबा ल्हुइ खाइमै आसिबादेन नइसी निबा ल्हुइ खाइमै आनइबा दोमाहेन्से बचनरी “कालदाएनोन ढाजी” भिसी भिबा ताम पूरा तला।*

55 “काल एसे खानड ढाबा मुला?

काल खाइ एला शक्ति?”*

56 पापग्याम कालसे दुख पिन्बा शक्ति याड्ला ओच्छे ठिमग्याम पापसे शक्ति याड्ला। 57 तर परमेश्वरदा धन्यवाद तगै, थेसे य्हाडदा य्हाडला प्रभु येशू ख्रीष्टग्याम ढाना लबान मुला।

† 15:45 “लिच्छाला आदम” भिबा चा ख्रीष्ट हिन्ना। * 15:45 उत्प २:७ * 15:52 १ थेस ४:१५-१७ * 15:54 यशै २५:८

* 15:55 होशै १३:१४

58 थेतबासेलमा डाला सेम निबा ज्योज्यो आले नाना आडागदे, एनीगदे विश्वासरी कोड्सी याडयोड आतना चिउ। ओच्छे झन्सी प्रभुला गे लउ। तिग्दा भिसम एनीगदेसे दुख लसी लबा प्रभुला गे खाइमै खेरोरी आनि भिबा ताम एनीगदेदा थानोन मुला।

16

यरूशलेमरी मुबा परमेश्वरला म्हिगदेला लागिरी भेटी

1 दाहेन्से डाइ परमेश्वरला म्हिगदेला लागिरी भेटी हुपबाला बारेरी भिबान मुला, डाइ गलातियाला मण्डलीदा पाड्बा हड् लसीन एनीगदेसे हुपगो। 2 एनीगदेसे हाडसे गे लसी सहोबा टाडगाग्याम साताला शुरुला धिनकुनु सातैदडसेन जजाकर भेटी हुप्सी थान्गो। थेहड् लजी भिसम डा खबा धुइरी एनीगदेसे भेटी हुप आतोः। 3 ओच्छे डा खमाहेन्से एनीगदेसे धम्बा म्हिगदेदा डोसेना लबा चिठी पिन्ना। जमाहेन्से थेनीगदेसेन थे भेटी यरूशलेमरी भोर्सी निला। 4 ओच्छे डाएनोन निमा ज्यबा तला भिसम थेनीगदे डादेन छ्यामनोन निला।

पावलसे ग्ला ग्लारी निबा सेम लबा

5 डा माकेडोनिया तसी खबा धुइरी एनीगदेदेन छ्याम हुप तबारी खला। तिग्दा भिसम दान्दे चा डा माकेडोनिया तसी निबारी छ्याइबा मुला। 6 एनीगदेदेन छ्याम डा तिगै धिनधोना चिखम्ला तला, तजी भिसम सेख् भरनोन एनीगदेदेन छ्याम चिखम्ला। जमाहेन्से डा जुन ग्लारी निसैनोन एनीगदेसे डादा ग्यामरी तोःबा जम्मान सहे ढिकना लखम्ला। 7 चु पालसे चा एनीगदेदेन छिन्नड जे हुप तबारी खबा आहिन, प्रभुला सेम तजी भिसम तिगै धिनधोना एनीगदेदेन छ्यामनोन चिम्याड्ला भिसी डाइ आश लबा मुला। 8 तर पेन्तिकोस भिबा चाडधोना डा एफिसस शहररीन चिला। 9 डादा बिरोध लबा म्हिगदे ल्हानान मुसैनोन थेरी प्रभुला घेन गे लबारी डाइ ज्यबा मौका याड्बा मुला।

10 चुदे तिमोथी एनीगदे मुबा ग्लारी खजी भिसम थेदा एनीगदेदेन छ्याम ज्यना लसी चिपुड्गो। तिग्दा भिसम थेसेनोन डाइ हड् लसीन प्रभुला गे लबान मुला। 11 थेतबासेलमा थेदा खालैसेन हेला थालउ। तर थे डा मुबा ग्लारी खमा एनीगदेसे थेदा ज्यना लसी पुइखउ। तिग्दा भिसम चुरी मुबा विश्वासीगदेदेन डाइ थेदा भ्रान्सी चिबा मुला।

12 आले अपोल्लोसदा डाइ स्यहान्दो ज्योज्यो आलेगदेदेन छ्याम एनीगदे मुबा ग्लारी निउ भिसी ल्हानान पाड्बा मुला। तर थेसे दान्दे एनीगदे मुबा ग्लारी खबा सेम आलनी, तजी भिसम थे लिच्छा एनीगदे मुबा ग्लारी खला।

चिठीला थुमरी पाड्बा

13 एनीगदे होशियार तसी चिउ। ओच्छे विश्वासरी कोड्सी चिउ। थेहड् लसी आलोड्ना आँट थोसी भ्रउ। 14 एनीगदेसे जुन जुन गे लला थे जम्मान गे मायाग्याम लउ।

15 अखैया भिबा अञ्चलला जम्मान म्हिगदे न्हडरी जम्मान भन्दा डाच्छा स्तिफनासदेन थेला म्हेमेगदेसे विश्वास लबा हिन्ना भिबा ताम एनीगदेदा थानोन मुला। थेनीगदेसे परमेश्वरला म्हिगदेसे लबा गेरी सेमहेन्सेन हो लबा मुला। ज्योज्यो आले नाना आडागदे, डाला चु बिन्ती मुला, 16 थेहड्बा म्हिगदेदेन थेहड्बा गे लबा स्यहान्दो म्हिगदेसे पाड्मा ड्यान्गो। 17 स्तिफनास, फोर्टुनाटसदेन अखाइकस खमा डा ल्हानान ताड्जी। तिग्दा भिसम थेनीगदेसे एनीगदे आरेबासे लमा डादा तोःबा जम्मान सहेगदे पिन्बा मुला। 18 थेनीगदेसे एनीगदेदा हड्नोन डादाएनोन आँट पिन्बा मुला। थेतबासेलमा एनीगदेसे थेहड्बा म्हिगदेदा मान लउ।

19 एशियारी† मुबा मण्डलीगदेसे एनीगदेदा फ्याफुल्ला भिसी पाड्बा मुला। अकिलासदेन प्रिस्का† ओच्छे थेनीगदेला दिमरी मुबा मण्डलीसेनोन एनीगदेदा फ्याफुल्ला भिसी पाड्बा मुला। 20 चुरी मुबा

† 16:19 चु चिठी भिबा धुइरी चा चु ग्लादा एशिया भिमुबा, तर दान्दे चा चु ग्ला टर्की भिबा यहुल्सा हिन्ना। † 16:19 ग्रीक बाइबलरी चु पददेन १ कोरिन्थी १६:१९ पदरी जे प्रिस्का भिसी भिबा मुला। अर्गु जम्मान ग्लारी प्रिस्किला भिसी भिबा मुला। प्रिस्का भिबादेन प्रिस्किला भिबा म्हि गिकनोन हिन्ना।

जम्मान ज्योज्यो आले नाना आडागदेसे एनीगदेदा फ्याफुल्ला भिसी पाड्बा मुला। एनीगदेसेनोन हाड हाड न्हडरी गिकसेम गिकदा सेमहेन्सेन माया लसी फ्याफुल्गो।

21 डा पावल हाडलान यासे फ्याफुल्ला भिसी भिबा मुला।†

22 जुन म्हिसे प्रभुदा माया आल थेसे परमेश्वरग्याम सजाय याङ्गै। प्रभु, हाड फेप्खउ!

23 प्रभु येशूला दयामाया एनीगदेदेन छ्याम तगै।

24 ओच्छे ख्रीष्ट येशूदेन छ्याम गिक तबा एनीगदे जम्मादान डाइ माया लला, आमेन।

† 16:21 पावलसे स्य्हान्दो म्हि गिकदा पाड्सी भिपुङ्गी, तर चु चिठीरी मुबा जम्मान ताम पावलसे पाड्बा अन्छार भिबा हिन्ना भिसी जम्मासेन था याङ्गै भिसी चु पदला ताम चा पावल हाडसेन भिबा मुबा।

पावलसे कोरिन्थला विश्वासीगदेदा भिबा न्हीरेमला चिठी चु चिठीला बारेरी पाड्तोःमा

भिबा म्हि: येशूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हिसे हो लबा मुबा (२ कोरिन्थी १:१)।

भिबा ग्ला: माकेडोनिया भिबा अञ्चलरी भिबा मुबा।

भिबा साल: ओस्पन ईश्वी संवत् ५५-५७ (विक्रम संवत् ११२-११४) साल न्हडरी भिबा मुबा।

खाल्दा भिबा: कोरिन्थ शहररी मुबा विश्वासीगदेदा भिबा मुबा।

पावलसे कोरिन्थला विश्वासीगदेदा डाच्छारेमला चिठी भिसी पुइमाहेन्से ओस्पन तिदिड लिच्छा भिसी पुइबा चु “न्हीरेमला” चिठी हिन्ना। चु चिठी भिबा धुइरी कोरिन्थला मण्डलीदेन पावलला गुडरी आढिक्बा तामगदे मुबा। मण्डलीला कोइ कोइ म्हिसे पावलदा बिरोध लसी बेइज्जत लबा मुबा। तसैनोन पावलसे थेनीगदेदेन छ्याम ढिक्बारी ल्हानान सेम लजी।

चु चिठीला शुरुरी पावलदेन कोरिन्थला मण्डलीला गुडरी तबा तामगदेला बारेरी भिबा मुला। पावलसे कोरिन्थला मण्डलीरी मुबा हाडदा बेइज्जत लबा कोइ कोइ म्हिगदेदा चिठीरी ल्हानान बड्सी भिबा मुबा। चु चिठीरी भिबा तामसे लमा म्हिगदेसे हाड हाडला पाप ख्लासी परमेश्वरपट्टि दोःबादेन जम्मान तामरी ढिक्बासे लमा पावल ल्हानान ताड्बा मुबा। जमाहेन्से पावलसे यरूशलेमरी मुबा मण्डलीदा सेमहेन्सेन हो लउ भिसी बिनती लजी। थेहड् लसी पावलसे हाड ख्रीष्टला पक्का मुला चेला हिन्ना भिसी पाड्बा मुला। तिग्दा भिसम कोरिन्थला कोइ कोइ म्हिसे हाड चा ख्रीष्टला पक्का मुल चेला हिन्ना भिसी पाड्बा मुबा। ओच्छे पावल चा फट्टा मुल चेला हिन्ना भिसी दोष लबा मुबा।

मुल तामगदे

फ्याफुल्बादेन धन्यवाद पिन्बा १:१-११

पावलदेन कोरिन्थरी मुबा विश्वासीगदे १:१२-७:१६

यरूशलेमरी मुबा परमेश्वरला म्हिगदेला लागिरी भेटी ८:१-९:१५

पावलसे हाड ख्रीष्टला मुल चेला हिन्ना भिसी पाड्बा १०:१-१३:१०

चिठीला थुमरी भिबा ताम १३:११-१३

पावलसे कोरिन्थला विश्वासीगदेदा भिबा न्हीरेमला चिठी

१ लाससो, कोरिन्थ शहररी मुबा परमेश्वरला मण्डलीदेन अखैया अञ्चलरी मुबा जम्मान परमेश्वरला म्हिगदेदा परमेश्वरसे ख्रीष्ट येशूला मुल चेला दोबारी धम्बा डा पावलदेन य्हाडला आले तिमोथीग्याम फ्याफुल्ला। २ य्हाडला परमेश्वर आबादेन प्रभु येशू ख्रीष्टग्याम एनीगदेसे दयामायादेन शान्ति याङ्गै।

दुखरी हो लबा परमेश्वर

३ य्हाडदा ल्हानान दया लबादेन दुखरी हो लबा[†] य्हाडला प्रभु येशू ख्रीष्टला आबा परमेश्वरला जयजयकार तगै। ४ परमेश्वरसेन य्हाडदा जम्मान दुखरी हो लबा मुला। तिग्दा भिसम दुखरी परब तबा स्य्हान्दो म्हिगदेदा हो लखमगै भिसीन थेसे य्हाडदा दुखरी हो लबा मुला। ५ ख्रीष्टसे नाबा हड्बान दुख य्हाडसेनोन ल्हानान नाबासे लमा परमेश्वरसे य्हाडदा ख्रीष्टग्यामसेन ल्हानान हो लबा मुला। ६ डन्से दुख नाजी भिसम थे एनीगदेला लागिरी ह्योदेन थार्बा याड्बाला लागिरी हिन्ना। डन्से दुखरी हो याड्जी भिसम एनीगदेसेनोन दुखरी हो याड्ला। ओच्छे डन्से दुख नाखम्बा शक्ति याड्बा हड् लसी एनीगदेसेनोन दुख नाखम्बा शक्ति याड्ला। ७ एनीगदेशोरी डन्दा पूरान विश्वास मुला। तिग्दा भिसम

† 1:3 चु पदगदेरी “हो लबा” भिबा चा सम्झब लबा हिन्ना।

डन्से नाबा हड्बा दुख एनीगदेसेनोन नाबा मुला, ओच्छे दुखरी डन्से याड्बा हड्बान ह्यो एनीगदेसेनोन याड्बा मुला भिसी डन्दा था मुला।

८ ज्योज्यो आले नाना आडागदे, डन्से एशिया अञ्चलरी नाबा दुखला बारेरी एनीगदेसेनोन था याड्गै भिसी डन्से म्हन्बा मुला। थैरी डन्दा नाबारीन आखम्बा दुख तजी, थै दुखसे लमा सोला भिबा डन्दा आशनोन आरेबा। ९ डन्से मी सिबान तजी भिसी म्हन्बा मुबा। चु तबा चा हाडसे हाडदान भर लगै भिसी आहिन, तर सिबागदेदा सोना लबा परमेश्वरथोरी भर लगै भिसी चुहड् तजीम। १० थैहड्बा लोड्बा खबा दुखग्याम डन्दा परमेश्वरसेन फेजी, थैसे य्हाडदा फेनोन फेला। ओच्छे थैसे य्हाडदा सदन फेला भिसी डन्से पूरा विश्वास लबा मुला। ११ चुला लागिरी एनीगदेसे डन्दा ल्हानान प्रार्थना लसी पिन्गो। एनीगदेसे डन्ना लागिरी प्रार्थना लबासे लमा परमेश्वरसे डन्दा मोलम पिन्ना, ओच्छे ल्हानान म्हिगदेसे डन्ना लागिरी परमेश्वरदा धन्यवाद पिन्ना।

पावलसे ग्ला ग्लारी निबारी सेम पोबा

१२ चु तामला लागिरी डनी ताड्बा मुला, जम्बुलिडला म्हिगदेला डाच्छा जे आहिन, तर एनीगदेला डाच्छाएनोन डनी परमेश्वरसे उन्बा सत्या ग्यामरी सेमहेन्सेन भ्रबा मुला भिबा ताम डन्से सेमहेन्सेन पाड्खम्ला। चुहड्बा बानीबेहोर चा डन्से महिला ज्ञान बुद्धिग्याम याड्बा आहिन, परमेश्वरला दयामायाग्याम याड्बा हिन्ना। १३ एनीगदेसे पढब लखम्बादेन घोबारी खम्बा तामगदे जे डन्से एनीगदेदा भिबा मुला। थेतबासेलमा एनीगदेसे पूरान ताम घोखम्ला भिसी डाइ म्हन्बा मुला। १४ तसैनोन दान्दे एनीगदेदा डन्ना बारेरी जजाकर जे था मुला, लिच्छा एनीगदेसे डन्ना बारेरी जम्मान ताम था याड्बा। ओच्छे य्हाडला प्रभु येशू फेपूखबा धुइरी एनीगदे डन्ना लागिरी ताड्म्याड्बा हड् लसी डनीएनोन एनीगदेला लागिरी ताड्म्याड्बा।

१५-१६ य्हाड जम्मान ताड्म्याड्बा भिबा तामरी डा दुक्क तबा मुला। डा माकेडोनियारी निबा धुइरी एनीगदेदेन छ्याम हुप तबा सेम मुबा, थैहड् लसीन थैग्याम दोःसी खमाएनोन एनीगदेदेन छ्याम हुप तबा सेम मुबा। तिग्दा भिसम एनीगदेसे दोब्बर मोलम याड्गै भिबा डाला सेम मुबा। ओच्छे एनीगदेग्याम फेसी डा यहूदिया अञ्चलरी निमा एनीगदेसे डादा ह्यो लला भिसी डाइ म्हन्बा मुबा। १७ तर डा एनीगदे मुबा ग्लारी खबारी आखम्नी। तिग डाइ तिगै ताम आम्हन्ना डा एनीगदे मुबा ग्लारी खबारी छ्याड्बा भिसी म्हन्बा? तिग डा एनीगदे मुबा ग्लारी खबारी छ्याड्मा ख्रीष्टदा डोआसेबा म्हिगदेसे हड् खाइमाम “तला” खाइमाम “आत” भिसी डाइ पाड्बा हिन्ना? आहिन।

१८ तर परमेश्वर विश्वास लखम्बा परमेश्वर हिन्ना। थेतबासेलमा डाइएनोन ताम गिकदान खाइमाम “तला” खाइमाम “आत” भिसी खाइमै आपाड्। १९ तिग्दा भिसम परमेश्वरला झा येशू ख्रीष्टला बारेरी सिलास, तिमोथीदेन डाइ एनीगदेदा थैःना लबा ताम चा खाइमाम “हिन्ना” खाइमाम “आहिन” भिबा ताम आहिन्मुबा। तर परमेश्वरला झा येशू ख्रीष्टदेन छ्याम चा सदन “हिन्ना” भिबा ताम जे मुला। २० तिग्दा भिसम परमेश्वरसे लबा जम्मान हिन्ना भिबा कबुलगदे येशू ख्रीष्टग्यामसेन पूरा तबा मुला। थेतबासेलमा येशू ख्रीष्टग्यामसेन परमेश्वरला मानदेन जयजयकार तगै भिसी य्हाडसे थैला मिन किन्सी, “आमेन” भिमुला। २१ डन्देन एनीगदेदा ख्रीष्टदेन छ्याम गिक सहोसी भड्बा सहोबादेन य्हाडदा धम्बा चा परमेश्वरसेन हिन्ना। २२ थैहड् लसी डालान हिन्ना भिसी परमेश्वरसे य्हाडदा छापएनोन लबा मुला। ओच्छे थैसे य्हाडदा जम्मान सहे पिन्ना। तर य्हाडसे जम्मान सहे आयाड्देधोनाला लागिरी थैसे हाडला आत्मा बैनाला रूपरी य्हाडला सेमरी थान्सी पिन्बा मुला।

२३ डा कोरिन्थ शहररी आखबा चा डाइ एनीगदेदा बड्सी एनीगदेला सेम सहु थाखगै भिसी हिन्ना। चु ताम परमेश्वरदान था मुला। २४ एनीगदेसे विश्वास लबा तामथोरी डन्से खाइमै अधिकार आल। तर एनीगदे ताड्गै भिसी एनीगदेदेन छ्याम ठिक्सी गे लला। तिग्दा भिसम एनीगदे विश्वासरी कोड्बा मुला।

† 1:12 कोड कोड ग्रीक बाइबलरी “सत्य” भिबादा चोखो भिसी भिबा मुला।

२

१ थेतबासेलमा एनीगदेदा सुर्दा थातगै भिसी डा एनीगदे मुबा ग्लारी आखबा पक्का लजी। २ डादा ताड्ना लबा चा एनीगदेन हिनना। थेतबासेलमा डाइ एनीगदेला सेम सहु खना लजी भिसम डादा खाल्से ताड्ना लबा? ३ थेतबासेलमा डा खमा ताड्ना लबा म्हिगदेग्याम डादा सुर्दा थातगै भिसीन डाइ थे चिठी भिबा हिनना। तिग्दा भिसम डा ताड्बा धुइरी एनीगदेएनोन ताड्ला भिबा डादा पक्का विश्वास मुला। ४ डादा सेमरी सुर्दा तबा मुबा ओच्छे सेम ल्हानान सहु खसी क्राबान थे चिठी भिबा मुबा। डाइ थे चिठी एनीगदेदा दुख तना लबारी भिबा आहिन, तर डाइ एनीगदेदा गाते माया लबा मुला भिबा ताम एनीगदेसे था याङ्गै भिसी भिबा मुबा।

गल्ती लबागदेदा माफ लबा

५ खालै म्हिसे दुख पिन्बा मुसम थेसे एनीगदे जम्मादान भन्दा डादा ल्हाना दुख पिन्बा हिनना। पाङ्गोन तोःमा थे ताम जस्तोन मुसैनोन दाहेनसे डादा थे भन्दा ल्हाना पाङ्बा सेम आरे। ६ थेहड्बा म्हिदा एनीगदे न्हडला ल्हानान म्हिगदे ढिक्सी पिन्बा सजायसे छ्योबा मुला। ७ थेतबासेलमा दाहेनसे एनीगदेसे थेदा माफ लतोःला, ओच्छे थेदा ह्यो लतोःला। आहिनसम सेमरी ल्हानान दुख तसी थेदा झन सुर्दा तला। ८ थेतबासेलमा एनीगदेसे थे म्हिदा अझ सेमहेनसेन माया लउ भिबा डाला बिन्ती मुला।

९ एनीगदेसे डाइ कुल्बा जम्मान ताम ड्यानबा चीम कि आड्यानबा चीम भिसी च्याबाला लागिरीन डाइ एनीगदेदा थे चिठी भिबा मुबा। १० एनीगदेसे जुन म्हिदा माफ लबा मुला डाइएनोन थेदा माफ लला। चुदे डाइ तिगै तामरी खालैदा माफ लबा मुसम एनीगदेदान लागिरी डाइ ख्रीष्टला डाच्छापट्टि थेदा माफ लबा मुला। ११ शैतानसे य्हाडदा फसब लआम्याङ्गै भिसीन डाइ थेहड् लबा हिनना। तिग्दा भिसम शैतानना जम्मान जुक्तिगदे य्हाडदा था मुला।

प्रभुला गे लबागदे

१२ डा त्रोआस भिबा शहररी ख्रीष्टला थार्बा पिन्बा समाचार थेःना लबारी खमा प्रभुसे डादा थेला गे लबा मौका पिन्जी। १३ तर डाइ थेरी य्हाडला आले तीतसदा आस्यापमा डाला सेमरी शान्ति आरेबा। थेतबासेलमा डा थेनीगदेग्याम फेसी माकेडोनिया भिबा अञ्चलरीक्यार निजी।

१४ तर परमेश्वरदा धन्यवाद तगै, तिग्दा भिसम थेसे य्हाडदा सदन ख्रीष्टदेन छ्याम ढाबा ग्यामरी थोला। ओच्छे डनीग्यामसेन थेसे ज्यबा बासना खबा हड्बा ख्रीष्टला ज्ञान बुद्धिला तामगदे जम्मान ग्लारी धोना लला। १५ तिग्दा भिसम थार्बा याड्बा म्हिगदेदेन नाश तसी निबा म्हिगदेला गुडरीनोन डनी परमेश्वरला लागिरी ख्रीष्टग्याम ज्यबा बासना खबा धूप हिनना। १६ नाश तसी निबा म्हिगदेला लागिरी चा य्हाड कालला थाड हिनना, ओच्छे थार्बा याड्बा म्हिगदेला लागिरी चा सोना लबा बासना हिनना। चुहड्बा गे लखम्बा म्हि खाल मुला? १७ तिग्दा भिसम डन्से स्य्हानदो म्हिगदेसे हड् लसी परमेश्वरला बचन व्यापार लबा आरे। तर डन्दा परमेश्वरसेन पुइखबा हिनना। थेतबासेलमा परमेश्वरला ओन्छाडरी ख्रीष्टदेन छ्याम गिक तसी डन्से ज्यबा सेमसे पाड्ला।

३

१ तिग दोःसी डन्से हाडसे हाडदान घेन सहोबारी म्हाडबा हिनना? आहिन। तिग स्य्हानदो म्हिगदेसे हड् लसी डादा मान लउ भिसी एनीगदेदा स्य्हानदो म्हिसे चिठी भितोःला? भिआतोः। थेहड् लसीन एनीगदेसेनोन डादा मान लउ भिसी स्य्हानदो म्हिदा चिठी भिआतोः। २ जम्मान म्हिगदेसे घोबादेन पढब लखम्बा डन्ना सेमरी भिबा चिठी एनीगदेन हिनना। ३ एनीगदे ख्रीष्टसे भिबा चिठी हिनना, ओच्छे चिठी सबा चा डनी हिनना। चु चिठी मसीसे भिबा आहिन, तर छोन्बो परमेश्वरला आत्मासे भिबा हिनना। ओच्छे चु युडबाला पाटीरी† भिबा चिठी आहिन, तर य्हाडला सेमला पाटीरी भिबा हिनना।*

४ परमेश्वरला ओन्छाडरी डनी ख्रीष्टग्याम ढुक्क तबा मुला। ५ खजिबै ताम डनी हाडसेन लबारी खमला भिसी आपाड्, तर जम्मान ताम परमेश्वरग्याम लबारी खमला। ६ परमेश्वरसे छार कबुल लबा

† ३:३ परमेश्वरसे इस्राएलीगदेदा पिन्बा गोर च्युड कुल्बा तामगदे युडबाला पाटीरी भिबा मुबा।

* ३:३ प्रस्था २४:१२; यर्मि

३१:३३; इज ११:१९; ३६:२६

मुला ओच्छे इन्दा थे कबुल अन्छार गे लखम्बा म्हि स्होबा मुला। चु कबुल परमेश्वरला आत्मासे लबा कबुल हिन्ना, भिबा ठिमसे लबा कबुल आहिन। भिबा ठिमसे सिना लमुला, तर परमेश्वरला आत्मासे सोना लमुला।

छार कबुलग्याम खबा य्हाल

७ ठिम युडबाला पाटीरी ठ्वाइसी भिसी पिन्बा धुइरी परमेश्वरला य्हालदेन शक्ति खजी। थे य्हाल मोशाला लीरी परब तजी, लिच्छा थे य्हाल म्हाबान निजी। तसैनोन थे य्हालसे लमा इस्माएलीगदेसे मोशाला लीरी च्याबारी आखम्नी। सिना लबा ठिम याड्बा धुइरी मी थेहड्बा य्हाल तजी भिसम ८ परमेश्वरला आत्मासे लबा गेग्याम इन गाते य्हाल य्हाल तला। ९ तिग्दा भिसम म्हिला दोष उन्बा गे मी थेहड्बा य्हाल तजी भिसम परमेश्वरदा सेम निबा म्हि स्होबा गे इन ल्हानान य्हाल तला। १० पाड्बान तोःमा छार ग्यामला य्हाल चा थे डाच्छाला य्हाल भन्दा इन उदेकला य्हाल मुबासे लमा थे डाच्छाला य्हाल म्हासी निजी। ११ छिन्नडला लागिरी खबा सहे मी य्हालरी खजी भिसम सदनना लागिरी खबा सहे मी इन ल्हानान य्हाल य्हाल तला।

१२ इन्से थेहड्बा आश लबासे लमान इन्से ल्हानान आँट याड्बा मुला। १३ य्हाड मी मोशा हड्बा आहिन, थेसे थे म्हासी निबा य्हाल इस्माएलीगदेसे थाम्राड्गै भिसी हाडला ली घपमुबा। १४ तर थेनीगदेला सेम कोड्बा मुबा, तिग्दा भिसम दान्देधोनाएनोन थेनीगदेसे थे डाच्छाला कबुल पढब लबा धुइरी हाडला सेम घपमुला। थेतबासेलमा थेनीगदेसे सत्य ताम घोबारी आखम। थे घपबा सहे चा ख्रीष्टसे जे तेःखम्ला। १५ दान्देधोनाएनोन मोशाला ठिम पढब लबा धुइरी थे घपबा सहेसे हाडला सेम घपबासे लमा थेनीगदेसे आघोमुला।

१६ तर म्हि प्रभुपट्टि दोःमैछ्याम थे घपबा सहे थेग्याम तेःला। १७ तिग्दा भिसम प्रभु आत्मा हिन्ना। थेतबासेलमा जुन म्हिदेन छ्याम प्रभुला आत्मा मुला थे म्हि खालैला तहरी आत। १८ य्हाड जम्मासेन ली आघपना प्रभुला य्हालदेन शक्ति उन्बा मुला। प्रभु आत्मा हिन्ना, ओच्छे थेग्याम खबा थेनोन य्हालसे य्हाडदा थे हड्बान स्होबान इन ल्हानान य्हालरी भोर्बान मुला।

४

साप्राला ताडरी मुबा सम्पत्ति

१ परमेश्वरसे हाडसेन दया लसी इन्दा चु गे पिन्बासे लमा इन्से सुर्दा लआतोः। २ इन्से लतोःबा जम्मान पेःबा खबा गेगदे ख्लासी जिन्बा मुला। ओच्छे स्य्हान्दोदा जाल लसी फसब लबा ताम लबा आरे। थेहड् लसीन परमेश्वरला बचन लोपबा धुइरी बचनरी मुबा तिगै ताम पोबा आरे। बरु इन्से परमेश्वरला सत्य बचन म्हिगदेदा घोना लबान इनी खाल हिन्ना भिसी म्हिगदेदा उन्बा मुला। ओच्छे थेनीगदेसे परमेश्वरला डाच्छा इनी खाहड्बा म्हि हिन्ना भिसी था याड्बला। ३ चुदे इन्से थेःना लबा थार्बा पिन्बा समाचार घपबा मुसम थे नाश तसी निबा म्हिगदेला लागिरी जे घपबा मुला। ४ चु जम्बुलिडरी शासन लबा ल लुसे विश्वास आलबा म्हिगदेला सेम घपसी पिन्बा मुला। थेतबासेलमा ख्रीष्टला घेन मानना बारेरी उन्बा थार्बा पिन्बा समाचारला य्हालदेन शक्ति थेनीगदेसे म्राड्बा आरे। ख्रीष्टनोन परमेश्वरला रूप हिन्ना। ५ इन्से हाडलान बारेरी थेःना लबा आहिन, तर येशू ख्रीष्टनोन प्रभु हिन्ना भिसी थेःना लबा मुला। ओच्छे येशूला लागिरी इनी एनीगदेला नोकर हिन्ना भिसी थेःना लबा मुला। ६ “धोपधोपरी य्हाल तउ” भिसी सुड्बा परमेश्वरसे येशू ख्रीष्टला स्य्हालग्याम तबा य्हाल परमेश्वरला घेन मानना ज्ञान बुद्धिदा घोबारी खमगै भिसी इन्ना सेमरी थेसे य्हाल तना लजी।*

७ दाहेन्से इन्ना सेमरी चु य्हाल मुला, तर इनी हाडनोन चा साप्राला ताड हड्बा हिन्ना। थेतबासेलमा इन्देन छ्याम मुबा चु शक्ति इनी हाडलान आहिन, तर परमेश्वरग्यामनोन खबा हिन्ना भिबा ताम प्रसूतन था तला। ८ इन्से सदन हड्बा दुख याड्बा मुला, तसैनोन इन्ना सेम सिबा आरे। ओच्छे इनी तिग लबा भिसी अलमल तबा मुला, तसैनोन इन्ना सोबा आश म्हाबा आरे। ९ इन्से ल्हानान दुख याड्बा मुला, तसैनोन परमेश्वरसे इन्दा ख्लाबा आरे। इन्दा म्हिगदेसे ल्हानान तोबा मुला, तसैनोन

* ४:६ उत्प १:३

डनी नाश तसी निबा आरे। ¹⁰ डन्ना चु ल्हुइग्याम येशूला हड्बा जुनी म्हाड्बाम्गै भिसी थेसे सिबा धुइरी नाबा हड्बान दुख डन्सेनोन सदन नाबा मुला। ¹¹ तिग्दा भिसम दान्दे डनी सोतेधोना डन्ना ल्हुइग्याम येशूला जुनी म्हाड्गै भिसी डनी सदन येशूला लागिरी सिबारीनोन तयार मुला। ¹² थेहड् लसीन डनी सितोःसैनोन डन्से एनीगदेला गुडरी ख्रीष्टला गे लबान मुला, तर चुग्याम एनीगदे सोबा मुला।

¹³ “डाइ विश्वास लबासे लमा डाइ पाड्बा मुला” भिसी बचनरी भिबा म्हिदेन छ्याम विश्वास लबा आत्मा मुबा हड्बान डन्देन छ्यामएनोन विश्वास लबा आत्मा मुला। थेतबासेलमा डन्से विश्वास लला ओच्छे पाड्ला।* ¹⁴ डन्दा था मुला, प्रभु येशूदा सिबाग्याम सोना लबा परमेश्वरसे डन्दाएनोन येशूदेन छ्यामनोन सोना लला, ओच्छे परमेश्वरसेन डन्दा एनीगदेदेन छ्याम हाड मुबा ग्लारी भोर्ला। ¹⁵ चु जम्मान ताम एनीगदेला लागिरीन तबा हिनना। तिग्दा भिसम जति ल्हानान म्हिगदेसे परमेश्वरला दयामाया याड्ला ओतेन म्हिगदेसे परमेश्वरला मानदेन जयजयकार लबाला लागिरी परमेश्वरदा धन्यवाद पिन्बा गे बढब तबान निखम्गै।

छार जुनी

¹⁶ थेतबासेलमा डन्दा तिगै सुर्दा आरे। डन्ना चु ल्हुइ कमजोर तसी निसैनोन डन्ना आत्मा चा धिन धिननोन छार दोबान निला। ¹⁷ डन्से दान्दे तिगै धिनना लागिरी नाबा जजाबा दुखग्यामसेन डन्ना लागिरी जुकजुकधोना चिबा य्हालदेन शक्ति याड्ला। चु दुखगदे भन्दा चु य्हालदेन शक्ति चा ल्हानान घेन मुला। ¹⁸ डन्से म्हाड्बा सहेगदेदा आहिन, तर आम्राड्बा सहेगदेदा च्याबा मुला। तिग्दा भिसम म्हाड्बा सहेगदे मी छिन्नडला लागिरी जे तला, तर आम्राड्बा सहेगदे मी जुकजुकधोनान चिला।

5

¹ तिग्दा भिसम य्हाडला चु स्या काला ल्हुइ फुप्सी निबा दिम हड्बान मुला। तसैनोन परमेश्वरसे य्हाडदा स्वर्गरी जुकजुकधोना चिबा ल्हुइ पिन्ना। चु ल्हुइ चा महिला यासे सहोबा फुप्सी निबा दिम हड्बा आहिन, तर परमेश्वरसे सहोबा हिनना भिबा ताम य्हाडदा था मुला। ² भिनोन तोःमा चुरी य्हाड ल्हुइरी ल्हानान ब्लप्सी चिबा मुला। ओच्छे परमेश्वरसे पिन्बा ल्हुइ किन्बारी य्हाडसे ल्हानान सेम लबा मुला। ³ तिग्दा भिसम थे ल्हुइ किन्माहेन्से स्वर्गरी य्हाडला आत्मा थे ल्हुइदेन छ्यामनोन तला। ⁴ य्हाडदा चु जम्बुलिडरी सोतेधोना दुख मी तनोन तला। चु भिबा चा य्हाड सिबारीदेन य्हाडदेन छ्याम मुबा चु ल्हुइ ख्लाबारी म्हाड्बा चा आहिन। बरु य्हाडला चु सिबा ल्हुइ पोबाला लागिरी य्हाडसे सदन सोबा छार ल्हुइ किन्बारी म्हाड्बा हिनना। ⁵ दाहेन्से चुनोन छार ल्हुइला लागिरी य्हाडदा परमेश्वरसे सहोबा हिनना। ओच्छे य्हाडदा थेसे ह्हाडला आत्मा बैना पिन्सी पक्का लबा मुला।

⁶ डनी चु सिसी निबा ल्हुइरी मुतेधोना प्रभुग्याम थारेड मुसैनोन छार ल्हुइ याड्ला भिबा तामरी सदन दुक्क मुला। ⁷ थेतबासेलमा डनी विश्वासग्याम भ्रबा मुला, डन्ना मीसे म्हाड्बा ताम अन्छार आहिन। ⁸ चु सिसी निबा ल्हुइरी चिबा भन्दा मी परमेश्वरला दिमरी प्रभुदेन छ्यामनोन चिला भिबा तामरी डनी पूरान दुक्क मुला। ⁹ थेतबासेलमा डनी चुरी मुसैनोन, प्रभुदेन छ्याम मुसैनोन डन्ना सेम चा प्रभुदा ताड्ना लबा जे हिनना। ¹⁰ तिग्दा भिसम निसाफ लबा धुइरी य्हाड जम्मान ख्रीष्टला डाच्छा राप्तोःला। थे धुइरी य्हाडसे ल्हुइरी मुबा धुइरी ज्यबा आज्यबा खाहड्बा गे लबा मुला, थे अन्छार य्हाडदा ख्रीष्टसे निसाफ लला।

ख्रीष्टग्याम परमेश्वरदेन छ्याम ढिक्बा

¹¹ परमेश्वरदेन छ्याम लोड्बा भिबा तिग हिनना, थे ताम था याड्सी डन्से स्य्हान्दोगदेदाएनोन थे अन्छार भ्रपुड्मुला। परमेश्वरसे डन्दा ज्यना लसी डोसेबा मुला। ओच्छे डनी खाहड्बा मुला भिबा ताम एनीगदेसेनोन था याड्सी जिन्बा मुला भिसी डाइ म्हनबा मुला। ¹² एनीगदेसे डन्दा मान लगै भिसी डन्से दोःसी चु ताम पाड्बा आहिन। तर सेमला तामदा वास्ता आलना मीसे म्हाड्बा तामरी घमण्ड लबा म्हिगदेदा एनीगदेसे ज्यना लसी जोहाब पिन्खम्गै, ओच्छे डन्ना बारेरी था याड्सी एनीगदे ताड्खम्गै

* 4:13 भजन ११६:१०

भिसी पाड्बा हिन्ना। 13 चुदे डन्ना सेम ग्लारी आरे भिसम थे परमेश्वरला लागिरी हिन्ना, ओचछे चुदे डन्ना सेम ग्लारी मुला भिसम थे एनीगदेला लागिरी हिन्ना। 14 डनी ख्रीष्टला मायाला तहरी मुला, तिग्दा भिसम य्हाड जम्मालान लागिरी ख्रीष्ट सिबा मुला। थेतबासेलमा जम्मान म्हि सिबा मुला भिबा ताम डन्दा पक्का विश्वास मुला। 15 ख्रीष्ट जम्मान महिला लागिरी सिजी। थेतबासेलमा दाहेन्से सोबागदे हाडला लागिरी आहिन, तर थेनीगदेला लागिरी सिबाग्याम सोबा ख्रीष्टला लागिरी सोतो:ला।

16 दाहेन्से डन्से खालैदान जम्बुलिडला म्हिगदेसे म्हनबा हड लसी म्हनबारी आत। डाच्छा मी डन्सेनोन ख्रीष्टदा थे म्हिगदेसे म्हनबा हड लसीन म्हनबा मुबा। तर दाहेन्से डन्से ख्रीष्टदा थेहड लसी आम्हन। 17 थेतबासेलमा चुदे खालै म्हि ख्रीष्टदेन छ्याम गिक तसी जिन्बा मुला भिसम थे छार दोसी जिन्बा मुला, पुरानो तामगदे जम्मान म्हासी जिन्बा मुला। च्यागो, थे जम्मान ताम छार दोसी जिन्बा मुला। 18 चु जम्मान ताम चा य्हाडदा ख्रीष्टग्याम हाडदेन छ्याम ढिकना लबा परमेश्वरग्याम तबा हिन्ना। ओचछे परमेश्वरसे हाडदेन छ्याम स्य्हान्दोदा ढिकना लबा गे डन्दा पिन्बा मुला। 19 थेनोन परमेश्वर हाडनोन ख्रीष्टदेन छ्याम तसी जम्बुलिडला जम्मान म्हिगदेदा हाडदेन छ्याम ढिकना लबान मुबा। थेतबासेलमा परमेश्वरसे थेनीगदेसे लबा पापला तिगै सय आकिन्नी। ओचछे स्य्हान्दो म्हिगदेदा परमेश्वरदेन छ्याम ढिकना लबा गे डन्दा जिम्मा पिन्बा मुला। 20 थेतबासेलमा डनी ख्रीष्टला समाचार भोर्बा म्हि हिन्ना। परमेश्वर हाडनोन डन्देन छ्याम तसी एनीगदेदा ड्योइबान मुला। डनीएनोन ख्रीष्टदेन छ्याम तसी एनीगदे परमेश्वरदेन छ्याम ढिक्को भिसी बिन्ती लला। 21 य्हाड ख्रीष्टग्याम परमेश्वरदा सेम निबा म्हि दोगै भिसी पापनोन आलबा ख्रीष्टदा परमेश्वरसे य्हाडला जम्मान पाप काप्सी पिन्जी।

6

1 डनी परमेश्वरदेन छ्यामनोन गे लबा म्हि तबासे लमा एनीगदेदा परमेश्वरसे पिन्बा दयामाया खेरो निना थालउ भिबा डन्ना बिन्ती मुला। 2 तिग्दा भिसम परमेश्वरसे चुहड भिसी सुड्बा मुला, “ठीक धुइरी डाइ एसे लबा बिन्ती थे:बा मुला, ओचछे थार्ना लतो:बा धिनरी डाइ सदन ह्यो लजी।” च्यागो, ठीक धुइदेन थार्ना लबा धिन चा दान्देन हिन्ना।*

पावलला दुख

3 डन्से लबा गेदा खालैसेन बिरोध थालगै भिसी डन्से खालैदान दुख पिन्बा गे आल। 4 तर डन्से जम्मान तामग्याम डनी परमेश्वरला गे लबा म्हि हिन्ना भिसी उन्ना। डन्से जम्मान दुख, गाह्यो तबा ताम, आपत विपतला ताम सोजो तसी नाबा मुला। 5 डन्दा तोबा ग्याड्बा लजी, झ्याल्खानरी झाड्जी, बिरोध लसी म्हिगदेसे हुल दडगा लजी, दुख लसी गे लजी, म्हेर्बारी आम्याड्नी ओचछे चआम्याड्नी। 6 डन्से ज्यबा बानीबेहोर, ज्ञान बुद्धि, दुख नाखम्बा शक्ति, दया, परमेश्वरला आत्मादेन सत्य माया थोसी भ्रबा मुला। 7 डन्से सत्य बचनग्याम ओचछे परमेश्वरलान शक्तिग्याम थेला गे लबा म्हि हिन्ना भिसी उन्बा मुला। नडबा तामगदेशोरी ढाबारीदेन जम्मान तामग्याम जोगब तबाला लागिरी थोबा हतियारगदे चा परमेश्वरदा सेम निबा बानीबेहोर हिन्ना। 8 खालैसे डन्दा मान लजी, खालैसे डन्दा बेइज्जत लजी। खालैसे डन्दा ज्यबा म्हि भिसी पाड्जी, खालैसे डन्दा बिरोध लजी। ओचछे खालैसे डन्दा लुसीला ताम पाड्बा म्हि हिन्ना भिसी पाड्जी। तर डन्से सत्य ताम पाड्बा मुला। 9 डन्दा डोआसेबा म्हिदा हड लसैनोन डन्दा जम्मासेन डोसेबा मुला। सिबा हड्बान तसैनोन डनी सोबान मुला, ओचछे तोबा ग्याड्बा लजी तर डन्दा साइबा आरे। 10 डन्ना सेमरी ल्हानान दुख मुला, तसैनोन डनी सदन ताड्बा मुला। डनी प्राडबो मुसैनोन डन्से ल्हानान म्हिगदेदा विश्वासरी फ्युकपो सहोला। ओचछे तिगै आरेसैनोन डन्देन छ्याम जम्मान सहे मुला।

* 6:2 यशै ४९:८

11 कोरिन्थला डाला होगदे, डन्से एनीगदेदा जम्मान ताम घोना लसी पाड्बा मुला, एनीगदेदा डन्ना सेमहेन्सेन ल्हानान माया लबा मुला। 12 डन्से एनीगदेदा माया लबा ख्लाबा आरे, बरु एनीगदेसे चा डन्दा ल्हाना माया आलमुला। 13 थेतबासेलमा डाइ एनीगदेदा डालान कोलागदेदा हड् लसी पाड्ला, एनीगदेसेनोड डन्दा सेमहेन्सेन ल्हानान माया लउ।

ख्रीष्टदा विश्वास लबागदेदेन आलबागदे

14 म्हे मोडबा धुडरी जुवा गिकरीन म्हेदेन ता नारब आलबा हड् लसी एनीगदेएनोन ख्रीष्टदा विश्वास आलबा म्हिगदेदेन छ्याम गिक तसी थाभ्रउ। तिग्दा भिसम ज्यबादेन पाप खाइमै ढिकबारी आखम ओच्छे धोपदेन य्हाल खाइमै ग्ला गिकरी आत। 15 ख्रीष्टदेन शैताना खाइमै गिक आत ओच्छे ख्रीष्टदा विश्वास लबागदेदेन विश्वास आलबागदेएनोन खाइमै गिक आत। 16 मूर्तिगदेदेन परमेश्वरला मन्दिर खाइमै गिक आत। तिग्दा भिसम य्हाड चा छोन्बो परमेश्वरला मन्दिर हिन्ना। परमेश्वरसेनोन चुहड् भिसी सुड्बा मुला,

“डादा तेनबा म्हिगदेदेन छ्याम चिला,
ओच्छे थेनीगदेदेन छ्यामनोन भ्रला।

डा थेनीगदेलान परमेश्वर दोला,
ओच्छे थेनीगदे चा डाला म्हि दोला।*

17 थेतबासेलमा एनीगदे थेनीगदेग्याम फेसी खउ,
ओच्छे फेसी चिउ।

नड्बा सहेगदे तिगैनोन थाथुर्गो,
डाइ एनीगदेदा डालान म्हि स्होला' भिसी
परमप्रभुसे सुड्बा मुला।”*

18 “डा एनीगदेला आबा दोला,
ओच्छे एनीगदे चा डाला झा झामे दोला' भिसी
जम्मान भन्दा घेन परमप्रभुसे सुड्बा मुला।”*

7

1 थेतबासेलमा डाला सेम निबा होगदे, परमेश्वरसे य्हाडदेन छ्याम थे कबुलगदे लबासे लमा य्हाडसे य्हाडला ल्हुइदेन आत्मादा आज्यबा तना लबा जम्मान नड्बा सहेगदेदा भ्याड्सी चोखो म्हि दोगे। ओच्छे परमेश्वरदा मान लसी तिगै दोष आरेबा म्हि दोसी भ्रइ।

पावल ताड्बा

2 एनीगदेसे डन्दा सेमहेन्सेन ल्हानान माया लउ। डन्से खालैदान आज्यबा व्यवहार लबा आरे। ओच्छे डन्से खालैला विश्वास न्होड्ना लबादेन खालै म्हिग्याम फाइदा किन्बाएनोन आरे। 3 चु ताम डाइ एनीगदेदा दोष लबारी पाड्बा आहिन। तिग्दा भिसम एनीगदे डन्ना सेमरी मुला भिबा ताम डाइ एनीगदेदा डाच्छान पाड्सी जिन्बा मुला। डनी एनीगदेदेन छ्यामनोन सितो:सै सितो:सै तयार मुला। 4 डा एनीगदेदेन छ्याम ढुक्क मुला। एनीगदेदा डोसेबासे लमा डा ल्हानान ताड्बा मुला, एनीगदेसे डादा ल्हानान तामरी आँट पिन्बा मुला। थेतबासेलमा डन्से नातो:बा जम्मान दुखरीनोन डा ल्हानान ताड्बा मुला।

5 तिग्दा भिसम माकेडोनियारी खसीनोन डन्से बल्पबा न्हआम्याड्नी। डन्दा इन जम्मानग्याम आपत विपत तजी। डन्दा ल्हानान म्हिसे बिरोध लसी बड्जी ओच्छे सेमरी ल्हानान लोड्बा खजी।* 6 तर तीतस डनी मुबा ग्लारी खबा तामग्याम दुख तबागदे जम्मादान आँट पिन्बा परमेश्वरसे डन्दा आँट पिन्जी। 7 थे खबासे लमा जे आहिन, तर एनीगदेसे थेदा पिन्बा आँटग्याम डन्से आँट याड्बा मुला। एनीगदेसे डादेन छ्याम हुप तबारी ल्हानान सेम लबा मुला भिसी थेसे डन्दा पाड्जी। ओच्छे

† 6:15 ग्रीक बाइबलरी शैतानदा बेलिआल भिसी भिबा मुला। खाइमा गिक न्ही यहूदीगदेसे शैतानदा बेलिआल भिसी पाड्मुबा। बेलिआल भिबा चा गे आखेल्बा हिन्ना। * 6:16 लेवी २६:१२; इज ३७:२७ * 6:17 यशै ५२:११ * 6:18 २ शमू ७:१४

* 7:5 २ कोर २:१३

डाचूछा डाला सेम सहु खना लबा ताम ढन्सी एनीगदेसे ल्हानान दुख इहम्बा मुला भिबादेन डादा ल्हानान वास्ता लबा मुला भिबा तामएनोन थेसे डन्दा पाड्जी। चु ताम थेःसी डा झन ल्हानान ताड्बा मुला।

8 डाइ भिबा चिठीग्याम एनीगदेदा सुर्दा तजी भिसी डाइ दुख म्हन्बा आरे, हिन्बाम डाचूछा डादाएनोन सुर्दा तबा मुबा। थे चिठीसे एनीगदेदा छिन्नडला लागिरी जे तसैनोन सुर्दा तना लजी भिबा ताम डाइ था याड्जी। 9 एनीगदेदा सुर्दा तजी भिसी डा ताड्बा आहिन, तर थे सुर्दाग्याम एनीगदेसे हाडसे लबा आज्यबा गेगदे ख्लासी परमेश्वरपट्टि दोःजी भिसी ताड्बा हिन्ना। तिग्दा भिसम डनीग्याम एनीगदेदा तिगै सुर्दा थातगै भिसी एनीगदेसे परमेश्वरसे म्हन्बा अन्छारला दुख नाजी। 10 तिग्दा भिसम परमेश्वरदा ढन्सी लबा सुर्दा चा परमेश्वरदा सेम निबा सुर्दा हिन्ना। चुनोन सुर्दासे थाबा याड्बाला लागिरी म्हिदा हाडला पाप ख्लासी परमेश्वरपट्टि दोःपुड्ला। ओचूछे थे तामसे सेमरी तिगै दुख आत। तर जम्बुलिडला सुर्दासे चा म्हिदा सिना लला। 11 तिग्दा भिसम च्यागो, परमेश्वरग्याम खबा सुर्दासे एनीगदेदा गाते आँट पिन्बा मुला। थे सुर्दासे एनीगदेदा हाड तिगै दोष आरेबादेन ज्यबा म्हि हिन्ना भिसी उन्बारी आँट पिन्बा मुला। थे सुर्दासे एनीगदेला गुडरी पाप लबा म्हिगदे म्राड्सी बोमो खना लबा मुला। ओचूछे एनीगदेदा डादेन छ्याम हुप तबा सेम पिन्ना। थेहड् लसीन पापग्याम याड्बा सजाय म्राड्सी लोड्बादेन पाप गे लबा म्हिदा सजाय पिन्बा सेम खना लला। चु तामग्यामसेन एनीगदे तिगै दोष आरेबा म्हि हिन्ना भिसी था याड्ला। 12 डाइ थे चिठी दुख पिन्बा अथवा दुख याड्बा महिला लागिरी भिबा आहिन। तर परमेश्वरला डाचूछा एनीगदेसे डन्दा गाते ढन्बा मुला भिबा ताम था याड्बाला लागिरीन डाइ भिबा हिन्ना। 13 थेतबासेलमा डन्से आँट याड्बा मुला।

डन्से आँट जे आहिन, एनीगदेसे तीतसदा ताड्ना लबासे लमा डनीएनोन ल्हानान ताड्बा मुला। 14 तिग्दा भिसम डाइ एनीगदेला बारेरी तीतसदेन छ्याम घमण्ड लसी ताम लमुबा, तसैनोन डा पेःआतोःनी। डन्से एनीगदेदा सत्य ताम पाड्बा हड् लसीन तीतसदेन छ्याम घमण्ड लसी पाड्माएनोन सत्य दोजी। 15 एनीगदे लोड्सी तीतससे पाड्बा जम्मान ताम ड्यानूसी थेदा मान लजी। थे ताम ढन्सी थेसे एनीगदेदा झन ल्हानान माया लबा मुला। 16 एनीगदेथोरी पूरान भर लखम्बासे लमा डा एनीगदेदेन छ्याम ल्हानान ताड्बा मुला।

8

ज्यबा सेमसे पिन्तोःबा

1 ज्योज्यो आले नाना आडागदे, माकेडोनिया अञ्चलरी मुबा मण्डलीगदेदा परमेश्वरसे लबा दयामायाला बारेरी डन्से एनीगदेदा पाड्बा सेम मुला। 2 स्य्हान्दोसे ल्हानान दुख पिन्बा धुडरीनोन थेनीगदे ल्हानान ताड्बा मुबा। ओचूछे ल्हानान प्राडबो तसैनोन थेनीगदेसे स्य्हान्दोदा ज्यबा सेमसे दान पिन्मुबा। 3 थेनीगदेसे पिन्खम्बा भन्दा ल्हानान हाडला सेमहेन्से ताड्सी ताड्सी पिन्बा मुबा भिबा ताम डाइ एनीगदेदा पाड्ला। 4 थेनीगदेसे यरूशलेमरी मुबा परमेश्वरला म्हिगदेदा हो लबा मौका पिन्गो भिसी डन्देन छ्याम घरिघरि बिन्ती लजी। 5 थेनीगदेसे डन्से म्हन्नोन आम्हन्बा ताम लजी। जम्मान भन्दा डाचूछा थेनीगदेसे हाड हाडदा प्रभुला छ्यारी जिम्मा पिन्जी, ओचूछे परमेश्वरसे म्हन्बा अन्छारला गे लबाला लागिरी एनीगदेसे हाडसे हाडदान डन्ना यारी जिम्मा पिन्जी।

6 थे भेटी हुपबा ज्यबा गे डाचूछा तीतससेन शुरु लजी। थेतबासेलमा एनीगदेला गुडरीनोन थे गे पूरा लबाला लागिरी एनीगदेदा हो लउ भिसी डन्से थेदान बिन्ती लजी। 7 तर एनीगदे विश्वास लबारी, पाड्बारी, ज्ञान बुद्धिरी, जम्मान तामरी आँट पिन्बारीदेन डन्दा माया लबा चु जम्मान ताम एनीगदेसे ज्यना लसी लबान मुला। थेहड् लसीन पिन्बा गेएनोन एनीगदेसे ल्हानान लबान निउ।

8 चु चा डाइ एनीगदेदा लनोन तोःला भिसी कुल्बा आहिन। तर स्य्हान्दोगदेसे सेमहेन्सेन हो लबा तामग्याम एनीगदेसे स्य्हान्दोगदेदा लबा माया सत्य हिन्ना कि आहिन भिसी था याड्बाला लागिरी डाइ चु ताम पाड्बा हिन्ना। 9 य्हाडला प्रभु येशू ख्रीष्टसे लबा दयामाया एनीगदेदा थानोन मुला। थे

ल्हानान फ्युकुपो मुबा। तसेनोन थे एनीगदेला लागिरी प्राडबो दोजी। तिग्दा भिसम हाड प्राडबो दोसी एनीगदे फ्युकुपो दोखमगै भिसीन थेसे चुहड लबा हिनना।

१० एनीगदेला लागिरी ज्यबा तगै भिबा डाला चु सल्लाह मुला। तिग्युडमा एनीगदेसे पिन्बा गे शुरु लबा जे आहिन, तर थे गे लबारीनोन ल्हानान सेम लबा मुबा। ११ दाहेन्से एनीगदेसे थे गे पूरा लउ। शुरु लबा धुइरी एनीगदेसे ल्हानान पिन्बा सेम लबा अन्छार खमतेधोना पिन्सी पूरा लउ। १२ पिन्बा सेम मुसम म्हिसे हाडदेन छ्याम आरेबा स्हे आहिन, तर जुन स्हे हाडदेन छ्याम मुला थे अन्छार पिन्मा परमेश्वर ताड्ला।

१३ एनीगदेदा चा गाहो तगै, ओच्छे स्य्हान्दोगदेदा चा सजिलो तगै भिसी डाइ चु ताम पाड्बा आहिन। तर जम्मान च्योच्यो ततोःला भिसी डाइ चु ताम पाड्बा हिनना। १४ दान्दे एनीगदेदेन छ्याम ल्हानान मुबा स्हेग्याम आरेबागदेदा पिन्गो। ओच्छे लिच्छा थेनीगदेदेन छ्याम ल्हानान तबा धुइरी एनीगदेदा खाँचो तमा थेनीगदेसेनोन एनीगदेदा पिन्ना। थेहड लजी भिसम जम्मान च्योच्यो तला। १५ बचनरीनोन चुहड लसी भिबा मुला, “ल्हानान दुइबा म्हिदाएनोन ल्हाना आतनी, ओच्छे च्याड्ना दुइबा म्हिदाएनोन आछ्योबा आतनी।”*

तीतसदेन थेला ह्योगदे कोरिन्थरी निबा

१६ तर परमेश्वरदा धन्यवाद तगै। तिग्दा भिसम थेसे एनीगदेला लागिरी तीतसदाएनोन डाला हड्बान सेम पिन्जी। १७ तिग्दा भिसम थे डन्से पाड्बासे लमा जे एनीगदेदेन छ्याम हुप तबारी खबा आहिन, तर थे सेमहेन्सेन ताड्सी ताड्सी हाडनोन एनीगदे मुबा ग्लारी खबान मुला। १८ ओच्छे थार्बा पिन्बा समाचार थेःना लसी भ्रमा जम्मान मण्डलीसे मान लबा आलेदाएनोन डन्से थेदेन छ्याम पुइखबान मुला। १९ चुदे जे आहिन, मण्डलीसे हुप लबा भेटी यरूशलेमरी भोर्बा धुइरी चु आलेदा डन्देन छ्यामनोन निगै भिसी धम्बा मुला। चु ज्यबा गे डन्से प्रभुला मानदेन जयजयकार लबाला लागिरी ओच्छे आरेबागदेदा हो लबा सेम डन्दा मुला भिसी उन्बाला लागिरी लबा हिनना। २० ज्यबा सेमसे पिन्बा चु भेटी यरूशलेमरी भोर्सी थेला विश्वासीगदेदा भो लसी पिन्बा धुइरी डन्दा चु भेटीला बारेरी खालैसेन दोष थालगै भिसी डनी होशियार तसी गे लमुला। २१ तिग्दा भिसम डन्दा प्रभुला डाच्छापट्टि जे आहिन, तर म्हिगदेला डाच्छापट्टि एनोन जुन ताम ज्यबा मुला थेनोन ताम लबा सेम मुला।

२२ थेनीगदेदेन छ्यामनोन डन्से स्य्हान्दो आले गिकदाएनोन एनीगदे मुबा ग्लारी पुइखबान मुला। डन्से ल्हानान रेम च्यामा थे प्रभुला गे लबारी ल्हानान झन्बा म्राड्जी। ओच्छे थेसे एनीगदेशोरी भर लबासे लमा थेसे झन ल्हानान गे लबारी आँट याड्बा मुला। २३ तीतस चा डादेन छ्यामनोन ढिक्सी गे लबा डाला हो हिनना। थेसे एनीगदेसे हो लबा गेरी डादा हो लमुला। ओच्छे थेदेन छ्याम खबा स्य्हान्दो आलेगदे चा मण्डलीगदेसे पुइखबा आलेगदे हिनना। थेनीगदेएनोन ख्रीष्टला मानदेन जयजयकार लबागदे हिनना। २४ थेतबासेलमा चु म्हिगदेदा एनीगदेसे हाडला माया उन्गो। ओच्छे डनी एनीगदे म्राड्सी तिग्दा ताड्बा मुला थे ताम थेनीगदेदा उन्गो। तिग्दा भिसम चु ताम जम्मान ग्लाला मण्डलीगदेसे था याड्गै।

9

विश्वासीगदेसे हुपबा भेटी

१ यरूशलेमरी मुबा परमेश्वरला म्हिगदेला लागिरी पिन्बारी छ्याइबा भेटीला बारेरी डाइ एनीगदेदा भितोःबा ताम तिगै आरे। २ तिग्दा भिसम एनीगदे सदन स्य्हान्दोदा हो लबारी तयार मुला भिबा ताम डादा था मुला। एनीगदे अखैया अञ्चलरी मुबागदे तिग्युडमाहेन्सेन स्य्हान्दोदा हो लबारी तयार तबासे लमा डा ताड्बा ताम माकेडोनिया अञ्चलला म्हिगदेदा पाड्बा मुबा। चु ताम थेःसी माकेडोनियाला ल्हानान म्हिसे स्य्हान्दोदा हो लबा आँट याड्जी। ३ तर डनी एनीगदेला जुन गेला बारेरी थेःसी ताड्बा मुला। थे ताड्बा ताम खेरोरी थानिगै भिसी डाइ आलेगदेदा पाड्बा अन्छार

* ८:१५ प्रस्था १६:१८

एनीगदे भेटी पिन्बारी तयार तसी चिउ। डाइ आलेगदेदा एनीगदे मुबा ग्लारी पुइखबान मुला। ४ चुदे माकेडोनिया अञ्चलला खालै म्हि डादेन छ्याम खबा धुइरी एनीगदे तयार आरेबा स्यापजी भिसम डनी पे:तो:ला। ओच्छे एनीगदेएनोन ल्हानान पे:तो:ला। तिग्दा भिसम डन्से एनीगदेशेरी ल्हानान भर लबा मुला। ५ थेतबासेलमा एनीगदेसे पिन्ना भिसी कबुल लबा भेटी डा खबा भन्दा डाच्छान ढिकना लबाला लागिरी डाइ आलेगदेदा एनीगदे मुबा ग्लारी पुइखबान ज्यबा तला भिसी म्हन्जी। ओच्छे चु भेटी खालैला करकापसे आहिन, तर हाडलान सेमग्याम पिन्बा भेटी तगै।

ल्हानान ढ्वबासे ल्हानान बाली दुइला

६ तर च्याङ्ना ढ्वबा म्हिसे च्याङ्नान बाली दुइला, ओच्छे ल्हाना ढ्वबा म्हिसे ल्हानान बाली दुइला भिबा ताम एनीगदेसे थाम्ले:गो।* ७ ओच्छे जम्मान म्हिसे हाडला सेमसे म्हन्बा अन्छार पिन्गो। पिन्गे आमहन्सम खालैला करकापरी तसी थापिन्गो। तिग्दा भिसम सेमहेन्सेन ताङ्सी पिन्बा म्हिदा परमेश्वरसे माया लमुला। ८ परमेश्वरसे एनीगदेदा जम्मान सहे तो:बा भन्दा ल्हानान पिन्ना। जमाहेन्से एनीगदेदेन छ्याम सदन ल्हानान सहेगदे तला, ओच्छे एनीगदेसे ज्यबा गेला लागिरी स्य्हान्दोगदेदा पिन्बारी खम्ला। ९ बचनरीनोन चुहङ् भिसी भिबा मुला, “थेसे सेमहेन्सेन ताङ्सी प्राडबोगदेदा पिन्ना।

ओच्छे थेसे लबा ज्यबा गे जुकजुकधोनान चिला।”*

१० खेती लबा म्हिदा परमेश्वरसेन ढ्वबारी बलुदेन चबारी चबा सहे पिन्ना, थेसेन एनीगदेदा बलु पिन्ना ओच्छे फुइना लसी लहेना लला। एनीगदेसे लबा थे ज्यबा गेरी परमेश्वरसे मोलम पिन्बासे लमा स्य्हान्दोगदेदा हो लबारी खम्ला।* ११ एनीगदेसे ज्यबा सेमसे पिन्खमगै भिसी परमेश्वरसे एनीगदेदा जम्मान सहेरी मोलम पिन्ना। ओच्छे एनीगदेसे पिन्बा भेटी डन्से अर्गु मण्डलीगदेदा पिन्मा थेनीगदेसे परमेश्वरदा धन्यवाद पिन्ना। १२ एनीगदेसे पिन्बा भेटीग्याम परमेश्वरला म्हिगदेला खाँचो जे टारेब तबा आहिन। तर एनीगदेसे पिन्बा भेटीसे लमा थेनीगदेसे परमेश्वरदा ल्हानान धन्यवाद पिन्ना। १३ एनीगदेसे लबा थे ज्यबा गेग्याम एनीगदेसे हाड खाहङ्बा म्हि हिन्ना भिसी उन्बा मुला। एनीगदेसे ख्रीष्टला थार्बा पिन्बा समाचारदा विश्वास लसी कुल्बा ताम ड्यान्बासे लमा, एनीगदेसे हाडदेन छ्याम मुबा सहेगदे सेमहेन्सेन ताङ्सी थेनीगदेदेन स्य्हान्दोदा पिन्बा ताम म्राङ्बासे लमा म्हिगदेसे परमेश्वरला मानदेन जयजयकार लला। १४ परमेश्वरसे एनीगदेदा ल्हानान दयामाया लबासे लमा थेनीगदेसे एनीगदेदा ल्हानान माया लसी एनीगदेला लागिरी प्रार्थना लला। १५ पाङ्सी पाङ्बारी आखम्बा मोलमं पिन्बाला लागिरी परमेश्वरदा धन्यवाद तगै।

१०

पावलसे हाडला गे जोगब लबा

१ एनीगदे नहडला कोइ कोइसे डा एनीगदेदेन छ्याम चिमा चा सोजो तसी ताम लमुला, ओच्छे एनीगदेग्याम फेसी निमाहेन्से चा बङ्मुला भिसी पाङ्मुला। दाहेन्से ख्रीष्टसे पिन्बा सेमदेन दयाग्याम एनीगदेदा डा पावलला बिन्ती मुला। २ जुन म्हिगदेसे डन्दा जम्बुलिङला आज्यबा बानीबेहोर थोबा म्हि हिन्ना भिसी म्हन्बा मुला, थे म्हिगदेदा डा एनीगदे मुबा ग्लारी खबा धुइरी डाइ बङ्आतो:गै। ३ हिन्ना, दान्दे यहाड जम्बुलिङरी मुला, तसैनोन ख्रीष्टदा डोआसेबा म्हिगदेसे हङ् लसी यहाडसे लडाइ आल। ४ डन्से लडाइरी थोबा हतियारगदे चा स्य्हान्दो म्हिगदेसे थोबा हतियार हङ्बा आहिन। तर डन्से थोबा हतियार चा शैतानना शक्तिदेन डन्ना गुडरी मुबा लुसीला तामगदेदा नाश लखम्बा परमेश्वरला शक्ति हिन्ना। ५ घमण्ड लसी परमेश्वरला ज्ञान बुद्धिला बिरोध लबा जम्मान तामगदेदा डन्से नाश लबा मुला। ओच्छे जम्मान म्हन्बा तामगदेदा ख्रीष्टसे कुल्बा ताम ड्यान्गै भिसी डन्से तहरी थान्बा मुला। ६ एनीगदे पूरान कुल्बा ताम अन्छार भ्रमाहेन्से कुल्बा ताम अन्छार आभ्रबागदे जम्मादान सजाय पिन्बारी डनी तयार मुला।

* ९:६ हितो ११:२४ * ९:९ भजन ११:२:९ * ९:१० यशै ५५:१० † ९:१५ चु पदरी मोलम भिबा चा ल्हानान हङ्बा बाइबल विद्वानगदेसे ख्रीष्ट हिन्ना भिसी पाङ्बा मुला।

7 एनीगदेसे हाडसे म्राड्बा सहेगदेदा जे च्यामुला। एनीगदे न्हडला खालैसे डा खीष्टला म्हि हिन्ना भिसी पूरान विश्वास लबा मुला भिसम थेसे डनीएनोन खीष्टला म्हि हिन्ना भिसी घोटो:ला। 8 डन्से याड्बा अधिकारला बारेरी डाइ ल्हानान घमण्ड लसी पाड्बा मुसैनोन डा पे:आतो:। तिग्दा भिसम चु अधिकार एनीगदेदा न्होड्ना लबाला लागिरी आहिन, तर एनीगदेदा विश्वासरी कोड्बा सहोबाला लागिरीन प्रभुसे पिन्बा हिन्ना। 9 डाइ एनीगदेदा भिबा चिठीगदे एनीगदेदा लोड्ना लबाला लागिरी भिबा हिन्ना भिसी थाम्हन्गो। 10 तिग्दा भिसम कोइ कोइसे “पावलसे चिठीगदे भिबा धुइरी चा डनदा बड्सी भिमुला। तर यहाडदेन छ्याम हुप तबा धुइरी चा कमजोर तमुला, ओच्छे थेसे पाड्मा तिगै गे आखेल्बा तमुला” भिसी पाड्मुला। 11 थेहड्बा म्हिगदेसे डन्से चिठीरी जुन ताम भिबा मुला, थेनोन अनछार एनीगदेदेन छ्याम हुप तमाएनोन लला भिबा ताम घोटो:ला।

12 कोइ कोइ म्हिसे हाडसे हाडदान घेन म्हि भिसी म्हनमुला, थेहड्बा म्हिगदेदेन छ्याम डनी हाडसे हाडदान दाँजब लसी च्याबा सेम आरे। तर थेनीगदेसे हाडसे हाडदान घेन सहोसी हाड हाड न्हडरी दाँजब लसी च्याजी भिसम थेनीगदे तिगै आघोबा मूर्ख म्हि दोला। 13 तर परमेश्वरसे पिन्बा अधिकारला बारेरी जे डन्से घेन दोसी ताम पाड्ला। परमेश्वरसे पिन्बा गेला बारेरी भन्दा अर्गु खजिबै तामला बारेरी डन्से घेन दोसी ताम आल। थेहड् लसी घेन दोसी लबा गे एनीगदे मुबा ग्लारीनोन धोखबा मुला। 14 एनीगदे मुबा ग्लारी खनोन आखबा म्हिसे हड् लसी डन्से मुबा आरेबा तामगदेरी ताड्सी भ्रबा आरे। तिग्दा भिसम जम्मान भन्दा डाच्छा खीष्टला थार्बा पिन्बा समाचार भसी एनीगदे मुबा ग्लारी खबा म्हि डनीन हिन्ना। 15 स्य्हान्दोगदेसे लबा गेदा डन्से लबा हिन्ना भिसी ताड्सी आभ्र, तर डनी हाडसेन लबा गेरी जे ताड्ला। एनीगदेला विश्वास ल्हेबान निमा एनीगदेला गुडरी डन्से लबा गे झन बढब तबान निला भिबा डन्दा आश मुला। 16 चुहड् लसी डन्से लबा गे एनीगदेला गुडरी बढब तबान निजी भिसम डन्से एनीगदेग्याम अर्गु यहुल्सारीनोन थार्बा पिन्बा समाचार थे:ना लबारी खम्ला। थेहड् तजी भिसम डन्से स्य्हान्दोगदेसे डाच्छान गे लबा ग्लारी निबा सेम आल। तिग्दा भिसम स्य्हान्दोगदेसे लबा गेदा डन्से लबा हिन्ना भिसी ताड्सी भ्रबा सेम आरे। 17 तर बचनरीनोन चुहड् भिसी भिबा मुला, “जुन म्हिदा ताड्बा सेम मुला थे म्हि प्रभुला बारेरी ताड्गै।”* 18 तिग्दा भिसम खालैसे डा ज्यबा म्हि हिन्ना भिदेमा थे ज्यबा म्हि आत। तर जुन म्हिदा प्रभुसे ज्यबा म्हि हिन्ना भिसी सुड्ला, थेनोन ज्यबा म्हि तला।

11

पावलदेन लुसीला ताम पाड्बा मुल चेला

1 डाइ मूर्ख ताम लसैनोन एनीगदेसे नाला भिबा डाइ आश लबा मुला। एनीगदेसे डादा नासी पिन्गो या। 2 परमेश्वरसे एनीगदेदा लबा हड्बान वास्ता डाइएनोन लबा मुला। तिग्दा भिसम आबासे झामेदा म्हाछारला यारी जिम्मा पिन्बारी कबुल लबा हड् लसी डाइ एनीगदेदाएनोन चोखो मिडकोलादा हड् लसी खीष्टला छ्यारी जिम्मा पिन्बा सेम लसी कबुल लबा मुला। 3 तर शैतानसे पुखीला रुप किन्सी हव्वादा फसब लबा हड् लसी खालैसे एनीगदेला खीष्टदा तेन्बा चोखो सेम न्होड्ना लला वा भिसी डा लोड्बा मुला।* 4 तिग्दा भिसम चुदे खालै म्हि खसी एनीगदेदा डन्से पाड्बा येशूला बारेरी भन्दा स्य्हान्दो येशूला बारेरी पाड्जी भिसम एनीगदेसे सेम लसी ड्यान्बा चीम। ओच्छे एनीगदेदा डाच्छा पाड्बा परमेश्वरला आत्मादेन थार्बा पिन्बा समाचारला बारेरी भन्दा स्य्हान्दो आत्मादेन समाचारला बारेरी पाड्जी भिसम थे ताम एनीगदेसे तुरुन्तन विश्वास लबा चीम। 5 थे जम्मान भन्दा घेन मुल चेला दोबा सहोबा म्हिगदे भन्दा डा तिगै तामरी जजा मुला भिसी म्हनबा आरे। 6 डा ज्यना लसी ताम पाड्बारी आसेबा म्हि तसैनोन डादेन छ्याम ज्ञान बुद्धि चा मुला। चु जम्मान ताम डन्से डाच्छान एनीगदेदा ज्यना लसी घोना लसी उन्बा मुला।

7 एनीगदेदा घेन सहोबाला लागिरी डा जजा दोसी एनीगदेग्याम तिगै आकिन्ना परमेश्वरला समाचार थे:ना लमा तिग डाइ पाप लबा हिन्ना? 8 डाइ एनीगदेदा हो लबाला लागिरी अर्गु

* 10:17 यर्मि ९:२४ * 11:3 उत्प ३:१-२०

मण्डलीगदेग्याम टाडगा किन्मा अर्गु मण्डलीगदेदा डाइ ठगब लबा हड्बान तजी। ९ एनीगदेदेन छ्याम चिमा डादा खाँचो तबा धुइरी डाइ एनीगदेदा दुख आपिन्नी। डादा खाँचो तबा धुइरी जम्मान सहेगदे माकेडोनियाग्यामसेन आलेगदेसे भसी पिन्मुबा। दान्देनोन एनीगदेदा दुख पिन्बा सेम आरे। चु तामला लागिरी डाइ एनीगदेदा डाचछाएनोन दुख आपिन्नी, दाहेन्सेनोन डाइ एनीगदेदा दुख आपिन।* १० अखैया अञ्चलरी डाइ ताड्सी पाड्बा चु तामदा थापाड्गो भिसी खालैसेन पाड्बारी आखम। तिग्दा भिसम डाला सेमरी ख्रीष्टला सत्य बचन मुला। ११ डाइ तिग्दा चुहड् लबा हिन्ना? तिग डाइ एनीगदेदा माया आलबासे लमा हिन्ना? डाइ एनीगदेदा माया लमुला भिबा ताम परमेश्वरदान था मुला।

१२ तर डन्से लबा हड्बान गे लबा मुला भिसी ताड्बारी म्हाइबा थे जम्मान भन्दा घेन मुल चेला दोबा सहोबा म्हिगदेदा ताड्सी भ्रबा मौका आपिन्बाला लागिरी डाइ दान्दे जुन गे लबान मुला थे गे सदन लला। १३ तिग्दा भिसम थेहड्बा म्हिगदे ख्रीष्टला मुल चेला दोबा सहोसी स्यहान्दोदा छल लसी भ्रबा फट्टा चेलागदे हिन्ना। १४ चु तिगै उदेक म्हन्तोःबा ताम आहिन। तिग्दा भिसम शैतानसेनोन म्हिदा फसब लबाला लागिरी य्हाल य्हाल्बा स्वर्गदूत हड्बान दोसी खमुला। १५ थेतबासेलमा शैतानना नोकरगदेएनोन परमेश्वरदा सेम निबागदे हड्बान दोसी भ्रजी भिदेमा तिगै उदेक म्हन्तोःबा ताम आरे। परमेश्वरसे निसाफ लबा धुइरी थेनीगदेसे हाडसे लबा आज्यबा गेला सजाय नातोःला।

पावलसे नाबा दुखगदे

१६ डाइ दोःसीनोन पाड्ला, डादा खालैसेन मूर्ख थाम्हनगो। चुदे एनीगदेसे डादा मूर्ख म्हन्बा मुसम मूर्खन म्हन्सी डाइ पाड्मा विश्वास लउ। जमाहेन्से डाइएनोन तिगै तामरी जजाकर भिसै ताड्म्याड्ला। १७ हिन्ना, ताड्बा तामला बारेरी डाइ मूर्खसे हड् लसीन ताम लबान मुला। चु ताम चा डादा प्रभुसे कुल्बासे लमा पाड्बा आहिन। १८ ल्हानान म्हिगदे जम्बुलिडला तामगदेशोरी ताड्बासे लमा डाइएनोन ताड्ला। १९ एनीगदे मी ल्हानान ज्ञान बुद्धि मुबा म्हि दोजीम। ओच्छे मूर्ख म्हिगदेसे पाड्माएनोन ताड्सी ताड्सी नाबा चीम। २० चुदे खालै म्हिसे एनीगदेदा नोकर सहोसैनोन, ठगब लसैनोन, ब्यन्सैनोन, एनीगदेदा धाक उन्सैनोन ओच्छे ग्रम्बारीन तोसैनोन एनीगदेसे थे जम्मान नाबा चीम। २१ एनीगदेदा स्यहान्दोगदेसे लबा हड्बान डन्से लआखमनी भिसी डा पेःतोःबा हिन्ना? आहिन।

तर खालै म्हि तिगै तामरी ताड्बा मुसम डाइएनोन थे तामरी ताड्ला। हिन्ना, डाइ मूर्ख म्हिसे हड् लसीन ताम लबान मुला। २२ तिग थेनीगदे हिबू हिन्ना? डाएनोन हिबू हिन्ना। तिग थेनीगदे इस्राएली हिन्ना? डाएनोन इस्राएली हिन्ना। तिग थेनीगदे अब्राहामला सन्तान हिन्ना? डाएनोन अब्राहामला सन्तान हिन्ना। २३ तिग थेनीगदे ख्रीष्टला गे लबा म्हिगदे हिन्ना? म्योबा म्हिसे हड् लसीन डाइ चु तामगदे पाड्बान मुला। थेनीगदे भन्दा मी डा ज्ञान ज्यना लसी ख्रीष्टला गे लबा म्हि हिन्ना। थेनीगदेसे भन्दा डाइ ल्हानान दुख लसी गे लजी। ओच्छे थेनीगदे भन्दा डा ल्हानान रेम झ्याल्खानरी परब तजी। थेनीगदेदा भन्दा डादा कोर्सेनोन ल्हानान तोजी। ओच्छे गाते रेम मी डा सिला हड्णोन तजी।* २४ डादा यहूदीगदेसे डारेमधोना चुड्सी तोजी। थेनीगदेसे डादा डारेम डारेमधोना बोगल गिकसे च्युक कुरेमधोना कोर्से तोजी।* २५ सोमरेमधोना डादा कडीसे तोजी। तिरैम युड्बासेनोन तोजी। सोमरेमधोना डा क्रेःबा पानी जहाजएनोन न्होड्जी। ओच्छे धिन गिक म्हन गिक डा समुन्द्ररीन चिजी।*

२६ ख्रीष्टला समाचार थेःना लसी भ्रमा डा स्योडरी परब तसी, ओच्छे यहूदीगदेग्याम, हाडलान म्हि यहूदीगदेग्याम, अर्गु यहूलला म्हिगदेग्याम, शहररीनोन, तोडतोडबा ग्लारीक्यार निमाएनोन, समुन्द्रग्याम भ्रमाएनोन, लुसीला ताम पाड्सी भ्रबा आलेगदेग्याम दुख नातोःजी।* २७ डा गाते रेम मी म्हेबारी आम्याड्नी तसैनोन आब्लेना दुख लसी गे लजी, गाते रेम चबा थुड्बा आयाड्ना फोइथाननोन चितोःजी ओच्छे क्वान आरेबासे लमा खड्बा नासीनोन चितोःजी। २८ ओते जे आहिन, मण्डलीगदेला

* ११:९ फिलि ४:१५-१८ † ११:१२ “डन्से लबा हड्बान गे” भिबा चा पावलसे तिगै टाडगा आकिन्ना लबा गे हिन्ना (२ कोर ११:९-९ सहीगो), तर घेन मुल चेला दोबा सहोबागदेसे चा टाडगा किन्सी गे लमुबा। * ११:२३ मुल १६:२३ * ११:२४ व्यव २५:३ * ११:२५ मुल १६:२२; १४:१९ * ११:२६ मुल ९:२३; १४:१५

बारेरीनोन डादा धिन धिननोन सुर्दा तमुबा। ²⁹ खालै म्हि विश्वासरी कमजोर तबा म्राड्जी भिसम डाएनोन कमजोर तबा हड्णोन छोर्मुला, ओच्छे खालै म्हि पापरी फसब तबा म्राड्जी भिसम डादा सेमरी ल्हानान दुख तमुला।

³⁰ चुदे डा ताड्णोन तोःजी भिसम डाला कमजोर तामगदे उन्मा ताड्ला। ³¹ डाइ पाड्बा तामगदे लुसीला ताम आहिन भिबा प्रभु येशूला आबा य्हाडला परमेश्वरदान था मुला। थेदा य्हाडसे सदन जयजयकार लतोःला। ³² दमस्कस भिबा शहररी मुबा धुइरी अरितस भिबा ग्लेला हाकिमसे डादा चुड्बाला लागिरी ग्ला ग्लारी सिपाहीगदे थान्मुबा।* ³³ तर डादा सडुनरी झाड्सी पर्खालला झ्यालग्याम मार पुड्बासे लमा डा थे ग्लेला यारी परब आतनी।

12

पावलसे म्राड्बा म्हाड

¹ तिगै फाइदा आरेसैनोन डा ताड्ला। ओच्छे डादा प्रभुसे उन्बा तामदेन डाइ म्राड्बा म्हाडला बारेरी एनीगदेदा पाड्ला। ² च्युक बलि दिड डाच्छाला ताम हिन्ना, ख्रीष्टदा विश्वास लबा म्हि गिकदा स्वर्गला जम्मान भन्दा घेन ग्लाधोनान भोर्जी। थे म्हिदा डाइ डोसेबा मुला, तर थेदा लहुइरी साँचचिन भोर्बा हिन्ना कि आहिन थे ताम डादा था आरे, परमेश्वरदान था मुला। ³ डाइ दोःसी पाड्ला, स्वर्गधोनान भोर्बा थे म्हिदा डाइ डोसेबा मुला। तर लहुइरीन भोर्बा हिन्ना कि आहिन, थे ताम डादा था आरे, परमेश्वरदान था मुला। ⁴ थेदा स्वर्गरी थीसी भोर्जी, थेरी थेसे म्हिसे पाड्आखम्बा घेन घेन ताम थेःजी, थेहड्बा ताम म्हिदा पाड्आपुड्मुला। ⁵ थेहड्बा म्हिला बारेरी डा ताड्ला, डा हाडलान बारेरी चा आताड्। तर डा चा डाला कमजोर ताम उन्बा धुइरी जे ताड्ला। ⁶ डाइ ताड्सीन भ्रबा सेम लसैनोन डा मूर्ख म्हि चा आदो। तिग्दा भिसम डाइ सत्य ताम पाड्बा मुला। डाइ लबा गे म्राड्बादेन डाला बारेरी थेःबा भन्दा ल्हाना घेन म्हि भिसी खालैसेन थाम्हन्गै भिबा डाला सेम मुला।

⁷ डाइ प्रभुसे उन्बा म्हाड म्राड्जी भिसी घेन दोसी थाभ्रगै भिसी डाला लहुइरी पुजुसे भ्लोबा हड्बान स्हेर पिन्जी। थेसे शैतानना दूतसे हड् लसी डादा धुइ धुइरी ताड्सी थाभ्रगै भिसी दुख पिन्मुला। ⁸ “डादा चु दुखग्याम फेसी पिन्गो” भिसी डाइ प्रभुदा सोमरेमधोना बिन्ती लजी। ⁹ तर प्रभुसे डादा “डाइ एदा ल्हानान दयामाया लबा मुला, ए कमजोर मुबा धुइरी डाला शक्ति एग्याम उन्बा मुला” भिसी सुड्जी। थेतबासेलमा डा कमजोर मुबा धुइरी डा झन ल्हानान ताड्बा मुला। तिग्दा भिसम थे धुइरी परमेश्वरसे ख्रीष्टला शक्ति डाग्याम उन्बा मुला। ¹⁰ थेतबासेलमा ख्रीष्टला लागिरी कमजोर तसैनोन, डादा बेइज्जत लसैनोन, बिरोध लसैनोन, स्य्हान्दोसे दुख पिन्सैनोन, ओच्छे आपत विपत तसैनोन डा ताड्ला। तिग्दा भिसम कमजोर तबा धुइरी डा झन भड्बा तला।

कोरिन्थला म्हिगदेला लागिरी पावलसे सुर्दा लबा

¹¹ डा मूर्ख हड्बा दोबा मुला, डादा मूर्ख हड्बान स्होबा चा एनीगदेन हिन्ना। एनीगदेसे डाला बारेरी ज्यबा ताम लतोःमुबा। पाड्णोन तोःमा डा तिगैनोन आहिन, तर थे जम्मान भन्दा घेन मुल चेला दोबा स्होबा म्हिगदे भन्दा डा जजा आहिन। ¹² डाइ एनीगदेला गुडरी जम्मान दुख नाबान शक्तिशाली चिनुगदेदेन उदेकला गेगदे लसी डा पक्कान मुल चेला हिन्ना भिसी एनीगदेदा उन्बा मुला। ¹³ खजिबा तामला बारेरी एनीगदे अर्गु मण्डलीगदे भन्दा जजा तजी? चु ताम जे हिन्ना, डाइ अर्गु मण्डलीगदेरी लबा गे गिक चा एनीगदेला लागिरी आलनी। थे गे चा तिग हिन्ना भिसम डाइ एनीगदेग्याम टाडगा आकिन्नी। चु डाला गल्ती हिन्ना, चुला लागिरी डादा माफ लउ।

¹⁴ डा दोःसीनोन एनीगदे मुबा ग्लारी खबारी छ्याइबा मुला। दान्दे खमा डा एनीगदे मुबा ग्लारी खबा सोमरेम तला। तर एनीगदेसे डाला लागिरी तिगै खर्च लआतोः। डाइ एनीगदेला सम्पत्ति म्हाइबा आहिन, डाइ मी एनीगदेदा चा म्हाइबा हिन्ना। तिग्दा भिसम आबा आमामसे कोलागदेग्याम आकिन, तर आबा आमामसे चा कोलागदेला लागिरी सोसी थान्ना। ¹⁵ डादेन छ्याम मुबा जम्मान स्हेगदे डाइ

* 11:32 मुल ९:२३-२५ † 12:2 चुरी चा पावलसे “थे म्हि” भिसी हाडसे हाडदान पाड्बा हिन्ना।

एनीगदेदा ताड्सी ताड्सी पिन्ना। ओचछे एनीगदेला लागिरी डा सिबारीनोन तयार मुला। डाइ एनीगदेदा सेमहेन्सेन ल्हानान माया लबा मुला भिसम तिग्दा एनीगदेसे चा डादा जजाकर जे माया लबा?

16 एनीगदेसे डाला लागिरी तिगै खर्च लआतो:नी, चु ताम एनीगदेदान था मुला। तर डा बाठो तसी डाइ एनीगदेदा फसब लजी भिसी खालैसे पाड्मुला। 17 तिग डाइ पुइखबा म्हिगदेग्याम एनीगदेदा फसब लसी डाइ तिगै सहे किन्बा मुला? 18 डाइ तीतसदा एनीगदे मुबा ग्लारी निउ भिसी पुइखजी, ओचछे थेदेन छ्याम डाइ स्य्हान्दो आलेदाएनोन पुइखबा मुबा। तीतससेनोन एनीगदेग्याम तिगै सहे आकिन्नी। थेदेन डा सेम गिक तसी गे गिकनोन लबा मुला।

19 चु जम्मान ताम डन्से हाडदान जोगब लबाला लागिरी पाड्बा हिन्ना भिसी एनीगदेसे म्हन्मुला तला। चु जम्मान ताम परमेश्वरला डाच्छा खीष्टदेन छ्याम गिक तसी डन्से पाड्बान मुला। डन्ना सेम निबा होगदे, डन्से चु जम्मान गे लबा चा एनीगदेदा विश्वासरी कोड्बा सहोबाला लागिरीन हिन्ना। 20 तिग्दा भिसम डा थेरी खबा धुइरी डाइ म्हन्बा अन्छार एनीगदेदा आस्याप, ओचछे एनीगदेसेनोन हाडसे म्हन्बा अन्छार डादा आस्याप वा भिसी डा लोड्बा मुला। एनीगदे हाड हाड न्हडरी छेबा बड्बा लबा, डाह लबा, बमो लबा, हाडला जे फाइदा च्याबा, स्य्हान्दोदा बड्बा, महिला तामगन लबा, हाडसे हाडदान डा हड्बा खालै आरे भिसी म्हन्बागदे ओचछे अलमल तना लबा म्हिगदे स्याप्ला वा भिसी डा लोड्बा मुला। 21 डा एनीगदे मुबा ग्लारी दो:सी खमा डादा डाला परमेश्वरसे एनीगदेला डाच्छा जजा सहोला भिसी डा लोड्बा मुला। ओचछे डाइ ल्हानान म्हिगदेला लागिरी सुर्दा लतो:ला। तिग्दा भिसम डाच्छा नड्बा गे लबादेन स्य्हान्दोदेन छ्याम ब्रेल्सी भ्रबा ओचछे सेमरी जे लइ म्हन्बा थेनोन लसी पाप लबा म्हिगदेसे हाडला पाप ख्लासी परमेश्वरपट्टि दो:बा आरे तला।

13

पावलसे अझ होशियार तना लबा

1 डा दो:सीनोन एनीगदे मुबा ग्लारी खला, दान्दे खमा सोमरेम तला। बचनरी चुहड् भिसी भिबा ताम ढन्गो, “खालै म्हिदा सजाय पिन्बाला लागिरी थेसे लबा गे म्राड्बा म्हि न्ही सोमसे पाड्बाग्यामसेन सजाय पिन्तो:बा कि पिन्आतो:बा भिसी था याड्ला।”* 2 न्हीरेमला पालरी डा एनीगदेदेन छ्याम मुबा धुइरी डाइ एनीगदेदा होशियार तना लबा मुबा। दान्दे डा एनीगदेदेन छ्याम आरेबा धुइरीनोन डाइ एनीगदेदा होशियार तना लबान मुला। डा दो:सी एनीगदे मुबा ग्लारी खमा डाच्छा डाच्छा पाप लबागदेदेन स्य्हान्दोगदे खालैदान डाइ आख्ला। 3 थे धुइरी खीष्ट डादेन छ्याम गिक तसी डाग्याम ताम पाड्बा चीम कि आपाड्बा चीम भिसी एनीगदेसे च्याबारी म्हाइबा ताम था याड्ला। एनीगदेला गुडरी गे लमा खीष्ट खाइमै कमजोर आत, तर शक्तिशाली तला। 4 तिग्दा भिसम खीष्ट कमजोर तसी क्रुसरी सिजी। तर परमेश्वरला शक्तिसे थेदा सोना लजी। थेहड् लसीन डनीएनोन खीष्ट हड्दोन कमजोर तबा मुला। तर एनीगदेला गुडरी गे लबाला लागिरी परमेश्वरसेन हाडला शक्तिग्याम डन्दा खीष्टदेन छ्याम सोना लला।

5 एनीगदेसे पक्का विश्वास लबा मुला कि आरे भिसी हाडसे हाडदान च्यागो। चुहड् लसी च्यामा येशू खीष्ट एनीगदेदेन छ्याम आस्यापनी भिसम एनीगदेसे पक्का विश्वास लबा आरेबा चीम भिसी था याड्ला। 6 ओचछे डन्से पक्का विश्वास लबा मुला भिबा तामएनोन एनीगदेसे था याड्ला भिसी डाइ आश लबा मुला। 7 एनीगदेसे आज्यबा गे थालगै भिसी डन्से परमेश्वरदेन छ्याम प्रार्थना लबान मुला। डनी चा ज्यबा म्हि हिन्ना भिसी उन्बाला लागिरी डन्से चुहड् लसी प्रार्थना लबा आहिन। तर एनीगदेसे डनी पक्का मुल चेला आहिन भिसी म्हन्सैनोन एनीगदेसे चा ठीक ठीक गे जे लखमगै भिसी डन्से प्रार्थना लबा हिन्ना। 8 तिग्दा भिसम डनी सत्य तामला बिरोध लसी गे आल, तर सत्य तामला लागिरी जे गे लला। 9 डनी कमजोर तसैनोन एनीगदे चा भड्बा तजी भिसम डनी ताड्ला। ओचछे एनीगदे झन विश्वासरी पूरान पाको म्हि दोगै भिसी डन्से प्रार्थना लबा मुला। 10 डा एनीगदे मुबा ग्लारी खमा प्रभुसे डादा पिन्बा अधिकारग्याम डाइ एनीगदेदा बड्आतो:गै भिसीन डा एनीगदेदेन

* 13:1 वयव १९:१५

छ्याम आरेबा धुइरी चु चिठी भिबान मुला। एनीगदेदा न्होङ्ना लबाला लागिरी आहिन, तर एनीगदेदा विश्वासरी कोङ्बा सहोबाला लागिरीन थे अधिकार प्रभुसे डादा पिन्बा हिन्ना।

चिठीला थुमरी पाङ्बा ताम

¹¹ ज्योज्यो आले नाना आडागदे, दाहेन्से डादा विदा पिन्गो। एनीगदे सेमहेन्सेन ज्यबा म्हि दोबारी म्हाइगो, ओच्छे गिकसेम गिकदा आँट पिन्सी ह्वाड ह्वाड न्हडरी ठिक्सी चिउ भिबा डाला बिन्ती मुला। जमाहेन्से शान्तिदेन माया पिन्बा परमेश्वर एनीगदेदेन छ्याम धन्छ्याला। ¹² ओच्छे गिकसेम गिकदा सेमहेन्सेन माया लसी फ्याफुल्गो। ¹³⁻¹⁴ परमेश्वरला चुरी मुबा जम्मान म्हिगदेसे एनीगदेदा फ्याफुल्बा मुला। प्रभु येशू ख्रीष्टला दयामायादेन परमेश्वरला माया ओच्छे परमेश्वरला आत्माला संगती एनीगदे जम्मानदेन छ्याम तगै।

पावलसे गलातीयाला विश्वासीगदेदा भिबा चिठी चु चिठीला बारेरी पाड्तोःमा

भिबा म्हि: येशूला मुल चेला पावलसे भिबा मुबा (गलाती १:१)।

भिबा ग्ला: एन्टिओखिया शहररी भिबा मुबा।

भिबा साल: ओस्पन ईश्वी संवत् ४८-५७ (विक्रम संवत् १०५-११४) सालला गुडरी भिबा मुबा।

खाल्दा भिबा: गलातीया अञ्चलला ग्ला ग्लारी मुबा मण्डलीगदेदा भिबा मुबा (गलाती १:२)।

येशूला बारेरी थार्बा पिन्बा समाचार थेंना लबारी छ्याइमाहेन्से अर्गु य्हुलला म्हिगदेसे येशूदा विश्वास लजी। ओच्छे ख्रीष्टदा पक्का विश्वास लबा म्हि दोबारी परमेश्वरसे मोशादा पिन्बा ठिम अन्छार भ्रतोःला कि भ्रआतोः भिबा तामगदे थोन्जी। पावलसे मोशादा पिन्बा ठिम अन्छार भ्रआतोः भिसी पाड्जी, तिग्दा भिसम ख्रीष्टसे पिन्बा जुकजुकधोनाला जुनीला मुल जग चा विश्वास हिन्ना। विश्वासग्यामसेन जम्मान म्हिगदे परमेश्वरदा सेम निबा म्हि दोला। तर एशियारी परब तबा रोम य्हुल्साला गलातीया अञ्चलरी मुबा मण्डलीगदेरी कोइ कोइ म्हिगदे खबा मुबा। पावलसे लोपबा ताम थाबान थेंनीगदेसे मोशादा पिन्बा ठिम अन्छार आभ्रनी भिसम खालैनोन परमेश्वरदा सेम निबा म्हि दोबारी आखम भिसी पाड्जी।

पावलसे लुसीला तामरी विश्वास लबा गलातीयाला म्हिगदेदा सत्य विश्वासरी दोःसी भबाला लागिरी चु चिठी भिबा मुबा। पावलसे हाड ख्रीष्टला मुल चेला हिन्ना भिबा ताम उन्बाला लागिरी ओच्छे मुल चेलागदेला अधिकारला बारेरी ज्यना लसी घोना लबाला लागिरी चु चिठी भिबा हिन्ना। ओच्छे पावलसे हाडदा म्हिसे मुल चेला सहोबा आहिन, तर परमेश्वरसेन मुल चेला सहोबा हिन्ना भिसी पाड्बा मुला। ओच्छे हाडसे थेंना लबा थार्बा पिन्बा समाचार चा अर्गु य्हुलला म्हिगदेला लागिरी हिन्ना भिसी पाड्बा मुला। थेंहड लसीन विश्वासग्यामसे जे म्हि य्हुल परमेश्वरदा सेम निबा म्हि दोला भिसी पाड्बा मुला। पावलसे लिच्छापट्टिला अध्यायगदेरी चा य्हाडसे स्य्हान्दोगदेदा माया लजी भिसम विश्वास लबा अन्छारला बानीबेहोर म्राड्ला, ओच्छे ख्रीष्टदा विश्वास लमाहेन्से स्य्हान्दोदा माया लबारी खम्ला भिसी पाड्बा मुला।

मुल तामगदे

फ्याफुल्बादेन थार्बा पिन्बा समाचार गिक जे मुला १:१-१०

पावलदा परमेश्वरसेन मुल चेला सहोबा १:११-२:२१

परमेश्वरला दयामायाला समाचार ३:१-४:३१

ख्रीष्टसे पापला तहग्याम फेबादेन ख्रीष्टदा विश्वास लबागदेला बानीबेहोर ५:१-६:१०

चिठीला थुमरी भिबा ताम ६:११-१८

पावलसे गलातीयाला विश्वासीगदेदा भिबा चिठी

¹ लाससो डा पावल खालै म्हिगदेसे धम्सी ओच्छे खालैसे सहोसी मुल चेला दोबा आहिन। तर येशू ख्रीष्टदा सिबाग्याम सोना लबा परमेश्वर आबादेन येशू ख्रीष्टसे डादा मुल चेला सहोबा हिन्ना। ² चुरी डादेन छ्याम मुबा जम्मान ज्योज्यो आलेगदेदेन डाग्याम गलातिया अञ्चलरी मुबा मण्डलीगदेदा फ्याफुल्ला!

³ एनीगदेदा परमेश्वर आबादेन य्हाडला प्रभु येशू ख्रीष्टग्याम दयामायादेन शान्ति तगै। ⁴ य्हाडदा चु जम्बुलिडला आज्यबा बानीबेहोरग्याम फेबारी परमेश्वर आबासे म्हनबा अन्छार प्रभु येशू ख्रीष्ट य्हाडला पापला लागिरी सिजी। ⁵ थेतबासेलमा परमेश्वरदा सदन मानदेन जयजयकार तगै। आमेन।

थार्बा पिन्बा समाचार चु भन्दा अर्गु आरे

6 एनीगदे म्राड्सी डा उदेक तबा मुला, तिग्दा भिसम ख्रीष्टला दयामायाग्याम एनीगदेदा ड्योइबा परमेश्वरदा एनीगदेसे चुदे योनान म्लेःसी अर्गु समाचार ड्यान्सी भ्रमुला। 7 च्यागो, थार्बा पिन्बा समाचार चा चु भन्दा अर्गु आरे। तर कोइ कोइ म्हिसे चा एनीगदेदा अलमल तना लसी ख्रीष्टला समाचारदा न्होइना लबारी म्हाइबा मुला। 8 ओच्छे डन्से एनीगदेदा थेःना लबा थार्बा पिन्बा समाचारदा उल्टो सहोसी लोपबागदे चा, डनी तसै स्वर्गदूतनोन तसै थे नाश तगै। 9 एनीगदेसे विश्वास लबा थार्बा पिन्बा समाचारदा उल्टो सहोसी पाड्बा म्हि चा नाशनोन तला। दान्दे डाइ पाड्बा चु ताम एनीगदेदा डाइ डाच्छाएनोन पाड्बा मुला। 10 तिग चुहड् लसी डाइ म्हिदा ताड्ना लबारी म्हाइबा हिनना? डाइ मी परमेश्वरदा ताड्ना लबारी म्हाइबा हिनना। तिग डादा म्हिगदेसे मान लगै भिसी डाइ म्हन्बा हिनना? चुदे डाइ चुहड् म्हन्बा हिनसम, डा ख्रीष्टला गे लबा म्हिनोन आहिन।

परमेश्वरसे पावलदा धम्बा

11 ज्योज्यो आले नाना आडागदे, डाइ एनीगदेदा थेःना लबा थार्बा पिन्बा समाचार म्हिगदेसे सहोसी पाड्बा ताम आहिन भिबा एनीगदेसे था याड्गै भिसी डाइ म्हन्बा मुला। 12 तिग्दा भिसम डादा चु खालै म्हिसे उन्बाएनोन आहिन, खालै म्हिसे पिन्बाएनोन आहिन। तर येशू ख्रीष्ट हाडसेन डादा चु उन्बा हिनना।

13 डाच्छा यहूदी धर्म तेन्बा धुइरी डाला बानीबेहोर खाहड्बा मुबा भिसी एनीगदेदा थानोन मुला। थे धुइरी डाइ परमेश्वरला मण्डलीदा ल्हानान दुख पिन्सी थेदा नाश लबारी म्हाइजी।* 14 थे धुइरी यहूदी धर्म तेन्बा डा च्योच्योला म्हिगदे न्हडरी जम्मान भन्दा सेवा घोबा डानोन मुबा। डाइ आखे म्हमेला रिमठिम ल्हानान तेन्मुबा।* 15 तर डा न्हबा भन्दा डाच्छान डादा दयामाया लसी धम्बा परमेश्वरसेन, 16 डाइ अर्गु यहूलला म्हिगदेदा थार्बा पिन्बा समाचार थेःना लबारी खमगै भिसी थेदा हाडलान झा डादा डोसेना लबा ज्यबा छोर्जी। थे धुइरी डाइ खालै म्हिदेन छ्याम ड्योइबा छार्बा लसी आभ्रनी।* 17 ओच्छे डा यरूशलेम शहररी डा भन्दा डाच्छाला मुल चेलागदेदा हुप तबारीनोन आनिनी, बरु तुरुन्तन अरब यहूलसारी निजी। जमाहेन्से दमस्कस भिबा ग्लारीन दोःसी खजी।

18 ओच्छे डा सोम दिड लिच्छा जे यरूशलेमरी पत्रुसदा हुप तबारी निजी। थेरी डा थेदेन छ्याम साता न्हीधोना चिजी।* 19 डाइ थेरी प्रभुला आले याकूबदा बाहेक स्य्हान्दो खालै मुल चेलागदेदा आस्यापनी। 20 डाइ एनीगदेदा भिबा चु ताम सत्य हिनना, डाइ लुसीला ताम पाड्बा आरे भिबा परमेश्वरदान था मुला। 21 जमाहेन्से डा सिरियादेन किलिकिया भिबा ग्लारी निजी। 22 थे धुइधोना ख्रीष्टदा विश्वास लबा यहूदिया अत्रचलरी मुबा म्हिगदेसे डादा डोआसेबा, 23 “डाच्छा य्हाडदा ल्हानान दुख पिन्सी य्हाडसे लबा विश्वासदा नाश लबारी म्हाइबा म्हि हाडसेन दान्दे थेनोन विश्वासला बारेरी पाड्सी भ्रमुला” भिबा ताम जे थेनीगदेसे थेःबा मुबा। 24 डाइ थेहड्बा गे ख्लासी परमेश्वरदा विश्वास लबासे लमा थेनीगदेसे परमेश्वरला जयजयकार लजी।

2

पावलदेन मुल चेलागदे

1 च्युक बलि दिड लिच्छा दोःसी डा बारनाबासदेन छ्याम तीतसदा भोर्सी यरूशलेम शहररी निजी।* 2 डादा परमेश्वरसे उन्बा अन्छार डा थेरी निजी। ओच्छे डाइ लबा गे खेरो थानिगै भिसी डाइ अर्गु यहूलला म्हिगदेदा थेःना लबा थार्बा पिन्बा समाचारनोन थेला सेवा घोबा मण्डलीदा च्याबा म्हिगदेदा कुनी गिकरी भोर्सी पाड्जी। 3 तर डादेन छ्याम निबा तीतसदा ग्रीक यहूलला म्हि तसैनोन खतना लतोःला भिसी खालैसेन आपाड्नी। 4 तसैनोन लुसीला ताम लोपबा गाते ज्योज्यो आलेगदे मण्डलीरी खसी खतना लतोःला भिसी डनी ख्रीष्ट येशूदेन छ्याम गिक तबासे लमा ठिमला तहग्याम फेबा तामला

* 1:13 मुल ८:३; २२:४-५; २६:९-११ * 1:14 मुल २२:३ * 1:16 मुल ९:३-६; २२:६-१०; २६:१३-१८ * 1:18 मुल ९:२६-३०

* 2:1 मुल ११:३०; १५:२

चिवा लजी। ओच्छे डाच्छाला ठिमला तहरी थान्बारी म्हाइजी। ⁵ तर थार्बा पिन्बा समाचारला सत्य ताम एनीगदेसे थाम्लेःगै भिसी डन्से थेनीगदेला तामदा वास्तान आलनी।

⁶ थेनीगदे सेबा घोबा मण्डलीदा च्याबा म्हिगदे तसैनोन डाइ पाड्बा तामदा आहिन भिसी आपाड्नी। ओच्छे थेनीगदे सेबा घोबान मुसैनोन डादेन थेनीगदे न्हडरी तिगै फरक आरे। तिग्दा भिसम परमेश्वरसे खालैला ली च्यासी गे आलमुला।* ⁷ तर परमेश्वरसे यहूदीगदेला गुडरी पत्रुसदा थार्बा पिन्बा समाचार थेःना लबा गे जिम्मा पिन्बा हड् लसी डादाएनोन परमेश्वरसे अर्गु यहूलला म्हिगदेला गुडरी थार्बा पिन्बा समाचार थेःना लबा गे जिम्मा पिन्जी भिबा ताम थेनीगदेसे था याड्जी। ⁸ खाहड् लसी परमेश्वरसे मुल चेला पत्रुसग्याम यहूदीगदेला गुडरी गे लजी थेहड् लसीन डाग्यामसेनोन परमेश्वरसे अर्गु यहूलला म्हिगदेला गुडरी गे लजी। ⁹ मण्डलीला मण्डलीदा च्याबा म्हिगदे याकूब, पत्रुसदेन यूहन्नासे डाथोरी परमेश्वरला दयामाया मुला भिसी था याड्जी। थेतबासेलमा थेनीगदेसे बारनाबासदेन डादा मान लसी संगती लबारी जिम्मा पिन्जी। जमाहेन्से डनी चा अर्गु यहूलला म्हिगदेला गुडरी गे लबा थेनीगदे चा यहूदीगदेला गुडरी गे लबा तामरी पक्का लजी। ¹⁰ खाँचोरी परब तबा प्राडबोगदेदा ह्यो लतोःला भिबा ताम चा थेनीगदेसेनोन लजी। चु गे चा डादाएनोन लबा सेम मुबा।

पावलसे पत्रुसला गल्ती उन्बा

¹¹ तर पत्रुस एन्टिओखिया भिबा ग्लारी धोखमाहेन्से डाइ थेदा जम्मालान डाच्छा बिरोध लजी। तिग्दा भिसम थेसे लबा गे गल्ती मुबा। ¹² थे याकूबसे पुइखबा म्हिगदे धोखबा भन्दा डाच्छा चा अर्गु यहूलला म्हिगदेदेन छ्यामनोन चिसी चबा थुड्बा लमुबा। तर याकूबसे पुइखबा म्हिगदे धोखमाहेन्से अर्गु यहूलला म्हिगदेदेन छ्याम आचिनी। तिग्दा भिसम खतना लबा म्हिगदे प्राड्सी थे लोड्मुबा। ¹³ जमाहेन्से अर्गु यहूदीगदेसेनोन थेसे हड् नोन लजी। थेनीगदेला चुहड्बा बानीबेहोर प्राड्सी बारनाबासएनोन थेनीगदे हड्बान दोबारी म्हाइजी। ¹⁴ तर डाइ थेनीगदेदा थार्बा पिन्बा समाचार अनछार सत्यरी भ्रवा आम्राड्नी। थेतबासेलमा थेनीगदे जम्मालान डाच्छा डाइ पत्रुसदा “हाड यहूदी तसीनोन अर्गु यहूलला म्हिगदे हड् लसी भ्रमुला भिसम खाहड् लसी अर्गु यहूलला म्हिगदेदा चा यहूदी हड् लसी भ्रउ भिसी पाड्खम्ला” भिसी पाड्जी।

¹⁵ हिन्बाम यह्हाड अर्गु यहूलला पापी म्हिगदे हड्बा आतना न्हमान यहूदी हिन्ना। ¹⁶ यह्हाड यहूदीगदेएनोन परमेश्वरदा सेम निबा म्हि दोबा यह्हाडला ठिम अनछार गे लसी आहिन। तर येशू ख्रीष्टदा विश्वास लबासे लमान परमेश्वरदा सेम निबा म्हि दोबा हिन्ना भिबा ताम यह्हाडदा था मुला। यह्हाडसेनोन परमेश्वरदा सेम निबा म्हि दोबाला लागिरी येशू ख्रीष्टदा विश्वास लजी। तिग्दा भिसम ठिम अनछार गे लबासे लमा आहिन, तर ख्रीष्टदा लबा विश्वासग्याम परमेश्वरदा सेम निबा म्हि दोखमगै भिसी हिन्ना। थेतबासेलमा ठिम अनछार गे लसी खालैनोन परमेश्वरदा सेम निबा म्हि दोबारी आखम।* ¹⁷ चुदे यह्हाड ख्रीष्टदेन छ्याम गिक तसी परमेश्वरदा सेम निबा म्हि दोबारी म्हाइमा खालैसे यह्हाडदाएनोन पापीन पाड्जी भिसम तिग ख्रीष्टसे यह्हाडदा पाप लपुड्बा हिन्ना? पक्कान आहिन। ¹⁸ तिग्दा भिसम हाडसेन फुप्बा सहे दोःसी हाडसेन सहोजी भिसम हाडसे हाडदान अपराधी सहोबा हिन्ना। ¹⁹ थेतबासेलमा परमेश्वरला लागिरी सोखमगै भिसी परमेश्वरसे मोशादा पिन्बा ठिमग्याम ठिमला लागिरी डा सिबा मुला। ²⁰ डादा ख्रीष्टदेन छ्यामनोन कूसरी साइबा मुला। थेतबासेलमा दाहेन्से सोबा डा आहिन, ख्रीष्ट डादेन छ्याम तसी सोबा मुला। दान्दे सोबा चु लहुइ चा परमेश्वरला झादा विश्वास लसी सोबा हिन्ना। थेसे डादा माया लसी हाडला ज्याननोन डाला लागिरी पिन्जी। ²¹ डाइ परमेश्वरला दयामायादा हेला लबारी आखम। तिग्दा भिसम परमेश्वरसे मोशादा पिन्बा ठिमग्याम म्हि परमेश्वरदा सेम निबा दोबारी खम्बा हिन्सम ख्रीष्ट सिबा चा तिगै गे आतनी।

3

विश्वासग्याम याड्बा मोलम

* 2:6 व्यव १०:१७ * 2:16 भजन १४३:२; रोमी ३:२०, २२

1 गलातियारी मुबा मूर्ख म्हिगदे, एनीगदेदा खाल्से मोहनी लजी? येशू ख्रीष्ट क्रुसरी सिजी भिबा ताम एनीगदेदान ओन्छाडरी घोना लसी पाड्ना पाड्नान खाहड्बा आघोबा? 2 थेहड् लसी एनीगदेसे याड्बा परमेश्वरला आत्मा परमेश्वरसे मोशादा पिन्बा ठिम अन्छार गे लसी याड्बा कि थार्बा पिन्बा समाचार थे:सी विश्वास लबासे लमा याड्बा हिन्ना? डादा पाड्गो। 3 एनीगदे खाहड्बा मूर्ख, परमेश्वरला आत्माग्याम शुरु तसी दान्दे गेग्याम पूरा तबारी म्हाड्बा? 4 तिग एनीगदेसे नाबा दुख खेरो निबा हिन्ना? पक्कान आहिन। 5 थेतबासेलमा परमेश्वरसे एनीगदेदा ह्वाडला आत्मा पिन्बा मुला, ओच्छे एनीगदेला गुडरी उदेकला गेगदे लबा मुला। तिग चु जम्मान परमेश्वरसे मोशादा पिन्बा ठिम अन्छार एनीगदेसे गे लबासे लमा तबा हिन्ना, कि थार्बा पिन्बा समाचार थे:सी विश्वास लबासे लमा तबा हिन्ना?

6 अब्राहामला विश्वासदा च्यागो, “थेसे परमेश्वरदा विश्वास लबा मुबा। ओच्छे परमेश्वरसे थेदा सेम निबा म्हि हिन्ना भिसी सुड्जी।” * 7 थेतबासेलमा जुन जुन म्हिसे परमेश्वरदा विश्वास लला, थेनीगदेन अब्राहामला सन्तान हिन्ना भिसी एनीगदेसे घोड। * 8 डाच्छान परमेश्वरला बचनरी अर्गु यहुलला म्हिगदेएनोन विश्वासग्यामसेन परमेश्वरदा सेम निबा म्हि दोला भिसी भिबा मुबा। थेतबासेलमा दडबोरीन परमेश्वरसे अब्राहामदा “एग्यामसे जम्मान यहुलला म्हिगदेसे मोलम याड्ला” भिसी ज्यबा समाचार थे:ना लबा मुबा। * 9 थेतबासेलमा ख्रीष्टदा विश्वास लबागदेसे विश्वास लबा अब्राहामसे हड् लसीन मोलम याड्बा मुला।

10 तर परमेश्वरसे मोशादा पिन्बा ठिमथोरी जे भर लसी चिबागदेसे सजाय याड्ला। तिग्दा भिसम परमेश्वरला बचनरी “परमेश्वरसे मोशादा पिन्बा ठिमरी मुबा जम्मान ताम आड्यान्बा म्हिगदेसे सजाय याड्ला” भिसी भिबा मुला। * 11 थेतबासेलमा परमेश्वरसे मोशादा पिन्बा ठिमथोरी जे भर लबा म्हि चा खालैनोन परमेश्वरदा सेम निबा म्हि दोबारी आखम भिबा ताम प्रस्टन मुला। तिग्दा भिसम “विश्वासग्यामसे जे परमेश्वरदा सेम निबा म्हि दोसी सोखम्ला” भिसी बचनरी भिबा मुला। * 12 तर विश्वासग्याम लबा गे परमेश्वरसे मोशादा पिन्बा ठिमसे लबारी आखम। बरु परमेश्वरला बचनरी चुहड् भिसी भिबा मुला, “जुन म्हिसे थे ठिम अन्छार गे लला, थे, थे ठिम अन्छारनोन भ्रला।” * 13 परमेश्वरसे मोशादा पिन्बा ठिम अन्छार य्हाडसे याड्तो:बा सजाय ख्रीष्टसेन नाजी, ओच्छे सय फासी य्हाडदा थे सजायग्याम फेजी। तिग्दा भिसम “परमेश्वरग्याम सजाय याड्बादा जे क्रुसरी च्योसी साड्ला” भिसी परमेश्वरला बचनरी भिबा मुला। * 14 थेतबासेलमा अब्राहामसे याड्बा परमेश्वरला मोलम अर्गु यहुलला म्हिगदेसेनोन याड्गै भिसी ख्रीष्ट येशूसे पापला सय फासी य्हाडदा पापग्याम फेजी। ओच्छे परमेश्वरसे ह्वाडला आत्मा पिन्ना भिसी लबा कबुल य्हाडसे विश्वासग्याम याड्ला।

परमेश्वरसे लबा कबुल

15 च्यागो ज्योज्यो आले नाना आडागदे, डाइ एनीगदेदा म्हि न्हीला गुडरी लबा कबुलला बाररी पाड्ला, थेन्नीसे कबुल लसी कागजरी सही छाप लमाहेनसे थेरी भिबा ताम लिच्छा घटबट लबारी आखम, आहिन भिबारी आखम। 16 परमेश्वरसे अब्राहामदा सन्तान पिन्ना भिसी कबुल लबा मुबा। थेदा लहानान सन्तान पिन्ना भिसी आहिन, तर गिक जे पिन्ना भिसी कबुल लबा मुबा। थे सन्तान गिक भिबा चा ख्रीष्टनोन हिन्ना। * 17 डाइ पाड्बा ताम चा चुनोन हिन्ना, परमेश्वरसे डाच्छान लबा कबुलदा ग्यार्जा ब्लिसे बोगल गिकसे च्युइ दिड लिच्छा मोशादा पिन्बा ठिमसे थाबारी आखम, थेहड् लसी थाबारी खम्बा हिन्सम परमेश्वरसे लबा कबुल भ्याड्सेला मुबा। * 18 चुदे मोशादा पिन्बा ठिम तेन्सी य्हाडसे परमेश्वरला सन्तान दोबा हक याड्बा हिन्सम, थे हक परमेश्वरसे लबा कबुलग्याम याड्बा आतसेला मुबा। तर परमेश्वरसे लबा कबुल अन्छार थे हक अब्राहामदा पिन्सी जिन्बा मुबा। * 19 थेहड् भिसम दाहेनसे परमेश्वरसे मोशादा पिन्बा ठिम तिग्दा तो:जी? तिग्दा भिसम म्हिगदेसे लबा

* 3:6 उत्प १५:६; रोमी ४:३ * 3:7 रोमी ४:१६ * 3:8 उत्प १२:३ * 3:10 व्यव २७:२६ * 3:11 हब २:४ * 3:12 लेवी १८:५ * 3:13 व्यव २१:२३ * 3:16 उत्प १२:७ * 3:17 प्रस्था १२:४० * 3:18 रोमी ४:१४

पाप गेगदे उन्बाला लागिरी ओच्छे परमेश्वरसे अब्राहामदा सन्तान पिन्ना भिसी लबा कबुल पूरा आततेधोनाला लागिरी जे हिन्ना। चु ठिम म्हिगदेदा परमेश्वरदेन छ्याम ढिकना लबाला लागिरी स्वर्गदूतगदेग्याम म्हि गिकसे सहोबा हिन्ना। 20 परमेश्वर गिक जे मुबासे लमा गिकला लागिरी अर्गु ढिकना लबा म्हि खालै आतोः।

परमेश्वरसे मोशादा पिन्बा ठिमला गे

21 थेहड् भिसम परमेश्वरला ठिम तिग परमेश्वरसे लबा कबुलला बिरोधरी मुला? आरे। चुदे म्हिगदेसे थाबा याङ्गै भिसी थे ठिम पिन्बा हिन्सम ठिमग्यामसेन म्हिगदे परमेश्वरदा सेम निबा म्हि दोसेला मुबा। 22 तर परमेश्वरला बचनसे चुहड् भिसी पाङ्बा मुला, जम्बुलिडला जम्मान म्हि पापला तहरी मुला। थेतबासेलमा जुन म्हिसे येशू ख्रीष्टदा विश्वास लला, थेसे परमेश्वरसे पिन्ना भिसी लबा कबुल विश्वासग्यामसेन याङ्गला।

23 तर ख्रीष्टदा विश्वास लबा धुइ खबा भन्दा डाच्छा यहाड मोशादा पिन्बा ठिमला तहरी मुबा, ओच्छे विश्वास आलतेधोना यहाडदा थे ठिमसेन खीसी थान्बा मुबा। 24 विश्वासग्यामसेन परमेश्वरदा सेम निबा म्हि दोगै भिसी मोशादा पिन्बा ठिमसे यहाडदा लोपबान ख्रीष्ट मुबा ग्लाधोना निबा ग्याम उन्बा जिम्मा पिन्बा मुबा। 25 तर विश्वास खसी जिन्बासे लमा दाहेन्से यहाड मोशादा पिन्बा ठिमला तहरी चिआतोः।

26 तिग्दा भिसम ख्रीष्ट येशूदा लबा विश्वासग्यामसेन एनीगदे जम्मान परमेश्वरला सन्तान दोबा हिन्ना। 27 थेहड् लसीन एनीगदे न्हडला जुन म्हि ख्रीष्टदेन छ्याम गिक तसी बपत्तिस्मा किन्बा मुला, थेनीगदे जम्मान ख्रीष्ट हड्बान दोबा मुला। 28 थेतबासेलमा यहूदी तसै, ग्रीक तसै, नोकर तसै, नोकर आहिन्सै, हेम्फेबे तसै, म्रिडम्हेमे तसै ख्रीष्ट येशूदेन छ्याम एनीगदे जम्मान गिकनोन हिन्ना। 29 एनीगदे ख्रीष्टला हिन्सम अब्राहामला सन्तान हिन्ना, ओच्छे परमेश्वरसे पिन्ना भिसी कबुल लबा सम्पत्तिला हकएनोन याङ्गला मुला।*

4

1 डाइ पाङ्बा चा चुनोन हिन्ना, खालै म्हिसे हाडला आबा आमाला जम्मान धन सम्पत्ति याङ्गला हक मुसैनोन जजा मुतेधोना थे नोकर हड्बान हिन्ना। 2 ओच्छे थे घेन आततेधोना आबासे च्याबारी जिम्मा पिन्बा महिला तहरी चिसी पाङ्बा ताम ड्यान्तोःमुला। 3 ख्रीष्ट फेपखबा भन्दा डाच्छा यहाड जम्मान थेहड्बान मुबा। ओच्छे जम्मान म्हिगदे कोलागदे हड्बान मुबा। थे धुइरी जम्मान म्हिगदे जम्बुलिडरी मुबा आत्माला शक्तिगदेला तहरी मुबा। 4 तर धुइ ठीक तमाहेन्से परमेश्वरसे हाडलान झादा पुइखजी। थे म्रिडम्हेमेला कोखग्याम न्हसी यहूदी ठिमला तहरी धन्छ्याजी। 5 यहाडदा ठिमला तहग्याम सय फासी फेबाला लागिरी ओच्छे हाडलान कोलागदे सहोबाला लागिरी परमेश्वरसे थेदा पुइखबा हिन्ना। 6 दाहेन्से यहाड परमेश्वरला सन्तान दोबा मुला। थेतबासेलमा परमेश्वरसे हाडलान झाला आत्मा यहाडला सेमरी पुइखबा मुला। थेनोन आत्मासे यहाडदा सेमहेन्सेन “परमेश्वर आबा” भिसी पाङ्पुङ्मुला। 7 थेतबासेलमा परमेश्वरसे एनीगदेदा नोकर आहिन, तर हाडलान कोलागदे सहोबा मुला। ओच्छे एनीगदेसे याङ्गतोःबा हकएनोन याङ्गला मुला।

पावलसे गालीलला म्हिगदेदा वास्ता लबा

8 परमेश्वरदा डोसेबा भन्दा डाच्छा एनीगदेसे मुनोन आरेबा ल लुदा तेन्मुबा। ओच्छे थेलान तहरी चिमुबा। 9 तर एनीगदेसे परमेश्वरदा डोसेबा भन्दाएनोन परमेश्वरसे एनीगदेदा डोसेबा मुला। थेहड् भिसम दोःसी एनीगदे तिग्दा जम्बुलिडरी मुबा थेहड्बा गे आखेल्बा कमजोर आत्माला नोकर दोसी भ्रबा? 10 एनीगदेसे चा यहूदीगदेसे थड्बा धिन, ला, धुइदेन दिडदा तेन्सी परमेश्वरदा ताङ्गना लबारी म्हाइबा मुला। 11 थेतबासेलमा डाइ एनीगदेला लागिरी लबा गे खेरोरीन निजीम भिसी डादा सुर्दा तबा मुला।

* 3:29 रोमी ४:१३

12 ज्योज्यो आले नाना आडागदे, एनीगदेएनोन डा हड्बान दोगो भिबा डाला बिन्ती मुला। तिग्दा भिसम डाएनोन एनीगदे हड्बान मुबा। एनीगदेसे डादा तिगै आज्यबा लबा आरे। 13 जम्मान भन्दा डाच्छा डाइ एनीगदेदा थार्बा पिन्बा समाचार थे:ना लबा धुइरी डा आखम्बा मुबा भिबा एनीगदेदा थानोन मुला। 14 थे धुइरी डा आखम्बासे लमा एनीगदेदा ल्हानान गाहो तबा मुबा। तसैनोन एनीगदेसे डादा हेला आलनी। बरु परमेश्वरला दूतदेन ख्रीष्ट येशूदा हड् लसी एनीगदेसे डादा मान लजी। 15 थे धुइरी एनीगदे गाते ताड्बा मुबा, तबा हिन्सम एनीगदेसे हाडला मीनोन ते:सी पिन्तो:सै डादा पिन्बारी तयार मुबा भिबा ताम डादा था मुला। तर दान्दे चा एनीगदेदा तिग तजी? 16 तिग दान्दे डाइ सत्य ताम पाड्मा चा डा एनीगदेला शत्रु दोबा हिन्ना?

17 स्य्हान्दो म्हिगदेसेनोन एनीगदेदा वास्ता लमुला। तर ज्यबा सेमसे वास्ता लबा आहिन। थेनीगदेसे एनीगदेदा डाइ लोप्बा ताम ख्लासी हाडला लिच्छा भ्रबा म्हि स्होबारी म्हाइबा हिन्ना। 18 डा एनीगदेदेन छ्याम मुबा धुइरी जे झन्सी गे लबा आहिन, तर डा आरेसै सदन गे लसी चिबा चा ज्यबा ताम हिन्ना। 19 डाला कोलागदे, एनीगदे ख्रीष्ट हड्बान आदोतेधोना डादा कोला न्हबारी छ्याइबा म्रिडम्हेमेदा तबा हड्बान दुख तबा मुला। 20 दान्दे डा एनीगदेदेन छ्यामनोन चिसी चु भन्दा अर्गुन ताम लम्याड्बा हिन्सम गाते ज्यबा तसेला मुबा। तर पाड्मोन तो:मा डाइ एनीगदेला लागिरी तिग लतो:बा थे डादा था आरे।

हागारदेन सारा

21 परमेश्वरसे मोशादा पिन्बा ठिमला तहरी चिबारी म्हाइबागदेसे डादा पाड्गो, ठिमसे तिग भिमुला थे ताम एनीगदेदा था आरे? 22 तिग्दा भिसम चुहड् भिसी भ्रिबा मुला, अब्राहामला झा न्ही मुबा, गिक चा नोकरस्याग्याम न्हबा ओच्छे गिक चा हाडलान म्रिडग्याम न्हबा मुबा। थेला हाडलान म्रिड चा नोकर आहिनमुबा।* 23 नोकरस्याग्याम न्हबा झा चा सेमसे म्हन्बा अन्छार न्हबा मुबा। तर नोकर आहिनबा हाडलान म्रिडग्याम न्हबा झा चा परमेश्वरसे पिन्ना भिसी लबा कबुल अन्छार न्हबा मुबा। 24 चु म्रिडम्हेमे न्हीनोन परमेश्वरसे लबा कबुलगदे हड्बा हिन्ना। चु कबुलगदे तिग हिन्ना भिबा ताम चु म्रिडम्हेमे न्हीग्यामसेन म्राड्बा मुला। म्रिडम्हेमे गिक चा हागार हिन्ना। थे चा परमेश्वरसे सीनै भिबा गडरी मोशादा पिन्बा ठिम हड्बान हिन्ना। थे ठिमला नोकरगदे चा थेलान कोलागदे हिन्ना।

25 अरब य्हुल्साला सीनै भिबा गड चा हागार भिबा नोकरस्या हड्बान हिन्ना। ओच्छे परमेश्वरसे मोशादा पिन्बा ठिमदा तेन्बा दान्देला यरूशलेमदेन ठिमला लिच्छा भ्रबा जम्मान म्हिगदे थे नोकरस्याला सन्तान हड्बान हिन्ना। 26 तर स्य्हान्दो म्रिडम्हेमे सारा चा स्वर्गला यरूशलेम हड्बान हिन्ना। थे खालैला नोकर आहिन, थे चा य्हाडला आमा हिन्ना। 27 तिग्दा भिसम बचनरी चुहड् भिसी भ्रिबा मुला,

“कोलागदे आतबा म्रिडम्हेमे,

ए ताड्गो।

ओच्छे कोला न्हबा बेथानोन था आयाड्बा म्रिडम्हेमे,

ए सेमहेन्सेन ताड्सी क्रिड्गो।

तिग्दा भिसम कोला तबा म्रिडम्हेमेला भन्दा कोला आतबा

म्रिडम्हेमेला कोलागदे ल्हानान तला।”*

28 ज्योज्यो आले नाना आडागदे, य्हाडएनोन अब्राहामदेन साराला झा इसहाक हड्बान परमेश्वरसे लबा कबुल अन्छार न्हबा सन्तान हिन्ना। 29 तर थे धुइरी सेमसे म्हन्बा अन्छार न्हबा झासे परमेश्वरला आतमासे म्हन्बा अन्छार न्हबा झादा दुख पिन्मुबा, दान्देनोन थेहड्बान मुला।* 30 तर बचनरी तिग भिसी भ्रिबा मुला? “थे नोकरस्यादेन थेला झादा दिमग्याम ते:गो। तिग्दा भिसम नोकर आहिनबा हाडलान म्रिडग्याम न्हबा झासे याड्बा हक नोकरस्याला झासे आयाड्” भिसी भ्रिबा

* 4:22 उत्प १६:१५; २१:२ * 4:27 यशै ५४:१ * 4:29 उत्प २१:९

आरे?*

³¹ थेतबासेलमा ज्योज्यो आले नाना आडागदे, यहाड नोकरस्याला सन्तान आहिन, तर नोकर आहिन्बा मिडम्हेमेला सन्तान हिन्ना।

5

ख्रीष्टसे ठिमला तहग्याम फेबा

¹ यहाडदा ठिमला तहग्याम ख्रीष्टसे फेबा हिन्ना। थेतबासेलमा भड्बा तसी चिउ, ओच्छे दोःसी थे ठिमला नोकर दोबारी थाम्हाइगो।

² च्यागो, डा पावलसेन एनीगदेदा चु ताम पाड्बा मुला, एनीगदे खतना लबा ठिम तेन्बा हिन्सम एनीगदेला लागिरी ख्रीष्टला तिगै गे आरे। ³ डाइ दोःसी एनीगदेदा पाड्ला, खतना लतोःला भिसी पाड्बा म्हिगदे जम्मासेन परमेश्वरसे मोशादा पिन्बा ठिम पूरान तेन्तोःला। ⁴ मोशादा पिन्बा ठिम तेन्सी परमेश्वरदा सेम निबा म्हि दोबारी म्हाइबा एनीगदे ख्रीष्टग्याम थारेड तबा मुला। ओच्छे परमेश्वरला दयामायाग्यामएनोन थारेड तबा मुला। ⁵ तर डन्से लबा आश चा विश्वासग्याम सदन परमेश्वरदा सेम निबा म्हि दोबा हिन्ना। थे आश चा परमेश्वरला आत्माग्यामसेन याड्ला भिसी यहाडसे भ्रान्सी चिबा मुला। ⁶ तिग्दा भिसम ख्रीष्ट येशूदा विश्वास लमाहेन्से खतना लसै आलसै तिगै आहिन। तर गिकसेम गिकदा माया लसी विश्वासला गे लबा चा मुल ताम हिन्ना।

⁷ हिन्बाम एनीगदे ज्यबा ग्यामरी भ्रबान मुबा। तर दान्दे चा खाल्से एनीगदेदा सत्य ग्याम ख्लासी भ्रबारी कर लजी। ⁸ चुहड लपुड्बा चा एनीगदेदा ड्योइबा परमेश्वरसे आहिन। ⁹ चु लुसीला ताम चा जजाकी खमीर हड्बान हिन्ना। जजाकी खमीर युसै ज्योपबा जम्मान ब्रादा भोना लला।* ¹⁰ एनीगदेसे डाला ताम बाहेक स्यहान्दो महिला ताम आड्यान भिसी डाइ प्रभुरी विश्वास लबा मुला। एनीगदेदा अलमल लसी आतोःबा ग्यामरी भ्रपुड्बा जुन म्हि मुसै थेसे परमेश्वरग्याम खबा सजाय नातोःला। ¹¹ ज्योज्यो आले नाना आडागदे, डाइ अझ खतना लनोन तोःला भिसी पाड्सी भ्रसम तिग्दा चुहड लसी दुख नातोःसेला। खतना लबा ताम सत्य हिन्सम ख्रीष्ट येसू कुसरी सिबा ताम पाड्मा खालैसेन बिरोध आलसे मुबा। ¹² एनीगदेदा सत्य ग्याम ख्लापुड्बागदेसे मी तिग्दा खतना जे लसे, बरु थेनीगदेसे मी लहुइला सहेनोन थसै तसेला।

¹³ ज्योज्यो आले नाना आडागदे, ठिमला तहग्याम थार्बाला लागिरीन एनीगदेदा ड्योइबा हिन्ना। थेतबासेलमा थार्बा याड्सीनोन पापी बानीबेहोर अन्छार गे थालउ। तर माया लसी गिकसेम गिकदा ह्यो लउ। ¹⁴ तिग्दा भिसम परमेश्वरसे मोशादा पिन्बा जम्मान ठिम “एसे हाडला खिमजेमदा हाडदा हड्बान माया लउ” भिसी सुड्बा बचन गिकरीन पूरा तबा मुला।*

¹⁵ तर एनीगदे हाड हाड न्हडरी जनतुगदे हड लसी छेबा बड्बादेन खापबा लबा मुला भिसम होशियार तसी चिउ। आहिन्सम एनीगदे हाड हाडग्यामनोन नाश तसी निला।

परमेश्वरला आत्माग्याम याड्बा जुनी

¹⁶ थेतबासेलमा एनीगदेसे डाला ताम ड्यानगो, एनीगदे परमेश्वरला आत्मासे कुल्बा अन्छार भ्रउ। तर पापी बानीबेहोरग्याम जे लइ म्हन्बा थेनोन लसी थाभ्रउ। ¹⁷ तिग्दा भिसम पापी बानीबेहोरदा परमेश्वरला आत्मासे ओच्छे परमेश्वरला आत्मादा पापी बानीबेहोरसे बिरोध लला। एनीगदेसे जुन गे लबारी म्हाइला थे गे लआपुड्बाला लागिरी थेन्नी न्हडरी गिकसेम गिकला बिरोध लला। ¹⁸ तर चुदे एनीगदे परमेश्वरला आत्मासे कुल्बा अन्छार भ्रजी भिसम दाहेन्से एनीगदे ठिमला तहरी आरे।

¹⁹ पापी बानीबेहोरग्याम लबा गेगदे चुनोन हिन्ना: ब्रेल्सी भ्रबा, नइबा ताम म्हन्बा, सेमरी जे लइ म्हन्बा थेनोन लबा, ²⁰ मूर्तिगदेदा पूजा लबा, तन्त्रमन्त्र लबा, शत्रु सहोबा, छेबा बड्बा लबा, डाह लबा, बोमो लबा, हाडला जे ग्याम च्याबा, फेना लबा, हाड हाडला समूह सहोसी भ्रबा, ²¹ डाह लबा, ड्य्होइसी भ्रबा, मोजमजा लबादेन चुहड्बान अर्गु पाप गेगदे लबा। डाइ चुहड्बा गे लबा म्हिगदेदा परमेश्वरला यहुल्सारी वाड्आम्याड् भिसी डाच्छाएनोन पाड्बा मुबा, दान्देनोन पाड्बान मुला।

* 4:30 उत्प २१:१० * 5:9 १ कोर ५:६ * 5:14 लेवी १९:१८

22 तर परमेश्वरला आत्मासे य्हाडदा माया लबारी, ताडना लबारी, ढिक्सी चिबारी, नाबारी, दया लबारी, स्य्हान्दोदा ज्यबा लबारी, विश्वासला गे लबारी, 23 सोजो दोबारी, हाडसे हाडदान तहरी थान्बारी हो लला। चु तामगदेदा बिरोध लबा खजिबै ठिम आरे। 24 तर जुन म्हिगदे स्त्रीष्ट येशूला हिन्ना, थेनीगदेसे चा पापी बानीबेहोरग्याम थोन्बा जम्मान पापी सेमगदे कुसरी टांगब लसी जिन्बा मुला। 25 य्हाड परमेश्वरला आत्माग्याम सोबासे लमा परमेश्वरला आत्मासे कुल्बा अन्छारनोन भ्रइ। 26 य्हाड घमण्ड लसी गिकसे गिकदा बोमो खना लबादेन ईख थान्बा म्हि दोबारी आत।

6

गिकसेम गिकदा हो लउ

1 ज्योज्यो आले नाना आडागदे, चुदे खालै म्हिसे आज्यबा गे लबा स्यापजी भिसम एनीगदे परमेश्वरला आत्माग्याम पाको दोबागदेसे थेदा ज्यना लसी घोना लउ। तर एनीगदे हाडएनोन फसब आतबारी होशियार तसी चिउ। 2 दुखरी गिकसेम गिकदा हो लउ। चुहड लसी एनीगदेसे स्त्रीष्टसे लोपबा ठिम पूरा लला। 3 तिग्दा भिसम तिगै गे आखेल्बा म्हिसे डा हड्बा खालै आरे भिसी म्हन्जी भिसम थेसे हाडसे हाडदान धोका पिन्बा हिन्ना। 4 जम्मासेन हाड हाडसे लबा गे ठीक मुला कि आरे थे हाड हाडसेन च्यागो। हाडसे लबा गे ठीक मुसम ताड्गो। तर स्य्हान्दोसे भन्दा डाइ ज्यबा गे लजी भिसी घमण्ड थालउ। 5 तिग्दा भिसम जम्मासेन हाडला गे हाड हाडसेन लतोःला।

6 हाडदा परमेश्वरला बचन लोप्सी पिन्बा म्हिगदेदा हाडदेन छ्याम मुबा ज्यबा सहेगदे पिन्गो।

7 थेतबासेलमा खालैसे हाडसे हाडदान धोका थापिन्गो। परमेश्वरदा खालैसेन ठट्टा लबारी आत। तिग्दा भिसम म्हिसे जे सूला थेनोन रोला। 8 जुन म्हि हाडला पापी बानीबेहोर अन्छार भ्रला, थे थेनोन पापी बानीबेहोरसे लमा नाश तला। तर जुन म्हि परमेश्वरला आत्मासे कुल्बा अन्छार भ्रला, थेसे परमेश्वरला आत्माग्यामसेन जुकजुकधोनाला जुनी याड्ला। 9 दाहेन्से य्हाड ज्यबा गे लबारी भ्लपबारी आत। तिग्दा भिसम आभ्लपना ज्यबा गे लजी भिसम य्हाडसे ठीक धुइरी बाली दुइम्याड्ला। 10 थेतबासेलमा मौका याड्बा धुइरी चा य्हाडसे जम्मान म्हिदा ज्यबा लतोःला। अझ स्त्रीष्टदा विश्वास लबागदेला म्हेमेदा चा य्हाडसे ज्यबा लनोन तोःला।

छार जुनी

11 च्यागो, चु ताम एनीगदेसे था याड्गै भिसी डाइ हाडलान यासे घेन घेन हिगीरी भिबा मुला।

12 च्यागो, डा चा ज्यबा म्हि हिन्ना भिसी म्हिगदेदा उन्बारी म्हाडबागदेसे जे एनीगदेदा खतना लनोन तोःला भिसी कर लमुला। स्त्रीष्टला कुससे जे थाना लला भिबा तामरी विश्वास लबासे लमा स्य्हान्दो म्हिगदेग्याम दुख नाआतोःगै भिसी थेनीगदे जोगब तबाला लागिरी जे चु ताम पाड्बा हिन्ना। 13 जुन म्हिगदेसे एनीगदेदा खतना लतोःला भिसी पाड्मुला थेनीगदे हाडसेनोन ठिमरी पाड्बा अन्छार गे आलमुला। तर घमण्ड लबारी जे एनीगदेसे खतना लगै भिसी थेनीगदेसे म्हन्मुला। 14 तर डा चा अर्गु तामरी घमण्ड आल, प्रभु येशू स्त्रीष्ट कुसरी सिबा तामरी जे घमण्ड लला। तिग्दा भिसम प्रभु येशू स्त्रीष्ट कुसरी सिबासे लमा डाला लागिरी जम्बुलिडग्याम खबा जम्मान तामगदे सिसी जिन्बा मुला, ओच्छे डाएनोन जम्बुलिडला लागिरी सिसी जिन्बा मुला। 15 खतना लसै आलसै तिगै आहिन, तर परमेश्वरसे छार म्हि सहोबा चा मुल ताम हिन्ना। 16 चु ठिम अन्छार भ्रबागदे जम्मान परमेश्वरला म्हिगदेदा दयादेन शान्ति तला। दाहेन्से थेनीगदे जम्मान परमेश्वरला म्हिगदे हिन्ना। 17 दाहेन्से चु तामला लागिरी डाइ खालैग्यामसेन दुख नाआतोःगै। तिग्दा भिसम डा येशूला गे लबा म्हि हिन्ना भिसी उन्बाला लागिरी डाला लहुइ नाड डामनोन डाम मुला। 18 ज्योज्यो आले नाना आडागदे, एनीगदेला आत्मादेन छ्याम य्हाडला प्रभु येशू स्त्रीष्टला दयामाया तगै। आमेन।

पावलसे एफिससला विश्वासीगदेदा भिबा चिठी चु चिठीला बारेरी पाड्तोःमा

भिबा म्हिः येशूला मुल चेला पावलसे भिबा मुबा (एफिसी १:१)।

भिबा ग्लाः रोम शहरला झ्यालखानग्याम भिबा मुबा।

भिबा सालः ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भिबा मुबा।

खाल्दा भिबाः एफिसस शहररी मुबा मण्डलीदेन थेला डाम डामला ग्लारी मुबा मण्डलीगदेदा भिबा मुबा।

चु चिठीरी जम्मान भन्दा डाच्छा परमेश्वरसे म्हन्बा अन्छारला ख्रीष्टदा जम्मान सहेला मुल सहोसी जम्मान सहे ख्रीष्टला तहरी थान्जी भिसी भिबा मुला (एफिसी १:९-१०)। चु चिठी चा परमेश्वरला म्हिगदे ख्रीष्टदेन छ्याम गिक तसी परमेश्वरसे म्हन्बा अन्छार सोगै भिसी भिबा हिन्ना।

चु चिठीला डाच्छाला अध्यायरी खाहड लसी यहाड ख्रीष्टदेन छ्याम गिक तजी भिबा तामला बारेरी पाड्बा मुला। परमेश्वर आबासे हाडला म्हिगदेदा धम्सी हाडला झा येशू ख्रीष्टग्याम थेनीगदेला पापला दोष मेटब लसी पापग्याम फेजी, ओच्छे परमेश्वरसे हाडसे लबा घेन कबुल हाडला आत्मा बैना पिन्सी पक्का लजी। लिच्छापट्टिला अध्यायरी चा पावलसे चु चिठी पढब लबागदेदा ख्रीष्टदेन छ्याम गिक तबा अन्छारला बानीबेहोर उन्गो भिसी बिन्ती लबा मुला।

परमेश्वरला म्हिगदे ख्रीष्टदेन छ्याम गिक तबा तामगदे उन्बाला लागिरी पावलसे चुहड्बा तामगदे पाड्बा मुला। मण्डली चा ख्रीष्टला लहुड हड्बान हिन्ना, मण्डलीला थोबो चा ख्रीष्ट हिन्ना। ओच्छे मण्डली दिम हड्बान हिन्ना, थे दिमला सुर युडबा चा ख्रीष्ट हिन्ना। थेहड लसी मण्डली चाडछार हड्बान हिन्ना, ओच्छे म्हाछार चा ख्रीष्ट हिन्ना। चु चिठीरी पावलसे बलि, माफ, दयामायादेन चोखो ओच्छे ख्रीष्टला मायाला बारेरी घेन घेन ताम भिबा मुला।

मुल तामगदे

फ्याफुल्बा १:१-२

ख्रीष्टदेन ख्रीष्टदा विश्वास लबागदे १:३-३:२१

ख्रीष्टदेन छ्याम मुबा छार जुनी ४:१-६:२०

चिठीला थुमरी भिबा तामगदे ६:२१-२४

पावलसे एफिससला विश्वासीगदेदा भिबा चिठी

1 लाससो, एफिससरी मुबा जम्मान परमेश्वरला म्हिगदेदा डा पावलग्याम फ्याफुल्ला! डा परमेश्वरसे ख्रीष्ट येशूला गे लबाला लागिरी धम्बा मुल चेला हिन्ना। एनीगदे, ख्रीष्ट येशूदा सदन विश्वास लसी चिबागदेदा,* 2 यहाडला परमेश्वर आबादेन प्रभु येशू ख्रीष्टग्याम दयामायादेन शान्ति तगै।

ख्रीष्टग्याम याड्बा मोलम

3 यहाडला प्रभु येशू ख्रीष्टला आबा परमेश्वरला जयजयकार तगै। तिग्दा भिसम ख्रीष्टदेन छ्याम गिक तबासे लमा परमेश्वरसे यहाडदा स्वर्गला जम्मान मोलम पिन्बा मुला। थे मोलमगदे चा चुनोन हिन्ना। 4 चोखोदेन तिगै दोष आरेबा म्हि सहोबाला लागिरी परमेश्वरसे ख्रीष्टदेन छ्याम गिक सहोसी चु जम्बुलिड सहोबा भन्दा डाच्छान धम्बा हिन्ना। 5 परमेश्वरसे यहाडदा माया लसी येशू ख्रीष्टग्याम थेसे हाडला सेमसे म्हन्बा हड्बान कोलागदे सहोबारी यहाडदा डाच्छाहेन्सेन धम्बा मुबा। 6 परमेश्वरसे हाडला सेमहेन्से माया लबा झाग्याम यहाडदा ल्हानान दया लसी मोलम पिन्बा मुला। थेतबासेलमा यहाडसे परमेश्वरला जयजयकार लतोःला। 7-8 परमेश्वरसे यहाडदा ल्हानान

* 1:1 मुल १८:१९-२१; १९:१

दयामाया लबासे लमा य्हाडसे ख्रीष्टग्याम थाबा याड्बा मुला। थेनोन ख्रीष्टला कासे य्हाडला पापला सय फासी य्हाडदा पापग्याम फेबा मुला।* 9-10 चुह्ण्ड लसीन परमेश्वरसे हाडला पूरा ज्ञान बुद्धिग्याम थेला सेमला ताम य्हाडदा घोना लबा मुला। थेला सेमला ताम चा धुइ तमाहेन्से हाडसे म्हन्बा अन्छारला स्वर्गदेन जम्बुलिडरी मुबा जम्मान सहेगदे ख्रीष्टसे ग्ला गिकरी पोप लसी शासन लबा हिन्ना। चु चा थेसे म्हन्बा अन्छार डाच्छाहेन्से ख्रीष्ट येशूग्याम सहोसी थान्बा ताम हिन्ना।

11 थेतबासेलमा परमेश्वरसे हाडसे म्हन्बा अन्छार जम्मान ताम पूरा लबा मुला। थेह्ण्ड लसीन य्हाडदाएनोन ख्रीष्टदेन छ्याम गिक सहोसी थेला म्हि सहोबा मुला। 12 ख्रीष्ट येशूथोरी डाच्छाहेन्सेन आश लबा डनी यहूदीगदेदा परमेश्वरसे थेला य्हालदेन शक्तिला जयजयकार लगै भिसी धम्बा मुला।

13 थेह्ण्ड लसीन एनीगदेसेनोन थाबा पिन्बा समाचार सत्य बचन थेःसी ख्रीष्ट येशूदा विश्वास लजी। थेतबासेलमा एनीगदेदा डालान हिन्ना भिसी परमेश्वरसे हाडला आत्मासे छाप लबा मुला। चुनोन आत्मा परमेश्वरसे हाडला म्हिदा पिन्ना भिसी लबा कबुल हिन्ना। 14 य्हाड परमेश्वरला म्हिसे याड्तोःबा हकदेन पापग्याम पूरान फेला भिबा ताम उन्बाला लागिरी परमेश्वरसे थेला आत्मा बैना पिन्बा मुला। थेतबासेलमा य्हाडसे परमेश्वरला य्हालदेन शक्तिला जयजयकार लतोःला।

पावलसे एफिससरी मुबा विश्वासीगदेला लागिरी लबा प्रार्थना

15-16 थेतबासेलमा एनीगदेसे प्रभु येशूदा विश्वास लबा मुला भिबादेन परमेश्वरला महिगदेदा माया लबा मुला भिबा ताम थेःसी डाइ एनीगदेला लागिरी सदन परमेश्वरदा धन्यवाद पिन्बान चुह्ण्ड लसी प्रार्थना लबा मुला। 17 प्रभु येशू ख्रीष्टला परमेश्वर य्हाडसे मान लतोःबा परमेश्वर आबासे एनीगदेदा हाडला आत्मा पिन्गै। थेनोन आत्माग्याम परमेश्वरदा डोसेबा ज्ञान याड्सी थेला बारेरी अझ घोखमगै। 18 थेह्ण्ड लसीन परमेश्वरला य्हाल याड्बाला लागिरी एनीगदेला सेम छोर्सी एनीगदेदा तिग आश उन्सी ड्योडबा मुबा थे घोखमगै। ओच्छे थेसे हाडला महिगदेदेन कबुल लमा पिन्ना भिबा मोलम गाते घेन गाते लहाना मुला थे था याड्गै। 19 ओच्छे य्हाड विश्वास लबागदेला लागिरी गे लबा परमेश्वरला शक्ति गाते घेन मुला थे एनीगदेसे घोखमगै भिसीएनोन डाइ प्रार्थना लबा मुला। 20 थेनोन शक्तिग्याम परमेश्वरसे ख्रीष्ट येशूदा सिबाग्याम सोना लसी स्वर्गरी हाडला दाहिने छ्यापट्टि मुल ठिरी चिपुड्जी।* 21 ओच्छे परमेश्वरसे ख्रीष्ट येशूदा जम्बुलिडदेन मुरी मुबा जम्मान शासन लबागदे, अधिकार मुबागदे, शक्ति मुबागदे, ग्लेगदेदेन जम्मान मिनथोरी शासन लबा अधिकार पिन्जी। दान्देला धुइरी जे आहिन, तर लिच्छा खबा धुइरीनोन चु जम्मानथोरी थेदा शासन लबा अधिकार पिन्बा मुला। 22 थेह्ण्ड लसीन परमेश्वरसे जम्मान सहेगदे ख्रीष्टला स्यहाप धिरी थान्सी मण्डलीला लागिरी ख्रीष्ट येशूदा जम्मान सहेला थोबो सहोजी।* 23 मण्डली चा ख्रीष्टला लहुइ हिन्ना। थेग्यामसे मण्डली पूरा तमुला। ओच्छे जम्मान सहेगदे पूरा तना लबाएनोन थेनोन हिन्ना।*

2

य्हाडदा परमेश्वरसे दया लसी सोना लजी

1 एनीगदे हाडलान पापग्याम सिबा धुइरी परमेश्वरसे एनीगदेदा सोना लजी।* 2 थे धुइरी एनीगदे जम्बुलिडला आज्यबा ठिमला लिच्छा भ्रमुबा ओच्छे म्हडगदेला यहुल्सारी शासन लबा शैतानसे कुल्बा ताम ड्यानसी भ्रमुबा। दान्देनोन परमेश्वरसे कुल्बा ताम आड्यानबागदेदा थेसे हाडला तहरी थान्बा मुला। 3 डाच्छा मी य्हाड जम्मान थेनीगदे हड्बान सेमरी लहुइला लागिरी जे लइ म्हन्बा थेनोन लसी भ्रबा म्हि हिन्ना। य्हाडला थेह्ण्डबा बानीबेहोर अन्छार मी स्यहान्दोगदेसे हड्णोन य्हाडसेनोन परमेश्वरग्याम सजाय याड्तोःबा मुबा। 4 तर य्हाडला परमेश्वर ल्हानान दया लबा परमेश्वर हिन्ना। ओच्छे य्हाडदा ल्हानान माया लबा मुला। 5 थेतबासेलमान य्हाड पापरी सिसैनोन परमेश्वरसे ख्रीष्ट येशूदेन छ्यामनोन सोना लजी। एनीगदेसे याड्बा थाबाएनोन थेनोन परमेश्वरला दयामायासे हिन्ना। 6 ख्रीष्ट येशूदेन छ्याम गिक सहोबासे लमा परमेश्वरसे य्हाडदा येशू ख्रीष्टदेन छ्याम सोना लसी

* 1:7-8 कल १:१४ * 1:20 भजन ११०:१ * 1:22 भजन ८:६ * 1:23 कल १:१८ * 2:1 कल २:१३

स्वर्गरी थेदेन छ्यामनोन चिपुङ्गी। 7 परमेश्वरसे चुहड्बा गे लसी लिच्छाला धुइला लागिरी थेला घेन दयामाया उन्बा मुला। येशू ख्रीष्टसे यहाडला लागिरी जम्मान गे लबासे लमा यहाडसे चु दयामाया याड्बा मुला। 8 तिग्दा भिसम परमेश्वरला दयामायाग्याम यहाडला विश्वाससे लमान यहाडसे थार्बा याड्बा हिन्ना। चु चा एनीगदेसे लबा गेग्याम आहिन, तर परमेश्वरसे पिन्बा मोलमग्याम हिन्ना। 9 म्हिसे लबा गेग्याम थार्बा याड्बा हिन्सम म्हि घमण्डी दोसेला मुबा। 10 तिग्दा भिसम यहाडसे ज्यबा गे लगै भिसी परमेश्वरसे यहाडदा येशू ख्रीष्टग्याम छार म्हि सहोबा हिन्ना। थेसे म्हन्बा अन्छार भ्रगै भिसीन परमेश्वरसे यहाडदा डाच्छाहेन्सेन सहोबा मुबा।

येशू ख्रीष्टरी जम्मान गिक हिन्ना

11 थेतबासेलमा एनीगदेसे चु ताम थाम्ले:गो, डाच्छा लहुइरी खतना लबा यहूदीगदेसे घमण्ड लसी एनीगदेदा खतना आलबा अर्गु यहूलला म्हि भिसी भिबा मुबा। 12 थे धुइरी एनीगदे ख्रीष्टग्याम थारेड मुबा। ओच्छे इस्राएलीगदेसे याड्बा हकग्यामएनोन थारेड मुबा। थेहड् लसीन परमेश्वरसे हाडला म्हिगदेदा पिन्ना भिसी लबा कबुलगदेरीनोन एनीगदेला तिगै हक आरेबा मुबा। थेतबासेलमा एनीगदे जम्बुलिडरी आश आरेबादेन परमेश्वरदा डोआसेबा म्हि मुबा। 13 तर दान्दे एनीगदे ख्रीष्ट येशूदेन छ्याम गिक तबा मुला। डाच्छा एनीगदे परमेश्वरग्याम थारेड मुबा दान्दे ख्रीष्ट येशूसे बगब लबा काग्याम एनीगदेदा परमेश्वरला डामरी भबा मुला।

14 यहाडदा शान्ति पिन्बा येशू ख्रीष्टनोन हिन्ना। तिग्दा भिसम डाच्छा यहाडला गुडरी यहूदीदेन अर्गु यहूलला म्हि भिसी फेबारी पर्खाल हड्बा शत्रु मुबा। थेसे थे पर्खाल हड्बा शत्रुदा नाश लसी यहाडदा गिकनोन सहोजी। 15 ओच्छे येशू ख्रीष्टसे यहूदीगदेदेन अर्गु यहूलला म्हिगदेदा ठिकना लबादेन हाडग्याम छार म्हि सहोबारी हाडलान लहुइ पिन्सी यहूदीगदेला ठिमदेन ठिमसे कुल्बा तामगदे नाश लजी।* 16 थेहड् लसीन येशू ख्रीष्ट हाडनोन क्रुसरी सिसी यहाड न्हडरी गिकसे स्यहान्दोदा शत्रु भिसी म्हन्बा तामदा नाश लजी। ओच्छे यहाडदा गिकनोन सहोसी परमेश्वरदेन छ्याम ठिकना लजी। 17 येशू ख्रीष्ट हाडनोन फेपखसी परमेश्वरग्याम थारेड मुबा एनीगदे अर्गु यहूलला म्हिगदेदेन परमेश्वरला डामरी मुबा डनी यहूदीगदे जम्मादान शान्ति पिन्बा ज्यबा समाचार थे:ना लजी। 18 दान्दे डनी यहूदीदेन एनी अर्गु यहूलला म्हि, यहाड न्हीसेन ख्रीष्ट येशूग्याम परमेश्वरला आत्मा गिकनोन याड्सी परमेश्वर आबा मुबा ग्लारी निम्याड्बा मुला।

19 दाहेन्से एनीगदे विदेशी परदेसी आहिन। तर परमेश्वरला सन्तान हिन्ना। थेतबासेलमा परमेश्वरला म्हिगदेसे याड्बा हक एनीगदेसेनोन याड्बा मुला। 20 एनीगदे चा मुल चेलादेन अगमवक्तागदेला जगथोरी सहोबा दिम हिन्ना। थे दिमला सुर युड्बा चा ख्रीष्ट येशून हिन्ना। 21 थेतबासेलमा थे दिम पूरा प्रभुग्यामसेन जोडब तसी भड्बान परमेश्वरला लागिरी फेसी थान्बा चोखो मन्दिर दोबान निला। 22 थेहड् लसीन ख्रीष्टदेन गिक तसी एनीगदेएनोन डनी यहूदीगदेदेन छ्याम परमेश्वरला मन्दिर दोबान निबा मुला। थे मन्दिररी परमेश्वर हाडला आत्माग्याम धन्छ्याला।

3

अर्गु यहूलला म्हिगदेदा पावलसे येशू ख्रीष्टला समाचार थे:ना लबा

1 थेतबासेलमा डा पावल एनीगदे अर्गु यहूलला म्हिदा ख्रीष्ट येशूला समाचार थे:ना लमा झ्यालखानरी परब तबा हिन्ना। 2 एनीगदे अर्गु यहूलला म्हिगदेला लागिरी परमेश्वरसे थेला दयामायाग्याम चु गे डादा जिम्मा पिन्बा मुला भिबा ताम एनीगदेसेनोन था याड्सी जिन्बा मुला। 3 परमेश्वरसे डादा थेला सेमला ताम घोना लबा मुला। चु तामला बारेरी एनीगदेला लागिरी डाइ डाच्छान जजाकी भिबा मुला। 4 चु ताम पढब लमाहेन्से ख्रीष्टला बारेरी परमेश्वरला सेमरी मुबा ताम डाइ गाते घोजीम भिसी एनीगदेसे घोखम्ला। 5 डाच्छा मी परमेश्वरसे हाडला सेमला ताम म्हिगदेदा घोना लबा आरेमुबा। तर दान्दे परमेश्वरसे हाडला आत्माग्याम धम्बा हाडला मुल

* 2:15 कल २:१४

चेलादेन अगमवक्तागदेदा घोना लबा मुला। 6 चु ताम चा अर्गु य्हलला म्हिगदेसे परमेश्वरला थार्बा पिन्बा समाचार थे:सी विश्वास लमाहेन्से य्हूदीगदेसे ह्ङ्ङोन परमेश्वरला मोलम याड्बा हिन्ना। थेतबासेलमा दाहेन्से थेन्नी गिकनोन तबा मुला। ओच्छे परमेश्वरसे येशू ख्रीष्टग्याम हाडला म्हिगदेदा पिन्ना भिसी लबा कबुल एनीगदे अर्गु य्हलला म्हिसेनोन याड्बा मुला।*

7 ओच्छे परमेश्वरसेन दयामायादेन शक्तिग्याम थेला मोलम अन्छार डादा चु थार्बा पिन्बा समाचार थे:ना लबा म्हि स्होजी। 8 परमेश्वरला म्हिगदे न्हडरी डा जम्मान भन्दा गे आखेल्बा म्हि तसैनोन परमेश्वरसे डादा दयामाया लसी ख्रीष्टग्याम य्हडसे याड्बा म्हन्बारीन आखम्बा मोलमला समाचार अर्गु य्हलला म्हिगदेदा थे:ना लबारी डादा धम्बा मुला। 9 जम्मान सहे स्होबा परमेश्वरसे हाडला सेमला ताम दडबोहेन्सेन खालैदा उन्बा आरेबा। तर दान्दे परमेश्वरसे थे ताम खाह्ङ् लसी उन्सी पूरा लजी भिसी जम्मान म्हिदा घोना लबा गेएनोन डादा पिन्बा मुला। 10 परमेश्वरला सेमला ताम चा मण्डलीग्याम हाडला ज्ञान बुद्धि मुरी मुबा शक्तिदेन शासन लबागदेदा उन्बा हिन्ना। 11 चु चा जुकजुकहेन्सेन परमेश्वरसे म्हन्बा अन्छार य्हडला प्रभु येशू ख्रीष्टग्याम पूरा लबा हिन्ना। 12 ओच्छे य्हडसे येशू ख्रीष्टदा विश्वास लसी थेदेन छ्याम गिक तबासे लमा परमेश्वर मुबा ग्लारी निबा भड याड्बा मुला। 13 थेतबासेलमा एनीगदेला लागिरी डाइ नाबा दुख म्राड्सी एनीगदे आत्तेब थातउ। तिग्दा भिसम चु मी एनीगदेला लागिरी मान याड्बादेन ताड्तो:बा ताम हिन्ना।

पावलसे दो:सीएनोन एफिससला मण्डलीला लागिरी लबा प्रार्थना

14-15 थेतबासेलमान स्वर्गदेन जम्बुलिडरी मुबा जम्मान य्हलला म्हि स्होबा परमेश्वर आबादा डाइ पुड जूसी प्रार्थना लबा मुला। 16 परमेश्वरसे हाडला आत्माला शक्तिग्याम ल्हानान मोलम पिन्सी एनीगदेला सेम खाइमै याड्योड आतबा भड याड्गै। 17 ओच्छे एनीगदेसे ख्रीष्टदा विश्वास लबासे लमा ख्रीष्ट सदन एनीगदेला सेमरी धन्छ्यागै। ओच्छे एनीगदे परमेश्वरला मायारी खाइमै याड्योड आतना भड्बा तसी चिखम्गै। 18 थेह्ङ् लसीन परमेश्वरला म्हिगदे जम्मानदेन छ्याम ख्रीष्टला माया गाते ल्हानान मुला भिसी एनीगदेसे घोखम्गै। 19 ओच्छे महिला ज्ञान बुद्धिसे घोबारी म्हाइसै घोआखम्बा ख्रीष्टला माया घोखम्गै। थेह्ङ् लसीन परमेश्वर खाह्ङ्बा मुला, एनीगदेएनोन थेह्ङ्बान दोखम्गै। चुह्ङ् लसी डाइ एनीगदेला लागिरी प्रार्थना लबा मुला।

20 परमेश्वरसे य्हडला गुडरी हाडला शक्तिग्याम गे लमुला। ओच्छे य्हडसे हीबादेन म्हन्बा भन्दा ल्हानान पिन्मुला। 21 य्हड ख्रीष्ट येशूदेन छ्याम गिक तबा म्हिगदेदेन मण्डलीसे हाड जम्मान भन्दा घेन परमेश्वर हिन्ना भिसी सदन मानदेन जयजयकार लतो:ला। आमेन।

4

ख्रीष्टदा विश्वास लबागदे जम्मान गिकनोन हिन्ना

1 थेतबासेलमा प्रभुला गे लमा झ्यालखानरी परब तबा म्हि, डाइ एनीगदेदा परमेश्वरसे धम्बासे लमा थेसे कुल्बा अन्छार गे लउ भिसी बिन्ती लबा मुला। 2 एनीगदे खाइमै घेन आदोना सोजो म्हि दोसी भ्रउ। ओच्छे गिकसे गिकला ताम नासी हाड हाड न्हडरी माया लसी ढिक्सी चिउ।* 3 एनीगदेदा परमेश्वरला आत्मासे गिक स्होजी भिबा ताम अन्छार भ्रबारी सदन भड लउ। 4 परमेश्वरसे ड्योडबा धुडरी य्हडसे तिग याड्ला भिसी आश लमुबा, थे आश गिकनोन हिन्ना। थेह्ङ् लसीन दाहेन्से य्हड ल्हुइ गिकलान हिन्ना। ओच्छे य्हडसे याड्बा परमेश्वरला आत्माएनोन गिकनोन हिन्ना। 5 ओच्छे य्हडला प्रभुएनोन गिकनोन, य्हडला विश्वासएनोन गिकनोन ओच्छे य्हडसे किन्बा बपतिस्माएनोन गिकनोन हिन्ना। 6 थेतबासेलमा दाहेन्से य्हड जम्मालान परमेश्वर आबा गिकनोन हिन्ना। थेनोन जम्मानदेन छ्याम तसी य्हड जम्मानग्याम गे लबा मुला। ओच्छे थेसेन जम्मानथोरी शासन लबा मुला।

7 तर ख्रीष्टसे हाडला सेमसे म्हन्बा अन्छार य्हड जम्मादान थरी थरीला गे लबा मोलम पिन्बा मुला। 8 थेतबासेलमा परमेश्वरला बचनरी ख्रीष्टला बारेरी चुह्ङ् भिसी भिबा मुला,

* 3:6 कल १:२६-२७ * 4:2 कल ३:१२-१३

“थे तोर फेपूबा धुइरी थेसे हाडला शत्रुदाएनोन खीसी भोजी।

ओच्छे म्हिगदेदा मोलम पिन्जी।”*

9 थेहड् लसीन बचनरी तोर फेपूजी भिसी भिबाला अर्थ तिग? चु भिबा चा ख्रीष्ट चु जम्बुलिडला धिधोना फेपूजी भिबा आहिन? हिनना। 10 थेनोन जम्बुलिडला धिधोना फेपूसी जम्मानथोरी शासन लबारी स्वर्गरी जम्मान भन्दा तोर फेपूजी।

11 ओच्छे ख्रीष्टसे हाडला गे लगै भिसी कोइ म्हिदा ख्रीष्टला मुल चेला दोबारी, कोइ म्हिदा अगमवक्ता दोबारी, कोइ म्हिदा थार्बा पिन्बा समाचार थेःना लबारी, कोइ म्हिदा मण्डलीला पास्टरदेन म्हिगदेदा लोपूबा म्हि सहोबारी धम्जी। 12 तिग्दा भिसम परमेश्वरला जम्मान म्हिगदेसे परमेश्वरला गे ज्यना लसी ख्रीष्टला ल्हुइ मण्डलीदा भड्ना लखमगै भिसी थेसेन चुहड् लसी धम्बा हिनना। 13 थेतबासेलमा य्हाडसे परमेश्वरदा लबा विश्वासरी गिक आतनी भिसम ओच्छे थेला झा ख्रीष्टदा ज्यना लसी डोआसेनी भिसम य्हाड खाइमै पाको म्हि दोबारी आखम। ओच्छे ख्रीष्ट खाहड्बा मुला थेहड्बाएनोन दोबारी आखम। 14 दाहेन्से य्हाड जुन ताम थेःजी थेनोन तामरी विश्वास लबा कोलागदे हड् लसी आभ्र। तिग्दा भिसम कोइ कोइ म्हिगदेसे य्हाडदा फसब लबारी ल्हानान थरीला लुसीला तामदाएनोन सत्य ताम हड् लसी पाइसी भ्रमुला। 15 बरु य्हाड माया लसी सत्य ताम पाइसी ख्रीष्ट हड्बान दोगे। तिग्दा भिसम ख्रीष्ट चा य्हाडला थोबो हिनना। 16 य्हाडला ल्हुइरी या काड जोडब लसी ल्हुइ गिकनोन तबा हड् ख्रीष्टसेनोन जम्मादान गिकनोन सहोबा मुला। थेतबासेलमा या काड ढिक्सी हाड हाडला गे लबा हड् लसी य्हाडएनोन हाड हाड न्हडरी ढिक्सी गे लजी भिसम अझ य्हाड न्हडरी माया ल्हेबान निला।*

ख्रीष्टग्याम याड्बा छार जुनी

17 ख्रीष्ट येसूला अधिकारग्याम डाइ पाड्बा चु ताम ज्यना लसी ड्यानगो। दाहेन्से एनीगदे परमेश्वरदा डोआसेबा अर्गु य्हुलला म्हिगदे हड् तसी थाभ्रउ। तिग्दा भिसम थेनीगदेसे लबा गेदेन म्हन्बा ताम गे आखेल्बा मुला। 18 थेनीगदेसे सत्य ताम आघोमुला ओच्छे थेनीगदेला सेम कोड्बासे लमा थेनीगदेदेन परमेश्वरला बारेरी घोबा ज्ञाननोन आरे। थेतबासेलमा परमेश्वरग्याम याड्तोःबा जुनी थेनीगदेसे याड्बा आरे। 19 थेनीगदेदा ज्यबा तामदेन आज्यबा ताम तिगै था आरे। थेतबासेलमा थेनीगदेसे सेमरी तिग लइ म्हन्बा थेनोन लसी पेःबा खबा गे जे लसी भ्रमुला।

20 तर एनीगदेसे मी ख्रीष्टला बारेरी लोपूबा धुइरी थेहड्बा ताम लोपूबा आरेबा। 21 एनीगदेसे ख्रीष्ट येसूला सत्य ताम थेःसी घोबा मुला भिसी डादा था मुला। 22 थेतबासेलमा एनीगदेदा न्होड्ना लबा पापी सेमदेन डाच्छाला आज्यबा बानीबेहोर ख्लागो।* 23 ओच्छे परमेश्वरला आत्मासे एनीगदेला सेम छार सहोगै। 24 परमेश्वरसे एनीगदेदा हाड हड्बान म्हि सहोसी छार बानीबेहोर पिन्बा मुला। थेतबासेलमा दाहेन्से एनीगदेसे थे पक्का छार बानीबेहोर अन्छार परमेश्वरदा सेम निबादेन तिगै दोष आरेबा म्हि दोगो।*

25 थेतबासेलमा जम्मासेन लुसीला ताम पाड्बा ख्लासी विश्वासीगदे न्हडरी सत्य ताम जे पाड्गो। तिग्दा भिसम य्हाड ल्हुइ गिकलान हिनना।* 26-27 ओच्छे बोमो खसैनोन पाप थालउ। तिग्दा भिसम शैतानसे एनीगदेदा पाप लपुड्ला। थेतबासेलमा धिनी घल्बा भन्दा डाच्छान एनीगदेला बोमो म्हागै।*

28 खालैसे य्हो लबा मुसम दाहेन्से ख्लासी हाडसेन दुख लसी गे लगै, ओच्छे आरेबागदेदा पिन्खम्बा म्हि दोगै।

29 एनीगदे हाड हाड न्हडरी आज्यबा ताम थालउ। बरु ज्यबा तामदेन स्य्हान्दो महिला विश्वास बढब तबान निबा खाल्ला ताम जे लउ। तिग्दा भिसम एनीगदेसे लबा तामग्याम म्हिगदेदा ज्यबा तगै।

30 ओच्छे परमेश्वरला आत्मादा दुख थापिन्गो। तिग्दा भिसम एनीगदे पापग्याम फेबा धिन आखतेधोना एनीगदे परमेश्वरलान हिनना भिसी परमेश्वरला आत्मासेन छाप लबा मुला।

* 4:8 भजन ६८:१८ * 4:16 कल २:१९ * 4:22 कल ३:९ * 4:24 उत्प १:२६; कल ३:१० * 4:25 जक ८:१६

* 4:26-27 भजन ४:४

31 थेतबासेलमा दाहेनसे ईख थान्बा, बोमो लबा, म्हिदा बड्बा हड्बा जम्मान आज्यबा ताम एनीगदेसे ख्लागो। 32 बरु गिकसेम गिकदा सेमहेनसेन दया लउ। ओच्छे परमेश्वरसे एनीगदेदा ख्रीष्ट येशूग्याम माफ लबा हड् लसी एनीगदेसेनोन गिकसेम गिकदा माफ लउ।*

5

परमेश्वरदा सेम निबा गे जे लउ

1 एनीगदे परमेश्वरसे माया लबा कोलागदे तबासे लमा परमेश्वर हड्बान दोबारी म्हाइगो। 2 ओच्छे ख्रीष्टसे य्हाडदा माया लबा हड् लसी य्हाडएनोन ह्वाड ह्वाड न्हडरी माया लसी ढिक्सी चितोःला। तिग्दा भिसम ख्रीष्टसे य्हाडदा माया लसी ह्वाडला ल्हुडनोन पिन्जी। ओच्छे थेला ल्हुड बलिदान पिन्सी परमेश्वरला लागिरी ज्यबादेन बासना खबा धूप दोजी।*

3 एनीगदे परमेश्वरला म्हिगदे तबासे लमा स्य्हान्दोदेन छ्याम ब्रेल्सी भ्रबा, नड्बा खबा ताम ओच्छे लोभ लबा, चु जम्मान ताम म्हन्बारीनोन आत। 4 ओच्छे पेःबा खबा ताम, मूर्ख तामदेन म्हिदा सेम आनिबा ताम थालउ। चुहड्बा ताम लबा चा ज्यबा आहिन। बरु परमेश्वरदा धन्यवाद पिन्गो। 5 च्यागो, चु ताम चा एनीगदेदा था तनोन तोःबा ताम हिन्ना। स्य्हान्दोदेन छ्याम ब्रेल्सी भ्रबा, नड्बा खबा ताम लबा, लोभ लबा म्हिसे परमेश्वरदेन ख्रीष्टला य्हुल्सारी तिगै हक आयाड्। लोभ लबा म्हि चा मूर्तिदा परमेश्वर भिसी पूजा लबा म्हि हड्बान हिन्ना।

6 एनीगदेदा खालैसेन लुसीला ताम लोप्सी फसब थालगै। थेहड्बा गे लसी परमेश्वरसे कुल्बा ताम आड्यान्बा म्हिगदेदा परमेश्वरसे सजाय पिन्ना। 7 थेतबासेलमा एनीगदे परमेश्वरसे कुल्बा ताम आड्यान्बा थेहड्बा म्हिदेन छ्याम थाभ्रउ। 8 एनीगदे डाच्छा धोपधोपरी मुबा। तर दान्दे प्रभुदा डोसेबासे लमा य्हाल य्हालरी मुला। थेतबासेलमा दाहेनसे एनीगदे धोपधोपरी भ्रबा म्हिगदे हड् लसी आहिन तर य्हाल य्हालरी भ्रबा म्हिगदे हड् लसी भ्रउ। 9 तिग्दा भिसम य्हालरी भ्रबा म्हिगदेसे लबा गे चा ज्यबादेन परमेश्वरदा सेम निबा ओच्छे सत्य तमुला। 10 ओच्छे प्रभुदा सेम निबा गे तिग हिन्ना? थे गे जे लबारी म्हाइगो। 11 थेतबासेलमा धोपधोपरी भ्रबा म्हिगदेसे लबा हड्बा गे आखेल्बा गे एनीगदेसे थालउ। बरु खालै म्हिसे थेहड्बा गे लजी भिसम थे म्हिदा चु लबारी आतबा गे हिन्ना भिसी पाड्गो। 12 हिन्बाम, थे म्हिगदेसे लासी लबा नड्बा गेला बारेरी पाड्बारीनोन पेःबा खबा ताम हिन्ना। 13 तर तिगै सहे य्हालरी भजी भिसम थे सहे खाहड्बा चीम भिसी जम्मासेन था याड्ला। तिग्दा भिसम जम्मान सहेदा म्हाड्ना लबान य्हाल हिन्ना। 14 थेतबासेलमा चुहड् भिसी पाड्बा मुला, “म्हेर्बागदे छोर्गो,

ओच्छे सिबाग्याम रेःगो!

ख्रीष्टसे एनीगदेदा य्हाल तना लला।”

15 थेतबासेलमा एनीगदेला बानीबेहोर खाहड्बा मुला होस लसी भ्रउ। ओच्छे बुद्धि आरेबा म्हिगदे हड् लसी आहिन तर बुद्धि मुबा म्हि हड् तसी भ्रउ। 16 ओच्छे एनीगदेसे याड्बा मौका स्योर्ना थालउ। तिग्दा भिसम दान्देला धुड ठीक आरे।* 17 थेतबासेलमा मूर्ख म्हि हड् तसी थाभ्रउ। तर एनीगदेसे तिग लगे भिसी प्रभुसे म्हन्बा मुला थे ताम घोउ। 18 ओच्छे ड्य्होइबा सहे थुड्सी ड्य्होइसी थाभ्रउ। तिग्दा भिसम ड्य्होइबा सहेसे म्हिदा न्होड्ना लमुला। बरु एनीगदेला सेम सदन परमेश्वरला आत्मासे पुलिड्गो। 19 थेहड् लसीन एनीगदे ह्वाड ह्वाड न्हडरी परमेश्वरला आत्मासे पिन्बा व्हाइ गोसी गिकसेम गिकदा विश्वासरी कोड्बा तना लउ। चुहड् लसी सेमहेनसेन व्हाइ गोबान प्रभुदा जयजयकार लउ। 20 य्हाडला प्रभु येशू ख्रीष्टला मिनरी जम्मान सहेला लागिरी सदन परमेश्वर आबादा धन्यवाद पिन्गो।*

मिड हेम्बोसे लोप्तोःबा ताम

21 एनीगदेसे ख्रीष्टदा मान लबासे लमा ह्वाड ह्वाड न्हडरी गिकसेम गिकला तहरी चिउ।

* 4:32 कल ३:१३

* 5:2 प्रस्था २९:१८; भजन ४०:६

* 5:16 कल ४:५

* 5:20 कल ३:१६-१७

22 प्रभुला तहरी चिबा हड् लसी म्रिडम्हेमेगदेएनोन हाड हाडला हेम्बोला तहरी चिउ।* 23 तिग्दा भिसम ख्रीष्ट मण्डलीला थोबो हिन्ना। थेहड् लसीन म्रिडम्हेमेगदेला लागिरीनोन हाड हाडला हेम्बो थोबो हड्बान हिन्ना। ओच्छे हाडला लहुइ मण्डलीदा थाना लबाएनोन ख्रीष्टनोन हिन्ना। 24 थेतबासेलमा मण्डली ख्रीष्टला तहरी चिबा हड् लसी म्रिडम्हेमेगदेएनोन हाड हाडला हेम्बोला तहरी चिउ। 25 ओच्छे ख्रीष्टसे मण्डलीदा माया लसी हाडला ज्याननोन पिन्बा हड् लसी हेम्फेबेगदेसेनोन हाड हाडला म्रिडदा माया लउ।* 26 ओच्छे ख्रीष्टसे मण्डलीदा चोखो स्होबारी बपतिसमाला क्युइदेन हाडला बचनग्याम खुसी धाना लबा मुला। 27 ख्रीष्टसे मण्डलीदा य्हालदेन जेबा, दाग आरेबा, आज्योम्बा, तिगै चोट आरेबा, चोखोदेन तिगै दोष आरेबा मण्डली स्होसी हाडदेन छ्याम भबाला लागिरीन ख्रीष्टसे थेहड् लसी हाडला ज्याननोन पिन्बा हिन्ना। 28 थेहड् लसीन हेम्फेबेगदेसेनोन हाड हाडला म्रिडदा हाडला लहुइदा हड्नोन माया लदोमुला। हाडला म्रिडदा माया लबागदेसे जे हाडला लहुइदाएनोन माया लमुला। 29 तिग्दा भिसम खालै म्हिसेन हाडला लहुइदा आज्यना आलमुला। बरु ज्यबा तबारी ज्यना लसी चबा क्वान्बा लमुला। थेहड् लसीन ख्रीष्टसेनोन हाडला लहुइ मण्डलीदा ज्यना लमुला। 30 तिग्दा भिसम य्हाड ख्रीष्टला लहुइ तबासे लमा य्हाड गिकनोन हिन्ना।

31 “थेतबासेलमा म्हिसे हाडला आबा आमादा ख्लासी हाडला म्रिडदेन छ्याम ढिक्सी चिमुला। ओच्छे थेन्नी लहुइ गिक हड्बान तसी चिमुला।”* 32 चु य्हाड महिला ज्ञानसे घोखम्बा ताम आहिन। चु ताम डाइ ख्रीष्टदेन मण्डलीला बारेरी पाड्बा हिन्ना। 33 तर चु ताम एनीगदेसेनोन लतोःबा ताम हिन्ना। थेतबासेलमा एनीगदे जम्मासेन हाड हाडला म्रिडदा हाडदा हड्नोन माया लउ, ओच्छे म्रिडम्हेमेसेनोन हाड हाडला हेम्बोदा मान लउ।

6

आबा आमादेन कोलागदेसे लोप्तोःबा ताम

1 कोलागदे, एनीगदे प्रभुला म्हि तबासे लमा, हाडला आबा आमासे कुल्बा ताम ड्यान्गो। तिग्दा भिसम आबा आमासे कुल्बा ताम ड्यान्बान ज्यबा हिन्ना।* 2 “हाडला आबा आमादा मान लउ” चु चा परमेश्वरसे मोशादा पिन्बा ठिम न्हडरी परमेश्वरसे कबुल लसी जम्मान भन्दा डाच्छा कुल्बा ताम हिन्ना।* 3 थे कबुल चा एनीगदेसे आबा आमादा मान लजी भिसम जम्बुलिडरी एनीगदेदा ज्यबा तसी छेहेड्बा हिन्ना।

4 आबा आमागदे, एनीगदेसेनोन हाडला कोलागदेदा बोमो खना थालउ। तर थेनीगदेदा तहरी थान्सी प्रभुला बचन लोपबान छर्ना लउ।*

नोकरदेन मालिकगदेसे लोप्तोःबा ताम

5 नोकरगदे, एनीगदेसे ख्रीष्टदा सेमहेन्सेन मान लबा हड् लसी जम्बुलिडरी मुबा हाडला मालिकदाएनोन मान लउ। ओच्छे थेनीगदेसे कुल्बा ताम ड्यान्गो। 6 एनीगदेसे मालिकगदेला डाच्छा थेनीगदेदा ताड्ना लबारी जे गे लबा आहिन, तर ख्रीष्टला गे लबागदेसे हड् लसी एनीगदेसे सेमहेन्सेन परमेश्वरसे म्हनबा अन्छार गे लउ। 7 ओच्छे म्हिगदेदा उन्बाला लागिरी आहिन, तर प्रभुला लागिरी हड् लसी सेमहेन्सेन ज्यना लसी गे लउ। 8 थेतबासेलमा एनीगदे नोकर हिन्सै आहिन्सै ज्यबा गे लबा म्हिसे प्रभुग्याम थे अन्छारलान इनाम याड्ला भिबा ताम एनीगदेदा थानोन मुला।*

9 थेहड् लसीन मालिकगदेसेनोन हाडला नोकरगदेदा आज्यबा व्यवहार थालउ। तिग्दा भिसम एनीगदे न्हीलान मालिक स्वर्गरी मुला। थेसे निसाफ लबा धुइरी खालैला ली च्यासी आल।*

परमेश्वरसे पिन्बा हतियार

* 5:22 कल ३:१८; १ पत्रु ३:१ * 5:25 कल ३:१९; १ पत्रु ३:७ * 5:31 उत्प २:२४ * 6:1 कल ३:२० * 6:2 प्रस्था २०:१२; व्यव ५:१६ * 6:4 कल ३:२१ * 6:8 कल २:२२-२५ * 6:9 व्यव १०:१७; कल ३:२५; ४:१

10 दाहेन्से एनीगदे प्रभुदेन गिक तसी थेला घेन शक्तिग्याम भड्सी चिउ। 11 ओच्छे शैतानसे एनीगदेदा फसब लबारी म्हाइबा जुक्तिगदेदा ढाबारी सेनासे हड् लसी परमेश्वरसे पिन्बा जम्मान हतियारगदे थोगो। 12 तिग्दा भिसम य्हाड म्हिदेन लडाइ लबारी आहिन, तर जम्मान शासन लबा शक्तिगदेदेन लडाइ लबारी हिन्ना। थेहड् लसीन चु धोपधोप्बा जम्बुलिडरी शासन लबा शक्तिगदेदेन मुरी मुबा जम्मान म्हडला आत्मागदेला शक्तिदेन लडाइ लबारी हिन्ना। 13 थेतबासेलमा परमेश्वरसे पिन्बा जम्मान हतियारगदे एनीगदेसे सदन थोजी भिसम शैतानना सेना छेबारी खबा धिनरीनोन एनीगदे थेदेन छ्याम छेबारी खम्ला। ओच्छे लडाइ ढासीनोन एनीगदे भड्बा तसी चिखम्ला।

14 थेतबासेलमा सेनागदेसे क्रेप्सरी पेटी खीबा हड् लसी एनीगदेसे हाडदा सत्यसे खीगो। ओच्छे थेनीगदेसे कुरी पाता थान्बा हड् लसी एनीगदेसेनोन परमेश्वरदा सेम निबा बानीबेहोर थोसी तयार तसी चिउ।* 15 ओच्छे लखम क्वान्बा हड् लसी शान्ति पिन्बा थार्बा पिन्बा समाचार थोसी तयार तउ।* 16 ओच्छे अर्गु ताम चा एनीगदे सदन विश्वासला ढाल थोसी चिउ। थेहड् लसी चिजी भिसम शैतानसे पुइखबा मेला बान एनीगदेसे साइखम्ला। 17 थेहड् लसीन परमेश्वरसे एनीगदेदा पिन्बा थार्बादा सेनागदेसे टोप कूबा हड् लसी सदन कूसी चिउ। ओच्छे परमेश्वरला आत्माला तरवार थोगो। थे तरवार चा परमेश्वरला बचन हिन्ना।*

18 थेतबासेलमा परमेश्वरला आत्माग्याम एनीगदेसे सदन जम्मान सहेला लागिरी प्रार्थना लउ। चुहड् लसीन जम्मान परमेश्वरला म्हिगदेला लागिरीनोन सदन झन्सी प्रार्थना लउ।

19 ओच्छे डाइ ताम पाड्बारी छ्याइमा तिग ताम पाड्तो:बा थे ताम परमेश्वरसेन लोपगै। ओच्छे म्हिसे था आयाड्बा थार्बा पिन्बा समाचार आलोड्नान स्य्हान्दो म्हिगदेदा घोना लबारी खमगै भिसी डाला लागिरी प्रार्थना लसी पिन्गो। 20 चुनोन थार्बा पिन्बा समाचारला लागिरी झ्याल्खानरी परब तबा डा ख्रीष्टला दूत हिन्ना। ओच्छे डाइ आलोड्नान चुला बारेरी पाड्बारी खमगै भिसी प्रार्थना लसी पिन्गो।

चिठीला थुमरी भिबा ताम

21 प्रभुला गेरी विश्वास लखम्बा डन्से माया लबा आले तुखिकसदा डाइ एनीगदे मुबा ग्लारी पुइखबा मुला। ओच्छे डादा खाहड्बा मुला भिबादेन डाइ तिग लबान मुला भिबा जम्मान ताम थेसेन एनीगदेदा पाड्ला।* 22 ओच्छे चुरी डन्दा खाहड्बा मुला भिबा ताम था याड्सी एनीगदेसे आँट याड्गै भिसी डाइ एनीगदे मुबा ग्लारी थेदा पुइखबा हिन्ना।* 23 ख्रीष्टदा विश्वास लबा ज्योज्यो आले नाना आडा जम्मादान य्हाडला परमेश्वर आबादेन प्रभु येशू ख्रीष्टग्याम विश्वासरी कोड्सी मायादेन शान्ति याड्गै। 24 थेहड् लसीन य्हाडला प्रभु येशू ख्रीष्टदा जुकजुकधोना माया लबागदेदेन छ्याम परमेश्वरला दयामाया तगै।

* 6:14 यशै ११:५; ५९:१७ * 6:15 यशै ५२:७ * 6:17 यशै ५९:१७ * 6:21 मुल २०:४; २ तिमो ४:१२ * 6:22 कल ४:७-८

पावलसे फिलिप्पीला विश्वासीगदेदा भिबा चिठी चु चिठीला बारेरी पाड्तोःमा

भिबा म्हि: येशूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हिसे हो लबा मुबा (फिलिप्पी १:१)।

भिबा ग्ला: रोम शहरला झ्यालखानग्याम भिबा मुबा।

भिबा साल: ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भिबा मुबा।

खाल्दा भिबा: फिलिप्पी शहररी मुबा विश्वासीगदेदा भिबा मुबा। (मुल चेला १६:११-४०)

फिलिप्पी शहर चा माकेडोनिया अञ्चलला रोम यहुल्साला मुल शहर मुबा। चु शहर दान्दे यूरोपरी परब तमुला। चु चिठी भिबा धुइरी पावल झ्यालखानरी मुबा। थे धुइरी फिलिप्पी शहररी मुबा मण्डलीरी लुसीला ताम लोपबासे लमा पावलदा दुख इहम्बा मुबा। तर पावलला कोड्बा विश्वाससे लमा चु चिठीसे फिलिप्पीला विश्वासीगदेसे विश्वासरी आँट याड्जी।

चु चिठी चा फिलिप्पीला विश्वासीगदेदा धन्यवाद पिन्बाला लागिरी भिबा मुबा। थेनीगदेसे पावलदा खाँचो तबा धुइरी भेटी पुइसी हो लबा मुबा। ओच्छे थेनीगदेदाएनोन दुख तबा धुइरी पावलसे हाडदेन थेनीगदेदा विश्वासरी कोड्ना लबारीदेन आँट पिन्बाला लागिरी चु चिठी भिबा मुबा। हाड जे चबा थुड्बा लम्याड्सम तला भिसी म्हन्बा भन्दा सोजो तसी येशूला हड्बान बानीबेहोर थोगै भिसी पाड्बा मुला। ख्रीष्टदेन छ्याम गिक तबा थेनीगदेला बानीबेहोर चा परमेश्वरग्याम याड्बा मोलम हिन्ना। चु मोलम चा थेनीगदेसे यहूदीगदेला ठिम अन्छार भ्रबासे लमा याड्बा आहिन, तर थेनीगदेसे लबा विश्वासग्याम याड्बा हिन्ना भिसी पावलसे थेनीगदेदा ढन्ना लबा मुला। ओच्छे ख्रीष्टदा विश्वास लबागदेसे याड्बा ताड्बा तामदेन शान्तिला बारेरी पावलसे भिबा मुला।

चु चिठीरी ख्रीष्टदा विश्वास लबागदेसे याड्बा ताड्बा ताम, आँट, गिक तबादेन सेमहेनसेन गे लबा तामगदेला बारेरी पाड्बा मुला। ओच्छे चु चिठीरी पावलसे फिलिप्पीला विश्वासीगदेदा गाते माया लमुला भिबा ताम उन्बा मुला।

मुल तामगदे

फ्याफुल्बादेन प्रार्थना १:१-११

पावलदा तबा तामगदे १:१२-२६

ख्रीष्टदेन छ्याम मुबा जुनी १:२७-१:१८

तिमोथीदेन इपाफ्रोडिटस २:१९-३०

होशियार तना लबा तामगदे ३:१-४:९

भेटीला लागिरी धन्यवाद पिन्बा ४:१०-२०

चिठीला थुमरी भिबा ताम ४:२१-२३

पावलसे फिलिप्पीला विश्वासीगदेदा भिबा चिठी

पावलसे फिलिप्पीला विश्वासीगदेदा फ्याफुल्बा

1 लासू, ख्रीष्ट येशूदा तेन्बा डा पावलदेन तिमोथीग्याम फिलिप्पीरी मुबा ख्रीष्ट येशूदा विश्वास लबा परमेश्वरला म्हिगदेदेन मण्डलीदा च्याबा म्हि ओच्छे मण्डलीरी हो लबागदेदा फ्याफुल्ला!*

2 यहाडला परमेश्वर आबादेन प्रभु येशू ख्रीष्टग्याम एनीगदेदा दयामायादेन शान्ति तगै।

पावलसे लबा प्रार्थना

3 एनीगदेदा ढन्मा डाइ डाला परमेश्वरदा सदन धन्यवाद पिन्बा मुला। 4 डाइ प्रार्थना लबा धुइरी सदन एनीगदेला लागिरी ताड्सी ताड्सी प्रार्थना लमुला। 5 तिग्दा भिसम थार्बा पिन्बा समाचार थेःना

* 1:1 मुल १६:१२

लबाला लागिरी डाच्छाहेन्से दान्देधोना एनीगदेसे सेम गिक लसी डादा हो लबा मुला। ⁶ परमेश्वरसे एनीगदेला गुडरी शुरु लबा ज्यबा गे येशू ख्रीष्ट फेपखबा धुइधोनारी थेसेन पूरा लला भिबा ताम डादा पूरा विश्वास मुला।

⁷ डाइ एनीगदेला बारेरी चुहड्बा ताम म्हन्बाएनोन ठीक हिन्ना। एनीगदे सदन डाला सेमरी मुला। तिग्दा भिसम डा झ्याल्खानरी मुबा धुइरीनोन ओच्छे थार्बा पिन्बा समाचार जोगब लबारीदेन स्य्हान्दो म्हिगदेदा थेःना लबा चु गे न्हीरीन परमेश्वरला दयामायारी एनीगदेसे सेम गिक लसी डादा हो लबा मुला। ⁸ डाइ ख्रीष्ट येशूला मायाग्यामसे एनीगदे जम्मादान गाते ढन्बा मुला भिबा ताम परमेश्वरदान था मुला।

⁹ परमेश्वरग्याम ज्ञान बुद्धि याइसी एनीगदेला माया झन झन लहेबान निगै भिसी डाइ प्रार्थना लबा मुला। ¹⁰ चुहड् लजी भिसम एनीगदेसे जम्मान भन्दा ज्यबा ताम तिग हिन्ना, थे फेबारी खम्ला। ओच्छे ख्रीष्ट फेपखबा धुइला लागिरी एनीगदे तिगै दोष आरेबा चोखो म्हि दोला। ¹¹ परमेश्वरदा मानदेन जयजयकार लबाला लागिरी येशू ख्रीष्टसे पिन्बा परमेश्वरदा सेम निबा बानीबेहोरसे एनीगदेला सेम प्लिङ्गै।

पावल झ्याल्खानरी परब तबासे लमा थार्बा पिन्बा समाचार ल्हानान ग्लारी थेःबा

¹² ज्योज्यो आले नाना आडागदे, डाइ नाबा चु दुखग्याम थार्बा पिन्बा समाचार थेःना लबा गे झन ल्हानान तबा मुला भिबा ताम एनीगदेसे था याइगै भिसी डाइ म्हन्बा मुला। ¹³ ख्रीष्टला बारेरी थेःना लबासे लमान डा झ्याल्खानरी परब तबा हिन्ना भिसी ग्लेखाडला जम्मान सिपाहीगदेदेन अर्गु जम्मान म्हिगदेसे था याइसी जिन्बा मुला।* ¹⁴ डा झ्याल्खानरी परब तबासे लमा ल्हानान विश्वासीगदे प्रभुरी कोड्बा मुला। ओच्छे थेनीगदेसे आलोङ्गान परमेश्वरला बचन थेःना लबारी आँट याइबा मुला।

¹⁵ हिन्बाम कोइ कोइसे चा डाह लसी स्य्हान्दोसे भन्दा डाइ ज्यबा गे लबा मुला भिसी उन्बारी म्हाइमुला, तर स्य्हान्दोगदेसे चा ज्यबा सेमसे ख्रीष्टला बारेरी थेःना लबा मुला। ¹⁶ थार्बा पिन्बा समाचार थेःना लबाला लागिरीन परमेश्वरसे डादा धम्बा हिन्ना भिसी था याइबागदेसे चा माया लसी सेमहेन्सेन चु गे लबा मुला। ¹⁷ डाह लबागदेसे चा ज्यबा सेमसे आहिन। तर झ्याल्खानरी डाइ अझ ल्हानान दुख याइगै भिसी हाडसे हाडदान घेन सहोबा सेमसे ख्रीष्टला बारेरी पाड्बा हिन्ना। ¹⁸ ज्यबा सेमसे लसै आज्यबा सेमसे लसै ठीकनोन मुला, जस्तो लसीन ख्रीष्टला बारेरी पाइसी भ्रतोःबा हिन्ना।

चु तामरी डा ल्हानान ताड्बा मुला। ¹⁹ हिन्ना डा ताड्बा। तिग्दा भिसम एनीगदेसे लबा प्रार्थनादेन येशू ख्रीष्टला आत्मासेन हो लसी चु दुखग्याम फेला भिबा ताम डादा था मुला।* ²⁰ डाइ सेमहेन्सेन घेन आश लसी चिबा मुला, डाइ लतोःबा जम्मान गेरी डा खाइमै पेःआतोः। तर डादेन छ्याम ल्हानान आँट मुला। ओच्छे डा सिसै सोसै सदाला हड् लसीन डाला चु ज्यानसे ख्रीष्टलान मान लला। ²¹ तिग्दा भिसम डा सोबा चा ख्रीष्टदा तेन्बाला लागिरी हिन्ना। ओच्छे सिबा चा डाला लागिरी झन ज्यबा ताम हिन्ना। ²² डाला चु ल्हुइ सोतेधोना डाइ अझ ज्यबा गे लला। तर डा सिबा कि सोबा चु न्ही न्हडरी खजिबा चा धम्तोःबा थे ताम डादा था आरे। ²³ डादा दोधार तबा मुला। चु जम्बुलिड ख्लासी ख्रीष्टदेन छ्याम चिबा सेमएनोन ल्हानान मुला। तिग्दा भिसम डाला लागिरी चु ल्हानान ज्यबा ताम हिन्ना। ²⁴ तर एनीगदेला लागिरी चा डा सोसीन चितोःबा मुला। ²⁵ थेतबासेलमा एनीगदेदा विश्वासरी लहेना लबारीदेन ताइना लबारी डा अझ सोसी एनीगदे जम्मानदेन छ्याम चिला भिबा डादा पक्का था मुला। ²⁶ दाहेन्से डा दोःसी एनीगदेदेन छ्याम हुप तमा डाग्याम ख्रीष्टसे लबा गे म्हाइसी एनीगदे अझ ख्रीष्ट येशूदेन छ्याम गिक तसी ल्हानान ताइम्याइला।

²⁷ मुल ताम चा चुनोन हिन्ना, जे तसैनोन एनीगदेला बानीबेहोर ख्रीष्टला थार्बा पिन्बा समाचार अन्छार ततोःला। थेतबासेलमा डा एनीगदेदेन छ्याम हुप तसै आतसै थार्बा पिन्बा समाचाररी स्य्हान्दो म्हिगदेसे विश्वास लगै भिसी एनीगदे सेम गिक तसी ढिक्सी दुख लबान गे लबा मुला

* 1:13 मुल २८:३० * 1:19 यूह १४:१६-२१; १६:१२-१५

भिबा ताम डाइ थे:म्याङ्गै। 28 ओच्छे बिरोध लबा म्हिगदे म्हाङ्गी एनीगदे थालोङ्गो। चु थेनीगदेला लागिरी चा नाश तबाला चिनु हिन्ना। तर एनीगदेला लागिरी चा थार्बा याङ्गला भिसी म्हाङ्गबा चिनु हिन्ना। थार्बा याङ्गबा चा परमेश्वरग्यामनोन हिन्ना। 29 एनीगदेदा पिन्बा मौका ख्रीष्टदा विश्वास लबा जे आहिन, तर ख्रीष्टला लागिरी दुख नाबारीनोन हिन्ना। 30 डाइ डाच्छा नाबा दुख एनीगदेसे म्हाङ्गबा मुबा, थे दुख डाइ दान्देनोन नाबान मुला भिसी एनीगदेसे थे:बा मुला। चुनोन दुख एनीगदेसेनोन नाबान मुला।*

2

1 तिग ख्रीष्टदेन छ्याम गिक तबासे लमा एनीगदेसे आँट याङ्गबा मुला? ओच्छे तिग थैला मायासे एनीगदेसे हो याङ्गबा मुला? तिग परमेश्वरला आत्मादेन छ्याम संगती लबा मुला? तिग एनीगदेसे हाड हाड न्हडरी सेमहेन्सेन दया लबा मुला? 2 थेहङ्ग भिसम एनीगदे जम्मान सेम गिक तसी हाड हाड न्हडरी माया लउ, ओच्छे ढिक्सी छ्याम छ्यामनोन गे लसी डादा ताङ्गना लउ। 3 ओच्छे हाडला जे ग्याम च्यासी गे लबादेन हाड जे घेन भिसी थाम्हन्गो। तर हाड भन्दा स्यूहान्दोदा घेन म्हन्सी सोजो तसी चिउ। 4 एनीगदे जम्मासेन हाडदा जे ज्यबा तगै भिसी थाम्हन्गो। तर स्यूहान्दोदाएनोन ज्यबा तगै भिसी म्हन्गो।

- 5 एनीगदेसे ख्रीष्ट येशूला हङ्गबान सेम थोगो।
- 6 येशू ख्रीष्ट डाच्छाहेन्सेन परमेश्वर मुबा।
तसैनोन थे परमेश्वर दोबारी आम्हाङ्गीनी।
- 7 बरु स्वर्गरी मुबा हाडला जम्मान सहे ख्लासी
म्हि दोसी जम्बुलिङ्गी केजी।
ओच्छे नोकर हङ्गबान दोजी।
- 8 थे हाडनोन म्हि दोसी फेपखसैनोन सोजो तसी
परमेश्वरसे कुल्बा ताम ड्यान्सी
क्रुसरी सिबारीनोन तयार तजी।
- 9 थेतबासेलमा परमेश्वरसे थेदा जम्मान भन्दा घेन सहोसी
जम्मान सहेगदेला भन्दा घेन मिन थान्जी।
- 10 थेतबासेलमा स्वर्गदेन जम्बुलिङ्ग ओच्छे जम्बुलिङ्ग धिरी मुबा
जम्मासेन येशूदा मान लबारी पुइ जूतो:ला।
- 11 थेहङ्ग लसीन परमेश्वर आबाला मानदेन जयजयकार लबाला लागिरी
जम्मासेन येशू ख्रीष्टनोन प्रभु हिन्ना भिसी पाङ्गतो:ला।*

नाडसलसे हङ्ग लसी य्हाल तना लउ

12 डाला सेम निबा ह्योगदे, डा एनीगदेदेन छ्याम मुबा धुङ्गी एनीगदेसे डाइ पाङ्गबा ताम ड्यान्मुबा। दान्दे डा एनीगदेदेन छ्याम आरेमा झन डाइ पाङ्गबा ताम ड्यान्बा चा घेन ताम हिन्ना। परमेश्वर म्हाङ्गी लोङ्गो ओच्छे थेदा मान लसी एनीगदेसे याङ्गबा थार्बा अन्छारला गे लउ। 13 तिगदा भिसम परमेश्वरसे एनीगदेदा थेसे कुल्बा ताम ड्यान्बा सेमदेन थेदा ताङ्गना लबा शक्ति पिन्सी एनीगदेला गुङ्गी गे लबान मुला।

14 थेतबासेलमा गनगनदेन कल आलना जम्मान गे ढिक्सी लउ। 15 थेहङ्ग लजी भिसम एनीगदे पापीदेन न्होङ्गबा म्हिगदेला गुङ्गी चोखोदेन तिगै दोष आरेबा म्हि तसी परमेश्वरला सन्तान दोला। ओच्छे सारसे मुरी य्हाल तना लबा हङ्ग लसी एनीगदेसे जम्बुलिङ्गी य्हाल य्हाल तना लला।* 16 एनीगदेसे थेनीगदेदा थार्बा पिन्बा ख्रीष्टला समाचार थे:ना लजी भिसम ख्रीष्ट फेपखबा धुङ्गी डाइ दुख लसी लबा गे खेरोरी आनिनी भिसी डा ल्हानान ताङ्ग्याङ्गला। 17 ओच्छे एनीगदेला विश्वासग्याम एनीगदेला ल्हुइ परमेश्वरदा फुल्बा बलि हङ्गबान दोबा मुला। डाला ल्हुइएनोन

* 1:30 मुल १६:१६-४०; १ थेस २:२ * 2:11 यशै ४५:२३ * 2:15 वयव ३२:५

एनीगदेला ल्हुइदेन छ्याम बलि हड लसी फुलतोःसैनोन डा ताड्ला। ओच्छे एनीगदे जम्मानदेन छ्याम डा सेमहेन्सेन ताड्ला। 18 थेहड लसीन एनीगदे ताड्गो, ओच्छे डादाएनोन ताड्ना लउ।

तिमोथीदेन इपाफ्रोडिटस

19 डाइ तिमोथीदा एनीगदे मुबा ग्लारी योनान पुइखला भिसी प्रभु येशूथोरी आश लबा मुला। चुहड लसी थेग्याम एनीगदेला बारेरी था याड्सी डा ताड्म्याड्ला। 20 तिमोथीसे हड लसी एनीगदेदा सेमहेन्सेन वास्ता लबा म्हि डादेन छ्याम स्य्हान्दो खालै आरे। 21 तिग्दा भिसम स्य्हान्दोगदेसे चा येशू ख्रीष्टला तामदा तिगै वास्ता आलना हाडला जे ग्याम च्यासी भ्रमुला। 22 तर तिमोथी खाहड्बा म्हि हिन्ना भिबा ताम एनीगदेदा थानोन मुला। तिग्दा भिसम झासे आबादा खाहड् लसी हो लमुला थेहड लसीन थेसे डादा थार्बा पिन्बा समाचार थेःना लबारी हो लबा मुला। 23 थेतबासेलमा डादा तिग तबा चीम, थे ताम था याड्मैछ्याम डाइ थेदा एनीगदे मुबा ग्लारी पुइखबा सेम मुला। 24 ओच्छे डाएनोन योनान खम्याड्ला भिसी प्रभुथोरीन भर लबा मुला।

25 एनीगदेसे डादा हो लबाला लागिरी पुइखबा प्रभुरी डाला आले, डादेन छ्याम ढिक्सी प्रभुला गे लबा ओच्छे डादा हो लबा ख्रीष्टला सिपाही इपाफ्रोडिटसदा एनीगदे मुबा ग्लारी पुइखनोन तोःला भिसी डाइ म्हन्बा मुला। 26 तिग्दा भिसम थेसेनोन एनीगदे जम्मानदेन छ्याम हुप तबारी ल्हानान सेम लबा मुला। थे आखम्बा मुला भिबा ताम एनीगदेसे थेःबासे लमा थेदा ल्हानान सुर्दा तबा मुला। 27 हिन्ना, थे ल्हानान आखम्ना सिबारीन छ्याइमुबा तर परमेश्वरसे थेदा दया लजी। थेदा जे आहिन, डादाएनोन दुखथोरी झन दुख थातगै भिसी परमेश्वरसे दया लजी। 28 थेतबासेलमा थेदा एनीगदे मुबा ग्लारी पुइखबारी डाइ ल्हानान सेम लबा मुला। तिग्दा भिसम थेदा दोःसी म्राड्माहेन्से एनीगदे ताड्ला ओच्छे डाला सुर्दाएनोन म्हाला। 29 एनीगदेसे थेदा प्रभुरी आले हड्बान म्हन्सी सेमहेन्सेन ताड्सी माया लउ। चुहड्बा म्हिगदेदा चा मान लनोन तोःला। 30 तिग्दा भिसम एनीगदेसे डादा लतोःबा हो लबाला लागिरी हाडला ज्यान्ना तिगै वास्ता आलना ख्रीष्टला गे लबाला लागिरी थे सिबारीन तयार तजी।

3

ल्हुइरी भर थालउ

1 दाहेन्से ज्योज्यो आले नाना आडागदे, प्रभुदेन गिक तबासे लमा एनीगदे ताड्गो। एनीगदेला लागिरी ताम गिकनोन घरिघरि भितोःसै डा छेर्बा आरे। तिग्दा भिसम चु एनीगदेला विश्वास जोगब लबाला लागिरी हिन्ना।

2 नइबा गे लबा नगी† हड्बा म्हिगदे म्राड्सी होशियार तसी चिउ। थेनीगदेसे खतना लतोःला भिसी पाड्सी भ्रमुला। 3 य्हाडसे मी परमेश्वरदा आत्माग्याम तेन्बा मुला। ओच्छे ख्रीष्ट येशूदेन छ्याम गिक तसी ताड्बा मुला। य्हाडसे लबा पक्का खतना चा चुनोन हिन्ना। थेतबासेलमा य्हाड म्हिगदेला गेथोरी भर लबा म्हि आहिन। 4 थेहड्बा म्हिगदेला गेथोरी भर लबा म्हि हिन्सम स्य्हान्दोसे भन्दा डाइ ल्हानान भर लखम्सेला मुबा। 5 तिग्दा भिसम डा इस्राएल य्हुलला बेन्यामीन वंशरी न्हबा म्हि हिन्ना। न्हसी भ्रेःरे तमाकुनु डाला खतना तबा हिन्ना। डा हिब्रूगदेलाएनोन हिब्रू हिन्ना, ओच्छे परमेश्वरसे मोशादा पिन्बा ठिम ड्यान्बा फरिसीएनोन हिन्ना।* 6 यहूदी धर्मलान ताम लबा हिन्सम डाइ हाडला धर्मदा जोगब लबारी मण्डलीदा गाते ल्हानान दुख पिन्जी। ओच्छे ठिम अन्छार भ्रसी परमेश्वरदा सेम निबा म्हि दोबा हिन्सम डा तिगै दोष आरेबा म्हि हिन्ना।*

7 तर थे धुइरी डाइ लबा जम्मान गेगदेदेन म्हन्बा तामगदे डाला लागिरी ज्यबान हिन्ना भिसी म्हन्बा मुबा। दान्दे थे जम्मान गेदेन म्हन्बा तामगदे ख्रीष्टला लागिरी तिगै गे आखेल्बा चीम भिसी डाइ था याड्जी। 8 चुदे जे आहिन, डाइ ख्रीष्ट येशूदा डाला प्रभु भिसी डोसेबा ज्ञान बुद्धिला डाच्छा मी थे जम्मान स्हे तिगै गे आखेल्बा चीम भिसी डाइ म्हन्बा मुला। ख्रीष्ट येशूदा अझ ज्यना लसी

† 3:2 यहूदीगदेसे अर्गु य्हुलला म्हिदा “नगी” भिसी पाड्मुबा तर पावलसे चुरी यहूदीगदेदा “नगी” भिसी पाड्बा हिन्ना। तिग्दा भिसम थेनीगदेला गे आज्यबा मुबा। * 3:5 मुल २३:६; २६:५; रोमी ११:१ * 3:6 मुल ८:३; २२:४; २६:९-११

डोसेखमगै भिसी डाइ थे जम्मान सहेदा नइबा गे आखेलबा सहे म्हन्सी खीष्टला लागिरी ख्लासी जिन्बा मुला।⁹ डा खीष्टदेन छ्याम गिक तगै भिसी डाइ म्हन्बा मुला। ओच्छे डा परमेश्वरदा सेम निबा म्हि दोबा चा डाइ ठिम ड्यानसी डा हाडनोन परमेश्वरदा सेम निबा म्हि दोबा आहिन। तर खीष्टदा विश्वास लबासे लमा परमेश्वरदा सेम निबा म्हि दोबा हिन्ना। डाला विश्वासदा च्यासी परमेश्वरसे डादा हाडदा सेम निबा म्हि सहोबा हिन्ना।¹⁰ डाइ खीष्टदा पूरान डोसेसी थेदा सिबाग्याम सोना लबा शक्तिदा था याड्खमगै, ओच्छे थे सिबा धुइरी थेसे नाबा हड्बान दुख डाइ नाबारी खमगै।¹¹ थेहड् लसीन तजी भिसम सिबाग्याम दोःसी सोखमगै भिसी डाइ म्हन्बा मुला।

याड्तोःबा सहे याड्बारी भड लउ

¹² डाइ जम्मान ताम याड्सी पूरान पाको म्हि दोबा मुला भिसी पाड्बारी छ्याइबा आहिन। तर चु जम्मान ताम याड्बाला लागिरी डाइ अड् भड लबान मुला। तिग्दा भिसम खीष्ट येशूसे चुलान लागिरी डादा डाच्छान धम्बा मुला।¹³ ज्योज्यो आले नाना आडागदे, चु जम्मान तामगदे याड्सी जिन्जी भिसी डाइ म्हन्बा आरे। तर गे गिक चा डाइ लबा मुला। थे गे चा तिग हिन्ना भिसम डाच्छाला तामगदेदा म्लेःसी लिच्छाला तामगदेदा जे च्यासी डा भ्रबान मुला।¹⁴ परमेश्वरसे खीष्ट येशूग्याम जुकजुकधोनाला जुनी पिन्बारी डादा ड्योइबा हिन्ना। स्वर्गला चु इनाम याड्बाला लागिरी डाइ भड लबान मुला।

¹⁵ यहाड आत्मारी पाको तबागदे जम्मासेन चुहड्बान सेम थोतोःला। एनीगदेसे कोइ कोइ तामला बारेरी चा अर्गु सेम थोबा मुसम परमेश्वरसे एनीगदेदा घोना लला।¹⁶ ओच्छे यहाडसे जुन ताम याड्बा मुला, थे तामरीन भ्रड।

¹⁷ ज्योज्यो आले नाना आडागदे, एनीगदेसेनोन डाइ लबा हड्बान लउ। ओच्छे डन्से लबा हड्बान गे लसी भ्रबा म्हिगदेदा च्यासी थेनीगदेसे लबा हड्बान गे लउ।*¹⁸ खीष्टसे क्रुसरी सिसी तिग लजी भिसी भ्रबा म्हिगदेला बारेरी डाइ एनीगदेदा लहानान रेम पाड्सी जिन्बा मुला। दान्देनोन डाइ डाला मी नाड मीखली थोसी एनीगदेदा पाड्बा मुला।¹⁹ थेनीगदे नाश तसी म्हासी निला। तिग्दा भिसम थेनीगदेला लहुइसे तिग म्हाइबा थेदान ल भिसी तेन्मुला। ओच्छे पेःबा खबा तामरीनोन थेनीगदे ताड्बा चीम। थेनीगदेला सेमएनोन चुनोन जम्बुलिडला तामगदेरी जे मुला।²⁰ तर यहाड मी स्वर्गला म्हि हिन्ना। थार्बा पिन्बा यहाडला प्रभु येशू खीष्ट स्वर्गग्याम फेपखला भिसी यहाडसे ग्याम च्यासी चिबा मुला।²¹ खीष्ट येशूसे जम्मान सहेदा हाडला तहरी भबा शक्तिग्याम यहाडला कमजोर लहुइदा थेला हड्बान यहाल यहाल्बादेन शक्तिशाली लहुइ सहोला।

4

¹ थेतबासेलमा डाला ज्योज्यो आले नाना आडागदे, एनीगदेदा डाइ माया लसी लहानान ढन्बा मुला। एनीगदेसे लमान डा लहानान ताड्म्याड्बा मुला, ओच्छे डाइ याड्बा इनाम भिबान एनीगदे हिन्ना। थेतबासेलमा डाला ह्योगदे, एनीगदे सदन चुहड् लसीन प्रभुदेन छ्याम गिक तसी चिउ।

आँट पिन्बा ताम

² इयोदियादेन सुन्तुखे, एनीगदे प्रभुदेन गिक तबासे लमा हाड हाड न्हडरी ढिक्सी चिउ भिबा डाला बिन्ती मुला।³ डाला विश्वास लखम्बा हो, एदा डाइ चु ताम पाड्ला, चु म्रिडम्हेमेगदेदा एसे हो लसी पिन्गो। तिग्दा भिसम थेनीगदेसे डादेन छ्याम थार्बा पिन्बा समाचार थेःना लबा गे लबा मुला। डादेन छ्याम जे आहिन, क्लेमेस भिबा म्हिदेन डाला अर्गु ह्योगदेदेन छ्यामएनोन थेनीगदेसे ढिक्सी गे लबा मुला। परमेश्वरसे थेनीगदे जम्मालान मिन जुकजुकधोनाला जुनी पिन्बारी हाडला किताबरी भिसी थान्बा मुला।

⁴ ओच्छे प्रभुदेन गिक तबासे लमा एनीगदे ताड्गो, डाइ दोःसीनोन पाड्ला एनीगदे सदन ताड्गो।⁵ एनीगदेला सोजो बानीबेहोर जम्मान म्हिगदेसे था याड्गै। तिग्दा भिसम प्रभु फेपखसी जिन्बा मुला।⁶ एनीगदेसे तिगै तामरी सुर्दा थालउ। तर जम्मान तामला लागिरी प्रार्थना लबान धन्यवाद पिन्सी

* 3:17 १ कोर ४:१६; ११:१

परमेश्वरदेन छ्याम बिन्ती लउ। ⁷ म्हिसे था आयाड्बा परमेश्वरसे पिन्बा शान्तिसे एनीगदे जम्मालान म्हन्बा तामदेन सेमदा ख्रीष्ट येशूदेन छ्याम गिक सहोसी जोगब लसी थान्ना।

⁸ दाहेन्से ज्योज्यो आले नाना आडागदे, एनीगदेसे जुन ताम सत्य मुला, जुन ताम मान याड्बा खाल्ला मुला, जुन ताम ठीक मुला, जुन ताम चोखो मुला, जुन ताम ताड्बा खाल्ला मुला, जुन ताम ढिक्बा मुला ओच्छे जुन ताम जम्मादान सेम निबा खाल्ला मुला थेनोन तामरी सेम लउ। ⁹ एनीगदेसे जुन ताम डाग्याम लोपजी, जुन ताम डाग्याम याड्जी, जुन ताम थे:जी ओच्छे जुन ताम म्राड्जी, थेनोन ताम अन्छार भ्रउ। चुहड् लजी भिसम शान्ति पिन्बा परमेश्वर एनीगदेदेन छ्याम तला।

भेटीला लागिरी धन्यवाद

¹⁰ एनीगदेसे ल्हानान धिन लिच्छा डादा दो:सी ढन्बासे लमा डा प्रभुदेन छ्याम ल्हानान ताड्बा मुला। डाला लागिरी एनीगदेसे ल्हानान सुर्दा लबा मुबा। तर एनीगदेसे डादा पिन्बारी मौका आयाड्नी। ¹¹ डादा खाँचो तजी भिसी पाड्बा आहिन। तिग्दा भिसम जस्तोन धुइरी सन्तोक लसी चितो:मुला भिसी डादा था मुला। ¹² ओच्छे खाँचो तसै आतसै खाहड् लसी भ्रतो:ला भिसी डादा था मुला। थेहड् लसीन चम्याड्सै चआम्याड्सै, ल्हाना मुसै च्याड्ना मुसै जस्तोन धुइरी सन्तोक लसी चितो:मुला भिसी डादा था मुला। ¹³ ख्रीष्टसे पिन्बा शक्तिग्यामनोन डाइ चु जम्मान ताम लबारी खम्ला।

¹⁴ तसैनोन एनीगदेसे डादा दुखरी हो लसी ज्यबा लजी। ¹⁵ डाच्छा डाइ एनीगदेदा थार्बा पिन्बा समाचार थे:ना लसी माकेडोनिया भिबा ग्लाग्याम निबारी छ्याइमाएनोन चुहड् लसी किन्बा पिन्बा गे लबा चा एनीगदे फिलिप्पीला म्हिगदे बाहेक अर्गु खजिबै मण्डली आरेमुबा। थे ताम एनीगदेदा थानोन मुला। ¹⁶ थेहड् लसीन डा थेसलोनिके भिबा ग्लारी मुबा धुइरीनोन एनीगदेसे ल्हानान रेम चुहड् लसीन डादा हो लमुबा। ¹⁷ डाइ चु ताम पाड्सी एनीगदेग्याम भेटी किन्बारी म्हाइबा आहिन। तर एनीगदेसे डादा लबा ह्योग्याम परमेश्वरसे मोलम पिन्गै भिबा डाला आश मुला।

¹⁸ एनीगदेसे इपाफ्रोडिटसदा पुइखबा भेटीग्याम डादा तो:तेधोना छ्योबा मुला। थे भेटी चा परमेश्वरदा सेम निबा बासना खबा बलि दोबा मुला। थे म्राड्सी परमेश्वर ल्हानान ताड्बा मुला। ¹⁹ ख्रीष्ट येशूग्याम डाला परमेश्वरसे हाडला शक्तिग्याम ताड्सी ताड्सी एनीगदेदा तो:बा जम्मान सहेगदे थेला सम्पत्तिग्याम पिन्ना। ²⁰ य्हाडला परमेश्वर आबाला सदन मानदेन जयजयकार तगै। आमेन।

चिठीला थुमरी भिबा ताम

²¹ ख्रीष्ट येशूदेन छ्याम गिक तसी चिबा परमेश्वरला जम्मान म्हिगदेदा फ्याफुल्ला। चुरी डादेन छ्याम मुबा ज्योज्यो आले नाना आडागदेसेनोन एनीगदेदा फ्याफुल्बा मुला। ²² परमेश्वरला म्हिगदेसे ओच्छे खास लसी रोमी ग्याल्बो कैसरला गे लबा म्हिगदेसेनोन एनीगदेदा फ्याफुल्ला भिसी पाड्बा मुला।

²³ प्रभु येशू ख्रीष्टला दयामाया एनीगदेदेन छ्याम तगै।

पावलसे कलस्सीला विश्वासीगदेदा भिबा चिठी चु चिठीला बारेरी पाङ्तोःमा

भिबा म्हि: येशूला मुल चेला पावलसे भिबा मुबा। चु चिठी भिबाला लागिरी पावलदा तिमोथी भिबा म्हिसे हो लबा मुबा (कलस्सी १:१)।

भिबा ग्ला: रोम शहरला झ्यालखानग्याम भिबा मुबा।

भिबा साल: ओस्पन ईश्वी संवत् ६१-६३ (विक्रम संवत् ११८-१२०) सालला गुडरी भिबा मुबा।

खाल्दा भिबा: कलस्सी शहररी मुबा विश्वासीगदेदा भिबा मुबा।

कलस्सी भिबा शहर एफिसस भिबा शहरला स्यारपट्टि परब तबा एशिया अञ्चलला शहर गिक मुबा। चु मण्डली पावलसे शुरु लबा मण्डली चा आहिन, तसैनोन चु शहर थे बास चिबा ग्लाला डामरीन मुबासे लमा डाइ हो लतोःला भिसी थेसे म्हन्बा मुबा। चु मण्डलीरी प्रभुला गे लबाला लागिरी पावलसे एफिसस शहरग्याम म्हिगदे पुडबा मुबा। कलस्सीला मण्डलीरी लुसीला ताम लोप्बा म्हिगदेसे परमेश्वरदा डोसेबाला लागिरीदेन थाबा याड्बाला लागिरी स्यहान्दो आत्मादेन शक्तिगदेदा तेन्तोःला भिसी पाङ्मुबा। चु ताम पावलदाएनोन था मुबा। चु तामगदे बाहेक थे लुसीला ताम लोप्बा म्हिगदेसे खतना लतोःला, ओच्छे चबा थुड्बादेन अर्गु तामगदेलाएनोन ठिम अन्छार लतोःला भिसी लोप्मुबा।

पावलसे कलस्सीला विश्वासीगदेदा थेहड्बा लुसीला तामला बिरोध चा सत्य विश्वासग्याम लतोःला भिसी चिठी भिबा मुबा। थेसे भिबा चु चिठीला मुल ताम चा येशू ख्रीष्टसे पूरान थाना लखम्ला, ओच्छे अर्गु तामदेन ठिमसे चा म्हिगदेदा ख्रीष्टग्याम थारेड तना लमुला। परमेश्वरसे जम्बुलिडला म्हिगदे येशूग्यामसेन सहोजी ओच्छे येशूग्यामनोन थेनीगदेदा हाड मुबा ग्लारी भजी। थेतबासेलमा येशू ख्रीष्टग्याम जे जम्बुलिडला जम्मान म्हिगदेसे थाबा याड्ला। ओच्छे पावलसे जम्मान विश्वासीगदेदा विश्वासरी भिबाला लागिरी तोःबा जम्मान तामगदे घोना लबा मुला।

चु चिठी तुखिकस भिबा म्हिसे कलस्सी शहररी भोर्सी निबा मुबा। ओच्छे थेदेन छ्याम फिलेमोनना नोकर ओनेसिमसएनोन निबा मुबा। थेला लागिरी पावलसे फिलेमोनदा चिठीएनोन भिबा मुबा।

मुल तामगदे

फ्याफुल्बादेन प्रार्थना १:१-१४

ख्रीष्ट जम्मान भन्दा घेन १:१५-२:१९

ख्रीष्टदेन छ्याम गिक तसी याड्बा छार जुनी २:२०-४:६

चिठीला थुमरी भिबा ताम ४:७-१८

पावलसे कलस्सीला विश्वासीगदेदा भिबा चिठी

1-2 लास्सो, कलस्सेरी मुबा परमेश्वरला म्हिगदेदा परमेश्वरसे हाडला समाचार थेःना लबारी धम्बा डा ख्रीष्ट येशूला मुल चेला पावलदेन यहाडला आले तिमोथीग्याम फ्याफुल्ला! थेरी मुबा परमेश्वरला म्हिगदे ख्रीष्टदेन छ्याम गिक तबा विश्वासी ज्योज्यो आले नाना आडागदेदा यहाडला परमेश्वर आबादेन ख्रीष्ट प्रभुग्याम दयामायादेन शान्ति तगै।

धन्यवाददेन प्रार्थना

3 डन्से एनीगदेला लागिरी प्रार्थना लबा धुडरी यहाडला प्रभु येशू ख्रीष्टला आबा परमेश्वरदा सदन धन्यवाद पिन्बा मुला। 4 तिग्दा भिसम एनीगदेसे ख्रीष्ट येशूदा विश्वास लबा तामदेन परमेश्वरला जम्मान म्हिगदे न्हडरी माया लसी ढिक्सी चिबा मुला भिबा ताम डन्से थेःबा मुला। 5 परमेश्वरसे स्वर्गरी एनीगदेला लागिरी जुकजुकधोनाला जुनी थान्बा मुला भिसी एनीगदेसे आश लबा मुला।

थेतबासेलमा एनीगदे चुहड् लसी विश्वास लसी हाड हाड न्हडरी माया लसी ठिक्सी चिबा हिन्ना। एनीगदेसे लबा आशला तामला बारेरी एनीगदेसे डाच्छान थार्बा पिन्बा समाचार सत्य बचनग्याम थेःबा मुला। 6 चुनोन थार्बा पिन्बा समाचार थेःसी, परमेश्वरला दयामायाला बारेरी सत्य ताम ज्यना लसी घोमाकुनुहेन्से एनीगदे न्हडरी ख्रीष्टदा विश्वास लबा म्हिगदे बढब तबा मुला। थेहड् लसीन जम्बुलिडला जम्मान ग्लारी थार्बा पिन्बा समाचार थेःसी ख्रीष्टदा विश्वास लबा म्हिगदे बढब तबान मुला। 7 चु थार्बा पिन्बा समाचार एनीगदेसे डन्से माया लबा हो इपाफ्रासग्यामसेन था याड्सी जिन्बा मुला। थे डन्देन छ्यामनोन ठिक्सी गे लमुला। थेतबासेलमा डन्ना साटोरी थेसे एनीगदेला गुडरीनोन सेमहेन्सेन ख्रीष्टला गे लबा विश्वास लखम्बा म्हि हिन्ना।* 8 ओच्छे परमेश्वरला आत्माग्याम एनीगदेसे हाड हाड न्हडरी लबा मायाला बारेरी थेसे डन्दा पाड्बा मुला।

9 थेतबासेलमा चु ताम थेःमाकुनुहेन्से डन्से एनीगदेला लागिरी प्रार्थना लबारी ख्लाबा आरे। परमेश्वरला आत्मासे पिन्बा ज्ञान बुद्धिग्याम एनीगदेसे तिग लगे भिसी परमेश्वरसे म्हन्बा मुला, थे जम्मान ताम ज्यना लसी घोबारी खम्गै भिसी बिन्ती लबा मुला। 10 थेहड् लसीन एनीगदेसे प्रभुदा सेम निबा बानीबेहोर थोसी सदन ज्यबा गे लखम्गै। एनीगदेला थेहड्बा गेग्याम प्रभु ताड्गै। ओच्छे परमेश्वरला बारेरी ज्ञन ज्यना लसी घोखम्गै। 11 एनीगदेदा जस्तोन दुख तसैनोन ताड्सी ताड्सी नाबाला लागिरी परमेश्वरला घेन शक्ति याड्सी भड्सी चिउ। 12 परमेश्वरसे य्हाल य्हाल्बा य्हुल्सारी चिबा हाडला म्हिगदेदा पिन्बा हक एनीगदेदाएनोन पिन्बा मुला। थेतबासेलमा थेहड्बा हक पिन्बा परमेश्वर आबादा सदन धन्यवाद पिन्गो। 13 थेनोन परमेश्वरसे य्हाडदा शैतानना धोपधोपबा य्हुल्साग्याम फेसी हाडसेन माया लबा झा ख्रीष्टला य्हुल्सारी भसी थान्जी। 14 ख्रीष्टसेन य्हाडला पापला दोष मेटब लसी य्हाडदा पापग्याम फेबा मुला।*

जम्मान भन्दा घेन ख्रीष्टनोन हिन्ना

15 खालैसेन म्राड्आखम्बा परमेश्वरला रूप ख्रीष्टनोन हिन्ना। थे परमेश्वरसे सहोबा जम्मान सहे भन्दा डाच्छाहेन्सेन मुबा। थेतबासेलमा परमेश्वरसे सहोबा जम्मान सहे भन्दा घेन ख्रीष्टनोन हिन्ना। 16 तिगदा भिसम स्वर्गदेन जम्बुलिडरी मुबा म्राड्खम्बा म्राड्आखम्बा जम्मान सहेगदे, ग्लेगदे मुसै, य्हुल्सागदे मुसै, शासन लबागदे मुसै, अधिकार याड्बागदे मुसै परमेश्वरसे ख्रीष्टग्याम सहोबा हिन्ना। ओच्छे परमेश्वरसे चु जम्मान ख्रीष्टलान लागिरी सहोबा हिन्ना। 17 जम्मान सहे सहोबा भन्दा डाच्छाहेन्सेन ख्रीष्ट मुबा। थेतबासेलमा जम्मान सहेगदे ख्रीष्ट येशूरीन छ्याबा मुला। 18 ख्रीष्ट हाडला लहुड मण्डलीला थोबो हिन्ना। ओच्छे लहुडला मुल हड्बा जम्मान सहेला मुल थेनोन हिन्ना। थेहड् लसीन सिबागदे न्हडग्याम जम्मान भन्दा डाच्छा सोबाएनोन ख्रीष्टनोन हिन्ना। थेतबासेलमा जम्मान सहेगदे भन्दा घेन ख्रीष्टनोन हिन्ना।* 19 परमेश्वरसे म्हन्बा अन्छार परमेश्वर हाडनोन थेला झा ख्रीष्ट न्हडरी तसी धन्छ्याबा मुला। 20 हाडला झा ख्रीष्ट क्रुसरी सिसी बगब लबा काग्यामसेन परमेश्वरसे स्वर्गदेन जम्बुलिडरी मुबा जम्मान सहेदा शान्ति पिन्जी। ओच्छे ख्रीष्टग्यामसे जम्मान सहेदा हाडलान सहोजी।*

21 डाच्छा एनीगदेला पापी सेमदेन पाप गेसे लमा एनीगदे परमेश्वरला शत्रु मुबा। थेतबासेलमान थे धुडरी एनीगदे परमेश्वरग्याम थारेड मुबा। 22 तर दान्दे परमेश्वरसे म्हन्बा अन्छार परमेश्वरला झा म्हि दोसी सिजी। चुग्यामसेन परमेश्वरसे एनीगदेदा हाडला होदेन तिगै दोष आरेबा चोखो म्हि सहोसी हाडला डामरी भबारी हिन्ना। 23 थेतबासेलमा एनीगदेसे लबा विश्वास आख्लाना विश्वासरी कोड्सी चिउ। ओच्छे एनीगदेसे थार्बा पिन्बा समाचार थेःबा धुडरी याड्बा आशदा थाम्लेःगो। तिगदा भिसम चु समाचार जम्बुलिडला जम्मासेन थेःसी जिन्बा मुला। थेतबासेलमा डा पावलएनोन चुनोन समाचार थेःना लबा म्हि दोबा मुला।

मण्डलीला लागिरी पावलसे लबा गे

* 1:7 कल ४:१२; फिले २३ * 1:14 एफि १:७ * 1:18 एफि १:२२-२३ * 1:20 एफि २:१६

24 दान्दे एनीगदेला लागिरी दुख नातोःसै डा ताड्बा मुला। तिग्दा भिसम डाइ ख्रीष्टसे नाबा हड्बा दुख अझ नातोःसेला मुला। थेतबासेलमा थेला ल्हुइ मण्डलीला लागिरी डाइ नातोःबा जम्मान दुख नाला। 25 परमेश्वरसे थेला मण्डलीरी गे लबा जिम्मा डादा पिन्बा मुला। डादा पिन्बा जिम्मा चा एनीगदेला लागिरी परमेश्वरला समाचार पूरान थेःना लबा हिन्ना। 26 चु दडबोहेन्सेन खालैसे घोबारी आखम्बा परमेश्वरला सेमला ताम हिन्ना। तर दान्दे चु परमेश्वरसेन हाडला म्हिगदेदा घोना लबा मुला। 27 म्हिसे था आयाड्बा परमेश्वरला सेमला ताम अर्गु य्हुलला म्हिगदेला लागिरी गाते उदेकला मुबा भिबा ताम घोना लबारी थेनीगदेदा धम्बा हिन्ना। थे परमेश्वरला सेमला ताम चा एनीगदेला सेमरी मुबा ख्रीष्ट हिन्ना। ओच्छे एनीगदेसे परमेश्वरदेन छ्यामनोन चिम्याड्बा भिसी लबा आश हिन्ना।

28 थेतबासेलमा डन्से जम्मान म्हिगदेदा ख्रीष्टला बारेरी पाड्बा मुला। ओच्छे ख्रीष्टदेन छ्याम गिक तबागदेदा पाको म्हि सहोसी परमेश्वरला डामरी भोर्बाला लागिरी थेनीगदेदा डन्ना ज्ञान बुद्धिसे खम्तेधोना लोप्सी होशियार तना लबा मुला। 29 चुला लागिरी डा न्हडरी मुबा ख्रीष्टला घेन शक्तिग्याम डाइ दुख लसी चु गे लबा हिन्ना।

2

1 एनीगदेदेन लाउडिकिया भिबा शहररी मुबा विश्वासीगदेला लागिरी ओच्छे डादेन छ्याम हुप आतबा म्हिगदेला लागिरी डाइ गाते दुख लसी गे लबा मुला भिबा ताम एनीगदेसे था याङ्गै। 2 डाइ चुहड् लसी गे लबा चा एनीगदेसे आँट याड्सी हाड हाड न्हडरी माया लसी ढिक्सी चिखम्गै भिसी हिन्ना। ओच्छे एनीगदेसे परमेश्वरला बचन पूरान घोसी परमेश्वरला सेमला ताम ख्रीष्टदा ज्यना लसी डोसेगै, घोगै भिसीएनोन हिन्ना। 3 य्हाड्दा आरेनान आतबा परमेश्वरला ज्ञान बुद्धि ख्रीष्टदेन छ्याम जे मुला। 4 थेतबासेलमा खालैसेन एनीगदेदा लुसीला ताम लोप्सी झुक्याब लबारी थाखम्गै भिसी चु ताम डाइ एनीगदेदा पाड्बा हिन्ना। 5 डा ल्हुइरी एनीगदेदेन छ्याम आरेसै डाला सेम मी सदन एनीगदेदेन छ्यामनोन मुला। ओच्छे एनीगदेला बानीबेहोरदेन ख्रीष्टदा लबा विश्वासरी एनीगदे कोड्सी चिबा म्राड्सी डा ल्हानान ताड्बा मुला।

थार्बा पिन्बा ख्रीष्टनोन हिन्ना

6 थेतबासेलमा एनीगदेसे ख्रीष्ट येशूदा प्रभु भिसी विश्वास लबासे लमा सदन ख्रीष्टदेन छ्याम गिक तसी भ्रउ। 7 डाच्छा एनीगदेदा लोप्बा अन्छार विश्वासरी अझ कोड्बान निउ। थेहड् लसीन ख्रीष्टदा लबा विश्वासरी याडयोड आतना ख्रीष्टदेन छ्याम गिक तसी विश्वासरी बढब तबान निउ। ओच्छे परमेश्वरदा सदन धन्यवाद पिन्गो।

8 च्यागो, एनीगदेदा खालै म्हिसे थेनीगदे हाड हाडसे म्हन्सी लोप्बा गे आखेल्बा लुसीला ताम लोप्सी फसब थालगै। तिग्दा भिसम चु जम्मान ताम जम्बुलिडदेन मुरी मुबा म्हड म्हुड, ल लुग्याम खबा ताम हिन्ना। तर ख्रीष्टग्याम खबा आहिन।

9 ख्रीष्ट म्हि दोसी फेप्खसै थेनोन परमेश्वर हिन्ना। 10 एनीगदे ख्रीष्टरी गिक तबासे लमा एनीगदेसे पूरा थार्बा याड्बा मुला। ओच्छे जम्मान शक्तिगदेदेन अधिकार याड्बागदेथोरी शासन लबाएनोन ख्रीष्टनोन हिन्ना। 11 ख्रीष्ट येशूदेन छ्याम गिक तबासे लमा एनीगदे खतना लबा म्हि हड्बान दोबा मुला। तर य्हूदीगदेला ठिम अन्छार एनीगदेला ल्हुइला तिगै सहे थासी आहिन। तर ख्रीष्ट येशूसे एनीगदेला पापी बानीबेहोर भ्याड्सी खतना लबा हिन्ना। 12 तिग्दा भिसम बपतिस्मा किन्मा एनीगदे ख्रीष्टदेन छ्यामनोन ल्हुबा मुबा। ओच्छे परमेश्वरला शक्तिसे ख्रीष्टदा सिबाग्याम सोना लबा हिन्ना, थेनोन शक्तिथोरी विश्वास लबासे लमा एनीगदेदाएनोन ख्रीष्टदेन छ्यामनोन सोना लबा मुला।* 13 डाच्छा एनीगदे हाडला पापदेन पापी बानीबेहोर आख्लाबासे लमा एनीगदे सिबा तेबान मुबा। तर दान्दे परमेश्वरसे य्हाड जम्मालान पाप माफ लसी ख्रीष्टदेन छ्यामनोन सोना लबा मुला।* 14 य्हाडला आज्यबा गेसे लमा परमेश्वरसे मोशादा पिन्बा ठिम अन्छार याड्तोःबा सजायदा परमेश्वरसे क्रुसरी खिल ठोक्सी नाश लजी।* 15 चुहड् लसी ख्रीष्ट क्रुसरी सिसी जम्मान शक्तिगदेदेन

* 2:12 रोमी ६:४ * 2:13 एफि २:१-५ * 2:14 एफि २:१५

अधिकार याड्बागदेदा भेना लजी। ओच्छे थेनीगदेदा जम्मालान ओन्छाडरी पे:ना लजी।

16 थेतबासेलमा एनीगदेदा खालै म्हिसे तिग चबा थुड्बा लबा चीम, खाहड्बा खाहड्बा चाड धड्बा चीम, औंसी धड्बा चीम कि धड्बा चीम ओच्छे ब्लपूबा न्हबा धिन धड्बा चीम कि धड्बा चीम भिसी दोष थालगै।* 17 चु जम्मान ठिमगदे चा सत्य तामला चिनु जे हिन्ना। थे सत्य ताम भिबा चा ख्रीष्टनोन हिन्ना। 18 एनीगदेदा खालैसे लुसीला ताम लोप्सी फसब थालगै। तिग्दा भिसम थेहड्बा म्हिगदेसे एनीगदेदा फसब लबारी य्हाड तिगै आहिन, य्हाडसे स्वर्गदूतगदेदा तेन्तो:ला भिसी लोप्मुला। चु जम्मान ताम डन्दा परमेश्वरसे उन्बा हिन्ना भिसी थेनीगदेसे पाड्सैनोन थेन्ना सेमरी म्हनसी लोप्बा ताम जे हिन्ना। थेतबासेलमा एनीगदेसे थेनीगदेला ताम ड्यानूजी भिसम एनीगदेसे याड्तो:बा इनाम आयाड्। थेनीगदेसे हाडला सेमरी म्हनसी लोप्बा तामरी घमण्ड लसी भ्रमुला। तर थेनीगदेसे घमण्ड लतो:बा ताम तिगै आरे। 19 थेहड्बा म्हिगदे चा हाडला ल्हुइला थोबो हड्बा ख्रीष्टदेन छ्याम आचिना, फेसी चिमुला। ख्रीष्टदेन छ्याम गिक तसी चिजी भिसम जे य्हाडला ल्हुइला जोर्नी जोर्नीरी भड वाड्सी परमेश्वरसे म्हनबा अन्छार य्हाड ल्हेबान निला।*

20 एनीगदे ख्रीष्टदेन छ्यामनोन सिसी जम्बुलिडदेन मुरी शासन लबा म्हड म्हुडदेन ल लुग्याम फेसी जिन्बा मुला। चुदे एनीगदे फेसी जिन्बा हिन्सम जम्बुलिडरी चिबा हड् लसी थेहड्बा ठिमदा तिग्दा ख्लाबारी आखम्बा? ओच्छे अझ तिग्दा थेहड्बा ठिमला लिच्छा भ्रबा? 21 ओच्छे अझ तिग्दा चु लबारी आत, चु चबारी आत, चु थुर्बारी आत भिसी पाड्सी भ्रबा? 22 चु जम्मान तामगदे चा य्हाडसे लना लनान म्हासी निबा ताम हिन्ना। तिग्दा भिसम चु तामगदे चा म्हिगदेसे स्य्हान्दो म्हिदा कुल्बारीदेन लोपूबारी सहोबा ठिम जे हिन्ना। 23 थेहड्बा रिमठिम तेन्बा म्हिगदेसे चा “डनी धर्म कर्म लबा सोजो म्हि हिन्ना” भिसी ल्हानान सेबा दोसी हाडला ल्हुइदा दुख पिन्मुला। तर थेनीगदेसे हाडला पापी सेमदा चा तहरी थान्बारी आखम्मुला।

3

परमेश्वरदा सेम निबा बानीबेहोर

1 एनीगदे ख्रीष्टदेन छ्यामनोन सिबाग्याम सोबा मुला। थेतबासेलमा स्वर्गरी मुबा स्हेगदे म्हाइगो। थेनोन स्वर्गरी परमेश्वरला दाहिने छ्यापट्टि मुल ठिरी ख्रीष्ट धन्छ्यामुला।* 2 एनीगदेसे जम्बुलिडरी मुबा तामगदेला बारेरी आहिन तर स्वर्गरी मुबा तामगदेला बारेरी म्हनगो। 3 तिग्दा भिसम एनीगदे ख्रीष्टदेन छ्यामनोन सिबा मुला। ओच्छे एनीगदेला जुनी ख्रीष्टदेन छ्याम परमेश्वर मुबा ग्लारी थान्बा मुला। 4 ओच्छे एनीगदेला जुनी ख्रीष्टनोन हिन्ना। थेतबासेलमा ख्रीष्ट दो:सी फेप्खबा धुइरी थेला घेन य्हालदेन शक्तिरी एनीगदेएनोन थेदेन छ्यामनोन तला।

5 थेतबासेलमा एनीगदेसे जम्बुलिडरी लबा आज्यबा बानीबेहोर ख्लागो। थेहड्बा आज्यबा बानीबेहोर भिबा चा स्य्हान्दोदेन छ्याम ब्रेल्सी भ्रबा, स्य्हान्दोदेन छ्याम ब्रेल्बा सेम लबा, पापी सेम थोबा, आज्यबा ताम म्हनबादेन लोभ लबा हिन्ना। लोभ लबा चा मूर्तिदा परमेश्वर भिसी तेन्बा हिन्ना। 6 थेहड्बा गेगदेसे लमान परमेश्वर थेनीगदे म्हाड्सी बोमो खबा मुला ओच्छे परमेश्वरसे कुल्बा ताम आड्यानबा[†] थेहड्बा म्हिगदेदा थेसे सजाय पिन्ना। 7 डाच्छा मी एनीगदेएनोन थेहड्बा तामला लिच्छा भ्रमुबा।

8 तर दाहेन्से एनीगदेसे म्हिदा बोमो लबा, म्हिदा बिरोध लबा, स्य्हान्दोला बेइज्जत लबा, नडबा ताम लबा चु जम्मान आज्यबा ताम ख्लागो। 9 ओच्छे खालैदेन एनीगदेसे लुसीला ताम थालउ। तिग्दा भिसम एनीगदेसे डाच्छाला जम्मान आज्यबा बानीबेहोर ख्लासी जिन्बा मुला।* 10 दाहेन्से परमेश्वरसे एनीगदेदा छार जुनी पिन्बासे लमा एनीगदेसे परमेश्वरदा ज्यना लसी डोसेगै भिसी अझन परमेश्वरसे एनीगदेदा हाड हड्बान सहोबान मुला।* 11 छार म्हि दोमाहेन्से अर्गु य्हुलला म्हि मुसै,

* 2:16 रोमी १४:१-६ * 2:19 एफि ४:१६ * 3:1 भजन ११०:१ † 3:6 परमेश्वरसे कुल्बा ताम आड्यानबागदेदा भिबा ताम चा कोइ ग्रीक बाइबलरी मुला कोइ ग्रीक बाइबलरी आरे। * 3:9 एफि ४:२२ * 3:10 उत्प १:२६; एफि ४:२४

यहूदी मुसै, खतना लसै आलसै, पढब लबारी आसेसै, बानीबेहोर आरेसै नोकर मुसै मालिक मुसै तिगै घेन ताम आहिन। तर ख्रीष्टसे जम्मानथोरी शासन लबादेन ख्रीष्ट य्हाड जम्मानदेन छ्याम तबा चा घेन ताम हिन्ना।

12 हाडलान म्हिगदे सहोबारी परमेश्वरसे माया लसी एनीगदेदा धम्बा हिन्ना। थेतबासेलमा एनीगदे सेमहेन्सेन दया लबा, दुख नाखम्बादेन घेन म्हि आदोना सोजो म्हि दोसी भ्रउ।* 13 ओच्छे एनीगदे हाड हाड न्हडरी सेम नासी चिउ। खालैसे एनीगदेदा बिरोध लसम प्रभुसे एनीगदेदा माफ लबा हड लसी थेनीगदेदाएनोन माफ लउ।* 14 चु जम्मान तामगदे भन्दा घेन चा एनीगदे न्हडरी लबा माया हिन्ना। तिग्दा भिसम जम्मान सहेदा गिक सहोबा चा माया हिन्ना। 15 ओच्छे ख्रीष्टसे पिन्बा शान्तिसे एनीगदेला सेम न्हडरी सदन गे लगै। चुनोन शान्तिला लागिरी परमेश्वरसे एनीगदेदा ख्रीष्टग्याम लहुड गिक हडबान सहोसी ड्योडबा हिन्ना। ओच्छे सदन परमेश्वरदा धन्यवाद पिन्गो। 16 एनीगदेला सेम सदन ख्रीष्टला बचनसे प्लिड्सी गिकसेम गिकदा हाडला जम्मान ज्ञान बुद्धिसे लोप्गो। ओच्छे परमेश्वरला आत्मासे पिन्बा व्हाइ सेमहेन्से गोसी परमेश्वरदा धन्यवाद पिन्गो। 17 एनीगदेसे खजिबै गेदेन ताम लसै प्रभु येशूला मिनग्यामसेन लउ। ओच्छे प्रभु येशूग्यामसेन परमेश्वर आबादा धन्यवाद पिन्गो।*

ख्रीष्टदा विश्वास लबागदेसे लतो:बा ताम

18 जम्मान मिडम्हेमेगदे हाड हाडला हेम्बोला तहरी चिउ। तिग्दा भिसम चु प्रभुदा सेम निबा ताम हिन्ना।* 19 ओच्छे जम्मान हेम्फेबेगदेसेनोन हाड हाडला मिडदा आज्यबा व्यवहार आलना माया लउ।*

20 कोलागदे, एनीगदेसे हाडला आबा आमासे कुल्बा जम्मान ताम ड्यानगो। चुहड लसम परमेश्वर ताडला।*

21 थेहड लसीन आबागदेसेनोन हाड हाडला कोलागदेदा बोमो खना थालउ। बोमो खना लजी भिसम थेनीगदेला सेम सहु खला।*

22 नोकरगदे, एनीगदेसे जम्बुलिडरी मुबा हाड हाडला मालिकगदेदा ताडना लबारी थेनीगदेला डाच्छा जे गे लबा आहिन। तर प्रभुदा मान लबा हड लसी एनीगदेला मालिकदाएनोन मान लउ। ओच्छे एनीगदेसे सदन थेनीगदेसे कुल्बा ताम ड्यानगो। ओच्छे हाडला सेमहेन्से गे लउ।* 23 ओच्छे एनीगदेसे जुन गे लसै महिला लागिरी गे लबा हड लसी आहिन, तर प्रभुला लागिरी गे लबा हड लसी सेमहेन्सेन झन्सी गे लउ। 24 तिग्दा भिसम प्रभुसे हाडला म्हिगदेदा इनाम पिन्ना भिसी लबा कबुल एनीगदेदा थानोन मुला। ओच्छे एनीगदेसे तेन्बा प्रभु चा ख्रीष्ट जे हिन्ना। 25 जुन म्हिसे आज्यबा गे लला थेसे लबा आज्यबा गेला सजाय याड्णोन याड्ला। तिग्दा भिसम परमेश्वरसे खालैला ली आच्याना निसाफ लला।*

4

1 मालिकगदे, एनीगदेसेनोन हाडला नोकरगदे न्हडरी खालैला ली आच्याना ज्यना लउ। ओच्छे एनीगदेसेनोन हाडला मालिक स्वर्गरी मुला भिबा ताम थाम्ले:गो।*

ख्रीष्टियानगदेसे लतो:बा ताम

2 एनीगदे सदन परमेश्वरदा धन्यवाद पिन्बान झन्सी प्रार्थना लसी चिउ। 3 एनीगदेसे प्रार्थना लबा धुडरी अझ ख्रीष्टला बारेरी परमेश्वरला सेमरी मुबा ताम म्हिगदेदा थे:ना लबारी परमेश्वरसेन ग्याम सहोसी पिन्गै भिसी डन्ना लागिरी प्रार्थना लसी पिन्गो। ख्रीष्टला समाचार थे:ना लबासे लमान दान्दे डा झ्याल्खानरी परब तबा हिन्ना। 4 ओच्छे डाइ घोना लतो:बा चु ताम ज्यना लसी घोना लबारी खमगै।

* 3:12 एफि ४:२ * 3:13 एफि ४:३२ * 3:17 एफि ५:१९-२० * 3:18 एफि ५:२२; १ पत्रु ३:१ * 3:19 एफि ५:२५; १ पत्रु ३:७ * 3:20 एफि ६:१ * 3:21 एफि ६:४ * 3:22 एफि ६:५-८ * 3:25 व्यव १०:१७; एफि ६:९ * 4:1 एफि ६:९

5 ख्रीष्टदा विश्वास आलबा म्हिदेन होस लसी ज्यबा व्यवहार लउ। ओच्छे एनीगदेसे याड्बा खजिबै मौका स्योर्ना थालउ।* 6 थेतबासेलमा एनीगदेसे पाड्बा ताम म्हिगदेदा ड्यान्गे म्हन्बा खाल्ला तगै। ओच्छे म्हिगदेदेन छ्याम ताम लमा खाहड् लसी जोहाब पिन्तोःला भिसी घोउ।

7 डन्से माया लबा आले तुखिकससेन एनीगदेदा डाला बारेरी जम्मान ताम पाड्बा। थेएनोन डन्देन छ्यामनोन प्रभुला गे लबा विश्वास लखम्बा म्हि हिन्ना।* 8 डाइ थेदा एनीगदे मुबा ग्लारी पुइखबा चा थेसे डन्ना बारेरी पाड्सी एनीगदेसे आँट याड्गै भिसी हिन्ना।* 9 थेदेन छ्याम ओनेसिमसएनोन खबान मुला। डन्से विश्वास लखम्बा सेम निबा आले ओनेसिमस चा एनीगदेलान म्हि हिन्ना। एनीगदेदा डन्ना बारेरी थेन्से जम्मान ताम पाड्बा।*

10 डादेन छ्यामनोन झ्यालखानरी मुबा ह्यो आरिस्ताखससे एनीगदेदा फ्याफुल्ला भिसी पाड्बा मुला। ओच्छे बारनाबासला कोन मर्कूससेनोन एनीगदेदा फ्याफुल्ला भिसी पाड्बा मुला। मर्कूस एनीगदे मुबा ग्लारी खजी भिसम एनीगदेसे थेदा मान लतोःला भिबा ताम था याड्सी जिन्बा मुला।* 11 युस्तस भिबा येशूसेनोन एनीगदेदा फ्याफुल्ला भिसी पाड्बा मुला। यहूदी विश्वासीगदे न्हडला चु सोमसे जे परमेश्वरला यहुलसाला समाचार थेःना लबारी डादेन छ्याम गे लबा मुला। चु सोमसे लमान डाइ ल्हानान भड याड्बा मुला।

12 थेहड् लसीन प्रभु ख्रीष्ट येशूला गे लबा एनीगदेलान आले इपाफ्राससेनोन एनीगदेदा फ्याफुल्ला भिसी पाड्बा मुला। एनीगदेसे परमेश्वरसे म्हन्बा जम्मान ताम घोसी विश्वासरी पाकोदेन दुक्क तसी चिबारी खमगै भिसी थेसे सदन एनीगदेला लागिरी प्रार्थना लबा मुला।* 13 थेसे लाउडिकिया भिबा शहरदेन हिरापोलिस भिबा शहररी मुबागदेला लागिरी ओच्छे एनीगदेला लागिरी ल्हानान दुख लसी गे लबा मुला भिबा ताम डाइ म्राड्बा मुला।

14 थेहड् लसी डन्ना सेम निबा आले डाक्टर लूकादेन डेमाससेनोन एनीगदेदा फ्याफुल्ला भिसी पाड्बा मुला।* 15 लाउडिकिया भिबा शहरला विश्वासी ज्योज्यो आले नाना आडागदेदेन नुम्फास भिबा म्रिडम्हेमेदा ओच्छे थेला दिमरी मुबा मण्डलीदाएनोन डाइ फ्याफुल्बा मुला भिसी पाड्सी पिन्गो।

16 चु चिठी एनीगदेसे पढब लसी जिन्माहेन्से लाउडिकिया भिबा शहररी मुबा मण्डलीदाएनोन पढब लपुड्गो। ओच्छे लाउडिकियारी डाइ पुइबा चिठीएनोन एनीगदेसे पढब लउ। 17 ओच्छे “प्रभुसे एदा पिन्बा गे पूरा लनोन तोःला” भिसी अर्खिप्पसदा पाड्गो।*

18 एनीगदे जम्मादान फ्याफुल्ला भिसी डा पावलसेन भिबा हिन्ना। ओच्छे डा झ्यालखानरी मुला भिबा ताम एनीगदेसे थाम्लेःगो। एनीगदेदेन छ्याम परमेश्वरला दयामाया सदन तगै।

* 4:5 एफि ५:१६ * 4:7 मुल २०:४; २ तिमो ४:१२
२७:२; फिले २४; मुल १२:१२, २५; १३:१३; १५:३७-३९
* 4:17 फिले २

* 4:8 एफि ६:२१-२२ * 4:9 फिले १०-१२ * 4:10 मुल १९:२९;
* 4:12 कल १:७; फिले २३ * 4:14 २ तिमो ४:१०, ११; फिले २४

पावलसे थेसलोनिकेला विश्वासीगदेदा भिबा डाच्छारेमला चिठी चु चिठीला बारेरी पाङ्तोःमा

भिबा म्हि: येशूला मुल चेला पावलसे भिबा मुबा। चु चिठी भिबाला लागिरी पावलदा सिलासदेन तिमोथी भिबा म्हिसे हो लबा मुबा (१ थेसलोनिके १:१)।

भिबा ग्ला: कोरिन्थ शहररी भिबा मुबा।

भिबा साल: ओस्पन ईश्वी संवत् ५० (विक्रम संवत् १०७) सालरी भिबा मुबा। बाइबलला ल्हाना हड्बा विद्वानगदेसे पावलसे भिबा चिठीगदे न्हडला चु जम्मान भन्दा डाच्छा भिबा चिठी हिन्ना भिसी पाङ्मुला।

खाल्दा भिबा: थेसलोनिके शहररी मुबा विश्वासीगदेदा भिबा मुबा।

थेसलोनिके भिबा शहर रोम यहुल्सारी परब तबा माकेडोनिया भिबा अञ्चलला ग्लेखाड मुबा। पावल फिलिप्पी शहरग्याम चु शहररी निजी, ओच्छे थार्बा पिन्बा समाचार थेःना लसी मण्डली शुरु लजी (मुल चेला १७:१०)। तर थे शहररी यहूदीगदेसे तिगै धिन लिच्छा पावलदा बिरोध लजी। यहूदी धर्म सेम निबा अर्गु यहूलला म्हिगदेसे पावलसे थेःना लबा थार्बा पिन्बा समाचाररी विश्वास लबा म्राङ्सी थे यहूदीगदेसे पावलदा बिरोध लजी। थे यहूदीगदेसे ल्हानान बिरोध लबासे लमा पावल थेसलोनिके शहरग्याम बेरिया भिबा शहररी निजी। लिच्छा पावल कोरिन्थ शहरग्याम धोखमा थेदेन छ्यामनोन प्रभुला गे लबा तिमोथीग्याम थेसलोनिके शहररी मुबा मण्डलीला बारेरी थेःजी।

चु डाच्छारेमला चिठी पावलसे थेसलोनिके शहररी मुबा विश्वास लबा म्हिगदेदा आँट पिन्बारीदेन तिगै ताम लोपबाला लागिरी भिबा मुबा। ओच्छे थेनीगदेसे लबा विश्वासदेन मायाला बारेरी थेःसी पावलसे परमेश्वरदा धन्यवाद पिन्जी। पावलसे हाड थेनीगदेदेन छ्याम मुबा धुइरी हाड खाहड् लसी चिबा मुबा थे ताम ढन्ना लबा मुला।

जमाहेन्से पावलसे ख्रीष्ट दोःसी फेप्खबाला बारेरी मण्डली न्हडरी थोन्बा तामगदेला जोहाब चुहड् लसी पिन्बा मुला। तिग ख्रीष्ट दोःसी फेप्खबा भन्दा डाच्छान सिबा विश्वासीगदेसे ख्रीष्ट दोःसी फेप्खमा याड्बा जुकजुकधोनाला जुनी याड्ला? ख्रीष्ट दोःसी खाइमा फेप्खला? चुनोन धुइरी पावलसे थेनीगदेदा ख्रीष्ट दोःसी फेप्खला भिसी भ्रान्सी चिमा तिगै तामरी आकोल्ना कुटिसी ख्रीष्टला गे लबान निउ भिसी पाङ्बा मुला।

मुल तामगदे

फ्याफुल्बा १:१

पावलसे परमेश्वरदा धन्यवाद पिन्बादेन जयजयकार लबा १:२-१०

थेसलोनिकेरी पावलसे लबा गे २:१-३:१३

ख्रीष्टदा विश्वास लबागदेला बानीबेहोर ४:१-१२

ख्रीष्ट दोःसी फेप्खबाला बारेरी घोना लबा ४:१३-५:११

चिठीला थुमरी भिबा ताम ५:१२-२८

पावलसे थेसलोनिकेला विश्वासीगदेदा भिबा डाच्छारेमला चिठी

१ लाससो थेसलोनिकेरी मुबा जम्मान विश्वासीगदेदा डा पावलदेन सिलास ओच्छे तिमोथीग्याम फ्याफुल्ला! एनीगदे जम्मासेन परमेश्वर आबादेन प्रभु येशू ख्रीष्टग्याम दयामायादेन शान्ति याङ्गै।*

थेसलोनिकेला म्हिगदेसे लबा विश्वास

२ ङन्से प्रार्थना लबा धुइरी सदन एनीगदेदा ढन्सी परमेश्वरदा धन्यवाद पिन्बा मुला। ३ एनीगदेसे विश्वास लमाहेन्से गाते ज्यबा गे लबा मुला। हाड हाड न्हडरी गिकसेम गिकदा माया लसी गाते दुख

* 1:1 मुल १७:१

लसी गे लबा मुला। ओच्छे य्हाडला प्रभु येशू ख्रीष्ट फेपखला भिसी एनीगदेसे लबा आश खाहड्बा कोड्बा मुला। चु जम्मान ताम डन्से य्हाडला परमेश्वर आबाला डाच्छा ढन्बा मुला।

4 ज्योज्यो आले नाना आडा, परमेश्वरसे माया लसी एनीगदेदा धम्बा मुबा भिसी डन्दा था मुला। 5 ओच्छे डन्से एनीगदेदा थेःना लबा परमेश्वरला य्हुल्साला समाचार ताम जे आहिन। तर परमेश्वरला आत्मादेन शक्तिग्याम डन्सेनोन सेमहेन्से घोसी विश्वास लबा सत्य ताम मुबा। ओच्छे डनी एनीगदेदेन छ्याम चिबा धुइरी एनीगदेला लागिरी डनी खाहड्बा मुबा भिबा ताम एनीगदेदा थानोन मुला। 6 एनीगदे प्रभु येशूदेन डनी हड्बान दोबा मुला। तिग्दा भिसम म्हिगदेसे जस्तोन दुख पिन्सैनोन एनीगदे परमेश्वरला आत्माग्याम ताड्सी ताड्सी परमेश्वरला बचनरी विश्वास लजी।* 7 थेतबासेलमा एनीगदे माकेडोनियादेन अखैया भिबा अञ्चलरी मुबा जम्मान विश्वासीगदेला गुडरी ज्यबा म्हि दोबा मुला। 8 तिग्दा भिसम एनीगदेग्याम परमेश्वरला बचन माकेडोनियादेन अखैया भिबा अञ्चलरी जे थेःना लबा आहिन। तर एनीगदेसे परमेश्वरदा विश्वास लबा ताम जम्मान ग्लारी थेःबा मुला। थेतबासेलमा दाहेन्से डन्से पाड्तोःबा अर्गु ताम तिगै आरे। 9 तिग्दा भिसम डनी एनीगदे मुबा ग्लारी खमा एनीगदेसे डन्दा खाहड् लसी मान लबा मुला। ओच्छे छोन्बोदेन सत्य परमेश्वरला गे लबारी मूर्तिगदेदा तेन्बा ख्लासी एनीगदे परमेश्वरपट्टि दोःजी भिबा ताम म्हिगदेसेन पाड्ला। 10 थेहड् लसीन एनीगदेसे परमेश्वरला झा येशू स्वर्गग्याम फेपखला भिसी भ्रान्सी चिबा मुला। थेदा परमेश्वरसेन सिबाग्याम सोना लबा मुबा। ओच्छे थेसेन य्हाडदा पापला सजायग्याम थार्ना लला भिबा तामएनोन थेनीगदेसेन पाड्ला।

2

पावलसे थेसलोनिके भिबा ग्लारी लबा गे

1 च्यागो आलेगदे, डनी एनीगदे मुबा ग्लारी खबा ल्हानान ज्यबा तजी भिबा एनीगदेदा थानोन मुला। 2 थेहड् लसीन डाच्छा डन्से फिलिप्पी भिबा शहररी दुखदेन महिला हेला नाजी भिबा तामएनोन एनीगदेदा था मुला। तर डन्दा बिरोध लबागदे ल्हानान मुसैनोन परमेश्वरला य्हुल्साला समाचार थेःना लबारी परमेश्वरसे डन्दा आँट पिन्जी।* 3 तिग्दा भिसम डन्से लोप्बा तामगदे लुसीला तामएनोन आहिन्बा मुबा। ओच्छे नइबा तामदेन एनीगदेदा जाल लसी लोप्बा तामएनोन आहिन्बा मुबा। 4 तर परमेश्वरसे डन्दा च्यासीन थार्बा पिन्बा समाचार थेःना लबा जिम्मा डन्दा पिन्बा हिन्ना। थेतबासेलमा म्हिदा ताड्ना लबारी आहिन तर य्हाडला सेमला ताम था याड्बा परमेश्वरदा ताड्ना लबारी म्हिगदेदा थेःना लबा हिन्ना। 5 एनीगदेदाएनोन चु ताम थानोन मुला डन्से एनीगदेदेन छ्याम तिगै चिप्ले तामएनोन आलनी ओच्छे तिगै याड्ला भिसी लोभएनोन आलनी। चु ताम परमेश्वरदान था मुला।

6-7 डनी ख्रीष्टला मुल चेला तबासे लमा एनीगदेथोरी अधिकार लखमसेला मुबा। तसैनोन डन्से एनीगदेदेन स्य्हान्दो खालै म्हिगदेसे डन्दा ज्यबा म्हि भिगै भिसी आमहाइनी। तर हाडला कोलागदेदा सयार लबा आमासे हड् लसी डन्से एनीगदेदा माया लजी। 8 च्यागो आलेगदे, एनीगदेला मायासे लमा डन्से एनीगदेदा परमेश्वरला य्हुल्साला समाचार जे आहिन, तर डन्ना ज्ञानएनोन एनीगदेला लागिरी पिन्बारी डनी तयार मुबा। तिग्दा भिसम डन्से एनीगदेदा ल्हानान माया लमुबा। 9 ज्योज्यो आले नाना आडागदेदा थानोन मुला। डन्से परमेश्वरला य्हुल्साला समाचार थेःना लबा धुइरी खालैदा दुख आपिन्गे भिसी धिन म्हुननोन दुख लसी गे लबा मुबा।

10 विश्वासीगदेला गुडरी डन्से लबा गे परमेश्वरदा सेम निबादेन चोखो ओच्छे तिगै दोष आरेबा मुबा। चु ताम एनीगदेदेन परमेश्वरदान था मुला। 11 ओच्छे आबासे हाडला झा झामेदेन छ्याम लबा हड्बान व्यवहार लसी डन्से एनीगदेदा परमेश्वरदा सेम निबा ग्यामरी भ्रबाला लागिरी आँट पिन्जी भिबा ताम एनीगदेदा थानोन मुला। 12 थेतबासेलमा एनीगदेला चालचलन परमेश्वरसे म्हनबा अनछार तगै। तिग्दा भिसम परमेश्वरसे एनीगदेदा थेला य्हुल्सा, शक्तिदेन य्हालरी ड्योड्बा मुला।

* 1:6 मुल १७:५-९ * 2:2 मुल १६:१९-२४; १७:१-९

13 डन्से एनीगदेदा थे:ना लबा बचनदा म्हिगदेला बचन आहिन तर परमेश्वरलान बचन हिन्ना भिसी विश्वास लजी। थेनोन परमेश्वरला बचनसे एनीगदे न्हडरी गे लबान मुला। थेतबासेलमा चुलान लागिरी डन्से सदन परमेश्वरदा धन्यवाद पिन्बा मुला। 14 तिग्दा भिसम एनीगदेएनोन ख्रीष्ट येजूदा विश्वास लबा यहूदिया अञ्चलरी मुबा परमेश्वरला मण्डलीगदे हड्बान दोबा मुला। ओच्छे यहूदिया अञ्चलरी मुबा म्हिगदेसे हाडलान म्हि यहूदीगदेग्याम दुख नाबा हड् लसी एनीगदेसेनोन हाडलान म्हिगदेग्याम दुख नाबा मुला।* 15 चुनोन यहूदीगदेसे प्रभु येशू ख्रीष्टदेन अगमवक्तागदेदा साइजी, ओच्छे डन्दाएनोन दुख पिन्जी, ओच्छे परमेश्वरदा बोमो खना लबादेन जम्मान म्हिगदेदा बिरोध लबा मुला।* 16 ओच्छे अर्गु यहूलला म्हिगदेसे थार्बा याङ्गै भिसी थे:ना लबा ताम यहूदीगदेसे डन्दा थे:ना लआपुड्नी। थेहड् लसी यहूदीगदेसे पापथोरी झन पाप लजी। थेतबासेलमा परमेश्वरसे यहूदीगदेदा सजाय पिन्बा मुला।

पावलसे थेसलोनिकेरी मुबा म्हिगदेदा स्यापबारी ल्हानान सेम लबा

17 य्हाड ज्योज्यो आले नाना आडा न्हडरी तिगै धिनना लागिरी फेसै य्हाडला सेम फेबा आरे। थेतबासेलमा दो:सी एनीगदेदेन छ्याम हुप तबा सेम डन्दा ल्हानान मुला। 18 एनीगदे मुबा ग्लारी डनी खबारी म्हाइमुबा। ओच्छे डा पावल एनीगदे मुबा ग्लारी ल्हानान रेम खबारी म्हाइमुबा। तर डनी खबारी म्हाइमा सदन शैतानसे ग्याम काजी। 19 य्हाडला प्रभु येशू ख्रीष्ट फेपखबा धुइरी थेला डाच्छा डन्से लबा आशदेन ताड्तो:बा ताम एनीगदेन आहिन? हिन्ना। 20 डन्से याड्तो:बा मानदेन डनी ताड्तो:बा ताम भिबान एनीगदे हिन्ना।

3

तिमोथीदा थेसलोनिकेरी पुइबा

1 थेतबासेलमा एनीगदेग्याम फेसी चिबारी डन्ना सेमसे आड्यान्नी। ओच्छे डनी चा एथेन्स भिबा ग्लारीन चिबारी ज्यबा छोर्सी थेरीन चिजी।* 2 तर तिमोथीदा चा एनीगदे मुबा ग्लारी पुइखबा मुला। तिग्दा भिसम थेसेन एनीगदेदा विश्वासरी कोड्ना लबारी आँट पिन्ना। य्हाडला आले तिमोथी चा ख्रीष्टला समाचार थे:ना लबा डन्देन छ्यामनोन परमेश्वरला गे लबा म्हि हिन्ना। 3 थे धुइला दुखसे लमा एनीगदे खालैनोन याडयोड थातगै भिसी डन्से म्हन्बा मुबा। य्हाड सोतेधोना दुख मी खनोन खला भिबा ताम एनीगदेसेनोन घोसी जिन्बा मुला। 4 तिग्दा भिसम डनी एनीगदेदेन छ्याम मुबा धुइरीन य्हाडसे दुख नातो:ला भिसी डन्से डाच्छान पाड्बा मुबा। डन्से पाड्बा हड् तनोन तजी, थे एनीगदेदाएनोन थानोन मुला। 5 थेतबासेलमा डाइ नाआखम्ना एनीगदेला विश्वास खाहड्बा चीम भिसी घोबाला लागिरी डाइ एनीगदे मुबा ग्लारी तिमोथीदा पुइखबा मुला। तिग्दा भिसम एनीगदेदा खालै म्हिसे लोभ उन्सी फसब लसी डन्से लबा गेगदे गे आखेल्बा तना लजी वा भिसी डा लोड्बा मुबा। 6 तर दान्दे तिमोथी एनीगदे मुबाग्याम डनी मुबा ग्लारी खसी एनीगदेसे परमेश्वरदा लबा विश्वासदेन हाड हाड न्हडरी माया लसी ढिक्सी चिमुला भिबा ज्यबा समाचार डन्दा पाड्जी। ओच्छे डन्से एनीगदेदेन छ्याम हुप तबारी म्हाइबा हड् एनीगदेसेएनोन डन्दा ल्हानान ढन्सी सदन हुप तबारी म्हाइबा मुला भिबा तामएनोन पाड्जी।* 7 थेतबासेलमा ज्योज्यो आले नाना आडा, डन्दा दुख तसी सुर्दा तबा धुइरीनोन एनीगदेसे लबा विश्वासला बारेरी थे:सी डनी ताड्बा मुला। 8 तिग्दा भिसम एनीगदे प्रभुरी कोड्सी चिबा मुला भिबा थे:सी डनी ल्हानान ताड्बा मुला

9 एनीगदेसे लमा डनी परमेश्वरला डाच्छा ल्हानान ताड्म्याड्बा मुला। चुला लागिरी डन्से परमेश्वरदा जतिन धन्यवाद पिन्सै आछ्यो। 10 एनीगदेला विश्वास अझ कोड्ना लबा सेम लसी दो:सी एनीगदेदेन छ्याम हुप तम्याङ्गै भिसी डन्से धिन म्हुननोन झन्सी प्रार्थना लबा मुला।

11 दाहेन्से य्हाडला परमेश्वर आबादेन प्रभु येशूसेन डनी एनीगदे मुबा ग्लारी खबाला लागिरी ग्याम सहोसी पिन्गै। 12 डन्से एनीगदेदा माया लबा हड् लसी एनीगदेसे हाड हाड न्हडरी लबा

* 2:14 मुल १७:५
१८:५

* 2:15 मुल ९:२३, २९; १३:४५, ५०; १४:२, ५, १९; १७:५, १३; १८:१२

* 3:1 मुल १७:१५ * 3:6 मुल

मायादेन जम्मान म्हिगदेदा लबा मायादा प्रभुसेन ल्हानान लहेना लगै। 13 य्हाडला प्रभु येशू हाडला म्हिगदेदेन छ्याम दोःसी फेप्खबा धुइरी परमेश्वरसेन एनीगदेला सेमरी भड पिन्सी थेला डाच्छापट्टि तिगै दोष आरेबादेन चोखो म्हि सहोगै।

4

परमेश्वरदा सेम निबा गे लउ

1 दाहेनसे एनीगदे प्रभु येशूला म्हि तबासे लमा परमेश्वरदा ताडना लबारी खाहड लसी भ्रतोःला भिबा ताम डन्से लोप्सी जिन्बा मुला। ओच्छे एनीगदेसे डन्से लोप्बा हडनोन लबान मुला। थेतबासेलमा ज्योज्यो आले नाना आडागदे, अझ एनीगदेसे थेहडबा ज्यबा गे लबान निउ भिबा डन्ना बिन्ती मुला। 2 तिग्दा भिसम डन्से प्रभु येशूग्याम एनीगदेदा तिग तिग ताम कुल्बा मुबा थे ताम एनीगदेदा थानोन मुला। 3 एनीगदे चोखो म्हि दोगै भिसी परमेश्वरसे म्हनबा मुला। थेतबासेलमा एनीगदेसे स्य्हान्दोदेन छ्याम ब्रेल्सी भ्रबा तामरी संगतनोन थालउ। 4 एनीगदेसे हाडसे हाडलान ल्हुइदा तहरी थान्बारी लोपगै भिसी परमेश्वरसे म्हनबा मुला। ओच्छे स्य्हान्दो म्हिगदेग्याम मान लबाला लागिरी एनीगदेसे हाडला ल्हुइदा चोखो थान्गो। 5 ओच्छे एनीगदेसे परमेश्वरदा डोआसेबा म्हिगदेसे हड लसी खाल्दमनदेन छ्याम ब्रेल्बा सेम थालउ। 6 चु तामरी आज्यबा गे लसी विश्वासी ज्योज्यो आले नाना आडागदे न्हडरी खालैसे खालैदान न्होडना थालगै। च्यागो, चुहडबा गे लजी भिसम प्रभुसेन सजाय पिन्ना भिसी डन्से एनीगदेदा डाच्छान घोना लसी जिन्बा मुला। 7 तिग्दा भिसम परमेश्वरसे य्हाडदा चुहडबा नइबा गे लबारी आहिन, तर तिगै दोष आरेबा चोखो म्हि दोसी भ्रबाला लागिरी ड्योइबा हिनना। 8 थेतबासेलमा जुन म्हिसे चु तामदा वास्ता आल थेसे म्हिदा आहिन, तर एनीगदेदा हाडलान आत्मा पिन्बा परमेश्वरदा वास्ता आलबा हिनना।

9 विश्वास लबा ज्योज्यो आले नाना आडादा खाहड लसी माया लतोःला भिबा ताम डन्से एनीगदेदा पाड्आतोः। तिग्दा भिसम चु ताम एनीगदेदा परमेश्वरसेन लोप्सी जिन्बा मुला। 10 ओच्छे थेनोन अन्छार एनीगदेसे माकेडोनिया भिबा अञ्चलरी मुबा जम्मान विश्वासीगदेदा ल्हानान माया लबा मुला। थेतबासेलमा ज्योज्यो आले नाना आडागदे, थेहड लसीन एनीगदे हाड हाड न्हडरी अझ माया लसी चिउ भिबा डन्ना अर्ती मुला।

11 डाच्छा डन्से एनीगदेदा लोप्बा तामरी ढुकक तसी हाड हाडला गे सेम लसी लबान ढिक्सी चिउ। 12 चुहड लसम एनीगदेदा म्हिगदेसेनोन मान लला। ओच्छे एनीगदेदा खाँचो तबा धुइरी स्य्हान्दो महिला भर लआतोः।

प्रभु दोःसी फेप्खबा

13 ज्योज्यो आले नाना आडागदे, एनीगदेसे सिबा विश्वासीगदेला बारेरी था याड्गै भिबा डन्से म्हनबा मुला। थेतबासेलमा आशनोन आरेबा म्हिगदे हड लसी एनीगदे सुर्दा थालउ। 14 तिग्दा भिसम येशू सिबाग्याम दोःसी सोजी भिसी य्हाडसे विश्वास लबा मुला। थेहड लसीन सिबा विश्वासीगदेदा परमेश्वरसेन येशूग्याम दोःसी सोना लसी थेदेन छ्यामनोन भला भिसीएनोन य्हाडसे विश्वास लबा मुला। 15 प्रभुसे सुड्बा हड डन्से पाड्बा ताम ड्यानगो, प्रभु दोःसी फेप्खबा धुइरी य्हाड सोबागदे तिगै लसीन सिबा विश्वासीगदे भन्दा डाच्छा तआखम।* 16 तिग्दा भिसम प्रभु हाडनोन घेन काइरी कुल्बान मुल स्वर्गदूतला काइदेन परमेश्वरला बिगुलला काइरी स्वर्गग्याम फेप्खला। थेनोन धुइरी ख्रीष्टदा विश्वास लसी सिबागदे चा डाच्छान सोला। 17 जमाहेनसे य्हाड सोबागदे मुरी हुप तबारी थेनीगदेदेन छ्यामनोन खसुरी थीसी भोर्ला। ओच्छे य्हाड सदनना लागिरी प्रभुदेन छ्यामनोन चिला। 18 थेतबासेलमा चु तामग्याम गिकसे स्य्हान्दोदा आँट पिन्गो।

* 4:15 १ कोर १५:५१-५२

5

1 तर ज्योज्यो आले नाना आडागदे, चु ताम खाइमा तला भिसी एनीगदेला लागिरी तिगै भितोःबा आरे। 2 तिग्दा भिसम प्रभु फेपखबा धुइरी म्हनुड यहो खबा हड लसी फेपखला भिबा ताम एनीगदेदा थानोन मुला।* 3 थे धुइरी म्हिगदेसे “यहाडदा शान्ति मुला तिगै लोड्बा डोबा आरे भिसी भिला।” थेनोन धुइरी म्रिडम्हेमेदा कोला न्हबा धुइरी बेथा याड्बा हड थेनीगदे तिक्खुरीन नाश तला। जमाहेनुसे थेनीगदे थेहड्बा आपत विपतग्याम तिगै लसीन स्योर आम्याड्। 4 तर ज्योज्यो आले नाना आडागदे, एनीगदे धोपधोपरी आरे। थेतबासेलमा एनीगदेला लागिरी प्रभु फेपखबा धुइरी यहो खबा हड्बा आत। 5 तिग्दा भिसम एनीगदे जम्मान धोपधोपदेन म्हनुड भ्रबा महिला सन्तान आहिन, तर यहालदेन धिनीरी भ्रबा महिला सन्तान हिनना। 6 थेतबासेलमा यहाड स्यहान्दो म्हिगदे हड लसी म्हेर्बारी आत। तर होशियार तसी छोर्सी चितोःला। 7 तिग्दा भिसम म्हेर्बागदे म्हनुडनोन म्हेर्ला ओच्छे थुड्बागदेएनोन म्हनुडनोन ड्य्होइसी भ्रमुला। 8 तर यहाड चा धिनीरी भ्रबा महिला सन्तान तबासे लमा होशियार तसी भ्रतोःला। ओच्छे सेनासे हाडदा जोगब लबारी कुरी पाता थान्बा हड लसी यहाडसेनोन हाडदा जोगब लबाला लागिरी यहाडला विश्वासदेन मायादा थोसी भ्रतोःला। थेहड लसीन यहाडसे पूरा थार्बा याड्ला भिसी लबा आशदा सेनागदेसे सदन टोप कूबा हड लसी सदन कूतोःला।* 9 तिग्दा भिसम परमेश्वरसे यहाडदा सजाय पिन्बारी आहिन। तर प्रभु येशू ख्रीष्टग्याम थार्बा पिन्बारी डाच्छान धम्बा हिनना। 10 प्रभु फेपखबा धुइरी यहाड सिसै सोसै प्रभुदेन छ्यामनोन सोगै भिसी प्रभु येशू यहाडला लागिरी सिजी। 11 थेतबासेलमा एनीगदेसे दान्दे लबा हड्नुन गिकसे गिकदा आँट पिन्सी भड्ना लबा गे लउ।

चिठीला थुमरी भ्रिबा ताम

12 ज्योज्यो आले नाना आडागदे, एनीगदेला गुडरी दुख लसी गे लबागदेदा मान लउ भिबा डनुना बिनती मुला। तिग्दा भिसम थेनीगदेसे प्रभुला लागिरी खाहड लसी भ्रतोःला भिबा ताम एनीगदेदा लोप्ला। 13 थेनीगदेसे ज्यबा गे लबासे लमा थेनीगदेदा मायादेन मान लउ। ओच्छे हाड हाड न्हडरी ढिक्सी चिउ।

14 ज्योज्यो आले नाना आडागदे, ब्लेगुगदेदा अर्ती पिन्बादेन हरेस चबागदेदा आँट पिन्गो। ओच्छे आखम्बागदेदा हो लबादेन जम्मालान ओन्छाडरी ज्यबा गे लसी उन्गो भिबा डनुना बिनती मुला। 15 ओच्छे खालैसे एनीगदेदा आज्यबा लजी भिदेमा एनीगदेसे थेदा आज्यबा थालउ। बरु गिकसे गिकदा ओच्छे जम्मान म्हिगदेदा सदन ज्यबा व्यवहार लबारी म्हाइगो। 16 सदन ताड्सी चिउ। 17 ओच्छे सदन प्रार्थना लउ। 18 दुख सुख जस्तोन तसै धन्यवाद पिन्गो। तिग्दा भिसम ख्रीष्ट येशूदेन छ्याम गिक तबा एनीगदेसे चुहड्बा लगै भिसी परमेश्वरसे म्हन्बा मुला। 19 ओच्छे परमेश्वरला आत्मासे लबा गेदा रोकब थालउ। 20 खालैसे परमेश्वरग्याम पाड्बा तामदा हेला थालउ। 21 ओच्छे जम्मान ताम सेसी घोसी जुन ताम ज्यबा मुला थेनोन तामरी भड्बा तसी चिउ। 22 ओच्छे जम्मान आज्यबा तामगदेग्याम थारेड तसी चिउ। 23 शान्ति पिन्बा परमेश्वरसेन एनीगदेदा पूरा चोखो तना लगै, ओच्छे यहाडला प्रभु येशू ख्रीष्ट दोःसी फेपखबा धुइरी एनीगदेला आत्मादेन सेम ओच्छे ल्हुइरी तिगै दोष आरेबा तगै। 24 एनीगदेदा ड्योइबा परमेश्वर विश्वास लखम्बा परमेश्वर हिनना। थेसेन एनीगदेदा चु जम्मान ताम पूरा लसी पिन्ना। 25 थेतबासेलमा ज्योज्यो आले नाना आडागदे, एनीगदेसे डनुना लागिरीनोन प्रार्थना लसी पिन्गो। 26 जम्मान ज्योज्यो आले नाना आडागदे हाड हाड न्हडरी गिकसेम गिकदा सेमहेनुसेन माया लसी फ्याफुल्गो। 27 प्रभुला अधिकारग्याम डाइ पाड्बा ताम ड्यानगो। एनीगदेसे चु चिठी जम्मान ज्योज्यो आले नाना आडागदेदा पढब लसी थेःना लउ। 28 यहाडला प्रभु येशू ख्रीष्टला दयामाया एनीगदेशोरी तगै।

* 5:2 मत्ती २४:४३; लूका १२:३९; २ पत्र ३:१० * 5:8 यशै ५९:१७; एफि ६:१३-१७

पावलसे थेसलोनिकेला विश्वासीगदेदा भिबा न्हीरेमला चिठी चु चिठीला बारेरी पाङ्तोःमा

भिबा म्हि: येशूला मुल चेला पावलसे भिबा मुबा। चु चिठी भिबाला लागिरी पावलदा सिलासदेन तिमोथी भिबा म्हिसे हो लबा मुबा (२ थेसलोनिकी १:१)।

भिबा ग्ला: कोरिन्थ शहररी भिबा मुबा।

भिबा साल: ओस्पन ईश्वी संवत् ५१ (विक्रम संवत् १०८) सालरी भिबा मुबा।

खाल्दा भिबा: थेसलोनिके शहररी मुबा विश्वासीगदेदा भिबा मुबा।

थेसलोनिके शहरला मण्डली न्हडरी ख्रीष्ट दोःसी फेप्खला भिबाला बारेरी ल्हानान तामगदे तबा मुबा। चु तामला बारेरी ल्हानान ताम तबासे लमा थेसलोनिके शहरला विश्वासीगदेला गुडरी लुसीला तामगदे थोन्जी। थेनीगदे न्हडला कोइ कोइसे ख्रीष्ट फेप्खबा धुइ मी डाचछान तसी जिन्बा मुला भिसी विश्वास लमुबा। थेनीगदेला चुहड्बा विश्वास म्राङ्सी पावलसे थेनीगदेदा घोना लबाला लागिरी चु न्हीरेमला चिठी भिबा मुबा। चु चिठीरी पावलसे ख्रीष्ट फेप्खबा भन्दा डाचछा ख्रीष्टला बिरोध लबा नइबा गे लबा म्हि खला, ओचछे थेसे जम्मान नइबा तामगदे लबान निला भिसी भिबा मुला।

पावलसे चु चिठी पढब लबागदेदा जस्तोन दुख तसैनोन हाडसे लबा विश्वास आखलाना कोङ्सी चिड। ओचछे पावलसे हाडदेन हाडला होगदेसे हड् लसी सदन ज्यबा गे लतोःला भिसी थेनीगदेदा पाङ्बा मुला।

मुल तामगदे

फ्याफुल्बा १:१-२

सयाबासदेन आँट पिन्बा १:३-१२

ख्रीष्ट दोःसी फेप्खबाला बारेरी घोना लबा २:१-१७

ख्रीष्टदा विश्वास लबागदेला बानीबेहोर ३:१-१५

चिठीला थुमरी भिबा ताम ३:१६-१८

पावलसे थेसलोनिकेला विश्वासीगदेदा भिबा न्हीरेमला चिठी

¹ लासूसो य्हाडला परमेश्वर आबादेन प्रभु येशू ख्रीष्टदा विश्वास लबा थेसलोनिकेरी मुबा जम्मान विश्वासीगदेदा डा पावलदेन सिलास ओचछे तिमोथीला फ्याफुल्ला!* ² परमेश्वर आबादेन प्रभु येशू ख्रीष्टग्याम एनीगदेदा दयामायादेन शान्ति तगै।

धन्यवाददेन प्रार्थना

³ आलेगदे, एनीगदेला लागिरी परमेश्वरदा डन्से सदन धन्यवाद पिन्तोःबा मुला। तिग्दा भिसम एनीगदेला विश्वास ल्हानान बढब तबा मुला, ओचछे हाड हाड न्हडरी एनीगदेला माया बढब तबा मुला। ⁴ ओचछे एनीगदे जम्मान दुख कष्ट नासी विश्वासरी याडयोड आतना चिबा मुला। थेतबासेलमा एनीगदेला चुहड्बा विश्वासला बारेरी डन्से परमेश्वरला अर्गु मण्डलीगदेला गुडरीनोन ताङ्सी ताङ्सी पाङ्म्याङ्बा मुला। ⁵ एनीगदेसे दुख नाबासे लमा एनीगदे परमेश्वरला य्हुल्साला म्हि दोबा मुला। चु जम्मान तामग्याम परमेश्वरसे खालैला ली आच्याना ठीक निसाफ लबा मुला भिबा ताम था याङ्बा मुला। ⁶ एनीगदेदा दुख पिन्बादा परमेश्वरसेन दुख पिन्ना, तिग्दा भिसम परमेश्वर खालैला ली आच्याना ठीक निसाफ लबा परमेश्वर हिन्ना। ⁷ प्रभु येशू ख्रीष्ट शक्तिशाली स्वर्गदूतगदेदेन मेला ल्हामरी स्वर्गग्याम फेप्खला। ओचछे दुख नाबा डन्देन एनीगदेदा थे धुइरीन परमेश्वरसे य्हाडदा चु दुखग्याम फेला। ⁸ तर परमेश्वरदा डोआसेबागदेदेन य्हाडला प्रभु येशूला थार्बा पिन्बा समाचार आङ्ग्यान्बागदेदा परमेश्वरसे सजाय पिन्ना। ⁹ थेनीगदे प्रभुदेन प्रभुला घेन य्हालदेन शक्तिग्याम फेसी

* 1:1 मुल १७:१

चितोःला। ओच्छे थेनीगदेसे सदनना लागिरी नाश तबा सजाय याड्ला।* 10 चु ताम चा प्रभु येशू फेपखबा धुइरी तला। थे धुइरी परमेश्वरला जम्मान विश्वास लबा म्हिगदेसे प्रभु येशूदा ल्हानान जयजयकार लला। जमा धुइरी एनीगदेएनोन थेनीगदेदेन छ्यामनोन तला, तिग्दा भिसम डन्से पाड्बा तामरी एनीगदेसे विश्वास लजी।

11 थेतबासेलमा य्हाड्ला परमेश्वरसे एनीगदेदा ड्योइबा अन्छार ज्यना लसी भ्रखम्गै, ओच्छे एनीगदेसे लबारी म्हाइबा ज्यबा गेदेन एनीगदेला विश्वासग्याम लबा गे थेला शक्तिग्याम पूरा लगै भिसी डन्से प्रार्थना लबा मुला। 12 थेहड् लजी भिसम एनीगदेग्याम प्रभु येशूला मान तला ओच्छे प्रभु येशूएनोन एनीगदे म्हाइसी ताड्ला। तिग्दा भिसम एनीगदेसे य्हाड्ला परमेश्वर आबादेन प्रभु येशू ख्रीष्टग्याम दयामाया याड्बा मुला।

2

परमेश्वरला बचन आड्यान्बा म्हि

1 ज्योज्यो आले नाना आडागदे, य्हाड्ला प्रभु येशू ख्रीष्ट दोःसी फेपखबा धुइरी य्हाड् थेदेन छ्यामनोन हुप तला भिबा तामला बारैरी डन्से एनीगदेदा पाड्बा मुला।* 2 खालैसे एनीगदेदा प्रभु फेपखबा धुइ तसी जिन्बा मुला भिसी पाड्जी भिसम थेहड्बा ताम डनीग्याम खबा ताम हिन्ना भिसी एनीगदे थालोड्गो। तिग्दा भिसम थेहड्बा म्हिगदेसे डन्ना मिन किन्सी तामग्याम, चिठीग्याम ओच्छे परमेश्वरला आत्माग्याम पाड्बा हिन्ना भिसी एनीगदेदा फसब लबारी म्हाइमुला। तर एनीगदेसे थेनीगदेला ताम विश्वास थालउ भिबा डन्ना बिन्ती मुला। 3 ओच्छे एनीगदेदा खालैसेन तिगै ताम लसी फसब थालगै। तिग्दा भिसम पाप गे लबादेन नाश ततोःबा म्हि खसी परमेश्वरदा ल्हानान बिरोध आलतेधोना प्रभु फेपखबा धुइ आख। 4 थे म्हिसे हाडसे हाडदान घेन सहोसी म्हिगदेसे परमेश्वर भिसी तेन्बा जम्मान सहेला बिरोध लला। ओच्छे डानोन परमेश्वर हिन्ना भिसी थे परमेश्वरला मन्दिररी चिला।*

5 डा एनीगदेदेन छ्याम मुबा धुइरी डाइ पाड्बा ताम एनीगदेसे ढन्बा आरे? 6 थे म्हि थेला धुइ आतमान थोन्ना भिसी परमेश्वरसे दान्देधोना थेदा रोकब लसी थान्बा मुला भिबा ताम एनीगदेदा थानोन मुला। 7 तिग्दा भिसम थे परमेश्वरला बचन आड्यान्बा म्हिसे न्हड न्हडनोन गे लसी जिन्बा मुला। तर थेदा रोकब लसी थान्बा शक्तिसे थेदा आख्लातेधोना थेसे लबा नइबा गेगदे म्हाइआखम। 8 थे परमेश्वरला बचन आड्यान्बा म्हि थोन्ना। जमाहेन्से प्रभु येशू घेन शक्तिरी फेपखसी थेदा फू लसीन नाश लला।*

9 परमेश्वरला बचन आड्यान्बा थे म्हि शैतानना शक्ति थोसी खला। ओच्छे थेसे ल्हानान थरीला फट्टा चिनुगदेदेन उदेकला गेगदे लला।* 10 ओच्छे नाश तबागदेदा थेसे नइबा गे लसी फसब लला। तिग्दा भिसम थेनीगदेदा थार्बा पिन्बा सत्य ताम सेम आनिनी। 11 थेतबासेलमा थेनीगदेसे लुसीला तामरीन विश्वास लगै भिसी परमेश्वरसे थेनीगदेदा अलमल तबा शक्ति गिक थेनीगदे मुबा ग्लारी पुड्खला। 12 तिग्दा भिसम थेनीगदेसे सत्य तामरी विश्वास आलना नइबा तामनोन ज्यबा भिसी म्हन्बासे लमा परमेश्वरसे थेनीगदेथोरी निसाफ लबा हिन्ना।

थार्बा याड्बाला लागिरी धम्बागदे

13 प्रभुसे माया लबा आलेगदे, एनीगदेला लागिरी डन्से सदन परमेश्वरदा धन्यवाद पिन्नोन तोःबा मुला। तिग्दा भिसम एनीगदेदा तिगै दोष आरेबा म्हि सहोबारी परमेश्वरला आत्मादेन एनीगदेसे विश्वास लबा सत्य तामग्याम थार्बा याड्गै भिसी परमेश्वरसे एनीगदेदा डाचछाहेन्सेन धम्बा हिन्ना। 14 डन्से एनीगदेदा थेःना लबा थार्बा पिन्बा समाचारग्याम य्हालदेन शक्ति पिन्बारी य्हाड्ला परमेश्वरसे एनीगदेदा ड्योइबा हिन्ना। थेतबासेलमा परमेश्वर प्रभु येशू ख्रीष्टदेन छ्याम ताड्बा हड्

* 1:9 यशै २:१० * 2:1 १ थेस ४:१५-१७ * 2:4 दानि ११:३६; इज २८:२ * 2:8 यशै ११:४ * 2:9 मत्ती २४:२४

एनीगदेदेन छ्यामएनोन ताड्ला। १५ थेतबासेलमा ज्योज्यो आले नाना आडागदे, डन्से डाच्छा लोप्बा तामग्याम तसै डन्से भिबा चिठीग्याम तसै एनीगदेसे डन्से लोप्बा ताम ड्यान्सी कोड्सी चिउ।

१६ य्हाडदा माया लबा प्रभु येशू ख्रीष्टदेन परमेश्वर आबासे थेला दयामायाग्याम य्हाडदा जुकजुकधोनाला आँटदेन ज्यबा आश पिन्बा मुला। १७ थेतबासेलमा परमेश्वरसेन अझ सेमरी आँट पिन्सी एनीगदेदा जम्मान ज्यबा गेदेन ज्यबा ताम लबारी सदन भड पिन्गै।

३

प्रार्थना

१ ज्योज्यो आले नाना आडागदे, डन्ना लागिरी प्रार्थना लसी पिन्गो, तिग्दा भिसम एनीगदेसे थे:बा हड् प्रभुला बचन अर्गु जम्मान ग्लाला म्हिगदेसे योनान थे:गै। ओच्छे थेनीगदेसेनोन एनीगदेसे हड् नोन प्रभुला बचनदा मान लगै। २ ओच्छे परमेश्वरसे डन्दा आज्यबा म्हिदेन पापी म्हिगदेग्यामसेनोन जोगब लसी पिन्गै भिसी प्रार्थना लसी पिन्गो। तिग्दा भिसम जम्मान म्हिगदेसे मी विश्वास आल। ३ तर प्रभु मी विश्वास लखम्बा प्रभु हिन्ना। थेसे एनीगदेदा विश्वासरी कोड्ना लला ओच्छे शैतानग्याम जोगब लसी थान्ना। ४ डन्से कुल्बा ताम अन्छारनोन एनीगदेसे गे लबान मुला। ओच्छे थेहड् लसीन सदन गे लला भिबा ताम डन्से प्रभुग्यामनोन था याड्बा मुला। ५ परमेश्वरसे एनीगदेदा लबा मायादेन ख्रीष्टसे नाबा दुख एनीगदेसेनोन लबारीदेन नाबारी खम्गै भिसी प्रभुसेन उन्गै।

ब्लेगुगदेदा पाड्बा ताम

६ ज्योज्यो आले नाना आडागदे, य्हाडला प्रभु येशू ख्रीष्टला अधिकारग्याम डन्से एनीगदेदा चु ताम कुल्ला। डन्से लोप्बा ताम अन्छार आभ्रबादेन ब्लेगु विश्वासीगदेग्याम थारेड तसी चिउ। ७ तिग्दा भिसम डन्से लबा हड् नोन लतो:ला भिबा ताम एनीगदेदा थानोन मुला। एनीगदेदेन छ्याम मुबा धुइरी डनी खाइमै ब्लेगु दोसी आचिनी। ८ डन्से टाडगा आफाना खालैला तिगै आचनी, बरु एनीगदेदा दुख थातगै भिसी डन्से धिन म्हुननोन दुख लसी गे लजी। ९ एनीगदेग्याम डन्से टाडगा किन्बा अधिकार आरे भिसी आहिन, तर एनीगदेसेनोन डन्से हड् नोन लगै भिसी डन्से चुहड् लबा हिन्ना। १० एनीगदेदेन छ्याम मुबा धुइरी डन्से एनीगदेदा “खालैसे गे आलनी भिसम थेसे चबा थुड्बा थालगै” भिसी पाड्मुबा। ११ तिग्दा भिसम एनीगदे न्हडरी कोड कोड म्हिसे ब्लेगु दोसी तिगै गे आलना म्हिसे लबा गेरी ओहड् नोन या झाड्मुला भिबा ताम डन्से थे:मुला। १२ थेतबासेलमा थेहड्बा म्हिगदेदा प्रभु येशू ख्रीष्टला अधिकारग्याम डाइ चुहड् लसी कुल्ला। थेनीगदे कुटिसी हाड हाडला गे लगै ओच्छे हाड हाडलान यासे स्होसी चउ। १३ तर ज्योज्यो आले नाना आडागदे, एनीगदे चा ज्यबा लबारी खाइमै दुख थाम्हन्गो।

१४ डन्से भिबा चु चिठीला ताम चुदे खालैसे आड्यान्नी भिसम थे म्हिदा डोसेसी थान्गो, ओच्छे थेहड्बा महिला संगतनोन थालउ। थेहड् लसम थे हाडनोन पे:ला। १५ तसैनोन थेदा शत्रु हड्बा थाम्हन्गो, तर ज्योज्यो आलेदा हड् लसी थेदा अर्ती पिन्गो।

चिठीला थुमरी भिबा ताम

१६ य्हाडदा शान्ति पिन्बा प्रभुसे एनीगदेदा जस्तोन तसै सदन शान्ति पिन्गै। ओच्छे प्रभु सदन एनीगदेदेन छ्याम तगै।

१७ डा पावल हाडलान यासे फ्याफुल्ला भिसी भिबा मुला। ओच्छे डाला जम्मान चिठी डोसेबाला लागिरी सदन डाइ चुहड् लसी भिबा मुला।

१८ य्हाडला प्रभु येशू ख्रीष्टला दयामाया एनीगदे जम्मानदेन छ्याम तगै।

पावलसे तिमोथीदा भिबा डाच्छारेमला चिठी चु चिठीला बारेरी पाड्तोःमा

भिबा म्हिः येशूला मुल चेला पावलसे भिबा मुबा (१ तिमोथी १:१)।

भिबा ग्लाः फिलिप्पी शहररी भिबा मुबा।

भिबा सालः ओस्पन ईश्वी संवत् ६३-६५ (विक्रम संवत् १२०-१२२) सालला गुडरी भिबा मुबा।

खाल्दा भिबाः तिमोथी भिबा म्हिदा भिबा मुबा।

तिमोथी एशिया अञ्चलला विश्वास लबा भ्योन म्हि मुबा। थेला आमा यहूदी विश्वासी मुबा ओच्छे आबा चा ग्रीक यहूलला म्हि मुबा। थार्बा पिन्बा समाचार थेःना लमा थे पावलदेन छ्याम छ्यामनोन भ्रमुबा ओच्छे पावलदा हो लमुबा। पावलसे थेदा चु डाच्छारेमला चिठीरी मुल ताम सोम भिबा मुला।

जम्मान भन्दा डाच्छा चु चिठीरी मण्डलीरी मुबा लुसीला ताम लोपबागदेग्याम होशियार तना लबा मुला। थे लुसीला ताम चा यहूदी धर्मदेन अर्गु यहूलला म्हिगदेला सेमरी म्हन्बा तामगदे दोड्सी थोन्बा लुसीला तामग्याम खबा विश्वास हिन्ना। चु विश्वासग्याम जम्बुलिड पापसे प्लिड्बा मुला भिसी लोपजी। ओच्छे म्हिसे परमेश्वरला सेमला ताम घोबारी खम्बा ज्ञान बुद्धि पक्का लसी आयाड्तेधोना, गाते चबा सहेगदे चबारी आख्ला ओच्छे ब्याह लबारी आख्ला, थे धुडधोना थेसे थार्बा आयाड्।

चु चिठीरी मण्डलीरी खाहड् लसी गे लतोःला, खाहड् लसी हो लतोःला, मण्डलीदा च्याबा म्हिगदे खाहड्बा ततोःला ओच्छे थेनीगदेदा हो लबागदेला बानीबेहोर खाहड्बा ततोःला भिसी चु जम्मान अर्तीगदे पिन्बा मुला। थेहड् लसीन चिठीला थुमरी तिमोथीदा विश्वासीगदेला समूहगदेला लागिरी तिग लतोःबा भिबा तामला बारेरीदेन येशू ख्रीष्टला ज्यबा गे लबा म्हि खाहड् लसी दोबारी खम्बा भिसी सल्लाह पिन्बा मुला।

मुल तामगदे

फ्याफुल्बा १:१-२

मण्डलीला बारेरी लोपबा ताम १:३-३:१६

पावलसे तिमोथीला गेला बारेरी पाड्बा ४:१-६:२१

पावलसे तिमोथीदा भिबा डाच्छारेमला चिठी

1-2 लासुसो, विश्वासरी डाला झा तिमोथी, डा पावलग्याम फ्याफुल्ला। डा य्हाडदा थार्बा पिन्बा परमेश्वरदेन आश पिन्बा ख्रीष्ट येशूसे कुल्बा अन्छार ख्रीष्ट येशूला मुल चेला हिन्ना। एसे य्हाडला परमेश्वर आबादेन प्रभु ख्रीष्ट येशूग्याम मोलमदेन दया ओच्छे शान्ति याड्गै।*

लुसीला ताम लोपबागदेदा बड्गो

3 डा माकेडोनिया भिबा ग्लारी निबा धुडरी एदा पाड्बा अन्छार लुसीला ताम लोपबागदेदा थेहड् थालउ भिसी कुल्बाला लागिरी ए एफिससरीन चिउ। 4 थेनीगदेदा अनुमान लसी सेमरी म्हन्सी पाड्बा कथा ओच्छे आखे म्हेमेला बारेरी खाड्मै आजिन्बा तामला लिच्छा थाभ्रउ भिसी पाड्गो। थेहड्बा तामसे चा य्हाड न्हडरी छेबा बड्बा तना लमुला, ओच्छे विश्वासग्याम घोखम्बा परमेश्वरसे म्हन्बा तामदा जे न्होडना लमुला। 5 चु कुल्बा ताम चा ज्यबा सेमदेन सेमसे म्हन्बा अन्छार ठीक गे लबारी ओच्छे ज्यबा विश्वासग्याम खबा माया ल्हेना लबाला लागिरी हिन्ना। 6 कोड कोड म्हिगदे चा चु जम्मान तामगदेदा वास्ता आलना गे आखेल्बा तामगदेरी कोल्सी चिमुला। 7 थेनीगदे परमेश्वरसे मोशादा पिन्बा ठिम लोपबा म्हि दोबारीम म्हाडमुला, तर हाडसेन पक्का लसी पाड्बा ताम हाडसेन आघोमुला।

* 1:1-2 मुल १६:१

8 चुदे खालैसे परमेश्वरसे मोशादा पिन्बा ठिम ठीक लसी तेन्जी भिसम थे ठिम ल्हानान ज्यबा मुला भिबा ताम य्हाडदा था मुला। 9 ओच्छे य्हाडदा चु तामएनोन था मुला, थे ठिम ज्यबा महिला लागिरी आहिन। तर थे ठिम अन्छार आभ्रबागदेदेन कुल्बा ताम आङ्ग्यान्बागदे ओच्छे परमेश्वरदा आतेन्बागदे, पापीगदे, नइबा सेम मुबागदे, परमेश्वरदा बिरोध लबागदे, आबा आमादा साइबागदेदेन म्हि साइबागदे, 10 ओच्छे खाल्दमानदेन छ्याम ब्रेल्सी भ्रबागदे, हाड हाड न्हडरीन ब्रेल्सी हेम्फेबेगदेदेन छ्याम भ्रबागदे, नोकर चूड्बा ग्लुबा लसी भ्रबागदे, लुसीला ताम पाङ्गबागदेदेन लुसीला तामरी साक्षी दोसी भ्रबागदे ओच्छे सत्य तामदा आहिन भिसी बिरोध लसी भ्रबागदेला लागिरी हिन्ना। 11 थे सत्य ताम डादा जिम्मा पिन्बा ल्हानान ज्यबा परमेश्वरला ल्हानान घेन थार्बा पिन्बा समाचार अन्छार मुला।

पावलदा प्रभुला दया

12 डादा भड पिन्बा य्हाडला प्रभु ख्रीष्ट येशूदा धन्यवाद मुला, तिग्दा भिसम थेसे डादा विश्वासला म्हि म्हन्सी थेला गे लबारी डादा धम्जी। 13 डाइ डाच्छा प्रभुदा बिरोध लसी बेइज्जत लजी। थे धुइरी डाइ ख्रीष्टदा विश्वास आलबासे लमा चु जम्मान गे आसेना आघोना लजी। थेतबासेलमा डाइ प्रभुग्याम दया याङ्गी।* 14 य्हाडला प्रभुसे डादा ल्हानान दयामाया लजी। ओच्छे विश्वासदेन माया पिन्जी। तिग्दा भिसम ख्रीष्ट येशूदेन छ्याम य्हाडदा गिक सहोबा हिन्ना। 15 जस्तो लसीन चु जम्मासेन इयान्तोःबादेन विश्वास लतोःबा ताम हिन्ना। पापीगदेदा थार्बा पिन्बारी ख्रीष्ट येशू जम्बुलिडरी फेपूखबा हिन्ना। ओच्छे पापीगदे न्हडरी जम्मान भन्दा पापी चा डानोन हिन्ना। 16 डा पापीगदे न्हडरी जम्मान भन्दा पापी तसैनोन डाला लागिरी ख्रीष्ट येशूसे गाते दुख नाजी भिबा ताम उन्बाला लागिरी परमेश्वरसे डादा दया लजी। चुहड लबा चा थेदा विश्वास लसी जुकजुकधोनाला जुनी याङ्गबागदेदा उन्बाला लागिरी हिन्ना। 17 खालैसे म्राङ्गआखम्बादेन खाइमै आजिन्बा ओच्छे जुकजुकधोना चिबा ग्ले परमेश्वर गिकदा जे सदन मानदेन जयजयकार तगै। आमेन।

18 डाला झा तिमोथी, डाइ एदा चु ताम कुल्बा मुला, एला बारेरी परमेश्वरसे डाच्छान पाङ्गबा अन्छार एसे आँट याङ्गी विश्वासला लागिरी ज्यबा लडाइ लउ। 19 थे धुइरी एसे हाडला विश्वासदेन सेमसे म्हन्बा अन्छार ठीक गे लबारी थाख्लागो। तिग्दा भिसम कोइ कोइ म्हिसे सेमसे म्हन्बा अन्छार ठीक गे लबारी ख्लाबासे लमा थेनीगदेसे हाडला विश्वासदा नाश लबा मुला। 20 थेहड लसी नाश लबागदे न्हडरी हुमेनियसदेन अलेक्जेन्डर हिन्ना। थेनीगदेसे परमेश्वरदा बिरोध लबा ख्लागै भिसी डाइ थेनीगदेदा शैतानना यारी जिम्मा पिन्बा मुला।

2

मण्डलीरी प्रार्थना लबा धुइरी था ततोःबा ताम

1 जम्मान भन्दा मुल ताम चा एसे जम्मालान लागिरी प्रार्थना लउ, एसे थेनीगदे जम्मालान लागिरी परमेश्वरग्याम मोलम ह्नीसी पिन्गो, ओच्छे परमेश्वरदा धन्यवाद पिन्गो। 2 ग्लेगदेदेन घेन घेन पदरी मुबागदे जम्मालान लागिरीनोन प्रार्थना लउ। थेहड लजी भिसम य्हाड सदन सुख शान्तिरी दुक्क तसी परमेश्वरदा तेन्सी थेदा मान लसी चिम्याङ्गला। 3 चुहड लबा ल्हानान ज्यबा हिन्ना, य्हाडदा थार्बा पिन्बा परमेश्वरदाएनोन चुहडबान सेम निमुला। 4 तिग्दा भिसम जम्मान म्हिसे सत्यदा डोसेसी थार्बा याङ्गै भिबा परमेश्वरला सेम मुला। 5 तिग्दा भिसम परमेश्वर गिक जे मुला ओच्छे म्हिगदेदा परमेश्वरला डाच्छापट्टि भबा म्हिएनोन गिक जे मुला। थे म्हि चा ख्रीष्ट येशू हिन्ना। 6 येशू ख्रीष्टसे जम्मान म्हिगदेला पापला सय फाबारी हाडलान ल्हुइ बलिदान पिन्जी, चु ताम चा परमेश्वरसे म्हन्बा धुइरीन उन्जी। 7 चुलान लागिरी डादा अर्गु य्हलला म्हिगदेदा विश्वासदेन सत्यला बारेरी लोपबाला लागिरी थार्बा पिन्बा समाचार थेःना लबा म्हिदेन मुल चेला सहोजी। डाइ पाङ्गबा चु ताम पूरान सत्य हिन्ना, लुसीला ताम आहिन।*

* 1:13 मुल ८:३; ९:४-५ * 2:7 २ तिमो १:११

8 थेतबासेलमा संगती लबा जम्मान ग्लारी हेम्फेबेगदेसे तिमै बोमोदेन कल आलना हाड हाडला तिमै दोष आरेबा या थीसी प्रार्थना लगै भिसी डाइ म्हन्बा मुला।

9 थेहड लसीन म्हिडम्हेमेगदेएनोन ल्हाना क्रा सहोसी ज्योबादेन म्हर, मोती ओच्छे ल्हानान सयला क्वान क्वान्सी आहिन, तर सोजो तसी सुवाहब तबा क्वान क्वान्सी भ्रगै भिसी डाइ म्हन्बा मुला।* 10 तर जुन म्प्रिडम्हेमेगदेसे डा परमेश्वरदा तेन्बा म्हि हिनना भिसी म्हन्मुला थेनीगदे चा ज्यबा गेग्याम ज्योसी भ्रगै।

11 ओच्छे म्प्रिडम्हेमेगदे कुटिसी तहरी चिसी लोपुगै। 12 म्प्रिडम्हेमेगदेसे हेम्फेबेगदेदा तहरी थान्बादेन परमेश्वरला बचन लोपुबा अधिकार चा डाइ आपिन, तर थेनीगदे कुटीसीन चितो:ला। 13 तिग्दा भिसम परमेश्वरसे डाच्छा आदमदा सहोसी जे हव्वादा सहोबा हिनना।* 14 ओच्छे डाच्छा आदमदा आहिन, तर म्प्रिडम्हेमेदा चा शैतानसे पापरी फसब लबा हिनना।* 15 तसैनोन थेसे ज्यना लसी विश्वास लसी परमेश्वरला मायादेन तिमै दोष आरेबा म्हि दोसी परमेश्वरला डाच्छा ज्यबा तसी चिजी भिसम थेदा कोला न्हबा धुइरी जोगब लला।†*

3

मण्डलीदा च्याबा म्हिगदे

1 चु सत्य ताम हिनना। खालै म्हिसे मण्डलीदा च्याबा गे लबारी म्हाइबा चा ज्यबा ताम हिनना। चु चा थेला सेमसे लबारी म्हाइबा ज्यबा गे हिनना। 2 थेतबासेलमा मण्डलीदा च्याबा म्हि चा खालैसे दोष उन्बारी आखम्बा, म्प्रिड गिक जे मुबा, हाडसे हाडदान तहरी थान्बा, जम्मासेन मान लबा, डोन्बोदा मान लबादेन ज्यना लसी लोपुबारी खम्बा ततो:मुला। 3 ओच्छे झि आइरक थुड्सी ड्य्होइसी भ्रबादेन छेबा बड्बा लबा आहिन, तर जम्मानदेन छ्याम ढिक्बा, सोजो, टाडगाला लिच्छा आभ्रबादेन, 4 थेसे हाडला दिम परिवारदा ज्यना लसी च्यातो:ला। ओच्छे थेला कोलागदेसे कुल्बा ताम ड्यानसी थेदा मान लतो:ला। 5 चुदे खालै म्हिसे हाडला दिमला म्हिगदेदा तहरी थान्बारी आखम्नी भिसम थेसे खाहड लसी परमेश्वरला मण्डलीदा च्याबारी खम्ला? 6 मण्डलीदा च्याबा म्हि चा भर्खर प्रभुदा विश्वास लबा छार म्हि तबारी आत। आहिनसम थेसे हाडसे हाडदान घेन सहोसी घमण्ड लसी भ्रला। ओच्छे शैतानसे याड्बा सजायरी थेएनोन परब तला। 7 थे ख्रीष्टदा विश्वास आलबा म्हिगदेला ओन्छाडरीनोन ज्यबा म्हि ततो:ला, आहिन भिसम जम्मासेन थेला तामगन लसी भ्रला ओच्छे शैतानना यारी परब तला।*

8 थेहड लसीन मण्डलीरी हो लबा म्हिगदेएनोन जम्मासेन मान लबा म्हि ततो:ला, ओच्छे ले न्ही मुबा हड लसी ताम पाड्बारी आत, झि आइरक थुड्सी ड्य्होइबादेन टाडगाला लोभ लबारी आत, 9 बरु थेनीगदेसे हाडला सेमसे म्हन्बा अन्छार ठीक गे लसी सत्य विश्वासदा जोगब लसी थान्तो:ला। 10 डाच्छा थेनीगदे ठीक मुला कि आरे भिसी मण्डलीसे च्यागै। ओच्छे तिमै दोष आरेसम थेनीगदेसे मण्डलीरी हो लगै।

11 थेहड लसीन मण्डलीरी हो लबा महिला म्प्रिडम्हेमेगदेएनोन स्य्हान्दोग्याम मान याड्बादेन खालैला तामगन आलबा ततो:ला। ओच्छे हाडसे हाडदान तहरी थान्खम्बादेन जम्मान तामरी म्हिगदेसे विश्वास लखम्बा ततो:ला।

12 मण्डलीरी हो लबा महिलाएनोन म्प्रिड गिक जे ततो:ला ओच्छे थेसेनोन हाडला कोलागदेदेन दिम परिवारदा ज्यना लसी च्याखम्तो:ला। 13 तिग्दा भिसम मण्डलीरी हो लबागदेसे ज्यना लसी गे लजी भिसम थेनीगदेसे मान याड्ला। ओच्छे थेनीगदेसे ख्रीष्ट येशूदा लबा विश्वासला बारेरीनोन स्य्हान्दोगदेदा पाड्बारी आँट याड्ला।

* 2:9 १ पत्रु ३:३ * 2:13 उत्प २:७, २१-२२ * 2:14 उत्प ३:१-६ † 2:15 कोड कोड विद्वानगदेसे “कोला न्हबा धुइरी जोगब लला” भिबा चा न्हबा कोलाग्याम थार्बा याड्ला भिबा हिनना। चु कोला चा येशू हिनना। * 2:15 उत्प ३:१५ * 3:7 तीत १:६-९ † 3:11 “मण्डलीरी हो लबा म्हिगदेला म्प्रिडम्हेमेगदे” भिबा चा मण्डलीरी हो लबा म्प्रिडम्हेमे अथवा मण्डलीरी हो लबा महिला म्प्रिडदा पाड्बा हिनना।

य्हाडसे विश्वास लबा तामगदे गाते घेन मुला

14 ए मुबा ग्लारी योनान खबा सेम मुला, तसैनोन डाइ एदा चु चिठी भ्रिबान मुला। 15 तिगदा भिसम तिगै लसी डा खबारी घइजी भिसम चु चिठीग्यामसेन परमेश्वरला दिम य्हाडला छोनबो परमेश्वरला मण्डलीरी खाहड लसी गे लतोःला भिबा ताम एसे था याडला। तिगदा भिसम परमेश्वरला मण्डली चा सत्य तामला भर ताबा थामदेन जग हिनना। 16 य्हाडदा था मुला कि य्हाडसे लबा विश्वास म्हिसे था आयाडबा घेन मुला,

“य्हाडसे येशूदा म्हि लहुडरी म्राड्जी,

थे परमेश्वरदा सेम निबा मुला भिसी परमेश्वरला आत्मासे उन्जी।

ओच्छे थेदा स्वर्गदूतगदेसेनोन म्राड्जी।

थेला बारेरी य्हुल्सा य्हुल्सारी थेःजी,

थेदा जम्बुलिडरी विश्वास लजी,

ओच्छे थे घेन य्हालदेन शक्तिरी तोर फेपजी।”

4

तिमोथीदा लोपबा ताम

1 लिच्छा खबा धुडरी फट्टा आत्मादेन म्हड म्हुडला ताम ड्यान्सी कोड कोड म्हिसे विश्वास लबा खलाला भिसी परमेश्वरला आत्मासे प्रस्टन सुडबा मुला। 2 चुहडबा लुसीला ताम पाडबा म्हिगदेला जालसे लमान चुहड तला, थेहडबागदेला ज्ञान बुद्धि चा लेपबा फाइसे स्राड्सी सिबा हडबान तला। जमाहेनसे थेनीगदेसे ज्यबा नडबा तिग हिनना थे फेबारी आखम। 3 चुहडबा म्हिगदेसे ब्याह लबारी आत भिमुला, ओच्छे गाते चबा सहेगदे चा चबारी आत भिसी लोपमुला। तर ख्रीष्टदा विश्वास लसी सत्य ताम घोबागदेसे परमेश्वरसे सहोबा चबा सहेगदे धन्यवाद पिन्सी चबारी तला। 4 परमेश्वरसे सहोबा जम्मान सहे ज्यबा मुबा। थेतबासेलमा जम्मान सहे चबारी तला। तर परमेश्वरदा धन्यवाद पिन्सी जे चतोःला। 5 तिगदा भिसम परमेश्वरला बचनदेन प्रार्थनाग्याम थे चबारी तबा चोखो सहोला।

ख्रीष्ट येशूला गे लबा म्हिदेन छ्याम ततोःबा ज्यबा बानीबेहोर

6 चुदे एसे चु जम्मान तामला बारेरी ज्योज्यो आले नाना आडागदेदा लोपजी भिसम, ए भ्रबा ज्यबा तामदेन विश्वासला बचनरी पाको म्हि दोला, ओच्छे ए ख्रीष्ट येशूला गे लबा ज्यबा म्हि दोला। 7 परमेश्वरदा आतेनबादेन टाना गा जोला ताम पाडबागदेग्याम होशियार तसी थारेड चिउ, ओच्छे परमेश्वरला बचन अनछार भ्रबारी भड लसी गे लउ। 8 तिगदा भिसम लहुडला लागिरी लबा गे तिगै धिनना लागिरी जे फाइदा तला। तर आत्माला लागिरी लबा गे चा जुन लसै फाइदा तला। तिगदा भिसम चु गेग्याम दानदेला जुनीदेन लिच्छाला जुनीला लागिरी कबुल लबा ताम हिनना। 9 चु चा सेमहेनसेन ड्यान्सी विश्वास लतोःबा ताम हिनना। 10 चुलान लागिरी य्हाडसे दुख लसी गे लबा हिनना। तिगदा भिसम य्हाडसे छोनबो परमेश्वरथोरी आश लबा मुला। परमेश्वर चा जम्मान म्हिगदेदा थार्बा पिन्बा ग्ले हिनना। अझ पाडनोन तोःमा विश्वास लबा म्हिगदेदा थार्बा पिन्बा ग्ले हिनना।

11 चुनोन ताम लोप्सी कुल्गो। 12 ए भ्योन तसैनोन एदा खालैसेन हेला थालगै। तर विश्वासीगदेला ओन्छाडरी एला बोली बचनदेन बानीबेहोर ओच्छे एसे चोखो सेम थोसी स्य्हान्दोदा लबा मायादेन परमेश्वरदा लबा विश्वास उन्गो। 13 डा थेरी आखतेधोना एसे सेम लसी परमेश्वरला बचन पढब लसी थेःना लउ, ओच्छे बचनग्याम लोप्सी आँट पिन्बादेन अर्ती पिन्बा गे लउ। 14 एदा परमेश्वरसे पिन्बा मोलमदेन शक्तिदा ज्यना लसी चलब लउ। एसे थे मोलम मण्डलीदा च्याबा म्हिगदेसे एदा मोलम पिन्बारी या थान्सी प्रार्थना लबादेन अगमवक्तागदेसे एला बारेरी पाडबा धुडरी याडबा मुबा।

15 एसे लबा ज्यबा गे जम्मासेन म्राड्बाला लागिरी एदा जिम्मा पिन्बा थे गेगदे सेमहेनसेन लसी चिउ। 16 ओच्छे हाडला बारेरीदेन हाडसे लोपबा तामला बारेरी होशियार तसी चिउ। ओच्छे चु गे लसीन चिउ। थेहड लजी भिसम एसे लोपबा ताम ड्यान्बागदेदेन ए हाडएनोन थार्ला।

5

विश्वासीगदेदा लतोःबा बानीबेहोर

1 एसे खेपूबा दोबा म्हिदा थाबड्गो, तर थेदा आबादा हड् लसी सम्झब लउ। ओच्छे हाड भन्दा जजागदेदा आलेदा हड् लसी व्यवहार लउ। 2 थेहड् लसी खुइ दोबा म्रिडम्हेमेगदेदा आमादा हड् लसी ओच्छे हाड भन्दा जजा म्रिडम्हेमेगदेदा हाडला आडादा हड् लसी ज्यबा व्यवहार लउ।

3 साँचचिलान, खालै आरेबा हेम्बो सिबा म्रिडम्हेमेदा वास्ता लउ। 4 तर चुदे खालै हेम्बो सिबा म्रिडम्हेमेला कोलागदेदेन छाया छुया मुसम थेनीगदेसे सयार लसी हाडला आबा आमाला गुण फागै। ओच्छे थेनीगदेसे डाच्छा हाडलान दिमरी परमेश्वरला बचन अन्छार गे लगै। तिग्दा भिसम परमेश्वरदा चुनोन ताम सेम निमुला। 5 तर साँचचिलान, खालै आरेबा हेम्बो सिबा म्रिडम्हेमेसे चा परमेश्वरथोरी आश लसी धिन म्हुननोन प्रार्थना लसी चिमुला। 6 तर चुहड् आलना थेसे मोजमजा लसी भ्रजी भिसम थे सिबा तेबान तला।

7 विश्वासीगदेदा तिगै दोष आतबाला लागिरी चु ताम थेनीगदेदा लोपूगो। 8 तर चुदे खालैसे हाडला म्हिगदेदेन हाडला दिमला म्हेमेगदेदा चबा क्वान्बा आपिन्नी भिसम थेसे विश्वास लबा ख्वलाला। ओच्छे थे विश्वास आलबा म्हिगदे भन्दाएनोन गे आखेल्बा तला।

9 हेम्बो सिसैनोन हेम्बो सिबा म्रिडम्हेमेगदेला मिन भ्रिबा खातारी मिन भ्रिसी थान्बाला लागिरी बोगल सोम दिड छ्योबा ततोःला, हाडला हेम्बोला सतरी चिबा ततोःला, 10 ओच्छे थेसे ज्यबा गे लसी मान याड्बा, कोलागदे ज्यना लसी च्याबा, डोन्बोगदेदेन परमेश्वरला म्हिगदेदा ज्यना लसी क्योड्बा,† दुख याड्बागदेदा ह्यो लबा हड्बा ज्यबा गेरी सेम लबा म्हि ततोःला।

11 तर छामे म्रिडम्हेमेला हेम्बो सिसैनोन थेला मिन हेम्बो सिबा म्रिडम्हेमेगदेला मिन भ्रिबा खातारी थाभ्रिउ। तिग्दा भिसम थेनीगदेला सेमसे आड्याननी भिसम थेनीगदेसे ख्रीष्टदा ख्वलासी दोःसी ब्याह लला। 12 चुहड् लसी थेनीगदेसे डाच्छा लबा कबुल अन्छार आभ्रबासे लमा थेनीगदेसे सजाय याड्बा। 13 ओच्छे थेनीगदे म्हिला दिम दिमरी कोसी भ्रबादेन ब्लेगु दोसी भ्रबा जे आहिन, तर म्हिला तामगन लसी भ्रबा ओच्छे म्हिसे लबा गेरी या झाड्बादेन पाड्बारीन आतबा ताम पाड्सी भ्रबा तला। 14 थेतबासेलमा हेम्बो सिबा छामे म्रिडम्हेमेसे दोःसी ब्याह लसी कोलागदे तगै ओच्छे थेसे हाडला दिमनाम सहोगै। तिग्दा भिसम यहाडला शत्रुगदेसे यहाडदा दोष लआम्याङ्गै भिबा डाला सेम मुला। 15 तिग्दा भिसम कोइ कोइ हेम्बो सिबा छामे म्रिडम्हेमेगदे मी डाच्छान शैतानपट्टि निसी जिन्बा मुला।

16 चुदे खालै विश्वासी म्रिडम्हेमेला हाडला म्हि न्हडरी हेम्बो सिबा म्रिडम्हेमे मुसम थेसे ह्यो लगै, ओच्छे मण्डलीदा तिगै दुख थातगै। थेतबासेलमा मण्डलीसे चा साँचचिन खालै आरेबा हेम्बो सिबा म्रिडम्हेमेगदेदा ह्यो लबारी खमगै।

17 ल्हानान दुख लसी मण्डलीदा च्याबा म्हिगदेदा मान लसी थेनीगदेदा गेला ज्यालाएनोन याड्तोःबा भन्दा ल्हानान पिन्गो, ओच्छे दुख लसी परमेश्वरला बचन थेःना लबादेन लोपूबा म्हिसे मी झन चु याड्नोन तोःला। 18 तिग्दा भिसम परमेश्वरला बचनरी

“दाइँ लबा ग्लापला सुडरी भोर थाक्वान्गो”

भिसी भ्रिबा मुला।

ओच्छे

“गे लमाहेन्से ज्याला याड्नोन तोःला”

भिसी सुड्बा मुला।*

19 म्हि न्ही सोम साक्षी आरेतेधोना मण्डलीदा च्याबा म्हिदा लबा दोष थाड्यानगो।* 20 स्य्हान्दोगदेसेनोन पाप गे थालगै भिसी सदन पाप गे लसी भ्रबा म्हिगदेदा जम्मालान ओन्छाडरी बड्गो।

† 5:10 “परमेश्वरला म्हिगदेदा ज्यना लसी क्योड्बा” भिबा चा यहूदीगदेला ठिम अन्छार विश्वासीगदेला काड खुसी मान लबा हिन्ना। * 5:18 व्यव २५:४; मत्ती १०:१०; लूका १०:७ * 5:19 व्यव १७:६; १९:१५

21 परमेश्वरदेन ख्रीष्ट येशूला डाचछापट्टि ओच्छे परमेश्वरसे धम्बा स्वर्गदूतगदेला डाचछापट्टि एसे खालैला ली च्यासी गे आलना जम्मादान च्योच्यो लसी चु ठिमगदे ड्यान्गो भिसी डाइ एदा कुल्ला। 22 खालै म्हिथोरी हतार लसी या थान्सी प्रार्थना लसी मण्डलीला गे जिम्मा थापिन्गो। ओच्छे स्य्हान्दो म्हिगदेला पापरी थाभ्रउ। ओच्छे सदन पापग्याम जोगब तसी चिउ।

23 डाचछा हड् क्युइ जे आहिन, तर एला फो धुइ धुइरी आखम्बासे लमा एसे जजाकर अडगुरला निडगु थुङ्गो।

24 कोइ कोइ म्हिला पाप चा प्रस्टन म्राड्मुला ओच्छे थेनीगदे निसाफरी परब तमुला। तर स्य्हान्दो गाते म्हिला पाप चा लिच्छा जे म्राड्मुला। 25 थेहड् लसी गाते ज्यबा गेगदे डाचछान प्रस्टन म्राड्मुला ओच्छे प्रस्टन आम्राड्बा गेगदे मुसैनोन जम्मासेन था याड्ला।

6

1 परमेश्वरला मिनदेन य्हाडसे लोप्बा तामदा खालैसे दोष आलबाला लागिरी जम्मान नोकरगदेसे हाड हाडला मालिकला तहरी चिसी मालिकसे कुल्बा ताम ड्यान्तोःला भिसी म्हन्गो। 2 विश्वासरी ज्योज्यो आले नाना आडा तजी भिदेमा विश्वास लबा मालिकदा विश्वास लबा नोकरगदेसे मान आलबा आहिन। बरु थेनीगदेसे हाडला मालिकदा अझ ज्यना लसी मान लगै। तिगदा भिसम थेनीगदेसे लबा गेग्याम हाडलान सेम निबा विश्वासीगदेदान फाइदा तबा हिन्ना।

सत्यला धनदेन फट्टा ताम लोप्बा

चु अनछार गे लउ भिसी थेनीगदेदा लोप्सी आँट पिन्गो। 3 चुदे खालै म्हिसे लोप्बा ताम य्हाडला प्रभु येशू ख्रीष्टला सत्य बचनदेन परमेश्वरदा तेन्बारी लोप्बा तामदेन आढिकनी भिसम 4 थे म्हिसे डा हड्बा खालै आरे भिसी भ्रमुला, तर थेसे तिगै आघोमुला। थे भिथाला ताम लबादेन ताम गिक गिकरी कल लबा रोगसे स्याप्बा म्हि हिन्ना। चुहड्बा तामगदेसे डाह लबा, कल लबा बिरोध लबादेन नइबा म्हन्बा ताम खना लमुला। 5 ओच्छे बुद्धि न्होड्बादेन सत्य ताम आड्यान्बा म्हिगदेदेन छ्याम कल लमुला, ओच्छे परमेश्वरदा तेन्बा भिबा चा धन सम्पत्ति सहोबारी हिन्ना भिसी थेनीगदेसे म्हन्मुला।

6 हाडदेन छ्याम जुन सहे मुला थेरीन सन्तोक लसी परमेश्वरदा तेन्जी भिसम थेनोन जम्मान भन्दा घेन सम्पत्ति हिन्ना। 7 तिगदा भिसम य्हाडसे चु जम्बुलिडरी न्ह तिगै भसी खजी न्ह तिगै भोर्सी निला। 8 तर चबादेन क्वान्बारी जे छ्योजी भिसम य्हाड ओतेरीन सन्तोक तला।

9 तर फ्युकपो दोबारी म्हाइबा म्हिगदे चा थेनीगदेला सेमरी खबा आज्यबा तामदेन न्होड्बा सेमसे लमा थेनीगदे फसब तला। चु जम्मान नइबा म्हन्बा तामगदेसे थेनीगदेदा नर्गरी धोना लला। 10 तिगदा भिसम जम्मान न्होड्ना लबा तामगदे खबान टाडगाला लिच्छा भ्रबासे लमा हिन्ना। टाडगाला लिच्छा भ्रबासे लमा कोइ कोइ म्हिसे मी विश्वास लबान ख्लासी आज्यबा ग्यामपट्टि भ्रबा मुला, ओच्छे थेनीगदेला सेम ल्हानान दुखसे क्रोबा मुला।

पावलसे तिमोथीदा कुल्बा ताम

11 तर परमेश्वरला म्हि एसे चु जम्मान आज्यबा तामगदे खलागो। ओच्छे जुन ताम सत्यदेन ज्यबा मुला थे तामला लिच्छा भ्रउ। थेहड् लसीन परमेश्वरदा सेम निबा म्हि दोबारी, परमेश्वरदा तेन्बारी, विश्वासरी भ्रबारी, माया लबारी, सेम नाबारीदेन सोजो तसी भ्रबारी भड लउ। 12 थेतबासेलमा ए जुकजुकधोनाला जुनीला लागिरी विश्वासरी सदन डाचछा बढब तउ। तिगदा भिसम परमेश्वरसे एदा चुलान लागिरी ड्योइबा मुबा। एसे थे जुकजुकधोनाला जुनीला बारेरी ल्हानान म्हिला ओन्छाडरी ज्यना लसी उन्बा मुला। 13 जम्मादान जुनी पिन्बा परमेश्वर ओच्छे पन्तियस पिलातसला डाचछा सत्य ताम सुड्बा ख्रीष्ट येशूला डाचछा डाइ एदा कुल्ला।* 14 एदा खालैसे दोष आलबाला लागिरी डाइ एदा कुल्बा चु ताम य्हाडला प्रभु येशू ख्रीष्ट दोःसी आफेपखतेधोना ढुकक तसी पूरान ड्यान्गो। 15 परमेश्वर जम्मादान मोलम पिन्बादेन जम्मानथोरी शासन लबा, ओच्छे ग्लेगदेलाएनोन ग्ले,

* 6:13 यूह १८:३७

प्रभुगदेलाएनोन प्रभु परमेश्वर हिन्ना। धुइ पूरा तमाहेन्से थेसेन ख्रीष्ट फेपखबा धुइ उन्ना। 16 खाइमै आसिबा चा थे जे हिन्ना, ओच्छे थे खालै निआखम्बा य्हालरी धन्छ्यामुला। थेदा खालै म्हिसे खाइमै म्राड्बा आरे ओच्छे म्राड्बारीएनोन आखम। ओच्छे थेनोन परमेश्वरदा सदन मानदेन शक्ति तगै। आमैन।

17 चु जम्बुलिडला फ्युकुपोगदेदा डा हड्बा खालै आरे भिसी भ्रबारी आत भिसी कुल्गो। ओच्छे नाश तसी निबा सम्पत्तिरी आहिन, तर य्हाडदा ताड्ना लबारी जम्मान सहे ल्हानान पिन्बा परमेश्वरथोरी आश लउ भिसी पाड्गो। 18 थेनीगदेला टाड्गा ज्यबा गेरी चलब लउ भिसी पाड्गो, ओच्छे थेनीगदेदा स्य्हान्दोदा ज्यबा सेमसे भो लसी पिन्बा ज्यबा गेरी फ्युकुपो दोगो भिसी कुल्गो। 19 चुहड् लसी धन सम्पत्ति सोजी भिसम थेनीगदेदा खबा धिनगदेरी ज्यबा तला। चु थेनीगदेसे याड्बा पक्का जुनी हिन्ना।

20 तिमोथी, एदा जुन गे जिम्मा पिन्बा मुला, थे जोगब लसी थान्गो। ओच्छे परमेश्वरदा आतेन्बा तामदेन आतोःबा तामगदे चा भिथाला ज्ञान जे हिन्ना। थेतबासेलमा थेहड्बा तामगदे ख्लागो। 21 चु तामगदे ड्यान्सी भ्रबा गाते म्हिगदेसे विश्वास लबान ख्लाबा मुला।

एदेन छ्याम परमेश्वरला दयामाया तगै।

पावलसे तिमोथीदा भिबा न्हीरेमला चिठी चु चिठीला बारेरी पाड्तोःमा

भिबा म्हिः येशूला मुल चेला पावलसे भिबा मुबा (२ तिमोथी १:१)।

भिबा ग्लाः रोमला झ्यालखानग्याम भिबा मुबा।

भिबा सालः ओस्पन ईश्वी संवत् ६५-६७ (विक्रम संवत् १२२-१२४) सालला गुडरी भिबा मुबा।

खाल्दा भिबाः तिमोथी भिबा म्हिदा भिबा मुबा।

चु न्हीरेमला चिठी पावलसे थार्बा पिन्बा समाचार थेःना लबा ह्वाड भन्दा च्याड्बा तिमोथीदा जे पिन्बा सल्लाह हिन्ना। चु चिठीला मुल ताम चा “नाबा” हिन्ना। चु चिठीरी तिमोथीदा जस्तोन दुख तसैनोन सेमहेन्सेन ख्रीष्ट येशूला बारेरी पाड्बाला पाड्बान लउ भिसी पाड्बा मुला। ओच्छे परमेश्वरला थार्बा पिन्बा समाचारदेन पुरानो कबुलला सत्य तामगदेरी कोड्सी चिउ भिसी पाड्बा मुला। थेहड् लसीन दुखदेन हेला नातोःमा लोप्बा म्हिदेन थार्बा पिन्बा समाचार थेःना लबा म्हिसे लतोःबा जम्मान गे लसीन चिबाला लागिरी आँट खबा सल्लाह पिन्बा मुला।

खास लसी तिमोथीदा चु चिठीरी “जम्बुलिडला मूर्ख तामगदेग्याम” जोगब तबाला लागिरी होशियार तना लबा मुला। चुहड्बा मूर्ख तामसे ड्यानबागदेदा फाइदा आत, बरु न्होड्ना लमुला।

चु जम्मान तामला बारेरी पावलसे तिमोथीदा ह्वाडदेन ह्वाडसे लबारी म्हाड्बा गेगदेला बारेरी पाड्बा मुला। पावलसे ह्वाडलान विश्वासला बारेरी, ह्वाडसे नाबा तामला बारेरी, ह्वाडसे लबा मायाला बारेरीदेन दुखला धुडरी नाबा तामगदे ढन्ना लबा मुला।

मुल तामगदे

फ्याफुल्बा १:१-२

स्याबासदेन आँट पिन्बा १:३-२:१३

सल्लाह पिन्बादेन होशियार तना लबा २:१४-४:५

पावलसे ह्वाडलान बारेरी पाड्बा ४:६-१८

चिठीला थुमरी भिबा ताम ४:१९-२२

पावलसे तिमोथीदा भिबा न्हीरेमला चिठी

१-२ लाससो, प्रभुरी सेम निबा डाला झा तिमोथीदा डा पावलग्याम फ्याफुल्ला। डादा ख्रीष्ट येशूसे जुकजुकधोनाला जुनी पिन्ना भिसी लबा कबुल अनछार परमेश्वरसे ख्रीष्ट येशूला मुल चेला दोबारी धम्बा हिन्ना। एदा परमेश्वर आबादेन य्हाडला प्रभु येशू ख्रीष्टग्याम मोलमदेन दया ओच्छे शान्ति तगै।*

प्रभुला गे लबारी दुख थाम्हन्गो

^३ डाला झा, डाइ सदन धिन म्हून प्रार्थना लबा धुडरी एदा ढन्सी परमेश्वरदा धन्यवाद पिन्बा मुला। डाला आखे म्हेमेगदेसे तेन्बा हड् लसी डाइ सेमहेन्सेन परमेश्वरदा तेन्बा मुला। ^४ एला मीख्लीला धारा ढन्माम, डादा सदन एदेन छ्याम हुप तबा सेम खमुला, ओच्छे एदेन छ्याम हुप तम्याड्सम डा ल्हानान ताड्सेला मुबा। ^५ एसे सेमहेन्सेन लबा एला ज्यबा विश्वास डाइ ढन्बा मुला। थे विश्वास चा डाच्छा एला मम लोइसदेन आमा युनिससेनोन लमुबा। एला ममदेन आमासे लबा हड्बान विश्वास एसेनोन लबा मुला भिबा तामरी डा ढुकुक मुला।*

^६ थेतबासेलमा डाइ एथोरी या थान्सी प्रार्थना लमा एसे परमेश्वरग्याम याड्बा मोलमदा सदन सोना लसी थान्गो भिसी डाइ एदा ढन्ना लला। ^७ तिग्दा भिसम परमेश्वरला आत्मासे य्हाडदा लोड्बा खबा आत्मा पिन्बा आरे, तर भड, मायादेन ह्वाडसे ह्वाडदान तहरी थान्खम्बा आत्मा पिन्बा मुला।

* १:१-२ मुल १६:१ * १:५ मुल १६:१

८ थेतबासेलमा य्हाडला प्रभुला बारैरी पाड्बारी थापे:गो, ओच्छे डा झ्यालखानरी मुला भिसीएनोन थापे:गो। तर परमेश्वरग्याम शक्ति याड्सी थार्बा पिन्बा समाचार थे:ना लसी डादेन छ्यामनोन दुख नाबारी तयार तउ।

९ परमेश्वरसे य्हाडदा थार्ना लबा मुला।

थेसे य्हाडला गे म्हाड्सी आहिन,

तर थेसे म्हन्बा अन्छार हाडलान दयामायग्याम य्हाडदा हाडला म्हि सहोबारी ड्योइबा हिन्ना।

चु ताम थेसे दडबोरीन ख्रीष्ट येशूग्याम य्हाडदा पिन्बा मुबा।

१० दान्दे थे दयामाया य्हाडला थार्बा पिन्बा ख्रीष्ट येशू फेप्खसी य्हाडदा उन्बा मुला।

थेसे कालदा नाश लसी य्हाडदा थार्बा पिन्बा समाचारग्याम जुकजुकधोनाला जुनी उन्जी।

११ चुनोन थार्बा पिन्बा समाचार थे:ना लबारीदेन लोप्बारी डादा मुल चेला सहोसी धम्जी।*

१२ थेतबासेलमा डाइ चु दुखएनोन नाबान मुला। तसैनोन डा खाइमै आपे:नी। तिग्दा भिसम डाइ खाल्दा विश्वास लबा मुला थे ताम डादा था मुला। ओच्छे जुन गे थेसे डादा जिम्मा पिन्बा मुला थे जम्मान गे थेसे पूरा लखम्ला। निसाफ लबा धिन आततेधोना थे गे पूरा लबारी डादा भड पिन्ना भिबा तामरी डा दुक्के मुला।

१३ ख्रीष्ट येशूदेन छ्याम गिक तबा विश्वासदेन मायारी डाग्याम लोप्बा सत्य तामगदे अन्छार एसे गे लउ। १४ एदा जिम्मा पिन्बा सत्य तामदा य्हाड न्हडरी धन्छ्याबा परमेश्वरला आत्माग्याम जोगब लसी थान्गो।

१५ एशिया अञ्चलरी मुबागदे जम्मान डाग्याम फेसी निजी भिबा एदा थानोन मुला। फेसी निबागदे न्हडला फुगेलसदेन हर्मोगेनसएनोन हिन्ना।

१६ प्रभुसे ओनेसिफरसला म्हेमेदा दया लगै, तिग्दा भिसम थेसे डाला दुखरी ल्हानान रेम आँट पिन्मुबा, ओच्छे डा झ्यालखानरी मुसैनोन डा म्हाड्सी थे आपे:मुबा। १७ तर थे रोमरी धोखमैछ्याम डादा आस्यापतेधोना थेसे म्हाइबाला म्हाइबान लजी। १८ निसाफ लबा धुइरी थेदा प्रभुसे दया लगै। थेसे एफिसस शहररी डादा गाते हो लजी भिबा ताम एदा थानोन मुला।

2

येशू ख्रीष्टसे कुल्बा ताम ड्यान्बा म्हि

१ थेतबासेलमा डाला कोला, ए ख्रीष्ट येशूसे पिन्बा दयामायारी कोड्गो। २ ओच्छे ल्हानान महिगदेला गुडरी एसे डाग्याम थे:बा ताम विश्वास लखम्बादेन लोप्बारी खम्बा म्हिदा जिम्मा पिन्गो।

३ ख्रीष्ट येशूला ज्यबा सिपाही दोसी डन्देन छ्याम दुख नाबारी तयार तउ। ४ सिपाहीरी भर्ना तबा म्हि खाइमै अर्गु गेरी आकोल्मुला। तिग्दा भिसम थेला सेमरी हाड भन्दा थोला म्हिदा ताड्ना लतो:ला भिबा जे तमुला। ५ ओच्छे खेलरी भो किन्सी खेलला ठिम अन्छार आक्लड्बा खजिबै म्हिसे इनाम आयाड्। ६ जुन म्हिसे दुख लसी खेती लला थेसेन डाच्छा रोबा बाली याड्तो:ला। ७ डाइ तिग पाड्बा मुला, थे ताम म्हन्गो, तिग्दा भिसम जम्मान ताम एदा प्रभुसे घोना लला।

८ दाऊद वंशग्याम फेप्खबा येशू ख्रीष्टदा ढन्गो। थे सिबागदे न्हडग्याम सोबा मुला। डाइ थे:ना लबा थार्बा पिन्बा समाचार चा चुनोन हिन्ना। ९ थार्बा पिन्बा चुनोन समाचार थे:ना लबासे लमा डाइ दुख नाबान मुला, ओच्छे अझ अपराधीदा हड् लसी डादा च्याल्दासे खीबा मुला। तर परमेश्वरला थार्बा पिन्बा समाचारदा खाइमै च्याल्दासे खीबारी आखम। १० थेतबासेलमा परमेश्वरसे धम्बागदेला लागिरी डाइ जम्मान दुख नाला। तिग्दा भिसम थेनीगदेसेनोन जुकजुकधोनाला य्हालदेन शक्ति ओच्छे ख्रीष्ट येशूग्याम थार्बा याड्गै भिसी डाइ चु दुख नाबा हिन्ना। ११ चुहड् भिसी पाड्बा चा सत्य हिन्ना, चुदे य्हाड थेदेन छ्यामनोन सिबा मुला भिसम

* 1:11 १ तिमो २:७

थेदेन छ्यामनोन सोला।

१२ य्हाडसे दुख नाबारी खम्जी भिसम

य्हाडसेनोन थेदेन छ्यामनोन शासन लम्याङ्ला,
तर य्हाडसे थेदा विश्वास लबा ख्लाजी भिसम
थेसेनोन य्हाडदा ख्लाला।*

१३ य्हाडसे विश्वास लबा ख्लासैनोन,

ख्रीष्ट सदन विश्वास लखम्बा तला,
तिग्दा भिसम थेसे खाइमै हाडला बचन आपो।

परमेश्वरसे हाडला गे लबारी धम्बा म्हि

१४ चु ताम थेनीगदेदा घोना लउ ओच्छे आतोःबा तामरी कल थालउ भिसी प्रभुला डाच्छा कुल्गो।
चुहड्बा तामसे खालैदा ज्यबा आत, तर ड्यान्बागदेदा न्होङ्ना जे लला। १५ आपेःना परमेश्वरला
सत्य बचन अन्छार ज्यना लसी गे लबा म्हिसे हड् एसेनोन हाडसे हाडदान परमेश्वरदा सेम निबा
म्हि दोबारी भड लउ। १६ ओच्छे परमेश्वरदा मान आतबादेन मूर्ख तामगदे ख्लागो। तिग्दा भिसम
चुहड्बा तामसे म्हिगदेदा झन परमेश्वरग्याम थारेड तना लमुला। १७ थेनीगदेला ताम सइन तबा पोर
हड् तसी निमुला। थेहड्बा ताम लबा म्हिगदे न्हडला हुमेनियसदेन फिलेतसएनोन हिन्ना। १८ सत्य ताम
ख्लाबा चुनोन म्हिगदेसे थेनीगदे डाच्छान सिबाग्याम सोसी जिन्बा मुला भिसी पाङ्मुला। ओच्छे
थेनीगदेसे विश्वास लबा कोइ कोइ म्हिगदेदा मी न्होङ्ना लबा मुला। १९ तर परमेश्वरसे थान्बा
सत्यला जग सदन कोङ्सी चिला। ओच्छे थेथोरी चुहड्बा छाप लबा मुला, “प्रभुसे हाडला म्हिगदेदा
डोसेमुला,” ओच्छे “प्रभुला मिन किन्बागदे पापग्याम थारेड चिगै।”*

२० फ्युकपोला दिमरी म्हरदेन म्हुडला ताड जे आहिन, तर सिडदेन साप्राला ताडएनोन तमुला। चु
ताडगदे कोइ म्हिगदेदा क्योड्बाला लागिरी तला भिसम कोइ हाडलान लागिरी चलब लबाला लागिरी
हिन्ना। २१ खालै म्हिसे हाडदा पाप गेग्याम चोखो थान्जी भिसम थे म्हि चा डोन्बोदा क्योड्बारी
चलब लबा चोखो ताड हड्बान तला। तिग्दा भिसम थेसे हाडदान चोखो थान्बासे लमा जम्मान ज्यबा
गेरी चलब लबाला लागिरी मालिकदा थे सेम निबा तला।

२२ थेहड् लसीन भ्योन मुबा धुइरी सेमरी खबा नड्बा तामगदे ख्लागो, ओच्छे परमेश्वरदा सेम निबा
म्हि दोसी विश्वास, मायादेन शान्तिरी ज्यबा सेमसे प्रभुला मिन किन्बागदेदेन छ्याम भ्रउ। २३ तर एसे
मूर्ख तामदेन गे आखेल्बा ताम ख्लागो, तिग्दा भिसम चुहड्बा तामसे कल जे तमुला भिबा एदा थानोन
मुला। २४ प्रभुला गे लबा म्हिसे चा कल लबारी आत, थे जम्मानदेन छ्याम ढिक्बा, लोपबारी खम्बा,
जस्तोन दुख तसै नाबारी खम्बादेन २५ जम्मान गेरी सोजो तसी हाडदा बिरोध लबागदेदा घोना लसी
ज्यबा ग्याम उन्बारी खम्बा म्हि ततोःला। थेहड् लजी भिसम परमेश्वरसे थेनीगदेदा थेन्से लबा पाप
ख्लासी सत्य ताम घोसी परमेश्वरपट्टि दोःबा सेम पिन्ना तला, २६ जमाहेन्से होसरी खसी थेनीगदे
शैतानना याग्याम स्योर्ला। तिग्दा भिसम शैतानसे कुल्बा अन्छार भ्रगै भिसी थेसे थेनीगदेदा खीसी
थान्मुला।

३

लिच्छाला धुइरी परमेश्वरदा ख्लाबा म्हिगदे

१ लिच्छाला धुइ चा ल्हानान दुखला धुइ तला भिबा ताम एसे था याङ्गो। २ तिग्दा भिसम जमा धुइरी
म्हिगदे हाडदा जे माया लबा, ओच्छे टाडगाला लिच्छा जे भ्रबा, डा हड्बा खालै आरे भिसी भ्रबा, डा
जे चसे डा जे भ्रसे भिसी भ्रबा म्हि, स्य्हान्दोदा बिरोध लबा, आबा आमासे पाङ्बा ताम आङ्ग्यान्बा,
गुण आम्राड्बादेन परमेश्वरदा आतेन्बा, ३ ओच्छे दया आरेबा, ढिक्ना लबारी आखम्बा, तामगन
लसी भ्रबा, हाडसे हाडदान तहरी आथान्बा, च्यामान लोड्बा खबा, ज्यबा ताम सेम आनिबा, ४ धोका
पिन्बा, तिगै वास्ता आलना मूर्ख गे लसी भ्रबा, डा हड्बा खालै आरे भिसी भ्रबा, परमेश्वरदा ताङ्ना

* २:१२ मत्ती १०:३३; लूका १२:९ * २:१९ गन्ती १६:५

आलना मोजमजा लसी भ्रबा सेम लबा, ^५ परमेश्वरदा तेन्बा सहोबा, तर परमेश्वरला शक्तिग्याम लबा गे चा आहिन भिबा चुहड्बा म्हिगदेग्याम थारेड तसी चिउ।

^६ तिग्दा भिसम थेहड्बा म्हिगदे न्हडला कोइ कोइ चा दिम दिमरी निसी पापी सेम थोबादेन पापसे नाड्बा कमजोर मिडम्हेमेगदेदा हाडला तहरी थानमुला। ^७ थे मिडम्हेमेगदेसे सदन लोपबारी मी म्हाइमुला, तर सत्य ताम तिग हिन्ना भिसी खाइमै आसेमुला। ^८ यान्नेसदेन याम्ब्रेससे मोशादा बिरोध लबा हड्बोन चु म्हिगदेसे सत्य तामला बिरोध लमुला। चुहड्बा म्हिगदेला बुद्धि न्होड्बा मुला, ओचछे विश्वास लबा सहोसी भ्रमुला।* ^९ तर दाहेन्से थेनीगदे ल्हानान आटु, तिग्दा भिसम थेनीगदे गाते मूर्ख चीम भिबा ताम जम्मासेन म्राड्ला। ओचछे यान्नेसदेन याम्ब्रेसदा खाहड् तमुबा थेनीगदेदाएनोन थेहड्बोन तला।

पावलसे तिमोथीदा कुल्बा ताम

^{१०} तर डाइ लोपबा ताम, डाला बानीबेहोर, डाइ लबारी छ्याइबा गे, डाला विश्वास, डाइ दुख नाखम्बा, डाला मायादेन डा विश्वासरी गाते कोड्सी चिबा मुला भिबा ताम एसेन म्राड्बा मुला। ^{११} ओचछे डादा म्हिगदेसे पिन्बा दुखदेन डाइ नाबा दुख एसे म्राड्बा मुला। एन्टिओखिया, आइकोनियनदेन लुस्त्रा भिबा ग्लारी डाइ गाते ल्हाना दुख नाजी। तसैनोन थे जम्मान दुखग्याम प्रभुसे डादा जोगब लजी।* ^{१२} पाड्बोन तोःमा ख्रीष्ट येसूदा सेमहेन्सेन तेन्सी थेदेन छ्याम भ्रबागदे जम्मादान म्हिगदेसे दुख मी पिन्बोन पिन्ना। ^{१३} तर पापी सेम थोबा म्हिगदे स्य्हान्दोदा ठगब लबारी म्हाइमा थेनीगदे हाड्बोन झन झन न्होड्सी निला। ओचछे स्य्हान्दोदा धोका पिन्बागदे हाड्सेन धोका याड्ला। ^{१४} तसैनोन ए चा हाड्से लोपबा चु तामरी विश्वास लसी कोड्सी चिउ। तिग्दा भिसम चु ताम खाल खालग्याम लोपजी भिबा एदा थानोन मुला। ^{१५} एदा जजाहेन्सेन परमेश्वरला बचन था मुला। थे बचनसे ख्रीष्ट येसूदा लबा विश्वासग्याम थार्बा याड्बाला लागिरी एदा ज्ञान बुद्धि पिन्खम्ला। ^{१६} चु बचनरी भ्रिबा जम्मान ताम चा परमेश्वरला आत्माग्यामनोन खबा हिन्ना। तिग्दा भिसम सत्य ताम लोपबारी, आतोःबा तामला दोष उन्बारी, गल्ती तामगदेदा सोज्यब लबारी ओचछे परमेश्वरसे म्हन्बा अन्छार भ्रबा लोपबारी खम्गै भिसी हिन्ना। ^{१७} थेहड् लसीन परमेश्वरला म्हिगदेसे जम्मान ज्यबा गेगदे लबारी खम्गै भिसीन परमेश्वरला बचन पिन्बा हिन्ना।

4

^१ ख्रीष्ट येसू ग्ले दोसी फेपखमा सिबादेन सोबा जम्मालान निसाफ लला। थेतबासेलमा परमेश्वरदेन येसू ख्रीष्टला डाच्छापट्टि डाइ एदा चु ताम कुल्ला। ^२ धुइ मुसै आरेसै ए खाइमादमान बचन थेःना लबारी तयार तउ, म्हिगदेदा अर्ती पिन्गो, बड्गो, आँट पिन्गो, ओचछे दुख तसै सेम नाबारीदेन लोपबारी थाख्लागो। ^३ तिग्दा भिसम चुहड्बा धुइएनोन खबान मुला, जमा धुइरी म्हिगदेसे सत्य ताम ड्यानबा ख्लाला, थेनीगदे हाडला सेमसे तिग म्हन्बा थेनोन अन्छार जे भ्रला। थेहड् लसीन थेनीगदेसे हाडदा सेम निबा ताम लोपबा म्हिगदेदा जे ड्योइला। ^४ ओचछे थेनीगदेसे सत्य ताम ड्यानबारी ख्लासी म्हिसे म्हन्सी पाड्बा कथागदे चा ड्यानसी भ्रला। ^५ तर एसे हाडसे हाडदान जम्मान तामरी तहरी थान्गो, ओचछे जस्तोन दुख तसै नासी थार्बा पिन्बा समाचार थेःना लबा गे लउ। थेहड् लसीन एसे परमेश्वरदा तेन्बा गे पूरा लउ।

^६ डाइ चा डाला ल्हुइ परमेश्वरला डाच्छा बलि फुल्सी एनीगदेग्याम फेबारी छ्याइबा मुला। ^७ डाइ दुख नासी लतोःबा जम्मान गे लसी जिन्बा मुला। ओचछे डाइ विश्वासदा जोगब लसी थान्बा मुला। ^८ परमेश्वरदा सेम निबा म्हि हिन्ना भिसी उन्बा मुकुट याड्बारी जे बाँकी मुला। थे मुकुट ठीक निसाफ लबा प्रभुसेन थे धिनकुनु डादा कूसी पिन्ना। चु मुकुट डादा जे आहिन, तर थे दोःसी फेपखला भिसी थेदा माया लसी थेला ग्याम च्यासी चिबागदे जम्मादान पिन्ना।

^९ ए खम्तेधोना डादा हुप तबारी योनान खउ। ^{१०} तिग्दा भिसम डेमाससे जम्बुलिडरी मुबा सहेगदेदा माया लसी डादा ख्लासी थेसलोनिकेरी निजी। ओचछे क्रेसेन्स चा गलातियारी, तीतस चा दलमातियारी

* ३:८ प्रस्था ७:११ * ३:११ मुल १३:१४-५२; १४:१-७, ८-२०

निजी।* 11 लूका जे डादेन छ्याम मुला। ओच्छे मर्कूसदा म्हाइसी एदेन छ्यामनोन भसी खउ। तिग्दा भिसम थेसे डादा ज्यना लसी ह्यो लमुला।* 12 डाइ तुखिकसदा चा एफिससरी पुइबा मुला।* 13 ए खबा धुइरी त्रोआसरी डाइ कार्पस मुबा ग्लारी ख्लासी थान्बा घदेन किताबगदे, ओच्छे ढिरी भिबा परमेश्वरला बचन आम्ले:ना भसी खउ।*

14 स्हाइबोला ताड स्होबा अलेक्जेन्डरसे डादा ल्हानान दुख पिन्जी। थेसे लबा गे अन्छार प्रभुसेन थेदा खी किन्ना।* 15 थे म्हि म्राइसी एणोन होशियार तसी चिउ। तिग्दा भिसम य्हाइसे थार्बा पिन्बा समाचार थे:ना लमा थेसे डन्दा ल्हानान बिरोध लजी।

16 डाच्छा डादा मुद्दा तमा डाला लागिरी खालैसेन तिगै ताम पाइसी आपिन्नी, तर जम्मासेन डादा ख्लासी निजी। चु तामला दोष थेनीगदेदा थातगै। 17 तर प्रभु डादेन छ्याम तसी डादा भड पिन्जी। थेतबासेलमा डाइ अर्गु य्हुलला म्हिगदेदा थार्बा पिन्बा समाचार ज्यना लसी थे:ना लखम्जी। चुहड् लसी परमेश्वरसे डादा सिबाग्याम जोगब लजी।† 18 हिन्ना, अझ प्रभुसेन डादा जम्मान आज्यबा तामग्याम जोगब लला, ओच्छे प्रभुसेन डादा जोगब लसी थेला य्हुल्सारी भोर्ला। थेला सदन मानदेन जयजयकार तगै। आमेन।

चिठीला थुमरी भिबा ताम

19 प्रिस्किलादेन थेला हेम्बो अकिलासदा ओच्छे ओनेसिफरसला म्हेमेदा फ्याफुल्बा मुला भिसी पाइसी पिन्गो।* 20 इरास्तस कोरिन्थरीन चिबा मुला, तर त्रोफिमस चा आखम्बासे लमा डाइ थेदा मिलेटसरीन ख्लाजी।* 21 ए खम्तेधोना सेर्ख खबा भन्दा डाच्छान खबारी भड लउ, एदा युबुलससे फ्याफुल्ला भिसी पाइबा मुला, ओच्छे पुडेस, लिनस, क्लौडियादेन जम्मान आलेगदेसेनोन फ्याफुल्ला भिसी पाइबा मुला।

22 प्रभु एला आत्मादेन छ्याम तगै। ओच्छे एदेन छ्याम प्रभुला दयामाया तगै।

* 4:10 कल ४:१४; फिले २४; २ कोर ८:२३; गला २:३; तीत १:४ * 4:11 कल ४:१४; फिले २४; मुल १२:१२, २५; १३:१३; १५:३७-३९; कल ४:१० * 4:12 मुल २०:४; एफि ६:२१-२२; कल ४:७-८ * 4:13 मुल २०:६ * 4:14 १ तिमो १:२०; भजन ६२:१२; रोमी २:६ † 4:17 "सिबाग्याम जोगब लजी" भिबादा ग्रीक बाइबलरी च्यान्ना सुडग्याम जोगब तजी भिसी भिबा मुला। * 4:19 मुल १८:२; २ तिमो १:१६-१७ * 4:20 मुल १९:२२; रोमी १६:२३; मुल २०:४; २१:२९

पावलसे तीतसदा भिबा चिठी चु चिठीला बारेरी पाड्तोःमा

भिबा म्हि: मुल चेला पावलसे भिबा मुबा (तीतस १:१)।

भिबा ग्ला: कोरिन्थ शहररी भिबा मुबा।

भिबा साल: ओस्पन ईश्वी संवत् ६३-६५ (विक्रम संवत् १२०-१२२) सालला गुडरी भिबा मुबा।

खाल्दा भिबा: तीतस भिबा म्हिदा भिबा मुबा।

तीतस चा अर्गु य्हुलला म्हि मुबा। थेसे थार्बा पिन्बा समाचार थेःना लबा गेरी पावलदा हो लमुबा। पावलसे क्रेट भिबा शहरला मण्डलीदा च्याबाला लागिरी तीतसदा थे शहररीन थान्जी। चु चिठीरी गोर सोम मुल तामगदे भिबा मुला।

जम्मान भन्दा डाच्छाला ताम चा क्रेटला ल्हानान म्हिगदेसे नइबा गे लबासे लमा पावलसे तीतसदा मण्डलीदा च्याबा म्हिगदेला बानीबेहोर खाहड्बा ततोःला भिसी घोना लबा मुला। अर्गु ताम चा मण्डलीरी मुबा खेपूबा खुड दोबागदेदेन भ्योनगदे ओच्छे नोकरगदेदा खाहड् लसी लोपूबा भिसी घोना लबा मुला। अर्गु ताम चा पावलसे तीतसदा तिगै तामरी ईख आथान्ना, छेबा बड्बा आलना, मण्डली न्हडरी फेना लबा तामग्याम जोगब तउ ओच्छे सोजो तसी जम्मानदेन छ्याम ढिक्सी ख्रीष्टियान बानीबेहोर अन्छार भ्रतोःला भिसी सल्लाह पिन्बा मुला।

मुल तामगदे

फ्याफुल्बा १:१-४

मण्डलीदा च्याबा म्हिला बारेरी लोपूबा तामगदे १:५-१५

मण्डलीरी मुबा जम्मान समूहगदेसे लतोःबा गे २:१-१५

सल्लाह पिन्बादेन होशियार तना लबा ३:१-११

चिठीला थुमरी पाड्बा तामगदे ३:१२-१५

पावलसे तीतसदा भिबा चिठी

1 लाससो डा परमेश्वरला गे लबादेन येशू ख्रीष्टला मुल चेला पावलग्याम फ्याफुल्ला! डादा परमेश्वरसे धम्बागदेला विश्वास ल्हेना लबादेन परमेश्वरदा खाहड् लसी तेन्बा भिबा सत्य ताम लोपूबारी धम्बा हिन्ना। 2 चु सत्य तामग्याम चा यहाडदा जुकजुकधोनाला जुनी याड्ला भिबा आश खमुला। ओच्छे खाइमै लुसीला ताम आपाड्बा परमेश्वरसे यहाडदा चु जुनी पिन्ना भिसी जम्बुलिड स्होबा भन्दा डाच्छान कबुल लसी जिन्बा मुबा। 3 ओच्छे प्रभु येशूसे ठीक धुडरी डादा चु ज्यबा समाचार उन्जी। चुनोन ज्यबा समाचार थेःना लबारी यहाडदा थार्बा पिन्बा परमेश्वरसे कुल्बा अन्छार डादा जिम्मा पिन्जी।

4 विश्वास गिकनोन तबासे लमा डाला हाडलान झा दोबा तीतसदा परमेश्वर आबादेन यहाडदा थार्बा पिन्बा येशू ख्रीष्टग्याम दयामायादेन शान्ति तगै।

क्रेट भिबा य्हुल्सारी तीतससे लबा गे

5 डाइ कुल्बा अन्छार थेरी बाँकी मुबा गेगदे जिन्ना लबारीदेन जम्मान ग्लारी मण्डलीदा च्याबा म्हिगदे धम्बाला लागिरी डाइ एदा क्रेट भिबा ग्लारी थान्बा हिन्ना। 6 मण्डलीदा च्याबा म्हिगदे तिगै दोष आरेबादेन मिड गिक जे मुबा ततोःला। ओच्छे थेला कोलागदेएनोन विश्वास लबा ततोःला। आज्यबा बानीबेहोर थोबादेन कुल्बा ताम आड्यान्बा तबारी आत। 7 तिग्दा भिसम परमेश्वरला गे लबारी जिम्मा पिन्बा म्हि तबासे लमा मण्डलीदा च्याबा म्हि चा तिगै दोष आरेबा ततोःला। थे हाडला सुरसे भ्रबा, योनान बोमो खबा, झि आइरक थुड्सी ड्य्होड्सी भ्रबा, छेबा बड्बा लबा, धन सम्पत्तिरी लोभ लबा म्हि आहिन, 8 तर डोन्बोगदेदा मान लबा, ज्यबा तामरी जे सेम लबा, हाडसे

ह्वाडदान तहरी थान्बा ततोःला। ओच्छे परमेश्वरदा सेम निबा बानीबेहोर थोबादेन चोखो ओच्छे जस्तोन दुख तसैनोन नाखम्बा म्हि ततोःला। 9 थेदा लोप्बा विश्वास लखम्बा बचनरी थे कोड्सी चितोःला। तिग्दा भिसम थेसे घोबा सत्य ताम अन्छार थेसे स्य्हान्दोदा लोप्बारी खमगै। थेसे लोप्बा तामगदेदा बिरोध लबा म्हिगदेला गल्ती उन्खम्तोःला।*

10 तिग्दा भिसम ल्हानान म्हिगदे स्य्हान्दोला ताम आड्यानबादेन आतोःबा ताम पाड्बा ओच्छे लुसीला ताम पाड्बा तमुला, ज्ञन खतना लबागदेां थेहड्बा तमुला। 11 थेतबासेलमा थेनीगदेला सुड बन्द तना लतोःला। तिग्दा भिसम थेनीगदेसे ह्वाडला फाइदाला लागिरी आतोःबा ताम लोप्सी जम्मान म्हेमेगदेला विश्वास न्होड्ना लबा मुला। चुहड्बा ताम चा थेनीगदेसे लोप्बारी आतमुबा। 12 थेनीगदे न्हडला अगमवक्ता गिकसे “क्रेटला म्हिगदे सदन लुसीला ताम पाड्बादेन पशुला हड्बा बानीबेहोर लबा ओच्छे ल्हाना चबा ब्लेगुगदे तला” भिसी पाड्मुबा। 13 चु ताम सत्य हिनना। थेतबासेलमा थेनीगदे विश्वासरी पाको म्हि दोगै भिसी थेनीगदेदा ल्हानान बड्गो। 14 ओच्छे थेनीगदेसे सत्य तामदा खलाबा म्हिगदेसे कुल्बा तामदेन सेमरी म्हनसी पाड्बा यहूदीगदेसे स्होसी पाड्बा कथारी सेम थालगै।

15 चोखो सेम मुबा म्हिगदेला लागिरी जम्मान सहे चोखो तला। तर चोखो सेम आरेबादेन ख्रीष्टदा विश्वास आलबा म्हिगदेला लागिरी चा तिगै सहेनोन चोखो आत। तिग्दा भिसम थेनीगदेला सेमदेन थेनीगदेसे म्हनबा तामनोन चोखो आरे। 16 थेनीगदेसे परमेश्वरदा डोसेबा मुला भिसी मी पाड्मुला, तर थेनीगदेला गेग्याम चा आउन्मुला। ओच्छे थेनीगदे परमेश्वरला डाच्छा नड्बादेन कुल्बा ताम आड्यानबा म्हिगदे तमुला। थेतबासेलमा थेनीगदे खजिबै ज्यबा गे लबाधोनाला आरे।

2

जजा म्हिहेन्से घेन म्हिधोनादा लोप्बा ताम

1 तीतस, एसे चा म्हिगदेदा सत्य ताम अन्छार खाहड् लसी भ्रतोःला थे ताम जे लोपुगो। 2 खेपुबा म्हिगदेदा सेम नाबारी, जम्मानदेन छ्याम ढिक्बारी, ज्ञान बुद्धि थोसी चिबारी, ओच्छे विश्वासरी पाको दोबारी, माया लबारीदेन दुख तबा धुइरी नासी चिखम्तोःला भिसी लोपुगो।

3 चुहड् लसीन खुइ दोबा म्रिडम्हेमेगदेसे परमेश्वरदा तेन्बा बानीबेहोर थोतोःला, स्य्हान्दोदा आतोःबा तामरी दोष थालउ, ओच्छे झि आइरक थुड्सी ड्य्होड्बारी आत भिसी लोपुगो। थेनीगदेसे जुन ताम ज्यबा मुला थे ताम लोपुतोःला। 4 खुइ दोबा म्रिडम्हेमेगदेसे छामे म्रिडम्हेमेगदेदा ह्वाड ह्वाडला हेम्बोदेन कोलागदेदा माया लबारी, 5 जम्मानदेन छ्याम ढिक्सी हेम्बोसे कुल्बा ताम ड्यानबा, दिमनाम लखम्बादेन दया लबारी ओच्छे ह्वाड ह्वाडला हेम्बोला तहरी चिबारी थेनीगदेदा लोपुतोःला। चुहड् लजी भिसम परमेश्वरला बचनना हेला आत।

6 थेहड् लसीन भ्योन म्हिगदेदाएनोन ह्वाडसे ह्वाडदान तहरी थान्सी भ्रउ भिसी पाड्गो। 7 एसे लबा जम्मान गेग्यामसेन एला ज्यबा बानीबेहोर उन्गो, ओच्छे ए होशियार तसी सत्य ताम लोपुगो। 8 लोप्बा धुइरी खालैसे थाबारी आखम्बा सत्यदेन ठीक ताम लोपुगो। थेहड् लजी भिसम य्हाड्दा बिरोध लबागदेसे तिगै पाड्आखम्ना थेनीगदे ह्वाडनोन पेःला।

9 नोकरगदेदाएनोन ह्वाड ह्वाडला मालिकला तहरी चिसी जम्मान तामग्याम ह्वाडला मालिकदा ताड्ना लउ। ओच्छे ह्वाडला मालिकदा सुड थादोःगो भिसी लोपुगो। 10 थेनीगदेसे तिगै यहो थालगै। तर थेनीगदेसे लबा जम्मान गे ज्यबादेन पूरा विश्वासला तगै। थेहड् लसीन जम्मान तामरी थेनीगदेसे य्हाड्दा थार्बा पिन्बा परमेश्वरला बारैरी लोप्बा तामदा अझ जेना लगै।

11 तिग्दा भिसम परमेश्वरसे जम्मान म्हिदा थार्ना लबारी ह्वाडला दयामाया उन्बा मुला। 12 थे दयामायासे य्हाड्दा परमेश्वरदा तेन्आपुड्बादेन जम्बुलिडला स्हेगदेशोरी लोभ लबा सेम ख्लापुड्ला। ओच्छे चु जम्बुलिडरी ह्वाडसे ह्वाडदान तहरी थान्सी परमेश्वरदा सेम निबा बानीबेहोर थोबादेन परमेश्वरदा तेन्सी भ्रबारी लोप्बा मुला। 13 ओच्छे य्हाड्दा थार्बा पिन्बा जम्मान भन्दा घेन

* 1:9 † तिगो 3:2-9 † 1:10 “खतना लबागदे” भिबा चा यहूदी ख्रीष्टियानगदे हिनना।

परमेश्वर येशू ख्रीष्ट घेन य्हालदेन शक्तिरी दोःसी फेपूखबा धिनना य्हाडसे आश लसी चिबा मुला।
14 ख्रीष्टसे य्हाडला जम्मान पापला छे फासी थार्ना लबा मुला। ओच्छे ह्हाडलान लागिरी ज्यबा गे लबारी झन्बा य्हुल गिकदा चोखो तना लबारी ह्हाडलान ज्यान पिन्जी।*

15 एसे चु तामगदे पूरा अधिकार लसी लोपूगो, ओच्छे पाड्बा ताम आड्यान्नी भिसम थेनीगदेदा बड्गो। एदा खालैसेन हेला थालगै।

3

ज्यबा गे जे लउ

1 शासन लबा म्हिगदेदेन सरकारी गे लबा म्हिगदेसे पाड्बा ताम ड्यान्गो ओच्छे थेनीगदेसे कुल्बा ताम ड्यान्बारीदेन ज्यना लसी गे लबारी विश्वासीगदेदा ढनना लसी पिन्गो। 2 ओच्छे थेनीगदेसे खालैला बिरोध लबादेन छेबा बड्बा लसी थाभ्रगै। ओच्छे सोजो तसी जम्मान म्हिदेन छ्याम ज्यबा बानीबेहोर उन्गै।

3 तिग्दा भिसम डाच्छा य्हाडएनोन मूर्ख, पाड्बा ताम आड्यान्बा, तिगै आघोबादेन आज्यबा म्हन्बा, मोजमजा लबा ओच्छे डाह लबा, पापी सेम थोबा, स्य्हान्दोसे हेला लबादेन गिकसे गिकदा हेला लबा मुबा। 4 तर य्हाडदा थार्बा पिन्बा परमेश्वरसे ह्हाडला दयामाया उन्मा, 5 थेसे य्हाडदा थार्ना लबा य्हाडसे ज्यबा गे लसी आहिन, तर थेला दयासे हिन्ना। थेसे य्हाडदा परमेश्वरला आत्मासे खुसी दोःसी न्हना लसी छार जुनी पिन्बा मुला। 6 थार्बा पिन्बा येशू ख्रीष्टग्याम परमेश्वरसे य्हाडदा ताड्सी ताड्सी थेनोन आत्मासे प्लिड्ना लजी। 7 तिग्दा भिसम परमेश्वरला दयासे लमा य्हाड परमेश्वरदा सेम निबा म्हि दोजी। ओच्छे य्हाडसे आश लबा अन्छार जुकजुकधोनाला जुनी याड्बा हक याड्बा मुला। 8 चु ताम सत्य हिन्ना। थेतबासेलमा परमेश्वरदा विश्वास लबागदेसे ज्यबा गे लउ भिसी एसे थेनीगदेदा भड पिन्गो भिबा डाला सेम मुला। तिग्दा भिसम म्हिगदेला लागिरी चु ताम ज्यबादेन गे खेल्बा मुला।

9 तर मूर्ख तामदेन ओन्माला ताम ओच्छे परमेश्वरसे मोशादा पिन्बा ठिमला बारेरी कल लबागदेदेन छेबा बड्बा लबागदेग्याम थारेड चिउ। तिग्दा भिसम थे य्हाडदा आतोःबादेन गे आखेल्बा ताम हिन्ना। 10 ओच्छे छेबा बड्बा लसी फेबा म्हिदा तिरेम न्हीरेम सम्झब लउ, सम्झब लसै आड्यान्नी भिसम थेदेन छ्याम संगतनोन थालउ। 11 एदा चु ताम थानोन मुला, चुहड्बा महिला इज्जत आरे। ओच्छे थेसे लबा पापग्यामसेन थेसे ह्हाडला दोष ह्हाडसेन उन्ना।

ढन्तोःबा ताम

12 डाइ अर्तिमासदा तसै तुखिकसदा तसै ए मुबा ग्लारी पुड्खला। थे खमैछ्याम ए खमतेधोना डादा हुप तबारी निकोपोलिस भिबा ग्लारी खउ। तिग्दा भिसम डाइ सेख् भर थेरीन चिबा सेम लबा मुला।* 13 जेनास भिबा वकीलदेन अपोल्लोसदा ग्यामरी ह्यो लसी पिन्गो। तिग्दा भिसम खमतेधोना थेनीगदेदा तोःबा स्हे याड्गै।* 14 य्हाडला म्हिगदेसे आरेनान आतबा स्हेगदे स्य्हान्दोदा पिन्बाला लागिरी सदन ज्यबा गे लबारी लोपूतोःला। थेहड् लजी भिसम थेनीगदेला जुनी खेरोरी आनि।

15 चुरी डादेन छ्याम मुबागदे जम्मासेन एदा फ्याफुल्ला भिसी पाड्बा मुला। डन्दा माया लबा थेरी मुबा जम्मान विश्वासीगदेदा डन्सेनोन फ्याफुल्बा मुला भिसी पाड्गो।

एनीगदे जम्मानदेन छ्याम परमेश्वरला दयामाया तगै।

* 2:14 भजन १३०:८; प्रसूथा १९:५; वयव ४:२०; ७:६; १४:२; १ पत्रु २:९ * 3:12 मुल २०:४; एफि ६:२१-२२; कल ४:७-८; २ तिमो ४:१२ * 3:13 मुल १८:२४; १ कोर १६:१२

पावलसे फिलेमोनदा भिबा चिठी चु चिठीला बारेरी पाड्तोःमा

भिबा म्हि: मुल चेला पावलसे भिबा मुबा। चु चिठी भिबाला लागिरी तिमोथीसे हो लबा मुबा (फिलेमोन १:१)।

भिबा ग्ला: रोमला झ्याल्खानग्याम भिबा मुबा।

भिबा साल: ओस्पन ईश्वी संवत् ६०-६२ (विक्रम संवत् ११७-११९) सालला गुडरी भिबा मुबा।

खाल्दा भिबा: फिलेमोन भिबा म्हिदा भिबा मुबा।

फिलेमोन जम्मासेन डोसेबा ख्रीष्टियान मुबा। थे कलस्सी शहररी मुबा मण्डलीला विश्वासी तखम्ला। थे ओनेसिमस भिबा नोकरला मालिक मुबा। ओनेसिमस हाडला मालिकला दिमग्याम यासी रोम शहररी निबा मुबा। थार्बा पिन्बा समाचार थेःना लबासे लमा थे धुडरी पावल चा झ्याल्खानरी परब तबा मुबा। थेसे पावलग्यामसेन थार्बा पिन्बा समाचार थेःसी प्रभु येशूदा विश्वास लबा मुबा। पावलसे ओनेसिमसदा फिलेमोन मुबा ग्लारी पुडबान मुबा। थेतबासेलमा ओनेसिमससे तिगै गे न्होडना लबा मुसै थेदा माफ लसी पिन्गो ओच्छे थेदा नोकरदा लबा हड्बा व्यवहार आहिन, तर येशूदा विश्वास लबा आलेदा लबा हड्बान व्यवहार लसी मान लउ भिसी फिलेमोनदा चु चिठी भिबा मुबा।

मुल तामगदे

फ्याफुल्बा १-३

पावलसे फिलेमोनदा ज्यबा म्हि भिसी पाड्बा ४-७

ओनेसिमसला लागिरी बिन्ती लबा ८-२२

चिठीला थुमरी पाड्बा ताम २३-२५

पावलसे फिलेमोनदा भिबा चिठी

फिलेमोन भिबा म्हिदा पावलला चिठी

1 लासो, डा ख्रीष्ट येशूला लागिरी झ्याल्खानरी मुबा पावलदेन यहाडला आले तिमोथीग्याम, डन्ना सेम निबा हो डन्दा हो लबा फिलेमोनदेन 2 यहाडला आडा अप्फिया ओच्छे डन्देन छ्याम ढिक्सी गे लबा अखिप्पसदेन एला दिमला मण्डलीदा फ्याफुल्ला। 3 यहाडला परमेश्वर आबादेन प्रभु येशू ख्रीष्टग्याम दयामायादेन शान्ति याड्गै।

पावलसे फिलेमोनना लागिरी प्रार्थना लबा

4 फिलेमोन आले, डाइ प्रार्थना लबा धुडरी एदा ढन्मा डाइ सदन डाला परमेश्वरदा धन्यवाद पिन्मुला। 5 तिग्दा भिसम प्रभु येशूदा एसे लबा विश्वासदेन परमेश्वरला म्हिगदेदा एसे माया लबा मुला भिबा ताम थेःमुला। 6 एला विश्वाससे ख्रीष्टदेन छ्याम गिक तबा यहाडला जम्मान ज्यबा तामगदे अझ घोबारी ज्ञान बुद्धि पिन्गै भिसी डाइ परमेश्वरदेन छ्याम प्रार्थना लमुला। 7 डाला आले, एला मायासे डा ल्हानान ताड्सी आँट याड्बा मुला। तिग्दा भिसम एसे लमा परमेश्वरला म्हिगदेला सेम दोःसी ताड्बा मुला।

पावलसे ओनेसिमसला लागिरी पाड्बा ताम

8 थेतबासेलमा एसे तिग लतोःला भिसी ख्रीष्टसे पिन्बा अधिकारग्याम एदा कुल्खम्बा आँट मुला, 9 तर एला माया मुबासे लमा डाइ एदा चु बिन्ती लबा मुला, दान्दे डा खेपबा दोसी जिन्बा पावल ख्रीष्ट येशूला लागिरी झ्याल्खानरी मुला। 10 थेतबासेलमा प्रभुरी डाला झा ओनेसिमसला लागिरी डाइ एदा चु बिन्ती लबा मुला। झ्याल्खानरी मुबा धुडरीन डा थेला आबा दोबा मुला। 11 डाच्छा ओनेसिमसाँ एला लागिरी गे आखेल्बा म्हि मुबा। तर दान्दे एदेन डाला लागिरी थे गे खेल्बा म्हि तबा मुला। 12 थे

† 1:11 “ओनेसिमस” भिबाला अर्थ चा गे खेल्बा हिन्ना।

डाला तिडला डोरा हिन्ना। तसैनोन डाइ थेदा ए मुबा ग्लारी दोःसी पुइखबा मुला। ¹³ थार्बा पिन्बा समाचारला लागिरी डा झ्याल्खानरी मुबा धुइरी एला साटोरी थेसे डादा हो लबाला लागिरी थे चुरीन मुगै भिबा डाला सेम मुबा। ¹⁴ तर एदा आड्योइना डादा तिगै लइ आम्हन्नी। तिग्दा भिसम डादा हो लबा करसे आहिन, तर एलान सुरसे लगै भिबा डाला सेम मुला।

¹⁵ ओनेसिमस तिगै धिनना लागिरी एग्याम फेसी चिमुबा। थेहड् तबा चा थे सदन एदेन छ्यामनोन चिगै भिसीनोन मुला तला। ¹⁶ थेतबासेलमा दाहेन्से थे नोकर हड्बा आहिन, तर नोकर भन्दा घेन हिन्ना। ओच्छे प्रभुरी सेम निबा डाला हाडलान आले हिन्ना, दान्दे मी झन एला लागिरी थे हाडलान आले हिन्ना।

¹⁷ थेतबासेलमा चुदे एसे डादा हाडलान ढिक्बा हो महन्मुला भिसम थेदाएनोन डादा हड्बोन मान लउ। ¹⁸ चुदे थेसे एदा तिगै आज्यबा लसैनोन, अथवा थेसे तिगै फातोःबा मुसै थे डाला मिनरी थान्गो। ¹⁹ थे छे डाइनोन फासी पिन्ना भिबा ताम चा डा पावलसेन भिबा हिन्ना। ओच्छे एसेनोन प्रभुदा डोसेबा डाग्यामसेन हिन्ना भिबा ताम डाइ एदा पाड्आतोः तला।

²⁰ थेतबासेलमा डाला आले, डादा प्रभुला लागिरी चु गे लसी पिन्गो। ख्रीष्टदेन छ्याम गिक तबासे लमा एसे डाला सेम दोःसी ताड्ना लउ। ²¹ डाइ पाड्बा भन्दा अझ एसे डाला लागिरी ल्हानान लला भिबा ताम डादा पूरा था तसी डाइ एदा चु भिबा मुला।

²² ओच्छे अर्गु ताम चा डाला लागिरीनोन कोठा गिक ठीक लसी थान्गो। तिग्दा भिसम एला प्रार्थनासे लमा डाएनोन ए मुबा ग्लारी खम्याड्ला वा भिसी आश लबा मुला।

चिठीला थुमरी पाड्बा ताम

²³ ख्रीष्ट येसूला लागिरी डादेन छ्यामनोन झ्याल्खानरी चिबा इपाफ्राससे एदा फ्याफुल्ला भिसी भिबा मुला। ²⁴ थेहड् लसीन डादेन छ्याम ढिक्सी गे लबा डाला होगदे मर्कूस, अरिस्तार्खसदेन डेमास ओच्छे लूकासेनोन फ्याफुल्ला भिबा मुला।

²⁵ प्रभु येसू ख्रीष्टला दयामाया एनीगदेदेन छ्याम तगै।

हिब्रूगदेदा भिबा चिठी चु चिठीला बारेरी पाड्तोःमा

भिबा म्हि: खालैदा था आरे। डाच्छा डाच्छा चु चिठी पावलसे भिबा हिन्ना भिसी बाइबल विद्वानगदेसे पाड्मुबा। तर दान्दे पावलसे भिबा आहिन भिसी बाइबल विद्वानगदेसे म्हन्मुला। थेनीगदे न्हडला कोइसे अपोल्लोससे, कोइसे बारनाबाससे, कोइसे लूकासे, कोइसे सिलाससे, कोइसे चा स्य्हान्दो म्हिसे भिबा हिन्ना भिसी म्हन्बा मुला। तर खाल्से भिजी भिबा ताम परमेश्वरदा बाहेक स्य्हान्दो खालैदान था आरे।

भिबा ग्ला: पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाड्बा मुला।

भिबा साल: ओस्पन ईश्वी संवत् ७० (विक्रम संवत् १२७) साल भन्दा डाच्छा भिबा मुबा।

खाल्दा भिबा: येशूदा विश्वास लबा यहूदी म्हिगदेला समूहगदेदा भिबा मुबा।

येशूदा विश्वास लबा यहूदी म्हिगदेसे ल्हानान दुखदेन बिरोधला ताम नातोःबासे लमा येशूदा विश्वास लबा खलाला वा भिसी लोड्बा मुबा। थेतबासेलमा चु चिठी भिबा म्हिसे थेनीगदेदा ऑट पिन्बाला लागिरी येशू ख्रीष्टनोन परमेश्वरला म्राड्बा रूप हिन्ना भिसी पाड्बा मुला। चु ताम घोना लबाला लागिरी चु चिठी भिबा म्हिसे गोर सोम सत्य तामग्याम चुहड् भिसी पाड्बा मुला।

(क) येशू परमेश्वरला जुकजुकधोनाला झा हिन्ना, थेसे जम्मान दुख नासी परमेश्वर आबासे कुल्बा जम्मान तामगदे सेमहेन्सेन खाहड् लसी ड्यानतोःला भिसी था याड्जी। येशू परमेश्वरला झा तबासे लमान डाच्छाला कबुलरी पाड्बा जम्मान अगमवक्तागदे, स्वर्गदूतदेन मोशा भन्दा घेन हिन्ना।

(ख) परमेश्वरला झा येशू ख्रीष्ट चा जुकजुकधोना परमेश्वरला मन्दिररी पूजा लबा मुल म्हि हिन्ना। थे चा डाच्छाला कबुलरी पाड्बा परमेश्वरला मन्दिररी पूजा लबा म्हि भन्दा घेन हिन्ना भिसी पाड्बा मुला।

(ग) येशू ख्रीष्टदा विश्वास लबा म्हिदा पापदेन लोड्बा खबा ताम ओच्छे कालग्याम जोगब लला। चु तामला चिनु यहूदी धर्मला रिमठिमदेन जन्तुगदेदा बलि पिन्बा तामगदेग्याम डाच्छान उन्सी जिन्बा मुबा।

चु चिठी भिबा म्हिसे ११ अध्यायरी चु चिठी पढब लबा म्हिगदेदा इस्राएली काइरनरी मिन भिसी थान्बा कोइ कोइ मिन चलब तबा म्हिगदेसे लबा विश्वासला बारेरी पाड्सी विश्वासरी सदन कोड्सी चिउ भिसी बिन्ती लबा मुला। १२ अध्यायरी जस्तोन दुख तसैनोन आसितेधोना येशूदा जे च्यासी जम्मान ताम नागो, ओच्छे विश्वासरी कोड्सी चिउ भिसी थेसे थेनीगदेदा पाड्बा मुला। चु चिठी चा सल्लाह पिन्बादेन होशियार तना लबा तामगदे भिबान थुम्ना लबा मुला।

मुल तामगदे

येशू ख्रीष्ट परमेश्वरला पक्का रूप हिन्ना १:१-३

स्वर्गदूतगदे भन्दा येशू ख्रीष्ट घेन हिन्ना १:४-२:१८

मोशादेन यहोशू भन्दा येशू ख्रीष्ट घेन हिन्ना ३:१-४-१३

येशू ख्रीष्ट परमेश्वरला मन्दिररी पूजा लबा जम्मान भन्दा घेन म्हि ४:१४-७:२८

येशू ख्रीष्टसे लबा घेन कबुल ८:१-९:२८

येशू ख्रीष्ट पापला सय फाबारी क्रुसरी सिबा १०:१-३०

विश्वास चा जम्मान भन्दा मुल ताम हिन्ना ११:१-१२:२९

परमेश्वरदा ताड्ना लतोःबा १३:१-१९

चिठीला थुमरी लबा प्रार्थना १३:२०-२१

चिठीला थुमरी पाड्बा ताम १३:२२-२५

हिब्रूगदेदा भिबा चिठी

येशू ख्रीष्ट परमेश्वरला झा

1 ओन्मा परमेश्वर अगमवक्तागदेग्याम य्हाडला आखे म्हेमेगदेदेन छ्याम ल्हानान थरीसे ल्हानान रेमधोना ताम लमुबा। 2 तर चु लिच्छाला धिनगदेरी परमेश्वर हाडला झाग्याम य्हाडदेन छ्याम ताम लमुला। परमेश्वरसे हाडला झा ख्रीष्टग्यामसेन जम्बुलिड स्होजी। ओच्छे जम्मान सहेगदे हाडलान स्होबारी थेदान धम्जी। 3 परमेश्वरला घेन य्हालदेन शक्ति ख्रीष्टग्याम म्राड्बा मुला। परमेश्वरला रुप थेनोन हिन्ना। थेला शक्तिशाली बचनग्यामसेन मुदेन जम्बुलिडला जम्मान सहेगदे छ्याबा मुला। ओच्छे म्हिदा पापग्याम थाना लबा गे लसी जिन्माहेन्से थे स्वर्गरी शक्तिशाली परमेश्वरला दाहिने छ्यापट्टि मुल ठिरी धन्छ्याबा मुला।

ख्रीष्ट स्वर्गदूतगदे भन्दा घेन हिन्ना

4 ख्रीष्ट स्वर्गदूतगदे भन्दा ल्हानान घेन हिन्ना, थेहड् लसीन परमेश्वरसे स्वर्गदूतगदेला भन्दा थेला मिन ज्यबा थान्जी।

5 तिग्दा भिसम परमेश्वरसे येशूदा बाहेक खाडमै खजिबै स्वर्गदूतगदेदा चुहड् भिसी सुड्बा आरे, “ए डाला झा हिन्ना,

तिनी डा एला आबा दोबा मुला”

ओच्छे

“डा थेला आबा दोला,

थे डाला झा दोला।”*

6 परमेश्वरसे हाडला झादा जम्बुलिडरी पुड्खबा धुडरी

“जम्मान स्वर्गदूतगदेसे थेदा तेन्गै” भिसी दोःसीनोन सुड्बा मुला।

7 परमेश्वरसे स्वर्गदूतगदेला बारेरी चुहड् भिसी सुड्बा मुला,

“परमेश्वरसे हाडला स्वर्गदूतगदेदा लाबा स्होजी,

ओच्छे हाडला गे लबा म्हिगदेदा चा मेला ल्हाम स्होजी।”*

8 तर परमेश्वरसे हाडला झाला बारेरी चुहड् भिसी सुड्बा मुला,

“परमेश्वर हाडला य्हल्सा सदन चिला।

ओच्छे हाडसे ठीक लसी शासन लला।*

9 हाडदा ठीक ताम सेम निमुला, ओच्छे आज्यबा ताम चा च्यागेन आम्हन्मुला।

थेतबासेलमा परमेश्वर, हाडला परमेश्वरसे हाडदा धम्बा मुला।

ओच्छे हाडला ह्योगदेदा भन्दा ल्हाना मान लसी ताड्ना लबा मुला।”*

10 परमेश्वरसे हाडला झादा दोःसी चुहड् भिसी सुड्जी,

“प्रभु, हाडसेन शुरुरी जम्बुलिडला जग थान्जी।

ओच्छे हाडसे हाडलान छ्यासे मुदेन मुरी मुबा जम्मान सहेगदे स्होजी।”*

11 थे जम्मान सहेगदे नाश तला, तर हाड चा सदन चिला।

थे सहेगदे क्वान हड् भोक्टो तसी निला।*

12 थे सहेगदेदा हाडसे क्वान हड् लसी रिल्ला,

ओच्छे थे सहेगदे क्वान हड्बा भोक्टो तसी निला ओच्छे पोला,

तर हाड चा खाडमै आपो।

ओच्छे हाड खाडमै म्हासी आनि।”

* 1:5 भजन २:७; २ शमू ७:१४; १ इति १७:१३ * 1:7 भजन १०४:४ * 1:8 भजन ४५:६ * 1:9 भजन ४५:७ * 1:10 भजन १०२:२५ * 1:11 भजन १०२:२६; यशै ५१:६

13 तर परमेश्वरसे येशूदा बाहेक खाइमै खजिबै स्वर्गदूतगदेदा चुहड् भिसी सुड्बा आरे,
“डाइ एला शत्रुगदेदा एला काड धिरी आथानतेधोना
ए डाला दाहिने यापट्टि मुल ठिरी चिउ।”*

14 थेतबासेलमा स्वर्गदूतगदे चा परमेश्वरदा तेन्बा आत्मा जे हिन्ना। ओच्छे थाबा याड्बा म्हिगदेदा
हो लबाला लागिरी परमेश्वरसे थेनीगदेदा पुड्खबा हिन्ना।

2

परमेश्वरसे येशू ख्रीष्टग्याम पिन्बा थाबादा थाम्ले:गो

1 थेतबासेलमा य्हाडसे जुन ताम थे:बा मुला थे तामरी इन ल्हाना सेम लसी ड्यानतो:ला, आहिन्सम
य्हाड थे तामग्याम थारेड तला। 2 स्वर्गदूतगदेसे य्हाडला आखे म्हेमेदा थे:ना लबा परमेश्वरला
बचनरी पक्का अधिकार मुबा। थे ताम अन्छार आभ्रबा पाप लबा म्हिगदेदा परमेश्वरसे ठीक सजाय
पिन्जी। 3 थेतबासेलमा येशू ख्रीष्टसे पिन्बा चु घेन थाबादा य्हाडसे वास्ता आलनी भिसम इन य्हाड
चा खाहड् लसी सजायग्याम स्योर्मयाड्ला? चु थाबाला बारेरी डाच्छा प्रभुसेन थे:ना लजी। ओच्छे
प्रभुसे थे:ना लबा ताम थे:बा म्हिगदेसे चु ताम सत्य हिन्ना भिसी य्हाडदा घोना लजी। 4 परमेश्वरसेनोन
चिनुगदे उन्सी, ल्हानान थरीला उदेकला गेदेन शक्तिशाली गेगदे लसी, ओच्छे हाडसे म्हन्बा अन्छार
ह्हाडला आत्माला मोलमगदे भो लसी पिन्सी चु थाबा चा सत्य हिन्ना भिसी पक्का लजी।

य्हाडदा परमेश्वर मुबा ग्लारी भोबारी येशू म्हि दो:सी फेपुखबा

5 परमेश्वरसे स्वर्गदूतगदेदा य्हाडसे ताम लबा लिच्छाला धुइरी शासन लबा अधिकार पिन्बा
आरे।† 6 परमेश्वरला बचनरी ग्ला गिकरी चुहड् भिसी म्हि गिकसे भिबा मुला,
“म्हि जजा हिन्ना, तसैनोन हाडसे तिग्दा थेदा वास्ता लमुला?

ओच्छे म्हिला झा खाल हिन्ना, हाडसे तिग्दा थेला सुर्दा लमुला?

7 हाडसे थेदा तिगै धिनना लागिरी स्वर्गदूतगदे भन्दा जजा सहोजी।

तसैनोन हाडसे थेदा स्य्हान्दोगदेसे ल्हानान मानदेन जयजयकार लबा मुकुट कूसी पिन्जी।

8 ओच्छे हाडसे जम्मान सहेगदेथोरी शासन लबा अधिकार थेदा पिन्बा मुला।”*

परमेश्वरसे जम्मान सहे म्हिगदेला तहरी थान्मा थेला अधिकारी आरेबा सहेगदे तिगैनोन आरेबा।
तर दान्देला चु धुइरी य्हाड जम्मान सहेगदे म्हिला तहरी मुबा आम्राड्मुला। 9 तर तिगै धिनना लागिरी
स्वर्गदूतगदे भन्दा जजा तबा येशूदा य्हाडसे म्हाड्बा मुला। परमेश्वरला दयामायासे लमा थे जम्मालान
लागिरी सिजी। थेहड् लसी सिबासे लमा थेदा ल्हानान मानदेन जयजयकार लबा मुकुट कूसी पिन्जी।

10 परमेश्वरसे हाडला लागिरी जम्मान सहे हाडसेन सहोबा मुबा। ओच्छे हाडला कोलागदेदा
हाडसे याड्बा य्हालदेन शक्ति पिन्बाला लागिरी थाबा पिन्बा येशूदा दुख नापुड्सी पाको सहोबा
चा परमेश्वरदा ज्यबा छोर्जी, 11 तिग्दा भिसम येशूसे पापग्याम फेसी चोखो तना लबा जम्मान
म्हिगदेदेन येशू परमेश्वरलान सन्तान हिन्ना। थेतबासेलमा थेनीगदेदा आले आडा भिसी पाड्बारी
येशू आपे:मुला। 12 येशूसे परमेश्वरदा चुहड् भिसी सुड्जी,

“डाइ डाला आले आडागदेला गुडरी हाडसे लबा गेला बारेरी पाड्ला,

ओच्छे मण्डलीला गुडरी डाइ हाडला जयजयकार लला।”*

13 दो:सी येशूसे चुहड् भिसी सुड्जी,

“डाइ परमेश्वरथोरीन भर लला।”

थेहड् लसी दो:सीनोन

“च्यागो, दान्दे डा परमेश्वरसे डादा पिन्बा चु कोलागदेदेन छ्यामनोन मुला” भिसी सुड्जी।*

* 1:13 भजन ११०:१ † 2:5 चु भिबा चा स्वर्गदूतगदेदा शासन लबारी आपिन्नी। तर येशूदा शासन लबा अधिकार पिन्जी भिबा
हिन्ना। * 2:8 भजन ८:४-६ * 2:12 भजन २२:२२ * 2:13 यशै ८:१७-१८

14 थे कोलागदेला लहुइ स्यादेन काला तबासे लमा येशूला लहुइएनोन थेनीगदेला हड्बान स्यादेन काला दोजी। ओच्छे म्हिदा नाश लबा शक्ति थोबा शैतानदा नाश लबारी येशू हाडनोन सिजी। 15 ओच्छे सिला वा भिसी सदन लोड्सी चिबा म्हिगदेदा येशूसे लोड्बाग्याम फेजी। 16 चुहड् लसी येशूसे स्वर्गदूतगदेला लागिरी थेहड् लबा आहिन, तर अब्राहामला सन्ताननां लागिरी थेहड् लबा हिन्ना भिबा ताम य्हाडदा था मुला।* 17 थेतबासेलमा म्हिगदेला पाप माफ लबाला लागिरी परमेश्वरसे पिन्बा गेरी भर तबादेन दया मुबा परमेश्वरला मन्दिररी पूजा लबा मुल म्हि दोतो:ला। थेहड्बा म्हि दोबाला लागिरी जम्मान तामरी येशू हाडलान आले आडागदे हड्बान दोतो:बा मुबा। 18 शैतानसे फसब लबारी म्हाइमा येशू हाडसेन ल्हानान दुख नाजी। थेतबासेलमा शैतानसे फसब लबारी म्हाइबागदे जम्मादान थेसे जोगब लखम्ला।

3

येशू मोशा भन्दा घेन हिन्ना

1 थेतबासेलमा परमेश्वरसे हाडलान म्हिगदे सहोबाला लागिरी धम्बा ज्योज्यो आले नाना आडागदे, य्हाडसे परमेश्वरसे पुड्खबा परमेश्वरला मन्दिररी पूजा लबा मुल म्हि येशूदा च्यागे। 2 मोशा परमेश्वरला म्हिगदेला गुडरी गे लबाला लागिरी भर तबा म्हि मुबा हड्बानोन येशूएनोन हाडदा गे लपुड्बा परमेश्वरला लागिरी भर तबा मुबा।* 3 दिमसे भन्दा दिम सहोबा म्हिसे मान याड्बा हड् लसी मोशासे भन्दा येशूसे झन ल्हाना मान याड्बा मुला। 4 खजिबै दिम खजिबै म्हिसे सहोबा तमुला। तर जम्मान सहे सहोबा चा परमेश्वरनोन हिन्ना। 5 मोशा चा परमेश्वरला म्हिगदेदा च्याबा जम्मान तामरी भर तबा नोकर मुबा। थेसे परमेश्वरला म्हिगदेदा लिच्छा तिग तला भिबा ताम पाड्मुबा। 6 तर ख्रीष्ट चा दिमला भर तबा झा गिक हड्बान परमेश्वरला दिमरी अधिकार याड्बा मुल झा हिन्ना। चुदे य्हाडसे लबा आशथोरी पूरान भर लसी लिच्छाधोनान विश्वासरी कोड्सी चिजी भिसम य्हाडएनोन परमेश्वरला दिमला कोलागदे दोला।

परमेश्वरला लिच्छा भ्रउ

7 थेतबासेलमा परमेश्वरला आत्मासे चुहड् भिसी सुड्बा मुला,
“तिनी एनीगदेसे परमेश्वरला काइ थे:जी भिसम,
8 एनीगदेला आखे म्हेमेसे परमेश्वरला बिरोध लबा हड् लसी
एनीगदेसे हाडला सेम कोड्ना थालउ।
थेनीगदेसे तोडतोडबा ग्लारी परमेश्वरला सेम च्यासी परमेश्वरला बिरोध लबा मुबा।
9 थेरी एनीगदेला आखे म्हेमेगदेसे बोगल न्ही दिडधोना डाइ लबा गे म्हाड्सीनोन
डाला सेम च्यासी डादा विश्वास आलनी।
10 थेतबासेलमा थेनीगदेदा म्हाड्सी डादा बोमो रे:जी।
ओच्छे ‘चु म्हिगदेसे डादा विश्वास लबा ख्लाजी,
डाइ पाड्बा थेनीगदेसे आड्यान्नी’ भिसी डाइ भिजी।
11 डाइ बोमोला झोकरी थेनीगदेदा
‘डाइ सहोबा ब्लप्बा न्हबा ग्लारी थेनीगदे खाइमै वाड्आम्याड्’ भिसी घान फाजी।”*
12 ज्योज्यो आले नाना आडागदे, होशियार तसी चिउ। एनीगदे न्हडरी खालैनोन विश्वास आलबा पापी सेम थोसी छोनो परमेश्वरदा थाख्लागो। 13 तर परमेश्वरला बचनरी “तिनी” भिबा धुइ मुतेधोना जम्मासेन गिकसेम गिकदा सदन आँट पिन्सीन चिउ। आहिन्सम पापसे फसब लसी एनीगदे न्हडरी खालैला सेम कोड्ना लला। 14 य्हाडसे शुरुरी लबा विश्वासरी य्हाड सोतेधोना कोड्सी चिजी भिसम य्हाडसे ख्रीष्टग्याम याड्बा हक याड्ला। 15 बचनरी चुहड् भिसी भिबा मुला,
“तिनी एनीगदेसे परमेश्वरला काइ थे:जी भिसम

† 2:16 “अब्राहामला सन्तान” भिबा चा परमेश्वरदा विश्वास लबा म्हिगदे हिन्ना। * 2:16 गला ३:७; यशै ४१:८ * 3:2 गन्ती १२:७ * 3:11 भजन ९५:७-११

बिरोध लबा धिनरी हड लसी
एनीगदेसे हाडला सेम कोडना थालउ।”*

16 परमेश्वरला काइ थे:सीनोन थेदा बिरोध लबा म्हिगदे खाल मुबा? तिग मोशासे मिश्र यहुल्साग्याम फेसी भबा म्हिगदेन आहिन? हिनना। 17 खाल म्राड्सी परमेश्वर बोगल न्ही दिडधोना बोमो खजी? तोडतोडबा ग्लारी सिबा थे पाप लबा ओन्माला म्हिगदेदा म्राड्सी आहिन? हिनना। 18 परमेश्वरसे डाइ सहोबा बल्पबा न्हबा ग्लारी वाड्आम्याड् भिसी खाल्दा सुड्मुबा? परमेश्वरसे कुल्बा ताम आड्यान्बा थेनोन म्हिगदेदा सुड्बा आहिन? हिनना। 19 थेतबासेलमा थेनीगदेसे विश्वास आलबासे लमा थेनीगदे बल्पबा न्हबा ग्लारी वाड्आम्याड्नी भिबा ताम य्हाडसे था याड्बा मुला।

4

परमेश्वरला म्हिगदेला लागिरी बल्पबा न्हबा ग्ला

1 य्हाडदा बल्पबा न्हबा ग्लारी वाड्पुड्ला भिसी परमेश्वरसे कबुल लबा मुला। थेतबासेलमा य्हाड होशियार तसी चिड, आहिनसम एनीगदे न्हडला खालै थे बल्पबा न्हबा ग्लारी वाड्आम्याड्। 2 तिग्दा भिसम ओन्माला म्हिगदेदा हड्णोन य्हाडदाएनोन थार्बा पिनबा समाचार थे:ना लबा मुला। तर थेनीगदेला लागिरी थे समाचार गे आखेल्बा तजी। तिग्दा भिसम थेनीगदेसे थे समाचार सेमरी थान्सी विश्वास आलनी। 3 दाहेन्से य्हाड विश्वास लबागदे चा थे बल्पबा न्हबा ग्लारी वाड्म्याड्ला। परमेश्वरसे चुहड् भिसी सुड्बा मुला,

“डाइ बोमोला झोकरी ‘थेनीगदेदा डाइ सहोबा बल्पबा न्हबा ग्लारी
थेनीगदे खाड्मै वाड्आम्याड्’ भिसी घान फाजी।”

तसैनोन जम्बुलिड सहोमाहेन्सेन परमेश्वरसे लबा जम्मान गे पूरा तबान मुला।* 4 तिग्दा भिसम थेसे अर्गु ग्लारीनोन निसरेला बारेरी चुहड् भिसी सुड्बा मुला,

“परमेश्वरसे जम्मान गे लसी जिन्माहेन्से निसरेमाकुनु बल्पबा न्हजी।”*

5 दो:सी थेसे चु तामला बारेरी चुहड् भिसी सुड्बा मुला,

“डाइ बल्पबा न्हबाला लागिरी सहोबा ग्लारी थेनीगदे खाड्मै वाड्आम्याड्।”*

6 तसैनोन परमेश्वरसे सहोबा थे बल्पबा न्हबा ग्लारी अझन कोइ कोइ म्हि वाड्म्याड्ला। ओच्छे डाच्छान थार्बा पिनबा समाचार थे:सीनोन कुल्बा ताम आड्यान्बा म्हिगदे चा थे बल्पबा न्हबा ग्लारी वाड्आम्याड्नी। 7 थेतबासेलमा परमेश्वरसे बल्पबा न्हबा ग्लारी वाड्म्याड्बाला लागिरी अर्गु धिन सहोजी। थे धिन चा “तिनीला धिन” भिसी तोगब लजी। परमेश्वरसे ल्हानान दिड लिच्छा दाऊद ग्लेग्याम चुहड् भिसी सुड्जी,

“तिनी एनीगदेसे परमेश्वरला काइ थे:जी भिसम हाडला सेम कोडना थालउ।”*

चु ताम डाइ डाच्छाएनोन पाड्सी जिन्बा मुबा।

8 चुदे यहोशूसे थेनीगदेदा बल्पबा न्हबा ग्लारी धोना लबा हिनसम परमेश्वरसे थे अर्गु धिनना तामनोन आते:सेला मुबा।† 9 थेतबासेलमा परमेश्वरसे निसरेकुनु बल्पबा न्हबा हड् लसी परमेश्वरला म्हिगदेला लागिरीनोन बल्पबा न्हबा ग्ला सहोबा मुला। 10 परमेश्वरसे गे लसी जिन्माहेन्से बल्पबा न्हबा हड् लसी बल्पबा न्हबा ग्लारी वाड्बा म्हिगदेसेनोन गे लसी जिन्माहेन्से बल्पबा न्हला। 11 परमेश्वरसे कुल्बा ताम आड्यान्बासे लमा ओन्माला म्हिगदे बल्पबा न्हबा ग्लारी वाड्आम्याड्नी। तर य्हाड न्हडरी खालैनोन थेहड् आतबाला लागिरी य्हाड जम्मासेन थे बल्पबा न्हबा ग्लारी वाड्बारी खम्तेधोना भड लड्।

12 परमेश्वरला छोनबो बचन मी गे लसी चिबा शक्ति हिनना। चु न्हीलोनपट्टि धार मुबा तरवार भन्दा छ्यार्बा मुला। चुसे महिला आत्मा, लहुड, थेला जी जीदेन नखुला टाड्गदेन फेला ओच्छे महिला सेमला तामदेन लबारी म्हाड्बा गे ठीक मुला कि आरे भिसी च्याला। 13 परमेश्वरसे म्राड्आखम्बा

* 3:15 भजन ९५:७-८ * 4:3 भजन ९५:११ * 4:4 उत्प २:२ * 4:5 भजन ९५:११ * 4:7 भजन ९५:७-८ † 4:8 मोशा सिमाहेन्से इस्राएलीगदेदा यहोशूसे कनान भिबा यहुल्सारी भोर्बा गे लजी।

ताम तिगैनोन आरे। थेला डाच्छा जम्मान ताम प्रस्टन मुला। य्हाडसे लबा जम्मान गेला हिसाब थेदान उन्तोःला।

परमेश्वरला मन्दिररी पूजा लबा मुल म्हिगदे न्हडरी येशू जम्मान भन्दा घेन हिन्ना

14 थेतबासेलमा य्हाडसे लबा विश्वासरी अझ य्हाड कोड्सी चिड। तिग्दा भिसम स्वर्गरी फेपूबा परमेश्वरला झा येशून परमेश्वरला मन्दिररी पूजा लबा य्हाडला मुल म्हि हिन्ना। 15 परमेश्वरला मन्दिररी पूजा लबा मुल म्हिगदे न्हडला घेन म्हि य्हाडला येशूदा य्हाडला जम्मान कमजोरिगदे था मुला। तिग्दा भिसम थेदाएनोन य्हाडदा ह्ङनोन जम्मान तामरी फसब लबारी म्हाइजी। तर थेसे पाप चा आलनी। 16 थेतबासेलमा य्हाड आलोङ्ना दया लबा परमेश्वरला ठिला डाच्छापट्टि निइ। दुख तबा धुडरी य्हाडसे थेरी थेला दयामायाग्याम हो याड्ला।

5

1 परमेश्वरला मन्दिररी पूजा लबा खजिबै मुल म्हि धम्मा म्हिगदे न्हडग्यामनोन धम्मुला। म्हिगदेला साटोरी परमेश्वरदा फुल्तोःबा पापला बलिदेन भेटी फुल्बाला लागिरी थेदा धम्बा हिन्ना। 2 थे मुल म्हिसे आसेबा आघोबादेन ग्याम थोर्सी भ्रबागदेदा आछेर्ना ज्यना लसी घोना लखम्मुला। तिग्दा भिसम थे ह्ङएनोन कमजोर म्हि हिन्ना। 3 थेतबासेलमा स्य्हान्दो म्हिगदेला पापला लागिरी जे आहिन, तर थेसे ह्ङला पापला लागिरीनोन बलि फुल्तोःमुला।

4 खालै म्हिसे ह्ङला सेमसे म्हाइजी भिदेमा परमेश्वरला मन्दिररी पूजा लबा मुल म्हिसे याड्बा मान आयाड्। तर परमेश्वरसेन थे मान याड्बा म्हि स्होबारी धम्ला। थेह्ङ लसीन हारूनदाएनोन थेनोन परमेश्वरसे धम्जी।* 5 चुह्ङ लसी ख्रीष्टसेनोन ह्ङनोन परमेश्वरला मन्दिररी पूजा लबा मुल म्हि दोबारी मान आम्हाइनी। तर थेदा

“ए डाला झा हिन्ना,

डा तिनी एला आबा दोबा मुला”

भिसी सुड्बा परमेश्वरसेन धम्जी।* 6 ओच्छे परमेश्वरसे अर्गु ग्लारीनोन चुह्ङ भिसी सुड्बा मुला,
“ए मल्कीसेदेक ह्ङनोन

सदनना लागिरी परमेश्वरदा तेन्बा म्हि हिन्ना”*

7 येशू जम्बुलिडरी म्हि दोसी धन्छ्यामा ल्हानान क्रासी ह्ङदा सिबाग्याम सोना लखम्बा परमेश्वरदेन छ्याम प्रार्थना लजी। ओच्छे सोजो तसी कुलबा ताम ड्यान्बासे लमा परमेश्वरसे थेला प्रार्थना सान्जी। 8 येशू परमेश्वरला झा तसीनोन ह्ङसे नाबा दुखग्याम परमेश्वरसे कुल्बा ताम ड्यान्बारी लोपूजी। 9 येशू जम्मान तामरी पाको तमाहेन्से थे ह्ङसे कुल्बा ताम ड्यान्बा जम्मान म्हिगदेला लागिरी जुकजुकधोना थार्बा पिन्बा मुहान दोजी। 10 ओच्छे परमेश्वरसेन थेदा मल्कीसेदेकदा ह्ङनोन परमेश्वरदा तेन्बा मुल म्हि दोबारी धम्जी।

विश्वास थाख्लागै भिसी होशियार तना लबा

11 चु तामला बारेरी एनीगदेदा डन्से पाड्तोःबा ताम ल्हानान मुला। तर एनीगदेदा घोना लबारी गाहो तबा मुला। तिग्दा भिसम एनीगदेसे योना आघोमुला। 12 तिनीधोना मी एनीगदे स्य्हान्दोदा लोपूखम्बा म्हि ततोःमुबा। तर एनीगदेदा मी अझ परमेश्वरला बारेरी जजाबा तामगदेएनोन स्य्हान्दो म्हिसे लोपूतोःबा मुला। थेतबासेलमा एनीगदे चबा सहेला साटोरी अझ इहे थुड्बा कोलागदे ह्ङबान मुला। 13 एनीगदे इहेला भररी जे सोबा कोलागदे ह्ङ्बा म्हिसे चा ज्यबादेन नइबा तिग हिन्ना थे ताम था आत। 14 तर चबा सहे चबा घेन म्हिसे चा धिन धिननोन ह्ङसे लबा गेग्याम ज्यबादेन नइबा तिग हिन्ना थे ताम था याड्ला।

* 5:4 प्रस्था २८:१ * 5:5 भजन २:७ * 5:6 भजन ११०:४

6

1 थेहड् भिसम य्हाड ख्रीष्टला बारेरी डाच्छा लोप्बा तामगदे जे आतना अझ घेन घेन तामगदे लोप्बान पाको म्हि दोगे। अथवा नाश तना लबा गेगदे ख्लासी परमेश्वरपट्टि दोःबा तामदेन परमेश्वरदा विश्वास लबा ताम य्हाडदा घरिघरि लोप्आतोः। 2 ओच्छे बप्तिस्माला बारेरी लोप्बा तामगदे, स्य्हान्दोथोरी या थान्सी प्रार्थना लबा तामगदे, सिबागदे दोःसी सोला भिबा तामगदेदेन जुकजुकधोनाला सजाय याड्ला भिबा तामगदेला बारेरीनोन एनीगदेदा दाहेन्से लोप्आतोः। 3 चुदे परमेश्वरसे सेम लजी भिसम य्हाडसे घेन घेन तामएनोन लला।

4 तिग विश्वास ख्लासी निबागदेदा दोःसी भसी परमेश्वरपट्टि दोःपुड्बारी खम्ला? आखम। तिगदा भिसम जुन म्हिसे डाच्छा तिरेम परमेश्वरला य्हाल याड्सी स्वर्गला मोलमदेन परमेश्वरला आत्माएनोन याड्बा मुला। 5 थेनीगदेसे परमेश्वरला बचनएनोन था याड्बा मुला ओच्छे खबा धुइला बारेरी परमेश्वरसे लबा शक्तिशाली गेगदेएनोन म्राड्सी जिन्बा मुला। 6 थे जम्मान ताम था तसीनोन विश्वास लबा ख्लासी न्होड्सी निबा म्हिगदेदा दोःसी हाड हाडला पाप ख्लासी परमेश्वरपट्टि दोःपुड्बारी खम्नोन आखम। तिगदा भिसम थेहड्बा म्हिगदेसे परमेश्वरला झादा दोःसीनोन क्रुसरी टाँगब लसी जम्मान महिला ओन्छाडरी येशूला बेइज्जत लला।

7 ल्हानान हड् नाम ताइमाहेन्से बु भम्सी खेती लबागदेसे ढ्वबा अनून ल्हानान रोला। थेहड्बा बु वारीसे परमेश्वरग्याम मोलम याड्ला।† 8 तर थे बुरी पुजु दोडगदे जे फुइजी भिसम थे गे आखेल्बा तला। थेहड्बा बुदा परमेश्वरसे केःबारी छ्याइला। लिच्छा थे पुजु दोडगदे मेरी खाड्ला।

9 डाला सेम निबा ह्योगदे, डन्से चुहड्बा ताम लसैनोन एनीगदेला बारेरी चा ज्यबा ताम तला भिसी म्हन्बा मुला। ओच्छे थार्बा याड्सी एनीगदेसे ल्हानान ज्यबा सहेगदे याड्ला। 10 परमेश्वरसे सदन ठीक निसाफ लमुला, ओच्छे एनीगदेसे परमेश्वरला म्हिगदेदा ह्यो लसी परमेश्वरदा माया उन्बा मुला। अझ एनीगदेसे थेहड्बा गे लबान मुला, चु ताम परमेश्वरसे खाइमै आम्लेः। 11 एनीगदे जम्मासेन हाड हाडसे लबा आश पूरान याड्बाला लागिरी ढुकक तसी सोतेधोना भड लसी गे लला भिसी डन्से म्हन्बा मुला। 12 परमेश्वरसे पिन्ना भिसी कबुल लबा सहेगदे याड्बाला लागिरी एनीगदे ब्लेगु थादोगै। ओच्छे विश्वास लसी जस्तोन दुख तसै नाबा म्हिगदे हड् तसी भ्रगै भिबा डन्ना सेम मुला।

परमेश्वरसे लबा कबुल

13 परमेश्वरसे य्हाडला म्हेमे अब्राहामदा मोलम पिन्ना भिसी कबुल लमा हाड भन्दा घेन स्य्हान्दो खालै आरेबासे लमा परमेश्वरसे हाडलान मिनरी घान फासी चुहड् भिसी सुड्जी, 14 “डाइ एदा मोलम पिन्नोन पिन्ना, ओच्छे एला सन्तान ल्हानान तला।”* 15 परमेश्वरसे पिन्ना भिसी कबुल लबा मोलम आयाड्तेधोना अब्राहामसे भ्रान्सी चिबासे लमा थे मोलम याड्जी।

16 खालै म्हिसे तिगै ताम पक्का लतोःजी भिसम थेसे हाड भन्दा घेन्ना मिनरी घान फामुला, ओच्छे आढिक्बा तामगदे घान फासी ढिकना लमुला। 17 परमेश्वरसे पिन्ना भिसी कबुल लबा मोलम याड्बा म्हिगदेदा हाडसे लबा कबुल खाइमै आपोमुला भिबा ताम उन्बा सेम लजी। थेतबासेलमा परमेश्वरसे घान फासी थे कबुल पक्का लजी। 18 परमेश्वरसे य्हाडदेन छ्याम कबुलएनोन लबा मुला, घानएनोन फाबा मुला। चु ताम न्ही चा खाइमै आपोमुला। ओच्छे परमेश्वरसे खाइमै लुसीला ताम आलमुला। थेतबासेलमा जोगब तबाला लागिरी परमेश्वरला डाच्छा निबा य्हाडसे घेन आँट याड्ला। ओच्छे य्हाडसे य्हाडला डाच्छापट्टि थान्सी पिन्बा आशएनोन याड्ला। 19 चु आश चा य्हाडला आत्मादा जोगब लबा पक्का सत्य ताम हिन्ना। चुनोन आशग्याम य्हाड परमेश्वर धन्छ्याबा ग्लाधोना धोला। 20 य्हाडला लागिरी येशू य्हाड भन्दा डाच्छान थे ग्लारी फेप्सी धन्छ्यासी जिन्बा मुला। ओच्छे येशू सदनना लागिरी परमेश्वरदा तेन्बा म्हि मल्कीसेदेक हड्बान मुल म्हि दोबा मुला।

† 6:7 चु पदला बारेरी उत्पत्ति ३:१७-१८ सहीगो * 6:14 उत्प २२:१६-१७

परमेश्वरदा तेन्बा मल्कीसेदेक

1 चु मल्कीसेदेक शालेम भिबा यहुल्साला ग्लेदेन जम्मान भन्दा घेन परमेश्वरदा तेन्बा म्हि मुबा। अब्राहाम गोर बलि ग्लेदेन लडाइ लसी ढासी दोःसी खबा धुइरी मल्कीसेदेकसे स्याप्सी मोलम पिन्जी। 2 अब्राहामसे ग्लेगदेदा ढासी भबा जम्मान सहेगदेग्याम भो च्युइला भो गिक फेसी मल्कीसेदेकदा पिन्जी। मल्कीसेदेक भिबाला अर्थ गिक चा ठीक निसाफ लबा ग्ले हिन्ना। ओच्छे थे शालेम यहुल्साला ग्ले तबासे लमा मल्कीसेदेक भिबाला अर्गु अर्थ चा शान्तिला ग्ले हिन्ना। 3 मल्कीसेदेकला आबा आमादेन आखे म्हेमे खाल हिन्ना भिसी तिगै भिसी थान्बा आरे। ओच्छे थे न्हबादेन सिबा तामला बारेरीनोन तिगै भिसी थान्बा आरे। परमेश्वरला झा हङ्गोन थेएनोन सदनना लागिरी परमेश्वरदा तेन्बा म्हि दोजी।

4 मल्कीसेदेक गाते घेन म्हि मुबा भिबा ताम एनीगदेदा था तला। यह्हाडला म्हेमे अब्राहामसेनोन लडाइरी ढासी भबा जम्मान सहेग्याम भो च्युइला भो गिक थेदा पिन्जी। 5 परमेश्वरला मन्दिररी पूजा लबा लेवी वंशला म्हिगदेएनोन अब्राहामलान सन्तान तसैनोन परमेश्वरसे मोशादा पिन्बा ठिम अन्छार ह्हाडलान म्हिगदेग्याम भो च्युइला भो गिक किन्मुबा। 6 परमेश्वरदा तेन्बा मल्कीसेदेक लेवी वंशला आहिन। तसैनोन थेसे परमेश्वरला मन्दिररी पूजा लबा म्हिगदेला म्हेमे अब्राहामग्याम भो च्युइला भो गिक किन्जी। ओच्छे परमेश्वरसे लबा कबुलगदे याङ्तोःबा अब्राहामदा थेसे मोलम पिन्जी। 7 घेन म्हिसे जजा म्हिदा मोलम पिन्ना भिबा ताम जम्मादान था मुला। 8 परमेश्वरला मन्दिररी पूजा लबा सिसी निबा म्हिगदेसे भो च्युइला भो गिक किन्जी। तर परमेश्वरदा तेन्बा खाइमैनोन आसिबा मल्कीसेदेकसेनोन भो च्युइला भो गिक किन्बा मुबा। 9 लेवीगदेसे म्हिगदेग्याम भो च्युइला भो गिक किन्मुबा। तर चुहङ्गएनोन पाङ्खम्ला, लेवीगदेला म्हेमे अब्राहामसे मल्कीसेदेकदा भो च्युइला भो गिक पिन्माहेन्से लेवीगदेसेनोन पिन्बा तला। 10 तिग्दा भिसम मल्कीसेदेकसे अब्राहामदा स्याप्मा लेवी ह्हाडला म्हेमे अब्राहामला ल्हुइरीन मुबा।

येशू मल्कीसेदेक हङ्गबान हिन्ना

11 लेवी वंशला म्हिगदेसे परमेश्वरला मन्दिररी पूजा लबा गे याङ्बा मुबा। थेतबासेलमा इस्राएलीगदेसे परमेश्वरग्याम ठिम याङ्जी। तर परमेश्वरला मन्दिररी पूजा लबा लेवीला गे लबा ठिम अन्छार खालै म्हिदा तिगै दोष आरेबा म्हि स्होबारी खम्बा हिन्सम हारूनना सन्तानना साटोरी मल्कीसेदेक हङ्गबा परमेश्वरदा तेन्बा स्य्हान्दो म्हि तिग्दा खतोःजी? 12 तिग्दा भिसम परमेश्वरला मन्दिररी पूजा लबा मुल म्हि स्य्हान्दोन खाल्ला पोमाहेन्से ठिमएनोन पोतोःला।

13 यह्हाडला प्रभुला बारेरी चु तामगदे पाङ्बा मुला, थे अर्गु वंशला हिन्ना। थेला वंशला खालैसेन परमेश्वरदा भेटी फुल्बा ग्लारी गे लबा आरे। 14 यह्हाडला प्रभु मी यह्हाडला वंशरी न्हबा हिन्ना। यह्हाडला वंशग्याम परमेश्वरला मन्दिररी पूजा लबा म्हि स्होबा तामला बारेरी मोशासे तिगैनोन पाङ्बा आरे भिबा ताम जम्मादान था मुला।

15 मल्कीसेदेक हङ्गबान परमेश्वरदा तेन्बा स्य्हान्दो म्हि खसी जिन्बासे लमा दाहेन्से चु जम्मान ताम इन ज्यना लसी घोला। 16 थे यह्हाडला आखे म्हेमेला ठिम अन्छार स्होबा परमेश्वरदा तेन्बा म्हि आहिन। तर खाइमै नाश आतबा जुनीला शक्तिग्याम स्होबा परमेश्वरदा तेन्बा म्हि हिन्ना। 17 तिग्दा भिसम थेला बारेरी बचनरी चुहङ्ग भिसी भिबा मुला, “मल्कीसेदेक हङ्गोन ए सदनना लागिरी परमेश्वरदा तेन्बा म्हि हिन्ना।”* 18 तिग्दा भिसम थे डाच्छाला ठिम चा तिगै लआखम्बादेन गे आखेल्बा तबासे लमा भ्याङ्बा मुला। 19 तिग्दा भिसम थे ठिमसे खजिबै सहेदा तिगै दोष आरेबा स्होआखम्नी। तर दाहेन्से इन यह्हाडला ज्यबा आश पिन्बा मुला। थे आशग्याम यह्हाड परमेश्वरला डामरी धोखम्ला।

† 7:11 हारूनना सन्तान चा लेवीगदे हिन्ना। * 7:17 भजन ११०:४

20 परमेश्वरसे हाडला ताम पक्का लबाला लागिरी घान फासी चु छार ठिम शुरु लबा हिन्ना। चुहड्बा घान चसी परमेश्वरसे पूजा लबा स्य्हानदो खजिबै म्हिगदेदा धम्बा आरे, 21 तर येशू चा परमेश्वरसे घान फासी परमेश्वरला मन्दिररी पूजा लबा म्हि सहोबा हिन्ना। थेला बारेरी बचनरी चुहड् भिसी भिबा मुला,

“परमप्रभुसे घान फासी जिन्बा मुला,

थेसे हाडला सेम खाइमै आपो।

‘ए सदनना लागिरी परमेश्वरला मन्दिररी पूजा लबा म्हि हिन्ना।’ ”

22 परमेश्वरसे लबा ज्यबा कबुलला जिम्मा येशूसे किन्बा मुला।

23 ओच्छे अर्गु ताम चा डाच्छा परमेश्वरला मन्दिररी पूजा लबा म्हिगदे ल्हानान मुबा। तिग्दा भिसम थेनीगदे सिसी निबासे लमा सदन हाडला गे लबारी आखममुबा। 24 तर येशू चा जुकजुकधोनान सोसी चिबासे लमा थे सदनना लागिरी परमेश्वरला मन्दिररी पूजा लबा म्हि दोबा मुला। 25 थेतबासेलमा येशूदा विश्वास लसी परमेश्वर मुबा ग्लारी खबा म्हिगदेदा थेसे सदनना लागिरी थाना लबारी खमला। तिग्दा भिसम थेनीगदेला लागिरी परमेश्वरदेन छ्याम प्रार्थना लसी पिन्बारी येशू सदन सोसी चिला।

26 यहाडदा तोःबा परमेश्वरदा तेन्बा मुल म्हि चुनोन येशू हिन्ना। थे पापनोन आलबादेन चोखो ओच्छे तिगै दोष आरेबा मुला। थेतबासेलमा परमेश्वरसे थेदा पापी म्हिगदेग्याम फेसी स्वर्गला जम्मान भन्दा मुल ठिरी धन्छ्यापुड्बा मुला। 27 परमेश्वरला मन्दिररी पूजा लबा अर्गु मुल म्हिगदेसे म्हिगदेला पाप माफ लबारी धिन धिननोन बलि फुलतोःमुबा। तर येशूसे चा थेहड् लसी बलि फुलआतोःनी। तिग्दा भिसम थे हाडनोन तिरेमरीन सदनना लागिरी बलि तसी जिन्बा मुला। 28 तिग्दा भिसम मोशादा पिन्बा ठिम अन्छार कमजोर म्हिगदेदा परमेश्वरला मन्दिररी पूजा लबा मुल म्हि सहोबारी धम्जी। तर परमेश्वरला झा येशूदा थे ठिम भन्दा लिच्छा परमेश्वरसे हाडसे घान फाबा अन्छार धम्बा मुला। ओच्छे सदनना लागिरी तिगै दोष आरेबा सहोबा मुला।

8

येशू परमेश्वरदा तेन्बा यहाडला मुल म्हि हिन्ना

1 डन्से पाड्बा मुल तामएनोन चुनोन हिन्ना, यहाडला जम्मान भन्दा घेन परमेश्वरदा तेन्बा मुल म्हि स्वर्गरी परमेश्वरला दाहिनेपट्टि ठिरी धन्छ्याबा मुला।* 2 येशू परमेश्वरदा तेन्बा मुल म्हि दोसी स्वर्गला जम्मान भन्दा चोखो ग्लारी गे लमुला। चु चोखो ग्ला म्हिसे सहोबा आहिन, तर परमेश्वरसे सहोबा सत्य पाल हिन्ना।

3 परमेश्वरला मन्दिररी पूजा लबा जम्मान मुल म्हिगदे परमेश्वरदा भेटीदेन बलि फुलबाला लागिरी धम्बा हिन्ना। थेतबासेलमा परमेश्वरदा तेन्बा यहाडला मुल येशूसेनोन परमेश्वरदा तिगै सहे फुलनोन तोःला। 4 येशू चु जम्बुलिडरी मुबा हिन्सम खाइमै परमेश्वरदा तेन्बा म्हि आदोसेला मुबा। तिग्दा भिसम मोशादा पिन्बा ठिम अन्छार भेटी फुलबा परमेश्वरला मन्दिररी पूजा लबा लेवी वंशला म्हिगदे मी चुरी डाच्छाहेन्सेन मुबा। 5 थेनीगदेसे परमेश्वरला मन्दिररी पूजा लबा गे चा स्वर्गरी मुबा सत्य ताम हड्बा जे हिन्ना, तर स्वर्गरी मुबा सत्य तामनोन चा आहिन। मोशादाएनोन परमेश्वरसे थेहड्बान लउ भिसी कुलबा मुबा। मोशासे परमेश्वरदा तेन्बारी पाल सहोबारी छ्याइमा, “च्यागो, जम्मान ताम डाइ एदा गडरी उन्बा हड्बान सहोउ” भिसी कुलबा मुबा।* 6 तर येशूसे परमेश्वरदा तेन्बा गे चा परमेश्वरला मन्दिररी पूजा लबा स्य्हानदो मुल म्हिगदेला गे भन्दा झन घेन मुला। थेहड् लसीन परमेश्वरदेन परमेश्वरला म्हिगदेला गुडरी येशूसे लबा छार कबुल थे पुरानो कबुल भन्दा ज्यबा मुला। तिग्दा भिसम छार कबुलरी ल्हानान ज्यबा तामगदे मुला।

7 पुरानो कबुलरी तिगै दोष आरेबा हिन्सम थेला ग्लारी दोःसी अर्गु कबुल लनोन आतोःसेला मुबा।

8 तर परमेश्वरसे हाडला म्हिगदेसे लबा गल्ती था याड्सी चुहड् भिसी सुड्जी,

* 8:1 भजन ११०:१ * 8:5 प्रस्था २५:४०

- “परमप्रभुसे चुहड् भिसी सुड्बा मुला,
डाइ इस्राएलला सन्तानदेन यहूदाला सन्तानदेन छ्याम
छार कबुल लबा धिन खबान मुला।*
9 थे छार कबुल डाइ थेनीगदेला आखे म्हेमेगदेदेन छ्याम लबा कबुल हड्बा आत।
थे धुइरी डाइ थेनीगदेदा यारी चुड्सी मिश्र यहुल्साग्याम फेसी भबा मुबा।
परमप्रभुसे चुहड् भिसी सुड्बा मुला,
थेनीगदे डाइ लबा कबुल अन्छार आभनी।
थेतबासेलमा डाइ थेनीगदेला वास्ता आलनी।
10 थे धिन खमाहेन्से डाइ इस्राएलला सन्तानगदेदेन छ्याम छार कबुल लला,
डाइ थे ठिम थेनीगदेला सेमरी भिसी थान्ना।
डा थेनीगदेला परमेश्वर दोला ओच्छे थेनीगदे डाला म्हि दोला।
11 ‘परमप्रभुदा डोसेगो’ भिसी दाहेन्से खालैसेन हाडला खिमजेमदा,
हाडला ज्योज्यो आले नाना आडादा लोप्आतोः।
तिगदा भिसम जजाहेन्से घेनधोनाला जम्मासेन डादा डोसेला।
12 डाइ थेनीगदेसे लबा नइबा गेला दोष मेटब लला,
ओच्छे थेनीगदेसे लबा पाप डाइ दोःसी खाइमै आहन।”*
- 13 चु कबुलदा “छार” भिसी सुड्बासे लमान परमेश्वरसे डाच्छाला कबुलदा भोक्टो सहोजी। थे
डाच्छाला कबुल चा भोक्टो तबासे लमा म्हासी निला।

9

परमेश्वरदा तेन्बाला लागिरी म्हिसे सहोबा चोखो ग्ला

1 पुरानो कबुलरी परमेश्वरदा तेन्बा ठिम मुबा। ओच्छे थे ठिमरी परमेश्वरदा तेन्बा चोखो ग्लाला
बारेरीनोन भिबा मुबा। 2 थे पाल न्हडरी कोठा न्ही मुबा। डाच्छापट्टिला कोठादा चोखो ग्ला भिसी
भिमुबा। थे कोठारी चा नाडसल थान्बा ग्लादेन टेबुल मुबा। थे टेबुलथोरी चा परमेश्वरदा फुल्बा
गेडगदे मुबा। 3 थे कोठा भन्दा न्हडरी अर्गु पर्दा गिक मुबा। थे पर्दा न्हडला कोठादा चा जम्मान
भन्दा चोखो ग्ला भिसी भिमुबा।* 4 थे कोठा न्हडरी म्हरला धूप म्नाबा ग्लादेन डाच्छाला कबुल
थान्बा म्हरसे मोरब लबा चोखो सन्दोस मुबा। थे सन्दोस न्हडरी म्हरला ताडरी मन्नेनदेन म्हेन्दो
सारबा हारूनना कडी ओच्छे परमेश्वरसे हाडला म्हिगदेदेन छ्याम लबा कबुल भिसी थान्बा युड्बाला
पाटीगदे मुबा।* 5 परमेश्वरला यहालदेन शक्ति थेरी मुला भिसी उन्बाला लागिरी थे सन्दोसथोरी पाप
माफ लबा ग्लारी भ्याप मुबा करूब भिबा स्वर्गदूत न्ही मुबा। थे ग्लादा थेन्नीला भ्याप्से घप्सी
थान्बा मुबा। तर दान्देन डन्से चु ताम मेलोसेन पाड्बारी आखम।*

6 चु जम्मान सहगदे ठीक लसी जिनमाहेन्से परमेश्वरला मन्दिररी पूजा लबा म्हिगदे हाडसे लतोःबा
गेगदे लबारी धिन धिननोन डाच्छापट्टिला चोखो ग्लारी निमुबा।* 7 तर जम्मान भन्दा चोखो ग्लारी
चा तिदिडरी तिरेम परमेश्वरला मन्दिररी पूजा लबा मुल म्हि गिक बाहेक स्य्हान्दो खालै आनिमुबा।
थेएनोन थेरी जनतुला का आभोर्दे निआखममुबा। थे का थेसे हाडला पापदेन स्य्हान्दो म्हिगदेला
पापला लागिरी फुल्मुबा।* 8 चु जम्मान तामगदेग्याम डाच्छापट्टिला चोखो ग्ला मुतेधोना मन्दिर
न्हडपट्टिला जम्मान भन्दा चोखो ग्लारी वाड्बा म्नाप आठोड् भिबा ताम परमेश्वरला आत्मासे उन्बा
मुला। 9 चु ताम चा दान्देला धुइ गाते घेन मुला भिसी उन्बा चिनु जे हिन्ना। चु तामग्याम परमेश्वरदा
फुल्बा भेटीदेन बलिसे म्हिला सेम चोखो सहोबारी आखम भिसी उन्बा मुला। 10 थे सहगदे चा चबा
थुड्बादेन म्हिदा चोख्याब लबा ल्हानान थरीला ठिम जे हिन्ना। थे ठिम चा परमेश्वरग्याम छार ठिम
आखतेधोनाला लागिरी ल्हुइ चोखो तना लबा ठिम जे हिन्ना, सेम चोखो तना लबा ठिम आहिन।

* 8:8 यर्मि ३१:३१-३४ * 8:12 यर्मि ३१:३१-३४ * 9:3 प्रस्था २६:३१-३३ * 9:4 प्रस्था ३०:१-६; २५:१०-१६; १६:३३;
गन्ती १७:८-१०; वयव १०:३-५ * 9:5 प्रस्था २५:१८-२२ * 9:6 गन्ती १८:२-६ * 9:7 लेवी १६:२-३४

ख्रीष्टला का

11 तर ख्रीष्ट चा परमेश्वरदा तेन्बा मुल म्हि दोसी दान्दे चुरी मुबा जम्मान ज्यबा सहेगदे पिन्बाला लागिरी फेपखबा मुला। थे जम्मान भन्दा घेनदेन चोखो ग्लारी फेपजी। चु ग्ला चा जम्बुलिडला सहेगदेग्याम म्हिसे सहोबा ग्ला आहिन। 12 ख्रीष्टसे बोगोदेन बहरला का भोर्सी आहिन, तर हाडलान का भोर्सी तिरेमरीन य्हाडदा जुकजुकधोनान पापग्याम फेबाला लागिरी थे जम्मान भन्दा चोखो ग्लारी फेपजी। 13 डाच्छाला ठिम अन्छार रा बोगोदेन बहरला का ओच्छे म्हे योमो खाड्बा मेफ्रा अशुद्ध तबा म्हिगदेदा स्वामा थेनीगदेला ल्हुइ चोखो तमुबा। 14 झन ख्रीष्टला काग्याम य्हाड सोसी छोन्बो परमेश्वरदा तेन्गै भिसी य्हाडदा सिना लबा गे लपुड्बा नइबा सेमदा चोखो सहोबा मुला। तिग्दा भिसम ख्रीष्ट खाइमै नाश आतबा आत्माग्याम तिगै दोष आरेबा बलि दोसी हाडसे हाडदान परमेश्वरदा फुल्जी।

15 थेतबासेलमा परमेश्वरसे जुकजुकधोना चिबा मोलमगदे पिन्ना भिसी लबा कबुल हाडसे धम्बा म्हिगदेसे याड्गै भिसी छार कबुल ढिक्ना लबा चा ख्रीष्टनोन हिनना। तिग्दा भिसम डाच्छा लबा पुरानो कबुलला धुइरी म्हिगदेसे लबा पापगदेग्याम फेबाला लागिरीन ख्रीष्ट सिबा मुला।

16 अर्गु ताम चा खालै म्हिसे हाडला सम्पत्ति बकसपत्र भिसी पिन्बा हड्बा हिनना, तिग्दा भिसम बकसपत्र लसी पिन्बा म्हि आसितेधोना थे बकसपत्रसे तिगै गे आल। 17 तिग्दा भिसम बकसपत्र भिसी पिन्बा म्हि सोतेधोना बकसपत्र याड्बा महिला तिगै अधिकार आत। थे बकसपत्र भिसी पिन्बा म्हि सिमाहेन्से जे बकसपत्र याड्बा महिला अधिकार तला। 18 थेतबासेलमा डाच्छा लबा पुरानो कबुलसेनोन का आरेतेधोना तिगै गे आलमुबा। 19 मोशासे परमेश्वरसे पिन्बा जम्मान ठिमगदे म्हिगदेदा पाड्सी जिनमाहेन्से क्युइरी बोगोदेन बहरला का दोड्सी हिसपला स्याउलादेन वाला ऊनसे म्हिगदेदेन परमेश्वरसे पिन्बा ठिमला किताबरी स्वामुबा।* 20 ओच्छे थेसे चुहड् भिसी भिजी, “एनीगदेसे परमेश्वरसे कुलबा ताम ड्यानगै भिसी थेसे एनीगदेदेन छ्याम लबा कबुलदा पक्का लबा चा चुनोन का हिनना।” 21 थेहड् लसीन मोशासे परमेश्वरला मन्दिरला चोखो ग्लादेन पूजा लबारी चलब लबा जम्मान सहेगदेरी थे का स्वाजी।* 22 पाड्नोन तोःमा परमेश्वरसे मोशादा पिन्बा ठिम अन्छार जम्मान हड्बा सहेदा कासे चोखो तना लला, का बगब आततेधोना पापला दोष मेटब आत।

23 थे डाच्छाला ठिमला तामगदे स्वर्गरी मुबा सहेगदे हड्बा जे हिनना। थेहड्बा सहेगदेदा मी चोखो सहोबारी ठिम तोःजी भिसम स्वर्गरी मुबा सहेगदेदा चोखो सहोबारी झन ज्यबा बलि लतोःला। 24 थेतबासेलमा ख्रीष्ट म्हिसे सहोबा चोखो ग्लारी आफेपनी। तिग्दा भिसम थे स्वर्गरी मुबा चोखो सत्य ग्ला हड्बा जे हिनना। तर दान्दे थे परमेश्वरला डाच्छा य्हाडला लागिरी ताम थान्बारी स्वर्गरी फेपबा मुला। 25 डाच्छाला ठिम अन्छार परमेश्वरला मन्दिररी पूजा लबा मुल म्हि जन्तुला का भोर्सी दिडएदडसेन चोखो ग्लारी नितोःबा मुबा। तर ख्रीष्ट चा हाडनोन बलि दोसी घरिघरि स्वर्गरी आफेपनी। 26 चुदे सदन फेपतोःबा हिनसम जम्बुलिड छ्यामाहेन्सेन ख्रीष्टसे घरिघरि दुख नातोःसेला मुबा। तर जम्बुलिड नाश तबा धुइधोनाला लागिरी ख्रीष्ट तिरेम फेपखसी सदनना लागिरी पापला दोष मेटब लबारी हाडनोन बलि तजी। 27 म्हि तिरेम सिनोन तोःला, ओच्छे सिमाहेन्से परमेश्वरसे थेला निसाफ लला। 28 थेहड् लसीन ल्हानान महिला पापला दोष मेटब लबाला लागिरी ख्रीष्टएनोन तिरेम जे बलि दोजी। ख्रीष्ट दोःसीनोन फेपखला, ओच्छे थे धुइरी चा म्हिगदेला पापला दोष मेटब लबाला लागिरी आहिन, तर ताड्सी ताड्सी थेला ग्याम च्यासी चिबागदेदा थार्ना लबारी फेपखला।

10

ख्रीष्ट सदनना लागिरी बलि तजी

1 परमेश्वरसे मोशादा पिन्बा ठिम चा लिच्छा खबा ज्यबा तामला चिनु जे हिनना। तर ख्रीष्टसे लबा ज्यबा तामनोन चा आहिन। तिग्दा भिसम डाच्छाला ठिम अन्छार दिडएदडसेन खाल गिकलान बलि फुल्मुबा। तर थे बलिसे चा परमेश्वर मुबा ग्लारी खबा म्हिगदेदा चोखो सहोबारी आखम। 2 बलि

* 9:19 प्रस्था २४:६-८; लेवी १४:४ * 9:21 लेवी ८:१५

फुल्सी म्हिगदे चोखो तबा हिन्सम बलि फुल्बान आख्लासेला मुबा। तिग्दा भिसम परमेश्वरदा तेन्बा म्हिगदे सदनना लागिरी चोखो तसेला मुबा। ओच्छे थेनीगदेसे पापी भिसी म्हन्आतोःसेला मुबा।³ बरु थे दिडएदडसेन लबा बलिसे म्हिगदेदा हाडला पाप सदन ढन्ना जे लला।⁴ तिग्दा भिसम बहरदेन रा बोगोगदेला कासे खाइमै पापला दोष मेटब लबारी आखम।

⁵ थेतबासेलमा जम्बुलिडरी फेप्खबा धुडरी ख्रीष्टसे परमेश्वरदा चुहड् भिसी सुड्जी,
“हाडसे भेटीदेन बलिदान आमहाइनी,

तर डाला लागिरी हाडसे लहुइ गिक सहोजी।

⁶ हाड मेरी खाड्सी फुल्बा बलिदेन पापला दोष मेटब तबाला लागिरी फुल्बा बलिगदेरीनोन आताड्नी।’

⁷ जमाहेनसे डाइ चुहड् भिसी भिजी,

‘सहीगो परमेश्वर, डाला बारेरी बचनरी भिबा हड्णोन

हाडसे म्हन्बा अन्छार पूरा लबारी डा खबा मुला।’ ”*

⁸ ख्रीष्टसे डाच्छा चुहड् भिसी सुड्जी, “जन्तुगदेला बलिदेन अन्न बलिगदे ओच्छे बलि फुल्बा ग्लारी खाड्सी पिन्बा जन्तुला बलिदेन पाप मेटब तबाला लागिरी फुल्बा बलि किन्बारी हाड आताड्नी।” चु जम्मान बलिगदे चा मोशादा पिन्बा ठिम अन्छार मुसैनोन चुहड् भिसी सुड्जी।⁹ ओच्छे दोःसी ख्रीष्टसे चुहड् भिसी सुड्जी, “सहीगो, हाडसे म्हन्बा ताम पूरा लबाला लागिरी डा खबा मुला।” लिच्छाला ठिमदा सदनना लागिरी थान्बारी ख्रीष्टसे डाच्छाला ठिमदा भ्याड्जी।¹⁰ परमेश्वरसे म्हन्बा ताम पूरा लबारी येशू ख्रीष्टसे हाडलान लहुइ बलि फुल्जी। चुनोन बलिग्याम य्हाडदा सदनना लागिरी चोखो सहोबा मुला।

¹¹ परमेश्वरला मन्दिररी पूजा लबा जम्मान म्हिगदेसे डाच्छाला ठिम अन्छार सदन परमेश्वरला डाच्छा निसी घरिघरि खाल गिकलान बलि फुल्बा गे लमुला। तर थेहड्बा बलिसे खाइमै पापला दोष मेटब आतमुला।*¹² तर ख्रीष्टसे मी पापगदेला दोष सदनना लागिरी मेटब लबारी हाडलान लहुइदा बलि गिक सहोसी फुल्जी। ओच्छे थे परमेश्वरला दाहिने छ्यापट्टि मुल ठिरी धन्छ्याजी।*¹³ परमेश्वरसे थेला शत्रुगदेदा थेला काड धिरी आथान्तेधोना थे थेरीन भ्रान्सी धन्छ्याला।¹⁴ तिग्दा भिसम बलि गिकग्यामसेन थेसे चोखो सहोबा म्हिगदेदा सदनना लागिरी थेसे तिगै दोष आरेबा सहोबा मुला।

¹⁵ ओच्छे परमेश्वरला आत्मासेनोन चुला बारेरी य्हाडदा चुहड् लसी उन्बा मुला,

¹⁶ “परमप्रभुसे चुहड् भिसी सुड्बा मुला,

लिच्छाला धिनरी थेनीगदेदेन छ्याम लबा छार कबुल चुनोन हिन्ना।

डाइ थेनीगदेला सेमरी डाला ठिम भिसी थान्ना।”*

¹⁷ दोःसी परमप्रभुसे चुहड् भिसी सुड्बा मुला,

“दाहेनसे डाइ थेनीगदेसे लबा पापदेन आज्यबा गेगदे खाइमै आढन।”*

¹⁸ दाहेनसे थेनीगदेला जम्मान पाप माफ तबासे लमा दोःसी थेनीगदेला पापला लागिरी तिगै बलि फुल्आतोः।

परमेश्वरला डाच्छापट्टि निउ

¹⁹ थेतबासेलमा ज्योज्यो आले नाना आडागदे, येशूला कासे लमा य्हाडसे जम्मान भन्दा चोखो ग्लारी निबा आँट याड्बा मुला।²⁰ येशूसे हाडला लहुइ य्हाडला लागिरी बलि पिन्जी। ओच्छे पर्दाग्याम जम्मान भन्दा चोखो ग्लारी निबारी जुकजुकधोना सोबा छार ग्याम ठोड्सी पिन्बा मुला।²¹ परमेश्वरला दिमरी जम्मान अधिकार याड्बा परमेश्वरदा तेन्बा य्हाडला मुल म्हि गिक मुला।²² दाहेनसे य्हाड आज्यबा म्हन्बा तामग्याम चोखो तबादेन चोखो क्युडसे खुसी धाबा लहुइ थोसी ज्यबा सेमदेन पूरा विश्वास लसी परमेश्वरला डामरी निइ।*²³ य्हाडसे लबा आशरी य्हाड याडयोड आतना कोड्सी चिइ। तिग्दा भिसम हाडसे पिन्ना भिसी कबुल लबा परमेश्वर चा विश्वास लखम्बा

* 10:7 भजन ४०:६-८ * 10:11 प्रस्था २९:३८ * 10:12 भजन ११०:१ * 10:16 यर्मि ३१:३३ * 10:17 यर्मि ३१:३४

* 10:22 लेवी ८:३०; इज ३६:२५

परमेश्वर हिनना। ²⁴ य्हाडसे गिकसेम गिकदा माया लबादेन ज्यबा गे लबाला लागिरी आँट खबा खाल्ला ताम जे लइ। ²⁵ कोइ कोइ महिला संगतीरी आनिबा बानी मुला। तर य्हाड चा संगतीरी निबा आख्लागे। बरु प्रभु दोःसी फेपखबा धिन खबारी छ्याइबा मुला भिबा ताम घोसी गिकसेम गिकदा झन आँट पिन्गे।

²⁶ तिग्दा भिसम सत्य ताम था याड्सीनोन चुदे दोःसी पाप लबाला लबान लजी भिसम य्हाडसे लबा पापला दोष मेटब लबारी अर्गु खजिबै बलिदान आरे। ²⁷ तर थेहड्बा पाप लबागदे चा परमेश्वरला शत्रुगदेदा नाश लबा ल्हानान घेन मेदेन परमेश्वरसे पिन्बा लोड्बा खबा सजाय भ्रान्सी चितोःबा जे मुला।* ²⁸ चुदे खाल्लै महिसे परमेश्वरसे मोशादा पिन्बा ठिम आड्यानना भ्रबा ताम महि न्ही सोमसे म्हाड्सी पाड्जी भिसम थे ठिम आड्यानबा महिदा तिगै दया आउन्ना साइतोःबा मुबा।* ²⁹ थेहड् भिसम परमेश्वरला झादा बिरोध लबा महिसे झन गाते ल्हाना सजाय याड्ला। तिग्दा भिसम थेसे हाडदा पापग्याम फेसी चोखो तना लबादेन परमेश्वरसे लबा कबुलदा पूरा लबा ख्रीष्टला कादा गे आखेल्बा सहे स्होबा मुला, ओच्छे दयामाया पिन्बा परमेश्वरला आत्मादा बिरोध लबा मुला।* ³⁰ तर चुहड् भिसी सुड्बा परमेश्वरदा य्हाडसे डोसेबा मुला, “बदला किन्बा गे डाला हिनना, डाइ थेनीगदेसे लबा गे अनछारला सजाय पिन्ना”। ओच्छे दोःसी, “परमप्रभुसे हाडला महिगदेला ठीक निसाफ लला” भिसीएनोन सुड्बा मुबा।* ³¹ पाप गे लबागदे छोन्बो परमेश्वरला छ्यारी परब तबा चा लोड्बा खबा ताम हिनना।

³² एनीगदेसे येशू ख्रीष्टला बारेरी लोपबा डाच्छाला धिनगदेदा थाम्लेःगो। जमा धुइरी एनीगदेसे ल्हानान दुख नातोःसै विश्वासरी कोड्सी चिबा मुबा। ³³ खाइमाम एनीगदेसे जम्मान महिला ओन्छाडरी दुखदेन हेला नाजी। ओच्छे खाइमाम एनीगदेसे दुखरी परब तबागदेदा हो लजी। ³⁴ एनीगदेसे झ्याल्खानरी परब तबागदेदा हो लजी। ओच्छे हाडदेन छ्याम मुबा जम्मान धन सम्पत्ति ब्यन्माएनोन एनीगदेसे ताड्सी ताड्सी नाजी। तिग्दा भिसम जुकजुकधोना चिबा अझ घेन सम्पत्ति हाडदेन छ्याम मुला भिबा ताम एनीगदेदा था मुबा।

³⁵ थेतबासेलमा एनीगदेसे विश्वासग्याम जुन आँट याड्बा मुला थे थाख्लागो। चुग्यामसेन एनीगदेसे घेन इनाम याड्ला। ³⁶ परमेश्वरदा सेम निबा गे लबारीदेन परमेश्वरसे पिन्ना भिसी कबुल लबा तामगदे याड्बाला लागिरी भ्रान्सी चितोःबा मुला। ³⁷ तिग्दा भिसम बचनरी चुहड् भिसी भ्रिबा मुला,

“दाहेनसे फेपखबा चा फेपखनोन खला,
थेसे घइना आल।* ”

³⁸ तर डाइ महन्बा अनछार भ्रबा डाला महिगदे चा विश्वासग्याम सोला,
ओच्छे चुदे थेनीगदे न्हडला खाल्लैसे विश्वास लबा ख्लाजी भिसम
थे म्हाड्सी डा आताड्।”

³⁹ य्हाड चा विश्वास लबा ख्लासी नाश तबा महिगदे न्हडला आहिन, तर विश्वास लसी थाबा याड्बा महिगदे न्हडला हिनना।

11

विश्वास

¹ विश्वास लबा चा आश लबा ताम याड्ला भिसी दुक्क तबादेन आम्राड्बा तामरी पूरान भर लबा हिनना। ² तिग्दा भिसम थेनीगदेसे विश्वास लबासे लमान ओन्माला महिगदेदा परमेश्वरसे हाडला महि स्होजी।

³ परमेश्वरसे हाडला बचनग्यामसे चु जम्बुलिड स्होजी भिबा ताम विश्वासग्याम य्हाडसे था याड्बा मुला। थेहड् लसी य्हाडला मीसे आम्राड्बा सहेगदेग्यामसेन म्हाड्बा सहेगदे स्होजी।*

* 10:27 यशै २६:११ * 10:28 वयव १७:६; १९:१५ * 10:29 प्रस्था २४:८ * 10:30 वयव ३२:३५-३६ * 10:37 हब २:३-४ * 11:3 उत्प १:१; भजन ३३:६, ९; यूह १:३

4 विश्वासग्यामसेन हाबिलसे परमेश्वरदा कथिनसे भन्दा ज्यबा बलि फुल्जी। विश्वासग्यामसेन हाबिलदा परमेश्वरसे हाडदा सेम निबा म्हि सहोजी। ओच्छे थेसे फुल्बा बलि परमेश्वरदा सेम निजी। थे सिसी निसैनोन थेला विश्वासग्याम थेसे अझ य्हाडदा ल्हानान ताम लोप्वान मुला।*

5 विश्वास लबासे लमान हनोक आसिनी। तर थेदा छोनबोन स्वर्गरी भोजी। ओच्छे थेदा खालैसेन आस्यापनी। तिग्दा भिसम परमेश्वरसे थेदा थीसी भोर्बा मुबा। थेदा परमेश्वरसे थीसी भोर्बा भन्दा डाच्छा थेसे परमेश्वरदा ताडना लबा ताम चुग्यामसेन था याड्बा मुला।* 6 विश्वास आलना खालैसेन परमेश्वरदा ताडना लबारी आखम। तिग्दा भिसम परमेश्वर मुबा ग्लारी खबा म्हिसे परमेश्वर मुला भिबा तामदेन थेदा म्हाड्बा म्हिदा इनाम पिन्ना भिसी विश्वास लतोःला।

7 विश्वासग्यामसेन नोआसे थानोन आरेबा लिच्छा तसेला आम्राड्बा तामला बारेरी परमेश्वरसे कुल्बा अन्छार थेसे घेन पानी जहाज गिक सहोजी। ओच्छे थे पानी जहाज न्हडरी थेसे हाडला म्हेमेगदेदा थान्सी जोगब लजी। चुहड् लसी थेसे विश्वासग्यामसेन जम्बुलिडला म्हिगदेला दोष उन्जी। ओच्छे थे हाडला विश्वासग्याम परमेश्वरदा सेम निबा म्हि दोजी।*

8 विश्वास लबासे लमा अब्राहामसे परमेश्वरसे कुल्बा ताम ड्यानजी। ओच्छे थेदा पिन्ना भिसी कबुल लबा य्हुल्सारी परमेश्वरसे थेदा निउ भिसी कुल्जी। तर हाड खानडपट्टि निबान मुला भिबा था आरेसै थे हाडला य्हुल्सा ख्लासी निजी।* 9 विश्वास लबासे लमा अब्राहाम परमेश्वरसे पिन्ना भिसी कबुल लबा य्हुल्सारी निसी विदेशी हड् लसी पाल फ्रेड्सी चिजी। थेहड् लसीन परमेश्वरसे इसहाकदेन याकूबदानोन थे य्हुल्सा पिन्ना भिसी कबुल लजी। ओच्छे थेनीगदेएनोन अब्राहाम हड् लसीन चिजी।* 10 तिग्दा भिसम अब्राहामसे परमेश्वर हाडसेन म्हनसी जुकजुकधोना चिबा जगथोरी सहोबा शहरदा भ्रान्सी चिबा मुबा।

11 विश्वासग्यामसेन दिड निसी जिन्सैनोन अब्राहाम आबा दोजी। साराएनोन कोला आतबाधोनान खुड दोसी जिन्बा मुबा। तसैनोन परमेश्वरसे पिन्ना भिसी लबा कबुलथोरी अब्राहामसे पूरान विश्वास लसी चिजी।* 12 अब्राहाम ल्हानान खेप्वबा दोबासे लमा थेग्याम तिगै आशोनोन आरेमुबा। तसैनोन थे म्हि गिकग्यामसेन मुला सारदेन समुन्द्रला बालुवा तेनोन झ्यानोन आखम्बा सन्तान तजी।*

13 परमेश्वरसे पिन्ना भिसी कबुल लबा सहेगदे आयाड्सैनोन चु जम्मान म्हिगदेसे सिबा धुडधोनाएनोन विश्वास लबा आख्लानी। तसैनोन थेनीगदेसे थे सहेगदेदा थारेड्ग्यामसेन म्राड्सी सेमरी किन्जी। ओच्छे थेनीगदेसे हाड चा चु जम्बुलिडरी विदेशीदेन परदेशी हिन्ना भिसी म्हनजी।* 14 चुहड्बा ताम लबा म्हिगदेसे हाडलान य्हुल्सा म्हाड्बान मुला भिबा ताम प्रस्टन घोना लमुला। 15 थेनीगदेसे डाच्छा हाडसे ख्लासी खबा य्हुल्सादा ढन्सी आचिनी। चुदे थे य्हुल्सादा ढन्बा हिन्सम थेनीगदे दोःसी थे य्हुल्सारी निम्याड्सेला मुबा। 16 तर थेनीगदेसे चा चु भन्दान ज्यबा स्वर्गला य्हुल्सा म्हाड्बा मुबा। थेतबासेलमा थेनीगदेला परमेश्वर हिन्ना भिसी सुड्बारी परमेश्वर आपेःनी। तिग्दा भिसम परमेश्वरसे थेनीगदेदा पिन्बाला लागिरी शहर गिक सहोसी जिन्बा मुबा।

17-18 परमेश्वरसे अब्राहामला सेम च्याबा धुडरी विश्वाससे लमान अब्राहामसे हाडला झा इसहाकदा बलि फुल्बारी तयार तजी। परमेश्वरसे अब्राहामदा “इसहाकग्यामसेन एला वंश बढब तला” भिसी कबुल लबा मुबा। तसैनोन अब्राहामसे विश्वासग्यामसेन हाडला गिक जेन झादाएनोन बलि फुल्बारी तयार तजी।* 19 तिग्दा भिसम परमेश्वरसे सिबाग्यामएनोन सोना लखम्ला भिबा अब्राहामदा विश्वास मुबा। ओच्छे अब्राहामसे विश्वास लबा अन्छारनोन हाडला झा इसहाकदा सिबाग्याम सोबा हड्बान दोःसी याड्जी।

20 विश्वाससे लमान इसहाकसे याकूबदेन एसावदा लिच्छा तसेला तामला बारेरी मोलम पिन्जी।*

* 11:4 उत्प ४:३-१० * 11:5 उत्प ५:२१-२४ * 11:7 उत्प ६:१३-२२ * 11:8 उत्प १२:१-५ * 11:9 उत्प ३५:२७

* 11:11 उत्प १८:११-१४; २१:२ * 11:12 उत्प १५:५; २२:१७; ३२:१२ * 11:13 उत्प २३:४; १ इति १९:१५; भजन ३९:१२

† 11:17-18 हागारपट्टिला झा मुसैनोन अब्राहामसे इसहाकदा गिक जेन झा भिसी भिबा मुबा। तिग्दा भिसम इसहाक चा परमेश्वरसे कबुल लबा अन्छार न्हवा मुबा भिसम हागारपट्टिला झा चा अब्राहामला सेमसे म्हनबा अन्छार न्हवा मुबा। * 11:17-18 उत्प २२:१-१४ * 11:20 उत्प २७:२७-२९, ३९-४०

21 विश्वाससे लमान याकूबसे सिबारी छ्याइबा धुइरी योसेफला झागदेदा मोलम पिन्जी। ओच्छे कडीला भररी राप्सी याकूबसे परमेश्वरला जयजयकार लजी।*

22 विश्वाससे लमान योसेफसे सिबा धुइरी इस्राएलीगदेसे मिश्र यहुल्सा ख्लाबा तामला बारेरी पाइबा मुबा। थेसे थेनीगदेदा लिच्छा मिश्र यहुल्सा ख्लाबा धुइरी हाडला नखुगदे तिग लतोःला भिबा तामएनोन कुल्जी।*

23 विश्वाससे लमान मोशाला आबा आमासे थे न्हमाहेन्से ला सोमधोना छुम्सी थान्जी।† थेनीगदेसे हाडला झा ल्हानान जेबा म्राइजी, ओच्छे ग्लेसे कुल्बा ताम आइयान्बारीनोन आलोइनी।*

24 विश्वाससे लमान मोशासे हाड घेन तमाहेन्से फारो ग्लेला झामेला झा दोबारी आइयान्नी।*

25 पाप लसी छिन्नड ताइसी चिबा भन्दा मी बरु थेसे परमेश्वरला म्हिगदेदेन छ्यामनोन दुख नाबा सेम लजी। 26 मिश्र यहुल्साला जम्मान धन सम्पत्ति भन्दा बरु थेसे थार्बा पिन्बा ख्रीष्टला लागिरी दुख नाबा चा घेन सम्पत्ति म्हनजी। तिग्दा भिसम थेसे परमेश्वरसे पिन्बा इनामदा च्यासी चिबा मुबा। 27 विश्वाससे लमान ग्लेला बोमो म्राइसी आलोइनान थेसे मिश्र यहुल्सा ख्लाजी। ओच्छे म्राइआखम्बा परमेश्वरदाएनोन म्राइबा हइ लसीन थे भइसी चिजी।* 28 विश्वाससे लमान मोशासे नाश लबा स्वर्गदूतसे इस्राएलीगदेला थेबा झागदेदा थासाइगै भिसी बलिला का इस्राएलीगदे जम्मालान म्रापरी फोर्पुइजी। ओच्छे मिश्र यहुल्साग्याम फेसी खबा धिनदा ढन्सी धइबा चाड धइपुइजी।*

29 विश्वाससे लमान इस्राएलीगदेसे सरी भ्रबा हइ लसी वाला समुन्द्ररी भ्रसी क्याम्सडपट्टि निजी। मिश्र यहुल्साला म्हिगदेएनोन थेनीगदे हइ लसीन निबारी छ्याइमा डुबब तसी सिजी।*

30 विश्वाससे लमान इस्राएलीगदेसे निसरेधोना यरीहो शहरला पर्खाल क्युर्मा फुपजी।*

31 विश्वाससे लमान राहाब भिबा बेश्या मिडम्हेमे परमेश्वरसे कुल्बा ताम आइयान्बा म्हिगदेदा साइबा धुइरी सोजी। तिग्दा भिसम थेसे थेरी चिबा लबारी निबा इस्राएलीगदेदा मान लबा मुबा।*

32 चु भन्दा ल्हाना डाइ तिग पाइसे? तिग्दा भिसम गिदोन, बाराक, शिमशोन, यिप्ता, दाऊददेन शमूएल ओच्छे स्यहान्दो अगमवक्तागदेला बारेरी पाइबाला लागिरी डादा धुइ अरे।* 33 विश्वाससे लमान थेनीगदेसे जम्मान यहुल्सागदेदा ढासी शासन लजी। थेनीगदेसे ठीक निसाफ लसी परमेश्वरसे पिन्ना भिसी कबुल लबा तामगदेएनोन याइजी। विश्वाससे लमान थेनीगदेसे च्यानगदेला सुड मुसी पिन्जी।* 34 थेहइ लसीन थेनीगदेसे मेला ल्हामदा साइजी, तरवारग्यामएनोन जोगब तजी। ओच्छे थेनीगदे कमजोर मुबा, तर भइबा तजी। थेनीगदे लडाइ लमा आलोइनी ओच्छे अर्गु यहुल्साला जम्मान शत्रुगदेदा भ्रेना लजी।* 35 विश्वाससे लमान मिडम्हेमेगदेसे हाडला म्हिगदेदा सिबाग्याम दोःसी सोबा स्यापजी।*

स्यहान्दोगदेसे चा सिमाहेन्से अइ जयबा जुनी याइबाला लागिरी मिश्र यहुल्साग्याम फेबा सेम आलना ल्हानान दुख नाजी। 36 कोइ कोइदा बेइज्जत लसी कोर्से तोजी, स्यहान्दोगदेदा चा च्याल्दासे खीसी झ्याल्खानरी झाइजी।* 37 म्हिगदेसे थेनीगदेदा युडबासे तोजी, आरासे क्लेजी, तरवारसे ताम्जी। ओच्छे थेनीगदेसे रादेन ग्युला ढि क्वान्जी। थेनीगदे प्राडबो, स्यहान्दोला हेला नाबान दुख नासी क्यारमार कोर्सी भ्रतोःजी।* 38 चु आज्यबा जम्बुलिड थेनीगदेला लागिरी गे खेल्बाधोनाला आरेबा। थेनीगदे तोडतोडबा ग्लादेन गडगदे ओच्छे ऊगदेरी क्यारमार कोर्सी भ्रतोःजी।

39 थेनीगदे जम्मासेन हाडसे लबा विश्वासला लागिरी ल्हानान मान याइजी। तर परमेश्वरसे पिन्ना भिसी कबुल लबा स्यहगदे चा आयाइनी। 40 तिग्दा भिसम यह्हाडदेन छ्याम जे थेनीगदे तिगै दोष आरेबा म्हि दोगै भिसीन परमेश्वरसे यह्हाडला लागिरी डाच्छान जयबा स्ये स्योसी थान्बा मुबा।

* 11:21 उत्प ४७:३१-४८:२० * 11:22 उत्प ५०:२४-२५; प्रस्था १३:१९ † 11:23 मिश्र यहुल्साला ग्लेसे इस्राएलीगदेला झा न्हजी भिसम साइगो भिसी कुल्बा मुबा। * 11:23 प्रस्था १:२२; २:२ * 11:24 प्रस्था २:१०-१२ * 11:27 प्रस्था २:१५ * 11:28 प्रस्था १२:२१-३० * 11:29 प्रस्था १४:२१-३१ * 11:30 यहो ६:१२-२१ * 11:31 यहो २:१-२१; ६:२२-२५ * 11:32 न्याय ६:११-३२; ४:६-५:३१; ११:१-१२:७; १३:२-१६:३१; १ शमू १:१-२५:१; १ शमू १६:१-१ राजा २:११ * 11:33 दानि ६:१-२७ * 11:34 दानि ३:१-३० * 11:35 १ राजा १७:१७-२४; २ राजा ४:२५-३७ * 11:36 १ राजा २२:२६-२७; २ इति १८:२५-२६; यर्मि २०:२; ३७:१५; ३८:६ * 11:37 २ इति २४:२१

12

परमेश्वरला तहरी चिउ

1 य्हाडला क्युर्सीन चुदे ल्हाना विश्वास लबा म्हिगदे मुबासे लमा य्हाडदा ग्यामरी कोल्ना लबा ल्हानान सहेगदेदेन य्हाडदा सजिलोसे कोल्ना लबा पापगदेदा य्हाडसे भ्याड्गे। ओच्छे य्हाड धोतोःबा ग्लाधोना आधोतेधोना ढुकक तसी भ्रइ। 2 य्हाडला विश्वास शुरु लबादेन पूरा लबा येसूदा च्यासी भ्रइ। लिच्छा याड्बा ताड्बा तामला लागिरी थेसे बेइज्जत तसै तिगै वास्ता आलना क्रुसरी दुख नाजी। दान्दे थे परमेश्वरला दाहिने छ्यापट्टिला मुल ठिरी धन्छ्याबा मुला।* 3 एनीगदेदा सुर्दा आतबादेन सदन विश्वासरी चिबाला लागिरी पापीगदेसे बेइज्जत लमा नाबा येसूदा च्यागो।

4 एनीगदे पापला शक्तिगदेदेन छ्याम छेमा सिबाधोना मी तबा आरे। 5 परमेश्वरसे एनीगदेदा हाडला झागदेदा हड् लसी बचनरी चुहड् लसी अर्ती पिन्बा ताम म्लेःजी?

“डाला झा, परमप्रभुसे लबा तहरी भ्रउ।

ओच्छे थेसे बड्मा दुख थाम्हन्गो।

6 तिग्दा भिसम जुन म्हिदा परमप्रभुसे माया लला थेदा हाडला तहरी थान्मुला।

ओच्छे हाडलान कोलागदे भिसी म्हन्बा जम्मादान थेसे सजाय पिन्मुला।”*

7 एनीगदेसे नाबा सजाय चा आबाला तहरी चिबा हिन्ना भिसी म्हन्गो। एनीगदेसे नाबा सजायग्यामसे परमेश्वरसे एनीगदेदा हाडलान कोलागदेदा हड् लसी व्यवहार लबा मुला भिबा ताम उन्बा मुला। हाडला आबाग्याम तोबा ग्याड्बा आनाबा कोलागदे खालै मुला? आरे। 8 चुदे जम्मान कोलागदेसे नाबा सजाय एनीगदेसे चा आनानी भिसम एनीगदे हाडलान आबाला कोलागदे आहिन, तर स्य्हान्दोदेन छ्याम ब्रेल्सी न्हबा कोलागदे हिन्ना। 9 चु जे आहिन, य्हाड म्हिला मी आबासे हाडला कोलागदेदा तहरी थान्मुला, ओच्छे कोलागदेसे आबादा मान लमुबा। थेतबासेलमा झन य्हाडसे य्हाडला आत्माला आबा परमेश्वरला तहरी चितोःला। थेहड् लजी भिसम य्हाडसे जुकजुकधोनाला जुनी याड्ला।

10 य्हाड म्हिला आबासे चा य्हाडदा तिगै धिनना लागिरी थेन्से ठीक भिसी म्हन्बा अन्छार तहरी थान्मुला। तर परमेश्वर आबासे सदनना लागिरी य्हाडदा ज्यबा तगै ओच्छे हाड हड्बान तिगै दोष आरेबा दोबाला लागिरी तहरी थान्मुला। 11 सजाय याड्बा धुइरी य्हाडदा सुख आहिन, तर ल्हाना दुख तमुला। तर य्हाड तहरी चिसी पाको दोबागदे परमेश्वरदा सेम निबादेन ज्यबा बानीबेहोर मुबा म्हि दोला।

12 थेतबासेलमा एनीगदेला घेबा यागदे थीगो। ओच्छे कमजोर काड्गदे भड्बा तना लउ।* 13 एनीगदे सोजो ग्यामरी भ्रउ। जमाहेनसे कमजोर म्हिगदे आहिल, तर थेनीगदे ज्यना लसी भ्रखम्ला।*

परमेश्वरदा थाख्लागो भिसी पाड्बा

14 जम्मान म्हिगदेदेन छ्याम ढिक्सी चिबारीदेन परमेश्वरला डाच्छा तिगै दोष आरेबा म्हि दोबारी भड् लउ। तिग्दा भिसम परमेश्वरला डाच्छा तिगै दोष मुसम खालैसेन परमप्रभुदा म्हाड्बारी आखम। 15 च्यागो, खालैनोन परमेश्वरला दयामाया आयाड्बा म्हि थादोगै। आज्यबा सेमग्याम खालैदान छेबा बड्बा तना थालगै, ओच्छे ल्हानान म्हिदा न्होड्ना थालगै। 16 खालैसेन आज्यबा बानीबेहोर थाथोगै। ओच्छे एसाव हड्बान परमेश्वरसे कुल्बा ताम आड्यान्बा म्हि थादोगो। थेसे छाक गिक चबाला लागिरी थेबा झासे याड्तोःबा अधिकारदान चूड्जी।* 17 एनीगदेदा थानोन मुला, लिच्छा थेसे हाडला आबाग्याम मोलम किन्बारी म्हाइजी। ओच्छे क्रासी क्रासी हाडसे डाच्छा चूड्बा अधिकार दोःसी किन्बारी म्हाइजी। तर थेसे आयाड्नी। तिग्दा भिसम थेसे हाडसे लबा आज्यबा गे ख्लाबा मौकान आयाड्नी।*

* 12:2 भजन ११०:१ * 12:6 अय्यूब ५:१७; हितो ३:११-१२ * 12:12 यशै ३५:३ * 12:13 हितो ४:२६ * 12:16 उत्प २५:२९-३४ * 12:17 उत्प २७:३०-४०

18 एनीगदे इस्राएलीगदे हड्ड लसी थुर्बारी खम्बा सीनै भिबा गडरी खबा आरे। थेरी मेला ल्हाम थोन्बा मुबा, म्लाड म्लाडबा खसुसे घपबा मुबा, ओच्छे लाबालुडसर खबा मुबा।* 19 इस्राएलीगदेसे बिगुलला घेन काइदेन परमेश्वरसे सुड्बा बचनएनोन थे:बा मुबा। चुहड्बा काइ थे:माहेन्से थेनीगदेसे दाहेन्से दो:सी खाइमै थे:आतो:गै भिसी बिन्ती लबा मुबा। 20 तिग्दा भिसम थेनीगदेदा “चुदे खजिबै जन्तुसे चु गड थुर्जी भिसैनोन थेदा युड्बासे तोसी साइगो” भिसी कुल्बा ताम थेनीगदेसे नाबारी आखम्नी।* 21 मोशाएनोन थे ताम म्राड्सी ल्हानान लोड्बा मुबा। थेतबासेलमा, “डा लोड्सी फितफित धर्बा मुला” भिसी मोशासेनोन पाड्बा मुबा।*

22 तर एनीगदे मी सियोन गडरी खबा मुला। ओच्छे झ्यासीन झ्याबारी आखम्बाधोनाला स्वर्गदूतगदे ताड्सी पोप तसी छोनबो परमेश्वरला स्वर्गला यरूशलेम शहररी खबा मुला। 23 एनीगदे स्वर्गरी मिन भिसी जिन्बा डाच्छा न्हबा परमेश्वरला कोलागदेला सभारी खबा मुला। ओच्छे एनीगदे जम्मान महिला निसाफ लबा परमेश्वर मुबा ग्लारीदेन परमेश्वरला डाच्छा ज्यबा महिगदेला आत्मा मुबा ग्लारीनोन खबा मुला। 24 एनीगदे येशू मुबा ग्लारी खबा मुला। येशूसे चा एनीगदेदा परमेश्वरदेन छ्याम ढिक्ना लबाला लागिरी छार कबुल सहोबा मुला। ओच्छे एनीगदे हाबिलला कासे भन्दा अझ ज्यबा ताम लोपबा का स्वाबा ग्लारी खबा मुला।*

25 होशियार तसी चिउ, एनीगदेसे हाडदेन छ्याम ताम पाड्बा परमेश्वरला ताम ड्यानबारी थाख्लागो। तिग्दा भिसम चु जम्बुलिडला महि मोशासे कुल्बा ताम इस्राएलीगदेसे आड्यानमा सजायग्याम स्योरआम्याड्नी। इन यहाडसे स्वर्गग्याम कुल्बा परमेश्वरला ताम आड्याननी भिसम यहाड खाहड्ड लसी स्योख्म्ला? 26 परमेश्वरसे सीनै गडरी ताम लमा जम्बुलिडनोन य्होड्जी। तर दान्दे परमेश्वरसे चुहड्ड भिसी कबुल लबा मुला, “दाहेन्से अझ तिरेम जम्बुलिड जे आहिन, तर डाइ स्वर्गन य्होड्ना लला।” 27 चु “अझ तिरेम” भिबा तामग्याम जम्बुलिडरी मुबा जम्मान सहेगदे नाश तला भिबा हिन्ना। चु भिबा चा आय्होड्बा सहेगदे चा नाश आत।

28 थेतबासेलमा आय्होड्बा यहुल्सा यहाडसे याड्बासे लमा परमेश्वरदा धन्यवाद पिन्गे। थेहड्ड लसीन परमेश्वरदा सेम निबा गे लसी थेदा सदन मान लबान जयजयकार लइ। 29 तिग्दा भिसम यहाडला परमेश्वर नाश लबा मे हड्डबान मुला।*

13

परमेश्वरदा ताड्ना लबा गे

1 गिकसेम गिकदा ज्योज्यो आले नाना आडादा हड्डनोन सदन माया लउ। 2 डोआसेबा डोन्बोगदेदा मान लबारी थाख्लागो। चुहड्ड लसी डोन्बोदा मान लमा कोइ कोइसे था आयाड्ना स्वर्गदूतदाएनोन मान लबा मुबा।* 3 हाडएनोन झ्याल्खानरी मुबा हड्डबान म्हन्सी झ्याल्खानरी मुबागदेदा वास्ता लउ। ओच्छे हाडलान लहुडरी दुख याड्बा हड्डबान म्हन्सी दुख याड्बागदेदाएनोन वास्ता लउ।

4 ब्याह चा जम्मान महिला ओन्छाडरी ज्यबा ततो:ला। ओच्छे म्रिड हेम्बो न्हडरी खाइमै आज्यबा तबारी आत। तिग्दा भिसम आज्यबा बानीबेहोर थोसी स्युहान्दोला म्रिड हेम्बोदेन छ्याम ब्रेल्सी भ्रबागदेदा परमेश्वरसे सजाय पिन्ना।

5 एनीगदे धन सम्पत्तिला लिच्छा थाभ्रउ, हाडदेन छ्याम जुन सहे मुला थेरीन ताड्सी चिउ। तिग्दा भिसम परमेश्वरसे चुहड्ड भिसी सुड्बा मुला, “डाइ एदा तिगै लसीन आख्ला,

डाइ एदा खाइमै थारेड आथान।”*

6 थेतबासेलमा यहाड ढुकक तसी पाड्गे,

* 12:18 प्रस्था १९:१६-२२; २०:१८-२१; वयव ४:११-१२; ५:२२-२७ * 12:20 प्रस्था १९:१२-१३ * 12:21 वयव ९:१९
† 12:23 “डाच्छा न्हबा परमेश्वरला कोलागदे” भिबा चा परमेश्वरदा डाच्छान विश्वास लबा महिगदे हिन्ना। † 12:24 हाबिलला काग्याम सजाय याड्जी भिसम येशूला काग्याम जम्मान महिसे पापला माफ याड्जी (उत्प ४:११-१२ सहीगो)। * 12:24 उत्प ४:१० * 12:25 प्रस्था २०:२२ * 12:26 हागुँ २:६ * 12:29 वयव ४:२४ * 13:2 उत्प १८:१-८; १९:१-३ * 13:5 वयव ३१:६, ८; यहो १:५

“प्रभुसेन डादा हो लबा मुला,

थेतबासेलमा डा खाइमै आलोङ्।

तिग डादा म्हिसे तिगै लबारी खम्ला? आखम।”*

7 एनीगदेदा परमेश्वरला बचनग्याम लोप्बा मण्डलीदा च्याबा म्हिगदेदा ढन्गो। थेनीगदेला गाते ज्यबा बानीबेहोर मुबा थे घोउ। ओच्छे एनीगदेसेनोन थेनीगदेसे लबा हड्बान विश्वास लउ। 8 येशू ख्रीष्ट मी तिलमा, तिनी ओच्छे सदन गिकनोन मुला। 9 एनीगदेदा था आरेबा खजिबै छार तामगदेसे एनीगदेदा सत्य तामग्याम थाफेगै। चबा थुड्बाला ठिमसे आहिन, तर परमेश्वरला दयामायासे सेमदा भड्ना लबा चा ज्यबा हिनना। चबा थुड्बाला ठिम अन्छार भ्रसी आत्माला लागिरी तिगै फाइदा आरे।

10 यहूदीगदेला चोखो ग्लारी पूजा लबा म्हिगदेदा य्हाडला बलि फुल्बा ग्लारी तिगै चबा अधिकार आरे।† 11 डाच्छाला ठिम अन्छार परमेश्वरला मन्दिररी पूजा लबा मुल म्हिसे पापला लागिरी बलि फुल्बा जन्तुला का पाल न्हडला जम्मान भन्दा चोखो ग्लारी भोर्सी निमुबा। तर थे जन्तु चा शहरग्याम मडग्यार भोर्सी खाड्मुला।* 12 थेतबासेलमा येशूसेनोन ह्हाडलान काग्याम म्हिगदेदा पापग्याम फेसी चोखो सहोबाला लागिरी शहरला मडग्यार निसी सिजी। 13 थेतबासेलमा य्हाडएनोन शहरला मडग्यार येशू मुबा ग्लारी निसी थेसे नाबा हड्बान बेइज्जत नागे। 14 तिग्दा भिसम चु जम्बुलिडरी सदन चिबाला लागिरी य्हाडला शहर आरे। तर य्हाडसे मी लिच्छा खबा शहरला ग्याम च्यासी चिबा मुला।

15 थेतबासेलमा य्हाडसे येशूग्याम परमेश्वरदा सदन जयजयकारला बलि फुल्गे। चु थेला मिन किन्बागदेला सुडग्याम फुलबा बलि हिनना। 16 गिकसेम गिकदा ज्यबा लबारीदेन हो लबारी थाख्लागो। तिग्दा भिसम परमेश्वरदा सेम निबा बलि चुनोन हिनना।

17 एनीगदेसे ह्हाडला मण्डलीदा च्याबा म्हिगदेसे कुल्बा ताम ड्यान्सी थेनीगदेला तहरी चिउ। थेनीगदेला गे चा एनीगदेला आत्मादा वासता लबा हिनना। ओच्छे थेनीगदेसे एनीगदेला लागिरी लबा गेला हिसाब परमेश्वरदा उन्तोःला। एनीगदेसे थेनीगदेला ताम ड्यान्जी भिसी थेनीगदेसे ताड्सी ताड्सी ह्हाडला गे लला। तर थेहड् आलसम थेनीगदेसे दुख ड्हम्ला, ओच्छे एनीगदेला लागिरी तिगै ज्यबा आत।

18 डन्ना लागिरी सदन प्रार्थना लउ। डन्से म्हन्बा अन्छार डन्से तिगै गल्ती लबा आरे भिबा ताम डन्दा पक्का मुला। तिग्दा भिसम सदन ज्यबा गे लबा डन्ना सेम मुला। 19 डा दोःसी एनीगदे मुबा ग्लारी योनान खखमगै भिसी एनीगदेसे डाला लागिरी प्रार्थना लसी पिन्गो भिबा डाला बिन्ती मुला।

प्रार्थना

20 शान्तिला परमेश्वरसे जम्मान ग्युगदेला मुल गोठालो य्हाडला प्रभु येशूदा सिबाग्याम सोना लजी। ओच्छे थेला काग्याम जुकजुकधोना चिबा कबुल पूरा लजी। 21 एनीगदेसे परमेश्वरसे म्हन्बा गे लबाला लागिरी प्रभु येशूग्याम एनीगदेदा जम्मान ज्यबा तामगदेसे प्लिड्ना लगै। ओच्छे परमेश्वरदा सेम निबा गेगदे लबारी खमगै भिसी येशू ख्रीष्टग्याम एनीगदेला सेमरी गे लगै। येशू ख्रीष्टला सदन मानदेन जयजयकार तगै। आमेन।

22 ज्योज्यो आले नाना आडागदे, एनीगदेदा डाला चु बिन्ती मुला, एनीगदेदा आँट पिन्बा चु ताम आछेर्ना ड्यान्गो। डाइ एनीगदेदा ल्हाना ताम भिबा आरे। 23 य्हाडला आले तिमोथीएनोन झ्यालखानग्याम थोन्सी जिन्बा मुला भिबा ताम डाइ एनीगदेदा पाड्ला। थे योनान खजी भिसम डा थेदेन छ्यामनोन एनीगदे मुबा ग्लारी खला। 24 एनीगदेला जम्मान मण्डलीदा च्याबा म्हिगदेदेन परमेश्वरला जम्मान म्हिगदेदा फ्याफुल्ला। इटालिया य्हुल्साला विश्वासीगदेसेनोन एनीगदेदा फ्याफुल्ला भिसी पाड्बा मुला। 25 एनीगदे जम्मानदेन छ्याम परमेश्वरला दयामाया तगै। आमेन।

* 13:6 भजन ११८:६ † 13:10 तिग्दा भिसम थेनीगदेसे डाच्छाला ठिम अन्छार पूजा लबा तामथोरी भर लमुबा। ओच्छे थेनीगदेसे प्रभु येशूथोरी चा भर आलमुबा। य्हाडला लागिरी बलि फुल्बा ग्ला चा येशूला कुस हिनना। * 13:11 लेवी १६:२७

याकूबसे भिबा चिठी चु चिठीला बारेरी पाड्तोःमा

भिबा म्हि: येशूला आले याकूबसे भिबा मुबा (याकूब १:१, मत्ती १३:५५, मर्कूस ६:३)।

भिबा ग्ला: यरूशलेम शहररी भिबा मुबा।

भिबा साल: ओस्पन ईश्वी संवत् ६० (विक्रम संवत् ११७) सालरीक्यार भिबा मुबा। तर कोड कोड बाइबल विद्वानगदेसे ईश्वी संवत् ५० (विक्रम संवत् १०७) साल भन्दा डाच्छा भिबा मुबा भिसी पाड्बा मुला। थेतबासेलमा चु चिठी छार कबुलला जम्मान भन्दा डाच्छा भिबा किताब तखमुला।

खाल्दा भिबा: जम्बुलिडला ग्ला ग्लारी ससा बडबड तसी चिबा येशूदा विश्वास लबा यहूदी म्हिगदेदा भिबा मुबा।

चु चिठीरी विश्वास लबागदे खाहड् लसी भ्रतोःला भिसी विश्वास लबागदेदा तोःबा ज्ञान बुद्धिदेन मण्डलीदा च्याबा महिला बारेरी अर्ती पिन्बा मुला। चु अर्ती पिन्मा याकूबसे थरी थरीला उखानगदे पाड्बा मुला। ओच्छे विश्वास लबागदेसे थोतोःबा बानीबेहोरला बारेरी चुहड् भिसी भिबा मुला। फ्युकपोदेन प्राडबो भिसी खालैला ली च्यासी गे थालउ, ज्यबा व्यवहार लउ, खालैदा लेबाफेबा थालउ, डाह थालउ, खालैदा बिरोध थालउ, महिला तामगन थालउ, घमण्ड थालउ, जस्तोन दुख तसै नागो ओच्छे प्रार्थना लउ।

चु चिठीरी विश्वास लबा जे आहिन, तर विश्वास लबा अन्छारला गेएनोन लतोःला भिसी पाड्बा मुला।

मुल तामगदे

फ्याफुल्बा १:१

विश्वासदेन ज्ञान बुद्धि १:२-८

फ्युकपोदेन प्राडबो १:९-११

दुख नाबादेन सेम च्याबा १:१२-१८

बचन ड्यानसी थे अन्छारला गे लउ १:१९-२७

ली च्यासी गे थालउ २:१-१३

विश्वास अन्छारला गे २:१४-२६

सुड तहरी थानगो ३:१-१८

जम्बुलिडला स्हेगदेदेन विश्वास लबागदे ४:१-५:६

चिठीला थुमरी भिबा तामदेन अर्गु अर्तीगदे ५:७-२०

याकूबसे भिबा चिठी

1 लाससो, परमेश्वरदेन प्रभु येशू ख्रीष्टला गे लबा डा याकूबग्याम जम्बुलिडला ग्ला ग्लारी ससा बडबड तसी चिबा ख्रीष्टदा विश्वास लबा च्युक न्ही वंशला म्हिगदेदा[†] फ्याफुल्बा।*

विश्वासदेन बुद्धि

2 डाला ज्योज्यो आले नाना आडागदे, एनीगदेशोरी थरी थरीला आपत विपत खमा चु ताड्तोःबा ताम हिन्ना भिसी म्हन्गो। 3 तिग्दा भिसम चुहड्बा दुख नामाहेन्से एनीगदेला विश्वासग्याम अझ एनीगदेसे घेन घेन दुख नाखम्ला भिबा ताम एनीगदेदा थानोन मुला। 4 थेतबासेलमा एनीगदेशोरी खबा जम्मान दुख पूरान नागो। चुहड् लजी भिसम एनीगदे जस्तोन दुख तसैनोन नाखम्बा पाको म्हि दोला।

† 1:1 “च्युक न्ही वंशला म्हिगदे” भिबा चा यहूदी हिन्ना। तर याकूबसे पाड्बा चु ताम चा यहूदीगदेला लागिरी जे आहिन, ख्रीष्टदा विश्वास लबा जम्मान म्हिगदेला लागिरी हिन्ना। * 1:1 मत्ती १३:५५; मर्कू ६:३; मुल १५:१३; गला १:१९

5 तर चुदे एनीगदे न्हडरी खालैदा ज्ञान बुद्धि आरेसम थेसे आछेर्ना पिन्बा परमेश्वरदेन छ्याम हीगो। ओच्छे परमेश्वरसे थेदा पिन्ना। 6 तर थे म्हिसे तिगै शङ्का आलना परमेश्वरग्याम याड्ला भिबा विश्वास लसी हीगै। शङ्का लबा म्हि चा लाबासे रेःना लबा समुन्द्रला छाल हड्बान हिन्ना। 7 थेहड्बा शङ्का लबा म्हिसे चा परमप्रभुग्याम तिगै सहे याड्ला भिसी थाम्हन्गो। 8 तिग्दा भिसम थेहड्बा सेम क्लाड्बा म्हिसे चा लबारी म्हाड्बा खजिबै गे पूरा लबारी आखम।

प्राडबोदेन फ्युकुपो

9 प्राडबो ज्योज्यो आले नाना आडागदे, एनीगदे ताड्गो। तिग्दा भिसम परमेश्वरसे एनीगदेदा घेन म्हि सहोबा मुला। 10 ओच्छे फ्युकुपो ज्योज्यो आले नाना आडागदेएनोन ताड्गो, तिग्दा भिसम एनीगदेला धन सम्पत्ति परमेश्वरला डाच्छा तिगै आहिन। तिग्दा भिसम फ्युकुपो म्हि चा हिला म्हेन्दो हड्बान सम्सी निला। 11 तिग्दा भिसम खरेडी तमा धिनीसे क्रोसी म्हेन्दोला दोड स्याड्सी निला। ओच्छे ओते जेबा म्हेन्दो ताड्सी नाश तला। थेहड् लसीन फ्युकुपो म्हिएनोन हाडला गेरी कोल्ना कोल्नान नाश तला।*

12 जस्तोन दुख तसैनोन नासी चिखम्बा म्हि चा परमेश्वरग्याम मोलम याड्बा म्हि हिन्ना। थेहड्बा दुख नासी जिन्माहेन्से थेसे जुकजुकधोनाला जुनी याड्बा इनाम याड्ला। थे इनाम चा परमेश्वरसे हाडदा माया लबा म्हिगदेदा पिन्ना भिसी कबुल लबा मुला।

13 परमेश्वरसे खालै महिला सेम च्यामा, थे म्हि फसब तजी भिसम थेसे डादा परमेश्वरसे फसब लजी भिसी थापाड्गै। तिग्दा भिसम परमेश्वर हाडएनोन आज्यबा तामरी फसब आत। ओच्छे म्हिदाएनोन आज्यबा तामरी फसब आल। 14 तर जम्मान म्हि हाडलान आज्यबा सेमसे लोभ उन्सी फसब तमुला। 15 हाडलान आज्यबा सेमसे लमा पाप थोन्ना। ओच्छे थे पाप पूरान बढब तमाहेन्से नाश लला।

16 थेतबासेलमा डाला सेम निबा ज्योज्यो आले नाना आडागदे, एनीगदेसे हाडसे हाडदान धोका थापिन्गो। 17 यहाडसे याड्बा जम्मान ज्यबादेन चोखो मोलमगदे चा मुला लनी धिनी सहोबा यहाडला परमेश्वर आबाग्यामसेन खमुला। ओच्छे घरिघरि पोसी चिबा क्रिप हड् लसी परमेश्वर खाड्मै आपो। 18 परमेश्वरसे हाडलान सेमसे सत्य बचनग्याम यहाडदा हाडला म्हि सहोजी। तिग्दा भिसम परमेश्वरसे सहोबा जम्मान सहेगदे न्हडरी यहाडदा चा थेसे हाडलान लागिरी धम्जी।

परमेश्वरला बचन ड्यान्सी थे अन्छारला गे लउ

19 थेतबासेलमा सेम निबा डाला ज्योज्यो आले नाना आडागदे, एनीगदेसे हाडला ताम पाड्बा भन्दा डाच्छा ज्यना लसी ड्यान्गो। ओच्छे योना बोमो थाखउ भिबा ताम एनीगदे जम्मासेन घोउ। 20 तिग्दा भिसम महिला बोमोसे परमेश्वरसे म्हन्बा अन्छारला गे खाड्मै लबारी आखम। 21 थेतबासेलमा थेहड्बा जम्मान आज्यबा बानीबेहोरदेन नड्बा ताम ख्लागो। ओच्छे परमेश्वरसे एनीगदेला सेमरी थान्बा बचनदा सोजो तसी सदन थोसी भ्रउ। चुनोन बचनरी एनीगदेदा थार्ना लबा शक्ति मुला।

22 एनीगदेसे चु बचन ड्यान्बा जे आहिन, बचन अन्छार गेएनोन लउ। तर बचन ड्यान्सी जे हाडसे हाडदान धोका थापिन्गो। 23 खालै म्हिसे बचन चा ड्यान्सी बचन अन्छार गे आलनी भिसम थे म्हि चा ऐनारी ली च्याबा म्हि हड्बान हिन्ना। 24 थेसे ऐना च्यातेधोना जे हाडला ली चुहड्बा मुला भिसी था याड्मुला। तर ऐना च्यासी निमाहेन्से थेसे हाड खाहड्बा मुला भिबा ताम तुरुन्तन म्लेःला। 25 तर जुन म्हिसे थार्ना लबा परमेश्वरला ठिम अन्छार सेम लसी ड्यान्सी भ्रला, थेसे परमेश्वरला बचन आम्लेःना गेएनोन लला। थेहड्बा म्हिदा चा हाडसे लबा जम्मान गेरी परमेश्वरसे मोलम पिन्ना।

26 चुदे खालैसे हाडसे हाडदान डा परमेश्वरदा तेन्बा म्हि हिन्ना भिसी भिला, तर हाडला सुड चा तहरी आथान्नी भिसम थेसे हाडसे हाडदान धोका पिन्बा हिन्ना। थेतबासेलमा थेसे परमेश्वरदा तेन्बा ताम तिगै गे आखेल्बा तला। 27 परमेश्वर आबादा सेम निबा चोखोदेन सत्य तेन्बा ताम चा दुखरी

* 1:11 यशै ४०:६-७

परब तबा हेम्बो सिबा म्रिडम्हेमेगदेदा हो लबादेन टुहुरा कोलागदेदा सयार लबा ओच्छे जम्बुलिडला जम्मान आज्यबा तामगदे ख्लाबा हिन्ना।

2

ली च्यासी गे थालउ

1 डाला ज्योज्यो आले नाना आडागदे, एनीगदेसे य्हाडला जम्मान भन्दा घेन य्हालदेन शक्ति मुबा प्रभु येशू ख्रीष्टदा विश्वास लबासे लमा एनीगदेसे खालैला ली च्यासी गे थालउ। 2 चुदे एनीगदे हुप तसी प्रार्थना लबा ग्लारी ज्यबा ज्यबा क्वानदेन म्हरला च्याप क्वान्बा फ्युकुपो म्हिदेन भाक्टा भोक्टो क्वान क्वान्बा प्राडबो म्हि खबा धुइरी 3 एनीगदेसे ज्यबा ज्यबा क्वान क्वान्बा फ्युकुपो म्हिदा चा मान लसी, “तोर ठिरीन धन्छ्यागो” भिबा, तर प्राडबो म्हिदा चा “थेरीन राप्सी चिसै चिउ, सरीन चिसै चिउ” भिसी पाङ्जी भिसम, 4 एनीगदेसे हाड हाड न्हडरीन ली च्यासी गे लबा आहिन? एनीगदेसे चुहड्बा गे लमाहेन्से तिग एनीगदे पापी सेम थोसी निसाफ लबा म्हि आदोनी?

5 डाला सेम निबा ज्योज्यो आले नाना आडागदे ड्यान्गो, तिग परमेश्वरसे जम्बुलिडला प्राडबोगदेदा विश्वासरी फ्युकुपो दोना लसी हाडला य्हुल्सारी वाड्म्याड्बा हक पिन्बारी धम्बा आहिन? चुनोन य्हुल्सा परमेश्वरसे हाडदा माया लबागदेदा पिन्ना भिसी कबुल लबा आहिन? 6 तर एनीगदेसे प्राडबोगदेदा हेला लमुला। तिग फ्युकुपोगदेसे एनीगदेदाएनोन दुख आपिन्मुला? थेनोन फ्युकुपोगदेसे एनीगदेदा अदालतरी आभोर्मुला? 7 तिग येशू ख्रीष्टला मिन लसी एनीगदेदा थान्बा मिनना बेइज्जत लबा थेनोन फ्युकुपोगदे आहिन?

8 चुदे एनीगदेसे “हाडला खिमजेमगदेदा हाडदा हड्दोन माया लउ” भिसी बचनरी भिबा परमेश्वरला य्हुल्साला मुल ठिम अन्छार पक्कान भ्रजी भिसम एनीगदेसे ज्यबा गे लबा हिन्ना।* 9 तर एनीगदेसे प्राडबोदेन फ्युकुपोला ली च्यासी गे लजी भिसम एनीगदेसे पाप लबा हिन्ना। ओच्छे परमेश्वरला ठिमसेनोन एनीगदेला दोष उन्ना। 10 तिग्दा भिसम खालै म्हिसे परमेश्वरला ठिम न्हडरी मुबा ताम गिक जे आड्यान्सैनोन ठिमरी मुबा जम्मान तामला दोष थेशोरी खला। 11 तिग्दा भिसम “स्य्हान्दोदेन छ्याम ब्रेल्सी थाभ्रउ” भिसी सुड्बा परमेश्वरसेन “म्हिएनोन थासाइगो” भिसी सुड्बा हिन्ना। थेतबासेलमा स्य्हान्दोदेन छ्याम ब्रेल्सी आभ्रसैनोन म्हि चा साइजी भिसम एनीगदे परमेश्वरला जम्मान ठिम आड्यान्बा म्हि दोला।* 12 थेतबासेलमा एनीगदेसे चु ताम ढन्गो, एनीगदेसे पाड्बा तामदेन एनीगदेसे लबा गेग्याम फेबा ठिमसेन एनीगदेला निसाफ लला। 13 तिग्दा भिसम स्य्हान्दोदा दया आलबा म्हिदा परमेश्वरसेनोन निसाफ लबा धुइरी थेदा दया आल। तर स्य्हान्दोदा दया लबा म्हिदा परमेश्वरसेनोन दया लला ओच्छे परमेश्वरसे निसाफ लबा धुइरी थे लोड्आतो:।

विश्वास अन्छारला गे

14 च्यागो, डाला ज्योज्यो आले नाना आडागदे, खालै म्हिसे “डाइ विश्वास लबा मुला” भिसी पाड्ला, तर गे चा आलसम थेसे लबा विश्वासला तिग गे? तिग थेहड्बा विश्वाससे थेदा थार्ना लला? 15 चुदे खालै ज्योज्यो आले नाना आडादा चबादेन क्वान्बा तिगै आरे। 16 तर एनीगदे न्हडला खालैसे थेदा “हुक्क तसी निउ ओच्छे ज्यबा चबा क्वान्बा लउ” भिसी थेला ल्हुइदा तो:बा स्हे चा आपिन्नी भिसम एनीगदेसे पाड्बा तामला तिग गे? 17 थेतबासेलमा विश्वास जे लसी आत। तर विश्वास अन्छारला गेएनोन लतो:ला। चुदे विश्वास अन्छार गे आलनी भिसम थेहड्बा विश्वास सिबा हड्बान हिन्ना।

18 तर खालै म्हिसे “एसे विश्वास लमुला, डाइ गे लमुला” भिजी भिसम थेदा डाइ पाड्ला, “लु, दाहेन्से एसे गे आलना एला विश्वास उन्गो। डाइ गे लसी डाला विश्वास एदा उन्ना।” 19 एनीगदेसे परमेश्वर गिक जेन मुला भिसी विश्वास लमुला। थे ज्यबान ताम हिन्ना। थेहड्बा ताम मी म्हड म्हुडसेनोन विश्वास लमुला। तर परमेश्वर म्राड्माहेन्से थेनीगदे यार्मुला।

* 2:8 लेवी १९:१८ * 2:11 प्रस्था २०:१३-१४; वयव ५:१७-१८

20 मूर्खगदे, विश्वास अन्छारला गे आलनी भिसम थेहड्बा विश्वास तिगै गे आखेलुबा तमुला भिसी एनीगदेदा उन्तोःला? 21 य्हाडला म्हेमे अब्राहामएनोन विश्वास अन्छारला गेग्यामसेन परमेश्वरदा सेम निबा म्हि दोबा मुबा भिबा ताम एनीगदेदा था आरे? परमेश्वरसे कुल्बा अन्छारला थेसे हाडलान झा इसहाकदा बलि फुल्बारी बलि फुल्बा ग्लाथोरी थान्जी।* 22 अब्राहामसे विश्वासदेन छ्याम छ्यामनोन गेएनोन लजी। ओच्छे गेग्यामसेन थेला विश्वास पूरा तबा ताम एनीगदेसे म्राड्बा मुला। 23 “अब्राहामसे परमेश्वरदा विश्वास लबासे लमा परमेश्वरसे थेदा हाडदा सेम निबा म्हि हिन्ना भिसी सुड्जी” भिसी परमेश्वरला बचनरी भिबा ताम पूरा तबा मुबा। ओच्छे अब्राहाम परमेश्वरला होएनोन दोजी।* 24 थेतबासेलमा च्यागो, परमेश्वरदा सेम निबा म्हि दोबारी य्हाडसे विश्वास जे आहिन, तर विश्वासदेन छ्याम छ्याम गेएनोन लदोमुला।

25 थेहड् लसीन राहाब भिबा बेश्याएनोन थेला गेग्यामसेन परमेश्वरदा सेम निबा म्हि दोजी भिबा ताम एनीगदेदा थानोन मुला। तिग्दा भिसम थेसे थेरी चिवा लबारी खबा य्हूदीगदेदा क्योड्जी। ओच्छे थे ग्लाला म्हिगदेग्याम जोगब लसी अर्गु ग्यामसे पुड्जी।* 26 आत्मा आरेमाहेनसे म्हि सिबा हिन्ना, थेहड् लसीन विश्वास अन्छारला गे आलनी भिसम थेला विश्वासएनोन सिबा हिन्ना।

3

सुड तहरी थान्गो

1 डाला ज्योज्यो आले नाना आडागदे, एनीगदे न्हडरी ल्हानान स्य्हान्दोदा लोपुबा म्हि थादोगो। तिग्दा भिसम परमेश्वरसे य्हाड स्य्हान्दोदा लोपुबा महिला निसाफ लबा धुइरी य्हाडला ल्हानान ताम म्हाडला भिबा ताम य्हाडदा थानोन मुला। 2 य्हाड जम्मासेन ल्हानान गल्ती लमुला। तर जुन म्हिसे होशियार लसी ताम पाड्ला थे चा पाको म्हि दोला। ओच्छे हाडसे हाडदान तहरी थान्बारी खम्ला।

3 चुदे तागदेदा तहरी थान्बाला लागिरी थेनीगदेला सुडरी लगाम क्वान्जी भिसम थे घेन मुसैनोन य्हाडसे थेदा भोर्गे म्हनबा ग्लारी भोर्बारी खम्ला। 4 च्यागो, पानी जहाजगदेएनोन गाते घेन मुला, ओच्छे थे लाबाला तोडसे भ्रमुला। तसैनोन थे चलब लबा म्हिसे सिडला जजाबा क्याबाला भररी हाडदा भोर्गे म्हनबा ग्लारी भोर्खम्मुला। 5 थेहड् लसीन य्हाडला लेएनोन ल्हुइला जजाबा सहे हिन्ना, तसैनोन थेसे घेन घेन ताम लमुला।

च्यागो, मेला जजाबा फिलिडगो गिकसेन घेन घेन हि क्रोसी नाश लमुला। 6 थेतबासेलमा य्हाडला लेएनोन मे हड्बान हिन्ना। तिग्दा भिसम चु य्हाडला ल्हुइला जम्मान भन्दा नइबा गे लपुड्बा सहे हिन्ना। चुसे य्हाडला पूरान जुनी न्होड्ना लसी नर्गला मेरी झाड्मुला। ओच्छे थे हाडएनोन नर्गला मेसे क्रोसी नाश तमुला।

7 म्हिसे जम्मान खाल्ला जन्तुगदे, जम्मान खाल्ला चराचुरुङ्गीदेन सरी भ्रबा जन्तुगदे ओच्छे समुन्द्रला जन्तुगदेदा तहरी थान्खम्मुला ओच्छे तहरी थान्बाएनोन मुला। 8 तर लेदा चा खालैसेन तहरी थान्बारी आखम। तिग्दा भिसम ले पापदेन लोड्बा खबा बिखसे प्लिड्बा कुटिसी आचिबा सहे हिन्ना।

9 चुनोन लेसे य्हाडसे प्रभु परमेश्वर आबाला जयजयकार लमुला भिसम चुनोन लेसे परमेश्वरसे हाडलान रुपरी सहोबा म्हिदाएनोन केःमुला।* 10 चु सुडग्यामसेन मोलमएनोन पिन्मुला, म्हिदाएनोन केःमुला। तर डाला ज्योज्यो आले नाना आडागदे, चु चा य्हाडसे लबारी आतबा ताम हिन्ना। 11 तिग मुहान गिकग्यामसेन कम्बादेन डम्बा क्युइ प्योला? 12 डाला ज्योज्यो आले नाना आडागदे, तिग अज्जीरला दोडरी जैतून रोला? ओच्छे अडगुरला दोडरी अज्जीर रोला? थेतबासेलमा कम्बा क्युइ प्योबा मुहानग्यामसेन खाइमै डम्बा क्युइ आप्यो।

थरी न्हीला ज्ञान बुद्धि

* 2:21 उत्प २२:१-१४ * 2:23 उत्प १५:६; २ इति २०:७; यशै ४१:८ * 2:25 यहो २:१-२१ * 3:9 उत्प १:२६

13 एनीगदे न्हडरी ज्ञान बुद्धि मुबादेन ताम घोबा म्हि खाल मुला? थेसे हाडला ज्यबा बानीबेहोरग्याम बुद्धि मुबा सोजो म्हि तसी ज्यबा गे लसी उन्नै। 14 तर चुदे एनीगदेला सेमरी डाहदेन ईख थान्सी हाडला जे ग्याम च्याजी भिसम एनीगदेसे बुद्धि मुला भिसी घमण्ड थालउ। चुहड् लसी हाडसे हाडदान बुद्धि मुला भिसी भ्रबा चा सत्य तामदा बिरोध लसी हाडसे हाडदान फट्टा सहोबा हिनना। 15 चुहड्बा ज्ञान बुद्धि चा परमेश्वरग्याम खबा ज्ञान बुद्धि आहिन। तर जम्बुलिडला आज्यबा तामदेन महिला सेमग्याम ओच्छे शैतानग्याम खबा हिनना। 16 तिग्दा भिसम जुन ग्लारी डाहदेन ईख थान्सी हाडला जे ग्याम च्याला, थेरी खाडमै ढिक्सी चिआखम। थेरी जम्मान पाप गे जे तला।

17 तर परमेश्वरग्याम खबा ज्ञान बुद्धिला मुल ताम चा चोखो हिनना। ओच्छे शान्ति भबा, जम्मानदेन छ्याम ढिक्सी चिखम्बा, सोजो, दयासे प्लिड्बा, जम्मान गे ज्यबा लबा, खालैला ली च्यासी गे आलबादेन खालैदा चिप्ले ताम आलबा तमुला। 18 शान्ति भबागदेसे शान्तिरीन चिसी म्हिगदेला ओन्छाडरी परमेश्वरसे म्हन्बा अन्छारला गे लबान निला।

4

जम्बुलिडला सहेगदेदा माया लबा

1 एनीगदे न्हडरी छेबा बड्बा तिग तामसे तना लबा हिनना? एनीगदेसे हाड हाड जे मोजमजा लड भिसी म्हन्बा लोभ सेमसे लमान आहिन? 2 एनीगदेसे जुन सहे म्हाडमुला थे आयाड्मुला। थेतबासेलमा एनीगदेसे म्हा साड्मुला। एनीगदेसे ल्हानान लोभ लमुला, तर आयाड्मुला। थेतबासेलमा एनीगदे हाड हाड न्हडरीन छेबा बड्बा लमुला। एनीगदेसे जुन सहे म्हाडमुला थे सहे एनीगदेदेन छ्याम आरे। तिग्दा भिसम एनीगदेसे परमेश्वरदेन छ्याम आहीमुला। 3 हीसैनोन एनीगदेसे आयाड्मुला। तिग्दा भिसम एनीगदेसे मोजमजा लबाला लागिरी आज्यबा सेम थोसी हीमुला।

4 विश्वास आरेबा म्हिगदे, जम्बुलिडला जम्मान सहेदा माया लबा चा परमेश्वरदेन शत्रु सहोबा भिबा ताम एनीगदेदा था आरे? च्यागो, जुन म्हिसे जम्बुलिडला जम्मान सहेदा माया लला थेसे हाडसे हाडदान परमेश्वरला शत्रु सहोला। 5 तिग बचनरी चुहड् भिसी भिबा ताम एनीगदेसे गे आखेल्बा ताम भिसी म्हन्बा? “परमेश्वरसे यहाड न्हडरी थान्बा आत्मा चा ल्हानान डाहसे प्लिड्बा मुला।” 6 तर परमेश्वरसे थेहड्बा डाह लबा आत्माग्याम फेबारी झन ल्हाना दयामाया लमुला। थेतबासेलमा परमेश्वरला बचनरी चुहड् भिसी भिबा मुला, “परमेश्वरसे घमण्डीगदेदा बिरोध लला, तर सोजो म्हिगदेदा चा दयामाया लला।”*

7 थेतबासेलमा एनीगदे सदन परमेश्वरला तहरी चिउ, ओच्छे शैतानदा बिरोध लउ। जमाहेन्से थे एनीगदे मुबा ग्लाग्याम याला। 8 एनीगदे परमेश्वरला डामरी खउ, ओच्छे परमेश्वरएनोन एनीगदेला डामरी फेपखला। थेतबासेलमा पापीगदे, आज्यबा गे लबा या चोखो सहोउ। ओच्छे सेम न्ही मुबा म्हिगदे, एनीगदेला सेम चोखो सहोउ। 9 एनीगदे दुख ड्हम्सी क्राबा क्रिड्बा लउ। एनीगदे ताड्सी ड्येःबा भन्दा क्राबा क्रिड्बा लसी चिउ। 10 एनीगदे प्रभुला डाच्छा सोजो म्हि दोगो, ओच्छे थेसेन एनीगदेदा घेन म्हि सहोला।

स्य्हान्दोदा दोष थालउ

11 ज्योज्यो आले नाना आडागदे, एनीगदेसे गिकसेम गिकदा बिरोध लसी आज्यबा ताम थापाड्गो। तिग्दा भिसम जुन म्हिसे हाडला ज्योज्यो आले नाना आडादा बिरोध लसी दोष लला थेसे परमेश्वरला ठिमदा बिरोध लसी दोष लबा हिनना। चुदे एसे परमेश्वरला ठिमला दोष उन्जी भिसम ए ठिम अन्छार भ्रबा म्हि आहिन। तर ठिमला निसाफ लबा म्हि हिनना। 12 च्यागो, ठिम सहोबादेन निसाफ लबा मी परमेश्वर जे हिनना। थेदेन छ्याम जे नाश लबादेन थाना लबा शक्ति मुला। तर हाडला खिमजेमगदेदा दोष लबा एनीगदे चा खाल हिनना?

* 4:6 हितो ३:३४

परमेश्वरसे म्हन्बा अन्छार भ्रउ

13 “तिनी न्हडगरनोन य्हाड शहर गिकरी निसी थेरीन तिदिड चिसी व्यापार लला। ओच्छे धन सम्पत्ति स्होला” भिसी पाड्बा म्हिगदे डाला ताम ड्यानगो।* 14 न्हडगर तिग तला भिबा ताम एनीगदेदा तिगैनोन था आरे। एनीगदेला जुनी तिग हिन्ना भिबा तामएनोन था आरे। च्यागो, एनीगदेला जुनी मी लडबु हड्बान हिन्ना। थे छिन्नडरीन थोन्मुला छिन्नडरीन म्हामुला। 15 चुहड् भिबा भन्दा मी एनीगदेसे “चुदे परमेश्वरला सेम मुसम य्हाड सोसी चुहड् लला थेहड् लला” भिसी पाड्तो:मुबा। 16 तर दान्दे एनीगदे ल्हानान घमण्ड लसी धाक उन्मुला। चुहड् लसी धाक उन्बा चा पाप हिन्ना। 17 खालैसे ज्यबा लतो:ला भिसी था याड्सीनोन ज्यबा आलनी भिसम थेसे पाप लबा हिन्ना।

5

फ्युक्पो म्हिदा पाड्बा ताम

1 फ्युक्पो म्हिगदे, एनीगदेसे डाला ताम ड्यानगो, एनीगदेशोरी खबारी छ्याइबा दुखला लागिरी क्राबा क्रिड्बा लसी चिउ। 2 एनीगदेला धन सम्पत्ति नइबा मुला ओच्छे क्वानगदे बुलुडसे चसी जिन्बा मुला।* 3 ओच्छे एनीगदेला म्हर म्हुइरी खिया खबा मुला। थेनोन खियासे एनीगदेला दोष उन्ना। ओच्छे थेनोन खियासे एनीगदेला ल्हुइ मेसे हड् लसी क्रोसी नाश लला। तसैनोन परमेश्वरसे निसाफ लबा चु धिनरी एनीगदेसे ल्हानान धन सम्पत्ति सोसी थान्बा मुला। 4 एनीगदेसे हाडला बुरी गे लबा म्हिगदेदा पिन्तो:बा ज्यालाएनोन पिन्बा आरे। च्यागो, थेनीगदेदा पिन्तो:बा ज्यालासेन क्रिड्सी एनीगदेदा बिरोध लला। जम्मान भन्दा शक्तिशाली परमेश्वरसे बुरी गे लबागदे क्राबा क्रिड्बा लबा थे:सी जिन्बा मुला।* 5 एनीगदेसे जम्बुलिडरी ल्हानान मोजमजा लसी चिबा मुबा, एनीगदेसे हाडसे हाडदान साइबाला लागिरी थान्बा जन्तु हड् लसी छोना लसी थान्बा मुला। 6 एनीगदेदा बिरोध आलबादेन तिगै दोष आरेबा म्हिगदेदा एनीगदेसे दोष उन्सी साइजी।

जस्तोन दुख तसै नागो

7 थेतबासेलमा ज्योज्यो आले नाना आडागदे, प्रभु फेपखबा धुइ आततेधोना भ्रान्सी चिउ। च्यागो, खेती लबा म्हिसे ज्यबा बाली याड्ला भिबा आश लसी सेख्देन बर्खला नाम आखतेधोना भ्रान्सी चिमुला। 8 एनीगदेएनोन थेहड् लसीन भ्रान्सी विश्वासरी कोड्सी चिउ। तिग्दा भिसम प्रभु फेपखबा धुइ खसी जिन्बा मुला। 9 ज्योज्यो आले नाना आडागदे, एनीगदे हाड हाड न्हडरी दोष थालउ। परमेश्वरसेनोन एनीगदेला दोष उन्सी निसाफ आल। तर च्यागो, निसाफ लबा चा म्पारीन मुला।

10 ज्योज्यो आले नाना आडागदे, एनीगदेशोरी खबा दुख नासी चिबारी प्रभुला मिनग्याम ताम पाड्बा अगमवक्तागदेसे नाबा दुखदा ढन्गो। 11 थेनीगदेसे जम्मान दुख नाखम्बासे लमा य्हाडसे थेनीगदेदा मान लमुला। ओच्छे अय्यूबसेनोन जम्मान दुख नाखम्जी भिबा तामला बारेरी एनीगदेसे थे:बा मुला। थेहड् लसीन प्रभुसे लिच्छा अय्यूबदा दो:सी जम्मान सहे पिन्जी भिबा ताम एनीगदेदा थानोन मुला। प्रभुसे ल्हानान माया उन्सी दया लमुला।*

12 डाला ज्योज्यो आले नाना आडागदे, जम्मान भन्दा घेन ताम चा एनीगदेसे स्वर्ग, जम्बुलिडदेन अर्गु तिगै सहेला मिन किन्सी खाइमै घान थाफागो। बरु “हिन्ना” भिसम “हिन्ना” भिउ “आहिन” भिसम “आहिन” भिउ। थेहड् लजी भिसम परमेश्वरला डाच्छा एनीगदेला तिगै दोष आत।*

विश्वासला प्रार्थना

13 एनीगदे न्हडरी खालैदा दुख तबा मुसम थेसे प्रार्थना लउ। ओच्छे खालै ताड्बा मुसम थेसे परमेश्वरदा जयजयकार तबा व्हाइ गोउ। 14 थेहड् लसीन एनीगदे न्हडरी खालै आखम्बा मुसम थेसे मण्डलीदा च्याबा म्हिगदेदा ड्योडगो। ओच्छे मण्डलीदा च्याबा म्हिगदेसे थे म्हिदा प्रभुला मिनरी छ्युगु फोर्सी प्रार्थना लगै।* 15 विश्वास लसी लबा प्रार्थनासे आखम्बा म्हिदा खम्ना लला। ओच्छे

* 4:13 हितो २७:१ * 5:2 मत्ती ६:१९ * 5:4 व्यव २४:१४-१५ * 5:11 अय्यूब १:२१-२२; २:१०; भजन १०३:८ * 5:12 मत्ती ५:३४-३७ * 5:14 मर्कू ६:१३

प्रभुसे थेदा पूरान खम्ना लला। चुदे थेसे पापनोन लबा मुसै माफ याड्ला। 16 थेतबासेलमा एनीगदे ह्वाड ह्वाडसे लबा पापगदे गिकसेम गिकदा पाड्गो। ओच्छे एनीगदे खम्बाला लागिरी गिकसेम गिकदा प्रार्थना लउ। च्यागो, परमेश्वरसे म्हन्बा अन्छार भ्रबा म्हिसे लबा प्रार्थना शक्तिशाली तमुला, ओच्छे थेग्याम उदेकला गे तमुला।

17 एलियाएनोन य्हाड ह्वाडान म्हि मुबा। थेसे नाम थाखगै भिसी सेमहेन्सेन प्रार्थना लमा सोम दिडसे ला दुधोना जम्बुलिडरी नाम आखनी।* 18 दोःसी थेसे नाम खगै भिसी प्रार्थना लजी। जमाहेन्से नाम खसी बाली नाली ज्यबा तजी।*

19 डाला ज्योज्यो आले नाना आडागदे, एनीगदे न्हडरी खालै म्हिसे सत्य ग्याम ख्लासी निमा खालैसे थेदा दोःसी भजी भिसम, 20 थेसे चु ताम थाम्लेःगै, जुन म्हिसे आज्यबा ग्यामरी भ्रबा पापी म्हिदा दोःसी भला थेसे थेदा सिबाग्याम जोगब लला, ओच्छे ल्हानान पापगदेला पापला दोष मेटब तला।*

* 5:17 १ राजा १७:१; १८:१ * 5:18 १ राजा १८:४२-४५ * 5:20 हितो १०:१२; १ पत्रु ४:८

पत्रुससे भिबा डाच्छारेमला चिठी चु चिठीला बारेरी पाड्तोःमा

भिबा म्हि: येशूला मुल चेला पत्रुससे भिबा मुबा (१ पत्रुस १:१)। चु चिठी भिबाला लागिरी पत्रुसदा सिलाससे हो लबा मुबा (१ पत्रुस ५:१२)।

भिबा ग्ला: चु चिठी “बेबिलोन” शहरग्याम भिबा मुबा भिसी पाड्बा मुला (१ पत्रुस ५:१३)। बाइबलला ल्हानान विद्वानगदेसे बेबिलोन शहर भिबा चा रोम शहर हिन्ना भिसी पाड्मुला।

भिबा साल: ओस्पन ईश्वी संवत् ६०-६४ (विक्रम संवत् ११७-१२१) सालला गुडरी भिबा मुबा।

खाल्दा भिबा: एशिया अञ्चलला न्हुपपट्टिला ग्लारीक्यार ससा बडबड तसी चिबा येशूदा विश्वास लबागदेदा भिबा मुबा।

चु चिठीरी विश्वास लबागदेदा “परमेश्वरसे धम्बा म्हिगदे” भिसी पाड्बा मुला। चु चिठी भिबा चा चु चिठी पढब लबागदेसे आँट याड्गै भिसी हिन्ना। तिग्दा भिसम ख्रीष्टदा विश्वास लबासे लमा थेनीगदे दुख नासी चिबा मुबा। चुहड् लसी आँट पिन्मा पत्रुससे थेनीगदेदा येशू ख्रीष्टला बारेरी थाबा पिन्बा समाचार, येशू सिबादेन सिबाग्याम सोबा ताम ओच्छे येशू दोःसी फेपखला भिबा कबुल ढन्ना लबा मुला। थेनीगदेसे याड्बा दुख चा थेनीगदेसे लबा विश्वासदा कोड्बा सहोबा ताम हिन्ना। ओच्छे थेनीगदेसे ख्रीष्ट फेपखबा धिनरी इनाम याड्गला भिसी हुक्क तसी थे दुख नातोःला भिसी पाड्बा मुला।

पत्रुससे चु चिठी पढब लबागदेदा दुखला धुइरी आँट पिन्बान ख्रीष्टला म्हिगदे हड्बान दोसी भ्रउ भिसी बिन्ती लबा मुला।

मुल तामगदे

फ्याफुल्बा १:१-२

खाइमै आसिबा आश १:३-१२

तिगै दोष आरेबा म्हि दोगो १:१३-२:१०

दुखला धुइरी ख्रीष्टदा विश्वास लबागदेसे लतोःबा गे २:११-४:१९

ख्रीष्टदा विश्वास लबागदे सोजो तसी लतोःबा गे ५:१-११

चिठीला थुमरी भिबा ताम ५:१२-१४

पत्रुससे भिबा डाच्छारेमला चिठी

¹ लाससो, पोन्टस, गलातियादेन कापाडोकिया ओच्छे एशियादेन बिथिनिया भिबा ग्लारी[†] क्यार यासी ससा बडबड तसी परदेशी दोसी चिबा परमेश्वरसे धम्बा म्हिगदेदा डा येशू ख्रीष्टला मुल चेला पत्रुसग्याम फ्याफुल्ला।

² परमेश्वर आबासे डाच्छाहेन्सेन म्हन्बा अन्छार थेला आत्मासे एनीगदेदा ह्हाडलान म्हि सहोबारी धम्बा मुला। थेतबासेलमा एनीगदेसे येशू ख्रीष्टसे कुल्बा ताम ड्यानगै भिसी एनीगदेदा थेला काग्याम तिगै दोष आरेबा म्हि सहोबा मुला।

एनीगदेदेन छ्याम परमेश्वरला दयामायादेन शान्ति ल्हानान तगै।

खाइमै आसिबा आश

³ यहाडला प्रभु येशू ख्रीष्टला आबा परमेश्वरला जयजयकार तगै। तिग्दा भिसम परमेश्वरसे येशू ख्रीष्टदा सिबाग्याम सोना लसी यहाडदा ल्हानान दया लबासे लमा यहाडसे छार जुनी याड्बा मुला। दान्दे यहाडदेन छ्याम खाइमै आसिबा आश मुला। ⁴ थेहड् लसीन एनीगदेला लागिरी परमेश्वर आबासे खाइमै नाश आतबा, म्हासी आनिबा, न्होड्सी आनिबा मोलमगदे स्वर्गरी ठीक लसी थान्बा मुला।

[†] 1:1 पोन्टस, गलातियादेन कापाडोकिया ओच्छे एशियादेन बिथिनिया भिबा ग्लागदे डाच्छा रोम यहुल्सारी परब तमुबा। तर दान्दे चा चु जम्मान ग्लागदे टर्की भिबा यहुल्सारी परब तमुला।

5 ओच्छे एनीगदेसे लबा विश्वासग्याम परमेश्वरला शक्तिसे एनीगदेदा थार्ना लबाला लागिरी जोगब लसी थान्ना। चु ताम चा एनीगदेसे परमेश्वरसे निसाफ लबा धुइरी म्राड्ला।

6 दान्दे एनीगदेसे तिगै धिनना लागिरी ल्हानान थरीला दुख नातोःसै जमा धुइरी एनीगदे ताड्ला। 7 एनीगदेसे चुहड् लसी दुख नाबा चा एनीगदेसे लबा विश्वास सत्य हिनना भिसी उन्बाला लागिरी हिनना। नाश तसी निबा म्हरदा मी म्हर हिनना कि आहिन भिसी था याड्बाला लागिरी मेरी खाड्मुला भिसम एनीगदेला विश्वास मी थे म्हर भन्दा घेन हिनना। थेहड्बा विश्वाससे लमा येशू ख्रीष्ट दोःसी फेपूखमा एनीगदे उदेक तला। जमा धुइरी एनीगदेसे थेदेन छ्यामनोन मानदेन इज्जत याड्ला, ओच्छे एनीगदेदा ज्यबा म्हि भिसी पाड्ला।

8 एनीगदेसे येशू ख्रीष्टदा आम्राड्सैनोन माया लबा मुला। दान्दे एनीगदेसे थेदा आम्राड्सैनोन विश्वास लबा मुला। ओच्छे एनीगदे गाते ताड्ला भिबा तामदेन एनीगदेसे परमेश्वरदा गाते मानदेन जयजयकार लला भिबा ताम खालैसेन पाड्बारी आखम। 9 एनीगदेसे लबा विश्वासग्याम याड्बा इनाम चा एनीगदे थार्बा हिनना।

10 परमेश्वरसे एनीगदेदा लबा दयामायाला बारेरी अगमवक्तागदेसे डाच्छान पाड्सी जिन्बा मुबा। ओच्छे एनीगदेसे याड्बा चु थार्बाला बारेरी थेनीगदेसे ल्हानान इयोइबा छार्बा लमुबा। 11 थे अगमवक्तागदेसे चु खाहड् लसी तला, खाइमा तला भिसी इयोइबा छार्बा लमुबा। थेतबासेलमा थेनीगदेदा ख्रीष्टला आत्मासे[†] डाच्छा थार्बा पिन्बा ख्रीष्टसे दुख नातोःला, ओच्छे थेसे दोःसी ल्हानान मान याड्ला भिबा ताम डाच्छान पाड्सी जिन्बा मुबा। 12 अगमवक्तागदेसे थे धुइरी पाड्बा ताम हाडला लागिरी आहिन, तर एनीगदेलान लागिरी पाड्बा हिनना भिसी परमेश्वरसे थेनीगदेदा घोना लमुबा। चु ताम स्वर्गग्याम पुइखबा परमेश्वरला आत्माग्याम पाड्बागदेसे दान्दे एनीगदेदा थार्बा पिन्बा समाचार थेःना लबा मुला। चु ताम स्वर्गदूतगदेसेनोन च्याबारी ल्हानान सेम लमुला।

तिगै दोष आरेबा म्हि दोगो

13 थेतबासेलमा एनीगदेसे हाडला सेमदा तहरी थान्सी तयार तड। ओच्छे सोजो तसी येशू ख्रीष्ट दोःसी फेपूखबा धुइरी एनीगदेदा गाते दयामाया लला भिबा तामरी पूरान आश लसी चिड। 14 एनीगदे कुलबा ताम इयान्बा कोलागदे तबासे लमा एनीगदेसे डाच्छा आसेना आघोना हाडला सेमसे म्हाइबा जम्मान आज्यबा तामगदे ख्लागो। 15 एनीगदेदा धम्बा परमेश्वर तिगै दोष आरेबा परमेश्वर हिनना। थेतबासेलमा एनीगदेला जम्मान तामगदेएनोन परमेश्वरला डाच्छा तिगै दोष आरेबा ततोःला। 16 तिग्दा भिसम परमेश्वरला बचनरी चुहड् भिसी भिबा मुला, “एनीगदे तिगै दोष आरेबा म्हि दोगो, तिग्दा भिसम डा तिगै दोष आरेबा परमेश्वर हिनना।”*

17 खालैलान ली च्यासी आहिन, तर म्हिसे लबा गे अन्छार निसाफ लबा परमेश्वरदा एनीगदेसे आबा भिसी प्रार्थना लबासे लमा जम्बुलिडरी परदेशी दोसी चितेधोना एनीगदे परमेश्वर म्राड्सी लोड्गो। 18 तिग्दा भिसम आखे म्हेमेहेन्से तेन्सी खबा गे आखेल्बा रिमठिमग्याम एनीगदेदा फेबाला लागिरी परमेश्वरसे गाते ल्हानान पापला सय फाजी भिबा ताम एनीगदेदा थानोन मुला। थे सय चा नाश तसी निबा म्हर म्हुइग्याम फाबा सय हड्बा आहिन। 19 तर ग्लुसीन ग्लुबारी आखम्बा ख्रीष्टला काग्याम एनीगदेला पापला सय फासी एनीगदेदा थार्ना लबा हिनना। ख्रीष्ट बलि पिन्बा तिगै दोषदेन दाग आरेबा ग्यु बोगो हड्बान दोजी। 20 चुला लागिरी परमेश्वरसे ख्रीष्टदा जम्बुलिड स्होबा भन्दा डाच्छान धम्बा मुबा। तर चु लिच्छाला धुइरी[†] एनीगदेलान लागिरी ख्रीष्ट फेपूखजी।

21 ख्रीष्ट येशूग्यामसेन एनीगदेसे परमेश्वरदा विश्वास लबा हिनना। थेनोन परमेश्वरसे ख्रीष्ट येशूदा सिबाग्याम सोना लसी जम्मान भन्दा घेन मान पिन्जी। थेतबासेलमान एनीगदेसे परमेश्वरथोरी विश्वासदेन आश लमुला।

† 1:11 चु पदरी “ख्रीष्टला आत्मा” पाड्बा चा परमेश्वरला आत्मा भिबा हिनना। * 1:16 लेवी ११:४४-४५; १९:२ † 1:20 “लिच्छाला धुइ” भिबा चा डाच्छा ख्रीष्ट फेपूखमाहेन्से दोःसी फेपूखबा धुइधोनादा पाड्बा हिनना।

22 दाहेन्से एनीगदेसे सत्य ताम ड्यान्सी हाडला सेम चोखो सहोबा मुला। थेतबासेलमा एनीगदेसे हाडला ज्योज्यो आले नाना आडादा चोखो माया लमुला। ओच्छे गिकसेम गिकदाएनोन सेमहेन्सेन चोखो माया लउ। 23 तिग्दा भिसम एनीगदेसे खाइमै नाश आतबादेन छोन्बो परमेश्वरला बचनग्याम नाश तसी निबा आहिन, तर नाश आतबा छार जुनी याड्बा मुला। 24 तिग्दा भिसम परमेश्वरला बचनरी चुहड् भिसी भिबा मुला,

“जम्मान म्हिगदे छे हड्बान हिन्ना,
ओच्छे थेनीगदेला मानदेन जेबा हिरी खबा छेला म्हेन्दो हड्बा हिन्ना।
छे हेला ओच्छे म्हेन्दो ताइला।

25 तर प्रभुला बचन जुकजुकधोनान चिला।”*

दान्दे एनीगदेदा थेःना लबा थार्बा पिन्बा समाचार चु बचननोन हिन्ना।

2

1 थेतबासेलमा एनीगदेसे जम्मान आज्यबा ताम, छल लबा, सेमरी पाप ताम थान्बा, डाह लबादेन स्यहान्दोला तामगन लबा चु जम्मान ताम ख्लागो। 2 लैनु कोलासे इहे थुड्बारी म्हाइबा हड् लसी एनीगदेसे चा परमेश्वरला सत्य बचनदा म्हाइगो। तिग्दा भिसम चु बचनग्यामसेन एनीगदे हाडसे याड्बा थार्बारी ल्हेबान निला। 3 प्रभुसे गाते ल्हाना दया लबा मुला भिबा ताम एनीगदेसे था याड्सी जिन्बा मुला।*

4 एनीगदे येशू मुबा ग्लारी खबान मुला, थे चा छोन्बो युड्बा हिन्ना। थेदा म्हिगदेसे गे आखेल्बा युड्बा भ्याड्बा हड् लसी भ्याड्मुबा। तर परमेश्वरसे थेदा धम्सी ग्लुसीन ग्लुबारी आखम्बा युड्बा सहोजी। 5 एनीगदेएनोन छोन्बो युड्बा हड्बान हिन्ना, परमेश्वरसे एनीगदेदा हाडला मन्दिर सहोबा मुला। परमेश्वरला लागिरी फेसी थान्बा पूजा लबा म्हिगदे दोःसी येशू ख्रीष्टग्याम एनीगदे परमेश्वरदा सेम निबा आतमाला बलि फुल्बा म्हि दोबा मुला। 6 तिग्दा भिसम परमेश्वरला बचनरी चुहड् भिसी भिबा मुला,

“च्यागो, डाइ ग्लुसीन ग्लुबारी आखम्बा सुर युड्बा धम्सी

सियोन† भिबा ग्लारी थान्बा मुला।

जुन म्हिसे थेदा विश्वास लला

थे म्हि खाइमै पेःआतोः।”*

7 थेतबासेलमा विश्वास लबागदेला लागिरी येशू ख्रीष्ट ग्लुसीन ग्लुबारी आखम्बा युड्बा दोजी। तर विश्वास आलबागदेला लागिरी चा बचनरी भिबा चु ताम ढिक्मुला,
“जुन युड्बा दिम सहोबा म्हिगदेसे गे आखेल्बा युड्बा भिसी भ्याड्जी,
थेनोन युड्बा चा दिमला सुर युड्बा दोजी।”*

8 ओच्छे

“म्हिगदेदा तोइबा युड्बा चुनोन हिन्ना।

ल्हानान म्हिगदे तोइसी पाप्ला।”

परमेश्वरसे कुल्बा तामरी विश्वास आलबासे लमान थेनीगदे पाप्ला। थेनीगदे चुहड् तबा चा परमेश्वरसे म्हन्बा अन्छारनोन हिन्ना।*

9 तर एनीगदेदा धोपधोपग्याम हाडला उदेकला य्हालरी भबा परमेश्वरसे थेला उदेकला गे स्यहान्दो म्हिगदेदा पाड्बाला लागिरी एनीगदेदा थेसे धम्बा म्हि, जम्मानथोरी शासन लबा परमेश्वरला मन्दिररी पूजा लबा म्हि, ओच्छे परमेश्वरला लागिरी जे फेसी थान्बा य्हुलदेन हाडलान सन्तान सहोजी।*

10 डाच्छा एनीगदे परमेश्वरला सन्तान आहिनमुबा।

* 1:25 यशै ४०:६-८ * 2:3 भजन ३४:८ † 2:6 “सियोन” भिबा चा यरूशलेम हिन्ना। * 2:6 यशै २८:१६ * 2:7 भजन ११८:२२ * 2:8 यशै ८:१४-१५ * 2:9 प्रस्था १९:५-६; यशै ४३:२०-२१; वयव ४:२०; ७:६; १४:२; तीत २:१४; यशै ९:२

तर दान्दे एनीगदे परमेश्वरला सन्तान दोबा मुला।
डाचूछा एनीगदेसे दया आयाङ्मुबा।
तर दान्दे एनीगदेसे दया याङ्बा मुला।*

परमेश्वरदा तेन्बा म्हि

11 डाला सेम निबा ह्योगदे, एनीगदे चु जम्बुलिडला लागिरी विदेशीदेन परदेशी हिन्ना। थेतबासेलमा एनीगदेदा न्होङ्ना लबारी, सेमसे लबारी म्हाइबा आज्यबा गेगदे थालउ भिबा डाला बिनती मुला।
12 ओचूछे ख्रीष्टदा विश्वास आलबा म्हिगदेला गुडरी एनीगदेला बानीबेहोर ज्यबा तगै। तिगदा भिसम खालैसे एनीगदेदा बिरोध लसी आज्यबा ताम पाङ्सैनोन एनीगदेसे लबा ज्यबा गेगदे थेनीगदेसे म्हाङ्ला। चुहङ् लजी भिसम ख्रीष्ट निसाफ लबारी फेपूखबा धुडरी थेनीगदेसे एनीगदेला ज्यबा बानीबेहोर म्हाङ्सी परमेश्वरला मानदेन जयजयकार लला।

शासन लबागदेदेन मालिकगदेला तहरी चिउ

13 म्हिगदेसे य्हुल्सा चलब लबारी स्होबा रिमठिम मुसैनोन जम्मान भन्दा घेन ग्ले मुसैनोन प्रभुला लागिरी एनीगदे थेनीगदेला तहरी चिउ। 14 थेहङ् लसीन य्हुल्सा चलब लबा म्हिगदेला तहरीनोन चिउ। तिगदा भिसम आज्यबा गे लबागदेदा सजाय पिन्बारीदेन ज्यबा गे लबागदेदा मान पिन्बारी परमेश्वरसेन थेनीगदेदा धम्बा हिन्ना। 15 तिगदा भिसम एनीगदेसे लबा ज्यबा गे म्हाङ्सी मूर्ख म्हिगदेसे आघोना पाङ्बा आतोःबा तामगदे ख्लागै भिसी परमेश्वरसे म्हन्बा मुला। 16 थेतबासेलमा एनीगदे खालैला नोकर तबा हङ् लसी थाभ्रउ, तिगदा भिसम परमेश्वरसे एनीगदेदा थार्ना लबा मुला। तर परमेश्वरसे थार्ना लजी भिदेमा आज्यबा गे चा थालउ। बरु परमेश्वरदा तेन्बा म्हिगदे हङ् तसी भ्रउ। 17 ओचूछे जम्मान म्हिगदेदा मान लउ। थेहङ् लसीन येसू ख्रीष्टदा विश्वास लबा ज्योज्यो आले नाना आडागदेदा माया लउ। ओचूछे परमेश्वर म्हाङ्सी लोङ्गो। ग्लेदाएनोन मान लउ।†

ख्रीष्टसे हङ् लसीन दुख नागो

18 नोकरगदे, एनीगदेसे ह्वाङ् ह्वाङ्ला मालिकगदेदा मान लसी थेनीगदेला तहरी चिउ। एनीगदेदा दया लबा मालिकगदेदा जे आहिन, तर दया आरेबा मालिकगदेदाएनोन मान लउ। 19 खालै म्हिसे ह्वाङ्से नाआतोःबा दुख परमेश्वरसे म्हन्बा ताम ढन्सी नाजी भिसम थे म्हाङ्सी परमेश्वर ताङ्ला। 20 तिगदा भिसम एनीगदेसे आज्यबा गेरी दुख नासी तिग याङ्ला? तर एनीगदेसे ज्यबा गे लसीनोन दुख नाजी भिसम एनीगदे परमेश्वरला डाचूछा ज्यबा म्हि दोला। 21 चुलान लागिरी परमेश्वरसे एनीगदेदा धम्बा हिन्ना। तिगदा भिसम ख्रीष्टसेनोन एनीगदेला लागिरी दुख नासी उन्जी। थेतबासेलमा एनीगदेएनोन ख्रीष्टसे उन्बा ग्यामरी भ्रबारी तयार ततोःला।

22 “थेसे तिगै पाप आलनी,

ओचूछे थेसे खालैदा छलएनोन आलनी।”*

23 म्हिगदेसे जस्तोन हेला लसैनोन ख्रीष्टसे थेनीगदेदा हेला आलनी।

ओचूछे जस्तोन दुख पिन्सैनोन थेसे खालैदा तिगै आलनी। तर थेसे खालैला ली आच्याना ठीक निसाफ लबा परमेश्वरथोरी भर लजी।*

24 य्हाङ्से पाप लबा ख्लासी परमेश्वरदा सेम निबा म्हि दोगै भिसी

ख्रीष्टसे य्हाङ्ला जम्मान पाप ह्वाङ्लान ल्हुडरी पुडसी

क्रूसरी टांगब लजी।

थेनोन ख्रीष्टला घाउगदेग्याम एनीगदे खम्बा मुला।*

25 डाचूछा एनीगदे गोठालो आरेबा ग्युगदे हङ्नोन ससा बडबड तबा मुबा।

तर दान्दे एनीगदे ह्वाङ्ला आत्मादा वास्ता लबा गोठालो मुबा ग्लारी दोःसी खबा मुला।*

* 2:10 होशे २:२३ † 2:17 “ग्ले” भिबा चा शासन लबा म्हि हिन्ना। * 2:22 यशै ५३:९ * 2:23 यशै ५३:७ * 2:24 यशै ५३:५ * 2:25 यशै ५३:६

3

मिडदेन हेम्बोसे लोप्तोःबा ताम

1 थेहड् लसीन मिडम्हेमेगदे, एनीगदे हाड हाडला हेम्बोला तहरी चिउ। चुहड् लजी भिसम एनीगदेसे प्रभुला बारेरी तिगै ताम आपाङ्गसैनोन एनीगदेला ज्यबा बानीबेहोरसे लमा परमेश्वरला बचन आङ्गान्बा हाड हाडला हेम्बोला सेम ढाला।* 2 तिग्दा भिसम एनीगदेसे लबा मानदेन एनीगदेला चोखो बानीबेहोर थेनीगदेसे म्राङ्गला। 3 एनीगदे म्हिदा उन्बाला लागिरी म्हर म्हुइदेन ज्यबा ज्यबा क्वान क्वान्सी क्रा सहोसी ज्योसी थाभ्रउ।* 4 बरु एनीगदेला सेमरी चा खाइमै नाश आतबा ज्यबा शीलस्वभाव थोबादेन सोजो तसी चिउ। चु चा परमेश्वरला डाच्छा ल्हानान ज्यबा ताम हिन्ना। 5 तिग्दा भिसम परमेश्वरथोरी आश थान्सी परमेश्वरदा तेन्बा डाच्छा डाच्छाला मिडम्हेमेगदेएनोन हाड हाडला हेम्बोला तहरी चिसी चुहड् लसीन ज्योमुबा। 6 सारासे खाहड् लसी हाडला हेम्बो अब्राहामदा मालिक भिसी थेसे कुल्बा ताम ड्गान्मुबा। थेहड् लसीन एनीगदेसे हाडला हेम्बो म्राङ्गसी आलोङ्गना ज्यबा लजी भिसम एनीगदे सारालान झामेगदे दोला।*

7 थेहड् लसीन हेम्बोसेनोन जम्मान म्हि साप्राला ताड हड्बान कमजोर मुला भिबा ताम घोउ। थेतबासेलमा हाडला मिडदा हाड भन्दा कमजोर म्हन्सी मान लउ। तिग्दा भिसम परमेश्वरला दयामायाग्याम याड्बा जुनीरी थेनी गिकनोन हिन्ना। थेतबासेलमा प्रार्थना लमा तिगै तामसे रोकब थालगै भिसी गिकसेम गिकदा ज्यबा व्यवहार लउ।*

ज्यबा गे लमा नातोःबा दुख

8 दाहेन्से एनीगदे जम्मान सेम गिक तसी चिउ। ओच्छे स्य्हान्दोदा तबा दुख हाडदान तबा हड्बान म्हन्गो, हाडला ज्योज्यो आले नाना आडादा हड् लसी माया लउ ओच्छे सोजो तसी चिबादेन ज्यबा बानीबेहोर थोगो। 9 खालैसे आज्यबा लसैनोन एनीगदेसे थेनीगदेदा आज्यबा थालउ। ओच्छे केःबागदेदा एनीगदेसे थाकेःगो। बरु थेनीगदेदा मोलम पिन्गो। तिग्दा भिसम एनीगदेसे मोलम याङ्गै भिसी परमेश्वरसे एनीगदेदा ड्गोइबा हिन्ना। 10 तिग्दा भिसम परमेश्वरला बचनरी चुहड् भिसी भिबा मुला,

“जुन म्हिसे हाडला ल्हुइदा माया लबादेन

सुखला धिन च्याबा सेम लला

थेसे पाप तामदेन लुसीला ताम पाङ्गबा ख्लातोःला।

11 थेसे आज्यबा गे लबा ख्लासी ज्यबा गे लगै,

ओच्छे शान्ति म्हाइसी शान्तिलान लागिरी गे लगै।

12 तिग्दा भिसम प्रभुसे म्हन्बा अन्छारला गे लबा म्हिदा वास्ता लसी

थेनीगदेला प्रार्थना सान्मुला।

तर आज्यबा गे लबागदेदा परमप्रभुसे बिरोध लमुला।”*

13 चुदे एनीगदेसे ज्यबा गे लबा सेम मुजी भिसम एनीगदेदा खाल्से न्होङ्गना लला? 14 तर ज्यबा गे लमाएनोन दुख नातोःजी भिसम परमेश्वरग्याम एनीगदेसे मोलम याङ्गला। थेतबासेलमा एनीगदे खालै म्राङ्गसी लोङ्गआतोः, ओच्छे सुर्दाएनोन लआतोः। 15 बरु ख्रीष्टदा प्रभु हिन्ना भिसी एला सेमहेन्सेन थेदा मान लउ। ओच्छे एनीगदेसे लबा आशला बारेरी खालै म्हिसे ड्गोइजी भिसम पाङ्गबारी सदन तयार तसी चिउ।* 16 तर थेनीगदेदा पाङ्गबा धुइरी सोजो तसी थेनीगदेदा मान लसी पाङ्गो। ओच्छे एनीगदेला सेमदा सदन चोखो थान्गो। थेहड् लजी भिसम एनीगदेसे ख्रीष्टदा विश्वास लबासे लमा याङ्गबा ज्यबा बानीबेहोर म्राङ्गसी एनीगदेदा बिरोध लसी हेला लबागदे हाडनोन पेःला। 17 चुदे परमेश्वरसे चुहड्बान म्हन्बा मुसम आज्यबा गे लसी दुख नाबा भन्दा मी ज्यबा गे लसी दुख नाबान ज्यबा हिन्ना।

* 3:1 एफि ५:२२; कल ३:१८ * 3:3 १ तिमो २:९ * 3:6 उत्प १८:१२ * 3:7 एफि ५:२५; कल ३:१९ * 3:12 भजन ३४:१२-१६ * 3:15 मत्ती ५:१०; यशै ८:१२-१३

18 तिग्दा भिसम य्हाडला पापला लागिरी ख्रीष्ट तिरेम सदनना लागिरी दुख नासी सिजी। थेसे खाइमै पाप आलनी, तर पापीगदेदा परमेश्वर मुबा ग्लारी भोर्बारी सिजी। थे ल्हुइरी सिसी निसै थेदा परमेश्वरसे आत्मारी सोना लजी।†

19 थेनोन आत्माला शक्तिरी ख्रीष्ट फेप्सी च्युप्सी थान्बा आत्मागदेदाएनोन थार्बा पिन्बा समाचार थे:ना लजी। 20 थे आत्मागदे चा ओन्मा नोआ भिबा म्हिसे पानी जहाज सहोबा धुइरी हाड हाडला पाप ख्लासी हाड मुबा ग्लारी खला वा भिसी परमेश्वरसे भ्रान्सी चिबा म्हिगदे मुबा। तर थेनीगदेसे परमेश्वरसे कुल्बा ताम आड्याननी। थेतबासेलमा पानी जहाजरी मुबा म्हि भ्रे जे नामदेन भालग्याम जोगब तजी।* 21 थे नामदेन भाल चा बपतिस्माला चिनु हिनना। चु बपतिस्मा चा ल्हुइला खिदि भ्याड्बारी नुहाब लबा हड्बा आहिन, तर य्हाडला सेम चोखो सहोबाला लागिरी परमेश्वरसे य्हाडदेन छ्याम लबा कबुल हिनना। येशू ख्रीष्ट सिबाग्याम सोबासे लमा बपतिस्मा चा एनीगदे थार्बाला चिनु हिनना। 22 येशू ख्रीष्ट स्वर्गरी फेपजी, ओच्छे स्वर्गदूतगदे, शासन लबागदेदेन शक्तिगदेदा हाडला तहरी थान्सी परमेश्वरला दाहिने छ्यापट्टि मुबा ठिरी धन्छ्याबा मुला।

4

परमेश्वरला लागिरी सोड

1 थेतबासेलमा ख्रीष्टसे खाहड् लसी ल्हुइरी दुख नाजी एनीगदेएनोन थेहड्बान दुख नाबारी तयार तउ। तिग्दा भिसम जुन म्हिसे ल्हुइरी दुख नाला थेसे पाप लबा खलाला। 2 दाहेन्से थे म्हि थेसे म्हन्बा आज्यबा ताम अन्छार आहिन, तर चु ल्हुइ सोतेधोना परमेश्वरसे म्हन्बा अन्छार भ्रला। 3 डाच्छा मी एनीगदे परमेश्वरदा डोआसेबा म्हिगदे हड्बान स्य्हान्दोदेन छ्याम ब्रेल्सी भ्रबा, सेमरी जे लड म्हन्बा थेनोन लसी भ्रबा, ड्य्होइबा सहे थुड्सी मोजमजा लसी भ्रबादेन मूर्तिदा परमेश्वर भिसी ल्हानान पूजा लसी नड्बा खबा गे लसी भ्रजी।

4 ख्रीष्टदा विश्वास आलबागदे दान्दे एनीगदेसे थेनीगदेदेन छ्याम आज्यबा गे आलबा म्राड्सी उदेक तबा मुला। ओच्छे एनीगदेला बिरोध लमुला। 5 तर सोबागदेदेन सिबागदेला निसाफ लबारी तयार तसी धन्छ्याबा परमेश्वरदा थेनीगदेसे हाड हाडसे लबा गेला हिसाब उन्तो:ला। 6 थेतबासेलमान सिबागदेदा थार्बा पिन्बा समाचार थे:ना लबा हिनना। जम्बुलिडरी मुबा स्य्हान्दो म्हिगदेदा हड्बान सिबा म्हिगदेदाएनोन ल्हुइरी मुबा धुइरी निसाफ लबा मुबा। तसैनोन आत्मारी परमेश्वर हड् लसीन सोगै भिसी सिबागदेदाएनोन थार्बा पिन्बा समाचार थे:ना लबा हिनना।

7 जम्मान ताम नाश तबा धुइ खसी जिन्बा मुला। थेतबासेलमा एनीगदे प्रार्थना लबाला लागिरी हाडला सेम खीसी होशियार तसी चिउ। 8 जम्मान भन्दा घेन ताम चा हाड हाड न्हडरी सेमहेन्सेन माया लसी ढिक्सी चिबा हिनना। तिग्दा भिसम मायासे ल्हानान थरीला पापगदे माफ लमुला। 9 एनीगदेसे हाड हाडला दिमरी खबा डोन्बोदा आछेर्ना क्योड्गो।

10 एनीगदेसे परमेश्वरला दयामायाग्याम थरी थरीला मोलमगदे याड्बा मुला। एनीगदेसे थे मोलम अन्छार गिकसेम गिकला लागिरी गे लउ।* 11 चुदे खालैसे ताम पाड्बा मोलम याड्बा मुसम थेसे परमेश्वरसे पाड्बा अन्छार पाड्गै, चुदे खालैसे ह्यो लबा मोलम याड्बा मुसम थेसे परमेश्वरसे पिन्बा शक्तिग्याम ह्यो लगै। थेतबासेलमा जम्मान तामदेन येशू ख्रीष्टग्याम परमेश्वरला मानदेन जयजयकार तगै। थेदा सदन जम्मान मानदेन जयजयकार ओच्छे शक्ति तगै। आमेन।

ख्रीष्टदा विश्वास लबासे लमा तबा दुख

12 डाला सेम निबा ह्योगदे, ल्हानान दुख तबा धुइरी चु खाइमै आतबा ताम तजी भिसी उदेक थाम्हन्गो। तिग्दा भिसम चु चा एनीगदेला विश्वास खाहड्बा मुला भिसी च्याबा हिनना। 13 बरु ख्रीष्टसे नाबा दुख य्हाडसेनोन नाम्याड्जी भिसी ताड्गो। तिग्दा भिसम ख्रीष्टला घेन शक्ति म्राड्मा एनीगदे ल्हानान ताड्म्याड्ला। 14 चुदे ख्रीष्टदा विश्वास लबासे लमा खालैसे एनीगदेला

† 3:18 “पापीगदे” भिबा चा ख्रीष्टदा बिरोध लसी हेला लबा म्हिगदे हिनना (१ पत्रुस ३:१६ सहीगो)। * 3:20 उत्प ६:१-७:२४

* 4:10 हितो ११:३१

बेइज्जत लजी भिसम एनीगदेसे हाड परमेश्वरग्याम मोलम याड्बा म्हि भिसी म्हन्गो। तिग्दा भिसम परमेश्वरला आत्माला घेन य्हालदेन शक्ति एनीगदेदेन छ्याम तला। ¹⁵ तर म्हि साइबा, य्हो लबा, आज्यबा गे लबादेन महिला गेरी या झाड्बा म्हिगदेसे नाबा हड्बा दुख एनीगदे न्हडरी खालैसेन थानागो। ¹⁶ तर खालैसे ख्रीष्टियान तबासे लमा दुख नामुला भिसम थापे:गो। बरु ख्रीष्टला लागिरी दुख नाम्याड्जी भिसी परमेश्वरला जयजयकार लगै। ¹⁷ तिग्दा भिसम निसाफ लबा धुइ तसी जिन्बा मुला, परमेश्वरसे निसाफ लमा डाच्छा हाडलान म्हिगदेला लला। चुदे य्हाडदान डाच्छा निसाफ लबारी चुला भिसम परमेश्वरला समाचार थे:सीनोन विश्वास आलबागदेला गति खाहड्बा तला? ¹⁸ परमेश्वरला बचनरी चुहड् भिसी भिबा मुला,

“परमेश्वरला डाच्छा ज्यबा म्हिदा मी थाना लबारी चुहड्बा गाहो मुला भिसम परमेश्वरदा आतेन्बादेन पापी म्हिगदेला गति झन खाहड्बा तला?”*

¹⁹ थेतबासेलमा परमेश्वरसे म्हन्बा अन्छार दुख नाबागदेसे ज्यबा गे लबारी थाख्लागो। ओच्छे हाडला आत्मा जम्मान सहे सहोबा विश्वास लखम्बा परमेश्वरदा जिम्मा पिन्गो।

5

मण्डलीदा च्याबा म्हिगदेदेन भ्योनगदेसे लोप्तो:बा ताम

¹ थेतबासेलमा एनीगदे न्हडला मण्डलीदा च्याबा म्हिगदेदा डाइ चु बिनती लला। तिग्दा भिसम डाएनोन ख्रीष्टसे नाबा दुख म्हाड्बा मण्डलीदा च्याबा म्हि हिनना। थेहड् लसीन ख्रीष्ट दो:सी फेपखमा थेसे याड्बा य्हालदेन शक्ति डाइनोन याड्ला। ² परमेश्वरसे एनीगदेला विश्वासरी ख्लासी पिन्बा थेला म्हिगदेदा गोठालोसे ग्युगदेदा च्याबा हड् लसी ज्यना लसी च्यागो। चु गे टाडगाला लोभदेन करसे आहिन, तर हाडला सेमहेन्से ताड्सी ताड्सी लउ। तिग्दा भिसम चु परमेश्वरसे म्हन्बा ताम हिनना।* ³ एनीगदेदा जिम्मा पिन्बा म्हिगदेदा एनीगदेसे हाडला तहरी थान्बारी थाम्हाड्गो। तर एनीगदेसे डाच्छा थेनीगदेला लागिरी ज्यबा गे लसी उन्गो। ⁴ थेहड् लजी भिसम मुल गोठालो येशू ख्रीष्ट फेपखमा एनीगदेसे खाइमै आन्होड्बा झक्झक्बा मुकुट याड्ला।

⁵ थेहड् लसीन भ्योन म्हिगदे गन्बागदेला तहरी चिउ। ओच्छे एनीगदे जम्मान हाड हाड न्हडरी सोजो तसी गिकसेम गिकला ताम ड्यान्सी चिउ। तिग्दा भिसम परमेश्वरला बचनरी चुहड् भिसी भिबा मुला,
“परमेश्वरसे घमण्ड लबा म्हिगदेदा बिरोध लमुला,
तर सोजो म्हिगदेदा दयामाया लमुला।”*

⁶ थेतबासेलमा एनीगदे हाडनोन सोजो तसी परमेश्वरला घेन शक्तिला तहरी चिउ। ओच्छे धुइ तमाहेन्से परमेश्वरसे एनीगदेदा म्हिगदेला गुडरी मान याड्बा म्हि सहोला। जमाहेन्से एनीगदेसे मान याड्ला।* ⁷ एनीगदेला जम्मान धन्दा सुर्दा परमेश्वरथोरी थान्गो। तिग्दा भिसम परमेश्वरसेन एनीगदेदा वास्ता लला।

⁸ तसैनोन एनीगदे सदन होशियार तसी छोर्सी चिउ। तिग्दा भिसम एनीगदेला शत्रु शैतान खाल्दा स्याप्ला थेदान चतो:ला भिसी इहार्सी भ्रबा च्यानसे हड् लसी म्हाइसी भ्रमुला। ⁹ थेतबासेलमा विश्वासरी कोड्सी थे शैतानना बिरोध लउ। तिग्दा भिसम जम्बुलिड नाडलान विश्वासीगदेसेनोन एनीगदेसे नाबा हड्बान दुख नाबान मुला भिबा ताम एनीगदेदा थानोन मुला।

¹⁰ जम्मान दयामायासे प्लिड्बा परमेश्वरसे एनीगदेदा ख्रीष्ट येशूदेन छ्याम गिक सहोसी जुकजुकधोना चिबा हाडला य्हालदेन शक्तिरी ड्योइबा मुला। एनीगदेसे तिगै धिन दुख नामाहेन्से परमेश्वरसेन एनीगदेदा पाको म्हि सहोला, ओच्छे एनीगदेला विश्वास कोड्ना लला। ¹¹ जम्मान शक्तिदेन शासन सदन परमेश्वरलान हिनना। आमैन।

चिठीला थुमरी भिबा ताम

* 4:18 हितो ११:३१ * 5:2 यूह २१:१५-१७ * 5:5 हितो ३:३४ * 5:6 मत्ती २३:१२; लूका १४:११; १८:१४

12 परमेश्वरला जम्मान सत्य दयामाया एनीगदेदा घोना लबारीदेन आँट पिन्बारी डाइ विश्वास लखम्बा आले सिलासदा चु चिठीरी जजाकी ताम भ्रिपुड्बा हिन्ना। परमेश्वरला चु दयामायारी एनीगदे कोङ्सी चिउ।*

13 एनीगदेदा हङ्गनोन परमेश्वरसे धम्बा चु बेबिलोन भिबा शहररी† मुबा विश्वासीगदेदेन प्रभुरी डाला झा मर्कूससेनोन एनीगदेदा फ्याफुल्ला भिसी पाड्बा मुला। 14 ओच्छे गिकसे गिकदा सेमहेन्से माया लसी फ्याफुल्गो। एनीगदे ख्रीष्टला म्हिगदे जम्मादान शान्ति तगै।*

* 5:12 मुल १५:२२, ४० † 5:13 बाइबलला ल्हानान विद्वानगदेसे “बेबिलोन शहररी” भिबा चा रोम शहररी हिन्ना भिसी म्हन्मुला।

* 5:14 मुल १२:१२, २५; १३:१३; १५:३७-३९; कल ४:१०; फिले २४

पत्रुससे भिबा न्हीरेमला चिठी चु चिठीला बारेरी पाड्तोःमा

भिबा म्हि: येशूला मुल चेला पत्रुससे भिबा मुबा (२ पत्रुस १:१)।

भिबा गुला: पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाड्बा मुला।

भिबा साल: ओस्पन ईश्वी संवत् ६५-६८ (विक्रम संवत् १२२-१२५) सालला गुडरी भिबा मुबा।
चु चिठी पत्रुससे हाड सिबा भन्दा डाच्छा भिजी (२ पत्रुस १:१४)।

खाल्दा भिबा: ख्रीष्टदा विश्वास लबा जम्बुलिडला जम्मान ग्लारी ससा बडबड तसी चिबा म्हिगदेदा भिबा मुबा।

चु चिठी भिबा चा लुसीला ताम लोपबा म्हिगदेसे लोपबा तामदेन थे तामग्याम खबा आज्यबा तामगदेदा ज्यबा तना लबारी हिन्ना। थे लुसीला ताम लोपबा म्हिगदेसे चा येशू दोःसी आफेप्ख भिसी पाड्बा मुबा। तर पत्रुससे थे लुसीला ताम लोपबा म्हिगदेला ताम थाबान, “जम्मासेन हाडला पाप ख्लासी परमेश्वरपट्टि दोःगै ओच्छे खालैनोन नाश थातगै भिसी प्रभुसे एनीगदेदा भान्बा मुला” (२ पत्रुस ३:९) भिबा परमेश्वरला सेम मुबासे लमा ख्रीष्ट घडसी फेप्खबा हिन्ना भिसी पाड्बा मुला।

मुल तामगदे

फ्याफुल्बा १:१-२

विश्वासीगदेदा ड्योइबा १:३-२१

लुसीला ताम लोपबा म्हिगदे २:१-२२

ख्रीष्ट दोःसी फेप्खबा ताम ३:१-१८

पत्रुससे भिबा न्हीरेमला चिठी

^१ लासू, येशू ख्रीष्टदा तेन्बा डा मुल चेला सिमोन पत्रुसग्याम फ्याफुल्ला। डाइ चु ताम ज्यबादेन ठीक गे लबा य्हाडला परमेश्वरदेन थाबा पिन्बा येशू ख्रीष्टदा डन्से हड लसीन विश्वास लबा एनीगदेदा भिबा हिन्ना।

^२ एनीगदेसे परमेश्वरदेन य्हाडला प्रभु येशू ख्रीष्टदा डोसेबासे लमा ल्हानान दयामायादेन शान्ति याड्बान निगै।

ख्रीष्टसे धम्बा म्हि हड लसी भ्रउ

^३ परमेश्वरसे हाडला घेन शक्तिग्याम थेसे म्हन्बा अन्छारला म्हि सहोबाला लागिरी थेसे य्हाडदा तोःबा जम्मान सहे पिन्बा मुला। घेन य्हालदेन शक्ति ओच्छे ज्यबा गुणग्याम ड्योइबा परमेश्वरदा य्हाडसे डोसेबासे लमा चु जम्मान सहे याड्बा हिन्ना। ^४ थेहड लसीन परमेश्वरसे पिन्ना भिसी लबा ग्लुसीन आयाड्बा घेन कबुलगदे परमेश्वरसे य्हाडदा पिन्बा मुला। चु चा जम्बुलिडरी मुबा नाश तसी निबा आज्यबा तामगदेग्याम थोन्सी परमेश्वरला बानीबेहोर थोसी भ्रबाला लागिरी हिन्ना।

^५ थेतबासेलमा एनीगदेसे खम्तेधोना विश्वासदेन छ्याम छ्यामनोन ज्यबा बानीबेहोर थोगो। चुदे जे आहिन, ज्यबा बानीबेहोर लबा ज्ञान बुद्धि मुबा म्हिणोन दोगो। ^६ थेहड लसीन हाडसे हाडदान तहरी थान्बा, जस्तोन दुख तसै नाखम्बादेन सदन परमेश्वरदा ढन्बा म्हिणोन दोगो। ^७ चुदे जे आहिन, अझ एनीगदे विश्वास लबा ज्योज्यो आले नाना आडागदेदा वास्ता लबादेन माया लबा म्हि दोगो। ^८ चु चा एनीगदे न्हडरी आरेनान आतबा गुण हिन्ना, चुदे एनीगदेसे चु जम्मान गुणगदे थोजी भिसम एनीगदे य्हाडला प्रभु येशू ख्रीष्टला ज्ञान बुद्धिरी बढब तबान निसी एनीगदेसे लबा जम्मान गेगदे ज्यबादेन गे खेल्बा तला। ^९ तर चु गुणगदे आरेबा म्हिगदे चा थारेडला ताम आम्राड्बादेन काना म्हि हड्बान

हिन्ना। चुहड्बा म्हिसे हाडसे लबा डाच्छाला पापला दोष परमेश्वरसे मेटब लजी भिबा तामनोन म्ले:बा मुला।

10 थेतबासेलमा ज्योज्यो आले नाना आडागदे, परमेश्वरसे एनीगदेदा धम्बा तामदा आम्ले:ना झन सदन झनसी चिउ। चुहड् लजी भिसम एनीगदेसे लबा विश्वास खाइमै आमहा। 11 चुहड् लसी यहाडला प्रभु थार्बा पिन्बा येशू ख्रीष्टला जुकजुकधोनाला यहुल्सारी वाड्मा एनीगदेदा ल्हानान मान लला।

12 थेतबासेलमा चु तामगदे डाइ एनीगदेदा सदन ढन्ना लला। हिन्बाम, चु जम्मान ताम एनीगदेदा था मुला। ओच्छे एनीगदेदा लोप्बा सत्य तामरीनोन एनीगदे कोड्सी चिबा मुला। 13 डा सोतेधोना चु जम्मान ताम एनीगदेदा ढन्ना लबान होशियार तना लबा चा ज्यबा हिन्ना भिसी डाइ म्हन्बा मुला। 14 तिग्दा भिसम डा योनान चु जम्बुलिड ख्लासी निबान मुला भिसी डादा यहाडला प्रभु येशू ख्रीष्टसे डाच्छान उन्बा मुला। 15 डा सिसी निसैनोन चु जम्मान ताम एनीगदेसे सदन ढन्गै भिसी खम्तेधोना डाइ एनीगदेदा घोना लबा हिन्ना।

पत्रुससे ख्रीष्टला शक्ति म्राड्जी

16 यहाडला प्रभु येशू ख्रीष्ट घेन शक्तिरी फेपखजी भिसी डन्से पाड्बा चु ताम चलाक म्हिसे म्हन्सी सहोबा कथाग्याम पाड्बा आहिन। तर ख्रीष्टला घेन शक्ति डन्देन छ्यामनोन मुबासे लमा डन्से चु ताम पाड्बा हिन्ना। 17 परमेश्वर आबासे ख्रीष्टदा हाडला यहालदेन शक्ति ओच्छे मान पिन्जी, ओच्छे “चु डाइ सेमहेन्से माया लबा डाला झा हिन्ना, चु म्राड्सी डा ल्हानान ताड्बा मुला” भिबा स्वर्गग्याम परमेश्वरला घेन काइ खजी।* 18 थे चोखो गडरी डनी ख्रीष्टदेन छ्याम मुबा धुइरी स्वर्गग्याम खबा चु काइ डन्सेन थे:बा मुबा।

19 चुहड् लसीन अगमवक्तागदेसे थे:ना लबा परमेश्वरला बचनरी डनी ढुक्क तबा मुला। थेतबासेलमा स्यहोरी रमरम रिमरिम आततेधोना ओच्छे एनीगदेला सेमरी स्यहोला सुक्र आथोन्तेधोना धोपधोपरी नाडसल म्रासी थान्बा हड् लसी चु बचन एनीगदेसे हाडला सेमरी थान्जी भिसम ज्यबा तला। 20 तर परमेश्वरला बचनरी अगमवक्तागदेसे पाड्बा ताम चा थेनीगदेसे म्हन्सी घोना लबारी म्हाइबा ताम आहिन भिसी एनीगदेसे घोतो:ला। 21 तिग्दा भिसम अगमवक्तागदेसे पाड्बा ताम थेन्ना सेमरी म्हन्सी पाड्बा ताम आहिन। तर परमेश्वरला आत्मासे उन्बा अन्छार थेनीगदेसे परमेश्वरग्याम खबा ताम पाड्बा हिन्ना।

2

लुसीला ताम लोप्बा म्हिगदे

1 तर इस्राएलीगदेला गुडरी लुसीला ताम लोप्बा अगमवक्तागदे मुबा। थेहड् लसीन एनीगदेला गुडरीनोन लुसीला ताम लोप्बा म्हिगदे थोन्ना। थेनीगदेसे खालैदा था आतना लसी नाश लबा लुसीला ताम लोप्ला। चुदे जे आहिन, थेनीगदेसे हाडला पापला सय फासी थार्ना लबा प्रभुदान खलाला। ओच्छे थेनीगदेसे लबा गेग्यामसेन थेनीगदे तिक्खुरीन नाश तला। 2 ल्हानान म्हिगदे थेनीगदेसे उन्बा आज्यबा ग्यामरी भ्रसी पे:बा खबा गेगदे लला। थेनीगदेसे लोप्बा ताम ड्यानबा म्हिगदेसे लमान सत्य ग्यामला बिरोध लला। 3 लोभरी वाड्सी थेनीगदेसे लुसीला ताम लोप्सी एनीगदेग्याम फाइदा किन्ना। तर परमेश्वरसे थेनीगदेला निसाफ डाच्छान लसी जिन्बा मुला। थेतबासेलमा थेनीगदे नाश तनोन तला।

4 परमेश्वरसे पाप लबा स्वर्गदूतगदेदाएनोन आख्लानी। ओच्छे थेनीगदेदा नर्गरी भ्याड्जी। तर निसाफ लबा धिनधोनाला लागिरी थेनीगदेदा धोपधोपबा ग्लारी खीसी थान्बा मुला। 5 दडबोरी परमेश्वरसे जम्बुलिडला म्हिगदेदाएनोन आख्लानी। ओच्छे परमेश्वरसे कुल्बा ताम आड्यानबागदेदा परमेश्वरसे नामदेन भाल बाढीग्याम नाश लजी। तर हाडदा सेम निबा ताम थे:ना लबा नोआदेन स्यहान्दो म्हि निसदा चा नामदेन भालग्याम जोगब लसी थान्जी।* 6 थेहड् लसीन परमेश्वरसे सदोमदेन गमोरा भिबा शहरलाएनोन दोष स्याप्सी मेग्याम नाश लजी। थेतबासेलमा

* 1:17 मत्ती १७:१-५; मर्कू ९:२-७; लूका ९:२८-३५ † 1:19 “स्यहोला सुक्र आथोन्तेधोना” भिबा चा प्रभु दो:सी आफेपखतेधोना भिबा हिन्ना। * 2:5 उत्प ६:१-७:२४

परमेश्वरसे कुलबा ताम आङ्ग्यान्बा म्हिगदेला गति खाहङ्गुबा तला भिसी चुग्यामसेन था याङ्गुला।* ७ आज्यबा बानीबेहोर मुबा पेःबा खबा गेगदे लसी भ्रबा म्हिगदे म्हाङ्गुसी दुख नासी चिबा ज्यबा म्हि लोतदा चा परमेश्वरसे जोगब लजी।* ८ थे आज्यबा म्हिगदेला गुडरी चिमा थेनीगदेसे धिन धिननोन लबा पेःबा खबा गे थेःसी, म्हाङ्गुसी ज्यबा म्हि लोतला सेमरी ल्हानान दुख तजी। ९ चुहङ्गु लसी हाङ्गुदा तेन्बा म्हिगदेदा दुखग्याम खाहङ्गु लसी जोगब लसी थान्तोःला। ओच्छे नइबा गे लबागदेला निसाफ लबा धिनधोनाला लागिरी खाहङ्गु लसी खीसी थान्तोःमुला भिबा ताम प्रभुदा था मुला। १० थेनीगदेसे चा खास लसी म्हिदा न्होङ्गुना लबा पेःबा खबा गेगदे जे लसी भ्रमुला। ओच्छे परमेश्वरला अधिकारदा हेला लमुला। स्वर्गरी मुबागदेदा बिरोध लबारीनोन आलोङ्गुमुला।

चुहङ्गुबा म्हिगदे चा मूर्खदेन घमण्डी तमुला। ११ तर स्वर्गदूतगदे लुसीला ताम लोपबागदे भन्दा ल्हानान शक्तिशालीदेन घेन मुला। तसेनोन स्वर्गदूतगदेसे प्रभुला डाच्छा स्वर्गरी मुबागदेदा बङ्गुसी दोष आलमुला। १२ थेहङ्गुबा लुसीला ताम लोपबा म्हिगदेसे चा हाङ्गुसे घोनोन आघोबा तामगदेला बिरोध लमुला। थेनीगदे ज्ञान बुद्धि अरेबा जन्तु हङ्गुबान मुला। थेतबासेलमा थेनीगदे सदन हाङ्गुला बानीबेहोरला तहरी चिमुबा। ओच्छे थेनीगदे चुङ्गुसी साङ्गुबाला लागिरी न्हबा जन्तु हङ्गुबान मुला। थेतबासेलमा थेनीगदे पशु हङ्गु तसी नाश तला।

१३ थेनीगदेसे लबा आज्यबा गेला सजाय थेनीगदेसेन नातोःला। धिनगुडरीन सेमरी जे लइ म्हन्बा थेनोन लबा चा ताङ्गुतोःबा ताम हिन्ना भिसी थेनीगदेसे म्हन्मुला। थेनीगदेसे एनीगदेदेन छ्याम भोज चबा धुडरीनोन एनीगदेदा फसब लइ भिसी म्हन्मुला। एनीगदेदा न्होङ्गुना लबादेन पेःना लबा चु म्हिगदेन हिन्ना। १४ थेनीगदे सदन स्यहानदोदेन छ्याम ब्रेल्बा सेम जे थोसी भ्रमुला, ओच्छे जतिन पाप लसेनोन थेनीगदेसे अझ पाप लबारी आख्लामुला। थेनीगदेसे विश्वासरी कमजोर मुबा म्हिगदेदा फसब लमुला। थेनीगदेला सेम लोभसे प्लिङ्गुबा मुला। परमेश्वरग्याम सजाय याङ्गुबा चुगदेन हिन्ना। १५ थेनीगदेसे ज्यबा ग्याम ख्लासी खानड भ्रइ म्हन्बा थेरीन भ्रजी। ओच्छे थेनीगदेसे बओरला झा बालामसे हङ्गु लसी टाङ्गुगाला लिच्छा भ्रसी आज्यबा गे लसी भ्रजी।* १६ तर बालामसे लबा चुहङ्गुबा पापसे लमा थेसे बङ्गुबा नातोःजी। ओच्छे तामनोन आपाङ्गुबा गधासे म्हिसे हङ्गुनोन ताम पाङ्गुसी थे अगमवक्तादा मूर्ख गे लआपुङ्गुनी।

१७ थेहङ्गुबा म्हिगदे खर्सी निबा क्युइला मुहानदेन लाबालुङ्गुसरसे फ्याङ्गुना लबा खसु हङ्गुबान हिन्ना। थेनीगदेला लागिरी परमेश्वरसे धोपधोपबा ग्ला सहोसी थान्बा मुला। १८ थेनीगदेसे गे आखेल्बा घेन घेन ताम पाङ्गुसी भ्रमुला। ओच्छे भर्खर आज्यबा गे ख्लाबा म्हिगदेदा लहुइला लागिरी सेमसे जे लइ म्हन्बा थेनोन लम्याङ्गुला भिसी लोभ उन्सी फसब लमुला। १९ थेनीगदेसे म्हिगदेदा पापग्याम फेना लला भिसी कबुल लसी भ्रमुला। तर कबुल लबा म्हिगदे हाङ्गुनोन पापला नोकर दोःसी भ्रमुला। तिगदा भिसम जुन तामसे म्हिगदेदा तहरी थान्ना थेनीगदे थेनोन तामला नोकर हिन्ना। २० तर चुदे खालै म्हिसे य्हाङ्गुला प्रभु थार्बा पिन्बा येशू ख्रीष्टदा डोसेसी जम्बुलिङ्गुला नइबा तामगदेग्याम फेसी जिन्सीनोन दोःसी थेनोन नइबा तामरी फसब तजी भिसम थेनीगदेला गति डाच्छाला भन्दा इन आज्यबा तला। २१ परमेश्वरसे कुल्बा ताम अन्छार भ्रतोःला भिबा ताम था याङ्गुसीनोन थे ताम ख्लाबा म्हिसे मी बरु परमेश्वरदा सेम निबा म्हि दोःसी भ्रतोःला भिबा ताम खाङ्गुमै था आयाङ्गुबा हिन्सम ज्यबा तसेला मुबा। २२ थेनीगदे चा “नगीसे हाङ्गुसेन रुइसी दोःसी हाङ्गुसेन चमुला” भिबादेन “द्ववादा जतिन नुहाब लसै दोःसी हिलोरी क्याल्मुला” भिबा सत्य उखानसे पाङ्गुबा हङ्गुबान हिन्ना।*

३

प्रभु दोःसी फेपखबा धिन

१ डाला सेम निबा ह्योगदे, डाङ्गु एनीगदेदा भ्रिबा चु न्हीरिमला चिठी हिन्ना, एनीगदेला सेमसे चोखो ताम म्हन्गै भिसी चु चिठी न्हीरीन गाते तामगदे ढन्ना लबा मुला। २ ओच्छे ल्हानान डाच्छा परमेश्वरला

* २:६ उत्प १९:२४

* २:७ उत्प १९:१-१६

* २:१५ गन्ती २२:४-३५

* २:२२ हितो २६:११

अगमवक्तागदेसे पाडुबा तामदेन मुल चेलागदेसे एनीगदेदा थे:ना लबा य्हाडला थार्बा पिन्बा प्रभुसे कुल्बा तामदा एनीगदेसे सदन ढन्गै भिसी डाइ म्हन्बा मुला।

३ जम्मान भन्दा डाच्छा एनीगदेसे चु ताम घोटो:ला, लिच्छाला धिनरी ह्हाडलान सेमला तहरी भ्रबा म्हिगदे थोन्ना। थे म्हिगदेसे एनीगदेसे विश्वास लबा सत्य तामदा खिसी लबान चुहड् भिसी पाडुला,*

४ “ख्रीष्टसे डा दो:सी खला भिसी कबुल लमुबा आहिन? खाइ खबा? य्हाडला आखे म्हेमेनोन सिसी निजी, चु जम्बुलिड छ्यामाहेन्से तबा जम्मान ताम दान्देधोनाएनोन तबान मुला।”

५ तर परमेश्वरसे बचनग्यामसेन मुदेन जम्बुलिड डाच्छान सहोबा हिन्ना, ओच्छे जम्बुलिड चा क्युडला गुडरी क्युडग्यामसेन सहोबा हिन्ना भिबा ताम था याड्सीनोन थेनीगदेसे वास्ता आलमुला।*

६ थेनोन क्युडसे जम्बुलिड डुबब लसी नाश तजी।* ७ तर परमेश्वरदा आतेन्बा म्हिगदेला निसाफ लसी सजाय पिन्बा धिनना लागिरी थेनोन परमेश्वरला बचनसे दान्देला मुदेन जम्बुलिडदा मेग्याम नाश लबाला लागिरी जोगब लसी थान्बा मुला।

८ डाला सेम निबा ह्हागदे, प्रभुला लागिरी धिन गिक हजार दिड ते तला, हजार दिड धिन गिक तेएनोन तला भिबा ताम एनीगदेसे थाम्ले:गो।* ९ ह्हाडसे लबा कबुल पूरा लबारी प्रभुसे घइना लला भिसी कोड कोड म्हिसे पाड्सेनोन प्रभुसे घइना आल। तर जम्मासेन ह्हाडला पाप ख्लासी परमेश्वरपट्टि दो:गै ओच्छे खालैनोन नाश थातगै भिसी प्रभुसे एनीगदेदा भ्रान्बा मुला।

१० तर प्रभु दो:सी फेपखमा य्हो खबा हड् लसी फेपखला। थे धुडरी मु गुडुड्बा हड्बा घेन आवाज खसी मु म्हासी निला, ओच्छे मुरी मुबा जम्मान सहे चा मेला रापसे ड्युला, ओच्छे जम्बुलिडदेन थेरी मुबा जम्मान सहे क्रोसी नाश तला।*

११ चु जम्मान सहेगदे चुहड् लसी ड्युसी निला भिबा ताम था तबासे लमा एनीगदे खाहड्बा म्हि ततो:ला भिसम एनीगदे परमेश्वरदा सेम निबा बानीबेहोर थोबादेन सदन परमेश्वरदा ढन्बा म्हि दोतो:ला। १२ एनीगदेसे परमेश्वरसे निसाफ लबा धिन योनान खगै भिसी म्हन्सी भ्रान्बा मुला। थे धिनरी मु मेसे क्रोसी नाश तला। ओच्छे मुरी मुबा जम्मान सहेगदे चा मेला रापसे ड्युला। १३ तर प्रभुसे कबुल लबा अन्छार य्हाड चा छार मुदेन छार जम्बुलिडला ग्याम च्यासी चिला। थे छार जम्बुलिडरी जम्मान म्हिगदेसे परमेश्वरदा सेम निबा गे जे लला।*

१४ थेतबासेलमा डाला सेम निबा ह्हागदे, एनीगदे चु ताम तला भिसी भ्रान्सी चिबासे लमा परमेश्वरला शान्तिरी गिक तसी चिबाला लागिरी परमेश्वरला डाच्छा तिगै दागदेन दोष आरेबा म्हि दोबारी भड लउ। १५ य्हाडला प्रभु योनान आफेपखबा चा म्हिगदेसे थार्बा याड्बा हिन्ना भिसी म्हन्गो। य्हाडला सेम निबा आले पावलसेनोन प्रभुसे पिन्बा ज्ञान बुद्धिग्याम एनीगदेदा चुनोन ताम भ्रिबा मुबा। १६ थेसे भ्रिबा जम्मान चिठीरीनोन थेसे चु तामगदे भ्रिबा मुला। थेसे भ्रिबा चिठीगदेरी कोड कोड ताम चा घोबारी गाहो मुला। थेतबासेलमा आघोबादेन तिगै तामरी टुड्गो आरेबा म्हिगदेसे परमेश्वरला बचनरी मुबा तामदा उल्टोपाल्टो लबा हड् लसी थे तामगदेदाएनोन उल्टोपाल्टो लसी ह्हाडसे ह्हाडदान नाश लबा गे लमुला।

१७ थेतबासेलमा डाला सेम निबा ह्हागदे, एनीगदेदा चु ताम डाच्छाहेन्सेन था मुबासे लमा होशियार तसी चिउ। परमेश्वरला बचन आड्यान्बादेन तिगै तामदा वास्ता आलबा न्होड्बा म्हिगदेला तामरी अलमल तसी ह्हाडसे लबा विश्वासदा थाख्लागो। १८ तर य्हाडला प्रभु थार्बा पिन्बा येशू ख्रीष्टला दयामायादेन थेसे पिन्बा ज्ञानरी बढब तबान निउ। प्रभुदा तिनी, न्हडगर ओच्छे सदन मानदेन जयजयकार तगै। आमेन।

* ३:३ यहू १८ * ३:५ उत्प १:६-९ * ३:६ उत्प ७:१०-१२, २१-२३ * ३:८ भजन ९०:४ * ३:१० मत्ती २४:४३; लूका १२:३९; १ थेस ५:२; उन्बा १६:१५ * ३:१३ यशै ६५:१७; ६६:२२; उन्बा २१:१

यूहन्नासे भ्रिबा डाच्छारेमला चिठी चु चिठीला बारेरी पाड्तोःमा

भ्रिबा म्हिः येशूला मुल चेला यूहन्नासे भ्रिबा मुबा। चु यूहन्नासे थार्बा पिन्बा समाचारएनोन भ्रिबा मुला।

भ्रिबा गुलाः पक्का था आरे, तर बाइबल विद्वानगदेसे एफिसस शहरग्याम तखम्ला भिसी पाड्बा मुला।

भ्रिबा सालः पक्का था आरे, तर ल्हानान बाइबल विद्वानगदेसे ओस्पन ईश्वी संवत् ९० (विक्रम संवत् १४७) सालरी भ्रिबा मुबा भिसी पाड्बा मुला।

खाल्दा भ्रिबाः पक्का था आरे, तर ल्हाना हड्बा बाइबल विद्वानगदेसे एशिया अञ्चलरी मुबा मण्डलीगदेदा भ्रिबा मुबा भिसी पाड्बा मुला।

चु चिठीरी मुल ताम न्ही भ्रिबा मुला। ताम गिक चा चु चिठी पढब लबा म्हिगदेसे परमेश्वरदेन थेला झा येशू ख्रीष्टदेन छ्याम सदन संगती लसी चिउ भिसी आँट पिन्बा मुला। ओच्छे अर्गु ताम चा संगतीदा न्होङ्ना लबा थे लुसीला तामगदे अन्छार थाभ्रउ भिसी होशियार तना लबा मुला। चु जम्बुलिडरी चिजी भिसम नड्बा तामगदे खला। ओच्छे येशू चा परमेश्वरला झा जे हिन्ना म्हि दोबारी आखम भिबा लुसीला तामगदे खानडदमान थेःना लबा मुबा। थे लुसीला ताम लोप्बा म्हिगदेसे थार्बा याड्बाला लागिरी जम्बुलिडला जम्मान तामग्याम थारेड चितोःला ओच्छे ज्यबा बानीबेहोर थोसी स्य्हान्दोदा माया लआतोः भिसी लोप्मुबा।

चुहड् लसी लोप्बा लुसीला तामगदेदा यूहन्नासे थाबान येशू ख्रीष्ट म्हिनोन मुबा भिसी घोना लबा मुला। ओच्छे येशूदा विश्वास लबादेन परमेश्वरदा माया लबागदे जम्मासेन गिकसेम गिकदा माया लतोःला भिसी पाड्बा मुला।

मुल तामगदे

तिग्दा भ्रिबा १:१-४

य्हालदेन धोपधोप १:५-२:२९

परमेश्वरला कोलागदेदेन शैतानना कोलागदे ३:१-२४

सत्यदेन फट्टा ताम ४:१-६

मायाग्याम लतोःबा गे ४:७-२१

ढाबारी खम्बा विश्वास ५:१-२१

यूहन्नासे भ्रिबा डाच्छारेमला चिठी

जुनी पिन्बा बचन

¹ डन्से एनीगदेदा दडबोहेन्सेन मुबा जुनी पिन्बा बचनना बारेरी भ्रिबा मुला। चु बचन डन्से हाडसेन थेःबादेन हाडलान मीसे म्राड्बा हिन्ना। ओच्छे डन्से हाडलान यासे थुर्सी च्याबा हिन्ना।* ² थे जुनी परमेश्वरसे डन्दा उन्जी, ओच्छे डन्से म्राड्जी। ओच्छे डन्से हाडसेन म्राड्बा ताम पाड्बा हिन्ना। थेतबासेलमा एनीगदेदाएनोन डन्से थे जुकजुकधोनाला जुनीला बारेरी थेःना लला। परमेश्वर आबादेन छ्याम मुबा थे जुकजुकधोनाला जुनी परमेश्वर आबासेन डन्दा उन्जी।* ³ एनीगदेएनोन डन्देन छ्यामनोन संगती लगै भिसी डन्से म्राड्बादेन थेःबा जम्मान ताम एनीगदेदा पाड्बा मुला। य्हाडला संगती चा परमेश्वर आबादेन थेला झा येशू ख्रीष्टदेन छ्याम मुला ⁴ य्हाडला सेम पूरान ताड्गै भिसी डन्से चु ताम भ्रिबा हिन्ना।

परमेश्वरनोन य्हाल हिन्ना

* 1:1 यूह १:१ * 1:2 यूह १:१४

5 डन्से परमेश्वरला झा येशूग्याम थे:बा समाचारनोन एनीगदेदा थे:ना लबा मुला। थे समाचार चुनोन हिनना, परमेश्वरनोन यहाल हिनना, परमेश्वरदेन छ्याम धोप भिबा मुनोन आरे। 6 चुदे सुडसे चा यहाड परमेश्वरला संगतीरी मुला भिसी पाङ्सी भ्रबा, तर थे अन्छार आभ्रना धोपधोपरीन भ्रजी भिसम यहाड सतय ताम अन्छार आभ्रबा फट्टा हिनना। 7 तर परमेश्वर यहाल मुबा हड् लसी चुदे यहाडएनोन यहालरी भ्रजी भिसम यहाडला गुडरी संगती तला। ओच्छे परमेश्वरला झा येशूला कासेन यहाडला जम्मान पाप खुसी धाना लला।

8 चुदे यहाडसे डाइ पाप लबान आरे भिसी पाङ्जी भिसम यहाडसे हाडसे हाडदान धोका पिन्बा हिनना। ओच्छे यहाडदेन सतय भिबा तनोन आत। 9 तर चुदे यहाडसे डाइ पाप लबा मुला भिसी परमेश्वरला डाच्छा पाङ्जी भिसम थेसे यहाडला पापला दोष मेटब लला। तिग्दा भिसम थे विश्वास लखम्बा ठीक निसाफ लबा परमेश्वर हिनना। थेसेन यहाडला जम्मान आज्यबा गेग्याम यहाडदा फेला। 10 चुदे यहाडसे पाप लबा आरे भिसी पाङ्जी भिसम यहाडसे परमेश्वरदा फट्टा सहोबा हिनना, ओच्छे थेला बचन अन्छार यहाड आभ्र।

2

1 डाला कोलागदे, एनीगदेसे पाप थालगै भिसी डाइ चु ताम एनीगदेला लागिरी भ्रिबान मुला। तर चुदे खालैसे पाप लनोन लजी भिसम यहाडला लागिरी परमेश्वरदेन छ्याम बिन्ती लसी पिन्बा परमेश्वरसे म्हन्बा अन्छार भ्रबा येशू ख्रीष्ट यहाडदेन छ्याम मुला। 2 थेनोन येशू ख्रीष्ट यहाडला पाप माफ लबारी सिबा हिनना। तर थे यहाडला लागिरी जे आहिन जम्बुलिडरी मुबा जम्मान म्हिगदेला पापला लागिरी सिबा हिनना।

3 चुदे यहाडसे परमेश्वरसे कुल्बा तामगदे ड्यानजी भिसम चुग्यामसेन यहाडसे थेदा डोसेजीम भिसी था याङ्ला। 4 जुन म्हिसे डाइ परमेश्वरदा डोसेबा मुला भिसी पाङ्ला, तर थेसे कुल्बा ताम आड्याननी भिसम थे फट्टा हिनना। थेहड्बा म्हिदेन चा सतय भिबा तनोन आत। 5 तर जुन म्हि परमेश्वरला बचन अन्छार भ्रला, थेसे परमेश्वरदा सेमहेनसेन माया लबा तला। चुग्यामसेन यहाड परमेश्वरदेन छ्याम मुला भिबा ताम पक्का तला। 6 परमेश्वरसे म्हन्बा अन्छार भ्रमुला भिबा म्हिसे ख्रीष्ट हड्बान दो:सी भ्रतो:ला।

परमेश्वरसे कुल्बा छार ताम

7 डाला सेम निबा ह्योगदे, डाइ एनीगदेदा भ्रिबा चु ताम परमेश्वरसे कुल्बा छार ताम आहिन। तर डाच्छाहेनसेन एनीगदेदा था मुबा परमेश्वरसे कुल्बा तामनोन डाइ भ्रिबान मुला। चु ताम एनीगदेसे डाच्छान थे:बा बचन हिनना।* 8 तसैनोन डाइ एनीगदेदा चु कुल्बा तामदा छार ताम म्हन्सी भ्रिबान मुला। चु ताम चा ख्रीष्टदेन छ्याम मुला, ओच्छे ख्रीष्टसे एनीगदेदाएनोन चु ताम भ्राङ्ना लबा मुला। तिग्दा भिसम धोप म्हासी निबान मुला, ओच्छे सतय यहाल डाच्छाहेनसेन फेबान मुला।

9 जुन म्हिसे डा यहालरी मुला भिसी पाङ्ला, तर थेसे जम्मान ज्योज्यो आले नाना आडागदेदा हेला लजी भिसम थे म्हि अझ धोपधोपरीन तला। 10 जुन म्हिसे जम्मान ज्योज्यो आले नाना आडादा माया लला थे म्हि यहालरी तला, ओच्छे यहालरी चिबा म्हिसे खालैदा न्होङ्ना आल। 11 तर जुन म्हिसे जम्मान ज्योज्यो आले नाना आडादा हेला लला, थे चा धोपधोपरी तला। थेहड्बा धोपधोपरी भ्रबा म्हिसे हाड खानड निबान मुला भिबा तामनोन था आत। तिग्दा भिसम धोपधोप तबासे लमा थेसे तिगै आम्राङ्।

12 डाला कोलागदे, ख्रीष्टसे लमा एनीगदेला पापला दोष मेटब तबा मुला भिसी डाइ एनीगदेदा चु ताम भ्रिबा मुला।

13 आखे ममगदे, हाडनीसे दड्बोहेनसेन मुबा परमेश्वरदा डोसेबा मुला।

थेतबासेलमा डाइ हाडनीदा चु ताम भ्रिबा मुला।

एनी भर्खरला म्हिगदेदाएनोन डाइ चु ताम भ्रिबा मुला,

एनीगदेसे शैतानदा ढाबा मुला।

* 2:7 यूह १३:३४

ज्योज्यो आले नाना आडागदे, एनीगदेसे परमेश्वर आबादा डोसेबा मुला।

थेतबासेलमा डाइ एनीगदेदा चु ताम भ्रिबा मुला।

14 आखे ममगदे, हाडनीसे दडबोहेन्सेन मुबा परमेश्वरदा डोसेबा मुला।

थेतबासेलमा डाइ हाडनीदा चु ताम भ्रिबा मुला।

एनी भर्खरला म्हिगदेदाएनोन डाइ चु ताम भ्रिबा मुला,
एनीगदेला सेम न्हडरी परमेश्वरला बचन मुबासे लमा
एनीगदे भड्सी शैतानदा ढाबा मुला।

जम्बुलिडरी मुबा सहेदा माया थालउ

15 एनीगदेसे जम्बुलिडदेन जम्बुलिडरी मुबा सहेगदेदा माया थालउ। जुन म्हिसे जम्बुलिडदेन जम्बुलिडरी मुबा सहेगदेदा माया लला, थेसे परमेश्वरदा खाइमै माया आल। 16 तिग्दा भिसम जम्बुलिडरी मुबा यहाडला सेमसे म्हाइबा सहेदेन घमण्ड लबा ताम ओच्छे यहाडला मीसे म्राड्बा नड्बा ताम चा परमेश्वर आबाग्याम खबा आहिन। चु जम्मान ताम चा जम्बुलिडग्याम खबा हिन्ना। 17 महिला सेमसे म्हाइबा जम्बुलिडदेन जम्बुलिडरी मुबा जम्मान सहे नाश तसी निला, तर परमेश्वरसे कुल्बा जम्मान ताम ड्यान्सी भ्रबा म्हि चा खाइमै नाश आत।

ख्रीष्टदा बिरोध लबागदेला बारेरी पाड्बा

18 डाला कोलागदे, चु धुइ जम्बुलिड नाश तबा धुइ हिन्ना। तिग्दा भिसम ख्रीष्टदा बिरोध लबा म्हि खबान मुला भिबा ताम एनीगदेसे थेःबा मुला। ख्रीष्टदा बिरोध लबा थेहड्बा म्हिगदे दानदे लहानान खसी जिन्बा मुला। थेतबासेलमा चुग्यामसेन यहाडसे चु जम्बुलिड नाश तबा धुइ तसी जिन्बा मुला भिसी था याड्बा मुला। 19 थेनीगदे यहाडला म्हि आहिन्बा चीम। थेतबासेलमान थेनीगदे यहाडग्याम फेसी निजी। चुदे थेनीगदे यहाडला म्हि हिन्बा हिन्सम यहाडदेन छ्यामनोन चिसेला मुबा। थेनीगदे यहाडला म्हि आहिन भिबा ताम उन्बाला लागिरी यहाडग्याम फेसी निबा हिन्ना।

20 तर एनीगदे चा ख्रीष्टग्याम परमेश्वरला आत्मासे धम्बा म्हि हिन्ना। थेतबासेलमा एनीगदे जम्मासेन सत्य ताम घोबा मुला। 21 एनीगदेसे सत्य ताम घोबा आरे भिसी डाइ चु ताम भ्रिबा आहिन। तर सत्यग्याम खजिबै लुसीला ताम आख भिबा ताम एनीगदेसे घोबासे लमान डाइ एनीगदेदा चु ताम भ्रिबा हिन्ना।

22 तर लुसीला ताम पाड्बा म्हि खाल हिन्ना? तिग येशूदा थार्बा पिन्बा ख्रीष्ट आहिन भिसी पाड्बा महिनोन लुसीला ताम पाड्बा म्हि आहिन? हिन्ना। चुनोन ख्रीष्टदा बिरोध लबा म्हि हिन्ना। तिग्दा भिसम थेसे परमेश्वर आबादेन थेला झादा सदन बिरोध लमुला। 23 जुन म्हिसे परमेश्वरला झादा बिरोध लला थेसे परमेश्वर आबादाएनोन बिरोध लला। ओच्छे जुन म्हिसे परमेश्वरला झादा थार्बा पिन्बा ग्ले हिन्ना भिसी विश्वास लला थेसे परमेश्वर आबादाएनोन विश्वास लला।

24 थेतबासेलमा जुन ताम एनीगदेसे डाच्छाहेन्सेन थेःबा मुला, थे ताम एनीगदेसे हाडला सेमरी थान्गो। चुदे एनीगदेसे डाच्छाहेन्सेन थेःबा ताम हाडला सेमरी थान्जी भिसम एनीगदे परमेश्वर आबादेन थेला झादेन छ्याम तला। 25 थेसे यहाडदा पिन्ना भिसी लबा कबुल चा जुकजुकधोनाला जुनी हिन्ना।

26 चु जम्मान ताम डाइ एनीगदेदा फसब लबारी म्हाइबा म्हिगदेला बारेरी भ्रिबा हिन्ना। 27 तर एनीगदेसे ख्रीष्टग्याम परमेश्वरला आत्मा याड्बा मुला, थे आत्मा एनीगदेदेन छ्याम सदन धनछ्याला। थेतबासेलमा एनीगदेदा खालैसेन तिगै लोप्आतोः। तिग्दा भिसम परमेश्वरला आत्मासेन जम्मान तामला बारेरी एनीगदेदा लोप्ला। परमेश्वरला आत्मासे लोप्ला ताम चा लुसीला ताम आहिन, सत्य ताम हिन्ना। थेतबासेलमा परमेश्वरला आत्मासे एनीगदेदा लोप्ला अन्छार एनीगदे ख्रीष्टदेन छ्याम गिक तसी चिउ।

28 डाला कोलागदे, ख्रीष्ट दोःसी फेप्खबा धुइरी यहाडसे आँट याड्सी ख्रीष्टला डाच्छा यहाड पेःआतोःगै भिसी सदन ख्रीष्टदेन छ्याम गिक तसी चिउ। 29 ख्रीष्ट परमेश्वरसे म्हन्बा अन्छार भ्रबा

प्रभु हिन्ना भिबा ताम एनीगदेदा थानोन मुला। चु ताम था तमाहेनसे परमेश्वरसे म्हन्बा अन्छार गे लबा जम्मान म्हिगदेएनोन परमेश्वरलान सन्तान हिन्ना भिसी एनीगदेसे था याड्तोःला।

3

परमेश्वरला सन्तान

1 च्यागो, य्हाडदा परमेश्वर आबासे गाते ल्हाना माया लबा मुला। परमेश्वरला मायासे लमान य्हाडदा परमेश्वरला सन्तान भिसी पाड्बा हिन्ना, चु ताम सत्यएनोन हिन्ना। थेतबासेलमा जम्बुलिडला म्हिगदेसे य्हाडदा डोआसेबा हिन्ना, तिग्दा भिसम थेनीगदेसे परमेश्वरदा डोआसेनी।*

2 डाला सेम निबा ह्योगदे, दान्दे चा य्हाड परमेश्वरलान सन्तान हिन्ना। तर लिच्छा चा तिग तला थे ताम य्हाडदा उन्बा आरे। तर ख्रीष्ट दोःसी फेपखबा धुइरी य्हाडएनोन ख्रीष्ट हड्बान दोला। तिग्दा भिसम थे धुइरी य्हाडसे ख्रीष्ट खाहड्बा मुला थेहड्बान म्राड्बला भिबा ताम य्हाडदा था मुला। 3 ख्रीष्टथोरी चुहड्बा आश थान्बा जम्मान म्हिगदेसे ख्रीष्ट खाहड्बा चोखो मुला, हाडदाएनोन थेहड्बान चोखो थान्मुला।

4 पाप लसीन चिबागदे जम्मासेन परमेश्वरला ठिम आड्बान्बा हिन्ना। तिग्दा भिसम ठिम आड्बान्बान पाप हिन्ना। 5 म्हिगदेला पापला दोष मेटब लबाला लागिरी तिगै पाप आरेबा ख्रीष्ट चु जम्बुलिडरी फेपखजी भिबा ताम एनीगदेदा थानोन मुला।* 6 थेतबासेलमा सदन ख्रीष्टदेन छ्याम गिक तसी चिबा म्हिगदेसे पाप आल। तर सदन पाप लसी चिबा म्हिसे ख्रीष्टदा न्ह म्राड्बा मुला न्ह डोसेबा मुला।

7 डाला कोलागदे, एनीगदेदा खालैसेन फसब लआम्याड्गौ। जुन म्हिसे परमेश्वरसे म्हन्बा अन्छार गे लला, थे म्हि परमेश्वरसे म्हन्बा अन्छार भ्रबा ख्रीष्ट हड्बान दोला। 8 तर जुन म्हिसे सदन पाप लला, थे म्हि चा शैतानना हिन्ना। तिग्दा भिसम शैतानसे चा डाच्छाहेनसेन पाप लसीन खमुला। थेतबासेलमा शैतानना गेदा नाश लबाला लागिरी परमेश्वरला झा जम्बुलिडरी फेपखबा हिन्ना। 9 परमेश्वरला सन्तान दोःसी न्हबा म्हिगदेसे सदन पाप लसी आचि, तिग्दा भिसम थेदेन छ्याम परमेश्वरला बानीबेहोर तमुला। थेतबासेलमा थेसे सदन पाप लसी आचि, तिग्दा भिसम परमेश्वरनोन थेला आबा हिन्ना। 10 जुन म्हिसे परमेश्वरदा सेम निबा गेदेन स्य्हान्दोदा माया आल, थे चा परमेश्वरला सन्तान आहिन। थेतबासेलमा थेनीगदेला गेग्यामसेन खाल परमेश्वरला सन्तान, खाल शैतानना सन्तान हिन्ना भिसी प्रस्टन था याड्बा मुला।

गिकसेम गिकदा माया लउ

11 एनीगदेसे डाच्छाहेनसेन थेःबा समाचार चा चुनोन हिन्ना, “य्हाडसे गिकसेम गिकदा माया लतोःला।”* 12 कयिन शैतानना सन्तान दोसी हाडलान आलेदा साइजी। थेतबासेलमा य्हाड कयिन हड्बा दोबारी आत। कयिनसे हाडलान आलेदा तिग्दा साइजी? तिग्दा भिसम थेला आलेसे लबा गे परमेश्वरदा सेम निबा गे मुबा, तर कयिनसे लबा गे परमेश्वरदा सेम आनिबा गे मुबा।*

13 डाला ज्योज्यो आले नाना आडागदे, चुदे एनीगदेदा जम्बुलिडला म्हिगदेसे हेला लसम उदेक थाम्हन्गो। 14 य्हाडसे य्हाडला ज्योज्यो आले नाना आडागदेदा माया लबासे लमा कालग्याम फेसी य्हाडसे छार जुनी याड्जी भिबा ताम य्हाडदा था मुला। तर जुन म्हिसे माया आलनी थे दान्देधोना कालला तहरी मुला।* 15 हाडला ज्योज्यो आले नाना आडागदेदा हेला लबा म्हि चा ज्यानमारा हिन्ना। थेहड्बा महिला लागिरी जुकजुकधोनाला जुनी आरे भिबा ताम एनीगदेदा थानोन मुला।

16 य्हाडदा माया लसी ख्रीष्टसे हाडला ज्याननोन पिन्बासे लमा माया तिग हिन्ना भिबा ताम य्हाडसे ज्यना लसी घोबा मुला। थेतबासेलमा य्हाडसेनोन हाडला ज्योज्यो आले नाना आडागदेला लागिरी ज्याननोन पिन्बारी तयार ततोःला। 17 तर जुन म्हिदेन छ्याम जम्बुलिडला धन सम्पत्ति मुला, थेसे हाडला ज्योज्यो आले नाना आडागदेदा खँचो तबा म्राड्सीनोन आपिन्नी भिसम थेहड्बा म्हिदेन

* 3:1 यूह १:१२ * 3:5 यूह १:२९ * 3:11 यूह १३:३४ * 3:12 उत्प ४:८ * 3:14 यूह ५:२४

छ्याम खाहड लसी परमेश्वरला माया तला? 18 डाला कोलागदे, य्हाडसे सुडसे जे स्य्हान्दोदा माया लबा आहिन, तर य्हाडसे सेमहेन्सेन माया लतोःला। थेहड्बा माया चा य्हाडसे लबा गेग्यामसेन म्नाड्ला। 19 चुग्यामसेन य्हाड सत्यला म्हि हिन्ना भिबा ताम था याड्ला। ओच्छे य्हाड परमेश्वरला डाच्छा दुक्क तसी चिखम्ला। 20 तसैनोन य्हाडदा हाडला सेमसे मी दोष लमुला भिसम परमेश्वर मी इन य्हाडला सेम भन्दा घेन हिन्ना भिबा ताम य्हाडदा था मुला। ओच्छे परमेश्वरदा जम्मान ताम था तला।

21 डाला सेम निबा ह्योगदे, य्हाडला सेमसे य्हाडदा दोष आलनी भिसम य्हाडदा परमेश्वरला डाच्छा निबारी ल्हानान आँट याड्ला। 22 ओच्छे य्हाडसे ह्यीबा जम्मान सहे परमेश्वरग्याम याड्ला। तिग्दा भिसम य्हाडसे परमेश्वरसे कुल्बा ताम ड्यान्सी परमेश्वरदा सेम निबा गे लबा मुला। 23 परमेश्वरसे कुल्बा ताम चा थेला झा येशू ख्रीष्टदा विश्वास लबादेन येशू ख्रीष्टसे कुल्बा अन्छार गिकसेम गिकदा माया लबा हिन्ना। 24 परमेश्वरसे कुल्बा ताम ड्यान्बा म्हिगदे परमेश्वरदेन छ्याम तला, ओच्छे थेनीगदेदेन छ्यामएनोन परमेश्वर तला। परमेश्वर य्हाडदेन छ्याम तला भिबा ताम चा य्हाडदेन छ्याम मुबा परमेश्वरला आत्माग्यामसेन य्हाडसे था याड्बा मुला।

4

परमेश्वरला आत्मादा डोसेगो

1 डाला सेम निबा ह्योगदे, परमेश्वरला आत्मा मुला भिसी भ्रबा खजिबै म्हिदा विश्वास थालउ। तर थेनीगदेदेन छ्याम परमेश्वरला आत्मा मुला कि आरे भिसी च्यागो। तिग्दा भिसम लुसीला ताम पाड्बा अगमवक्तागदे जम्बुलिड नाडनोन खसी जिन्बा मुला। 2 येशू ख्रीष्ट म्हिला रुपरी जम्बुलिडरी फेपखबा हिन्ना भिसी पाड्बा म्हिदेन छ्याम चा परमेश्वरला आत्मा तला। चुग्यामसेन एनीगदेसे थेहड्बा म्हिदेन छ्याम परमेश्वरला आत्मा मुला भिसी था याड्ला। 3 येशू परमेश्वरग्याम फेपखबा हिन्ना भिबा तामदा विश्वास आलबा म्हिगदेदेन छ्याम परमेश्वरला आत्मा आत। तर थेदेन छ्याम ख्रीष्टदा बिरोध लबाला आत्मा तला। थे आत्मा खाल भिबा ताम एनीगदेसे डाच्छान थेःसी जिन्बा मुला। दान्दे थे आत्मा जम्बुलिडरी खसी जिन्बा मुला।

4 डाला कोलागदे, एनीगदे चा परमेश्वरला हिन्ना। थेतबासेलमा एनीगदेसे थे लुसीला ताम पाड्बा अगमवक्तागदेदा ढाबा मुला। तिग्दा भिसम एनीगदे न्हडरी मुबा परमेश्वरला आत्मा चा जम्बुलिडरी मुबा आज्यबा आत्मा भन्दा घेन हिन्ना। 5 थेनीगदे जम्बुलिडला हिन्ना। थेतबासेलमा थेनीगदेसे जम्बुलिडला ताम जे लमुला। ओच्छे थेनीगदेसे पाड्बा ताम जम्बुलिडरी मुबागदेसे जे ड्यान्मुला। 6 तर य्हाड मी परमेश्वरला म्हि हिन्ना। जुन म्हिसे परमेश्वरदा डोसेबा मुला थेसे य्हाडला ताम ड्यान्ना। ओच्छे जुन म्हि परमेश्वरला म्हि आहिन, थेसे य्हाडसे पाड्बा ताम आड्यान। चुग्यामसेन य्हाडसे सत्य आत्मादेन फट्टा आत्मादा डोसेखम्ला।

परमेश्वरला माया

7 डाला सेम निबा ह्योगदे, य्हाडसे गिकसेम गिकदा सदन माया लइ। तिग्दा भिसम माया परमेश्वरग्याम खमुला। जुन म्हिसे जम्मादान माया लला, थे परमेश्वरला सनतान हिन्ना। थेतबासेलमा थेसे परमेश्वरदा डोसेबा मुला। 8 तर जुन म्हिसे स्य्हान्दोदा माया आल, थेसे परमेश्वरदा डोआसे। तिग्दा भिसम परमेश्वरनोन माया हिन्ना। 9 ओच्छे परमेश्वरसे थेग्याम य्हाडसे जुनी याड्गै भिसी हाडला गिक जेन झादा जम्बुलिडरी पुइखसी य्हाडदा हाडला माया उन्जी। 10 चुनोन सत्य माया हिन्ना। चु य्हाडसे परमेश्वरदा लबा माया आहिन, तर परमेश्वरसे य्हाडदा लबा माया हिन्ना। थेतबासेलमान थेसे हाडला झा सिसी य्हाडला पाप माफ तगै भिसी हाडलान झादा जम्बुलिडरी पुइखजी।

11 डाला सेम निबा ह्योगदे, परमेश्वरसे मी य्हाडदा चुहड लसी माया लबा मुला भिसम य्हाडसेनोन गिकसेम गिकदा माया लतोःला। 12 खालैसेन परमेश्वरदा खाइमै म्नाड्बा आरे। तर चुदे य्हाडसे

गिकसेम गिकदा माया लजी भिसम परमेश्वरएनोन य्हाड न्हडरी धन्छ्याला। जमाहेन्से य्हाडसे लबा मायाएनोन परमेश्वरसे य्हाडदा लबा माया ह्ङ्बान तला।*

13 चुह्ङ् लसी य्हाडदा परमेश्वरसे हाडलान आत्मा पिन्बा मुला। थेतबासेलमा य्हाड परमेश्वरदेन छ्याम, ओच्छे परमेश्वर य्हाडदेन छ्याम मुला भिबा ताम य्हाडदा था मुला। 14 जम्बुलिडला जम्मान म्हिदा थार्ना लबारी परमेश्वर आबासे हाडलान झादा जम्बुलिडरी पुइखजी भिबा ताम डन्से म्राड्बा मुला। चु तामनोन डन्से स्य्हान्दोदा पाड्बा हिन्ना। 15 जुन म्हिसे येशूदा परमेश्वरला झा हिन्ना भिसी विश्वास लला, थेदेन छ्याम परमेश्वर धन्छ्याला, ओच्छे थे परमेश्वरदेन छ्याम तला। 16 परमेश्वरसे य्हाडदा गाते माया लमुला भिबा ताम य्हाडदा था मुला, ओच्छे य्हाडसे थेदा विश्वास लबा मुला।

परमेश्वर चा माया हिन्ना, ओच्छे जुन म्हि थे मायारी भ्रला, थे परमेश्वरदेन छ्याम तला, ओच्छे परमेश्वरएनोन थेदेन छ्याम धन्छ्याला। 17 परमेश्वरसे निसाफ लबा धुइरी य्हाड दुक्क तसी चिबाला लागिरी य्हाडसे स्य्हान्दोदा लबा मायाएनोन परमेश्वरसे लबा माया ह्ङ्बान स्होबा मुला। तिग्दा भिसम ख्रीष्ट जस्तो मुला य्हाडएनोन चु जम्बुलिडरी थे ह्ङ्बान दोबा मुला। 18 परमेश्वरसे लबा ह्ङ्बान माया लबा म्हि खाइमै आलोड्। तिग्दा भिसम थेह्ङ्बा मायारी लोड्बा भिबा तनोन आत। तर परमेश्वरसे लबा ह्ङ्बान माया आलबा म्हि चा सजाय याड्ला भिसी लोड्ला।

19 डाच्छा परमेश्वरसेन य्हाडदा माया लबासे लमा य्हाडसेनोन परमेश्वरदा माया लबा मुला। 20 चुदे खालै म्हिसे “डाड परमेश्वरदा माया लमुला” भिसी पाड्सी भ्रला, तर हाडला ज्योज्यो आले नाना आडादा चा हेला लमुला भिसम थे फट्टा हिन्ना। तिग्दा भिसम हाडला मीसे म्राड्बा ज्योज्यो आले नाना आडादा मी माया लबारी आखम्बासे आम्राड्बा परमेश्वरदा माया लबारी आखम। 21 जुन म्हिसे परमेश्वरदा माया लला, थेसे हाडला ज्योज्यो आले नाना आडादाएनोन माया लला। तिग्दा भिसम य्हाडदा ख्रीष्टसे कुल्बा ताम चुनोन हिन्ना।

5

परमेश्वरला झाथोरी लबा विश्वास

1 येशूदा थार्बा पिन्बा ख्रीष्ट हिन्ना भिसी विश्वास लबागदे जम्मान परमेश्वरला सन्तान हिन्ना। ओच्छे जुन म्हिसे आबादा माया लला, थे म्हिसे थेला सन्तानदाएनोन माया लला। 2 चुदे य्हाडसे परमेश्वरदा माया लसी थेसे कुल्बा अन्छार भ्रजी भिसम चुग्यामसेन य्हाडसे परमेश्वरला कोलागदेदा माया लमुला भिबा ताम था याड्ला। 3 तिग्दा भिसम परमेश्वरदा माया लबा भिबा चा परमेश्वरसे कुल्बा अन्छार भ्रबा हिन्ना। परमेश्वरसे कुल्बा अन्छार भ्रबारी गाहोएनोन आरे।* 4 तिग्दा भिसम परमेश्वरला जम्मान कोलागदेसे जम्बुलिडार्थोरी ढाबारी खम्ला। य्हाडसे जम्बुलिडदा ढाबा चा य्हाडला विश्वासग्यामनोन हिन्ना। 5 खालसे जम्बुलिडथोरी ढाखम्ला? जुन म्हिसे येशूदा परमेश्वरला झा हिन्ना भिसी विश्वास लला, थेसे जे जम्बुलिडथोरी ढाखम्ला।

6 येशू ख्रीष्टदा क्युइदेन काग्याम उन्जी। क्युइग्यामसेर् जे आहिन, काग्यामसेनोन हिन्ना। चु ताम सत्य हिन्ना भिसी परमेश्वरला आत्मासेन पाड्बा मुला, तिग्दा भिसम परमेश्वरला आत्मा सत्य हिन्ना। 7 चु तामला साक्षी सोम मुला। 8 क्युइदेन का ओच्छे परमेश्वरला आत्मासे पाड्बा ताम गिकनोन हिन्ना। 9 चुदे य्हाडसे म्हिसे पाड्बा ताम मी विश्वास लमुला भिसम परमेश्वरसे सुड्बा ताम मी य्हाडसे झन विश्वास लनोन तोःबा हिन्ना। तिग्दा भिसम परमेश्वरसे हाडलान झा ख्रीष्टला बारेरीनोन य्हाडदा सुड्बा मुला। 10 थेतबासेलमा जुन म्हिसे परमेश्वरला झादा विश्वास लला, थेला हाडलान सेम न्हडरी चु जम्मान ताम था तला। तर जुन म्हिसे परमेश्वरदा विश्वास आल, थेसे परमेश्वरसे सुड्बा सत्य तामदान लुसीला ताम हिन्ना भिसी म्हन्ना। तिग्दा भिसम परमेश्वरसे हाडला झाला बारेरी सुड्बा तामनोन थेसे विश्वास आल। 11 य्हाडसे म्राड्बा ताम चा परमेश्वरसे

* 4:12 यूह १:१८ * 5:3 यूह १४:१५ † 5:4 चु पदरी “जम्बुलिड” भिबा चा जम्बुलिडरी मुबा जम्मान नड्बा तामगदे हिन्ना।

† 5:6 क्युइग्याम भिबा चा येशूसे किन्बा बप्तिस्मा हिन्ना, ओच्छे काग्याम भिबा चा येशू कुसरी सिबा हिन्ना।

य्हाडदा पिन्बा जुकजुकधोनाला जुनी हिन्ना। थे जुकजुकधोनाला जुनी चा परमेश्वरला झादेन छ्याम मुला।* 12 थेतबासेलमा जुन म्हिदेन छ्याम परमेश्वरला झा मुला, थेदेन छ्याम जुकजुकधोनाला जुनी मुला। जुन म्हिदेन छ्याम परमेश्वरला झा आरे, थेदेन छ्याम जुकजुकधोनाला जुनी आरे।

जुकजुकधोनाला जुनी

13 परमेश्वरला झादा विश्वास लबा म्हि एनीगदेसे जुकजुकधोनाला जुनी याड्बा मुला भिबा ताम था याड्गै भिसीन डाइ चु ताम भिबा हिन्ना। 14 परमेश्वरसे म्हन्बा अन्छार य्हाडसे जुन सहे हीसैनोन पूरा लला भिबा तामरी य्हाड परमेश्वरथोरी ढुकक मुला। 15 य्हाडसे जुन सहे हीसैनोन परमेश्वरसे पूरा लमुला भिबा ताम य्हाडदा था मुला। ओच्छे य्हाडसे परमेश्वरदेन छ्याम हीबा सहेगदेएनोन याड्सी जिन्बा मुला भिबा ताम य्हाडदा था मुला।

16 चुदे खालै म्हिसे ह्हाडला ज्योज्यो आले नाना आडासे सिना आलबा पाप लबा म्हाड्जी भिसम थेला लागिरी परमेश्वरदेन छ्याम प्रार्थना लसी पिन्गो। थेहड् लसी एनीगदेसे प्रार्थना लजी भिसम थेसे जुकजुकधोनाला जुनी याड्ला। तर सिना लबा पापएनोन मुला, थेहड्बा पाप लबा म्हिगदेला लागिरी चा प्रार्थना लउ भिसी डाइ एनीगदे खालैदान आपाड्। 17 जम्मान खाल्ला नडबा गेगदे पाप हिन्ना, तसैनोन सिना आलबा पापएनोन मुला।

18 परमेश्वरला कोलागदे खालैसेन सदन पाप आलमुला भिबा ताम य्हाडदा था मुला। तिग्दा भिसम परमेश्वरला झासे थेदा जोगब लसी थान्ना, ओच्छे शैतानसे थेदा थुर्बारी आखम। 19 चु जम्बुलिड शैतानना यारी मुसैनोन य्हाड परमेश्वरला सन्तान हिन्ना भिबा ताम य्हाडदा था मुला। 20 परमेश्वरला झा फेपखजी, ओच्छे थे सत्य परमेश्वर हिन्ना भिबा ताम घोखमगै भिसी य्हाडदा ज्ञान बुद्धि पिन्बा मुला भिबा ताम य्हाडदा था मुला। य्हाड थेला झा येशू ख्रीष्टदेन छ्याम तबासे लमा दान्दे य्हाड सत्य परमेश्वरदेन छ्याम मुला। थेनोन सत्य परमेश्वर जुकजुकधोनाला जुनी हिन्ना।

21 थेतबासेलमा डाला कोलागदे, एनीगदेसे मूर्तिदा तेन्बा ख्लागो। एनीगदेसे ह्हाडला सेमरी परमेश्वरदा बाहेक अर्गु तिगैदान थाथान्गो।

* 5:11 यूह ३:३६ † 5:16 चुरी “सिना लबा” भिबा चा परमेश्वरग्याम सदन फेबा हिन्ना।

यूहन्नासे भ्रिबा न्हीरेमला चिठी चु चिठीला बारेरी पाड्तोःमा

भ्रिबा म्हि: मण्डलीदा च्याबा म्हिसे भ्रिबा मुबा (२ यूहन्ना १:१)। बाइबलला ल्हाना हड्बा विद्वानगदेसे मण्डलीला गे लबा चु मण्डलीदा च्याबा म्हि चा येशूला मुल चेला यूहन्ना हिन्ना भिसी पाड्बा मुला।

भ्रिबा ग्ला: पक्का था आरे, तर कोइ कोइ बाइबल विद्वानगदेसे एफिसस शहरग्याम तखम्ला भिसी पाड्बा मुला।

भ्रिबा साल: ल्हाना हड्बा बाइबल विद्वानगदेसे ओस्पन ईश्वी संवत् ९० (विक्रम संवत् १४७) सालरी भ्रिबा मुबा भिसी पाड्बा मुला।

खाल्दा भ्रिबा: परमेश्वरसे धम्बा म्रिडम्हेमेदेन थेला कोलागदेदा भ्रिबा मुबा (२ यूहन्ना १:१)। थे म्रिडम्हेमे खाल हिन्ना भ्रिबा ताम खालैदा था आरे। थे म्रिडम्हेमे चा मण्डली गिक मुबा ओच्छे थेला कोलागदे चा थे मण्डलीला म्हिगदे मुबा भिसी कोइ कोइ बाइबल विद्वानगदेसे पाड्बा मुला।

चु चिठीरी गिकसेम गिकदा माया लउ ओच्छे लुसीला ताम लोपबा म्हिदेन थेसे लोपबा तामग्याम होशियार तसी चिउ भिसी पाड्बा मुला।

मुल तामगदे

फ्याफुल्बा १-३

माया चा जम्मान भन्दा मुल ताम हिन्ना ४-६

लुसीला तामग्याम जोगब तसी चिउ भिसी होशियार तना लबा ७-११

चिठीला थुमरी भ्रिबा ताम १२-१३

यूहन्नासे भ्रिबा न्हीरेमला चिठी

१ लासूसो परमेश्वरसे धम्बा आडा, एदेन एला कोलागदेदा डा मण्डलीदा च्याबा म्हिग्याम फ्याफुल्ला! डाइ एदेन एला कोलागदेदा ल्हानान माया लबा मुला। डाइ जे आहिन, सत्यदा डोसेबागदे जम्मासेन एनीगदेदा माया लबा मुला। २ तिग्दा भिसम थे सत्य य्हाडदेन छ्याम धन्छ्याबा मुला। चु सत्य य्हाडदेन छ्याम दान्दे जे आहिन सदन धन्छ्याला।

३ य्हाड सत्यदेन मायारी गिक तसी चिबागदेदेन छ्याम परमेश्वर आबादेन थेला झा येशू ख्रीष्टग्याम मोलमदेन दया ओच्छे शान्ति तला।

ख्रीष्टसे कुल्बा अन्छार भ्रतोःला

४ य्हाडदा परमेश्वर आबासे कुल्बा अन्छार एला कोइ कोइ झा झामेगदे सत्य ग्यामरी भ्रबा म्राड्सी डा ल्हानान ताड्जी। ५ आडा, दाहेन्से डाइ एदा चु ताम पाड्ला, चु ताम चा डाइ एदा कुल्बा छार ताम आहिन। तर य्हाडसे गिकसेम गिकदा माया लतोःला भिसी डाच्छाहेन्सेन य्हाडदा कुल्बा ताम हिन्ना।* ६ परमेश्वरसे कुल्बा अन्छार भ्रबा भिबान गिकसेम गिकदा माया लबा हिन्ना। एसे डाच्छाहेन्सेन थेःबा परमेश्वरसे कुल्बा ताम चुनोन हिन्ना। थेतबासेलमा एनीगदे जम्मासेन गिकसेम गिकदा माया लसी ठिक्सी चितोःला।

७ तिग्दा भिसम म्हिगदेदा फसब लबा म्हिगदे जम्बुलिडला जम्मान ग्लारी खसी जिन्बा मुला। थे म्हिगदे चा येशू ख्रीष्ट जम्बुलिडरी महिला रुपरी फेपखबा हिन्ना भिसी विश्वास आलबा म्हिगदे हिन्ना। चुगदे चा छल लबादेन ख्रीष्टदा बिरोध लबा म्हिगदे हिन्ना। ८ थेतबासेलमा एनीगदेसे दुख

* १:५ यूह १३:३४; १५:१२, १७

लसी लबा गेला इनाम आस्योर्बाला लागिरी थेहड्बा म्हिगदे म्राड्सी एनीगदे ह्वाडनोन होशियार तसी चिउ। तर ह्वाडसे याड्तोःबा इनाम पूरान याड्स्वम्बा म्हि दोगो।

⁹ स्त्रीष्टसे कुल्बा अन्छार आभ्रबा, तर स्य्हान्दोला ताम ड्यानसी भ्रबा म्हिदेन छ्याम परमेश्वर आत। तर स्त्रीष्टसे कुल्बा अन्छार भ्रबा म्हिदेन छ्याम परमेश्वरदेन थेला झा तला। ¹⁰ चुदे खालै म्हि एनीगदे मुबा ग्लारी खसी स्त्रीष्टसे कुल्बा अन्छारला ताम आपाड्नी भिसम एनीगदेसे ह्वाडला दिमरी वाड्थापुड्गो। ओच्छे थेहड्बा म्हिदा फ्याथाफुल्गो। ¹¹ तिग्दा भिसम थेहड्बा म्हिदा फ्याफुल्बा चा य्हाडसे थेदा नइबा गे लबारी आँट पिन्बा हिन्ना।

¹² डाइ एनीगदेदा पाड्तोःबा ताम मी ल्हानान मुबा। तसैनोन दान्दे डाइ जम्मान ताम चिठीरी भ्रिबा आरे। तर डा एनीगदे मुबा ग्लारी खसी हुप तसी जम्मान ताम लबा सेम मुला, थे धुइरी य्हाड ल्हानान ताड्म्याड्ला।

¹³ थेहड् लसीन परमेश्वरसे धम्बा एला आडाला झा झामेगदेसेनोन एदा फ्याफुल्ला भिसी पाड्बा मुला।

यूहन्नासे भिबा सोमरेमला चिठी चु चिठीला बारेरी पाङ्तोःमा

भिबा म्हि: मण्डलीदा च्याबा म्हिसे भिबा मुबा (३ यूहन्ना १:१)। बाइबलला ल्हाना हड्बा विद्वानगदेसे चु मण्डलीदा च्याबा म्हि चा येशूला मुल चेला यूहन्ना हिन्ना भिसी पाङ्बा मुला।

भिबा ग्ला: पक्का था आरे, तर कोइ कोइ बाइबल विद्वानगदेसे एफिसस शहरग्याम तखम्ला भिसी पाङ्बा मुला।

भिबा साल: ल्हाना हड्बा बाइबल विद्वानगदेसे ओस्पन ईश्वी संवत् ९० (विक्रम संवत् १४७) सालरी भिबा मुबा भिसी पाङ्बा मुला।

खाल्दा भिबा: गायस भिबा म्हिदा भिबा मुबा।

चु चिठीरी यूहन्नासे गायसदा ज्यबा म्हि भिसी पाङ्बा मुला, तिग्दा भिसम थेसे विश्वास लबागदेदा हो लबा मुबा। ओच्छे यूहन्नासे डेमेत्रियस भिबा म्हिग्याम होशियार तसी चिउ भिसी गायसदा पाङ्बा मुला।

मुल तामगदे

फ्याफुल्बा १-४

गायसला बारेरी पाङ्बा ज्यबा ताम ५-८

डियोत्रिफसदा दोष लबा ताम ९-१०

डेमेत्रियसला बारेरी पाङ्बा ज्यबा ताम ११-१२

चिठीला थुमरी भिबा ताम १३-१५

यूहन्नासे भिबा सोमरेमला चिठी

1 लाससो डाला सेम निबा हो गायस, डा मण्डलीदा च्याबा म्हिग्याम फ्याफुल्ला! सत्य ताम अनछार भ्रबा एदा डाइ सेमहेन्सेन माया लबा मुला।* 2 डाला सेम निबा हो, ए विश्वासरी ज्यबा मुला भिबा ताम डादा था मुला। थेहड् लसीन एदा सदन ज्यबा तगै भिसी डाइ एला लागिरी प्रार्थना लबा मुला। 3 ए विश्वासरी कोड्बा मुला भिबादेन सत्यरी चिबा मुला भिबा ताम म्राङ्सी थेग्याम खबा कोइ कोइ ज्योज्यो आलेगदेसे डादा पाङ्जी। थे ताम थेःसी डा ल्हानान ताङ्बा मुला। 4 थेहड् लसी डाला कोलागदे सत्यरी भ्रबा मुला भिबा ताम थेःम्याङ्बा भन्दा घेन ताङ्बा ताम डाला लागिरी अर्गु तिगै आरे।

सत्य तामरी गिक तबागदेदा सेमहेन्सेन हो लउ

5 डाला सेम निबा हो, एसे जम्मान ज्योज्यो आले नाना आडागदेला लागिरी विश्वासला गे लबा मुला। एसे डोसेबा ज्योज्यो आले नाना आडागदेला लागिरी जे आहिन, डोआसेबा ज्योज्यो आले नाना आडागदेला लागिरीएनोन गे लबा मुला। 6 एसे थेनीगदेदा गाते माया लसी वास्ता लजी भिबा ताम थेनीगदेसे मण्डलीला डाच्छा पाङ्बा मुला। थेनीगदेसे लबारी छ्याइबा गेरी एसे अझ हो लसम एला गेग्याम परमेश्वर ताङ्ला। 7 तिग्दा भिसम थेनीगदे प्रभुला गे लबारी भ्रबासे लमा प्रभुदा विश्वास आलबा म्हिगदेग्याम तिगै सहे आकिन्ना खबा मुला। 8 थेतबासेलमा सत्य तामरी गिक तबाला लागिरी थेनीगदेदेन छ्याम ढिक्सी य्हाडसे चुहड्बा गे लबा म्हिगदेदा हो लतोःला।

9 डाइ मण्डलीला लागिरी तिगै ताम भिबा मुबा। तर एनीगदेला गुडरी मुबा ह्हाडसे ह्हाडदान घेन म्हन्बा डियोत्रिफससे डाला तामदा वास्ता आलनी। 10 डा थेरी खमा थेसे लबा जम्मान ताम एनीगदेदा पाङ्ला। थेसे य्हाडला बिरोध लसी लुसीला ताम लबा मुला। चुदे जे आहिन, थेसे विश्वासी ज्योज्यो आले नाना आडागदेदा वास्ता आलमुला। ओच्छे वास्ता लबारी म्हाइबागदेदाएनोन मण्डलीग्याम मडग्यार तेःमुला।

* 1:1 मुल १९:२९; रोमी १६:२३; १ कोर १:१४

11 डाला सेम निबा ह्यो, ए आज्यबा तामला लिच्छा थाभ्रउ, तर ज्यबा तामला लिच्छा भ्रउ। जुन म्हिसे ज्यबा लला थे परमेश्वरला म्हि हिन्ना। तर जुन म्हिसे आज्यबा लला थेसे परमेश्वरदा डोसेबा आरे। 12 तर डेमेत्रियसदा चा जम्मासेन ज्यबा म्हि हिन्ना भिसी पाङ्मुला, चु ताम मी थेसे लबा सत्य गेग्यामसेन था याङ्ला। थेला बारेरी स्यूहान्दो म्हिगदेसे पाङ्बा ताम डन्सेनोन पाङ्खम्ला। डन्से पाङ्बा ताम सत्य ताम जे तमुला भिबा ताम एनीगदेदा थानोन मुला।

13 डाइ पाङ्तोःबा ताम मी ल्हानान मुबा। तसैनोन दान्दे डादा चिठीरी भिबा सेम आरे। 14 तर य्हाड योनान हुप तला भिसी डाइ आश लबा मुला, य्हाड हुप तसीन जम्मान ताम लला।

15 एदेन छ्याम परमेश्वरला शान्ति तगै। चुरी मुबा जम्मान ह्योगदेसेनोन एदा फ्याफुल्ला भिसी पाङ्बा मुला। थेरी मुबा जम्मान ह्योगदेदाएनोन डाइ फ्याफुल्बा मुला भिसी पाङ्सी पिन्गो।

यहूदासे भिबा चिठी चु चिठीला बारेरी पाङ्तोःमा

भिबा म्हि: येशूदेन याकूबला आले यहूदासे भिबा मुबा (यहूदा १:१, मत्ती १३:५५, मर्कूस ६:३)।

भिबा ग्ला: पक्का था आरे, तर कोइ कोइ बाइबल विद्वानगदेसे यरूशलेम शहरग्याम तखम्ला भिसी पाङ्बा मुला।

भिबा साल: ओस्पन ईश्वी संवत् ६५-७० (विक्रम संवत् १२२-१२७) सालला गुडरी भिबा मुबा।

खाल्दा भिबा: येशूदा विश्वास लबा म्हिगदेदा भिबा मुबा।

यहूदासे चु चिठी लुसीला ताम लोपूबा म्हिगदेग्याम होशियार तना लबाला लागिरी भिबा मुबा। थे लुसीला ताम लोपूबा म्हिगदेसे ह्वाडसे ह्वाडदान येशूदा विश्वास लबा म्हि हिन्ना भिसी पाङ्मुबा। चु चिठी पत्रुससे भिबा न्हीरेमला चिठी ह्वाडान मुला। यहूदासे चु चिठी पढब लबागदेदा परमेश्वरसे ह्वाडला म्हिगदेदा पिन्बा विश्वासदा जोगब लसी थान्बाला लागिरी आँट पिन्बा मुला।

मुल तामगदे

फ्याफुल्बा १-२

लुसीला ताम लोपूबागदेला बानीबेहोरदेन होशियार तना लबा तामगदे ३-१६

विश्वासरी कोङ्सी चिउ भिसी होशियार तना लबा १७-२३

परमेश्वरला जयजयकार लबा २४-२५

यहूदासे भिबा चिठी

1 लासो, येशू ख्रीष्टदा तेन्बा डा याकूबला आले यहूदाग्याम परमेश्वरसे धम्सी माया लबागदेदेन येशू ख्रीष्टसे जोगब लसी थान्बागदेदा फ्याफुल्ला!*

2 एनीगदेसे परमेश्वरग्याम ल्हानान दया, शान्तिदेन माया याङ्गै।

पाप लबागदेदा परमेश्वरसे सजाय पिन्ना

3 डाला सेम निबा ह्वागदे, य्हाडदा परमेश्वरसे माया लसी थान्बा लबा गेला बारेरी सेमहेन्सेन भिड म्हनमुबा। तर परमेश्वरसे ह्वाडला लागिरी फेसी थान्बा म्हिगदेदा सदनना लागिरी तिरेम पिन्बा विश्वासदा जोगब लसी थान्बारी चा एनीगदेसे भड याङ्गै भिसी डाइ चु ताम भिनोन तोःला भिसी म्हनजी। 4 तिगदा भिसम लुसीला ताम लोपूबा कोइ कोइ म्हिगदे एनीगदेला गुडरी खालैसे था आयाङ्ना लसी वाङ्बा मुला। थेनीगदे चा परमेश्वरदा आतेन्बा म्हि हिन्ना। थेनीगदेसे एनीगदेदा परमेश्वरग्याम दयामाया याङ्बा गा भिसी पाप लपुङ्मुला। ओच्छे येशू ख्रीष्टनोन य्हाडला प्रभुदेन मालिक हिन्ना भिसीएनोन विश्वास आलमुला। चुह्वाडला म्हिगदेसे परमेश्वरग्याम सजाय याङ्ला भिसी डाच्छान परमेश्वरला बचनरी भिबा मुला।

5 डाच्छा प्रभुसे तिग तिग लजी भिबा ताम एनीगदेदा था मुसैनोन डाइ एनीगदेदा कोइ कोइ ताम ढन्ना लला। थेसे ह्वाडला म्हि इस्त्राएलीगदेदा मित्र यहूल्साग्याम तेःसी भजी। तसैनोन थेनीगदे न्हडला विश्वास आलबा म्हिगदेदा लिच्छा नाश लजी।* 6 ओच्छे थेदा पिन्बा अधिकारला वासता आलना ह्वाडला ग्ला ख्लासी भ्रबा स्वर्गदूतगदेदाएनोन निसाफ लबा धुइरी सजाय पिन्बाला लागिरी खाइमै स्योर्बारी आखमना लसी प्रभुसे च्याल्दासे खीसी धोपधोपूबा ग्लारी थान्बा मुला। 7 थेह्वाड लसीन सदोमदेन गमोरा भिबा शहर ओच्छे थे शहरला क्यारमारला शहरला जम्मान म्हिगदेदा प्रभुसे नाश लजी। तिगदा भिसम थेनीगदे स्य्हान्दोदेन छ्याम ब्रेल्सी भ्रबादेन हेम्फेबे हेम्फेबेन ब्रेल्सी नइबा गे लसी भ्रमुबा। थे म्हिगदेदा खाइमै आसिबा मेग्याम सजाय पिन्सी दान्देला म्हिगदेदा उन्बा मुला।*

* 1:1 मत्ती १३:५५; मर्कू ६:५ * 1:5 प्रस्था १२:५१; गन्ती १४:२९-३० * 1:7 उत्प १९:१-२४

8 थेहड्ड लसीन म्हड म्राड्बा चु लुसीला ताम लोपुबा म्हिगदेसे हाडसे हाडदान पाप लपुडमुला, ओच्छे परमेश्वरग्याम अधिकार याड्बा म्हिगदेदा हेला लबादेन स्वर्गरी मुबागदेदा खिसी लमुला। 9 मुल स्वर्गदूत मिखाएलसेनोन मोशाला लासला बारेरी शैतानदेन छ्याम अधिकारला ताम लमा शैतानदा बिरोध लसी आबड्ना “प्रभुसेन एदा बड्गै” भिसी पाड्बा मुबा।* 10 तर चुहड्बा म्हिगदेसे चा हाडसे घोतोःबा तामएनोन घोनोन आघोना बिरोध लसी भ्रमुला। तिग्दा भिसम थेनीगदे ज्ञान आरेबा जनतुगदे हड्बान मुला। थेहड्बा बानीबेहोरसे लमान थेनीगदे नाश तला।

11 थेनीगदेसे परमेश्वरग्याम घेन सजाय याड्ला। तिग्दा भिसम थेनीगदे कयिन भिबा म्हिला हड्बान बानीबेहोर थोसी भ्रबा मुला। ओच्छे टाड्गाला लागिरी बालाम भिबा म्हिसे लबा हड्बान नइबा गे लसी भ्रबा मुला। थेहड्ड लसीन कोरह भिबा म्हिसे हड्बान परमेश्वरग्याम अधिकार याड्बा तिगै दोष आरेबा म्हिगदेदान बिरोध लसी भ्रबा मुला। थेतबासेलमा थेनीगदेएनोन थे म्हिगदे हड्बान नाश तला।*

12 चु म्हिगदे चा एनीगदेसे मण्डलीरी लबा भोजगदेरी बेइज्जत लबागदे हिन्ना। तिग्दा भिसम थेनीगदेसे तिगै धन्दा सुर्दा आलना हाडला जे वास्ता लसी ल्हानान चबा थुड्बा लमुला। थेनीगदे लाबासे भोर्बा नाम आरेबा खसुदेन तिगै आरोबा सेखला दोड हड्बान हिन्ना। थेहड्बा दोड चा नहीरेमधोना सिसी टाहेनसेन नइसी गुर्मुला। 13 थेनीगदे समुन्द्ररी रेःबा छाल हड्बान हिन्ना। तिग्दा भिसम समुन्द्ररी छाल रेःमा बोप्स्या थोन्बा हड्ड लसी थेनीगदेला सुड्ग्याम नइबा तामगदे थोन्ना। थेहड्ड लसीन थेनीगदे मुग्याम ताइसी म्हासी निबा सार हड्बान मुला। थेहड्बा म्हिगदेला लागिरी चा जुकजुकधोनाला लागिरी धोपधोपुबा ग्ला सहोसी थान्बा मुला।

14 आदमहेनसे पुस्ता निस लिच्छाला हनोक भिबा म्हिसेनोन थेहड्ड म्हिगदेला बारेरी डाच्छान चुहड्ड भिसी पाड्बा मुबा, “च्यागो, परमप्रभु झ्यासीन झ्याबारी आखमुबा हाडला म्हिगदेदेन छ्याम फेप्खबान मुला।* 15 थेसे जम्मान म्हिगदेला निसाफ लला ओच्छे परमेश्वरदा आतेन्ना पाप गे लसी परमेश्वरला बिरोध लसी नइबा ताम लबागदेदा सजाय पिन्ना। 16 गनगन लबागदे, स्य्हान्दोदा दोष लबागदे, नइबा सेम अन्छार गे लबागदे, घेन दोःसी ताम लबागदेदेन हाडला फाइदाला लागिरी लुसीला ताम पाड्बागदे चा चुगदेन हिन्ना।”

विश्वास थाख्लागो भिसी पाड्बा

17 तर डाला सेम निबा ह्योगदे, एनीगदेसे य्हाडला प्रभु येशू ख्रीष्टला मुल चेलागदेसे डाच्छा पाड्बा ताम थामलेःगो। 18 थेनीगदेसे चुहड्ड भिसी पाड्मुबा, “लिच्छाला धिनरी परमेश्वरदा आतेन्बादेन सेमरी जे लइ म्हन्बा थेनोन अन्छार लसी भ्रबा म्हिगदेसे खिसी लला।”* 19 एनीगदेदा गिकसेम गिकग्याम फेना लबा म्हिगदे, महिला ज्ञान बुद्धि अन्छार भ्रबा परमेश्वरला आत्मा आरेबा म्हिगदे चुगदेन हिन्ना।

20 तर डाला सेम निबा ह्योगदे, एनीगदे चा हाडसे लबा चोखो विश्वासरी बढब तबान निउ। ओच्छे परमेश्वरला आत्माला शक्तिरी प्रार्थना लउ। 21 जुकजुकधोनाला जुनी याड्बाला लागिरी एनीगदेसे य्हाडला प्रभु येशू ख्रीष्टला दया भ्रान्सी चिउ, ओच्छे परमेश्वरला मायारी हाडसे हाडदान जोगब लसी थान्गो। 22 थेहड्ड लसीन शङ्का लबा म्हिगदेदा एनीगदेसे दया लउ। 23 स्य्हान्दोगदेदा नर्गला मेग्याम तेःसी जोगब लउ, ओच्छे खालै खालैदा दया लबारी होशियार तउ, पापसे लमा न्होड्बा थेनीगदेला बानीबेहोरदा बिरोध लउ।

परमेश्वरला जयजयकार लउ

24 एनीगदेदा पापरी फसब तबाग्याम जोगब लबा शक्तिशाली परमेश्वरला जयजयकार तगै। थेसे एनीगदेदा तिगै दोष आरेबा म्हि सहोसी हाडलान घेन य्हालला डाच्छा ताड्ना लसी भोर्ला। 25 य्हाडला प्रभु येशू ख्रीष्टग्याम य्हाडदा थान्ना लबा थेनोन परमेश्वर गिक जे सदन जम्मान भन्दा

* 1:9 दानि १०:१३, २१; १२:१; उन्बा १२:७; वयव ३४:६; जक ३:२ * 1:11 उत्प ४:३-८; गन्ती २२:१-३५; १६:१-३५ † 1:14 ग्रीक बाइबलरी “म्हिगदे” भिसी पाड्बा आरे। थेतबासेलमा बाइबलला ल्हाना हड्बा विद्वानगदेसे स्वर्गदूतगदे हिन्ना भिसी पाड्बा मुला (मत्ती २५:३१)। * 1:14 उत्प ५:१८, २१-२४ * 1:18 २ पत्रु ३:३

घेन ओच्छे थेदा जे घेन मानदेन जयजयकार ओच्छे शक्तिदेन अधिकार डाच्छाहेन्से दान्देधोना ओच्छे जुकजुकधोनान तगै। आमेन।

परमेश्वरसे यूहन्नादा उन्बा ताम चु किताबला बारेरी पाङ्तोःमा

भ्रिबा म्हि: येशूला मुल चेला यूहन्नासे भ्रिबा मुबा। चु यूहन्नासे छार कबुलरी मुबा किताबगदे न्हडला “थार्बा पिन्बा समाचार” देन गोर सोम चिठीगदेएनोन भ्रिबा मुबा।

भ्रिबा ग्ला: समुन्द्रला गुडरी मुबा पत्मोस भिबा ग्लारी भ्रिबा मुबा।

भ्रिबा साल: ओस्पन ईश्वी संवत् ९०-९५ (विक्रम संवत् १४७-१५२) सालला गुडरी भ्रिबा मुबा।

खाल्दा भ्रिबा: एशिया अञ्चलरी मुबा गोर निस मण्डलीगदेदा भ्रिबा मुबा।

चु किताबरी मुबा जम्मान तामगदे परमेश्वरसे यूहन्नादा उन्बा ताम हिन्ना। चु ताम म्हाड्बा धुइरी यूहन्नादा म्हाड्बा हड्बान छोर्बा मुबा। यूहन्नादा उन्बा ताम चा दुखला धिनगदेला बारेरी हिन्ना। चु “दुखला धिनगदे” यूहन्नाला धुइरीन शुरु तसी जिन्बा मुबा। तिग्दा भिसम थेनीगदेसे येशू ख्रीष्टदा ह्वाडला प्रभु हिन्ना भिसी विश्वास लबा मुबा। यूहन्नासे खास लसी चु चिठी पढब लबागदेदा आशदेन आँट पिन्बाला लागिरी ओच्छे दुखदेन आपत विपतला धुइरी ह्वाडसे लबा विश्वासरी याडयोड आतना चिबाला लागिरी बिन्ती लबा मुला।

चु किताबला ल्हाना हड्बा खण्डगदेरी उन्बा तामदेन म्हाड्बा तामगदेदा चिनुगदेग्याम घोना लबा मुला। चुहड्बा चिनुगदे थे धुइला विश्वासीगदेसे घोबारी खम्मुबा, तर स्य्हान्दो म्हिगदेदा चा घोबारी गाहो तमुबा। हिन्बाम ल्हानान म्हिगदेसे चु किताबला बारेरी थरी थरीला तामगदे पाङ्मुला। तर मुल ताम चा प्रस्टन मुला। थे मुल ताम चुनोन हिन्ना, प्रभु ख्रीष्टग्याम परमेश्वरसे शैतानदेन ह्वाडला जम्मान शत्रुगदेदा सदनना लागिरी नाश लला। ओच्छे जुन धुइरी शैतानदेन ह्वाडला जम्मान शत्रुगदेथोरी ढाला थे धुइरी परमेश्वरसे ह्वाडदा विश्वास लबा म्हिगदेदा छार स्वर्गदेन छार जम्बुलिड इनाम पिन्ना।

मुल तामगदे

शुरुला तामदेन फ्याफुल्बा १:१-८

परमेश्वरसे यूहन्नादा उन्बा ताम १:९-२०

गोर निस मण्डलीगदेदा भ्रिबा चिठी २:१-३:२२

यूहन्नासे स्वर्ग म्हाड्बा ४:१-११

गोर निस लाहा छाप लबा रिल्सी थान्बा किताबला मुठा ५:१-८:५

गोर निस बिगुलगदे ८:६-११:१९

अजिङ्गरदेन गोर न्ही जन्तु १२:१-१३:१८

यूहन्नादा उन्बा अर्गु तामगदे १४:१-१५:८

परमेश्वरला बोमोसे प्लिड्बा गोर निस खोरे १६:१-२१

परमेश्वरसे ह्वाडला शत्रुगदेथोरी ढाबा १७:१-२०:१०

परमेश्वरसे लबा जम्मान भन्दा लिच्छाला निसाफ २०:११-१५

छार स्वर्ग, छार जम्बुलिडदेन छार यरूशलेम २१:१-२२:५

ख्रीष्ट दोःसी योनान फेप्खला २२:६-२१

परमेश्वरसे यूहन्नादा उन्बा ताम

¹ चु किताबला जम्मान तामगदे येशू ख्रीष्टग्याम उन्बा हिन्ना। ह्वाडला गे लबा म्हिगदेसे योनान ततोःबा जम्मान तामगदेला बारेरी घोखम्गै भिसी परमेश्वरसे येशू ख्रीष्टदा चु जम्मान ताम पिन्जी। चु ताम पाङ्बाला लागिरी येशू ख्रीष्टसे ह्वाडला गे लबा यूहन्ना मुबा ग्लारी स्वर्गदूत गिक पुइखजी। ² ह्वाडसे म्हाड्बा जम्मान ताम यूहन्नासे पाङ्बा मुला। थेसे पाङ्बा परमेश्वरला बचनदेन येशू ख्रीष्टसे उन्बा सत्य ताम चुनोन हिन्ना। ³ चु किताब पढब लबादेन चु किताबरी मुबा परमेश्वरग्याम पाङ्बा

बचन ड्यानूसी थे अन्छार भ्रबा जम्मान म्हि परमेश्वरग्याम मोलम याड्बा म्हि हिन्ना। तिग्दा भिसम चु जम्मान ताम योनान तसेला मुला।

यूहन्नासे फ्याफुल्ला भिसी पाड्बा

4 एशियारी मुबा गोर निस मण्डलीदा डा यूहन्नाग्याम फ्याफुल्ला। दान्देनोन मुला, डाच्छाएनोन मुबा, दोःसीनोन फेपखबा परमेश्वरग्यामदेन थेला ठिला डाच्छापट्टि चिबा गोर निस आत्माग्याम एनीगदेदा दयामायादेन शान्ति तगै।* 5 ओच्छे परमेश्वरला बारेरी जम्मान सत्य ताम उन्बा विश्वास लखम्बा येशू ख्रीष्टग्यामसेनोन एनीगदेदा दयामायादेन शान्ति तगै। थे सिबागदेग्याम जम्मान भन्दा डाच्छा सोबादेन जम्बुलिडरी शासन लबा ग्लेगदेलाएनोन ग्ले हिन्ना।*

थेसे यहाडदा माया लसी ह्याडला कासे पापग्याम फेबा मुला। 6 थेसे ह्याडला आबा परमेश्वरदा तेन्बाला लागिरी यहाडदा परमेश्वरदा पूजा लबा महिला यहुल गिक सहोजी। थेनोन येशू ख्रीष्टदा सदन सदनना लागिरी मानदेन जयजयकार तगै। आमेन।*

7 च्यागो, थे खसुरी फेपखबान मुला,

थेदा भलोसी साइबागदेदेन जम्मान म्हिसे थेदा म्राड्ला।

ओच्छे जम्बुलिडला जम्मान यहुलला म्हिगदेसे थेला लागिरी सुर्दा लला।

हिन्ना चु तनोन तला। आमेन।*

8 जम्मान भन्दा घेन परमप्रभु परमेश्वरसे चुहड् भिसी सुड्बा मुला, “अल्फादेन ओमेगा” डानोन हिन्ना,” थे दान्दे मुला, डाच्छाएनोन मुबा, दोःसीनोन फेपखला।*

यूहन्नासे येशू ख्रीष्टदा म्राड्बा

9 डा एनीगदेला ज्योज्यो यूहन्नाएनोन एनीगदेदेन छ्यामनोन मुला। यहाडसे यहाडला ग्ले येशूदा विश्वास लबासे लमा दुख नाबा मुला, तसेनोन थेसे यहाडदा चु दुख नाबारी आँट पिन्बा मुला। चुलान लागिरी परमेश्वरसे यहाडदा ड्योड्बा मुला। परमेश्वरला बचनदेन येशू ख्रीष्टला बारेरी थेःना लबासे लमा डादा समुन्द्रला गुडरी मुबा पतमोस भिबा ग्लारी भोर्सी थान्बा मुबा। 10 प्रभुला धिनकुनु डा परमेश्वरला आत्मासे प्लिड्बा मुबा। थेनोन धुडरी डाला ग्यापग्याम बिगुलला हड्बान घेन काइरी चुहड् भिसी पाड्बान लबा थेःजी, 11 “एसे जुन ताम म्राड्ला थे जम्मान ताम किताब गिकरी भ्रिड। ओच्छे एफिसस, समुर्ना, पर्गामम, थिआटीरा, सार्डिस, फिलाडेल्फियादेन लाउडिकिया शहररी मुबा गोर निस मण्डलीदान पुड्गो।”

12 डाइ डादेन छ्याम ताम पाड्बा खाल चीम भिसी ग्याप दोःसी च्यामा थेरी गोर निस म्हरला नाडसल थान्बा सहेदेन, 13 नाडसल थान्बा सहेला गुडरी परमेश्वरसे पुड्खबा म्हि हड्बान काडधोनान धोबा क्वान क्वान्बादेन कुरी म्हरला हड्बा फित्ता क्वान्बा म्हि गिकदा डाइ म्राड्जी।* 14 थेला थोबोदेन क्रा ऊनदेन ग्लिड हड्बान तार तार्बा मुबा। ओच्छे थेला मी मे ल्हाम हड्बान मुबा।* 15 थेला स्यहाप चा मेरी खाड्सी सहोबा झक्झक्बा काँसला ताड हड्बान मुबा। ओच्छे थेला काइ चा स्योड ड्यबा हड्बान मुबा।* 16 थेला दाहिने छ्यासे गोर निस सारगदे चुड्बा मुबा। ओच्छे थेला सुड्ग्याम न्हीलोनपट्टि धार मुबा छ्यार्बा तरवार थोन्बा मुबा। थेला स्यहाल चा धिनी गुडला धिनीला सहेर हड्बान मुबा।

17 थेदा म्राड्मा डा सिबा तेबान तसी थेला स्यहापरी हिल्जी। तर थेसे ह्याडला दाहिने छ्या डाथोरी थान्सी चुहड् भिसी सुड्जी, “थालोड्गो, जम्मान सहे शुरु लबादेन थुम्ना लबा डानोन हिन्ना।* 18 सोबाएनोन डानोन हिन्ना। डा सिबा मुबा। च्यागो, डा सदनना लागिरी सोबा मुला। ओच्छे सिबा

* 1:4 प्रस्था ३:१४; उन्बा ४:५ * 1:5 यशै ५५:४; भजन ८९:२७ * 1:6 प्रस्था १९:६; उन्बा ५:१० * 1:7 दानि ७:१३; मत्ती २४:३०; मर्कु १३:२६; लूका २१:२७; १ थेस ४:१७; जक १२:१०; यूह १९:३४, ३७ † 1:8 “अल्फादेन ओमेगा” भिबा चा ग्रीक ग्योडरी शुरुला हिगीदेन जम्मान भन्दा लिच्छाला हिगी भिबा हिन्ना। चु भिबा चा जम्मान भन्दा डाच्छादेन जम्मान भन्दा लिच्छा हिन्ना। * 1:8 उन्बा २१:६; २२:१३ † 1:10 “प्रभुला धिनकुनु” भिबा चा प्रभु येशू सिबाग्याम सोबा धिनकुनुदा पाड्बा हिन्ना। * 1:13 दानि ७:१३; १०:५ * 1:14 दानि ७:९; १०:६ * 1:15 इज १:२४; ४३:२ * 1:17 यशै ४४:६; ४८:१२; उन्बा २:८; २२:१३

म्हिंगदेला आत्मा चिबा ग्लादेना कालला साँचोगदे डादेन छ्यामनोन मुला।¹⁹ थेतबासेलमा एसे जुन ताम म्राड्बा मुला थे भ्रिउ। ओच्छे दान्दे तबा तामगदेदेन लिच्छा तसेला तामगदे न्हीनोन भ्रिउ।²⁰ म्हिसे था आयाड्बा ताम एसे डाला दाहिने यारी म्राड्बा गोर निस सारगदेदेन म्हरला नाडसल थान्बा सहे निसला अर्थ चा चुनोन हिन्ना। गोर निस सारगदे चा मण्डली निसदा च्याबा म्हिंगदेा हिन्ना। ओच्छे म्हरला नाडसल थान्बा सहे निस चा मण्डली निस हिन्ना।”

2

एफिससला मण्डली

1 एफिससरी मुबा मण्डलीदा च्याबा म्हिदा चु ताम भ्रिउ।

चु ताम यारी गोर निस सार थोबादेन गोर निस म्हरला नाडसल थान्बा सहेला गुडग्याम भ्रबासे सुड्बा मुला।² एसे लबा जम्मान गेगदे डादा था मुला। ओच्छे एसे दुख लसी गे लबादेन सेम नासी चिमुला भिबा ताम डादा था मुला। आज्यबा गे लबा म्हिंगदेदा नाबारी आखम्मुला भिबा तामएनोन डादा था मुला। मुल चेला आहिन्सै मुल चेला हिन्ना भिसी भ्रबागदेदा च्यासी थेनीगदेदा फट्टा म्हि हिन्ना भिसी एसे था याड्बा मुला भिबा तामएनोन डादा था मुला।³ ए थेन्नोन आतना डाला लागिरी दुख नासी भ्रान्सी चिबा मुला।⁴ तर एला बिरोधरी डाइ पाड्तोःबा ताम गिक मुला। थे ताम चा एसे डादा डाच्छा लबा माया ख्लाबा मुला।⁵ थेतबासेलमा ए खानडग्याम मार ताइजी, थे ताम ढन्गो। ओच्छे एसे लबा पाप ख्लासी परमेश्वरपट्टि दोःसी डाच्छा लबा गे लउ। चुदे ए पाप ख्लासी परमेश्वरपट्टि आदोःनी भिसम डा ए मुबा ग्लारी खसी एला नाडसल थान्बा सहे थेग्याम तेःला।⁶ तर एदेन छ्याम ज्यबा तामएनोन मुला, एसे डाइ हड् लसीन निकोलाइटसगदेला गेदा बिरोध लबा मुला।⁷ जुन म्हिदा ड्यानबा सेम मुला, थेसे परमेश्वरला आत्मासे मण्डलीगदेदा सुड्बा ताम ड्यानसी ज्यना लसी घोउ। जुन म्हिसे ढाला थेदा परमेश्वरला बगैचारीा मुबा जुनी पिन्बा दोडला रो चबारी पिन्ना।*

स्मुर्नाला मण्डली

8 ओच्छे स्मुर्नारी मुबा मण्डलीदा च्याबा म्हिदा चु ताम भ्रिउ।

चु ताम जम्मान सहे शुरु लबादेन जम्मान सहे थुम्ना लबासे सुड्बा मुला, थे सिबा मुबा दोःसी सिबाग्याम सोबा मुला।*⁹ एसे गाते दुख नाबा मुला भिबा तामदेन ए गाते प्राडबो मुला भिबा ताम डादा था मुला। तर पाड्नोन तोःमा ए फ्युकपोन मुला। यहूदी आहिन्सै यहूदी हिन्ना भिसी भ्रबा म्हिंगदेसे एदा गाते बिरोध लमुला भिबा तामएनोन डादा था मुला। थेनीगदे मी शैतानना म्हिंगदे हिन्ना।¹⁰ एनीगदेथोरी खबारी छ्याड्बा दुख म्राड्सी थालोड्गो। च्यागो, एला विश्वास च्याबाला लागिरी शैतानसे एनीगदे न्हडला कोइ कोइदा झ्यालखानरी झाड्ला। तर एसे च्युडरे जे दुख नातोःला। ए सिनोन तोःसै डादा विश्वास लबा थाख्लागो। ओच्छे डाइ एदा जुकजुकधोनाला जुनी याड्बा इनामा पिन्ना।¹¹ जुन म्हिदा ड्यानबा सेम मुला, थेसे परमेश्वरला आत्मासे मण्डलीगदेदा सुड्बा ताम ड्यानसी ज्यना लसी घोउ। जुन म्हिसे ढाला थेदा आत्मादा सिना लबा कालसे तिगै लबारी आखम।*

पर्गाममला मण्डली

12 पर्गामम भिबा ग्लारी मुबा मण्डलीदा च्याबा म्हिदा चु ताम भ्रिउ।

† 1:18 ग्रीक ग्योडरी सिबा म्हिंगदेला आत्मा चिबा ग्लादा 'हेडिस' भिसी पाड्बा मुला। थे ग्लारी सिबा म्हिंगदेला आत्मा परमेश्वरसे जम्मान भन्दा लिच्छा लबा निसाफला धुइ भ्रान्सी चिमुला (उन्बा ६:८; २०:१३, १४)। † 1:20 ल्हानान हड्बा बाइबलरी चा "मण्डलीदा च्याबा म्हिंगदे" भिबादा स्वर्गदूत भिसी भ्रिबा मुला (उन्बा २:१, ८, १२, १८; ३:१, ७, १४)। † 2:6 निकोलाइटसगदे भिबा चा लुसीला ताम लोपबा म्हिंगदेला समूह हिन्ना। † 2:7 "परमेश्वरला बगैचा" भिबा चा स्वर्गएनोन तरखम्ला। * 2:7 उत्प २:९; उन्बा २२:२; इज २८:१३; ३१:८ * 2:8 यशै ४४:६; ४८:१२; उन्बा १:१७; २२:१३ † 2:10 थे धुडरी खेलरी ढाबा म्हिदा इनाम चा म्हेन्दोला मुकुट पिन्मुबा। * 2:11 उन्बा २०:१४; २१:८

चु ताम न्हीलोनपट्टि छ्यार्बा धार मुबा तरवार थोबासे सुड्बा मुला। 13 ए शैतानना ठि मुबा ग्लारी चिमुला भिबा ताम डादा था मुला। तसैनोन एसे डादा विश्वास लसीन चिबा मुला, ओच्छे विश्वासरी कोड्बा तसी चिबा डाइ विश्वास लखम्बा एन्टिपासदा शैतानसे शासन लबा ग्लारी एनीगदेलान डाच्छा साइबा मुबा। थे धुइरीनोन एसे विश्वास लबा आख्लानी भिबा तामएनोन डादा था मुला।

14 तर एला बिरोधरी डाइ पाड्तोःबा तिगै ताम मुला। तिग्दा भिसम एदेन छ्याम कोइ कोइ बालामसे लोप्बा ताम अन्छार भ्रबा म्हिगदेएनोन मुला। थेसे इस्राएलीगदेदा पापरी फसब लबाला लागिरी मूर्तिदा फुल्बा सहेगदे चबारीदेन स्य्हान्दोदेन छ्याम ब्रेल्सी भ्रबारी तला भिसी बालाक ग्लेदा लोप्मुबा।* 15 थेहड् लसीन निकोलाइटसगदेसे लोप्बा ताम अन्छार भ्रबा म्हिगदेएनोन एदेन छ्याम मुला। 16 थेतबासेलमा हाडला पाप ख्लासी परमेश्वरपट्टि दोःगो। आहिन्सम डा ए मुबा ग्लारी योनान खला ओच्छे डाला सुडरी मुबा तरवारसे थेनीगदेदेन छ्याम लडाइ लला।

17 जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा सुड्बा ताम ज्यना लसी ड्यान्तोःला। जुन म्हिसे ढाला, डाइ थेदा छुम्सी थान्बा मन् पिनना। ओच्छे डाइ थेदा छार मिन भ्रिबा तार युड्बा गिक पिनना, थे युड्बा याड्बा म्हिसे बाहेक स्य्हान्दो खालैसेन आघो।*

थिआटीराला मण्डली

18 थिआटीरारी मुबा मण्डलीदा च्याबा म्हिदा चु ताम भ्रिउ।

चु ताम मेला ल्हाम हड्बा मी मुबा ओच्छे झक्झक्बा काँस हड्बान स्य्हाप मुबा परमेश्वरला झासे सुड्बा मुला। 19 एसे तिग तिग लमुला थे डादा था मुला। एसे लबा माया, एसे लबा विश्वास, एसे लबा गेदेन नाबा जम्मान ताम डादा था मुला। ओच्छे एसे डाच्छा भन्दा दान्दे ल्हानान गे लमुला भिबाएनोन डादा था मुला।

20 तर एला बिरोधरी डाइ पाड्तोःबा तामएनोन मुला। एसे हाडसे हाडदान अगमवक्तास्य्या हिन्ना भिसी भ्रबा इजेबेल भिबा म्रिडम्हेमेदा थेसे म्हन्बा अन्छार लपुड्जी। थेसे डाला गे लबा म्हिगदेदा स्य्हान्दोदेन छ्याम ब्रेल्सी भ्रबारीदेन मूर्तिदा फुल्बा सहेगदे चबारी तला भिसी लोप्मुला। चुहड् लसी थेसे थेनीगदेदा फसब लबा मुला।* 21 डाइ थेदा हाडला पाप ख्लासी परमेश्वरपट्टि दोःबारी मौका पिनजी। तर थे स्य्हान्दोदेन छ्याम ब्रेल्सी भ्रबारी ख्लासी परमेश्वरपट्टि दोःबारी आड्यान्नी। 22 च्यागो, डाइ थेदा सहु सहेर पिनसी थान्ना। ओच्छे थे म्रिडम्हेमेदेन छ्याम ब्रेल्सी भ्रबागदेसे हाडसे लबा आज्यबा गे ख्लासी परमेश्वरपट्टि आदोःनी भिसम डाइ थेनीगदेदा ल्हानान दुखरी थान्ना। 23 डाइ थेला ताम ड्यान्सी भ्रबागदे जम्मादान नाश लला। ओच्छे जम्मान मण्डलीगदेसे जम्मालान सेमला तामदेन म्हन्बा ताम म्राड्बादेन था याड्बा डा थेनोन हिन्ना भिसी था याड्बा। डाइ एनीगदे जम्मादान हाड हाडला गे अन्छारला इनाम पिनना।

24 तर थिआटीराला मण्डलीरी मुबा थे ताम अन्छार आभ्रबादेन शैतानना सेमरी मुबा ताम अन्छार आभ्रबा स्य्हान्दोगदेदा चा डाइ पाड्बा। डाइ एनीगदेथोरी तिगै दुख तना आल। 25 तर एनीगदेदेन छ्याम जुन विश्वास मुला, डा आखतेधोना थे विश्वासरी जे कोड्सी चिउ। 26 जुन म्हिसे ढाला ओच्छे आसितेधोना डाइ म्हन्बा अन्छार गे लला, थेदा डाइ यहुल यहुलथोरी शासन लबा अधिकार पिनना।*

27 जमाहेन्से थेसे फाइला कडी थोसी थेनीगदेथोरी शासन लला। ओच्छे साप्राला ताड थिबा हड् लसी थेनीगदेला शक्ति नाश तला।

28 डाइएनोन डाला आबाग्याम चु अधिकार याड्बा मुला। थेनीगदेसे ढाजी भिसी उन्बाला लागिरी डाइ थेनीगदेदा स्य्होला सुक्र पिनना। 29 जुन म्हिदा ड्यान्बा सेम मुला थेसे परमेश्वरला आत्मासे मण्डलीदा तिग सुड्बा मुला, थे ताम ड्यान्सी ज्यना लसी घोटोःला।

* 2:14 गन्ती २२:५-७; ३१:१६; वयव २३:४; गन्ती २५:१-३ * 2:17 प्रस्था १६:१४-१५; १६:३३-३४; यूह ६:४८-५०; यशै ६२:२; ६५:१५ * 2:20 १ राजा १६:३१; २ राजा ९:२२, ३० * 2:26 भजन २:८-९

3

सार्डिसला मण्डली

1 सार्डिसरी मुबा मण्डलीदा च्याबा म्हिदा चु ताम भ्रिउ।

चु ताम परमेश्वरदा तेन्बा गोर निस आत्मादा तहरी थान्बादेन गोर निस सार थोबासे सुड्बा मुला। एला जम्मान गेगदे डादा था मुला, ए सोबा मुला भिसी मी पाड्मुला, तर ए सिबा मुला।

2 थेतबासेलमा छोर्सी चिउ, तिग्दा भिसम एदेन छ्याम मुबा विश्वास सिबारी छ्याइबा मुला। थेतबासेलमा नाश तबा भन्दा डाच्छान जोगब लसी कोड्ना लसी थान्गो। तिग्दा भिसम एसे लबा गे डाइ परमेश्वरदा सेम निबा खाल्ला आस्यापनी। 3 एसे जुन ताम थेःबा मुला ओच्छे लोप्बा मुला, थे ताम ढन्गो। ओच्छे थे ताम अन्छार भ्रसी हाडला पाप ख्लासी परमेश्वरपट्टि दोःगो। डा ए मुबा ग्लारी य्हो खबा हड् लसी खालैसे था आयाड्ना लसी खला। तर होशियार तसी आचिनी भिसम एसे डा खबा थानोन आयाड्।*

4 तर सार्डिसरीनोन कोइ कोइ म्हिगदेसे चा हाडला क्वान फोहोर† तना लबा आरे। थेनीगदे डादेन छ्यामनोन तार क्वान क्वान्सी भ्रला। तिग्दा भिसम थेनीगदे डादेन छ्याम भ्रबाधोनाला मुला। 5 जुन म्हिसे ढाला थेदा चुहड् लसी तार क्वान क्वान्सी पिन्ना। डाइ थेला मिन जुकजुकधोनाला जुनीला किताबग्याम खाइमै मेटब आल। डाइ थेदा डाला आबादेन आबाला दूतगदेला डाच्छा चु डालान हिन्ना भिसी पाड्ला।* 6 जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा तिग सुड्बा मुला, थे ताम ड्यान्सी ज्यना लसी घोटोःला।

फिलाडेल्फियाला मण्डली

7 फिलाडेल्फियारी मुबा मण्डलीदा च्याबा म्हिदा चु ताम भ्रिउ।

चु ताम तिगै दोष आरेबादेन सत्यसे सुड्बा मुला। थेदेन छ्याम दाऊद ग्लेला साँचो मुला, थेसे ठोड्बा सहे खालैसे ढुड्बारी आखम। ओच्छे थेसे ढुड्बा सहे खालैसे ठोड्बारी आखम।* 8 एसे लबा जम्मान गेगदे डादा था मुला। च्यागो, डाइ एला लागिरी खालैसेन ढुड्बारी आखम्बा प्राप ठोड्सी थान्बा मुला। एदेन छ्याम ल्हानान भड आरे भिबा ताम डादा था मुला। तसैनोन एसे डादा विश्वास लबा ख्लाबा आरे, ए डाला बचन अन्छार भ्रबा मुला। 9 च्यागो, शैतानना म्हिगदेसे हाड यहूदी आहिन्सै यहूदी हिन्ना भिसी लुसीला ताम पाड्बागदेदा डा खसी एला काडरी फ्या लपुड्ला। ओच्छे डाइ एदा माया लमुला भिबा ताम थेनीगदेदा घोना लला।* 10 एसे ल्हानान दुख नासी डाइ कुल्बा ताम ड्यान्बासे लमा जम्बुलिडला जम्मान म्हिगदेला विश्वास च्याबा धुइरी तबारी छ्याइबा घेन दुखग्याम डाइ एदा जोगब लला।

11 डा योनान खबान मुला। एसे ढाबा मुकुट खालैसेन ब्यन्सी थाभोगै भिसी एदेन छ्याम मुबा ताम जोगब लसी थान्गो। 12 जुन म्हिसे ढाला, थेदा डाइ डाला परमेश्वरला मन्दिरला थाम स्होला, ओच्छे थे थेग्याम खाइमै आथोन। डाइ थेथोरी डाला परमेश्वरला मिन भ्रिला, जमाहेन्से थे डाला परमेश्वरला शहरला म्हि दोला। थे शहर डाला परमेश्वरग्याम स्वर्गहेन्से मार खबा छार यरूशलेम हिन्ना। ओच्छे थेथोरी डाइ डाला छार मिनएनोन भ्रिला।* 13 जुन म्हिदा ड्यान्बा सेम मुला थेसे परमेश्वरला आत्मासे मण्डलीगदेदा सुड्बा ताम ड्यान्सी ज्यना लसी घोटोःला।

लाउडिकियाला मण्डली

14 लाउडिकियारी मुबा मण्डलीदा च्याबा म्हिदा चु ताम भ्रिउ।

चु ताम परमेश्वरसे स्होबा जम्मान सहेगदेथोरी शासन लबा, आमन भिबादेन विश्वास लखम्बा ओच्छे सत्य ताम उन्बासे सुड्बा मुला।* 15 एसे लबा गेगदे डादा था मुला। ए न्ह लेप्बा मुला,

* 3:3 मत्ती २४:४३-४४; लूका १२:३९-४०; उन्बा १६:१५ † 3:4 फोहोर क्वान भिबा चा पापी बानीबेहोर हिन्ना। ओच्छे तार क्वान भिबा चा परमेश्वरदा सेम निबा बानीबेहोर हिन्ना। * 3:5 प्रस्था ३२:३२-३३; भजन ६९:२८; उन्बा २०:१२; मत्ती १०:३२; लूका १२:८ * 3:7 यशै २२:२२; अय्यूब १२:१४ * 3:9 यशै ४९:२३; ६०:१४; ४३:४ * 3:12 उन्बा २१:२; यशै ६२:२; ६५:१५ * 3:14 हितो ८:२२

न्ह सिम्बा मुला। बरु ए कि सिम्बा तगै कि लेप्बा तगै भिबा डाला सेम मुला। 16 ए न्ह लेप्बा मुला न्ह सिम्बा मुला, तर दालदोल जे मुबासे लमा डाइ एदा डाला सुडग्याम थो भ्याड्बा हड् लसी भ्याड्बा। 17 एसे हाडदा डा फ्युक्पो मुला, डादेन छ्याम जम्मान सहे मुला ओच्छे डादा तिगै सहेला खांचो आरे भिसी पाड्मुला, तर ए गाते दया खबाधोनाला मुला भिबा तामदेन दुख याड्बा, प्राडबो, कानादेन लिगन्डी मुला भिबा ताम एदा था आरे। 18 थेतबासेलमा सदन फ्युक्पो दोबाला लागिरी डाग्याम मेरी खाड्सी खारेब लबा म्हर ग्लुउ। थेहड् लसीन एदा पेःबा खबा लिगन्डी ल्हुइ घपबाला लागिरी तार क्वान ओच्छे मी म्राड्बाला लागिरी मन डाग्याम ग्लुउ भिबा एदा डाला सल्लाह मुला।

19 जुन म्हिदा डाइ माया लला, थेदा डाइ बड्सी तहरी थान्ना। थेतबासेलमा झन्सी गे लबारी सेम लउ, ओच्छे हाडला पाप ख्लासी डापट्टि दोःगो।* 20 च्यागो, डा खालैला दिमरी खसी ड्योइमा चुदे खालै म्हिसे डाला काइ थेःसी म्राप ठोड्जी भिसम डा दिम न्हडरी खला। ओच्छे थेदेन छ्याम चिसी चबा थुड्बा लला, थेसेनोन डादेन छ्यामनोन चिसी चबा थुड्बा लला।

21 डाइ ढाजी, ओच्छे डाला आबादेन छ्यामनोन आबाला ठिरी चिबा हड् लसी जुन म्हिसे ढाला डाइ थेदा डाला ठिरी डादेन छ्यामनोन चिपुड्बा। 22 जुन म्हिदा ड्यान्बा सेम मुला, थेसे परमेश्वरला आत्मासे मण्डलीगदेदा सुड्बा ताम ड्यान्सी ज्यना लसी घेतोःला।

4

यूहन्नासे स्वर्ग म्राड्बा

1 जमाहेन्से च्यागो, डाइ स्वर्गरी म्राप गिक ठोड्बा म्राड्जी। डाइ डाच्छा थेःबा बिगुलला हड्बान काड्ग्याम डादा चुहड् सुड्बान लबा डाइ थेःजी। “ए तोर खउ, दाहेन्से तसेला तामगदे डाइ एदा उन्ना।” 2 जमाहेन्से डा तिक्खुरीन परमेश्वरला आत्मासे प्लिड्जी। ओच्छे स्वर्गरी म्हि गिक धन्छ्याबान लबा ठि गिक म्राड्जी।* 3 थेला स्यहाल चा झक्झक्बा मणि हड्बान जेबा मुबा ओच्छे ठिला क्यारक्युर चा झक्झक्बा रत्न हड्बान लरक्युड मुबा। 4 थे ठिला क्यारक्युर बोगल गिकसे गोर बलि अर्गु ठिगदे मुबा। थेनोन ठिगदेरी बोगल गिकसे बलि गन्बागदे चिबा मुबा। थेनीगदेसे तार क्वान क्वान्बादेन थोबोरी म्हरला मुकुट कूबा मुबा। 5 थे ठिग्याम तिप्लीड हड् लसी मे थोन्बादेन गडडगुडुड मु ठेड्बा हड्बा काइ खमुबा। ओच्छे थे ठिला डाच्छापट्टि गोर निस मेदड लुड्बा मुबा। थे मेदड चा परमेश्वरला आत्मा निस हिन्ना।* 6 थे ठिला डाच्छापट्टि प्रसटन म्राड्बा ऐना हड्बान समुन्द्र मुबा।*

लिच्छापट्टिऐनोन डाच्छापट्टिऐनोन ल्हुइ नाडनोन मीनोन मी मुबा गोर बलि छोन्बो जन्तु थे ठिला क्युर्नोन मुबा। 7 थे जन्तुगदे चा गिक च्यान हड्बा, गिक म्हे बहर हड्बा, ओच्छे गिकला ली चा म्हिला हड्बा मुबा, थेहड् लसीन गिक चा फ्याड्बान लबा ग्वाइ हड्बान मुबा। 8 थे गोर बलि छोन्बो जन्तुगदेलाना गोर दु दु भ्याप मुबा। ओच्छे थेनीगदेला भ्यापला पाखापट्टिऐनोन न्हडपट्टिऐनोन मी मुबा। थेनीगदे धिन म्हूननोन थेन आतना चुहड् भिसी व्हाइ गोमुबा,

“जम्मान भन्दा घेन परमप्रभु परमेश्वर

चोखो, चोखो, चोखो मुला।

थे दान्देनोन मुला, डाच्छापट्टिऐनोन मुबा ओच्छे दोःसीनोन फेप्खला।”*

9 थे छोन्बो जन्तुगदेसे जुकजुकधोनान सोसी चिबा मुल ठिरी धन्छ्याबादा जयजयकारदेन धन्यवाद पिन्सी मान लमुबा। 10 जमाहेन्से थे बोगल गिकसे गोर बलि गन्बागदेसे ठिरी धन्छ्याबा

* 3:19 हितो ३:१२; हिब्रू १२:६ * 4:2 इज १:२६-२८; १०:१ * 4:5 प्रस्था १९:१६; उन्बा १:४; ८:५; ११:१९; १६:१८; इज १:१३; जक ४:२ * 4:6 इज १:२२, ५-१०; १०:१४ † 4:8 चु जन्तु चा जम्बुलिडला जन्तु हड्बा आहिन। तर परमेश्वरसे यूहन्नादा तिगै ताम उन्बा धुडरी म्राड्बा ताम पाड्बा जन्तु हिन्ना। † 4:8 चुरी ‘चोखो’ भिबा चा तिगै दोष आरेबादेन जम्मान भन्दा घेन ओच्छे थे भन्दा स्यहान्दो खालै आरे। थेतबासेलमा जम्मासेन थेदा तेन्तोःला। * 4:8 इज १:१८; १०:१२; यशै ६:२-३

सदन सोसी चिबादा फ्या लजी। ओच्छे थेनीगदेसे हाड हाडला मुकुट ठिला डाच्छापट्टि थान्सी चुहड् भिसी व्हाइ गोजी,

11 “जम्मान जयजयकार, मानदेन शक्ति याड्तोःबा डन्ना प्रभु परमेश्वर हाड जे हिन्ना।

तिग्दा भिसम जम्मान सहेगदे हाडसेन सहोबा हिन्ना।

थे जम्मान सहे हाडसे म्हन्बा अन्छारनोन तजी, ओच्छे सहोजी।”

5

गोर निस लाहा छाप लसी रिल्सी थान्बा किताबला मुठा

1 ओच्छे डाइ ठिरी धन्छ्याबाला दाहिने छ्यारी रिल्सी थान्बा किताबला मुठा गिक म्राड्जी। थे किताबरी न्हीलोनपट्टि भिबा मुबा ओच्छे बन्द लसी ग्ला निसरी लाहा छाप लबा मुबा।* 2 ओच्छे डाइ शक्तिशाली स्वर्गदूत गिकदा म्राड्जी। थेसे “चु रिल्सी थान्बा किताबला मुठारी लबा लाहा छाप ब्लबादेन ठोड्खम्बाधोनाला म्हि खाल मुला?” भिसी घेन काइसे पाड्बान मुबा। 3 तर स्वर्गरी, जम्बुलिडरी ओच्छे जम्बुलिडला धिरी चु रिल्सी थान्बा किताब ब्लसी च्याबारी खम्बा म्हि खाले आरेबा। 4 थे रिल्सी थान्बा किताब ब्लसी च्याखम्बा म्हि खालेनोन आस्यापबासे लमा डा ल्हानान क्राजी। 5 जमाहेन्से गन्बागदे न्हडला गिकसे डादा “थाक्रागो, च्यागो, यहूदा यहूलला दाऊद वंशग्याम थोन्बा च्यानसेन ढाबा मुला। चु किताबला ग्ला निसला लाहा छाप ब्लसी ठोड्बाधोनाला म्हि चा थेनोन हिन्ना” भिसी भिजी।* 6 जमाहेन्से साइबा थार्बा पिन्बा ग्यु बोगो हड्बान खालेदा परमेश्वरला ठिला गुडरी राप्सी चिबा डाइ म्राड्जी। थेला क्युर्सीन गोर बलि जन्तुगदेदेन गन्बागदे मुबा। थेला गोर निस रुदेन गोर निस मी मुबा। चु चा जम्बुलिडला जम्मान ग्लारी पुड्खबा परमेश्वरला आत्मा निस हिन्ना।* 7 थे फेप्सी मुल ठिरी धन्छ्याबाला दाहिने छ्याग्याम थे रिल्सी थान्बा किताबला मुठा किन्जी। 8 थेसे थे रिल्सी थान्बा किताबला मुठा किन्माहेन्से थे गोर बलि छोनबो जन्तुदेन बोगल गिकसे बलि गन्बागदेसे थार्बा पिन्बा ग्यु बोगोदा फ्या लजी। जम्मालान यारी वीणादेन ज्यबा बासना खबा धूपसे प्लिड्बा म्हरला पोडमो ताड मुबा। थे ज्यबा बासना खबा धूप चा परमेश्वरला म्हिगदेसे लबा प्रार्थना हिन्ना।* 9 थेनीगदेसे चुहड् भिसी छार व्हाइ गिक गोजी, “चु रिल्सी थान्बा किताबला मुठा किन्सी

लाहा छाप ब्लबादेन ठोड्बाधोनाला हाड जे मुला।

तिग्दा भिसम हाडदा साइबा मुबा,

ओच्छे हाडला कासे जम्मान वंश, ग्योड, म्हि, यहूलदेन यहुल्सादा

पापला सय फासी परमेश्वरला लागिरी ग्लुजी।*

10 यहडला परमेश्वरदा तेन्गै भिसी

हाडसे थेनीगदेदा परमेश्वरदा पूजा लबा यहूल गिक सहोबा मुला।

ओच्छे थेनीगदेसे जम्बुलिडरी शासन लला।”*

11 दोःसी डाइ च्यामा, परमेश्वरला ठिदेन जन्तुगदे ओच्छे गन्बागदेला क्युर्सीन ल्हानान स्वर्गदूतगदेसे व्हाइ गोबा म्राड्जी। थेनीगदे लाख, करोड झ्यानोन आखम्बाधोना मुबा।* 12 थेनीगदेसे घेन काइरी चुहड् भिसी व्हाइ गोबान मुबा,

“जम्मालान लागिरी बलि तबा थार्बा पिन्बा ग्यु बोगो जे

जम्मान शक्ति, धन सम्पत्तिदेन ज्ञान बुद्धि,

ओच्छे भड, मान, यहाल यहालदेन जयजयकार

किन्खम्बाधोनाला मुला।”

* 5:1 डज २:९-१०; यशै २९:११ * 5:5 उत्प ४९:९; यशै ११:१, १० † 5:6 च्यानदेन थार्बा पिन्बा ग्यु बोगो भिबा चा येशू ख्रीष्टदा पाड्बा हिन्ना। * 5:6 यशै ५३:३; जक ४:१० * 5:8 भजन १४१:२ * 5:9 भजन ३३:३; ९८:१; यशै ४२:१० * 5:10 प्रस्था १९:६; उन्बा १:६ * 5:11 दानि ७:१०

13 ओच्छे स्वर्गदेन जम्बुलिङ ओच्छे जम्बुलिङ धिरी, समुन्द्ररीदेन थेरी मुबा जम्मान जन्तुगदेसे चुहङ् भिसी व्हाइ गोबान लबा डाइ म्राङ्जी।

“ठिरी धन्छ्याबादेन थार्बा पिन्बा ग्यु बोगोदा

सदन सदन जयजयकार, मानदेन य्हाल य्हाल,

ओच्छे शक्ति तगै।”

14 जमाहेन्से थे गोर बलि छोन्बो जन्तुसे “आमेन” भिजी। ओच्छे थे गन्बागदेसे चा फ्या लबान जयजयकार लजी।

6

लाहा छाप बलबा

1 जमाहेन्से डाइ थे गोर निस लाहा छाप न्हडला छाप गिक थार्बा पिन्बा ग्यु बोगोसे बलबा म्राङ्जी। थेनोन धुइरी थे गोर बलि छोन्बो जन्तुगदे न्हडला गिकसे मु घुर्बा हड्बान काइरी “खउ” भिसी पाङ्बा डाइ म्राङ्जी। 2 जमाहेन्से डाइ तार ता गिक म्राङ्जी। थे ताथोरी मुबा म्हिसे म्यादली गिक थोबा मुबा। थेदा मुकुट गिक पिन्जी, ओच्छे थे ढाबाला लागिरी ढाबा म्हि दोःसी थेग्याम भ्रजी।*

3 थार्बा पिन्बा ग्यु बोगोसे दोःसी न्हीरेमला लाहा छाप बलमा अर्गु जन्तु गिकसे “खउ” भिसी पाङ्बा डाइ थेःजी। 4 जमाहेन्से डाइ वाला ता गिक म्राङ्जी। थे ताथोरी मुबा म्हिदा म्हिगदे न्हडरी गिकसेम गिकदा साइगै भिसी जम्बुलिङग्याम शान्ति ब्यन्सी भोर्बा अधिकार पिन्जी। ओच्छे थेदा घेन तरवार गिकएनोन पिन्जी।*

5 दोःसी थार्बा पिन्बा ग्यु बोगोसे सोमरेमला लाहा छाप बलजी। थे धुइरी डाइ अर्गु जन्तुसे “खउ” भिसी पाङ्बा म्राङ्जी। जमाहेन्से डाइ म्लाङ्गै ता गिक म्राङ्जी। थे ताथोरी मुबा म्हिला यारी उमाल गिक मुबा। 6 डाइ थे गोर बलि छोन्बो जन्तुगदेला गुडग्याम चुहङ् भिबा काइ थेःजी। “तिरेला ज्यालासे ग्वा ग्लुबा हिन्सम किलो नाड ओच्छे जौ ग्लुबा हिन्सम किलो सोम ग्लुबारी खम्ला। तर छ्युगुला दोडदेन अडगुरला दोडदा चा न्होङ्ना थालउ।

7 ओच्छे थार्बा पिन्बा ग्यु बोगोसे बलिरेमला लाहा छाप बलजी। थे धुइरी डाइ अर्गु जन्तुसे “खउ” भिसी पाङ्बा म्राङ्जी। 8 जमाहेन्से डाइ उर ता गिक म्राङ्जी। थे ताथोरी क्रेःबा म्हिला मिन चा “काल” मुबा। ओच्छे थेला लिच्छा लिच्छा चा सिबा म्हिगदेला आत्मा चिबा ग्ला मुबा। थेनीगदेदा लडाइ, अनिकाल, देसानदेन जम्बुलिङला हि जन्तुगदेग्याम जम्बुलिङला भो बलिरी भो गिकदा नाश लबा अधिकार पिन्बा मुबा।*

9 थेहङ् लसीन थार्बा पिन्बा ग्यु बोगोसे डारेमला लाहा छाप बलजी। थे धुइरी डाइ धूप म्राबा ग्लाला धिरी परमेश्वरला बचनदेन परमेश्वरला बारेरी थेःना लबासे लमा स्य्हान्दोसे साइबा म्हिगदेला आत्मागदे म्राङ्जी। 10 ओच्छे थेनीगदेसे घेन काइरी क्रिङ्बान, “जम्मान भन्दा घेन ओच्छे जम्मान भन्दा चोखोदेन सत्य प्रभु, हाडसे डन्दा साइबा जम्बुलिङरी मुबा म्हिगदेला ठीक निसाफ खाइमा लसी थेनीगदेदा सजाय पिन्ना?” भिसी भिजी। 11 थेनीगदे जम्मादान गोर गिक गिक तार क्वान पिन्जी। ओच्छे थेनीगदेदा एनीगदेदा हङ् लसी साइतोःबा येशूदा तेन्बा एनीगदेला जम्मान होदेन ज्योज्यो आले नाना आडागदेदाएनोन आसाइतेधोना भ्रान्गो भिसी भिजी।

12 जमाहेन्से डाइ थार्बा पिन्बा ग्यु बोगोसे दुरेमला लाहा छाप बलबा म्राङ्जी। थे धुइरी घेन सडगुल खजी। ओच्छे धिनी म्लाङ्गै क्वान हड्बान धोपधोप तजी, लनी चा का हड्बान वाला तजी।* 13 लाबालुङसरसे अञ्जीरला दोड य्होङ्मा आचिप्बा रोगदे ताइबा हङ् लसी मुला सारगदे जम्बुलिङरी ताइजी।* 14 मु चा कागज हङ्गोन रिल्बान म्हासी निजी। ओच्छे गडगदेदेन समुन्द्रला गुडरी मुबा ग्लागदे चा ह्हाड ह्हाडला ग्लाग्याम लेःजी।* 15 जमाहेन्से जम्बुलिङला ग्लेगदे, शासन लबागदे, सिपाहीला कप्तानगदे, फ्युकपो म्हिगदे, अधिकार मुबा म्हिगदे, नोकरगदेदेन अर्गु जम्मान

* 6:2 जक १:८; ६:३, ६ * 6:4 जक १:८; ६:२ * 6:8 उन्बा १:१८; इज १४:२१ * 6:12 उन्बा ११:१३; १६:१८; यशै १३:१०; योए २:१०, १३; ३:१५; मत्ती २४:२९; मर्क १३:२४-२५; लूका २१:२५ * 6:13 यशै ३४:४ * 6:14 उन्बा १६:२०

महिगदे गड गडला ऊगदेदेन पहरागदेरीक्यार लाजी।* 16 थेनीगदेसे गडदेन पहरागदेदा चुहड् भिसी भिजी, “ठिरी धन्छ्याबादेन थार्बा पिन्बा ग्यु बोगोला बोमोग्याम डन्दा छुम्सी जोगब लउ।* 17 तिगदा भिसम ठिरी धन्छ्याबादेन थार्बा पिन्बा ग्यु बोगोसे निसाफ लसी घेन सजाय पिन्बा धिन खसी जिन्बा मुला। थे धिनना दुख खाल्से नाखम्ला?”*

7

लाख गिकसे बोगल न्हीसे हजार बलिदा छाप लबा

1 जमाहेन्से डाइ गोर बलि स्वर्गदूतगदेदा जम्बुलिडरी, समुन्द्ररी ओच्छे खजिबै दोडरी लाबा थाखगै भिसी जम्बुलिडलापट्टि बलिग्यामसेन खबा लाबादा रोकब लबान जम्बुलिडला कुनी बलिरी राप्सी चिबा म्राङ्जी।* 2 ओच्छे डाइ छोन्बो परमेश्वरला छाप पुइसी स्यारग्याम स्य्हान्दो स्वर्गदूत गिक खबान लबा म्राङ्जी। थेसे जम्बुलिडदेन समुन्द्रदा न्होङ्ना लबारी परमेश्वरग्याम अधिकार याङ्बा थे गोर बलि स्वर्गदूतगदेदा घेन काइरी चुहड् भिसी भिजी, 3 “डन्से य्हाडला परमेश्वरला गे लबा महिगदेला डोरी छाप आलतेधोना जम्बुलिडदेन समुन्द्र ओच्छे दोङ्गदेदा न्होङ्ना थालउ।”* 4 ओच्छे डाइ परमेश्वरला छाप लबा महिगदे गाते मुला भिसी पाङ्बा थे:जी। जमा इस्राएलला जम्मान वंशग्याम लसी लाख गिकसे बोगल न्हीसे हजार बलि मुबा।

5 यहूदाला वंशग्याम च्युक न्ही हजारदा,
रूबेनना वंशग्याम च्युक न्ही हजारदा,
गादला वंशग्याम च्युक न्ही हजारदा,
6 आशेर वंशग्याम च्युक न्ही हजारदा,
नप्तालीला वंशग्याम च्युक न्ही हजारदा,
मनश्शेला वंशग्याम च्युक न्ही हजारदा,
7 शिमियोनला वंशग्याम च्युक न्ही हजारदा,
लेवीला वंशग्याम च्युक न्ही हजारदा,
इस्साखारला वंशग्याम च्युक न्ही हजारदा,
8 जबूलूनना वंशग्याम च्युक न्ही हजारदा,
योसेफला वंशग्याम च्युक न्ही हजारदा
बेन्यामीनला वंशग्याम च्युक न्ही हजार
महिदा छाप लजी।

तार क्वान क्वान्बागदेला हुल

9 जमाहेन्से डाइ खालै म्हिसे झ्यासीन झ्याबारी आखम्बा महिला हुल गिक म्राङ्जी। थेनीगदे जम्मान यहूलुसादेन वंश ओच्छे यहूलदेन ग्योइ पाङ्बा महिगदे मुबा। थेनीगदे तार क्वान क्वान्सी यारी खजूरला हाँगा थोसी मुल ठिदेन थार्बा पिन्बा ग्यु बोगोला डाच्छापट्टि राप्सी चिबा मुबा।

10 थेनीगदेसे घेन काइरी चुहड् भिसी भिजी,
“ठिरी धन्छ्याबा य्हाडला परमेश्वरदेन
ग्यु बोगोग्यामसेन य्हाडसे थार्बा याङ्गला।”

11 ओच्छे ठि, गन्बागदेदेन थे गोर बलि छोन्बो जन्तुला क्युर्नोन जम्मान स्वर्गदूतगदे राप्जी, ओच्छे ठिला डाच्छापट्टि खलुप तसी परमेश्वरला जयजयकार लजी।

12 “आमेन! य्हाडला परमेश्वरदा सदन सदन

जयजयकारदेन य्हाल य्हाल, बुद्धि, धन्यवाद, मान
ओच्छे शक्तिदेन भड तगै। आमेन!”

* 6:15 यशै २:१९, २१ * 6:16 होशे १०:८; लूका २३:३० * 6:17 योए २:११; मला ३:२ * 7:1 यर्मि ४९:३६; जक ६:५
* 7:3 इज ९:४-६

13 गन्बागदे न्हडला गिकसे डादा “तार क्वान क्वान्बा म्हिगदे खाल हिन्ना, ओच्छे थेनीगदे खानडग्याम खबा हिन्ना?” भिसी ड्योइजी।

14 डाइ थेंदा “गुरु, थें मी हाडदान था मुला” भिसी भिमा थेंसे डादा चुहड् भिसी पाड्जी, “थेनीगदे चा ल्हानान दुख नासी खबा म्हिगदे हिन्ना। थेनीगदेसे हाड हाडला क्वान थार्बा पिन्बा ग्यु बोगोला कासे खुसी तार तना लबा मुला।* 15 थेंतबासेलमा थेनीगदे परमेश्वरला ठिला डाच्छापट्टि मुला, ओच्छे थेनीगदेसे धिन म्हूननोन परमेश्वरला मन्दिररी थेंदा तेन्मुला। ठिरी धन्छ्याबासे चा थेनीगदेला गुडरी धन्छ्यासी थेनीगदेदा जोगब लला। 16 दाहेन्से थेनीगदेदा फो खेन्बै आत, क्युइ फुइबाएनोन आत। ओच्छे थेनीगदेदा धिनीला रापदेन अर्गु खजिबै सहेला रापसे आक्रो।* 17 तिग्दा भिसम ठिला गुडरी धन्छ्याबा थार्बा पिन्बा ग्यु बोगो थेनीगदेला गोठालो दोला। ओच्छे थेसेन थेनीगदेदा जुकजुकधोनाला जुनी पिन्बा क्युइला मुलरी भोर्ला। ओच्छे परमेश्वरसेन थेनीगदेला जम्मान मीख्ली फ्यासी पिन्ना।”*

8

निसरेमला लाहा छापदेन म्हरला पोइमो ताड

1 थार्बा पिन्बा ग्यु बोगोसे निसरेमला लाहा छाप बलमा स्वर्गरी ओस्पन घण्टा गडसलधोना सुनसान तजी। 2 जमाहेन्से डाइ परमेश्वरला डाच्छा राप्सी चिबा गोर निस स्वर्गदूतगदेदा म्राड्जी। ओच्छे थेनीगदेदा गोर निस बिगुल पिन्जी। 3 ओच्छे स्यहान्दो स्वर्गदूत गिक म्हरला पोइमो ताड थोसी धूप म्राबा ग्लाला डामरी राप्जी। ठिला डाच्छापट्टि मुबा म्हरला धूप म्राबा ग्लारी परमेश्वरला म्हिगदेला प्रार्थनादेन छ्यामनोन फुल्बाला लागिरी थेंदा ल्हानान धूप पिन्जी।* 4 स्वर्गदूतला याग्याम ज्यबा बासना खबा धूपला म्युगु परमेश्वरला म्हिगदेला प्रार्थनादेन छ्यामनोन परमेश्वरला डाच्छा तोर निजी। 5 जमाहेन्से थें स्वर्गदूतसे पोइमो ताड थोसी धूप म्राबा ग्लाला मे पोइमो ताडरी युसी जम्बुलिडरी भ्याड्जी। ओच्छे गडडगुडुड म् ठेड्सी तिप्लीड खसी सडगुल निजी।*

बिगुलगदे

6 जमाहेन्से थें बिगुल थोबा गोर निसनोन स्वर्गदूतगदे बिगुल हापबारी ठीक तजी।

7 जमाहेन्से जम्मान भन्दा डाच्छापट्टि मुबा स्वर्गदूत गिकसे हाडला बिगुल हापजी। थेनोन धुइरी का दोड्बा सेर्बादेन मे जम्बुलिडरी ल्हानान ताइजी। थेंतबासेलमा जम्बुलिडला भो सोमरी भो गिक दोड्गदेला भो सोमरी भो गिक ओच्छे जम्मान छेगदेएनोन क्रोजी।

8 न्हीरेमला स्वर्गदूतसे हाडला बिगुल हापबा धुइरी मे लुड्बा घेन गड हड्बा सहे गिक समुन्द्ररी भ्याड्जी। ओच्छे समुन्द्रला क्युइ भो सोमरी भो गिक का दोजी। 9 ओच्छे समुन्द्ररी मुबा जम्मान जनतुगदे भो सोमरी भो गिक सिजी। थेंहड् लसीन पानी जहाजगदेएनोन भो सोमरी भो गिक नाश तजी।

10 थेंहड् लसीन सोमरेमला स्वर्गदूतसे हाडला बिगुल हापजी। थेनोन धुइरी लुड्बा मेला ल्हाम हड्बान घेन सार गिक मुग्याम भो सोम स्योडगदेला भो गिकरीदेन क्युइला मुहानगदेरी ताइजी।* 11 थें सारला मिन “कम्बा” मुबा। थें सारसे भो सोम क्युइरी भो गिक कम्ना लजी। थें कम्बा क्युइ थुड्बा ल्हानान म्हिगदे सिजी।

12 दोःसी बलिरेमला स्वर्गदूतसे हाडला बिगुल हापजी। थेनोन धुइरी धिनी, लनीदेन सारगदेला भो सोमला भो गिकरी तिगै सहेसे तोजी। जमाहेन्से थेनीगदेला भो सोमरी भो गिक धोप तजी। चुहड् लसी धिनदेन म्हूनएनोन भो सोमरी भो गिक धोपधोप तजी।

13 डाइ च्याबान लमा मुरी ग्वाइ गिक फ्याड्बान लबा म्राड्जी। थें ग्वाइसे क्रिड्बान चुहड् भिसी भिजी, “दुखन दुख, जम्बुलिडरी मुबा म्हिगदेदा ल्हानान दुख तला। तिग्दा भिसम दाहेन्से बिगुल हापबारी बाँकी मुबा अर्गु गोर सोम स्वर्गदूतसे बिगुल हापबा धुइ तसी जिन्बा मुला।”

* 7:14 दानि १२:१; मत्ती २४:२१; मर्कू १३:१९ * 7:16 यशै ४९:१० * 7:17 भजन २३:१; इज ३४:२३; भजन २३:२; यशै ४९:१०; २५:८ * 8:3 आमो ९:१; प्रस्था ३०:१, ३ * 8:5 लेवी १६:१२; इज १०:२; प्रस्था १९:१६; उन्बा ११:१९; १६:१८ * 8:10 यशै १४:१२

9

1 दोःसी डारेमला स्वर्गदूतसे हाडला बिगुल हापबा धुइरी डाइ मुग्याम जम्बुलिडरी सार गिक ताइबान लबा म्राड्जी। थे सारदा ल्हानान नुपबा व्हाडला म्रापला साँचो पिन्जी। 2 थे सारसे ल्हानान नुपबा व्हाडला म्राप ठोड्मा थेग्याम मेला घेन खाराडग्याम थोन्बा हड्बान म्युगु थोन्जी। थे म्युगुसे लमा धिनीदेन मु धोप तना लजी।* 3 जमाहेन्से थे म्युगु न्हडग्याम तिरीगदे थोन्सी जम्बुलिडरी खजी। थे तिरीगदेदा बिच्छीगदेसे जिबा हड्बान जिबा शक्ति पिन्जी।* 4 जम्बुलिडला छे स्याउलादेन दोडगदेदा तिगै न्होड्ना थालउ। तर डोरी परमेश्वरला छाप आरेबागदेदा जे दुख पिन्गो भिसी थे तिरीगदेदा कुल्बा मुबा।* 5 थेनीगदेदा साइनोन चा थासाइगो, तर ला डाधोना दुख पिन्गो भिसी थे तिरीगदेदा अधिकार पिन्जी। थे तिरीगदेसे पिन्बा दुख चा म्हिदा बिच्छीसे जीमा सहु खबा हड्बान सहु खमुबा। 6 थे धुइरी म्हिगदे सिबारी म्हाइला, तर थेनीगदे सिआम्याड्। थेनीगदेसे सिबारी म्हाइला, तर काल चा थेनीगदेग्याम यार्ला।*

7 थे तिरीगदे लडाइ लबाला लागिरी निबारी ठीक तबा तागदे हड्बान म्राड्मुबा। थेनीगदेला थोबोरी म्हरला मुकुट हड्बा सहे मुबा। ओच्छे थेनीगदेला ली चा म्हिला ली हड्बान मुबा।* 8 थेनीगदेला क्रा मिडम्हेमेला क्रा हड्बान हेड्बा मुबा, ओच्छे स्वा चा च्यानना स्वा हड्बान मुबा।* 9 थेनीगदेला कुरी फाइला ढाल क्वान्बा मुबा। ओच्छे थेनीगदे फ्याड्मा भ्यापग्याम लडाइरी ल्हानान रथदेन तागदे छ्योड्मा खबा हड्बान आवाज खमुबा।* 10 थेनीगदेला मेःरी चा बिच्छीला हड्बान दुम मुबा। थेनीगदेला मेःरी म्हिगदेदा ला डाधोना दुख पिन्बा शक्ति मुबा। 11 थेनीगदेदा शासन लबा ग्ले चा ल्हानान नुपबा व्हाडला दूत मुबा। थे दूतला मिन हिब्रू ग्योइरी एबाड्डोन मुबा ओच्छे ग्रीक ग्योइरी अपोल्लियोन मुबा।†

12 दुख गिक निसी जिन्जी। तर च्यागो, दोःसी अझ दुख न्ही खबारी बाँकी मुला।

13 डुरेमला स्वर्गदूतसे हाडला बिगुल हापमा डाइ परमेश्वरला डाच्छा मुबा म्हरला धूप म्राबा ग्लाला कुनी बलिग्याम चुहड्भिबा काइ थेःजी।* 14 थे बिगुल हापबा डुरेमला स्वर्गदूतदा चुहड्भिबा डाइ थेःजी, “यूफ्रेटिस भिबा घेन स्योडरी खीसी थान्बा स्वर्गदूत बलिदा बलसी पिन्गो।” 15 चुनोन धुइ, चुनोन धिनकुनु, चुनोन ला, चुनोन दिडला लागिरी ठीक लसी थान्बा थे स्वर्गदूत बलिदा जम्बुलिडरी मुबा म्हिगदेला भो सोमरी भो गिकदा साइबाला लागिरी पुड्बा हिन्ना। 16 थेरी ताथोरी क्रेःबा सिपाहीगदे गाते मुला भिबा तामएनोन डादा पाड्जी। थेरी ताथोरी क्रेःसी खबा सिपाहीगदे बोगल गिक करोड मुबा।

17 डाइ म्राड्बा तादेन ताथोरी क्रेःबा सिपाहीगदे चुहड्बा मुबा, थेनीगदेला कुरी क्वान्बा ढालगदे चा मे हड्बान वाला ओच्छे पिड्गैदेन गन्धक हड्बान उर मुबा। थे तागदेला थोबो च्यानना हड्बान मुबा। थेनीगदेला सुड्ग्याम मे, म्युगुदेन गन्धक थोन्मुबा। 18 थेनीगदेला सुड्ग्याम थोन्बा मे, म्युगुदेन गन्धकला आपत विपत सोमग्याम जम्बुलिडरी मुबा भो सोम न्हडला भो गिक म्हिगदे साइजी। 19 तिग्दा भिसम थे तागदेला सुड्देन मेःरी शक्ति मुबा। थेनीगदेला मेः चा बिख मुबा पुखीला थोबो हड्बान मुबा। ओच्छे थेनीगदेसे म्हिगदेदा मेःदेन थोबोसे पोर तना लमुबा।

20 तर चुहड्बा आपत विपतग्याम आसिना जोगब तबा म्हिगदेसे हाड हाडसे लबा आज्यबा गे ख्लासी परमेश्वरपट्टि आदोःनी। ओच्छे थेनीगदेसे म्हड म्हुडदेन म्राड्आखम्बा, थेःआखम्बा, भ्रआखम्बा म्हर, म्हुइ, काँस, युड्बादेन सिड्ग्याम सहोबा मूर्तिगदेदा तेन्बा आख्लानी।* 21 थेहड् लसीन थेनीगदेसे म्हि साइबा, टुनामुना लबा, स्य्हान्दोदेन छ्याम ब्रेल्सी भ्रबादेन य्हो लबा हड्बा आज्यबा गेगदे ख्लासी परमेश्वरपट्टि आदोःनी।

10

रिल्सी थान्बा जजाबा किताबला मुठा थोबा स्वर्गदूत

† 9:1 चु पदरी “ल्हानान नुपबा व्हाड” भिबा चा म्हड म्हुड चिबा ग्ला हिन्ना (लूका ८:३१; रोमी १०:७; उन्बा ९:२, ११; ११:७; १७:८; २०:१, ३)। * 9:2 उत्प १९:२८ * 9:3 प्रस्था १०:१२-१५ * 9:4 इज १:४ * 9:6 अय्यूब ३:२१; यर्मि ८:३ * 9:7 योए २:४ * 9:8 योए १:६ * 9:9 योए २:५ † 9:11 चु मिनना अर्थ चा नाश लबा म्हि हिन्ना। * 9:13 प्रस्था ३०:१-३ * 9:20 भजन ११५:४-७; १३५:१५-१७; दानि ५:२३

1 जमाहेन्से डाइ स्य्हान्दो शक्तिशाली स्वर्गदूत गिक स्वर्गग्याम फापबान लबा म्राड्जी। थेसे खसुला क्वान क्वान्बा मुबा, ओच्छे थेला थोबारी लरक्युड मुबा। थेला ली धिनी हडबान मुबा, ओच्छे काड चा मेला ल्हाम हडबान मुबा। 2 ओच्छे थेला यारी ब्लसी थान्बा जजाबा किताब मुबा। थेसे हाडला दाहिने काड समुन्द्ररी ओच्छे देब्रे काड सरी थान्सी राप्जी। 3 थे स्वर्गदूत च्यान ड्हाबा हड लसी घेन काडरी क्रिड्जी। ओच्छे थेसे चुहड लसी क्रिड्मा गोर निस मु गुडुडबासे पाड्जी। 4 थे थे:मैछ्याम डाइ भिबारी छ्याड्मुबा। तर स्वर्गग्याम “गोर निस मु गुडुडबासे पाड्बा ताम थाभ्रिउ, तर चु ताम एला सेमरी थान्गो” भिबा डाइ थे:जी।

5 ओच्छे हाडला काड समुन्द्रदेन सरी थान्सी राप्बा थे शक्तिशाली स्वर्गदूतसे हाडला दाहिने या स्वर्गपट्टि थीजी।* 6 ओच्छे स्वर्ग, जम्बुलिडदेन समुन्द्र सहोबा ओच्छे थेरी मुबा जम्मान सहोबा सदन सोसी चिबा परमेश्वरला मिनरी घान फाबान थे स्वर्गदूतसे चुहड भिसी भिजी, “दाहेन्से आघड, 7 तर निसरेमला स्वर्गदूतसे हाडला बिगुल हापबारी छ्याड्बा धुडरी परमेश्वरसे हाडला गे लबा अगमवक्तागदेदा सुड्बा म्हिसे था आयाड्बा ताम पूरा तला।”

8 जमाहेन्से डाइ थे:बा स्वर्गग्याम खबा थे काडसे दो:सी डादा चुहड भिसी भिजी, “निउ! समुन्द्ररीदेन सरी काड थान्सी राप्बा थे स्वर्गदूतला यारी मुबा ब्लसी थान्बा थे किताब किन्गो।”*

9 ओच्छे डाइ थे स्वर्गदूत मुबा ग्लारी निसी थे रिल्सी थान्बा किताबला मुठा हीजी। जमाहेन्से थेसे डादा “ना, चु चउ! एला सुडरी खुदु हड्दोन केकेला। तर चु ग्लोड्माहेन्से एला फो न्होड्ना लला” भिसी भिजी। 10 थे स्वर्गदूतला याग्याम डाइ थे रिल्सी थान्बा किताबला मुठा किन्सी चजी। थे चमा डाला सुडरी खुदु हड्दोन केकेजी, तर चसी जिन्माहेन्से कम्सी डाला फो न्होड्जी। 11 जमाहेन्से थेसे डादा “एसे ल्हानान म्हिगदे, ल्हानान य्हुल, ल्हानान य्हुल्सा, ल्हानान ग्योइदेन ल्हानान ग्लेगदेला बारेरी परमेश्वरसे उन्बा ताम दो:सी पाड्तो:ला” भिसी पाड्जी।

11

परमेश्वरला गे म्राड्बा न्ही

1 जमाहेन्से डादा दपबा सहे हडबान माला कडी गिक पिन्जी। ओच्छे थेसे डादा चुहड भिसी भिजी, “रे:सी परमेश्वरला मन्दिरदेन थेरी धूप म्राबा ग्ला दपगो। ओच्छे थेरी पूजा लबा म्हि गाते चीम झ्यागो।”* 2 तर परमेश्वरला मन्दिरला खाडग्गा चा थादपगो। तिग्दा भिसम थे ग्ला चा अर्गु य्हुलला म्हिगदेदा पिन्बा मुला। थेनीगदेसे बोगल न्हीसे ला न्हीधोना परमेश्वरला शहररी रजाई लला।* 3 ओच्छे डाला गे स्य्हान्दो म्हिदा उन्बा म्हि न्हीदा हजार गिकसे ग्यार्जा न्हीसे बोगल सोम धिनधोना बोराला क्वान क्वान्सी परमेश्वरला ताम पाड्बा अधिकार पिन्ना।”

4 डाला गे स्य्हान्दो म्हिदा उन्बा न्ही चा जम्बुलिड नाडनोन शासन लबा प्रभुला डाच्छापट्टि मुबा जैतूनना दोड न्हीदेन नाडसल थान्बा ग्ला न्ही हिन्ना। 5 चुदे खालै शत्रुसे थेनीगदेदा न्होड्ना लबारी म्हाड्जी भिसम थेनीगदेला सुडग्याम थोन्बा मेसे थेनीगदेला शत्रुदा नाश लला। थेतबासेलमा चुदे खालै म्हिसे थेनीगदेदा न्होड्ना लबारी म्हाड्जी भिसम थेनीगदेदाएनोन थेहड लसीन साइला। 6 थेनीगदेसे परमेश्वरसे उन्बा ताम पाड्बा धुड्धोना नाम थाखगै भिसी मु हुड्बादेन क्युड्दा काधोना लबा शक्ति थेनीगदेदेन छ्याम मुला। ओच्छे थेनीगदेसे म्हन्बा धुडरी जम्बुलिडरी थरी थरीला आपत विपत तना लबा शक्तिएनोन थेनीगदेदेन छ्याम मुला।*

7 थेनीगदेसे परमेश्वरसे उन्बा ताम पाड्सी जिन्माहेन्से ल्हानान नुपबा व्हाडग्याम थोन्सी खबा लोड्बा खबा जनतुसे थेनीगदेदेन छ्याम लडाइ लसी थेनीगदेदा भ्रेना लसी साइला।* 8 थेनीगदेला लास थेनीगदेला प्रभुदा क्रुसरी टांगब लसी साइबा ग्लाला घेन शहरला ग्यामरीन थान्ना। थे शहर चा सदोमदेन मिश्र य्हुल्सा हडबान हिन्ना।* 9 जम्मान य्हुल्साला म्हिगदे, जम्मान वंशला

* 10:5 प्रस्था २०:११; व्यव ३२:४०; दानि १२:७; आमो ३:७ * 10:8 इज २:८-३:३ * 11:1 इज ४०:३; जक २:१-२ * 11:2 लूका २१:२४ * 11:6 १ राजा १७:१; प्रस्था ७:१७-१९; १ शमू ४:८ * 11:7 दानि ७:७, २१; उन्बा १३:५-७; १७:८ * 11:8 यशै १:९-१०

म्हिंगदे, जम्मान ग्योइ पाड्बा म्हिंगदेदेन जम्मान य्हलला म्हिंगदेसे थेनीगदेला लास सोमरेसे धिन गडसालधोना च्याला। ओच्छे थेनीगदेला लास ल्हुआपुड।¹⁰ चु न्हीदा साइबा म्राड्सी जम्बुलिडला म्हिंगदे ताड्सी हाड हाड न्हडरी गिकसेम गिकदा उपहार पिन्बा किन्बा लला। तिग्दा भिसम चु अगमवक्ता न्हीसे जम्बुलिडला म्हिंगदेदा ल्हानान दुख पिन्बा मुबा।

¹¹ तर सोमरेसे धिन गडसल तमाहेन्से जुनी पिन्बा सा परमेश्वरग्याम खसी थेनीगदे न्हडरी वाड्जी। ओच्छे थेनीगदे सिबाग्याम सोसी डोड रे:जी, थे म्राड्सी म्हिंगदे ल्हानान लोड्जी।* ¹² जमाहेन्से थे अगमवक्ता न्हीसे स्वर्गग्याम “तोर खउ” भिबा घेन काइ थे:जी। जमाहेन्से थेनीगदेला शत्रुगदेसे च्यान च्यानान थेन्नी खसु न्हडग्याम तबान स्वर्गरी निजी।*

¹³ थेनोन धुइरी घेन सडगुल खसी शहरला भो च्युइला भो गिक दिमगदे नाश लजी। थे सडगुल खमा हजार निस म्हिंगदे सिजी। ओच्छे आसिबा म्हिंगदेसे चा ल्हानान लोड्सी स्वर्गरी धन्छ्याबा परमेश्वरदा मानदेन जयजयकार लजी।*

¹⁴ न्हीरेमला आपत विपत निसी जिन्जी। तर च्यागो, सोमरेमला आपत विपत योनान खला।

निसरेमला बिगुल

¹⁵ ओच्छे निसरेमला स्वर्गदूतसे हाडला बिगुल हाप्जी। थेसे हाडला बिगुल हाप्मा स्वर्गरी घेन घेन काइगदेरी चुहड् भिसी भिबान मुबा,
“दाहेन्से जम्बुलिडथोरी शासन लबा अधिकार य्हाडला परमेश्वरदेन थेसे धम्बा थार्बा पिन्बा स्त्रीष्टलान हिन्ना।

थेसे सदनना लागिरी शासन लला।”*

¹⁶ जमाहेन्से परमेश्वरला डाच्छा हाड हाडला ठिरी चिबा थे बोगल गिकसे गोर बलि गन्बागदेसे परमेश्वरदा फ्या लसी जयजयकार लजी। ¹⁷ ओच्छे थेनीगदेसे चुहड् भिसी भिजी,
“जम्मान भन्दा घेन परमप्रभु परमेश्वर,

हाड डाच्छाएनोन मुबा ओच्छे दान्देनोन मुला।
हाडदा उन्ना ल्हानान धन्यवाद मुला।

तिग्दा भिसम हाडसे हाडला घेन अधिकार किन्सी
शासन लबारी छ्याइबा मुला।

¹⁸ य्हल य्हलला म्हिंगदेदा[†] ल्हानान बोमो खबा मुबा,
तर दाहेन्से हाडदाएनोन बोमो खबा धुइ तबा मुला।

दाहेन्से सिबागदेला निसाफ लबा धुइएनोन तबा मुला,
ओच्छे हाडसे हाडला गे लबा अगमवक्तागदेदेन हाडला म्हिंगदे,
ओच्छे हाडदा मान लबा जजा घेन जम्मान म्हिंगदेदा
इनाम पिन्बा धुइएनोन तबा मुला,

ओच्छे जम्बुलिड नाश लबागदेदा नाश लबा धुइएनोन तबा मुला।”*

¹⁹ जमाहेन्से स्वर्गरी मुबा परमेश्वरला मन्दिर ठोड्जी। ओच्छे परमेश्वरसे लबा कबुल थान्बा सन्दोस म्राड्जी। जमाहेन्से तिप्लीड खसी गडडगुडुड भिसी मु ठेड्बा थे:जी। ओच्छे सडगुल निसी घेन घेन सेर्बा ताइजी।*

12

यूहन्नासे म्राड्बा म्रिडम्हेमेदेन अजिड्गर

¹ जमाहेन्से डाइ स्वर्गरी उदेकला चिनु गिक म्राड्जी। ओच्छे डाइ धिनी क्वान्बादेन काड धिरी लनी मुबा च्युक न्ही सारला मुकुट कूबा म्रिडम्हेमे गिक म्राड्जी। ² थे म्रिडम्हेमे जिउ न्हीला मुबा, ओच्छे बेथा याड्बासे लमा थे क्रिड्बान मुबा। ³ ओच्छे डाइ दो:सी स्वर्गरी उदेकला चिनु गिक

* 11:11 इज ३७:१० * 11:12 २ राजा २:११ * 11:13 उन्बा ६:१२; १६:१८ * 11:15 प्रस्था १५:१८; दानि २:४४; ७:१४, २७
† 11:18 “य्हल य्हलला म्हिंगदे” भिबा चा अर्गु य्हलला म्हिंगदे हिन्ना। * 11:18 भजन २:५; ११०:५; ११५:१३ * 11:19 उन्बा ८:५; १६:१८-२१

म्राड्जी। च्यागो, गोर निस थोबोदेन गोर च्युइ रु मुबा वाला घेन अजिङ्गर गिक म्राड्जी। थेसे गोर निस मुकुट कूबा मुबा।* 4 थे अजिङ्गरला मेःसे मुला सारगदे भो सोम न्हडरी भो गिक सारदा पोप लसी जम्बुलिडरी भ्याङ्जी। ओच्छे कोला न्हमैछ्याम चतोःला भिसी थे अजिङ्गर कोला न्हबारी छ्याइबा थे म्रिडम्हेमेला डामरी राप्सी चिजी।* 5 थे म्रिडम्हेमेसे जम्बुलिडला जम्मान यहुलला म्हिगदेदा फाइला कडीसे शासन लबा झा गिक न्हजी। थे कोलादा परमेश्वर मुबा ग्लारी थीसी भोर्सी परमेश्वरला ठिरी थान्जी।* 6 जमाहेन्से थे म्रिडम्हेमे तोडतोडबा ग्लारी यार्जी। थेला लागिरी हजार गिकसे ग्यार्जा न्हीसे बोगल सोम धिनधोनाला लागिरी चबा थुड्बा लगै भिसी परमेश्वरसे थेदा ग्ला गिक ठीक लसी थान्बा मुबा।

7 ओच्छे स्वर्गरी लडाइ तजी। मिखाएलदेन[†] थेला दूतगदेसे थे अजिङ्गरदेन थेला दूतगदेदेन छ्याम लडाइ लजी। थेहड् लसीन अजिङ्गरदेन थेला दूतगदेसेनोन लडाइ लजी।* 8 तर अजिङ्गरदेन थेला दूतगदे भ्रेजी। जमाहेन्से थेनीगदेदा चिबाला लागिरी स्वर्गरी ग्ला आतनी। 9 थे अजिङ्गर चा दडबोला पुख्री हिनना। थेला मिन शैतान हिनना, थेदा म्हडला ग्लेएनोन भिमुला। थेसे जम्बुलिडला जम्मान म्हिगदेदा न्होङ्ना लबा मुबा। थेदेन थेला दूतगदेदान स्वर्गग्याम जम्बुलिडरी भ्याङ्जी।* 10 जमाहेन्से डाइ स्वर्गरी घेन काइसे चुहड् भिबा थेःजी,

“दाहेन्से यहडला परमेश्वरग्याम यहडसे याड्बा थार्बादेन शक्ति

ओच्छे परमेश्वरला यहुलसादेन थेसे धम्बा थार्बा पिन्बा खीष्टला अधिकार उन्बा मुला।

तिग्दा भिसम यहडला ज्योज्यो आले नाना आडागदेदा

धिन म्हुननोन परमेश्वरला डाच्छापट्टि दोष उन्बा

शैतानदा स्वर्गग्याम भ्याङ्बा मुला।*

11 थार्बा पिन्बा ग्यु बोगोला कादेन थेनीगदेसे पाड्बा सत्य बचन तबासे लमा थेनीगदेसे थेदा ढाबा मुला।

ओच्छे हाडला ज्याननोन पिन्बारी थेनीगदे तयार तबा मुबा।

12 थेतबासेलमा एनीगदे स्वर्गदेन स्वर्गरी मुबागदे जम्मान ताङ्गो!

तर जम्बुलिडदेन समुन्द्ररी मुबागदेदा गाते दुख तला!

तिग्दा भिसम शैतानसे हाड ल्हाना आसो भिबा ताम था याड्सी

थे ल्हानान बोमो खसी एनीगदे मुबा ग्लारी खबा मुला।”

13 थे अजिङ्गरसे हाडदा जम्बुलिडरी भ्याङ्जी भिबा ताम था याड्सी थे झा न्हबा म्रिडम्हेमेदा तापबारी छ्याइजी। 14 तर थे म्रिडम्हेमेदा तोडतोडबा ग्लारी फ्याड्सी निबाला लागिरी घेन ग्वाइला भ्याप पिन्जी। थे तोडतोडबा ग्ला चा थे म्रिडम्हेमेदा अजिङ्गरग्याम सोम दिडसे ला दुधोना[†] जोगब तसी चिबाला लागिरीदेन चबा थुड्बा लबाला लागिरी ठीक लसी थान्बा मुबा।* 15 थे म्रिडम्हेमेदा भाल बाढीसे भोर्गे भिसी थे अजिङ्गरसे सुडग्याम स्योड हड् लसी क्युइ पुइजी। 16 तर जम्बुलिडसे हाडला सुड आँ लसी थे अजिङ्गरला सुडग्याम थोन्बा स्योड ग्लोड्सी थे म्रिडम्हेमेदा जोगब लजी। 17 जमाहेन्से थे अजिङ्गर थे म्रिडम्हेमेदेन छ्याम झन ल्हानान बोमो खजी। ओच्छे परमेश्वरसे कुल्बा ताम ड्यानबादेन येशूसे लोपबा तामथोरी विश्वास लबा थे म्रिडम्हेमेला अर्गु सन्तानगदेदेन छ्याम लडाइ लबारी भ्रजी। 18 ओच्छे थे अजिङ्गर समुन्द्रला कुनीरी निसी राप्जी।

13

समुन्द्रग्याम थोन्सी खबा जन्तु

* 12:3 दानि ७:७ * 12:4 दानि ८:१० * 12:5 यशै ६६:७; भजन २:९ † 12:7 “मिखाएल” भिबा चा घेन स्वर्गदूत हिनना, थे चा स्यहानदो स्वर्गदूतगदेला कप्तान हिनना। * 12:7 दानि १०:१३, २१; १२:१; यहू ९ * 12:9 उत्प ३:१; लूका १०:१८ * 12:10 अय्यूब १:९-११; जक ३:१ † 12:14 ग्रीक बाइबल अन्छार सोम दिडसे ला दुधोना भिबा चा धुइ, धुइगदेदेन धुइ गडसल भिसी भिबा मुला। * 12:14 दानि ७:२५; १२:७

1 जमाहेन्से डाइ लोड्बा खबा जन्तु गिक समुन्द्रग्याम थोन्सी खबा म्राङ्जी। थे जन्तुला गोर च्युइ रुदेन गोर निस थोबो मुबा, ओच्छे थेला जम्मान रुरी गोर गिक गिक मुकुट मुबा। थेहड् लसीन थेला जम्मान थोबोरी परमेश्वरदा बिरोध लबा आज्यबा मिन भिबा मुबा। 2 थे लोड्बा खबा जन्तु चितुवा हड्बान मुबा। तर थेला काड तहुमला हड्बान मुबा ओच्छे सुड चा च्यानना हड्बान मुबा। थे अजिङ्गरसे हाडला शक्तिदेन हाडला ठि ओच्छे घेन अधिकार थे जन्तुदा पिन्जी।* 3 थे लोड्बा खबा जन्तुला थोबोगदे न्हडला थोबो गिकरी चा घेन पोर तबा हड्बान म्राङ्मुबा, थे पोरसे लमा थे सिबारी छ्याइबा मुबा, तर थे पोर खम्जी। जमाहेन्से जम्बुलिङला जम्मान म्हिगदे उदेक तसी थे जन्तुला लिच्छा लिच्छा भ्रजी। 4 थे अजिङ्गरसे हाडला अधिकार थे लोड्बा खबा जन्तुदा पिन्बा म्राङ्सी म्हिगदेसे थे अजिङ्गरदा तेन्जी। ओच्छे म्हिगदेसे “चु जन्तु हड्बा अर्गु खाल मुला? चुदेन छ्याम खाल छेबारी खम्ला?” भिबान थे जन्तुदाएनोन तेन्जी।

5 थे लोड्बा खबा जन्तुदा परमेश्वरला बिरोध लबा ताम पाङ्पुङ्जी। ओच्छे थेदा तिग लइ म्हन्बा थेनोन लबारी बोगल न्हीसे ला न्हीधोना अधिकार पिन्जी।* 6 थे लोड्बा खबा जन्तुसे परमेश्वरला बिरोधरी ताम पाङ्जी। परमेश्वरला मिनदेन थे धन्छ्याबा ग्ला ओच्छे स्वर्गरी परमेश्वरदेन छ्याम चिबागदेला बिरोध लजी। 7 थे लोड्बा खबा जन्तुदा परमेश्वरला म्हिगदेदेन लडाइ लसी ढाबारी खम्बा शक्ति पिन्बा मुबा। ओच्छे जम्मान वंशदेन म्हिगदे ओच्छे थरी थरीला ग्योइगदेदेन य्हुलगदेथोरी शासन लबा अधिकार पिन्बा मुबा।* 8 जम्बुलिङ स्होबा भन्दा डाच्छान जुकजुकधोनाला जुनीला किताबरी मिन आरेबा जम्बुलिङला जम्मान म्हिगदेसे थे लोड्बा खबा जन्तुदा तेन्ना। थे किताब चा साइबा थार्बा पिन्बा ग्यु बोगोला मुबा।*

9 जुन म्हिदा ड्यानबा सेम मुला,

थेसे ड्यानसी ज्यना लसी घोउ।

10 खालै म्हिदा झ्याल्खानरी झाङ्तोःबा मुसम

थेदा झ्याल्खानरी झाङ्नोन झाङ्ला।

ओच्छे खालै म्हि तरवारग्याम सितोःबा मुसम

थे तरवारग्यामसेन सिला।

थेतबासेलमा परमेश्वरला म्हिगदेदेन छ्याम गाते नाखम्बा शक्तिदेन विश्वास ततोःला भिबा ताम चुग्यामसेन था तला।*

जम्बुलिङग्याम थोन्बा जन्तु

11 ओच्छे डाइ जम्बुलिङग्याम थोन्सी खबा अर्गु लोड्बा खबा जन्तु गिकएनोन म्राङ्जी। थे लोड्बा खबा जन्तुला ग्युला हड्बान रु न्ही मुबा। तर थेसे अजिङ्गरसे हड् लसी ताम पाङ्मुबा। 12 चु लोड्बा खबा जन्तुसे समुन्द्रग्याम थोन्बा थे डाच्छाला लोड्बा खबा जन्तुला लागिरी हाडला अधिकारग्याम जम्बुलिङला जम्मान म्हिगदेदा थे घेन पोर म्हाबा डाच्छाला लोड्बा खबा जन्तुदा तेन्पुङ्जी। 13 जम्बुलिङग्याम थोन्बा थे लोड्बा खबा जन्तुसे जम्मान म्हिला डाच्छा मुग्याम जम्बुलिङरी मे ताइना लसी घेन घेन चिनुगदे उन्जी। 14 थेसे थे समुन्द्रग्याम थोन्बा लोड्बा खबा जन्तुला लागिरी उदेकला चिनुगदेग्याम जम्बुलिङला जम्मान म्हिगदेदा फसब लजी। ओच्छे तरवारसे थासी घेन पोर तसीनोन सोबा थे लोड्बा खबा जन्तुदा मान लबाला लागिरी थेला मूर्ति गिक स्होउ भिसी जम्बुलिङग्याम थोन्बा थे लोड्बा खबा जन्तुसे जम्मान म्हिगदेदा कुल्जी। 15 थे जम्बुलिङग्याम थोन्बा जन्तुदा थे डाच्छा थोन्बा जन्तुला मूर्तिसे ताम पाङ्खमगै ओच्छे थेला मूर्तिदा आतेन्बा म्हिगदेदा साइगै भिसी थे मूर्तिरी सा युबा अधिकार पिन्जी। 16 ओच्छे थे जम्बुलिङग्याम थोन्बा जन्तुसे जजा मुसै घेन मुसै, फ्युकपो मुसै प्राडबो मुसै, नोकर हिनसै नोकर आहिनसै जम्मादान हाड हाडला दाहिने यारी तसै डोरी तसै चिनु लपुङ्जी। 17 थे चिनु आलबा म्हिगदेसे चा तिगै सहे ग्लुबा

* 13:2 दानि ७:४-६
४३:११

* 13:5 दानि ७:८, २५; ११:३६

* 13:7 दानि ७:२१

* 13:8 भजन ६९:२९

* 13:10 यर्मि १५:२;

चूड्बा लआम्याड्मुबा। थे चिनु चा समुन्द्रग्याम थोन्बा जन्तुला मिन अथवा थेला मिनदा घोबा अङ्क हिनना।

18 चु ताम घोबाला लागिरी ज्ञान बुद्धि तोःला, जुन म्हिदेन घोखम्बा शक्ति मुला थेसे थे समुन्द्रग्याम थोन्बा जन्तुला अङ्कला अर्थ घोखम्गै। तिग्दा भिसम थे अङ्क म्हि गिकला मिनग्याम थान्बा हिनना। थे अङ्क चा ६६६ हिनना।

14

थार्बा याड्बागदेसे गोबा व्हाइ

1 दोःसी डाइ च्यामा सियोन गडरी थार्बा पिन्बा ग्यु बोगो राप्सी चिबा मुबा। थेदेन छ्याम लाख गिकसे बोगल न्हीसे हजार बलि म्हिगदे मुबा। थे म्हिगदेला डोरी थेदेन थेला आबाला मिन भिबा मुबा।* 2 ओच्छे डाइ स्वर्गग्याम छाँगारी क्युइ ताइबा हड्बादेन मु गुडुड्बा हड्बान आवाज थेःजी। थे आवाज चा ल्हानान वीणा भिबा बाजा ह्यापमा थोन्बा आवाज हड्बान थेःमुबा। 3 थे लाख गिकसे बोगल न्हीसे हजार बलि म्हिगदे चा मुल ठिदेन गोर बलि छोन्बो जन्तु ओच्छे गन्बागदेला डाच्छापट्टि राप्सी छार व्हाइ गिक गोजी। चु व्हाइ चा थेनीगदेसे जे था याड्बारी खम्मुबा। तिग्दा भिसम थेनीगदेदा जे सय फासी जम्बुलिङ्ग्याम तेःबा मुबा। 4 थेनीगदे खालै म्निङ्कोलागदेदेन छ्याम आब्रेल्बा कन्याकेटा दोसी चिबा मुबा। थेनीगदे थार्बा पिन्बा ग्यु बोगोसे कुल्बा अन्छार भ्रमुबा। जम्बुलिङ्गला म्हिगदे न्हड्ग्याम थेनीगदेदा जे सय फासी तेःबा मुबा ओच्छे परमेश्वरदेन थार्बा पिन्बा ग्यु बोगोला लागिरी जम्मान भन्दा डाच्छा फुल्बा भेटी थेनीगदेन मुबा। 5 थेनीगदेसे लुसीला ताम तिगैनोन लबा आरेबा, ओच्छे थेनीगदे तिगै दोष आरेबा म्हि मुबा।*

गोर सोम स्वर्गदूत

6 जमाहेनसे डाइ मुरी फ्याड्बान लबा स्यहान्दो स्वर्गदूत गिकदा म्नाड्जी। थे जम्बुलिङ्गरी मुबा जम्मान य्हुलसाला म्हिगदे, जम्मान वंशला म्हिगदेदेन थरी थरीला ग्योइ पाड्बा म्हिगदेदेन य्हुल य्हुलला म्हिगदेदा जुकजुकधोनाला जुनी पिन्बा समाचार थेःना लबारी खबा मुबा। 7 थेसे घेन काइग्याम चुहड् भिसी भिजी, “परमेश्वर म्नाड्सी लोङ्गो, ओच्छे थेदा मानदेन जयजयकार लउ। तिग्दा भिसम परमेश्वरसे जम्मान म्हि य्हुलला निसाफ लबा धुइ तसी जिन्बा मुला। थेतबासेलमा स्वर्गदेन जम्बुलिङ्ग ओच्छे समुन्द्रदेन क्युइला मुलगदे स्होबा परमेश्वरदा तेन्गो।”

8 ओच्छे स्यहान्दो स्वर्गदूत गिकएनोन थेनोन स्वर्गदूतला लिच्छा लिच्छा चुहड् भिबान खजी, “थे घेन बेबिलोन शहर नाश तबा मुला! हिनना नाश तबा मुला। थेनोन शहरसे जम्मान य्हुल य्हुलला म्हिगदेदा स्यहान्दोदेन छ्याम ब्रेल्पुड्सी निङ्गुसे ड्य्होइबा हड्गोन तना लजी।”*

9 थे स्वर्गदूत न्हीला लिच्छा लिच्छा स्यहान्दो स्वर्गदूत गिकएनोन घेन काइरी चुहड् भिबान खजी, “चुदे खालै म्हिसे थे समुन्द्रग्याम थोन्बा जन्तुदेन थेला मूर्तिदा तेन्सी डोरी अथवा यारी थेला चिनु थान्जी भिसम, 10 थेदाएनोन परमेश्वरसे हाडला बोगोग्याम घेन सजाय पिन्ना, थेनीगदेदा परमेश्वरला स्वर्गदूतगदेदेन थार्बा पिन्बा ग्यु बोगोला डाच्छापट्टि मेदेन गन्धकरी भ्याड्सी सजाय पिन्ना।* 11 ओच्छे थेनीगदेदा सजाय पिन्बा मेला म्युगु सदन तोरपट्टि निला। जुन जुन म्हिसे थे समुन्द्रग्याम थोन्बा जन्तुदेन थेला मूर्तिदा तेन्सी थेला मिन मुबा चिनु थान्ना थेनीगदेसे धिन म्हुननोन सजाय नातोःला।”* 12 परमेश्वरसे कुल्बा ताम ड्यान्बादेन येशूदा विश्वास लबा परमेश्वरला म्हिगदे चा खाहड् लसी नासी विश्वास आखलाना चितोःला भिबा ताम चुग्यामसेन था तला।

13 ओच्छे डाइ स्वर्गग्याम चुहड् भिबा काइ थेःजी, “चु भिसी थान्गो, दाहेनसे प्रभुदा विश्वास लसी सिबागदे परमेश्वरग्याम मोलम याड्बागदे हिनना।” परमेश्वरला आत्मासे चुहड् भिसी सुड्बा मुला, “हिनना, थेनीगदे हाड हाडसे लबा गेदेन दुखग्याम फेबा मुला ओच्छे थेनीगदेसे लबा गे अन्छारला इनाम याड्ला।

* 14:1 इज ९:४; उन्बा ७:३

* 14:5 सप ३:१३

* 14:8 यशै २१:९; यर्मि ५१:८; उन्बा १८:२

* 14:10 यशै ५१:१७; उत्प

१९:२४; इज ३८:२२

* 14:11 यशै ३४:१०

जम्बुलिडला बाली खन्बा धुइ

14 ओच्छे डाइ परमेश्वरसे पुइखबा म्हि हड्बान म्हि गिक तार खसुथोरी धन्छ्याबा म्हाङ्गी। थेसे म्हरला मुकुट कूबा मुबा। थेला यारी छ्यार्बा हडसु गिक मुबा।* 15 जमाहेन्से परमेश्वरला मन्दिर न्हड्ग्याम स्य्हान्दो स्वर्गदूत गिक खसी खसुरी धन्छ्याबादा घेन काइसे चुहड् भिसी भिजी, “हाडला हडसुसे बाली खन्गो। तिग्दा भिसम जम्बुलिडला जम्मान बाली खन्बा धुइ तसी जिन्बा मुला।”*

16 जमाहेन्से खसुथोरी धन्छ्याबासे जम्बुलिडथोरी हाडला हडसु चलब लसी जम्बुलिडला जम्मान बाली खन्जी।

17 थेहड् लसीन स्वर्गरी मुबा परमेश्वरला मन्दिर न्हड्ग्याम स्य्हान्दो स्वर्गदूत गिक एनोन मड्ग्यार खजी। थेदेन छ्यामएनोन छ्यार्बा हडसु गिक मुबा। 18 जमाहेन्से मेथोरी अधिकार मुबा स्य्हान्दो स्वर्गदूत गिक धूप म्हाबा ग्लाग्याम थोन्जी। ओच्छे हडसु थोबा स्वर्गदूतला छ्यार्बा हडसुसे जम्बुलिडला अडगुर थुउ,† तिग्दा भिसम जम्बुलिडला अडगुर मिन्सी जिन्बा मुला” भिसी घेन काइसे पाङ्गी। 19 जमाहेन्से थे स्वर्गदूतसे जम्बुलिडथोरी हाडला हडसु चलब लसी जम्बुलिडला जम्मान अडगुर थुसी ग्ला गिकरी पोप लजी। ओच्छे थे अडगुरदा परमेश्वरसे सजाय पिन्बा कोलरी भ्याङ्गी। 20 थे अडगुरदा शहरला मड्ग्यारपट्टि मुबा कोलरी म्हर्जी। थे कोलग्याम ओस्पन मिटर नाङ्से गडसल नुप्बा† ओच्छे ग्यार्जा सोम किलोमिटर हेड्बा काला स्योड थोन्बा मुबा।*

15

गोर निस स्वर्गदूतगदे

1 डाइ स्वर्गरी उदेकला घेन अर्गु चिनु गिक म्हाङ्गी। थेरी आपत विपत गिक गिक थोसी चिबा गोर निस स्वर्गदूतगदे मुबा। चु चा जम्मान भन्दा लिच्छाला आपत विपत मुबा। तिग्दा भिसम परमेश्वरसे पिन्बा जम्मान भन्दा लिच्छाला सजाय चुनोन मुबा। 2 डाइ डाला डाच्छापट्टि मेदेन सिसा दोङ्बा समुन्द्र हड्बान सहे म्हाङ्गी। ओच्छे समुन्द्रग्याम थोन्बा जन्तुदेन थेला मूर्ति ओच्छे थेला मिनग्याम थान्बा अङ्कथोरी ढाबागदे जम्मादान म्हाङ्गी। थेनीगदे हाड हाडला यारी परमेश्वरसे पिन्बा वीणा थोसी थे समुन्द्रला कुनीरी राप्सी चिबा मुबा। 3 थेनीगदेसे चुहड् भिसी परमेश्वरदा तेन्बा म्हि मोशादेन थार्बा पिन्बा ग्यु बोगोला व्हाइ गोबान मुबा,
“परमप्रभु परमेश्वर हाड जम्मान भन्दा घेन हिन्ना,
हाडला गे ल्हानान घेनदेन उदेकला मुला,
ओच्छे जम्बुलिडला जम्मान य्हलला म्हिगदेथोरी
सदन शासन लबा ग्ले हाडनोन हिन्ना,
हाडसे लबा गेगदे सत्यदेन ठीक मुला।”*

4 परमप्रभु हाड म्हाङ्गी आलोङ्बा म्हि खाल मुला?

ओच्छे हाडदा मान लसी जयजयकार आलबा म्हि खाल मुला?

तिग्दा भिसम हाड जे जम्मान भन्दा चोखो मुला।

जम्मान य्हलला म्हिगदेसे हाडदा तेन्ना,

तिग्दा भिसम हाडसे ठीक निसाफ लबा जम्मासेन म्हाङ्बा मुला।”*

5 जमाहेन्से डाइ स्वर्गरी परमेश्वरला मन्दिर ठोङ्बा म्हाङ्गी, ओच्छे मन्दिर न्हडला जम्मान भन्दा चोखो ग्लाएनोन म्हाङ्गी।* 6 थे मन्दिर न्हडग्याम गोर गिक गिक आपत विपत थोबा गोर निस स्वर्गदूतगदे थोन्सी खजी। थेनीगदेसे सफादेन य्हाल य्हाल्बा क्वान क्वान्बा मुबा, ओच्छे कुरी म्हरला फित्ता खीबा मुबा। 7 जमाहेन्से थे गोर बलि छोन्बो जन्तुगदे न्हडला गिकसे थे गोर निस स्वर्गदूतगदेदा सदन सोबा परमेश्वरला बोमोसे प्लिङ्बा गोर गिक गिक म्हरला खोरे पिन्जी।

* 14:14 दानि ७:१३ * 14:15 योए ३:१३ † 14:18 चु पदरी “अडगुर” भिबा चा परमेश्वरदा विश्वास आलबा म्हिगदे हिन्ना।

† 14:20 मिटर नाङ्से गडसल नुप्बा भिबा चा ग्रीक बाइबल अन्छार सहेन्से दप्पा ताला सुडधोना दोमुबा। * 14:20 यशै ६३:३;

विल १:१५; उन्बा १९:१५ * 15:3 प्रस्था १५:१ * 15:4 यर्मि १०:७; भजन ८६:९ * 15:5 प्रस्था ३८:२१

8 ओच्छे परमेश्वरला य्हालदेन शक्तिग्याम थोन्बा म्युगुसे मन्दिर प्लिङ्जी। जमाहेन्से थे गोर निस स्वर्गदूतगदेसे थोबा गोर निस आपत विपत आजिन्तेधोना खालैनोन मन्दिर न्हडरी वाड्बारी आखमनी।*

16

परमेश्वरला बोमोसे प्लिङ्बा गोर निस खोरे

1 जमाहेन्से डाइ परमेश्वरला मन्दिर न्हडग्याम घेन काइरी थे गोर निस स्वर्गदूतगदेदा चुहङ् भिसी कुल्बा थे:जी, “एनीगदे निउ, ओच्छे परमेश्वरला बोमोसे प्लिङ्बा थे गोर निस खोरे जम्बुलिङ्थोरी ल्हूगो।”

2 जमाहेन्से स्वर्गदूत गिक निसी हाडदेन छ्याम मुबा खोरे जम्बुलिङ्थोरी ल्हूजी। थेतबासेलमा थे समुन्द्रग्याम थोन्बा जन्तुला चिनु थान्बादेन थेला मूर्तिदा तेन्बा म्हिगदेदा ल्हानान सहु खबादेन नइबा खबा पोर थोन्जी।*

3 ओच्छे न्हीरेमला स्वर्गदूतसे हाडदेन छ्याम मुबा खोरे समुन्द्ररी ल्हूजी। ओच्छे समुन्द्रला क्युइ सिबा महिला का हड्बान दोजी। थेतबासेलमा समुन्द्ररी मुबा जम्मान छोन्बो जन्तुगदे सिजी।

4 ओच्छे सोमरेमला स्वर्गदूतसे हाडदेन छ्याम मुबा खोरे स्योडदेन क्युइला मुहानरी ल्हूजी। जमाहेन्से जम्मान क्युइ का दोजी।* 5 जमाहेन्से डाइ क्युइला अधिकार याड्बा स्वर्गदूतसे चुहङ् भिबान लबा थे:जी, “हाड तिगै दोष आरेबा परमेश्वर हिन्ना, हाड डाच्छाएनोन मुबा, दान्देनोन मुला। हाडसे लबा निसाफ ठीक मुला। 6 हाडसे पुइखबा अगमवक्तागदेदेन हाडदा तेन्बा म्हिगदेदा थेनीगदेसे साइबासे लमा हाडसे थेनीगदेदा कानोन थुङ्पुङ्सी थेनीगदेसे याड्तो:बा सजाय पिन्बा मुला।” 7 जमाहेन्से डाइ धूप म्नाबा ग्लाग्याम चुहङ् भिबा थे:जी, “परमप्रभु परमेश्वर, हाड जम्मान भन्दा घेन परमेश्वर हिन्ना, हाडसे लबा निसाफ सत्यदेन ठीक मुला।”

8 जमाहेन्से ब्लिरेमला स्वर्गदूतसे हाडदेन छ्याम मुबा खोरे धिनीरी ल्हूजी। ओच्छे धिनीग्याम थोन्बा मेला हड्बा रापसे म्हिगदेदा क्रोना लपुङ्जी। 9 मेला हड्बा धिनीला रापसे म्हिगदे क्रोजी, ओच्छे थे आपत विपतगदेदा तहरी थान्बा परमेश्वरदा म्हिगदेसे के:जी। तर थेनीगदे हाड हाडला पाप ख्लासी परमेश्वरपट्टि दो:सी परमेश्वरदा मानदेन जयजयकार आलनी।

10 डारेमला स्वर्गदूतसे हाडदेन छ्याम मुबा खोरे थे समुन्द्रग्याम थोन्बा जन्तुला† ठिथोरी ल्हूजी। ओच्छे थेला यहुल्सा धोपधोप तजी। जमाहेन्से थेनीगदेसे सहु सहेरसे लमा स्वा क्रेजी।* 11 थेनीगदेदा तबा सहु सहेरदेन पोरसे लमा थेनीगदेसे स्वर्गरी धन्छ्याबा परमेश्वरदा बिरोध लजी। तर थेनीगदे हाड हाडसे लबा आज्यबा गे ख्लासी परमेश्वरपट्टि आदो:नी।

12 डुरेमला स्वर्गदूतसे हाडदेन छ्याम मुबा खोरे यूफ्रेटिस भिबा घेन स्योडरी ल्हूजी। जमाहेन्से स्यारग्याम खबा ग्लेगदेदेन थेला सिपाहीगदेदा भ्रबारी ग्याम तगै भिसी थे स्योड खर्जी।* 13 जमाहेन्से डाइ अजिङ्गरदेन थे जम्बुलिङ्ग्याम थोन्बा जन्तु ओच्छे लुसीला ताम पाड्बा अगमवक्ताला सुङ्ग्याम भाल्बा हड्बान गोर सोम म्हडगदे थोन्बा म्नाङ्जी। 14 थे आज्यबा आत्मागदे चा उदेकला चिनुगदे उन्बा म्हडगदे हिन्ना। जम्मान भन्दा घेन परमेश्वरसे निसाफ लबा धिनकुनु थे आत्मागदे परमेश्वरदेन छ्याम लडाइ लबाला लागिरी जम्बुलिङ्गला जम्मान ग्लेगदेदा पोप लबारी निला।

15 “च्यागो, डा य्हो खबा हड् लसी खालैदा था आयाङ्ना लसी खला। जुन म्हि छोर्सी चिसी हाडला क्वान हाडदेन छ्याम थान्ना थे परमेश्वरग्याम मोलम याड्बा म्हि हिन्ना। थेहड् लसी हाडला क्वान जोगब लसी थान्बा म्हि लिगन्डी भ्रआतो:। ओच्छे म्हिगदेला डाच्छापट्टि पे:आतो:।”† 16 ओच्छे

* 15:8 प्रस्था ४०:३४; १ राजा ८:१-११; २ इति ५:१३-१४; यशै ६:४ * 16:2 प्रस्था ९:१० * 16:4 प्रस्था ७:१७-२१; भजन ७८:४४ † 16:10 थे समुन्द्रग्याम थोन्बा जन्तु चा शैतानना ग्ले हिन्ना। * 16:10 प्रस्था १०:२१ * 16:12 यशै ११:१५ † 16:15 चु पदला ताम प्रभु येशूसे सुड्बा हिन्ना, (मत्ती २४:४३-४४; लूका १२:३९-४०; उन्बा ३:३ सहीगो)।

थे म्हडगदेसे जम्बुलिडला जम्मान ग्लेगदेदा ग्ला गिकरी पोप लजी। थे ग्लादा हिब्रू ग्योइरी आर-मागेडुनां भिमुबा।*

17 ओच्छे निसरेमला स्वर्गदूतसे हाडदेन छ्याम मुबा खोरे लाबाथोरी लहूजी। जमाहेन्से मन्दिरला ठिग्याम “दाहेन्से जिन्जी” भिबा घेन काइ खजी। 18 जमाहेन्से तिप्लीड खबादेन मु ठेड्बा ओच्छे घेन घेन काइ खजी, ओच्छे घेन सडगुल खजी। थेहड्बा घेन सडगुल मी जम्बुलिडरी म्हि ठुड्बा धिनहेन्से दान्देधोना खाइमै खबा आरेबा। 19 जमाहेन्से थे घेन बेबिलोन भिबा शहर भो सोम तसी फेजी, ओच्छे जम्मान युहुल्साला शहरगदे नाश तजी। परमेश्वरसे थे घेन शहर बेबिलोनला पाप ढन्जी, ओच्छे हाडला घेन बोमोग्याम थे शहरदा सजाय पिन्जी।* 20 जमाहेन्से समुन्द्रला गुडरी मुबा जम्मान ग्लागदेदेन जम्मान गडगदे म्हाजी। 21 ओच्छे मुग्याम म्हिगदेथोरी ओस्पन बोगल न्ही किलोला सेर्बा ताइबारी छ्याइजी। चुहड्बा सेर्बा ताइसी आपत विपत तबासे लमा म्हिगदेसे परमेश्वरदा केःबारी छ्याइजी। तिग्दा भिसम चु ल्हानान लोड्बा खबा आपत विपत मुबा।

17

ल्हानान बेश्या गे लसी भ्रबा म्रिडम्हेमे

1 थे गोर निस खोरे थोबा गोर निस स्वर्गदूतगदे न्हडला गिक डा मुबा ग्लारी खसी डादा चुहड् भिजी, “चुरी खउ, डाइ एदा ल्हानान स्योडगदेला कुनीरी चिबा जम्मासेन डोसेबा बेश्या म्रिडम्हेमेसे याड्बा सजाय उन्ना। थे बेश्या म्रिडम्हेमे ल्हानान स्योडगदेला कुनीरी मुबा घेन बेबिलोन शहर हिनना।* 2 जम्बुलिडला ग्लेगदे थे बेश्या म्रिडम्हेमेदेन छ्याम ब्रेल्बा मुला। ओच्छे जम्बुलिडला म्हिगदे थेदेन छ्याम ब्रेल्सी अडगुरला निडगुसे ड्य्होइबा हड्बोन तबा मुला।*

3 जमाहेन्से डा परमेश्वरला आत्मासे प्लिड्जी। ओच्छे थे आत्मारी स्वर्गदूतसे डादा तोडतोडबा ग्लारी भोजी। थेरी डाइ वाला जन्तुथोरीं क्रेःबा म्रिडम्हेमे गिक म्राड्जी। थे जन्तुला गोर निस थोबो मुबा ओच्छे गोर च्युइ रु मुबा। थे जन्तुला जिउ नाडनोन परमेश्वरदा बिरोध लबा मिनगदे भ्रिबा मुबा।* 4 थे म्रिडम्हेमेसे चा वाला वाला पिडगैदेन वाला क्वान क्वान्बा मुबा। ओच्छे म्हर, रत्नदेन मोतीगदे क्वान्सी ज्योबा मुबा। थेसे हाडला यारी म्हरला खोरे गिक थोबा मुबा। थे खोरे चा थेसे लबा नइबा तामदेन थे स्य्हान्दोदेन छ्याम ब्रेल्सी भ्रबा नइबा खबा तामगदेसे प्लिड्बा मुबा।* 5 थे म्रिडम्हेमेला डोरी, “जम्बुलिडला बेश्यागदेदेन नइबा खबा तामगदेला आमा घेन बेबिलोन शहर” भिसी म्हिसे था आयाड्बा मिन गिक भ्रिबा मुबा। 6 ओच्छे डाइ थे म्रिडम्हेमे परमेश्वरला म्हिगदेदेन येशूला लागिरी हाडला ज्याननोन पिन्बा म्हिगदेला का थुड्सी ड्य्होइबा म्राड्जी।

थे म्रिडम्हेमेदा म्राड्सी डा ल्हानान उदेक तजी। 7 जमाहेन्से थे स्वर्गदूतसे डादा चुहड् भिजी, “ए तिग्दा उदेक म्हन्बा? थे म्रिडम्हेमेदेन थेदा पुइबा गोर निस थोबादेन गोर च्युइ रु मुबा जन्तुला बारेरी म्हिसे था आयाड्बा ताम डाइ एदा पाड्ला। 8 एसे म्राड्बा थे जन्तु डाच्छा मुबा, तर दान्दे आरे। सदनना लागिरी नाश तबारी थे ल्हानान नुप्बा व्हाडग्याम तोर खबारी छ्याइबा मुला। जम्बुलिड छ्यामाहेन्से जुकजुकधोनाला जुनीला किताबरी मिन आभ्रिबा जम्बुलिडला म्हिगदे थे जन्तुदा म्राड्सी उदेक म्हन्ना। तिग्दा भिसम थे जन्तु डाच्छा मुबा, दान्दे सिसी जिन्बा मुला। तर थे दोःसी सोला।*

9 “चु ताम घोबारी ज्ञान बुद्धि तोःला। थे जन्तुला गोर निस थोबो चा थे म्रिडम्हेमे चिबा गड निस हिनना। 10 थे गोर निस ग्लेगदेएनोन हिनना, थेनीगदे न्हडरी गोर डा ग्लेगदे नाश तसी जिन्जी, गिक चा दान्देधोना शासन लबान मुला। ओच्छे स्य्हान्दो गिक चा अझ खबा आरे। थे खमाहेन्से ला न्ही सोमला लागिरी जे थेसे शासन लला। 11 थे जन्तु डाच्छा सोबान मुबा, तर दान्दे सिसी जिन्बा मुला।

† 16:16 “आर-मागेडुनां” भिबा चा मेगोडु भिबा गड हिनना। ओन्मा थे गडरी ल्हानान लडाइ तबा मुबा। * 16:16 २ राजा २३:२९; न्याय ५:१९; जक १२:११ * 16:19 यशै ५१:१७ * 17:1 यर्मि ५१:१३ * 17:2 यशै २३:१७; यर्मि ५१:७ † 17:3 वाला जन्तुदेन समुन्द्रग्याम थोन्बा लोड्बा खबा जन्तु ओस्पन तखम्ला। उन्बा १३:१ सहीगो। * 17:3 उन्बा १३:१ * 17:4 यर्मि ५१:७ * 17:8 दानि ७:७; उन्बा ११:७; भजन ६९:२८

थे जन्तु चा भेःरेमला ग्ले हिन्ना। थे जन्तुएनोन गोर निस ग्लेगदे न्हडला ग्ले गिक हिन्ना। तसैनोन थे नाश तला।

12 “एसे म्राड्बा थे गोर च्युइ रु चा ग्ले च्युइ हिन्ना। तर थेनीगदेसे दान्देधोना शासन लम्याड्बा आरे। थेनीगदेसे थे जन्तुदेन छ्याम तिगै धिनना लागिरी शासन लम्याड्बा।* 13 थे ग्लेगदेला सेम गिकनोन मुला। थेतबासेलमा थेनीगदेसे हाड हाडला शक्तिदेन अधिकार थे जन्तुदा जिम्मा पिन्ना। 14 थेनीगदेसे थार्बा पिन्बा ग्यु बोगोला बिरोध लसी लडाइ लला। तर थार्बा पिन्बा ग्यु बोगोसे थेनीगदेशोरी ढाला। तिग्दा भिसम थे प्रभुगदेला प्रभु ओच्छे ग्लेगदेलाएनोन ग्ले हिन्ना। थेदेन छ्याम मुबागदे चा थेसे ड्योइबागदेदेन धम्बागदे ओच्छे थेदा विश्वास लबागदे हिन्ना।”

15 थे स्वर्गदूतसे डादा दोःसी चुहड् भिसी पाड्जी, “एसे म्राड्बा थे बेश्या चिबा स्योडगदे चा यहुल यहुलदेन यहुल्सा ओच्छे थरी थरीला ग्योइ पाड्बा म्हिगदे हिन्ना। 16 एसे म्राड्बा गोर च्युइ रुदेन थे वाला जन्तुसे थे बेश्यादा हेला लला। ओच्छे थेदेन छ्याम मुबा जम्मान सहे ब्यन्सी थेदा लिगन्डीन लसी थेला स्या चला। ओच्छे थेला नखुगदे मेसे ख्राड्सी नाश लला। 17 तिग्दा भिसम थेनीगदेदा परमेश्वरसे हाडसे महन्बा अन्छार पूरा लबा सेम पिन्बा मुबा। थेतबासेलमा परमेश्वरसे सुड्बा बचन पूरा आततेधोना थेनीगदे सेम गिकलान तसी हाडसे शासन लबा शक्तिदेन अधिकार थे लोड्बा खबा जन्तुदा पिन्जी। 18 एसे म्राड्बा थे म्रिड्महेमे चा जम्बुलिडला ग्लेगदेशोरी शासन लबा घेन शहर हिन्ना।”

18

बेबिलोन शहर नाश तबा

1 जमाहेन्से डाइ स्यहान्दो स्वर्गदूत गिक स्वर्गग्याम मार फाप्वान लबा म्राड्जी। थेदेन छ्याम घेन अधिकार मुबा। ओच्छे थेला य्हालदेन शक्तिसे लमा जम्बुलिड नाडनोन य्हाल य्हाल तजी। 2 थे स्वर्गदूतसे घेन काइरी चुहड् भिसी भिजी,

“थे शहर नाश तजी! थे घेन शहर बेबिलोन नाश तजी,

थे घेन शहर शैतानदेन थेला दूतगदे चिबा दिम दोबा मुला,

ओच्छे जम्मान नइबा आत्मागदेदेन चरागदे चिबा ग्ला दोजी।* ”

3 तिग्दा भिसम स्यहान्दोदेन छ्याम ब्रेल्सी भ्रबा थेला आज्यबा गेसे लमा

जम्मान यहुलला म्हिगदे अडगुरला निडगुसे ड्य्होइबा हड्णोन तबा मुला।

ओच्छे जम्बुलिडला ग्लेगदे थेदेन छ्याम ब्रेल्बा मुला,

थेला थेहड्बा ब्रेल्सी भ्रबा सेमसे लमा जम्बुलिडला व्यापारीगदे फ्युकुपो दोबा मुला।”*

4 जमाहेन्से डाइ स्वर्गग्याम चुहड् भिवान लबा अर्गु काइ थेःजी,

“डाला म्हिगदे, एनीगदे थे ग्लाग्याम थोन्सी खउ।

आहिन्सम थेसे लबा पापरी एनीगदेएनोन परब तला,

ओच्छे थेसे याड्बा सजाय एनीगदेसेनोन नातोःला।* ”

5 तिग्दा भिसम थेसे पापथोरी पाप लबासे लमा थेला नइबा गेगदे स्वर्गधोनान धोबा मुला।

ओच्छे परमेश्वरसे थेसे लबा आज्यबा गेगदे ढन्बा मुला।* ”

6 थेसे एनीगदेदा तिग लबा मुला, थेदाएनोन एनीगदेसे थेहड्णोन लउ।

ओच्छे थेसे जुन गे लबा मुला एनीगदेसे थेदा थे भन्दा दोब्बर नाड फागो।

थेसे एनीगदेला लागिरी जुन सहे दोड्सी खोरेरी ठीक लबा मुबा

थे भन्दा ल्हाना खरो सहे एनीगदेसे थेदा पिन्गो।* ”

7 थेसे मोजमजा लसी जति मान याड्बा मुला,

ओतेन थेदा दुखदेन सुर्दा पिन्गो।

* 17:12 दानि ७:२४ * 18:2 यशै १३:२१; २१:९; यर्मि ५०:३९; ५१:८; उन्बा १४:८ * 18:3 यशै २३:१७; यर्मि ५१:७ * 18:4 यशै ४८:२०; यर्मि ५०:८; ५१:६, ४५ * 18:5 उत्प १८:२०-२१; यर्मि ५१:९ * 18:6 भजन १३७:८; यर्मि ५०:२९

तिग्दा भिसम थेसे घमण्ड लसी सेम न्हड न्हडरी चुहड् भिसी पाड्मुला।

‘डा ग्लेस्या दोसी चिबा मुला,
डा हेम्बो सिबा म्रिडम्हेमे आहिन।
थेतबासेलमा डाइ खाइमै सुर्दा लआतोः।’*

8 थेतबासेलमा तिरेरीन थेशोरी
कालदेन सुर्दा ओच्छे रोगदेन अनिकाल खला।

ओच्छे थेदा मेसे खाड्ला,
तिग्दा भिसम थेला निसाफ लबा परमप्रभु परमेश्वर
शक्तिशाली मुला।”

9 थेदेन छ्याम ब्रेल्बादेन मोजमजा लसी चिबा जम्बुलिडला ग्लेगदे थेदा क्रोबा मेला म्युगु म्राड्सी
क्राबा क्रिड्बा लला। 10 थेदा पिन्बा सजाय नाआतोःगै भिसी थेनीगदे लोड्सी थारेडनोन राप्सी चुहड्
भिजी,

“अम्मै गाते आज्यबा ताम,
परमेश्वरग्याम सजाय याड्बा घेन शक्तिशाली बेबिलोन शहर,
एसे लबा आज्यबा गेसे लमा ए छिन्नडरीन नाश तबा मुला।”*

11 जम्बुलिडला व्यापारीगदे थेला लागिरी क्राबा क्रिड्बा लला, तिग्दा भिसम थेनीगदेसे लबा
व्यापारला सामानगदे दोःसी खालैसेन आग्लु। 12 म्हर, म्हुइ, रत्न, मोतीदेन मलमलला क्वानगदे
वाला वाला पिड्गै छोनना क्वानगदे, रेशमला क्वानगदे, वाला क्वानगदे, जम्मान खाल्ला बासना
खबा सिड, हात्तीला स्वाग्याम सहोबा जम्मान सहेगदे, ल्हानान महंगो जम्मान सिड, काँसग्याम
सहोबा सहेगदे, फाइग्याम सहोबा सहेगदे, ओच्छे सिड्गमरमरग्याम सहोबा सहेगदे, 13 सिडकाउली,
मसला, बासना खबा धूप, मूर्, तार धूप, अडगुरला निड्गु, छ्युगु, ब्रा, ग्वा, म्हे, मुइ, ग्युगदे, तागदे,
रथगदे, नोकरगदेदेन लडाइरी भ्रेबा म्हिगदेदाएनोन खालैसेन आग्लु।*

14 थे व्यापारीगदेसे थेदा चुहड् भिसी भिजी, “बेबिलोन, एला सेमसे म्हनबा जम्मान सहेगदे एग्याम
ब्यन्बा मुला। ओच्छे एला धन सम्पत्तिदेन जम्मान झक्झक्बा सहेगदे नाश तसी जिन्बा मुला। दोःसी
एसे थे जम्मान सहे खाइमै आयाड्। 15 थे घेन शहररी व्यापार लसी धनी तबा व्यापारीगदे थेदा पिन्बा
घेन सजाय म्राड्सी लोड्सी थारेडनोन राप्सी चिला। ओच्छे चुहड् भिबान क्राबा क्रिड्बा लला,*

16 “अम्मै गाते आज्यबा ताम,
मलमलला क्वान, वाला वाला पिड्गैदेन वाला क्वान क्वान्बा
ओच्छे म्हरदेन रत्न ओच्छे मोतीगदे क्वान्सी ज्योबा मुबा।

17 तिग्दा भिसम छिन्नडरीन एला जम्मान धन सम्पत्ति नाश तबा मुला।”

जम्मान पानी जहाजला कप्तानदेन पानी जहाजरी भ्रबा म्हिगदे ओच्छे पानी जहाज चलब लबा
म्हिगदेदेन समुन्द्रग्याम व्यापार लबा म्हिगदे थारेडनोन राप्सी चिजी।* 18 ओच्छे थे घेन शहर
क्रोसी थोन्बा म्युगु म्राड्सी, “चुहड्बा घेन शहर हड्बा अर्गु खजिबै शहर आरेबा” भिसी क्रिड्जी।

19 थेनीगदेसे हाड हाडला थोबोरी धुलु युसी चुहड् भिबान क्रिड्जी,

“अम्मै गाते आज्यबा ताम,
थेरी मुबा धन सम्पत्तिग्याम पानी जहाजला धनीगदे फ्युक्पो दोबा मुबा।

तर थे शहर छिन्नडरीन क्रोसी नाश तजी।*

20 स्वर्गरी मुबागदे, थे नाश तबासे लमा एनीगदे ताड्गो!

परमेश्वरला म्हिगदे, मुल चेलागदेदेन अगमवक्तागदे,

एनीगदे जम्मान ताड्गो।

तिग्दा भिसम थेसे एनीगदेदा अन्याय लबासे लमा

* 18:7 यशै ४७:७-९ * 18:10 इज २६:१६-१७ * 18:13 इज २७:१२, १३, २२ * 18:15 इज २७:३१, ३६ * 18:17 इज
२७:२६-३० * 18:19 इज २७:३०-३४

परमेश्वरसे थेदा सजाय पिन्बा मुला।”*

21 जमाहेन्से शक्तिशाली स्वर्गदूत गिकसे हान्दा हड्बान घेन युडबा गिक थीसी चुहड् भिबान थे युडबा समुन्द्ररी भ्याड्जी,

“थे घेन शहर बेबिलोनदाएनोन चुहड् लसीन भ्याड्ला,

ओच्छे थेदा दोःसी खाइमै आम्राड्।”*

22 थेरी वीणादेन बाँसुरी ओच्छे बिगुलदेन

व्हाइ गोबागदेला काइ थेःआम्याड्।

थेरी जम्मान खाल्ला बुट्टा सहेड्बा म्हिगदेएनोन खाइमै आस्याप।

ओच्छे थेरी हान्दा ड्यबाएनोन खाइमै थेःआम्याड्।”*

23 थेरी खाइमै नाडसल आम्रा।

ओच्छे थेरी म्हाछारदेन चाडछारला काइएनोन खाइमै थेःआम्याड्।

तिग्दा भिसम एला व्यापारीगदे जम्बुलिडला घेन घेन म्हिगदे मुबा।

ओच्छे एला तन्त्रमन्त्रसे यूहुल यूहुलला म्हिगदेदा ठगब लबा मुबा।”*

24 थे शहररीन अगमवक्तागदे, परमेश्वरला म्हिगदेदेन

जम्बुलिडरी साइबा जम्मान म्हिगदेला का स्यापबा मुबा।”*

19

स्वर्गरी परमेश्वरला जयजयकार लबा

1 जमाहेन्से डाइ स्वर्गरी ल्हानान म्हिगदेसे घेन काइरी चुहड् भिसी क्रिड्बा थेःजी,
“परमेश्वरदा जयजयकार तगै!

थार्बा पिन्बादेन मान ओच्छे शक्ति य्हाडला परमेश्वरलान हिन्ना।

2 तिग्दा भिसम परमेश्वरसे लबा निसाफ सत्यदेन ठीक मुला।

स्य्हान्दोदेन छ्याम ब्रेल्सी जम्बुलिड नाडलान म्हिगदेदा न्होड्ना लबा थे घेन बेश्यादा परमेश्वरसे निसाफ लबा मुला।

ओच्छे हाडला गे लबागदेदा साइबासे लमा परमेश्वरसे थेदा सजाय पिन्जी।”*

3 थेनीगदेसे दोःसी घेन काइरी चुहड् भिजी,

“परमेश्वरदा जयजयकार तगै!

थे घेन शहर क्रोसी थोन्बा म्युगु सदन तोरपट्टि निला।”*

4 ओच्छे थे बोगल गिकसे बलि गन्बागदेदेन थे गोर बलि छोन्बो जन्तुगदेसे ठिरी धन्छ्याबा परमेश्वरदा फ्या लबान जयजयकार लजी। ओच्छे थेनीगदेसे क्रिड्बान चुहड् भिजी।

“आमेन!, परमेश्वरदा जयजयकार तगै!”

5 ठिग्याम घेन काइरी चुहड् भिबा थेःजी,

“परमेश्वरला गे लबादेन थे म्हाड्सी लोड्बागदे जजा घेन जम्मासेन

य्हाडला परमेश्वरला जयजयकार लउ।”*

6 जमाहेन्से डाइ महिला घेन हुलला काइदेन छाँगाग्याम ताइबा क्युइला आवाज ओच्छे घेन मु गुडुड्बा हड्बान आवाजरी चुहड् भिबा थेःजी,

“परमेश्वरदा जयजयकार तगै!

तिग्दा भिसम जम्मान भन्दा घेन परमप्रभु य्हाडला परमेश्वरसे शासन लबा मुला।”*

7 य्हाड ल्हानान ताड्सी परमेश्वरला मानदेन जयजयकार लड!

तिग्दा भिसम य्हाडदा थार्बा पिन्बा ग्यु बोगोला ब्याह लबा धिन खसी जिन्बा मुला।

* 18:20 व्यव ३२:४३; यर्मि ५१:४८ * 18:21 यर्मि ५१:६३-६४; इज २६:२१ * 18:22 इज २६:१३; यशै २४:८ * 18:23 यर्मि ७:३४; २५:१० * 18:24 यर्मि ५१:४९ * 19:2 व्यव ३२:४३; २ राजा ९:७ * 19:3 यशै ३४:१० * 19:5 भजन ११५:१३ * 19:6 इज १:२४; भजन ९३:१; ९७:१; ९९:१

ओच्छे थेला चाडछारएनोन ठीक तसी जिन्बा मुला।

8 चाडछारदा मलमलला य्हाल य्हाल्बा सफा क्वान पिन्सी जिन्जी।”

थे य्हाल य्हाल्बा मलमलला सफा क्वान चा

परमेश्वरला म्हिगदेसे लबा ज्यबा गे हिन्ना।

9 ओच्छे थे स्वर्गदूतसे डादा “एसे चु ताम भ्रिउ, थार्बा पिन्बा ग्यु बोगोला ब्याहला भोजरी निमतो याड्बा म्हिगदे चा परमेश्वरग्याम मोलम याड्बा म्हिगदे हिन्ना” भिसी भिजी। थेसे दोःसी डादा “परमेश्वरला सत्य बचनगदे चुनोन हिन्ना” भिसी भिजी।*

10 जमाहेन्से थेला काडरी फ्या लबाला लागिरी डा ख्लुप तजी। तर थेसे डादा चुहड् भिसी भिजी, “एसे डादा फ्या लबारी आत। डा चा एदेन एला ह्योगदेदेन छ्याम ओच्छे येशूला सत्य बचन ड्यान्बा म्हिगदे जम्मानदेन छ्याम परमेश्वरला गे लबा म्हि जे हिन्ना। थेतबासेलमा परमेश्वरदा जे फ्या लउ। तिग्दा भिसम अगमवक्तासे पाड्बाएनोन येशूला बारेरी पाड्बा सत्य बचन हिन्ना।

तार ताथोरी क्रेःसी निबा

11 डाइ स्वर्ग ठोड्बा म्राड्जी, च्यागो, थेरी तार ता गिक मुबा। थे ताथोरी क्रेःसी निबा महिला मिन चा विश्वास लखम्बादेन सत्य मुबा। थेसे लबा निसाफदेन लडाइ ठीक मुला।* 12 थेला मी मेला ल्हाम हड्बान मुबा, ओच्छे थेला थोबोरी ल्हानान मुकुट कूबा मुबा। थेला डोरी मिन गिक भ्रिबा मुबा, थे मिन थेदा बाहेक स्य्हान्दो खालैदान था आरेबा।* 13 थेसे कारी ब्लुम्बा क्वान क्वान्बा मुबा। थेला मिन “परमेश्वरला बचन” मुबा। 14 स्वर्गला सेनागदे मलमलला तार सफा क्वान क्वान्सी तार तागदेशोरी क्रेःसी थेला लिच्छा लिच्छा भ्रिजी। 15 थेला सुडग्याम छ्यार्बा तरवार थोन्जी, ओच्छे थेसे थे तरवार थोसी य्हल य्हलला म्हिगदेशोरी ढाला। थेसे फाइला कडी थोसी थेनीगदेशोरी शासन लला। ओच्छे कोलरी अडगुर नाड्सी म्हर्बा हड् लसी थेसे जम्मान भन्दा घेन परमेश्वरला घेन बोमोसे नाड्सी थेनीगदेदा म्हर्ला।* 16 थेसे क्वान्बा क्वानदेन काडसहुरी “ग्लेगदेला ग्लेदेन प्रभुगदेला प्रभु” भिसी भ्रिबा मुबा।

17 जमाहेन्से डाइ धिनीरी राप्सी चिबा स्वर्गदूत गिक म्राड्जी। थेसे मुरी फ्याड्बान लबा जम्मान चरागदेदा घेन काडरी चुहड् भिसी भिजी, “परमेश्वरसे ठीक लबा घेन भोज चबारी पोप तउ। 18 ग्लेगदेदेन कप्तानगदे ओच्छे शक्तिशाली म्हिगदे, तागदेदेन ताथोरी क्रेःबागदे, ओच्छे नोकर हिन्सै आहिन्सै, जजा, घेन जम्मालान स्या चबारी खउ।”*

19 जमाहेन्से डाइ थे समुन्द्रग्याम थोन्बा लोड्बा खबा जन्तुदेन जम्बुलिडला ग्लेगदे हाड हाडला सिपाही थोसी तार ताथोरी क्रेःबादेन थेला सिपाहीगदेदेन छ्याम लडाइ लबाला लागिरी पोप तबा म्राड्जी। 20 तर थे समुन्द्रग्याम थोन्बा लोड्बा खबा जन्तुदेन थे जन्तुला डाच्छापट्टि उदेकला गे लबा फट्टा अगमवक्तादा चुड्जी। उदेकला गे लसी थे फट्टा अगमवक्तासे थे जन्तुला छापदेन थेला मूर्तिदा पूजा लबा म्हिगदेदा फसब लबा मुबा। थे न्हीदा छोन्बोन गन्धकला लुड्बा मेला ग्योइरी भ्याड्जी।* 21 ओच्छे थे न्हीला जम्मान सिपाहीगदेदा चा ताथोरी क्रेःबाला सुडग्याम थोन्बा तरवारसे साइजी। ओच्छे चरागदेसे थेनीगदेला स्या जम्मान भ्रेन्ना चजी।

20

हजार गिक दिड

1 जमाहेन्से डाइ ल्हानान नुप्बा व्हाडला साँचोदेन घेन च्याल्दा गिक यारी थोसी स्वर्गग्याम मार फापबान लबा स्वर्गदूत गिकदा म्राड्जी। 2 थेसे अजिङ्गरदा चुड्सी च्याल्दासे हजार गिक दिडधोनाला लागिरी खीसी थान्जी। थे अजिङ्गर चा दडबोला पुखी म्हड म्हडला ग्ले शैतान हिन्ना।* 3 थे अजिङ्गरसे दाहेन्से य्हल य्हलला म्हिगदेदा फसब थालगै भिसी हजार गिक दिडधोनाला लागिरी

* 19:9 मत्ती २२:२-३ * 19:11 इज १:१; भजन ९६:१३; यशै ११:४ * 19:12 दानि १०:६ * 19:15 भजन २:९; यशै ६३:३; योए ३:१३; उन्बा १४:२० * 19:18 इज ३९:१७-२० * 19:20 उन्बा १३:१-१८ * 20:2 उत्प ३:१

स्वर्गदूतसे थेदा ल्हानान नुपबा व्हाडरी भ्याङ्सी थे व्हाडला प्रापरी ताल्चा लसी लाहा छाप लजी। ओच्छे हजार गिक दिड छ्योमाहेन्से थेदा ला न्ही सोमला लागिरी पुइतोःला।

4 जमाहेन्से डाइ ठिगदेदेन ठिथोरी धन्छ्याबागदे प्राङ्जी। थेनीगदेला निसाफ लबा अधिकार पिन्बा मुबा। ओच्छे डाइ येशूला सत्य तामदेन परमेश्वरला बचन थेःना लबासे लमा थोबो थासी साइबागदेला आत्मागदे प्राङ्जी। थेनीगदेसे थे समुन्द्रग्याम थोन्बा लोड्बा खबा जन्तुदेन थेला मूर्तिदा आतेन्बा मुबा ओच्छे डोदेन यारी थेला छापएनोन लबा आरेबा। थे आत्मागदे दोःसी सोजी ओच्छे हजार गिक दिडधोना ख्रीष्टदेन छ्याम शासन लजी।* 5 चुहड् लसी सिबाग्याम दोःसी सोबा चा चु डाच्छा रेम हिनना। अर्गु सिबागदे चा थे हजार गिक दिड आछ्योतेधोना आसोनी। 6 डाच्छारेम सिबाग्याम सोबागदे चा परमेश्वरग्याम मोलम याड्बागदेदेन हाडला लागिरी फेसी थान्बा म्हिगदे हिनना। थेनीगदेदा दोःसी कालला शक्तिसे तिगै लआखम। तर थेनीगदे परमेश्वरदेन ख्रीष्टला पूजा लबा म्हि दोला ओच्छे ख्रीष्टदेन छ्याम हजार गिक दिडधोना शासन लला।

सदनना लागिरी शैतान नाश तबा

7 हजार गिक दिड छ्योमाहेन्से शैतानदा च्युप्सी थान्बा ग्लाग्याम पुइला। 8 जमाहेन्से शैतान जम्बुलिड नाडलान गोग ओच्छे मागोग भिबा यहुलला यहुलला म्हिगदेदा फसब लबारी निला। शैतानसे लडाइ लबाला लागिरी थे यहुलला म्हिगदेदा ग्ला गिकरी पोप लला। थेसे पोप लबा म्हिगदे समुन्द्रला बालुवा तेनोन तला।* 9 थेला सेनागदेसे जम्बुलिड नाडलान परमेश्वरला म्हिगदेला पालगदेदेन परमेश्वरसे माया लबा शहरदा घेरब लजी। तर स्वर्गग्याम मे ताइसी थेला सेना नाश तजी। 10 यहुलला यहुलला म्हिगदेदा फसब लबा थे शैतानदा चा गन्धकला लुड्बा मेला घ्योइरी भ्याङ्जी। थेरी डाच्छान थे लोड्बा खबा जन्तुदेन लुसीला ताम पाड्बा अगमवक्तादा भ्याङ्बा मुबा। थेरी थेनीगदेसे धिन म्हुन सदन सजाय नातोःला।

जम्बुलिडला म्हिगदेला निसाफ

11 जमाहेन्से डाइ घेन तार ठि गिकदेन थे ठिथोरी धन्छ्याबादा प्राङ्जी। ठिथोरी धन्छ्याबाला डाच्छाग्याम मुदेन जम्बुलिड यार्जी ओच्छे दोःसी खानडएनोन आम्राङ्नी।* 12 डाइ घेन जजा जम्मान सिबागदे थे ठिला डाच्छापट्टि राप्सी चिबा प्राङ्जी। थेरी किताबगदे ठोड्सी थान्बा मुबा, ओच्छे अर्गु किताब गिकएनोन ठोड्जी। थे किताबला मिन चा जुकजुकधोनाला जुनी हिनना। थे जम्मान किताबगदेरी थेनीगदेसे लबा गेला बारेरी भिबा मुबा, थे गेगदे अन्छारनोन सिबागदेला निसाफ लजी। 13 समुन्द्रसे हाडदेन छ्याम मुबा सिबागदे दोःसी पिन्जी, कालदेन सिबा म्हिगदेला आत्मा चिबा ग्लासेनोन हाडदेन छ्याम मुबा सिबागदे दोःसी पिन्जी। ओच्छे थेनीगदे जम्मालान हाड हाडसे लबा गे अन्छार निसाफ लजी। 14 जमाहेन्से कालदेन सिबा म्हिगदेला आत्मा चिबा ग्लादा मेला घ्योइरी भ्याङ्जी। चु मेला घ्योइरी भ्याङ्बा चा दोःसी सिबा हिनना।* 15 जुन महिला मिन जुकजुकधोनाला जुनीला किताबरी आस्याप्नी थेदा मेला घ्योइरी भ्याङ्गला।

21

परमेश्वरसे जम्मान सहे छार सहोबा

1 जमाहेन्से डाइ छार मुदेन छार जम्बुलिड प्राङ्जी। तिग्दा भिसम डाच्छाला मुदेन जम्बुलिड म्हासी निबा मुबा, ओच्छे समुन्द्रएनोन आरेबा मुबा।* 2 ओच्छे डाइ परमेश्वरला शहर, छार यरूशलेम परमेश्वरग्याम स्वर्गहेन्से मार खबान लबा प्राङ्जी। थे यरूशलेम म्हाछारला लागिरी ज्योसी थान्बा चाडछार हड्बान मुबा।* 3 डाइ ठिग्याम चुहड् भिबा घेन काइ गिक थेःजी, “च्यागो, परमेश्वर म्हिगदेदेन छ्याम धन्छ्याबा मुला। परमेश्वर थेनीगदेदेन छ्याम धन्छ्याला ओच्छे थेनीगदे थेला म्हि तला। थेहड् लसीन थे हाडनोन थेनीगदेला परमेश्वर दोःसी थेनीगदेदेन छ्याम धन्छ्याला।* 4

* 20:4 दानि ७:९, २२ * 20:8 इज ७:२; ३८:२, ९, १५ * 20:11 दानि ७:९-१० * 20:14 उन्बा १:१८ * 21:1 यशै ६५:१७; ६६:२२; २ पत्रु ३:१३ * 21:2 यशै ५२:१; ६१:१०; उन्बा ३:१२ * 21:3 इज ३७:२७; लेवी २६:११-१२

4 थेसे थेनीगदेला जम्मान मीख्ली फ्यासी पिन्ना। ओचछे थेनीगदे दोःसी खाइमै आसि, खालैदान सुर्दा आत, खालैनोन आक्रा, ओचछे खालैदान तिगै दुखएनोन आत। तिग्दा भिसम डाचछाला तामगदे चा जम्मान म्हासी जिन्बा मुला।*

5 ठिरी धन्छ्याबासे डादा “च्यागो, डाइ जम्मान ताम छार सहोला” भिसी सुड्जी। थेसे दोःसीनोन डादा “चु ताम भिउ, तिग्दा भिसम चु तामगदे चा विश्वास लखम्बादेन सत्य मुला” भिसी सुड्जी।

6 परमेश्वरसे डादा चुहड् भिसी सुड्जी, “दाहेन्से जम्मान ताम पूरा तसी जिन्जी। अल्फादेन ओमेगा* डानोन हिन्ना, ओचछे शुरु लबादेन जिन्ना लबाएनोन डानोन हिन्ना। क्युइ फुइबागदेदा डाइ जुकजुकधोनाला जुनी पिन्बा क्युइला मुलग्याम ओहड् नोन थुड्बारी पिन्ना।* 7 जुन जुनसे ढाला थेसे डाग्याम चु जम्मान हक याड्ला। डा थेला परमेश्वर दोला ओचछे थे डाला झा दोला।* 8 तर लोड्बागदे, विश्वास आलबागदे, नइबा गे लबागदे, म्हि साइबागदे, स्यहान्दोदेन छ्याम ब्रेल्सी भ्रबागदे, टुनामुना लबागदे, मूर्तिदा तेन्बागदेदेन जम्मान लुसीला ताम पाड्बागदे चा गन्धकदेन लुड्बा मेला घ्योइरी नितोःला। चु मेला घ्योइरी निबा चा दोःसी सिबा हिन्ना।

छार यरूशलेम

9 जमाहेन्से थे जम्मान भन्दा लिच्छाला आपत विपतसे प्लिड्बा खोरे निस थोबा गोर निस स्वर्गदूतगदे न्हडला गिक खसी डादा “खउ, डाइ एदा चाडछार उन्ना, थे थार्बा पिन्बा ग्यु बोगोला मिड हिन्ना” भिसी भिजी। 10 जमाहेन्से डा परमेश्वरला आत्मासे प्लिड्जी। ओचछे थे स्वर्गदूतसे डादा नोबा गडरी भोर्सी परमेश्वरग्याम स्वर्गहेन्से मार फापबान लबा परमेश्वरला शहर यरूशलेम उन्जी।* 11 थे शहर परमेश्वरला घेन य्हालदेन शक्तिसे प्लिड्बा मुबा। ओचछे थे शहर चा ल्हानान बिल्लौरदेन रत्नगदे ओचछे स्फटिक हड्बान झकझक्बा मुबा। 12 थे शहरला क्युर्नोन च्युक न्ही प्राप थान्सी सहोबा घेन घेन नोबा पर्खाल मुबा। थे प्रापदडसेन गोर गिक गिक स्वर्गदूत मुबा। थे प्रापदडसेन इस्राएलला च्युक न्ही वंशला मिन भिबा मुबा।* 13 स्यारपट्टि प्राप सोम, झ्याडपट्टि प्राप सोम ल्होपट्टि प्राप सोम, न्हुपट्टि प्राप सोम मुबा। 14 थे शहरला पर्खालला जगरी ग्ला ग्लारी च्युक न्ही घेन घेन युड्बा थान्बा मुबा। थे युड्बादडसेन थार्बा पिन्बा ग्यु बोगोला च्युक न्ही मुल चेलागदे गिक गिकला मिन भिबा मुबा।

15 थे शहरदेन शहरला प्रापगदे ओचछे पर्खाल दप्बाला लागिरी डादेन छ्याम ताम पाड्बा स्वर्गदूतदेन छ्याम म्हरला दप्बा स्हे गिक मुबा।* 16 थे शहर चारपाटे मुबा। थे शहरला लम्बाइदेन चौडाइ च्योच्यो मुबा। थेसे थे दप्बा स्हेसे शहर दप्मा हजार न्हीसे ग्यार्जा बलि किलोमिटर मुबा। थे शहरला लम्बाइ, चौडाइदेन नोबा च्योच्यो मुबा। 17 स्वर्गदूतसे पर्खालएनोन दप्जी। म्हिगदेसे चलब लबा दप्बा स्हे अन्छार थे पर्खाल बोगल सोमसे मिटर डा ब्लाक्बा मुबा। चु दप्बा स्हे स्वर्गदूतलाएनोन हिन्ना। 18 थे पर्खाल बिल्लौरग्याम सहोबा मुबा। ओचछे शहर चा ज्यबा म्हरग्याम सहोबा मुबा। थे शहर सफा सिसा हड्बान य्हाल य्हाल्ला मुबा। 19 थे पर्खालला जगरी युबा थे घेन घेन युड्बारी ल्हानान थरीला महंगो रत्नगदे थान्बा मुबा। पर्खालला जगरी थान्बा थे घेन घेन युड्बारी रत्न गिक गिक थान्बा मुबा। जम्मान भन्दा डाचछा थान्बा युड्बारी चा बिल्लौर, जमाहेन्से अर्गु युड्बारी नीर, हरित रत्न, पन्ना, 20 थेहड् लसीन आनिक्स, लालमणि, पीतमणि, बेरूज, पुष्पराज, लसुने, नीलमणि, ओचछे जम्मान भन्दा लिच्छाला युड्बारी चा कटेला थान्बा मुबा।† 21 थे शहरला च्युक न्ही प्राप चा च्युक न्ही मोतीग्याम सहोबा मुबा। जम्मान प्रापगदे चा मोती गिक गिकग्याम सहोबा मुबा। थे शहरला ग्याम सफा सिसा हड्बान ज्यबा म्हरग्याम सहोबा मुबा।

22 डाइ थे शहर न्हडरी मन्दिर गिकनोन आम्राड्नी। तिग्दा भिसम थे शहरला मन्दिर चा जम्मान भन्दा घेन परमेश्वरदेन थार्बा पिन्बा ग्यु बोगो ह्वाड् नोन हिन्ना। 23 थे शहरदा य्हाल तना लबाला

* 21:4 यशै २५:८; ३५:१०; ६५:१९ * 21:6 उन्बा १:८ * 21:6 यशै ५५:१ * 21:7 २ शमू ७:१४; भजन ८९:२६-२७

* 21:10 इज ४०:२ * 21:12 इज ४८:३०-३५ * 21:15 इज ४०:३ † 21:20 २१:१९-२० चु पदरी ल्हानान रत्नगदेला मिन मुला। चु पदरी पाड्बारी म्हाइबा चा अर्गुन अर्गुन छोनना य्हालदेन ल्हानान य्हाल य्हाल्ला ओचछे झकझक्बा मुला भिसी पाड्बा हिन्ना।

लागिरी धिनीदेन लनी आतोः। तिग्दा भिसम परमेश्वरला य्हालदेन शक्तिसेन थे शहरदा य्हाल तना लमुला। थे शहरला नाडसल चा थार्बा पिन्बा ग्यु बोगो ह्वाडनोन हिन्ना।* 24 परमेश्वरला य्हालरीन य्हुल य्हुलला म्हिगदे भ्रला। ओच्छे जम्बुलिड नाडलान ग्लेगदेसे ह्वाड ह्वाडला धन सम्पत्तिदेन मान थे शहररी भला।* 25 थे शहरला प्रापगदे धिनीरी खाइमै आहुड्, तिग्दा भिसम थेरी म्हुन तनोन आत। 26 य्हुल य्हुलला म्हिगदेसे ह्वाड ह्वाडसे याड्बा मानदेन ल्हानान धन सम्पत्ति थे शहररी भला।* 27 तर नइबा तामगदे, आज्यबा पेःबा खबा गे लबागदेदेन लुसीला ताम पाड्बागदे तिगै लसीन थे शहररी वाड्आम्याड्। थार्बा पिन्बा ग्यु बोगोला जुकजुकधोनाला जुनीला किताबरी मिन मुबा म्हिगदे जे थे शहररी वाड्म्याड्ला।*

22

जुकजुकधोनाला जुनी पिन्बा स्योड

1 जमाहेन्से थे स्वर्गदूतसे डादा सफटिका ह्वाडबान झकझकबा जुकजुकधोनाला जुनी पिन्बा क्युडला स्योड उन्जी। थे स्योड परमेश्वरदेन थार्बा पिन्बा ग्यु बोगोला ठिग्याम थोन्जी।* 2 ओच्छे थे स्योड थे शहरला ग्यामला गुडग्याम तबान निबा मुबा। थे स्योडला कुनी न्हीरीन जुकजुकधोनाला जुनी पिन्बा दोड मुबा। थे दोडरी लाएनोनदडसे थरी थरीला रो रोमुबा। थेरी दिड गिकरी च्युक न्ही थरीला रो रोमुबा। थे दोडला भा चा य्हुल य्हुलला म्हिगदेदा खम्ना लबा मन मुबा।* 3 दाहेन्से थे शहररी मुबा खजिबै सहेदा परमेश्वरसे आकेः।†

परमेश्वरदेन थार्बा पिन्बा ग्यु बोगोला ठि थे शहररीन तला, ओच्छे थेला म्हिगदेसे थेदा तेन्ना।*

4 थेनीगदेसे परमेश्वरला स्य्हाल प्राड्ला, ओच्छे थेनीगदेला डोरी थेला मिन भ्रिबा तला। 5 थे शहररी दोःसी खाइमै म्हुन आत। थेनीगदेदा नाडसलदेन धिनीला य्हाल आतोः। तिग्दा भिसम परमप्रभु परमेश्वरनोन थेनीगदेला य्हाल दोला। ओच्छे थेनीगदेसे थेरी सदन शासन लला।*

6 स्वर्गदूतसे डादा चुहड् भिसी भिजी, “चु बचन विश्वास लखम्बादेन सत्य मुला। अगमवक्तागदेदा ह्वाडला आत्मा पिन्बा परमप्रभु परमेश्वरसे ह्वाडला गे लबा म्हिगदेदा योनान तबा तामगदे उन्बाला लागिरी स्वर्गदूत पुइखबा मुला।”

येशू योनान फेपखबान मुला

7 येशूसे चुहड् भिसी सुड्जी, “च्यागो, डा योनान खबान मुला! चु किताबरी भ्रिबा अगमवाणीला बचन अन्छार भ्रबागदे परमेश्वरग्याम मोलम याड्बागदे हिन्ना।”

8 चु जम्मान ताम थेःबादेन प्राड्बा डा यूहन्ना हिन्ना। डाइ चु जम्मान ताम थेःबादेन प्राड्माहेन्से डादा चु ताम उन्बा स्वर्गदूतदा फ्या लबारी डा कू तजी। 9 तर थेसे डादा चुहड् भिसी भिजी, “च्यागो, एसे चुहड् लबारी आत। डा मी एदेन एला ज्योज्यो आले अगमवक्तागदे ओच्छे चु किताबरी भ्रिबा ताम ड्यान्बागदे ह्वाडला परमेश्वरला गे लबा ह्यो जे हिन्ना। परमेश्वरदा जे फ्या लसी तेन्गो।”

10 जमाहेन्से थे स्वर्गदूतसे डादा चुहड् भिसी भिजी, “चु किताबरी भ्रिबा अगमवाणीला बचन आपाड्ना कुटिसी थाचिउ। तिग्दा भिसम चु जम्मान तामगदे तबारी छ्याइबा मुला। 11 नइबा गे लबा म्हिसे नइबान गे लसी चिगै, पेःबा खबा गे लबा म्हिसे पेःबा खबान गे लसी चिगै, ज्यबा गे लबा म्हिसे ज्यबा गे लसीन चिगै, ओच्छे तिगै दोष आरेबा म्हिसे तिगै दोष आरेबा गे लसीन चिगै।”*

12 येशूसे चुहड् भिसी सुड्जी, “च्यागो, डा योनान खबान मुला! डा इनामदेन सजाय भसी खला। जमाहेन्से डाइ जम्मान म्हिगदेदा थेनीगदेसे लबा गे अन्छार इनामदेन सजाय पिन्ना।* 13 अल्फादेन ओमेगा, डाच्छादेन लिच्छा ओच्छे शुरु लबादेन जिन्ना लबा डानोन हिन्ना।*

* 21:23 यशै ६०:१९-२० * 21:24 यशै ६०:३ * 21:26 यशै ६०:११ * 21:27 यशै ५२:१; इज ४४:९ † 22:1 “सफटिक” भिबा चा सिसा ह्वाडबान झकझकबा सफा सहे हिन्ना। * 22:1 इज ४७:१; जक १४:८ * 22:2 उत्प २:९; इज ४७:१२ † 22:3 चु पदरी “आकेः” भिबा चा सराप आयु भिबा हिन्ना। * 22:3 जक १४:११ * 22:5 यशै ६०:१९; दानि ७:१८ * 22:11 दानि १२:१० * 22:12 यशै ४०:१०; ६२:११; भजन २८:४; यर्मि १७:१० * 22:13 उन्बा १:८, १७; २:८; यशै ४४:६

14 “जुकजुकधोनाला जुनी पिन्बा दोडला रो चबा हक याड्बारीदेन शहरला म्नापगदेग्याम न्हडरी वाड्म्याङ्गै भिसी हाड हाडला क्वान खुबागदेा चा परमेश्वरग्याम मोलम याड्बागदे हिन्ना।*
 15 तर नगी हड्बा म्हिगदे, टुनामुना लबागदे, स्य्हान्दोदेन छ्याम ब्रेल्सी भ्रबागदे, म्हि साड्बागदे, मूर्तिदा तेन्बागदे, लुसीला ताम सेम निबागदेदेन लुसीला ताम अन्छार भ्रबागदे चा शहरला मड्ग्यार तला।

16 “डा येशूसे मण्डलीगदेरी मुबा जम्मादान चु तामगदे था तना लबाला लागिरी एनीगदे मुबा ग्लारी डाला दूत पुइखबा मुला। दाऊद ग्लेला मुल सन्तान डानोन हिन्ना। ओच्छे स्य्होला झक्झक्बा सारएनोन डानोन हिन्ना।”†*

17 परमेश्वरला आत्मादेन चाड्छारसे “फेप्खउ” भिसी भिला। जुन म्हिसे थे ताम थे:ला थेसेनोन “फेप्खउ” भिसी भिगै। जुन म्हिदा क्युइ फुइला थे खसी जुकजुकधोनाला जुनी पिन्बा क्युइ ओहड्णोन थुङ्गै।*

18 च्यागो, चु किताबरी भ्रिबा अगमवाणीला बचन थे:बा म्हिगदेदा डाइ पाड्ला।
 चुदे खालै म्हिसे चु किताबरी भ्रिबा तामरी अर्गु ताम काप्जी भिसम चु किताबरी भ्रिबा जम्मान आपत विपतगदे परमेश्वरसे थेदा काप्सी पिन्ना। 19 ओच्छे खालै म्हिसे चु अगमवाणीला किताबरी भ्रिबा बचनग्याम तिगै ताम ते:जी भिसम चु किताबरी भ्रिबा जुकजुकधोनाला जुनी पिन्बा दोडदेन परमेश्वरला शहरग्याम थेसे याड्तो:बा हक परमेश्वरसे थेग्याम ब्यन्ना।*

20 चु जम्मान तामगदे उन्बादेन सुड्बासे चुहड् भिसी सुड्बा मुला, “हिन्ना, डा योनान खबान मुला।”
 आमेन, फेप्खउ, प्रभु येशू।

21 परमेश्वरला जम्मान म्हिगदेदेन छ्याम प्रभु येशूला दयामाया तगै। आमेन।

† 22:14 “हाड हाडला क्वान खुबागदे” भिबा चा येशूदा विश्वास लसी येशूला काग्याम पापला दोष मेटब तबा म्हिगदे हिन्ना।

* 22:14 उत्प २:९; ३:२२ † 22:16 “स्य्होला झक्झक्बा सारएनोन डानोन हिन्ना” भिबा चा थार्बा पिन्बा ख्रीष्टसे हाडलान छार धुइ शुरु लला भिबा हिन्ना। * 22:16 यशै ११:१, १० * 22:17 यशै ५५:१ * 22:19 व्यव ४:२; १२:३२